


# GODOKONO WADE TABO



The New Testament in the Fly River dialect of the Tabo  
language of Papua New Guinea

**GODOKONO WADE TABO**  
**The New Testament in the Fly River dialect of the Tabo language of Papua New Guinea**

**Nupela Testamen long tokples Tabo (Fly River) long Niugini**

Copyright © 2006, 2023 The Bible Society of Papua New Guinea and Wycliffe Bible Translators, Inc.

Language: Tabo (Fly River) (Tabo)

Dialect: Fly River

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-03-04

---

PDF generated using Haiola and XeLaTeX on 5 Mar 2024 from source files dated 4 Mar 2024  
cbbd3ff2-0ca7-5896-b3fd-850bc0fd18b7

## Contents

FRT	1
Ma:t	3
Mak	81
Luk	126
Yon	208
Ali	269
Lom	347
1 Kol	390
2 Kol	436
Gal	465
Epe	480
Pil	495
Kol	504
1 Tes	513
2 Tes	521
1 Tim	526
2 Tim	539
Tai	547
Pai	552
Yu Epo	555
Ya:i	590
1 Pit	601
2 Pit	613
1 Yon	620
2 Yon	629
3 Yon	631
Yud	633
Awo	637
Kodakoda Tabono Magumu	678

# Godokono Wade Tabo

## Fly River Tabo

### *Godokono Wade Tabo*

The New Testament in the Fly River dialect of the Tabo language of Papua  
New Guinea  
[knvF]

© 2006, The Bible Society of Papua New Guinea and Wycliffe Bible  
Translators, Inc.

Print publication, 2006 by The Bible Society of Papua New Guinea

### **Me Kawo Bukano Iyaiya Egege Buka**

Oli Nopo Buka[tab]Gopogopo Mailo[tab]

Tagala Nopo Buka[tab]Gopogopo Mailo[tab]

### **Me Bukano Mabu Awokalimi Tabo**

Me buka ebe Fly Tabo epono bukala, ibi mabuma: ale me tabono iyaiya tanalo keyakeyapino Baibolo bukane oba:midalima: Ega:walo kalakala kawonomola, me atu tetelo ale Aramia Tabo epono buka ibi mabuma: atumu kosiyodilima:. Buka ka:la:mioledawa, a:ma:le me bukano unu tabo ma kunu uma:ta, ‘Godokono Wade Tabo, Ebete Ebena Oli Nopo Epatamo Diyatiya.’

Ebema: ale aimano kawo kalakalanomo Godotamo adipatema:, mabu ebena nilakapo magumulo ebete ebena ubi tanalo iyalo iyatiya me wade tanalo Tabo epatamo kosiyodiloma:. Me mabuma: 1987 ulamalo wagilimite, ebete iyaiya nanitabokobi midipi epetapino tepo magumuno woki eba wadipalatelelo ibino towetowe tabo gela tanalodo ega:walo ibino mani ikameo tanalodo atamo elawo ikaeamenaki, ale me woko nanitabonomolo kopoliyama:.

Ebema: modobola Godote me bukano woko osiyodilo tanalone kawo amama tanalonomo na:lawaenakomene, mabu nanitabola, “Ebate moto ete woko osiyodiloa:no, piyate ebe woko osiyodiloma: dowagelena iba:te nanitabo tanalo a:kuima:na:” (Oale 127.1). Ebema: kalakala kawonomola, Godote kebe woko iyalo dowagilimiya, ebete ebe wade woko ebena Tabo epagodolo eba osiyodilona, modobola iba:te me Igilo Buka ka:la:miole tanalodo ega:walo iyatulame tanalodo ibino nanitabokobi midi magumulo kodakodanomoma: neda:oma:na:.

### **English Preface**

This book is a translation of the New Testament into the Fly River dialect of the Tabo language of Papua New Guinea. It is being published simultaneously with the New Testament for the other half of the language, the speakers of the Aramia River dialect. The two dialects together presently comprise a total of about 3,400 speakers, most of whom live in villages located along the banks of the Aramia, Bamu, and Fly Rivers as well as Segero Creek.

We offer thanks to God who out of love for the Tabo people determined to give them this special gift. We are grateful to Him for the many, many individuals who, by their faithfulness in prayer and giving over the years, have enabled us to complete this work. Through them God has caused this portion of His Word to become a reality for the Tabo people in their heart language.

And so we dedicate this book to God for his eternal glory, for truly, “Unless He builds the house, its builders labour in vain” (Psalm 127.1). May He use the reading and the teaching of this Book of Life to continue building His house among the Tabo people, helping them not only to grow as a church in terms of numbers, but also in an ever increasing quality of faith.

## YA:SUKONO WADE TABO MA:TIYUTE AKULOLIYA

*Ya:sukono Mabu Epono Mailono Tanalo*

*Luk 3.23-38*

<sup>1</sup> Ya:su Kelisoko ebe Da:ibidikono walone gudula, ega:walo Da:ibidiko ebe A:ibalayamakono walone dawala, ebene me ebe Ya:sukono mabu epono mailono tanalola.

<sup>2</sup> A:ibalayamako tetene wagilimite Da:ibidiko teta:mo pemaiga, Ya:sukono mabu epono tanalo ma kunula —

A:ibalayamakono gudu Aisa:ketela.

Aisa:kekono gudu Ya:ikobotela.

Ya:ikobokono gudu Yudatela, wiyasiya Yudako kapiya kosiyodiliya:, ebene nani ega:walo ekaki epetapi eba:go nilukulinamiya.\*

<sup>3</sup> Yudakono gudi netewa Peleseko ega:walo Silako, ibino menoko Ta:imatela.

Peleseko gudu Esalonatela.

Esalonakono gudu Lamatela.

<sup>4</sup> Lamakono gudu Aminadabatela.

Aminadabakono gudu Nasonatela.

Nasonakono gudu Samonotela.

<sup>5</sup> Samonokono gudu Bowasetela, ebe guduno menoko La:iya:batela.

Bowasekono gudu Obedatela, ebe guduno menoko Lutitela.

Obedakono gudu Yesitela.

<sup>6</sup> Yesikono gudu Da:ibiditela, ebete Isalaela opono Kawo Elawodubuma: eda:nami.

Ebene Da:ibidiko tetene wagilimite Yekonayako teta:mo pemaiga, Ya:sukono mabu epo me ebe Yu epo Kawokawo Elawodubula, ibino mailono tanalo ma kunula —

Da:ibidikono gudu Solomonotela, ebe guduno menokote dopamo Ulayakono kamiyalema: eda:nami.

<sup>7</sup> Solomonokono gudu Liyobaumatela.

Liyobaumakono gudu Abayatela.

Abayakono gudu A:isatela.

<sup>8</sup> A:isakono gudu Yosapatatela.

Yosapatakono gudu Yolamatela.

Yolamakono gudu Usayatela.

<sup>9</sup> Usayakono gudu Yautamatela.

Yautamakono gudu A:iyasatela.

A:iyasakono gudu Esekayatela.

<sup>10</sup> Esekayakono gudu Ma:na:satela.

Ma:na:sakono gudu A:monatela.

A:monakono gudu Yausayatela.

<sup>11</sup> Yausayakono gudu Yekonayatela, wiyasiya ebe kapiya kosiyodiliya:, ebene ekaki epetapi eba:go nilukulinamiya. Yekonayako tetelo Ba:baloni

\* **1:2:** Buka ka:la:mioledawa, modobola a:ma: me tanalo niyatawa, Yu epo magumulo 12 gu tanebapiate ilukulinamiya, iba:te Ya:ikobokono 12 dubu guda:godone maimiya.

gowelaopiate pelamete Isalaela opo epo elawamo puwatete ibino Ba:baloni oponomamo ebo magataliya.

<sup>12</sup> Ebene gowelaopiate ibi Ba:baloni opamo demagataliya, ebe tetene wagilimite Yausepeko teta:mo pemaiga, Ya:sukono mabu epono tanalo ma kunula —

Yekonayakono gudu Siyatiyelatela.

Siyatiyelakono gudu Selababelatela.

<sup>13</sup> Selababelakono gudu Abiyudatela.

Abiyudakono gudu Elayakimitela.

Elayakimikono gudu A:isotela.

<sup>14</sup> A:isokono gudu Sa:idokatela.

Sa:idokakono gudu A:ikimitela.

A:ikimikono gudu Eliyudatela.

<sup>15</sup> Eliyudakono gudu Eliyesatela.

Eliyesakono gudu Ma:ta:natela.

Ma:ta:nakono gudu Ya:ikobotela.

<sup>16</sup> Ya:ikobokono gudu Yausepetela. Yausepeko ebe Ma:likono awila ega:walo Ma:lite Ya:suko alaimiya, ebe gudu epate Godokono Alibodawa Kelisoma: ka:minaka.

<sup>17</sup> Ebema: Ya:sukono mabu epono tanalo ma kunula. A:ibalayamakono tetene wagilimite Da:ibidikono teta:mo pemaiga 14 epola, ega:walo Da:ibidikono tetene wagilimite gowelaopiate epo Ba:baloni opamo demagataliya ebe teta:mo pemaiga 14 epola, ega:walo Ba:baloni tetene wagilimite Kelisokono teta:mo pemaiga 14 epola.

### *Ya:su Kelisokono Awokala Tanalo*

#### *Luk 2.1-7*

<sup>18</sup> Ebene Ya:su Kelisote keba kunu kawokaliyale, me ebe tanalola. Ebena menoko Ma:liko Yausepetamo natamiya, ebene iba:te kapiyama: eda:no, Ma:lite dopamo iyatawiya ebete Godokono Uliyanamo lamituma: eda:te gudu kalaimimene. <sup>19</sup> Ebena awi Yausepeko ebe wade tuputupudawanomola. Ebema: ebete Ma:liago kapiyama: eda:no ebete ebena lamituma: eda: tanalo diyatawiya, ebe tetelo ebe ubila Ma:liko gelebadiago alibutima:, mabu ebe ubia:nola epono ololo apulo ebetamo ilipo ikaema:.

<sup>20</sup> Wiyasiya ebete me tanalo eba malagidilolo Kawodawa Godokono nopodawate iyo gabodo ebetamo maiganate negeni, “Da:ibidikono a:la:mu Yausepe, a:ma:le Ma:liko a:imano kamiyalema: eda:ma: akotoletola:la:, mabu ebena tepo magumulo da:luta ebe gudu Godokono Wade-talena Uliyanate ebetamo ikami. <sup>21</sup> Iyo, ebete dubu gudu kalaimimene ebena a:ma: ebena mailo Ya:suma: neka:miye, mabu ebete ebena epo ibino iyaiya kuba osiyodilole magumune uwatete ibino igilo ka:mula:lelaemene.”<sup>†</sup>

<sup>22</sup> Ebene me tanalo bilibilinomate emaimiya, Kawodawa Godote ebena woki awokalimidawado degiya ebe tabote nanitaboma: keda:ma:, iyo, iyalo tetelo ebete tabo ma kunu giya,

<sup>23</sup> “Buwelete lamituma: eda:te dubu gudu kalaimimene, ebene iba:te ebena mailo Ima:nuwelama: keka:ima:na:.”

Buka ka:la:mioledawa, modobola a:ma: niyatawa me Ima:nuwela mailono magumu nitana ‘Godote ago nokolina.’

<sup>†</sup> **1:21:** Ya:su mailono magumu nitana ‘Godoko ebe Igilo Mula:dawala.’

<sup>24</sup> Ebema: Yausepete u wata baine maiganate Godokono nopodawate ebe beda: tabo kananiyale, ebete ebe tabamo tuduwatate Ma:liko ebenu kamiyalema: ebo lawiya. <sup>25</sup> Wiyasiya Ma:lite gudu Ya:suko alaimia:non Yausepete dopamo eba:go kapiyama: kediyas, ebenu Ma:lite Godokono gudu dalaimiya ebe tetelo Yausepete ebe Ya:suma: ebo ka:miya.

## 2

### *Mulolo Mawele Ka:la:miolepi Dubuno Tanalo*

<sup>1</sup> Elodite Yudiya opolo Kawo Elawodubuma: eba eda:nalo, idoko idilo Ya:sute ebe opono Beteliyama duliyoumololo ebo awokalani. Ebenu egele epetapi da:petoia, ebe tetelo mulolo mawele ka:la:miolepi dubate egele da:pemaiganako eba apune mulu opono pelamiya Yudiya opono kawo duliyoumolo Yelusalemamo. <sup>2</sup> Iba:te ma kunu pegeliya, “Keleka: Yu opono Kawo Elawodubuma: eda:ma: dawokali ebe gudu? Ale ebenu mawele aimano mulu opolo umite ebe amamatema: pelaema:.”

<sup>3</sup> Ebema: Kawo Elawodubu Elodite me tanalo dolowiya ebenu tepo magumulo woki bilibilinomoma: ediya, ega:walo Yelusalema kawo duliyoumololo dilukulionamiya ibi bilibilinomate atumu woki bilibili tanalo ebo kelawiya.

<sup>4</sup> Ebenu Godotamo kalimagono ikameopino ununomo watowatopi ega:walo Godokono Totomu iyatulamepi, Elodite ibi bilibilinomo ebetamo ka:la:mite nalateda:liya, “La:imano woki keba kunula:ka? La: Yu opono Kawo Elawodubu Kelisote kebe duliyoumololo nakawokalamene?”

<sup>5</sup> Iba:te ebetamo nowamiya, “Ebete Yudiya opono Beteliyama duliyoumololo kawokalamene, mabu Godokono woki awokalimidawate Godokono Bukamo tabo ma kunu akuloliya,

<sup>6</sup> ‘Beteliyama duliyoumolo Yudiya opolo ditana,  
Yudiya opono kawokawo elawodubu magumulo  
a:ma: da:pesoa,  
mabu a:ma: magumune  
epono watodawate kemaigamene,  
naimano Isalaela epo ebete bulamenamene.’ ”

<sup>7</sup> Ebenu adimo tetelo Kawo Elawodubu Elodite mawele ka:la:miolepi diya gabodo ebetamo ebo ka:la:mini, mabu ebe ubila mawelete kebe tetelo kemaiganiyale iba:godone ebe tete kiyatawanama: <sup>8</sup> Ebete ebe tanalo lawenate ibi eba alibolenalo nanaleni, “La: tolama:wete Beteliyama duliyoumololo gudu wadenomamo nowadiawete da:numa:ema, modobola la: walo ka:pelama:wete na napananiyala:, ebenu nale atumu ka:tote ebe kakanamamatemamo.”

<sup>9-10</sup> Ebema: mawele ka:la:miolepiate Elodikono tabo olowinate gito tolameniya. Ebenu iba:te eba tolamenalo, egele da:pemaiganako ebe mulu opolo dopamo duminiya, ebe atu mawele walo na:ka:numiniya. Ebe tetelo iba:te mawele da:ka:numiniya kalakala ebo nelaweniya, o kalakala beda: kawonomola:ka:, ebenu ebe mawelete ibi dopolamenate eba tonalo, gudute kebolo kowataniyale mawelete ebe tetenomamo gito nutini. <sup>11</sup> Ebema: iba:te ebe moto guamo nopila:onate gudu ega:walo ebenu menoko Ma:liko ebo nulameniya. Ebe tetelo iba:te ibino pupamo eba ilukulinalo gudutamo tudila:onate ebe ebo amamateniya, ebenu iba:te dopamo mani kawokawonomamo duwateiya ebe nilakapo inamabu waulatelenate gudutamo ebo



ikameoniya, ma kunu golodo mani, ape abutimino wade nibo inamabu, ega:walo wade nibo ii inamabu idi.

<sup>12</sup> Ebe idokolo Godote iyolo ibi nanaleni, “La: Kawo Elawodubu Eloditam walo akotolama:la;,” ebema: egela idilo iba:te wagilimite gabo idido ibino oponomamo ebo tolamiya.

#### *Yausepeko Ma:liko Iba:te Isipiti Opamo Dalautiniya*

<sup>13</sup> Ebene idoko idilo Kawodawa Godokono nopodawate Yausepetamo iyolo pemaiganate ebe napanani, “Modobola a:ma: samonomamo maigawete, gudu ega:walo ebenu menoko uwata:wete Isipiti opamo nalauta:la: La: ebolo eba nokolionalo, kebe tetelo nale la: dakanaleta:ma la: mam walo ebo ka:ka:pemamota, mabu tete tatalila Elodite gudu anakapuima: Beteliyama duliyoumololo ka:powadimene.” <sup>14</sup> Ebe tetelo Yausepete maiganate gudu ega:walo ebenu menoko uwatenate Isipiti opamo to gabodo ebo toniya.

<sup>15</sup> Ebema: iba:te Isipiti opamo nemaimite ebo nokoliya Kawo Elawodubu Elodikono a:e teta:mo. Me tanalote ma kunu pemaigiya Kawodawa Godote ebenu woki awokalimidawado degiya ebe tabote nanitaboma: keda:ma:, iyo, iyalo tetelo ebete tabo ma kunu giya, “Naimano gudute Isipiti opone ka:pema: nale ebe keka:imamo.”

#### *Elodite Gudi Egege Danakapulamiya*

<sup>16</sup> Ebene mawele ka:la:miolepi dubate Elodiko a:da: demasigiya, ebete me tanalo iyatawate kawonomamo dowiya. Ebe ubi kawonomola gudu Kelisoko anakapuima:, ebema: ebete Beteliyama duliyoumololo ega:walo niyakabolo dilukulinamiya ebe epatamo gowelaopi dubu aliboliya, iba:te tolamete netewa ulama tete dubu gudi ega:walo a:lia:li gudi bilibilinomo kananakapulaema:. Ebete ma kunu osiyodiliya mabu mawele ka:la:miolepi dubate ebe aniya kawo mawelete iyalo netewa ulama tetelo dopamo emaigani.

<sup>17</sup> Me tanalote ma kunu pemaigiya Kawodawa Godote ebenu woki awokalimidawa Yelemayado degiya ebe tabote nanitaboma: keda:ma:, iyo, iyalo tetelo ebete tabo ma kunu giya,

<sup>18</sup> “La:ima duliyoumolo epagodone  
iimi kawonomote maiga,  
mabu Lesula:te ebenu gudi liyalamena!  
Iyo, ebete gowelalo diina katepana:  
mabu ebenu gudi bilibilinomate  
nanitabolo a:ela.”

#### *Yausepeko Ma:liko Iba:te Isipiti Opone Walo Da:ka:piya*

<sup>19</sup> Walone tetelo Elodite da:iya, Yausepete Isipiti opolo eba okolinalo Godokono nopodawate iyo gabodo ebetamo ebo maigani. <sup>20</sup> Nopodawate ebe nanani, “A:ma: gudu ega:walo ebenu menoko uwata:wete, la: Isalaela opamo na:kolowamiyala:, mabu gudu anakapuima: dowagelenamiya iba:te a:elaiya.” <sup>21</sup> Ebene Yausepete maigate gudu ega:walo ebenu menoko uwatete Isalaela opono pe gabodo walo na:ka:piya.

<sup>22</sup> Wiyasiya Yausepete tanalo idi ma kunu olowiya, ka:lo Elodikono gudu Akeleyasiko ebete ebenu nabiwino gobobobo lawete Yudiya opolo Kawo Elawodubuma: edi. Ebema: Yausepete Yudiya opolo nokolima: da:toletoliya, ebe tetelo Godote iyo gabodo tabo idi ma kunu palibiya ebete Ga:lili opamo ka:toma:. <sup>23</sup> Ebene iba:te Ga:lili opono Nasaleta duliyoumolamo nemaimite ebo nokoliya, mabu iyalo tetelo Godokono woki awokalimpiate negeliya,

“Epate Kelisoko Nasalete duliynomolodawama: keka:ima:na:,” ebema: me tanalote ma kunu pemaigiya Kawodawa Godokono tabote nanitaboma: keda:ma:.

### 3

*Yoneko Epo Obamo Waduba:midaoledawate Godokono Tabo Da:kiyawaiya*

*Mak 1.1-8; Luk 3.1-18; Yon 1.19-28*

<sup>1</sup> Ebene ulama epetapi da:petolamiya, ebe tetelo Yoneko epo obamo waduba:midaoledawate pete Yudiya opono bulu opolo Godokono tabo ma kunu pa:kiyawaiya, <sup>2</sup> “La:imano kubane nolobila:la:, mabu Godote Kawo Elawodawama: deda:na ebe tanalote na:pe!”

<sup>3</sup> Nanitabola, Godokono woki awokalimidawa Aisayate dopamo Yonekono pe tanaloma: tabo ma kunu giya,

“Lumagite bulu opolo tabo ma kunu  
kawonomamo ka:pegemene,  
‘Kawodawano gabo nosiyodiloma:la:,  
ebeno gabo na:tupugaima:la:!’ ”

<sup>4</sup> Ebe tetelo Yonekono okoli tanalo ebe epo epetapino ilukuli tanalo keba kunula:ka: eba kunua:, mabu ebete ka:molo-goeo ipo kuba kaliku kau-goeo tama batago pulinaki, ega:walo ebena bae siguniya ega:walo molo naonaki. <sup>5</sup> Ebema: Yelusalema kawo duliynomolo epo ega:walo Yudiya opo epo epetapi ega:walo Yodane Kolomo apulo dilukulionamiya, ibi bilibilinomate Yonetamo tolamiya ebena tabo olowioma:, <sup>6</sup> ebena iba:te ibino kuba danawokalilamoliya, ebete ibi Yodane Kolomolo obamo ebo waduba:midaoliya.

<sup>7</sup> Ebe tetelo Pa:lisi tanebapi ega:walo Sa:diyusi tanebapi,\* ibi epetapi bilibilinomate Yonetamo tolamiya ebete ibi obamo kowaduba:midaolema:, wiyasiya Yonete ibi ulamete iba:tamo negiya, “La: bu kalulata! La: potele kanaletia obamo waduba:midaolema: da:pelama:ema, ba:, Godokono kawo dowo tanalonomote la:tamo a:ka:pemene? Ao, ka:pemene! <sup>8</sup> La:imano tepo magumu iyakobi da:midila:ema, modobola la: la:imano nanitabo tanalo awokalima: wadewade tanalo nosiyodilola:la:. <sup>9</sup> La: a:ka:tuwa: la:imano wokilo ma kunu akogelanakala:, ‘A modobola mabu A:ibalayamako ebe aimano ewono nabiwila.’ Ao, la: a:ka:modobomata! Na la:tamo nani tabo gemo, Godogodolo elawo bitana ebete me nokolamo A:ibalayamakono gudi kosiyodilolema:! <sup>10</sup> Ebema: ka:lo Godote ebena kabi a:li, noloa: da:imi kewa bilibilinomo ebete lute elamo kiyalekemene.

<sup>11</sup> “La: epetapi la:imano kubane dolobila:ima, nale ebe tanalo kawokalima: la: obamo waduba:midaolemata. Wiyasiya lumagi idino elawo kawonomola, naimano elawo nodoliona, ebema: na wadenoa: ebena

\* **3:7:** Ya:sukono tetelo Yu epono iyatulamepiate netewa taneba magumulo ilukulinamiya, ebe taneba netewano mailo ebe Pa:lisi tanebapi ega:walo Sa:diyusi tanebapila. Ebe netewa tanebapiate woki kapiyama: keda:onamia:, iba:te apaminatua:go ilukulinamiya. Pa:lisi tanebapiagodolo totomu bilibilinomate pola:namiya, iba:te totomu epetapi Godokono Bukane uwatiya ega:walo totomu epetapi ibi a:ka:tuwa: ibino woki mabune uwatiya. Ebema: iba:te ebe totomu bilibilinomo uwatete wadenomamo tudila:onamiya, ega:walo piyate atu totomu uwate:no Pa:lisi tanebapiate ibi kubakubapima: gelanakiya. Sa:diyusi tanebapino tanalo iyala. Iba:te a:ka:tuwa: ibi Godoko waloma:tapima: gelanakiya, wiyasiya ibino kateneno ubilo wapata:lamenamiya, ebema: iba:te Pa:lisi tanebapino totomu bilibilinomamo ka:tudila:onamia:.

agowa ukulaleno obo aguwataema: Ebete naimano walogabo apune ba:pena, ebene ebete la: Godokono Uliyanamo ega:walo ebene elamo ka:powaduba:midaolema:ta. <sup>12</sup> Iyo, ebete witi-laisono nonoka balamo alomono inamabu elawi, ebene ebete witi-laiso naono ebene moto guamo eba alomolo nonoka elamo ebo kiyalekemene, ebe elate uwomua: tetelo nowaena, ka:egana:”

*Yonete Ya:suko Obama Daduba:midiya*

*Mak 1.9-11; Luk 3.21-22*

<sup>13</sup> Ebene Ya:sute Ga:lili opone Yodane Kolomamo Yonetamo piya, ebete ebe obama kaduba:midama: <sup>14</sup> Ebe tetelo Yonete negiya, “A:ma:le na obama aduba:midanema: modobola, wiyasiya mabu keleka: a:ma: ebe tanalo nagodone laema: da:pa:wa:? Modoboa!”

<sup>15</sup> Wiyasiya Ya:sute ebetamo negiya, “Modobola a kosiyodilomalema:, mabu Godokono tuputupu gabodo tolame magumulo ebete a tanalo bilibili-nomo osiyodilolema: danaenakomene, ale ubia:noma: a:keda:onakoma:.”

Ebe tetelo Yonete Ya:sukono tabamo tuduwatate ebo osiyodiliya. <sup>16</sup> Ebene Ya:sute obone eba pidiwilo, ebe tetenomolo Godote ebene Unu Duliyomolo a:iyamiditalo ebo umiya, ega:walo ebete tanalo idi ma kunu kumiya, Godokono Uliyana bigo ola keba kunula:ka: eba kunu piwisigate ebetamo gito pokoliya. <sup>17</sup> Ebe tetelo tabote Unu Duliyomolone ma kunu piwisigiya, “Me naimano kapiya Gudunomola. Na ebetamo nekalakalitamo.”

## 4

*Saitanate Ya:suko Kuba Gabamo Kowabuga:tama: Ebetamo Da:pemaigiya*

*Mak 1.12-13; Luk 4.1-13*

<sup>1</sup> Ebene Godokono Uliyanate Ya:suko bulu opamo nemagatiya, mabu ebe ubila Saitanatamo tete ebolo nikamete, ebete Ya:suko kuba gabamo kowabuga:tama:. <sup>2</sup> Ebene Ya:sute bulu opolo 40 egelamo eba nokolilo, ebe tete geyageyanomolo bae kenanakia:, ebema: ebete bae kape tanalo ebo iyatawiya.

<sup>3</sup> Ebene Saitanate ebetamo pemaigate ebe naniya, “A:ma: Godokono nani Guduma: deda:wena, me nokola baema: na:midila:.”

<sup>4</sup> Ya:sute ebene tabo eba wiyalo negiya, “Godokono Bukalo tabo ma kunu itana, ‘Lumagite me opono bae kapiyalo a:kigilonamene, wiyasiya ebete Godokono tabo bilibilinomo denaomene nanitabonomolo bigilonamene.’ ”

<sup>5</sup> Ebene Saitanate Ya:suko Godokono wade-talena duliyomolo Yelusalemamo magatate Godoko Amamateno Iya Motono auba unamo nadipite <sup>6</sup> ebe ebo naniya, “A:ma: Godokono nani Guduma: deda:wena, a:ma: a:ka:tuwa: opamo na:nepatega, mabu Godokono Bukalo tabo ma kunu itana,

‘Godote ebene nopopi  
a:imano tanaloma: kapalibolemene,  
iyo, iba:te ibino kotamo a:ma: ka:pelaema:ta,  
ebema: a:ma:le nokolalo  
agowa a:ka:nukamidaemene.’ ”\*

\* **4:6:** Saitanate degiya ebe tabo Godokono Bukalo nanitabonomolo bitana, iyo, modobola a:ma: Sam Oale Buka 91.11-12 numiye. Saitanako ebe kawo a:da: tabo kiyawaodawanomola, ebema: tete epetapilo ebete Godokono tabono iyaiya tanalo epono woki mabuamo wadaenako, wiyasiya ebe tabono magumu ebete nanitabolo kawokalilamena:, iyo, me gabodo ebete ibi kuba gabamo wabuga:taleno, ebete Ya:sutamo osiyodiloma: dowageliya eba kunu.

<sup>7</sup> Wiyasiya Ya:sute negiya, “Ao, nale ebe kuba tanalo a:kosiyodilomo, mabu Godokono Bukalo tabo idi ma kunu itana, ‘Opo lumagite Kawodawa Godoko wabudima: akowagela:la.’ Iyo, ebe mabuma: me opo lumagite ebene daedale wokiamo tanalo idi dosiyodilomene, ebete akomalagidilala: Godote ebene igilo gito ka:pa:mula:ema.”

<sup>8</sup> Ebene Saitanate Ya:suko damela ununomo ida:mo magatate me opo kawonomono iyaiya opo kawokawo eba niyatumiolo, iba:te ebe opo bilibilinomo ega:walo kawokawo inamabu ebo ulamoliya. <sup>9</sup> Saitanate ebetamo negiya, “A:ma: pupamo okoliawete na namamanatena:, ebene nale me tanalo bilibilinomo a:ma:tamo kikameomamota.”

<sup>10</sup> Wiyasiya Ya:sute ebetamo negiya, “Saitana, a:ma: nagodone na:toa! Godokono Bukalo tabo idi ma kunu itana, ‘A:ma: a:imano Kawodawa Godoko amamatelo ebe kapiyatamo na:tuduwatanakiye!’”

<sup>11</sup> Ebene Saitanate Ya:suko atepate, wiyasiya Godokono nopopiate pelamete ebe ebo pa:buiyatiya.

*Ya:sute Ebene Woko Dowagilimiya*

*Mak 1.14-15; Luk 4.14-15*

<sup>12</sup> Ebene gabamaniate Yoneko idoko motamo diyatiya, Ya:sute ebe tanalo olowite ebete Ga:lili opamo gito tiya. <sup>13</sup> Ebete Nasaletu duliyo molo atepate Kapeniya duliyo mololo nokolinami, Kapeniya duliyo molo ebe Ga:lili Paka: balalo itanami, me paka: Sebulana ega:walo Na:patali me netewa gu epono opo niyakabolo itanami. <sup>14</sup> Me tanalote pemaigiya Godokono woki awokalimidawa Aisayate kebe tabo ka:kiyawaiyale ebe tabote nanitaboma: keda:ma:, iyo, ebete iyalo tetelo ma kunu a:kiyawaiya,

<sup>15</sup> “Sebulana opo epo ega:walo Na:patali opo epo,  
Ga:lili Paka:mo tolame gabo niyakabolo dilukuliawenama,  
la: ebe epolata.

Iyo, la: Yodane Kolomo apu balalo da:pola:wenama  
ebe epolata,

la:imano opono mailo  
ebe Yua: epono Ga:lilila.

<sup>16</sup> Piyate idoko magumulo dilukuliona,  
iba:te alo kawonomo kuima:na:,  
iyo, piyate a:e magumulo dilukuliona,  
wiyasiya igilo alote  
ibi ka:pukuilaemene.”

<sup>17</sup> Ebe tetelo Ya:sute Godokono tabo kiyawao eba wagilimilo negiya, “La:imano kubane olobila:wete woki iyakobi na:midila:la:, mabu Godokono Kawo Elawodawama: eda: tete tatalila.”

*Ya:sute Namu Uwatolepi Netewa-netewa Duwatiya*

*Mak 1.16-20; Luk 5.1-11*

<sup>18</sup> Ebene Ya:sute Ga:lili Paka: balado eba petolo dubu netewa ebo nulamiya, Saimonoko ebene mailo idi Pitatela ega:walo ebene ekawi A:nduluko, ibi netewapi namu uwatolepila, iba:te namu kamauamo na:utiya. <sup>19</sup> Ebene Ya:sute iba:tamo negiya, “La: na nowaloma:ena:la:, ebene nale la: epo uwatepima: ka:midilimamota.” <sup>20</sup> Ebe tetenomolo iba:te ibino kamau miyapate Ya:suko ebo waloma:tiya.

<sup>21</sup> Ebene Ya:sute kela:mo walo ka:tote Sebedikono gudu Ya:imesiko ega:walo ebene ekawi Yoneko ebo ka:nulamiya, iba:te ibino nabiwa:go pelo

ilukulite kamau osiyodilolitiya. Ebene Ya:sute ibi netewapi deka:la:miya,<sup>22</sup> ebe tetenomolo iba:te ibino pe ega:walo ibino nabiwi miyapate Ya:suko ebo waloma:tiya.

*Ya:sute Godokono Elawamo Epo Bilibilinomo Dowalubilinaki*

*Luk 6.17-19*

<sup>23</sup> Ebene Ya:sute Ga:lili opo kawonomodo da:petonaki, ebe tetelo ebete Yu epono iyaiya balidi ibilamole motolo ibi eba iyatulamelo, Godote Kawo Elawodawama: deda:na ebete ebe tanalono Wade Tabo iba:tamo ebo kiyawaonaki, ega:walo epo magumulo piyate iyaiya temetema:go dilukulionamiya ebete ibi bilibilinomo wadekobi atumu a:ka:midiolenaki.<sup>24</sup> Ebene ebe tetelo Siliya opo epo bilibilinomate atumu Ya:sukono tanalo kolowiote, iba:te ibino iyaiya temetema:gopi ebetamo ebo magaelenakiya. Ma kunu kubakuba uliyanagopi, ea: temetema:gopi, ape kodakoda temetema:gopi, ega:walo iyaiya gabugabuagopi bilibilinomo epetapiate Ya:sutamo da:pelamenakiya, ebete ibi wadekobi ebo midiolenaki.<sup>25</sup> Nanitabola, ebe tetelo epo bilibilinomate Ya:sutamo iyaiya opone pelamoliya, iyo, iba:te Ga:lili opone, Teni Duliyomolono opone, Yelusalema kawo duliyomolone, Yudiya opone, ega:walo Yodane Kolomo apune iyaiya pelamolete Ya:suko ebo waloma:tiya.

## 5

*Ya:sute Epo Iyatulaema: Damela Unamo Da:nodoliya*

<sup>1</sup> Ebene ebe epo bilibilinomate Ya:sutamo da:pelamiya, ebete ibi ulamete damela unamo nodolote gito nokoliya. Ebema: ebe waloma:tapi dubate pelamete ebe da:pa:wa:midadigiya,<sup>2</sup> ebete ibi iyatulame ebo wagilimiya.

*Godokono Nanitabo Kalakala Tanalo*

*Luk 6.20-23*

- <sup>3</sup> Ya:sute iba:tamo negiya,  
 “Piyate ibi a:ka:tuwa: ibi egegema: gelalo  
 Godoko ibino Kawodawama: degelanaka,  
 modobola iba:te nekalakalaonama:na,  
 mabu Godote Kawo Elawodawama: deda:na,  
 ebe wade duliyomolono tanalo ibinola!
- <sup>4</sup> “Ega:walo piyate me tetelo temetema:go diimina,  
 modobola iba:te nekalakalaonama:na,  
 mabu Godote iba:tamo gelebadi kikalaemene!
- <sup>5</sup> “Ega:walo piyate amamaoa:pima: deda:ona,  
 modobola iba:te nekalakalaonama:na,  
 mabu Godote me opo kawonomo  
 iba:tamo kikalaemene!
- <sup>6</sup> “Ega:walo piyate tuputupu ilukuli tanaloma: diyawaona,  
 modobola iba:te nekalakalaonama:na,  
 mabu Godote ibino iyawa tanalo ka:modoboilaemene!
- <sup>7</sup> “Ega:walo piyate nilakapo dawokalilamena,  
 modobola iba:te nekalakalaonama:na,  
 mabu Godote iba:tamo  
 ebena nilakapo kawokalimene!

8 “Ega:walo piyate ibino tepo magumu wadenomamo dukulalena,  
modobola iba:te nekalakalaonama:na;  
mabu iba:te Godokono ololo kuima:na!”

9 “Ega:walo piyate dowapiatamo milo dikalamena,  
modobola iba:te nekalakalaonama:na;  
mabu Godote ibi ebeno gudima: kegemene!”

10 “Ega:walo piyate tuputupu gabodo eba wapata:lamenalo  
ebe mabuma: temeteme duwatenaka,  
modobola iba:te nekalakalaonama:na;  
mabu Godote Kawo Elawodawama: deda:na,  
ebe wade duliynomolono tanalo ibinola!”

11 “Ega:walo epate na mabuma: la: malogolelo kawokawo temeteme  
eba ikalamelo la: kubakubapima: degelana, la: atumu na:kekalakalala!  
12 Iyo, la: kawonomamo nekalakalala; mabu walone tetelo la:le Godokono  
Unu Duliynomololo la:imano wiya kawokawonomo ka:nuwatemamota.  
Numa:la:, dopamo tetelo dilukulinamiya ebe kubakubapiate atumu  
Godokono woki awokalimpiatamo kawokawo temeteme eba kunu kikala-  
menamiya.”

*Solu Ega:walo Alo Ibino Tanalo*  
*Mak 9.50; Luk 14.34-35*

13 Ebene Ya:sute walo na:kegiya, “La: me opono solu golalata, wiyasiya  
la:imano soluno golate dalatidimene, lumagi idite walo solukobi midima:  
a:ka:modobomene. Ebe solu kubanomoma: eda:, ebema: epate iyabaiamo  
aminaoete agowamo ka:mikitaolema:na.”

14 “Ega:walo me tanalo idila, la: me opo kawonomono alolata, mabu  
nanitabola, damela unulo ditana epate ebe duliynomolo wadenomamo  
buminama:na. 15 Iyo, lumagite ebeno wuiki alo pite bagowo magumamo  
a:kiyatimene, wiyasiya ebete awokala baiamo kiyatimene, ebeno ebe alote  
moto gulo dilukulina ebe epo bilibilinomo ka:pukuilaemene. 16 Ebema:  
modobola la:imano alote ebe atu gabodo epo epetapi na:pukuilaemene,  
iba:te la:imano wadewade osiyodilole tanaloma: la:imano Unu Duliynomolo  
Nabiwi kemoioma:.”

*Godote Mosesedo Epatamo Dikalamiya Ebe Totomu Tabono Tanalo*

17 Ebene Ya:sute walo na:kegiya, “La: wadenomamo nemalagidilala,  
Godote Mosesedo epatamo dikalamiya ega:walo ebeno woki awokalimpi-  
ate ebeno Bukamo dakuloliya, nale ebe wadewade Totomu Tabo iyabaiamo  
alomoma: ka:piya:. Ao, eba kunua:. Nale wiyasiya ebe iyaiya Totomu  
Tabono nanitabo tanalo awokalima: piyamo. 18 Na la:tamo nani tabo  
gemo. Me opo ega:walo tobolo unu ibino inamabuate tete geyageyanomolo  
eba pola:nalo Godokono Totomu Tabote atumu ba:ka:pola:nama:na;, ibi  
bilibilinomo magumulo tabo da:pesonomo idite akalatidimene. Iyo,  
Godote kebe tabo apuapu ebeno Bukamo dalomoliya, ebe tanalate epo  
biyatulamnakoma:na: ebeno woko bilibilinomo opoliyale uwomuamo!  
19 Ebema: Godokono Totomu Tabo bilibilinomo magumulo kebe lumagite  
tabo da:pesonomo idi ubia:noma: eda:te, ebeno ebete epetapi tudila:oa:  
tanalo diyatulaemene, walone tetelo ebete Godokono Unu Duliynomololo  
da:pesonomoma: ka:neda:mene. Wiyasiya kebe lumagite Godokono To-  
tomu Tabo bilibilinomamo eba tuduwatalo epo epetapi atu tanalo osiy-  
odilolema: diyatulaemene, ebete Godokono Unu Duliynomololo kawoma:



ka:neda:mene. <sup>20</sup> Ebema: nale la: analemata, modobola la:le Godokono Totomu iyatulamepi ega:walo Pa:lisi tanebapi ibino tanalo nemalagidilala:. Epate ibi tuputupupima: gelana, wiyasiya la:imano tuputupu ilukuli tanalote ibino ilukuli tanalo odolia:no la: Godokono Unu Duliyomolamo a:ka:nopila:ema.”

### *Epono Dowa Tanalo*

<sup>21</sup> Ebene Ya:sute walo na:kegiya, “Dopamo tetelo epate Godokono totomu tabo idi ma kunu diyatulamenakiya, la: olowiyamata. ‘Lumagi akoanakapuma:la:. Potele lumagi idi danakapuimene, epono tabo anagilamelelamedawate ebetamo kuba wiya kikaemene.’ <sup>22</sup> Wiyasiya me tetelo nale tabo idi na:kegemo. Kebe lumagite ebene ekawitamo da:dowamene, tanalo anagiyamidawate ebetamo kuba wiya kikaemene, ega:walo kebe lumagite ebene ekawi demalogomene, Ka:nisolo dubate ebetamo kuba wiya kikaema:na:, ega:walo kebe lumagite ebene ekawi watoa:noma: degemene, ebe kuba mabuma: Godote ebe Ela Opamo kanalibomene. <sup>23</sup> Ebema: a:ma: Godoko watidilonoma: kalimagono inamabu patapatamo eba adaelo a:ma: woki wadenomamo ma kunu da:nelawa:emene, ‘Eiye! Naimano ekawite natamo na:dowana!’ <sup>24</sup> modobola ebe tetelo a:ma: a:imano nilakapo inamabu ebamo natepapiye. A:ma: dopamo toawete a:imano ekawi gelebadikobi na:mida:wete, ebene a:ma: walo ka:pa:wete ebe nilakapo inamabu Godotamo ebo na:pikamiye.

<sup>25</sup> “A:ma:tamo da:dowana ebe lumagite a:ma: gabamani dubu kawotamo demagatatamene, la: ebetamo nemaimia:no modobola a:ma: dopamo eba:go na:negelebadiyala:. A:ma: ebe gelebadikobi midia:no, nanitabola, ebete a:ma: kawo dubuno kotamo ka:niyatima:ta, ebene kawo dubute a:imano kuba anagiyamidametate a:ma: polisi dubutamo eba nalibolo, a:ma: idoko motamo ebo ka:toma:ta. <sup>26</sup> Na a:ma:tamo nani tabo gemo, a:ma: idoko moto gulo eba nokolilo, gabamani dubute kebako tete okolima: a:ma: danatamene, a:ma:le ebako kuba wiya modobutinomo modobuta:wete duliyomolamo walo ka:ka:pema:ta, wiyasiya a:ma:le ebe wiya modobutia:no a:ka:pemaigaemene.”

### *Kamiyale Pilo Tanalo*

<sup>27</sup> Ebene Ya:sute walo na:kegiya, “Epate Godokono totomu tabo idi ma kunu diyatulamenakiya, la: olowiyamata. ‘Lumagi idino kamiyale pilolo akolawa:la:.’ <sup>28</sup> Wiyasiya me tetelo nale tabo idi na:kegemo. Kebe dubute kamiyale idi umite ubi ebetamo diyatimene, Godokono umi magumulo ebete ebene tepo magumulo ebe kuba iyalo osiyodilo. <sup>29</sup> Ebema: a:imano tumudi apu balidite a:ma: kuba gabamo dowabuga:tatana, a:ma: magoba:wete iyabaiamo neba:idila! Modobola a:imano balidite me tetelo alatidi, wiyasiya walone tetelo Godote a:imano ape kawonomo Ela Opamo ba:idilo modoboa:! <sup>30</sup> Ega:walo a:imano tumudi apu kotote a:ma: kuba gabamo dowabuga:tatana, a:ma: itamidawete iyabaiamo neba:idila. Modobola a:imano kotote me tetelo alatidi, modoboa: walone tetelo a:ma:le ape kawonomago Ela Opamo toma:!”

### *Kamiyale Alibuti Tanalo*

*Ma:t 19.9; Mak 10.11-12; Luk 16.18*

<sup>31</sup> Ebene Ya:sute walo na:kegiya, “Ega:walo epate Godokono totomu tabo idi ma kunu iyatulamenakiya, ‘Kebe dubute ebene ubia: tetelo kamiyale dalibutimene, kuba:. Ebete ebe alibuti tabo pepamo akulote ebetamo ikamelo ebo kanalibomene.’ <sup>32</sup> Wiyasiya me tetelo nale tabo idi na:kegemo.

Dubu idino kamiyalete dubu ida:go kuba osiyodiloa:no, ebene ebene awite ebe ubia:noma: eda:te gito dalibutimene, ebe dubute kawo kuba kosiyodilomene, ebene ebete Godogodone kuba wiya nanitabolo kelaemene. Mabu ebene kuba osiyodilo tanalodo ebene kamiyalete eba tolo dubu idi da:nelaemene, Godokono umi magumulo ibi netewapino osiyodilo tanalote pilo tanaloma: keda:mene.”

*Godokono Ololo Apulo Tabo Nanitabonomolo Ge Tanalo*

<sup>33</sup> Ebene Ya:sute walo na:kegiya, “Dopamo tetelo epate Godokono totomu tabo idi ma kunu diyatulamenakiya, la: olowiyamata. ‘A:ma:le Godokono mailamo kebe tabo da:kiyawaemene ebe tabo bilibilinomo nanitabonomolo nosiyodiloliye.’ <sup>34</sup> Wiyasiya me tetelo nale tabo idi na:kegemo. A:ma:le epetapiatamo nani tabonomo gema: dowagela:emene, iba:te a:imano tabo nanitabokobi ka:midima: a:ma:le Godokono Unu Duliyomolono mailo akoka:miala:, mabu ebe Duliyomolo talenama: eda:na, ebe Godokono okoli baila. <sup>35</sup> Ega:walo me opono mailo akoka:miala:, mabu me opo atumu talenama: eda:na, ebe Godokono agowa puti baila. Ega:walo atumu Yelusalema kawo duliyomolono mailo akoka:miala:, mabu ebe aimano Kawo Elawodawa Godokono duliyomolola. <sup>36</sup> Ega:walo a:imano tabo olowidawate a:imano tabo nanitabokobi ka:midima:, a:ma:le a:imano mailo akoka:miala: mabu a:ma: kawodawa:, iyo, a:ma:godolo elawo kitana: a:imano kapiya kilikili eke keyakeyama: midima:. <sup>37</sup> Ebema: modobola a:ma: wiyasiya a:imano tabo kiyawao magumulo inamabu idino mailo ka:mia:no tabo nanitabolo ma kunu negiye, ‘Iyo, na kosiyodilomamo,’ ega:walo kebe tetelo a:ma: tanalo idi osiyodilo modoboa:noma: deda:emene, modobola a:ma: nani tabo idi ma kunu negiye, ‘Ao, na a:kosiyodilomo.’ Eiyee! Epetapiate a:imano tabo nanitabokobi ka:midima: a:ma:le a:imano tabo elawokobi ka:mida:ema: tabo idi akogeala:, mabu ebako tabo kiyawao tanalote Saitanagodone ka:pemene.”

*A:ma:tamo Kuba Dosiyodilonako Ebe Lumagitamo Kuba Ako-osiyodilala:*

*Luk 6.29-30*

<sup>38</sup> Ebene Ya:sute walo na:kegiya, “Epate Godokono totomu tabo idi ma kunu diyatulamenakiya, la: olowiyamata. ‘Lumagi idite a:imano balidi da:kubaimene, a:ma: wiyasiya ebene balidi ka:kubaimima:ta. Ega:walo lumagi idite a:imano lalo dowakeamidalemene a:ma: atumu ebene lalo kowakeamidalema:ta.’ <sup>39</sup> Wiyasiya me tetelo nale tabo idi na:kegemo. Potele a:ma:tamo kuba dosiyodilonako ebe ako-odiyobala:, ma kunu ebete a:ma: tumudi apu tatakolo danagalimitamene, modobola a:ma: pele apu ebetamo na:kikamiye. <sup>40</sup> Ega:walo kebe lumagite a:imano lubudino inamabu laema: ubi iyatilo a:ma: tanalo anagiyamida baiamo magatama: degemene, modobola ebetamo gito nikamiye ega:walo ebe atu tetelo a:imano sete inamabu akoamoeda:la:, a:ma:le ebetamo nilakapolo gito na:kikamiye. <sup>41</sup> Ega:walo gabamani dubu idite ebene inamabu kapiya kilomita tatalidopamo aguwataema: a:ma: danatamene, modobola a:ma: kalakalago ebene inamabu netewa kilomita muludopamo aguwawete eba:go gito na:tiye. <sup>42</sup> Ega:walo kebe lumagite a:imano inamabu idima: a:ma: da:toweometamene, modobola a:ma: ebetamo nilakapolo nikamiye. Iyo, idite tete idilo a:ma:godone inamabu lawete walo a:ma:tamo ikaema: da:kegemene, modobola a:ma:le ebe gito nowalubiye.”

*La:go Gowelaopi Nilakapolo Malagidilole Tanalo*

*Luk 6.27-28,32-36*



<sup>43</sup> Ebene Ya:sute walo na:kegiya, “Epate ma kunu diyatulamenakiya, la: olowiyamata. ‘A:ma: a:imano namutudawa nilakapolo nemalagidilona, wiyasiya potele a:ma:go da:gowelaona a:ma:le ebako lumagitamo dowama: kuba:.’ <sup>44</sup> Wiyasiya me tetelo nale tabo idi na:kegemo. La:go da:gowelaona, modobola la: ibi nilakapolo nemalagidilolenala:, ega:walo la:tamo teme-teme dikalametana ibi Godotamo nowadipalatenakiyala: ebete ibi wadenomamo kowalubilinama:. <sup>45</sup> Mako osiyodilo tanalodo la: Unu Duliyomolo Nabiwino gudima: beda:onamata, mabu ebete ebena egelano alo ega:walo ebena ulama kuba epo ega:walo tuputupu epo iba:tamo kapimiya pikalamenako. <sup>46</sup> Piyate la: nilakapolo demalagidiloletana, la: ebe epo kapiya demalagidilola:wenama la:imano woki keba kunula:ka:? Ebe mabuma: Godote la:tamo wade wiya ba:kikalametamene? Ao, mabu mani pilolo uwatepiate atumu ibino namutupi kapiya malagidilolenaka! <sup>47</sup> Ega:walo la: la:imano epo kapiyatamo wadewade tanalo dosiyodilola:wenama la:imano woki keba kunula:ka:? La: ebe wadewade osiyodilole magumudo epo epetapi ba:kodoila:ema? Ao, mabu nanitabokobi midia:piate atumu ibino epo kapiyatamo wadewade tanalo osiyodilolenaka! <sup>48</sup> Ebema: la:imano osiyodilole magumulo wadenomamo nilukuliniyala:, la:imano Unu Duliyomolono Nabiwi keba kunula:ka: eba kunu, mabu ebegodolo kapiya kuba idi kitana:.”

## 6

### *Epono Wadewade Osiyodilole Tanalo Ega:walo Nigologolopiatamo Nilakapo Inamabu Ikalame Tanalo*

<sup>1</sup> Ebene Ya:sute walo na:kegiya, “La: nanisiwale, wadewade tanalo osiyodilole tetelo epetapiate la:imano wade tanalo uima: ibino ololo apulo ako-osiyodilola:la:. La: eba kunu dowagela:ema la:imano Unu Duliyomolono Nabiwite la:tamo wade wiya a:kikalametamene. <sup>2</sup> Ebema: nilakapo inamabu nigologolopiatamo ikalame tetelo epetapiate la:imano wade osiyodilo tanalo uima: awokala ako-osiyodilola:. Numa:la:, mena netewa epate balidi ibilamole motolo ega:walo epono ololo apulo ibino nilakapo inamabu diyamo kawonomago ikalamenaka epetapiate ibi kemoiolema:. Ebema: na la:tamo nani tabo gemo, iba:te epono moirole tanalo magumulo ibino kawo wiya iyalo elawa:, Godogodone walo a:kuwatema:na:. <sup>3</sup> Wiyasiya la:imano nilakapo inamabu ikalame tetelo modobola la:le diya gabodo nosiyodiliyala:, ma kunu la:imano wade namutudawa idite akoiyatawala:, Godoko kapiyate niyatawamene. <sup>4</sup> Iyo, la: nilakapo inamabu diya gabodo nikalamenakiyala:, ebena la:imano Nabiwi Godote la:imano diya osiyodilo tanalo umite ebete a:ka:tuwa: la:tamo wade wiya bikalamenakoma:ta.”

### *Godago Tabo Gela Tanalo*

#### *Luk 11.2-4*

<sup>5</sup> Ebene Ya:sute walo na:kegiya, “La:le Godago tabo gela tetelo mena netewa epoma: akoeda:oala:. Iba:te balidi ibilamole motolo ega:walo epono ololo apulo utitamate tabo madodo unamo wadipalatelelo Godotamo ebo gelanaka, mabu ibi ubila epate ibino gela tanalo kolowilatelema:. Ebema: na la:tamo nani tabo gemo, iba:te epono moirole tanalo magumulo ibino kawo wiya iyalo elawa:, Godogodone walo a:kuwatema:na:. <sup>6</sup> Wiyasiya a:ma:le Godago tabo degelaema, modobola a:ma: motamo nodolawete gigiyu na:pemopiye. Ebene a:ma:le a:imano Nabiwa:go diya gabodo tabo eba gelalo, a:ma:le ebe a:kuma:emene, wiyasiya ebete a:imano diya osiyodilo tanalo umite a:ma:tamo wade wiya ebo kikaema:ta.

<sup>7</sup> “Ebema: a:ma:le Godago tabo gela tetelo, a:ma: Godoko iyatawa: lumagima: akoeda:la:. Numa:la:, ebako lumagite Godoko toweome tetelo ma kunu malagidilonako, ‘Nale atu towetowe tabo bilibili teta:mo degenakomo, ebema: Godote naimano tabo nanitabonomolo kolowimene.’ <sup>8</sup> Wiyasiya la: ebako lumagima: akoeda:oala:, mabu la:le la:imano iyaiya modoboa: tanalo Godoko ana:no ebete iyalo iyatawanako. <sup>9</sup> Ebema: la: Godotamo towetowe tabo ma kunu negelanakiyala:,

‘Aimano Unu Duliyomolono Nabiwi,  
modobola a:imano talena mailo  
epate nadipatema:na:,

<sup>10</sup> ega:walo modobola a:ma:le Kawo Elawodawama: deda:wena  
ebe tanalote nawokalamene.

Nanitabola, a:ma:le a:imano ubi tanalo keba kunu kalomawena  
Unu Duliyomololo eba kunu bosiyodilolenakoma:ta,  
ebema: modobola a:ma: me opolo  
a:imano ubi tanalo atumu na:kosiyodilolenakiye.

<sup>11</sup> ‘Ega:walo modobola a:ma: me kapiya egelano bae  
atamo modobolo nikaeama:.

<sup>12</sup> Ega:walo epetapiate atamo kuba dosiyodilolena,  
ale ebe kuba egebolelamete  
ka:dodolomatililaemalema:,  
ebema: modobola a:ma: atumu  
aimano kuba egeboleama:wete na:dodolomatiliama:.

<sup>13</sup> ‘Ega:walo Saitanakono kuba gabamo wabuga:ta magumulo  
a:ma:le wiyasiya a eba walubilo  
a:imano wade gabodo nemagataenakiye,

iyoy, ebena kuba osiyodilo magumune  
aimano igilo na:mula:leama:,  
mabu a:imano Kawo Elawodawa tanalo,  
ega:walo elawo kawonomo,  
ega:walo amama tanalo

uwomua: uwomua: tetelo a:ma:godolo ba:pola:nama:na:  
Taula.’ ”\*

<sup>14</sup> Ya:sute tabo moga:melo walo na:kegiya, “Epetapiate kuba la:tamo dosiyodiloliya, la:le ibino kuba da:dodolomatililama:ema la:imano Unu Duliyomolono Nabiwite atumu la:imano kuba egebolelametate ka:dodolomatililaema:ta, <sup>15</sup> wiyasiya la:le epetapino kuba dodolomatililamea:no, la:imano Unu Duliyomolono Nabiwite atumu la:imano kuba egebolelametate a:ka:dodolomatililametamene.”

*Godokono Woko Osiyodiloma: Bae Naoa:no Pola:na Tanalo*

<sup>16</sup> Ebene Ya:sute walo na:kegiya, “La:le Godokono woko osiyodiloma: bae naoa:no da:pola:wenama, mena netewa epoma: akoeda:oala:. Iba:te bae naoa:no pola:na tetelo ibino dopo mibomiboma: eda:olamenaka, mabu ibi ubila epate ibino bae naoa: tanalo kumilaema:. Ebema: na la:tamo nani tabo gemo, iba:te epono moiole tanalo magumulo ibino kawo wiya iyalo elawa:, Godogodone walo a:kuwatema:na:. <sup>17</sup> Wiyasiya a:imano bae naoa:no

\* **6:13:** Ma:t 6.13b buka apuno tabo Ma:tiyute bukamo kakuloliya:, wiyasiya ebena buka osiyodilo walogabo apune nanitabokobi mididawa idite akuloliya.

okoli tetelo modobola a:ma: ebe tanalo diya gabodo nosiyodilonakiye. Ebema: a:ma: bae kapete umia:no, a:ma:le kalakalago dokoliawena a:ma: eba kunu nokolitiye, a:ma:le a:imano eke wadipalatela:wete a:imano ololo wadenomamo kukulama:ta. <sup>18</sup> Ebene epate a:kiyatawaoma:na: a:ma:le bae naoa:no dokoliawita, Nabiwi Godoko kapiyate kiyatawamene. A:ma:le ebe a:kuma:emene, wiyasiya ebete a:imano diya osiyodilo tanalo umite a:ma:tamo wade wiya ebo kikaema:ta.”

*Godokono Unu Duliyomololo Inamabu Dogodogokobi Midili Tanalo*

*Luk 12.33-34*

<sup>19</sup> Ebene Ya:sute walo na:kegiya, “La: me opolo inamabu dogodogokobi akomidilinala:, mabu me opolo wadewade kaliku nopaiate a:kubailamenaka ega:walo auli inamabu nabote atumu a:ka:kubailamenaka. Iyo, nanitabola, pilo epate moto guamo podolote la:imano inamabu epetapi gito ka:pa:kubailaema:na:. <sup>20</sup> Ebema: modobola la: Godokono Unu Duliyomololo la:imano inamabu dogodogokobi na:midilinala:, mabu ebolo nopaiate inamabu kenaona:, ega:walo nabote inamabu ka:kubailamena:, ega:walo pilo epate moto guamo odolote la:imano inamabu a:kuwatema:na:. <sup>21</sup> La: nanisiwale! La:imano inamabuate kebolo da:pola:nama:na: la:imano tepo magumuno woki atumu ebolo ka:na:pola:nama:na:.”

*Apeno Alono Tanalo*

*Luk 11.34-36*

<sup>22</sup> Ebene Ya:sute walo na:kegiya, “Lumagino apeno alo ebe ebena balidila. Ebema: a:imano balidite wadenomamo da:pukuilaemene a:imano tepo magumuno alote atumu wadenomamo ka:ka:pukuilaemene, <sup>23</sup> wiyasiya balidite wadenomamo pukuilamea:no a:imano apete idoko magumulo kitanamene. Ebema: a:ma: nanisiwale, a:imano tepo magumuno alote didokomene, ebe idoko tanalo beda: kawonomola:ka:!”

*Godoko Ega:walo Mani Ibino Tanalo*

*Luk 16.13*

<sup>24</sup> “Ega:walo me tanalo idila, lumagite netewa elawodubatamo wokedawama: eda:ma: modoboa:. Ebete eba kunu dowagelemene iditamona eba dowanalo idi nilakapolo bemalagidilonamene, ega:walo ebe iditamona eba utinalo idi ubia:noma: beda:namene. Ebema: a:ma: atumu, Godotamo ega:walo manitamona kapiyate tetelo tuduwatama: modoboa:.”

*Godoko Nanitabokobi Midi Tanalo*

*Luk 12.22-31*

<sup>25</sup> Ebene Ya:sute walo na:kegiya, “Nale la: analemata, la:imano ilukulio tanaloma: woki bilibilima: akoeda:onala:, iyo, la:le nao inamabu, nio inamabu, ega:walo pupuliono inamabu uwatema: kawonomamo akomalagidilola:la:, mabu nao inamabu ega:walo pupuliono inamabu iba:te kawokawoma: keda:ona:. Nao inamabute lumagitamo nanitabo igilo ba:kikaemene? Ao, a:kikaemene, ega:walo pupuliono inamabute atumu ebena ape uwomua: tetelo a:kowalubinamene. <sup>26</sup> Ebema: la: olaolano tanalo nemalagidilala:, iba:te pali inamabu kamiona: ega:walo iba:te pelamete naono pali inamabu ka:petapionakoa:, iyo, ibino pali inamabu alomona moto puliyala, wiyasiya la:imano Unu Duliyomolono Nabiwite iba:tamo bae modobolo ikalamenako. Numa:la:, Godokono nilakapo nanitabolo bitana olaolatamo, wiyasiya la:tamo keba kunu kitanale? Nanitabola, ebena nilakapo la:tamo kawonomoma: eda:te uwomua: uwomua: tetelo bitanamene! <sup>27</sup> Ebema: la: woki bilibilima: akoeda:oala:. Lumagite ebe

a:ka:tuwa: ebena a:e tete egela ida:mo keba kunu na:kiyatimene, ega:walo ebete ebena igilo keba kunu na:kegeyageyaima:tepamene? Gabo puliyala, kitana:

<sup>28</sup> “Ebema: mabu keleka: la: pupuliono inamabuma: woki bilibilima: deda:wenama? La: me opono kaiyakaiyano tanalo nemalagidilala:, iba:te woko kosiyodilona: ega:walo pupuliono inamabu kosiyodilolona:.” <sup>29</sup> Nale la: analemata, Kawo Elawodubu Solomonote inamabu dogodogodawanomoma: eda:nami, wiyasiya ebete wadewade tita:gono inamabu da:pupulinaki, ebe kalikuno titi me opono kaiyakaiyano titite nodoilina. <sup>30</sup> Numa:la:, me opono uwagate ka:lo napepeuta, dumutu epate elamo kiyalekema:na:, wiyasiya Godote ebe nonoka inamabu tita:gonoma: midilina, ebema: ebete atumu la:tamo pupuliono inamabu modobolo bikalamenakoma:ta. La: me tanalo wadenomamo iyatawaoa:no la:imano nanitabokobi midi tanalo Godotamo kawokawoa:!

<sup>31</sup> “Ebema: la:le woki bilibilima: eda:olo ma kunu akogelanakala:, ‘A beda: na:kenaoma:, ega:walo a beda: na:ka:nioma:, ega:walo a beda: na:ka:pupulioma:?’” <sup>32</sup> Nanitabokobi midia:piate me inamabu woki bilibila:go olena, la: wiyasiya eba kunu akowagelenala:, mabu ebe inamabu la:godolo modobolo pola:na:no la:imano Unu Duliyomolono Nabiwite iyalo iyatawanako. <sup>33</sup> Ebema: la: la:imano Kawo Elawodawa Godotamo tudila:olo ebena tuputupu okoli tanalo dopamo nowadiala:, ebena la:imano modoboa: tetelo ebete la:imano iyaiya tanalo ulamelelametate la:tamo modobolo bikalamolenakoma:ta. <sup>34</sup> Ebema: la: dumutu egelano tanaloma: woki bilibilima: akoeda:oala:, mabu ebe egelano tanalote a:ka:tuwa: kapawokalamene. Ka:lo egelalo da:pola:na ebe iyaiya tanalo nemalagidilola:, wiyasiya egela idino kuba tanalate pemaimia:no dopamo tole tanalote la:tamo akopa:la:.”

## 7

### *Epono Tanalo Anagilamelelame Tanalo*

#### *Luk 6.37-38,41-42*

<sup>1</sup> Ebene Ya:sute walo na:kegiya, “Epo epetapino kuba osiyodilole tanaloma: la:le ibi kubakubapima: samamo akoka:la:miala:, ebena Godote la: kubakubapima: a:keka:la:mitamene,” <sup>2</sup> mabu la:le epono tanalo keba kunu kanagilamelelama:ema, Godote la:imano tanalo eba kunu kanagilamelelaema:ta, ega:walo la: epetapiatamo keba kunu kosiyodilola:wenakoma, eba kunu Godote la:tamo atumu ba:kosiyodilolenakomene. <sup>3</sup> Keleka: mabu a:ma:le ekawino balidilo nonoka da:peso umilo wiyasiya a:imano balidilo ditana ebe kawo kewa tete kuma:wena:? <sup>4</sup> Ega:walo beda: mabuma: a:imano ekawitamo ma kunu degeawita, ‘Modobola a:imano balidilo ditana ebe nonoka da:peso nale kelaemamota,’ wiyasiya a:imano balidilo ditana ebe kawo kewa tete a:ma: kelawa:wena:? <sup>5</sup> Eiye! A:ma: mena netewa lumagilata! Modobola a:ma: dopamo a:imano balidilo ditana ebe kewa lawa:wete, a:ma:le walone wadenomamo mela:wete a:imano ekawino balidilo ditana ebe nonoka da:peso ebo kelaema:ta.

<sup>6</sup> “Ega:walo me tanalo idila, la:le Godokono talena inamabu gaagaatamo akoikalama:la:. La: eba kunu dowagela:ema, diyala, iba:te la:tamo olobila:te la: kubanomamo da:baloletamene, ega:walo la:imano wadewade mani goeogoeatamo akoikalama:la:, iba:te ebe inamabu agowamo mikitaote gito da:ba:miyapama:na:.”

*Modoboa: Tetelo Godoko Toweome Tanalo*  
*Luk 11.9-13*

<sup>7</sup> Ebene Ya:sute walo na:kegiya, “La: Godoko na:toweoma:la:, ebete la:tamo kikalaema:ta. Iyo, la: ebena wade tanalo nowadiala:, la:le kuimamota, ega:walo gigiyu nanakamiala:, ebete la:tamo ka:iyamidamene. <sup>8</sup> Numa:la:, piyate Godoko da:toweomenaka iba:te ebegodone kelaema:na:, ega:walo piyate ebena wade tanalo dowadinaka iba:te kuima:na:, ega:walo piyate gigiyu danakaminaka ebete iba:tamo ka:iyamidamene. <sup>9</sup> La: magumulo kebe dubu ebena gudute ebe baema: da:toweoemene, wiyasiya ebetamo nokola ba:kikaemene? <sup>10</sup> Ega:walo a:imano gudute a:ma: namoma: da:toweometamene, a:ma: wiyasiya ebetamo bu kalu ba:kikama:emene? <sup>11</sup> Numa:la:, la: wadewade epoa: wiyasiya la: iyatawalata la:imano guda:tamo wadewade bae ikalaema:, ebema: la:imano Unu Duliomolono Nabiwi atumu iyatawanomola wadewade tanalo epatamo ikalaema:, piyate ebe da:toweomenaka iba:tamo kikalaemene.

<sup>12</sup> “Ebema: epate la:tamo beda: tanalo osiyodiloma: la:le ubi diyata:wenakoma, la: epetapiatamo eba kunu nosiyodilonakiyala:, mabu Godote ebena Totomu Tabo Mosesedo epatamo dikalamiya ega:walo ebena woki awokalimipiate ebena Bukamo dakuloliya, ebe kawokawo tabono magumu kapiya ebe ma kunula, la: epetapiatamo nilakapo tanalo nawokaliminakiyala:.”

*Ta:kumi Gigiyuno Tanalo*  
*Luk 13.24*

<sup>13</sup> Ebene Ya:sute walo na:kegiya, “La: ta:kumi gigiyudo nopila:la: mabu Ela Opamo da:nopila:onaka ebe gigiyu kawonomola, gabo kodakoda: Epo bilibilinomate ebena nopila:ote ebe gabodo tolamena. <sup>14</sup> Wiyasiya Godokono Igilo Duliomolamo da:nopila:onaka ebe gigiyu ta:kuminomola, gabo kodakodala. Kapiyakapiya epate ebe gigiyu numite ebena tolamena.”

*Kewa Ega:walo Ebena Da:imi*  
*Luk 6.43-44; 13.25-27*

<sup>15</sup> Ebene Ya:sute walo na:kegiya, “La:le Godokono mailamo a:da: tabo kiyawaopi wadenomamo nulama:la:. Iba:te alagiole sipi-goeogoeono tama pupulite la:tamo ebo pelamenaka, wiyasiya ibino tepo magumulo ibi elawoelawo gaagaa keba kunula:ka: eba kunula. <sup>16</sup> La: ibino osiyodilole tanalo wadenomamo nulamelelamiyala:. Lumagite wadewade gala:ipi da:imi moeagono kewalo a:ka:nulaemene, ega:walo ebete moeagono kewamo tote umei kewano da:imi a:ka:netapiomene. <sup>17</sup> Numa:la:, wadewade kewalo wadewade da:ima:te ka:noloma:na:, ega:walo kuba kewalo kubakuba da:ima:te ka:noloma:na:. <sup>18</sup> Iyo, wade kewalo kubakuba da:ima:te a:ka:noloma:na:, ega:walo kuba kewalo wadewade da:ima:te a:ka:noloma:na:, <sup>19</sup> ebema: nanitabola, wadewade da:imi noloa: kewa epate lute elamo kiyalekema:na:. <sup>20</sup> Ebema: la: a:da: tabo kiyawaopino osiyodilole tanalo eba ulamelo la:le ibino nolo tanalamo ibino nanitabo tanalo ebo kiyatawaomamota.

<sup>21</sup> “Numa:la:, piyate na Kawodawama: gito deka:na:minaka wiyasiya nanitabo tanalo puliyala, ebe epate Godokono Unu Duliomolamo a:ka:nopila:oma:na:. Wiyasiya piyate naimano Nabiwino ubi tanalamo da:tudila:ona, ibi kapiyate ebena Unu Duliomolamo ka:nopila:oma:na:. <sup>22</sup> Ebema: Godokono Kawo Egelalo epetapiate natamo ma kunu kegelama:na:, ‘Kawodawa, Kawodawa! Ale a:imano mailamo Godokono



tabo a:kiyawaonakima:, ega:walo a:imano mailamo kuba uliyana alibole-nakima:, ega:walo atumu ale anoano tanalo epetapi osiyodilolenakima:.’  
<sup>23</sup> Wiyasiya nale iba:tamo kegemamo, ‘Na iyatawa: la:imano tanalo. La: kuba osiyodilolepilata, nagodone na:tolama:la:!’ ”

*Moto Netewa Etemotepino Tanalo*

*Luk 6.47-49*

<sup>24</sup> Ebene Ya:sute walo na:kegiya, “Kebe lumagite naimano tabo olowiote ebe iyaiya tanalo dosiyodilolemene, ebe wade mulo woki lumagila. Ebete ebene moto kodakoda damela unamo detiya, ebe dubu keba kunula:ka: eba kunula. <sup>25</sup> Ebe tetelo ulamate dowiya obote ebo odoliya, ebene kawo awanomote pete moto dapadimagotiya motote kekagiya: mabu ebete wade damelamo etiya. <sup>26</sup> Wiyasiya kebe lumagite naimano tabo olowiote osiyodilolea:no, ebe daedale woki lumagila. Ebete ebene moto wiyo damelamo detiya ebe dubu keba kunula:ka: eba kunula. <sup>27</sup> Ebe tetelo ulamate dowiya obote ebo odoliya, ebene kawo awanomote pete moto dapadimagotiya motote kagate kubanomoma: ebo ediya. O olalati beda: kawonomola:ka:!”

*Tabo Olowiopiate Ya:sukono Tanaloma: Danoanoiya*

<sup>28</sup> Ebene Ya:sute me iyaiya tanalo kiyawao dolopoligiya ebene tabo olowiopi bilibilinomate nanoanoutiya, <sup>29</sup> mabu ebete Godokono elawamo iyatulamiti, wiyasiya ebe ibino Godokono Totomu iyatulamepi keba kunula:ka: eba kunua:.

## 8

*Ya:sute Kukulakukulago Dubu Wadekobi Da:midiya*

*Mak 1.40-45; Luk 5.12-16*

<sup>1</sup> Ebe tetelo Ya:sute damela unune da:piwisigiya epo epetapi bilibili-nomate ebe a:wa:midalo ebo tolamiya. <sup>2</sup> Ebene kukulakukulago dubute ebetamo pete ebene pupamo pokolite na:pegiya, “Kawodawa, a:imano ubi ditametana, a:ma:le na wadekobi ka:midinima:ta.”

<sup>3</sup> Ya:sute ebene koto uwamidate ebe eba ologilo ebetamo negiya, “Na ubila, a:ma: wadekobi nolowia!” ebema: ebe tetenomolo kukulakukula temetemete ebegodone dolopoligiya ebete wadekobi ebo olowiya. <sup>4</sup> Ebene Ya:sute ebetamo tabo idi ma kunu kegiya, “A:ma: naimano tanaloma: epo akonanala:la: Modobola a:ma: wiyasiya me tetenomolo toawete a:imano ape Godotamo kalimagono ikameodawatamo nanawokalimiye, ebene kalimagono nilakapo inamabu Godotamo akona:nikamiye, Mosesete da:kiyawaiya eba kunu. Ebe tanalote epo kiyatulaemene a:imano temetemete olopoligi.”

*Ya:sute Gowelaodawa Elawodubuno Wokodawa Wadekobi Da:midiya*

*Luk 7.1-10*

<sup>5</sup> Ebene Ya:sute Kapeniyama duliyaomolamo da:tiya Loma epono gowelaodawa elawodubu idite ebetamo pete ebe petoweomelo napaniya, <sup>6</sup> “Kawodawa, naimano wokodawa motolo kawo gabugabuago watita, ebe ape kodakoda temetemete umita.”

<sup>7</sup> Ebene Ya:sute ebetamo negiya, “Modobola, na pete ebe wadekobi ka:pa:midimamo.”

<sup>8</sup> Gowelaodawa elawodubute tabo eba wiyalo negiya, “Ao, Kawodawa, eba kunua: Na wade lumagia: a:ma:le naimano motamo podoloma: Wiyasiya na niyatawitamo, a:ma:le motamo pea:no tabo gito degeaemene, naimano wokodawate nanitabonomolo wadekobi kolowimene. <sup>9</sup> Mabu na

atumu gowelaopino kawokawo elawodubuno opodawama: eba eda:nalo ibino tabamo a:tuduwatanakomo, ega:walo atu tetelo naimano gowelaopiate naimano umi magumulo pola:na. Ibi magumulo nale idi danamo, ‘A:ma: na:toa!’ ebete ebo ka:tomene. Ega:walo idi dakanamo, ‘A:ma: na:pa:!’ ebete ebo ka:pemene. Atumu nale naimano wiya: wokodawa danamo, ‘A:ma: me tanalo nosiyodila!’ ebete ebe tanalo kosiyodilomene. Ebema: Kawodawa, modobola a:ma: tabote negea naimano wokodawate wadekobi kolowima:.”

<sup>10</sup> Ya:sute ebe tabo dolowiya ebete nela:wiya, ebema: ebe dowloma:titiya ebe epatamo negiya, “Na la:tamo nanitabonomolo gemo, na Isalaela epo bilibilinomo magumulo mako lumagino nanitabokobi midi tanalo kuminakoa!” <sup>11</sup> Nale la: analemata, epo bilibilinomate me opo kawonomono apune apune pelamolete, iba:te A:ibalayamako, Aisa:keko, ega:walo Ya:ikoboko iba:go kapimiya Kawo Elawodawa Godokono soliyomu bailo ka:pa:pola:nama:na. <sup>12</sup> Wiyasiya la: Yu epo epetapi Godote la: idoko magumamo ka:piyalekema:ta, ebe idoko magumulo la: lalo eba oliomolelo kawonomamo kiimimamota.”

<sup>13</sup> Ebene Ya:sute gowelaodawa elawodubutamo negiya, “Mabu a:ma:le na nanitabokobi a:midina:ta, ebema: a:ma: toawete a:imano wokodawa na:numiye, ebete wadekobi olowi.” Nanitabola, ebe tetenomolo Ya:sute ebe tabo eba gitalo wokodawate wadekobi ebo olowiya.

*Ya:sute Pitakono Moto Lapino Wadekobi Da:midiya*

*Mak 1.29-31; Luk 4.38-39*

<sup>14</sup> Ebe tetelo Ya:sute Pitakono moto guamo nodolote ebenu moto lapino ebo numiya, ebete ape enaena gabugabu watiti. <sup>15</sup> Ebene Ya:sute ebe kamiyaleno koto dologimiya, gabugabute ebegodone eba olopoligolo ebete maigate Ya:suko mabuma: bae okalimi woko ebo wagilimiya.

<sup>16</sup> Eba adimonalo duliyomolo epate kubakuba uliyanagopi bilibilinomo Ya:sutammo ebo magaeleniya, ebenu ebete tabo kiyawao kapiyamo kubakuba uliyana iba:godone eba alibolenalo temetema:gopi epetapi bilibilinomo atumu wadekobi ebo ka:midioleni. <sup>17</sup> Nanitabola, Ya:sute makomako wadewade tanalo epatamo osiyodilolenaki, Godokono woki awokalimidawa Aisayate degiya ebe tabote nanitaboma: keda:ma:, iyo, ebe dawate iyalo tetelo tabo ma kunu giya, “Ebate aimano gabugabu ega:walo temeteme kuwateamene.”

*Woki Netewago Ya:suko Waloma:ta Modoboa:*

*Luk 9.57-62*

<sup>18</sup> Egela idilo epo epetapi bilibilinomate Ya:suko da:na:wa:midadigiya, ebete ebe tanalo umite ebe waloma:tapi nanaliya, “A paka: apuamo ka:na:iwaliye.”

<sup>19</sup> Ebe tetelo Godokono Totomu iyatulamedawa idite pete ebetamo na:pegiya, “Iyatulamedawa, a:ma: kebamo ka:toaemene, nale a:ma: ebamo kowaloma:tamota.”

<sup>20</sup> Wiyasiya Ya:sute ebenu tabo olowite negiya, “Iyaiya, a:ma: dopamo me tanalo idi wadenomamo nemalagidila. Tumu gaagaano lao bai damela gugu ba:pola:lamena ega:walo olaolate ibino moto etemoteonaka, wiyasiya na Epono Naniwi\* naimano wata bai puliyala.”

<sup>21</sup> Ebene waloma:tadawa idite negiya, “Kawodawa, modobola na dopamo tote, naimano nabiwi kadelete da:emene, nale ebenu ape bobamo niyatite na walone a:ma: kowaloma:emamota.”

\* **8:20:** Epono Naniwi ebe Ya:sukono mailo idila. Ebe a epo bilibilinomono Naniwila, atumu Godoko ebe aimano Naniwila.

<sup>22</sup> Ya:sute ebetamo nowamiya, “Ao, a:ma: ka:lonomo na nowaloma:ena, wiyasiya modobola a:elao epate ibi a:ka:tuwa: ibino a:elaopi bobamo nalomoma:na:.”

*Ya:sute Awa Matalukobi Da:midini  
Mak 4.35-41; Luk 8.22-25*

<sup>23</sup> Ebene adimo tete eba tatalinalo Ya:sute peamo da:niwisigani ebe waloma:tapiate eba:go kapimiya niwitioniya. <sup>24</sup> Iba:te peamo olonate da:tolameniya ebe tetelo kawo awanomote eba penalo kawokawo ulate maimionate pe guamo obo ebo polomeni, wiyasiya Ya:sute pe gulo u ebe watani. <sup>25</sup> Ebema: waloma:tapiate ebetamo pelamenate ebe eba pamutiyano ebo pananiya, “Kawodawa, aimano igilo na:mula:leama:! A ka:elaomalema:!”

<sup>26</sup> Ya:sute wiyasiya negeni, “La: beda:ma: ka:toletoleawenama? La:imano nanitabokobi midi tanalo depesonomola!” Ebe tetelo ebete maiganate awa ega:walo ulo kawiya nanaleni, “La: nolodiyobala:!” ebene paka:te matalukobi olowinomo gito olowini.

<sup>27</sup> Ebe tetelo ibi bilibilinomate eba anoanonalo negelaniya, “Me kebako dubula:ka:? Awa ega:walo ulo iba:te ebene tabo olowite a:tudila:!”

*Ya:sute Gadala Duliymolopi Kubakuba Uliyanago Dubu Netewa  
Wadekobi Da:midoliya*

*Mak 5.1-20; Luk 8.26-39*

<sup>28</sup> Ebene egela idilo Ya:sute paka: apuamo na:iwate Gadala duliymolono opamo nemaigate, damelamo eba nodololo kubakuba uliyanagono dubu netewate eba:go ebo palugiya. Ebe dubu netewate a:elao epono bobo bailo okolionamiya ega:walo ibi elawoelawonomola, ebema: epate ebe gabodo wapata:laema: kawonomamo toletoleonamiya. Nanitabola, ebe opo epono tanalo ma kunula, iba:te maboele nokola damela eba obobolelo iyaiya bobo ebo osiyodilolenakiya iba:te ibino a:elao epono ape alomoma:. <sup>29</sup> Me dubu netewate Ya:suko dumiya ebe tetenomolo iba:te gelatepaolo negeliya, “A:ma: Godokono Gudulata! A:ma: atamo beda: tanalo na:kosiyodilaemene? Godokono kuba wiya ikalame tete pea:no, a:ma: dopamo a anakapuaema: ka:pa:wa:?”

<sup>30</sup> Ebe tetelo ibi niyakabolo dabiolo goeogoeo bilibilinomate nala:go wapata:lamitiya, <sup>31</sup> ebema: kubakuba uliyanagopi dubate Ya:suko toweomelo negeliya, “A:ma: a me dubagodone aliboema: ubi diyata:wita, modobola a:ma:le a goeogoeatamo naliboa:.”

<sup>32</sup> Ya:sute iba:tamo negiya, “Na:tolama:la:!” Ebe tetelo iba:te dubagodone nemaimite goeogoeatamo ebo nopila:iya, ebema: ebe goeogoeate damela unune puila:ote maboele damelane da:na:gudiya, obamo nololuote ibi bilibilinomate gito na:elaiya.

<sup>33</sup> Ebe tetelo Ya:sute kubakuba uliyanagopi wadekobi keba kunu ka:midoliyale, goeogoeo ulamepi dubate ebe tanalo umite ibino duliymolamo puila:ote epo bilibilinomo ebo nanaliya. <sup>34</sup> Ebene duliymolamo epo bilibilinomate Ya:sutamo pelamete, iba:te ebe da:pumiya ebe napaniya ebete ibino opo atepate ka:toma:.

## 9

*Ya:sute Ape Kodakoda Temetema:go Dubu Wadekobi Da:midiya  
Mak 2.1-12; Luk 5.17-26*

<sup>1</sup> Ebene Ya:sute peamo olote paka: apuamo na:iwate ebene okoli duliymolamo Kapenyamamo gito nemaigiya. <sup>2</sup> Ebe tetelo epate ape kodakoda



temetema:go dubu patapatago aguwatiya, ebene Ya:sute ibino nanitabokobi midi tanalo umilamete ebetamo negiya, “Naimano namutudawa, a:ma: nekalakala! Godote a:imano kuba egebolemetate a:dodolomatilima:ta.”

<sup>3</sup> Wiyasiya Godokono Totomu iyatulamepi epetapiate ebe tabo olowite ibi magumulo tabo ma kunu gelitiya, “Me dubute amamago kuba tabo ge Godokono ololo apulo!”

<sup>4</sup> Iba:te ibino tepo magumulo degeliya, Ya:sute iyatawate iba:tamo negiya, “Mabu keleka: la:imano tepo magumulo me kuba tanalo demalagidilawitama? <sup>5</sup> Me tabo kodakodala:ka: nale gema:, ‘Godote a:imano kuba egebolemetate a:dodolomatilima:ta?’ O me tabo idi gema: kodakodala:ka:, ‘A:ma: maigawete na:toa?’ <sup>6</sup> Ebema: nale la: kiyatulaemamota na Epono Naniwigodolo elawo bitana me opo kawonomolo epono kuba egebolemete ka:dodolomatililaema.” Ebene Ya:sute temetema:go dubutamo negiya, “A:ma: maigawete, keta mokopiamidawete motamo na:toa.”

<sup>7</sup> Ebema: ebe dubute maigate ebene motamo gito tiya. <sup>8</sup> Nanitabola, epo bilibilinomate ebe tanalo umite eba anoanoutalo Godokono mailo unamo ebo adipatiya, mabu ibino ololo apulo ebete Ya:sudo ebene elawo kawonomo awokalimiya.

*Ya:sute Ma:tiyuko Deka:miya*  
*Mak 2.13-17; Luk 5.27-32*

<sup>9</sup> Ya:sute ebe motone nemaigate eba petonatolo dubu idi ebo numiya, ebene mailo Ma:tiyutela, ebe ta:kese uwatedawala, ebete ebene woko bailo okoliti. Ebe tetelo Ya:sute ebetamo negiya, “A:ma: na nowaloma:ena:,” ebene ebete maigate Ya:suko nowaloma:tiya.

<sup>10</sup> Ebene Ya:sute ebe waloma:tapiago Ma:tiyukono motolo bae eba nautalo, ta:kese uwatepi ega:walo Godokono Totomu Tabo uwatea:pi ibi bilibilinomo epetapiate pelamete iba:go pepola:niya. <sup>11</sup> Ebe tetelo Pa:lisi tanebapi dubu epetapiate ebe tanalo umite ebe waloma:tapiatamo negeliya, “La:imano iyatulamedawate ta:kese mani elemasigilo uwatepi ega:walo Godokono Totomu Tabo uwatea:piago bae beda:ma: kenanakole?”

<sup>12</sup> Ya:sute ebe tabo olowite negiya, “Wadewade epate doketatamo a:ka:tolaema:na:, wiyasiya gabugabuagopiate ka:tolaema:na:. <sup>13</sup> Iyo, piyate a:ka:tuwa: degelana, ‘A wadewade epola,’ na ebakobako epo uwatema: ka:piya:. Na wiyasiya kubakuba epo kapiya uwatema: piyamo, iba:te na kowaloma:enema:. Ebema: modobola la: me Godokono Buka apuno tabo magumu na:nowadiala:, ‘La: natamo kalimagono inamabu gito akopikanama:la:, na ubia:nola. Wiyasiya na ubila la:imano tepo magumulo nilakapo tanalo kuima:.’ ”

*Godokono Woko Osiyodiloma: Bae Naoa:no Pola:na Tanalo*  
*Mak 2.18-20; Luk 5.33-35*

<sup>14</sup> Ebene Yonekono waloma:tapi epetapiate Ya:sutamo pelamete ebe napalatediya, “Mabu keleka: a ega:walo Pa:lisi tanebapi a bilibilinomate iyaiya tetelo bae naoa:no da:pola:nanakoma: Godokono woko osiyodiloma:, wiyasiya a:ma: waloma:tapiate bae naoa:no ka:pola:nanakoa:?”

<sup>15</sup> Ya:sute iba:tamo negiya, “Dubute kamiyale daidimene, ebe tetelo ebene namutupiate soliyomu bailo tepo mibomibago gito ba:ka:pola:nama:na:? Ao, modoboa:! Iba:te eba:go soliyomu bae kapimiya kenaoma:na:. Wiyasiya kamiyale oli aidi dubute ebene kamiyale duliyo molo ida:mo magata tete na:pe, nanitabola, ebe tetelo ebene namutupiate ibino tepo temeteme tanaloma: bae naoa:no ka:pola:nama:na:. Ebema: numa:la:, me tete ebe la:imano kalakalago bae nao tetela mabu nale la:go bokolinamo.”

*Tagala Okoli Tanalo Ega:walo Oli Okoli Tanalo*

*Mak 2.21-22; Luk 5.36-39*

<sup>16</sup> Ebene Ya:sute tabo moga:melo walo na:kegiya, “Lumagite oli kaliku apu tagala kalikuno bolegala:mo a:kowaluomene, mabu kaliku ukula tetelo ebe oli kaliku apute tagala kaliku kanagiyamidalemene, ebene bolegalete kawonomoma: keda:mene. <sup>17</sup> Ega:walo atu gabodo lumagi idite tagala gautu-goeo tama kalila:mo oli da:imi obo akalatemene, mabu oli da:imi obote tagala gautu-goeo tama kalili ka:na:ta:pulaemene, ebene da:imi obote opamo ka:ka:liyaote da:imi obo ega:walo kalili ibi netewate kapiya tetelo ka:kubakubaoma:na. Me mabuma: iyatawadawate oli da:imi obo olioli tama kalili kapiyamo nalateonakomene, da:imi obo ega:walo kalili iba:te tete geyageyalo wadenomamo ka:pola:nama.”

*Yu Watodawa Dubute Ya:suko Da:toweomiya Ebeno Buwele Wadekobi Ka:midima:*

*Mak 5.21-23; Luk 8.40-42*

<sup>18</sup> Ya:sute me tabo iba:tamo eba kiyawautalo, Yu watodawa dubute ebetamo pete pupamo pokolite na:pegiya, “Naimano buwele ka:ma:nomo a:e, wiyasiya a:ma: pa:wete a:imano koto ebetamo da:powatila:emene ebete a:ene walo ka:kemaigamene.”

*Kalima Ka:ka:liya Temetema:go Kamiyalete Ya:sukono Kaliku Dologiya*

*Mak 5.24-34; Luk 8.42-48*

<sup>19</sup> Ebema: Ya:sute maigate ebe waloma:tapiago ebe kawo dubu ebo waloma:tiya. <sup>20</sup> Ebe tetelo kamiyale idi 12 ulama tetelo kalima ka:ka:liya temetemetete duminami, ebete Ya:sukono walogabo apune pete ebeno kaliku ebo pologiya, <sup>21</sup> mabu ebete nemalagidiliya, “Nale ebeno kaliku dologimo, nale wadekobi kolowimamo.”

<sup>22</sup> Ya:sute oobligate ebe dumiya ebetamo negiya, “Kamiyale, a:ma: nekalakala! A:imano nanitabokobi midi tanalote a:ma: wadekobi a:mida:ta.” Ebe tetenomolo ebe kamiyaleno temetemetete ebo olopoligomiya.

*Ya:sute Yu Watodawa Dubuno Buwele A:ene Dadipatiya*

*Mak 5.35-43; Luk 8.49-56*

<sup>23</sup> Ebene Ya:sute Yu watodawa dubuno motamo pete a:e buwele liyaema: bibolo da:moleutiya ebe dubu ega:walo epo bilibilinomo ebo pulamiya, iba:te gowela kawonomago pola:niya. <sup>24</sup> Ebema: ebete ibi nanaliya, “La: bilibilinomo moto gune na:nemaimiala:. Buwele da:peso ka:eaka:, ebe u watita.” Wiyasiya ibi bilibilinomate ebe nekalakalatiya. <sup>25</sup> Ebe tetelo Ya:sute epo motone paliboletete buwelete dekapitani ebe baiamo nopegate ebeno koto da:nelaemiya ebete ebo maigiya. <sup>26</sup> Ebene ebe anoano tanalono tabote ebe opo kawonomamo gito tiya.

*Ya:sute Balidi Tamiolame Dubu Netewa Wadekobi Da:midoliya*

<sup>27</sup> Ya:sute ebe duliyaomolo atepate eba tonatolo, balidi tamiolame dubu netewate ebe eba waloma:tanatolo kawonomamo ebo negelapatiya, “Da:ibidikono A:la:mu! A:ma: a na:nilakapoiana:!”

<sup>28</sup> Ebene Ya:sute moto gu ida:mo nodolote ebe balidi tamiolame dubate atu motamo da:ka:nodoliya Ya:sute ibi nalateda:liya, “La: nanitabokobi na:ka:mida:witama, nagodolo elawo bitana la: wadekobi ka:midioletama:?”

Iba:te tabo eba wiyalo negeliya, “Iyo, Kawodawa, a:ma:godolo elawo bitana.”

<sup>29</sup> Ebe tetelo Ya:sute ibino balida:mo ebeno koto eba watiolelamelo iba:tamo negiya, “Mabu la:le na nanitabokobi a:midinimata, ebe mabuma:

nale la:imano balidi wadekobi ka:midiolemamo.” <sup>30</sup> Ebene ibino balidite wadekobi dolowiolamiya, Ya:sute ibi kawonomamo analelo iba:tamo negiya, “La: me tanaloma: epo epetapi akoanala:la!” <sup>31</sup> wiyasiya iba:te tote ebe opo kawonomamo Ya:sukono tanalo ebo na:kiyawaiya.

*Ya:sute Tabo Kiyawaoa: Dubu Wadekobi Da:midiya*

<sup>32</sup> Ebene ebe dubu netewate eba tutalo epo epetapiate dubu idi Ya:sutamo ebo magatiya, mabu ebe tabo kiyawaoa: kuba uliyanagonola. <sup>33</sup> Ebe tetelo Ya:sute ebegodone kuba uliyana dalibiya ebete tabo kiyawao ebo wagilimiya, ebema: epo bilibilinomate me tanalo umite anoanolo negeliya, “A Isalaela opolo mako tanalo kuminakia!” <sup>34</sup> wiyasiya Pa:lisi tanebapiate negeliya, “Ebete kubakuba uliyanano Kawodawano elawamo alibolenako, Godokono elawamoa:!”

*Ya:sute Ebeno Nilakapo Epatamo Dawokalimiya*

<sup>35</sup> Ya:sute Yu epono kawokawo ega:walo egege duliynomolodo da:petonaki, ebe tetelo ebete ibino iyaiya balidi ibilamole motolo ibi eba iyatulamelo ebete Godokono Kawo Elawodawano tanalono Wade Tabo iba:tamo ebo kiyawaonaki, ega:walo ebete ibino iyaiya temetema:gopi wadekobi a:ka:midiolenaki. <sup>36</sup> Ebene egela idilo ebete epo bilibilinomo ulamete ebeno tepo magumulo kawonomamo nilakapoilamiti, mabu iba:te woki bilibilima: ega:walo elawoa:noma: eda:utiya, sipi-goeogoeate ulamedawa:no keba kunu kilukuline eba kunu. <sup>37</sup> Ebene Ya:sute ebe waloma:tapiatamo negiya, “Godokono pali magumulo kono bilibilinomo a:kodakodaiya, wiyasiya tapio wokopi bilibilia:, <sup>38</sup> ebema: la: pali namutudawatamo towetowe tabo negelala:, ebete wokopi epetapi pali magumamo kapalibolemene wadewade kono ka:powakalamima:.”

## 10

*Ya:sute Ebeno 12 Alibolepi Dubu Dekala:miya*

*Mak 3.13-19; Luk 6.12-16*

<sup>1</sup> Ebe tetelo Ya:sute ebeno 12 waloma:tapi dubu ebetamo ka:la:mite iba:tamo elawo ebo ikalamiya, iba:te epagodone kubakuba uliyana kanalibolema: ega:walo iyaiya temetema:gopi wadekobi ka:nimidiolema:. <sup>2</sup> Me Ya:sukono 12 alibolepi dubuno mailola.

Dopo dubu ebe Saimonotela, ebeno mailo idi Pitate, ega:walo ebeno ekawi A:ndulutela.

Sebedikono gudi Ya:imesiko ega:walo ebeno ekawi Yoneko.

<sup>3</sup> Pilipiko, Batolomuko, Tomasiko, ega:walo Ma:tiyuko, ebe ta:kese uwatedawala.

A:lapiyasikono gudu Ya:imesiko, Ta:diyasiko, <sup>4</sup> ega:walo Saimonoko. Me Saimono idi ebe ubila kapela Loma gabamani epago eba gowelalo iba:te ebeno Ka:inane opo ebo katepama:.

Ega:walo walogabo dubu ebe Keliyota duliynomolodawa Yudasite, ebete walone tetelo Ya:suko anakapumipi walubiliya.

*Ya:sute 12 Waloma:tapi Dubu Daliboliya*

*Mak 6.7-13; Luk 9.1-6*

<sup>5</sup> Ya:sute me 12 dubu eba alibolelo ibi nanaliya, “La: Yua:piatamo akotolama:la:, ega:walo Samaliya opo epatamo akonemaimiala:. <sup>6</sup> Wiyasiya la: Isalaela opolo dilukuliona ebe Yu epo kapiyatamo na:tolamiyala:, iba:te tumamo dalatidioliya ebe sipi-goeogoeo keba kunula:ka: eba kunu ilukulina. <sup>7</sup> Ebene la: eba tolamelolo me tabo kapiyate na:kiyawaonatiyala:, ‘Godokono Kawo Elawodawama: eda: tete tatalila.’ <sup>8</sup> Ega:walo la: ebolo gabugabute dulamena ebe epo wadekobi na:na:midiolenakiyala:, kukulakukulagopi ibi atumu. Ebe atu tetelo a:elaopi a:e magumune nowadipalatelenakiyala: ega:walo kubakuba uliyana epagodone nalibolenakiyala:.

“Nanitabola, tete bilibilinomolo Godote ebena wadewade tanalo la:tamo nilakapolo gito ikalamenakota, ebema: modobola la: epetapi atu nilakapo tanalago nowalubilinakiyala:. <sup>9</sup> Ebema: la: eba tolamelolo kawokawo mani gatele magumamo akoalomala:, ega:walo egege mani atumu akowatala:. <sup>10</sup> Gabo tetelo la: kapiyakapiya inamabu na:pupuliyala:, epetapi akouwata:la:. Ega:walo la: inamabu alomono ikuwa, agowa pata, ega:walo gaubu atumu akouwata:la:, mabu duliyaomolo epate wade wokodawano iyaiya modobola: tanalo ebolo na:modoboilamelemenakoma:na:.

<sup>11</sup> “La: duliyaomolo ida:mo nemaimiawete wade okoli lumagi nowadiawete da:numa:ema, ebena motamo nodoloawete ebegodolo nilukula:tepawete walone ebena motone opo ida:mo ka:ka:tolaemamota, iyo, la: moto idine moto ida:mo eba kunu akonowagela:la:. <sup>12</sup> Ega:walo la: kebe motamo da:nodoloaema, modobola la: ebe moto epatamo nilakapo tabo ma kunu na:negeliyala:, ‘Godokono kalakalate la:godolo nitanamene.’ <sup>13</sup> Ebema: ebe moto epate la: kalakalago uwatetate la:imano tabo dolowima:na:, Godokono kalakalate iba:godolo nanitabonomolo kitanamene, wiyasiya iba:te la: uwateta:no, la: nilakapo tabo degelaema ebe tabono nanitabo tanalote ebolo a:kitanamene. <sup>14</sup> Ebene kebe epate la: kalakalago uwateta:no, la: ebe motone o duliyaomolone eba tolamelolo la:imano agowano tuwae na:moda:midatepaliyala:. Me tanalote ibi kiyatulaemene, Godokono tete ebe na:pe ebete ibino tanalo kapanagilamelelaemene. <sup>15</sup> Na la:tamo nani tabo gemo, Godote epono tanalo danagilamelelaemene, ebe Kawo Egelalo ebete me duliyaomolo epatamo kuba wiya kawonomamo kikalaemene. Ebe tetelo ebete Sodomomo ega:walo Gomola duliyaomolo epatamo\* kuba wiya eba ikalamelolo nilakapo kela:mo kawokalimene, wiyasiya nanitabola, ebete nilakapo idi a:kiyatimene la: uwatea:piyatamo.”

*Kawokawo Temetema:te Pelaema: Ya:sute Degiya*

*Mak 13.9-13; Luk 21.12-17*

<sup>16</sup> Ebene Ya:sute walo na:kegiya, “La: nolowiala:! La: sipi-goeogoeo keba kunula:ka: eba kunula, nale la: elawoelawo gaagaano taneba magumamo alibolemata. Ebema: piyate la:go gowelaopima: deda:ona, la:le iba:go eba na:pola:nalo modobola la: mulo wokinomago nemalagidiloleniyala:, ega:walo atu tetelo milonomoma: eba eda:olo temeteme lumagi iditamokoikamenakala:. <sup>17</sup> La: nanisiwale, mabu kubakubapiate la: elawamo uwatetate tabo anagiyamida baiamo kemagatalema:ta, ega:walo Yu epono balidi ibilamole moto gulo iba:te la: pa:ka:pa:ka:mo ka:na:ma:ga:tiolema:ta. <sup>18</sup> Iba:te la: na mabuma: iyaiya kawokawo elawodubuno ololo apuamo elawago demagataletamene, ebe tetelo la: naimano Wade Tabo iba:tamo ega:walo Yua:piatamo ka:kiyawaomamota. <sup>19</sup> Ega:walo iba:te la: tabo

\* **10:15:** Buka ka:la:mioledawa, a:ma: Sodomomo ega:walo Gomola duliyaomolo epono tanalo iyatawama: dowagela:emene, modobola a:ma: Wagilamole Mabu 18.16–19.29 numiye.

anagiyamida baiamo demagataletamene, ebe tetelo la:imano gela tanaloma: woki bilibilima: akoeda:oala:, ma kunu, ‘Na beda: tabo na:kegemo? Ega:walo na tabo keba kunu na:ka:kiyawaomo?’ Tete da:pemene Godote ebene iyaiya tabono tanaloma: la: kowalubilima:ta, <sup>20</sup> mabu la: a:ka:tuwa: a:ka:kiyawaoaema, la:imano Nabiwi Godokono Uliyanate la:do ka:kiyawaomene.

<sup>21</sup> “Ebe tetelo naniwite ekawi a:eamo kalibomene, ega:walo atu gabodo ekawite naniwi kanakapuimene. Iyo, dubute ebene gudu atumu kakamitimene, ega:walo guda:te dowate ibino menokobila nabila a:eamo kalibolema:na. <sup>22</sup> Ebene na mabuma: epo bilibilinomate la:tamo ka:dowaoma:na:, wiyasiya kebe lumagite temeteme magumulo kodakodalo utite uwomuamo da:nemaigamene, Godote ebene igilo ka:mula:emene. <sup>23</sup> Ebema: iba:te la:tamo temeteme dikalامتamene, ebe tetelo la: wiyasiya duliyo molo ida:mo nalautiyala:. Na la:tamo nani tabo gemo, la: Isalaela opono duliyo molo bilibilinomolo woko eba nosiyodilolo ebe iyaiya woko opoliyalea:no Epono Naniwite ebo ka:pemaigamene.

<sup>24</sup> “Numa:la:, epono umi magumulo sukulu guduno iyatawa tanalote ebene iyatulamedawano iyatawa kodolina:, ega:walo wokodawano elawote ebene woko namutudawano elawo kodolinakoa:. <sup>25</sup> Ebema: modobola sukulu gudute ebene iyatawa magumulo ebene iyatulamedawa keba kunula:ka: ebako dawama: na:keda:mene, ega:walo wokodawate ebene woko magumulo ebene namutudawa keba kunula:ka: ebako dawama: na:keda:mene. La: nolowiala:! Iba:te na moto namutudawa kuba uliyana Biyesibulu mailamo eka:na:miya, ebema: walone iba:te atumu la: naimano ekaki kuba mailonomamo keka:la:ima:ta!”

*La: Poko Na:ka:tolema:wenama  
Luk 12.4-7*

<sup>26</sup> Ebene Ya:sute walo na:kegiya, “Ebema: ebe elawoelawo dubu akotolelama:la:. Kebe itiole tanalate da:pola:na walone tetelo Godote kawokalilaemene, ega:walo waminaole tanalate da:pola:na walone epate kulamolema:na. <sup>27</sup> Ebema: nale idoko tetelo la: da:kiyawaolametanakoma, la:le wiyasiya alo tetelo na:kiyawaolamenakiyala:, ega:walo la:le nagodone ganalalo dolowiawenakoma, ebe iyaiya tanaloma: la:imano tabo madodo eba adipatelo epo bilibilinomatamo nawokalilamenakiyala:. <sup>28</sup> La: ape anakapulame iyatawaopi akotolelama:la:. Iba:godolo elawo puliyala epono uliyana anakapulamete Ela Opamo iyalekema:. Wiyasiya la: Godoko kapiya na:tolemenala:, mabu ebegodolo elawo bitana epono ape ega:walo uliyana kapiya tetelo Ela Opamo iyalekema:. <sup>29</sup> Numa:la:, epate netewa piliyo olaola kapiya toea maniamo uwatema: gelanaka, ebe olaolano igilo kawokawoa:, wiyasiya la:imano Nabiwi Godote ebako egege olaola eba malagidilolenalo, ebete modobo tabo gea:no ibi magumulo idi kapiyate a:ka:emene. <sup>30</sup> Ega:walo nanitabola, la:imano watono eke bilibilinomo Godote iyalo tetelo eka:la:mioliya, iyo, la:imano iyaiya tanalo ebete iyatawanomola. <sup>31</sup> Ebema: la: woki bilibilima: akoeda:onala:. Ebene nilakapo olaolatamo nanitabonomolo bitana, wiyasiya ebene nilakapo la:tamo kawonomoma: eda:te ilukulina tetelo bitanamene!”

*Epono Ololo Apulo Ya:suko Awokalimi Tanalo  
Luk 12.8-9*



<sup>32</sup> Ebene Ya:sute walo na:kegiya, “Kebe lumagite awokala degemene, ‘Na Ya:suko waloma:tadawala,’ na atumu Nabiwi Godokono ololo apulo kegemamo, ‘Me lumagi ebe naimano ekawila.’ <sup>33</sup> Wiyasiya kebe lumagite na iyatawa:ma: degemene, na atumu Godotamo ebe iyatawa:ma: ka:kegemamo.”

*Ya:sute Epono Gowela Mabuma: Eda:na*  
*Luk 12.51-53; 14.26-27*

<sup>34</sup> Ebene Ya:sute walo na:kegiya, “La: na:kemalagidilawitama nale me opamo milo adaema: pe? Ao, na epatamo milo ikalaema: ka:piya:, na gowelaono gili ikalaema: piyamo. <sup>35</sup> Numa:la:, naimano iyaiya tabono tanaloma: anagiyamida tanalote epo magumulo ka:pemaigamene. Ma kunu anagiyamida tanalote dubu ega:walo ebenu nabiwi ibi magumulo kitanamene, ega:walo buwele ebenu menokago ibi magumulo kitanamene, ega:walo kamiyale ebenu awino menokago ibi magumulo kitanamene. Iyo, na anagiyamida tanalo epatamo ikalaema: piyamo, <sup>36</sup> ebema: nanitabola, na mabuma: dubuno moto epate eba:go ka:gowelaoma:na:

<sup>37</sup> “Ebema: kebe lumagite ebenu nabiwila menokola kawonomamo eba malagidilelo na kela:mo demalagidilonena, ebe lumagite naimano woko osiyodiloma: a:ka:modobomene. Ega:walo kebe lumagite ebenu gudi kawonomamo eba malagidilolenalo na kela:mo demalagidilonena, ebe lumagite naimano woko osiyodiloma: a:ka:modobomene. <sup>38</sup> Ega:walo kebe lumagite ebenu kewa olotolowa agute na waloma:enea:no, ebete atumu naimano woko osiyodiloma: a:ka:modobomene. <sup>39</sup> Ebema: kebe lumagite ebenu kateneno ubi gabodo eba tolo ebenu igilo nagodone damoeda:mene, ebenu igilote kalatidimene, wiyasiya kebe lumagite ebenu igilo na mabuma: datutimene, ebete nanitabo igilo kelaemene.”

*Godogodone Wade Wiya Lawe Tanalo*  
*Mak 9.41*

<sup>40</sup> Ebene Ya:sute walo na:kegiya, “Kebe lumagite a:ma: kalakalago dowalubitana ebete na walubinina, ega:walo kebe lumagite na dowalubinina ebete na kapiya kowalubinina:, ebete na Alibonedawa Godoko atumu na:kowalubina. <sup>41</sup> Ebema: kebe lumagite Godokono woki awokalimidawa kalakalago dowalubina ebete walone Godogodone ebenu woki awokalimidawano wiya ka:nelaemene, ega:walo kebe lumagite tuputupudawa kalakalago dowalubina ebete atumu tuputupudawano wiya ka:nelaemene. <sup>42</sup> Na la:tamo nani tabo gemo, me egegepi magumulo kebe lumagite na waloma:enedawama: deda:na, ebe mabuma: idawate gibagiba obo ebetamo dikaemene, ebete Godogodone delaemene ebe wade wiyate akalatidimene.”

## 11

*Yonete Ebe Waloma:tapi Ya:sutamo Daliboliya*  
*Luk 7.18-35*

<sup>1</sup> Ebene Ya:sute ebenu 12 waloma:tapi iyatulame dolopoligiya, ebete ebe duliyo molo atepate Yu epono duliyo molo epetapilo ibi iyatulama:go eba tolo Godokono tabo ebo kiyawaolamenatiya.

<sup>2</sup> Ebe tetelo Yoneko epo obamo waduba:midaoledawate idoko motolo eba okolinalo, Kelisote wadewade tanalo dosiyodilolenami ebete ebe tanalo olowiote ebe waloma:tapi ebetamo ebo aliboliya. <sup>3</sup> Ebene ibi netewapiate Ya:sutamo da:pemaimiya iba:te ebe ma kunu paniya, “Yonete pema: degi, a:ma: ebe lumagila:ka: o ale lumagi idi kemakopelena:ma:?”

<sup>4</sup> Ebene Ya:sute wiya tabo iba:tamo negiya, “La: toawete la:le kebe tabo kolowiawitama ega:walo kebe tanalo kulama:witama, ebe iyaiya tanalo Yoneko nananala. <sup>5</sup> Balidi tamiopiate balidi a:melea ega:walo agowa tataipiate nowapata:lama! Kukulakukulagopiate wadekobi olowiwa ega:walo galo tamiolamepiate nolowia! A:elaopiate a:ene walo a:kemaimiya ega:walo nigologolo epatamo Godokono Wade Tabote a:pe! <sup>6</sup> Ebema: kebe lumagite na nanitabokobi eba midinilo woki netewama: eda:no, ebegodolo Godokono kalakala tanalote bitanamene!”

<sup>7</sup> Ebene Yonete dapaliboliya ebe dubate eba tolo, Ya:sute Yonekono tanaloma: epatamo ebo kiyawaiya. Ebete negiya, “La: Yonekono tanalo olowiawete bulu opamo da:nemaimiama, beda: tanalo uima: ka:tolama:ima? Pudo kapiya awate gito dadegetiti, ebe uima: ka:tolama:ima? <sup>8</sup> O la: wadewade kaliku pupulio dubu uima: ka:tolama:ima? Ao, la: iyatawalata wadewade kaliku pupuliopiate bulu opolo kilukuliona:, wiyasiya iba:te kawokawo elawodubuno motolo ibino kateneno ubilo ilukuliona! <sup>9</sup> Ebema: la: na niyatunama:la:, la: beda:ma: ka:tolama:ima? Godokono woki awokalimidawa uima:la:ka:? Iyo, na la:tamo nani tabo gemo, Yonete Godokono woki awokalimipi bilibilinomo odoili. <sup>10</sup> Nanitabola, Yonekono tanaloma: Godote ebene Bukalo tabo ma kunu giya,

‘Nale Kelisokono dopo apuamo  
naimano tabo atadawa kapalibomamo,  
ebete ebe dopomete  
ebeno gabo kosiyodiloma:.’ ”

<sup>11</sup> Ya:sute walo na:kegiya, “Nale la:tamo nani tabo gemo, wagilimi mabune me teta:mo pemaiga me opo kawonomolo dawokalaiya, ebe epo bilibilinomo magumulo Yoneko kawodawanomoma: eda:na. Wiyasiya me tetene wagilimite Godote Kawo Elawodawama: deda:na, ebe duliyoumololo kebe lumagite da:pesonomoma: deda:mene ebete Yoneko nanitabolo kodolimene. <sup>12</sup> Me tanalo idila. Yoneko tetene wagilimite me teta:mo pemaiga, elawoelawo dubu ubila Godokono Wade Duliyoumolo ibi a:ka:tuwa: ibino elawamo lawete ebamo ka:nopila:oma:, wiyasiya iba:te a:ka:modoboma:na. <sup>13</sup> La: nolowiala: Godokono woki awokalimipiate ebene Bukamo dakuloliya ega:walo ebete ebene Totomu Tabo Mosesedo epatamo dikalamiya, ebe wade tabono tanalote iyalo tetelo awokalate, penatete Yoneko teta:mo ebo pemaigi. <sup>14</sup> Nanitabola, Godote dopamo tabo ma kunu kiyawaiya, ebene woki awokalimidawa Elayako ka:pemene, iyo, Yoneko me ebe lumagila, ebema: modobola la: me tanalo nanitabokobi na:mida:la. <sup>15</sup> Galagodawa, a:ma: wadenomamo nolowia!”

<sup>16</sup> Ebene Ya:sute negiya, “Na me tete epono tanalo kebe uli tabamo nakawokalimo? Ibi olowame bailo dekalakalauta ebe gudi egege keba kunula:ka: eba kunula. Gudi epetapiate epetapiatamo kegela, epetapiate epetapiatamo kegela, iba:te apamineuilo ma kunu wagelena, <sup>17</sup> ‘Ale soliyomu eba osiyodilolo hibolo da:moleoma: wiyasiya la: ago kemaewa:, ega:walo a a:e lumagi bobamo iyatima: dowagelitama: wiyasiya la: ebe ka:liyama:wita:!’ Iyo, me tete epo eba kunu wagelena, iba:te Godokono wokopiatamo ubia: tabo gelanaka. <sup>18</sup> Numa:la:, Yonete da:pemaigi ebe tetelo ebete elawo da:imi obo ka:ninakia: ega:walo tete epetapilo ebete bae naoa:no lutanaki Godokono woko kosiyodiloma:, ebema: epate negeliya, ‘Ebe kuba uliyanagonola!’ <sup>19</sup> Wiyasiya Epono Naniwite da:pemaigi, ebene

tanalo iyala. Ebete bae enanako ega:walo elawo da:imi obo a:ninako, ebema: iba:te ma kunu gelanaka, 'Ebeno kuba numa:la:! Ebe tumu goeoma: eda:te bae kawonomamo nanako, ebe elawo da:imi obo ni kawodawala! Ebe ta:kese mani elemasigilo uwatepi ega:walo Godokono Totomu Tabo uwatea:pi epetapi ibino namutudawala!' ”

Ebene uwomunomolo Ya:sute iba:tamo negiya, “Godokono wade mulo tanalo dowloma:tana, ebe epate ibino osiyodilole magumulo ebe mulo nanitabonomolo bawokaliminakoma:na.”

### *Nanitabokobi Midia: Duliyomolo Epono Tanalo*

#### *Luk 10.13-15*

<sup>20</sup> Ya:sute kebe iyaiya duliyomololo anoano tanalo bilibilinomo dosiyodilolenaki, ebe duliyomolo epate ibino kuba woki iyakobi midilite Godotamo kolobiliya:. Ebe mabuma: Ya:sute ibi kawonomamo ma kunu analiya, <sup>21</sup> “Kolasini duliyomolo, a:ma: kuba wiya kawonomo kelaema:ta! Betasaida duliyomolo, a:ma: ebe atumu! Mabu nale la:godolo anoano tanalo dosiyodilolimo, nale ebakobako woko Taya duliyomololo ega:walo Saidono duliyomololo dopamo nosiyodiloliyataleka:, ebe Yua: epate ibino kubakuba woki iyakobi ba:midiliyana:. Iyo, iba:te ibino kuba osiyodilole mabuma: tepo temetemema: eda:ote ebe temeteme kawokalima: kubakuba kaliku pupuliole ono tuwaeamo gito bilukuliyana:. <sup>22</sup> Ebema: na la:tamo negemo, Godote epono tanalo danagilamelelaemene, ebe Kawo Egelalo ebete Taya duliyomolo epatamo ega:walo Saidono duliyomolo epatamo kuba wiya eba ikalamelo nilakapo kela:mo kawokalimene, wiyasiya nanitabola, Kolasini duliyomolo ega:walo Betasaida duliyomolo, ebete la:tamo nilakapo a:kiyatimene! <sup>23</sup> Ega:walo Kapeniyama duliyomolo, a:imano tanalo ma kunula. A:ma: ubila a:ma: a:ka:tuwa: a:ma: Godokono Unu Duliyomolamo kadipata:ema:, wiyasiya Godote a:ma: Ela Opamo keba:idiloma:ta! Mabu nale a:ma:godolo anoano tanalo dosiyodilolimo, nale ebakobako woko Sodomu duliyomololo nosiyodiloliyataleka:, ebe Yua: epate ibino kubane olobila:ote Godote ibi akanakapulamiyana:. <sup>24</sup> Ebema: na a:ma:tamo negemo, Godote epono tanalo danagilamelelaemene, ebe Kawo Egelalo ebete Sodomu duliyomolo epatamo kuba wiya eba ikalamelo nilakapo kela:mo kawokalimene, wiyasiya Kapeniyama duliyomolo, ebete a:ma:tamo nilakapo a:kiyatimene!”

### *Ya:sute Tutulo Ilukuli Tanalo Epatamo Dikalamena*

#### *Luk 10.21-22*

<sup>25</sup> Ebe tetelo Ya:sute Godotamo negiya, “Aba, a:ma: me opo kawonomo ega:walo Unu Duliyomolo Namutudawama: eda:nata! Na a:ma:tamo kalakala tabo gemo, mabu a:ma: me opono kawokawo iyatawapi dubatamo a:imano mulo woki eba waminaolelo iyatawa: epatamo awokalilamiata.

<sup>26</sup> Aba, nanitabola, me tanalote a:imano ubilo pemaigi.”

<sup>27</sup> Ebene Ya:sute epatamo negiya, “Naimano Nabiwi Godote tanalo bilibilinomo naimano kotamo alomiya nale kulamenama:, ebema: ebete a:ka:tuwa: iyatawala na ebeno Guduno tanalo, lumagi idite iyatawa:. Ega:walo Nabiwino tanalo atumu, lumagi idite iyatawa: wiyasiya na ebeno Gudute a:ka:tuwa: iyatawala, ega:walo nale piyatamo Nabiwino tanalo awokalima: ubi diyatimo, ibinomate atumu Nabiwino tanalo ka:kiyatawaoma:na:.

<sup>28</sup> “Ebema: la: piyate mibomibo magumulo dilukula:wenama, la: natamo da:pelama:ema nale tutulo okoli tanalo la:tamo kikalaemamota.



<sup>29</sup> Numa:la; netewa kau-goeogoeate woko eba osiyodilutalo, namutu-dawate ibino abaumu unamo kewa olotolowa iyatilamete iba:te kapimiya ebo ka:toma:na; ebema: a:ma: atumu, a:ma: ega:walo na, ale kapimiya ba:tonakoma: woko kosiyodilonama:. Ebe tanalo magumulo a:ma: naimano tanalo wadenomamo ma kunu kiyatawama:ta, nale mulo ega:walo milo okolidawama: deda:namo. Ega:walo a:ma: nagodone tutulo okoli ke-laema:ta, <sup>30</sup> ebema: nale a:imano abaumu teta:mo diyatimitama, a:ma: ebe kewa olotolowa mibonomoma: a:kegeaemene, ega:walo nale inamabu waguatama: dikametama a:ma: tutuma: kegema:ta.”

## 12

### *Wokoa: Talena Egelano Tanalo* *Mak 2.23-28; Luk 6.1-5*

<sup>1</sup> Yu epono wokoa: talena egela idilo Ya:sute ebe waloma:tapiago kono pali magumudo petolamiya, ebene bae kape tanalote ebe waloma:tapiatamo da:piya, iba:te kono naoma: kapiyakapiya kubakubadopo ebo nowakalamiya. <sup>2</sup> Pa:lisi tanebapi epetapiate ebe tanalo umite Ya:sutamo negeliya, “Numa; a:imano waloma:tapiate wokoa: talena egela adikanalita.”

<sup>3</sup> Ebene Ya:sute tabo eba wiyalo negiya, “Modobola Godote ebenu Bukamo dakuloliya, la: ebe tanalo nemalagidilala:. Da:ibiditam kuba tete da:piya, ebete ebenu wapata:lamepiago bae kapete dulamiti, ebene ebete beda: tanalo kosiyodiliyale? <sup>4</sup> Ebete Godokono Motamo nodolote, ebe Motono wokopiate Godotamo dalomonakiya ebe talena bae ebete ebenu wapata:lamepiago a:nenaiya. Ebe tanalo magumulo iba:te aimano totomu tabo adikanaliya, mabu totomu tabote a niyatuamena a bilibilinomate ebe bae nao talenala, Godotamo kalimagono ikameopiate a:ka:tuwa: naonaka. Wiyasiya numa:la; Da:ibidiate denaiya Godote ebe tanalo kubama: kegiya:. <sup>5</sup> Ega:walo Godote ebenu Bukamo Mosesedo dakuloliya, me tanalo idi nemalagidilala:. Piyate ebetamo kalimagono ikameopima: deda:ona, iba:te wokoa: talena egelalo ebe amamateno motolo woko dosiyodilonaka, ebe tetelo iba:te ebe talena egela dadikanalenaka wiyasiya Godote ebe tanalo modoboma: gena.

<sup>6</sup> “Ebema: nale la:tamo gemo, Godoko Amamateno Motono talena nanitabolo bitana, wiyasiya nagodolo ditana ebe talenano elawote iyaiya talena epetapino elawo nodoilina. <sup>7</sup> Godote ebenu Bukalo negena, ‘La: natamo kalimagono inamabu gito akopikanama:la; na ubia:nola, wiyasiya na ubila la:imano tepo magumulo nilakapo tanalo uima:.’ La: Pa:lisi tanebapiate me tabono magumu niyatawawetaleka; na waloma:enepiate tuputupu tanalo eba osiyodilolo la: ibi kubakubapima: a:kegelawena; <sup>8</sup> mabu nanitabola, na Epono Naniwite wokoa: talena egela namutu-dawama: eda:namo.”

### *Ya:sute Koto Apu A:eme Dubu Wadekobi Da:midia* *Mak 3.1-6; Luk 6.6-11*

<sup>9</sup> Ebene Ya:sute ibi miyapate ibino balidi ibilamole motamo da:nodoliya, <sup>10</sup> koto apu a:eme dubute ebolo na:luti. Pa:lisi tanebapi epetapiate ebolo da:pola:niya, ibi ubila Ya:suko kubadawama: kegelama; ebema: iba:te ebe nalatediya, “Wokoa: talena egelalo temetema:godawa wadekobi midima: talena ba:kitanale?”

<sup>11</sup> Ebene Ya:sute iba:tamo negiya, “A:imano sipi-goeote talena ege-lalo damela gugamo da:negamene, a:ma: samamo ebe nowaluba:wete

ka:nowagilima:ta, a, nanitabola:ka:? <sup>12</sup> La: me tanalo iyatawala, sipigoeono igilo tanalote kawoma: keda:na: wiyasiya lumagino igilo ebe kawo tanalonomola. Ebema: aimano totomu tabote talena kiyatiamena: woko: talena egelalo wadewade tanalo osiyodilolema:.” <sup>13</sup> Ebe tetelo Ya:sute koto apu a:eme dubutamo negiya, “A:imano koto nuwamida,” ebene ebete koto duwamidiya ebene kotote wadekobi ebo olowiya, apulo wadeno ditameni eba kunu. <sup>14</sup> Ebe mabuma: Pa:lisi tanebapiate dowago tolamete tabo ebo negeliya Ya:suko kanakapuima:.

*Godote Ebene Gudu Ya:suko Wade Wokodawama: Deka:miya*

<sup>15</sup> Ebe tetelo Ya:sute Pa:lisi tanebapino kuba nopo iyatawate ebete ebe duliomolo atepate gito tiya, ebene epo bilibilinomate ebene tanalo umite ebe ebo waloma:tiya. Ibi magumulo piyate temetema:go da:pola:niya Ya:sute ibi bilibilinomo wadekobi midiolete, <sup>16</sup> ibi ma kunu kawiya analiya, “La: naimano tanaloma: epo akoanala:la!” <sup>17</sup> Ebema: Ya:sukono osiyodilo magumulo Godokono woki awokalimidawa Aisayate degiya, ebe tabono nanitabo tanalote maigiya. Iyalo tetelo ebene tabo kiyawao magumulo Godote ma kunu giya,

<sup>18</sup> “Me naimano wade Wokodawala,  
nale ebe dopamo eka:miyamo.  
Nale ebe nilakapolo eba malagidilonalo  
ebetamo kawonomamo nekalakalanamo,  
ebema: nale naimano Wade-talena Uliyana  
ebe unamo nalibote,  
ebene ebete iyaiya opo epatamo  
ibino igilo mula:lame tanaloma:  
tabo ka:kiyawaomene.

<sup>19</sup> “Me Wokodawate apamineu tanalo kiyatawanakoa;  
ebete naimano tabo eba kiyawaolo a:kegatepaomene,  
ega:walo epono ololo apulo  
ebete tabo madodo unamo akadipatemene.

<sup>20</sup> Piyate elawoa:noma: deda:ona  
ebete iba:tamo nilakapago ka:tomene,  
eba kunu ebete balibali pudo  
gito akadikanalemene,  
ega:walo wuiki alono mena da:pesoma: deda:na  
ebete gito a:ka:egamidamene.

“Nanitabola, naimano Wokodawate  
wadewade tanalo eba osiyodilolelo  
Tuputupu Okoli tanalote Kubano  
wato kikopu kelaemene,

<sup>21</sup> ebema: opo bilibilinomono epate  
me naimano Wokodawano pe tanalo makopelena.”

*Ya:suko Ega:walo Biyesibuluko\* Ibino Tanalo*

*Mak 3.20-30; Luk 11.14-23; 12.10*

<sup>22</sup> Ebe tetelo epo epetapiate dubu idi Ya:sutamo magatiya, ebe dubute tabo ka:kiyawaonakia: ega:walo ebe balidi tamiomela, mabu ebe kuba

\* **12:21:** Biyesibuluko ebe Saitanakono nopodawa idila, ebete Yu epono opolo Saitanakono opodawama: eda:nami, atumu Tabo epono opolo Monoiko bokolina.

uliyagonola. Ebene Ya:sute ebe wadekobi da:midia, ebete tabo kiyawao wagilimite balidi wadekobi ebo olowiomia. <sup>23</sup> Ebema: epo bilibilinomate eba anoanoutalo negelitia, “Diyala, me dubu Ya:suko da: Da:ibidikono a:la:mu Kelisotela!” <sup>24</sup> Wiyasiya Pa:lisi tanebapiate ibino tabo olowite negeliya, “Ao, ebete kubakuba uliyano Kawodawa Biyesibulukono elawamo alibolenako, Godokono elawamoa!”

<sup>25</sup> Ebema: Ya:sute ibino kuba woki iyatawate iba:tamo negiya, “Numa:la, kapiya duliomolono epate tetedo dadikanalema:na: ebe duliomolote ka:kubamene, ega:walo kapiya motono epate tetedo dadikanalema:na: ebe moto epate a:kilukulinama:na:, ibino motote atumu ka:ka:kubamene. <sup>26</sup> Ebema: Saitanakono woki ma kunula, ebete ebene kubakuba uliyana epagodone akalibola:le, mabu ebete eba kunu dowagelemene ebene woko osiyodilo elawote kolopoligomene. <sup>27</sup> La:le naimano tanaloma: negelamata, ‘Ebete kubakuba uliyana Biyesibulukono elawamo alibolenako.’ Ebe tabo degelaema nanitabola:ka? Ao, nanitaboa: La:imano tanebapiate kubakuba uliyana dalibolenaka, ebe elawo iba:tamo potele kikalame-nakole? Iyo, Godotela, Saitanatea! Ebema: la:imano tanebapino wade osiyodilo tanalote la:imano kuba woki awokalimina. <sup>28</sup> Me tanalo nanitabola, nale kubakuba uliyana Godokono Uliyanano elawamo alibolenakomo, ebema: modobola la: me tanalone kiyatawaomamota, Godokono Kawo Elawodawano tetete la:tamo ebe a:pe.

<sup>29</sup> “Numa:la, Saitanako ebe elawodubu idi keba kunula:ka: eba kunula, ega:walo ebete pilolo duwatiya ebe epo ebe ebene motono inamabula. Ebema: epate mako elawo dubuno motamo odolote ebene inamabu uwatema: ubi diyatima:na:, iba:te dopamo ebe ala:mo matuomeote ebene ebene inamabu ebo kuwatema:na:.

<sup>30</sup> “Nanitabola, kebe lumagite na walubinina: ebete naimano goweladawama: eda:na, ma kunu ebete epo kapiya baiamo magaelema: nago woko osiyodiloa:no wiyasiya ibi iyaiya alibolenako. <sup>31</sup> Ebema: nale la: analemata, epono iyaiya kuba tanalo bilibilinomo Godote egebolelamete dodolomatili iyatawala, ega:walo kebe lumagite Godoko ubia: tabo degemene, ebe kuba tabono tanalo Godote egebolemete ka:dodomatimene. Wiyasiya kebe lumagite Godokono Uliyanano osiyodilo tanaloma: kubama: degemene, Godote ebe kuba egebolemete a:ka:dodomatimene.

<sup>32</sup> Ebema: kebe lumagite Epono Naniwino tanaloma: odiyobo tabo da:kiyawaomene, Godote ebene kuba egeboleme iyatawala, wiyasiya kebe lumagite Godokono Uliyanano woko osiyodilo tanaloma: odiyobo tabo da:kiyawaomene, Godote ebe kuba egebolemete a:ka:dodomatiminamene, uwomua: uwomua: tetelo ebene kubate bitanamene.”

### *Kewa Ega:walo Ebene Da:imi*

#### *Luk 6.43-45*

<sup>33</sup> Ya:sute tabo moga:melo walo na:kegiya, “Naimano da:imi keba kunula:ka? La:le kewa wadenoma: degelawenakoma ebe kewano da:imi wadewadenola, wiyasiya la:le kewa idi kubanoma: degelawenakoma ebe kewano da:imi kubakubanola. Iyo, nanitabola, la: iyaiya kewano da:imi ibino ololamo dulama:ema la: ebo kiyatawaomamota ibi magumulo kebe da:ima:te naoma: wadewadenoma: keda:onale. <sup>34</sup> Pa:lisi tanebapiala:, la: bu kalulata! La:imano tepo magumu kubakubanomoma: eba eda:onalo wade tabo keba kunu na:kegelaema? Gaboa:nola! Mabu lumagino tepo magumulo kebe tanalate ka:pola:nale, ebe tanalate ebene tabo kiyawao tanalodo ka:pemaima:na: <sup>35</sup> Ebema: wade lumagite ebene tepo magumune wadewade tanalo ba:powaulatelenakomene, wiyasiya kuba lumagino tepo

magumulo kubakuba tanalate pola:na, ebema: ebegodone kuba tanalate ba:pemaimionakoma:na:

<sup>36</sup> “Na la:tamo negemo, epate ibino iyaiya kuba tabo da:kiyawaonaka, ebe kuba tabono tanaloma: iba:te Godokono Kawo Egelalo ebene dopo apuamo ka:nemaima:na:, ebene ebete ibino tanalo bilibilinomo eba anagilamelelamelelo iba:tamo wiya dikalaemene, ibino taneba magumulo lumagi idite ebe odiyoboma: tabo idi a:kegemene. <sup>37</sup> Ebema: a:ma: nanisiwale! A:ma:le kebe iyaiya tabo ka:kiyawawenaka, walone tetelo Godote ebe tabo bilibilinomo eba anagilamelelelo, ebete a:ma: tuputupudawama: da:begemene o a:ma: kubadawama: da:beka:mitamene.”

*Pa:lisi Tanebapiate Anoano Tanalo Uima: Ya:suko Daniya  
Mak 8.11-12; Luk 11.29-32*

<sup>38</sup> Ebene Pa:lisi tanebapi epetapi ega:walo Godokono Totomu iyatulamepi iba:te Ya:suko naniya, “Iyatulamedawa, a ubila a:ma:godolo anoano tanalo idi uima:.”

<sup>39</sup> Ya:sute tabo eba wiyalo iba:tamo negiya, “Kuba osiyodilolepi ega:walo nanitabokobi midia:pi, ibi ubi kawonomola Godokono elawo awokalimino anoano tanalo kuima:, wiyasiya Godote tanalo idi akawokalimene. Nanitabola, ebete ebene woki awokalimidawa Yaonado dawokalimiya, ebe anoano tanalo kapiya la:tamo ikalamiyata. <sup>40</sup> Numa:la:, Yaonate egela netewa-kapiya ega:walo idoko netewa-kapiya kawo namono tepo magumulo okoliti, ebema: ebe atu gabodo Epono Naniwite egela netewa-kapiya ega:walo idoko netewa-kapiya bobo magumulo ka:lutamene. <sup>41</sup> Ega:walo me tanalo idila. Godote epono tanalo danagilamelelaemene, ebe Kawo Egelalo Niniba duliyoumolo epate maimiote la: Yu epo kubakubapima: keka:la:ima:ta, mabu ebe Yua: epate Yaonakono tabo dolowiya iba:te ibino kubane Godotamo olobiliya. Ebe tetelo ibi ubila Godokono tabo Yaonagodone laema:, wiyasiya la: tetelo Godote Epono Naniwino tanalo la:tamo eba awokaliminalo, la: ebe tanalo ubia:nola. La: numa:la:, Epono Naniwino elawote Yaonakono elawo nodoliona!

<sup>42</sup> “Ega:walo Godokono Kawo Egelalo Siba opo epono Kawo Elawo Kamiyalete maigate la: atumu kubakubapima: keka:la:ima:ta, mabu ebe Yua: kamiyalete mulu oponomone piya Isalaela opamo Kawo Elawodubu Solomonokono mulo tabo ka:polowioma:. Ebe tetelo ebe ubila Godokono mulo Solomonogodone laema:, wiyasiya la: tetelo Godote Epono Naniwino tanalo la:tamo eba awokaliminalo, la: ebe tanalo ubia:nola. La: numa:la:, Epono Naniwino mulote Solomonokono mulo nodoliona!”

*Kuba Uliyanate Lumagitamo Walo Da:ka:pemene Ebe Tanalo  
Luk 11.24-26*

<sup>43</sup> Ebene Ya:sute negiya, “Kuba uliyanate lumagi idigodone da:nemaigamene, ebe tetelo ebete gagale opamo tote okoli bai idi kowadinatomene. Wiyasiya ebete wade okoli bai numia:no <sup>44</sup> ebe a:ka:tuwa: ebetamo kegemene, ‘Nale datepimo ebe atu okoli baiamo walo ka:ka:tomamo.’ Ebete walo ka:pete ebe okoli motolo idawate okolina:no, wadenomamo moda:midala ega:walo inamabu wadenomamo alomola, ebete ebe moto eba kunu ka:ka:puimene. <sup>45</sup> Ebene ebete walo ka:tote kubakuba uliyana epetapi sebeni kanadabuilite ka:kemagaelemene, iba:te ebe motamo podolote ebolo kilukulinama:. Numa:la:, walone da:pelaema:na: ebe kubakuba uliyanate kawokawo kuba ba:posiyodilolenakoma:na:, dopamo dokolinami ebe kapiya kuba uliyanano okoli eba kunua:. O ebe lumagi niyala! Ebe dopamo kela:mo kubadopola,

wiyasiya me tetelo ebete kubanomoma: eda:. Ebema: me teteno kubakuba epala:, la: nanisiwale, mabu la: ma kunu kowagelemamota!”

*Ya:sukono Menoko Ega:walo Ebena Ekaki*

*Mak 3.31-35; Luk 8.19-21*

<sup>46</sup> Ya:sute epatamo tabo eba kiyawautalo, ebena menoko ega:walo ekaki iba:te pelamete moto niyakabolo pelamota:oniya eba:go tabo ka:pegelama:.

<sup>47</sup> Ebema: epo magumulo idawate Ya:suko naniya, “Numa:, a:imano menoko ega:walo ekaki iba:te moto niyakabolo ba:pelamota:ona. Ibi ubila a:ma:go tabo kegelaema:.”

<sup>48</sup> Ya:sute ebe lumagitamo nowamiya, “Naimano menoko potelela:ka:, ega:walo naimano ekaki piyatela:ka:?” <sup>49</sup> Ebena Ya:sute ebe waloma:tapi ebena kotamo mida:lamolelo negiya, “Me epo ebe naimano menokobila ega:walo naimano ekakila, <sup>50</sup> mabu potele naimano Unu Duliyomolono Nabiwino ubi tanalo dosiyodilomene, ebe lumagi naimano menokola ega:walo naimano ekawila.”

## 13

*Kono Kikopu Aminaoledawano Iyatulame Oi*

*Mak 4.1-9; Luk 8.4-8*

<sup>1</sup> Ebe atu egelalo Ya:sute moto gune pemaigate, ebete epo iyatulaema: Ga:lili Paka: balalo nokoliti, <sup>2</sup> ebena epo bilibilinomate ebetamo da:pelamiya, ebete peamo olote gito okoliya wiyasiya epate damela balalo pelamota:oniya. <sup>3</sup> Ebena ebete iba:tamo tanalo epetapi bilibilinomo iyatulame oiamo eba awokalilamelolo tabo idi ma kunu giya, “Lumagi idite pali amio bai dosiyodili kono kikopu aminaola:go ebo ti. <sup>4</sup> Ebete aminaola:go eba tonatolo kikopu epetapi iba:te gabamo gudiyaya, ebema: olaolate pelamete ebo penaiya. <sup>5</sup> Kikopu epetapi iba:te nokola damelamo gudiyaya, ebolo damela kawoa:. Ebema: iba:te samonomamo maimiya mabu damela bidobidoa:, <sup>6</sup> ebena egelate da:pioli iba:te nalawoiya mabu ibino dolodolo magumamo ka:tolamea:, iyo, iba:te ebema: samonomamo a:elaiya. <sup>7</sup> Kikopu epetapi iba:te moemoe uwago damelamo gudiyaya, ebema: ebe uwagate dapepeiya kono ebo anakapulamiya. <sup>8</sup> Wiyasiya kikopu epetapi iba:te wade damelamo gudiyaya, ebema: iba:te apepeote ebo noloiya, epetapi 100 teta:mo, epetapi 60 teta:mo, epetapi 30 teta:mo bilibilinomoma: eda:iya.”

<sup>9</sup> Ya:sute walo na:kegiya, “Galagodawa, a:ma: wadenomamo nolowia!”

*Ya:sukono Iyaiya Iyatulame Oino Mabu*

*Mak 4.10-12; Luk 8.9-10*

<sup>10</sup> Ebe tetelo Ya:suko waloma:tapiate ebetamo pelamete na:pegeliya, “Beda: mabuma: a:ma: oiamo epo diyatulama:wenaka?”

<sup>11</sup> Ya:sute tabo eba wiyalo iba:tamo negiya, “Godote Kawo Elawodawama: deda:na, ebe tanalono magumu kelawa:ema: nale elawo la:tamo ikalaimata, iyo, ebe tanalono waminaole tanalo la: iyatawaimata. Wiyasiya nale ebe iyatawa tanalo epetapiatamo kikalamea:. <sup>12</sup> Nanitabola, Godokono tabo olowioma: lumagigodolo wadewade woki da:pola:na, Godote ebetamo wadewade tanalo bilibilinomo ikameote ebena tepo magumu ketabokaimene. Wiyasiya lumagigodolo wadewade woki pola:na:no, ebegodolo kebe kapiyakapiya tanalate da:pola:na Godote ebegodone walo ka:kuwatemene. <sup>13</sup> Ebe mabuma: nale epo oiamo iyatulamenakomo, mabu iba:te naimano tabono magumu wadite kuminakoa:, iyo, iba:te olowite



atumu kiyatawaonakoa: <sup>14</sup> Ebema: Godokono woki awokalimidawa Aisay-ate ibino tanaloma: degiya ebe tabote nanitaboma: eda: Ebete iyalo tetelo ma kunu giya,

‘La: tabo bolowinakomata  
wiyasiya a:kiyatawaoawenakoma,  
iyo, la: magumu bowadinakomata  
wiyasiya a:kuma:wenakoma.

<sup>15</sup> Mabu me epono woki alatidiolamiya,  
ibi nanitabo tanalo olowima: ubia:nola,  
ebema: iba:te galo emopioliya,  
ega:walo ibino balidi atumu a:mula:oliya.  
Ebema: iba:te ibino balidi mula:olea:noma: neda:otaleka;  
ibino balidite naimano wade tanalo bulamena;  
ega:walo ibino galote nolowiotaleka;  
iba:te ibino tepo magumuno woki  
wadenomamo malagidilote natamo bolobila:na;  
ebema: na modobola ibi wadekobi midilima:’ ”

<sup>16</sup> Ebene Ya:sute ebe waloma:tapiatamo negiya, “Godokono kalakala kawonomo la:godolo bitana, mabu la: la:imano balida:mo ebene iyaiya tanalo wadenomamo nulamenamata! Iyo, la:le la:imano galamo Godokono nanitabo tanalo wadenomamo nolowionamata! <sup>17</sup> Nale la:tamo nani tabo gemo, dopamo tetelo Godokono woki awokalimipi ega:walo tuputupu ilukuli epo epetapi, iba:te ubi kawonomo iyatinamiya la:le dulama:wenama ebe kawokawo tanalo ulaema:, wiyasiya iba:te ka:modobiya:, ega:walo ibi ubila la:le dolowiawenama ebe tanalo kolowioma:, wiyasiya iba:te ka:modobiya:.”

*Kono Kikopu Aminaoledawano Iyatulame Oino Magumu  
Mak 4.13-20; Luk 8.11-15*

<sup>18</sup> “Ebema: la: kono kikopu aminaola:go da:ti ebe lumagino oino magumu nolowiala: <sup>19</sup> Godote Kawo Elawodawama: deda:na, epate ebe tanalono tabo olowite magumu wadenomamo iyatawaoa:no, ebe tetelo Saitanate pete ibino tepo magumune ebe tabo walo ka:ka:puwatelaemene. Mako epo gabamo da:gudi, ibi ebe kono kikopu keba kunula:ka: eba kunula. <sup>20</sup> Ega:walo epo epetapiate nokola damelamo da:gudi, ibi ebe kikopula. Iba:te Godokono tabo dolowima:na:, ebe tetenomolo kalakalago kelaema:na:, <sup>21</sup> wiyasiya ibino tepo magumulo dolodolo puliyala. Ebema: iba:te Godokono woko magumulo tete da:pesamo ilukula:tepate, ebene Godokono taboma: temeteme tanalate iba:tamo da:pemaimioma:na: ega:walo epate ibino tanaloma: degelama:na:, iba:te samonomamo kalautioma:na: <sup>22</sup> Epo epetapi iba:te moemoe uwago damelamo da:gudi, ibi ebe kikopula. Iba:te Godokono tabo kolowima:na:, wiyasiya iba:te inamabu kawonomamo malagidilolena ega:walo ibino ilukuli tanaloma: woki bilibilima: eda:ona. Ebema: ibino tepo magumulo ebakobako woki bilibilinomo ba:pola:na, me wokino tanalate wade tabo eba anakapumilo, ebene iba:te a:ka:noloma:na: <sup>23</sup> Wiyasiya epo epetapi iba:te wade damelamo da:gudi, ibi ebe kikopula. Iba:te Godokono tabo olowite wade iyatawa lawete nanitabonomolo ka:noloma:na:, epetapi 100 teta:mo, epetapi 60 teta:mo, epetapi 30 teta:mo ka:noloma:na:.”

*Kuba Uwagate Pali Magumulo Demaimiya Ebe Iyatulame Oi*

<sup>24</sup> Ebene Ya:sute oi idi epo eba iyatulamelo na:kegiya, “Godote Kawo Elawodawama: deda:na, ebe tanalote ebe dubu idite ebenu pali amio bai osiyodilote wade kono kikopu daminaoli eba kunula. <sup>25</sup> Idoko idilo epo bilibilinomate delaoniya, eba:go gowelaodawama: deda:nami ebe dubute penate kuba uwago kikopu pali magumamo pamionate gito toni. <sup>26</sup> Walone tetelo konote apepeote da:noloiya, kuba uwagate maimiote konono dolodolo ebo aupulatoliya, <sup>27</sup> ebenu pali namutudawano wokopiate ebetamo pelamete ebe napaniya, ‘A:ma: pali magumamo wadewade kikopu amiata, wiyasiya me kuba uwagate kebene kemaimile?’

<sup>28</sup> “Ebate tabo eba wiyalo negi, ‘Ago gowelaodawa idi, ebete ami.’

“Ebenu wokopiate ebe nalatediya, ‘Modobola:ka: a ebe kuba uwago kemagobelemalema:?’

<sup>29</sup> “Namutudawate wiyasiya negi, ‘Ao, la:le demagobela:ema, diyala, la: atu tetelo wadewade kono epetapi da:bemagobelemalema. <sup>30</sup> Ebema: modobola iba:te kapimiya napepeoma:na:, wiyasiya walone nao kono uwate tetelo nale wokopi kanalemamo iba:te dopamo kuba uwago magobelete elamo kiyalekema:, ebenu iba:te wadewade nao kono uwatete naimano pali inamabu alomono motamo kapalomoma:na:.’ ”

#### *Mastada Kikopuno Iyatulame Oi*

*Mak 4.30-32; Luk 13.18-19*

<sup>31</sup> Ebene Ya:sute oi idi ibi eba iyatulamelo na:kegiya, “Godote Kawo Elawodawama: deda:na ebe tanalo mastada kikopu keba kunula:ka: eba kunula, iyo, tete idilo dubute me kikopu lawete ebenu pali magumamo gito ami. <sup>32</sup> Nanitabola, me opo kawonomolo kewa kikopu kawokawonomo ba:pola:na wiyasiya mastada kikopu ebe da:pesonomola. Wiyasiya numa:la:, lumagite daimene ebe da:peso kikopute apete kewa bilibilinomo epetapi kodoilimene, ebenu olaolate pelamete ebe kewa katomolo ba:pilukulionama:na:.”

#### *Palowa Bae Gamagamaimino Tuwae Inamabuno Iyatulame Oi*

*Luk 13.20-21*

<sup>33</sup> Ebene Ya:sute oi idi ibi eba iyatulamelo na:kegiya, “Godote Kawo Elawodawama: deda:na ebe tanalo palowa bae gamagamaimino tuwae inamabu keba kunula:ka: eba kunula. Kamiyale idite modobo palowa lawete gamagamaimino inamabu kela:mo aminalete ebo ewegedi, ebenu gamagamaimino inamabute palowa lawenomo eba lawelo palowa baete unamo ebo maigi.”

#### *Ya:sute Epo Oiamo Diyatulamenaki Ebe Tanalono Maburu*

*Mak 4.33-34*

<sup>34</sup> Ya:sute me tanalo epo bilibilinomatamo iyatulame oiamo kiyawaonaki, ma kunu ebete tanalo idi iba:tamo iyatulame oia:no ka:kiyawaonakia:.  
<sup>35</sup> Ebe tanalote emaigiya Godote ebenu woki awokalimidawado degiya, ebe tabote nanitaboma: keda:ma:. Ebete iyalo tetelo tabo ma kunu giya,

“Na Godote epatamo tabo kiyawao tetelo  
iyatulame oiamo kiyawaonakomo.  
Iyo, nale me opo dosiyodiliyamo  
ebe tetene wagilimite me teta:mo pemaiga,  
kebe tanalate waminaole magumulo da:pola:namiya,  
na ebe tanalo ma kunu kawokalilaemamo.”

#### *Kuba Uwagate Demaimiya Ebe Iyatulame Oino Magumu*

<sup>36</sup> Ebene Ya:sute epo bilibilinomo miyapate moto guamo gito nodoliya. Ebe tetelo ebe waloma:tapiate ebetamo pelamete na:pegeliya, “Kono pali magumulo dapepeiya ebe kuba uwagono magumu keba kunula:ka? A:ma: a niyatuama:”

<sup>37</sup> Ya:sute ibino tabo eba wiyalo negiya, “Wade kono kikopu kebe dubute kaminaolile, ebe Epono Naniwila. <sup>38</sup> Ebema: ebena pali ebe me opo kawonomola, wadewade kono kikopu ibi Godokono Unu Duliyaomolono gudila, ega:walo kuba uwago ibi Saitanakono gudila. <sup>39</sup> Kuba uwago dami ebe Saitanatela, ega:walo nao kono uwate tete ebe me opono uwomula, ega:walo nao kono uwatepi ibi Godokono nopopila. <sup>40</sup> Ebema: wokopiate kuba uwago magobelete elamo diyalekiya, me opono uwomu eba kunu kitanamene. <sup>41</sup> Ebe tetelo Epono Naniwite ebena nopopi kapalibolemene. Ebema: piyate ebena epago eba ilukulinalo kuba dosiyodilolenaka, nopopiate ibi bilibilinomo puwatete <sup>42</sup> kawonomo elate dowadena ebe baiamo gito ka:niyalekema:na:, ebena iba:te ebolo lalo eba oliomolelo kawonomamo ebo kiimima:na:. <sup>43</sup> Wiyasiya Godokono tuputupu ilukuli guda:godolo ebena alote kawonomamo ka:pukuilaemene, ibino Nabiwino Unu Duliyaomolono da:pukuilamena eba kunu. Galagodawa, a:ma: wadenomamo nolowia!”

#### *Waminaole Manino Iyatulame Oi*

<sup>44</sup> “Godote Kawo Elawodawama: deda:na, ebe tanalo ebe lumagite kawo mani ega:walo wadewade inamabu iyalo tetenomolo damelamo dowaminaoliya eba kunula. Walone tetelo ebete ebo a:iya, ebena ulama bilibilinomo da:petoiya lumagi idite damela obobo woko eba osiyodilolo ebe wadewade inamabu ebo ulamiya. Ebe tetelo ebete kalakalago walo kitiolete, ebena ebena motamo tote ebena inamabu bilibilinomo maniamo na:midiolete modobo mani ebo nelawiya. Ebena ebe maniamo ebete ebe damela lawete, ebe damela magumulo waminaolelo da:pola:niya ebe wadewade inamabuate ebena: ebo eda:iya.”

#### *Wiya Kawo Negegeno Iyatulame Oi*

<sup>45</sup> “Ega:walo Godote Kawo Elawodawama: deda:na, ebe tanalo ebe olowame lumagite wadewade negege inamabu ola:go depata:na eba kunula. <sup>46</sup> Egela idilo ebete kapiya negege wadenomo dumi, ebe tetelo ebena inamabu bilibilinomo maniamo na:midiolete modobo mani nelawete, ebena ebe maniamo ebete ebe wade negege lawete ebena: ebo midi.”

#### *Kamauno Iyatulame Oi*

<sup>47</sup> “Ega:walo Godote Kawo Elawodawama: deda:na, ebe tanalo ebe lumagite namo bilibilinomo uwatolema: kamau kolomamo daubi eba kunula. <sup>48</sup> Ebena namo bilibilinomate detaiya ebe tetelo wokopiate kamau kolomo balamo anamiyamidate wadewade namo bagowamo eba alomolo kubakuba namo gito iyalekiya. <sup>49</sup> Ebema: me opono uwomu eba kunu kitanamene. Ebe tetelo Godokono nopopiate pelamete kuba osiyodilolepi tuputupu ilukuli epagodone powagailite <sup>50</sup> kawonomo elate dowadena ebe baiamo gito ka:niyalekema:na:, ebena iba:te ebolo lalo eba oliomolelo kawonomamo ebo kiimima:na:.”

#### *Godokono Kawo Elawodawa Tanalono Magumu Delawiya Ebe Lumagino Tanalo*

<sup>51</sup> Ebema: Ya:sute ebe waloma:tapiatamo negiya, “La: me tanalo bilibilinomo wadenomamo na:kiyatawawenama?”

Iba:te tabo eba wiyalo negeliya, “Iyo, a modobola.”



<sup>52</sup> Ebene Ya:sute iba:tamo walo na:kegiya, “Godokono Totomu iyatu-lamepi magumulo, potele Godokono Kawo Elawodawa tanalono magumu lawenomo delawi, ebe lumagi kawo moto namutudawa keba kunula:ka: eba kunula. Ebe mulo dubuno motolo kawokawo wadewade inamabu-ate ba:pola:na, ma kunu tagalatagala inamabu ega:walo olioli inamabu kapimiya ba:pola:mena, ebema: ebete ebenu ubilo ebe iyaiya inamabu epatamo ba:powaulatelenakomene ibi wadenomamo kowalubilinama:.”

*Nasalete Duliyomolo Epate Ya:suko Ubia:noma: Deda:iya*  
*Mak 6.1-6; Luk 4.16-30*

<sup>53</sup> Ebene Ya:sute ebe iyatulame oi kiyawao dolopoligiya, ebete ebe duliyomolone tote <sup>54</sup> ebenu okoli duliyomolo Nasaleta:mo walo na:ka:tiya. Ebete epono balidi ibilamole motolo ibi eba iyatulamitalo iba:te anoanolo negelitiya, “Me dubuno mulo iyatulame woki ebete kebolo kiyatawile? Ega:walo ebete anoano tanalo pokono elawamo kosiyodilolenale? <sup>55</sup> Ebe kapeneta dubuno gudula, ebenu menoko ebe Ma:litela. A iyatawala ebenu ekaki Ya:imesiko, Yausepeko, Saimonoko, ega:walo Yudasiko, <sup>56</sup> iyo, ebenu ekaki buwelemele bilibilinomate ago bilukulina. Ebema: me dubute ebenu elawo ega:walo mulo kebolo kuwatile?”

<sup>57</sup> Ebene iba:te ebe ubia:noma: eba eda:utalo Ya:sute ibi nanaliya, “Godokono woki awokalimidawa epate ebe unamo kadipatema:na:, wiyasiya ebenu duliyomolo epo ega:walo ebenu moto epo iba:te ebe ubia:noma: beda:onakoma:na:.” <sup>58</sup> Ebema: Nasalete epono nanitabokobi midia: mabuma: Ya:sute ibino duliyomololo anoano tanalo bilibilinomo kosiyodiloliya:, ebete ibino taneba magumulo kapiyakapiyanomo osiyodiloliya.

## 14

*Elodite Yonekono Wato Dotowamidamiya*  
*Mak 6.14-29*

<sup>1</sup> Ebe tetelo Ga:lili opono Kawo Elawodubu Elodite Ya:sukono osiyodilole tanalo olowiote, <sup>2</sup> ebete ebenu opopiatamo negiya, “Me Ya:suko ebe Yonete, epo obamo waduba:midaoledawala. Ebete a:e magumune emaigi, ebema: me anoano tanalate ebegodone pemaiminaka.”

<sup>3-4</sup> Me tanalo ebe Yonete keba kunu kaiyale ebe tanalola.

Yonete dopamo eba okolinalo, Elodite ebenu ekawi Pilipikono kamiyale pilolo lawiya, ebe kamiyaleno mailo Elodiyasitela. Me mabuma: Yonete Elodiko kawiya eba analo negiya, “A:ma:le ebe kamiyale lawe modoboa:, kawo kubanomola!” Ebema: Elodite ebenu gowelaopi danaliya, iba:te Yoneko nelawete idoko moto guamo gito peba:idiliya, mabu ebete ebenu ubi iyatiya ebe osiyodilo tanalodo ebete Elodiyasiko kalakalakobi ka:midima:.

<sup>5</sup> Ebe tetelo Elodite ebe anakapuima: ubi niyatiti wiyasiya ebete Yu epo tolelamelo gito atepiya, mabu iba:te Yoneko Godokono woki awokalimidawama: gelanakiya.

<sup>6</sup> Ebene Elodite dawokaliya, ebe egela malagidilolo ebenu namutupiate eba:go soliyomu bae nautiya. Ebe tetelo Elodiyasikono buwelete ibi bilibilinomono ololo apuamo pete eba pemaitalo, Elodite ebetamo kawonomamo kalakaliti, <sup>7</sup> ebema: ebete buweletamo negiya, “Nale Godokono mailamo gemo, a:ma:le beda: tanaloma: ubi diyata:emene nale a:ma:tamo nanitabonomolo kikaemamota!”

<sup>8</sup> Ebene buweleno menokote ebe daniya, ebete Eloditamo ma kunu nowamiya, “Na ubila Yoneko epo obamo waduba:midaoledawano wato kikopu kawatago. Ka:lonomo natamo nikanama!”

<sup>9</sup> Ebe tetelo Kawo Elawodubu Elodite ebene tepo magumulo mibomiboma: ediya, wiyasiya ebete dopamo degiya ebe tabo ebete Godokono mailamo giya soliyomu epono ololo apulo. Ebema: ebete ebene gowelao-dawa idi daniya, <sup>10</sup> ebe dubute idoko motamo tote Yonekono wato ebo notowamidamiya. <sup>11</sup> Ebene ebete wato kikopu kawatago adaete buweletamo da:pikamiya, wiyasiya ebete ebene menokotamo gito atiya. <sup>12</sup> Ebe tetelo Yoneko waloma:tapiate ebene apenomo pelawete bobo magumamo gito niyatiya, ebene iba:te tolamete ebe tanalo Ya:suko ebo naniya.

*Ya:sute Epo Bilibilinomatamo Bae Dikalamoleni*

*Mak 6.30-44; Luk 9.10-17; Yon 6.1-14*

<sup>13</sup> Ya:sute ebe tanalo olowite ebe waloma:tapiago pe lawete gito tolamiya, ebete a:ka:tuwa: diyamo: opamo ka:nemaigama:. Wiyasiya epo bilibilinomate ebene to tanalo dolowiya, iba:te ibino iyaiya duliyaomolone maimiote Ya:suago kanalugoma: damela gaboiya gito tolamiya. <sup>14</sup> Ebene Ya:sute peago da:nemaigiya, epo bilibilinomo nulamete ibi kawonomamo na:nilakapoilamiya, ebema: ebete damelamo nodolote ibino temetema:gopi wadekobi ebo nimidioliya.

<sup>15</sup> Eba adimonalo ebe waloma:tapiate ebetamo pelamenate ebe napananiya, “Me epoa: baila. Tete olopoligo, samamo kidokomene, ebema: a:ma: ibi nalibola:, iba:te iyaiya duliyaomolamo tolamoete ibi a:ka:tuwa: ibino bae ka:nuwateoma:.”

<sup>16</sup> Ya:sute ibi nanaleni, “Ao, iba:te tolamea:no la:le iba:tamo nao inamabu dopamo nikalamola:la:.”

<sup>17</sup> Iba:te nowaiminiya, “Agodolo paibu bae ega:walo namo netewa ebene mate pola:na.”

<sup>18</sup> Ya:sute iba:tamo negeni, “Ebe baela namola natamo nowada:la:.” <sup>19</sup> Ebene ebete epo uwagolo ilukulima: danaleni, ebe tetelo ebete paibu bae ega:walo namo netewa uwatenate, Unu Duliyaomolamo melelo Godotamo kalakala tabo ebo geni. Ebene ebete ebe bae wakalamiolenate ebe waloma:tapiatamo ikalamenate, iba:te epo bilibilinomatamo gito ikalamoleniya. <sup>20</sup> Ebe tetelo ibi bilibilinomate bae denaoniya ibino bae kape tanalo ebo olopoligolamene, ebene Ya:suko waloma:tapiate da:luliniya ebe bae apuapuoamo 12 bagowo ebe owiyaoleniya. <sup>21</sup> Nanitabola, ebe bae 5,000 dubate naoniya ibino kamiyaale guda:go.

*Ya:sute Obo Unudo Da:toni*

*Mak 6.45-52; Yon 6.15-21*

<sup>22</sup> Ebene ebe tetenomolo Ya:sute epo eba alibolenalo ebe waloma:tapiatamo negeni, “Pe lawa:wete Ga:lili Paka: apuamo na:na:iwala:la:.” <sup>23</sup> Ebene ebete epo bilibilinomo alibolenate ebete damela unamo gito nodoloni Godago tabo ka:negelanama:. Ebene didokoni Ya:sute a:ka:tuwa: ebolo okolini. <sup>24</sup> Ebe tetelo waloma:tapiate peago paka: tulituli tetenomodo eba tolamenalo, ulate pe apuamo obiyamidanki, apuamo obiyamidanki, eba kunu wageleni mabu awate ibi nodiyoboleni. <sup>25</sup> Ebema: idoko tetelo egela walo tatalima: eba eda:nalo, Ya:sute obo unudo iba:tamo ebo toni. <sup>26</sup> Wiyasiya ebete obo unudo eba tonatolo, iba:te ebe uminate eba toletoleonalo negelaniya, “Obolote pe!” ebema: iba:te tole kawonomago ebo gelatepaoniya.

<sup>27</sup> Ebe tetenomolo Ya:sute ibi nanaleni, “Na Ya:sutela, la: ka:toletoleonala!”

<sup>28</sup> Ebene Pitate wiyasiya ebetamo negeni, “Kawodawa, a:ma:lala:ka?: A:ma: na nanana:, nale obo unudo a:ma:tamo ka:pema:.”

<sup>29</sup> Ya:sute ebena tabo eba wiyanalo negeni, “Na:pa:!” ebena Pitate pe atepanate obamo a:putinate obo unudo ebetamo ebo toni. <sup>30</sup> Wiyasiya ebete kawo awano ulo ulamenate ebo toletoleni, ebena ebete obamo eba ololunalo Ya:sutamo kawonomamo negeni, “Kawodawa, a:ma: naimano igilo na:mula:nama:!”

<sup>31</sup> Ebe tetenomolo Ya:sute koto uwamidanate Pitako lawenate nanani, “A:imano nanitabokobi midi tanalo kawoa:, da:pesola. Mabu keleka: a:ma:le woki netewama: deda:wa:?” <sup>32</sup> ebena iba:te walo peamo da:koloniya awate ebo olopoligoni.

<sup>33</sup> Ebe tetelo Ya:suko waloma:tapiate ebe eba amamatenalo negelaniya, “Nanitabola, a:ma: Godokono Gudulata!”

*Ya:sute Genasalete Opolo Temetema:gopi Wadekobi Da:midiolenaki*

*Mak 6.53-56*

<sup>34</sup> Ebene iba:te duiya tetelo paka: apuamo na:iwalete Genasalete opamo gito nemaimiya. <sup>35</sup> Ebe tetelo epate Ya:sukono tanalo iyatawaote ebe opono duliyoumolo bilibilinomamo tabo nanalibiya, iba:te temetema:gopi ebetamo kemagaelema:. <sup>36</sup> Ebema: Ya:sute ebolo eba nokolinalo, temetema:gopiate da:pelamenakiya ebe na:petoweomenakiya iba:te ebena kaliku kologoma:, ebena piyate ebena kaliku dologionakiya iba:te wadekobi ebo olowionakiya.

## 15

*Yu Epono Ewonino Iyatulame Tanalo*

*Mak 7.1-13*

<sup>1</sup> Ebe tetelo Pa:lisi tanebapi ega:walo Godokono Totomu iyatulamepi, ibi epetapiate Yelusalema kawo duliyoumolone pelamete Ya:sutamo na:pegeliya, <sup>2</sup> “Mabu keleka: a:ma: waloma:tapiate aimano ewoniate diyatulamenakiya ebe totomu tabo dowakalaminaka? Numa:, iba:te koto ukulaolea:no bae ebo naonaka!”

<sup>3</sup> Ya:sute wiyasiya iba:tamo negiya, “La: beda: mabuma: ewoniate degelanakiya ebe totomu tabo eba malagidilolenalo, wiyasiya Godokono Totomu Tabo ebe wakalaminamata? <sup>4</sup> Numa:la:, Godote ebena Bukalo negiya, ‘La:imano menokobila nabila nowalubila:la:,’ ega:walo ebete na:kegiya, ‘Kebe lumagite ebena menoko o nabiwino tanaloma: kuba tabo da:kiyawaomene, la:le ebe nanakapumiyala:.’ <sup>5</sup> Wiyasiya la: me Godokono tabo iyabaiamo alomawete negelanamata, ‘Lumagigodolo da:pola:na menokola nabiwila walubilima:, ebete iba:tamo ikalaema: ubia:noma: deda:mene, kuba:nola. Ebete gito kegemene, ‘Me inamabu talenala, nale Godotamo ikameote me inamabuamo naimano menokola nabiwila a:kowalubilimo.’ <sup>6</sup> Ma kunu la: magumulo kuba woki lumagite ebena nabiwi kowalubinakoa:, mabu la: Godokono nani tabo iyabaiamo alomolo wiyasiya la:imano ewoniate degelanakiya la: ebe iyaiya tanalo kapiya osiyodilolenakomata. <sup>7</sup> La: mena netewa epolata! Godokono woki awokalimidawa Aisayate la:imano tanaloma: dopamo nanitabonomolo ma kunu egiya,

<sup>8</sup> ‘Me epate na tabamo amamanatenena, wiyasiya ibino tepo magumuno woki

na niyakabolo kapola:na:, mulunomolo ba:na:pola:na.  
<sup>9</sup> Iba:te naimano mailo unamo nadipatena,  
 wiyasiya nanitabo tanalo puliyala,  
 iyo, iba:te me opo epono totomu  
 Godokono Totomunomoma: midilite ebo iyatulamenaka.’ ”

*Epo Da:kubailamenaka Ebe Iyaiya Tanalo*

*Mak 7.14-23*

<sup>10</sup> Ebene Ya:sute epo bilibilinomo ebetamo ka:la:mite iba:tamo negiya, “La: me tabo olowiawete la:imano woki wadenomamo na:tuputupuilama:la:. <sup>11</sup> Nao inamabute lumagino tepo magumamo dopegamene ebe inamabute ebe a:ka:kubaimene, wiyasiya lumagino tabone da:pemaima:na: ebe tanalate ebe ka:kubaima:na:.”

<sup>12</sup> Ebene Ya:suko waloma:tapiate ebetamo pelamete na:pegeliya, “A:ma: iyatawala:ka:, Pa:lisi tanebapiate a:ma:le degeawa: ebe taboma: na:dowa?”

<sup>13</sup> Ya:sute wiyasiya negiya, “Naimano Nabiwite Unu Duliyomololo dokolina, ebene pali magumamo epate a:ka:tuwa: ibino elawamo damionaka, ebe kewa bilibilinomo ebete dolodolago ka:pemagobelemene, wiyasiya ebete a:ka:tuwa: kebe kewa kamionale, ebe kewanomate belamota:onama:na:. <sup>14</sup> Ebema: la:le Pa:lisi tanebapino tabo ako-olowiala:, na:miyapiyala: mabu ibi balidi tamio-pila, iba:te epo kubanu iyatulamenaka. Numa:la:, balidi tamio dubute balidi tamio dubu idi gabodo demagatamene iba:te damela gugamo kapimiya ka:na:gudima:na:.”

<sup>15</sup> Ebene Pitate ebe naniya, “A:ma: me tanalono magumu a niyatuama:.”

<sup>16</sup> Ya:sute tabo eba wiyalo negiya, “Epetapiate woki wadenomamo ka:tuputupuilamena:, la: atumu. <sup>17</sup> La: iyatawala:ka:? Nao inamabute lumagi magumamo opegate wapuamo tote ebene neago ka:penemaigamene, <sup>18</sup> wiyasiya lumagite ebene tabamo da:kiyawaomene, ebe tabo ebene tepo magumuno woki mabune ka:pemaimioma:na:, ebe iyaiya tabote ebe ebo ka:kubaima:na:. <sup>19</sup> Numa:la:, lumagino tepo magumune wiyasiya kuba wokino tanalate pemaiminaka, ebene ebe kuba wokine me kawokawo kubate ka:pemaiminaka — lumagi anakapumi tanalo ega:walo inamabu pilo tanalo, buwele pilo tanalo ega:walo lumagi idino kamiyale pilo tanalo, a:da: tabo kiyawao tanalo ega:walo lumagi idino mailo kubaimi tanalo. <sup>20</sup> Iyo, nanitabola! Me kubate pemaimite lumagi ebo ka:kubaima:na:, wiyasiya lumagite koto ukulalea:no bae denamene ebe tanalote ebene woki mabu a:ka:kubaimene.”

*Taya Duliyomolo Kamiyaleno Nanitabokobi Midi Tanalo*

*Mak 7.24-30*

<sup>21</sup> Ebene Ya:sute ebe opo atepate Taya ega:walo Saidono kawokawo duliyomolono opamo gito tiya. <sup>22</sup> Ebe Ka:inane opolo dokolinami, kamiyale idi ebe Yua: lumagila, ebete Ya:sutamo geatepago pete na:pegeliya, “Da:ibidikono A:la:mu, na:na:nilakapoinama:! Naimano gudu buwele kuba uliyanagonola, ebema: ebete kawo temeteme iyatawana!”

<sup>23</sup> Wiyasiya Ya:sute ebe kamiyaleno tabo ka:wiyala:, ebema: ebe waloma:tapiate ebetamo pelamete na:pegeliya, “A:ma: me kamiyale iyabaiamo naliba, mabu ebe ago depaita gowela kawonomo osiyodiluta.”

<sup>24</sup> Ebema: Ya:sute ibino tabo eba wiyalo negiya, “Isalaela epo magumulo dalatidioliya, Godote na ebe sipi-goeogoeo kapiya olema: paliboniya, iyaiya opo epatamoa:.”

<sup>25</sup> Ebene ebe Yua: kamiyaletе ebеno tabo olowite ebetamo walo ka:pete ebеno agowa mabuamo pa:tuduwatalo na:pegiya “Kawodawa, a:ma: na nowalubina.”

<sup>26</sup> Ebema: Ya:sute ebеno tabo eba wiyalo negiya, “Mabu keleka: nale a:ma: owalubima: degeawita? Modoboa: epate gudino bae epetapiatamo gito ikalaema:, mabu ebe osiyodilo tanalo ebe gaagaatamo ikalame tanalo keba kunula:ka: eba kunula.”

<sup>27</sup> Kamiyaletе Ya:sutamo negiya, “Iyo, a:ma:le degeawa: nanitabola, wiyasiya kawo dubu idino bae nao patapatane opamo da:penigudinaka, ebe bae apuapu gaagaate nao modobola!”

<sup>28</sup> Ebene Ya:sute ebetamo negiya, “Kamiyale, a:ma:godolo nanitabokobi midi tanalo kawonomo bitana, ebema: a:ma:le ubi diyata:wita, na ebe tanalo nanitabolo kosiyodilomamo.” Nanitabola, ebe tetenomolo ebe kamiyaleno buwelete wadekobi ebo olowiya.

### *Ya:sute Temetema:gopi Bilibilinomo Wadekobi Da:midoliya*

<sup>29</sup> Ebene Ya:sute ebe opo atepate Ga:lili Paka: balado petote damela unamo nodolote gito nokoliya. <sup>30</sup> Ebe tetelo epo bilibilinomate Ya:sutamo eba pelamelo iba:te ibino temetema:gopi ebetamo ebo magaeliya, ma kunu iba:te agowa kubakubapi, balidi tamiopi, tabo kiyawaoa:pi, ega:walo iyaiya gabugabuagopi epetapi bilibilinomo Ya:sutamo magaelete ebеno agowa mabuamo da:powadilatoliya, ebete ibi wadekobi ebo midoliya. <sup>31</sup> Ebene epate kawonomamo anoanoiya mabu iba:te ibino balida:mo me iyaiya tanalo ulamiya, tabo kiyawaoa:piate tabo a:kiyawaiya, agowa kubakubapiate owapata:lamiya, ega:walo balidi tamiopiate balidi a:meleiya. Ebema: ebe tetelo Godote Isalaela epo dowalubilinako, iba:te ebеno mailo unamo ebo adipatiya.

### *Ya:sute Epo Bilibilinomatamo Bae Walo Da:kikalamoliya Mak 8.1-10*

<sup>32</sup> Ebene Ya:sute ebe waloma:tapi ebetamo ka:la:mite ibi nanaliya, “Na me epo na:nilakapoilamitamo, mabu iba:te nago netewa-kapiya egela dilukulinatiya ibino bae olopoligolami. Na ubia:nola ibi baea:no ibino iyaiya duliynomolamo gito alibolema:. Diyala, iba:te gabo tetelo elawoa:noma: da:ba:neda:oma:na:.”

<sup>33</sup> Ebe waloma:tapiate ebetamo negeliya, “Me baea: opola. Ale me epo bilibilinomatamo bae ikalamole modoboa:.”

<sup>34</sup> Ebene Ya:sute ibi nalateda:liya, “La:godolo kebalata baete ka:pola:nale?”

Iba:te negeliya, “Sebeni bae ega:walo namo egege kapiyakapiyate pola:na.”

<sup>35</sup> Ebene Ya:sute epo opamo ilukulima: danaliya, <sup>36</sup> ebe tetelo ebete ebe sebeni bae apuapu ega:walo namo uwatete Godotamo kalakala tabo ebo giya, ebene ebete wakalamiolete ebe waloma:tapiatamo gito ikalamiya iba:te epatamo kikalamolema:. <sup>37-38</sup> Ebe tetelo piyate ebe bae denaiya ibino bae kape tanalo gito olopoligolamiya. Nanitabola, ebe bae 4,000 dubate naiya ibino kamiyale guda:go, ebene da:luliya ebe bae apuapuamo Ya:suko waloma:tapiate sebeni bagowo ebe owiyaoliya.

<sup>39</sup> Ebene Ya:sute ebe epo ibino iyaiya duliynomolamo daliboliya, ebe tetelo ebete peamo olote Magadana opamo gito tiya.



## 16

### *Pa:lisi Tanebapiate Anoano Tanalo Uima: Ya:suko Walo Dakaniya Mak 8.11-13; Luk 12.54-56*

<sup>1</sup> Ebene Pa:lisi tanebapi epetapi ega:walo Sa:diyusi tanebapi iba:te ubi iyatiya Ya:sutamo pelamete ebe kuba gabamo ka:powabuga:tama:. Iba:te ebe ma kunu paniya, “A:ma:godolo Godokono elawo ditana, ebe tanalo awokalima: anoano tanalo idi atamo nosiyodila.”

<sup>2</sup> Ya:sute tabo eba wiyalo iba:tamo negiya, “Egelate eba niwisigalo egela unu kalimakalimama: da:neda:mene, la: ebe tanalo uma:wete kegelamamota, ‘Dumutu egela wadenomamo ka:powalomene.’ <sup>3</sup> Ega:walo tete idilo egelate eba waloutalo la: ulama bubu dulama:ema la: kegelamamota, ‘Me egelate ka:kubamene.’ Iyo, la: tobolo ununo iyaiya tanalo ulamole iyatawalata, wiyasiya me tetelo Godote la: magumulo dosiyodilolena ebe iyaiya tanalono magumu la: wadenomamo kiyatawawena:. <sup>4</sup> Kuba osiyodilolepi ega:walo nanitabokobi midia:pi, ibi ubi kawonomola Godokono elawo awokalimino anoano tanalo kuima:, wiyasiya Godote tanalo idi iba:tamo akawokalimene. Nanitabola, ebete Yaonado dawokalimiya ebe anoano tanalo kapiya la:tamo ikalamiyata.” \*

Ebe tetelo Ya:sute ibi miyapate gito tiya.

### *Pa:lisi Tanebapi Ega:walo Sa:diyusi Tanebapi Ibino Amama Tanalo Mak 8.14-21*

<sup>5</sup> Ebene Ya:sute ebe waloma:tapiago Ga:lili Paka: apuamo da:na:iwaliya, ebe tetelo iba:te bae uwate tanalo na:dodomatiya. <sup>6</sup> Ya:sute iba:tamo negiya, “La: wadenomamo nolowiala:. Palowa baete a:ka:tuwa: unamo demaiga, Pa:lisi tanebapi ega:walo Sa:diyusi tanebapi ibino amama tanalo eba kunula. Eiyee, mako tanalote la:tamo akopemaigala:!”

<sup>7</sup> Ebema: iba:te ibino taneba magumulo tabo ma kunu geliya, “Ebete atamo me tabo nege mabu ale bae kowadaea:.”

<sup>8</sup> Wiyasiya iba:te tabo degelitiya Ya:sute iyatawate negiya, “La:imano nanitabokobi midi tanalo kawokawoa:. La:le baea:no pola:na tabo beda:ma: kegelawitama? <sup>9</sup> Keleka: mabu la:le naimano nanitabo tanalo wadenomamo kuma:wena:? Nale adimo idilo paibu bae 5,000 dubatamo dowakalamiolelamenimo, me tanaloma: la:godolo woki ba:kitanale? Ebe tetelo la: kebalata bagowo kowiyaola:wenima? <sup>10</sup> Ega:walo egela idilo nale sebeni bae 4,000 dubatamo da:kowakalamiolelaimo, ebe tetelo la: kebalata bagowo kowiyaola:ima? <sup>11</sup> La: beda: mabuma: naimano tanalo wadenomamo kemalagidilawena:? Nale la:imano bae nao tanaloma: kegea:. La: nanisiwale, Pa:lisi tanebapi ega:walo Sa:diyusi tanebapi ibino amama tanalote la:tamo akopemaigala:!”

<sup>12</sup> Ebene Ya:suko waloma:tapiate ebena tabo magumu wadenomamo ma kunu lawiya, Ya:sute palowa bae unamo maiga tabo danaliya, ebete Pa:lisi tanebapino amama iyatulame tanaloma: giya. Ebe ubia:nola ebe kubate ebe waloma:tapiatamo pemaigama:.

\* **16:4:** Buka ka:la:mioledawa, modobola a:ma: me tanalo niyatawa, Yaonako Godokono woki awokalimidawa idila, ebete Godokono tabo Niniba duliyoumolo epatamo atiya. Yaonate ebe Yua:piatamo nemaiga:no, dopamo gabo tetelo kawo olalatite ebetamo nemaigiya, ma kunu namo kawonomote ebe gito alopogiya. Ebene Yaonate netewa-kapiya egelalo namono tepo magumulo okolitate, ebe tetelo Godote ebe nilakapoimilo kawo anoano tanalo eba osiyodilolo ebena igilo ebo mula:miya. Ya:sute ebe anoano tanaloma: kiyawaiya Pa:lisi tanebapiatamo.



*Pitate Ya:sukono Nanitabo Tanalo Dawokalimiya*

*Mak 8.27-30; Luk 9.18-21*

<sup>13</sup> Ebene Ya:sute Sisaliya-Pilipai opamo da:nemaigiya ebete ebenu waloma:tapi ebo nalateda:liya, “Na Epono Naniwi iba:te poma: kegelanake?”

<sup>14</sup> Iba:te negeliya, “Epetapiate a:ma: Yoneko obamo waduba:midaoledawama: gelanaka, epetapiate a:ma: Elayama: gelanaka, epetapiate a:ma: Yelemayama: gelanaka, ega:walo epetapiate a:ma: Godokono woki awokalimidawa idima: gelanaka.”

<sup>15</sup> Ebene Ya:sute ibi nalateda:liya, “Wiyasiya la:le na poma: ka:midina:wenama?”

<sup>16</sup> Saimono Pitate tabo eba wiyalo negiya, “A:ma: Kelisotela, iyo, a:ma: Igilo Godono Gudulata!”

<sup>17</sup> Ebene Ya:sute ebetamo nowamiya, “Saimono, Yonekono gudu, a:ma: kawonomamo nekalakala! Mabu me tabo lumagi idite a:ma: kiyatumita:, a:ma: naimano Unu Duliyomolono Nabiwite iyatumiata. <sup>18</sup> Na a:ma:tamo ma kunu gemo, ‘A:ma: Pitate, naimano nokolalata.† Nanitabola, nale me nokola unamo naimano sosi ketemamo, ebema: Saitanakono a:etanalote ebe sosi kubaimima: a:ka:modobomene. <sup>19</sup> Numa:, nale Kawo Elawodawa Godokono iyaiya ki a:ma:tamo kikameomamota. Ebema: a:ma:le Saitanako kodiyoabaema: me opolo kebe gigiyu me kiamo demopi-aemene, Godokono Unu Duliyomololo atu mopi tanalote ka:nitanamene, ega:walo a:ma:le lumagino igilo ka:mula:ma:ema: me opolo kebe gigiyu me kiamo da:iyamidaemene, Unu Duliyomololo atu a:iyamida tanalote ka:nitanamene.’”

<sup>20</sup> Ebene Ya:sute ebenu waloma:tapi kawonomamo ma kunu analiya, “Nale Kelisoma: nanitabolo deda:namo, la:le me tanalo epetapi akokiyawao-lama:la:!”

*Ya:sute Ebenu A:etanaloma: Dopamo Degiya*

*Mak 8.31-9.1; Luk 9.22-27*

<sup>21</sup> Ebe tetelo Ya:sute ebe waloma:tapi iyatulame ma kunu wagilimiya, “Nale Yelusalema kawo duliyomolamo tote epagodone kawokawo teme-teme ebo ka:nuwatemamo, Godokono ubila. Ebene Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi iba:te na kanakapunaema:na:, wiyasiya netewakapiya egelalo Godote na a:ene kadipanatenemene.”

<sup>22</sup> Ebene Pitate Ya:suko waloma:tapi epetapiagodone kela:mo magatate ebe kawiya ma kunu naniya, “Kawodawa, me kubate a:ma:tamo akope-maigala:, modobola Godote nodiyobamene!”

<sup>23</sup> Ebene Ya:sute olobigate Pitatamo negiya, “Pita, a:ma: Saitanako keba kunula:ka: eba kunula! Na natepana:! A:ma:le naimano agowa ukamidadawama: editata mabu a:imano woki Godotamo kiyata:wita:, a:ma: epono wokilo okolinata!”

<sup>24</sup> Ebe tetelo Ya:sute ebe waloma:tapi nanaliya, “Kebe lumagite na waloma:enema: ubi diyatimene, dopamo ebete ebenu tanalo dodolomatilite ebenu kewa olotolowa agute na ebo nowaloma:enemene. <sup>25</sup> Nanitabola, kebe lumagite ebenu igilo nagodone damoeda:mene ebenu igilote kalatidimene, wiyasiya kebe lumagite ebenu igilo na mabuma: datutimene ebete nanitabo igilo ebo ka:nuimene. <sup>26</sup> Ebema: lumagite opono inamabu bilibilinomo uwatenomo eba uwatelo, ebenu igilo datutimene ebe lumagino wiya keleka:? Ebete ebenu igilo walo ka:kelaema: beda: inamabu

† 16:18: Pita mailono magumu nitana ‘Nokolala.’

na:kikaemene? Gabo puliyala, kitana: <sup>27</sup> Nanitabola, Epono Naniwite ebene wade-talena nopopiago ega:walo Nabiwi Godokono elawo alonomago ka:pemene. Ebe tetelo ebete epono tanalo eba anagilamelelamelelo ibino modobo woko wiya nanitabolo kikalaemene. <sup>28</sup> Na la:tamo nani tabo gemo, me tetelo dilukuliona ibi epetapiate Epono Naniwi ebene Kawo Elawodawano elawago da:pemene, ebe kawo tanalo dopamo umite walone ebo ka:elaoma:na:.”

## 17

### *Godokono Elawo Alonomote Ya:sukono Ape Da:pukuimiya Mak 9.2-13; Luk 9.28-36*

<sup>1</sup> Ebene sikisi egela dolopoligiya Ya:sute Pitako, Ya:imesiko, ega:walo ebene ekawi Yoneko, ibinomo magataliya damela ununomo ida:mo. <sup>2</sup> Ebe tetelo ebe waloma:tapino dopo apulo Ya:sukono apete iyama: ediya, ebene ebene ololote egelano pukuilame keba kunula:ka: ebakonoma: eba eda:lo, ebene pupuliono inamabuata atumu keyakeyanomoma: eda:omiya. <sup>3</sup> Ebene waloma:tapino ololo apuamo Moseseko ega:walo Elayako iba:te pemaimite Ya:suago tabo ebo gelitiya. <sup>4</sup> Ebe tetelo Pitate Ya:sutamo negiya, “Kawodawa, ale malo da:pola:nama:, kalakala kawonomola. A:ma: ubi diyata:emene, nale nupunupu netewa-kapiya ketemotemamo, idi a:imanola, idi Mosesekonola, idi Elayakonola.”

<sup>5</sup> Pitate ebe tabo eba kiyawautalo, ebe tetenomolo pukuilame tema iyanomote pete ibi gito panalopamidaliya, ebene tema magumune tabote ma kunu piya, “Me naimano kapiya Gudunomola, na ebetamo nekalakalitamo. La: ebene tabo nolowiala:.”

<sup>6</sup> Ebene Ya:suko waloma:tapiate ebe tabo olowite kawonomamo eba toletoleolo opamo ebo gudiya, <sup>7</sup> wiyasiya Ya:sute pete ibi eba pologiolelo na:pegiya, “Nemaimiala:, akotoletoleala:!” <sup>8</sup> Ebe tetelo iba:te balidi da:meleiya lumagi idi kumiya:, Ya:suko kapiyate ebolo utiti.

<sup>9</sup> Iba:te unu damelane eba piwitiolo Ya:sute ibi napanaliya, “La:le kebe anoano tanalo kuma:ema, ebe tanalo me tetelo epetapi akoanala:la:, wiyasiya Godote na Epono Naniwi a:ene walo dakadipanatenemene epo ebo kanalemamota.”

<sup>10</sup> Ebene Ya:suko waloma:tapiate ebe nalatediya, “Mabu keleka: Godokono Totomu iyatulamepiate degelanaka, Elayate dopamo pete, ebene walogabo apune Kelisote ka:pemene?”

<sup>11</sup> Ebete tabo eba wiyalo negiya, “Nanitabola, Elayako dopamo pete tanalo bilibilinomo ka:pa:tuputupuilaemene. <sup>12</sup> Na la:tamo negemo, Elayako epatamo iyalo a:pi wiyasiya iba:te ebene tanalo kiyatawaoa:, ebene iba:te ibino ubilo kawokawo kuba ebetamo osiyodilolenakiya. Ebema: la: niyatawala:, Epono Naniwite atumu iba:godone kawokawo temeteme nanitabolo kuwatemene.”

<sup>13</sup> Ebene ebe waloma:tapiate ebe tabono magumu wadenomamo ma kunu lawiya, Ya:sute Yoneko obamo waduba:midaoledawano tanaloma: ge.

### *Ya:sute Kuba Uliyanagono Koi Wadekobi Da:midia Mak 9.14-29; Luk 9.37-43*

<sup>14</sup> Ebe tetelo iba:te epo epetapiatamo da:pemaimiya, dubu idite Ya:sutamo pete pupamo pokolite <sup>15</sup> na:pegiya, “Kawodawa, a:ma: naimano koi na:nilakapoima:! Mabu ebe ea: tanalote lawenako, ebema: tete epetapilo ebe elamo bega, obamo bega, eba kunu wagelena. <sup>16</sup> Nale ebe a:ma:

waloma:tapiatamo demagaeakamo, wiyasiya iba:godolo elawo puliyala ebe wadekobi ka:midima.”

<sup>17</sup> Ya:sute wiyasiya iba:tamo negiya, “Eiye, la: nanitabokobi midia: kubakuba epolata! La:le natamo mibo ikanamenamata, ebema: na ubia:nola tete geyageyalo la:go okolinama:! La: koi natamo nemaga:la!”

<sup>18</sup> Ebene Ya:sute kuba uliyana kawiya daniya ebete koi magumune gito nemaigiya, ebe tetenomolo koite wadekobi ebo olowiya.

<sup>19</sup> Ebene epo epetapino pola:na: tetelo Ya:suko waloma:tapiate ebe-tamo pelamete na:pegeliya, “Mabu keleka: ale kuba uliyana aliboma: ka:modobaka:?”

<sup>20</sup> Ebete iba:tamo negiya, “Ebe mabu ma kunu bitana, la:imano nanitabokobi midi tanalote depesoma: eda:ona. Na la:tamo nani tabo gemo, mastada kikopu kawoa:, da:pesonomola. Wiyasiya la:imano nanitabokobi midi tanalote makonoma: deda:mene, la:imano elawote modoboma: eba eda:lo me damelatamo kegelamamota, ‘A:ma: mene ebamo na:toatepa!’ ebene damelate la:imano tabamo ka:tuduwatamene. Me tabo nanitabola, la:godolo nanitabokobi midi tanalo eba itanalo osiyodiloa: tanalo idite a:kitanamene, iyo, kodakoda tanalote modobonomoma: keda:mene. <sup>21</sup> Ebema: la:le la:imano ilukuli magumulo tete epetapilo bae naoa:no eba pola:nalo Godago tabo degelawenakoma, la:le elawo ebo kelaemamota mako kuba uliyana aliboma:.”\*

*Ya:sute Ebena A:e Tanaloma: Walo Da:kegiya*

*Mak 9.30-32; Luk 9.43-45*

<sup>22</sup> Tete idilo Ya:suko waloma:tapiate Ga:lili opolo kapiyama: walo da:kediya, ebete iba:tamo negiya, “Godote Epono Naniwi kubakuba epono kotamo kiyatimene, <sup>23</sup> ebene iba:te ebe kanakapuima:na:, wiyasiya netewakapiya egelalo Godote ebe a:ene walo kakadipatemene.”

Ebema: Ya:suko waloma:tapiate ebena tabo olowite tepo temeteme kawonomo ebo lawiya.

*Godokono Motono Ka:pita:isin Wiya† Alomo Tanalo*

<sup>24</sup> Ya:suko waloma:tapiate Kapenyama duliynomolamo da:pelamiya, ebe tetelo dubu epetapiate Pitatamo pemaimiya Godoko Amamateno Iya Motono ka:pita:isin wiya uwatema:. Iba:te tabo ma kunu pegeliya, “La:imano iyatulamedawate Godokono Motono ta:kese mani a:kiyatinakole?”

<sup>25</sup> Pitate negiya, “Iyo, iyatinako.”

Ebene Pitate motamo da:nodoliya ebete tabo gea:no dopamo Ya:sute ebe naniya, “Saimono, a:imano woki keba kunula:ka:? Me opono kawokawo elawodubatamo ta:kese mani piyate kalomonake? Atu opo epatela:ka: o kapela epatela:ka:?”

<sup>26</sup> Pitate ebena tabo eba wiyalo negiya, “Kapela epate a:ka:tuwa: alomonaka.”

Ya:sute negiya, “Iyo, nanitabola, atu opo epate gabamaniatamo ta:kese mani kalomona:. Numa:la:, a Yu epo me Isalaela opono gudila, ebema: mabu keleka: ale Godokono Motono wokopiatamo ka:pita:isin mani dikalamenakoma:? Mabu kitana:. <sup>27</sup> Wiyasiya na iba:tamo teme-teme ikalaema: ubia:nola, ebema: a:ma: Ga:lili Paka:mo toawete tуди

\* **17:21:** Ma:t 17.21 buka apuno tabo Ma:tiyute bukamo kakuloliya, wiyasiya ebena buka osiyodilo walogabo apune nanitabokobi mididawa idite akuloliya. † **17:23:** Me ka:pita:isin wiya alomo tanalo ma kunula. Yu epo magumulo dubu bilibilinomate ulama bilibilinomolo me mani alomonakiya Godoko Amamateno Iya Moto kosiyodiloma:.

nanawotalama: Dopamo dapalimene ebe namo lawa:wete ebena tabo a:na:ma:midama:wete kapiya siliba mani ebo numiye, ebene a:ma: ebe mani lawa:wete Godokono Motono wokopiatamo na:nikalamiye, a:imano ega:walo naimano ka:pita:isin wiya tanaloma:.”

## 18

*Kawodawama: Potele Na:keda:mene*  
*Mak 9.33-37; Luk 9.46-48*

<sup>1</sup> Ebe tetelo Ya:suko waloma:tapiate pelamete ebe napaniya, “Godote Kawo Elawodawama: deda:na, ebe duliynomololo kawodawama: potele na:keda:mene?”

<sup>2</sup> Ebene ebete gudu da:peso ebetamo ka:mite ibino tetenomamo adipite <sup>3</sup> negiya, “Na la:tamo nani tabo gemo, la:le la:imano amama woki iyakobi midila:wete gudi egege keba kunula:ka: ebakonoma: neda:iyala:, mabu la: eba kunu wagelea:no Godokono Kawo Elawodawano duliynomolamo a:ka:nopila:oaema. <sup>4</sup> Nanitabola, kebe lumagite mako gudu da:pesomu ebe a:ka:tuwa: ebe opamo diyatimene, ebete Godokono Kawo Elawodawano duliynomololo kawodawama: ka:neda:mene, <sup>5</sup> ega:walo kebe lumagite naimano mailamo mako gudu da:peso kalakalago dowalubina ebete na atumu na:kowalubinina.”

*Kuba Gabamo Wabuga:ta Tanalo*  
*Mak 9.42-48; Luk 17.1-2*

<sup>6</sup> Ebene Ya:sute walo na:kegiya, “Ebema: da:peso gudute na nanitabokobi eba midininalo, kebe lumagite ebe kuba gabamo dowabuga:tana, modobola epate ebe lawete ebena kuwokoba:mo kawo nokolanomo ma:midaomete kewa: kolomamo neba:idiloma:na: ebete kulukulu obamo kololuma:. <sup>7</sup> La: nolowiala:, me opote kubanomo ka:kubamene! Nanitabola, Saitanakono kuba gabamo wabuga:ta tanalate epatamo kemaimioma:na:, wiyasiya kebe lumagigodone mako kuba tanalote demaigamene, Godote ebetamo kuba wiya kawonomo kikaemene!

<sup>8</sup> “Ega:walo a:imano kotote o agowate a:ma: kuba gabamo dowabuga:tatana, modobola a:ma: itamidawete iyabaiamo neba:idila! Modobola a:ma:le kapiya kotago o kapiya agowago Godokono Igilo Duliynomolamo nopegama:, kubala koto netewago ega:walo agowa netewago Godote a:ma: Ela Opamo neba:idiloma:. Nanitabola, ebe duliynomololo elate uwomua: tetelo nowaena. <sup>9</sup> Ega:walo a:imano balidite a:ma: kuba gabamo dowabuga:tatana, modobola a:ma: magoba:wete iyabaiamo neba:idila. Modobola a:ma:le balidi kapiyago Godokono Igilo Duliynomolamo nopegama:, kubala balidi netewago Godote a:ma: Ela Opamo neba:idiloma:.”

*Sipi-goeote Dalatidi Ebe Iyatulame Oi*  
*Luk 15.3-7*

<sup>10</sup> Ebene Ya:sute walo na:kegiya, “Nale la:tamo negemo, Godote egege gudi kawonomamo eba malagidilolelo ebete ebena nopopi iba:tamo palibolenako ibi ka:pa:buiyalatelema:. Ebema: la: nanisiwale, la: mako gudu da:peso ubia:noma: eda:wete la:imano tabamo ebe akokubaima:la:. <sup>11</sup> Ega:walo me tanalo idila. Piyate kuba osiyodilole magumulo dalatidiolena, na Epono Naniwite ebe epono igilo mula:lelaema: piyamo.\*

\* **18:11:** Ma:t 18.11 buka apuno tabo Ma:tiyute bukamo kakuloliya:, wiyasiya ebena buka osiyodilole walogabo apune nanitabokobi mididawa idite akuloliya:.

<sup>12</sup> “Ebema: la: me tanalo keba kunu na:kemalagidilaema? Dubu idi ebenu 100 sipi-goeogoeate da:pola:mena, ebenu kapiyate dalatidimene ebete beda: tanalo na:kosiyodilomene? Iyo, ebete 99 sipi-goeogoeo wade uwago opolo miyapate, ebete unuunu damelamo walo ka:nodolote dalatidi ebe sipi-goeo ka:nowadimene. <sup>13</sup> Nale la:tamo nani tabo gemo, ebe dubuno kalakalate bitana alatidiolea: 99 sipi-goeogoeo epetapiatamo, wiyasiya ebete dalatidi ebe sipi-goeo da:nuimene ebenu kalakalate kawonomoma: keda:mene. Nanitabola, kalakala beda: kawonomola:ka:!<sup>14</sup> Ebema: la:imano Unu Duli-yomolono Nabiwi atumu ubia:nola mako gudu da:peso kapiyate alatidima:.”

*A:ma:tamo Kuba Dosiyodilolena Ebe Dawano Tanalo*

<sup>15</sup> Ebenu Ya:sute walo na:kegiya, “A:imano naniwite a:ma:tamo kuba tanalo dosiyodilomene, a:ma: diya gabodo towawete ebenu kuba tanalo ebe na:niyatuma:. Ebenu ebete a:imano tabo nanitabonomolo dolowimene, modobola a:ma: eba:go walo namutudawama: na:kediyala:. <sup>16</sup> Wiyasiya ebete a:imano tabo olowia:noma: deda:mene, ebe tetelo a:ma: walubima: a:ma:le kapiya o netewa epo epetapi na:nuwatiye, ebenu la: naniwitamo palo tolama:wete atu tabo kawiya dananaema, ebete ebe tetelo la:imano tabo nanitaboma: ka:midimene. <sup>17</sup> Wiyasiya ebete la:imano tabo olowia:noma: walo da:keda:mene, la:le ebenu tanalo sosi epatamo nanawokalimiyala:, ebenu ebete sosi epo bilibilinomono tabo olowia:noma: deda:mene, modobola, nitanamene. Ebe tetelo la:le ebe nanitabokobi midia:dawa keba kunula:ka: ega:walo mani pilo dubu keba kunula:ka: ebako lumagima: mida:wete eba:go kapiyama: walo akoeda:oala:.”

*Matuolamole Ega:walo Palamirole Tanalo*

<sup>18</sup> Ebenu Ya:sute walo na:kegiya, “Na la:tamo nani tabo gemo, la: Saitanakono tanalo kodiyoabaema: ebe keba kunu dematuomeaema, ebe matuomeo tanalote Godokono Unu Duli-yomololo eba kunu ka:nitanamene, ega:walo lumagino igilo ka:mula:ema: la: kebe tanalo me opolo depami-aema, ebe atu tanalote Unu Duli-yomololo pami eba kunu ka:nitanamene. <sup>19</sup> Ebema: nale la:tamo tanalo idi na:kegemo, la: nanitabokobi midipi netewate woki kapiyama: eda:wete naimano Unu Duli-yomolono Nabiwi toweomelo ebete tanalo idi matuomeoma: danaema, nanitabola, ebete la:imano tabo olowite eba kunu kosiyodilomene. <sup>20</sup> Mabu netewa o netewakapiya nanitabokobi midipiate woki kapiyago eba pola:nalo, iba:te naimano mailo deka:ima:na: nale ebolo iba:go nanitabolo ka:lutamoo.”

*Lumagino Kuba Dodomatimi Ubia:noma: Dedi Ebe Wokodawano Iyatulame Oi*

<sup>21</sup> Ebe tetelo Pitate Ya:sutamoo pete na:pegiya, “Kawodawa, naimano ekawi natamo kuba dosiyodilolenako na ebenu kuba kebako teta:mo na:ka:dodolomatilimo? Sebeni teta:mo modobola:ka:?”

<sup>22</sup> Ya:sute ebetamo nowamiya, “Na a:ma:tamo negemo, sebeni teta:moa:. Ao, modobola a:ma:le a:imano okolina tetelo ma kunu 77 teta:mo ebenu kuba egebolema:wete na:dodolomatiliminakiye.”

<sup>23</sup> Ebenu ebete tabo moga:melo negiya, “La: numa:la:, Godote Kawo Elawodawama: deda:na, ebe tanalo me oino magumu keba kunula:ka: eba kunula. Opo idino Kawo Elawodubute ebenu kawokawoo mani eba ka:la:miolelo ebenu woki nitameni ebenu wokopino nanitabokobi midit tanalo ka:pulamelelaema:. Ebenu ebete ebenu woki ma kunu iyatiya, wokopi magumulo piyate ebegodone walubi mani gito duwata:digiya ibino tanalo ka:tuputupuilaema:. <sup>24</sup> Ebenu ebete mani ka:la:miole dowagilimi, ebe tetelo epetapiate ebetamo dopo wokodawa magariya, ebe dubute teni



taoseni kawokawo mani ebegodone dopamo gito uwata:digi. <sup>25</sup> Mabu ebete ebe mani wiyama: ebegodolo gabote kitania:, ebema: Kawo Elawodubute ebene opopiatamo tabo ma kunu gi, 'La: me dubu, ebene kamiyale ebene gudi eba:go, ibi bilibilinomo uwata:wete maniamo midiola:wete kawokawo dubu epetapiatamo nikalama:la:, iba:te ilukulina tetelo ibino wiya: wokopima: keda:onama:. Na ebe gabodo me dubuno kuba wiya ebetamo kikaemamo.'

<sup>26</sup> "Ebe tetelo wiya: dubute opamo gate ebene pupamo okolite Kawo Elawodubutamo towetoweolo negi, 'Iyaiya, a:ma: nuta:tepa. Na gabo numite ebako kawo wiya nanitabolo ka:pa:wiya!'

<sup>27</sup> "Kawo Elawodubute wiyasiya ebe nilakapoimilo nani, 'A:imano wiya: tanalo nale egebolemetate a:dodolomatilimata. A:ma: kalakalago na:toa!'

<sup>28</sup> "Wiyasiya ebe wiya: wokodawate Kawo Elawodubugodone nemaigate eba tolo ebene namutudawa idi ebo numi, ebe namutudawate ebegodone dopamo 100 mani egege duwati, walo ebetamo ka:wia:. Ebe tetelo ebete ebe kuwokobene lawete eba adimagotelo nani, 'A:ma: naimano mani natamo samonomamo na:wiya!'

<sup>29</sup> "Ebene ebene namutudawate opamo gate ebetamo towetoweolo negi, 'Iyaiya, a:ma: nuta:tepa. Na gabo numite nanitabolo ka:pa:wiya!'

<sup>30</sup> "Wiyasiya ebete ebene namutudawa nilakapoimia:no idoko motamo gito magati, ebete ebolo eba okolinalo ebene epate pa:wiya:te ebe ebo ka:powagalima:. <sup>31</sup> Ebe tetelo wokopi epetapiate ebe tanalo umite tepo temetemema: eba eda:olo, iba:te tolamete ibino Kawo Elawodubutamo ebe tanalo ebo nawokalimiya.

<sup>32</sup> "Ebene Kawo Elawodubute ebe wokodawa ka:mite kawonomamo eba analo negi, 'A:ma: kuba wokodawanomolata! A:ma:le ka:lo duiyalo na da:toweonama:wa:ka, nale a:imano wiya: tanalo kawonomo gito egebolema:kamata. <sup>33</sup> Ebema: mabu keleka: a:ma:le naimano wokodawa idi ka:nilakapoima:wa:ka:, nale a:ma: da:nilakapoimitakama eba kunu?' <sup>34</sup> Ebe tetelo Kawo Elawodubute ebetamo kawonomamo dowate idoko motamo gito nalibi, ebete ebolo kawo temetema:go eba okolinalo teni taoseni kawokawo mani wiyate ebo ka:pemaigama:."

<sup>35</sup> Ebene Ya:sute uwomu tabo olowiopiatamo negiya, "La: numa:la!: La:le la:imano tepo magumuno nilakapo awokalilamea:no ega:walo epo epetapino kuba egebolelamea:no, ebe tetelo naimano Unu Duliyomolono Nabiwite la:tamo atumu eba kunu osiyodilote la: kawo temeteme baiamo kanalibolema:ta."

## 19

### *Kamiyale Alibuti Tanalo*

#### *Mak 10.1-12*

<sup>1</sup> Ebene Ya:sukono tabo kiyawao tanalote dolopoligomiya, ebete Ga:lili opo atepate Yudiya opodo petote Yodane Kolomo apuamo gito nemaigiya.

<sup>2</sup> Ebe tetelo epo bilibilinomate ebe opamo ebe dotaloma:tiya, ebete ibino temetema:gopi wadekobi ebo na:midioliya.

<sup>3</sup> Ebene Pa:lisi tanebapi epetapiate Ya:suko kuba gabamo kowabuga:tama: ebetamo pelamete ebe napalatediya, "Kamiyalet ebene awitamoda beda: kawo kuba osiyodilote ebo nakalibutimene? O ebe tetelo awite ebe dalibutimene Godokono Totomu Tabo bakadikanalemene?"

<sup>4</sup> Ya:sute tabo eba wiyalo negiya, "Modobola la: Godokono Buka apuno tabo idi wadenomamo nemalagidilala:. Ebe tabote ma kunu itana, Godote me opono wagilimi mabune dubula kamiyaleta osiyodiloliya, <sup>5</sup> ebene ebete



negiya, 'Me mabuma: dubute ebene nabiwila menokola miyapate, ebene kamiyala:go kapiya bailo kokolioma:na; ebene ibi netewapiate kapiyama: eda:te walo iyama: a:keda:ma:na. <sup>6</sup> Iyo, ibi kapiyanomola.' Numa:la;, Godote ibi netewapi kapiyakobi a:midiliya, ebema: lumagite ibi iyakobi midilima: modoboa:."

<sup>7</sup> Ebene Pa:lisi tanebapi dubate Ya:sutamo negeliya, "A:ma: degeawa: ebe tabote nanitaboma: deda:mene, keleka: mabu Mosesete totomu tabo ma kunu diyatiya, dubute ebene kamiyale alibutima: kamiyale alibuti pepa osiyodilote ebetamo kikaemene?"

<sup>8</sup> Ya:sute iba:tamo negiya, "Mabu la:imano tepo magumu kodakoda-ibinomola Mosesete me totomu la:tamo ebema: ikalamiyata, wiyasiya me opono wagilimi mabune Moseseko teta:mo pemaiga ebe tanalote eba kunu kitanamia:." <sup>9</sup> Ebema: nale la:tamo gemo, kamiyaletu dubu ida:go kuba osiyodiloma:na, ebe tetelo ebene awite ebe alibutite kamiyale idi daidimene, ebete Godokono ololo apulo ebe kamiyale pilolo kelaemene."

<sup>10</sup> Ebene Ya:suko waloma:tapiate ebetamo negeliya, "Dubute kamiyale lawe magumulo mako kodakoda tanalote ditanamene, modobola dubate kamiyale a:kuwatolema:na:."

<sup>11</sup> Ebe tetelo Ya:sute wiyasiya negiya, "Nale la: diyatulametama ebe tabono magumu kodakodanomola. Godote piyatamo mulo dikalaemene ibinomate ibino wokilo me tabono magumu laema: ka:modoboma:na:."

<sup>12</sup> Dubu epetapiate kamiyale uwatolema: ka:modobona:, mabu epetapi ibino apete menokobino tepo magumulo kubakubadopoma: eda:tepaolamiya. Ega:walo dubu epetapiate kamiyale uwatolema: ka:modobona:, mabu gowela magumulo epetapiate ibi eba kunu amilateliya. Ega:walo dubu epetapiate kamiyale uwatolema: ka:modobona:, mabu ibi a:ka:tuwa: ibi eba kunu midilina Kawo Elawodawa Godokono woko kosiyodilonama:na. Ebema: kebe lumagite me tabono magumu laema: da:modobomene, modobola ebete nelaemene."

### *Ya:sute Guda:tamo Koto Dowatiolelamiya*

*Mak 10.13-16; Luk 18.15-17*

<sup>13</sup> Ebene epate gudi Ya:sutamo nemagataliya ebete iba:tamo koto eba watiolelamelo Godoko kanama: ebete ibi wadenomamo kowalubilinama:na. Wiyasiya ebe waloma:tapiate epo kawiya eba analelo ibi dodiyoboliya, <sup>14</sup> Ya:sute ibino osiyodilo tanalo umite negiya, "Gudi natamo pelaema: modobola. Ako-odiyobola:la: mabu mako epate Godote Kawo Elawodawama: deda:na ebe duliyoumolamo ka:nopila:oma:na:."

<sup>15</sup> Ebene ebe gudi kowalubilima: ebete ebene koto iba:tamo watiolelamete, ibi eba miyapalo ebene to gabodo gito tiya.

### *Inamabu Bilibilinomago Dubute Ya:sutamo Da:piya*

*Mak 10.17-31; Luk 18.18-30*

<sup>16</sup> Ebe tetelo dubu idite Ya:sutamo pete na:pegiya, "Iyatulamedawa, na beda: wade tanalo osiyodilote uwomua: igilo ebo na:kelaemo?"

<sup>17</sup> Ya:sute ebetamo negiya, "A:ma:le wade tanalo osiyodiloma: na beda:ma: kanana:wa:? Godoko kapiyate wadedawala, ebema: a:ma: ubi diyata:emene ebene Igilo Duliyoumolamo nopegama:, modobola a:ma:le ebene Totomu Tabamo na:tuduwatanakiye."

<sup>18</sup> Dubute ebetamo nowamiya, "Kebe totomu taboma: kegeawa:?"

Ya:sute ebene tabo eba wiyalo negiya, "A:ma: lumagi akoanapakuma:la:, lumagi idino kamiyale pilolo akolawa:la:, inamabu pilolo akouwata:la:,

lumagi idino tanaloma: a:da: tabo akokiyawala:, <sup>19</sup> ega:walo a:imano nabi-wila menokola ibino tabamo na:tuduwatanakiye. Ega:walo totomu tabo idite ma kunu bitana, a:ma: a:ka:tuwa: a:ma: demalagidilawena, modobola a:ma:le eba kunu a:ma: niyakabolo dokolina ebe lumagi nilakapolo ne-malagidilona.”

<sup>20</sup> Ebene ebe oli ape dubute Ya:sutamo negiya, “Na me totomu tabo bilibilinomo kodakodalo uwatete kapiya idi kadikanaliya:. Ebema: na beda: tanalo idi na:kosiyodilomo?”

<sup>21</sup> Ya:sute tabo eba wiyalo negiya, “A:ma:le wade lumaginomoma: keda:ema: ubi nanitabolo diyata:emene, modobola a:ma: toawete epetapi-ate a:imano inamabu maniamo uwateometate, a:ma:le ebe mani nigol-ogolopiatamo gito na:nikalamola:. Ebe tetelo a:ma: walo ka:pa:wete na nowaloma:eniye, ebene a:imano inamabu bilibilinomate Godokono Unu Duliyomololo ka:nepola:nama:na:.”

<sup>22</sup> Ebe oli ape dubute ebe tabo olowite tepo mibago gito tiya, mabu ebe inamabu bilibila:godawanomola.

<sup>23</sup> Ebema: Ya:sute ebe waloma:tapi nanaliya, “Na la:tamo nani tabo gemo, Godote Kawo Elawodawama: deda:na, inamabu bilibilinomagodawate ebe duliyomolamo nopegama: kodakodanomola! <sup>24</sup> Nale la:tamo tanalo idi na:kegemo, ka:molo-goeote\* kaliku waluono moe iyado nilupigama: kodakodama: eda:na, gabo:a:nola. Atumu inamabu bilibilinomago-dawate Godokono Kawo Elawodawano duliyomolamo nopegama: kodako-danomoma: eda:na, gabote nanitabonomolo a:kitanamene.”

<sup>25</sup> Ya:suko waloma:tapiate ebe tabo olowite kawonomamo la:wa:ote ebe-tamo negeliya, “A:ma:le degeawa: ebe tabote nanitaboma: deda:na, piyate modobola:ka: Godote ibino igilo mula:lelaema:?”

<sup>26</sup> Wiyasiya Ya:sute ibi ulamenate negiya, “Epate a:ka:tuwa: ibino igilo mula:lema: modoboa:, wiyasiya Godoko kapiyate modobola mabu ebe-godolo elawo bitana tanalo bilibilinomo osiyodilolema:.”

<sup>27</sup> Ebene Pitate Ya:sutamo eba wiyalo negiya, “A:ma: numa:, a inamabu bilibilinomo miyapate a:ma: nowaloma:enata. Ebema: Godote atamo beda: wiya na:kikaeamene?”

<sup>28</sup> Ya:sute iba:tamo negiya, “Na la:tamo nani tabo gemo, Godote me opono iyaiya inamabu bilibilinomo olinoma: da:midilimene, ebe tetelo na Epono Naniwite naimano Kawo Elawodawano okoli bailo kawo alonomago kokolitamo. Ebene atu tetelo la:le na dowaloma:ena:wenama, la:kawokawo elawodubuno ilukuli bailo ilukula:wete Isalaela 12 gu epono iyaiya tanalo anagilamelelamepima: keda:omamota. <sup>29</sup> Nanitabola, kebe lumagite ebenu moto, o ebenu nanila nanikubila ekakila, o ebenu nabila menokobila gudila ega:walo ebenu opo, ebete na mabuma: ebe iyaiya tanalo da:miyapamene, ebete ebe atu tanalo bilibilinomo walo ka:kuwatemene, ega:walo walone nale ebetamo uwomua: igilo kikaemamo. <sup>30</sup> Iyo, ka:lo dopopi bilibilinomo da:pola:na iba:te walone walogabopima: keda:oma:na:, ega:walo ka:lo walogabopi da:pola:na iba:te walone dopopima: keda:oma:na:.”

## 20

### *Da:imi Pali Wokopino Iyatulame Oi*

\* **19:24:** Ya:suko tetelo Yu epono tanalo ma kunula, iba:te alagiola ka:molo-goeogoeo kawokawonomo ibino woko osiyodilolenakiya. Iyo, iyaiya tete epetapilo ka:molo-goeogoeate ibino inamabu watanakiya mulu opamo, ega:walo tete epetapilo iba:te pema: watenamiya.

<sup>1</sup> Ebe atu tetelo Ya:sute na:kegiya, “Godote Kawo Elawodawama: deda:na, ebe tanalo ma kunula. Kawo dubu idite duiyanomolo maigate ebene motone piwisigate ebo ti ebene da:imi pali wokopi ka:nuwatema:.” <sup>2</sup> Ebene ebete dubu epetapi nulamete iba:tamo kapiya egelano woko wiya ikalaema: nanali. Iba:te ebene tabo olowite modoboma: degeliya, ebete ibi ebo aliboli ebene pali woko ka:nowagilima:.

<sup>3</sup> “Ebene egelate kela:mo da:podolatepi, ebete walo ka:tote dubu epetapi olowame bailo gito lamota:onalo da:nulami, <sup>4</sup> ebete iba:tamo negi, ‘Modobola la: atumu naimano pali wokamo na:ka:tolama:la:, ebene nale woko wiya la:tamo modobolo kikalaemamota.’ <sup>5</sup> Ebe tetelo iba:te atu pali wokamo gito ka:tolamiya.

“Ebene egela tuli tetelo ega:walo egelate da:ponolobigatepi, ebe netewa teta:mo ebete walo ka:tote wokopi epetapi atumu ka:nulamete wokamo ebo kanaliboli. <sup>6</sup> Ebene egelate walo da:ka:toatepi, ebete walo ka:tote dubu epetapi olowame bailo gito lamota:onalo nulamete nananali, ‘Beda: mabuma: la: ka:lo egelalo woko:ano gito da:pola:wenama?’

<sup>7</sup> “Iba:te ebetamo nowamiya, ‘Mabu idawate atamo woko kikaeama:ka:.’

“Ebene kawo dubute iba:tamo negi, ‘Modobola la: atumu naimano pali wokamo na:ka:tolama:la:.’

<sup>8</sup> “Dadimoni ebe pali namutudawate penate ebene woko umidawatamo na:pegeni, ‘A:ma: wokopi bilibilinomo ka:la:miauwete wiya nikalamola: Walogabonomolo woko da:powagilima:ka ebe dubagodone wagilima:wete, wiyasiya duiyanomolo woko da:powagilima:ka a:ma:le ibi uwomulo nowalubiliye.’

<sup>9</sup> “Ebene walogabonomolo woko dowagilimiya ebe dubate dopamo pelamenate, ebete iba:tamo kapiya egelano modobo woko wiya eba kunu ikalameni. <sup>10</sup> Ebene duiyanomolo woko dowagilimiya ebe dubate pelamenate kawodopamo na:puwatanamu pemalagidiloniya, wiyasiya ebete iba:tamo atu wiyanomolo kikalamoleni. <sup>11</sup> Ebe tetelo iba:te wiya uwatenate pali namutudawatamo ubia: tabo eba gelanalo, <sup>12</sup> ibi magumulo idawate penate na:pegeni, ‘Walone dowagilima:ka iba:te tete da:pesamo posiyodilote wiyasiya ebe woko wiya ago modobolo beda:ma: kuwate, mabu a egela kawonomolo woko kawo koloago osiyodilutakama:?’

<sup>13</sup> “Ebe tetelo ebete nowamini, ‘Naimano namutudawa, na kuba tanalo idi a:ma:tamo kosiyodiloma: Duiyalo a:ma:la, nala, ale nani tabonomo negelakama: a:ma: kapiya egelano modobo woko wiya kelawa:ema:, nale a:ma:tamo ma kunu ebema: ikaemata. <sup>14</sup> Ebema: a:imano wiya lawa:wete kalakalago na:toa. A:ma:le woko wiya delawa:wa:, nale ebe atu modobo mani walone dowagilima:ka iba:tamo ubi diyatimo, nale eba kunu kikalaemamo. <sup>15</sup> Me woko wiya mani ebe naimano manila, ebema: nale a:ka:tuwa: naimano ubilo dosiyodilomo ebe naimano tanalola. Mabu keleka: a:ma:le naimano nilakapo tanaloma: da:dowawena?’ ”

<sup>16</sup> Ebema: Ya:sute uwomu tabo ma kunu giya, “Nanitabola, ka:lo walogabopi bilibilinomo da:pola:na iba:te walone dopopima: keda:oma:na:, ega:walo ka:lo dopopi da:pola:na iba:te walone walogabopima: keda:oma:na:.”

*Ya:sute Ebene A:e Tanaloma: Walo Da:kegiya*

*Mak 10.32-34; Luk 18.31-34*

<sup>17</sup> Ebene Ya:sute Yelusalema kawo duliynomolamo eba tutalo, gabo tetelo ebete ebene 12 waloma:tapinomo uwatete tabo diya nanaliya, <sup>18</sup> “La: nolowiala:, a Yelusalemamo tolamitama:. Ebole Godote Epono Naniwi

epatamo kikalaemene, ebene Godotamo kalimagono ikameopino watowatopi ega:walo Godokono Totomu iyatulamepi, iba:te ebe anakapuima: gelate <sup>19</sup> Yua:piatamo ebo kikalaema:na:. Ebe epate ebe kalakalatete pa:ka:pa:ka:mo a:na:ma:ga:midaote ebe ebo kanakapuima:na:, wiyasiya netewa-kapiya egelalo Godote ebe a:ene kadipatemene.”

*Waloma:tapi Netewapino Menokote Kuba Wokiamo Ya:suko Tanalo Idima: Daniya*

*Mak 10.35-45*

<sup>20</sup> Ebene Sebedikono gudino menokote ebene guda:go Ya:sutamono pete ebene pupamo pokolite, ebete ebe kowalubima: napaniya.

<sup>21</sup> Ya:sute ebetamo negiya, “A:ma: beda: ubi kiyata:wita nale a:ma:tamo osiyodiloma:?”

Ebete tabo eba wiyalo negiya, “Me naimano gudi netewa na:kulama:wita? A:ma:le Kawo Elawodubuma: deda:emene, a ubila a:ma:le degeaemene idawate a:imano tumudi apulo ega:walo idawate pele apulo a:imano Kawo Elawodubuno elawo magumulo kokoliutama:.”

<sup>22</sup> Wiyasiya Ya:sute iba:tamo negiya, “La:le na wade wokiamo kanana:wita:. La: modobola:ka: nale da:nimo ebe temeteme kalila:mo nioma:?”

Iba:te negeliya, “A modobola:.”

<sup>23</sup> Ya:sute iba:tamo negiya, “Me tanalo nanitabola, nale da:nimo la: ebe kalila:mo niawete temeteme bolowionakomata. Wiyasiya naimano tumudi apuamo ega:walo pele apuamo ilukuli tanaloma: nale a:kegemo. Nabiwi Godote piyatamo dosiyodiloliya ibinomate ebolo ka:pola:nama:na:, iyo, me tanaloma: ebete a:ka:tuwa: kegemene.”

<sup>24</sup> Ebene teni waloma:tapi epetapiate ebe tanalo olowite ebe dubu netewatamo na:dowautiya, <sup>25</sup> wiyasiya Ya:sute ibi bilibilinomo ebetamo ka:la:mite negiya, “La: iyatawalata, Godoko nanitabokobi midia:pino kawokawo dubate ibi a:ka:tuwa: ibi eba wadipalatelelo epo epetapi kawonomamo analenaka, iba:te ibino ubi tanalamo ka:tudila:onama:.” <sup>26</sup> Wiyasiya la: ebako epoma: a:keda:oaema. Kebe lumagite la:imano kawodawama: eda:ma: ubi diyatimene, ebete la:imano wiya: wokodawama: neda:mene, <sup>27</sup> ega:walo kebe lumagite dopodawama: eda:ma: ubi diyatimene, ebete la:imano idoko motono wokodawama: neda:mene, iyo, ebe a:ka:tuwa: ebe oponomamo iyatinomo niyatimene. <sup>28</sup> Ma kunu Epono Naniwite da:piya, ebe ubia:nola me opo epate ebetamo wiya: wokopima: eda:oma:, wiyasiya ebete na:piya epatamo wiya: wokodawama: ka:pada:ma:, ega:walo ebene igilo iyabaiamo iyatite ebene a:e wiyate epo bilibilinomo epetapi Saitanakono idoko motone gito kowagailima:.”

*Ya:sute Balidi Tamiolame Dubu Netewa Wadekobi Da:midoliya*

*Mak 10.46-52; Luk 18.35-43*

<sup>29</sup> Ya:sute ebe waloma:tapiago Yeliko kawo duliomolone da:nemaimiya, ebe tetelo epo bilibilinomate ebe waloma:tiya. <sup>30</sup> Ebene dubu netewa balidi tamiolamepila, iba:te gabo niyakabolo eba okoliutalo Ya:sukono pe tanalo olowite kawonomamo negeliya, “Da:ibidikono A:la:mu! A:ma:le a na:nilakapoiama:!”

<sup>31</sup> Ebema: epo bilibilinomate ibi kawiya analelo nodiyoboliya iba:te taboa:no kokoliutama:, wiyasiya iba:te kawonomamo walo na:kegeliya, “Kawodawa Ya:su, Da:ibidikono A:la:mu! A:ma:le a na:nilakapoiama:!”

<sup>32</sup> Ebene Ya:sute ebamo utite ibi ka:la:mite iba:tamo negiya, “La: beda: ubi kiyata:witama nale la:tamo kosiyodiloma:?”

<sup>33</sup> Balidi tamiolamepiate negeliya, “Kawodawa, aimano balidi wadekobi na:midioleama.”

<sup>34</sup> Ebene Ya:sute ibi nilakapoilamelo ibino balida:mo ebena koto dowa-tiolelamiya, ebe tetenomolo ibino balidite wadekobi olowiolamete iba:te Ya:suko ebo waloma:tiya.

## 21

*Ya:sute Yelusalema Kawo Duliyomolamo Da:nopegiya*

*Mak 11.1-11; Luk 19.28-40; Yon 12.12-19*

<sup>1</sup> Ebene iba:te Yelusalema kawo duliyomolo niyakabamo eba pelamelo, Betapa:gi duliyomolo niyakabodo tolamete Olibi Kewakewa Unu Damelamo ebo nemaimiya. Ebe tetelo Ya:sute ebe waloma:tapi netewa dopamo eba nalibolelo <sup>2</sup> iba:tamo negiya, “La: ebe tatali duliyomolamo toawete, ebe duliyomolamo da:nemaima:ema donoki-goeo ala:mo ma:midao ebena gudago ka:nulama:digalemamota. Modobola la: ale pamiawete ebena gudago nemagaeliyala:.” <sup>3</sup> Idawate la: odiyobolema: tabo degemene la: wiyasiya ma kunu kegelamamota, ‘Kawodawate me donoki-goeogoeo ubila, ebete walo samonomamo kakapalibolemene.’ ”

<sup>4</sup> Ebene me tanalote pemaigiya Godokono woki awokalimidawate degiya ebe tabote nanitabokobi kolowima:. Iyalo tetelo ebete tabo ma kunu giya,

<sup>5</sup> “La: Yelusalema epatamo na:negeliyala:

‘Numa:la:, la:imano Kawo Elawodubute la:tamo pita.

Ebete donoki-goeo unamo okolite milago pita,

iyu, la: numa:la:, ebete donoki da:pesago ba:pe.’ ”

<sup>6</sup> Ebene Ya:suko waloma:tapi netewate tote, ebete keba kunu kegiyale iba:te eba kunu nosiyodiliya. <sup>7</sup> Iba:te donoki-goeo ega:walo ebena gudu Ya:sutamoma magaelete, ibino watubino kaliku ibi unamo alomolamete, Ya:sute ebe kaliku unamo ebo okoliya. <sup>8</sup> Ebe tetelo epo bilibilinoma epetapiate ibino ga:ga:ga:ga: kaliku pupukulamete gabamo apoago to-lamiya, ega:walo epetapiate puwala otolete gabamo atumu kapotame-onatiya. <sup>9</sup> Ebene piyate da:dopiya ega:walo Ya:sukono walogabo apune da:pelamitiya, iba:te kapimiya kawonomamo ma kunu gelitiya,

“Da:ibidikono a:la:mu nadipata:la:!

Godu, a:imano mailago da:pita,

modobola a:ma: ebe lumagi kawokobi na:midiyel!

O epala:, la: Godoko moiolo

unamo nadipata:la:!”

<sup>10</sup> Ebema: Ya:sute Yelusalema kawo duliyomolamo da:nopegiya, me duliyomolo epo bilibilinomate ebe uima: pemaimiote na:pegeliya, “Me lumagi potelela:ka:?”

<sup>11</sup> Ebe tetelo Ya:suago da:tolamitiya ibi bilibilinomate duliyomolo epono tabo eba wiyalo negeliya, “Me Godokono woki awokalimidawa Ya:sutela, ebete Ga:lili opono Nasaleta duliyomolone pe.”

*Ya:sute Godoko Amamateno Iya Moto Wadekobi Da:midiya*

*Mak 11.15-19; Luk 19.45-48; Yon 2.13-22*

<sup>12</sup> Ebe tetelo Ya:sute Godoko Amamateno Iya Motamo tote, ebe motolo ebete inamabu olowamepi nulamete ibi bilibilinoma elawonomamo



na:na:ma:lateliya, ega:walo ebete mani odowaolepino patapata bigo olowamepino ilukuli patapatago ebo noba:midaolelamiya. <sup>13</sup> Ebene ebete iba:tamo negiya, “Godokono Bukalo tabo ma kunu bitana, ‘Naimano Moto epate Godoko Amamate Motoma: kegelama:na:, la:le wiyasiya pilo epono motoma: a:midimata.’”

<sup>14</sup> Ebe tetelo balidi tamiolamepi ega:walo agowa tataipi, iba:te Godoko Amamateno Iya Motamo da:pelamiya Ya:sute ibi wadekobi ebo midioliya. <sup>15</sup> Wiyasiya Godotamo kalimagono ikameopino watowatopi ega:walo Godokono Totomu iyatulamepi, iba:te Ya:sukono wade anoano tanalo dulamitiya iba:te ebetamo na:dowautiya. Ega:walo ebe atu tetelo iba:te tanalo idima: ka:dowautiya ma kunu, gudi epetapiate eba gelatepautalo degelitiya, “Da:ibidikono a:la:mu nadipata:la:!” Ebe mabuma: iba:te <sup>16</sup> Ya:suko naniya, “A:ma: guda:te tabo kubanu degelita na:kolowiawita?”

Wiyasiya Ya:sute iba:tamo negiya, “Iyo, na nolowitamo. Modobola la: me Godokono Buka apuno tabo wadenomamo nemalagidilala:, ‘O aimano Kawodawa Godo, gudi egege ega:walo nono da:niona, a:ma:le ibino tabo magumune wadewade tabo kiyawaonakota a:ma: a:ka:tuwa: a:ma: kemoiawenama:.’”

<sup>17</sup> Ebene dadimoni Ya:sute ibi miyapanate kawo duliyaomolo magumune maiganate Betani duliyaomolamo tonate ebo nowatani.

*Ya:sute Da:imi Noloa: Umei Kewa\* Dumiya*

*Mak 11.12-14,20-24*

<sup>18</sup> Duiya idilo Ya:sute kawo duliyaomolamo walo da:kolowamiya, gabo tetelo ebe bae kapete umiti, <sup>19</sup> ebene ebete umei kewa gabo niyakabolo pumite da:imi olema: ebamo da:tiya wiyasiya paanomoiya nulamiya. Ebema: ebete umei kewatamo negiya, “Uwomua: tetelo da:imite a:ma:godone a:ka:nolonakomene!” Ebe tetenomolo ebe da:imi kewate alawoma: ebo ediya.

<sup>20</sup> Ya:suko waloma:tapiate ebe tanalo umite kawonomamo anoanote negeliya, “Umei kewate alawoma: samonomamo beda:ma: keda:le?”

<sup>21</sup> Ya:sute ibino tabo eba wiyalo negiya, “Na la:tamo nani tabo gemo, la: tete bilibilinomolo Godoko nanitabokobi eba midinalo la:imano tepo magumulo woki netewama: eda:oa:no, nale umei kewatamo keba kunu kosiyo-dilomo, la:le ebe atu tanalo osiyodiloma: ka:modobomamota. Ega:walo la: nanitabokobi midilo me damelatamo ma kunu degelaema, ‘A:ma: kewa: kolomamo na:toatepa!’ la:le ebe tanalo nanitabolo kuimamota. <sup>22</sup> Iyo, nanitabola, la: Godoko nanitabokobi eba midinalo beda: tanaloma: ebe da:toweoma:ema, ebe tetelo la:le ebe tanalo kelaemamota.”

*Yu Watowatopiate Ya:sukono Elawo Mabuma: Ebe Dalatediya*

*Mak 11.27-33; Luk 20.1-8*

<sup>23</sup> Ebene Ya:sute Godoko Amamateno Iya Motamo tote epo eba niyatulamitalo, ebe tetelo Godotamo kalimagono ikameopino watowatopi ega:walo Yu epono kawokawo dubu epetapi, iba:te ebe odiyoboma: pelamete ebe ma kunu palatediya, “A:ma: me iyaiya tanalo pokono elawamo kosiyo-dilola:wena? Ega:walo me elawo a:ma:tamo potele kikame-tia?”

<sup>24</sup> Ya:sute iba:tamo nowamiya, “Nale la: dopamo kapiya tanaloma: kalateda:lemamota. La:le na wiya tabo wadenomamo dowaminama:ema, ebene nale me tanalo pokono elawamo kosiyo-dilolenamo, ebe tanalo nale la: ebo kanalemamota. <sup>25</sup> Naimano alateda: tabo la:tamo ma kunu bitana,

\* **21:17:** Epate umei kewano mailo Gogodala tabamo salibisama: ka:minaka.



Yonete epo obamo dowaduba:midaolenaki, ebete ebenu elawo pogodone kelawile, Godogodonela:ka: o lumagi idigodonela:ka:?”

Ebema: ibi a:ka:tuwa: ibino taneba magumulo apamineuilo negeliya, “Ale degelama: Godote Yonetamo elawo ikami, ebete kegemene, ‘Mabu keleka: la:le ebenu tabo nanitabokobi ka:mida:wea:?’ <sup>26</sup> Ega:walo a mod- oboa: ebe ma kunu anama:, me opo lumagite Yonetamo elawo ikami, mabu ale me epono dowa tanalo tolemitama:. Ibi bilibilinomate negelana Yoneko Godokono woki awokalimidawala.” <sup>27</sup> Ebema: iba:te ibino tepo magumuno woki waminaolelo Ya:sutamo negeliya, “Yonekono elawo mabu a iyatawa:.”

Ebema: Ya:sute iba:tamo negiya, “Nale la: atumu akanaletama nale me iyaiya tanalo pokono elawamo kosiyodilolenamo.”

### *Koi Netewano Iyatulame Oi*

<sup>28</sup> Ebene Ya:sute ebe Yu watowatopiatamo negiya, “Na la:tamo oi tabo idi ka:kiyawaomamo. La: ebe oi wadenomamo olowiawete ebenu magumu natamo nawokalimiyala:. Kapiya dubute nokolinami, ebenu koi netewala. Egela idilo ebete ebenu dopo koitamopete na:pegi, ‘A:ma: toawete naimano pali magumulo woko na:nosiyodila.’ <sup>29</sup> Ebenu gudute nowami, ‘Ao, na ubia:nola,’ wiyasiya walone tetelo ebete woki iyakobi midite wokoma: gito ti. <sup>30</sup> Ebene ebe dubute ekawitamopete atu tabo da:ka:pegi, ebe gudute nowami, ‘Iyo, Aba, na ka:tomamo,’ wiyasiya ebete ka:toa:.”

<sup>31</sup> Ebene Ya:sute ebenu tabo olowiopiatamo negiya, “La:imano woki keba kunula:ka:? Gudi netewa magumulo ebenu nabiwi potele kekalakalaimile?”

Iba:te negeliya, “Dopo gudutela.”

Ebema: Ya:sute iba:tamo negiya, “Na la:tamo nani tabo gemo, ta:kese mani elemasigilo uwatepi dubu ega:walo dubu bilibili kamiyale, iba:te la:imano gobebobo uwatelametate Godokono Kawo Elawodawano duliwomolamo ka:nopila:oma:na:. <sup>32</sup> Mabu Yoneko epo obamo waduba:midaoledawate Godokono tuputupu gabodo da:pi, la:le ebenu tabo nanitabokobi ka:mida:wea:, wiyasiya mani pilolo uwatepi dubu ega:walo dubu bilibili kamiyale iba:te ebe nanitabokobi midite ibino tepo magumu Godotamo oba:midaliya. Nanitabola, ebe tetelo la:le ibino tanalo dulamelelama:ima, wiyasiya la:imano kubakuba woki iyakobi midilia:no Yonekono tabo kelawa:wea:.”

### *Tupina Da:imi Pali Atila:pino Iyatulame Oi*

#### *Mak 12.1-12; Luk 20.9-19*

<sup>33</sup> Ebene Ya:sute walo na:kegiya, “Modobola la:le naimano iyatulame oi idi nolowiala:. Kawo dubu idite pali osiyodilote tupina da:imi kewa ebo ami, ebe da:imino mailo ebe gala:ipi da:imila. Amio tanalote dolopoligi, ebete kala ga:dimite da:imi ii egedioleno nokola bobo obobote, pali atila:pino unu nupunupu ebo eti. Ebe tetelo ebe dubute ebenu pali atila:pi dubu epetapiatamo gito atepi, iba:te ebolo woko eba osiyodilonalo ebe pali wadenomamo umilo ebenu da:imi kuwatolemenakoma:, ebenu ebete mulu opamo gito ti.

<sup>34</sup> “Ebenu da:imi tapio tete da:pi ebete pali atila:piatamo wiya: wokopi epetapi napaliboli, iba:te iba:godone ebenu da:imi ka:puwatema:. <sup>35</sup> Wiyasiya pali atila:piate ibi uwatete idi gaubamo anagalimiya, ega:walo idi gito anakapumiya, ega:walo idi nokolamo mapemiya. <sup>36</sup> Dopamo pali namutudawate kapiyakapiya wiya: wokopi paliboli, ebenu ebete walo epetapi bilibilinomo dakapaliboli pali atila:piate iba:tamo atu kubakuba tanalo kosiyodiloliya. <sup>37</sup> Walogabonomone ebete ebenu gudu

eba palibolo ebenu wokilo negi, ‘Nanitabola, iba:te naimano gudutamo ka:tudila:oma:na.’

<sup>38</sup> “Wiyasiya ebe pali atila:pi dubate ebe gudu pitalo dumiya iba:te ibino taneba magumulo negeliya, ‘Numa:la:, me gudute nabiwino inamabu namutudawama: deda:mene, ebe gudute na:pe. Ebema: modobola ale ebe anakapumite ebenu pali kelaemalema;’ <sup>39</sup> ebenu iba:te ebe lawete palino kala magumune neba:idilote gito nanakapumiya.”

<sup>40</sup> Ebema: Ya:sute olowiopiatamo negiya, “La:imano woki keba kunula:ka? Pali namutudawate mulu opone da:pemene, ebete beda: tanalo na:ka:posiyodilomene pali atila:piatamo?”

<sup>41</sup> Yu watowatopiate ebenu tabo eba wiyalo negeliya, “Nanitabola, ebete ebe kuba wokopi kubanomamo palukoletu kapanakapulaemene. Ebe tetelo ebete ebenu pali atila:pi dubu epetapiatamo ka:pikalaemene, da:imi nolo tetelo iba:te ebenu pali inamabu ebetamo wadenomamo kikameonakoma.”

<sup>42</sup> Ya:sute iba:tamo negiya, “La: dopamo Godokono Bukalo me tabo nanitabolo eka:la:mioliamata,

‘Moto etepiate iyabaiamo diyatiya,  
ebe alote wiyasiya  
motono elawo mabuma: eda:na.  
Me tanalo Godote osiyodili,  
ebema: aimano wokilo nanoanoutama!’

<sup>43</sup> “Ebema: nale la:tamo negemo, Godote Kawo Elawodawama: deda:na, ebe tanalo ebete la:godone puwatete piyagodolo wadewade nolo da:imi da:pola:na ebako epatamo gito kikalaemene. <sup>44</sup> Numa:la:, nale alono tanaloma: degemo, ebenu kodakoda ebe nokola keba kunula:ka: eba kunula. Iyo, me nokola unamo degamene ebe lumagite keta:ta:puwatiomene, ega:walo me nokolate lumagi dita:timene kedagodagoimene.”

<sup>45</sup> Ebenu Godotamo kalimagono ikameopino watowatopi ega:walo Pa:lisi tanebapi epetapi iba:te Ya:sukono oi tabo dolowiya, iba:te ebo iyatawaiya Ya:sute ibino tanaloma: kiyawaiya. <sup>46</sup> Ebema: iba:te ebe laema: ubi iyatitiya, wiyasiya iba:te epo tolelamitiya mabu ibi bilibilinomate Ya:suko Godokono woki awokalimidawama: gelanakiya.

## 22

### *Dubute Kamiyale Lawe Soliyomuno Iyatulame Oi*

#### *Luk 14.15-24*

<sup>1</sup> Ebenu Ya:sute iyatulame oi idi epatamo kiyawaolo negiya, <sup>2</sup> “Godote Kawo Elawodawama: deda:na, ebe tanalo ma kunu itana. Kawo Elawodubu idite ebenu koino kamiyale laweno soliyomu osiyodilote <sup>3</sup> ebenu wokopi ebo aliboli, ebete dopamo deka:la:mi ebe epo nuwatete soliyomu baiamo kemagaelema:. Wiyasiya iba:te pelaema: ubia:noma: eda:iya, <sup>4</sup> ebenu ebete walo wokopi epetapi eba kanalibolelo na:kegi, ‘Na dopamo deka:la:mimo, la:le ebe epo ma kunu walo nakananala:la:, ‘Na soliyomu inamabu osiyodilola:kamo, kau-goeogoeo gadigadinomo alukola:kamo, soliyomu inamabu bilibilinomo osiyodilole olopoligo. Modobola la: pelama:wete na:penaola.’

<sup>5</sup> “Wiyasiya iba:te ebe tabo ubia:noma: eda:ote ibino iyaiya woko baiamo gito tolamoliya, ma kunu idawate ebenu pali wokoma: ti ega:walo idawate olowame baiamo ti, <sup>6</sup> ebenu epetapiate Kawo Elawodubuno wokopi uwatete eba malogolelo ibi ebo anakapulamiya. <sup>7</sup> Ebe tetelo Kawo Elawodubute

kawonomamo dowalo ebene gowelaopi ebo naliboli, ebene piyate ebene wokopi danakapulamiya, gowelaopiate ibi kubanu anakapulamete ibino duliyomolo elamo gito imukalamiya.

<sup>8</sup> “Ebe tetelo ebete ebene wokopiatamo negi, ‘Naimano koino kamiyale lawe soliyomuno inamabu bilibilinomo osiyodilola:kamo, wiyasiya nale dopamo deka:la:imo ebe epo wadewadenoa:, iba:te pelaema: na ubia:nola.

<sup>9</sup> Ebema: modobola la: kawokawo gabo gagao teta:mo tolama:wete, la:le da:nulama:ema ebe epo bilibilinomo nananaliyala: iba:te naimano soliyomu bae ka:penaoma:.’ <sup>10</sup> Ebe tetelo wokopiate tolamete gabo gagao tetelo epo bilibilinomo ebo nuwatiya, ma kunu nigologolopi ega:walo inamabu bilibilinomagopi, ebe epo bilibilinomate kapimiya soliyomu baiamo pelamolete, iba:te bae kebe motolo kenautiye ebe kawo moto gu gito taboki.

<sup>11</sup> “Ebe tetelo Kawo Elawodubute epono koto uwatolelaema: soliyomu motamo da:pi, ebete kapiya dubu ebo pumi ebete soliyomuno wade kalikunomo pulia:no podoli. <sup>12</sup> Kawo Elawodubute ebetamo negi, ‘Namu-tudawa, mabu keleka: a:ma: wade kaliku pulia:no da:podolawa:?’

“Ebe tetelo ebete ebene tabo olowite kowamiya:, <sup>13</sup> ebema: Kawo Elawodubute ebene opopiatamo negi, ‘Modobola la: ebene kotola agowala ala:mo matuolamolema:wete idoko magumamo ba:idila:wete ebo nanatepiyala:. Ebete ebolo lalo eba oliomolelo kawonomamo kiimene.’ ”

<sup>14</sup> Ebema: Ya:sute uwomu tabo ma kunu giya, “Nanitabola, Godote epo bilibilinomo ka:la:mina, wiyasiya ibi magumulo kapiyakapiyanomo uwatenako.”

### *Loma Epono Kawo Elawodubunomo Sisatamo\* Ta:kese Mani Ikameo Tanalo*

*Mak 12.13-17; Luk 20.20-26*

<sup>15</sup> Ebe tetelo Pa:lisi tanebapiate tolamete Ya:sukono tanaloma: ibi magumulo tabo da:negeliya ibino ubi ebo niyatiya, iba:te ebe kuba gabamo eba nowabuga:talo ebete kebako tabo gelo ebe ebo kelaema:. <sup>16</sup> Ebene iba:te ibino waloma:talepi epetapi ega:walo Kawo Elawodubu Elodikono tanebapi atu tetelo Ya:sutamo aliboliya. Iba:te ebetamo pelamete a:da: elemasigi gabodo na:pegeliya, “Iyatulamedawa, a iyatawala a:ma: nani tabo lumagilata, iyo, a:ma: epo Godokono gabo wadenomamo iyatulamenata. Nanitabola, a:ma: epetapino gito gela tanaloma ka:tuduwatawenakoa:, ega:walo a:ma: epo unu nikapiamo kulama:wena:, ma kunu lumagi idi atepalo lumagi idi ebo a:kelawa:emene. <sup>17</sup> Ebema: a:imano woki awokalima:wete a nanaa:, Loma epono Kawo Elawodubunomo Sisatamo ta:kese mani ikameoma: modobola:ka: o kubala:ka:? A ebetamo ba:kikameoma: o a:kikameoma:?”

<sup>18</sup> Ya:sute ibino elemasigi tanalo iyatawate negiya, “La: mena netewa epolata! Mabu keleka: la:le na masiginima: dowagela:witama? <sup>19</sup> La: mani kapiya natamo nikanama:la:.”

Ebene iba:te kapiya mani ebetamo dikamiya, <sup>20</sup> ebete ibi nalateda:liya, “Me manilo da:pola:na, mailo ega:walo ololo pokonola:ka:?”

<sup>21</sup> Iba:te negeliya, “Kawo Elawodubunomo Sisakonola.”

Ebene Ya:sute iba:tamo negiya, “Sisakono inamabu Sisatamo nikameala:, wiyasiya Godokono inamabu Godotamo nikameala:.”

\* **22:14:** Sisako ebe Loma epono Kawo Elawodubunomola, opo kawonomolo ebe kapiya elawonomoma: eda:nami. Ebete ebene gowelaopi iyaiya opamo alibolenaki, ebene iba:te ebe iyaiya opolo eba nilukulionalo epagodone ta:kese mani kawonomo ebo nuwatelamenakiya, ebe maniamo ibino Loma gabamanino iyaiya woko kosiyodilolenama.

<sup>22</sup> Ebema: iba:te Ya:sukono tabo olowite eba anoanolo ebe atepate gito tolamiya.

*A:e Magumune Igilamo Maimio Tanalo*

*Mak 12.18-27; Luk 20.27-40*

<sup>23</sup> A:e magumune maimioa:noma: degelana, ebe epo Sa:diyusi tanebapila.† Ebe atu egelalo ibi epetapiate Ya:sutamo pelamete <sup>24</sup> tabo ma kunu pegeliya, “Iyatulamedawa, Mosesete Godokono tabo ma kunu giya, ‘Dubute a:ete kamiyaale gudia:no datepamene, ebene ekawite ebe amole lawete ebene naniwino tanaloma: gudi nosiyodilolemene.’ <sup>25</sup> Amano epo magumulo kapiya dubuno sebeni koiate ilukulinamiya. Dopo gudute kamiyaale lawete gudi ulamea:no a:iya, ebene ebene ekawite ebene amole gito kelawiya. <sup>26</sup> Ebe tetelo ebe atumu gudi ulamea:no gito ka:iya, ega:walo tetedawa idite eba kunu kowageliya. Ebene ebe sebeni atu alailame bilibilinomate eba kunu a:elaiya, <sup>27</sup> wiyasiya kamiyaalete walone gito a:iya. <sup>28</sup> Ebema: iba:te a:e magumune igilamo demaimioma:na:, ebe Kawo Egelalo ebe kamiyaalete sebeni dubu magumulo pokono kamiyaalema: na:keda:mene, mabu ebe ibi bilibilinomate aida:tepaiya?”

<sup>29</sup> Ebene Ya:sute iba:tamo nowamiya, “La: Sa:diyusi tanebapiate la:imano wokilo epono a:ela tanaloma: kubanu gelanakomata, mabu la: Godokono Buka tabo ega:walo ebene elawo iyatawa: <sup>30</sup> Me tanalo ebe nanitabola, epate a:e magumune maimio tetelo iba:te kamiyaale walo a:ka:piaidiolema:na: ega:walo dubu a:ka:puwatolema:na:, iyo, iba:te Godokono Unu Duliyomolono nopopimu bilukulionama:na: <sup>31</sup> Ebe mabuma: Godokono Bukate a niyatua:mena a:elaopiate a:e magumune maimioma:, iyo, ebete ebene Bukalo la:tamo iyalo degiya ebe tabo la: nanitabola eka:la:mioliamata. Ebe tabote ma kunu itana, <sup>32</sup> ‘Nanitabola, na Godotela. A:ibalayamako, Aisa:keko, ega:walo Ya:ikoboko, iba:te uwomua: tetelo poko kamamatene, na ebetela.’ Ebema: la: Sa:diyusi tanebapi, la:imano wokilo na:kemalagidilawenama ebe ewonino igilate olopoligoiya? Ao, kolopoligoiya:, mabu a:elaopiate Godoko kamamatena:, wiyasiya piyate igilolo dilukulina ebe eponomate ebe amamatena.”

<sup>33</sup> Ebe tetelo epo bilibilinomate Ya:sukono tabo olowite ebene tabamo anoanolo nekalakalautiya.

*Kebe Totomu Tabote Kawonomoma: Keda:nale*

*Mak 12.28-34; Luk 10.25-28*

<sup>34</sup> Ya:sukono tabote Sa:diyusi tanebapino tabo dalukolelamiya, ebe tanalo Pa:lisi tanebapiate olowite iba:te kapimiya ebetamo pelamiya. <sup>35</sup> Ebene ibi magumulo dubu idi ebe Godokono Totomu Tabo iyatawanomola, ebete Ya:suko kuba gabamo wabuga:tama: ebe palateda:lo na:pegiya, <sup>36</sup> “Iyatulamedawa, Godokono Totomu Tabo bilibilinomo magumulo kebe totomute kawonomoma: keda:nale?”

<sup>37-38</sup> Ya:sute ebene tabo eba wiyalo negiya, “Godokono Totomu Tabo bilibilinomo magumulo me tabote kawonomoma: eda:na, ‘A:ma: a:imano Kawodawa Godoko nilakapolo nemalagidilona, a:imano tepo magumunomamo, ega:walo a:imano uliyanano elawamo, ega:walo a:imano woki kawonomamo.’ <sup>39</sup> Ega:walo me totomu kawonomo idi atumu ba:kitana, ‘A:ma: a:ka:tuwa: a:ma: demalagidilawena, modobola a:ma:le eba kunu a:ma:

† **22:23:** Ya:suko tetelo Sa:diyusi epo ebe Yu epono taneba idila, iba:te Pa:lisi tanebapino iyaiya totomu bilibilinomamo ka:tudila:onakia:. Ega:walo epate a:elaote a:ene walo kemaimiote Godotamo da:nemaimioma:na:, ebe tanalo Sa:diyusi tanebapiate nanitabokobi ka:midinamia:, ebema: iba:te ebe atu nanitabokobi midia: tanalamo epo iyatulamenakiya.

niyakabolo dokolina ebe lumagi nilakapolo nemalagidilona.’<sup>40</sup> Nanitabola, Godote epatamo Mosesedo dikalamiya ega:walo ebena woki awokalimipiate ebena Bukamo dakuloliya, ebe Totomu Tabo bilibilinomono magumu ebe kapiyala, me kawokawo totomu netewa magumulo ba:pola:na.”

*Godokono Alibodawa Kelisoko Potelela:ka:  
Mak 12.35-37; Luk 20.41-44*

<sup>41</sup> Ebene Pa:lisi dubate ibino taneba magumulo eba pola:nalo Ya:sute ibi nalateda:liya, <sup>42</sup> “La: Kelisokono tanaloma: keba kunu kemalagidilawenama? Ebe pokono a:la:mula:ka:?”

Iba:te ebetamo nowamiya, “Da:ibidikono a:la:mula, ebena walone gudi magumune kawokalamene.”

<sup>43</sup> Ya:sute iba:tamo negiya, “La:imano tabo nanitabola, ebema: mabu keleka: Da:ibidite Kelisoko ebena Kawodawama: deka:miya? Iyo, ebete Godokono Uliyanano elawamo tabo ma kunu kiyawaiya,

<sup>44</sup> ‘Kawodawa Godote naimano Kawodawa  
Kelisotamo nege,

‘A:ma: naimano tumudi apuamo na:pokoliya,  
ebene a:ma:go gowelaopi  
a:ma:le naimano elawamo  
ibi ka:mikitaolema:ta.’”

<sup>45</sup> Ebene Ya:sute tabo moga:melo walo na:kegiya, “La: me tabo eba malagidilolo na nanana:la:, Da:ibidite ebena a:la:mu Kelisoko ebena Kawodawama: ka:milo ebete Godokono tumudi apuamo okolima: giya, ebema: ebe tanalote keba kunu na:ka:pemaigamene?”

<sup>46</sup> Ebe tetelo ibi magumulo lumagi idite Ya:sutamoni wiya tabo gema: ka:modobiya:, ebema: ebe tetene wagilimite epate ebe tabo idi alateda:ma: na:toletoleutiya.

## 23

*Ya:sute Godokono Totomu Iyatulamepino Amama Tanaloma: Degiya  
Mak 12.38-39; Luk 11.43,46; 20.45-46*

<sup>1</sup> Ebene Ya:sute epo bilibilinomo ega:walo ebena waloma:tapiatamo tabo eba kiyawaolo negiya, <sup>2</sup> “Godokono Totomu iyatulamepi ega:walo Pa:lisi tanebapi, Godote iba:tamo Mosesekono gobebobo ikalamiya, ma kunu Mosesete Bukamo dakuloliya iba:te ebe Totomu Tabo wadenomamo niyatulamenakoma:na. <sup>3</sup> Ebema: iba:te la: Godokono tabamo tudila:oma: danaletanakoma:na:, modobola la: na:tudila:onakiyala:, wiyasiya la:le ibino iyaiya ilukuli tanalo dulama:ema la: ibi akoibamilatela:la:, mabu iba:te epetapi kawonomamo analenaka wadewade tanalo kosiyodilolema:, wiyasiya nanitabo tanalo puliyala, iba:te ebe atu wadewade tanalo kosiyodilolenakoa. <sup>4</sup> Numa:la:, iba:te ibino totomu tabamo epatamo iyaiya mibomibo tanalo ikalamenaka, iyo, ibino totomu tabo ebe epate mibomibo inamabu okolamo dowaguatena eba kunula. Ebema: iba:te epono mibomibo dulaema:na: walubi tanalo da:pesonomo idi kiyatinakoa:, koto makupiolete gito lamota:onanaka.

<sup>5</sup> Ega:walo ibi ubi kawonomola epate ibino unu tama eba ulamelelamelelo ibi wadewadepima: kegelama:. Ebema: Godokono Buka apuapuno tabo iba:te egege pepamo akulolete ibino wato kalamo ebo matuolamolena,







<sup>16</sup> “Eiye, la: piyate kuba gabo diyatulama:wenama, la: ebe balidi tamiopi dubulata!

“La: kuba wiya kawonomo kelaemamota, mabu la: ma kunu gelanakomata, ‘Potele Godoko Amamateno Motono mailamo kiyawaote, ebete ebe tabo walo dakadikamidalemene, ebe tanalo kubanoa. Wiyasiya ebete atu tabo Godokono Motono golodo inamabuno mailamo da:kiyawaomene, ebete ebena tabo kodakodakobi midite walo akadikamidalemene.’ <sup>17</sup> Nanitabola, la: balidi tamiolamepi dubula ega:walo la: daedale wokiagopilata! Godoko Amamateno Motono talena kawonomola, wiyasiya moto gulo ditana ebe golodo inamabuno talena kawoa:!

<sup>18</sup> “Ega:walo la: tanalo idi ma kunu gelanakomata, ‘Potele Godoko watidilono patapatano mailamo kiyawaote, ebete ebe tabo walo dakadikamidalemene, ebe tanalo kubanoa. Wiyasiya ebete ebe patapata unulo ditana ebe kalimagono inamabuno mailamo atu tabo da:kiyawaomene, ebete ebena tabo kodakodakobi midite walo akadikamidalemene.’

<sup>19</sup> “Nanitabola, la: balidi tamiolamepi dubulata! Godoko watidilono patapatano talena kawonomola, wiyasiya ebe unulo ditana ebe kalimagono inamabuno talena kawoa:!<sup>20</sup> La: nolowiala:, ebe patapatate Godoko watidilonoma: itana, ega:walo epate patapata unamo dalomonaka ebe kalimagono inamabuate atumu Godoko watidilonoma: ka:pola:na. Ebema: lumagite talena patapatano mailamo da:kiyawaomene ebete ebena tabo walo akadikamidalemene, ega:walo idawate talena kalimagono inamabuno mailamo da:kiyawaomene ebete atumu ebena tabo walo akadikamidalemene. <sup>21</sup> Nanitabola, aimano Kawo Talena Godote ebena Amamateno Motolo okolina, ebema: lumagite Godokono talena mailamo da:kiyawaomene ebete ebena tabo walo akadikamidalemene, ega:walo idawate Godokono Motono mailamo da:kiyawaomene ebete atumu ebena tabo walo akadikamidalemene. <sup>22</sup> Ega:walo me tanalo idila, Godokono Unu Duliyomololo ebete ebena Kawo Elawodawano okoli bailo bokolina. Ebema: lumagite Unu Duliyomolono mailamo da:kiyawaomene ebete ebena tabo walo akadikamidalemene, ega:walo idawate Kawo Elawodawa Godokono mailamo da:kiyawaomene ebete atumu ebena tabo walo akadikamidalemene.

<sup>23</sup> “Nanitabola, Godokono Totomu iyatulamepi ega:walo Pa:lisi tanebapi, la: kuba wiya kawonomo kelaemamota, mabu la: mena netewa epolata!

“La: la:imano pali inamabu bilibilinomo magumulo teni apuapu eba anagilamolelo Godotamo ebena apu wadenomamo ikameonakomata. Ebe tanalo magumulo la: kapiya tanalo da:pesonomo kawotawenakoa:, wiyasiya Godokono kawokawo totomonomo osiyodilolema: la: wadenomamo kemalagidilawena:. Ma kunu la: epagodolo tuputupulo kilukula:wena:, ega:walo la:le ibi nilakapolo kemalagidilola:wena:, ega:walo la:imano osiyodilole tanalodo Godokono nanitabo tanalo kawokalima:wena:. Ebema: modobola la: ebe kawokawo tanalo nosiyodilolenala: ega:walo atu tetelo egege tanalo osiyodilolema: akododomatila:la:. <sup>24</sup> Eiye, la: piyate gabo kubanu diyatulama:wenama, la: ebe balidi tamio dubulata! Ebema: la:imano osiyodilo tanalo ma kunula, la: obo nio tetelo la: dopamo obo eba wadipapalamirolelo egege inamabu umagago balamo alomonakomata, wiyasiya la:imano kalili magumulo da:pola:na ebe kawokawo abale inamabu ulamea:no obago gito nionakomata!

<sup>25</sup> “Nanitabola, Godokono Totomu iyatulamepi ega:walo Pa:lisi tanebapi, la: kuba wiya kawonomo kelaemamota, mabu la: mena netewa epolata!

La:le la:imano kalili ega:walo meleki unu apu ukulalenakomata, wiyasiya la:imano tepo magumulo da:pola:na ebe tanalo kukulala:wenakoa:, ebema: la:le pilo gabodo ega:walo kateneno ubi gabodo dosiyodilola:wenakoma, ebe kawokawo kuba tabokaonomola. <sup>26</sup> Ebema: a:ma: Pa:lisi balidi tamio-dawa, modobola a:ma: kalili magumu dopamo ukulawete ebene bala atumu na:kukuliye! Ebe gabo kapiyado a:imano daleyate kolopoligomene.

<sup>27</sup> “Nanitabola, Godokono Totomu iyatulamepi ega:walo Pa:lisi tanebapi, la: kuba wiya kawonomo kelaemamota, mabu la: mena netewa epolata!

“Iyo, a:elaopino bobo baino piki epate wadewade tita:gonoma: da:midilinaka, la: eba kunula mabu unute wadenomamo pola:na wiyasiya piki mabulo epono goa abale tabokaote pola:na! <sup>28</sup> Nanitabola, eba kunu epate la:imano unu tama eba ulamelelamente la: tuputupupima: ka:la:minata, wiyasiya la:imano tepo magumulo mena netewa tanalo ega:walo kuba osiyodilole tanalate la:godolo tabokaote pola:na.”

*Godokono Totomu Iyatulamepiate Ibino Kuba Wiya Laema: Ya:sute Walo Da:kegiya*

*Luk 11.47-51*

<sup>29</sup> Ya:sute tabo moga:melo walo na:kegiya, “Godokono Totomu iyatulamepi ega:walo Pa:lisi tanebapi, la: kuba wiya kawonomo kelaemamota, mabu la: mena netewa epolata!

“Numa:la:, la:imano ewoniate Godokono woki awokalimipi danakapula-menakiya, la: me tetelo ebe Godokono tuputupu wokopi unamo eba wadi-palatelelo ibino bobo bai wadenomamo osiyodilola:wete kaiyakaiya ebo amionakomata. <sup>30</sup> Ega:walo atu tetelo la: na:kegelanakomata, ‘Aimano ewoniate dilukulinamiya, a ebe tetelo iba:go nilukulinataleka:, ale Godokono woki awokalimipiatamo walubi eba iyatilo aimano wadewade osiyodilole tanalodo ibino igilo ba:mula:lelamiyana:.’ <sup>31</sup> Ao, la:le atumu ibi banakapulama:wiyana:! Numa:la:, la: a:ka:tuwa: la:imano tabamo la:imano kuba woki awokalilamenakomata, iyo, la: ewonino gudilata! <sup>32</sup> Ebema: la:imano ewoniate dowagilimiya, modobola la: ibino kuba kawonomo opoliyawete la:imano kuba wiya Godogodone nelawiyala:!

<sup>33</sup> “Eiye, la: kaluno gudilata, iyo, la: bu kalulata, ebema: la: Ela Opono wiya tanalone keba kunu nakalautiaema?

<sup>34</sup> “Nale la: nanitabonomolo analemata, nale Godokono woki awokalimipi ega:walo ebene mulopi dubu ega:walo ebene nani Totomu iyatulamepi la:tamo kapalibolemamo. Wiyasiya la:le ibi epetapi kewamo eba tupuguil-amelo kanakapulaemamota, ega:walo la:le epetapi la:imano balidi ibil-amole motolo pa:ka:pa:ka:mo ka:na:ma:ga:tiolemamota, ebene naimano wokopiate la:imano temeteme ikalame magumune duliwomolo ida:mo danalautioma:na:, la:le ebamo nemaimiawete ibi walo duliwomolo ida:mo ka:ka:na:ma:talemamota. <sup>35</sup> Ebema: la:le kuba wiya kelaemamota, mabu me opono wagilimi mabune la:le Godokono woki awokalimipi anakapulamemenakimata. Tuputupudawa A:ibolokono kalimate opamo deka:ka:liya, ebe tanalo wagilimi mabula. Ebene la:le tuputupu wokopi epetapi bilibilinomo anakapulama:wete, uwomu tetelo Godoko Amamateno Motolo la:le Balakayakono gudu Sekalayako ebo kanakapumiyamata, iyo, ebete ebe Motono Talena Bailo ega:walo Godotamo kalimagono ikameo bai tetenomolo eba utitalo, la:le ebe kubanomamo anagalimiyamata.

<sup>36</sup> “Ebema: na la:tamo nani tabonomo gemo, me tete epatamo ebe kuba bilibilinomono wiyate nanitabolo ka:pemene.”

*Ya:sute Yelusalema Duliyomolono Tanaloma: Tepo Temeteme Diyatawiya  
Luk 13.34-35*

<sup>37</sup> Ebene Ya:sute walo na:kegiya, “O Yelusalema, Yelusalema! A:ma:le Godokono woki awokalimipi anakapulamenakota, ega:walo ebete a:ma: kowalubitama: dapalibolenako, a:ma:le ibi nokolamo mapelama:welo akanakapulamenakota. Tete geyageyanomolo na ubi iyatinaimo a:imano epo naimano etakamo kitakeamidalema:, kakabate ebene gudi ditakeamidalenako eba kunu, wiyasiya a:ma: ubia:noma: eda:namiyata! <sup>38</sup> Ebema: umu numita:, a:imano duliyomolote kubanomo ka:kubamene. <sup>39</sup> Nale a:ma:tamo negemo, a:imano epate na tete geyageyanomolo a:kunaema:na:, wiyasiya a:imano walonepiate Godotamo ma kunu degelama:na:, ‘A:imano mailago da:pita, ale ebe unamo kadipatemalema:!’ ebe tetelo nale walo da:ka:pemo iba:te na ebo kunaema:na:.”

## 24

*Godoko Amamateno Iya Moto Kubaimi Tanalo  
Mak 13.1-2; Luk 21.5-6*

<sup>1</sup> Ebene Ya:sute Godoko Amamateno Iya Moto atepate eba tolo, ebe waloma:tapiate ebetamo pelamete ebe kawokawo motono tanaloma: ebo paniya. <sup>2</sup> Ya:sute wiyasiya iba:tamo negiya, “La: me inamabu bilibilinomo na:kulama:witama? Na la:tamo nani tabo gemo, walone me motono tanaloma: nokola idite idi unulo a:ka:pola:nama:na:, mabu gowelaopiate nokola bilibilinomo mapitaotele opamo iyalekenomo ka:piyalekema:na:.”

*Kawokawo Temetema:te Pelaema: Ya:sute Degiya  
Mak 13.3-13; Luk 21.7-19*

<sup>3</sup> Ebene Ya:sute Olibi Kewakewa Unu Damelalo eba okolitalo, ebe waloma:tapi a:ka:tuwa: ebetamo pelamete na:pegeliya, “A:ma:le a nanaa:, Godokono Moto kubaimi tanalote kebe tetelo na:ka:pemaigamene? A:ma:le me opamo walo da:ka:pa:emene, ebe tanalo ega:walo me opono uwomu tanalono tetema: a beda: anoano tanalote na:kiyatuaemene?”

<sup>4</sup> Ya:sute wiyasiya iba:tamo negiya “La: nanisiwale. Lumagi idite la: demasigilitamene, la: ebene tabo ako-olowiala:, <sup>5</sup> mabu dubu bilibilinomo epetapiate naimano mailamo pelamete ka:pegelama:na:, ‘Na ebe Kelisotela!’ ebene iba:te epo bilibilinomo ma kunu eba pemasi-giolelo iya gabamo ebo kemagatalema:na:. <sup>6</sup> Ega:walo la:le iyaiya opo epono gowelao tanalo ega:walo ibino gowelaoma: nopo iyati tanalo kolowiomamota. Ebe tetelo la:le la:imano woki kodakodailama:wete akotoleleala:, mabu me tanalate nanitabolo ka:pemaimioma:na: wiyasiya ebe tete ebe uwomu tetea:. <sup>7</sup> Nanitabola, opo epetapino epate opo epetapino epago ka:gowelaoma:na:, iyo, opo idite opo iditamo gowela tanalo kosiyo-dilomene, ebene iyaiya duliyomolo epetapilo epate baea:no kilukulioma:na: ega:walo mumulate iyaiya opo bilibilinomamo ka:pelaema:na:. <sup>8</sup> Numa:la:, kamiyaletе gudu laema: temeteme dowagilimi, me tanalo bilibilinomo eba kunula.

<sup>9</sup> “Ebe tetelo iba:te la:tamo kawokawo temeteme eba ikalamelo la: elawamo uwatetate anakapulaema: kemagatalema:ta, ega:walo na mabuma: opo bilibilinomono epate la:tamo ka:dowaoma:na:. <sup>10</sup> Ebene epo epetapi bilibilinomate ibino nanitabokobi midi magumulo agowa eba ukamidaolelo, iba:te ibino namutupiatamo dowaoite diya gabodo ibino mailo ibi anakapulamepiatamo kowatama:na:. <sup>11</sup> Ega:walo Godokono mailamo a:da: tabo kiyawaopiate ka:pemaimioma:na: epo epetapi

bilibilinomo kuba gabamo kemagatalema:.<sup>12</sup> Ebe tetelo kuba osiyodilole tanalote kawonomoma: keda:mene, ebema: epono tepo magumulo nilakapo kimalagidilo tanalote gibagibanomoma: keda:oma:na:,<sup>13</sup> wiyasiya numa:la:, kebe lumagite kodakodalo utite uwomuamo da:nemaigamene, Godote ebena igilo ka:mula:emene.<sup>14</sup> Ebema: Godote Kawo Elawodawama: deda:na, ebe tanalono Wade Tabo ebena wokopiate dopamo me opo kawonomolo ka:kiyawaoma:na: iyaiya opono epo bilibilinomate kolowioma:, ebena me opono uwomu ebo ka:pemaigamene.”

*Talena Bai Kubaimidawano Tanalo*  
*Mak 13.14-23; Luk 21.20-24*

<sup>15</sup> Na Ma:tiyute buka ka:la:mioledawatamo negemo, a:ma: me tabo Ya:sute degiya wadenomamo niyatawa.

Ya:sute tabo moga:melo walo na:kegiya, “Godokono woki awokalimida:wa Da:niyolote dopamo degiya ebe tanalote nanitabolo ka:pemaigamene, ebema: Godokono Moto kubaimidawate ebe talena bailo utitalo la:le ebe duma:ema,<sup>16</sup> ebe tetelo modobola Yudiya opo epate unuunu damelamo nalautioma:na:.<sup>17</sup> Iyo, moto tanatimilo dokolitamene, ebe lumagite moto guamo a:ka:nopegamene ebena inamabu uwatema:,<sup>18</sup> ega:walo tumulo woko dosiyodilutamene, ebe lumagite walo motamo a:ka:toamene ebena lubudino kaliku laema:.

<sup>19</sup> “Numa:la:, lamitulamitu ega:walo nono dikalamena ebe kamiyala:tamo ebe egelate kubanomoma: keda:mene!<sup>20</sup> Ebema: modobola la: Godoko na:toweomiyala:, la:imano alautio tanalote gibagiba tetelo o wokoa: talena egela tetelo akopemaigala:,<sup>21</sup> mabu ebe tetelo kawokawo temetemenomate nanitabolo ka:pemaimioma:na:. Numa:la:, me opo wagilimi mabune wagilimite ka:lo me teta:mo pemaiga, ebakobako temetema:te dopamo ka:pemaimiya:, ega:walo walone tetelo ebakobako temetema:te walo a:ka:pelaema:na:, iyo, iba:te kapiya tetenomolo ka:pemaimioma:na:.<sup>22</sup> Me tanalo nanitabola, Godote ebe tete gopowaimia:no lumagi idite me opolo igilolo a:kokolinamene, wiyasiya ebete deka:la:mioliya ebe epo nilakapoilamelote tete ka:gopowaimene.

<sup>23</sup> “Ebe tetelo lumagi idite la:tamo ma kunu degemene, ‘Numa:la:, Godokono Alibodawa Kelisote malo bokolina!’ o, ‘Ebate ebolo bokolina!’ la: nanitabokobi akomida:la:,<sup>24</sup> mabu elemasigi Kelisoma: eda:opi ega:walo naimano mailamo a:da: tabo kiyawaopi, iba:te pemaimiote iyaiya anoano tanalo kawokawonomo kosiyodilolema:na:. Iyo, ibi ubila ebe osiyodilole tanalame Godote deka:la:mioliya ebe epo iya gabamo kemagatalema:.<sup>25</sup> Numa:la:, me tanalate pemaimioa:no nale la: dopamo analemata.

<sup>26</sup> “Ebema: iba:te la:tamo ma kunu degelama:na:, ‘Numa:la:, Kelisote bulu opolo bokolina!’ la: ebamo akotolama:la:. Ega:walo iba:te da:kegelama:na:, ‘Numa:la:, ebete lumagi idino motolo opegate ba:luta!’ la: nanitabokobi akomida:la:.<sup>27</sup> Nanitabola, molete da:la:uwa:midamene ebe tetelo egelate tobolo unu kawonomo eba pukuilamelote alote apune wagilimite apuamo gito ka:petomene, ebema: na Epono Naniwite walo da:ka:pemo naimano pe tanalote eba kunu kitanamene, iyo, me opo epo bilibilinomate naimano pe tanalo kuima:na:.

<sup>28</sup> “Me tanalo ebe nanitabola, abale inamabute kebolo kitanamene, waliate aleola:go ebamo ka:guditama:na:.”

*Epono Naniwino Pe Tete*  
*Mak 13.24-27; Luk 21.25-28*

<sup>29</sup> “Ebe kawo temeteme tetete dolopoligomene, ebe tetenomolo egelate kidokomene ega:walo saganate a:ka:pukuilaemene, iyo, mawela:te tobolo unune opamo ka:pa:gudima:na: ega:walo tobolo ununo elawoelawo inamabuate kalela:oma:na:.” <sup>30</sup> Ebe tetelo Epono Naniwino elawo awokalimino anoano tanalote tobolo unulo ka:pemaigamene, ebene me opono iyaiya epo bilibinomate kawo tola:go kiimima:na:, mabu Epono Naniwite tobolo unune eba piwisigalo iba:te ebe ebo kuima:na:, ebete ebene elawago ega:walo alo kawonomago ka:pemene. <sup>31</sup> Ebene ebene nopodawate tutele kawonomamo eba molelo, ebete Unu Duliynomolono nopopi epetapi iyaiya opo bilibinomamo kapalibolemene, Godote deka:la:mioliya ebe epo me opo apune apune ka:puwatema:.”

*Umei Kewano Tanalo*  
*Mak 13.28-31; Luk 21.29-33*

<sup>32</sup> “La: umei kewano tanalone me tanalo idi wadenomamo niyatawala. Katomono wuiate pemaimite olioli paa da:mogoiamidalema:na:, ebe tanalote la: kiyatulamema:ta ulamano tete ebe netatali, <sup>33</sup> ebema: la:le me temeteme tanalo bilibinomo dulama:ema, la: kiyatawaomamota Epono Naniwino pe tete tatalila, ebe gigiyudo opegama: pe. <sup>34</sup> Na la:tamo nani tabo gemo, me tanalo bilibinomate dopamo ka:pemaimioma:na:, walone me tete epate ebo ka:elaoma:na:, <sup>35</sup> iyo, me opo ega:walo tobolo unu iba:te kolopoligoma:na:, wiyasiya naimano tabote a:kolopoligomene, uwomua: tetelo bitanamene.”

*Epono Naniwino Pe Tete Epate Iyatawa:*  
*Mak 13.32-37; Luk 17.26-30,34-36*

<sup>36</sup> “Numa:la:, epate ebe Kawo Egelano tete iyatawa:, Unu Duliynomolono nopopi ega:walo Godokono Gudu iba:te iyatawa:, Nabiwi Godo kapiyate iyatawala. <sup>37</sup> Nowako tetelo kebako tanalote ka:pemaigiyale, Epono Naniwite walo da:ka:pemene ebe tetelo atu tanalote ka:ka:pemaigamene. <sup>38</sup> Mabu obote pea:no iba:te ebe tetelo bae naota ega:walo elawo da:imi obo kawonomamo niota, dubate kamiyale uwatoleta ega:walo kamiyala:te dubu uwatoleta, iba:te eba kunu eba wagelenalo Nowate kawo peamo ebo opegiya. <sup>39</sup> Ebe tetelo iba:te kiyatawaonamia: obo kawonomote odolote ibi bilibinomo danakapulaemene, ebema: Epono Naniwite walo da:ka:pemene ebe tetete eba kunu kitanamene. <sup>40</sup> Ebe tetelo dubu netewate tumulo dowapaitama:na:, Epono Naniwite pete idi eba pelawelo idi ebo katepamene, <sup>41</sup> ega:walo kamiyale netewate bae delapautama:na:, ebete pete idi eba pelawelo idi ebo katepamene. <sup>42</sup> Ebema: la: olowiolo nilukuliniyala:, mabu la: iyatawa: la:imano Kawodawano pe tete. <sup>43</sup> Ega:walo me tanalo idi na:kemalagidilala:. Moto namutudawate pilo lumagino pe tete diyatawamene, ebete ebe idoko kawonomolo ebe teta:mo kolowionamene, mabu ebe ubia:nola pilo dawate ebene motamo ka:popegama:. <sup>44</sup> Ebema: la: atumu nolosiyodilala:, mabu diyala, la: olowioa:no eba ilukulinalo Epono Naniwite ebo da:ba:pemene.”

*Mulo Wokodawa Ega:walo Daedale Wokodawa Ibino Tanalo*  
*Luk 12.41-48*

<sup>45</sup> Ebene Ya:sute walo na:kegiya, “Namutudawatamo da:tuduwatanako ebe mulo wokodawano tanalo keba kunula:ka:? Nanitabola, namutudawate ebe lawete wokopi epetapi ulamedawama: kiyatimene, ma kunu ebete ibino bae nao tetelo iba:tamo bae kikalamolemene. <sup>46</sup> Ebene ebe mulodawate woko wadenomamo eba osiyodilonalo, ebene namutudawate pete ebene tanalo da:puimene, ebe wokodawate kawonomamo kekalakalamene. <sup>47</sup> Na



la:tamo nani tabo gemo, namutudawate ebe mulo wokodawano tanaloma: eba pekalakalalo, ebete ebe ebena inamabu bilibilinomo ulamedawama: kiyatimene.

<sup>48</sup> “Wiyasiya ebe wokodawate kuba woki lawete ebena tepo magu-mulo ma kunu degemene, ‘Naimano namutudawate tete geyageyadopolo nokolina, samamo ka:pena:’ <sup>49</sup> ebe tetelo ebete woko osiyodiloa:no kuba osiyodilolepi epetapiago ebena namutudawano bae kawiya naote elawo da:imi obo ebo ka:nioma:na:, ebema: ebete daedalema: eda:te wokopi epetapi alukole ebo kowagilimene. <sup>50</sup> Ebene ebe daedale wokodawate olowioa:no eba okolinalo ebena namutudawano pe tanalo a:kiyatawamene. Ebe tetelo namutudawate pete <sup>51</sup> daedale wokodawa kawonomamo panagalimiote mena netewa epago kanalibomene ebena kuba wiya ka:nelaema:, ebe temeteme bailo iba:te lalo eba noliomolelo kawonomamo kiimima:na:.”

## 25

### *Teni Buwelemelena Iyatulame Oi*

<sup>1</sup> Ebene Ya:sute walo na:kegiya, “Ebe egelalo Godote Kawo Elawodawama: deda:na, ebe tanalote ma kunu kitanamene. Dubu idite oli kamiyale delawi, ebe tetelo teni buwelemela:te ibino wuiki alo uwatete motone nemaimiote eba:go soliyomu baiamo tolaema: nemakopelitiya, <sup>2</sup> ibi magumulo paibu buwelemela:te daedalema: eda:iya, wiyasiya paibu epetapiate wade woki-ago tolamiya. <sup>3</sup> Ma kunu daedale buwelemela:te ibino alo dowatiya iba:te modobo obago kowatia:, <sup>4</sup> wiyasiya wade wokiago da:tolamiya ebe buwelemela:te modobo obo iyapote ibino alo ega:walo obo ebo watiya.

<sup>5</sup> “Didokoni dubute soliyomu baiamo samamo ka:pemaigania:, ebema: buwelemela:te tete geyageyalo nipo demakopeleniya iba:te gito laoniya. <sup>6</sup> Sele tetenomolo lumagi idite ma kunu gepateni, ‘Ebe dubu na:pe! La: bilibilinomate eba:go alugoma: na:pelama:la:!’

<sup>7</sup> “Ebe tetelo ebe buwelemela:te maimionate ibino alo pioma: eba wage-lenalo, <sup>8</sup> ebena paibu daedale buwelemela:te ibino wade wokiago namutupiatamo negelaniya, ‘La:imano alo obo sa:sa: apuapu atamo ikaeaema: modobola:ka:? Aimana alote tete tatalila ka:egaoma:na:.’

<sup>9</sup> “Wiyasiya wade woki buwelemela:te iba:tamo negelaniya, ‘Ao, ale la:tamo dikalamoletamene, a bilibilinomate modoboa:noma: keda:omalema:. Modobola la: tolama:wete olowame motone obo na:niyapoala:.’ <sup>10</sup> Ebene daedale buwelemela:te obo olema: da:tolameniya, dubute soliyomu baiamo ebo pemaigani. Ebe tetelo paibu buwelemela:te dopamo wade wokiago demakopeleniya, iba:te eba:go soliyomu motamo nodolonate moto namutudawate gigiyu gito pemopini.

<sup>11</sup> “Ebena paibu daedale buwelemele epetapiate walone da:pelameniya, iba:te gigiyu niyakabamo putitanate moto namutudawa ma kunu pananiya, ‘Aimana Kawodawa! Gigiyu na:pa:iyamidaeama:!’ <sup>12</sup> Wiyasiya ebete negeni, ‘Ao, na la:imano tanalo iyatawa:.’”

<sup>13</sup> Ebene Ya:sute uwomu tabo ma kunu giya, “La: olowiolo nilukuliniyala:, mabu Epono Naniwino egela ega:walo tete la: kiyatawawena:.”

### *Kawo Dubute Wokopiatamo Mani Dikalamoliya Ebe Iyatulame Oi*

#### *Luk 19.11-27*

<sup>14</sup> Ebene Ya:sute walo na:kegiya, “Godote Kawo Elawodawama: deda:na, ebe tanalote ma kunu kitanamene. Kawo dubu idite mulu opamo eba tolo ebena wokopi ebetamo ka:la:mite, iba:te ebena inamabu ega:walo mani wadenomamo kulamelemenama: iyaiya ikalamolette ebo tiya. <sup>15</sup> Ebe tetelo



ebete iditamō 5,000 mani ikamiya, ega:walo iditamō 2,000 mani, ega:walo iditamō 1,000 mani, ibino wokiago modobolo eba kunu eba ikalamolelo, ebete ibi gito miyapiya. <sup>16</sup> Ebene 5,000 mani delawiya ebe dubute tonomo tote bisnisi woko idi eba nosiyodilolo 5,000 mani idi ebo nosiyodiliya, <sup>17</sup> ega:walo 2,000 mani delawiya ebe dubute atumu eba ka:nowagelelo 2,000 mani idi nosiyodiliya, <sup>18</sup> wiyasiya 1,000 mani delawiya ebe dubute tote damela nobobote ebēno kawodawano mani gito nowaminiya.

<sup>19</sup> “Ulama epetapi da:petolamiya ebe wokopino kawodawate walo ka:pete iba:go kapimiya ibino mani uwomu ebo peka:la:miolelamiya. <sup>20</sup> Ebene 5,000 mani delawiya ebe dubute pete 10,000 mani eba pawokalimilo na:pegiya, ‘Kawodawa, numa: A:ma:le natamo 5,000 mani ikanamiyata, wiyasiya naimano woko magumulo 5,000 mani idi walo da:kosiyodilimo, mela bitana.’ <sup>21</sup> Ebēno kawodawate ebetamo negiya, ‘Oe! A:ma: wade wokodawalata ega:walo wade tuputupudawalata! A:ma: da:peso tanalo wadenomamo osiyodiliata, ebema: na wiyasiya a:ma: naimano kawokawo tanalo epetapi ulamedawama: ka:midimamota. A:ma: naimano kalakala soliyomu baiamo na:popega.’

<sup>22</sup> “Ebene 2,000 mani delawiya ebe dubute pete na:pegiya, ‘Kawodawa, numa: A:ma:le natamo 2,000 mani ikanamiyata, wiyasiya naimano woko magumulo 2,000 mani idi walo da:kosiyodilimo, mela bitana.’ <sup>23</sup> Ebēno kawodawate ebetamo negiya, ‘Oe! A:ma: atumu wade wokodawalata ega:walo wade tuputupudawalata! A:ma: da:peso tanalo wadenomamo osiyodiliata, ebema: na wiyasiya a:ma: naimano kawokawo tanalo epetapi ulamedawama: ka:midimamota. A:ma: naimano kalakala soliyomu baiamo na:popega.’

<sup>24</sup> “Ebene walogabodawate 1,000 mani delawiya, ebete pete na:pegiya, ‘Kawodawa, na iyatawala a:ma: genegene dubunomolata. Epetapiate inamabu damionaka a:ma: ebe inamabu gito ba:petapionakoma:ta, ega:walo iba:te kikopu ibino paliamo daminaolenaka a:ma: nolo tetelo gito ba:puwatanakoma:ta a:ma:le a:ka:tuwa: kenaoaema:.’ <sup>25</sup> Ebema: a:ma: da:toawiyala, nale a:ma: tolemelo a:imano 1,000 mani damela magumamo gito nowaminiyamo. Mela, me ebela. A:imano inamabu na:kelawa:.’

<sup>26</sup> “Ebēno kawodawate wiyasiya ebetamo negiya, ‘A:ma: kuba damola wokodawanomolata! A:ma: tabo ma kunu egeata, epetapiate damionaka nale ebe inamabu gito ba:petapionakomo, ega:walo iba:te kikopu daminaolenaka nale nolo tetelo gito ba:puwatanakomo. <sup>27</sup> Ebema: mabu keleka: a:ma:le naimano mani baneka wokopiatamo ka:nikalama:wiya:? Iba:te mani uwatete woko idi nosiyodilotaleka: kawodopoma: beda:na:, ebene nale pete a:ma:le natamo atu mani wiyasiya kele unudopamo walo ba:kikanama:wena:.’

<sup>28</sup> “Ebene kawo dubute ebēno opopiatamo negiya, ‘La: ebēno 1,000 mani laema:wete 10,000 maniago dubutamō nikama:la:.’ <sup>29</sup> Mabu kebe lumagigodolo wadewade woki da:pola:na, idawate ebetamo wadewade tanalo bilibilinomo ikameote ebēno tepo magumu ketabokaimene, wiyasiya kebe lumagigodolo wadewade woki pola:na:no, ebegodolo kebe kapiyakapiya tanalate da:pola:na idawate ebegodone walo ka:kuwatemene. <sup>30</sup> Ebema: me damola wokodawa idoko magumamo gito na:neba:idilala:, ebolo ebete epetapiago lalo eba noliomolelo kawonomamo kiimima:na:.’ ”

### *Godote Me Opo Epo Iyaiya Dapalomomene*

<sup>31</sup> Ebene Ya:sute walo na:kegiya, “Epono Naniwite ebēno alo kawonomago ega:walo Unu Duliomolono nopopiago da:pemene, ebe tetelo ebete ebēno

Kawo Elawodawano okoli bailo ka:pokolitamene epono tanalo kapanag-ilamelelaema:.<sup>32</sup> Ebene iyaiya opo epo bilibilinomate ebetamo dapalad-abutima:na:, ebe tetelo ebete ibi bilibilinomo iyaiya kalomomene, sipi-goeogoeo ulamedawate sipi ega:walo gautu iyaiya keba kunu kalomonakole eba kunu,<sup>33</sup> ebene ebete sipi-goeogoeo ebena tumudi apuamo alomote ega:walo gautu-goeogoeo ebena pele apuamo kalomomene.

<sup>34</sup> “Ebe tetelo Kawo Elawodawate tumudi apu epatamo ma kunu kegemene, ‘Naimano Nabiwite wadewadepima: degena, la: ebena Kawo Elawodawano duliynomolamo na:popila:la: wadewade tanalo ebolo ka:puwata:ema:. Iyo, ebete me opo osiyodilo tetelo la:tamo dosiyodiliya, la: me oli duliynomolo na:pelawa:la:.’<sup>35</sup> Mabu na bae kapete dunamenaki ebe tetelo la:le bae natamo ikanamonenakimata, ega:walo na obo kapete dunamenaki la:le na obamo owalubininakimata. Nale kapeladawamu la:tamo da:pemaiganakimo ebe tetelo la:le na kalakalago elawenenakimata,<sup>36</sup> ega:walo pupuliono inamabua: tetelo gito da:lutanakimo la:le kaliku a:pulinamenakimata. Gabugabute dunamenaki ebe tetelo la:le na wadenomamo unamenanakimata, ega:walo kubakubapi epetapiate na idoko motamo diyatininakiya la:le na unaema: ebamo a:pelamenakimata.’

<sup>37</sup> “Ebe tetelo tuputupupiate wiya tabo Kawo Elawodawatamo kegelama:na:, ‘Kawodawa, kebe tetelo a:ma: bae kapete dumititiyala, ale a:ma: umitate bae ebo kikametiya? Ega:walo ale obo kebolo kikametiya?<sup>38</sup> Kebe tetelo a:ma:le kapeladawamu da:pemaigawiyala, ale a:ma: umitate kalakalago ebo kelawetiya? Ega:walo ale wade kaliku kebolo ka:pulimitiyala?<sup>39</sup> Kebe tetelo a:ma: gabugabute dumititiyala ale walubi tanalo ebo ka:piyatiyama:?’ Ega:walo epetapiate a:ma: idoko motamo diyatitiyala ale kebe tetelo a:ma: uima: ebamo ka:pelamiyama:.’

<sup>40</sup> “Ebena Kawo Elawodawate iba:tamo kowaimene, ‘Me na waloma:enepi nulama:la:. Na la:tamo nani tabo gemo, la:le ibi magumulo lumagi da:pesonomotamo mako wade tanalo dosiyodilawenaima, la:le natamo osiyodilonaimata.’

<sup>41</sup> “Ebena ebete olobigate pele apupiatamo ma kunu kegemene, ‘Godote la:tamo kuba wiya ikalaema: gena, ebema: la: naimano ololo apune na:tolama:la:! Ebete Saitanako ega:walo ebena nopopino tanaloma: a:ega: ela iyalo demadiya, la: ebe ela magumamo na:tolama:la:!’<sup>42</sup> Mabu na bae kapete dunamenaki la:le bae natamo kikanama:wenakia:, ega:walo na obo kapete dunamenaki la:le obamo kowalubina:wenakia:.<sup>43</sup> Na kapeladawamu da:pemaiganakimo, la:le na kalakalago kelawena:wenakia:, ega:walo na pupuliono inamabua: tetelo gito da:lutanakimo la:le kaliku ka:pulinama:wenakia:.. Gabugabute na dunamenaki ega:walo kubakubapi epetapiate na idoko motamo diyatininakiya, la:le na ka:powalubina:wenakia:.’

<sup>44</sup> “Ebe tetelo iba:te ebetamo wiya tabo kegelama:na:, ‘Kawodawa, a:ma: bae kapete o obo kapete kebe tetelo kumititiyala? Ega:walo a:ma: kapeladawamu o inamabua:dawamu atamo kebe tetelo ka:pemaigawiyala? Ega:walo a:ma: gabugabute dumititiyala o epetapiate a:ma: idoko motamo diyatitiyala kebe tetelola:ka:?’ Ale a:ma:le eba kunu wagelitalo kumitanakia:!’

<sup>45</sup> “Ebete wiyasiya iba:tamo kegemene, ‘Na la:tamo nani tabo gemo, la:le naimano lumagi da:pesonomotamo mako wade tanalo osiyodiloa:no dilukula:wenaima, la:le natamo kosiyodilawenamia:.’ ”

<sup>46</sup> Ebema: Ya:sute uwomu tabo ma kunu giya, “Nanitabola, ebe kubakubapiate uwomua: Temeteme Opamo eba tolamelolo, wiyasiya tuputupupiate uwomua: Igilo Opamo ka:tolaema:na.”

## 26

*Yu Watowatopiate Ya:suko Anakapuima: Degeliya*

*Mak 14.1-2; Luk 22.1-2; Yon 11.45-53*

<sup>1</sup> Ebene Ya:sute me tabo bilibilinomo kiyawao dolopoligiya, ebete ebe waloma:tapiatamo negiya, <sup>2</sup> “La: iyatawalata Aduga:la Soliyomu\* wagilima: netewa egelate nepola:na. Ebe tetelo Godote Epono Naniwi epono kotamo kiyatimene, ebene iba:te ebe kewamo tupuguimite ebo kanakapuima:na.”

<sup>3</sup> Ebe ulamalo Kayapasite Godotamo kalimagono ikameopino Unu Watodawanomoma: eda:nami. Ebema: ebe kawo dubu ega:walo ebenu opopi elawodubu ega:walo Yu epono kawokawo dubu epetapi, iba:te ebenu motamo aladabutite <sup>4</sup> tabo ebo iyatiya Ya:suko kanakapuima:. Ebema: iba:te ebe diya gabodo laema: gabo eba waditalo <sup>5</sup> epetapiate wiyasiya negeliya, “A Soliyomu tetelo ebe a:kelaema:, mabu epate atamo dowao agoda:ba:gowelama:na.”

*Betani Duliymolo Kamiyalete Ya:sutamo Wade Nibo Ii Dadipanamiya*

*Mak 14.3-9; Yon 12.1-8*

<sup>6</sup> Ebene Ya:sute Betani duliymololo dubu idi Saimonokono motolo okoliti, ebe dubu dopamo kukulakukulagonola. <sup>7</sup> Ya:sute bae eba nitalo ebe tetelo kamiyale kapiyate pete, wade nibo ii nokola kalila:mo tabokaimi adaete Ya:sukono watamo ebo padipanamiya, ebe ii inamabuno wiya kawonomola. <sup>8</sup> Ya:suko waloma:tapiate ebe tanalo dumiya iba:te dowao negeliya, “Mabu keleka: ebete wiya kawo inamabu dologala inamabuma: da:midi? <sup>9</sup> A me ii manima: na:na:miditaleka: mani kawonomo buwatena:, ebene ebe mani nigologolopiatamo gito bikalamolena!”

<sup>10</sup> Ya:sute ibino tabo gela tanalo iyatawate wiyasiya iba:tamo negiya, “La:le me kamiyale kawiyale beda:ma: kanawitama? Ebete natamo wade tanalonomo osiyodilo. <sup>11</sup> La: numa:la:, nigologolopiate tete geyageyanomolo la:go bilukulionama:na:, la:imano ubi tetelo ibi nowalubiliniyala:, wiyasiya na uwomua: tetelo la:go a:kokolinamo, tete tatalila nale la:ka:miyapamamota. <sup>12</sup> Ebema: nale a:ea:no tetelo me kamiyalete wade nibo ii naimano apa:mo dopamo dadipana, ebe tanalodo ebete gabo osiyodilo naimano ape bobamo iyatima:. <sup>13</sup> Na la:tamo nani tabo gemo, epate iyaiya opo bilibilinomamo Godokono Wade Tabo datanakoma:na:, iba:te me kamiyalete dosiyodilo ebe tanalo malagidilolo ba:nikiyawaonakoma:na.”

*Yudasite Ya:suko Laema: Nopo Diyatiya*

*Mak 14.10-11; Luk 22.3-6*

<sup>14</sup> Ebene Ya:sukono <sup>12</sup> waloma:tapino taneba magumulo Keliyota duliymolodawa Yudasite Godotamo kalimagono ikameopino watowatopiatamo tote, <sup>15</sup> na:negiya, “Nale Ya:suko la:imano kotamo diyatimo, la:le natamo

\* **26:2:** Me Aduga:la Soliyomuno mabu ebe Moseseke tetelo wagilimiya. Ebe tetelo Isipiti Kawo Elawodubu Pa:lote Yu epo bilibilinomo uwatete ibi ebenu wiya: wokopima: midiliya, ebema: ebe ubia:nola ibi gito alibolema: ibino Ka:inane opamo. Godote Pa:lokono wato kodakoda tanalo dumiya, ebema: idoko idilo ebete ebenu a:e nopodawa Isipiti opamo napaliboni Isipiti epo bilibilinomono dopo gudi kapanakapulamenama:. Ebene ebe idokolo a:e nopodawate Yu epono gudi aduga:lalenate, wiyasiya Isipiti epono gudinomo anakapulameni. Ebe anoano tanalodo Yu epo bilibilinomate Isipiti opone ebo nemaiminiya, ebema: ebe tanalo malagidiloma: iba:te ulama bilibilinomo magumulo Aduga:la Soliyomu bosiyodilonakoma:na:.

beda: wiya na:kikanama:ema?” Ebe tetelo iba:te 30 siliba mani ebo ikamiya, <sup>16</sup> ebene ebe tetene wagilimite ebete gabo wadiya Ya:suko ibino kotamo kiyatima:.

*Ya:sute Ebe Waloma:tapiago Aduga:la Soliyomu Denaniya*

*Mak 14.12-21; Luk 22.7-14,21-23; Yon 13.21-30*

<sup>17</sup> Ebene epate Unamo Maiga: Palowa Bae Soliyomu† nao dowagilimiya, ebe egelalo Ya:suko waloma:tapiate ebetamo pelamete na:pegeliya, “Ale Aduga:la Soliyomuno nao inamabu kebolo na:kosiyodilolema:, ale a:ma:go kapimiya kenaoma:?”

<sup>18</sup> Ya:sute iba:tamo nowamiya, “La: netewapi kawo duliyaomolamo toawete aimano namutudawa idi da:numa:ema, ebe dubutamo ma kunu na:negeliyala:, ‘Iyatulamedawate ge, naimano olalati pemaiga tanalono tete tatalila, Godokono ubila. Ebema: na ubila a:imano motolo nale naimano waloma:tapiago Aduga:la Soliyomu bae ka:penama:.’ ”

<sup>19</sup> Ebene Ya:sute ibi keba kunu kanaliyale, ebe waloma:tapiate eba kunu nosiyodilote Aduga:la Soliyomu inamabu ebo nosiyodiloliya.

<sup>20</sup> Ebene ebe idokolo Ya:sute ebene 12 waloma:tapiago bae naoma: dilukuliniya, <sup>21</sup> ebe tetelo Ya:sute iba:tamo negeni, “Na la:tamo nani tabo gemo, la:imano taneba magumulo idawate na anakapunamepi kowalubilimene na lawenema:.”

<sup>22</sup> Iba:te tepo mibomibonomoma: eba eda:onalo Ya:sutamo idawate genaki, idawate genaki, “Kawodawa, nalela:ka:?”

<sup>23</sup> Ebete iba:tamo nowamini, “Bae kalila:mo potele nago koto ka:ma: daduba:mida, ebe ebe lumagila. Ebete na anakapunamepino kotamo kiyatinimene. <sup>24</sup> Iyo, ebe nanitabola, Epono Naniwite a:eamo ebe na:to, Godokono Bukalo tabo ma kunu itana, wiyasiya kebe lumagite ebe anakapumpiatamo dikalaemene, ebe lumagite kuba wiya kawonomo ke-laemene. Me ebe mabuma: ebe dubu ebene menokote ebe alaimia: notaleka: ba:modobona:!”

<sup>25</sup> Ebene Yudasiko, ebete dopamo Yu watowatopiago nopo diyatiya Ya:suko laema:, ebete negeni, “Iyatulamedawa, nalela:ka:?”

Ya:sute nowamini, “A:ma:le ebe ebe geata.”

*Ya:suko Malagidilo Bae Nao Tanalono Wagilimi Mabu*

*Mak 14.22-26; Luk 22.14-20; 1 Kol 11.23-25*

<sup>26</sup> Ebene iba:te bae eba naonalo, Ya:sute bae lawenate Godotamo kalakala tabo genate ebo wakamioni, ebema: ebete ebe waloma:tapiatamo eba ikalamolenalo negeni, “La: uwata:wete nenaola:, me naimano apela.”

<sup>27</sup> Ebene ebete kalili kelawenate, Godotamo kalakala tabo genate iba:tamo eba ikalamolenalo negeni, “La: bilibilinomo na:niala:, <sup>28</sup> mabu Godote epago milolo kilukulinama: nopo diyatiya, me naimano kalimate ebe nopo kodakodaimina, iyo, me kalimate epo epetapi bilibilinomono kuba egebole-laema: keka:ka:liyamene. <sup>29</sup> Nale la: analemata, na me tetelo me da:imi obo walo a:ka:nimo, wiyasiya naimano Nabiwite Kawo Elawodawama: deda:na, ebe duliyaomololo na oli da:imi obo walone tetelo la:go ka:na:niomalema:.”

† **26:17:** Unamo Maiga: Palowa Bae Soliyomu ebe Yu epono soliyomu idila. Aduga:la Soliyomu dolopoligomene, egela idilo me soliyomu idi wagilimite iba:te sebeni egela tetelo bosiyodilonakoma:na. Me soliyomuno magumu ma kunula. Yu epate Isipiti opone Godokono elawamo da:nemaiminiya, ebe idokolo ibino palowa bae osiyodilolenate wadenomamo okaleona:no iba:te gawagawalo ebo tolameniya. Mabu ebe baete unamo maimioma: tetea:nola, ebema: ebe tanalo malagidiloma: Yu epate me soliyomu bosiyodilonakoma:na.

<sup>30</sup> Ebene iba:te Godoko amamateno oale alapionate, Olibi Kewakewa Unu Damelamo ka:tolamenama: motone gito niwitioniya.

*Ya:sute Pitako Danani, A:ma:le Na Iyatawa:noma: Kegema:ta*  
*Mak 14.27-31; Luk 22.31-34; Yon 13.36-38*

<sup>31</sup> Ebe tetelo Ya:sute iba:tamo negeni, “Ka:lo idokolo la: bilibilinomate na katepanemamota, mabu Godokono Bukalo tabo ma kunu itana, ‘Godote sipi-goeogoeo ulamedawa danakapuimene, ebe tetelo ebena tanebano sipi-goeogoeate iyaiya kalautioma:na:.’ <sup>32</sup> Wiyasiya Godote na a:ene walo dakadipanatenemene, na Ga:lili opamo dopamo ka:tomamo. La:le na ebolo ka:punaemamota.”

<sup>33</sup> Ebene Pitate Ya:sutamo negeni, “Ibi bilibilinomate a:e tolemelo a:ma: atepatate dalautioma:na:, wiyasiya nale a:ma: akatepatama!”

<sup>34</sup> Ya:sute ebena tabo eba wiyanalona negeni, “Na a:ma:tamo nani tabo gemo, ka:lo idokolo kakabate geoa:no, a:ma: netewa-kapiya teta:mo na iyatawa:noma: kegema:ta.”

<sup>35</sup> Pitate ebetamo walo na:kegeni, “Na a:ma:go da:na:emo, nale a:ma: iyatawa:noma: a:kegemo!” Ebe tetelo Ya:suko waloma:tapi bilibilinomate ebe atu tabo kegelaniya.

*Ya:sute Getasemanilo Godotamo Da:towetoweoni*  
*Mak 14.32-42; Luk 22.39-46*

<sup>36</sup> Ebene Ya:suko ega:walo ebe waloma:tapi iba:te kawo duliyaomolone ne-maimionate tatali opo ida:mo tolameniya, ebe opono mailo Getasemanila. Ya:sute ebolo iba:tamo na:negeni, “La: malo na:pola:nala: Na me tataliamo tomo Godotamo towetowe tabo ka:negema:.” <sup>37</sup> Ebe tetelo ebete Sebedikono gudi Ya:imesiko ega:walo Yoneko, ibi netewapi ega:walo Pitako ebalata towetoweo tabo gela baiamo magatalenate, ebena tepo mibomibo tanalo ega:walo woki temeteme tanalo ebetamo kawonomamo ebo pelameniya.

<sup>38</sup> Ebema: Ya:sute iba:tamo negeni, “Na tepo temeteme kawonomamo iyatawanamo, mako tepo temeteme na anakapuname keba kunula:ka: eba kunula. La: malo nago olowiolo na:pola:nala:.”

<sup>39</sup> Ebene ebete kela:mo toatepanate, ebena ololo opamo niyatinate Godotamo ma kunu na:towetoweoni, “Naimano Nabiwi, a:ma: modoboma: degeaemene, me temeteme kalili nagodone nelawa: Wiyasiya naimano ubia:, a:ma: a:ka:tuwa: a:imano ubila nosiyodila.”

<sup>40</sup> Ebene ebete waloma:tapiatamo da:peni laonalo pulamenate Pitatamo na:pegeni, “Mabu keleka: la:le nago tete da:pesamo olowioa:noma: deda:wenama?” <sup>41</sup> Ebe tetelo Ya:sute ibi nanaleni, “Godotamo olowiolo na:towetoweonala:, mabu la:le Saitanakono kuba gabamo wabuga:ta tanalamo da:ba:gudima. La:imano tepo magumulo wade tanalo osiyodiloma: ubila, wiyasiya la:godolo osiyodiloma: elawo puliyala.”

<sup>42</sup> Ya:sute tete idilo walo ka:tonate Godotamo ma kunu ka:na:towetoweoni, “Naimano Nabiwi, me tepo temeteme kalili a:ma: nagodone laema: gabote itana:no modobola, a:imano ubi ditanamene na ka:nimamo.” <sup>43</sup> Ebene ebete ebe waloma:tapiatamo walo da:ka:peni laonalo ka:pulameni, mabu ibino balidite uma: na:elaolameni.

<sup>44</sup> Ebene Ya:sute netewa-kapiya tetelo ibi walo ka:miyapanate, dopamo ebete towetowe tabo keba kunu ka:negeniyale ebete Godotamo atumu ka:negeni. <sup>45</sup> Ebe tetelo ebete ebe waloma:tapiatamo da:ka:peni iba:tamo na:pegeni, “La: ela amiolo walo beda:ma: ka:kelawenama? Numa:la:, tete a:pe, kubakubapiate Epono Naniwi ibino kotamo nelawa:.” <sup>46</sup> Iyo,



la: nemaimiala:, a na:tolaema:. Numa:la:, na anakapunamepino kotamo iyatinidawate ebe na:pe!”

*Yu Watowatopiate Ya:suko Anakapuima: Delaweniya*  
*Mak 14.43-50; Luk 22.47-53; Yon 18.3-11*

<sup>47</sup> Ya:sute ebe tabo eba genalo Yudasite ebo peni, Ya:sukono 12 waloma:tapino taneba magumulo ebe idila. Ebene eba:go dubu bilibili-nomo epetapiate ibino gowelaono gili ega:walo gaubago da:pelameniya, ebe dubu ebe Godotamo kalimagono ikameopino watowatopi ega:walo Yu epono kawokawo dubu epetapi, iba:te dapaliboleniya ebe dubula. <sup>48</sup> Nanitabola, Yudasite ibi iyalo ma kunu analeni, “Nale daboeteomo, ebe ebe lumagila. La: ebe samonomamo nelawiyala:.”

<sup>49</sup> Ebene Yudasite penate, Ya:sutamo tonomo tonate ebe nanani, “Iyatulamedawa, niyata!” Ebe tetenomolo ebete ebe ebo aboeteoni.

<sup>50</sup> Ya:sute ebetamo negeni, “Namutudawa, a:ma: beda: tanalo osiyodiloma: da:pa:wa:, nosiyodila,” ebene dubu epetapiate Ya:sutamo pelamenate ibino kotamo ebe kodakodanomolo ebo pelaweniya. <sup>51</sup> Ebene Ya:suko waloma:tapi magumulo dubu idite ebene gowelaono gili magoba:nate, Godotamo kalimagono ikameopino Unu Watodawanomono moto wokodawa anagaliminate galo apu ebo mapitamidameni. <sup>52</sup> Wiyasiya Ya:sute ebetamo negeni, “A:imano gili walo na:kemapeda:, mabu gila:mo da:gowelaona walone epetapiate ibi atumu gila:mo kanakapulaema:na:.”

<sup>53</sup> A:ma: iyatawala:ka:, nale ubi iyatite Godoko danamo, ebe tetelo na kowalubinima: ebete ebene 12 taoseni gowelao nopopi kapalibolemene? <sup>54</sup> Wiyasiya nale eba kunu dowagelemo, Godote dopamo ebene Bukamo dakuloliya ebe nanitabo tanalate keba kunu na:kemaimioma:na:? Buka tabote nanitabolo gena me tanalate natamo nemaima:na:!”

<sup>55</sup> Ebe tetelo Ya:sute dubu epetapi bilibilinomatamo negeni, “Na pilo lumagila:ka:, o na gowelaodawala:ka:? Mabu keleka: la:le gowelaono gila:go ega:walo gaubago na lawenema: da:pelama:ema? Na egela epetapilo Godoko Amamateno Iya Motolo eba okolilo epo diyatulamenatimo, la:le na ebolo kelawena:wea:, <sup>56</sup> wiyasiya me tanalo bilibilinomate a:pemaimia, Godokono woki awokalimpiate ebene Bukamo dopamo dakuloliya ebe tabono tanalate nanitaboma: keda:oma:.”

Ebe tetelo ebe waloma:tapi bilibilinomate ebe atepanate gito alautioniya.

*Yu Epono Ka:nisolo Dubate‡ Ya:sukono Tanalo Danagiyamidameniya*  
*Mak 14.53-65; Luk 22.54-55,63-71; Yon 18.13-14,19-24*

<sup>57</sup> Ebe tetelo Ya:suko delaweniya ebe dubate ebe Kayapasikono motamo magataniya, Kayapasiko ebe Godotamo kalimagono ikameopino Unu Watodawanomola. Iba:te Ya:suko ebe motamo magatana:no dopamo Godokono Totomu iyatulamepi ega:walo kawokawo dubu epetapi iba:te pelamenate ebo paladabutiniya. <sup>58</sup> Ebe tetelo Pitate Ya:suko muludopone eba waloma:tanalo, ebete Unu Watodawanomono moto kala magumamo nopeganate atila:piago ebo nokolini. Ebe ubila kebe tanalote Ya:sutamo da:pemaigamene ebe tanalo ebene balida:mo kuminama:. <sup>59</sup> Ebene Godotamo kalimagono ikamepino watowatopi ega:walo Ka:nisolo dubu bilibilinomo epetapiate a:da: tabo gelapi oleniya, Ya:sukono kuba olemenate ebe kanakapuima:. <sup>60</sup> Ebema: tabo gelapi bilibilinomate ebene tanaloma:

‡ 26:56: Buka ka:la:mioledawa, modobola a:ma: me tanalo niyatawa, Ya:suko tetelo Yu epono watowatopi dubu epetapi, ibi me Ka:nisolo dubula. Ebe watowatopiate Yu epono iyaiya tanalo eba anagilamelelamelelo kubakubapiatamo ibino wiya ebo ikalamenakiya, wiyasiya ebe Ka:nisolo dubagodolo elawo kitanamia: lumagi a:eamo aliboma:.



a:da: tabo kiyawaoniya wiyasiya ibino tabo gela magumulo Ka:nisolo dubate Ya:sukono a:e mabuma: kuba idi kuminiya:. Ebene walogabo apuamo netewapiate kapimiya pemaiminate <sup>61</sup> olowiopiatamo na:pegelaniya, “Me dubute ma kunu gi, ‘Naimano elawo modobola Godoko Amamateno Moto anabulimite netewa-kapiya egelalo walo ka:ketemamo.’ ”

<sup>62</sup> Ebene Godotamo kalimagono ikameopino Unu Watodawanomote maiganate Ya:sutamo negeni, “A:ma: tabo gea:noma: beda:ma: keda:wena? Me dubate a:imano tanaloma: degelana keba kunula:ka:?” <sup>63</sup> Ya:sute tabo gea:no Unu Watodawanomote ebetamo walo na:kegeni, “Nale a:ma: Igilo Godokono mailamo nanamata, a:ma: a nanaa:, a:ma: Godokono Gudu Kelisotela:ka:?”

<sup>64</sup> Ya:sute ebetamo nowamini, “A:ma:le ebe ebe geata. Nale la: analemata, nanitabola, la:le na Epono Naniwi aimano Elawodawa Godokono tumudi apulo okolitalo kunaemamota, iyo, walone na Unu Duliyomolone tema magumudo kapawokalamamo!”

<sup>65</sup> Ebema: Unu Watodawanomote ebe tabo olowinate, ebena kawo dowo tanalonomo kawokaliminama: ebete da:pulini ebe lubudino ga:ga: kaliku anagiyamidalenate negeni, “A me dubuno kuba kiyatawaoma: tabo gedawa idi a ubia:nola! Ebete a:ka:tuwa: kuba tabonomo dege la: ebe olowiomata, mabu ebete nege, ‘Na ega:walo Godoko, a kapiyala!’ <sup>66</sup> Ebema: la:imano ubi keba kunula:ka: ebena tanaloma:?”

Ka:nisolo dubate wiya tabo negelaniya, “Modobola ebete na:emene!” <sup>67</sup> Ebene ibi epetapiate kowe ebena ololamo meolenate, ega:walo epetapiate kotamo ebe tatakolo eba anagalimionalo <sup>68</sup> negelaniya, “A:ma: Godokono woki awokalimidawa Kelisoma: nanitabolo deda:wena, a nanaa: a:ma: piyate kanagalimiotana!”

### *Pitate Ya:suko Iyatawa:noma: Degeni*

*Mak 14.66-72; Luk 22.56-62; Yon 18.15-18,25-27*

<sup>69</sup> Ebe tetelo Pitate ebe motono kala magumulo eba okolinalo, woko buwelete ebetamo penate ebe napanani, “A:ma: atumu me Ga:lili opodawa Ya:suago pata:namiata!”

<sup>70</sup> Pitate ibi bilibilinomono ololo apulo negeni, “Ao, a:ma:le degeawena ebe tabo na iyatawa:.” <sup>71</sup> Ebene ebete kala ga:dimi gigiyamo da:toni, ebe tetelo woko buwele idite ebe uminate, ebolo da:pola:niya ebe epo nakapanaleni, “Me dubute Nasaleta duliyomolodawa Ya:suago pata:nami!”

<sup>72</sup> Wiyasiya Pitate ebe atu tabo ma kunu kegeni, “Na Godokono mailamo gemo, na ebe dubu iyatawa:!”

<sup>73</sup> Ebene ebolo da:pola:niya iba:te tete da:pesamo ilukula:tepanate Pitatamo pelamenate ebe walo nakapananiya, “Nanitabola! A:ma: Ya:sukono lumagi idilata, mabu a:imano tabo kiyawao tanalote me tanalo awokalimina, a:ma:le Ga:lili opodawa idima: eda:nata.”

<sup>74</sup> Wiyasiya Pitate negeni, “Godokono dopo apulo utite gemo, nale nani tabo gea:no ebete na kanaginaemene! Nale ebe dubu iyatawa:!”

Ebene ebe tetenomolo kakabate degeoni, <sup>75</sup> Ya:sute ebetamo dopamo kebe tabo kegenile, Pitate ebe tabo ebo malagidiloni, “Kakabate gea:no a:ma:le netewa-kapiya teta:mo na iyatawa:noma: kegema:ta.” Ebene Pitate iyabaiamo tonate kawo tepo temetemenomago iinomo ebo niini.

## 27

*Yu Epono Watowatopiate Ya:suko Paeletetamo\* Demagatiya*

*Mak 15.1; Luk 23.1-2; Yon 18.28-32*

<sup>1</sup> Egelate da:powaloiya Godotamo kalimagono ikameopino watowatopi ega:walo kawokawo dubu epetapi, ibi bilibilinomate tabo gelitiya Ya:suko anakapuima:.<sup>2</sup> Ebene iba:te Ya:suko ala:mo matuomeote Paeletetamo ebo magatiya, ebe Loma epate Yudiya opamo dapalibiya ebe kapela Kawo Elawodubula.

*Yudasite A:ka:tuwa: Ebe Danakapumiya*

*Ali 1.18-19*

<sup>3</sup> Ebe tetelo Yu watowatopiate Ya:suko anakapuima: nopo nanitabonomolo diyatiya, Yudasite ebe tanalo olowiya, ebe Ya:suko ibino kotamo diyatiya ebe lumagila. Ebema: ebete idoko tetelo kebe kuba tanalo kosiyodilonile ebe mabuma: tepo temeteme kawonomoma: eda:lo, ebete 30 siliba mani Yu watowatopiatamo kowadaete na:pegiya,<sup>4</sup> “Na kuba osiyodilonimo. Na tuputupu lumaginomo la:imano kotamo iyatinimo.”

Ebene watowatopiate ebena tabo eba wiyalo negeliya, “Ebe aimano tanalaa:, a:ma: a:ka:tuwa: a:imano tanalola.”

<sup>5</sup> Ebe tetelo Yudasite ebe mani Godoko Amamateno Iya Moto guamo ebo niyaleka:midia, ebene ebete tote ebena kuwokoba:mo ale nema:midaote ebe a:ka:tuwa: ebe ebo nanakapumiya.

<sup>6</sup> Ebema: Yu watowatopiate ebe mani eba uwatolelo ma kunu geliya, “Totomu tabote talena iyatiamena ale me mani Godokono maniago kapiyakobi ka:midilima:, mabu me mani lumagi anakapumi manila.”<sup>7</sup> Ebene iba:te tabo ma kunu iyatiya, “Modobola a me maniamo Kalili Osiyodilodawano Damela kelaemalema:, ebene kapela epate Yelusalema kawo duliomololo da:pa:elaonakoma:na:, ale ibi me damelamo balomonakoma:.”<sup>8</sup> Ebema: ebe tetene wagilimite me teta:mo pemaiga epate ebe damela Kalima Wiya Damelama: ka:mina, mabu dopamo iba:te ebe maniamo lumagi anakapumite ebena kalima opamo ebo ka:ka:liya.

<sup>9-10</sup> Iyalo tetelo Godokono woki awokalimidawa Yelemayate tabo ma kunu giya, “Isalaela epate 30 siliba mani uwatete negeliya, ‘Me Godokono wokodawano wiyala.’ Ebema: Kawodawa Godote na Yelemayako keba kunu kananile epate ebe maniamo kebe tanalo na:kosiyodiloma:na:, iba:te nanitabolo eba kunu osiyodiliya, iyo, iba:te ebe maniamo Kalili Osiyodilodawano Damela lawiya.” Ebema: me tanalo nanitabola, Ya:suko tetelo Yu watowatopiate ebe damela maniamo delawiya, ebe tetelo Godote Yelemayado dopamo degiya ebe tabote nanitabonomoma: ebo ediya.

*Paeletete Ya:sukono Tanaloma: Ebe Dalatediya*

*Mak 15.2-5; Luk 23.3-5; Yon 18.33-38*

<sup>11</sup> Ebene Ya:sute kapela Kawo Elawodubu Paeletekono ololo apulo eba utitalo, ebete ebe ebo alatediya, “A:ma: Yu epono Kawo Elawodubula:ka:?”

Ya:sute negiya, “A:ma:le ebe ebe geata.”<sup>12</sup> Ebene Godotamo kalimagono ikameopino watowatopi ega:walo kawokawo dubu epetapi, iba:te Ya:sukono tanaloma: negelitiya ebete iyaiya kubakuba tanalo osiyodilolenami. Ebe tetelo Ya:sute wiyasiya tabo kegiya:

<sup>13</sup> Ebene Paeletete ebetamo negiya, “Iba:te negelita a:ma: kawokawo kuba tanalo bilibilinomo osiyodiloliata. Ibino tabo gela na:kolowiawita?”

\* 27:: Ya:suko tetelo Loma epate Paeleteko napalibiya Yu epono Yudiya opamo, ebete ibino kapela Kawo Elawodubuma: ka:pada:nama:, ebene ebe opolo Paeleteko kapiyagodolo elawo itanami lumagi a:eamo aliboma:.

<sup>14</sup> Wiyasiya Ya:sute kapiya tabo da:peso idi kegiya:, ebema: kapela Kawo Elawodubute kawonomamo anoaniya.

*Paeletete Ya:suko A:eamo Dalibiya*  
*Mak 15.6-15; Luk 23.13-25; Yon 19.1-16*

<sup>15</sup> Ebe tete epono osiyodilo tanalo ma kunula, ulama bilibilinomo magumulo Yu epono Aduga:la Soliyomu tetelo ibi bilibilinomate idoko motolo kapiya lumagi mailamo deka:minakiya, kapela Kawo Elawodubu Paeletete ebe lumagi ebena kuba wiyane gito alibonaki. <sup>16</sup> Ebe tetelo lumagi idite idoko motolo okolinami, ebena mailo Balabasitela ega:walo ebete keke kawokawo kuba kosiyodiloliyale epo iyatawala. <sup>17</sup> Ebema: epate Paeletetamo dapaladabutiya ebete ibi nanaliya, “La: ubila:ka: nale Balabasiko ebena kuba wiyane gito aliboma:? O la: ubila:ka: Ya:suko, epetapiate ebe Kelisoma: deka:mina?” <sup>18</sup> Paeletete me tabo negiya mabu ebete iyatawiya Yu epo epetapiate Ya:sutamo nekalakalautiya, wiyasiya ibino watowatopiate ebe mabuma: dowate ebe gito magaiya, iyo, iba:godolo nanitabo tanalo puliyala, kitaniya.

<sup>19</sup> Ebe tetelo Paeletete tabo anagiyamida bailo eba okolitalo, ebena kamiyaletete ebetamo tabo eba palibolo na:pegiya, “A:ma: me tuputupu dubunomotamo tanalo idi ako-osiyodilala:, mabu na ka:lo idokolo ebe mabuma: iyolo temeteme kawonomo elawenakamo.”

<sup>20</sup> Wiyasiya Godotamo kalimagono ikameopino watowatopi ega:walo kawokawo dubu epetapi, iba:te tabo gela magumulo epo epetapi bilibilinomatamo elawo ikalamiya, iba:te Paeleteko kanama: ebete Balabasiko igilamo gito alibote wiyasiya Ya:suko kanakapuima:. <sup>21</sup> Ebene kapela Kawo Elawodubute iba:tamo walo na:kegiya, “Me netewapi magumulo nale poka gito nakalibomo?”

Iba:te ebetamo nowamiya, “Balabasiko gito naliba!”

<sup>22</sup> Paeletete iba:tamo negiya, “Me Ya:suko epetapiate ebe Kelisoma: degelana, nale ebe keba kunu nakamitimo?”

Ibi bilibilinomate negeliya, “Kewa olotolowamo tupuguima:wete, ikoko nanagilamolema:!”

<sup>23</sup> Ebene Paeletete negiya, “Beda: mabuma:? Ebete beda: kuba kosiyo-dilile?”

Wiyasiya iba:te kawonomamo gelatepaolo walo na:kegeliya, “Kewa olotolowamo na:tupuguima:!”

<sup>24</sup> Ebe tetelo Paeletete iyatawiya iba:te ebena tabo kelawitiya: wiyasiya gowela tanalote maigiti. Ebe mabuma: ebete obo lawete epo bilibilinomono ololo apulo koto eba ukulalelo negiya, “Me tuputupudawano kalima ka:ka:liya tanalote naimano kubama: a:keda:mene, la: a:ka:tuwa: la:imano kubala!”

<sup>25</sup> Epo bilibilinomate wiyasiya negeliya, “Modobola! Ebena kalima ka:ka:liya mabuma:, a ega:walo aimano guda:go ebe kuba wiya kelae-malema:!”

<sup>26</sup> Ebema: Paeletete Balabasiko idoko motone gito alibiya, ega:walo ebete gowelaopi nanaliya iba:te Ya:suko pa:ka:pa:ka:mo ka:na:ma:ga:midaoma:. Ebene ebe tanalo dolopoligiya ebete Ya:suko gowelaopiatamo gito ikalamiya, iba:te ebe kewa olotolowamo tupuguimate ikoko kanagilamolema:.

*Gowelaopi Dubate Ya:suko Dekalakatitiya*  
*Mak 15.16-20; Yon 19.2-3*

<sup>27</sup> Ebe tetelo Paeletekono gowelaopi dubate Ya:suko Loma gabamanino kawo moto guamo magatate ibino gowelaopino taneba dubu bilibilinomate iba:go ebo naladabutiya. <sup>28</sup> Iba:te Ya:suko eba kalakalatelo ebenu kalikunomo pekanamete wiyasiya wiya kawonomo kalimakalima kaliku ebetamo ebo pulimiya. <sup>29</sup> Ebene iba:te moeagono ale nelawete anagogobeyamidaolo a:dete Ya:sukono watamo gito pulimiya, ega:walo iba:te gaubu ebenu tumudi kotamo iyatimiya, kawo elawodubuno elawo awokalimino gaubu keba kunula:ka: eba kunu. Ebe tetelo iba:te ebe kalakalatelo ibino pupamo ilukulite ebetamo eba tudila:olo negeliya, “Eiye! Yu epono Kawo Elawodubu, a:ma: niyata!” <sup>30</sup> ebenu iba:te ebetamo kowe meolete, ebenu gaubu laemete watolo ebo anagalimiya. <sup>31</sup> Iba:te ebe kalakalate dolopoligiya, kalimakalima kaliku ebenu apene pekanamete ebenu kalikunomo walo gito ka:pulimiya, ebenu iba:te ebe a:e baiamo nemagatiya kewa olotolowamo ebe ka:na:tupuguima:.

*Gowelaopiate Ya:suko Kewa Olotolowamo Da:tupuguimiya*

*Mak 15.21-32; Luk 23.26-43; Yon 19.17-27*

<sup>32</sup> Iba:te kawo duliomolone eba tolamitalo gowelaopiate Sailiniya duliomolo dubu idi Saimonoko numite ebo nelawiya Ya:sukono kewa olotolowa kaguwataema: <sup>33</sup> Ebene iba:te Gologota damelamo nemaimiya, ebe damelano mailo magumu ebe ‘Wato Goala.’ <sup>34</sup> Ebolo iba:te elawo da:imi obo ega:walo temeteme olowia:no kaka mulamula adabulatelete Ya:sutamo dikamiya, ebete kela:mo alatipite gito atepiya.

<sup>35</sup> Ebe tetelo gowelaopiate ebe kewamo tupuguimite ikoko ebo anagilamolemiya, ebenu iba:te ebenu kaliku iyaiya alabaoema: nokola egege iyalekeolo kalakala tanalo osiyodilote, <sup>36</sup> opolo ilukulite ebe ebo umitiya.

<sup>37</sup> Ebe tetelo iba:te Ya:sukono wato unu apuamo ebenu a:e mabu awokalima: tabo ma kunu akuloliya, “Me Ya:suko ebe Yu epono Kawo Elawodubula,” <sup>38</sup> ega:walo iba:te pilo dubu netewa Ya:suago iyaiya kewamo akotupuguilamiya, idi tumudi apuamo, idi pele apuamo.

<sup>39</sup> Ebene piyate ebe gabodo da:petolamitiya iba:te Ya:suko malogolo nekalakalatitiya, iyo, iba:te ibino wato wadegelatelelo <sup>40</sup> negelitiya, “Eiye! A:ma: Godokono Moto anabulima:wete netewa-kapiya egelalo walo etema: degeawia, a:ma: ebe lumagilata! A:ma: a:ka:tuwa: a:imano igilo na:mula:! A:ma: Godokono nani Guduma: deda:wena, a:ma: kewa olotolowa ununa:piwisiga!”

<sup>41</sup> Ebe tetelo Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi, iba:te Ya:suko atumu kalakalatelo na:kegelitiya, <sup>42</sup> “Ya:sute epo epetapino olalati tanalo mula:lalamanaki, wiyasiya ebe a:ka:tuwa: ebenu igilo mula:ma: modoboa:! Ebete Isalaela epono nani Kawo Elawodubuma: deda:na, modobola ebete kewa olotolowa ununa:piwisigana, iyo, ale ebe tanalo umite ebe nanitabokobi ebo ka:midimalema:! <sup>43</sup> Ebete negenako, ‘Na Godoko nanitabokobi na:midinamo, ega:walo na ebenu Gudula,’ ebema: Godote ebetamo nekalakalataleka: ebete ebenu igilo ba:mula:mena:!”

<sup>44</sup> Ebe tetelo eba:go da:tupuguilamiya, ebe pilo dubu netewate atumu Ya:suko malogolo kuba tabo na:kegelitiya.

*Ya:sute Da:eni*

*Mak 15.33-41; Luk 23.44-49; Yon 19.28-30*

<sup>45</sup> Ebene egelate tuli teta:mo dutiya opo kawonomote ebo idokiya. Ebe tetelo idokote egelano alo eba mula:lo egelate a:iwate kela:mo a:niwisigatepani, egela tuli tetene wagilimite 3 koloko uwomuamo.

<sup>46</sup> Ebene Ya:sute Yu epono tabamo kawonomamo negeni, “Elai, Elai, lama sabakatani?” me tabono magumu ma kunu itana, “Naimano Godo, naimano Godo, na a:ma:le beda:ma: katepana:wa:?”

<sup>47</sup> Epetapi ebolo da:pola:niya iba:te ebenu tabo olowinate negelaniya, “Me dubute Elayako ebe ka:mina!” <sup>48</sup> Ebe tetenomolo ibi magumulo kapiya dubute na:puliganate, umago kaka da:imi obamo naduba:midanate pudamo namogotenate Ya:sutamo ebo nikameni.

<sup>49</sup> Wiyasiya epetapiate negelaniya, “Iyaiya, a kuma:tepiye! Elayate pete ebenu igilo da:ba:pa:mula:emene.” <sup>50</sup> Ebe tetelo Ya:sute kawonomamo walo kegepatenate a:enomo ebo a:eni.

<sup>51</sup> Ebene Godoko Amamateno Iya Motono kaliku ubilite tulituliya bolegale unune wagiliminate opamo ebo piwisigani, ega:walo mumulte da:peni iyaiya maboele nokola damelate eba bolaliyaolenalo, <sup>52-53</sup> epo epetapino a:elao bobote a:ka:tuwa: ebo bolaliyaoleniya. Ebema: nanitabola, Ya:sute a:e magumune da:kemaigiya, ebe atu tetelo kebe tuputupupiate dopamo da:elaiya Godote ibi epetapi a:e magumune atumu eba kowadipalatelelo, iba:te ibino iyaiya nokola bobo magumune ibino apa:go ebo pemaimiya, iyo, iba:te Yelusalema kawo duliyaomolamo nemaimiote ibi a:ka:tuwa: ibino tanalo epatamo ebo nawokalilamoliya.

<sup>54</sup> Ebene gowelaopino elawodubu ega:walo ebenu opopi magumulo piyate Ya:sukono a:e tanalo duminiya, iba:te mumulu ega:walo anoano tanalo epetapi eba ulamenalo kawo tole tanalonomago negelaniya, “Nanitabola, me lumagi ebe Godokono Gudula!”

<sup>55</sup> Ebe tetelo kamiyaale epetapi bilibilinomate Ya:suko uima: mulune putitaniya, Ya:sute Ga:lili opone Yelusalema kawo duliyaomolamo da:tiya iba:te ebe eba waloma:talo ebe wadenomamo walubinatiya. <sup>56</sup> Ebe kamiyaleno taneba magumulo Magadala duliyaomolodawa Ma:liki, ega:walo Ma:li idi ebenu gudi netewa Ya:imesiko ega:walo Yausesiko, ega:walo Sebedikono kamiyaale ebete ebenu gudi netewa dalailamiya, miba:te pola:niya.

*A:limitiya Duliyaomolodawa Yausepete Ya:sukono Ape Nokola Bobo Magumamo Diyatini*

*Mak 15.42-47; Luk 23.50-56; Yon 19.38-42*

<sup>57</sup> Adimo tetelo inamabu bilibilinomago dubu idite na:peni, ebenu mailo Yausepete A:limitiya duliyaomolodawala, ebe Ya:suko waloma:tadawa idila.

<sup>58</sup> Ebe tetelo ebe dubute Paeletetamo tonate Ya:sukono ape lawenama: ebe dananani, Paeletete ebenu gowelaopi ebo nanaleni iba:te ebetamo kika:menama:. <sup>59</sup> Ebene ebete Ya:sukono ape lawenate oli keyakeya kalikamo aputinate <sup>60</sup> bobo magumamo ebo niatini, ebe bobo ebe oli bobola, epate maboele nokola damela eba obobolo Yausepekonoma: iyalo osiyodilomiya. Ebe tetelo Yausepete kawo nokolanomo mupiamidanate bobo gigiyu nemopinate gito toni, <sup>61</sup> ebenu Magadala duliyaomolodawa Ma:liki ega:walo Ma:li idi, iba:te nokola bobo apulo eba okolionalo Yausepekono osiyodilole tanalo ebo ulamelemeniya.

*Gowelaopiate Ya:sukono Bobo Datiliya*

<sup>62</sup> Egela idi ebe Yu epono wokoa: egelala. Ebe tetelo Yu watowatopi ega:walo Pa:lisi tanebapi epetapi iba:te Paeletetamo tolamete <sup>63</sup> ma kunu negeliya, “Kawodawa, ebe elemasigi dubu Ya:suko ebete a:ea:no dopamo negi, ‘Netewa-kapiya egelalo na a:ene ka:kemaigamamo.’” <sup>64</sup> A me tanalo eba malagidilolo, a ubila a:ma: tabo negea gowelaopiate ebe nokola bobo netewa-kapiya egelalo wadenomamo katila:ma:, mabu diyala, ebenu



waloma:tapiate ebena ape pilolo da:ba:pelaema:na; ebene iba:te ma kunu kegelama:na; ebete a:ene a:kemaigi. Numa:, dopo elemasigi tabote a teme-teme ikaeami, wiyasiya kebe tetelo epate me elemasigi tabo idi nanitaboma: da:midima:na; aimano temeteme tanalote kawonomoma: keda:mene.”

<sup>65</sup> Paeletete iba:tamo negiya, “Modobola, la: bobo bai wadenomamo atila:ma: naimano gowelaopi epetapi nuwata:la:. Ebene la: a:ka:tuwa: la:godolo wade woki da:pola:namene, la: eba kunu nosiyodiliyala:.”

<sup>66</sup> Ebema: iba:te bobo baiamo tolamete, bobo demopiya ebe nokola unamo pukala ebo niyatiya epate ologikapoma:, ebene iba:te bobo atila:ma: gowelaopi ebo miyapiya.

## 28

### *Ya:sute A:ene Walo Da:kemaigiya*

#### *Mak 16.1-10; Luk 24.1-12; Yon 20.1-10*

<sup>1</sup> Ebene Yu epono woko: talena egela dolopoligiya, Sande egelate eba waloutalo, Ma:li Magadala duliomolodawa ega:walo Ma:li idi, iba:te kamiyalet epetapiago nokola bobo uima: ebo tolamiya. <sup>2</sup> Wiyasiya iba:te bobo baiamo nemaimia:no, dopamo kawo mumulunomote piya, ebene Kawodawa Godokono nopodawate Unu Duliomolone piwisigate, bobo demopiniya ebe kawo nokola balamo pinimupiamidate ebe nokola unulo okoliti. <sup>3</sup> Ebena ololo molete da:la:uwa:mida keba kunula:ka: eba kunula, ega:walo ebena pupuliono inamabuata keyakeyaibinomoma: eba eda:omelo ebo pukuilamiti. <sup>4</sup> Ebe mabuma: bobo bai atila:pi dubate toletoleolo eba anakamiolo opamo gudite a:elaopimu polamota:oniya.

<sup>5</sup> Godokono nopodawate wiyasiya kamiyala:tamo negiya, “La: akotoletolela:la! Na iyatawala, la:le Ya:suko epate ebe kewa olotolowamo da:tupuguimiya, ebe waditamata. <sup>6</sup> Ebe malo puliyala mabu ebe emaigaka, ebete dopamo degi eba kunu! La: pelama:wete ebete dekapitani ebe bai na:puma:la:. <sup>7</sup> Ebene la:le ebena waloma:tapi samonomamo nananala:la:, ‘Ya:sute a:e magumune emaigaka. La: nolowiala:, ebete Ga:lili opamo dopamo ka:tomene, la: tolama:wete ebe ebo ka:nuimamota. Nanitabola, na Godokono nopodawate me tanaloma: la: dopamo analemata.’ ”

<sup>8</sup> Ebema: iba:te bobo bai samamo atepate, kawo tole ega:walo kalakala tanalote ibi eba uwatelo, iba:te eba kunu puila:iya Ya:sukono waloma:tapi kananalema:

<sup>9</sup> Iba:te eba tolamelo ebe tetenomolo Ya:sute iba:go alugote iba:tamo negiya, “Niyaniyata!” ebene iba:te ebena dopo apulo opamo na:gudite ebena agowa eba na:wiyamidalemelo ebe ebo namamatiya. <sup>10</sup> Ya:sute iba:tamo negiya, “La: akotoletolela:la. La: tolama:wete, na dowaloma:enena ebe naimano ekaki nananaliyala: iba:te Ga:lili opamo na:tolaema:na:. Iba:te na ebo ka:nunaema:na:.”

### *Nokola Bobo Atila:pino A:da: Tabo Gela Tanalo*

<sup>11</sup> Ebene kamiyala:te Ya:sugodone eba tolamitalo, nokola bobo atila:pi gowelaopiate kawo duliomolamo tolamete Godotamo kalimagono ikameopino watowatopi ebo nanaliya, bobo bailo demaimiya ebe tanalo bilibilinomo. <sup>12</sup> Ebene ebe watowatopiate Yu epono kawokawo dubu epetapiago naladabutite tabo ebo niyatiya gowelaopiatamo kawokawo mani kikalamolema:. <sup>13</sup> Iba:te eba ikalamolelo negeliya, “La: epo masigililo a:da: tabo ma kunu na:negeliyala:, ‘Idokolo ale eba laonalo Ya:suko waloma:tapiate pelamenate ebena ape pilolo ebo pelawa:diganiya.’

<sup>14</sup> Ega:walo la: woki bilibilima: akoeda:oala:, mabu kapela Kawo Elawodubu



Paeleteko me u lao tabo dolowimene, ale ebe ka:negelebadimimalema: ebete la:tamo kuba wiya ikalamekapoma:.”

<sup>15</sup> Ebene gowelaopiate ebe mani uwatete, Yu watowatopiate keba kunu kegeliye iba:te eba kunu osiyodiliya, ebe mabuma: ebe a:da: elemasigi tabote Yu epono duliyomolo epetapi bilibilinomamo tiya, ka:lo ebe tabote iba:godolo bitana, kolopoligona:.

*Ya:sute Uwomu Tabo Ebena Waloma:tapiatamo Da:kiyawaiya*

*Mak 16.14-18; Luk 24.36-49; Yon 20.19-23; Ali 1.6-8*

<sup>16</sup> Ebene Ya:sukono 11 waloma:tapiate Ga:lili opamo gito tolamiya, Ya:sute ibi dopamo danaliya ebe damela ununomamo. <sup>17</sup> Iba:te ebe numite ebe ebo namamatiya, wiyasiya ebolo da:pola:niya ibi epetapiate woki bilibilima: eba eda:utalo nanitabokobi ka:miditiya: <sup>18</sup> Ebene Ya:sute iba:tamo pete ibi ma kunu panaliya, “Godote iyalo tetelo elawo kawonomo natamo ikanamiya, ebena Unu Duliyomololo ega:walo me opo kawonomolo ebena ubi tanalo bilibilinomo kosiyodilolenama: <sup>19</sup> Ebema: la: me opono iyaiya epo bilibilinomatamo tolama:wete ibi na waloma:enepima: na:na:midiliyala: Ma kunu la:le ibi Nabiwi Godokono mailamo, ega:walo ebena Guduno mailamo, ega:walo ebena Talena Uliyanano mailamo obamo na:nowaduba:midaoliyala:, <sup>20</sup> ega:walo nale la: diyatulamoletiana, ebe tanalo bilibilinomo la:le ibi na:niyatulamoliyala: iba:te naimano tabamo ka:tudila:oma: Umu numita:la:! Na uwomua: tetelo la:go bokolinamo, me opono uwomu tete da:nemaigamene ebe teta:mo.”

## YA:SUKONO WADE TABO MAKATE AKULOLIYA

*Yoneko Epo Obama Waduba:midaoledawate Godokono Tabo Da:kiyawaiya*

*Ma:t 3.1-12; Luk 3.1-18; Yon 1.19-28*

<sup>1</sup> Ya:su Kelisoko ebe Godokono Alibodawala ega:walo ebene Gudula, ebene Ya:sukono Wade Tabo dowagilimiya me ebe mabula.

<sup>2</sup> Nanitabola, Godote dopamo ebene woki awokalimidawa Aisayado Kelisokono pe tanaloma: ebene Bukamo tabo ma kunu akuloliya,

“Nale Kelisokono dopo apuamo  
naimano tabo atadawa kapalibomamo,  
ebete ebene gabo ka:posiyodiloma:.”

<sup>3</sup> Iyo, lumagite bulu opolo  
tabo ma kunu kawonomamo ka:pegemene,  
‘Kawodawano gabo nosiyodiloma:la:  
Ebene gabo na:tupugaima:la:!’ ”

<sup>4</sup> Ebe mabuma: Yonete pemaigiya. Ebete epo bulu opolo obama eba powaduba:midaolelo, Godokono tabo ma kunu pa:kiyawaiya, “La:imano kubane olobila:wete obama aduba:mida tanalo laema: na:pelama:la:, ebene Godote la:imano kuba egebolelametate ka:dodolomatililaema:ta.” <sup>5</sup> Ebema: epo bilibilinomate Yudiya opone ega:walo Yelusalema kawo duliyaomolone tolamiya Yonekono tabo olowioma:, ebene iba:te ibino kuba danawokalilamoliya, Yonete ibi Yodane Kolomolo obama ebo waduba:midaoliya. <sup>6</sup> Ebe tetelo Yonekono okoli tanalo ebe epo epetapino ilukuli tanalo keba kunula:ka: eba kunua:, mabu ebete ka:molo-goeo ipo kuba kaliku kau-goeo tama batago pulinaki, ega:walo ebene bae siguniya ega:walo molo naonaki.

<sup>7</sup> Yonete Godokono tabo eba pa:kiyawaolo negiya, “Lumagi idite naimano walogabo apune ba:pena. Ebene elawo kawonomola, naimano elawo nodoliona, ebema: na wadenoa: nale opamo tuduwatate ebene agowa ukulaolema:.” <sup>8</sup> Nale la: obama waduba:midaolemata, wiyasiya ebete Godokono Uliyanamo la: ka:powaduba:midaolema:ta.”

*Yonete Ya:suko Obama Daduba:midiya*

*Ma:t 3.13-17; Luk 3.21-22*

<sup>9</sup> Ebe tetelo Ya:suko Ga:lili opono Nasaleta duliyaomolone pete, Yonete Yodane Kolomolo ebe obama ebo aduba:midiya. <sup>10</sup> Ya:sute obone eba pidiwilo, ebe tetenomolo Godote ebene Unu Duliyaomolo a:iyamiditalo ebo umiya, ebene ebete Godokono Uliyana umiya ebetamo bigo olamu da:piwisigiti. <sup>11</sup> Ebene tabote Unu Duliyaomolone ma kunu piwisigiya, “A:ma: naimano kapiya Gudunomolata. Na a:ma:tamo nekalakalitamo.”

*Saitanate Ya:suko Kuba Gabamo Kowabuga:tama: Ebetamo Da:pemaigiya*

*Ma:t 4.1-11; Luk 4.1-13*

<sup>12</sup> Ebe tetenomolo Godokono Uliyanate Ya:suko bulu opamo nemagatiya, <sup>13</sup> ebene ebete bulu opolo 40 egelamo eba nokolilo, Saitanate kuba gabamo kowabuga:tama: ebetamo ebo pemaigiya. Ebolo iyaiya elawoelawo inamabuate na:pola:niya, wiyasiya Godokono nopopiate ebe na:buiyatitiya.

*Ya:sute Ebedo Woko Dowagilimiya*  
*Ma:t 4.12-17; Luk 4.14-15*

<sup>14</sup> Ebene gabamaniate Yoneko idoko motamo diyatiya, ebe tetelo Ya:sute Ga:lili opamo Godokono Wade Tabo kiyawaoago ebo piya. <sup>15</sup> Ebete na:pegiya, “Wade tete a:pe. Godokono Kawo Elawodawama: eda: tete tatalila, ebema: la:imano kubane olobila:wete Wade Tabo nanitabokobi na:mida:la:.”

*Ya:sute Namu Uwatolepi Netewa-netewa Duwatiya*  
*Ma:t 4.18-22; Luk 5.1-11*

<sup>16</sup> Ebene Ya:suko Ga:lili Paka: balado eba tonatolo, ebete namu uwatolepi netewa ebo nulamiya, Saimonoko ega:walo ebene ekawi A:nduluko iba:te namu kamauamo na:utiya. <sup>17</sup> Ya:sute iba:tamo negiya, “La: na nowaloma:ena:la:, ebene nale la: epo uwatepima: ka:midilimamota.” <sup>18</sup> Ebe tetenomolo iba:te ibino kamau miyapate Ya:suko ebo waloma:tiya. <sup>19</sup> Ebene Ya:sute kela:mo walo ka:tote Sebedikono gudu Ya:imesiko ega:walo ebene ekawi Yoneko ebo ka:nulamiya, iba:te ibino pelo okoliutalo kamau osiyodilolitiya. <sup>20</sup> Ya:sute ibi deka:la:miya, ebe tetenomolo iba:te ibino nabiwi Sebediko atepate Ya:suko ebo waloma:tiya, wiyasiya ibino nabiwino mani woko dosiyodilonamiya ebe dubu epetapiate eba:go pelo ilukulitiya.

*Ya:sute Kuba Uliyanagono Dubu Wadekobi Da:midiya*  
*Luk 4.31-37*

<sup>21</sup> Ebe tetelo Ya:sute ebe waloma:tapiago Kapeniyama duliyaomolamo tolamiya. Ebene Yu epono wokoa: talena egelalo ebete ibino balidi ibilamole motamo tote ibi da:niyatulamiti, <sup>22</sup> iba:te ebene tabamo nanoanoutiya, mabu ebete Godokono elawamo iyatulamiti wiyasiya ebe ibino Godokono Totomu iyatulamepi keba kunula:ka: eba kunua:.

<sup>23</sup> Ebe atu tetelo kuba uliyanagono dubute ibino balidi ibilamole moto gulo nokoliti, <sup>24</sup> ebene ebete geatepaolo negiya, “Ya:su Nasalete duliyaomolodawa, a:ma: atamo beda: tanalo na:kosiyodilaemene? A:ma: a kubaiaema: ka:pa:wa:? Eiye, na iyatawala a:imano tanalo, a:ma: ebe Godokono Wade talena Dawalata!”

<sup>25</sup> Ya:sute wiyasiya ebe kawiya aniya, “A:ma: kodakodawete, ebegodone na:nemaiga!”

<sup>26</sup> Ebene kuba uliyanate geatepaoago ega:walo wageleago dubuno apene da:penemaigiya, <sup>27</sup> epate ebe tanaloma: nanoanoutiya. Idite idi ananaki, idite idi ananaki, “Me beda:la:ka? Me iya oli iyatulame tanalola:ka? Me dubuno elawo kawonomola! Numa:la:, kuba uliyanate ebene tabamo a:tudila:!” <sup>28</sup> Ebema: nanitabola, ebe atu egelalo Ya:sukono woko osiyodilo tabote ebe Ga:lili opo kawonomamo gito tiya, iyo, piyate ebolo dilukulionamiya ibi bilibilinomate ebene tanaloma: tabo ebo na:kiyawaiya.

*Ya:sute Saimonokono Moto Lapino Wadekobi Da:midiya*  
*Ma:t 8.14-17; Luk 4.38-39*

<sup>29</sup> Ebene Ya:imesiko Yoneko iba:te Ya:suago Yu epono balidi ibilamole motone pemaimite, Saimonoko A:nduluko ibi netewapino motamo tolamenomo tolamiya. <sup>30</sup> Ebolo Saimonokono moto lapino ape enaena gabugabuago watiti, ebene epate me kamiyaleno tanaloma: Ya:suko ebo aniya. <sup>31</sup> Ebema: Ya:sute ebetamo pete ebe kotamo dapadipatiya ebene gabugabute nolopoligiya, ebene ebe kamiyaletete maigate ibi mabuma: bae okalimi woko ebo wagilimiya.

*Ya:sute Temetema:gopi Bilibilinomo Wadekobi Da:midiole*  
*Ma:t 8.16-17; Luk 4.40-41*

<sup>32</sup> Eba adimonalo egelate da:niwisigani, duliyo molo epate temetema:gopi bilibilinomo ega:walo kuba uliyana gopi Ya:sutam o ebo magaeleniya, <sup>33</sup> ebene ibi epetapi bilibilinomate moto gigiyu dopo apulo pepola:niya. <sup>34</sup> Ebe tetelo Ya:sute ibi magumulo iyaiya temetema:gopi epetapi bilibilinomo wadekobi midiole, ega:walo kubakuba uliyana bilibilinomo epetapi agodone ebo aliboleni. Ebe kuba uliyana iyatawala Ya:suko ebe Godogodone piya, ebema: iba:te ebene tanalo kawokalima: ebete tabo gela talena ebe iyatilam eni.

*Ya:sute Ga:lili Opo Kawonomolo Godokono Tabo Da:na:kiyawaonaki*  
*Luk 4.42-44*

<sup>35</sup> Ebe idoko tetenomolo walo apuamo Ya:sute ebene u wata baine maiganate, ebe a:ka:tuwa: diyamo a: opamo tonate Godago tabo ebo na:kiyawaoniya. <sup>36</sup> Ebene duiyalo Saimonoko ega:walo ebene namutupi iba:te Ya:suko wadima: da:tolamiya, <sup>37</sup> iba:te ebe numite nananiya, “Epo bilibilinomate a:ma: waditata.”

<sup>38</sup> Ebema: Ya:sute iba:tamo negiya, “Kuba:, a ka:tolamiye. Nale duliyo molo epetapilo Godokono tabo ka:na:kiyawaomamo, mabu na ebema: piyamo.”

<sup>39</sup> Ebe tetelo ebete Ga:lili opono duliyo molo bilibilinomamo tonaki, ebene ebete Yu epono balidi ibilamole moto gulo Godokono tabo kiyawaolamenaki ega:walo ebete kuba uliyana epagodone akalibolenaki.

*Ya:sute Kukulakukulago Dubu Wadekobi Da:midiya*  
*Ma:t 8.1-4; Luk 5.12-16*

<sup>40</sup> Ebene kukulakukulago dubute Ya:sutam o pete ebene pupamo pokolite ebetamo kawiya eba petowetoweolo na:pegiya, “A:imano ubi ditametana, a:ma:le na wadekobi ka:midinima:ta.”

<sup>41</sup> Ya:sute ebe kawonomamo nilakapoimilo ebene koto uwamidate ebe ologilo naniya, “Na ubila, a:ma: wadekobi nolowia!” <sup>42</sup> ebema: ebe tetenomolo kukulakukula temetemetete ebegodone olopoligote ebe wadekobi ebo olowiya. <sup>43</sup> Ebene Ya:sute ebe eba alibolo kawonomamo ma kunu aniya, <sup>44</sup> “A:ma: naimano tanaloma: epo akonanala:la:. Modobola a:ma: wiyasiya me tetenomolo toawete a:imano ape Godotamo kalimagono ikameodawatamo nanawokalimiye, ebene kalimagono nilakapo inamabu Godotamo akona:nikamiye, Mosesete da:kiyawaiya eba kunu. Ebe tanalote epo kiyatulaemene a:imano temetemetete olopoligi.”

<sup>45</sup> Wiyasiya ebe dubute eba tolo epo bilibilinomo na:kiyawaolamenatiya, ebema: Ya:sute duliyo molo epetapiamo awokala toma: ka:modobiya:. Ebe tetene wagilimite ebete wiyasiya bulu opolo okolinami, ebene apune apune epate ebetamo pelamenakiya.

## 2

*Ya:sute Ape Kodakoda Temetema:go Dubu Wadekobi Da:midiya*  
*Ma:t 9.1-8; Luk 5.17-26*

<sup>1</sup> Ebene egela epetapi dolopoligiya Ya:sute Kapeniyama duliyo molamo walo na:ka:piya. Ebete ebene motolo dokoliti epate olowiya, <sup>2</sup> ebema: ibi epetapi bilibilinomate da:pelamiya, moto gulo ega:walo gigiyu dopo apulo tete idi kitaniya:. Ebe tetelo Ya:sute Godokono tabo iba:tamo eba kiyawaotalo, <sup>3</sup> netewa-netewa dubate ape kodakoda temetema:go dubu ebetamo ebo aguwatiya. <sup>4</sup> Mabu epo bilibilinomate ebolo na:pola:niya, ebe dubate Ya:suko niyakabamo tolaema: gaboa:nola. Ebema: iba:te

moto unamo nodolote, Ya:sute kebo kutitiyale iba:te ebe moto unu anabulimite temetema:go dubu ketago Ya:sutamano ebana nuwamidiya. <sup>5</sup> Ya:sute ibino nanitabokobi midi tanalo umilamete temetema:go dubutamo negiya, “Naimano namutudawa, Godote a:imano kuba egebolemetate a:dodolomatilima:ta.”

<sup>6</sup> Wiyasiya Godokono Totomu iyatulamepi epetapi ebolo da:pola:niya, iba:te ebe tabo olowite ibino tepo magumulo ma kunu malagidilolitiya, <sup>7</sup> “Me dubu amamago kuba tabo beda:ma: kegele Godokono ololo apulo? Kuba egeboledawa potelela:ka? Ebe Godoko kapiyatela!”

<sup>8</sup> Ebe tetenomolo Ya:sute iyatawiya iba:te beda: tanaloma: woki kalomutiye, ebema: ebete iba:tamo negiya, “Mabu keleka: la:imano tepo magumulo me tanalo demalagidilola:witama? <sup>9</sup> Me tabo kodakodala:ka: nale me temetema:go dubutamo gema:, ‘Godote a:imano kuba egebolemetate a:dodolomatilima:ta?’ O me tabo idi gema: kodakodala:ka:, ‘Maigawete, a:imano keta lawa:wete na:toa?’ <sup>10</sup> Ebema: nale la: kiyatulaemamota, Epono Naniwigodolo\* elawo bitana me opolo epono kuba egebolelamete ka:dodolomatililaema:.” Ebene ebete ape kodakoda temetema:go dubutamo negiya, <sup>11</sup> “Nale a:ma: anamata, nemaiga! A:imano keta mokopiamidawete motamo na:toa.”

<sup>12</sup> Ebe tetelo ibi bilibilinomate ebe eba umitalo, me dubute maigate ebene keta lawete samonomamo ebo tiya, ebema: iba:te nanitabonomolo anoanolo negeliya, “Godoko unamo nadipata:la:. A dopamo mako tanalo kuminakia:!”

*Ya:sute Libaiko† Deka:miya*

*Ma:t 9.9-13; Luk 5.27-32*

<sup>13</sup> Ebe tetelo Ya:sute Ga:lili balamo walo na:ka:tiya, ebene epo bilibilinomate ebetamo da:pelamiya, ebete ibi ebo iyatulamoliya. <sup>14</sup> Ebene ebete eba petonatolo A:lapiyasikono gudu Libaiko ebo numiya, ebe ta:kese uwatedawala, ebete ebene woko bailo okoliti. Ebe tetelo Ya:sute ebetamo negiya, “Na nowaloma:ena:,” ebene ebete maigate Ya:suko nowaloma:tiya.

<sup>15</sup> Ebene tete da:peso da:petiya Ya:sute ebe waloma:tapiago Libaikono motolo ilukulite bae eba nautalo, ta:kese uwatepi ega:walo Godokono Totomu uwatea:pi epetapi iba:go na:pola:niya, mabu nanitabola, makomako epo bilibilinomate Ya:suko waloma:tiya. <sup>16</sup> Ebema: Pa:lisi tanebapino‡ totomu tabo iyatulamepi epetapi iba:te ebe tanalo dumiya, iba:te Ya:suko waloma:tapiatamo negeliya, “Ebete ta:kese mani elemasigilo uwatepi ega:walo Godokono Totomu uwatea:piago bae beda:ma: kenanakole?”

<sup>17</sup> Ya:sute ebe tabo olowite iba:tamo negiya, “Modobo epate doke-tatamo a:ka:tolaema:na:, wiyasiya gabugabuagopiate ka:tolaema:na:. Iyo, piyate a:ka:tuwa: degelana ‘A modobo epola,’ na ebako epo uwatema:ka:piya:. Na wiyasiya kubakuba epo kapiya uwatema: piyamo, iba:te na kowaloma:enema:.”

*Godokono Woko Osiyodiloma: Bae Naoa:no Pola:na Tanalo*

*Ma:t 9.14-15; Luk 5.33-35*

\* **2:10:** Epono Naniwi ebe Ya:sukono mailo idila. Ebe a epo bilibilinomono Naniwila, atumu Godoko ebe aimano Nabiwila. † **2:12:** Buka ka:la:mioledawa, modobola a:ma: me tanalo niyatawa, Libaikono mailo idi ebe Ma:tiyutela. ‡ **2:16:** Ya:suko tetelo Pa:lisi epo ebe Yu epono taneba idila. Godote ibino ewoniatamo Mosesedo dikalamiya ebe Totomu Tabo, ega:walo ibino ewoniate a:ka:tuwa: kebe iyaiya tanaloma: kawokawo pukalama: degelanamiya, Pa:lisi epate ebe tanalo bilibilinomamo wadenomamo tudila:onamiya, ebene iba:te epo ma kunu eba iyatulamenalo, piyate ibino tabamo tudila:oa:no iba:te ibi kubakubapima: gelate iba:go kaladabutinakia:.

<sup>18</sup> Tete idilo Yoneko waloma:tapi ega:walo Pa:lisi taneba watowatopino waloma:talepi iba:te bae naoa:no pola:niya. Ebene epo epetapiate Ya:sutamo pelamete ebe napalatediya, “Keleka: mabu Yoneko waloma:tapi ega:walo Pa:lisi tanebapi iba:te iyaiya tetelo bae naoa:no da:pola:nanaka Godokono woko osiyodiloma:, wiyasiya a:ma: waloma:tapiate bae naoa:no ka:pola:nanakoa:?”

<sup>19</sup> Ya:sute iba:tamo negiya, “Dubute kamiyale daidimene, ebe tetelo ebena namutupiate soliyomu bailo baea:no gito ba:ka:pola:nama:na? Ao, modoboa:! Ebete iba:go eba pola:nalo soliyomu bae kapimiya kenaoma:na. <sup>20</sup> Wiyasiya kamiyale oli aidi dubute ebena kamiyale duliyaomolo ida:mo magata tete na:pe, nanitabola, ebe egelalo ebena namutupiate ibino tepo temeteme tanaloma: bae naoa:no ka:pola:nama:na. Ebema: numa:la:, me tete ebe la:imano kalakalago bae nao tetela mabu nale la:go bokolinamo.”

*Tagala Okoli Tanalo Ega:walo Oli Okoli Tanalo*

*Ma:t 9.16-17; Luk 5.36-39*

<sup>21</sup> Ebene Ya:sute tabo moga:melo walo na:kegiya, “Lumagite oli kaliku apu tagala kalikuno bolegala:mo a:kowaluomene. Ebete ma kunu dosiyodilomene, oli kaliku apute tagala kaliku kanagiyamidalemene, ebena bolegalete kawonomoma: keda:mene. <sup>22</sup> Atu gabodo lumagite tagala gautu-goeo tama kalila:mo oli da:imi obo akalatemene, mabu oli da:imi obote tagala tama kalili ka:na:ta:pulaemene, ebena da:imi obote opamo ka:ka:liyaote da:imi obo ega:walo kalili ibi netewate kapiya tetelo ka:kubakubaoma:na. Me mabuma: iyatawadawate oli da:imi obo olioli tama kalili kapiyamo balateonakomene.”

*Wokoa: Talena Egelano Tanalo*

*Ma:t 12.1-8; Luk 6.1-5*

<sup>23</sup> Yu epono wokoa: talena egela idilo Ya:sute ebe waloma:tapiago kono pali magumudo eba petolamenatolo, ebe waloma:tapiate kono kenaoma: kapiyakapiya kubakubadopo ebo nowakalamiya. <sup>24</sup> Ebene Pa:lisi tanebapi epetapiate Ya:sutamo negeliya, “Numa:, a:ma: waloma:tapiate wokoa: talena egela beda:ma: kadikanalite?”

<sup>25</sup> Ya:sute iba:tamo negiya, “Modobola Godote ebena Bukamo dakuloliya, la: ebe tanalo nemalagidilala: Da:ibiditamona kuba tete da:piya, ebete ebena wapata:lamepiago bae kapete dulamiti, ebena ebete beda: tanalo kosiyaodiliyale? <sup>26</sup> Ebete Godokono Motamo nodolote, ebe Motono wokopiate Godotamo dalomonakiya ebe talena bae ebete a:nenaiya. Numa:la:, aimano totomu tabote a niyatuamena Godotamo kalimagono ikameopiate ebe bae a:ka:tuwa: naonaka, epo epetapiate nao talenala. Wiyasiya Da:ibidite ebe bae nate, eba:go wapata:lamepiatamo dikalamoliya, Godote ebe tanalo kubama: kegiya:. Nanitabola, me tanalote Abayatakono tetelo pemaigiya, ebe Godotamo kalimagono ikameopino Unu Watodawanomola.”

<sup>27</sup> Ebene Ya:sute iba:tamo negiya, “Numa:la:, Godote wokoa: talena egela epo walubilima: eba osiyodilolo, ebete ubi kiyatiya: wokoa: talena egelamo epono ilukuli tanalo ka:kodakodailaema:. <sup>28</sup> Ebema: nanitabola, na Epono Naniwite wokoa: talena egela namutudawama: eda:namo.”

### 3

*Ya:sute Koto Apu A:eme Dubu Wadekobi Da:midia*

*Ma:t 12.9-14; Luk 6.6-11*

<sup>1</sup> Tete idilo Yu epono balidi ibilamole motamo Ya:sute walo da:ka:nodoliya, koto apu a:eme dubute ebolo nokoliti. <sup>2</sup> Ebene ebe



duliyomolono Pa:lisi tanebapiate Ya:suko kodakodamo umitiya, ebete wokoa: talena egelalo ebe lumagi wadekobi midilo iba:te ebe kubama: kegelama:. <sup>3</sup> Ebe tetelo Ya:sute koto apu a:eme dubutamo negiya, “A:ma: maigawete, mamu na:pa:.” <sup>4</sup> Ebene Ya:sute ebe epatamo negiya, “A:mano totomu tabote kebe talena tanalo kiyatuamenale? Ale wokoa: egelalo wade tanalo o kuba tanalo ba:kosiyodiloma:? Epo wadekobi ba:ka:midilima: o ba:ka:kubailaema:?”

Iba:te wiya tabo kegeliya;, <sup>5</sup> ebema: Ya:sute dowate ibino wato kodakoda tanalo umilamete, ebe mabuma: ibi tepo mibomibago eba ulamolelo ebe dubutamo negiya, “A:mano koto nuwamida,” ebene ebete koto duwamidiya ebenu kotote wadekobi ebo olowiya. <sup>6</sup> Ebe mabuma: Pa:lisi tanebapiate dowago tolamete, ebe tetenomolo iba:te Kawo Elawodubu Elodikono tanebapiago tabo ebo negeliya Ya:suko anakapuima:.

### *Epo Bilibilinomate Ya:suko Uima: Da:pelamiya*

<sup>7-8</sup> Ebe tetelo Ya:sute ebe waloma:tapiago Ga:lili Paka:mo walo na:ka:tiya, ebenu Yu epo bilibilinomate ebe tanalo olowite iba:te Ga:lili opone, Yudiya opone, ega:walo Yelusalema kawo duliyomolone pelamolete ebe ebo waloma:tiya. Ega:walo epetapi bilibilinomate iyaiya mulu opone atumu a:ka:pelamoliya, iba:te Idumiya opone, Yodane Kolomo apune, Taya kawo duliyomolone, ega:walo Saidono kawo duliyomolone pelamoliya. <sup>9-10</sup> Ebene ibi magumulo Ya:sute temetema:gopi bilibilinomo wadekobi da:midoliya, temetema:gopi bilibilinomo epetapiate ebe tanalo eba iyatawaolo ebe ologioma: mupuma:tiuilu da:pelamiya, ebe mabuma: Ya:sute ebe waloma:tapi nanaliya iba:te pe kadaema:, ebe epate ibino mupuma:tiui tanalamo ebe kubaimikapoma:.

<sup>11</sup> Ebe tetelo kuba uliyanagopiate Ya:suko duminakiya, iba:te ebenu agowa mabuamo da:pa:gudinakiya gelatepaolo gelanakiya, “A:ma: Godokono Gudulata!” <sup>12</sup> wiyasiya Ya:sute ibi kawonomamo analenaki, mabu ebe ubia:nola iba:te ebenu tanalo awokalima:.

### *Ya:sute Ebenu 12 Alibolepi Dekala:miya*

#### *Ma:t 10.1-4; Luk 6.12-16*

<sup>13</sup> Ebe tetelo Ya:sute damela unu ida:mo da:nodoliya, ebete ebenu ubi epo ebetamo peka:la:mite, iba:te ebetamo ebo tolamiya. <sup>14</sup> Ebene ebete ibi magumulo 12 dubu uwatete iba:tamo negiya, “La: naimano alibolepilata. Nale la: uwatemata la:le nago ilukulinama:, ebema: nale la: Godokono tabo kiyawaoma: kalibolemamota, <sup>15</sup> ega:walo na la:tamo elawo kikalaemamota la:le kuba uliyana epagodone kanalibola:ema:.”

<sup>16</sup> Ya:sute 12 dubu duwatiya, me ibino mailola.

Saimonoko, Ya:sute ebetamo Pita mailo idi ikamiya.

<sup>17</sup> Sebedikono gudu Ya:imesiko ega:walo ebenu ekawi Yoneko, Ya:sute ibi netewapiatamo Bowanagese mailo ikalamiya, ebe mailono magumu ebe ‘Tobolo Gelapate Dubula.’

<sup>18</sup> A:nduluko ega:walo Pilipiko,  
Batolomuko ega:walo Ma:tiyuko,  
Tomasiko ega:walo A:lapiyasikono gudu Ya:imesiko.

Ta:diyasiko ega:walo Saimonoko, me Saimono idi ebe ubila kapela Loma gabamani epago eba gowelalo iba:te ebenu Ka:inane opo ebo katepama:.

<sup>19</sup> Ega:walo Ya:sute Keliyota duliynomolodawa Yudasiko atumu akolawiya, me dubu ebe walone tetelo Ya:suko anakapumipi dowlubiliya ebe dawala.

*Ya:suko Ega:walo Biyesibuluko\* Ibino Tanalo*

*Ma:t 12.22-32; Luk 11.14-23; 12.10*

<sup>20</sup> Ebene Ya:sute motamo da:tiya epo bilibilinomate ebetamo pelamete walo eba:go dakapaladabutiya, ebema: Ya:suko ega:walo ebe waloma:tapi bae naoma: ka:modobiya:. <sup>21</sup> Ebe tetelo ebena ekakiate ebe tanalo olowite ebe laema: ebo tolamiya, mabu epate iba:tamo ma kunu geliya, “Ebe daedalela!”

<sup>22</sup> Ebene Godokono Totomu iyatulamepi Yelusalema kawo duliynomolone da:pelamiya, ebe dubate na:pegeliya, “Biyesibuluko ebegodolo bokolina, iyo, ebete kubakuba uliyanano Kawodawano elawamo alibolenako, Godokono elawamoa:!”

<sup>23</sup> Ebene Ya:sute epo ebetamo ka:la:mite oi epetapiamo eba iyat-ulamelo negiya, “Saitanate ebena kubakuba uliyana lumagigodone bakalibolemene? Ao, akalibolemene. <sup>24</sup> Numa:la:, kapiya duliynomolono epate tetedo dadikanalema:na: ebe duliynomolote ka:kubamene, <sup>25</sup> ega:walo kapiya motono epate tetedo dadikanalema:na: ebe motono epate a:kilukulinama:na:, ibino motote atumu ka:ka:kubamene. <sup>26</sup> Ebema: Saitanakono woki ma kunula, ebete ebena kubakuba uliyana epagodone akalibola:le, mabu kebe tetelo ebete eba kunu dowagelemene ebena woko osiyodilo elawo tanalote kolopoligomene, iyo, ebena uwomu bitana.

<sup>27</sup> “Numa:la:, Saitanako ebe elawodubu idi keba kunula:ka: eba kunula, ega:walo ebete pilolo duwatiya ebe epo ebe ebena moto inamabula. Ebema: epate mako elawodubuno motamo opila:ote ebena inamabu uwatema: ubi diyatima:na:, iba:te dopamo ebe ala:mo matuomeote, ebena ebena inamabu ebo kuwatema:na:.

<sup>28</sup> “Na la:tamo nani tabo gemo, epono iyaiya kuba tanalo bilibilinomo Godote egebolelamete dodolomatili iyatawala, ega:walo epate Godoko ubia: tabo degelama:na:, ebe iyaiya kuba tabono tanalo Godote egebolelamete ka:dodolomatililaemene. <sup>29</sup> Wiyasiya kebe lumagite Godokono Uliyanano osiyodilo tanaloma: kubama: degemene, Godote ebe lumagino kuba egebolemete a:ka:dodomatiminamene, ebete uwomua: tetelo ebe kubadawama: begenakomene.”

<sup>30</sup> Nanitabola, me tanalo Ya:sute giya mabu ebe epate ma kunu geliya, “Ebe kuba uliyanagodawala.”

*Ya:sukono Menoko Ega:walo Ebena Ekaki*

*Ma:t 12.46-50; Luk 8.19-21*

<sup>31</sup> Ebene Ya:sukono menoko ega:walo ebena ekaki iba:te ebe uima: da:pelamiya, iba:te moto niyakabolo eba pelamota:onaloma, ebete iba:tamo pema: tabo ebo nalibiya. <sup>32</sup> Ebe tetelo epo bilibilinomate Ya:suko niyakabolo na:pola:niya, ebena iba:te ebetamo negeliya, “Numa:, a:imano menoko ega:walo ekaki iba:te moto niyakabolo ba:pepola:na. Ibi ubila a:ma:.”

<sup>33</sup> Ya:sute iba:tamo nowamiya, “Naimano menoko potelela:ka:, ega:walo naimano ekaki piyatela:ka:?” <sup>34</sup> Ebene ebete epo ebe niyakabolo da:pola:niya ulamete negiya, “Me epo ebe naimano menokobila ega:walo naimano ekakila. <sup>35</sup> Potele Godokono ubi tanalo dosiyodilomene, ebe lumagi naimano menokola ega:walo naimano ekawila.”

\* **3:19:** Biyesibuluko ebe Saitanakono nopodawa idila, ebete Yu epono opolo Saitanakono opodawama: eda:nami, atumu Tabo epono opolo Monoiko bokolina.

## 4

*Kono Kikopu Aminaoledawano Iyatulame Oi**Ma:t 13.1-9; Luk 8.4-8*

<sup>1</sup> Tete idilo Ya:sute Ga:lili Paka: balalo epo iyatulamiti, ebene epo bilibili-nomate ebetamo da:pelamiya, ebema: ebete peamo olote pe potone kela:mo nalima:tepate peamo gito okoliya, wiyasiya epate Ga:lili damela balalo pepola:niya. <sup>2</sup> Ebene ebete iyaiya tanalo epetapi bilibilinomo iyatulame oiamo eba awokalilamelu, iyatulame tabo idi iba:tamo ma kunu giya, <sup>3</sup> “La: nolowiala: Lumagi idite pali amio bai dosiyodili kono kikopu aminaola:go ebo ti. <sup>4</sup> Ebete aminaola:go eba tonatolo, kikopu epetapi iba:te gabamo gudiya, ebema: olaolate pelamete ebo penaiya. <sup>5</sup> Kikopu epetapi iba:te nokola damelamo gudiya, ebolo damela kawoa: Ebema: iba:te samonomamo pemaimiya mabu damela bidobidoa:, <sup>6</sup> ebene egelate da:pioli iba:te nalawoiya mabu ibino dolodolo magumamo ka:tolamea:, iyo, iba:te ebema: samonomamo a:elaiya. <sup>7</sup> Kikopu epetapi iba:te moemoe uwago damelamo gudiya, ebema: ebe uwagate dapepeiya kono ebo anakapulamiya, ebene iba:te ka:noloa:. <sup>8</sup> Wiyasiya kikopu epetapi iba:te wade damelamo gudiya, ebema: iba:te apepeote ebo nolojiya, epetapi 30 teta:mo, epetapi 60 teta:mo, epetapi 100 teta:mo bilibilinomoma: eda:iya.”

<sup>9</sup> Ya:sute walo na:kegiya, “Galagodawa, a:ma: wadenomamo nolowia!”

*Ya:sukono Iyaiya Iyatulame Oino Mabu**Ma:t 13.10-17; Luk 8.9-10*

<sup>10</sup> Ebene epo bilibilinomate Ya:suko datepiya, kapiyakapiya epo epetapi-ate ebene 12 waloma:tapiago ebetamo pelamete na:pegeliya, “A:imano iyatulame oino magumu keba kunula:ka:?”

<sup>11</sup> Ya:sute iba:tamo negiya, “Godote Kawo Elawodawama: deda:na, ebe tanalono magumu kelawa:ema: nale elawo la:tamo ikalaimata, iyo, ebe tanalono wamina tanalo la: iyatawaimata. Wiyasiya epo epetapi eba kunua:, iba:te iyatulame oine tanalo bilibilinomo olowiote wadenomamo a:kiyatawaoma:na:. <sup>12</sup> Nanitabola,

‘Iba:te bowadinakoma:na:

wiyasiya a:kuminakoma:na;

ega:walo iba:te bolowinakoma:na:

wiyasiya a:kiyatawaonakoma:na;

ebema: iba:te ibino kubane a:kolobila:oma:na;

ega:walo Godote ibino kuba a:kegebolelaemene.’ ”

*Kono Kikopu Aminaoledawano Iyatulame Oino Magumu**Ma:t 13.18-23; Luk 8.11-15*

<sup>13</sup> Ebene Ya:sute ebe waloma:tapiatamo negiya, “La: me iyatulame oino magumu kiyatawawita:, ebema: la: walone tetelo naimano iyatulame oi epetapino magumu keba kunu na:kiyatawaema? Me oino magumu ma kunula, <sup>14</sup> kono kikopu aminaoledawa ebete Godokono tabo naminaolena. <sup>15</sup> Ebene epo epetapiate gabamo da:gudi, ibi ebe kono kikopu keba kunula:ka: eba kunula, iba:te tabo dolowima:na: Saitanate pete ibino tepo magumune samonomamo ka:puwatelaemene. <sup>16</sup> Epo epetapiate nokola damelamo da:gudi, ibi ebe kikopula, iba:te Godokono tabo dolowima:na: kalakalago kelaema:na:, <sup>17</sup> wiyasiya ibino tepo magumulo dolodolo puliyala. Ebema: iba:te Godokono woko magumulo tete da:pesamo ilukula:tepate, ebene Godokono taboma: temeteme tanalate iba:tamo da:pemaimioma:na: ega:walo epate ibino tanaloma: degelama:na:,

iba:te samonomamo kalautioma:na. <sup>18</sup> Epo epetapi iba:te moemoe uwago damelamo da:gudi, ibi ebe kikopula. Iba:te Godokono tabo kolowima:na, <sup>19</sup> wiyasiya iba:te inamabu kawonomamo malagidilolena ega:walo ibino ilukuli tanaloma: woki bilibilinomoma: eda:ona, ebema: ibino tepo magumulo ebakobako woki bilibilinomo ba:pola:na, me wokino tanalate wade tabo eba anakapumilo, ebene iba:te a:ka:noloma:na. <sup>20</sup> Wiyasiya epo epetapi iba:te wade damelamo da:gudi, ibi ebe kikopula. Iba:te Godokono tabo olowite, nanitabonomolo lawete ka:noloma:na, epetapi 30 teta:mo, epetapi 60 teta:mo, epetapi 100 teta:mo ka:noloma:na.”

*Wuiki Alo Awokala Baiamo Iyati Tanalo*

*Luk 8.16-18*

<sup>21</sup> Ebene Ya:sute iba:tamo negiya, “Lumagite ebene wuiki alo bagowo magumamo a:kiyatimene ega:walo ebene wata bai magumamo a:kiyatimene, wiyasiya ebete awokala baiamo kiyatimene. <sup>22</sup> Kebe waminaole tanalate da:pola:na walone tetelo Godote kawokalilaemene, ega:walo kebe ulamolea: tanalate da:pola:na walone epate alo tetelo kulamolema:na. <sup>23</sup> Galagodawa, a:ma: wadenomamo nolowia!”

<sup>24</sup> Ega:walo Ya:sute iba:tamo na:kegiya, “La:le dolowiawenama ebe tanalo wadenomamo nulamenakiyala:! La:le lumagi iditamo anagiyamida tanalo keba kunu kosiyodilaema, Godote la:tamo eba kunu ka:posiyodilomene, wiyasiya la:imano anagiyamida wiyate kawonomamo ka:pemene. <sup>25</sup> Nanitabola, Godokono tabo olowima: lumagigodolo wadewade woki da:pola:na, Godote ebetamo wadewade tanalo bilibilinomo walo ka:kikameomene. Wiyasiya lumagigodolo wadewade woki pola:na:no, ebegodolo kebe kapiyakapiya tanalate da:pola:na Godote ebegodone walo ka:kuwatemene.”

*Kono Kikopuno Ape Tanalono Iyatulame Oi*

<sup>26</sup> Ebene Ya:sute walo na:kegiya, “Godote Kawo Elawodawama: deda:na, ebe tanalo ma kunula. Dubute ebene kawo pali damelamo kono kikopu daminaoli, <sup>27</sup> ebene ebete kowata, kemaiga, eba kunu eba wagenalalo, ebe kono wuiate pemaimite ebo apepeiya. Wiyasiya kikopuate damela magumulo eba pola:nalo tete geyageyadopolo iba:te keba kunu dapepeona, ebe dubute kiyatawana; <sup>28</sup> mabu palino damelate a:ka:tuwa: inamabu noloilamena, dopamo paa ega:walo ula, ebene nao kikopu. <sup>29</sup> Ebema: nanitabola, nao kikopuate da:kodakodaoma:na; ebe dubute samonomamo tote ka:nowakalaimene, mabu kono wakalami tete a:pe.”

*Mastada Kikopuno Iyatulame Oi*

*Ma:t 13.31-32; Luk 13.18-19*

<sup>30</sup> Ebene Ya:sute walo na:kegiya, “Godote Kawo Elawodawama: deda:na ebe tanalo ale beda: ula:mo nakawokalima:, ega:walo ebe tanalo ale kebako iyatulame oiamo na:ka:tupugaima:? <sup>31</sup> Nanitabola, me opo kawonomolo kewa kikopu kawokawonomo ba:pola:na wiyasiya mastada kikopu da:pesonomola, ebema: Godote Kawo Elawodawama: deda:na ebe tanalo mastada kikopu keba kunula:ka: eba kunula. <sup>32</sup> Dubute daimene, ebe da:peso kikopute apete kewa epetapi bilibilinomo odolite kawokawo katomo kuwamidaolemene, ebene olaolate pelamete kewa katomono golololo ba:pilukulionama:na.”

<sup>33</sup> Nanitabola, epono iyatawa tanalote da:modobiya, Ya:sute ibi mako iyatulame oi bilibilinomamo iyatulamenaki. <sup>34</sup> Iyo, ebete Godokono tabo iyatulame oiamo kiyawaonaki, wiyasiya epo epetapi bilibilinomate

ibino iyaiya duliynomolamo walo da:ka:tolamolenakiya, ebe tetelo ebe waloma:tapiatamo oi bilibilinomono magumu diya gabodo awokalilame-naki.

*Ya:sute Awa Matalukobi Da:midini*

*Ma:t 8.23-27; Luk 8.22-25*

<sup>35</sup> Ebe egelate didokoni, Ya:sute ebe waloma:tapiatamo negeni, “A paka: apuamo ka:na:iwaliye.” <sup>36</sup> Ebene iba:te epo bilibilinomo epetapi miya-panate, Ya:sute dokolini ebe waloma:tapiate ebe peamo olonate gito tola-meniya. Ebe tetelo pe epetapi atumu iba:go na:ka:tolameniya, <sup>37</sup> ebene kawo awanomote eba maiganalo kawokawo ulono obote waloma:tapino peamo da:poloniya, pe gu obote gito tabokani. <sup>38</sup> Wiyasiya Ya:suko pe walo-gabo apulo ebenu wato ilakamo apatinate ebo watani, ebema: iba:te ebe amutiyante nananiya, “Iyatulamedawa, a:ma: a wadenomamo beda:ma: kuama:wena? A ka:elaomalema!”

<sup>39</sup> Ebene Ya:sute maiganate awa kawoya nanani, “Nolodiyoba!” ega:walo ulotamo atu tabo na:kegeni, “Nolopoloala!” ebene awate olopoligonate paka:te matalukobi olowinomo gito olowini. <sup>40</sup> Ebema: Ya:sute iba:tamo negeni, “La: beda:ma: ka:toletoleawenama? La:imano nanitabokobi mididi tanalo puliyala:ka:?”

<sup>41</sup> Wiyasiya iba:te kawonomamo eba anoanonalo ibino taneba magumulo negelaniya, “Me lumagi potelela:ka:? Awa ega:walo ulo iba:te ebenu tabo olowite a:tudila!”

## 5

*Ya:sute Kuba Uliyanagono Dubu Wadekobi Da:midiya*

*Ma:t 8.28-34; Luk 8.26-39*

<sup>1</sup> Ebene Ya:suko ega:walo ebe waloma:tapi iba:te Ga:lili Paka: apuamo na:iwaliya Gelasa duliynomolono opamo. <sup>2</sup> Ya:sute pene damelamo eba nodololo, kuba uliyanagono dubute eba:go alugoma: ebo piya. Ebe opo epono tanalo ma kunula, iba:te maboete nokola damela eba obobolelo iyaiya bobo ebo osiyodilolenakiya iba:te ibino a:elao epo alomoma:. Ebema: me dubute ebe a:elao epono bobo baine piya, <sup>3</sup> mabu ebete ebe nokola bobo magumulo okolinami. Epate ebe auli ala:mo dematuomeonakiya ebe ale ka:modobonakia:, <sup>4</sup> iyo, tete bilibilinomolo iba:te ebenu agowala kotola auli ala:mo dematuolamolemenakiya, ebete kotono ale iyailinaki ega:walo agowano ale atumu a:kiyailinaki. Nanitabola, ebete elawonomoma: eda:nami, ebema: lumagite ebe odiyoboma: modoboa:. <sup>5</sup> Ega:walo ebete egela ega:walo idoko bilibilinomolo nokola bobo magumulo ega:walo damela unulo eba geatepaolo, ebe a:ka:tuwa: ebenu tama nokolamo danagalimionaki kalimate ebo pemaimiomenaki.

<sup>6</sup> Ebene me dubute Ya:suko muluamo numite, ebetamo na:puligate ebenu agowa mabuamo da:na:tuduwatiya, <sup>7-8</sup> Ya:sute ebetamo negiya, “Kuba uliyana, a:ma: me dubugodone na:nemaiga!”

Ebe tetelo ebete geatepaolo negiya, “Ya:su! A:ma: Ununomo Godokono Gudulata! A:ma:le natamo beda: tanalo na:kosiyodilaemene? Nale a:ma: Godokono mailamo anamata, natamo kuba wiya akoikanama:la:!”

<sup>9</sup> Ebene Ya:sute ebe nalatediya, “A:imano mailo potelela:ka:?”

Ebete nowamiya, “Naimano mailo Bilibilinomotela mabu a kuba uliyana bilibilinomola!” <sup>10</sup> Ebene ebe dubute Ya:suko kawoya eba toweomelo ebe naniya, “Nagodolo dilukulina ebe kubakuba uliyana me opone akoalibola:la:!”



<sup>11</sup> Ebe tetelo dabirole goeogoeo bilibilinomate damela unulo naoago ebolo nowapata:lamitiya, <sup>12</sup> ebema: kubakuba uliyanate Ya:sutamo towetoweolo negeliya, “A:ma:le a goeogoeatamo naliboa:, ale iba:tamo ka:nopila:oma.”

<sup>13</sup> Ebene Ya:sute modobo tabo gete ibi ebo analiya, “Na:tolama:la!” Ebe tetelo kubakuba uliyanate dubugodone pemaimite goeogoeatamo ebo nopila:iya, ebema: ebe 2,000 goeogoeate damela unune puila:ote maboele damelane da:na:gudiya, obamo nololuote ibi bilibilinomate gito na:elaiya.

<sup>14</sup> Ebe tetelo goeogoeo ulamepi dubate ebe tanalo umite ibino duliyo-molamo puila:ote ebe duliyo-molo epo ega:walo tumu motolo dilukulinamiya da:nikiyawaolamiya, epo bilibilinomate ebo pelamiya Ya:sute dosiyodiliya ebe tanalo uima:. <sup>15</sup> Iba:te ebetamo pemaimite, dopamo kubakuba uliyana bilibilinomago dokolinami ebe dubu ebo pumiya, ebete kaliku pulite ebolo okoliti mabu ebenu woki a:tuputupuomiya. Me mabuma: iba:te na:toletoleutiya, <sup>16</sup> ebene Ya:sute kubakuba uliyanagono dubutamo ega:walo goeogoeatamo kebe iyaiya tanalo kosiyodiloliyale, piyate ebe tanalo dulamiya iba:te epo epetapi ebo kiyawaolamiya.

<sup>17</sup> Ebe tetelo ebe epate Ya:suko kawiya naniya ebete ibino opo katepama:, <sup>18</sup> ebene Ya:sute peamo eba ololo, dopamo kubakuba uliyanago dokolinami ebe dubute ebe ebo toweomiya, “Na niyala, a:ma:go ka:pa:mo!”

<sup>19</sup> Wiyasiya Ya:sute ebe eba odiyobolo naniya, “A:ma: motamo na:toa. Godote a:ma:tamo keba kunu kosiyodilola:kale ega:walo a:ma: da:nilakapomitaka, ebe kawokawo tanalonomo a:imano mabu epo na:nikiyawaolama:.”

<sup>20</sup> Ebema: me dubute Teni Duliyo-molono opo kawonomamo tote, Ya:sute ebetamo dosiyodiliya ebe tanalo kiyawaolama:go tiya, ebene piyate ebe iyaiya tanalo dolowiya iba:te kawonomamo anoanoiya.

*Ya:ilasite Ya:suko Da:toweomiya Ebenu Buwele Wadekobi Ka:midima:  
Ma:t 9.18; Luk 8.40-42*

<sup>21</sup> Ebene Ya:sute peago paka: apuamo walo da:ka:na:iwiya, ebete ebolo eba nokolitalo epo bilibilinomate ebetamo ebo pelamiya. <sup>22</sup> Ebe tetelo Yu epono balidi ibilamole moto umidawa dubu, ebenu mailo Ya:ilasitela, ebete Ya:sutamo pete ebenu agowa mabuamo pa:tuduwatate, <sup>23</sup> kawonomamo eba petowetoweolo na:pegiya, “Naimano buwele da:peso a:e tatalila. A:ma: pa:wete a:imano koto ebetamo na:powatila: ebete wadekobi kolowima:, ebenu ebete a:ka:emene.”

*Kalima Ka:ka:liya Temetema:go Kamiyaletu Ya:sukono Kaliku Dologiya  
Ma:t 9.19-22; Luk 8.42-48*

<sup>24</sup> Ebene Ya:sute me dubago to dowagilimiya, epo bilibilinomate ebe eba a:wa:midalo mupuma:tiua:go tolamitiya. <sup>25</sup> Ibi magumulo kamiyale idi 12 ulama tetelo kalima ka:ka:liya temetemetu uminami, <sup>26</sup> doketa epo epetapiate ebetamo mibomibo tanalo ikameonamiya. Iba:te ebe wadekobi ka:midiya:, wiyasiya ebe kamiyaletu ebenu mani iba:tamo eba ikalamolelo dopoliyaliya, ebenu temetemetu kawodopoma: ediya. <sup>27</sup> Ebema: ebete Ya:sukono tanalo dolowiya epo magumamo nopegate, ebenu walogabo apune pete ebenu kaliku ebo pologiya, <sup>28</sup> mabu ebete nemalagidiliya, “Nale ebenu kaliku dologimo na wadekobi ebo kolowimamo.”

<sup>29</sup> Ebene ebete Ya:sukono kaliku dologiya, ebe tetenomolo ebenu kalima ka:ka:liya tanalote dolopoligiya ebete iyatawiya ebenu ape a:modobo. <sup>30</sup> Wiyasiya Ya:sute iyatawiya elawote ebegodone demaigiya, ebenu ebete polobigate epo napalateda:liya, “Naimano kaliku potele kologile?”

<sup>31</sup> Wiyasiya ebe waloma:tapiate ebe naniya, “Me epo bilibilinomate a:ma:tamo mupuma:tiua:go pelamita. A:ma: ibi ulamelo beda:ma: kegeawita a:ma: potele kologita?” <sup>32</sup> Ya:sute ibi kowamilamiya:, wiyasiya ebete me lumagi kuima: epo ulamoliya.

<sup>33</sup> Ebe tetelo ebe kamiyaletе iyatawiya Ya:sukono elawote ebeno ape wadekobi a:midi, ebema: ebete toletolelo anakamiago pete, Ya:sukono agowa mabuamo pa:tuduwatalo ebeno temetemenо tanalo ebetamo ebo pawokalilamiya. <sup>34</sup> Ebene Ya:sute ebetamo negiya, “Kamiyale, a:imano nanitabokobi midi tanalote a:ma: wadekobi a:mida:ta. A:ma: kalakalago na:toa, mabu a:ma: dumitanamiya, ebe temetemetе olopoligo.”

*Ya:sute Ya:ilasikono Buwele A:ene Dadipatiya  
Ma:t 9.23-26; Luk 8.49-56*

<sup>35</sup> Ya:suko me tabo eba kiyawautalo, tabo adaepiate Yu watodawa Ya:ilasikono motone pelamete ebe napaniya, “A:imano buwele a:e, ebema: Iyatulamedawa walo akoanala: ebe wadekobi ka:pa:midima:.”

<sup>36</sup> Ya:sute ibino tabo gito olowiatepiya, ebene ebete Ya:ilasiko naniya, “A:ma: akotoletola:la:, a:ma: Godoko nanitabokobi na:mida:.” <sup>37</sup> Ebe tetelo ebete Pitako, Ya:imesiko, ega:walo ebeno ekawi Yoneko, ibi kapiya eba magatalelo epo epetapi nodiyoboliya iba:te iba:go ka:tolaema: <sup>38</sup> Ebene ibi a:ka:tuwa: Ya:ilasikono motamo da:nemaimiya Ya:sute epo bilibilinomo ebo nulamiya, iba:te gowelalo kawonomamo iimitiya. <sup>39</sup> Ya:sute moto guamo nodolote ibi nananaliya, “La: bilibilinomo gowelalo beda: mabuma: kiima:witama? Gudu buwele ka:eaka:, ebe u watita.”

<sup>40</sup> Wiyasiya iba:te ebe nekalakalatitiya, ebema: ebete ibi bilibilinomo motone gito paliboliya, ebene Ya:sute guduno menokola, nabiwila, ega:walo ebeno netewa-kapiya waloma:tapi uwatete, gudute dekapitani iba:te ebe teta:mo gito nopila:iya. <sup>41</sup> Ebe tetelo ebete buwele kotamo nelawete Yu epono tabamo naniya, “Talita kumi!” Me tabono magumu nitana, “Buwele, nale a:ma: anamata, nemaiga!”

<sup>42</sup> Ebene ebe tetenomolo ebe 12 ulama tete buwelete maigate nepatiya. Piyate me tanalo dumiya iba:te kawonomamo anoanoiya, <sup>43</sup> wiyasiya Ya:sute ibi kawonomamo analiya, “La: me tanaloma: epo epetapi akoanala:la:!” ega:walo ebete iba:tamo na:kegiya, “Buweletamo nao inamabu nikameala:.”

## 6

*Nasalete Duliyomolo Epate Ya:suko Ubia:noma: Deda:iya  
Ma:t 13.53-58; Luk 4.16-30*

<sup>1</sup> Ebe tetelo Ya:sute ebe duliyomolone tote ebeno okoli duliyomolo Nasaleta:mo walo da:ka:tiya, ebe waloma:tapiate ebe ebana kapimiya ka:tolamiya. <sup>2</sup> Ebene Yu epono wokoa: talena egelalo ebete balidi ibilamole motolo epo eba iyatulamitalo, ibi bilibilinomo epetapiate ebeno tabo dolow-iutiya ebema: anoanoutiya. Iba:te negeliya, “Me dubuno iyatulame tanalo mulonomola! Ebete me iyaiya tanalo kebolo kiyatawile? Ega:walo ebete anoano tanalo dosiyodilolena beda: kawokawonomola:ka:!” <sup>3</sup> Ebe kapeneta dubunomola, Ma:likono gudula. A iyatawala ebeno ekaki Ya:imesiko, Yausesiko, Yudasiko, ega:walo Saimonoko, iyo, ebeno ekaki buwelemela:te me duliyomololo ago bilukulita.”

Ebene iba:te ebe ubia:noma: eba eda:utalo <sup>4</sup> Ya:sute iba:tamo negiya, “Godokono woki awokalimidawa epate ebe unamo kadipatema:na:,

wiyasiya ebena duliyaomolo epo ega:walo ebena moto epo ega:walo ebena kalima epo, iba:te ebe ubia:noma: beda:onakoma:na.”

<sup>5-6</sup> Ebe tetelo Ya:sute Nasaleta epono nanitabokobi midia: tanaloma: kawiya la:wa:te, ebete ebena koto temetema:gopi kapiyakapiyanomatamo dowatiolelamiya ibi wadekobi ebo midioliya, wiyasiya ebete ibino duliyaomololo anoano tanalo epetapi osiyodilolema: ka:modobiya:, ebema: ebete ibi eba miyapalo wiyasiya iyaiya duliyaomolo epetapilo iyatulama:go pata:nami.

*Ya:sute 12 Waloma:tapi Dubu Daliboliya*

*Ma:t 10.5-15; Luk 9.1-6*

<sup>7</sup> Ebene Ya:sute ebena 12 waloma:tapi ebetamo ka:la:mite, epetapi netewa, epetapi netewa, iyaiya duliyaomolamo ebo aliboliya, ega:walo ebete iba:tamo elawo ikalamiya kubakuba uliyana epagodone kanali-bolema:. <sup>8</sup> Ebete ibi nanaliya, “La:imano tolame tetelo gaubu kapiya nuwatiyala:, wiyasiya inamabu epetapi akouwata:la:, iyo, la: baea:no, gatelea:no, ega:walo mania:no na:tolamiyala:.” <sup>9</sup> Ega:walo modobola la: agowa inamabu ega:walo kapiyakapiya kaliku pupuliawete ebo na:tolamiyala:, pupuliono inamabu epetapi akouwata:la:.” <sup>10</sup> Ebene la: duliyaomolo ida:mo nemaima:wete kebe moto guamo da:nodoloaema, la: ebe motolo nilukula:tepawete walone ebe motone opo ida:mo ka:ka:tolaemamota, iyo, la: moto idine moto ida:mo eba kunu akonowagela:la:. <sup>11</sup> Ega:walo kebe duliyaomolo epate la: kalakalago uwateta:no ega:walo la:imano tabo olowia:no, ebe duliyaomolo eba atepalo la:le agowano tuwae na:moda:midatepaliyala:. Me tanalote ebe epo kiyatulaemene, Godokono tete ebe na:pe ebete ibino tanalo kapanagiyamidalaemene.”

<sup>12</sup> Ebema: Ya:suko waloma:tapiate tolamete Godokono tabo na:kiyawaolamenatiya epate ibino kubane kolobila:ma:. <sup>13</sup> Ebene iba:te epagodone kubakuba uliyana nalibolenakiya, ega:walo iba:te temetema:gopi epetapi bilibilinomo olibi kikopuno iamo ibino wato dabutilamolamenakiya, ibi wadekobi ebo midiolenakiya.

*Epo Bilibilinomate Ya:sukono Tanaloma: Degelanakiya*

*Ma:t 14.1-2; Luk 9.7-9*

<sup>14</sup> Ebe tetelo Kawo Elawodubu Elodite ebe anoano tanalo olowiya, mabu epo bilibilinomate Ya:sukono tanalo eba iyatawaolo ibi magumulo epetapiate tabo ma kunu geliya, “Yoneko epo obamo waduba:midaoledawate a:e magumune emaigi, ebema: me anoano tanalate ebegodone pemaiminaka.” <sup>15</sup> Ebene epetapiate negeliya, “Ebe Elayate, Godokono woki awokalimidawala,” wiyasiya epetapiate na:kegeliya, “Ao, ebe Godokono woki awokalimidawa idila, dopamo aimano ewoniatamo da:pemaimiya ibi keba kunula:ka: eba kunula.”

<sup>16</sup> Wiyasiya Elodite Ya:sukono tanalo dolowiya, ebete negiya, “Me dubu ebe Yonetela, nale ebena wato dotowamidaimo, wiyasiya ebete a:ene walo a:kemaigi!”

*Elodite Yonekono Wato Dotowamidamiya*

*Ma:t 14.3-12*

<sup>17-18</sup> Me tanalo ebe Yonete keba kunu ka:iyale ebe tanalola.

Yonete dopamo eba okolinalo, Kawo Elawodubu Elodite ebena ekawi Pilipikono kamiyale pilolo lawiya, ebe kamiyaleno mailo Elodiyasitela. Me mabuma: Yonete Elodiko kawiya eba analo negiya, “A:ma:le ebe kamiyale laema: modoboa:, kawo kubanomola!” Ebema: Elodite ebena gowelaopi daliboliya, iba:te Yoneko nelawete idoko moto guamo gito peba:idiliya,

mabu ebete ebenu ubi niyatiya ebe osiyodilo tanalodo ebete Elodiyasiko kalakalakobi ka:midima:

<sup>19</sup> Ebe tetelo Elodiyasite Yonetamo dowate ebe anakapuima: ebenu ubi ebo iyatiya, wiyasiya Elodite me tanalo osiyodiloma: ubia:nola. <sup>20</sup> Ebete Yoneko na:tolemenami, mabu ebe iyatawala Yonete tuputupudawama: eba eda:nalo Godokono talena magumulo okolina. Nanitabola, ebete Yonekono tabo dopamo dolowiya woki bilibilima: ebo ediya, wiyasiya ebete idoko motolo eba okolinalo, Elodite ebe wadenomamo eba uminalo iyaiya tete epetapilo ebete ebenu tabo kalakalago olowinaki.

<sup>21</sup> Ebene Elodite dawokaliya, ebe egela malagidilolo ebete kawo soliyomu osiyodiluti. Ebema: ebenu gabamani dubu, gowelaopi elawodubu, ega:walo Ga:lili opono watowatopi, ibi bilibilinomate soliyomu baiamo tolamiya. Ebe tetelo Elodiyasite wade tete ebo umiya. <sup>22</sup> Ebete ebenu buwele nalibote, ebete ibino ololo apulo da:pemaiti, Elodiko ega:walo eba:go da:pola:niya iba:te ebetamo nekalakalautiya. Ebene Elodite buweletamo negiya, “A:ma:le kebe tanaloma: na danana:emene, nale a:ma:tamo kikaemamota.” <sup>23</sup> Elodite ebetamo nanitabonomolo walo na:kegiya, “A:ma: beda: tanaloma: na danana:emene, a:imano ubi diyata:emene naimano inamabu apu ega:walo naimano opo epetapi, nale a:ma:tamo kikameomamota! Naimano tabo akadikanalemo.”

<sup>24</sup> Ebene ebe buwelete ebenu menokotamo tote na:negiya, “Na beda: tanaloma: na:ka:negemo?”

Ebenu menokote naniya, “A:ma: Yoneko epo obamo waduba:midaoledawano watoma: ebe nananiye.”

<sup>25</sup> Ebene ebe buwelete Kawo Elawodubu Eloditamo samonomamo walo ka:pete ebe napaniya, “Na ubila Yoneko epo obamo waduba:midaoledawano wato kikopu kawatago. Ka:lonomo natamo nikanama:!”

<sup>26</sup> Ebema: Elodite ebenu tepo magumulo mibomibonomoma: ediya, wiyasiya ebete buweletamo kebe tabo kegiyale, eba:go da:pola:niya iba:te ebe tabo olowiya, ebe mabuma: ebete amoeda:ma: ka:modobiya:. <sup>27</sup> Ebe tetenomolo Elodite ebenu gowelaodawa dubu idi eba nalibolo, ebe naniya ebete Yonekono wato ka:nelaema:, ebene ebete idoko moto guamo tote Yonekono wato ebo notowamidamiya. <sup>28</sup> Ebene ebete wato kawatamo niyatite buweletamo dadaiya, ebete lawete ebenu menokotamo gito nikamiya. <sup>29</sup> Ebe tetelo Yoneko waloma:tapiate ebe tanalo dolowiya, iba:te ebenu apenomo pelawete nokola bobo magumamo gito niyatiya.

*Ya:sute Epo Bilibilinomatamo Bae Dikalamoleni*

*Ma:t 14.13-21; Luk 9.10-17; Yon 6.1-14*

<sup>30</sup> Ebene Ya:sute daliboliya ebe waloma:tapi dubate walo ebetamo ka:pelamete, iba:te kebe iyaiya tanalo epagodolo da:nosiyodiloliya ega:walo ibi keba kunu ka:niyatulamoliye, ebe tanalo bilibilinomoma: iba:te ebe na:pa:kiyawaomiya. <sup>31</sup> Ebe tetelo epo bilibilinomate Ya:suko uima: odoliatepauilo wapata:lamitiya, ebema: Ya:suko ega:walo ebe waloma:tapi bae naoma: tete kumiya:. Ebe mabuma: ebete ibi nanaliya, “Modobola a a:ka:tuwa: diyamo: opamo tolamete ela kanamiye,” <sup>32</sup> ebene iba:te ibino peago diyamo: opo ida:mo tolaema: ebo wagilimiya.

<sup>33</sup> Wiyasiya iba:te eba tolamitalo, epo bilibilinomate ibi ulamete iyatawiya ibi piyatela:ka:. Ebema: Ya:sute kebamo ka:tutiyale, ebe iyaiya duliynomolo bilibilino epate ebe tanalo umite, iba:te paka: balado puila:ote ebe opamo dopamo gito nemaimiya. <sup>34</sup> Ebene Ya:sute ebamo da:nemaigiya, epo bilibilinomo nulamete ebenu tepo magumulo ibi

kawonomamo na:nilakapoilamiya, mabu sipi-goeogoeate ulamedawa:no keba kunu kilukuline iba:te eba kunu pola:niya, ebema: ebete ibi iyaiya tanalo epetapi bilibilinomo eba iyatulamelo, <sup>35</sup> iba:te adimo teta:mo ebo nemaimioniya. Ebe tetelo ebe waloma:tapiate ebetamo pelamenate ebe napananiya, “Me epoa: opola, samamo kidokomene. <sup>36</sup> Ebema: a:ma: ibi nalibola:, iba:te iyaiya duliyoumolamo ega:walo ea:ge motamo tolamete bae ka:nuwateoma:.”

<sup>37</sup> Ya:sute wiyasiya ibi nanaleni, “Ao, la:le iba:tamo nao inamabu nikalam-ola:la:.”

Ebene iba:te ebe nalateda:niya, “A tolamete kapiya ulamano woko wiya maniamo bae uwateote, iba:tamo ebo ba:kikalamolema:? Ao, a modoboa:!”

<sup>38</sup> Ebene Ya:sute ibi nalateda:leni, “La:godolo kebalata baete ka:pola:nale? La: tolama:wete na:nulama:la:.”

Iba:te ulamenate negelaniya, “Agodolo paibu bae ega:walo namo netewa ba:pola:na:.”

<sup>39</sup> Ebene ebete ebe waloma:tapi nanaleni, “Epo nanala:la: iyaiya taneba osiyodilolete wade uwagolo kilukulioma:.” <sup>40</sup> Ebema: epate iyaiya taneba bilibilinomo osiyodilolenate ebo pola:niya, taneba idi magumulo 100, taneba idi magumulo 50, eba kunu ilukulioniya. <sup>41</sup> Ebene Ya:sute paibu bae ega:walo namo netewa uwatenate, Unu Duliyoumolamo melenalo Godotamo kalakala tabo genate bae wakalamiolenate ebe waloma:tapiatamo gito ikalameni iba:te epatamo kikalamolenama:, ega:walo ebete atu gabodo namo netewa kuwatenate epo bilibilinomatamo ebo kikalamoleni. <sup>42</sup> Ebe tetelo epo bilibilinomate bae denaoniya ibino bae kape tanalo ebo olopoligolameni. <sup>43-44</sup> Nanitabola, ebe bae 5,000 dubate naoniya, ebene da:luliniya ebe bae apuapuamo ega:walo namo apuapuamo Ya:suko waloma:tapiate 12 bagowo ebe owiyaoleniya.

*Ya:sute Obo Unudo Da:toni*  
*Ma:t 14.22-33; Yon 6.15-21*

<sup>45</sup> Ebe tetenomolo Ya:sute epo eba alibolenalo ebe waloma:tapiatamo negeni, “Pe lawa:wete Ga:lili Paka: apuamo na:na:iwala:la: Betasaida duliyoumolamo,” <sup>46</sup> ebene ebete ibi bilibilinomo alibolenate, ebete damela unamo gito nodoloni Godago tabo ka:negelanama:.

<sup>47</sup> Didokoni waloma:tapiate peago paka: tulitulinomodo eba tolamenalo, wiyasiya Ya:sute damelalo a:ka:tuwa: okolini. <sup>48</sup> Ebete ibi ulameni, iba:te pe elawonomamo dabidiloniya wiyasiya ibino elawo ka:modoboniya: mabu awate ibi nodiyoboleni, ebema: idoko tetelo egela walo tatalima: eba eda:nalo, ebete obo unudo iba:tamo ebo toni ibino ololo apudo ka:petonama:. <sup>49</sup> Wiyasiya ebete obo unudo eba tonatolo, iba:te ebe uminate oboloma: gelanate ebo gelatepaoniya, <sup>50</sup> mabu ibi bilibilinomate kubanomamo toletoleoniya.

Ebe tetenomolo Ya:sute ibi nanaleni, “Na Ya:sutela, la: ka:toletoleonala:!” <sup>51</sup> ebene ebete penate ibino peamo da:poloni awate gito olopoligoni. Ebe tetelo ebe waloma:tapiate kawonomamo anoanoniya, <sup>52</sup> mabu iba:te ibino tepo magumulo kodakodama: eda:onamiya, iyo, ebe mabuma: Ya:sute epo bilibilinomatamo bae dikalamoleni, iba:te ebe anoano tanalono magumu ibino wokiamo nipo wadiniya.

*Ya:sute Genasalete Opolo Temetema:gopi Wadekobi Da:midiolenaki*  
*Ma:t 14.34-36*

<sup>53</sup> Ebene iba:te duiya tetelo paka: apuamo da:na:iwaliya Genasalete opono pe boboamo pe gito na:iliya. <sup>54</sup> Iba:te pene damelamo da:nodoloiya, piyate



ebolo da:pola:niya ebe epate Ya:sukono tanalo samonomamo iyatawaote,  
<sup>55</sup> iba:te ebe opono iyaiya duliynomolamo na:puila:iya epo epetapi ebenu  
 pe tanalo kananalema:. Nanitabola, Ya:sute kebe duliynomololo da:lutanaki,  
 epate ebe tanalo dolowinakiya temetema:gopi ketago ebo magatalenakiya.  
<sup>56</sup> Iyo, Ya:sute kebe iyaiya depeso ega:walo kawokawo duliynomolo ega:walo  
 tumu motamo da:tonaki, epate ibino temetema:gopi ebamo demagatale-  
 nakiya, iba:te ibi ebe iyaiya duliynomolono inamabu olowame baiamo eba  
 nowadilatililo ebe ebo na:toweomenakiya temetema:gopiate ebenu kaliku  
 kologiona:. Ebema: nanitabola, piyate ebenu kaliku dologionakiya, iba:te  
 wadekobi ebo olowionakiya.

## 7

### *Yu Epono Ewonino Iyatulame Tanalo*

#### *Ma:t 15.1-9*

<sup>1</sup> Ebene Pa:lisi tanebapi ega:walo Godokono Totomu iyatulamepi magu-  
 mulu piyate Yelusalema kawo duliynomololo woko dosiyodilolenamiya, ibi  
 epetapiate Ya:sutamo kapimiya da:pelamiya, <sup>2</sup> iba:te ebenu waloma:tapi  
 epetapi pulamiya, iba:te koto ukulaolea:no bae denautiya. Me gabodo iba:te  
 Pa:lisi tanebapino totomu tabo ida:mo ka:tudiliya:.

<sup>3</sup> Numa:la:, Yu epo bilibilinomono ewoniate ibi diyatulamenamiya, ibi  
 bilibilinomate ebe atu wokilo eba ilukulinalo ebo osiyodilolenaka, ega:walo  
 Pa:lisi tanebapiate ebe ewonino totomu tabamo atumu wadenomamo  
 ka:tudila:ona, kebako totomu da:pesonomo idi iba:te kadikamidalena:. Me  
 mabuma: ibino koto wadenomamo ukulaolea:no iba:te bae a:kenaoma:na:,  
<sup>4</sup> ega:walo nao inamabu olowame bailo duwateoma:na: iba:te ebe inamabu  
 ukulaolea:no a:ka:penaoma:na:. Nanitabola, iba:godolo obo nio kalili  
 ega:walo iyaiya okalimiono kalili ukulaole totomuatae ba:ka:pola:na, iyo,  
 ma kunu ibino ewoniate iba:tamo dikalamoliya, ebakobako totomu epetapi  
 bilibilinomo iba:godolo ba:pola:na.

<sup>5</sup> Ebema: Pa:lisi tanebapiate Godokono Totomu iyatulamepiago Ya:suko  
 nalatediya, “Beda: mabuma: a:ma: waloma:tapiate aimano ewoniate dege-  
 lanakiya ebe totomuamo ka:tudila:ona:, wiyasiya ibi a:ka:tuwa: ibi kubail-  
 amete koto ukulaolea:no bae ebo naonaka?”

<sup>6</sup> Ya:sute iba:tamo negiya, “La: mena netewa epolata! Godokono  
 woki awokalimidawa Aisayate la:imano tanaloma: dopamo nani tabo  
 da:kiyawaiya, Godokono Bukalo ebe tabote ma kunu itana,

‘Me epate na tabamo amamanatenena,  
 wiyasiya ibino tepo magumuno woki  
 na niyakabolo ka:pola:na,  
 mulunomolo ba:na:pola:na.

<sup>7</sup> Iba:te naimano mailo unamo nadipatena,  
 wiyasiya nanitabo tanalo puliyala,  
 iyo, iba:te me opo epono totomu  
 Godokono Totomunomoma: midilite  
 ebo iyatulamenaka.’”

<sup>8</sup> Ebene Ya:sute walo na:kegiya, “Aisayakono tabo nanitabonomola, mabu  
 la: Godokono Totomu Tabonomo a:miyapiyamata, wiyasiya epate degelana  
 ebe totomuamo tudila:onamata.

<sup>9</sup> “La: mulo eponomolata! La: Godokono Totomu Tabonomo iyaba-  
 iamo eba alomonalo, wiyasiya la:imano ewoniate degelanakiya la: ebe

iyaiya tanalo kapiya osiyodilolenakomata. <sup>10</sup> Numa:la:, Godokono Bukalo Mosesete negiya, ‘La:imano menokobila nabila nowalubila:la:,’ ega:walo ebete na:kegiya, ‘Kebe lumagite ebeno menoko o nabiwino tanaloma: kuba tabo da:kiyawaomene, la:le ebe nanakapumiyala:.’ <sup>11</sup> Wiyasiya la: me Godokono tabo iyabaiamo alomawete negelanamata, ‘Lumagigodolo da:pola:na ebeno menokola nabiwila walubilima:, ebete iba:tamo ikalaema: ubia:noma: deda:mene, kuba:nola. Ebete gito kegemene, ‘Me inamabu talenala, nale Godotamo ikameote me inamabuamo naimano menokola nabiwila a:kowalubilimo.’ <sup>12</sup> Ebema: la: ebako kuba woki lumagi nemalionakomata, ebete ebeno menokola nabiwila kowalubilina:. <sup>13</sup> Iyo, me gabodo la:imano iyatulame tanalate Godokono nani tabo iyabaiamo alomona, ebene la:le ebe atu kuba woki gabodo iyaiya tanalo epetapi bilibilinomo na:kosiyodilolenamata.”

*Epo Da:kubailamenaka Ebe Iyaiya Tanalo*

*Ma:t 15.10-20*

<sup>14</sup> Ebene Ya:sute epo ebetamo walo keka:la:mite iba:tamo negiya, “La: bilibilinomo naimano tabo olowiawete, woki wadenomamo na:tuputupuilama:la:. <sup>15</sup> Lumagi niyakabolo ditana ebe inamabute ebe magumamo opegate ebe a:ka:kubaimene, wiyasiya lumagino tepo magumune da:pemaima:na: ebe tanalate ebe ka:kubaima:na:. <sup>16</sup> Galagodawa, a:ma: wadenomamo nolowia!”\*

<sup>17</sup> Ebene Ya:sute epo miyapate moto guamo da:nodoliya, ebe waloma:tapiate ebete beda: tabo kegiyale, ebe tabono magumuma: ebe nalatediya. <sup>18</sup> Ebete iba:tamo negiya, “Epetapiate woki wadenomamo ka:tuputupuilamena:, la: atumu. La: iyatawala:ka:? Nao inamabute lumagino tepo magumamo opegate ebe a:ka:kubaimene, <sup>19</sup> mabu nao inamabute lumagino woki mabuamo ka:tuta:, wiyasiya wapuamo tuta ebene neago ka:penemaigamene.” Ebema: nanitabola, Ya:sute me tabamo nao inamabuno talena bilibilinomo iyabaiamo alomonomo alomiya.

<sup>20</sup> Ebene ebete walo na:kegiya, “Numa:la:, lumagino tepo magumune da:pemaimioma:na: ebe tanalo kapiyate ebe ka:kubaima:na:, <sup>21-22</sup> mabu lumagino tepo magumune iyaiya kuba wokino tanalate pemaiminaka, ebene ebe kuba wokine me kawokawo kubate ka:pemaiminaka – buwele pilo tanalo ega:walo lumagi idino kamiyale pilo tanalo, inamabu pilo tanalo ega:walo lumagi idino inamabu ubi tanalo, dowo tanalo ega:walo lumagi anakapumi tanalo, elemasigi tanalo ega:walo lumagino mailo kubaimi tanalo, apa:mo kuba osiyodilole tanalo ega:walo iyaiya kuba olelo osiyodilole tanalo, amama tanalo ega:walo daedale wokino tanalo. <sup>23</sup> Iyo, nanitabola! Me kuba bilibilinomate lumagino tepo magumune pemaimite lumagi ebo ka:kubaima:na:.”

*Taya Duliyomolo Kamiyaleno Nanitabokobi Midi Tanalo*

*Ma:t 15.21-28*

<sup>24</sup> Ebene Ya:sute ebe opo atepate Taya kawo duliyomolono opamo gito tiya. Ebe tetelo ebe ubia:nola ebete kebe motamo da:nodoliya epate iyatawaoma:, wiyasiya iba:te ebe moto samamo iyatawiya. <sup>25-26</sup> Ebema: ebe opo kamiyale idi, ebeno buwele da:peso kuba uliyanagonola, ebete Ya:sukono tanalo olowite ebetamo pete ebeno agowa mabuamo eba pa:tuduwatalo ebe ebo petoweomiya, ebete ebeno buwelegodone kuba uliyana kaliboma:. Wiyasiya me kamiyale Yu lumagia:, <sup>27</sup> ebema: Ya:sute

\* **7:16:** Mak 7.16 buka apuno tabo Makate bukamo kakuloliya:, wiyasiya ebeno buka osiyodilo walogabo apune nanitabokobi mididawa idite akuloliya.

ebetamo negiya, “Mabu keleka: nale a:ma: owalubima: degeawita? Epate dopamo ibino guda:tamo bae nikalaema:na:. Modoboa: iba:te gudino bae epetapiatamo gito ikalaema:, mabu ebe osiyodilo tanalo ebe gaagaatamo ikalame tanalo keba kunula:ka: eba kunula.”

<sup>28</sup> Ebete wiyasiya Ya:sutamo negiya, “Kawodawa, a:ma:le degeawa: nanitabola, wiyasiya guda:te opamo diyalekenaka, ebe bae apuapu gaagaate naoma: modobola!”

<sup>29</sup> Ebene Ya:sute ebetamo negiya, “Mabu a:ma: eba kunu egeata, a:ma: kalakalago motamo na:toa. Kuba uliyanate a:imano buwelegodone a:nemaiga.”

<sup>30</sup> Ebene ebe kamiyaletete motamo tote ebenu buwele ebo numiya, kuba uliyanate ebegodone iyalo nemaigate, ebete ketalo watiti.

*Ya:sute Galo Tamiome Ega:walo Tabo Kiyawaoa: Dubu Wadekobi Da:midia*

<sup>31</sup> Ebene Ya:sute Taya opo atepate Saidono kawo duliynomolamo tote, ebete Teni Duliynomolono opodo ka:petote Ga:lili Paka:mo walo gito ka:nemaigiya.

<sup>32</sup> Ebe tetelo epate galo tamiome ega:walo tabo kiyawaoa: dubu Ya:sutamo magaete ebe na:petoweomiya ebete ebenu koto ebe dubutamo kowatima:.

<sup>33</sup> Ebene Ya:sute ebe dubu epagodone kela:mo iyabaiamo magatate, ebenu koto dubuno galo magumamo ebo nowodolataoliya, ebene ebete ebenu kotamo kowe meamidate dubuno mena ebo ologimiya. <sup>34</sup> Ebe tetelo Ya:sute Unu Duliynomolamo melelo, ela agolamidalo Yu epono tabamo negiya, “Epa:ta!” me tabono magumu ma kunu itana, “Na:totokoliala!”

<sup>35</sup> Ebema: ebe dubuno galote totokoliyaote ega:walo ebenu menate wadekobi dolowiya, ebete tabo wadenomamo ebo kiyawaiya. <sup>36-37</sup> Epate ebe tanalo dumiya iba:te anoanolo kawonomamo negeliya, “Ya:sute tanalo bilibilinomo wadenomamo osiyodilolenako. Numa:la:, ebete galo tamiolamepi tabo olowioma: wadekobi na:midiolena, ega:walo atumu tabo kiyawaoa:pi tabo kiyawaoma: wadekobi na:ka:midiolena!”

Ebene Ya:sute ibi kawonomamo analiya, “La:le epo epetapiatamo me tanalo akoawokalima:la:!” Nanitabola, iyaiya tete epetapilo Ya:sute epo ma kunu analenaki, wiyasiya iba:te ebenu tabamo tudila:oa:no ebenu osiyodilole tanalo gito nawokaliminakiya.

## 8

*Ya:sute Epo Bilibilinomatamo Bae Walo Da:kikalamoliya*

*Ma:t 15.32-39*

<sup>1</sup> Ebe tetelo epo bilibilinomate Ya:sutamo pelamete walo kapiyama: na:ka:pediya, ebenu ibino baete dolopoligolamiya Ya:sute ebe waloma:tapi ebetamo ka:la:mite ibi nanaliya, <sup>2</sup> “Na me epo na:nilakapoilamitamamo, mabu iba:te nago netewa-kapiya egela dilukulinata: ibino bae olopoligolami. <sup>3</sup> Na ibi baea:no ibino duliynomolamo dalibolemo, diyala, gabo tetelo elawoa:noma: da:ba:neda:oma:na:, mabu ibi epetapiate mulunomone pelamoliya.”

<sup>4</sup> Wiyasiya ebe waloma:tapiate ebetamo negeliya, “Me baea: opola. Ale me epo bilibilinomatamo bae ikalamolema: modoboa:.”

<sup>5</sup> Ebene Ya:sute ibi nalateda:liya, “La:godolo kebalata baete ka:pola:nale?” Iba:te negeliya, “Sebeni.”

<sup>6</sup> Ebene Ya:sute epo opamo kilukulima: danaliya, ebe tetelo ebete ebe sebeni bae apuapu uwatete Godotamo kalakala tabo ebo giya, ebenu ebete wakalamiolete ebe waloma:tapiatamo gito ikalamiya iba:te

epatamo kikalamolema:.<sup>7</sup> Ega:walo iba:godolo namo egege kapiyakapiya na:ka:pola:niya, ebene Ya:sute ebe namoma: Godotamo kalakala tabo kegete, ebe waloma:tapi nanaliya iba:te epatamo ka:kikalamolema:.<sup>8-9</sup> Ebe tetelo piyate ebe bae denaiya ibino bae kape tanalo ebo olopoligolamiya. Nanitabola, ebe bae 4,000 epate naiya, ebene da:luliya ebe bae apuapuamo Ya:suko waloma:tapiate sebeni bagowo ebe owiyaoliya. Ebene Ya:sute ebe epo ibino iyaiya duliynomolamo daliboliya,<sup>10</sup> ebe tetenomolo ebete ebe waloma:tapiago peamo olote Da:lamanuta opamo gito tolamiya.

*Pa:lisi Tanebapiate Anoano Tanalo Uima: Ya:suko Daniya*

*Ma:t 16.1-4*

<sup>11</sup> Ebene Pa:lisi tanebapi epetapiate Ya:sutamo pelamete ebe napapaminatiya. Ibi ubila ebe kuba gabamo kowabuga:tama:, ebema: iba:te ebe naniya, “A:ma:godolo Godokono elawo ditana, ebe tanalo awokalima: anoano tanalo idi atamo nosiyodila.”

<sup>12</sup> Ebene Ya:sute ebene tepo magumulo ela kawonomamo agolamidalo negiya, “Mabu keleka: me tete epate anoano tanalo dowadina? Na la:tamo nani tabo gemo, Godote ebene elawo awokalima: me tete epatamo anoano tanalo a:kikalaemene!”<sup>13</sup> Ebene ebete ibi ubia:noma: eda:lo peamo olote paka: apuamo walo na:ka:na:iwiya.

*Pa:lisi Tanebapi Ega:walo Elodiko Ibino Amama Tanalo*

*Ma:t 16.5-12*

<sup>14</sup> Ga:lili Paka: a:iwale wagilimia:no Ya:suko waloma:tapiate bae uwate tanalo na:dodomatiya, ebema: iba:godolo kapiya baenomote itani pe gulo.

<sup>15</sup> Ebene Ya:sute ibi kawonomamo analiya, “La: wadenomamo nolowiala! Palowa baete a:ka:tuwa: unamo demaiga, Pa:lisi tanebapi ega:walo Elodiko ibino amama tanalo eba kunula. Eiyee, mako amama tanalote la:tamo akopemaigala!”

<sup>16</sup> Ebema: iba:te ibino taneba magumulo tabo ma kunu geliya, “Ebate atamo me tabo nege mabu a baea:nola.”

<sup>17</sup> Wiyasiya iba:te tabo degelitiya Ya:sute iyatawate iba:tamo negiya, “La:le baea:no pola:na tabo beda:ma: kegelawitama? La:le naimano nanitabo tanalo wadenomamo kuma:wena: ega:walo kiyatawawena: Mabu keleka: la:le la:imano tepo magumu da:kodakodailama:wenama?<sup>18-19</sup> La: balida:gopilata wiyasiya la: kuma:wena:, iyo, la: galagopilata wiyasiya la: kolowiawena:. Nale adimo idilo paibu bae 5,000 dubatamo dowakalamiolelaimo, me tanaloma: la:godolo woki ba:kitanale? Ebe tetelo la: bae apuapuamo kebalata bagowo kowiyaola:wenima?”

Iba:te ebetamo nowamiya, “12 bagowola.”

<sup>20</sup> “Ega:walo egela idilo nale sebeni bae 4,000 epatamo da:kowakalamiolelaimo, ebe tetelo la: bae apuapuamo kebalata bagowo kowiyaola:ima?”

Iba:te ebetamo nowamiya, “Sebenila.”

<sup>21</sup> Ebema: Ya:sute iba:tamo walo na:kegiya, “Mabu keleka: la:le naimano tanalo nanitabolo kiyatawawena:?”

*Ya:sute Balidi Tamio Dubu Wadekobi Da:midia*

<sup>22</sup> Ebene iba:te Betasaida duliynomolamo da:nemaimiya, epo epetapiate balidi tamio dubu Ya:sutamo magaete, ebe ebo petoweomiya ebete ebe kologima:.<sup>23</sup> Ebene Ya:sute balidi tamio dubu kotamo lawete duliynomolone kela:mo magatate, ebete ebene balida:mo kowe alomomete ebene koto watililo ebe nalatediya, “A:ma: inamabu na:kulama:wita?”

<sup>24</sup> Ebe dubute melete negiya, “Na epo dowapata:lamita nulamitamo, wiyasiya ibi kewamula.”

<sup>25</sup> Ebene Ya:sute ebenu koto ebe dubuno balida:mo walo da:kowatiliya, ebete kawonomamo melete ebenu balidite wadekobi ebo olowiomiya, iyo, ebe tetelo ebete inamabu bilibilinomo wadenomamo ebo ulamoliya.

<sup>26</sup> Ebene Ya:sute ebe naniya, “A:imano motamo tonomo na:toa, me duliyo omolamo walo akopa:la.”

*Pitate Ya:sukono Nanitabo Tanalo Dawokalimiya*

*Ma:t 16.13-20; Luk 9.18-21*

<sup>27</sup> Ebene Ya:sute ebe waloma:tapiago Sisaliya-Pilipai opono iyaiya duliyo omolamo eba tutalo, gabo tetelo ebete ebenu waloma:tapi nanalateda:liya, “Epate na poma: kegelanake?”

<sup>28</sup> Iba:te negeliya, “Epetapiate a:ma: Yoneko obamo waduba:midaoledawama: gelanaka, epetapiate a:ma: Elayako Godokono woki awokalimidawama: gelanaka, ega:walo epetapiate a:ma: Godokono woki awokalimidawa idima: gelanaka.”

<sup>29</sup> Ebene Ya:sute ibi nalateda:liya, “Wiyasiya la:le na poma: ka:midina:wenama?”

Pitate ebetamo nowamiya, “A:ma: Kelisotela, Godokono Alibodawalata!”

<sup>30</sup> Ebene Ya:sute ebe waloma:tapi kawiya analiya, “La:le naimano tanaloma: epetapi akokiyawaolama:la.”

*Ya:sute Ebenu A:e Tanaloma: Dopamo Degiya*

*Ma:t 16.21-28; Luk 9.22-27*

<sup>31</sup> Ebene Ya:sute ebe waloma:tapi eba iyatulamitalo negiya, “Epono Naniwi epagodone kawokawo temeteme walone kuwatemene, Godokono ubila. Iyo, Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi iba:te ebe ubia:noma: keda:oma:na:, ebenu epate ebe kanakapuima:na: wiyasiya netewa-kapiya egelalo ebete a:ene walo ka:kemaigamene.”

<sup>32</sup> Ebete me tabo iba:tamo degiya, Pitate Ya:suko waloma:tapi epetapi-agodone kela:mo magatate ebe tabono tanaloma: ebe kawiya ebo naniya.

<sup>33</sup> Ebene Ya:sute olobigate, waloma:tapi epetapi ulamete Pitako kawonomamo analo negiya, “Pita, a:ma: Saitanako keba kunula:ka: eba kunula! Na natepana: mabu a:imano woki Godotamo kiyata:wita:, a:ma: epono wokilo okolinata!”

<sup>34</sup> Ebema: Ya:sute epo bilibilinomo ebe waloma:tapiago ebetamo ka:la:mite ibi nanaliya, “Kebe lumagite na waloma:enema: ubi diyatimene, dopamo ebete ebenu tanalo dodolomatilite ebenu kewa olotolowa agute na ebo nowaloma:enemene. <sup>35</sup> Nanitabola, kebe lumagite ebenu igilo nagodone damoeda:mene ebenu igilote kalatidimene, wiyasiya kebe lumagite Godokono Wade Tabo kiyawaoma: ebenu igilo na mabuma: datutimene ebete nanitabo igilo kelaemene. <sup>36</sup> Ebema: lumagite opono inamabu bilibilinomo uwatenomo eba uwatelo, ebenu igilo datutimene ebe lumagino wiya keleka:?”

<sup>37</sup> Ebete ebenu igilo walo ka:kelaema: beda: inamabu na:kikaemene? Gabo puliyala, kitana: <sup>38</sup> Numa:la:, me tete epate kubakubanomoma: eda:ote, iba:godolo Godoko nanitabokobi midi tanalo puliyala. Ebema: kebe lumagite natamo ega:walo naimano taboma: dilipomene, na Epono Naniwite atumu ebetamo kilipomamo, iyo, nale naimano Nabiwino elawo alonomago ega:walo ebenu wade-talena nopopiago da:pemo, ebe tetelo ebe ka:pilipoimamo.”



## 9

<sup>1</sup> Ebene Ya:sute iba:tamo walo na:kegiya, “Na la:tamo nani tabo gemo, me tetelo dilukuliona ibi epetapiate Godokono Kawo Elawodawano tetete elawago da:pemene, ebe kawo tanalo dopamo umite walone ebo ka:elaoma:na:.”

*Godokono Elawo Alonomote Ya:sukono Ape Da:pukuimiya  
Ma:t 17.1-13; Luk 9.28-36*

<sup>2</sup> Ebene sikisi egela dolopoligiya Ya:sute Pitako, Ya:imesiko, ega:walo Yoneko damela ununomo ida:mo magataliya, iba:te a:ka:tuwa: ebolo ka:na:pola:nama. Ebe tetelo ibino dopo apulo Ya:sukono apete iyama: eba editalo, <sup>3</sup> ebena pupuliono inamabuate pukuilamete nanitabolo keyakeyanomoma: eda:omitiya, me opo kawonomolo lumagi idite kaliku ma kunu ukulalelo keyakeyanomoma: midiolema: modoboa:. <sup>4</sup> Ebene waloma:tapino ololo apuamo Moseseko ega:walo Elayako iba:te pemaimite Ya:suago tabo ebo gelitiya. <sup>5</sup> Ebe tetelo Pitate Ya:sutamo negiya, “Iyatulamedawa, ale malo da:pola:nama:, kalakala kawonomola. Modobola a nupunupu netewa-kapiya ketemotemalema:, idi a:imanola, idi Mosesekonola, idi Elayakonola.” <sup>6</sup> Nanitabola, waloma:tapiate kawonomamo toletoleutiya, ebema: Pitate woki wadenomamo malagidiloa:no ebe tabo gito giya.

<sup>7</sup> Ebene temate pete ibi dapanalopamidaliya, tabote tema magumune ma kunu piya, “Me naimano kapiya Gudunomola, na ebetamo nekalakalitamoma. La: ebena tabo nolowiala!” <sup>8</sup> Wiyasiya ebe tetelo iba:te opo samonomamo umiote Moseseko Elayako ibi walo kulamiya:, Ya:suko kapiyate iba:go ebolo utiti.

<sup>9</sup> Ebene iba:te unu damelane eba piwitiolo Ya:sute ibi napanaliya, “La:le kebe tanalo kuma:ema, ebe tanalo me tetelo epetapi akoanala:la:, wiyasiya na Epono Naniwite a:ene walo da:kemaigamo, la: epo ebo kanalemamota.”

<sup>10</sup> Ebema: iba:te ebe tanalo tepo magumamo iyatiya, wiyasiya a:ene maiga tanalono magumuma: ibino taneba magumulo gelitiya. <sup>11</sup> Ebene iba:te Ya:suko nalatediya, “Beda: mabuma: Godokono Totomu iyatulamepiate degelanaka, Elayate dopamo pete, ebena walogabo apune Kelisote ka:pemene?”

<sup>12</sup> Ya:sute iba:tamo negiya, “Nanitabola, Elayako dopamo pete iyaiya tanalo bilibilinomo ka:pa:tuputupuilaemene. Wiyasiya Godokono Bukalo tabo idi ma kunu ba:kitana, Epono Naniwi temeteme bilibilinomo kuwatemene ega:walo epate ebe ubia:noma: keda:oma:na:. Me tabono magumuma: la:imano woki keba kunu ka:pola:nale? <sup>13</sup> Na la:tamo negemo, Elayako epatamo iyalo a:pi\* wiyasiya iba:te ibino ubilo kawokawo kuba ebetamo osiyodilolenakiya, Godote ebena Bukalo dopamo degiya eba kunu.”

*Ya:sute Kuba Uliyanagono Koi Wadekobi Da:midia  
Ma:t 17.14-21; Luk 9.37-43*

<sup>14</sup> Ebene iba:te waloma:tapi epetapiatamo pemaimite, epo bilibilinomate iba:go eba pola:nalo ebo pulamiya. Ebe tetelo Godokono Totomu iyatulamepiate Ya:suko waloma:tapiago eba apamineuteitalo, <sup>15</sup> wiyasiya epate Ya:suko dumiya iba:te kawonomamo la:wa:olo ebetamo puila:ote nilakapo tabo ebo negeliya. <sup>16</sup> Ebene Ya:sute ebe waloma:tapi nalateda:liya, “Mabu keleka: la: me dubago dapamineutea:witama?”

\* **9:13:** Buka ka:la:mioledawa, modobola a:ma: me tanalo niyatawa, Ya:sute Yoneko epo obamo waduba:midaoledawano tanaloma: kiyawaiya.

<sup>17</sup> Ebe tetelo epo bilibilinomo magumulo lumagi idite Ya:sukono tabo eba wiyalo negiya, “Iyatulamedawa, na naimano gudu a:ma:tamo emaga:kamo mabu ebe kuba uliyante lawenako, ebema: ebe tabo kiyawaoma: mod- oboa:.” <sup>18</sup> Kebe tetelo kuba uliyante ebe walo da:kelawemene opamo ka:peneba:idilomene, ebene ebete lalo eba oliomolelo pakote ebene tabo magumune pemaimiomete, ebene apete kodakodanomoma: ebo keda:mene. Nale a:ma: waloma:tapi anala:kamo iba:te kuba uliyana kali- boma:, wiyasiya iba:godolo elawo puliyala.”

<sup>19</sup> Ebema: Ya:sute iba:tamo negiya; “Eiye, la: nanitabokobi midia: epolata! La: natamo mibo ikanamenamata, ebema: na ubia:nola tete geyageyalo la:go okolinama:! La: koi natamo nemaga:la!”

<sup>20</sup> Ebene iba:te ebe koi Ya:sutamo demagatiya, kuba uliyante Ya:suko umite koi kubanomamo ebo lawiya. Koite opamo gate wageleolo eba igiligautalo ebene tabone pakote pemaimiomitiya. <sup>21</sup> Ebe tetelo Ya:sute koino nabiwi nalatediya, “Ebe me tanalo kebako tetelo kowagilimile?”

Ebete nowamiya, “Gudu da:peso tetelo wagilimi. <sup>22</sup> Tete bilibilinomolo kuba uliyante ebe elamo keba:idilo, ega:walo obamo keba:idilo, eba kunu amitina ebe kanakapuima:. Ebema: a:imano elawo tanalo modobola:ka: a kowalubima:? Elawote modobolo ditametana, a nilakapoiamelolo ebe nowalubiye.”

<sup>23</sup> Ya:sute ebetamo negiya, “Mabu keleka: a:ma:le naimano elawo tanaloma: danana:wa:? Me tanalo naimano tanaloma:, ebe a:imano tanaloma! Modobola a:ma: Godoko nanitabokobi na:mida:, ebene a:ma:godolo elawo bitanamene iyaiya tanalo bilibilinomo osiyodilolema:.”

<sup>24</sup> Ebe tetenomolo koino nabiwite kawonomamo negiya, “Na nanitabokobi na:miditamo wiyasiya naimano nanitabokobi midi tanalo da:pesola. Kawokobi na:midinama:!”

<sup>25</sup> Ebene epo epetapi bilibilinomate eba pelamenapelo, Ya:sute ibi ulamete kuba uliyana kawiya analo negiya, “Taboa:dawa ega:walo galo tamiome uliyana, nale a:ma: nanamata, ebegodone nemaigawete na:toa! Walo ebetamo akopopegala:!”

<sup>26</sup> Ebe tetelo kuba uliyante kawiya gepatelo koi opamo ba:idilote, ebene koite kubanomamo wageleolo kuba uliyante ebegodone da:nemaigiya, ebete a:emu ebo kapitani. Ebe mabuma: epetapiate negeliya, “Ebe a:e,” <sup>27</sup> wiyasiya Ya:sute ebe kotamo lawete dadipatiya ebe ebo maigiya.

<sup>28</sup> Ebene Ya:sute moto guamo da:nopegiya, epo epetapino pola:na: tetelo ebe waloma:tapiate ebe nalatediya, “Mabu keleka: ale kuba uliyana ali- boma: ka:modobaka:?”

<sup>29</sup> Ebete ibino tabo eba wiyalo negiya, “Kebe dawate ebene okoli magumulo Godago tabo degelanaka, ebe kapiyate mako kuba uliyana kalibomene.”

*Ya:sute Ebene A:e Tanaloma: Walo Da:kegiya*

*Ma:t 17.22-23; Luk 9.43-45*

<sup>30</sup> Ebene iba:te ebe duliomolo atepate Ga:lili opodo eba petolamelolo, Ya:suko ubia:nola ebete kebolo ka:lutiyaale epate iyatawaoma:, <sup>31</sup> mabu ebete ebe waloma:tapi iyaiya tanalo epetapi iyatulamiti. Ebete ibi iyatulamelolo negiya, “Godote Epono Naniwi kubakuba epono kotamo kiyatimene, ebene iba:te ebe kanakapuima:na:, wiyasiya ebete netewa-kapiya egelalo a:ene walo ka:kemaigamene.”

<sup>32</sup> Wiyasiya Ya:sute degiya ebe waloma:tapiate ebe tabono magumu wade-nomamo kemalagidilutiya:, ebema: iba:te me tanaloma: Ya:suko alateda:ma: na:toletoleutiya.

*Kawodawama: Potele Na:keda:mene*

*Ma:t 18.1-5; Luk 9.46-48*

<sup>33</sup> Ebene iba:te Kapeniyama duliyo molamo da:pelamiya, Ya:sute moto guamo nodolote ebe waloma:tapi ebo nalateda:liya, “Gabo tetelo la: beda: mabuma: kegelawitakama?”

<sup>34</sup> Iba:te tabo kowaimiya: mabu iba:te ibino taneba magumulo potele kawoma: eda:ma: apamineuteutiya. <sup>35</sup> Ebe mabuma: Ya:sute okolite ebena 12 waloma:tapi ebetamo ka:la:mite iba:tamo negiya, “Kebe lumagite kawoma: eda:ma: ubi diyatimene, ebete ebe a:ka:tuwa: walogabodawama: midite epetapino wiya: wokodawama: neda:mene.” <sup>36</sup> Ebene Ya:sute gudu da:peso lawete ibino tetenomamo adipite, ebe kotamo eba a:wiyamidalo iba:tamo negiya, <sup>37</sup> “Kebe lumagite naimano mailamo mako gudu da:peso kalakalago dowalubina ebete na walubinina, ega:walo kebe lumagite na dowalubinina ebete na kapiya kowalubinina:, ebete na Alibonedawa Godoko atumu na:kowalubina.”

*Ago Gowelaoa:dawa Ebe A Walubidawama: Eda:na*

*Luk 9.49-50*

<sup>38</sup> Ebene Yonete Ya:sutamo negiya, “Iyatulamedawa, ale kapiya dubu uima:, ebete a:imano mailamo kubakuba uliyana daliboliti, wiyasiya ale ebe kawiya anima: ebe tanalo katepama: mabu ebe aimano taneba lumagia:.”

<sup>39</sup> Wiyasiya Ya:sute iba:tamo negiya, “La:le ebe ako-odiyobala:. Kebe lumagite naimano mailamo anoano tanalo dosiyodilomene, ebe lumagite tote naimano tanaloma: kuba tabo a:ka:nikiyawaomene, <sup>40</sup> mabu nanitabola, kebe lumagite ago gowelaoa:dawama: deda:na, ebete a walubina. <sup>41</sup> Nale la:tamo nani tabo gemo, la:le na Kelisokono epoma: deda:wenama, ebe mabuma: idawate obo la:tamo dikalametamene, ebete Godogodone delaemene ebe wade wiyate akalatidimene.”

*Kuba Gabamo Wabuga:ta Tanalo*

*Ma:t 18.6-9; Luk 17.1-2*

<sup>42</sup> Ebene Ya:sute walo na:kegiya, “Da:peso gudute na nanitabokobi eba midininalo, kebe lumagite ebe kuba gabamo dowabuga:tana, modobola epate ebe lawete ebena kuwokoba:mo kawo nokolanomo ma:midaomete kewa: kolomamo neba:idiloma:na:, ebete atu kuba tanalo gudu iditamo osiyodilokapoma:. <sup>43</sup> Ega:walo a:imano kotote a:ma: kuba gabamo dowabuga:tana, notowamida! Modobola a:ma:le kapiya kotago Godokono Igilo Duliyo molamo nopegama:, modoboa: koto netewago Ela Opamo toma:. Nanitabola, ebe opolo elate uwomua: tetelo nowaena, <sup>44</sup> ebolo a:elao epono ape denalenaka ebe ea:ga:te ka:elaona:, ega:walo elate ka:egana:† <sup>45</sup> Ega:walo a:imano agowate a:ma: kuba gabamo dowabuga:tana, notowamida! Modobola a:ma:le kapiya agowago Godokono Igilo Duliyo molamo nopegama:, modoboa: agowa netewago Godote a:ma: Ela Opamo neba:idiloma:. <sup>46</sup> Ebolo a:elao epono ape denalenaka ebe ea:ga:te ka:elaona:, ega:walo elate ka:egana:. <sup>47</sup> Ega:walo a:imano balidite a:ma: kuba gabamo dowabuga:tana, nemagoba:! Modobola a:ma:le balidi kapiyago Godote Kawo Elawodawama: deda:na ebe duliyo molamo nopegama:, modoboa:

† 9:44: Mak 9.44 ega:walo Mak 9.46 buka apuapuno tabo Makate bukamo kakuloliya:, wiyasiya ebena buka osiyodilo walogabo apune nanitabokobi mididawa idite akuloliya.

balidi netewago Godote a:ma: Ela Opamo neba:idiloma:. <sup>48</sup> Ebolo a:elao epono ape denalenaka ebe ea:ga:te ka:elaona:, ega:walo elate ka:egana:.”

<sup>49</sup> Ebene Ya:sute tabo idi ma kunu kegiya, “Epate solu baeamo keba kunu kalomonake, Godote epo bilibilinomono ilukuli tanalamo ebena ela eba kunu kapalomolaemene.

<sup>50</sup> “Solu wadenomola, wiyasiya lumagi idino solu golate dalatidimene, a:ma:le walo solukobi midima: a:ka:modoboaemene. Ebema: Godokono solute la:imano taneba magumulo nitanamene, iyo, modobola idite idi nilakapomilo eba kunu nilukuliniyala:.”<sup>‡</sup>

## 10

### *Kamiyale Alibuti Tanalo*

*Ma:t 19.1-12; Luk 16.18*

<sup>1</sup> Ebene Ya:sute Ga:lili opo atepate Yudiya opodo petote Yodane Kolomo apuamo gito nemaigiya. Ebe tetelo epo bilibilinomate ebetamo walo da:ka:pelamiya, ebena ebete ibi walo na:kiyatulamiya mabu ebena osiyodilo tanalo ma kunula.

<sup>2</sup> Ebene Pa:lisi tanebapi epetapiate pelamete, Ya:suko kuba gabamo ka:powabuga:tama: ebe napalatediya, “Dubute ebena kamiyale dalibutimene, Godokono Totomu Tabo bakadikanalemene?”

<sup>3</sup> Ya:sute wiyasiya iba:tamo negiya, “Mosesete la: beda: totomu tabo kanaletiyala?”

<sup>4</sup> Iba:te negeliya, “Dubute ebena kamiyale alibutima: Mosesete gabo atamo ma kunu osiyodiliya, dubute ebena ubi diyatimene, ebete kamiyale alibuti pepa osiyodilote ebetamo gito kikaemene.”

<sup>5</sup> Ebene Ya:sute iba:tamo negiya, “Mabu la:imano tepo magumu kodakoda-ibinomola, Mosesete kamiyale alibuti tabo Godokono Bukamo ebema: iyatiya. <sup>6</sup> Wiyasiya numa:la:, dopamo Godote me opo dosiyodiliya, ebe tetelo ebete dubula kamiyalela osiyodiloliya. <sup>7</sup> Me mabuma: dubute ebena nabiwila menokola miyapate ebena kamiyala:go kapiya bailo kokolioma:na:, <sup>8</sup> ebena ibi netewapiate kapiyama: eda:te walo iyama: a:keda:ma:na:. Iyo, ibi kapiyanomola. <sup>9</sup> Numa:la:, Godote ibi netewapi kapiyakobi a:midiliya, ebema: lumagite ibi iyakobi midilima: modoboa:.”

<sup>10</sup> Walone moto gulo Ya:suko waloma:tapiate ebe tabono magumuma: ebe danalatediya, <sup>11</sup> ebete iba:tamo ma kunu giya, “Kebe lumagite ebena kamiyale alibutite kamiyale idi daidimene, ebete Godokono ololo apulo ebe kamiyale pilolo kaidimene, <sup>12</sup> ega:walo kebe kamiyaletete ebena dubu alibutite dubu idi delaemene, ebete ebe dubu atumu pilolo kelaemene.”

### *Ya:sute Guda:tamo Koto Dowatiolelamiya*

*Ma:t 19.13-15; Luk 18.15-17*

<sup>13</sup> Ebene epo epetapiate ibino gudi Ya:sutamoma nemagataliya, ebete iba:tamo koto eba watiolelanelo Godoko kanama: ebete ibi wadenomamo kowalubilinama:. Wiyasiya ebe waloma:tapiate ebe epo kawiya analolo ibi dodiyoboliya, <sup>14</sup> Ya:sute ibino osiyodilo tanalo umite iba:tamo dowalo negiya, “Gudi natamo pelaema: modobola. Ako-odiyobola:la:, mabu mako epate Godote Kawo Elawodawama: deda:na ebe duliynomolamo ka:nopilaoma:na:. <sup>15</sup> Na la:tamo nani tabo gemo, kebe lumagite gudu da:pesomu aimano Kawo Elawodawa Godoko lawea:no, ebe lumagite ebena Kalakala Duliynomolamo a:ka:nopegamene.” <sup>16</sup> Ebene Ya:sute guda:tamo

<sup>‡</sup> **9:50:** Buka ka:la:mioledawa, Ya:sute degiya ebe uli tabono magumu ma kunula, solu ebe nanitabokobi mididawano okoli tanalola.

koto eba watiolelanelo Godoko ebo aniya, ebete ibi wadenomamo kowalubilinama:

*Inamabu Bilibilinomago Dubute Ya:sutamo Da:piya*

*Ma:t 19.16-30; Luk 18.18-30*

<sup>17</sup> Ebene Ya:sute maigate gabodo eba tutalo, dubu idite ebetamo na:puligate pupamo nokolite ebe naniya, “Wade Iyatulamedawa, na beda: tanalo osiyodilote uwomua: igilo ebo na:kelaemo?”

<sup>18</sup> Ya:sute ebetamo negiya, “A:ma:le na wadedawama: beda:ma: keka:na:miawa? Wadedawa idi puliyala, Godoko kapiyate wadedawanomola. <sup>19</sup> A:ma: Godokono Totomu Tabo iyatawala. Lumagi akoanakapuma:la:, lumagi idino kamiyale pilolo akolawa:la:, inamabu pilolo akouwata:la:, lumagi idino tanaloma: a:da: tabo akokiyawala:, lumagino inamabu a:da: gabodo akouwata:la:, ega:walo a:imano menokola nabiwila ibino tabamo na:tuduwatanakiye.”

<sup>20</sup> Wiyasiya ebete Ya:sutamo negiya, “Iyatulamedawa, na da:peso tetene wagilimite me totomu bilibilinomo kodakodalo uwatete kapiya idi kadikanaliya.”

<sup>21</sup> Ebene Ya:sute ebe uminate nilakapoimilo ebe naniya, “Kapiya tanalote a:ma:godolo ka:modobona:. Modobola, a:ma: toawete, epetapiate a:imano inamabu bilibilinomo maniamo uwateometate, a:ma:le ebe mani nigol-ogolopiatamo gito na:nikalamola:. Ebe tetelo a:ma: walo ka:pa:wete na nowaloma:eniye, ebene a:imano inamabu bilibilinomate Godokono Unu Duliyomololo ka:nepola:nama:na:.” <sup>22</sup> Ebete ebe taboma: dopo mibonomoma: eda:te tepo mibago gito tiya, mabu ebe inamabu bilibilinomagodawanomola.

<sup>23</sup> Ebema: Ya:sute ebe waloma:tapi ulamolelo nanaliya, “Godote Kawo Elawodawama: deda:na, inamabu bilibilinomagopiate ebe duliyomolamo nopila:oma: kodakodanomola!”

<sup>24</sup> Ebe tetelo ebe waloma:tapiate ebena taboma: nanoanoutiya, ebene Ya:sute iba:tamo walo na:kegiya, “Naimano ekakiala:, Godote Kawo Elawodawama: deda:na, epate ebe duliyomolamo nopila:oma: kodakodanomola! <sup>25</sup> Numa:la:, ka:molo-goeote\* kaliku waluono moe iyado nilupigama: kodakodama: eda:na, gaboana:la. Atumu inamabu bilibilinomagodawate Godokono Kawo Elawodawano duliyomolamo nopegama: kodakodanomoma: eda:na, gabote nanitabonomolo a:kitanamene.”

<sup>26</sup> Ebene iba:te kawonomamo la:wa:ote, ibi a:ka:tuwa: ibino taneba magumulo negelitiya, “Ya:sute dege ebe tabote nanitaboma: deda:na, piyate modobola:ka: Godote ibino igilo mula:lalaema:?”

<sup>27</sup> Ya:sute ibi ulamenate negiya, “Epate a:ka:tuwa: ibino igilo mula:lema: modoboa:, wiyasiya Godoko kapiyate modobola mabu ebegodolo elawo bitana iyaiya tanalo bilibilinomo osiyodilolema:.”

<sup>28</sup> Ebene Pitate Ya:sutamo negiya, “A:ma: numa:, a inamabu bilibilinomo miyapate a:ma: nowaloma:enata.”

<sup>29</sup> Ya:sute iba:tamo walo na:kegiya, “Na la:tamo nani tabo gemo, kebe lumagite ebena moto, o ebena nanila nanikubila ekakila, o ebena menokobila nabila gudila ega:walo ebena opo, ebete na mabuma: ega:walo Godokono Wade Tabo kiyawaoma: ebe tanalo da:miyapamene, <sup>30</sup> ebete me tetelo motola, nanila, nanikubila, ekakila, menokobila, gudila, ega:walo opo

\* **10:25:** Ya:suko tetelo Yu epono tanalo ma kunula, iba:te alagiola ka:molo-goeogoeo kawokawonomamo ibino woko osiyodilolenakiya. Iyo, iyaiya tete epetapilo ka:molo-goeogoeate ibino inamabu watanakiya mulu opamo, ega:walo tete epetapilo iba:te pema: watenamiya.



kawonomo walo ka:kuwatemene. Ega:walo ebe atu tetelo epate temeteme tanalo ebetamo kikameoma:na; wiyasiya walone nale ebetamo uwomua: igilo kikaemamo. <sup>31</sup> Iyo, nanitabola, ka:lo dopopi bilibilinomo da:pola:na, iba:te walone walogabopima: keda:oma:na; ega:walo ka:lo walogabopi da:pola:na, iba:te walone dopopima: keda:oma:na:.”

*Ya:sute Ebene A:e Tanaloma: Walo Da:kegiya*

*Ma:t 20.17-19; Luk 18.31-34*

<sup>32</sup> Ebene Ya:sute ebe waloma:tapiago Yelusalema kawo duliyaomolamo eba tolamitalo, ebete ibi dopolamete tuti. Ebe tetelo ebe waloma:tapiate woki bilibilinomoma: eda:utiya, ega:walo kebe epate ibino walogabo apune da:pelamitiya iba:te atumu na:ka:toletoleutiya. Ebene Ya:sute ebene 12 waloma:tapi uwatete, ebetamo da:pemaima:na: ebe temeteme tanaloma: ibi eba iyatulamelolo negiya, <sup>33</sup> “La: nolowiala. A Yelusalemamo tolamitamama: Ebolo Godote Epono Naniwi epatamo kikalaemene, ebene Godotamo kalimagono ikameopino watowatopi ega:walo Godokono Totomu iyatulamepi, iba:te ebe anakapuima: gelate Yua:piatamo ebo kikalaema:na:.” <sup>34</sup> Ebene ebe epate ebe kalakalatete, ebetamo kowe meolete, pa:ka:pa:ka:mo ebe a:na:ma:ga:midaote kanakapuima:na; wiyasiya ebete netewa-kapiya egelelo a:ene walo ka:kemaigamene.”

*Ya:imesiko Ega:walo Yoneko Iba:te Kuba Wokiamo Ya:suko Tanalo Idima: Daniya*

*Ma:t 20.22-28*

<sup>35</sup> Ebene Sebedikono gudi Ya:imesiko ega:walo Yoneko iba:te pete Ya:sutamoma na:pegeliya, “Iyatulamedawa, a ubila ale a:ma: beda: tanaloma: danatamene, nikaeamiye.”

<sup>36</sup> Ya:sute ibi nanaliya, “La: beda: tanalo ubila:ka: nale la:tamo ikalaema:?”

<sup>37</sup> Iba:te tabo eba wiyalo negeliya, “A:ma:le Kawo Elawodubuma: deda:emene, a ubila a:ma:le degeaemene idawate a:imano tumudi apulo ega:walo idawate pele apulo a:imano kawo alonomo magumulo kilukulitama:.”

<sup>38</sup> Wiyasiya Ya:sute iba:tamo negiya, “La:le na wade wokiamo kanana:wita: La: modobola:ka: nale da:nimo ebe temeteme kalila:mo nioma:? La: modobola:ka: Godote na a:e tanaloma: daduba:midanemene ebe tanaloma: la: waduba:midaolema:?”

<sup>39</sup> Iba:te negeliya, “A modobola.”

Ya:sute iba:tamo negiya, “Me tanalo nanitabola, nale da:nimo walone tetelo la: atumu ebe kalila:mo niawete temeteme bolowionakomata, ega:walo Godote na daduba:midanemene ebe a:e tanaloma: la: kaduba:midaolema:ta. <sup>40</sup> Wiyasiya naimano tumudi apuamo ega:walo pele apuamo ilukuli tanaloma: nale a:kegemo. Godote piyatamo dosiyodilolelamiya ibinomate ebolo ka:pola:nama:na; iyo, me tanaloma: ebete a:ka:tuwa: kegemene.”

<sup>41</sup> Ebene Ya:suko waloma:tapi teni epetapiate ebe tanalo olowite, Ya:imesiko ega:walo Yoneko iba:tamo na:dowautiya, <sup>42</sup> wiyasiya Ya:sute ibi bilibilinomo ebetamo ka:la:mite ibi nanaliya, “La: iyatawalata, Godoko nanitabokobi midia:pino kawokawo dubate ibi a:ka:tuwa: ibi eba wadi-palatelelo epo epetapi elawamo analenaka, iba:te ibino ubi tanaloma: ka:tudila:onama:.” <sup>43</sup> Wiyasiya la: ebako epoma: a:keda:oaema. Kebe lumagite la:imano kawodawama: eda:ma: ubi diyatimene, ebete la:imano wiya: wokodawama: neda:mene, <sup>44</sup> ega:walo kebe lumagite dopodawama:

eda:ma: ubi diyatimene, ebete la: bilibilinomono idoko motono wokedawama: neda:mene, iyo, ebe a:ka:tuwa: ebe oponomamo iyatinomo niyatimene. <sup>45</sup> Numa:la:, Epono Naniwite da:piya, ebe ubia:nola me opo epate ebetamo wiya: wokopima: eda:oma:, wiyasiya ebete na:piya epatamo wiya: wokodawama: ka:pada:ma:, ega:walo ebena igilo iyabaiamo iyatite ebena a:e wiyate epo bilibilinomo epetapi Saitanakono idoko motone gito kowagailima:.”

*Ya:sute Batimiyasikono Balidi Wadekobi Da:midilimiya  
Ma:t 20.29-34; Luk 18.35-43*

<sup>46</sup> Ebe tetelo Ya:sute ebe waloma:tapiago Yeliko kawo duliyoumolamo pelamete, ebene iba:te epo bilibilinomo epetapiago kapimiya ebe duliyoumolone pemaimite eba tolamelo, Timiyasikono gudu Batimiyasiko balidi tamio dubula, ebete gabo niyakabolo eba okolitalo epo epetapi manima: ebo toweolamiti. <sup>47</sup> Ebene ebete Nasaletu duliyoumolodawa Ya:sukono pe tanalo olowite kawonomamo negiya, “Ya:su, Da:ibidikono A:la:mu! A:ma:le na na:nilakapoinama:!”

<sup>48</sup> Ebe tetelo epo epetapi bilibilinomate ebe kawiya analo nodiyobiya ebete taboa:no kokolitama:, wiyasiya ebete kawonomamo walo na:kegiya, “Da:ibidikono A:la:mu! A:ma:le na na:nilakapoinama:!”

<sup>49</sup> Ebene Ya:sute ebamo utite negiya, “La: ebe mamu neka:miala:.”

Ebene iba:te ebe balidi tamio dubu eba ka:milo ebetamo negeliya, “Nekalakala, ebete a:ma: peka:mitata! Nemaiga!”

<sup>50</sup> Ebe tetelo ebete ebena lubudino kaliku iyabaiamo ba:idilote, samonomamo maigate Ya:sutamo ebo piya. <sup>51</sup> Ebene Ya:sute ebe nalatediya, “A:ma: beda: ubi kiyata:wita nale a:ma:tamo kosiyodiloma:?”

Balidi tamio dubute negiya, “Iyatulamedawa, na ubila inamabu wadenomamo kulamolema:.”

<sup>52</sup> Ya:sute ebe naniya, “A:ma: na:toa. A:imano nanitabokobi midi tanalote a:ma: wadekobi a:mida:ta,” ebema: nanitabola, ebe tetenomolo ebena balidite wadekobi dolowiomiya, ebete ebe to gabodo Ya:suko ebo waloma:tiya.

## 11

*Ya:sute Yelusalema Kawo Duliyoumolamo Da:nopegiya  
Ma:t 21.1-11; Luk 19.28-40; Yon 12.12-19*

<sup>1</sup> Ebene iba:te Yelusalema kawo duliyoumolo niyakabamo eba pelamelo, Betapa:gi duliyoumolo ega:walo Betani duliyoumolo tatalido tolamete Olibi Kewakewa Unu Damelamo ebo nemaimiya. Ebe tetelo Ya:sute ebe waloma:tapi netewa dopamo eba nalibolelo <sup>2</sup> ibi nanaliya, “La: ebe niyakabo duliyoumolamo toawete, ebe duliyoumolamo da:nemaima:ema donokigoeo da:peso ala:mo ma:midao ka:numa:digamamota, lumagite dopamo ebe unamo kokoliya: Modobola la:le ale pamiawete nemagaiyala:.” <sup>3</sup> Idawate la:tamo degemene, ‘La: me tanalo beda:ma: kosiyodilawitama?’ la: wiyasiya ma kunu negeliyala:, ‘Kawodawate donokigoeo ubila, ebete walo samonomamo kakapalibomene.’”

<sup>4</sup> Ebene iba:te tote, gabolo donokigoeo da:peso gigiyu niyakabolo ma:midao numite ale ebo nepamiya. <sup>5</sup> Ebema: piyate ebolo da:pola:niya iba:te ibi nalateda:liya, “La: ale beda: mabuma: kepamiawitama?”

<sup>6</sup> Ebene Ya:sute ibi netewapiatamo dopamo kebe tabo kegiyale, iba:te ebe atu tabo ibi danaliya ebe epate ibi gito miyapiya. <sup>7</sup> Ebene iba:te ebe donokigoeo da:peso Ya:sutamo magaete, ibino watubino kaliku donokigoeo unamo alomomete, Ya:sute ebe kaliku unamo ebo okoliya. <sup>8</sup> Ebe

tetelo epo epetapi bilibilinomate ibino ga:ga:ga:ga: kaliku pupukulamete gabamo apoago tolamiya, ega:walo epetapiate gabo tametamene puwala otolete gabamo atumu kapotameonatiya. <sup>9</sup>Ebene piyate da:dopiya ega:walo Ya:sukono walogabo apune da:pelamitiya, ibi bilibilinomate kawonomamo ma kunu gelitiya,

“Godoko nadipata:la!

Godoko, a:imano mailago da:pita,

modobola a:ma: ebe lumagi kawokobi na:midiye!

<sup>10</sup>Iyo, aimano ewono nabiwi Da:ibidikono a:la:mute

Kawo Elawodubuma: deda:na,

modobola a:ma:le ebe kawokobi na:midiye!

O epala:, la: Godoko moiolo

unamo nadipata:la!”

<sup>11</sup>Ebe tetelo Ya:sute Yelusalema kawo duliyoumolamo nopegate, Godoko Amamateno Iya Motamo nodolote inamabu bilibilinomo ulamola:go ebo petiya, ebene dadimoni ebete Betani duliyoumolamo walo na:ka:toni ebene <sup>12</sup>waloma:tapiago.

*Ya:sute Da:imi Noloa: Umei Kewa\* Dumiya*

*Ma:t 21.18-19*

<sup>12</sup>Egela idilo iba:te Betanine walo da:ka:pelamitiya, gabo tetelo Ya:suko bae kape tanalo eba piyatawalo, <sup>13</sup>ebete umei kewa paagono muluamo pumite, da:imi olema: ebamo gito tiya. Wiyasiya ebete ebamo da:nemaigiya paanomoiya nulamiya, mabu ebe tete umei da:imi kewano nolo tetea:, <sup>14</sup>ebema: ebete ebe umei kewatamo negiya, “Uwomua: tetelo epate a:ma:godone da:imi a:kenaonakoma:na!” Ebe tabo ebe waloma:tapiate olowiya.

*Ya:sute Godoko Amamateno Iya Moto Wadepi Da:midiya*

*Ma:t 21.12-17; Luk 19.45-48; Yon 2.13-22*

<sup>15</sup>Ebene iba:te Yelusalemamo nemaimite Godoko Amamateno Iya Motamo tolamete, ebe motolo Ya:sute inamabu olowamepi nulamete elawonomamo na:na:ma:lateliya, ega:walo ebete mani odowaolepino patapata bigo olowamepino ilukuli patapatago ebo noba:midaolelamiya. <sup>16</sup>Ega:walo Yelusalema duliyoumolo epate ibino inamabu apune apune dowadaenakiya, iba:te ebe inamabuago Godokono Motono kala magumudo podolote apudo da:nemaimionakiya, Ya:sute ibi ebe mabuma: odiyoboliya. <sup>17</sup>Ebe tetelo ebete epo eba iyatulameloni negiya, “Nanitabola, Godokono Bukalo tabo ma kunu bitana, ‘Naimano Moto iyaiya opo bilibilinomono epate Godoko Amamate Motoma: kegelama:na:, la:le wiyasiya pilo epono motoma: a:midimata!’ ”

<sup>18</sup>Ebene Godotamo kalimagono ikameopino watowatopi ega:walo Godokono Totomu iyatulamepi, iba:te ebe tabo olowite Ya:suko anaka:puima: gabo waditiya, wiyasiya iba:te ebe na:tolemitiya mabu epo bilibilinomate ebene iyatulame tanaloma: anoanolo nekalakalautiya.

<sup>19</sup>Ebene dadimoni Ya:suko ega:walo ebe waloma:tapi ebe kawo duliyoumolone walo na:ka:tolameniya.

*Ya:suko Waloma:tapiate Umei Kewa Alawoma: Eda: Dumiya*

*Ma:t 21.20-22*

\* **11:11:** Epate umei kewano mailo Gogodala tabamo salibisama: ka:minaka.

<sup>20</sup> Egela idi duiyanomolo iba:te kawo duliynomolamo walo eba ka:pelamitalo, umei kewa dolodolone wagilimite apa:mo pemaiga alawoma: eda: ebo pumiya. <sup>21</sup> Ebene Ya:sute dopamo beda: tabo kegile, Pitate ebe tanalo malagidilote Ya:sutamo negiya, “Iyatulamedawa, numa! A:ma:le kawiya danawia ebe umei kewate alawoma: edi!”

<sup>22</sup> Ya:sute wiyasiya iba:tamo negiya, “La: Godoko nanitabokobi na:mida:la:.” <sup>23</sup> Na la:tamo nani tabo gemo, kebe lumagite nanitabokobi midilo me damelamo ma kunu degemene, ‘A:ma: kewa: kolomamo na:toatepa!’ ebene ebete tepo magumulo woki netewama: eda:no, ebe tanalote pemaigama: nanitabokobi da:midimene, ebete ebe tanalo nanitabolo kuimene. <sup>24</sup> Ebema: nale la: nanalemata, la: beda: tanaloma: Godoko da:toweoma:ema, la: ebe tanalo iyalo laema: gelalo nanitabokobi na:midiyala:, ebene la: ebe tanalo nanitabolo kelaemamota. <sup>25</sup> Ega:walo kebe tetelo la:le maimiawete Godotamo towetowe tabo degelaema, ebene lumagi iditamo dowo tanalote ditanamene, la: ebe lumagino kuba egebolema:wete na:dodolomatilimiyala:, ebene la:imano Unu Duliynomolono Nabiwite la:imano kuba egebolelametate atumu ka:ka:dodolomatililaema:ta. <sup>26</sup> Wiyasiya la: epono kuba egebolelama:wete dodolomatililamea:no, la:imano Unu Duliynomolono Nabiwite la:imano kuba egebolelametate a:ka:dodolomatililametamene.”†

*Yu Watowatopiate Ya:sukono Elawo Mabuma: Ebe Dalatediya  
Ma:t 21.23-27; Luk 20.1-8*

<sup>27</sup> Ebe tetelo Ya:suko ega:walo ebe waloma:tapi Yelusalema kawo duliynomolamo walo na:ka:pelamiya. Ebene Ya:sute Godoko Amamateno Iya Motolo eba nepata:lo, Godotamo kalimagono ikameopino watowatopi, Godokono Totomu iyatulamepi, ega:walo kawokawo dubu epetapi, iba:te ebetamo pelamete <sup>28</sup> ebe ma kunu palatediya, “A:ma: me iyaiya tanalo pokono elawamo kosiyodilola:wena? Ega:walo me elawo potele kikametia, a:ma:le me tanalo kosiyodilola:wenama:?”

<sup>29</sup> Wiyasiya Ya:sute iba:tamo negiya, “Nale kapiya tanaloma: la: kalateda:lemamota. La:le na wiya tabo wadenomamo dowaminama:ema, ebene nale me tanalo pokono elawamo kosiyodilolenamo, ebe tanalo nale la: ebo kanalemamota. <sup>30</sup> Naimano alateda: tabo ma kunu bitana la:tamo, Yonete epo obamo dowaduba:midaolenaki, ebe elawo ebetamo potele kikamile, Godotela:ka: o lumagitela:ka:?”

<sup>31</sup> Ebema: ibi a:ka:tuwa: ibino taneba magumulo apamineuilo negeliya, “Ale degelama: Godote Yonetamo elawo ikami, ebete kegemene, ‘Mabu keleka: la:le ebene tabo nanitabokobi ka:mida:wea:?’” <sup>32</sup> Ega:walo a mod- oboa: ebe ma kunu anama:, me opo lumagite Yonetamo elawo ikami.” Iba:te epono dowo tanaloma: toletoleolo tabo ma kunu geliya, mabu ibi iyatawala epo bilibilinomate Yoneko Godokono nanitabo woki awokalimi-dawama: gelana. <sup>33</sup> Ebema: iba:te ibino tepo magumuno woki waminaolelo Ya:sutamo negeliya, “Yonekono elawo mabu a iyatawa:.”

Ebe tetelo Ya:sute iba:tamo negiya, “Ebema: nale la: atumu akanaletama nale me iyaiya tanalo pokono elawamo kosiyodilolenamo.”

## 12

*Tupina Da:imi Pali Atila:pino Iyatulame Oi  
Ma:t 21.33-46; Luk 20.9-19*

† 11:26: Mak 11.26 buka apuno tabo Makate bukamo kakuloliya; wiyasiya ebene buka osiyodilo walogabo apune nanitabokobi mididawa idite akuloliya.

<sup>1</sup> Ebene Ya:sute oi tabo ida:mo ibi ma kunu iyatulamiya, “Dubute pali osiyodilote tupina da:imi kewa bilibilinomo ebo ami, ebe da:imino mailo ebe gala:ipi da:imila. Ebene amio tanalote dolopoligi, ebete kala ga:dimite, da:imi ii egediolenokola bobo obobote, pali atila:pino unu nupunupu ebo eti. Ebe tetelo ebe dubute ebene pali atila:pi dubu epetapiatamo gito atepi, iba:te ebolo woko eba osiyodilonalo, ebe pali wadenomamo umilo ebene da:imi kuwatolemenakoma:, ebene ebete mulu oponomamo gito ti.

<sup>2</sup> “Ebene da:imi tapio tete da:pi ebete pali atila:piatamo wiya: wokodawa napalibi, ebete iba:godone da:imino mani magumune ebene kawodawano apu ka:pelaema:, <sup>3</sup> wiyasiya iba:te ebe lawete gaubamo anagalimiote inamabua:no gito nalibiya. <sup>4</sup> Ebene pali namutudawate wiya: wokodawa idi walo dakapalibi, wiyasiya iba:te ebe watolo eba kanagalimiolo ebe ilipo ikamete atumu gito kalibiya. <sup>5</sup> Ebene ebete wiya: wokodawa idi walo dakapalibi iba:te ebe anakapumiya. Ebene wiya: wokopi bilibilinomo epetapiate da:pelamiya, iba:te atumu epetapi anagilamoletete gito aliboliya, wiyasiya iba:te epetapi anakapulamolliya.

<sup>6</sup> “Ebene namutudawagodolo kapiya idi dokolinami, ebe gudu ebete kawonomamo malagidilonami. Ebema: walogabonomone ebete ebe gudu eba palibolo ebene wokilo negi, ‘Nanitabola, iba:te naimano gudutamo ka:tudila:oma:na.’

<sup>7</sup> “Ebe pali atila:pi dubate wiyasiya ibino taneba magumulo negeliya, ‘Numa:la:, me gudute nabiwino inamabu namutudawama: deda:mene, ebe gudute na:pe. Ebema: modobola ale ebe anakapumite ebene pali lawenomo kelaemalema:,’ <sup>8</sup> ebene iba:te ebe lawete anakapumite palino kala magumune gito neba:idiliya.”

<sup>9</sup> Ebema: Ya:sute olowiopiatamo negiya, “La:imano woki keba kunula:ka:, pali namutudawate beda: tanalo na:kosiyodilomene? Nanitabola, ebete pete pali atila:pi panakapulamate ebene pali epetapiatamo ka:pikalaemene.

<sup>10</sup> Iyo, la: dopamo Godokono Bukalo me tabo nanitabolo eka:la:mioliamata,

‘Moto etepiate iyabaiamo diyatiya,  
ebe alote wiyasiya

motono elawo mabuma: eda:na.

<sup>11</sup> Me tanalo Godote osiyodili,

ebema: aimano wokilo nanoanoutama:!’ ”

<sup>12</sup> Ebema: Yu watowatopi dubate Ya:suko laema: ubila mabu ibi iyatawala ebete me iyatulame oi ibino tanaloma: kiyawaiya, wiyasiya iba:te epo tolelamelo ebe atepate gito tolamiya.

*Loma Epono Kawo Elawodubunomo Sisatamo\* Ta:kese Mani Ikameo Tanalo*

*Ma:t 22.15-22; Luk 20.20-26*

<sup>13</sup> Ebene Yu watowatopiate Pa:lisi tanebapi epetapi ega:walo Kawo Elawodubu Elodikono tanebapi Ya:sutamo aliboliya, iba:te ebe kuba gabamo eba nowabuga:talo ebete kebako tabo gelo ebe ebo kelaema:. <sup>14</sup> Iba:te ebetamo pelamete a:da: elemasigi gabodo na:pegeliya, “Iyatulamedawa, a iyatawala a:ma: nani tabo lumagilata. A:ma: epetapino gito gela tanalamo ka:tuduwatawenakoa:, ega:walo a:ma: epo unu nikapiamo kulama:wena:,

\* **12:12:** Sisako ebe Loma epono Kawo Elawodubunomola, opo kawonomolo ebe kapiya elawonomoma: eda:nami. Ebete ebene gowelaopi iyaiya opamo alibolenaki, ebene iba:te ebe iyaiya opolo eba nilukulonalo epagodone ta:kese mani kawonomo ebo nuwatelamenakiya, ebe maniamo ibino Loma gabamanino iyaiya woko kosiyodilolenama:.



ma kunu lumagi idi atepalo lumagi idi ebo a:kelawa:emene. Iyo, a:ma: epo Godokono gabo wadenomamo iyatulamenata, ebema: a nanaa:, Loma epono Kawo Elawodubunomo Sisatamo ta:kese mani ikameoma: mod- obola:ka: o kubala:ka:? A ebetamo ba:kikameoma: o a:kikameoma:?”

<sup>15</sup> Wiyasiya Ya:sute ibino mena netewa tanalo iyatawate iba:tamo negiya, “Mabu keleka: la:le na masiginima: dowagela:witama? La: mani kapiya natamo nikanama:la:, na kuimamo.”

<sup>16</sup> Ebene iba:te mani kapiya ebetamo dikamiya, ebete ibi nalateda:liya, “Me manilo da:pola:na, mailo ega:walo ololo pokonola:ka:?”

Iba:te negeliya, “Kawo Elawodubunomo Sisakonola.”

<sup>17</sup> Ebene Ya:sute iba:tamo negiya, “Sisakono inamabu Sisatamo nikameala:, wiyasiya Godokono inamabu Godotamo nikameala:.”

Ebema: iba:te ebena taboma: kawonomamo anoanoutiya.

### *A:e Magumune Igilamo Maimio Tanalo*

*Ma:t 22.23-33; Luk 20.27-40*

<sup>18</sup> A:e magumune maimioa:noma: degelana, ebe epo Sa:diyusi taneba epola.† Ibi epetapiate Ya:sutamo pelamete tabo ma kunu pegeliya,

<sup>19</sup> “Iyatulamedawa, Godokono Bukamo Mosesete tabo ma kunu akuloliya,

‘Dubute a:ete kamiya gudia:no datepamene, ebena ekawite ebe amole lawete ebena naniwino tanaloma: gudi nosiyodilolemene.’ <sup>20</sup> Kapiya

dubuno sebeni koiate ilukulinamiya. Ibi magumulo dopo gudute kamiya lawete gudi ulamea:no a:iya, <sup>21</sup> ebena ebena ekawite atu kamiya kelawete

gudi ulamea:no gito ka:iya, ega:walo tetedawa idite atumu kowageliya. <sup>22</sup> Ebene ebe sebeni atu alailama:te gudia:no eba kunu a:elaiya, wiyasiya

kamiyalet walone gito a:iya. <sup>23</sup> Ebema: iba:te a:e magumune igilamo demaimioma:na:, ebe Kawo Egelalo ebe kamiyalet pokono kamiyalet: na:keda:mene, mabu ebe sebeni dubate aida:tepaiya?”

<sup>24</sup> Ebene Ya:sute iba:tamo negiya, “Mabu la: Godokono Buka tabo ega:walo ebena elawo iyatawa:, ebe mabuma: la:imano wokilo epono a:ela tanaloma: kubanu gelanakomata. <sup>25</sup> Numa:la:, epate a:e magumune igil-

amo demaimioma:na:, ebe tetelo iba:te kamiyalet walo a:ka:piadiolema:na: ega:walo dubu a:ka:puwatolema:na:, wiyasiya iba:te Godokono Unu Duli-

omolono nopopimu bilukulionama:na:. <sup>26</sup> Ebe mabuma: Godokono Bukate a niyatua:mena a:elaopiate a:e magumune maimioma:. Iyo, Mosesete diyatiya

ebe tabo la: nanitabolo eka:la:mioliamata, ma kunu elate kewalo dowaiti wiyasiya kewate kolotolitiya:, ebe tetelo Godote Mosesetamo negiya,

‘Nanitabola, na Godotela. A:ibalayamako, Aisa:keko, ega:walo Ya:ikoboko iba:te uwomua: tetelo poko kamamatene, na ebetela.’ <sup>27</sup> Ebema: la: Sa:diyusi

tanebapi la:imano wokilo na:kemalagidilawenama ebe ewonino igilate olopoligoiya? Ao, kolopoligiya:, mabu a:elaopiate Godoko kamamatena:

wiyasiya piyate igilolo dilukulina ebe eponomate ebe amamatena. Me mabuma: la: Sa:diyusi tanebapiate epono a:ela tanaloma: kubanu gelanako-

mata!”

### *Kebe Totomu Tabote Kawonomoma: Keda:nale*

*Ma:t 22.34-40; Luk 10.25-28*

<sup>28</sup> Ebene Godokono Totomu iyatulamedawa idite pete, iba:te degelitiya ebe tabo ebo polowiya. Ya:sute Sa:diyusi tanebapiatamo tabo wadenomamo

† **12:18:** Ya:suko tetelo Sa:diyusi epo ebe Yu epono taneba idila, iba:te Pa:lisi tanebapino iyaiya totomu bilibilinomamo ka:tudila:onakia:. Ega:walo epate a:elaote a:ene walo kemaimiote Godotamo da:nemaima:na:, ebe tanalo Sa:diyusi tanebapiate nanitabokobi ka:midinamia:, ebema: iba:te ebe atu nanitabokobi midia: tanalamo epo iyatulamenakiya.

da:kiyawaiya, ebe tanalo umite ebete Ya:suko nalatediya, “Kebe totomu tabote kawonomoma: keda:nale?”

<sup>29</sup> Ya:sute negiya, “Me kawo totomunomola. ‘Isalaela epala:, la: nolowiala! Godoko aimano Kawodawala, ebe kapiyanomola, idi puliyala. <sup>30</sup> A:ma: a:imano Kawodawa Godoko nilakapolo nemalagidilona, a:imano tepo magumunomamo ega:walo a:imano uliyanano elawamo, a:imano woki kawonomamo ega:walo a:imano elawo kawonomamo.’ <sup>31</sup> Ega:walo me kawo totomunomo idila. ‘A:ma: a:ka:tuwa: a:ma: demalagidilawena, modobola a:ma:le eba kunu a:ma: niyakabolo dokolina ebe lumagi nilakapolo nemalagidilona.’ Totomu tabo idite me kawokawo totomu netewa a:kodoilimene.”

<sup>32</sup> Godokono Totomu iyatulamedawate Ya:sutamo negiya, “Iyatulamedawa, nanitabola, a:ma: wadenomamo geata. Aimano Kawodawa Godoko kapiyanomola, idawa puliyala, kokolina: <sup>33</sup> Lumagite ebene tepo magumunomamo ega:walo ebene uliyanano elawamo, ebene woki kawonomamo ega:walo ebene elawo kawonomamo ebete Godoko nilakapolo nemalagidilonamene. Ega:walo ebe a:ka:tuwa: ebe demalagidilona, ebete eba kunu ebe niyakabolo dilukulina ebe epo nilakapolo nemalagidilolenamene. Nanitabola, me netewa totomu ebe kawokawonomoma: eda:ona, wiyasiya Godotamo ikameo tanalate kawokawoma: keda:ona:, iyo, epate elamo madolame sipi-goeogoe ega:walo nilakapo inamabu epetapi Godotamo dikameonaka, ebete negena ebe tanalo bilibilinomate kawokawoma: keda:ona:.”

<sup>34</sup> Ebete tabo wadenomamo degiya, Ya:sute olowite ebetamo negiya, “Godote Kawo Elawodawama: deda:na, ebe duliynomolamo a:ma: opegama: tatalila.”

Nanitabola, ebe tetene wagilimite epate Ya:suko tanalo idima: alateda:ma: na:toletoleutiya.

*Godokono Alibodawa Kelisoko Potelela:ka:  
Ma:t 22.41-46; Luk 20.41-44*

<sup>35</sup> Ebene Ya:sute Godoko Amamateno Iya Motolo epo eba iyatulamitalo negiya, “Godokono Totomu iyatulamepiate negelana Godokono Alibodawa Kelisoko ebe Da:ibidikono a:la:mula, ebene walone gudi magumune kawokalamene. Wiyasiya me tanalono magumu keba kunula:ka:? <sup>36</sup> Numa:la:, Da:ibidite Godokono Uliyanano elawamo tabo ma kunu kiyawaiya,

‘Kawodawa Godote naimano Kawodawa Kelisotamo nege,

‘A:ma: naimano tumudi apuamo na:pokoliya,  
ebene a:ma:go gowelaopi  
a:ma:le naimano elawamo ibi ka:mikitaolema:ta.’ ’ ”

<sup>37</sup> Ebene Ya:sute tabo moga:melo walo na:kegiya, “La: me tabo eba malagidilolo na nanana:la:, Da:ibidite ebene a:la:mu Kelisoko ebene Kawodawama: ka:milo ebete Godokono tumudi apuamo okolima: giya, ebema: ebe tanalote keba kunu na:ka:pemaigamene?”

Nanitabola, ebe tetelo epo bilibilinomate Ya:sukono tabo kalakalago olowitiya.

*Ya:sute Godokono Totomu Iyatulamepino Amama Tanaloma: Degiya  
Ma:t 23.1-7,28; Luk 11.37-54; 20.45-47*

<sup>38</sup> Ebene Ya:sute epo eba iyatulamitalo negiya, “La:le Godokono Totomu iyatulamepi wadenomamo nulama:la:. Ibi ubila ga:ga:ga:ga: kaliku pupulote olowame bailo eba wapata:lamelo, epate ibi ebo kowalogolema:.”

<sup>39</sup> Iyo, ibi ubila a Yu epono balidi ibilamole moto gulo kawokawo dubuno ilukuli bailo kilukulima; ega:walo ibi ubila soliyomu osiyodilo tetelo kawokawo ilukuli bailo ka:pola:nama. <sup>40</sup> Ega:walo iba:te amoleamoleno inamabu a:da: elemasigi tanalodo eba uwatelo, ebo opoliyaolelamenaka, ebene iba:te ebe tanalo kuba:noma: gelalo tolamete Godotamo balidi eba nibilamolelo ga:ga:ga:ga: towetowe tabo ebo negelanaka, mabu ibi ubila epate ibino tanalo umilo ibi wadewadepima: kegelama:. Ebe mabuma:, nanitabola, iba:te kuba wiya kawonomo kelaema:na!”

*Amole Kamiyaletе Godotamo Mani Dikamiya*

*Luk 21.1-4*

<sup>41</sup> Ebene Godoko Amamateno Iya Motolo epate mani eba alomutalo, Ya:sute ebe mani alomo bai niyakabolo okolite epono mani alomo tanalo ulamiti. Inamabu dogodogopi epetapiate mani kawokawonomo alomutiya, <sup>42</sup> ebene inamabua: amole kamiyale idite pete netewa mani egege, kapiya toea keba kunula:ka: eba kunula, ebete ebo palomiya. <sup>43</sup> Ya:sute ebe waloma:tapi ebetamo ka:la:mite negiya, “Na la:tamo nani tabo gemo, epate mani dapaloma, me inamabua: amole kamiyaletе ibi bilibilinomo odoili, <sup>44</sup> mabu inamabu dogodogopiate ibino inamabu epetapi da:lulilamenako ebe inamabu paloma, wiyasiya me amole kamiyale inamabua:nola. Ebete ebene uwomu mani alomonomo apalomo, ebene bae uwateono manila.”

## 13

*Godoko Amamateno Iya Moto Kubaimi Tanalo*

*Ma:t 24.1-2; Luk 21.5-6*

<sup>1</sup> Ebene Ya:sute Godoko Amamateno Iya Motone eba piwisigitalo, ebene waloma:tapi magumulo idawate negiya, “Iyatulamedawa, a:ma: nulama:. Me nokola moto iyaiyanomola ega:walo wadewadenonomola!”

<sup>2</sup> Ya:sute wiyasiya ebetamo negiya, “A:ma: me kawokawo moto ba:kulama:wita? Me iyaiya motono tanaloma: nokola idite nokola idi unulo a:ka:pola:nama:na:, mabu gowelaopiate nokola bilibilinomo mapitaotele opamo iyalekenomo ka:piyalekema:na:.”

*Kawokawo Temetema:te Pelaema: Ya:sute Degiya*

*Ma:t 24.3-14; Luk 21.7-19*

<sup>3</sup> Ebene Ya:sute Olibi Kewakewa Unu Damelalo eba okolitalo, Godoko Amamateno Iya Moto apuamo umilo okoliti. Ebe tetelo Pitako, Ya:imesiko, Yoneko, ega:walo A:nduluko, ibinomate ebetamo tolamete na:negeliya, <sup>4</sup> “A:ma:le a nanaa:, Godokono Moto kubaimi tanalote kebe tetelo na:ka:pemaigamene? A beda: anoano tanalote na:kiyatuaemene, tete ebe na:pe me tanalo bilibilinomate ka:pemaimioma:?”

<sup>5</sup> Ebene Ya:sute iba:tamo negiya, “La: nanisiwale. Lumagi idite la: demasigilitamene, la: ebene tabo ako-olowiala:, <sup>6</sup> mabu dubu bilibilinomo epetapiate naimano mailamo pelamete ka:pegelama:na:, ‘Na ebe Kelisotela!’ ebene iba:te epo bilibilinomo ma kunu eba pemasigiolelo iya gabamo ebo kemagatalema:na:. <sup>7</sup> Ega:walo la:le iyaiya opo epono gowelao tanalo ega:walo ibino gowelaoma: nopo iyati tanalo dolowiaema, la: ebe mabuma: akotoletoleala:. Me tanalate nanitabolo ka:pemaimioma:na:, wiyasiya ebe tete ebe uwomu tetea:. <sup>8</sup> Nanitabola, opo epetapino epate opo epetapino epago ka:gowelaoma:na:, iyo, opo idite opo iditamogowela tanalo kosiyodilomene, ebene mumulate iyaiya opo bilibilinomamo ka:pelaema:na:, ega:walo iyaiya duliynomolo epetapilo epate baea:no

kilukulioma:na:. Numa:la:, kamiyaletе gudu laema: temeteme dowagilimi, me tanalo eba kunula.

<sup>9</sup> “Ebema: la: la:imano tanalo wadenomamo nulamenala:, mabu kubakubapiate la: elawamo uwatetate tabo anagiyamida baiamo kemagatalema:ta, ega:walo iba:te Yu epono balidi ibilamole moto gulo la: gaubamo kalukolema:ta. Iba:te na mabuma: la:imano tanalo danagilamelelametamene, ebe tetelo la: iyaiya kawokawo elawodubuno ololo apulo utitatawete naimano Wade Tabo iba:tamo ebo ka:kiyawaomamota. <sup>10</sup> Iyo, uwomu tete pea:no, Godoko ubila la:le dopamo ebena Wade Tabo iyaiya opo bilibilinomolo ka:na:kiyawaema:.  
<sup>11</sup> Ebema: epate tabo anagiyamida baiamo la: demagataletamene, ebe tetete pemaiga:no la:imano gela tanaloma: woki bilibilima: akoeda:oala:, ma kunu, ‘Na beda: tabo na:kegemo?’ Tete da:pemene Godote kebe iyaiya tabono tanalamo la: dowa lubilitamene, modobola la:le ebe tabo kapiya na:kiyawaiyala:, mabu nanitabola, la: a:ka:tuwa: a:ka:kiyawaoema, Godokono Uliyanate la:do ka:kiyawaomene.

<sup>12</sup> “Ebe tetelo naniwite ekawi a:eamo kalibomene, ega:walo atu gabodo ekawite naniwi kanakapuimene, iyo, dubute ebena gudu atumu kakamitimene, ega:walo guda:te dowaote ibino menokobila nabila a:eamo kalibolema:na:. <sup>13</sup> Ebene na mabuma: epo bilibilinomate la:tamo ka:dowaoma:na:, wiyasiya kebe lumagite kodakodalo utite uwomuamo da:nemaigamene, Godote ebena igilo ka:mula:emene.”

*Talena Bai Kubaimidawano Tanalo  
Ma:t 24.15-28; Luk 21.20-24*

<sup>14</sup> Na Makate me buka ka:la:mioledawatamo negemo, a:ma: me tabo Ya:sute degiya wadenomamo niyatawa.

Ya:sute tabo moga:melo walo na:kegiya, “Godokono Moto kubaimidawate ebe talena bailo utitalo la:le ebe duma:ema, ebe tetelo modobola Yudiya opo epate unuunu damelamo nalautioma:na:. <sup>15</sup> Iyo, moto tanatimilo dokolitamene, ebe lumagite moto guamo walo a:ka:nopegamene ebena inamabu uwatema:, <sup>16</sup> ega:walo tumulo woko dosiyodilutamene, ebe lumagite walo motamo a:ka:toamene ebena lubudino kaliku laema:.

<sup>17</sup> “Numa:la:, lamitulamitu ega:walo nono dikalamena ebe kamiyala:tamo ebe egelate kubanomoma: keda:mene! <sup>18</sup> Ebema: modobola la: Godoko na:toweomiyala: me tanalate gibagiba tetelo akopemaimiala:, <sup>19</sup> mabu ebe tetelo kawokawo temetemenomate ka:pemaimioma:na:. Numa:la:, Godote me opo dosiyodiliya ebe tetene wagilimite ka:lo me teta:mo pemaiga, ebakobako temetema:te dopamo ka:pemaimiya:, ega:walo walone tetelo ebakobako temetema:te walo a:ka:pelaema:na:, kapiya tetenomamo ka:pemaimioma:na:. <sup>20</sup> Me tanalo nanitabola, Kawodawa Godote ebe tete gopowaimia:no lumagi idite me opolo igilolo a:kokolinamene, wiyasiya ebete kebe epo ka:la:miolete duwatiya ebe epo nilakapoilamelo tete ka:gopowaimene.

<sup>21</sup> “Ebe tetelo lumagi idite la:tamo ma kunu degemene, ‘Numa:la:, Godokono Alibodawa Kelisote malo bokolita!’ o, ‘Numa:la:, ebete ebolo bokolita!’ la: nanitabokobi akomida:la:, <sup>22</sup> mabu elemasigi Kelisoma: eda:opi ega:walo naimano mailamo a:da: tabo kiyawaopi, iba:te pemaimiote iyaiya anoano tanalo kosiyodilolema:na:. Iyo, ibi ubila ebe osiyodilole tanalamo Godote deka:la:mioliya ebe epo iya gabamo kemagatalema:.  
<sup>23</sup> Ebema: la: wadenomamo nolowiala:, me tanalo bilibilinomate pemaimioa:no nale la: dopamo analemata.”

*Epono Naniwino Pe Tete*  
*Ma:t 24.29-31; Luk 21.25-28*

<sup>24</sup> “Ebe kawo temeteme tetete dolopoligomene, ebe tetelo egelate ki-dokomene ega:walo saganate a:ka:pukuilaemene, <sup>25</sup> iyo, mawela:te tobolo unune opamo ka:pa:gudima:na:, ega:walo tobolo ununo elawoelawo inam-abuate kalela:oma:na:. <sup>26</sup> Ebene ebe tetelo Epono Naniwite tobolo unune eba piwisigalo, iba:te ebe ebo kuima:na:, ebete ebeno elawago ega:walo alo kawonomago ka:pemene. <sup>27</sup> Ebene ebete Unu Duliyomolono nopopi iyaiya opo bilibilinomamo kapalibolemene, Godote deka:la:mioliya ebe epo me opo apune apune ka:puwatema.”

*Umei Kewano Tanalo*  
*Ma:t 24.32-35; Luk 21.29-33*

<sup>28</sup> “La: umei kewano tanalone me tanalo idi wadenomamo niyatawala:. Katomono wuiate pemaimite olioli paa da:mogoiamidalema:na:, ebe tanalote la: kiyatulamema:ta ulamano tete ebe netatali, <sup>29</sup> ebema: me temeteme tanalate pemaimilo dulama:ema, la: kiyatawaomamota Epono Naniwino pe tete tatalila, ebe gigiyudo opegama: pe. <sup>30</sup> Na la:tamo nani tabo gemo, me tanalo bilibilinomate dopamo ka:pemaimioma:na:, walone me tete epate ebo ka:elaoma:na:, <sup>31</sup> iyo, me opo ega:walo tobolo unu iba:te kolopoligoma:na:, wiyasiya naimano tabote a:kolopoligomene, uwomua: tetelo bitanamene.”

*Epono Naniwino Pe Tete Epate Iyatawa:*  
*Ma:t 24.36-44; Luk 17.26-30,34-36*

<sup>32</sup> “Numa:la:, epate ebe Kawo Egelano tete iyatawa:, Unu Duliyomolono nopopi ega:walo Godokono Gudu iba:te iyatawa:, Nabiwi Godo kapiy-ate iyatawala. <sup>33</sup> Ebema: la: olowiolo nilukuliniyala:, mabu ebe tetete da:pemene la: iyatawa:. <sup>34</sup> Me tanalote ma kunu kitanamene, kawo dubu idite mulu opolo ka:nokoliatepama: ebeno moto wiya: wokopiatamo katepamene iba:te wadenomamo kuiminama:. Ebene ebete iba:tamo woko iyaiya ikalamolete gigiyu umidawatamo kegemene, ‘A:ma: naimano pe teta:mo olowiolo nokoliniye.’ <sup>35</sup> Ebema: la: olowiolo nilukuliniyala:, mabu la: iyatawa: moto namutudawano pe tete, diyala, adimo tetelola:ka: o idoko tetelola:ka:, walo apuamola:ka: o duiya tetelola:ka:. <sup>36</sup> Iyo, ebete samonomamo da:pemene la: laonalo da:ba:pulametamene, <sup>37</sup> ebema: nale me tabo la: kapiyatamo kegea:, epo bilibilinomatamo gemo, la: olowiolo nilukuliniyala:!”

## 14

*Yu Watowatopiate Ya:suko Anakapuima: Degeliya*  
*Ma:t 26.1-5; Luk 22.1-2; Yon 11.45-53*



<sup>1</sup> Aduga:la Soliyomu\* ega:walo Unamo Maiga: Palowa Bae Soliyomu† ibino tanalo wagilima: netewa egelate eba na:pola:nalo, ebe tetelo Godotamo kalimagono ikameopino watowatopi ega:walo Godokono Totomu iyatula:mepe, iba:te Ya:suko anakapuima: tabo ebo iyatiya, ebene iba:te ebe diya gabodo laema: gabo waditiya. <sup>2</sup> Iba:te negeliya, “A soliyomu tetelo ebe a:kelaema:, mabu epate atamo dowate ago da:ba:gowelama:na:.”

*Betani Duliymolo Kamiyalete Ya:sutamo Wade Nibo Ii Dadipanamiya*  
*Ma:t 26.6-13; Yon 12.1-8*

<sup>3</sup> Ebene Ya:sute Betani duliymololo dubu idi Saimonokono motolo bae niti, ebe dubu dopamo kukulakukulagonola. Ebe tetelo kamiyale kapiyate pete, wade nibo ii nokola kalila:mo tabokaimi adaete, ebete pitukamidate Ya:sukono watamo ebo padipanamiya, ebe ii inamabuno mailo ebe nadala, ebene wiya kawonomola. <sup>4</sup> Epo epetapi ebolo da:pola:niya, iba:te dowate ibi a:ka:tuwa: ibino taneba magumulo tabo eba kiyawaolo negeliya, “Mabu keleka: ebete me wade nibo ii dologala inamabuma: da:midi? <sup>5</sup> A me ii manima: na:na:miditaleka: kapiya ulamano woko wiya mani buwatena:, ebene ebe mani nigologolopiatamo gito bikalamolena:.” Ebema: iba:te ebe kamiyale kawiya ebo aniya.

<sup>6</sup> Wiyasiya Ya:sute iba:tamo negiya, “La: ebe natepala! Ebe kawiya beda:ma: kanawitama? Ebete natamo wade tanalonomo osiyodilo. <sup>7</sup> La: numa:la:, nigologolopiate tete geyageyanomolo la:go bilukulionama:na:, la:imano ubi tetelo iba:tamo nilakapo inamabu ebo nikalamenakiyala:, wiyasiya na uwomua: tetelo la:go a:kokolinamo, tete tatalila nale la:ka:miyapamamota. <sup>8</sup> Ebema: nanitabola, me kamiyalete natamo wade tanalo osiyodilo, kuba idi kitana:. Nale a:ea:no tetelo ebete naimano ape bobamo iyatima: gabo dopamo osiyodilo, iyo, ebe tanalo eba malagidilolo ebete naimano apa:mo wade nibo ii ebema: adipana. <sup>9</sup> Na la:tamo nani tabo gemo, epate iyaiya opo bilibilinomamo Godokono Wade Tabo datanakoma:na:, iba:te me kamiyalete dosiyodilo ebe tanalo malagidilolo ba:nikiyawaonakoma:na:.”

*Yudasite Ya:suko Laema: Nopo Diyatiya*  
*Ma:t 26.14-16; Luk 22.3-6*

<sup>10</sup> Ebene Ya:sukono 12 waloma:tapino taneba magumulo Keliyota duliymolodawa Yudasite Godotamo kalimagono ikameopino watowatopiatamo tote, nopo ebo niyatiya Ya:suko ibino kotamo kiyatima:. <sup>11</sup> Ebe tetelo iba:te ebe tanalo olowite kalakalaolo tabo ebo iyatiya ebetamo mani kikaema:, ebema: Yudasite iba:godone tote gabo ebo nowadiya Ya:suko ibino kotamo kiyatima:.

---

\* **14:1:** Me Aduga:la Soliyomuno mabu ebe Moseseke tetelo wagilimiya. Ebe tetelo Isipiti Kawo Elawodubu Pa:lote Yu epo bilibilinomo uwatete ibi ebene wiya: wokopima: midiliya, ebema: ebe ubia:nola ibi gito alibolema: ibino Ka:inane opamo. Godote Pa:lokono wato kodakoda tanalo dumiya, ebema: idoko idilo ebete ebene a:e nopodawa Isipiti opamo napaliboni Isipiti epo bilibilinomono dopo gudi kapanakapulamenama:. Ebene ebe idokolo a:e nopodawate Yu epono gudi aduga:lalenate, wiyasiya Isipiti epono gudinomo anakapulameni. Ebe anoano tanalodo Yu epo bilibilinomate Isipiti opone ebo nemaiminiya, ebema: ebe tanalo malagidiloma: iba:te ulama bilibilinomo magumulo Aduga:la Soliyomu bosiyodilonakoma:na:. † **14:1:** Unamo Maiga: Palowa Bae Soliyomu ebe Yu epono soliyomu idila. Aduga:la Soliyomu dolopoligomene, egela idilo me soliyomu idi wagilimite iba:te sebeni egela tetelo bosiyodilonakoma:na:. Me soliyomuno magumu ma kunula. Yu epate Isipiti opone Godokono elawamo da:nemaiminiya, ebe idokolo ibino palowa bae osiyodilolenate wadenomamo okaleona:no iba:te gawagawalo ebo tolameniya. Mabu ebe baete unamo maimioma: tetea:nola, ebema: ebe tanalo malagidiloma: Yu epate me soliyomu bosiyodilonakoma:na:.

*Ya:sute Ebe Waloma:tapiago Aduga:la Soliyomu Denaniya  
Ma:t 26.17-25; Luk 22.7-14,21-23; Yon 13.21-30*

<sup>12</sup> Yu epono osiyodilo tanalo ma kunula, iba:te ulama bilibilinomolo Unamo Maiga: Palowa Bae Soliyomu nao dowagiliminakiya, ebe dopo egelalo Aduga:la Soliyomuma: iba:te sipi-goeogoeo egege alukolenakiya. Ebe tanalo eba malagidilolo Ya:suko waloma:tapiate ebetamo negeliya, “A tolamete Aduga:la Soliyomuno nao inamabu kebolo na:ka:nosiyodilolema:, ale a:ma:go kapimiya kenaoma:?”

<sup>13</sup> Ebene ebete ebe waloma:tapi netewa eba alibolelo iba:tamo negiya, “La: kawo duliyoumolamo na:toala:, ebene obo daguwaita ebe dubute la:go dupalugomene, la: ebe ebo nowaloma:tiyala:.” <sup>14</sup> Ebete kebe motamo ka:nodolomene, la: ebe moto namutudawatamo ma kunu na:negeliyala:, ‘Iy-atulamedawate ge, moto keleka: nale na waloma:tapiago Aduga:la Soliyomu bae kenaoma:?’ <sup>15</sup> Ebe tetelo ebete moto guamo la: kemagatalema:ta, unu motolo tete kawo bitana, iyalo osiyodilaka. La: ebolo aimano nao inamabu na:nosiyodiloliyala:.”

<sup>16</sup> Ebene Ya:suko waloma:tapi netewate kawo duliyoumolamo nemaimite, Ya:sute kebe tanaloma: kanaliyale, iba:te ebe tanalo nulamete Aduga:la Soliyomu inamabu ebo nosiyodiloliya.

<sup>17</sup> Ebema: didokoni Ya:sute ebene 12 waloma:tapiago ebe motamo na:pelameniya. <sup>18</sup> Iba:te ilukulinate bae eba naonalo Ya:sute negeni, “Na la:tamo nani tabo gemo, la:imano taneba magumulo idawate na anaka-punamepi kowalubilimene na lawenema:.”

<sup>19</sup> Ebe tetelo iba:te tepo mibomiboma: eba eda:onalo, Ya:sutamo idawate genaki, idawate genaki, “Nalela:ka:?”

<sup>20</sup> Ya:sute iba:tamo negeni, “La: 12 waloma:tapino taneba magumulo bae kalila:mo nago koto daduba:midamene, ebe ebe lumagila.” <sup>21</sup> Iyo, ebe nanitabola, Epono Naniwite a:eamo ebe na:to, Godokono Bukalo tabo ma kunu bitana, wiyasiya kebe lumagite ebe anakapumipiatamo dikalaemene, ebe lumagite kuba wiya kawonomo kelaemene. Me ebe mabuma: ebe dubu ebene menokote ebe alaimia:notaleka: ba:modobona:!”

*Ya:suko Malagidilo Bae Nao Tanalono Wagilimi Mabu  
Ma:t 26.26-30; Luk 22.14-20; 1 Kol 11.23-25*

<sup>22</sup> Ebene iba:te bae eba naonalo, Ya:sute bae lawenate Godotamo kalakala tabo genate ebo wakamioni, ebema: ebete iba:tamo eba ikalamolenalo negeni, “La: nuwata:la:, me naimano apela.”

<sup>23</sup> Ebene ebete kalili kelawenate Godotamo kalakala tabo genate iba:tamo eba ikalamolenalo, ibi bilibilinomate ebo nioniya. <sup>24</sup> Ya:sute iba:tamo negeni, “Godote epago milolo kilukulinama: nopo diyatiya, naimano kalimate ebe nopo kodakodaimina, iyo, me kalimate epo epetapi bilibilinomo walubilima: keka:ka:liyamene.” <sup>25</sup> Na la:tamo nani tabo gemo, na me tetelo me da:imi obo walo a:ka:nimo, wiyasiya Godote Kawo Elawodawama: deda:na, ebe duliyoumololo na oli da:imi obo walone tetelo ebo ka:na:nimamo.”

<sup>26</sup> Ebene iba:te Godoko amamateno oale alapionate, Olibi Kewakewa Unu Damelamo ka:tolamenama: motone gito niwitioniya.

*Ya:sute Pitako Danani, A:ma:le Na Iyatawa:noma: Kegema:ta  
Ma:t 26.31-35; Luk 22.31-34; Yon 13.36-38*

<sup>27</sup> Ebe tetelo Ya:sute iba:tamo negeni, “La: bilibilinomate na katepane-mamota mabu Godokono Bukalo tabo ma kunu bitana, ‘Godote sipi-goeogoeo ulamedawa danakapuimene, ebe tetelo sipi-goeogoeate iyaiya

kalautioma:na:’ <sup>28</sup> Wiyasiya Godote na a:ene walo dakadipanatenemene, na Ga:lili opamo dopamo ka:tomamo. La:le na ebolo ka:punaemamota.”

<sup>29</sup> Ebene Pitate Ya:sutamo negeni, “Ibi bilibilinomate a:e tolemelo dalautioma:na:, wiyasiya nale a:ma: akatepatama!”

<sup>30</sup> Ya:sute ebena tabo eba wiyanaloni negeni, “Na a:ma:tamo nani tabo gemo, ka:lo idokolo kakabate netewa teta:mo geoa:no, a:ma: netewa-kapiya teta:mo na iyatawa:noma: kegema:ta.”

<sup>31</sup> Wiyasiya Pitate kawonomamo walo na:kegeni, “Na a:ma:go da:na:emo, nale a:ma: iyatawa:noma: a:kegemo!” Ebe tetelo ibi bilibilinomate ebe atu tabo kegelaniya.

*Ya:sute Getasemanilo Godotamo Da:towetoweoni*

*Ma:t 26.36-46; Luk 22.39-46*

<sup>32</sup> Ebene Ya:suko ega:walo ebe waloma:tapi iba:te kawo duliomolone nemaimionate tatali opo ida:mo tolameniya, ebe opono mailo Getasemanila. Ya:sute ebolo iba:tamo na:negeni, “La: malo na:pola:nala:. Na me tataliamo tomo Godotamo towetowe tabo ka:negema:.” <sup>33</sup> Ebe tetelo ebete Pitako, Ya:imesiko, ega:walo Yoneko, ibi ebalata towetoweo tabo gela baiamo magataleni, ebena tepo mibomibo ega:walo woki temeteme tanalo ebetamo kawonomamo ebo pelameniya. <sup>34</sup> Ebema: Ya:sute iba:tamo negeni, “Na tepo temeteme kawonomamo iyatawanamo, mako temetemetete na anakapuname keba kunula:ka: eba kunula. La:le naimano tanaloma: malo olowiolo na:pola:nala:.”

<sup>35</sup> Ebene ebete kela:mo tonate ebena ape opamo niyatinate Godotamo ebo na:towetoweoni, gabote da:modobomene ebe teteno tepo temetemetete ebe katepama: <sup>36</sup> Ebete negeni, “Oe, Aba! Tanalo bilibilinomo osiyodilolema: a:ma:godolo elawo bitana, ebema: a:ma:le me tepo temeteme kalili nagodone nelawa:. Wiyasiya naimano ubia:, a:ma: a:ka:tuwa: a:imano ubila nosiyodila.”

<sup>37</sup> Ebene ebete waloma:tapiatamo da:peni laonalo pulamenate Pitatamo na:pegeni, “Saimono, la: beda:ma: kelawenama? Mabu keleka: la:le naimano tanaloma: tete da:pesamo olowioa:noma: deda:wenama?”

<sup>38</sup> Ebe tetelo Ya:sute ibi nanaleni, “Godotamo olowiolo na:towetoweonala:, mabu la:le Saitanakono kuba gabamo wabuga:ta tanalomo da:ba:gudima. La:imano tepo magumulo wade tanalo osiyodiloma: ubila, wiyasiya la:godolo osiyodiloma: elawo puliyala.”

<sup>39</sup> Ebene Ya:sute walo ka:tonate, ebete dopamo Godotamo towetowe tabo keba kunu ka:negeniyale, ebete atumu ka:negeni, <sup>40</sup> ebena ebete ebe waloma:tapiatamo walo da:ka:peni laonalo ka:pulameni. Ebe tetelo ibino balidite unomoma: na:elaolameni, ebe mabuma: iba:te ilipago ebetamo gela tabo nipo wadiniya.

<sup>41</sup> Ebene ebete walo ka:tonate netewa-kapiya tetelo Godotamo na:towetoweonate da:ka:peni iba:tamo na:pegeni, “La: ela amiolo walo beda:ma: ka:kelawenama? Taula, tete a:pe, kubakubapiate Epono Naniwi ibino kotamo nelawa:. <sup>42</sup> Iyo, la: nemaimiala:, a na:tolaema:. Numa:la:, na anakapunamepino kotamo iyatinidawate ebe na:pe!”

*Yu Watowatopiate Ya:suko Anakapuima: Delaweniya*

*Ma:t 26.47-56; Luk 22.47-53; Yon 18.3-11*

<sup>43</sup> Ya:sute ebe tabo eba genalo ebe tetenomolo Yudasite peni, Ya:sukono 12 waloma:tapino taneba magumulo ebe idila. Ebene eba:go dubu bilibilinomo epetapiate ibino gowelaono gili ega:walo gaubago da:pelameniya, ebe dubu ebe Godotamo kalimagono ikameopino watowatopi, Godokono

Totomu iyatulamepi, ega:walo kawokawo dubu epetapi, iba:te dapali-boleniya ebe dubula. <sup>44</sup> Nanitabola, Yudasite ibi iyalo ma kunu analeni, “Nale daboeteomo, ebe ebe lumagila. La:le ebe samonomamo lawa:wete wadenomamo nemagatiyala:.”

<sup>45</sup> Ebene Yudasite penate Ya:sutamo tonomo tonate ebe nanani, “Iyatulamedawa!” Ebe tetenomolo ebete ebe eba aboeteonalo, <sup>46</sup> dubu epetapiate Ya:suko ibino kotamo kodakodanomolo ebo laweniya. <sup>47</sup> Ebe tetelo Ya:suko waloma:tapi magumulo dubu idite ebene gowelaono gili magoba:nate, Godotamo kalimagono ikameopino Unu Watodawanomono moto wokodawa anagaliminate, galo apu ebo mapitamidameni. <sup>48</sup> Ebene Ya:sute iba:tamo negeni, “Na pilo lumagila:ka:, o na gowelaodawala:ka?: Mabu keleka: la:le gowelaono gila:go ega:walo gaubago na lawenema: da:pelama:ema? <sup>49</sup> Na egela epetapilo Godoko Amamateno Iya Motolo la:go eba okolilo epo diyatulamenatimo, la:le na ebolo kelawena:wea:, wiyasiya me tanalate a:pemaimia Godokono Buka tabono tanalate nanitaboma: keda:oma:.”

<sup>50</sup> Ebe tetelo ebe waloma:tapi bilibilinomate ebe atepanate gito alautioniya. <sup>51</sup> Ebolo oli ape dubu nutini, ebete dopamo wade keyakeya kalikunomo pulinate Ya:suko waloma:tapiago ebamo da:nemaigani, ebema: dubu epetapi ubila ebe kelawenama:, <sup>52</sup> wiyasiya ebete ebene kaliku atepanate kikopiyanomo atumu gito kalaula:ni.

*Yu Epono Ka:nisolo Dubate‡ Ya:sukono Tanalo Danagiyamidameniya  
Ma:t 26.57-68; Luk 22.54-55,63-71; Yon 18.13-14,19-24*

<sup>53</sup> Ebene iba:te Ya:suko Godotamo kalimagono ikameopino Unu Watodawanomono motamo gito magataniya. Iba:te ebe ebe motamo magatana:no dopamo Godotamo kalimagono ikameopino watowatopi epetapi, ega:walo Godokono Totomu iyatulamepi, ega:walo kawokawo dubu epetapi, ibi bilibilinomate pelamenate ebo paladabutiniya. <sup>54</sup> Ebe tetelo Pitate Ya:suko muludopone eba waloma:tanalo, ebete Unu Watodawanomono moto kala magumamo nopeganate, ebete atila:piago elalo ebo na:giga:oniya. <sup>55</sup> Ebene Unu Watodawanomo ega:walo Ka:nisolo dubu bilibilinomo epetapiate tabo gelapi oleniya, Ya:sukono kuba olemenate ebe kanakapuima:. Wiyasiya iba:te ebene kuba idi kuminiya:, <sup>56</sup> iyo, tabo gelapi bilibilinomate ebene tanaloma: a:da: tabo eba kiyawaonalo, iyaiya tabo degelaniya ibino tabote wiyasiya kapiyama: keda:oniya:.

<sup>57</sup> Ebene epetapiate maiminate Ya:sukono tanaloma: a:da: tabo eba kiyawaonalo, iba:te ma kunu gelaniya, <sup>58</sup> “Ebate tabo degiti ale ma kunu olowitima:, ‘Me Godokono Moto epate kotamo detiya, nale anabulimite netewa-kapiya egelalo moto idi walo ka:ketemamo, ebako moto epo epetapiate etema: modoboa:.’ ” <sup>59</sup> Wiyasiya dopo a:da: tabo kiyawaopi keba kunula:ka:, me oli tabo gelapi eba kunula, iba:te ibino tabo gela magumulo Ya:sukono tanaloma: woki kapiyama: keda:oniya:. <sup>60</sup> Ebene Godotamo kalimagono ikameopino Unu Watodawanomote ibino tanebalo maiganate Ya:suko nalateda:ni, “A:ma: tabo gea:noma: beda:ma: keda:wena? Me dubate a:imano tanaloma: degelana keba kunula:ka:?”

‡ 14:52: Buka ka:la:mioledawa, modobola a:ma: me tanalo niyatawa, Ya:suko tetelo Yu epono watowatopi dubu epetapi, ibi me Ka:nisolo dubula. Ebe watowatopiate Yu epono iyaiya tanalo eba anagilamelelamelelo kubakubapiatamo ibino wiya ebo ikalamenakiya, wiyasiya ebe Ka:nisolo dubagodolo elawo kitanamia: lumagi a:eamo aliboma:.

<sup>61</sup> Ebe tetelo Ya:sute tabo gea:no gito utini, ebema: Unu Watodawanomote ebe walo nakalateda:ni, “Godoko epate ebe damamatena, a:ma: ebena Gudu Kelisotela:ka:?”

<sup>62</sup> Ya:sute nowamini, “Na ebe ebetela. Ebene la:le na Epono Naniwi aimano Elawodawa Godokono tumudi apulo okolitalo kunaemamota, iyo, walone na Unu Duliyomolone tema magumudo kapawokalamamo!”

<sup>63</sup> Ebema: Unu Watodawanomote ebe tabo olowinate, ebena kawo dowo tanalonomo kawokaliminama: ebete da:pulini ebe kaliku anagiyamidale-nate negeni, “A me dubuno kuba kiyatawaoma: tabo gedawa idi a ubia:nola!”

<sup>64</sup> Ebete a:ka:tuwa: kuba tabonomo dege la: ebe olowiomata, mabu ebete nege, “Na ega:walo Godoko, a kapiyala!” Ebema: ebena tanaloma: la:imano ubi keba kunula:ka:?”

Ebene ibi bilibilinomate Ya:sukono tanalo eba anagiyamidamenalo ebe anakapuima: ebo gelaniya. <sup>65</sup> Ebe tetelo ibi epetapiate Ya:sutamo kowe me-olenate, ebena ololo mula:menate eba anagalimionalo negelaniya, “A:ma: Godokono woki awokalimidawama: nanitabolo deda:wena, a:ma: negea piyate kanagalimiotana!” ebene atila:pi dubate ebe lawenate kotamo ebo anagalimioniya.

*Pitate Ya:suko Iyatawa:noma: Degeni*

*Ma:t 26.69-75; Luk 22.56-62; Yon 18.15-18,25-27*

<sup>66-67</sup> Ebe tetelo Pitate ebe motono kala magumulo ebena ape kenaenaimi-nama: elalo okolini. Ebene Unu Watodawanomono woko buwelete penate, Pitako wadenomamo pumionate ebe napanani, “A:ma: atumu me Nasaleta duliyomolodawa Ya:suago pata:namiata!”

<sup>68</sup> Wiyasiya Pitate negeni, “Ao, na ebe dubu iyatawa: A:ma:le degeawena ebe tabo na kemalagidilona:.” Ebene ebete kala ga:dimi gigiyamo da:toni, ebe tetelo kakabate negeoni.

<sup>69</sup> Ebene woko buwelete ebe uminate, ebolo dilukuliniya ebe epo walo nakanaleni, “Me Ya:sukono lumagi idila!” <sup>70</sup> wiyasiya Pitate ebe atu iyatawa: tabo kegeni.

Ebene ebolo da:pola:niya iba:te tete da:pesamo ilukula:tapanate Pitako walo nakananiya, “Nanitabola! A:ma: Ya:sukono lumagi idilata, mabu a:ma: Ga:lili opodawalata.”

<sup>71</sup> Wiyasiya Pitate negeni, “Godokono dopo apulo utite gemo, nale nani tabo gea:no ebete na kanaginaemene! La:le kebe lumagima: kegelawenama, na ebe iyatawa:!”

<sup>72</sup> Ebene ebe tetenomolo kakabate geo netewa tetema: deda:meni, Ya:sute ebetamo dopamo kebe tabo kegenile, Pitate ebe tabo ebo malagidiloni, “Kakabate netewa teta:mo gea:no, a:ma:le netewa-kapiya teta:mo na iyatawa:noma: kegema:ta.” Ebene Pitate kawonomamo ebo iini.

## 15

*Yu Epono Watowatopiate Ya:suko Paeletetamo\* Demagatiya*

*Ma:t 27.1-2,11-14; Luk 23.1-5; Yon 18.28-38*

<sup>1</sup> Duiyanomolo Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi, me Ka:nisololo epo bilibilinomate nopo iyatiya. Ebema: iba:te Ya:suko ala:mo

\* **15::** Ya:suko tetelo Loma epate Paeleteko napalibiya Yu epono Yudiya opamo, ebete ibino kapela Kawo Elawodubuma: ka:pada:nama:, ebene ebe opolo Paeleteko kapiyagodolo elawo itanami lumagi a:eamo aliboma:.



matuomeote Paeletetamo demagatiya, <sup>2</sup> Paeletete ebe nalatediya, “A:ma: Yu epono Kawo Elawodubula:ka:?”

Ya:sute ebetamo nowamiya, “A:ma:le ebe ebe geata.”

<sup>3</sup> Ebe tetelo Godotamo kalimagono ikameopino watowatopiate Ya:sukono tanaloma: negelitiya ebete iyaiya kubakuba tanalo osiyodilolenami, <sup>4</sup> ebene Paeletete ebe walo nakalatediya, “A:ma: ibino tabo ba:kowamiaemene? Iba:te negelita a:ma: kawokawo kubakuba tanalo bilibilinomo osiyodiledawalata!”

<sup>5</sup> Wiyasiya Ya:sute tabo idi kegiya:, ebema: Paeletete kawonomamo anoaniya.

*Paeletete Ya:suko A:eamo Dalibiya*

*Ma:t 27.15-26; Luk 23.13-25; Yon 19.1-16*

<sup>6</sup> Ebe tete epono osiyodilo tanalo ma kunula, ulama bilibilinomo magumulo Yu epono Aduga:la Soliyomu tetelo iba:te idoko motolo kapiya lumagi mailamo deka:minakiya, Paeletete ebe lumagi ebene kuba wiyane gito alibonaki. <sup>7</sup> Ebe tetelo kapiya dubu ebene mailo Balabasitela, ebete idoko moto gulo okolinami, ebene tanalo ma kunula. Dopamo dubu epetapiate Loma gabamaniago gowelaopima: eba eda:olo, iba:te epo epetapi ebo anakapulamiya, ebe mabuma: Loma gabamani watowatopiate ibi Balabasiko ebana uwatete idoko motamo gito alomiya. <sup>8</sup> Ebema: Ya:sute Paeletekono ololo apulo eba utitalo, epo bilibilinomate ebetamo pelamete napaniya, ebete soliyomu tetelo dopamo keba kunu kosiyodilonakile eba kunu walo ka:kosiyodiloma:. <sup>9</sup> Ebene Paeletete iba:tamo negiya, “La: ubila:ka: nale la: Yu epono Kawo Elawodubu gito aliboma:?” <sup>10</sup> Ebete me tabo giya mabu ebete iyatawiya, Yu epo bilibilinomate Ya:sutamo nekalakalautiya, wiyasiya ibino watowatopiate ebe mabuma: dowate ebe gito magariya, iyo, iba:godolo nanitabo tanalo puliyala, kitaniya:.

<sup>11</sup> Wiyasiya ebe tetelo Godotamo kalimagono ikameopino watowatopiate epo epetapi bilibilinomatamo elawo ikalamiya iba:te Paeleteko kanama:, ebete Balabasiko idoko motone gito alibote wiyasiya Ya:sutamo kuba wiya kikaema:. <sup>12</sup> Ebene Paeletete iba:tamo walo na:kegiya, “Me dubu la:le Yu epono Kawo Elawodubuma: degelawenama, nale ebe keba kunu nakamitimo?”

<sup>13</sup> Iba:te gelatepaolo negeliya, “Kewa olotolowamo tupuguima:wete, ikoko nanagilamolema:!”

<sup>14</sup> Ebene Paeletete negiya, “Beda: mabuma:? Ebete beda: kuba kosiyo-dilile?”

Wiyasiya iba:te kawonomamo gelatepaolo walo na:kegiya, “Kewa olotolowamo ebe na:tupuguima:!”

<sup>15</sup> Ebema: Paeletete ebe epo kalakalakobi ka:midilima: ubi eba iyatilo, ebete Balabasiko idoko motone gito alibiya, wiyasiya ebete ebene gowelaopi nanaliya iba:te Ya:suko pa:ka:pa:ka:mo ka:na:ma:ga:midaoma:. Ebene ebe tanalo dolopoligiya ebete Ya:suko iba:tamo gito ikalamiya, iba:te ebe kewa olotolowamo tupuguimite ikoko kanagilamolema:.

*Gowelaopi Dubate Ya:suko Dekalakatitiya*

*Ma:t 27.27-31; Yon 19.2-3*

<sup>16</sup> Ebe tetelo gowelaopi dubate Ya:suko nemagatiya Loma gabamanino kawo moto guamo, ebe motono mailo ebe Pelatoliyamala, ebene iba:te ibino gowelaopino taneba dubu bilibilinomo ka:la:mite iba:go ebo nalad-abutiya. <sup>17</sup> Iba:te Ya:suko eba kalakalatelo wiya kawonomo kalimakalima kaliku ebetamo ebo pulimiya, ega:walo iba:te moeagono ale nelawete

anagogobeyamidaolo a:dete ebeno watamo gito pulimiya. <sup>18</sup> Ebene iba:te ebe kalakalatele negeliya, “Eiye! Yu epono Kawo Elawodubu, a:ma: niyata!” <sup>19</sup> ega:walo iba:te ebe gaubamo watolo anagalimiote ebetamo kowe meolete, iba:te ebe eba kalakalatele ibino pupamo ilukulite ebetamo ebo tudila:iya. <sup>20</sup> Iba:te ebe kalakalate dolopoligiya, kalimakalima kaliku ebeno apene pekanamete ebeno kalikunomo walo gito ka:pulimiya, ebene iba:te ebe nemagatiya kewa olotolowamo ebe ka:na:tupuguima:.

*Gowelaopiate Ya:suko Kewa Olotolowamo Da:tupuguimiya*  
*Ma:t 27.32-44; Luk 23.26-43; Yon 19.17-27*

<sup>21</sup> Ebe tetelo dubu idi Saimonoko ebe Sailiniya duliyaomolodawala, ebe A:lesandako ega:walo Lupasiko ibino nabiwila, ebete iyabaine kawo duliyaomolamo me gabodo eba pitalo, gowelaopiate ebe odiyobote ebo lawiya Ya:sukono kewa olotolowa kaguwataema: <sup>22</sup> Ebene iba:te Ya:suko nemagatiya Gologota damelamo, ebe damela mailono magumu ebe ‘Wato Goala.’ <sup>23</sup> Ebolo iba:te elawo da:imi obo ega:walo temeteme olowia:no kaka mula-mula adabulatelete ebetamo dikamiya Ya:sute ka:niya: <sup>24-25</sup> Ebene egelate kela:mo da:podolatepiya 9 koloko tetelo, gowelaopiate Ya:suko kewamo tupuguimite ikoko ebo anagilamolemiya, ega:walo iba:te nokola egege iyalekeolo kalakala tanalo eba osiyodilolo ebeno kaliku iyaiya uwatemete ebo alabaomiya.

<sup>26</sup> Ebe tetelo iba:te Ya:sukono a:e mabu awokalima: tabo unamo ma kunu akuloliya, “Me dubu ebe Yu epono Kawo Elawodubula,” <sup>27</sup> ega:walo iba:te pilo dubu netewa Ya:suago iyaiya kewamo akotupuguilamiya, idi tumudi apuamo, idi pele apuamo. <sup>28</sup> Ebe tanalote ma kunu pemaigiya, Godote ebeno Bukamo dopamo dakuloliya ebe tabote nanitaboma: keda:ma:, iyo, ebeno Bukalo tabote ma kunu itana, “Iba:te ebe kubakubapiago kapiyama: midiya.”†

<sup>29</sup> Ebene piyate ebe gabodo da:petolamitiya iba:te Ya:suko malogolo nekalakalatitiya, iyo, iba:te ibino wato wadegelatelelo negelitiya, “Eiye! A:ma: Godokono moto anabulima:wete, netewa-kapiya egelalo walo etema: degeawia, a:ma: ebe lumagilata! <sup>30</sup> Modobola, a:ma: a:ka:tuwa: a:imano igilo mula:wete kewa olotolowa unune opamo na:piwisiga!”

<sup>31</sup> Ebe tetelo Godotamo kalimagono ikameopino watowatopiate Godokono Totomu iyatulamepiago Ya:suko atumu na:kekalakalatitiya, ma kunu idite iditamo genaki, idite iditamo genaki, eba kunu wagemitiya, “Ya:sute epo epetapino olalati tanalo mula:lalamanaki, wiyasiya ebe a:ka:tuwa: ebeno igilo mula:ma: modoboa:!” <sup>32</sup> Ebete Godokono Alibodawa ega:walo Isalaela epono nani Kawo Elawodubuma: deda:na, modobola ebete kewa olotolowa unune opamo na:piwisigana, iyo, ale ebe tanalo umite ebe nanitabokobi ebo ka:midimalema:!”

Ebe tetelo eba:go da:tupuguilamiya, ebe dubu netewate atumu Ya:suko malogolo kuba tabo na:kegelitiya.

*Ya:sute Da:eni*  
*Ma:t 27.45-56; Luk 23.44-49; Yon 19.28-30*

<sup>33</sup> Ebene egelate tuli teta:mo dutiya opo kawonomote ebo idokiya. Ebe tetelo idokote egelano alo eba mula:lo egelate a:iwate kela:mo a:niwisigatepani, egela tuli tetene wagemilimite 3 koloko uwomuamo. <sup>34</sup> Ebene Ya:sute Yu epono tabamo kawonomamo negeni, “Elai, Elai,

† 15:28: Mak 15.28 buka apuno tabo Makate bukamo kakuloliya:, wiyasiya ebeno buka osiyodilo walogabo apune nanitabokobi mididawa idite akuloliya.

lama sabakatani?” me tabono magumu ma kunu itana, “Naimano Godo, naimano Godo, na a:ma:le beda:ma: katepana:wa:?”

<sup>35</sup> Epetapi ebolo da:pola:niya iba:te ebene tabo olowinate negelaniya, “Numa:la:, ebe Elayako ebe ka:mina!” <sup>36</sup> Ebene kapiya dubu na:puliganate umago kaka da:imi obamo naduba:midanate pudamo namogotenate Ya:sutamo eba nikamenalo negeni, “Iyaiya, a kuma:tepiye! Elayate ebe pelawete opamo da:ba:powolukomene!”

<sup>37</sup> Ebe tetelo Ya:sute kawonomamo gepatenate a:enomo ebo a:eni.

<sup>38</sup> Ebene Godoko Amamateno Iya Motono kaliku ubilite tulituliya bolegale unune wagiliminate opamo ebo piwisigani. <sup>39</sup> Ega:walo Ya:sukono ololo apulo dutini, ebe gowelaopino elawodubute Ya:sute keba kunu ka:enile ebe tanalo uminate negeni, “Nanitabola, me dubu ebe Godokono Gudula!”

<sup>40-41</sup> Ebe tetelo kamiyale epetapiate Ya:suko uima: mulune putitataniya, piyate eba:go Yelusalemamo da:pelamiya, ibi ebe kamiyalela, ega:walo ibino taneba magumulo Salomiko, ega:walo Magadala duliynomolodawa Ma:liko, ega:walo Ma:li idi ebene gudi netewa Yausesiko ega:walo Da:pesodawa Ya:imesiko, miba:te pola:niya. Nanitabola, Ya:sute Ga:lili opolo depata:nami me netewa-kapiya kamiyala:te ebe wadenomamo walubinamiya.

*A:limitiya Duliynomolodawa Yausepete Ya:sukono Ape Nokola Bobo Magumamo Diyatini*

*Ma:t 27.57-61; Luk 23.52-56; Yon 19.38-42*

<sup>42-43</sup> Adimo tetelo A:limitiya duliynomolodawa Yausepete na:peni, ebe Yu epono Ka:nisolo magumulo tuputupu lumagi idima: eda:nami, iyo, ebete Godokono Kawo Elawodawama: eda: tete nemakopelenami. Ebene ebete ma kunu pemalagidiloni, ebe egela Yu epono wokoa: egelano inamabu osiyodilole tetela mabu dumutu ebe talena egelala, ebema: ebete tonate Paeleteko tolea:no nananani Ya:sukono ape lawenama:. <sup>44</sup> Paeletete ebe tabo olowinate kapiya la:wa:nate wokilo negeni, “Ya:sute iyalo a:ka:eakale?” ebema: ebete gowelaopino elawodubu ebetamo ka:minate Ya:sukono a:e tanaloma: ebe ebo alateda:ni. <sup>45</sup> Ebene Paeletete gowelaodawa elawodubugodone Ya:sukono a:e tete olowinate Yausepetamo modobo tabo ebo geni ebete Ya:sukono ape lawenama:. <sup>46</sup> Ebene Yausepete wade keyakeya kalikunomo maniamo lawenate Ya:sukono ape opamo powolukonate, wade kalikamo aputinate nokola bobo magumamo ebo niyatini, ebe bobo epate maboele nokola damela eba obobolo iyalo ebo osiyodiliya. Ebe tetelo Yausepete kawo nokola mupiamidanate bobo gigiyu ebo nemopini, <sup>47</sup> ebene Magadala duliynomolodawa Ma:liko ega:walo Yausesikono menoko Ma:liko, Yausepete Ya:sukono ape diyatini iba:te ebe bobo bai uminiya.

## 16

*Ya:sute A:ene Walo Da:kemaigiya*

*Ma:t 28.1-8; Luk 24.1-4; Yon 20.1-10*

<sup>1</sup> Ebene Yu epono wokoa: talena egela tete dolopoligiya, Magadala duliynomolodawa Ma:liko, Ya:imesikono menoko Ma:liko, ega:walo Salomiko, iba:te tolamenate wade nibo inamabu maniamo nuwateoniya egela idilo Ya:sukono apa:mo kapabutillamelema:. <sup>2</sup> Ebene Sande egela duiyanomolo egela eba waloutalo, iba:te nokola bobo baiamo da:tolamitiya <sup>3-4</sup> na:negeliya, “Bobo gigiyulo ditana ebe kawo nokola balamo potele na:ka:na:mupiamidaeaemene?” Iba:te ma kunu gelitiya mabu ebe nokola

mibonomola, wiyasiya iba:te wadenomamo eba meleolo, ebe kawo nokola balamo iyalo mupiamida eba itanalo ebo numiya. <sup>5</sup> Ebene iba:te nokola bobo magumamo nopila:ote, oli ape dubu keyakeya ga:ga: kaliku pulite tumudi apulo dokoliti numite kawonomamo nanoanoutiya.

<sup>6</sup> Ebete iba:tamo negiya, “La: akoanoanoala! Nasaletе duliymolodawa Ya:suko epate ebe kewa olotolowamo da:tupuguimiya, la:le ebe waditamata. Ebe malo puliyala, ebe emagaka! Iba:te ditidi adimolo ebe diyatiniya ebe bai la: numa:la:. <sup>7</sup> Ebema: la: tolama:wete Pitako ega:walo ebe waloma:tapi epetapi nananala:la:, ‘Ya:sute Ga:lili opamo dopamo ka:tomene. La: tolama:wete ebe ebo ka:nuimamota, ebete la: dopamo keba kunu kanaletia eba kunu.’ ”

<sup>8</sup> Ebene iba:te anoanolo anakamiago nokola bobo magumune pemaimiote gito pipuila:iya, wiyasiya iba:te lumagi idi kaniya: mabu iba:te kawonomamo toletoleutiya.

*Ya:sute Magadala Duliymolodawa Ma:litamo Danawokaliya\**  
*Ma:t 28.9-10; Yon 20.11-18*

<sup>9</sup> Ebe Sande egela duiyanomolo Ya:sute a:e magumune maigate, Magadala duliymolodawa Ma:litamo dopamo nawokaliya, ebe kamiyalegodone Ya:sute dopamo sebeni kubakuba uliyana aliboliya. <sup>10</sup> Ebema: Ma:lite tote, piyate Ya:suago dopamo dowapata:lamenamiya ebe epate eba iimitalo ibi ebo nanaliya, <sup>11</sup> wiyasiya iba:te Ya:sukono igilamo maiga tanalo ega:walo Ma:lite ebe dumiya, iba:te ebe tabo olowite nanitabokobi ka:midiya:.

*Ya:sute Waloma:tapi Netewatamo Danawokaliya*  
*Luk 24.13-35*

<sup>12</sup> Walone Ya:sukono waloma:tapi netewate Yelusalema kawo duliymolone eba tutalo, Ya:sukono apete iyama: eda:mete ebete iba:tamo ebo nawokaliya. <sup>13</sup> Ebene ibi netewapiate walo na:ka:tiya waloma:tapi epetapi kananalema:, wiyasiya iba:te ebe tabo olowite nanitabokobi ka:midiya:.

*Ya:sute Ebeno 11 Waloma:tapiatamo Danawokaliya*  
*Ma:t 28.16-20; Luk 24.36-49; Yon 20.19-23; Ali 1.6-8; 1 Kol 15.5*

<sup>14</sup> Walone Ya:sukono 11 waloma:tapiate ilukulite bae eba nautalo Ya:sute iba:tamo ebo nawokaliya, ebema: ebete ibi kawiya analiya mabu iba:te ibino tepo magumulo kodakodaibima: eba eda:olo nanitabokobi ka:midiya:, iyo, epetapiate ebeno igilo tanalo umite ibi dapanaliya, iba:te ibino tabo olowite ebeno a:e magumune maiga tanalo iba:te nanitabokobi ka:midiya:. <sup>15</sup> Ebene Ya:sute iba:tamo negiya, “La: opo kawonomamo tolama:wete Godokono Wade Tabo iyaiya epo bilibili-nomatamo na:nikiyawaolamenakiyala:. <sup>16</sup> Kebe lumagite nanitabokobi midite ebene obamo aduba:mida tanalo delaemene, Godote ebeno igilo ka:mula:emene, wiyasiya kebe lumagite nanitabokobi midia:no Godote ebe lumagino tanalo anagiyamidamete ebetamo kuba wiya nanitabolo kikaemene. <sup>17</sup> Nanitabola, Godokono elawo awokalima: anoano tanalate nanitabokobi midipiagodolo ka:pola:nama:na:. Iyo, iba:te naimano mailamo epagodone kuba uliyana balibolenakoma:na: ega:walo iba:te Unu Duliymolono nopopino iyaiya tabamo ba:kiyawaonakoma:na:. <sup>18</sup> Ebene iba:te kalu kotamo duwatolenakoma:na: ega:walo iba:te a:e obo da:nionakoma:na:, ebe tanalate ibi a:ka:kubailamenakoma:na:, ega:walo

\* **16:8:** Mak 16.9-20 buka apuno tabo Makate bukamo kakuloliya:, wiyasiya ebeno buka osiyodilo walogabo apune nanitabokobi mididawa idite akuloliya.

iba:te temetema:gopiatamo ibino koto dowatiolelamenakoma:na:, ebe tetelo ebe temetema:gopiate wadekobi bolowionakoma:na:.”

*Godote Ya:suko Unu Duliyomolamo Dadipatiya*

*Luk 24.50-53; Ali 1.9-11*

<sup>19</sup> Ebene Kawodawa Ya:sute iba:tamo tabo kiyawao dolopoligiya, Godote ebe pelawete Unu Duliyomolamo ebo adipatiya, ebolo ebete Godokono tumudi apuamo gito nokoliya. <sup>20</sup> Ebene waloma:tapiate tolamete iyaiya opo bilibilinomolo Godokono tabo eba na:kiyawaolamelo, Kawodawa Ya:sute iba:go kapimiya Godokono woko nosiyodilonamiya, iyo, ebe tetelo ebete Godokono elawo awokalimino anoano tanalo magumudo ebe Wade Tabo elawokobi nimidinami.



## YA:SUKONO WADE TABO LUKUTE AKULOLIYA

### *Lukukono Buka Osiyodilo Mabv*

<sup>1-2</sup> Naimano wade namutudawa Tiyopolasi, niyata.\* Aimano taneba magumulo kebe iyaiya tanalate iyalo da:pemaimiya, piyate wagilimi mabune ibino balidinomamo ebe tanalo dulamoliya, ibi epetapiate Godokono Wade Tabo eba kiyawaolo ebe atu tanalo a ega:walo epo epetapi bilibilinomo ebo anaiya. Nanitabola, ebe tetene wagilimite epetapi bilibilinomate ebe iyaiya tanalo pepamo nanitabonomolo akulolema: nowageleonamiya, wiyasiya ibi magumulo idawate woko wadenomamo kopoliya:. <sup>3</sup> Ebema: naimano kawodawa, nale me tanalo bibibilinomo ibino wagilame mabune wadenomamo eba malagidilolenapelo, naimano tepo magumuno wokilo ubi ebo iyatimo a:ma:tamo buka osiyodilote me tanalo ka:tuputupuilaema:, <sup>4</sup> iyo, epetapiate a:ma: diyatumiotia, a:ma:le ebe tanalo bilibilinomo nanitabonomolo kiyatawaema:, nale me tanalo ebema: osiyodilomo.

### *Godokono Nopodawate Yonekono Awokala Tanalo Sekalayatamo Da:kiyawaiya*

<sup>5</sup> Ebe tetelo Elodite Yudiya opono Kawo Elawodubuma: eba eda:nalo, dubu idi ebenu mailo Sekalayatela, ebete Abayakono tanebadawama: eda:nami, ebe Godotamo kalimagono ikameodawa idila. Ebenu kamiyaleno mailo Elisabetitela, ebe kamiyaleno nabiwi atumu Godotamo kalimagono ikameodawala. <sup>6</sup> Ebene ibi netewapino ilukuli tanalote Godokono ololo apulo tuputupunomoma: eba eda:onalo iba:te ebenu totomu tabo bilibilinomamo nanitabonomolo tudila:onamiya. <sup>7</sup> Wiyasiya ibi niyaniyala, iba:godolo gudu puliyanomola mabu Elisabetiko ta:li kamiyalema: eda:nami, iyo, Sekalayako ega:walo Elisabetiko iba:te kadele abelenomoma: eba eda:olo gudu uima: modoboa:.

<sup>8</sup> Ebene sagana idilo Sekalayakono gu epono tetete pemaigiya, iba:te Godoko Amamateno Iya Motolo iyaiya woko ka:posiyodilolema:. Ebema: egela idilo Sekalayate ebolo woko nosiyodiluti, <sup>9</sup> mabu ebe egelalo ebenu epate Godokono ubi tanalamo eba tudila:olo ebe lawiya, ebete Godoko Amamateno Moto guamo nopegate, ebolo ebete wade nibo tuwae inamabu patapata unamo eba naminaolelo Godotamo ka:nikameoma:. <sup>10</sup> Ebene ebe inamabuate elalo eba wamoteutalo epo bilibilinomate Godoko Amamateno Moto niyakabolo ibino towetowe tabo Godotamo ebo negelitiya.

<sup>11</sup> Ebe tetelo Godokono nopodawate wade nibo tuwae inamabu wamoteno patapata tumudi apudo eba pemaigalo Sekalayako kapiyatamo ebo pawokaliya, <sup>12</sup> ebenu ebete ebe umite woki bilibilinomoma: eda:lo kawonomamo toletoliya. <sup>13</sup> Wiyasiya nopodawate ebetamo negiya, "Sekalaya, a:ma: akotoletola:la:. Godote a:imano towetowe tabo olowi, ebema: a:imano kamiyale Elisabetite dubu gudu kalaimene. A:ma: ebenu mailo Yonema: neka:miye. <sup>14</sup> Nanitabola, ebete dawokalamene a:ma: kawonomamo ebo

\* **1:1-2:** Tiyopolasi mailono magumu nitana 'Godokono Namutudawala,' ebema: buka ka:la:mioledawa, a:ma: Godokono namutudawama: deda:wena, modobola me bukano tabote a:ma:tamo atumu na:ka:pena.

kekalakalama:ta, ega:walo epo bilibilinomate ebe mabuma: atumu kawono-mamo ka:kekalakalaoma:na: <sup>15</sup> Ebete ebenu menokono tepolo eba okolilo Godokono Uliyanate ebe iyalo ketabokaimene, ebema: Godokono dopo apulo ebete kawodawama: keda:mene, ega:walo ebete elawo da:imi obo a:ka:ninakomene.

<sup>16</sup> “Nanitabola, ebete Isalaela epo bilibilinomo ibino Kawodawa Godotamo walo ka:kemagaelemene, <sup>17</sup> iyo, ebete aimano Kawodawa dopomete ka:tomene ega:walo Wade-talena Uliyanate ebe unamo eba okolilo ebete elawonomoma: keda:mene, Godokono woki awokalimidawa Elayako keba kunula:ka: eba kunu. Ebema: ebete nabi ega:walo gudi kapiyama: walo ka:ka:midilimene, iyo, ebete Godokono tabo olowioa:pino woki iyakobi midililamete ka:tuputupuilamelelaemene, ega:walo ebete Kawodawano epo wadekobi ka:midilimene ebenu pe tanaloma:.”

<sup>18</sup> Sekalayate Godokono nopodawatamo negiya, “Na me tanalo nanitabonomolo keba kunu na:kiyatawamo, mabu na kadelenomola ega:walo naimano kamiyale abelenomola?”

<sup>19</sup> Ebene Godokono nopodawate nowamiya, “Na ebe Ga:ibiliyolotela, Godokono ololo apulo utitanakomo, iyo, na ebete palibone me wade tabo a:ma: kapanatama: <sup>20</sup> Naimano tabote nanitabonomoma: keda:mene, wiyasiya a:ma:le ebe tabo nanitabokobi ka:mida:wea:, ebema: me tetene wagilimite ebe nanitabo tanalote pemaiga teta:mo a:ma: tabo kiyawaoa:noma: keda:ma:ta.”

<sup>21</sup> Ebe tetelo epo bilibilinomate Sekalayakono pemaiga tanalo eba makopelitalo iba:te negelitiya, “Tete geyageyanomolo ebete Godoko Amamateno Motolo beda:ma: ka:lutale?” <sup>22</sup> Ebene ebete Godoko Amamateno Iya Motone da:pemaigiya epatamo tabo kiyawaoma: ka:pa:modobiya: Wiyasiya ebete iba:tamo kotamo da:pa:kiyawaiya, ebe tanalodo iba:te ma kunu iyatawiya, ebete Godokono Motolo eba lutalo, Godokono nopodawate ebetamo da:pemaiga ebenu balidite iyama: ebo eda:ome.

<sup>23</sup> Ebene Sekalayakono woko tetete Godoko Amamateno Motolo dolopoligiya, ebete ebenu duliyaomolamo ebo tiya. <sup>24</sup> Ebene egela epetapiate da:petoiya ebenu kamiyale Elisabetite lamituma: dediya, ebete ebe tetene wagilimite paibu sagana magumulo ebenu motonomolo okoliya. <sup>25</sup> Ebe tetelo ebete ebenu tepo magumulo tabo ma kunu giya, “Ka:lo uwomu egela tetenomolo Godote na a:nilakapoinami, iyo, ebete gudu natamo eba ikanamelo naimano ilipo tanalo iyabaiamo iyatinami.”

### *Godokono Nopodawate Ya:sukono Awokala Tanalo Ma:litamo Da:kiyawaiya*

<sup>26</sup> Ebene Elisabetite lamituma: eda:te, sikisi sagana da:petoiya Godote ebenu nopodawa Ga:ibiliyoloko Ga:lili opono Nasalette duliyaomolamo ebo palibiya. <sup>27</sup> Ebete buwele Ma:litamo Godokono nopo adaiya, ebe buwele dopamo Yausepetamo atamiya, me dubu Yausepeko ebe Kawo Elawodubu Da:ibidikono walone gudu idila. <sup>28</sup> Ebene nopodawate Ma:liko napaniya, “A:ma: niyata, Kawodawa Godote a:ma: nilakapolo elawiata! Ebete a:ma:godolo bokolina!”

<sup>29</sup> Ebema: Ma:lite ebe tabo dolowiya woki bilibilinomoma: eda:lo ebenu tepo magumulo negiya, “Me beda: tanalola:ka:?”

<sup>30</sup> Nopodawate ebetamo negiya, “Ma:li, a:ma: akotoletola:la:, mabu Godote a:ma: ma kunu a:nilakapoimita, <sup>31</sup> a:ma:le lamituma: eda:wete dubu gudu kalaima:ta, ebenu a:ma: ebenu mailo Ya:suma: neka:miye. <sup>32</sup> Ebete kawonomoma: keda:mene, epate ebe Ununomo Godokono Guduma:

beka:minakoma:na; iyo, Godote ebe Kawo Elawodubuma: ka:midimene, ebene ewono Da:ibidiko keba kunu kokolinamile eba kunu. <sup>33</sup> Ebema: nanitabola, Ya:ikobokono walone gudi magumulo ebete uwomua: uwomua: tetelo Kawo Elawodubuma: beda:namene, iyo, ebene Kawo Elawodawama: eda: tanalote a:kolopoligonamene.”

<sup>34</sup> Ma:lite wiyasiya nopodawatamo negiya, “Na buwelenomola ega:walo na awia:nola. Me tanalote natamo keba kunu na:kemaigamene?”

<sup>35</sup> Nopodawate ebetamo nowamiya, “Wade-talena Uliyanate a:ma:tamo ka:pemene, ega:walo Godokono elawote a:ma: unamo kokolimene, ebema: a:ma:le dalaima:emene ebe talena gudu epate Godokono Guduma: beka:minakoma:na. <sup>36</sup> A:ma: a:imano menokono naniko Elisabetikono tanalo nemalagidila. Dopamo epate negelanakiya ebe ta:li kamiyalela, wiyasiya ebete abele tetelo lamituma: eda:te sikisi saganate olopoligi. <sup>37</sup> Nanitabola, tanalo bilibilinomo osiyodilolema: Godogodolo elawo bitana, osiyodiloa: tanalo idite ebegodolo kitana.”

<sup>38</sup> Ebema: Ma:lite negiya, “Na Kawodawa Godokono wiya: woko buwelela. Modobola a:ma:le degeawa; ebe tanalote nemaigamene,” ebene Godokono nopodawate ebegodone gito tiya.

#### *Ma:lite Elisabetiko Uima: Da:tiya*

<sup>39</sup> Ebe tetelo Ma:lite samonomamo maigate Yudiya opono unuunu damelamo tote mulu duliyomolo ida:mo gito nemaigiya. <sup>40</sup> Ebene ebete Sekalayakono motamo nodolote Elisabetiko eba na:wiyamidalo ebetamo nilakapo tabo ebo na:kiyawaiya.

<sup>41</sup> Ebema: Elisabetite Ma:likono nilakapo tabo dolowiya, ebe tetenomolo ebene tepo magumulo gudute kawo kalakala lawete ebo igiligaiya. Ebene Godokono Uliyanate Elisabetikono tepo magumu detabokaimiya, <sup>42</sup> ebete tabo unamo adipatelo Ma:litamo negiya, “Kamiyale bilibilinomo magumulo Godote a:ma: unamo adipatelo wadenomamo bowalubinama:ta, ega:walo a:ma:le dalaima:emene Godote ebe Kawodawa atumu uwomua: tetelo bowalubinamene. <sup>43</sup> Naimano Kawodawano menoko, a:ma:le na unaema: da:pa:wa: kalakala kawonomola, wiyasiya me wade tanalonomote na kuba lumagitamo beda:ma: ka:pemaigale? <sup>44</sup> Nanitabola, nale a:imano tabo dolowimo, ebe tetelo naimano tepo magumulo gudute kawo kalakala lawete ebo igiligao, <sup>45</sup> ebema: a:ma:tamo kalakala beda: kawonomola:ka; mabu a:ma:le Godoko nanitaboma: a:midiata ebene tabote a:ma:do nanitabonomoma: keda:mene!”

#### *Ma:lite Godoko Damamatiya*

<sup>46</sup> Ebene Ma:lite negiya,

“Naimano kimalagidilote Godoko nowaloguta,

<sup>47</sup> iyo, naimano tepo magumute

naimano Igilo Mula:dawa Godotamo nekalakalita,

<sup>48</sup> mabu ebete na malagidilonelo

kalakala tanalo osiyodili na ebene da:peso wiya: woko buweletamo!

Ebema: me tetene wagilimite uwomua: uwomua: tetelo

epo bilibilinomate

na kalakala lumagima: beka:na:minakoma:na;

<sup>49</sup> mabu Elawonomo Godote natamo wadewade tanalo kawokawo osiyodiloli,

iyo, ebe Kawodawano mailo talenala!

- <sup>50</sup> “Nanitabola, piyate ebe da:tolemena  
 ebete iba:tamo nilakapo biyatinakomene,  
 iyo, epate me opolo tete geyageyanomolo eba ilukulinalo,  
 ebete iba:tamo ma kunu bowagelenakomene.
- <sup>51</sup> Ebema: a tetelo ebete ebenu kotamo  
 kawokawo tanalo osiyodiloli,  
 ega:walo piyate ibi a:ka:tuwa: amamaolo kawokawoma: degeliya,  
 ebete ibino nopo kubailamete  
 ebenu elawamo ibi a:na:ma:lateli.
- <sup>52</sup> “Ega:walo ebete kawokawo elawodubu ibino gobebobone iyabaiamo  
 alomi,  
 wiyasiya ebete ebe atu tetelo  
 dologala epo owadipalatele.
- <sup>53</sup> Iyo, piyate nigologololo dilukuliniamiya,  
 ebete ibi wadewade inamabuamo eba tabokailamelo,  
 wiyasiya inamabu bilibilinomagopi inamabua:no gito aliboli.
- <sup>54-55</sup> “Ebema: nanitabola,  
 ebete aimano ewoniatamo nanitabonomolo degiya,  
 ebe tabote a tetelo nawokala,  
 iyo, tete tatalila ebenu walubi tanalote ka:pemaigamene  
 ebenu wiya: wokodawa Isalaelatamo.  
 Me ebe mabuma: Godote A:ibalayamatamo  
 kebe nilakapo kawokalimiyale,  
 ebe nilakapamo ebenu walone gudi  
 uwomua: tetelo bemalagidilolenamene!”

<sup>56</sup> Ma:lite me iyaiya tabono tanalo kiyawao dolopoligiya, ebete netewakapiya sagana Elisabeti ago okolite, ebenu ebete ebenu duliyoumolonomamo walo gito ka:tiya.

*Yoneko Epo Obama Waduba:midaoledawate Dawokaliya*

- <sup>57</sup> Ebenu Elisabetikono gudu alaimi tete da:piya ebete dubu gudu alaimite, <sup>58</sup> ebe niyakabolo dilukuliniamiya ega:walo ebenu mabu epo, iba:te Godokono wade walubi tanalo Elisabetigodolo umite eba:go nekalakalaiya.
- <sup>59</sup> Ebenu sebeni egela da:petoiya, a:iti egela tetelo iba:te dubu guduno tama itamida pukala osiyodiloma: ebo pelamiya. Ebe tetelo epetapiate ubi iyatiya ebe gudu ebenu nabiwi Sekalayakono mailamo keka:ima:, <sup>60</sup> wiyasiya ebenu menokote negiya, “Ao, la: ebenu mailo Yonema: neka:miala:.”
- <sup>61</sup> Ebenu iba:te la:wa:ote ebetamo negeliya, “Numa:, a:imano epagodolo me mailo kitana:!” <sup>62</sup> Ebema: iba:te ebenu nabiwitamo kotamo eba gelalo ebe nalatediya, ebenu ubi keba kunu kitanale gudutamo mailo kikaema:.
- <sup>63</sup> Ebenu Sekalayate kotamo kiyawaolo epetapiate tabo akuloleno inamabu adaema: danaliya, ebete ebe inamabu lawete ma kunu akuloliya, “Ebenu mailo Yonetela.” Ebe mabuma: iba:te kawonomamo anoanoiya,
- <sup>64</sup> ebenu ebe tetenomolo Sekalayakono tabo kiyawao tanalote wadekobi da:kolowimiya, ebete Godoko moio ebo wagilimiya. <sup>65</sup> Ebema: ebenu duliyoumolo epate ebe anoano tanalo dulamiya iba:te kawonomamo toletoleiya, ebenu iba:te ebe iyaiya tanalo epo epetapi da:nikiyawaolamiya, ebe tabote Yudiya opono unuunu damelano duliyoumolo bilibilinomamo ebo tiya. <sup>66</sup> Ega:walo piyate ebe tabo dolowiya iba:te eba malagidilolo negeliya, “Me gudu ebete kebako dawama: na:keda:mene?” Iba:te me tabo

negeliya mabu ibino umi magumulo Godokono elawote ebe gudugodolo nanitabonomolo itani.

*Sekalayate Godokono Woki Ebene Uliyanano Elawamo Dawokalilamiya*

<sup>67</sup> Ebene Godokono Uliyanate Yonekono nabiwi Sekalayakono tepo magumu detabokiya, ebete Godokono woki ma kunu awokalilamiya,

<sup>68</sup> “Godote Isalaela epo wadenomamo dowalubilinako,  
ale ebe ebema: kemoiomalema;  
mabu ebete ebene epo walubilima: ebe na:pe,  
tete tatalila ebete ibino kuba osiyodilole magumune  
ibi ka:powagailimene!

<sup>69</sup> Iyo, Godote a mabuma: dadipati,  
ebe Kawo Igilo Mula:leamedawate ebe na:pe,  
ebe Godokono wokodawa Da:ibidikono walone gudu idila.

<sup>70</sup> “Nanitabola, piyate dopamo tetelo  
Godokono talena magumulo dilukulionamiya,  
ebete ebe wokopido  
ebene woki eba awokalimilo negiya,

<sup>71</sup> piyate dowate atamo gowela tanalo dosiyodilonaka,  
ebete a ibino elawo kotone kowagaimene.

<sup>72</sup> Iyo, ebete tabo idi ma kunu kegiya,  
ebete aimano ewoniatamo ebene nilakapo biyatinamene,  
ega:walo ebete iba:tamo kebe nopo nanitabonomolo kiyatiyale,  
ebe wade-talena tabo eba malagidilonalo  
uwomua: tetelo ebete bosiyodilonakomene.

<sup>73</sup> “Ega:walo ebete aimano ewono A:ibalayamatamo  
nanitabonomolo na:kegiya,

<sup>74</sup> piyate ago da:gowelaonaka,  
ebete a ibino koto magumune kuwatemene,  
ebene ale ibi tolelamea:no  
ebe kapiyatamo woko bosiyodilonakoma:.

<sup>75</sup> Iyo, ale ebene ololo apulo  
talena epoma: eba eda:onalo,  
ale uwomua: tetelo  
ebene tuputupu gabodo bowapata:lamenama:.”

<sup>76</sup> Ebene Sekalayate ebene tabo moga:melo walo na:kegiya,

“O naimano gudu Yone,  
epate a:ma: Ununomo Godokono  
woki awokalimidawama: beka:minakoma:ta,  
iyo, ebete dupalibomene,  
a:ma:le ebe Kawodawano gabo dopoma:wete eba tonatolo,  
ebene gabo kosiyodiloema:ta.

<sup>77</sup> Ega:walo a:ma:le Godokono epo  
ma kunu kiyatulaema:ta,  
ebete ibino kuba eba egebolelamelo ka:dodolomatililaemene,  
iyo, ebete ebe gabodo ibino igilo ka:mula:lalaemene.

<sup>78</sup> “Ebema: nanitabola, aimano Godote



a kawonomamo eba nilakapoiamenalo,  
 ebenu igilo mula: leno alote atamo ebo ka:pemaigamene,  
 egelate epatamo da:pemaiganako eba kunu.

<sup>79</sup> Ebe alote ebenu Unu Duliyoumolone ka:pa:pukuilaemene,  
 a:e magumulo ega:walo idoko magumulo dilukuliona  
 ebe epatamo,  
 ebema: kalakala kawonomola,  
 Godote ebenu milolo wapata:lame tanalono gabo  
 a ebo kiyatuaemene.”

<sup>80</sup> Ebema: Sekalayakono gudute eba apelo Godokono Uliyanate ebe  
 magumulo elawonomoma: ediya, ebenu ebete bulu opamo tote ebo nokoli-  
 nami, wiyasiya walone Godokono ubi tetelo ebete Isalaela epatamo ebo  
 pemaigiya.

## 2

### *Ya:sute Dawokalani*

#### *Ma:t 1.18-25*

<sup>1</sup> Ebe tetelo Kawo Elawodubunomo Sisa Ogastasete opo kawonomamo  
 tabo napalibiya epo bilibilinomate ibino mailo gabamanino bukamo  
 kanalomolema; <sup>2</sup> ebe atu tetelo Kiliniyasete Siliya opono Kapela Ela-  
 wodubuma: eda:nami. Buka ka:la:mioledawa, modobola a:ma: niyatawa,  
 me dopo tetela epo bilibilinomate ibino mailo gabamanino bukamo danalo-  
 moliya, <sup>3</sup> ebema: epo bilibilinomate ebe tanalo ka:nosiyodiloma: ibino  
 ewonino iyaiya duliyoumolamo na:tolamoliya.

<sup>4</sup> Ebenu Yausepete Ga:lili opono Nasaletu duliyoumolone Yudiya opono  
 Beteliyama duliyoumolamo tiya, mabu ebe Kawo Elawodubu Da:ibidikono  
 walone gudu idila ega:walo Da:ibidiko Beteliyama duliyoumololo awokaliya.

<sup>5</sup> Ebe tetelo Ma:liko ebetamo atamiya ega:walo ebe lamitula, ebema: ibi  
 netewapiate kapimiya tiya iba:te ibino mailo ebolo kanalomoma:. <sup>6</sup> Ebenu  
 iba:te Beteliyamalo eba nilukulilo idoko idilo Ma:likono gudu alaimi tete  
 da:peni, <sup>7</sup> ebete ebenu dopo koi gudu alaiminate ebe kalikamo aputinate  
 kau-goeogoeono uwago nao bokose guamo gito adilatini, mabu kapela epate  
 delaonakiya ebe motolo tetea:nola iba:te ebolo ilukulima:.

### *Godokono Nopopiate Sipi-goeogoeo Ulamepiatamo Dapawokalaoniya*

<sup>8</sup> Ebe tetelo sipi-goeogoeo ulamepiate Beteliyama duliyoumolo niyakabolo  
 uwago opolo ibino sipi-goeogoeo eba ulamenalo, <sup>9</sup> Kawodawa Godokono  
 nopodawate iba:tamo pawokalanate Godokono alo kawonomote ibi ebo  
 pipukuilameni. Ebema: iba:te kawonomamo toletoleoniya, <sup>10</sup> wiyasiya  
 nopodawate iba:tamo negeni, “La: ka:toletoleonala! Na la:tamo wade  
 tabo adaemo, ebe tabote epo bilibilinomatamo kalakala kawonomo  
 kikalaemene, <sup>11</sup> mabu ka:lo idokolo Da:ibidikono duliyoumololo la:imano  
 Igilo Mula:lamedawa awokala, ebe Kawodawa Kelisotela, Godokono  
 Alibodawala. <sup>12</sup> La: tolama:wete ebe gudu kalikamo aputi ka:nuimamota,  
 ega:walo ebe kau-goeogoeono uwago nao bokose guamo adilatila, iyo,  
 la:le ebe anoano tanalo numa:wete ebo kiyatawaomamota naimano tabo  
 nanitabonomola.”

<sup>13</sup> Ebe tetenomolo ebe nopodawago Godokono nopopi epetapi bilibilino-  
 mate gito pawokalaoniya, ebenu iba:te Godoko eba adipatenalo negelaniya,

<sup>14</sup> “Godote ebenu Ununomo Duliyoumololo dokolina,

la: ebe moiolo nadipata:la:  
 Me opolo ebete piyatamo dekalakalana,  
 ebene igilo mula: tanalote  
 iba:godolo nitanamene!”

<sup>15</sup> Ebene Godokono nopopiate Unu Duliomolamo walo da:ka:nodoloniya, ebe tetelo sipi-goeogoeo ulamepiate negelaniya, “Kawodawa Godote a danae Beteliyama duliomololo ka:lo idokolo da:pemaiga, a ebe tanalo uima: ka:tolamiye.”

<sup>16</sup> Ebene iba:te samonomamo tolamenate, Ma:liko, Yausepeko, ega:walo gudu kau-goeogoeono uwago nao bokose guamo adilati, iba:te ibi ebo nulameniya. <sup>17</sup> Ebene sipi-goeogoeo ulamepiate gudu numinate, nopodawate ebene tanaloma: degeni, iba:te ebe tabo Ma:liko Yausepeko ibi ebo nanaleniya. <sup>18</sup> Nanitabola, ebe tetene wagilimite piyate sipi-goeogoeo ulamepino tabo dolowiya ibi bilibilinomate kawonomamo anoanoiya, <sup>19</sup> ega:walo Ma:lite me iyaiya tanalo ebene tepo magumamo alomonate tete bilibilinomolo kawonomamo nemalagidilolenami. <sup>20</sup> Ebene ebe idokolo sipi-goeogoeo ulamepiate eba olowamionalo, Godoko amamata:go ebo tolameniya, mabu iba:te Godokono nopodawagodone kebe tabo kolowioniye, iba:te ebe tanalo bilibilinomo nanitabonomolo a:nulamoleniya.

*Yausepeko Ma:liko Iba:te Ya:suko Mailo Dikamiya*

<sup>21</sup> Ebene wuiki kapiya olopoligote dubu guduno tama itamida pukala osiyodilo tete da:piya, Yausepeko Ma:liko iba:te me gudu Ya:suma: ka:miya, mabu ebene menokote lamituma: eda:no Godokono nopodawate me mailo iyalo ikamiya.

*Iba:te Ya:suko Yelusalemamo Demagatiya Godotamo Ikaema:*

<sup>22-24</sup> Ebene tete da:piya iba:te Ya:suko lawete Yelusalema kawo duliomolamo gito tolamiya menokola gudula ibino agima talena ka:nopoliyalema:, Godote Mosesedo totomu tabo diyatiya eba kunu. Iyo, ebe totomu tabote Yu epo ma kunu iyatulamena, agima talena olopoligo tetelo menokote bigo ola netewa o badu ola netewa Godotamo nikameomene, ebema: Yausepeko Ma:liko iba:te me totomuamo tudila:ote kalimagono inamabu ebetamo eba kunu ikameiya. Ega:walo ebe atu tetelo ibi ubila gudu Ya:suko Godotamo ikaema:, mabu Godokono totomu tabo idite ma kunu kegena, dopo dubu gudi talenama: midilite Godotamo kikameoma:.

*Simiyonote Gudu Ya:suko Dematopiya*

<sup>25</sup> Ebe tetelo dubu idi ebene mailo Simiyonotela, ebete Yelusalema kawo duliomololo okolinami. Ebe tuputupudawanomola, iyo, ebete Godotamo na:tuduwatanami ega:walo ebete Isalaela epono igilo mula:le tanalono maiga tete nemakopelenami. Ebema: Godokono Uliyanate eba:go eba okolinalo <sup>26</sup> ebe iyalo aniya ma kunu, ebete Godokono Alibodawa Kelisoko dopamo umite ebe walone ebo ka:emene. <sup>27</sup> Ebene Ma:liko Yausepeko iba:te Godokono totomuamo tudila:olo ibino gudu Godoko Amamateno Iya Motamo demagatiya, ebe tanalo Godokono Uliyanate Simiyonoko ebo iyatumiya. Ebe tetelo ebete Godokono Motamo pete, <sup>28</sup> gudu Ya:suko pumite ebene kotamo ebe pematopa:te Godotamo kalakala tabo ma kunu pa:kiyawaiya,

<sup>29</sup> “Kawodawa, a:ma:le dopamo nanitabonomolo degeawiyala ebe tabote awokala,

ebema: na a:imano wiya: wokodawate  
 gelebadiago a:eamo ka:tomamo.  
<sup>30</sup> Nanitabola, ka:lo naimano balida:mo  
 a:imano igilo mula: tanalo uimo,  
<sup>31</sup> ebe igilo mula: tanalo a:ma:le a:modoboimiyata  
 iyaiya epo bilibilinomono ololo apulo.  
<sup>32</sup> Iyo, a:imano igilo mula: tanalo ebe wade alola,  
 ebe alote Yua:piatamo  
 a:imano ubi gabo eba awokaliminalo,  
 a:imano Isalaela epatamo  
 kawonomamo ba:pukuilamenamene.”

<sup>33</sup> Ebene Simiyonote gudu Ya:sukono tanaloma: kebe tabo ka:kiyawaiyale,  
 Ma:liko Yausepeko iba:te ebe tabo olowite kawonomamo anoanoutiya.  
<sup>34</sup> Ebe tetelo Simiyonote Godoko naniya ebete ibi wadenomamo kowalu-  
 bilinama:, ega:walo ebete guduno menoko Ma:litamo negiya, “Me gudu  
 Ya:suko Godote ebe iyalo ka:mite elawiya, ebema: ebete Isalaela epono  
 magumulo ibino kubakuba tanalo ega:walo wadewade tanalo bilibilinomo  
 kanagilamelelaemene. Iyo, ebena okoli tanalote anoano tanaloma: eda:te  
 Godokono elawo kawokalimene, ebema: epo epetapiate ebe tanalo umite  
 ubia: tabo gelate <sup>35</sup> ibino kubakuba woki kawokalilamolema:na:. Ebe  
 tetelo kawo temetemetete a:ma:tamo pemaigate, gowelaono kiyoiyo gili keba  
 kunula:ka: ebe temetemetete a:imano tepo magumu eba kunu kawami-  
 damene.”

#### *A:nako Ega:walo Ya:suko Ibino Tanalo*

<sup>36</sup> Ebe atu tetelo Godokono woki awokalimidawa kamiyale idite nokoli-  
 nami, ebena mailo A:natela, ebena nabiwi Pa:nuwelatela, ebe A:sa gu  
 lumagila. Me kamiyale ebe abelenomola. Dopamo ebete dubu lawete  
 sebeni ulama okolite <sup>37</sup> ebena awite ebo a:iya, ebena ebete amolema:  
 eda:te ebe tetene wagilimite ebena 84 ulama teta:mo pemaiga, ebete egela  
 ega:walo idoko bilibilinomolo Godoko Amamateno Iya Motolo eba okolinalo  
 ebe moto katepanakia:. Ebe tete geyageyanomolo ebete Godoko eba  
 amamatenalo, tete epetapi bilibilinomolo bae naoa:no Godotamo towetowe  
 tabo ebo genaki. <sup>38</sup> Ebene Yausepeko Ma:liko iba:te Simiyonago tabo eba  
 gelitalo, ebe atu tetenomolo A:nate pete gudu Ya:suko pumite kalakala  
 tabo Godotamo ebo padipatiya. Ebema: ebe tetene wagilimite, Yelusalema  
 duliynomolo epo magumulo piyate ibino igilo mula:le tanalo maiga tete  
 demakopelenamiya, iba:te Godokono Motamo da:pelamenakiya A:nate ibi  
 bilibilinomatamo Ya:sukono tanaloma: ebo kiyawaonaki.

#### *Ma:liko Yausepeko Iba:te Nasaletu Duliynomolamo Walo Da:ka:tiya*

<sup>39</sup> Ebene Ma:liko ega:walo Yausepeko iba:te Godokono totomu bilibili-  
 nomono iyaiya tanalo wadenomamo osiyodilote, iba:te Ga:lili opono  
 Nasaletu duliynomolamo walo na:ka:tiya mabu ebe ibino duliynomolonomola.  
<sup>40</sup> Ebolo gudu Ya:sute eba apelo elawoma: ebo ediya, ega:walo ebete woki  
 mulodawama: eda:lo Godote ebena nilakapo tanalamo ebe nowalubinami.

#### *Ya:sute Ebena Koi Tetelo Godoko Amamateno Iya Motamo Da:tiya*

<sup>41</sup> Ya:sukono menokola nabiwila ibino tanalo ma kunula, ulama bili-  
 binomolo iba:te epo epetapiago Yelusalema kawo duliynomolamo tolame-  
 nakiya Yu epono Aduga:la Soliyomu ka:nosiyodiloma:, <sup>42</sup> ebena Ya:sute

12 ulama tetema: eba eda:lo iba:te ebe lawete walo na:ka:tolamiya ebe soliyomu baiamo.

<sup>43</sup> Ebene Soliyomuno egela dolopoligoiya iba:te Nasalete duliyoumolamo walo na:ka:pelamiya, wiyasiya Ya:sute Yelusalemalo dolowagiliya ebenu menokola nabiwila, iba:te kiyatawaiya. <sup>44</sup> Iba:te Ya:suko epago duliyoumolamo toma: gelate, ebe egela kapiyalo tonomo tote, ebenu adimolo iba:te ebe ibino epagodolo ega:walo namutupiagodolo nowadinate <sup>45</sup> ebe ka:numiniya. Ebema: egela idilo iba:te ebe wadiago Yelusalema kawo duliyoumolamo walo ka:tote, <sup>46</sup> ebenu netewa-kapiya egelalo iba:te ebe Godoko Amamateno Iya Motolo iyatulamepi dubago eba lutalo ebo numiya, ebete ibino tabo eba olowiolo ibino iyaiya iyatulame tanaloma: ebo alateda:lenaki. <sup>47</sup> Ebe tetelo Ya:sute iba:go tabo eba kiyawaolo ibi tuputupu tabamo dowamilamenaki, ebema: piyate ebenu tabo dolowiutiya ibi bilibilinomate kawonomamo anoanoutiya. <sup>48</sup> Ebema: Ma:liko Yausepeko ibi netewapiate ebe da:numiya, kawiya nela:wa:ote menokote ebe naniya, “Gudu, a:ma: me tanalo atamo beda:ma: kosiyodilawia? A:imano nabiwila nala, ale a:ma: tepo temetema:go wadinata.”

<sup>49</sup> Ya:sute wiyasiya iba:tamo negiya, “Mabu keleka: la:le na me duliyoumolono iyaiya motolo dowadina:witakama? Modobola la: niyatawala: na naimano Nabiwino Motolo ba:lutamo, na moto idilo lutama: a:ka:modobomo!” <sup>50</sup> Iba:te wiyasiya ebe tabono magumu wadenomamo kelawiya.

<sup>51</sup> Ebe tetelo Ya:sute ebenu menokola nabiwila iba:go Nasalete duliyoumolamo tote, ebolo eba nokolinalo ibino tabamo tuduwatanaki, ebenu Ma:lite me iyaiya tanalo ebenu tepo magumamo alomote tete bilibilinomolo kawonomamo nemalagidilolenami. <sup>52</sup> Ebema: me tanalo nanitabola, Ya:sute mulo kimalagidilago eba apelo, Godoko ega:walo epo ebetamo nekalakalaonamiya.

### 3

*Yoneko Epo Obama Waduba:midaoledawate Godokono Tabo Da:kiyawaiya*

*Ma:t 3.1-12; Mak 1.1-8; Yon 1.19-28*

<sup>1</sup> Ebe tetelo Sisa Taibiliasite 15 ulamalo opo kawonomono Kawo Elawodubunomoma: eba eda:nalo, dubu epetapiate ebenu opopima: ma kunu eda:onamiya,

Poniyase Paeleteko Yudiya opono Kapela Elawodubula.

Elodiko Ga:lili opono Kawo Elawodubula.\*

Ebenu ekawi Pilipiko Ituliya opo ega:walo Ta:konaitasi opono Kawo Elawodubula.

Ega:walo Laisaniasiko A:bilini opono Kawo Elawodubula.

<sup>2</sup> Ebe atu tetelo A:nasiko ega:walo Kayapasiko ibi netewapiate Godotamo kalimagono ikameopino Ununomo Watowatopima: eda:onamiya, ebenu Sekalayakono gudu Yoneko ebete bulu opolo eba okolinalo Godokono tabote ebetamo ebo piya. <sup>3</sup> Iyo, ebete Yodane Kolomono opo kawonomamo tote Godokono tabo ma kunu na:kiyawaiya, “La:imano kubane olobila:wete

\* **3:1:** Buka ka:la:mioledawa, modobola a:ma: me tanalo niyatawa, Ya:sute dawokaliya ebe tetelo Yudiya opolo Kawo Elawodubuma: deda:nami, ebe dopo Elodi ebe me Elodi idino nabiwila, iyo, nabiwite gudutamo atu Elodi mailo kikamiya.

obamo aduba:mida tanalo laema: na:pelama:la:, ebene Godote la:imano kuba egebolelametate ka:dodolomatililaema:ta.”

<sup>4</sup> Nanitabola, Godote dopamo ebene woki awokalimidawa Aisayagodone Yonekono pe tanaloma: ebene Bukamo tabo ma kunu akuloliya,

“Lumagite bulu opolo  
tabo ma kunu kawonomamo ka:pegemene,  
‘Kawodawano gabo nosiyodiloma:la:  
ebene gabo na:tupugaima:la:!

<sup>5</sup> Godote me opono damela bolaliyao bilibilinomo  
ilatote,  
damela unuunu kapatalulatolemene,  
iyo, ebete kalawikalawi gabo nanitabolo tuputupuilamoete,  
gabono damela gugu ilatote  
ka:dilidililaemene.

<sup>6</sup> Nanitabola, ebete epono  
igilo da:mula:lelaemene,  
ibi bilibilinomate  
ebe tanalo ebo kuima:na:!’ ”

<sup>7</sup> Ebene epo bilibilinomate Yonetamo na:pelamiya ebete ibi obamo kowaduba:midaolema:, wiyasiya ebete iba:tamo negiya, “La: bu kalulata! La: potele kanaletia obamo waduba:midaolema: da:pelama:ema, ba:, Godokono kawo dowo tanalomote la:tamo a:ka:pemene? Ao, ka:pemene! <sup>8</sup> La:imano tepo magumu iyakobi da:midila:ema, modobola la: la:imano nanitabo tanalo awokalima: wadewade tanalo nosiyodilola:la:. La: a:ka:tuwa: la:tamo mako tabo gela akowagilima:la:, ‘A modobola mabu A:ibalayamako ebe aimano ewono nabiwila.’ Ao, la: a:ka:modobomata! Na la:tamo nani tabo gemo, Godogodolo elawo bitana ebete me nokolamo A:ibalayamakono gudi kosiyodilolema:!” <sup>9</sup> Ebema: ka:lo Godote ebene kabi a:li, noloa: da:imi kewa bilibilinomo ebete lute elamo kiyalekemene.”

<sup>10</sup> Epate ebe tanalo olowite Yoneko nalatediya, “A Godokono dowo odiyoboma: beda: tanalo na:kosiyodiloma:?”

<sup>11</sup> Ebete eba wiyalo negiya, “Modobola kaliku netewagodawate kalikua:dawa idi kowalubimene, ega:walo baeagodawate baea:dawa kowalubimene.”

<sup>12</sup> Ebene ta:kese mani elemasigilo uwatepi dubu epetapi iba:te obamo waduba:midaolema: da:pelamiya, iba:te ebe napalatediya, “Iyatulamedawa, a beda: tanalo na:kosiyodiloma:?”

<sup>13</sup> Ebete ibi nanaliya, “La:le ta:kese mani uwate tetelo a:da: gabodo kawonomamo akouwatenakala: la: a:ka:tuwa: la: walubilima:, wiyasiya gabamani dubate degelanaka ebe modobolo nuwatenakiyala:.”

<sup>14</sup> Ebene gowelaopi epetapiate Yoneko nalatediya, “A keba kunula:ka:? A beda: tanalo na:kosiyodiloma:?”

Ebene ebete iba:tamo negiya, “La:le epo epetapino mani elawo gabodo o a:da: gabodo akouwata:la:, ega:walo la:imano tabo gela magumulo epo epetapi akokubailama:la:, ega:walo la:imano woko wiya delawa:wenakoma ubia: tabo gela:no kalakalago nuwatenakiyala:.”

<sup>15</sup> Epate Yonekono tanalo eba malagidilolo, iba:te kalakalaolo ne-malagidiliya Yoneko da: Godokono Alibodawa Kelisotela: <sup>16</sup> Ebene Yonete iba:tamo negiya, “Nale la: obamo waduba:midaolemata, wiyasiya lumagi idite naimano walogabo apune ba:pena. Ebene elawo kawonomola,



naimano elawo nodoliona, ebema: na wadenoa: nale ebena agowa uku-laolema:. Nanitabola, ebete la: Godokono Uliyanamo ega:walo ebena elamo ka:powaduba:midaolema:ta, <sup>17</sup> iyo, ebete witi-laisono nonoka balamo alomono inamabu elawi, ebene ebete witi-laiso naono ebena moto guamo eba alomolo nonoka elamo ebo kiyalekemene, ebe elate uwomua: tetelo nowaena, ka:egana:.”

<sup>18</sup> Nanitabola, Yonete Godokono Wade Tabo da:kiyawaonaki, ebete iyaiya tanalo bilibilinomo iyatulamolena epate ibino woki iyakobi ka:midilima:. <sup>19</sup> Ebene egela idilo Yonete Kawo Elawodubu Elodiko kawiya aniya, mabu ebete ebena ekawino kamiyale Elodiyasiko pilolo lawiya ega:walo ebete kuba tanalo epetapi bilibilinomo osiyodilolenaki. <sup>20</sup> Ebe tetelo Elodite kuba tanalo kawonomo idi ma kunu kosiyodiliya, ebete Yoneko idoko motamo gito iyatiya.

*Yonete Ya:suko Obamo Daduba:midiya*

*Ma:t 3.13-17; Mak 1.9-11*

<sup>21</sup> Elodite ebe idoko motamo iyatia:no, dopamo Yonete epo bilibili-nomo obamo owaduba:midaoliya, Ya:suko ebalata. Ebema: Ya:sute obamo aduba:mida tanalo lawete, Godotamo kalakala tabo eba kiyawautalo Godote ebena Unu Duliyomolo ebo a:iyamidiya. <sup>22</sup> Ebene Godokono Uliyanate bigo olamu ebe unamo eba piwisigalo, tabote Unu Duliyomolone ma kunu piwisigiya, “A:ma: naimano kapiya Gudunomolata. Na a:ma:tamo nekalakalitamoma.”

*Ya:sukono Mabu Epono Mailono Tanalo*

*Ma:t 1.1-17*

<sup>23</sup> Ya:sute 30 ulamama: eba eda:lo ebete ebena kawo woko ebo wagilimiya, ebene ebena mabu epono mailono tanalo ma kunula. Epate ibino wokilo ebe Yausepekono guduma: gelanamiya, me Yausepeko Ilaikono gudula.

<sup>24</sup> Ilaiko Mata:takono gudula.

Mata:tako Libaikono gudula.

Libaiko Melekaikono gudula.

Melekaiko Yanaikono gudula.

Yanaiko Yausepekono gudula.

<sup>25</sup> Yausepeko Mata:tayasikono gudula.

Mata:tayasiko A:imosokono gudula.

A:imosoko Na:iumakono gudula.

Na:iumako Esalaikono gudula.

Esalaiko Nagaikono gudula.

<sup>26</sup> Nagaiko Maa:takono gudula.

Maa:tako Mata:tayasikono gudula.

Mata:tayasiko Sema:inikono gudula.

Sema:iniko Yausekekono gudula.

Yausekeko Yaudakono gudula.

<sup>27</sup> Yaudako Yowanankono gudula.

Yowananko Lisakono gudula.

Lisako Selababelakono gudula.

Selababelako Siyatiyelakono gudula.

Siyatiyelako Nelaikono gudula.

<sup>28</sup> Nelaiko Melekikono gudula.

Melekiko Adaikono gudula.

Adaiko Kosamakono gudula.  
 Kosamako Elamadamakono gudula.  
 Elamadamako Eyakono gudula.  
<sup>29</sup> Eyako Yosuwakono gudula.  
 Yosuwako Eliyesakono gudula.  
 Eliyesako Yolimikono gudula.  
 Yolimiko Mata:takono gudula.  
 Mata:tako Libaikono gudula.  
<sup>30</sup> Libaiko Simiyonokono gudula.  
 Simiyonoko Yudakono gudula.  
 Yudako Yausepekono gudula.  
 Yausepeko Yaonamakono gudula.  
 Yaonamako Elayakimikono gudula.  
<sup>31</sup> Elayakimiko Meleyakono gudula.  
 Meleyako Menakono gudula.  
 Menako Mata:taikono gudula.  
 Mata:taiko Na:itanakono gudula.  
 Na:itanako Da:ibidikono gudula.

<sup>32</sup> Da:ibidiko Yesikono gudula.  
 Yesiko Obedakono gudula.  
 Obedako Bowasekono gudula.  
 Bowaseko Samonokono gudula.  
 Samonoko Nasonakono gudula.  
<sup>33</sup> Nasonako Aminadabakono gudula.  
 Aminadabako Adaminakono gudula.  
 Adaminako Anikono gudula.  
 Aniko Esalonakono gudula.  
 Esalonako Pelesekonono gudula.  
 Peleseko Yudakono gudula.  
<sup>34</sup> Yudako Ya:ikobokono gudula.  
 Ya:ikoboko Aisa:kekono gudula.  
 Aisa:keko A:ibalayamakono gudula.

A:ibalayamako Telakono gudula.  
 Telako Neyokono gudula.  
<sup>35</sup> Neyoko Selugukono gudula.  
 Seluguko Liyukono gudula.  
 Liyuko Pelegekonono gudula.  
 Pelegeko Ibakono gudula.  
 Ibako Silakono gudula.  
<sup>36</sup> Silako Ka:inanekonono gudula.  
 Ka:inaneko Apasa:dakono gudula.  
 Apasa:dako Semakono gudula.  
 Semako Nowakono gudula.  
 Nowako La:imekakono gudula.  
<sup>37</sup> La:imekako Metusalakono gudula.  
 Metusalako Inokokono gudula.  
 Inokoko Yeledikono gudula.  
 Yelediko Mayalalelakono gudula.  
 Mayalalelako Ka:inanekonono gudula.  
<sup>38</sup> Ka:inaneko Inosokono gudula.

Inosoko Setakono gudula.  
Setako A:da:mekono gudula.  
A:da:meko Godokono gudula.

Ebema: me Ya:sukono mabu epono tanalono uwomula.

## 4

*Saitanate Ya:suko Kuba Gabamo Kowabuga:tama: Ebetamo Da:pemaigiya  
Ma:t 4.1-11; Mak 1.12-13*

<sup>1</sup> Ebene Godokono Uliyanate Ya:sukono tepo magumu tabokaimite, Yodane Kolomone eba magatalo ebete bulu opamo gito tiya. <sup>2</sup> Ebene Ya:sute bulu opolo 40 egelamo eba nokolilo Saitanate ebe kuba gabamo kowabuga:tama: ebetamo ebo pemaigiya. Ebe tete geyageyanomolo Ya:sute bae kenanakia:, ebema: ebe tete dolopoligiya ebete bae kape tanalo ebo iyatawiya.

<sup>3</sup> Ebene Saitanate ebe naniya, “A:ma: Godokono nani Guduma: deda:wena, me nokola baema: na:mida:.”

<sup>4</sup> Ya:sute ebene tabo eba wiyalo negiya, “Godokono Bukalo tabo ma kunu itana, ‘Lumagite me opono bae kapiyalo a:kigilonamene.’ ”

<sup>5</sup> Ebene Saitanate Ya:suko unamo magatate me opo kawonomono iyaiya opo kawokawo eba niyatumiolo, iba:te ebe tetenomolo ebe inamabu bilibilinomo ebo ulamoliya. <sup>6</sup> Saitanate ebetamo negiya, “Me inamabu bilibilinomo ega:walo elawo kawonomo nale a:ma:tamo kikaemamota. Nanitabola, me opono inamabu bilibilinomo Godote natamo ikanamoniya, ebe mabuma: nale kebe lumagitamo ikaema: ubi diyatimo nagodolo elawo bitana ebetamo kikameoma:.” <sup>7</sup> Iyo, a:ma:le na namamanatena:, ebene me inamabu bilibilinomo a:ma:le kuwatema:ta.”

<sup>8</sup> Wiyasiya Ya:sute ebene tabo eba wiyalo negiya, “Godokono Bukalo tabo ma kunu itana, ‘A:ma: a:imano Kawodawa Godoko amamatelo ebe kapiyatamo na:tuduwatanakiye.’ ”

<sup>9</sup> Ebene Saitanate ebe Yelusalema kawo duliynomolamo magatate Godoko Amamateno Iya Motono auba unamo nadipite ebe ebo naniya, “A:ma: Godokono nani Guduma: deda:wena, me motone opamo na:nepatega, <sup>10</sup> mabu Godokono Bukalo tabo ma kunu itana,

‘Godote ebene nopopi kapalibolemene

iba:te a:ma: wadenomamo ka:powalubitama:,

<sup>11</sup> iyo, iba:te ibino kotamo a:ma: ka:pelaema:ta,

ebema: a:ma:le nokolalo agowa a:ka:nukamidaemene.’ ”\*

<sup>12</sup> Wiyasiya Ya:sute ebetamo nowamiya, “Ao, nale ebe kuba tanalo a:kosiyodilomo, mabu Godokono Bukalo tabo idi ma kunu itana, ‘Opo lumagite Kawodawa Godoko wabudima: akowagela:la:.’ Iyo, ebe mabuma: me opo lumagite ebene daedale wokiamo tanalo idi dosiyodilomene, ebete akomalagidilala: Godote ebene igilo gito ka:pa:mula:ema:.”

<sup>13</sup> Ebene Saitanakono kuba gabamo wabuga:ta tanalo bilibilinomo dolopoligiya, ebete Ya:suko tete da:pesamo ebo atepiya.

\* **4:11:** Saitanate degiya ebe tabo Godokono Bukalo nanitabonomolo bitana, iyo, modobola a:ma: Sam Oale Buka 91.11-12 numiye. Saitanako ebe kawo a:da: tabo kiyawaodawanomola, ebema: tete epetapilo ebete Godokono tabono iyaiya tanalo epono woki mabuamo wadaenako, wiyasiya ebe tabono magumu ebete nanitabolo kawokalilamena:, iyo, me gabodo ebete ibi kuba gabamo wabuga:talenako, ebete Ya:sutamo osiyodiloma: dowageliya eba kunu.

*Ya:sute Ebedo Woko Dowagilimiya*  
*Ma:t 4.12-17; Mak 1.14-15*

<sup>14</sup> Ebe tetelo Ya:sute Godokono Uliyanano elawago Ga:lili opamo walo na:ka:tiya, ebene ebe opo kawonomolo dilukulionamiya ebe epo bilibilinomate Ya:sukono tanaloma: tabo ebo na:kiyawaiya. <sup>15</sup> Ebete ebe Yu epono balidi ibilamole motolo ibi diyatulamenaki, ebe mabuma: ibi bilibilinomate ebe kawonomamo moionakiya.

*Nasalete Duliyomolo Epate Ya:suko Ubia:noma: Deda:iya*  
*Ma:t 13.53-58; Mak 6.1-6*

<sup>16</sup> Egela idilo Ya:sute ebene okoli duliyomolo Nasaleta:mo tiya, ebene ebete Yu epono wokoa: talena egelalo dopamo keba kunu kosiyodilonakile, ebete ebe egelalo atu tanalo ka:nosiyodiliya, iyo, ebete epono balidi ibilamole motamo nodolote Godokono Bukano tabo ka:la:miolema: ebo maigiya. <sup>17</sup> Ebene iba:te Aisaya buka mokopi ebetamo ikamete, ebete paeamidate buka ka:la:miole ma kunu ebo wagilimiya,

<sup>18</sup> “Godokono Uliyanate nagodolo bokolina,  
 mabu ebete na elaweniya,  
 nale nigologololo dilukuliona ebe epatamo  
 Godokono Wade Tabo katama:.

“Ebate na apaliboniya  
 idoko motolo dilukuliona ebe epatamo,  
 ebema: nale ibi ka:kiyawaolaemamo,  
 tete ebe na:pe ibi idoko motone kowagailima:;  
 ega:walo na balidi tamiolame epo kanalemamo,  
 ibino balidi ka:meleoma:.

“Iyo, nale mibomibago dowapata:lamena  
 ebe epo tutunomoma: ka:midilimamo,  
<sup>19</sup> ega:walo Kawodawa Godote ibino igilo da:mula:lelaemene,  
 nale ibi me tabo kanalemamo, ebe tanalo na:pe.”

<sup>20</sup> Ebene buka ka:la:miole dolopoligiya Ya:sute buka walo ka:mokopite wokodawatamo ikamete epo iyatulaema: ibino ololo apulo gito okoliya. Ebe tetelo balidi ibilamole moto gulo da:pola:niya ebe epate Ya:suko wadenomamo umiutiya, <sup>21</sup> ebema: ebete iba:tamo negiya, “Ka:lo nale me buka apuno tabo deka:la:miolema:, ebe tetenomolo ebene nanitabo tanalote la:tamo ebe apawokala.”

<sup>22</sup> Ebene ebete Godokono tabo iba:tamo eba kiyawautalo ibi bilibilinomate nemalagidilutiya, “Ya:suko ebe wade lumaginomola,” ega:walo iba:te ebene tabone kebe tabo kolowiye ebe wadewade taboma: anoanolo negelitiya, “Me ebe Yausepekono gudula, ebene mulo keba kunula:ka:?”

<sup>23</sup> Ebene ebete iba:tamo negiya, “Na la:tamo nani tabo gemo. Epate muloma: degelanaka, walone la:le ebako tabo natamo ma kunu kegela-mamota, ‘A:ma: nani doketama: deda:wena, modobola a:ma: a:ka:tuwa: a:ma: wadekobi na:mida:.’ Ega:walo la:le na kananemamota, ‘A:ma:le Kapeniyama duliyomololo da:nosiyodilola:wia ale ebe anoano tanalo olow-ima:, ebema: ka:lo wiyasiya a:imano duliyomolonomolo ebako tanalo na:kosiyodilola:.’ ”

<sup>24</sup> Ya:sute iba:tamo walo na:kegiya, “Na la:tamo nani tabo gemo, Godokono woki awokalimidawa ebene duliyomolo epate ebe ubia:noma:

eda:ote a:kelaema:na. <sup>25</sup> Ebema: la: naimano nani tabo nolowiala:. Elayate dokolinami ebe tetelo netewa-kapiya ulamalo ulamate kowonakia:, opo kawonomolo nao inamabute ebema: olopoligiya. Ebe tetelo amoleamole bilibilinomate Isalaela opolo nigologololo ilukulionamiya, <sup>26</sup> wiyasiya Godote Elayako ebe Yu epono amoleamola:tamo kanalibiya:. Ao, ebete ebe Saidono opono Sa:lepata duliyoumolamo nalibiya, ebolo dokolinami ebe amole kapiyanomo ka:nowalubima:. Ebe kamiyale Yu lumagia:! <sup>27</sup> Ega:walo me tanalo idila. Godokono woki awokalimidawa idi Elaisakono tetelo Isalaela opolo kukulakukulago dubu bilibilinomate nilukulionamiya, wiyasiya ibi magumulo Godote dubu idi wadekobi ka:midia:, Siliya opodawa idi Na:imanako kapiya wadekobi midia. Ebe dubu Yu lumagia:!”

<sup>28</sup> Ebene Yu epono balidi ibilamole motolo da:pola:niya, ibi bilibilinomate ebe tabo dolowiya kawonomamo dowaiya. <sup>29</sup> Ebema: iba:te maimiote Ya:suko lawete duliyoumolo magumune elawamo ebo powolukiya, mabu ibi ubila ebe damela unu ida:mo magatate maboele damelane ka:pa:na:mupiamidama:, iyo, mako damela Nasalete duliyoumolo niyakabolo itanami. <sup>30</sup> Ebe tetelo Ya:sute wiyasiya ebe epo bilibilinomono tetedo tote ebene to gabodo gito tiya.

*Ya:sute Kuba Uliyanagono Dubu Wadekobi Da:midia  
Mak 1.21-28*

<sup>31</sup> Ebene Ya:sute Ga:lili opono Kapeniya duliyoumolamo tote, Yu epono wokoa: talena egelalo epo da:niyatulamiti, <sup>32</sup> iba:te ebene tabamo nanoanoutiya mabu ebete tabo Godokono elawamo kiyawauti.

<sup>33</sup> Ebe tetelo ibino balidi ibilamole moto gulo kuba uliyanagono dubute ebolo na:luti, ebene ebete geatepaolo kawonomamo negiya, <sup>34</sup> “Oe! Ya:su Nasalete duliyoumolodawa, a:ma: atamo beda: tanalo na:kosiyodilaemene? A:ma: a kubaiaema: ka:pa:wa:? Eiye, na iyatawala a:imano tanalo, a:ma: ebe Godokono Wade-talena Dawalata!”

<sup>35</sup> Ya:sute wiyasiya ebe kawiya naniya, “A:ma: kodakodawete, ebegodone na:nemaiga!” Ebene kuba uliyanate epono ololo apulo ebe dubu opamo ba:idilote ebegodone ebo penemaigiya, wiyasiya ebetamo kuba tanalo idi kosiyodiliya.

<sup>36</sup> Ebema: ebe epo bilibilinomate anoanolo idite iditamo genaki, idite iditamo genaki, ma kunu wigelitiya, “Me tabono elawo keba kunula:ka:? Me dubuno elawo ega:walo a:di kawonomola! Numa:la:, kubakuba uliyanate ebene tabo olowite iyabaiamo alautia!” <sup>37</sup> Ebene Ya:sukono woko osiyodilo tabote ebe opo kawonomamo gito tiya, iyo, piyate ebolo dilukulionamiya ibi bilibilinomate ebene tanaloma: tabo ebo na:kiyawaiya.

*Ya:sute Saimonokono Moto Lapino Wadekobi Da:midia  
Ma:t 8.14-15; Mak 1.29-31*

<sup>38</sup> Ebene Ya:sute Yu epono balidi ibilamole motone pemaigate Saimonokono motamo gito tiya. Ebolo Saimonokono moto lapino ape elanomo gabugabute umiti, ebene ebene tanaloma: epate Ya:suko ebo aniya. <sup>39</sup> Ebema: Ya:sute tote ebene wata baiamo nutite ebe gabugabute ebe katepama: daniya, ebe tetenomolo gabugabute ebegodone eba olopoligolo ebete maigate ibi mabuma: bae okalimi woko ebo wigelimiya.

*Ya:sute Temetema:gopi Bilibilinomo Wadekobi Da:midiole  
Ma:t 8.16-17; Mak 1.32-34*

<sup>40</sup> Ebe tetelo egelate da:niwisigani, piyate ebe duliyoumololo iyaiya temetema:go da:pola:niya ibino namutupiate ibi bilibilinomo Ya:sutamo ebo



magaeleniya, ebene ebete ebenu koto iba:tamo watiolelamenalo ibi bilibilinomo wadekobi ebo midioleni. <sup>41</sup> Ega:walo ebete kubakuba uliyana kawiyana danaleni, iba:te epo epetapi bilibilinomagodone eba nemaimionalo gelatepaolo tabo ma kunu gelaniya, “Ya:su, a:ma: ebe Godokono Gudulata!” Nanitabola, ebe kubakuba uliyana iyatawala Ya:suko ebe Godokono Alibodawa Kelisotela, wiyasiya ebete ibi kawiyana eba analenalo, iba:te ebenu tanalo kawokalima: ebete tabo gela talena ebo iyatilameni.

*Ya:sute Iyaiya Duliyomolo Epetapilo Godokono Tabo Da:na:kiyawaonaki  
Mak 1.35-39*

<sup>42</sup> Ebene egelate eba waloutalo Ya:sute ebe duliyomolone nemaigate diyamo: opamo na:tiya, ebema: epate ebe wadiago tolamete ebo numiya, mabu ibi ubia:nola Ya:sute ibi miyapama:. <sup>43</sup> Wiyasiya Ya:sute iba:tamo negiya, “Modobola na duliyomolo epetapiamo tote, Godote Kawo Elawodawama: deda:na ebe tanalono Wade Tabo ka:na:kiyawaomamo, mabu Godote na ebema: paliboniya.”

<sup>44</sup> Ebene Ya:sute ebe opono duliyomolo bilibilinomamo tonaki Yu epono balidi ibilamole moto gulo Godokono tabo ebo na:kiyawaonaki.

## 5

*Ya:sute Ebenu Dupo Waloma:tapi Duwatiya  
Ma:t 4.18-22; Mak 1.16-20*

<sup>1</sup> Tete idilo Ya:sute Genasalete Paka: balalo eba utitalo epo bilibilinomate ebetamo mupuma:tiua:go tolamitiya Godokono tabo olowioma:. <sup>2</sup> Ebene ebete pe netewa paka: balalo pola:nalo ulamiya, namo uwatolepi dubate ebe pe iyalo miyapate iba:te ibino kamau ukulaolitiya. <sup>3</sup> Ebema: ibi magumulo Ya:sute dubu idino peamo oliya, ebe dubuno mailo Saimonotela. Ebene Ya:sute ebe daniya ebete ebenu pe potone kela:mo kalima:tepama:, ebete ebe tanalo osiyodilote Ya:sute peamo okolite Godokono tabo epo ebo iyatulamiya.

<sup>4</sup> Ebene ebete Godokono tabo kiyawao dolopoligiya Saimonoko ebo aniya, “Pe kela:mo kulukulu teta:mo walo kalima:tepawete, a:ma: ega:walo a:imano namutupi la:imano kamau obamo nowaduba:la: namo kuwata:ema:.”

<sup>5</sup> Wiyasiya Saimonote ebetamo eba wiyalo negiya, “Kawo Iyatulamedawa, a idoko geyageyanomolo nipo odobinakama:, namo idi kelawenaka:. Wiyasiya kuba:, mabu a:ma:le na danana:wa:, ebema: nale a:imano tabamo tuduwatalo na kamau obamo kowadubitemamo.” <sup>6</sup> Ebema: ebete wokopi epetapiago ebe tanalo dosiyodiliya, namo bilibilinomate taote kamau tatalila teteoma:, <sup>7</sup> ebene iba:te ibino namutupi epetapi pe idilo da:pola:niya kotamo na:midaolamiya iba:te ibi ka:powalubilima:. Ebema: iba:te pelamete ebe pe netewamo namo da:powiyaoliya, pete tatalila obamo ololuoma:. <sup>8</sup> Ebene Saimonote ebe tanalo umite kawonomamo danoaniya, ebete Ya:sukono agowa mabuamo pete pupamo pokolite ebo pegiya, “Kawodawa, a:ma: na atepana:wete na:toa, mabu na kuba lumagila!”

<sup>9-10</sup> Wiyasiya Ya:sute ebetamo negiya, “Akotoletola:la:, a:ma: dopamo namo uwatedawama: eda:namiata, wiyasiya me tetene wagilimite a:ma: epo uwatedawalata.”

Ebe tetelo Saimonago namo uwatole mani woko dosiyodilonamiya, ebe dubu Ya:imesiko ega:walo Yoneko, ibi netewapi Sebedikono gudila. Ebene ibi ega:walo wokopi epetapi ebolo da:pola:niya, iba:te ebe namo bilibilinomo ulamete atumu nakanoanoutiya. <sup>11</sup> Ebe mabuma: Saimonoko

ega:walo me dubu netewa epetapi iba:te ibino pe netewa pa:iliolete ibino woko inamabu bilibilinomo miyapate Ya:suko ebo waloma:tiya.

*Ya:sute Kukulakukulago Dubu Wadekobi Da:midia*

*Ma:t 8.1-4; Mak 1.40-45*

<sup>12</sup> Tete idilo Ya:sute duliomolo idilo okoliti, ebe duliomololo kuba kukulakukulago dubunomote nokolinami. Ebene ebete Ya:suko umite ebetamo pete ebene ololo opamo piyatite towetowe tabo na:pegiya, “Kawodawa, a:imano ubi ditametana, a:ma:le na wadekobi ka:midinima:ta.”

<sup>13</sup> Ya:sute ebene koto uwamidate ebe eba ologilo ebetamo negiya, “Na ubila, a:ma: wadekobi nolowia!” ebema: ebe tetenomolo kukulakukula temetemete ebegodone nolopoligiya. <sup>14</sup> Ebene Ya:sute ebe kawiya eba analo negiya, “A:ma: naimano tanaloma: epo akoanala:la. Modobola a:ma: wiyasiya me tetenomolo toawete a:imano ape Godotamo kalimagono ikameodawatamo nanawokalimiye, ebene kalimagono nilakapo inamabu Godotamo akona:nikamiye, Mosesete da:kiyawaiya eba kunu. Ebe tanalote epo kiyatulaemene a:imano temetemete olopoligi.”

<sup>15</sup> Wiyasiya Ya:sute kebe wadewade tanalo kosiyodilolenakile ebe tabote ebe opo kawonomamo tiya, ebema: epo bilibilinomate ebetamo napaladabutiya ebene tabo kolowioma: ega:walo ebete ibino temetema:gopi wadekobi ka:midiolema:. <sup>16</sup> Ebete wiyasiya ibi miyapate bulu opamo a:ka:tuwa: ebo tiya, ebe diyamo: opolo Godago tabo ka:negelama:.

*Ya:sute Ape Kodakoda Temetema:go Dubu Wadekobi Da:midia*

*Ma:t 9.1-8; Mak 2.1-12*

<sup>17</sup> Egela idilo Ya:sute epo eba iyatulamitalo, Pa:lisi tanebapi ega:walo Godokono Totomu iyatulamepi ibi epetapiate Ga:lili opono iyaiya duliomolone pelamoliya, ebene epetapiate atumu Yudiya opone ega:walo Yelusalema kawo duliomolone pelamolete ebo pepola:niya. Ebe tetelo Kawodawa Godokono elawote Ya:sugodolo nitani ebete temetema:gopi wadekobi ka:midiolema:, <sup>18</sup> ebene dubu epetapiate ape kodakoda temetema:go dubu patapatago aguwaiya. Iba:te moto guamo odoloma: gabo waditiya ibino namutudawa Ya:sukono agowa mabuamo kanadilatima:, <sup>19</sup> wiyasiya epo bilibilinomola ebema: iba:te gabo idi kumiya:. Ebe mabuma: iba:te moto unamo nodolote, Ya:sute kebo kutitiyale iba:te ebe moto unu anabulimite ebe dubu patapatago ebana nuwamidiya Ya:sutamo. <sup>20</sup> Ya:sute ibino nanitabokobi midi tanalo umilamete dubutamo negiya, “Namutudawa, Godote a:imano kuba egebolema:ta.”

<sup>21</sup> Wiyasiya Godokono Totomu tabo iyatulamepi ega:walo Pa:lisi tanebapi dubu iba:te ibino tepo magumulo ma kunu malagidilutiya, “Me dubu amama kawodawanomola, Godokono ololo apulo kuba tabo beda:ma: kegele? Kuba egeboledawa potelela:ka:? Ebe Godoko kapiyatela!”

<sup>22</sup> Iba:te ibino tepo magumulo degeliya Ya:sute iyatawete iba:tamo negiya, “Mabu keleka: la:imano tepo magumulo me tanalo demalagidilola:witama?” <sup>23</sup> Me tabo kodakodala:ka: nale gema:, ‘Godote a:imano kuba egebolemetate a:dodolomatilima:ta?’ O me tabo idi gema: kodakodala:ka:, ‘A:ma: maigawete, na:toa?’ <sup>24</sup> Ebema: nale la: kiyatulaemamota, na Epono Naniwigodolo\* elawo bitana me opo kawonomolo epono kuba egebolelamete ka:dodolomatililaema:.” Ebene ebete temetema:go dubutamo negiya, “Nale a:ma: anamata, a:ma: maigawete, a:imano keta mokopiamidawete motamo na:toa!”

\* **5:24:** Epono Naniwi ebe Ya:sukono mailo idila. Ebe a epo bilibilinomono Naniwila, atumu Godoko ebe aimano Nabiwila.

<sup>25</sup> Ebe tetenomolo ebe dubute ibino ololo apulo maigate ebene keta lawete Godokono mailo unamo eba adipatelo ebene motamo gito tiya, <sup>26</sup> ebema: ebe epo bilibilinomate kawonomamo anoanoutiya. Iba:te Godokono mailo unamo eba adipatelo toletoleolo negeliya, “A ka:lo egelalo anoano tanalo nanitabonomolo ulaema:!”

*Ya:sute Libaiko† Dekamiya*

*Ma:t 9.9-13; Mak 2.13-17*

<sup>27</sup> Me tanalo dolopoligiya Ya:sute moto gune nemaigate dubu idi Libaiko ebo numiya, ebe ta:kese uwatedawala, ebete ebene woko bailo okoliti. Ebe tetelo Ya:sute ebetamo negiya, “A:ma: na nowaloma:ena;,” <sup>28</sup> ebene ebete maigate ebene woko inamabu bilibilinomo miyapate Ya:suko ebo waloma:tiya.

<sup>29</sup> Ebene tete da:peso da:petiya Libaite ebene motolo Ya:suko mabuma: kawo soliyomunomo osiyodiliya. Ebe tetelo ta:kese uwatepi dubu epetapi ega:walo epo bilibilinomo epetapi iba:te Ya:suago soliyomu bae nautiya. <sup>30</sup> Ebene Pa:lisi tanebapi‡ ega:walo ibino totomu tabo iyatulamepi ibi epetapiate Ya:suko waloma:tapi kawiya nanaliya, “Mabu keleka: la:le ta:kese mani elemasigilo uwatepi ega:walo Godokono Totomu Tabo uwatea: epago da:imi obo niawete iba:go bae denawenakoma?”

<sup>31</sup> Wiyasiya Ya:sute ebe tabo olowite iba:tamo negiya, “Wadewade epate doketatamo a:ka:tolaema:na; gabugabuagopiate ka:tolaema:na. <sup>32</sup> Iyo, piyate a:ka:tuwa: degelana, ‘A wadewade epola,’ na ebakobako epo uwatema: ka:piya: Na wiyasiya kubakuba epo kapiya uwatema: piyamo, iba:te ibino iyaiya kuba osiyodilole tanalone kolobila:ma:.”

*Godokono Woko Osiyodiloma: Bae Naoa:no Pola:na Tanalo*

*Ma:t 9.14-15; Mak 2.18-20*

<sup>33</sup> Ebene epo epetapiate Ya:sutamo negeliya, “Yoneko waloma:tapi ega:walo Pa:lisi tanebapino waloma:talepi iba:te iyaiya tetelo bae naoa:no Godotamo towetowe tabo ebo gelanaka, wiyasiya a:ma: waloma:tapiate ma kunu ka:pola:nanakoa:. Iba:te tete bilibilinomolo elawo da:imi obo niote bae ebo naonaka.”

<sup>34</sup> Ya:sute iba:tamo negiya, “Dubute kamiya daidimene, ebe tetelo ebene namutupiate soliyomu bailo bae:nao gito ba:ka:pola:nama:na? Ao, modoboa: Iba:te eba:go soliyomu bae kapimiya kenaoma:na. <sup>35</sup> Wiyasiya kamiya oli aidi dubute ebene kamiya duliya omolo ida:mo magata tete na:pe, nanitabola, ebe egelalo ebene namutupiate ibino tepo temeteme tanaloma: bae naoa:no ka:pola:nama:na. Ebema: numa:la:, me tete ebe la:imano kalakalago bae nao tetela mabu nale la:go bokolinamo.”

*Tagala Okoli Tanalo Ega:walo Oli Okoli Tanalo*

*Ma:t 9.16-17; Mak 2.21-22*

<sup>36</sup> Ebene Ya:sute iba:tamo me iyatulame oi kiyawaolamiya, “Lumagite oli kaliku itamidate tagala kalikuno bolegala:mo a:kowaluomene. Ebete ma kunu dosiyodilomene oli kalikute tagala kalikago a:ka:modobomene, walo ka:ka:bolegalemene. <sup>37</sup> Atu gabodo lumagite tagala gautu-goeo tama kalila:mo oli da:imi obo akalatemene, mabu oli da:imi obote

† 5:26: Buka ka:la:mioledawa, modobola a:ma: me tanalo niyatawa, Libaikono mailo idi Ma:tiyutela.

‡ 5:30: Ya:suko tetelo Pa:lisi epo ebe Yu epono taneba idila. Godote ibino ewoniatamo Mosesedo dikalamiya ebe Totomu Tabo, ega:walo ibino ewoniate a:ka:tuwa: kebe iyaiya tanaloma: kawokawo pukalama: degelanamiya, Pa:lisi epate ebe tanalo bilibilinomamo wadenomamo tudila:onamiya, ebene iba:te epo ma kunu eba iyatulamenalo, piyate ibino tabamo tudila:oa:no iba:te ibi kubama: gelate iba:go kaladabutinakia:.

tagala gautu-goeo tama kalili ka:na:ta:pulaemene, ebene da:imi obote opamo ka:ka:liyaote da:imi obo ega:walo kalili ibi netewate kapiya tetelo ka:kubakubaoma:na. <sup>38</sup> Me mabuma: modobola iyatawadawate oli da:imi obo olioli tama kalili kapiyamo nalateonakomene. <sup>39</sup> Ega:walo me tanalo idila. Lumagite tagala da:imi obo da:ninako ebete walone tetelo oli da:imi obo nima: ubia:noma: keda:mene mabu ebete begenakomene, ‘Tagala da:imi obo golanomola,’ wiyasiya ebako lumagi iyatawa: oli da:imi obono wade gola tanalo.”

## 6

### *Wokoa: Talena Egelano Tanalo*

*Ma:t 12.1-8; Mak 2.23-28*

<sup>1</sup> Yu epono wokoa: talena egela idilo Ya:sute ebe waloma:tapiago kono pali magumudo eba petolamenatolo, ebe waloma:tapiate kono kapiyakapiya kubakubadopo nowakalamite iba:te kenaoma: tama ebo welamiya. <sup>2</sup> Ebema: Pa:lisi tanebapi epetapiate Ya:sutamono negeliya, “Numa:, a:ma: waloma:tapiate aimano totomu tabamo ka:tudila:oa:. Iba:te wokoa: talena egela beda:ma: kadikanalite?”

<sup>3</sup> Ebene Ya:sute iba:tamo eba wiyalo negiya, “Modobola Godote ebene Bukamo dakuloliya, la: ebe tanalo nemalagidilala:. Da:ibiditamono kuba tete da:piya, ebete ebene wapata:lamepiago bae kapete dulamiti, ebene ebete beda: tanalo kosiyodiliyale? <sup>4</sup> Ebete Godokono Motamo nodolote, ebe Motono wokopiate Godotamo dalomonakiya ebe talena bae ebete a:nenaiya. Numa:la:, aimano totomu tabote a niyatua:mena Godotamo kalimagono ikameopiate ebe bae a:ka:tuwa: naonaka, epo epetapiate nao talenala. Wiyasiya Da:ibidite ebe bae naote eba:go wapata:lamepiatamo dikalamoliya, Godote ebe tanalo kubama: kegiya:.”

<sup>5</sup> Ebema: Ya:sute iba:tamo negiya, “Nanitabola, na Epono Naniwite wokoa: talena egela namutudawama: eda:namo.”

### *Ya:sute Koto Apu A:eme Dubu Wadekobi Da:midiya*

*Ma:t 12.9-14; Mak 3.1-6*

<sup>6</sup> Wokoa: talena egela idilo Ya:sute Yu epono balidi ibilamole moto guamo nodolote epo eba niyatulamitalo, tumudi apu koto a:eme dubute ebolo nokoliti. <sup>7</sup> Ebene Pa:lisi tanebapi ega:walo Godokono Totomu iyatulamepi ibi epetapiate Ya:suko balidi kodakodamo umitiya, ebete wokoa: talena egelalo ebe dubu wadekobi da:ba:midimene, iyo, ibi ubila Ya:sute ebe tanalo eba osiyodilolo kubama: ebo kegelama:. <sup>8</sup> Wiyasiya Ya:sute iyatawiya iba:te ibino tepo magumulo beda: tanalo kemalagidilolitiye, ebema: ebete ebe dubutamono negiya, “A:ma: maigawete dopo apuamo na:pa:,” ebene ebe dubute maigate dopo apuamo pete gito putiya. <sup>9</sup> Ebene Ya:sute iba:tamo negiya, “Nale la: alateda:lemata, aimano totomu tabote kebe talena kiyatuamenale? Ale wokoa: talena egelalo wade tanalo o kuba tanalo ba:kosiyodiloma:? Epo wadekobi ba:ka:midilima: o ba:ka:kubailaema:?” <sup>10</sup> Ebe tetelo Ya:sute ibi bilibilinomo eba pulamolenatolo ebe dubutamono negiya, “A:imano koto nuwamida,” ebene ebete koto duwamidiya ebene kotote wadekobi ebo olowiya.

<sup>11</sup> Ebe mabuma: Pa:lisi tanebapiate kawonomamo dowaolo ibi magumulo tabo ebo geliya, “A me dubu Ya:suko keba kunu nakamitima:?”

### *Ya:sute Ebene 12 Alibolepi Dubu Dekala:miya*

*Ma:t 10.1-4; Mak 3.13-19*

<sup>12</sup> Ebe idokolo Ya:sute Godago tabo gelanama: damela unu ida:mo nodoloni, ebema: ebete idoko geyageyanomolo Godago tabo eba gelanalo egelate ebo powaloiya. <sup>13</sup> Ebene egelate da:pemaigiya ebete ebenu waloma:tapi ebetamo ka:la:mite, ibi magumulo 12 dubu eba uwatelo ibi nanaliya, “La: naimano alibolepilata.”

<sup>14</sup> Ebema: Ya:sute 12 dubu duwatiya, me ibino mailola.

Saimonoko Ya:sute ebetamo Pita mailo idi ikamiya, ega:walo ebenu ekawi A:nduluko.

Ya:imesiko ega:walo Yoneko,  
Pilipiko ega:walo Batolomuko.

<sup>15</sup> Ma:tiyuko ega:walo Tomasiko, A:lapiyasikono gudu Ya:imesiko ega:walo Saimonoko. Me Saimono idila epate dopamo negelanakiya, ebete kapela Loma gabamani epago gowelaodawama: eda:nami.

<sup>16</sup> Ega:walo Ya:sute dubu epetapi netewa kuwatiya, Ya:imesikono gudu Yudasiko ega:walo Keliyota duliynomolodawa Yudasiko, walone tetelo me walogabo dubute Ya:suko anakapumpipi walubiliya ebe kelaema:.

*Ya:sute Temetema:gopi Wadekobi Da:midoliya*

*Ma:t 4.23-25*

<sup>17</sup> Ebene Ya:sute ebe waloma:tapiago unu damelane apotame opo ida:mo da:niwitiya, ebe tetelo waloma:tapi epetapi ega:walo iyaiya epo bilibilinomate iba:go ebo palugiya. Ibi epetapiate Yelusalema kawo duliynomolone ega:walo Yudiya opono duliynomolo epetapine pelamiya, ega:walo ibi epetapiate kewa: kolomo bala apune ka:pelamiya, ibi Taya kawo duliynomololo ega:walo Saidono kawo duliynomololo dilukulionamiya ebe epola. <sup>18</sup> Nanitabola, ebe epo bilibilinomate pelamoliya Ya:sukono tabo olowioma: ega:walo ebete ibino temetema:gopi wadekobi ka:midiolema:, ega:walo kuba uliyanagopiate ebetamo atumu a:ka:pelamiya, ebene ebete ibi bilibilinomo wadekobi ebo midoliya. <sup>19</sup> Ebema: ebe epo bilibilinomo ubila Ya:suko kologioma:, mabu iba:te iyatawaiya Godokono elawote ebe magumune da:pemaiganaki ebe tetelo ebete temetema:gopi wadekobi ebo midiolenaki.

*Kalakala Tanalo Ega:walo Tepo Temeteme Tanalo*

*Ma:t 5.1-12*

<sup>20</sup> Ebene Ya:sute ebenu waloma:tapi bilibilinomo eba ulamitalo nanaliya, “La: piyate nigologololo dilukula:wenama,  
modobola la: nekalakalala;  
mabu Godote Kawo Elawodawama: deda:na,  
ebe wade duliynomolono tanalo la:imanola!

<sup>21</sup> “Ega:walo me tetelo  
la: bae kapete dulametana,  
modobola la: nekalakalala;  
mabu Godote la:imano bae kape tanalo ka:modoboilaemene!

“Ega:walo me tetelo la: piyate  
temetema:go diima:wenama,  
modobola la: nekalakalala;  
mabu walone la: kawo kalakalate kuwatelema:ta!



22 “Ega:walo Epono Naniwino tanaloma: epetapiate la:tamo dowao lo ubia: tabo eba gelalo la: demalogoletana, ega:walo iba:te la:imano mailo da:kubailamena, modobola la: atumu na:kekalakalala! 23 Iyo, la: kalakalaolo unamo nilapatela:iyala:, mabu walone tetelo la:le Godokono Unu Duliyomololo la:imano wiya kawokawonomo ka:nuwatemamota. Numa:la:, dopamo ibino ewoniate atu ubia: tabo kegelanakiya Godokono woki awokalimipiatamo.

24 “Wiyasiya me tetelo la: piyate  
 inamabu bilibilinomagopima: deda:wenama,  
 la: kawo tepo temeteme kiyatawaomamota,  
 mabu la:imano kalakala nelawenamata,  
 walone kolopoligomene!

25 “Ega:walo me tetelo la: kebe epo  
 bae kapete kulametana;  
 la: kawo tepo temeteme kiyatawaomamota,  
 mabu walone la: bae kapete kuwatelema:ta!

“Ega:walo me tetelo la: piyate  
 dekalakalawenama,  
 la: kawo tepo temeteme kiyatawaomamota,  
 mabu walone la: gowelago kiimimamota!

26 “Ega:walo epo bilibilinomate la: demoiioletamene, la: nanisiwale, mabu walone tetelo la: kawo tepo temeteme kiyatawaomamota! Numa:la:, dopamo ibino ewoniate Godokono mailamo a:da: tabo kiyawaopi atumu emoiolenakiya.”

*La:go Gowelao pi Nilakapolo Malagidilole Tanalo  
 Ma:t 5.38-48; 7.12*

27 Ebene Ya:sute walo na:kegiya, “Ebe mabuma: na la:tamo negemo, piyate la:go da:gowelao na, modobola la: ibi nilakapolo nemalagidilolenala: ega:walo iba:tamo wadewade tanalo nosiyodilolenakiyala:. 28 Ega:walo la:tamo malato tabo da:kiyawaonaka, ebe epono tanaloma: Godotamo na:towetoweonakiyala: ebete ibi wadenomamo kowalubilinama:, iyo, piyate la:tamo kuba tanalo dosiyodilolena la: ibi Godotamo nowadipalatele-nakiyala:. 29 Ega:walo potele a:ma: tatakolo danagalimitamene, modobola apu bala ebetamo na:kikamiye. Ega:walo kebe lumagite a:imano sete inamabu a:ma:godone elawamo delaemene, ebe atu tetelo a:imano lubudino inamabu akoamoeda:la:, a:ma:le ebetamo nilakapolo gito na:kikamiye. 30 Iyo, lumagite a:imano inamabu idima: a:ma: da:toweometamene, modobola ebetamo nilakapolo nikamiye, ega:walo kebe lumagite a:imano inamabu pilolo duwatemene, a:ma: toawete ebe inamabu elawamo akonuwata:la:. 31 Ebema: epate la:tamo beda: tanalo osiyodiloma: la:le ubi diyata:wenakoma, la: epetapiatamo eba kunu nosiyodilonakiyala:.

32 “Piyate la: nilakapolo demalagidiloleletana, la: ebe epo kapiya demalagidilola:wenama la:imano woki keba kunula:ka? Ebe mabuma: Godote la:tamo wade wiya ba:kikalametamene? Ao, mabu kuba osiyodilolepiate atumu ibino namutupi kapiya nilakapolo malagidilolenaka! 33 Ega:walo piyate la:tamo wadewade tanalo dosiyodilolena, la: ebakobako epo kapiyatamo wadewade tanalo dosiyodilola:wenama

la:imano woki keba kunula:ka? Ebe mabuma: Godote la:tamo wade wiya ba:kikalametamene? Ao, mabu kuba osiyodilolepiate ibino namutupi kapiyatamo atu wadewade tanalo kosiyodilolenaka! <sup>34</sup> Ebema: piyate la:tamo walo da:kikalamoletanaka, la: ibi kapiyatamo mani dikalamola:ema la:imano woki keba kunula:ka? Ebe mabuma: Godote la:tamo wade wiya ba:kikalametamene? Ao, kuba osiyodilolepiate atumu ibino namutupi kapiyatamo mani ikalamolenaka mabu atu tanalo iba:godone walo ka:kuwatema:na! <sup>35</sup> Wiyasiya modobola la:tamo gowelaopima: deda:ona, la: ibi nilakapolo nemalagidilolenala: ega:walo iba:tamo wadewade tanalo nosiyodilolenakiyala:. Iba:te manima: la: danaletamene, modobola la: iba:tamo gito nikalamiyala:, wiya tanalo akomalagidilala:. Mako osiyodilo tanalodo la: Ununomo Godokono gudima: eda:wete walone tetelo wiya kawonomo kuwatemamota. Numa:la:, ebete kuba osiyodilolepi ega:walo ebetamo kalakala tabo gela:pi ebakobako epatamo nilakapo tanalo osiyodilolenako. <sup>36</sup> Ebema: la: epo bilibilinomo nilakapolo nemalagidilolenala:, la:imano Nabiwite ibi keba kunu kemalagidilolenale eba kunu.”

*Epono Tanalo Anagilamelelame Tanalo*

*Ma:t 7.1-5*

<sup>37</sup> Ebene Ya:sute walo na:kegiya, “La:le epo epetapino iyaiya tanalo anagilamelelamelelo ibi kubakubapima: samamo akoka:la:miala:, ebene Godote la:imano tanalo anagilamelelamelelo la: kubakubapima: a:keka:la:mitamene. Ega:walo modobola la: epono kuba egebolelama:wete na:dodolomatililamiyala:, ebene Godote atumu la:imano kuba egebolelametate ka:dodolomatililaema:ta. <sup>38</sup> Ega:walo modobola la: epetapiatamo inamabu nilakapolo nikalamenakiyala:, ebene Godote atumu la:tamo eba ikalamelo tete bilibilinomolo ebete la: inamabuamo betabokailamenakoma:ta, iyo, la: epetapiatamo kebako uwomulo kikalama:wenakoma, Godote atumu la:tamo ebako uwomulo ba:kikalamenakoma:ta.”

<sup>39</sup> Ebene Ya:sute iyatulame oi eba kiyawaolo negiya, “Balidi tamio dubute balidi tamio dubu idi gabodo wadenomamo a:kemagatamene. Ebete eba kunu dowagelemene ibi netewapi damela gugamo kapimiya ka:na:gudima:na:, a, nanitabola:ka? <sup>40</sup> Ebema: ka:lo sukululo diyatawana ebe guduno iyatawa tanalote iyatulamedawano iyatawa kodolina:, wiyasiya walone ebenu sukululu dolopoligomene ebenu iyatawa tanalo ega:walo iyatulamedawano tanalo atu tetelo ka:pola:nama:na:.”

<sup>41</sup> “Keleka: mabu a:imano ekawino balidilo nonoka da:peso umilo wiyasiya a:imano balidilo ditana ebe kawo kewa tete kuma:wena:? <sup>42</sup> Ega:walo beda: mabuma: a:imano ekawitamo ma kunu degeawita, ‘Ekawi, modobola a:imano balidilo ditana ebe nonoka da:peso nale kelaemamota,’ wiyasiya a:imano balidilo ditana ebe kawo kewa tete a:ma: kelawa:wena:? Eiye! A:ma: mena netewa lumagilata! Modobola a:ma: dopamo a:imano balidilo ditana ebe kewa lawa:wete, a:ma:le walone wadenomamo mela:wete a:imano ekawino balidilo ditana ebe nonoka da:peso ebo kelaema:ta.”

*Kewa Ega:walo Ebenu Da:imi*

*Ma:t 7.16-20; 12.33-35*

<sup>43</sup> Ebene Ya:sute walo na:kegiya, “Wadewade kewalo kubakuba da:ima:te a:ka:noloma:na:, ega:walo kuba kewalo wadewade da:ima:te a:ka:noloma:na:. <sup>44</sup> Iyo, nanitabola, la: iyaiya kewano da:imi ibino ololamo dulama:ema la: ebo kiyatawaomamota, ibi magumulo kebe da:ima:te naoma: wadewadenoma: keda:onale. Ebema: lumagite moeagono kewamo tote umei kewano da:imi a:ka:netapiomene, ega:walo ebete moeagono

kewalo wadewade gala:ipi da:imi a:ka:nulaemene. <sup>45</sup> Ebema: wade lumagite ebene tepo magumune wadewade tanalo ba:powaulatelenakomene, wiyasiya kuba lumagino tepo magumulo kuba tanalate pola:na ebema: ebegodone kubakuba tanalate ba:pemaimionakoma:na; mabu lumagino tepo magumulo kebe tanalate ka:pola:nale, ebe tanalate ebene tabo kiyawao tanalodo ka:pemaimioma:na.”

*Moto Netewa Etemotepino Tanalo*

*Ma:t 7.24-27*

<sup>46</sup> Ebene Ya:sute walo na:kegiya, “Keleka: mabu la:le na Kawodawama: gito deka:na:miawenama, wiyasiya nale da:kiyawaonakomo ebe tanalo la:le kosiyodilola:wena? <sup>47</sup> Ebema: kebe lumagite natamo pete naimano tabo polowiote ebe iyaiya tanalo dosiyodilolemene, ebe lumagino tanalo keba kunu kitanale nale la: wadenomamo kiyatulaemamota. <sup>48</sup> Ebe lumagi wade moto detiya ebe dubu keba kunula:ka: eba kunula. Ebete damela magumunomamo obobote kodakoda damela unamo ebene moto ebo etiya, ebene ulama obote eba odololo ebe moto dapadimagotiya, wiyasiya motote kalegiya: mabu etedawate ebene moto wadenomamo etiya. <sup>49</sup> Wiyasiya kebe lumagite naimano tabo olowite osiyodilolea:no, ebe kobokobo damelamo moto detiya ebe dubu keba kunula:ka: eba kunula. Ebe motono mabu puliyala, kitaniya; ebema: ulama obote eba odololo ebe moto dapadimagotiya opamo gito kagiya. O olalati beda: kawonomola:ka!”

**7**

*Ya:sute Gowelaodawa Elawodubuno Woko Dubu Wadekobi Da:midiya*

*Ma:t 8.5-13*

<sup>1</sup> Ya:sute epatamo me tanalo bilibilinomo kiyawao dolopoligiya ebete Kapeniyama duliomolamo gito tiya. <sup>2</sup> Loma epono gowelaodawa elawodubu idite ebolo okolinami, ebene ebene wiya: wokopi magumulo ebete kebe dubu kawonomamo demalagidilonami, ebe dubu kawo gabugabute umiti, ebe a:e tatalila. <sup>3</sup> Ebema: ebe elawodubute Ya:sukono tanalo olowite Yu watowatopi dubu epetapi ebetamo ebo ka:la:miya, iba:te Ya:suko ma kunu kananama; ebete pete elawodubuno wokodawa wadekobi ka:pa:midima:. <sup>4</sup> Ebene ibi epetapiate Ya:sutamo pelamete ebe toweomelo napaniya, “Me Loma opodawa elawodubu wade lumagila. Modobola a:ma: ebe na:nowaluba; <sup>5</sup> mabu ebete a Yu epo kawonomamo nemalagidiloena, ega:walo ebete ebene maniamo aimano balidi ibilamole moto eteami.”

<sup>6</sup> Ebema: Ya:sute iba:go na:tiya. Ebete eba tonatolo moto niyakabamo da:nemaigiya, ebe elawodubute ebene namutupi ebo aliboliya iba:te Ya:suko kananama; “Kawodawa, kodakoda tanalo idi naimano tanaloma: ako-osiyodilala:. Na wade lumagia: a:ma:le naimano motamo podoloma:. <sup>7</sup> Ega:walo na wadenoa: a:imano ololo apuamo pema:. Wiyasiya na niyatawitamo, a:ma:le motamo pea:no tabo gito degeaemene, naimano wokodawate nanitabonomolo wadekobi kolowimene. <sup>8</sup> Mabu na atumu gowelaopino kawokawo elawodubuno opodawama: eba eda:nalo ibino tabamo a:tuduwatanakomo, ega:walo atu tetelo naimano gowelaopiate naimano umi magumulo pola:na. Ibi magumulo nale idi danamo, ‘A:ma: na:toa!’ ebete ebo ka:tomene. Ega:walo idi dakanamo, ‘A:ma: na:pa:!’ ebete ebo ka:pemene. Atumu nale naimano wiya: wokodawa danamo, ‘A:ma: me tanalo nosiyodila!’ ebete ebe tanalo kosiyodilomene. Ebema: Kawodawa, modobola a:ma: tabote negea naimano woko dubute wadekobi kolowima:.”

<sup>9</sup> Ya:sute ebe tabo dolowiya ebete nela:wiya, ebema: ebe dowaloma:titiya ebete ebe epo bilibilinomatamo olobigate negiya, “Na la:tamo nanitabonomolo gemo, na Isalaela epo bilibilinomo magumulo mako nanitabokobi midi lumagi kuminakoa!”

<sup>10</sup> Ebene gowelaodawa elawodubute daliboliya ebe dubate ebena motamo walo da:ka:pelamiya, iba:te ebe wiya: wokodawa wadekobi olowilo pumiya.

*Ya:sute Amole Kamiyaleno Gudu A:ene Dadipatiya*

<sup>11</sup> Egela idilo Ya:sute duliynomolo ida:mo gito tiya, ebe duliynomolono mailo ebe Na:inila, ebe tetelo ebe waloma:tapi ega:walo epo bilibilinomo eba:go kapimiya tolamitiya. <sup>12</sup> Ebene ebete duliynomolono kala ga:dimi gigiyamo da:nemaigiya, ebe tetelo epo bilibilinomate a:e dubu agute duliynomolone pemaimiutiya ebe bobamo ka:piniyatima:, ebe a:e dubuno menoko amolela, ebena gudu kapiyanomote a:iya. <sup>13</sup> Ebema: Kawodawate ebe kamiyale umite nilakapoimilo ebetamo negiya, “A:ma: akoitala:.” <sup>14</sup> Ebene Ya:sute tote a:e dubute dekapitani ebe patapata da:nologiya, ebe daguwatitiya ebe dubate ebamo eba putitatalo, ebete a:e dubutamo negiya, “Ekawi, nale a:ma: anamata, nemaiga!” <sup>15</sup> Ebene ebe dubute maigate tabo kiyawao dowagilimiya, Ya:sute ebena menokotamo gito ikamiya.

<sup>16</sup> Ebema: ibi bilibilinomate kawonomamo toletoleolo Godokono mailo unamo eba adipatelo negeliya, “Godokono woki awokalimidawa atamo a:pemaiga! Iyo, Godote ebena epono igilo mula:lelaema: pe!”

<sup>17</sup> Ebema: ebe Na:ini duliynomolono opo ega:walo opo epetapi tametamelo dilukulionamiya, ebe epo bilibilinomate Ya:sukono tanaloma: tabo ebena:kiyawaiya.

*Yonete Ebe Waloma:tapi Ya:sutamo Daliboliya*

*Ma:t 11.2-19*

<sup>18</sup> Ebe tetelo Yoneko epo obamo waduba:midaoledawa, ebena waloma:tapiate me tanalo bilibilinomo ebe ebena pikiyawaomiya. Ebene ibi magumulo Yonete netewa dubu ka:la:mite <sup>19</sup> Ya:sutamo ebena naliboliya, iba:te ebe ma kunu kananama:, “Yonete pema: degi, a:ma: ebe lumagila:ka: o ale lumagi idi kemakopelena:?”

<sup>20</sup> Ebene iba:te Ya:sutamo pelamete na:pegeliya, “A Yonete paliboe a:ma: ma kunu kapalateda:tama:, ‘Yonete pema: degi, a:ma: ebe lumagila:ka: o ale lumagi idi kemakopelena:?’ ”

<sup>21</sup> Ebe tetenomolo Ya:sute ibino ololo apulo iyaiya temetema:gopi, ega:walo gabugabuagopi, ega:walo kuba uliyanagopi bilibilinomo wadekobi midioliya, ega:walo ebete balidi tamiopi atumu wadekobi a:ka:midioliya. <sup>22</sup> Ebema: ebete wiya tabo Yoneko waloma:tapiatamo negiya, “La: toawete la:le kebe tanalo kulamola:ema ega:walo la:le kebe tabo kolowiaema, ebe iyaiya tanalo Yoneko nananala:. Balidi tamiopiate a:melea ega:walo agowa tataipiate nowapata:lama:! Kukulakukulagopiate wadekobi olowiya ega:walo galo tamiolamepiate nolowia! A:elaopiate a:ene walo a:kemaimiya ega:walo nigologolo epatamo Godokono Wade Tabote a:pe! <sup>23</sup> Ebema: kebe lumagite na nanitabokobi midinilo woki netewama: eda:no, ebegodolo Godokono kalakalate bitanamene!”

<sup>24</sup> Ebene Yonete dapaliboliya ebe dubu netewate da:tiya, Ya:sute Yonekono tanaloma: epatamo ebena kiyawaiya. Ebete negiya, “La: Yonekono tanalo olowiawete bulu opamo danemaimiama, beda: tanalo uima: ka:tolama:ima? Pudo kapiya awate gito dadegetiti, ebe uima: ka:tolama:ima? <sup>25</sup> O la: wadewade kaliku pupulio dubu uima:

ka:tolama:ima? Ao, la: iyatawalata wadewade kaliku pupuliopiate bulu opolo kilukuliona:, wiyasiya iba:te kawokawo elawodubuno motolo ilukuliona! <sup>26</sup> Ebema: na niyatunama:la:, la: beda:ma: ka:tolama:ima? Godokono woki awokalimidawa uima:la:ka:? Iyo, na la:tamo nani tabo gemo, Yonete Godokono woki awokalimipi epetapi bilibilinomo odoili. <sup>27</sup> Nanitabola, Yonekono tanaloma: Godote ebene Bukalo tabo ma kunu giya,

‘Nale Kelisokono dopo apuamo  
naimano tabo atadawa kapalibomamo,  
ebete ebe dopomete  
ebene gabo kosiyodiloma:.’ ”

<sup>28</sup> Ya:sute walo na:kegiya, “Nale la: analemata, wagilimi mabune me teta:mo pemaiga me opo kawonomolo dawokalaiya, ebe epo bilibilinomo magumulo Yoneko kawodawanomoma: eda:na. Wiyasiya me tetene wagilimite Godote Kawo Elawodawama: deda:na, ebe duliomololo kebe lumagite da:pesonomoma: deda:mene ebete Yoneko nanitabolo kodolimene.”

<sup>29</sup> Ebe tetelo dopamo Yonete kebe epo obamo dowaduba:midaoliya, ebe ta:kese uwatepi ega:walo epo epetapi bilibilinomo iba:te Ya:sukono tabo olowite Godokono gabo tuputupunomoma: gelate ebo kalakalautiya. <sup>30</sup> Wiyasiya Pa:lisi tanebapi ega:walo Godokono Totomu iyatulamepi iba:te dopamo Yonetamo ka:nemaimiya: ebete ibi obamo waduba:midaolema:. Ebe tanalo magumulo iba:te Godokono wade tanalo odiyobiya, ebema: iba:te Ya:sukono taboma: kekalakalautiya.

<sup>31</sup> Ebema: Ya:sute negiya, “Na me tete epono tanalo kebe uli tabamo nakawokalimo? La: kebako epola:ka:? <sup>32</sup> La: olowame bailo dekalakalauta ebe gudi egege keba kunula:ka: eba kunula. Gudi epetapiate epetapiatamo kegela, epetapiate epetapiatamo kegela, iba:te apamineuilo ma kunu wagelena, ‘Ale soliyomu eba osiyodilolo bibolo da:moleoma: wiyasiya la: ago kemaewa:, ega:walo a a:e lumagi bobamo iyatima: dowagelitama: la: wiyasiya ago kiima:wita:!’ Iyo, me tete epala:, la: eba kunu wagelena-mata, la: Godokono wokopiatamo ubia: tabo gelanakomata. <sup>33</sup> Numa:la:, Yoneko epo obamo waduba:midaoledawate da:pemaigi, ebe tetelo ebete elawo da:imi obo ka:ninakia: ega:walo tete epetapilo ebete bae naoa:no lutanaki Godokono woko kosiyodiloma:, ebema: la: negelimata, ‘Ebe kuba uliyanagonola!’ <sup>34</sup> Wiyasiya Epono Naniwite da:pemaigi, ebene tanalo iyala. Ebete bae enanako ega:walo elawo da:imi obo a:ninako ebema: la: ma kunu gelanakomata, ‘Ebene kuba numa:la:! Ebe tumu goeoma: eda:te bae kawonomamo nanako, ebe elawo da:imi obo ni kawodawala! Ebe ta:kese mani elemasigilo uwatepi ega:walo Godokono Totomu Tabo uwatea:pi epetapi ibino namutudawala!’ ”

<sup>35</sup> Ebene uwomunomolo Ya:sute iba:tamo negiya, “Godokono wade mulo tanalo dowaloma:tana, ebe epate ibino ilukuli magumulo ebe mulo nanitabonomolo bawokaliminakoma:na:.”

#### *Ya:sute Saimonokono Motolo Bae Deniya*

<sup>36</sup> Ebene Pa:lisi tanebadawa dubu idite Ya:suko naniya ebete ebegodolo bae ka:nenama:, ebema: Ya:sute ebe dubuno motamo nodolote bae nama: gito nokoliya. <sup>37</sup> Ebe duliomololo kuba kamiyale idi okolinami, ebene Ya:sute Pa:lisi tanebadawano motolo bae deniti ebe kamiyalete ebe tanalo olowite wade nibo ii nokola kalila:mo tabokaimi ebo adaiya. <sup>38</sup> Ebe tetelo



ebete Ya:sukono walogabo apune pete ebenu agowa mabuamo putite ebenu ipupamo Ya:sukono agowa pukulalemete agowa a:la:li ebenu eka:mo ebo iya:da:olemiya, ebenu ebete ebenu agowa aboelatelemete ebete dadaiya ebe wade nibo ii ebenu agowamo gito adipanamiya. <sup>39</sup> Ebenu Ya:suko daniya ebenu motamo pema:, ebe Pa:lisi tanebadawate kamiyaleno osiyodilo tanalo umite ebenu tepo magumulo ma kunu malagidiliya, “Me dubu ebe Godokono woki awokalimidawama: neda:taleka:, ebete ebe kamiyaleno tanalo biyatawana:, ebe dologi ebe kamiyale dubu bilibili kamiyalela!”

<sup>40</sup> Ebenu Ya:sute Pa:lisi tanebadawatamo negiya, “Saimono, nagodolo tabo da:peso bitana a:ma: kanatama:.”

Ebenu Saimonote negiya, “Modobola, Iyatulamedawa, negea.”

<sup>41</sup> Ya:sute negiya, “Inamabu bilibilinomago dubu idi okolinami, ebenu dubu netewate ebegodone mani uwatete tete geyageyanomolo ebetamo walo kikameiya:, idawate 500 mani, idawate 50 mani. <sup>42</sup> Ibi netewapiate eba kunu wiyaolea:no eba ilukulinalo, egela idilo ebe kawo dubute ibi ebetamo ka:la:mite, ibi nilakapoilamelo ibino wiyaolea:no tanalo gito egebolelamiya. Ebema: a:imano woki keba kunula:ka:, ibi netewapi magumulo kawo kalakalago ebe potele kemalagidilonamile?”

<sup>43</sup> Saimonote tabo eba wiyalo negiya, “Naimano woki bitana, mani kawonomo duwatiya ebe wiya:nodawala.”

Ebenu Ya:sute negiya, “A:ma: nani tabo geata.” <sup>44</sup> Ebe tetelo Ya:sute kamiyaletamo olobigate Saimonoko ebo alatediya, “A:ma: me kamiyale na:kuma:wita? Na a:imano motamo da:podolomo, ebe tetelo a:ma: natamo agowa ukulaleno obo kikanama:wea:. Ebete wiyasiya ebenu ipupamo naimano agowa ukulalenamete, agowa a:la:li ebenu eka:mo iya:da:olename. <sup>45</sup> Ega:walo a:ma:le na kaboenatena:wea:, wiyasiya nale motamo da:podolomo ebe tetene wagilimite ebete naimano agowa aboelatole katepita:. <sup>46</sup> Ega:walo a:ma: wade olibi kikopuno iamo naimano wato kabutima:wea:, ebete wiyasiya naimano agowamo wiya kawonomo wade nibo ii ebe adipana.\* <sup>47</sup> Ebema: na a:ma:tamo negemo, ebete natamo nilakapo kawonomamo dawokalimi, ebe osiyodilo tanalote tanalo idi ma kunu kawokalimi, Godote ebenu kawokawo kuba bilibilinomo egebolemete a:dodolomatilimi. Wiyasiya numa:, Godote lumagi idino kuba depeso da:dodolomatilimene, diyala, ebe lumagite nilakapo tanalo Godotamo akawokalimene.”

<sup>48</sup> Ebenu Ya:sute ebe kamiyaleno tepo magumu eba iyatawalo ebetamo negiya, “Godote a:imano kuba egebolemetate a:dodolomatilima:ta.”

<sup>49</sup> Ebema: eba:go ilukulite bae denautiya iba:te ibi magumulo negeliya, “Lumagino kuba egebolema: dege, me kebe amama dubula:ka:?”

<sup>50</sup> Ebenu Ya:sute kamiyaletamo walo na:kegiya, “A:imano nanitabokobi midi tanalote a:imano igilo a:mula:ma:ta. Kalakalago na:toa.”

## 8

### *Ya:suko Dowalubinakiya Ebe Iyaiya Kamiyaleno Tanalo*

\* **7:46:** Buka ka:la:mioledawa, modobola a:ma: me tanalo niyatawa, Ya:suko tetelo Yu epono osiyodilo magumulo wade lumagi idite dubu idino motamo da:nodolonaki, moto namutudawate ebenu kalakala ebetamo awokalima: netewa-kapiya tanalo ma kunu osiyodilolenaki. Dopamo ebete ebenu tatakoto apune apune kaboteomene, ebenu ebete ebenu agowa kukulalemene, walone ebete olibi kikopuno iamo ebenu wato ebo kabutimene. Saimonote ebe netewa-kapiya tanalo magumulo tanalo idi kosiyodiliya: Ya:sutamo, wiyasiya kuba kamiyaletate pete wadenomamo posiyodiloliya.

<sup>1</sup> Ebene egela epetapi dolopoligiya Ya:sute kawokawo ega:walo egege duliynomololo Godokono Wade Tabo kiyawaoago eba pata:lo, Godote Kawo Elawodawama: deda:na ebete ebe tanalo na:kiyawaonaki. Ebe tetelo ebena 12 waloma:tapi dubate eba:go tolamenakiya, <sup>2</sup> ega:walo kamiyale epetapiate eba:go atumu na:kowapata:lamenamiya, dopamo tetelo ibino taneba magumulo epetapiate kuba uliyanagopima: eda:onamiya ega:walo epetapiate iyaiya temetema:gopima: eda:onamiya, wiyasiya Ya:sute ibi wadekobi a:midoliya. Ebe kamiyale magumulo Magadala duliynomolodawa Ma:liki ebe idila, dopamo Ya:sute ebegodone sebeni kubakuba uliyana aliboliya. <sup>3</sup> Ega:walo kamiyale idi Kusakono kamiyale Yowanatela, Kusako ebe Kawo Elawodubu Elodikono opodawa idila. Ega:walo kamiyale idi ebe Susa:natela. Ebe netewa-kapiya kamiyale iba:te kamiyale bilibilinomo epetapiago ibino maniamo Ya:suko ega:walo ebena 12 waloma:tapi dubu walubilinakiya.

*Kono Kikopu Aminaotedawano Iyatulame Oi*

*Ma:t 13.1-9; Mak 4.1-9*

<sup>4</sup> Ebene epo bilibilinomate iyaiya duliynomolone pelamolete Ya:suago daladabutiya, Ya:sute iyatulame oi iba:tamo ma kunu kiyawaiya, <sup>5</sup> “Lumagi idite pali amio bai dosiyodili, ebe tetelo ebete kono kikopu aminaola:go eba tonatolo kikopu epetapi iba:te gabamo ebo gudiya, ebema: epate agowamo da:mikitaoliya olaolate gito penaiya. <sup>6</sup> Kikopu epetapi iba:te nokola damelamo gudiya, ebema: iba:te tete da:pesamo apepeote ebo alawoiya mabu ebe damela a:la:li puliyala. <sup>7</sup> Kikopu epetapi iba:te moemoe uwago damelamo gudiya, ebema: iba:te kapimiya apepeote moeagopi uwagate kono gito anakapulamiya. <sup>8</sup> Wiyasiya kikopu epetapi iba:te wade damelamo gudiya, ebema: iba:te apepeote gito noloiya, kono idite 100 teta:mo, kono idite 100 teta:mo, iba:te eba kunu bilibilinomoma: eda:iya.”

Ebema: Ya:sute kawonomamo negiya, “Galagodawa, a:ma: wadenomamo nolowia!”

*Ya:sukono Iyaiya Iyatulame Oino Mabu*

*Ma:t 13.10-17; Mak 4.10-12*

<sup>9</sup> Ebene Ya:suko waloma:tapiate ebe nalatediya, “Me iyatulame oino magumu keba kunula:ka?”

<sup>10</sup> Ya:sute iba:tamo eba wiyalo negiya, “Godote Kawo Elawodawama: deda:na, ebe tanalono magumu kelawa:ema: nale elawo la:tamo ikalaimata, iyo, ebe tanalono waminaole tanalo la: iyatawaimata. Wiyasiya epo epetapi eba kunua:, iba:te ebe tanalono iyatulame oi olowiote, iba:te ebena magumu bowadinakoma:na: wiyasiya a:kuminakoma:na:, iyo, iba:te bolowinakoma:na: wiyasiya a:kiyatawaonakoma:na:.”

*Kono Kikopu Aminaotedawano Iyatulame Oino Magumu*

*Ma:t 13.18-23; Mak 4.13-20*

<sup>11</sup> Ebene Ya:sute walo na:kegiya, “Me iyatulame oino magumu ma kunula, kono kikopu ebe Godokono tabola. <sup>12</sup> Ebene epo epetapiate gabamo da:gudi, ibi ebe kono kikopu keba kunula:ka: eba kunula. Iba:te Godokono tabo dolowima:na:, Saitanate pete ebe tabo ibino tepo magumune ka:puwatelaemene iba:te nanitabokobi midite igilo mula: tanalo lawekapoma:. <sup>13</sup> Epo epetapiate nokola damelamo da:gudi, ibi ebe kikopula. Iba:te tabo dolowima:na: kalakalago kelaema:na:, wiyasiya ibino tepo magumulo dolodolo puliyala, ebema: iba:te nanitabokobi midite magumulo tete da:pesamo ilukula:tepate temeteme tanalate iba:tamo

da:pemaimioma:na: iba:te samonomamo ka:gudima:na:. <sup>14</sup> Epo epetapiate moemoe uwago damelamo da:gudi, ibi ebe kikopula. Iba:te tabo kolowima:na:, wiyasiya iba:te inamabu uwatema: eba malagidilolenalo woki bilibilima: eda:ona, ebema: ibino ilukuli tanalono ubi tanalate ibino nanitabokobi midi tanalo eba anakapumilo iba:te wade nao konoma: a:keda:oma:na:. <sup>15</sup> Ebene epo epetapiate wade damelamo da:gudi, ibi ebe kikopula. Iba:te Godokono tabo dolowima:na: nanitabonomolo ke-laema:na:, ebene iba:te ibino tepo magumulo ebe tabamo tudila:ote kodakodanomolo eba utitalo wade nao kono ebo ka:noloma:na:.”

*Wuiki Alo Awokala Baiamo Iyati Tanalo*

*Mak 4.21-25*

<sup>16</sup> Ebene Ya:sute walo na:kegiya, “Lumagite ebene wuiki alo pite bagowo magumamo a:kiyatimene ega:walo ebene wata bai magumamo a:kiyatimene. Wiyasiya ebete alo awokala baiamo kiyatimene, ebene epate ebene moto guamo da:podoloma:na: iba:te ebe alo ka:puima:na:. <sup>17</sup> Numa:la:, kebe waminaole tanalate da:pola:na walone tetelo Godote kawokalilaemene, ega:walo kebe ulamolea: tanalate da:pola:na walone epate alo tetelo kulamolema:na:. <sup>18</sup> Ebema: a:ma: wadenomamo nolowia. Godokono tabo olowioma: lumagigodolo wadewade woki da:pola:na, Godote ebetamo wadewade tanalo bilibilinomo walo ka:kikameomene. Ega:walo lumagigodolo wadewade woki pola:na:no wiyasiya ebete ne-malagidilona, ‘Na wadedawala,’ ebegodolo kebe kapiyakapiya tanalate da:pola:na Godote ebegodone walo ka:kuwatemene.”

*Ya:sukono Menoko Ega:walo Ebene Ekaki*

*Ma:t 12.46-50; Mak 3.31-35*

<sup>19</sup> Ebene Ya:sukono menoko ega:walo ebene ekaki ebetamo da:pelamiya, iba:te ebe uima: ka:modobiya: mabu epo bilibilinomate ebe niyakabolo na:pola:niya. <sup>20</sup> Ebema: lumagi idite Ya:suko naniya, “A:imano menoko ega:walo ekaki iba:te moto niyakabolo ba:pelamota:ona. Ibi ubila a:ma:kumitama:.”

<sup>21</sup> Ebene Ya:sute ibi bilibilinomatamo negiya, “Potele Godokono tabo olowite ebetamo da:tuduwatamene, ebe lumagi naimano menokola ega:walo ebako epo naimano ekakila.”

*Ya:sute Awa Matalukobi Da:midini*

*Ma:t 8.23-27; Mak 4.35-41*

<sup>22</sup> Adimo idilo Ya:sute ebe waloma:tapiago peamo olonate ibi nanaleni, “A paka: apuamo ka:na:iwaliye,” ebema: iba:te paka: a:iwale ebo wagiliminiya. <sup>23</sup> Iba:te eba na:iwalenalo Ya:sute ebe palai pe gulo gito nowatani, ebene kawo awanomote eba maiganalo kawokawo ulono obote pe guamo da:poloniya pete tatalila ololuna. <sup>24</sup> Ebema: iba:te Ya:sutamo pelamenate ebe eba pamutiyanalalo ebo pananiya, “Iyatulamedawa, a ka:elaomalema:!”

Ebe tetelo Ya:sute maiganate awa ega:walo kawokawo ulo kawiya nanaleni, “La: nolodiyobala:!” ebene awate olopoligonate paka:te matalukobi ebo olowini. <sup>25</sup> Ebema: Ya:sute iba:tamo negeni, “La:imano nanitabokobi midi tanalo keleka:?”

Wiyasiya iba:te tola:go anoanonalo ibino taneba magumulo negelaniya, “Me lumagi potelela:ka:? Ebete awa ega:walo ulo danale, iba:te ebene tabamo a:tudila:!”

*Ya:sute Kuba Uliyanagono Dubu Wadekobi Da:midiya*

*Ma:t 8.28-34; Mak 5.1-20*

<sup>26</sup> Ebene Ya:suko ega:walo ebe waloma:tapi iba:te Gelasa duliyoumolono opamo nemaimiya, ebe opote Ga:lili Paka: apulo itanami. <sup>27</sup> Ya:sute damelamo eba nodololo Gelasa duliyoumolodawa kuba uliyanagono dubute eba:go palugiya, ebete tete geyageyanomolo kalikua:no okolinami ega:walo ebe motonomolo kokolinamia:. Nanitabola, ebe opo epono tanalo ma kunula, iba:te maboele nokola damela eba obobolelo iyaiya bobo ebo osiyodilolenakiya iba:te ibino a:elao epo alomoma:, ebene ebe dubute ebe nokola bobo magumulo okolinami. <sup>28</sup> Ebete Ya:suko umite kawonomamo gepatete ebene agowa mabuamo gate tabo madodo eba adipatelo negiya, “Ya:su! A:ma: Ununomo Godokono Gudulata! A:ma:le natamo beda: tanalo na:kosiyodilaemene? Nale a:ma: na:toweomata, natamo kuba wiya akoikanama:la!” <sup>29</sup> Ebete tabo ma kunu giya mabu Ya:sute kuba uliyana kawiya aniya ebegodone ka:nemaigama:. Nanitabola, dopamo tete bilibilinomo epetapilo ebe kuba uliyanate ebe dubu magumulo elawonomoma: eda:nami, ebema: epate ebene agowala kotola auli ala:mo dematuolamolemenakiya, ebete ebe ale iyailinaki kuba uliyanano elawamo bulu opamo ebo alaula:naki.

<sup>30</sup> Ebene Ya:sute ebe nalatediya, “A:imano mailo potelela:ka:?”

Ebete nowamiya, “Naimano mailo Bilibilinomotela,” mabu ebe magumulo kubakuba uliyana bilibilinomate ilukulinamiya. <sup>31</sup> Ebene ebe kubakuba uliyanate Ya:suko na:toweomiya, “A:ma: a Ela Opamo akonali-boala:!”

<sup>32</sup> Ebe tetelo dabirole goeogoeo bilibilinomate damela unulo nala:go ebolo nowapata:lamitiya. Kubakuba uliyanate Ya:suko na:toweomiya iba:te goeogoeo magumamo ka:nopila:oma:, ebene Ya:sute modobo tabo gete ibi ebo analiya, “Na:tolama:la:!” <sup>33</sup> Ebema: kubakuba uliyanate dubugodone nemaimite goeogoeoatamo da:nopila:iya, goeogoeo bilibilinomate damela unune puila:ote maboele damelane da:na:gudiya obamo nololuote gito na:elaiya.

<sup>34</sup> Ebe tetelo goeogoeo ulamepi dubate ebe tanalo umite ibino duliyoumolamo puila:ote, duliyoumolo epo ega:walo tumu motolo dilukulionamiya da:nikiyawaolamiya, <sup>35</sup> epo bilibilinomate ebo pelamiya Ya:sute dosiyodiliya ebe tanalo uima:. Iba:te ebetamo pemaimite kubakuba uliyanate datepiya ebe dubu ebo pumiya, ebete kaliku pulite Ya:sukono agowa mabulo okoliti mabu ebene woki a:tuputupuomiya. Me mabuma: iba:te na:toletoleutiya. <sup>36</sup> Ebene piyate ebe tanalo dumiya ebe epate kubakuba uliyanagono dubute wadekobi keba kunu kolowiyale, ebe tanaloma: epo epetapi ebo kiyawaolamiya. <sup>37</sup> Ebe tetelo ebe Gelasa opo epo bilibilinomate Ya:suko naniya ebete ibino opo atepate ka:toma: mabu iba:te kawonomamo toletoleutiya. Ebema: Ya:sute peamo olote eba tolo, <sup>38</sup> kubakuba uliyanate datepiya ebe dubute ebe na:toweomiya, “Na niyala, a:ma:go ka:pa:mo!”

Wiyasiya Ya:sute ebe eba alibolo naniya, <sup>39</sup> “A:ma: motamo na:toa. Godote a:ma:tamo kebe tanalo kosiyodilola:kale, a:imano duliyoumolo epo ebe iyaiya tanalo na:nikiyawaolama:.”

Ebene me dubute ebene duliyoumolamo tote, Ya:sute ebetamo dosiyodiloliya ebete ebe tanalo bilibilinomo epatamo ebo na:kiyawaiya.

*Ya:ilasite Ya:suko Da:toweomiya Ebene Buwele Wadekobi Ka:midima:  
Ma:t 9.18; Mak 5.21-23*

<sup>40</sup> Ya:sute paka: apune walo da:ka:pa:iwiya, ebe tetelo epo bilibilinomate nekalakalaiya mabu iba:te ebene pe tanalo makopelitiya. <sup>41</sup> Ebene Yu epono balidi ibilamole moto umidawa dubute Ya:sutamo piya, ebene mailo

Ya:ilasitela. Ebete Ya:sukono agowa mabuamo pa:tuduwatate ebe ebo petoweomiya ebete ebena motamo ka:toma. <sup>42</sup> mabu ebena kapiyanomo 12 ulama tete buwele ebete a:e tatalila.

*Kalima Ka:ka:liya Temetema:go Kamiyaletete Ya:sukono Kaliku Dologiya  
Ma:t 9.19-22; Mak 5.24-34*

Ebene Ya:sute Ya:ilasikono motamo to dowagilimiya, epo bilibilinomate ebe eba a:wa:midalo mupuma:tiua:go tolamitiya. <sup>43</sup> Ibi magumulo kamiyaletete idi 12 ulama tetelo kalima ka:ka:liya temetemetete uminami, ebete ebena mani bilibilinomo doketa dubatamo eba ikalamelolo ebo opoliyaliya, wiyasiya iba:te ebe wadekobi ka:midia:ya. <sup>44</sup> Ebene me kamiyaletete Ya:sukono walogabo apune pete ebena kaliku da:pologiya, ebe tetenomolo ebena kalima ka:ka:liya temetemetete ebegodone gito olopoligiya. <sup>45</sup> Ebene Ya:sute negiya, “Na potele kologinile?”

Epo bilibilinomate iyatawa:noma: eba gelalo Pitate ebe naniya, “Wade Iyatulamedawa, epo bilibilinomate a:ma: eba a:wa:midalo mupuma:tiua:go pelamita.”

<sup>46</sup> Ya:sute negiya, “Lumagi idite na ologini mabu elawote nagodone da:nemaiga, na ebo iyatawamo.”

<sup>47</sup> Ebene ebe kamiyaletete beda: tanalo kosiyodiliyale wamina gabo kumiya:, ebema: ebete anakamiago Ya:sukono agowa mabuamo pa:tuduwatate epo bilibilinomono ololo apulo ebena tanalo ebo awokalimiya. Ebete Ya:suko beda: mabuma: ka:pologiyale ega:walo temetemetete ebe tetenomolo ebegodone dolopoligiya, ebete ebe tanalo bilibilinomo Ya:sutamo ebo kiyawaiya. <sup>48</sup> Ebene Ya:sute ebetamo negiya, “Kamiyaletete, a:imano nanitabokobi midi tanalote a:ma: wadekobi a:mida:ta. A:ma: kalakalago na:toa.”

*Ya:sute Ya:ilasikono Buwele A:ene Dadipatiya  
Ma:t 9.23-26; Mak 5.35-43*

<sup>49</sup> Ya:sute me tabo eba kiyawautalo Yu watodawa Ya:ilasikono motone tabo adaedawa idite pete Ya:ilasiko napaniya, “A:imano gudu buwele a:e. Iyatulamedawa walo akoanala: ebe wadekobi ka:pa:midima:.”

<sup>50</sup> Wiyasiya Ya:sute ebe tabo olowite Ya:ilasitamo negiya, “A:ma: akotoleto:la:la: A:ma: Godoko nanitabokobi na:mida:, ebena a:imano buwelete wadekobi kolowimene.”

<sup>51</sup> Ebene Ya:sute Ya:ilasikono motamo pemaigate epo epetapiate moto guamo odoloma: ibi nodiyoboliya, wiyasiya Pitako, Yoneko, Ya:imesiko, ega:walo buweleno nabiwila menokola, eba:go mibinomate nopila:iya. <sup>52</sup> Ebe tetelo moto gulo da:pola:niya ebe epo bilibilinomate buwele liyami-tiya, ebema: Ya:sute ibi nanaliya, “La: kiimitala: Gudu buwele ka:eaka:, ebe u watita!” <sup>53</sup> Wiyasiya iba:te iyatawaiya gudute a:enomo a:iya, ebema: iba:te Ya:suko nekalakalatiya.

<sup>54</sup> Ebene Ya:sute tote buwele kotamo nelawete ebe eba ka:milo negiya, “Gudu, a:ma: nemaiga!” <sup>55</sup> Ebema: ebena igilote ebetamo walo da:ka:piya ebe tetenomolo ebete na:kemaigiya, ebena Ya:sute ebena menokola nabiwila nanaliya iba:te ebetamo bae kikameoma:. <sup>56</sup> Ebe mabuma: iba:te nanoanoutiya wiyasiya Ya:sute ibi eba analolo negiya, “La: me tanaloma: epo epetapi akoanala:la:.”

## 9

*Ya:sute 12 Waloma:tapi Dubu Daliboliya  
Ma:t 10.5-15; Mak 6.7-13*



<sup>1</sup> Ebe tetelo Ya:sute ebena 12 waloma:tapi dubu ebetamo ka:la:mite iba:tamo elawo ebo ikalamiya epagodone kubakuba uliyana kanalibolema: ega:walo iyaiya temetema:gopi wadekobi ka:nimidiolema:. <sup>2</sup> Ebene ebete ibi naliboliya Godote Kawo Elawodawama: deda:na iba:te ebe tanalo epatamo ka:na:kiyawaoma: ega:walo iba:te temetema:gopi wadekobi ka:na:midiolema:. <sup>3</sup> Ebete iba:tamo negiya, “La:imano tolame tetelo la:le gaubu, ega:walo mani alomono gatele, ega:walo bae, ega:walo mani, me inamabu akouwata:la:. Ega:walo la: kapiyakapiya inamabu na:pupuliyala:, epetapi akouwata:la:. <sup>4</sup> Ebene la: duliynomolo ida:mo nemaimiawete kebe motamo da:nodoloaema, la: ebolo nilukula:tepawete walone ebe motone opo ida:mo ka:ka:tolaemamota, iyo, la: moto idine moto ida:mo eba kunu akonowagela:la:. <sup>5</sup> Ega:walo kebe duliynomolo epate la: uwateta:no, ebe duliynomolo eba atepalo la:le agowano tuwae na:moda:midatepaliyala:. Me tanalote ebe epo kiyatulaemene, Godokono tete ebe na:pe ebete ibino tanalo kapanagiyamidalaemene.”

<sup>6</sup> Ebema: Ya:suko waloma:tapiate duliynomolo bilibilinomamo tolamete Godokono Wade Tabo epatamo eba na:kiyawaolo iyaiya temetema:gopi wadekobi ebo na:midoliya.

*Epo Bilibilinomate Ya:sukono Tanaloma: Degelanakiya*  
*Ma:t 14.1-2; Mak 6.14-16*

<sup>7</sup> Ebe tetelo Ga:lili opolo Elodite Kawo Elawodubuma: eda:nami. Ebene Ya:sute kebe tanalo bilibilinomo kosiyodilolenakile Elodite ebe tanalo olowiote woki bilibilima: ebo ediya, mabu epetapiate negeliya, “Yoneko epo obamo waduba:midaoledawate a:e magumune emaigi!” <sup>8</sup> Ebene epetapiate negeliya, “Ya:suko ebe Elayate, Godokono woki awokalimidawala, ebete atamo walo a:ka:pemaigi,” wiyasiya epetapiate na:kegeliya, “Ao, ebe Godokono woki awokalimidawa idila. Aimano ewoniatamo dopamo da:pemaimiya, ibino taneba magumulo idawate a:e magumune emaigi.”

<sup>9</sup> Ebene Elodite negiya, “Na Yonekono wato otowamidaimo, wiyasiya me dubu potelela:ka: nale ebena osiyodilole tanalo dolowionamo?” ebema: tete geyageyalo ebe ubila Ya:suko kuima:.

*Ya:sute Epo Bilibilinomatamo Bae Dikalamoleni*  
*Ma:t 14.13-21; Mak 6.30-44; Yon 6.1-14*

<sup>10</sup> Ya:sute daliboliya ebe waloma:tapi dubate ebetamo walo ka:pelamete iba:te kebe tanalo bilibilinomo ka:nosiyodiloliye ebe ebo pa:kiyawaomiya, ebena ebete epo epetapi miyapate ebe waloma:tapinomo uwatete iba:te Betasaida duliynomolamo gito tolamiya. <sup>11</sup> Ebema: epo bilibilinomate Ya:sukono to tanalo olowite ebena walogabone na:ka:tolamoliya, ebena ebete ibi kalakalago uwatete Godote Kawo Elawodawama: deda:na ebe tanalo ibi ebo iyatulamiya, ega:walo atu tetelo ebete ibino temetema:gopi wadekobi ebo ka:midoliya.

<sup>12</sup> Egelate eba niwisiganalo Ya:sukono 12 waloma:tapiate pelamenate ebe ebo pananiya, “A:ma: epo nalibola:, iba:te iyaiya duliynomolamo ega:walo tumu motamo tolamoete bae ega:walo lao bai ka:nulaema:, mabu me epoa: baila.”

<sup>13</sup> Wiyasiya Ya:sute iba:tamo negeni, “Ao, la:le iba:tamo nao inamabu nikalamola:la:.”

Iba:te nowaiminiya, “Agodolo paibu bae ega:walo namo netewa ebena mate pola:na. Ebema: a:ma: ubila:ka: ale tolamete aimano maniamo ibino bae ka:nuwateolaema:?” <sup>14</sup> Iba:te ma kunu gelaniya mabu 5,000 dubate ebolo pola:niya.

Ebene Ya:sute ebe waloma:tapi nanaleni, “La:le epo iyaiya taneba osiyodilote opamo kilukulioma: nanaliyala:, iba:te taneba idilo 50, taneba idilo 50, ma kunu nilukulioma:na:.”

<sup>15</sup> Ya:suko waloma:tapiate ebe tabo olowinate eba kunu osiyodiloniya, ebene epo bilibilinomate ibino tanebalo opamo gito ilukulioniya. <sup>16</sup> Ebene Ya:sute paibu bae ega:walo namo netewa uwatenate, Unu Duliyomolamo melelo Godotamo kalakala tabo genate ebe bae namago wakalamiolenate ebe waloma:tapiatamo gito ikalameni iba:te epatamo kikalamolena:na:. <sup>17</sup> Ebe tetelo epo bilibilinomate bae denaoniya ibino bae kape tanalo ebo olopoligolamene, ebene Ya:suko waloma:tapiate da:luliniya ebe bae apuapamo 12 bagowo ebe owiyaoleniya.

*Pitate Ya:sukono Nanitabo Tanalo Dawokalimiya*

*Ma:t 16.13-19; Mak 8.27-29*

<sup>18</sup> Egela idilo Ya:suko a:ka:tuwa: diyamo: opolo Godago tabo eba gelitalo ebene waloma:tapiate ebetamo ebo pemaimiya. Ebene ebete ibi nalateda:liya, “Epate na poma: kegelanake?”

<sup>19</sup> Iba:te negeliya, “Epetapiate a:ma: Yoneko obamo waduba:midaoledawama: gelanaka, epetapiate Elayako Godokono woki awokalimidawama: gelanaka, ega:walo epetapiate a:ma: Godokono woki awokalimipiate dopamo aimano ewoniatamo da:pemaimiya, ibi magumulo idawate a:ene nemaigamu gelanaka.”

<sup>20</sup> Ebene Ya:sute ibi nalateda:liya, “Wiyasiya la:le na poma:ka:midina:wenama?”

Pitate ebetamo nowamiya, “A:ma: Kelisotela, Godokono Alibodawalata!”

<sup>21</sup> Ebene Ya:sute ibi kawiya eba analelo negiya, “La: naimano tanaloma: epetapi akokiyawaolama:la:!”

*Ya:sute Ebene A:e Tanaloma: Dopamo Degiya*

*Ma:t 16.21-28; Mak 8.31-9.1*

<sup>22</sup> Ebene ebete tabo moga:melo negiya, “Epono Naniwi epagodone kawokawo temeteme walone kuwatemene, Godokono ubila. Iyo, Godotamo kalimagono ikameopino watowatopi, ega:walo Godokono Totomu iyatulamepi, ega:walo kawokawo dubu epetapi iba:te ebe ubia:noma: keda:oma:na:, ebene epate ebe kanakapuima:na:, wiyasiya netewa-kapiya egelalo ebete a:ene walo ka:kemaigamene.”

<sup>23</sup> Ebene ebete ibi bilibilinomatamo negiya, “Kebe lumagite na waloma:enema: ubi diyatimene, dopamo ebete ebene tanalo dodolomatilite, ebene egela bilibilinomolo ebete ebene kewa olotolowa agute na ebo nowaloma:enemene. <sup>24</sup> Nanitabola, kebe lumagite ebene igilo nagodone damoeda:mene ebene igilote kalatidimene, wiyasiya kebe lumagite ebene igilo na mabuma: datutimene ebete nanitabo igilo kelaemene. <sup>25</sup> Ebema: lumagite me opono inamabu bilibilinomo uwatenomo eba uwatelo ebene igilo datutimene ebene wiya keleka:? Godote lumagigodone ebene igilo delaemene ebegodolo beda: wade tanalote na:kitanamene? <sup>26</sup> Ebema: numa:la:, kebe lumagite natamo ega:walo naimano taboma: dilipomene, na Epono Naniwite atumu ebetamo kilipomamo, iyo, nale naimano alago da:pemo, ebe tetelo Nabiwi Godoko ega:walo ebene wade-talena nopopi ibino elawo alonomago pete ebe ka:pilipoimamo. <sup>27</sup> Na la:tamo nani tabo gemo, me tetelo dilukuliona ibi epetapiate Godote Kawo Elawodawama: deda:na, ebe kawo tanalo dopamo umite walone ebo ka:elaoma:na:.”

*Godokono Elawo Alonomote Ya:sukono Ape Da:pukuimiya  
Ma:t 17.1-8; Mak 9.2-8*

<sup>28</sup> Kapiya wuiki idi dolopoligiya ebe tetelo Ya:sute Pitako, Ya:imesiko, ega:walo Yoneko uwatete unu damela ida:mo magataliya, ebete ebolo Godago tabo ka:negelama: <sup>29</sup> Ebene ebe a:ka:tuwa: Godago tabo eba gelitalo, ebenu ololo iyama: ebo ediya ega:walo ebenu pupuliono inamabute keyakeyaibinomoma: eba eda:omelo ebo pukuilamiya. <sup>30</sup> Ebe tetenomolo dubu netewa Elayako ega:walo Moseseko, iba:te pemaimite Ya:suago tabo gelitiya. <sup>31</sup> Iyo, ibi netewapiate Godokono Unu Duliyomolono alago pemaimite eba:go tabo ma kunu gelitiya, Ya:sute Godokono nopo epatamo kawokalima: ebete Yelusalema kawo duliyomololo ka:emene. <sup>32</sup> Pitako ega:walo ebenu namutupi netewa iba:te u eba lautalo me anoano tanalo ebo pemaigiya, ebenu iba:te ibino balidi paeamidaote Ya:sukono alo ega:walo dubu netewa eba:go delamota:niya ebo ulamiya. <sup>33</sup> Ebene dubu netewate Ya:sugodone eba tutalo, Pitate ebe naniya, “Wade Iyatulamedawa, a malo da:pola:nama:, kalakala kawonomola. Modobola, a nupunupu netewa-kapiya ketemotemalema:, idi a:imanola, idi Mosesekonola, idi Elayakonola.” Pitate kimalagidiloa:no me tabo ebema: giya.

<sup>34</sup> Pitate tabo eba kiyawautalo temate pete ibi gito panalopamidaliya, ebema: iba:te na:toletoleutiya. <sup>35</sup> Ebene tema magumune tabote ma kunu pemaigiya, “Me naimano Gudula, nale ebe dopamo eka:miyamo! La: ebenu tabo nolowiala!” <sup>36</sup> Ebe tabote dolopoligiya iba:te Ya:suko kapiya umiya, ebenu tete geyageyadopolo ebe waloma:tapiate kebe tanalo kumiye iba:te epo epetapi kanaliya:

*Ya:sute Kuba Uliyanagono Koi Wadekobi Da:midia  
Ma:t 17.14-21; Mak 9.14-27*

<sup>37</sup> Ebe egela idilo iba:te unu damelane da:piwitiya epo bilibilinomate pelamete Ya:suago gito palugiya. <sup>38</sup> Ebene ibi magumulo kapiya dubute kawonomamo ebo gepatiya, “Iyatulamedawa, naimano guduno tanaloma: a:ma: toweoemata mabu ebe naimano kapiya gudunomola! <sup>39</sup> Kuba uliyanate geatepago ebe delawenako, gudute opamo deganako ebenu apete kodakodanomoma: eda:menako ebenu ebenu tabone pakote pemaiminako, ega:walo ebe lawe tetelo kuba uliyanate naimano gudu samamo katepanakoa:!” <sup>40</sup> Ebema: nale a:ma: waloma:tapi a:toweolama:kamo iba:te kuba uliyana kaliboma:, wiyasiya iba:godolo elawo puliyala.”

<sup>41</sup> Ya:sute wiyasiya ibi bilibilinomatamo negiya, “Eiye, la: nanitabokobi midia: kubakuba epolata! La: natamo mibo ikanamenamata, ebema: na ubia:nola tete geyageyalo la:go okolinama:!” Ebene ebete dubutamo negiya, “A:imano gudu mamu nemaga:.”

<sup>42</sup> Ebe tetelo koite eba penapelo kuba uliyanate ebe lawete opamo gito ba:idiliya, ebenu koite kubanomamo ebo wageleiya. Ebene Ya:sute kuba uliyana kawiya daniya, ebe tetelo koite wadekobi olowite Ya:sute ebe ebenu nabiwitamo gito ikamiya, <sup>43</sup> ebema: ebe tanalo dumiya ebe epo bilibilinomate Godokono kawo elawo tanaloma: nanoanoutiya.

*Ya:sute Ebenu A:e Tanaloma: Walo Da:kegiya  
Ma:t 17.22-23; Mak 9.30-32*

Ebema: epate Ya:sukono osiyodilole tanalo bilibilinomoma: eba anoanoutalo, ebe tetelo Ya:sute ebe waloma:tapiatamo negiya, <sup>44</sup> “Nale me tetelo la:tamo da:kiyawaomo, ebe tabo wadenomamo olowiawete akododomatjala: — Godote Epono Naniwi kubakuba epono kotamo kiyatimene.” <sup>45</sup> Ebe tetelo iba:te ebe tabono magumu wadenomamo

kemalagidiliya: mabu wamina magumulo itanami, wiyasiya iba:te iyatawa:noma: eba eda:olo me tabono magumu tanaloma: Ya:suko anama: na:toletoleutiya.

*Kawodawama: Potele Na:keda:mene*

*Ma:t 18.1-5; Mak 9.33-37*

<sup>46</sup> Ebene waloma:tapiate ibino taneba magumulo potele kawoma: eda:ma: apamiteutiya. <sup>47</sup> Iba:te ibino tepo magumulo demalagidilutiya Ya:sute ebe tanalo iyatawiya, ebema: ebete gudu lawete ebe balamo eba adipilo <sup>48</sup> iba:tamo negiya, “Kebe lumagite naimano mailamo mako gudu da:peso kalakalago dowalubina ebete na walubinina, ega:walo kebe lumagite na dowalubinina, ebete na kapiya kowalubinina:, ebete na Alibonedawa Godoko atumu na:kowalubina. Ebema: la:imano taneba magumulo potele da:pesodawanomoma: deda:mene ebe dawate kawonomoma: keda:mene.”

*La:go Gowelaoa:dawa Ebe La: Walubilidawama: Eda:na*

*Mak 9.38-40*

<sup>49</sup> Ebene Yonete negiya, “Wade Iyatulamedawa, ale dubu idi uima: ebete a:imano mailamo kubakuba uliyana daliboliti, wiyasiya ale ebe kawiya anima: ebe tanalo katepama: mabu ebe aimano taneba lumagia:.”

<sup>50</sup> Wiyasiya Ya:sute iba:tamo negiya, “La:le ebe ako-odiyobala:, mabu kebe lumagite la:go gowelaoa:dawama: deda:na, ebete la: walubilinata.”

*Samaliya Opo Epate Ya:suko Ubia:noma: Deda:iya*

<sup>51</sup> Ebene Ya:sute Godokono Unu Duliyomolamo nodolo tete detataliya, ebete ebe tanalo iyatawate ebenu woki kawonomamo ebo iyatiya Yelusalema kawo duliyomolamo ka:toma:. <sup>52</sup> Ebene gabo tetelo ebete Samaliya opono duliyomolo ida:mo nopo atapi dopamo aliboliya, iba:te ebolo ebenu wata bai ega:walo bae ka:nosiyodilolema:. <sup>53</sup> Wiyasiya ebe duliyomolo epate iyatawaiya Ya:sute Yelusalemamo tolame gabodo da:tuti, ebema: iba:te ebetamo ubia: tabo geliya.\* <sup>54</sup> Ebene Ya:imesiko ega:walo Yoneko, iba:te me tanalo umite negeliya, “Kawodawa, modobola:ka: a Godoko kanama: ebete Unu Duliyomolone ela palibote ibi ka:kubailaema:?”

<sup>55</sup> Wiyasiya Ya:sute ibi netewapiatamo olobigate ibi kawonomamo eba analelo iba:tamo negiya, “Mabu keleka: la:le na kuba wokiamo danana:ema? Mabu la:imano tepo magumuno woki ega:walo naimano tepo magumuno woki iyaiya ba:pola:na! <sup>56</sup> Na Epono Naniwite epo kubailaema: ka:piya:, wiyasiya nale ibino igilo mula:lelaema: piyamo.”† Ebete ebe tabo gete, iba:te duliyomolo ida:mo laoma: gito tolamiya.

*Woki Netewago Ya:suko Waloma:ta Modoboa:*

*Ma:t 8.19-22*

<sup>57</sup> Iba:te eba tolamitalo dubu idite Ya:sutamoma negiya, “A:ma: keba apuamo da:toaemene, nale a:ma: ebamo kowaloma:tamota.”

\* **9:53:** Buka ka:la:mioledawa, modobola a:ma: me tanalo niyatawa. Yu epo ega:walo Samaliya opo epono tanalo ma kunula, iba:te gelebadilo kilukulinamia:. Me taneba netewano ewonino mabu kapiyala, ebe A:ibalayamatela, ebema: dopamo tetelo iba:te kapiya epoma: eda:onamiya. Walone tetelo kapela epate iba:go eba ilukulilo, Samaliya opo epate ibino buwelemele ebe kapela epatamo ebo ikalamoliya, wiyasiya Yu epate eba kunu kowageliya:. Ebe mabuma: Yu epate Samaliya opo epo kubakubapima: ka:la:minakiya, Samaliya opo epate atumu Yu epatamo ubia: tanalo kawokaliminakiya. Ma kunu Ya:suko tetelo me taneba netewagodolo kalakala tanalote kitanamia:, iba:te gito dowateuinamiya. † **9:56:** Luk 9.55b-56a buka apuno tabo Lukute bukama kakuloliya:, wiyasiya ebenu buka osiyodilo walogabo apune nanitabokobi mididawa idite akuloliya.

<sup>58</sup> Wiyasiya Ya:sute ebetamo negiya, “Iyaiya, a:ma: dopamo me tanalo idi wadenomamo nemalagidila. Tumu gaagaano lao bai damela gugu ba:pola:lamena ega:walo olaolate ibino moto etemoteonaka, wiyasiya na Epono Naniwi, naimano wata bai puliyala.”

<sup>59</sup> Ebene Ya:sute dubu iditamo negiya, “A:ma: na nowaloma:ena:.”

Ebete wiyasiya Ya:sutamo negiya, “Kawodawa, modobola na dopamo tote, naimano kadele nabiwite da:emene, nale ebena ape bobamo niyatite na walone a:ma: kowaloma:emamota.”

<sup>60</sup> Ya:sute ebetamo nowamiya, “Modobola a:elao epate ibi a:ka:tuwa: ibino a:elaopi bobamo nalomoma:na:, wiyasiya a:ma: toawete Godote Kawo Elawodawama: deda:na ebe tanalono tabo epatamo na:nikiyawaonakiye.”

<sup>61</sup> Ebene dubu idite negiya, “Kawodawa, na ubila a:ma: kowaloma:etama:, wiyasiya modobola na dopamo tote naimano moto epatamo yawo tabo ka:negemamo.”

<sup>62</sup> Wiyasiya Ya:sute ebetamo negiya, “Kebe lumagite damela maboeleno inamabuamo pali woko eba wagilimilo, duliyoumolono iyaiya tanalo malagidilote wokone walo da:kolobigamene, ebako lumagite Kawo Elawodawa Godokono woko osiyodiloma: a:ka:modobomene.”

## 10

### *Ya:sute 72 Waloma:tapi Godokono Tabo Kiyawaoma: Daliboliya*

<sup>1</sup> Me tabo dolopoligiya ebe tetelo Kawodawa Ya:sute 72 waloma:tapi epetapi uwatete epetapi netewa, epetapi netewa, ma kunu dopamo aliboliya, ebete da:tomene ebe duliyoumolo bilibilinomamo. <sup>2</sup> Ebete iba:tamo negiya, “Godokono pali magumulo kono bilibilinomo a:kodakodaiya, wiyasiya wakalami wokopi bilibilia:, ebema: la: pali namutudawatamo towetowe tabo negelala:, ebete wokopi epetapi pali magumamo kapalibolemene wadewade naono kono ka:powakalamima:.” <sup>3</sup> Ebema: la: na:tolama:la:! La: sipi-goeogoeo egege keba kunula:ka: eba kunula, nale la: elawoelawo gaagaano taneba magumamo alibolemata. <sup>4</sup> La: mani alomono gatele akouwata:la:, ega:walo la: bae alomono ikuwa ega:walo agowa pata akouwata:la:. Ega:walo la: gabo tetelo lumagi ida:go danalugaema eba:go tabo eba negelalo la:imano woko tete akonikubaima:la:.

<sup>5</sup> “Ebena la: kebe motamo da:nodoloaema, modobola la: ebe moto epatamo nilakapo tabo na:negeliyala: ma kunu, ‘Godokono kalakalate la:imano motolo nitanamene.’” <sup>6</sup> Ebema: Godokono gelebadi lumagite ebolo dokolina, Godokono kalakalate ebegodolo nanitabolo kitanamene, wiyasiya ebako lumagite ebe motolo okolita:no, la: nilakapo tabo degelaema ebe tabono nanitabo tanalote ebolo a:kitanamene. <sup>7</sup> La: ebe moto kapiyalo na:nilukuliniyala:, ebena iba:te la:tamo dikalamoletamene ebe bae nawete ibino obo atumu na:ka:niyala:, mabu la: wokopiate ebako wiya laema: modobola, ega:walo duliyoumolo ida:mo tolame tete pemaiga:no la: moto idine moto ida:mo eba kunu akonowagela:la:. <sup>8</sup> Iyo, la:le duliyoumolo ida:mo tolama:wete iba:te la: kalakalago duwatetamene, ebe tetelo iba:te kebe nao inamabu la:tamo dikalametamene kalakalago nenaiyala:. <sup>9</sup> Ega:walo ebe duliyoumololo dilukulina la: ebe temetema:gopi wadekobi midiola:wete duliyoumolo epo bilibilinomatamo ma kunu negeliyala:, ‘Godote Kawo Elawodawama: deda:na ebe tanalote la:tamo etatali.’” <sup>10</sup> Wiyasiya la: duliyoumolo ida:mo nemaima:wete iba:te la: kalakalago uwateta:no, la: ebe duliyoumolo tulitulinomolo eba lamota:onalo ibi bilibilinomatamo ma kunu negeliyala:, <sup>11</sup> ‘La:imano duliyoumolono damela tuwae aimano agowane



na:moda:midatepaolema:, mabu me tanalote la: iyatulamitata Godokono tete ebe na:pe ebete la:imano tanalo kapanagilamelelametama:. Ebema: me kawo tanalo akododomatiala:, Godokono Kawo Elawodawano tete la:tamo etatali! ”

<sup>12</sup> Ebene Ya:sute ebe waloma:tapiatamo negiya, “Na la:tamo nani tabo gemo, Godote epono tanalo danagilamelelaemene, ebe Kawo Egelalo ebete me duliynomolo epatamo kuba wiya kawonomamo kikalaemene. Ebe tetelo ebete Sodomo duliynomolo epatamo kuba wiya eba ikalamelo nilakapo kela:mo kawokalimene, wiyasiya nanitabola, ebete nilakapo a:kiyatimene me kuba epatamo!”

*Nanitabokobi Midia: Duliynomolo Epono Tanalo*

*Ma:t 11.20-24*

<sup>13</sup> Ebene Ya:sute walo na:kegiya, “Kolasini duliynomolo, a:ma: kuba wiya kawonomo kelaema:ta! Betasaida duliynomolo, a:ma: ebe atumu! Mabu nale la:godolo anoano tanalo dosiyodilolimo, la: ebe tetelo la:imano kubane kolobila:wea:. Wiyasiya nale ebakobako woko Taya duliynomololo ega:walo Saidono duliynomololo dopamo nosiyodiloliyataleka:, ebe Yua: epate ibino kubakuba woki iyakobi ba:midiliyana:. Iyo, iba:te ibino kuba osiyodilole mabuma: tepo temetemema: eda:ote ebe temeteme kawokalima: kubakuba kaliku pupuliole ono tuwaeamo gito bilukuliyana: <sup>14</sup> Ebema: Godote epono tanalo danagilamelelaemene, ebe Kawo Egelalo ebete Taya duliynomolo epatamo ega:walo Saidono duliynomolo epatamo kuba wiya eba ikalamelo nilakapo kela:mo kawokalimene, wiyasiya nanitabola, Kolasini duliynomolo ega:walo Betasaida duliynomolo, ebete la:tamo nilakapo a:kiyatimene!

<sup>15</sup> Ega:walo Kapeniyama duliynomolo, a:imano tanalo ma kunula. A:ma: ubila a:ma: a:ka:tuwa: a:ma: Godokono Unu Duliynomolamo kadipata:ema:, wiyasiya Godote a:ma: Ela Opamo keba:idiloma:ta!”

<sup>16</sup> Ebene Ya:sute tabo moga:melo ebe waloma:tapiatamo negiya, “Kebe lumagite la:imano tabo dolowimene ebete ebe tanalo magumulo naimano tabo kolowimene, wiyasiya kebe lumagite la: ubia:noma: deda:mene ebete ebe tanalo magumulo na ubia:noma: keda:mene, ega:walo kebe lumagite na ubia:noma: deda:mene ebete na kapiya ubia:noma: a:keda:mene, ebete na Alibonedawa Godoko atumu ubia:noma: ka:keda:mene.”

*Ya:sukono 72 Dubate Ebetamo Da:kolowamiya*

<sup>17</sup> Ebene Ya:sute daliboliya ebe 72 dubate tolamete iyaiya duliynomololo woko nosiyodilote, iba:te da:kolowamiya kawo kalakalanomago ebetamo na:pegeliya, “Kawodawa, ale kubakuba uliyana a:imano mailamo kawiya dananalima: iba:te aimano tabamo tudila:ote epagodone a:nemaimiya!”

<sup>18</sup> Ya:sute iba:tamo eba wiyalo negiya, “Nanitabola, Godote Saitanako elawoa:kobi midite Unu Duliynomolone da:peba:idili nale uimo, iyo, molete keba kunu ka:la:uwa:midanakole ebete opamo samonomamo eba kunu pegi. <sup>19</sup> La: wadenomamo nolowiala:! Na elawo la:tamo ikalaimata la:le kalu ega:walo gopowaidubu la:imano agowamo ka:mikitaola:wenakoma:, ebe elawote la:imano gowelaodawa Saitanakono elawo nodoliona, ebema: inamabu idite la: a:ka:kubailametamene. <sup>20</sup> Ega:walo me tanalo idila. Kuba uliyanate la:imano tabamo da:tudila:onaka ebe mabuma: akokalakalala:, wiyasiya Godote la:imano mailo ebena Unu Duliynomolono Bukamo daku:lolelametiyala la: ebe mabuma: nekalakalala:.”

*Ya:sute Godotamo Kalakala Tabo Dadipatiya*

*Ma:t 11.25-27; 13.16-17*

<sup>21</sup> Ebe tetelo Godokono Uliyanate Ya:sukono tepo magumulo detabokiya ebete Godotamo kalakalago negiya, “Aba, a:ma: me opo kawonomo ega:walo Unu Duliyomolo Namutudawama: eda:nata! Na a:ma:tamo kalakala tabo gemo, mabu a:ma: me opono kawokawo iyatawaopi dubatamo a:imano mulo woki eba waminaolelo iyatawa: epatamo awokalilamiata. Aba, nanitabola, me tanalote a:imano ubilo pemaigi.”

<sup>22</sup> Ebene Ya:sute epatamo negiya, “Naimano Nabiwi Godote tanalo bilibilinomo naimano kotamo alomiya nale kulamenama:, ebema: ebete a:ka:tuwa: iyatawala na ebenu Guduno tanalo, lumagi idite iyatawa:. Ega:walo Nabiwino tanalo atumu, lumagi idite iyatawa: wiyasiya na ebenu Gudute a:ka:tuwa: iyatawala, ega:walo nale piyatamo awokalima: ubi diyatimo, ibinomate atumu Nabiwino tanalo ka:kiyatawaoma:na:.”

<sup>23</sup> Ebene Ya:sute ebenu waloma:tapiatamo polobigate tabo diya ebo analiya, “Godokono kalakala kawonomo la:godolo bitana, mabu la: la:imano balida:mo ebenu iyaiya tanalo wadenomamo nulamenamata!  
<sup>24</sup> Ebema: nale la: analemata, dopamo tetelo Godokono woki awokalimipi ega:walo kawokawo elawodubu iba:te ubi kawonomo iyatinamiya la:le dulama:wenama ebe kawokawo tanalo ulaema:, wiyasiya iba:te ka:modobiya:, ega:walo ibi ubila la:le dolowiawenama ebe tanalo kolowioma:, wiyasiya iba:te ka:modobiya:.”

### *Samaliya Opo Dubuno Nilakapo Tanalono Oi*

<sup>25</sup> Ebene Godokono Totomu iyatulamedawa idi ubila Ya:sukono mulo tanalo ka:puima:, da: nanitabola: o da: nanitaboa:, ebema: ebete pete ebetamo na:pegiya, “Iyatulamedawa, na beda: tanalo osiyodilote uwomua: igilo ebo na:kelaemo?”

<sup>26</sup> Ya:sute ebenu tabo eba wiyalo negiya, “Godote Bukamo ebenu Totomu Tabo dakuloliya, ebe tanalate a keba kunu kiyatuamenale? Ebe iyaiya tanalono magumu keba kunula:ka:?”

<sup>27</sup> Ebe dubute nowamiya, “Godokono Bukate ma kunu gena, ‘A:ma: a:imano Kawodawa Godoko nilakapolo nemalagidilona, a:imano tepo magumunomamo ega:walo a:imano uliyanano elawamo, a:imano elawo kawonomamo ega:walo a:imano woki kawonomamo,’ ega:walo totomu tabo idi ma kunu bitana, ‘A:ma: a:ka:tuwa: a:ma: demalagidilawena, modobola a:ma:le eba kunu a:ma: niyakabolo dokolina ebe lumagi nilakapolo nemalagidilona.’ ”

<sup>28</sup> Ebene Ya:sute ebetamo negiya, “A:ma: nani tabo geata. A:ma: me tanalo osiyodilawete ebo bigilonama:ta.”

<sup>29</sup> Ebe dubute Ya:sukono taboma: ilipote wiyasiya ebenu ilipo waminalo ma kunu giya, “Na niyakabolo dokolina, ebe lumagi potelela:ka:? Na poka na:kowalubinamo?”

<sup>30</sup> Ya:sute ebenu tabo eba wiyalo negiya, “Dubu idite Yelusalema kawo duliyomolone Yeliko duliyomolamo eba niwisigitalo pilo dubate ebe lawete ebenu pupuliono inamabu pupukulamelemete ebe ebo anagalimiya. Ebene ebenu elawote dolopoligi iba:te ebe ebamo atepapate gito tolamiya. <sup>31</sup> Ebe tetelo Godotamo kalimagono ikameodawate ebe gabodo eba pitalo ebe

pumite niyakabodo gito nodoliatepi. <sup>32</sup> Ebene Libai gudawate\* ka:pete atumu ka:powageli. Dubute dekapitani ebete ebamo pemaigate ebe ebo pumi, wiyasiya ebete walubi ebetamo ka:piyatia:, gito ka:nodoliatepi.

<sup>33</sup> “Ebene ebe gabodo da:piti, dubu idi ebe Yu lumagia:, ebe Samaliya opo dubula,† ebete ebamo pemaigate ebe dubu da:pumi ebenu tepo magumulo nilakapo kawonomo piyati. <sup>34</sup> Ebete ebetamo pete olibi kikopuno ii ega:walo wade mulamula ebenu bugomamo abutilamelemete kaliku apuapuamo gito matuolamolemi. Ebene ebete ebe dubu ebenu donoki-goeo unamo adipite duliyoumolo ida:mo ebo magati, ebe duliyoumololo kapela epate delaonaka ebete ebe motolo ebe dubu wadenomamo nowalubi. <sup>35</sup> Egela idilo Samaliya opo dubute netewa mani moto namutudawatamo eba ikamelo negi, ‘A:ma: me dubu wadenomamo nowalubinatiye. Me manite modoboa:no, nale walo da:ka:pemo a:ma:tamo walo ka:ka:pa:wiyamo.’ ”

<sup>36</sup> Ebene Ya:sute tabo moga:melo Godokono Totomu iyatulamedawatamo negiya, “A:imano woki keba kunula:ka? Pilo dubate danagalimiya ebe dubutamo netewa-kapiyate da:pelamiya, ibi magumulo potele ebe walubidawama: ka:pedile? Ega:walo ebe niyakabolo dokolina ebako lumagimu potele ka:pedile ebetamo nilakapo kawokalima:?”

<sup>37</sup> Ebene Godokono Totomu iyatulamedawate tabo eba wiyalo negiya, “Yua: lumagi kapiyate ebe kawonomamo pa:nilakapoimi.”

Ebene Ya:sute negiya, “A:imano tabo nanitabola. Modobola, a:ma: toawete epatamo nilakapo ma kunu nanawokaliminakiye.”

### *Ya:sute Matako Ega:walo Ma:liko Ibino Motamo Bae Nama: Da:nodoliya*

<sup>38</sup> Ya:sute ebenu waloma:tapiago Yelusalema gabodo eba tolamitalo iba:te duliyoumolo ida:mo da:nemaimiya, ebe tetelo kamiyale idi ebenu mailo Matatela ebete Ya:suko kalakalago naniya ebete ebenu motolo bae ka:penama:. <sup>39</sup> Matakono ekawino mailo Ma:litela, ebenu Ya:sute motamo da:nodoliya Ma:lite ebenu agowa mabuamo pokolite Kawodawa Ya:sukono iyatumi tanalo wadenomamo olowiuti. <sup>40</sup> Wiyasiya Matate a:ka:tuwa: bae okalimi tanalo eba osiyodilutalo ebe ubia:noma: eda:te Ya:suko ebo paniya, “Kawodawa, a:ma: na:kuma:wita naimano ekawite na kowalubinita: Tanalo bilibilinomo na a:ka:tuwa: osiyodilolitamo, ebema: modobola a:ma: ebe nana, ebete pete na na:powalubinina!”

<sup>41</sup> Kawodawa Ya:sute ebenu tabo eba wiyalo negiya, “Mata, Mata! A:ma: egege tanalo bilibilinomo osiyodilolema: woki bilibilinomoma: editata.

<sup>42</sup> Wiyasiya kapiya tanalote kawonomoma: deda:na, Ma:lite ebe wade tanalo umite elawe, epate walone ebegodone a:kelaema:na:.”

## 11

### *Ya:sute Godotamo Towetowe Tabo Gela Tanalo Ebe Waloma:tapi Diyatulamuya*

*Ma:t 6.9-13; 7.7-11*

\* **10:32:** Buka ka:la:mioledawa, modobola a:ma: me tanalo niyatawa, Yu epo magumulo 12 gu na:pola:namiya, me Libai gu ebe idila. Ebe gu kapiyate Godokono woko osiyodilonamiya Yu epo epetapiatamo. Ma kunu Yelusalemalo da:enami ebe Godoko Amamateno Iya Motolo Libai gu dubate woko a:ka:tuwa: osiyodilonamiya, ebenu iyaiya duliyoumololo atumu ibi epetapiate Yu epono balidi ibilamole motolo oale alapiopima: eda:onamiya, ega:walo epetapiate Godokono Totomu iyatulamepima: eda:onamiya, ega:walo epetapiate tabo anagiyamidapima: eda:onamiya. † **10:33:** Buka ka:la:mioledawa, a:ma: Samaliya opo epo ega:walo Yu epono dowateui tanalo iyatawama: ubi diyata:emene, modobola a:ma: Luk 9.51-56 buka apuno walubi tabo numiye.

<sup>1</sup> Egela idilo Ya:sute diyamoa: opolo Godago tabo gelitiya. Ebe tanalo dolopoligiya ebe waloma:tapi magumulo idawate ebe naniya, “Kawodawa, Yonete ebe waloma:tapi iyatulami iba:te Godotamo keba kunu da:towetoweonakoma:na; ebema: modobola a:ma: a ebe atu tanalo na:kiyatuama:.”

<sup>2</sup> Ebene Ya:sute iba:tamo negiya, “La: Godotamo towetowe tabo ma kunu negelanakiyala;

‘Aimano Nabiwi, modobola a:imano talena mailo epate nadipatema:na; ega:walo modobola a:ma:le Kawo Elawodawama: deda:wena ebe tanalote napawokalamene.

<sup>3</sup> ‘Ega:walo modobola a:ma: me egelano bae atamo modobolo nikaeama:.

<sup>4</sup> Ega:walo epetapiate atamo kuba dosiyodilolena, ale ebe kuba egebolelamete ka:dodolomatililaemalema; ebema: modobola a:ma: atumu aimano kuba egeboleama:wete na:dodolomatiliama:.

‘Ega:walo Saitanakono kuba gabamo wabuga:ta magumulo a:ma:le wiyasiya a eba walubilo a:imano wade gabodo nemagataenakiye.’ ”

<sup>5</sup> Ebene Ya:sute iba:tamo negiya, “Diyala, la: magumulo lumagi idite sele tetenomolo ebena namutudawatamo tote ma kunu da:negemene, ‘Naimano namutudawa, modobola:ka: a:ma:le na nowalubina? Natamo netewakapiya bae apuapu nikanama; <sup>6</sup> mabu naimano lumagite mulu opone walo a:kolowami, wiyasiya nagodolo bae puliyanomola nale ebetamo ikaema!’

<sup>7</sup> “Wiyasiya moto gulo da:luta, ebete tabo ma kunu kegemene, ‘Ao, a:ma: temeteme natamo akoikanama:la. Na gigiyu a:kodakodaiminakamo, ega:walo na atumu guda:go nowatanamo, ebema: modoboa: nale maigate bae a:ma:tamo ikaema:.’

<sup>8</sup> “Wiyasiya a:ma:le a:imano namutudawa toweome tanalo atepa:no, a:ma:tamo beda: tanalote na:ka:pemaigamene? Iyo, ebete maigate a:imano iyaiya modoboa: tanalo ka:modoboilaemene, wiyasiya ebete a:ma:tamo bae eba ikamelo a:ma: ebena namutudawama: a:kegemene, mabu ebegodolo kalakala puliyala. Ebema: mabu keleka: ebete a:ma:tamo walubi diyatimene? Mabu a:ma: towetowedawagodolo ilipo tanalo kitana; ebete a:ma: ebe mabunomoma: kowalubima:ta.”

<sup>9</sup> Ebene ebe tabono magumu eba awokalimilo Ya:sute negiya, “Nale la:tamo gemo, la: Godoko na:toweoma:la; ebete la:tamo kikalaema:ta. Iyo, la: ebena wade tanalo nowadiala; la:le kuimamota, ega:walo la: gigiyu nanakamiala; ebete la:tamo kaiyamidamene. <sup>10</sup> Numa:la; piyate Godoko da:toweomenaka iba:te ebegodone kelaema:na; ega:walo piyate ebena wade tanalo dowadinaka iba:te kuima:na; ega:walo piyate gigiyu danakaminaka ebete iba:tamo kaiyamidamene. <sup>11</sup> La: magumulo kebe dubu ebena gudute ebe namoma: da:toweomene, wiyasiya ebetamo bu kalu ba:kikaemene? <sup>12</sup> Ega:walo a:imano gudute a:ma: kakaba kikopuma: da:toweometamene, a:ma: wiyasiya ebetamo gopowaidubu ba:kikama:emene? <sup>13</sup> Numa:la; la: wadewade epoa: wiyasiya la: iyatawalata la:imano guda:tamo wadewade bae ikalaema; ebema: la:imano Unu

Duliyomolono Nabiwi atumu iyatawanomola ebena Wade-talena Uliyana epatamo ikalaema; piyate ebe da:toweomenaka iba:tamo kikalaemene.”

*Ya:suko Ega:walo Biyesibuluko\* Ibino Tanalo*

*Ma:t 12.22-30; Mak 3.20-27*

<sup>14</sup> Ebe tetelo tabo kiyawaoa: kuba uliyanagono dubu ebolo okolinami, ebene Ya:sute ebegodone kuba uliyana dalibiya ebete tabo kiyawao ebo wagilimiya. Ebema: epo bilibilinomo epetapiate Ya:sukono tanaloma: eba anoanoutalo, <sup>15</sup> wiyasiya epetapiate negelitiya, “Biyesibulukono elawote ebegodolo bitana. Ebete kubakuba uliyanano Kawodawano elawamo alibolenako, Godokono elawamoa:!”

<sup>16</sup> Ebe tetelo epetapiate ubi iyatiya Ya:suko kuba gabamo kowabuga:tama; ebema: iba:te ebe naniya, “A:ma:godolo Godokono elawo nanitabolo ditana, anoano tanalo idi nosiyodila ebe tanalo atamo kawokalima:ema:.”

<sup>17</sup> Ebema: Ya:sute ibino kuba woki iyatawate iba:tamo negiya, “Numa:la; kapiya duliyomolono epate tetedo dadikanalema:na: ebe duliyomolote ka:kubamene, ega:walo kapiya motono epate tetedo dadikanalema:na: ibino motote opamo kekagamene. <sup>18</sup> Ebema: Saitanakono woki ma kunula, ebete ebena kubakuba uliyana epagodone akalibola:le, mabu ebete eba kunu dowagelemene ebena woko osiyodilo elawote kolopoligomene. La:le naimano tanaloma: negelamata, ‘Ebate kubakuba uliyana Biyesibulukono elawamo alibolenako.’ <sup>19</sup> Ebe tabo degelaema nanitabola:ka? Ao, nanitaboa: La:imano tanebapiate kubakuba uliyana dalibolenaka, ebe elawo iba:tamo potele kikalamenakole? Iyo, Godotela, Saitanatea: Ebema: ebe la:imano tanebapino wade osiyodilo tanalote la:imano kuba woki awokalimina. <sup>20</sup> Me tanalo nanitabola, nale kubakuba uliyana Godokono elawamo epagodone alibolenakomo, ebema: modobola la: me tanalone kiyatawaomamota, Godokono Kawo Elawodawano tetete la:tamo ebe a:pe.

<sup>21</sup> “Numa:la; Saitanako ebe elawodubu idi keba kunula:ka: eba kunula, ega:walo ebete pilolo duwatiya ebe epo ebe ebena motono inamabula. Ebema: kebe tetelo elawo dubute ebena gowelaono inamabu uwatete ebe a:ka:tuwa: ebena moto wadenomamo datila:namene, motono inamabuate wadenomamo ka:pola:nama:na: <sup>22</sup> Wiyasiya dubu idi ebena elawote dopo dubuno elawo dodolina, ebe dubute pete gowela tanalo eba posiyodilolo dopo dubu kapanagalimiomene. Ebene ebete ebe dubuno gowelao inamabu ega:walo motono inamabu uwatete ebena namutupiatamo kanalabao-laemene.

<sup>23</sup> “Nanitabola, kebe lumagite na walubiniana: ebete naimano gowelao-dawama: eda:na, ma kunu ebete epo kapiya baiamo magaelema: nago woko osiyodilola:no wiyasiya ibi iyaiya alibolenako.”

*Kuba Uliyanate Lumagitamo Walo Da:ka:pemene Ebe Tanalo*

*Ma:t 12.43-45*

<sup>24</sup> Ebene Ya:sute negiya, “Kuba uliyanate lumagi idigodone da:nemaigamene, ebe tetelo ebete gagale opamo tote okoli bai idi kowadinatomene. Wiyasiya ebete wade okoli bai numia:no ebe a:ka:tuwa: ebetamo kegemene, ‘Nale datepimo ebe atu okoli baiamo walo ka:ka:tomamo.’ <sup>25</sup> Ebete walo ka:pete ebe okoli moto wadenomamo moda:midala ega:walo inamabu wadenomamo alomola, ebete ebe moto eba kunu da:ka:puimene, <sup>26</sup> ebene ebete walo ka:tote sebeni kuba uliyana epetapi kanadabuulite ka:kemagaelemene, iba:te ebe motamo podolote

\* **11:13:** Biyesibuluko ebe Saitanakono nopodawa idila, ebete Yu epono opolo Saitanakono opodawama: eda:nami, atumu Tabo epono opolo Monoiko bokolina.



ebolo kilukulinama: Numa:la:, walone da:pelaema:na: ebe kuba uliyanate kawokawo kuba ba:posiyodilolenakoma:na:, dopamo dokolinami ebe kapiya kuba uliyanano okoli eba kunua:. O ebe lumagi niyala! Ebe dopamo kela:mo kubadopola, wiyasiya me tetelo ebete kubanomoma: eda:.”

*Godokono Nanitabo Kalakala Tanalo*

<sup>27</sup> Ya:sute me tabo eba kiyawautalo, epo magumulo kamiyale idite ebetamo kawonomamo negiya, “A:ma: dalaimitiyala ega:walo nono a:ma:tamo dikametiya, ebe kamiyaleno kalakala beda: kawonomola:ka:!”

<sup>28</sup> Wiyasiya Ya:sute negiya, “Modobola a:ma: nanitabo tanalo idi ne-malagidila. Piyate Godokono tabo olowiote ebetamo da:tudila:oma:na:, ebene nanitabo kalakalate ebe epo kapiyagodolo bitanamene.”

*Epate Anoano Tanalo Uima: Ubi Diyatiya*

*Ma:t 12.38-42*

<sup>29</sup> Epo bilibilinomate Ya:suko a:wa:midate eba lamota:onalo ebete iba:tamo negiya, “Me tete epo kubakubanomola! Ibi ubi kawonomola Godokono elawo awokalimino anoano tanalo kuima:, wiyasiya Godote tanalo idi iba:tamo akawokalimene. Nanitabola, ebete ebene woki awokalimidawa Yaonado dawokalimiya, ebe anoano tanalo kapiya iba:tamo ikalamiya. <sup>30</sup> Iyo, Godote Yaonakono okoli tanalodo Niniba kawo duliyo-molo epatamo ebene elawo awokalimiya, ebene ebete atumu Epono Naniwido ebene elawo walo kakawokalimene me tetelo dilukuliona ebe epatamo, wiyasiya anoano tanalo idi iba:tamo a:kosiyodilomene.

<sup>31</sup> “Ega:walo me tanalo idila. Godote epono tanalo danagilamelelaemene, ebe Kawo Egelalo Siba opo epono Kawo Elawo Kamiyaletete maigate la: Yu epo kubakubapima: keka:la:ima:ta, mabu ebe Yua: kamiyaletete mulu oponomone piya Isalaela opamo Kawo Elawodubu Solomonokono mulo tabo ka:polowioma:. Ebe tetelo ebe ubila Godokono mulo Solomonogodone laema:, wiyasiya la: tetelo Godote Epono Naniwino tanalo la:tamo eba awokaliminalo, la: ebe tanalo ubia:nola. La: numa:la:, Epono Naniwino mulote Solomonokono mulo nodoliona! <sup>32</sup> Ega:walo Godokono Kawo Egelalo Niniba duliyo-molo epate maimiote la: atumu kubakubapima: keka:la:ima:ta, mabu ebe Yua: epate Yaonakono tabo dolowiya iba:te ibino kubane Godotamo olobiliya. Ebe tetelo ibi ubila Godokono tabo Yaonagodone laema:, wiyasiya la: tetelo Godote Epono Naniwino tanalo la:tamo eba awokaliminalo, la: ebe tanalo ubia:nola. La: numa:la:, Epono Naniwino elawote Yaonakono elawo nodoliona!”

*Godokono Alote Lumagino Tepo Magumamo Opega Tanalo*

*Ma:t 5.15; 6.22-23*

<sup>33</sup> Ebene Ya:sute negiya, “Lumagite ebene wuiki alo pite wamina baiamo a:kiyatimene, ega:walo ebete bagowo magumamo a:kiyatimene, wiyasiya ebete awokala baiamo kiyatimene, ebene epate ebene moto guamo da:nodoloma:na: iba:te ebe wade alo ebo ka:nuima:na:.”

<sup>34</sup> “A:imano apeno alo ebe a:imano balidila. Ebema: a:imano balidite wadenomamo da:pukuilaemene a:imano tepo magumuno alote atumu wadenomamo ka:ka:pukuilaemene, wiyasiya balidite wadenomamo pukuilamea:no a:imano ape kawonomote idoko magumulo kitanamene.

<sup>35</sup> Ebema: a:ma: nanisiwale, a:imano tepo magumuno alote idokoma: akoeda:la:!  
<sup>36</sup> A:imano ape kawonomote alo magumulo ditanamene ega:walo a:imano ape apu idoko magumulo itana:no, ebe tetelo a:ma: kawonomamo ka:pukuilaema:ta, wade wuiki alote a:ma: da:pukuimitana eba kunu.”

*Ya:sute Pa:lisi Tanebapi Kawonomamo Danaliya  
Ma:t 23.4-7,23-36; Mak 12.40; Luk 20.46*

<sup>37</sup> Ya:sukono tabo kiyawao dolopoligiya Pa:lisi tanebapi dubu idite ebe naniya ebete ebegodolo bae ka:penama; ebene Ya:sute ebe dubuno motamo nodolote bae nama: gito nokoliya. <sup>38</sup> Wiyasiya Ya:sute ebene koto ukulalea:no bae nama: da:nokoliya, ebema: ebe Pa:lisi tanebapi dubute kawiyaya la:wiya. <sup>39</sup> Ebene Ya:sute ebe naniya, “La: Pa:lisi tanebapi la:imano kalili ega:walo melesi unu apu ukulalenakomata, wiyasiya la:imano tepo magumulo da:pola:na ebe inamabu kukulala:wenakoa; ebema: la:le dosiyodilola:wenakoma ebe pilo tanalo ega:walo kawokawo kuba osiyodilole tanalo epetapi tabokaonomola! <sup>40</sup> Eiyey, la: daedale epolata! Godote lumagino unu tama osiyodilote ega:walo magumu ako-osiyodiliya, <sup>41</sup> ebema: modobola la:imano melesilo ega:walo kalililo beda: inamabuate ka:pola:nale, la: inamabua:piatamo gito nikalamola:la! Iyo, ebe tanalo magumudo la:le la:imano tepo magumuno kuba kukulalemamota.

<sup>42</sup> “Nanitabola, la: Pa:lisi tanebapi kuba wiya kawonomo kelaemamota! La: la:imano pali inamabu bilibilino magumulo teni apuapu eba anagilamolelo Godotamo ebene apu wadenomamo ikameonakomata. Ebe tanalo magumulo la: kapiya tanalo da:pesonomo kawotawenakoa; wiyasiya kawokawo tanalonomo epetapi osiyodilolema: la: wadenomamo kemalagidilola:wena; ma kunu la: epagodolo tuputupulo kilukula:wena: ega:walo Godokono nilakapo kawokalima:wena;. Ebema: modobola la: ebe kawokawo tanalo nosiyodilolenala: ega:walo atu tetelo egege tanalo osiyodilolema: akododolomatila:la!”

<sup>43</sup> “Nanitabola, la: Pa:lisi tanebapiate kuba wiya kawonomo kelaemamota, mabu balidi ibilamole moto gulo la: ubila kawokawo dubuno ilukuli bailo ilukulima; ega:walo la: ubila la:le inamabu olowame bailo eba wapata:lamelo epate la: ulametate ebo kowalogoletama! <sup>44</sup> Nanitabola, la:tamo da:pemene ebe kuba wiyate kawonomoma: keda:mene, mabu la: epono a:ela ape waminaole bobo keba kunula:ka: eba kunulata! Ma kunu epate iyatawa: abale inamabuate da:pola:na, ebema: iba:te iyatawaoa:no ebana wapata:lamena.”

<sup>45</sup> Ebene Godokono Totomu iyatulamedawa idite Ya:sutamo negiya, “Iyatulamedawa, a:ma: Pa:lisi tanebapi tabamo da:kubailama:wa; a:ma: ebe tabamo a atumu a:kemalogo:ta!”

<sup>46</sup> Ya:sute ebene tabo eba wiyalo negiya, “Iyo, la: Godokono Totomu iyatulamepi, la: atumu kuba wiya kawonomo kelaemamota, mabu la: la:imano totomu tabamo epatamo iyaiya mibomibo tanalo ikalamenakomata! Iyo, la:imano totomu tabo epate mibomibo inamabu okolamo dowaguatena eba kunula, ebema: la:le ibino mibomibo dulama:wenakoma walubi tanalo da:pesonomo idi kiyata:wenakoa; koto makupiola:wete gito lamota:onanakomata. <sup>47-48</sup> Nanitabola, la:tamo da:pemene ebe kuba wiya kawonomoma: keda:mene, mabu la:imano ewoniate Godokono woki awokalimipi nanitabolo anakapulamenakiya, wiyasiya ka:lo la: la:imano ewonino iyaiya osiyodilole tanalo kubama: gela:no ibi emoiolenakomata. Eiyey! Ebe mabuma: ibino kubate la: magumulo atumu ba:kitana, wiyasiya la: ebe kuba waminalo la:imano ewoniate danakapulamenakiya ebe tuputupupino bobo bai wadenomamo osiyodilolenakomata. Ebema: numa:la; ebe tanalote la:imano mena netewa tanalo awokalimina, mabu la:imano tepo magumulo atu kuba osiyodilole ubi ba:ka:pola:na Godokono wokopinomatamo! <sup>49</sup> Ebe mabuma: Godokono Mulo Tabote ma kunu gena, ‘Nale epatamo naimano woki awokalimipi ega:walo naimano alibolepi

epetapi kanalibolemamo, wiyasiya iba:te ebe wokopi ubia:nola, ebene iba:te ibi epetapi eba anakapulamelolo epetapiatamo temeteme bikalame-nakoma:na:.' <sup>50</sup> Ebema: me tete epate kuba wiya kelaema:na:, mabu me opono wagilimi mabune iba:te Godokono woki awokalimipi anakapula-menakiya. <sup>51</sup> Iyo, A:ibolokono kalimate opamo deka:ka:liya, ebe tanalo wagilimi mabula. Ebene iba:te tuputupu wokopi epetapi bilibilinomo anakapulamete, uwomu tetelo Godoko Amamateno Motolo Sekalayako ebo kanakapumiya, iyo, ebete ebe Motono Talena Bai ega:walo Godotamo kalimagono ikameo bai tetenomolo eba utitalo, iba:te ebe danagalimiya ebete gito a:iya. Ebema: na la:tamo nani tabonomo gemo, me tete epate ebe kuba bilibilinomo mabuma: wiya nanitabolo kelaema:na:!

<sup>52</sup> "Nanitabola, la: Godokono Totomu iyatulamepi, la:imano kuba wiy-ate kawonomoma: keda:mene, mabu la:le epono gabo mopilamenamata iba:te Godogodone iyatawa kelaema:! La: a:ka:tuwa: ebene wade tanalo laema: ubia:nola, ebema: piyate ubi diyatina wiyasiya la:le ibi atumu na:kodiyobolenamata!"

<sup>53</sup> Ebene Ya:sute ebe motone da:piwisigiya, ebe tetelo Godokono Totomu iyatulamepi ega:walo Pa:lisi tanebapi iba:te kawonomamo dowaoe Ya:sukono tanaloma: tabo kubanomamo gela ebo wagilimiya. Ega:walo ebe tetene wagilimite iba:te Ya:sutamo da:pelamenakiya iyaiya tanalo ebo pikiyawaomenakiya, <sup>54</sup> mabu ibi ubila ebe kuba gabamo eba wabuga:talo ebete iya tabo kubanu gelo ebe ebo kelaema:.

## 12

### *Ya:sute Mena Netewa Tanaloma: Tabo Da:kiyawaiya*

#### *Ma:t 10.26-27*

<sup>1</sup> Tete idilo epo bilibilinomate Ya:suko uima: daladabutiya iba:te mupuma:tiua:go pelamitiya, idite idi mupiamidanaki, idite idi mupi-amidanaki, eba kunu wagemitiya. Ebe tetelo Ya:sute ebe waloma:tapi nanaliya, "La: nanisiwale! Palowa baete a:ka:tuwa: unamo demaiga, Pa:lisi tanebapino amama tanalo eba kunula. Ebema: mako amama tanalote la:tamo akopemaigala:, mabu ebe amama tanalo ebe ibino mena netewa tanalola. <sup>2</sup> Numa:la:, kebe itiole tanalate da:pola:na walone tetelo Godote kawokalilaemene, ega:walo waminaole tanalate da:pola:na walone epate kulamolema:na:. <sup>3</sup> Ebene la:le idoko tetelo da:kiyawawenakoma, epate wiyasiya alo tetelo kolowioma:na:, ega:walo moto gulo la:le ganalalo degelawenakoma, ebe iyaiya tanaloma: iba:te tabo madodo eba adipatelo epo bilibilinomatamo kawokalilaema:na:."

### *La: Poko Na:ka:tolema:wenama*

#### *Ma:t 10.28-31*

<sup>4</sup> Ebene Ya:sute walo na:kegiya, "Naimano namutupiala:, nale la:tamo gemo, ape anakapulame iyatawaopi akotolelama:la:. Iba:te la: danakapula-metamene, iba:godolo elawo idite a:kitanamene la:imano uliyanano igilo kubailaema:. <sup>5</sup> Ebema: la: poko na:ka:tolema:wenama? Ebe Godotela, la: ebe kapiya na:tolemenala:, mabu ebegodolo elawo bitana epo anakapulamete Ela Opamo iyalekema:. Iyo, na nani tabo gemo, ebe kapiya na:tolemenala:!

<sup>6</sup> "Numa:la:, epate paibu piliyo olaola netewa toea maniamo uwa-tema: gelanaka, ebe olaolano igilo kawokawoa:, wiyasiya Godote ebako da:peso ola kapiya a:ka:dodomatimene. <sup>7</sup> Ega:walo me tanalo nanitabola, la:imano watono eke bilibilinomo Godote iyalo tetelo eka:la:mioliya, iyo, la:imano iyaiya tanalo ebete iyatawanomola. Ebema: la: woki bilibilima:

akoeda:oala:. Ebena nilakapo olaolatamo nanitabolo bitana, wiyasiya ebena nilakapo la:tamo kawonomoma: eda:te ilukulina tetelo bitanamene!”

*Epono Ololo Apulo Ya:suko Awokalimi Tanalo*

*Ma:t 10.32-33; 12.32; 10.19-20*

<sup>8</sup> Ebene Ya:sute walo na:kegiya, “Nale la: analemata, kebe lumagite awokala degemene, ‘Na Ya:suko waloma:tadawala,’ na Epono Naniwite atumu Godokono nopopino ololo apulo kegemamo, ‘Me lumagi ebe naimano ekawila.’ <sup>9</sup> Wiyasiya kebe lumagite na iyatawa:noma: degemene, na atumu Godokono nopopiatamo ebe iyatawa:noma: ka:kegemamo.

<sup>10</sup> “Ega:walo kebe lumagite Epono Naniwino tanaloma: odiyobo tabo da:kiyawaomene, Godote ebena kuba egeboleme iyatawala, wiyasiya kebe lumagite Godokono Uliyanano osiyodilo tanaloma: kubama: degemene, Godote ebe kuba egebolemete a:ka:dodomatimene.

<sup>11</sup> “Ebema: iba:te la:imano tanalo kanagilamelelametama: Yu epono balidi ibilamole motamo la: demagataletamene, ebe tetelo la:le gabamani dubu ega:walo kawokawo dubu epetapi iba:tamo kebako tabo kegelaema: woki bilibilima: akoeda:oala:, ma kunu, ‘Na beda: tabo na:kegemo? Ega:walo na iba:tamo tabo keba kunu na:ka:wiyamo?’ <sup>12</sup> Numa:la:, Godokono Uliyanate ebe tetenomolo la:le iba:tamo da:kiyawaema ebe tabo la: kiyatulaema:ta.”

*Daedale Inamabu Bilibilinomagodawano Iyatulame Oi*

<sup>13</sup> Ebene epo bilibilinomate Ya:suago da:pola:niya, lumagi idite ibino taneba magumulo ebetamo negiya, “Iyatulamedawa, naimano naniwi nana, aimano naniwite atamo da:miyapaeami ebe inamabu bilibilinomo ebete wadenomamo nalabalemene.”

<sup>14</sup> Ya:sute ebetamo nowamiya, “Dubu, a:ma: potele kanatiya nale la:imano tanalo anagiyamidawama: keda:ma:?” <sup>15</sup> Ebene ebete epo bilibilinomatamo negiya, “La: nanisiwale! Inamabu uwate ubi tanalote la:tamo akopemaigala:, mabu lumagite inamabu bilibilinomo eba uwatelo nanitabo igilo ebo a:kuimene.”

<sup>16</sup> Ebene Ya:sute iyatulame oi idi iba:tamo ma kunu kiyawaiya, “Inamabu bilibilinomagodawa idite okolinami, ebena opolo pali inamabuate kawonomamo apepeonamiya. <sup>17</sup> Ebene ebe a:ka:tuwa: ebena wokilo negi, ‘Naimano pali inamabu alomono moto modobolo ka:pola:na:, ebema: na beda: tanalo na:kosiyodilomo?’ <sup>18</sup> Oe! Na ma kunu kosiyodilomamo. Nale naimano pali inamabu alomono moto anabuilmate olioli moto kawokawo walo ka:ketemotemamo, ebena ebe moto magumamo naimano pali inamabu ega:walo kawokawo inamabu epetapi kalomomamo. <sup>19</sup> Ebe tetelo nale naimano tepo magumulo kegemamo, ‘Na kawo dubunomola! Na kawokawo inamabu wadenomamo alomimo, ebema: na ulama epetapi bilibilinomolo kodakoda woko osiyodiloa:no, na bae kena, elawo da:imi obo ka:ni, eba kunu kalakalago gito bokolinamo!’ <sup>20</sup> Wiyasiya Godote ebetamo negi, ‘A:ma: daedale lumagilata! Ka:lo idokolo nale a:imano igilo kelaemamota, ebena a:ma: a:ka:tuwa: a:imano tanaloma: dalomawenamiya ebe inamabu bilibilinomo potele na:kuwatemene?’ ”

<sup>21</sup> Ebema: Ya:sute ebena uwomu tabo ma kunu giya, “Lumagi a:ka:tuwa: ebena tanaloma: inamabu dogodogokobi eba midililo wiyasiya ebena tepo magumamo Godokono wadewade tanalo alomoa:no, ebe ebako daedale dawala.”

*Godoko Nanitabokobi Midi Tanalo*

*Ma:t 6.25-34*

<sup>22</sup> Ebene Ya:sute ebe waloma:tapiatamo negiya, “Nale la: analemata, la:imano ilukulio tanaloma: woki bilibilima: akoeda:onala:, iyo, la:le nao inamabu ega:walo pupuliono inamabu uwatema: kawonomamo akomalagidilola:la:.” <sup>23</sup> Numa:la:, nao inamabu ega:walo pupuliono inamabu iba:te kawokawoma: keda:ona:, mabu nao inamabute lumagitamo nanitabo igilo a:kikaemene, ega:walo pupuliono inamabuate atumu ebena ape uwomua: tetelo a:kowalubinamene. <sup>24</sup> Ebema: la: owaowa olaolano tanalo nemalagidilala:, iba:te pali inamabu kamiona: ega:walo iba:te pelamete naono pali inamabu ka:petapionakoa:, iyo, ibino pali inamabu alomono moto puliyala, wiyasiya Godote iba:tamo bae modobolo ikalamenako. Numa:la:, Godokono nilakapo nanitabolo bitana olaolatamo, wiyasiya ebena nilakapo la:tamo kawonomoma: eda:te uwomua: uwomua: tetelo bitanamene. <sup>25</sup> Ebema: la: woki bilibilima: akoeda:oala:. Lumagi ebe a:ka:tuwa: ebena a:e tete egela ida:mo keba kunu na:kiyatimene, ega:walo ebete ebena igilo keba kunu na:kegeyageyaima:tepamene? Gabo puliyala, kitana:!  
<sup>26</sup> Numa:la: la: la:imano igilo tete da:pesamo geyageyailama:tepalema: modoboa:, ebema: mabu keleka: la: iyaiya tanalo epetapima: woki bilibilinoma: deda:wenama?

<sup>27</sup> “La: me opono kaiyakaiyano tanalo nemalagidilala:, iba:te woko kosiyodilolena: ega:walo pupuliono inamabu kosiyodilolena:. Nale la: analemata, Kawo Elawodubu Solomonote inamabu bilibilinomagodawanomoma: eda:nami, wiyasiya ebete wadewade tita:gono inamabu da:pupulinaki, ebe kalikuno titi me opono kaiyakaiyano wade titite nodoilina. <sup>28</sup> Numa:la:, me opono uwagate ka:lo napepeuta, dumutu epate elamo kiyalekema:na:, wiyasiya Godote ebe nonoka inamabu tita:gonoma: midilina, ebema: ebete atumu la:tamo pupuliono inamabu modobolo bikalamenakoma:ta. La: me tanalo wadenomamo iyatawaoa:no la:imano nanitabokobi midi tanalo Godotamo kawokawoa:!  
<sup>29</sup> Ebema: nao inamabu ega:walo obo nio tanaloma: kawonomamo akomalagidilolenala:, ega:walo woki bilibilima: akoeda:onala:. <sup>30</sup> Me opo kawonomolo epate me inamabu woki bilibila:go olena, la: wiyasiya eba kunu akowagelenala:, mabu ebe inamabu la:godolo modobolo pola:na:no, la:imano Nabiwite iyalo iyatawanako. <sup>31</sup> Ebema: la: Godote Kawo Elawodawama: deda:na ebe tanalo dopamo nowadiala:, ebena la:imano modoboa: tetelo ebete la:imano iyaiya tanalo ulamelelametate la:tamo modobolo bikalamenakoma:ta.”

### *Godokono Unu Duliyomololo Inamabu Dogodogokobi Midili Tanalo*

#### *Ma:t 6.19-21*

<sup>32</sup> Ebene Ya:sute walo na:kegiya, “La: naimano sipi-goeogeo taneba da:pesolata, ebema: la: akotoletoleala:!  
Godote Kawo Elawodawama: deda:na ebe wade tanalo la:imano Nabiwi ubila la:tamo ikalaema:.” <sup>33</sup> Ebema: la: tolama:wete la:imano inamabu bilibilinomo maniamo na:midiola:wete nigologolopiatamo mani na:nikalamola:la:, iyo, la: ebe gabodo olopoligoa: mani gatele nosiyodilola:la:, ma kunu la:imano wadewade inamabuate Godokono Unu Duliyomololo ba:na:pola:lamenama:ta. Ebe inamabuate ebolo a:kolopoligoma:na:, iyo, pilo epate a:kuwatema:na: ega:walo nopaiate a:kenalema:na:.” <sup>34</sup> La: nanisiwale! La:imano inamabuate kebolo da:pola:nama:na: la:imano tepo magumuno woki atumu ebolo ka:na:pola:nama:na:.”

#### *Olowiolo Ilukuli Tanalo*

<sup>35</sup> Ebene Ya:sute walo na:kegiya, “La: nanisiwale! Diyala, tanalo idite la:tamo da:ba:pemene, ebema: la:imano kaliku pupuliawete nolosiyodilala: ega:walo alo na:piala:.” <sup>36</sup> Iyo, kawo dubuno wokopiate ebena pe tanalo



olowiolo keba kunu kemakopelene, modobola la: eba kunu nilukuliniyala. Numa:la:, ebe kawo dubute oli kamiyala:go kapiyama: eda:te soliyomu baine da:pemene, ebenu wokopiate ebenu pe tanalo dolowima:na: gigiyu kalakalago ebetamo gito ka:iyamidaema:na:. <sup>37</sup> Ebene kawo dubute da:pemene ibino kalakala kawonomoma: keda:mene, mabu iba:te ebetamo olowiolo eba ilukulinalo ebete ibi ebo pulame. Nale la: analemata, ebete ibino olosiyodilo tanalo pulamelelamete ebete ebenu lubudino kaliku pepekanate ebe a:ka:tuwa: iba:tamo wiya: wokodawama: eba pa:midilo, wokopiate ilukulite ebete iba:tamo wade bae ebo ka:pikalaemene. <sup>38</sup> Diyala, kawo dubute sele tetelo da:ba:pemene o walo apuamo da:ba:pemaigamene, ebema: wokopiate ebetamo eba olowionalo, ebete iba:tamo da:pemene iba:te kawonomamo kekalakalaoma:na:.

<sup>39</sup> “Ega:walo me tanalo idi na:kemalagidilala: Moto namutudawate pilo lumagino pe tete diyatawamene ebete ebe teta:mo kolowionamene, mabu ebe ubia:nola pilo dawate ebenu motamo ka:popegama:. <sup>40</sup> Ebema: la: atumu nolosiyodilala:, mabu diyala, la: olowioa:no eba ilukulinalo Epono Naniwite ebo da:ba:pemene.”

*Mulo Wokodawa Ega:walo Daedale Wokodawa Ibino Tanalo*

*Ma:t 24.45-51*

<sup>41</sup> Ebema: Pitate Ya:sutamo negiya, “Kawodawa, a:ma: me iyatulame oi a kapiyatamo kegeawa: o epo bilibilinomatamola:ka:?”

<sup>42</sup> Wiyasiya Kawodawa Ya:sute negiya, “Namutudawatamo da:tuduwatanako ebe mulo wokodawano tanalo keba kunula:ka:? Nanitabola, woko namutudawate ebe lawete wokopi epetapi ulamedawama: kiyatimene, ma kunu ebete ibino bae nao tetelo iba:tamo modobolo kikalamotoemene. <sup>43</sup> Ebene ebe mulodawate woko wadenomamo eba osiyodilonalo, ebenu namutudawate pete ebenu tanalo da:puiemene, ebe wokodawate kawonomamo kekalakalamene. <sup>44</sup> Na la:tamo nani tabo gemo, namutudawate ebe mulo wokodawano tanaloma: eba pekalakalalo, ebete ebe ebenu inamabu bilibilino ulamedawama: kiyatimene.

<sup>45</sup> “Wiyasiya ebe wokodawate kuba woki lawete ebenu tepo magumulo ma kunu degemene, ‘Naimano woko namutudawate tete geyageyadopolo nokolina, samamo kapena:,’ ebe tetelo ebete woko osiyodiloa:no ebenu namutudawano bae kawiya nate elawo da:imi obo ebo ka:nimene, ebema: ebete daedalema: eda:te wokopi dubu ega:walo kamiyale epetapi alukole ebo kowagilimene. <sup>46</sup> Ebene ebe daedale wokodawate olowioa:no eba okolinalo ebenu namutudawano pe tanalo a:kiyatawamene. Ebe tetelo namutudawate pete daedale wokodawa kawonomamo panagalimiote kuba osiyodilolepi epetapiago kanalibomene ebenu kuba wiya ka:nelaema:.

<sup>47</sup> “Nanitabola, kebe wokodawate ebenu namutudawano ubi tanalo iyatawate wiyasiya wade tanalo osiyodiloa:no, namutudawate ebe gaubamo kapanagalimiomene. <sup>48</sup> Wiyasiya wokodawa idite ebenu namutudawano ubi tanalo iyatawa:no ebete kuba idi ebetamo dosiyodilomene, namutudawate ebe kuba mabuma: wiya ka:pikaemene wiyasiya kawonomamo akapanagalimiomene. Numa:la:, epate lumagi iditam wade wade inamabu dikameoma:na: iba:te kawonomamo walo uwatema: ka:kegelama:na:. Eba kunu Godote kebe lumagitamo wadewade tanalo bilibidopo dikameomene, ebete ebe lumagino okoli magumulo atu wadewade tanalo ba:kolemenakomene.”

*Ya:sute Epono Gowela Mabuma: Eda:na*

*Ma:t 10.34-36*

<sup>49</sup> Ebene Ya:sute walo na:kegiya, “Na me opo epatamo Godokono ela ebe adaiyamo, iyo, ibino kuba wiya mabuma: na ubila Godote me opo samamo kemadoema: <sup>50</sup> Wiyasiya numa:la:, Godoko ubila ebete na a: magumamo kaduba:midanema:, ebema: ebe tanalote pea:no nale dopamo me opo epono kuba mabuma: wiya idi iba:tamo a:kikalaemo. <sup>51</sup> La: na:kemalagidilawitama nale me opamo milo adaema: pe? Ao, na epatamo milo ikalaema: ka:piya:, ibi anagiyamidalema: piyamo. <sup>52</sup> Numa:la:, naimano iyaiya tabono tanaloma: anagiyamida tanalote epo magumulo ka:pemaigamene. Ebema: me tetene wagilimite moto idilo paibu atu alailama:te da:pola:nama:na: ibi teta:mo anagiyamidalete, netewa-kapiyate netewapiatamo gowelaopima: keda:ma:na: ega:walo netewate netewa-kapiyatamo atumu gowelaopima: ka:keda:ma:na:. <sup>53</sup> Iyo, iba:te ma kunu ka:gowelaoma:na:, nabiate ibino koiatamo ega:walo koiate ibino nabiatamo, menokobiate ibino buwelemela:tamo ega:walo buwelemela:te ibino menokobiatamo, kamiyala:te ibino awino menokobiatamo ega:walo ebe menokobiate ibino etelamigatamo.”

*Ya:sute Epono Iyatawa: Tanaloma: Degiya*

*Ma:t 16.2-3*

<sup>54</sup> Ebene Ya:sute epo bilibilinomatamo negiya, “La: egelate da:niwisigana eba apulo bubu odolonalo duma:ema, la: ma kunu kegelamamota, ‘Ulamate kowomene,’ ebene ebe tanalote nanitaboma: keda:mene. <sup>55</sup> Ega:walo me tanalo idila. La: awa ega:walo siyele ibino gowela tanalo duma:ema ma kunu kegelamamota, ‘Egelate enaenanomoma: keda:mene,’ ebene ebe tanalote nanitaboma: keda:mene. <sup>56</sup> Iyo, la: me opola tobolola ibino iyaiya tanalo ulamole iyatawalata, wiyasiya me tetelo Godote la: magumulo dosiyodilolena ebe iyaiya tanalono magumu la: wadenomamo beda:ma: kiyatawawena:? Mabu la: mena netewa epolata!”

*A:imano Goweladawago Gelebadima: Eda: Tanalo*

*Ma:t 5.25-26*

<sup>57</sup> Ebene Ya:sute ebene tabo moga:melo walo na:kegiya, “Beda: mabuma: la: a:ka:tuwa: la:imano tanalo wadenomamo kanagilama:wena:? <sup>58</sup> A:ma:tamo da:dowana ebe lumagite a:ma: gabamani dubu kawotamo demagatatamene, la: ebetamo nemaimia:no modobola a:ma: dopamo goweladawago gelebadima: na:nediyala:. A:ma: ebe gelebadikobi midia:no, nanitabola, ebete a:ma: kawo dubutamo kemagatama:ta, ebene kawo dubute wiyasiya a:imano kuba anagiyamidametate a:ma: polisi dubutamo eba nalibolo, ebete a:ma: idoko moto guamo ebo ka:niyatima:ta. <sup>59</sup> Na a:ma:tamo negemo, a:ma: idoko moto gulo eba nokolilo, gabamani dubute kebako tete wiyama: a:ma: danatamene, a:ma:le ebako wiya modobutinomo modobuta:wete duliynomolamo walo ka:ka:pema:ta, wiyasiya a:ma:le ebe wiya modobutia:no a:ka:pemaigaemene.”

## 13

*La:imano Kubane Olobila:oa:no La: Ka:elaomamota*

<sup>1</sup> Ebe tetelo Ya:suago da:pola:niya ebe epo epetapiate ebe naniya Ga:lili opo epono tanaloma:, iba:te sipi-goeogoeo alukoletete kalima Godotamo eba ikameolo Paeletekono gowelaopiate iba:tamo pemaimite ebo panakapulamiya. <sup>2</sup> Ya:sute wiyasiya ebe epatamo negiya, “La:imano woki keba kunula:ka? Ga:lili opo epo epetapi kubakubadopola:ka:, wiyasiya Paeletete danakapulami ibi kapiya kubakubanomola:ka? Godote ibi kapiyatamo dowate kuba wiya ebema: kikalamilite? <sup>3</sup> Ao, eba kunua:! Na la:tamo

negemo, la: bilibilinomo la:imano kubane olobila:oa:no la: ebe atumu ka:ka:elaomamota. <sup>4</sup> Ega:walo me tanalo idi na:kemalagidilala; Silomo idili motonomote kagate 18 epo danakapulami, ibino tanaloma: la:imano woki keba kunula:ka:? Ebe da:elaiya ibi kapiyate kubakubanomola:ka:, wiyasiya Yelusalema duliynomolo epo epetapi wadewade epola:ka:? <sup>5</sup> Ao, eba kunua:! Na la:tamo negemo, la: bilibilinomo la:imano kubane olobila:oa:no la: atumu ka:ka:elaomamota.”

*Noloa: Da:imi Kewano Iyatulame Oi*

<sup>6</sup> Ebene Ya:sute iba:tamo me iyatulame oi tabo negiya, “Dubu idite ebenu pali magumamo da:imi kewa ami, ebenu ebete walone da:imi tapioma: da:pi da:imi ka:pulamea. <sup>7</sup> Ebema: ebete pali wokodawatamo negi, ‘Numa:, na netewa-kapiya ulamalo me kewalo da:imi dolenamo wiyasiya akulama:lemo. Modobola a:ma: nema:lia mabu me kewate pali ebe kubaimina.’

<sup>8</sup> “Pali wokodawate wiyasiya negi, ‘Kawodawa, modobola:ka: na me kapiya ulamalo kuma:tepanamo. Na damela walo kelapate kewa mabuamo wade damela goeogoeono neago kaminaolemenatemamo, <sup>9</sup> ebema: diyala, ulama idilo kewate da:ba:nolomene. Modobola a me tetelo katepanalema:, a:kema:lima:, wiyasiya noloa:no kema:limamo.’ ”

*Ya:sute Wokoa: Talena Egelalo Waba Kuba Kamiyale Wadekobi Da:midia*

<sup>10</sup> Ebene Yu epono wokoa: talena egela idilo Ya:sute ibino balidi ibilamole motolo epo iyatulamiti. <sup>11</sup> Ibino taneba magumulo kamiyale idi okoliti, ebe 18 ulama magumulo kuba uliyante ebetamo dikamiya ebe temetemetemete uminami, ebema: ebete tuduwatalo pata:nami, waba uwamidate wadenomamo utima: modobonomoa. <sup>12</sup> Ya:sute ebe umite ebe eba ka:milo negiya, “Kamiyale, a:ma: dumitanamiya Godote ebe temetemenomale epalamiolema:ta!” <sup>13</sup> Ebene Ya:sute ebetamo koto dowatiliya, ebe tetenomolo ebete waba uwamidate wadenomamo utite Godotamo kalakala tabo ebo adipatiya.

<sup>14</sup> Wiyasiya balidi ibilamole moto namutudawate Ya:sutamona:dowiya mabu ebete wokoa: talena egelalo ebe kamiyale wadekobi a:midia. Ebema: ebe dubute epatamo negiya, “Sikisi egela ba:pola:na epate woko osiyodiloma: La: ebe sikisi egelalo na:pelama:la:, me dubute la:imano temeteme tanaloma: la: kowalubilitama:, wiyasiya aimano talena egelaloa:!”

<sup>15</sup> Ya:sute wiyasiya ebetamo negiya, “La: mena netewa epolata! Wokoa: talena egelalo la: la:imano kau-goeo o donoki-goeo ibino ale pepalamiola:wete obo nio baiamo emagatalenakomata, a, nanitabola:ka:?”

<sup>16</sup> Wiyasiya me kamiyale ebe A:ibalayamakono buwele idila. Saitanate ebe 18 ulamalo ala:mo matuomeiya, ebema: Godokono talena egelalo ale ebe walubite ebenu ale depalamiolema: ebe wade tanalola!” <sup>17</sup> Ya:sute ebe tabo da:kiyawaiya ebe tetelo ebe odiyobopi bilibilinomate nilipoutiya, wiyasiya epetapi bilibilinomate nekalakalautiya mabu Ya:sute iyaiya tanalo bilibilinomo wadenomamo osiyodilolenami.

*Mastada Kikopuno Iyatulame Oi*

*Ma:t 13.31; Mak 4.30-32*

<sup>18</sup> Ebene Ya:sute negiya, “Godote Kawo Elawodawama: deda:na, ebe tanalo keba kunula:ka:? Nale ebe tanalo beda: ula:mo nakawokalimo? <sup>19</sup> Ebe tanalo ebe mastada kikopu keba kunula:ka: eba kunula. Dubute amite, ebe da:peso kikopute apete kawo kewama: deda:mene, ebe tetelo olaolate pelamete ebe kewa katomolo ba:pilukulionama:na:.”

*Palowa Bae Gamagamaimino Tuwae Inamabuno Iyatulame Oi*

*Ma:t 13.33*

<sup>20</sup> Ebene Ya:sute walo na:kegiya, “Godote Kawo Elawodawama: deda:na, nale ebe tanalo beda: ula:mo nakawokalimo? <sup>21</sup> Ebe tanalo ebe ma kunula. Kamiyale idite modobo palowa lawete gamagamaimino tuwae inamabu kela:mo aminalete ebo ewegedi, ebene gamagamaimino inamabute palowa lawenomo eba lawelo palowa baete unamo ebo maigi.”

*Ta:kumi Gigiyuno Tanalo*

*Ma:t 7.13-14,21-23*

<sup>22</sup> Ebene Ya:sute Yelusalema kawo duliynomolamo eba tolo ebete kawokawo duliynomolo epetapi ega:walo egege duliynomololo epo iyatulama:go tiya. <sup>23</sup> Ebe tetelo lumagi idite ebetamo negiya, “Kawodawa, epo bilibilinomo magumulo kapiyakapiyanomate igilo mula: tanalo ba:kelaema:na:?”

Ya:sute iba:tamo nowamiya, <sup>24</sup> “La: Godokono Unu Duliynomolono ta:kumi gigiyudo opila:oma: woki kawonomamo niyatinala:, mabu nale la:tamo negemo, epetapi bilibilinomate ebe gigiyudo opila:oma: dowagelema:na: wiyasiya iba:te a:ka:modoboma:na:. <sup>25</sup> Numa:la:, moto namutudawate maigate gigiyu demopimene, ebe tetelo la: balalo putitatawete gigiyu eba panakamilo ka:pegelamamota, ‘Kawodawa, gigiyu na:pa:iyamidaeama:!’ wiyasiya ebete ma kunu kegemene, ‘Na iyatawa: la:imano tanalo. La: kebe epola:ka:?’ <sup>26</sup> Ebe tetelo la: ma kunu kegelamamota, ‘A a:ma:go bae naote da:imi obo a:nionakima:, iyo, a:ma: aimano duliynomololo epo iyatulamenakiyata!’ <sup>27</sup> Ebete wiyasiya la:tamo walo ka:kegemene, ‘Na iyatawa: la:imano tanalo, la: kebene ka:pelama:ema? La: kuba osiyodilolepilata, nagodone na:tolama:la:!’ <sup>28</sup> Ebema: ebe tetelo la: muludopolo nutitatawete, la: Godokono Unu Duliynomolo magumulo A:ibalayamako, Aisa:keko, Ya:ikoboko, ega:walo Godokono woki awokalimipi bilibilinomo kulaemamota, wiyasiya Godote la: iyabaiamo diyaleketamene, la: lalo eba oliomolelo kawonomamo kiimimamota. <sup>29</sup> Numa:la:, ebe tetelo epo bilibilinomate me opo kawonomono apune apune pelamote, Godote Kawo Elawodawama: deda:na iba:te ebe duliynomolono soliyomu magumulo ka:pa:pola:nama:na:. <sup>30</sup> Nanitabola, ibi bilibilinomo magumulo walogabopiate wiyasiya dopopima: keda:oma:na:, ega:walo dopopiate wiyasiya walogabopima: keda:oma:na:.”

*Ya:sute Yelusalema Duliynomolono Tanaloma: Tepo Temeteme Diyatawiya*

*Ma:t 23.37-39*

<sup>31</sup> Ebe tetenomolo Pa:lisi tanebapi dubu epetapiate pelamete Ya:sutamo na:pegeliya, “A:ma: me duliynomolone iyabaiamo nalaula:, mabu Kawo Elawodubu Elodite a:ma: anakapuima: ubi niyatina.”

<sup>32</sup> Ya:sute wiyasiya iba:tamo negiya, “La: tolama:wete ebe elawoa: tumu gaatamo ma kunu na:negelala:, ‘Ka:lo ega:walo dumutu na kubakuba uliyana epagodone alibolete temetema:gopi wadekobi ka:midiolemamo, ebene nale pino naimano woko kopoliyamamo.’” <sup>33</sup> Ebene Ya:sute walo na:kegiya, “Nanitabola, na ka:lo me duliynomolone na:tutamo. Ka:lo, dumutu, ega:walo pino nale me gabodo tote Yelusalemamo ka:nemaigamamo. Mabu epate Yelusalemalo Godokono woki awokalimipi anakapulamenakiya, ebema: modoboa: nale duliynomolo idilo a:ema:, iyo, iba:te na atumu Yelusalemalo nakanakapunaema:na:.”

<sup>34</sup> “O Yelusalema, Yelusalema! A:ma:le Godokono woki awokalimipi anakapulamenakota, ega:walo ebete a:ma: kowalubitama: dapalibolenako, a:ma:le ibi nokolamo mapelama:welo akanakapulamenakota. Tete

geyageyanomolo na ubi niyatinaimo a:imano epo naimano etakamo kitakeamidalema:, kakabate ebena gudi ditakeamidalenako eba kunu, wiyasiya a:ma: ubia:noma: eda:namiyata! <sup>35</sup> Ebema: umu numita:, a:imano duliyoumolote kubanomo ka:kubamene. Nale a:ma:tamo negemo, a:imano epate na tete geyageyanomolo a:kunaema:na:, wiyasiya a:imano walonepiate Godotamo ma kunu degelama:na:, ‘A:imano mailago da:pita, ale ebe unamo kadipatemalema:!’ ebe tetelo nale walo da:ka:pemo iba:te na ebo kunaema:na:.”

## 14

### *Ya:sute Ape Alupae Temetema:go Dubu Wadekobi Da:midiya*

<sup>1</sup> Ebene Yu epono wokoa: talena egela idilo Ya:sute bae nama: Pa:lisi tanebapino watodawa idino motamo eba nodolutalo, ebolo da:pola:niya ebe epate ebe balidi kodakodamo umitiya. <sup>2</sup> Ebe tetelo dubu idi ape alupae temetemetete duminami, ebete Ya:sukono ololo apuamo da:piya, <sup>3</sup> ebema: Ya:sute Godokono Totomu iyatulamepi ega:walo Pa:lisi tanebapi dubatamo negiya, “A:imano totomu tabote keba kunu kiyatuamenale? Wokoa: talena egelalo lumagi wadekobi midima: modobola:ka: o kubala:ka:?”

<sup>4</sup> Wiyasiya iba:te tabo idi kegeiya:, ebene Ya:sute ebe dubu kotamo lawete ebe wadekobi midite ebe ebo nalibiya. <sup>5</sup> Ebene Ya:sute iba:tamo negiya, “A:imano gudute talena egelalo damela gugamo da:negamene, a:ma:le ebe samamo ka:nowalubima:ta, a, nanitabola:ka:? Iyo, ebe atu egelalo a:imano kau-goeote obo gula:mo da:negamene, a:ma: atumu ebe samamo ka:nidimuima:ta.”

<sup>6</sup> Ebema: iba:te ilipote Ya:sutamo wiya tabo gelama: ka:modobiya:.

### *Ya:sute Soliyomuno Amama Tanaloma: Diyatulamiya*

<sup>7</sup> Ebene tete idilo Ya:sute bae nao bailo eba okolitalo, moto namutudawate dopamo deka:la:miya ebena soliyomu bae ka:penaoma:, ebe dubate da:pelamiya ibi ubila kawokawo epono ilukuli bailo pilukulima:. Ya:sute ebe tanalo umite iba:tamo iyatulame oi idi ma kunu kiyawaiya, <sup>8</sup> “Dubu idite oli kamiyale lawe soliyomu osiyodilo tetelo ebete a:ma: eba:go bae nama: danatamene, ebe tetelo a:ma:le kawodawano okoli baiamo akonokoliala:. Diyala, kawo dubu idite da:ba:pemene, <sup>9</sup> ebema: soliyomu namutudawate pete a:ma:tamo ma kunu ka:pegemene, ‘A:ma: eba:, nepauwa! Me kawo baiamo me dubute ka:pokolimene!’ Ebe tetelo a:ma: eba ilipolo da:peso lumagino okoli bainomo kelaema:ta. <sup>10</sup> Ebema: modobola a:ma: bae nama: da:pa:emene, ebe tetelo a:ma: da:pesodawano okoli bainomote na:pelawiye, ebena soliyomu namutudawate pete a:ma:tamo ma kunu ka:pegemene, ‘Namutudawa, me da:peso okoli bai atepawete, kawo okoli bai nelawa:.’ Ebene bae denauta ebe epo bilibilinomate a:ma: eba umitalo, ebete a:ma: eba kunu kekalakalaima:ta, <sup>11</sup> mabu nanitabola, lumagite ebe a:ka:tuwa: ebe kawoma: da:midimene Godote ebe da:pesoma: ka:midimene, ega:walo kebe lumagite ebe a:ka:tuwa: ebe da:pesoma: da:midimene Godote wiyasiya ebe kawoma: ka:midimene.”

<sup>12</sup> Ebene Ya:sute bae kebe motolo kenitiyale, ebete ebe moto namutudawatamo negiya, “A:ma:le soliyomu dosiyodilaemene ebe tetelo a:imano duliyoumolo epo, ega:walo a:imano nanila ekakila, ega:walo a:imano kalima epo epetapi, ega:walo a:imano opolo dilukuliona inamabu bilibila:gopi akoka:la:miala:, mabu ebako epate a:ma:tamo walo ka:ka:wiaoma:na:. <sup>13</sup> Wiyasiya a:ma: soliyomu dosiyodilaemene, ebe tetelo inamabua:pi, agowa kubakubapi, ega:walo balidi tamiolamepi, ebakobako



epo neka:la:miye soliyomu baiamo, <sup>14</sup> mabu iba:godolo inamabu puliyala a:ma:tamo wiyaoma:. A:ma:le eba kunu dosiyodilawenakomene, Godote a:ma: wadenomamo bowalubinakoma:ta, ega:walo tuputupu epate a:e magumune demaimioma:na: ebe tetelo ebete wade wiya idi a:ma:tamo walo ka:kikaema:ta.”

*Kawo Soliyomuno Iyatulame Oi*  
*Ma:t 22.1-10*

<sup>15</sup> Ebene Ya:suago bae nao bailo da:pola:niya, ibi magumulo lumagi idite ebene tabo olowite ebetamo negiya, “Godote Kawo Elawodawama: deda:na, ebe duliyaomololo bae denaoma:na: ebe epate kekalakalaoma:na:, kalakala beda: kawonomola:ka!”

<sup>16</sup> Ya:sute wiyasiya ebetamo negiya, “Dubu idite kawo soliyomu osiyodilo nopo eba iyatilo tabo dopamo epo epetapi bilibilinomatamo nalibi iba:te ka:pelaema:. <sup>17</sup> Ebene soliyomu egelate da:pi, ebete ebene wokodawa ebo alibi ebe atu epo ka:kiyawaolamenatoma:. Ebene wokodawate tote iba:tamo na:negi, ‘La: soliyomu baiamo na:pelama:la:, inamabu bilibili-nomo a:modoboilaema:,’ <sup>18</sup> wiyasiya ibi bilibilinomate pelaema: ubia:noma: eda:ote idawate tabo idi genaki, idawate tabo idi genaki, eba kunu wageli-tiya.

“Ibino taneba magumulo idawate kawo dubuno wokodawatamo negi, ‘Na pali amio bai maniamo ka:lo elawa:kamo, ebema: na ebe opo uima: tutamo. Niyata, na a:ka:pemo.’ <sup>19</sup> Idawate na:kegi, ‘Na teni kau-goeogoeo maniamo ka:lo uwata:kamo, ebema: na iba:godolo woko osiyodiloma: tutamo. Niyata, na a:ka:pemo.’ <sup>20</sup> Idawate walo na:kegi, ‘Na kamiyale ka:lonomo aida:kamo, ebema: na pema: modoboa:.’

<sup>21</sup> “Ebene wokodawate ebene namutudawatamo ka:pete ebe epono ubia: tanalo ebe napani. Kawo dubute ebene tabo dolowi, ebete dowate wokodawa ebo ani, ‘A:ma: samonomamo walo na:ka:toa. A:ma: kawo duliyaomolamo nemaigawete, ebe duliyaomolono kawokawo ega:walo egege gabodo eba tolo, inamabua:pi, ega:walo agowa kubakubapi, ega:walo balidi tamiolamepi, ibi bilibilinomo me soliyomu baiamo nemagaeliye.’

<sup>22</sup> “Ebene wokodawate walo da:kolowami, ebe tetelo ebete na:pegi, ‘Kawodawa, a:ma:le degeawa:ka nale ebe tanalo a:nosiyodilomo. Epo bilibilinomate a:pelama:, wiyasiya soliyomu bailo tete kawodopo bitana epetapiate ka:pelaema:.’

<sup>23</sup> “Ebema: kawo dubute ebetamo na:kegi, ‘A:ma: walo na:ka:toa, tumulo dilukuliona ega:walo iyaiya gabolo dowapata:lamita, ebe epo samamo nowalolatela:wete ibi atumu na:kemagaeliye naimano soliyomu motote ketabokama:.’ <sup>24</sup> Ebene ebe kawo dubute ebene moto epatamo olobigate na:kegi, ‘Nale la: nanitabonomolo analemata, nale dopamo deka:la:imo, ka:lo ebe epate ibino ubia: tanalo dawokalima:ka, ibino taneba magumulo kapiya lumagi idite naimano soliyomu bae a:kenamene.’ ”

*Ya:suko Waloma:ta Tanalo*  
*Ma:t 10.37-38*

<sup>25</sup> Ebene epo bilibilinomate Ya:suago da:tolamitiya, ebe tetelo ebete polobigate iba:tamo na:pegiya, <sup>26</sup> “Kebe lumagite natamo pema: ubi diy-atimene, ebete ebene nabiwila menokola, ega:walo ebene kamiyalela gudila, ega:walo ebene nanila nanikubila ekakila, iyo, ebene kateneno igilo atumu, ebete ebe tanalo bilibilinomo ginima:mo ilateleano, ebete na waloma:enema: a:ka:modobomene. <sup>27</sup> Iyo, nanitabola, kebe lumagite

ebeno kewa olotolowa agute na waloma:eneano, ebete nago kapimiya toma: a:ka:modobomene.

<sup>28</sup> “Numa:la:, la:imano taneba magumulo lumagi idite idili motonomo etema: ubi diyatimene, ebete dopamo okolite moto eteno mani uwomu wadenomamo malagidilote, ebegodolo da:pola:na ebe mani ma kunu keka:la:miolemene, ebe moto opoliyama: mani modobola:ka: o modoboa:.

<sup>29</sup> Ebete ma kunu wagelea:no ebena motono alo alomote, ebe tetelo mani opoliyate woko datepamene, epate ebe tanalo uimite ebe eba kalakalatelelo <sup>30</sup>kegelama:na:, ‘Moto etema: dowagilimi wiyasiya opoliyama: elawoa:nola, me ebe dubula!’

<sup>31</sup> “Ega:walo me tanalo idila. Kawo elawodubu idite kawo elawodubu ida:go gowelama: dowagelemene, ebete dopamo okolite ebe tanalo wadenomamo eba malagidilutalo ma kunu kegemene, ‘Naimano 10 taoseni gowelaopi dubate elawodubu idino 20 taoseni dubago gwela modobola:ka:?’

<sup>32</sup> Ebete ebena wokilo modoboa:noma: degemene, elawodubu idite muludopone eba pitalo, ebete ebena obiale dubu dopamo kanalibolemene. Ebene iba:te kawo elawodubu iditamo nemaimite ka:negelama:na:, ‘La: beda: ubi kiyata:witama ale la:tamo kikalametama:? A ubila la:go milo kiyatima:.’ ”

<sup>33</sup> Ebema: Ya:sute uwomu tabo ma kunu giya, “Naimano tabono kawo magumu ma kunula, kebe lumagite ebena okoli tanalono bilibilinomo tanalo ginima:mo ilateleano, ebete na waloma:enema: a:ka:modobomene.”

### *Soluno Golate Alatidi Tanalo*

*Ma:t 5.13; Mak 9.50*

<sup>34</sup> Ebene Ya:sute walo na:kegiya, “Solu wadenomola, wiyasiya lumagi idino soluno golate dalatidimene, ebete walo solukobi midima: a:ka:modobomene.\* <sup>35</sup> Numa:la:, epate sosowa ega:walo goeogoeono

ne kubanomoma: gelanaka wiyasiya ebako inamabu pali amio baiamo diyalekema:na:, pali inamabuate wadenomamo kapepeoma:na:. Wiyasiya lumagino tepo magumuno solu eba kunua:. Ebene soluno golate dalatidimene, ebena igilote kubanomoma: eba eda:lo wade woko walo a:kosiyodilonakomene. Ebema: ebete ebena igilo walo wadekobi keba kunu na:ka:midimene? Gabo puliyala! Galagodawa, a:ma: wadenomamo nolowia!”

## 15

### *Sipi-goeote Dalatidi Ebe Iyatulame Oi*

*Ma:t 18.12-14*

<sup>1</sup> Egela idilo ta:kese mani elemasigilo uwatepi ega:walo Godokono Totomu Tabo uwatea:pi ibi epetapi bilibilinomate Ya:sutamoma pelamiya ebena tabo ka:polowioma:. <sup>2</sup> Ebene Pa:lisi tanebapi ega:walo Godokono Totomu iyatulamepiate eba dowaoalo negeliya, “Numa:la:, me dubute kubakuba epo kalakalago uwatete iba:go bae ebo nanako!”

<sup>3</sup> Ebema: Ya:sute me iyatulame oi iba:tamo ma kunu kiyawaiya, <sup>4</sup> “La:imano taneba magumulo lumagi idi ebena 100 sipi-goeogoeo da:pola:mena, ebena kapiyate dalatidimene ebete keba kunu na:kowagelemene? Iyo, ebete 99 sipi-goeogoeo epetapi wade uwago nao bailo miyapate, dalatidi ebe sipi-goeo kapiya idi wadinatote ka:nuimene. <sup>5</sup> Ebete da:nuimene ebe tetelo ebete agute kalakalago kemagaemene. <sup>6</sup> Ebene ebete motamo walo ka:pete ebena namutupi ega:walo ebe niyakabolo dilukulina, ebe epo peka:la:mite iba:tamo ka:pegemene, ‘La:

\* **14:34:** Buka ka:la:mioledawa, me uli tabono magumu ma kunula, solu ebe nanitabokobi mididawano okoli tanalola.

nago kapimiya nekalakalaola; mabu naimano sipi-goeo tumulo dalatidi nale walo a:kelaemo!’ ”

<sup>7</sup> Ebema: Ya:sute tabo ma kunu giya, “Nale la: analemata, kapiya lumagite ebene kubane olobigate woki iyakobi da:midimene, ebe tetelo Godokono Unu Duliyaomololo kalakala kawonomote kitanamene. Wiyasiya 99 epo epetapi iba:te a:ka:tuwa: ibi tuputupupima: degelana, ibi mabuma: Godokono kalakalate nanitabolo a:kitanamene.”

### *Mani Kapiyate Dalatidi Ebe Iyatulame Oi*

<sup>8</sup> “Ega:walo me tanalo idila. Kamiyale idino teni mani da:pola:mena, ebene kapiyate dalatidimene ebe keba kunu na:kowagelemene? Ebete ebene alo pite ega:walo moto gu wadenomamo eba moda:midalo mani wadinatote ebo ka:nuimene. <sup>9</sup> Ebene ebete delaemene ebe tetelo ebene namutupi ega:walo ebe niyakabolo dilukulina, ebete ebe epo ka:la:mite iba:tamo kegemene, ‘La: nago kapimiya nekalakalaola; mabu dalatidi ebe mani nale walo a:kelaemo!’ ”

<sup>10</sup> Ebema: Ya:sute tabo ma kunu giya, “Na la: analemata, kapiya lumagite ebene kubane olobigate woki iyakobi da:midimene, Godokono Unu Duliyaomololo ebene nopopiate atumu kawonomamo kekalakalaoma:na:.”

### *Koite Dalatidi Ebe Iyatulame Oi*

<sup>11</sup> Ebene Ya:sute tabo idi walo na:kegiya, “Koi netewago dubu okolinami, <sup>12</sup> ebene ekawite ebene nabiwitamo negi, ‘A:ma:le a:e tetelo natamo ikanaema: degeawia, ebe inamabu ega:walo damela ka:lo natamo nikanama:.’ Ebe tetelo nabiwite ebene inamabu ega:walo mani tulituliya anagiyamidalelamete ebene gudi netewatamo iyaiya ebo ikalamoli.

<sup>13</sup> “Ebene ekawite bilibili egela ka:lutia:. Ebete nabiwigodone delawi ebe damela kawonomo maniamo midite mani lawete mulu opamo gito ti, ebolo ebete daedale wokilo kubakuba tanalo eba nosiyodilolelo ebene mani gito nopoliyali. <sup>14</sup> Ebene ebe mulu opo kawonomolo bae olopoligo tanalote epatamo ebo pemaigi, ebema: bae kape tanalote ebe kawonomamo lawi. <sup>15</sup> Ebema: ebete tote ebe opo epono dubu idigodolo woko eba nelawelo, ebete ebe tumamo gito alibi ebene goeogoeo ka:nulamenama:. <sup>16</sup> Ebe tetelo epate sosowamo dalomonakiya ebe bae goeogoeoatamo da:pikalamolenaki, ebete tete bilibilinomolo ebe bae naoma: ubi niyatinami, wiyasiya lumagi idite ebetamo nao inamabu kikamenakia:.

<sup>17</sup> “Ebene egela epetapiate dolopoligiya ebete ebene woki iyakobi midite negi, ‘Naimano nabiwino wokopiagodolo nao inamabu bilibilinomo ba:pola:na, iba:te a:ka:tuwa: naonama: modoboa:. Na wiyasiya malo bae kapelo a:ema: wagenamo! <sup>18</sup> Modobola na tote naimano nabiwitamo ma kunu ka:negemamo, ‘Aba, na Godotamo ega:walo a:ma:tamo iyaiya kuba tanalo a:nosiyodilolimo, <sup>19</sup> ebema: na wadenoa: a:ma:le na a:imano guduma: ka:na:ima:. Modobola a:ma: na wiyasiya a:imano wiya: wokodawa idima: na:midina:.’ ” <sup>20</sup> Ebe tetelo ebete maigate ebene nabiwitamo ebo ti.

“Ebene ebete mulune eba pitalo, ebene nabiwite ebe numite ebe kawonomamo nilakapoimilo ebetamo na:puligate ebe eba na:wiyamidalo ebo naboeti. <sup>21</sup> Ebene gudute negi, ‘Nabiwi, na Godotamo ega:walo a:ma:tamo iyaiya kuba tanalo a:nosiyodilolimo, ebema: na wadenoa: a:ma:le na a:imano guduma: ka:na:ima:.’

<sup>22</sup> “Wiyasiya ebene nabiwite wokodawa iditamo negi, ‘Wade kalikunomo samamo adaema:wete naimano koitamo na:pa:pulima:, ega:walo lini

inamabu ebenu kotamo pipulima:wete agowa pata akona:pupuliomiye.\*  
<sup>23</sup> Ebene a:ma: toawete oli ape kau-goeo gadinomo nelawa:wete nanana-galimiye. Ale soliyomu bae eba naonalo kekalakalaonamalema; <sup>24</sup> mabu naimano gudu da:i ebete ka:lo igilo walo a:kelawe, ebete iyabaiamo dalatidi wiyasiya nale ebe walo a:kelaemo.' Ebene ebe tetelo iba:te kalakala ebo wagilimiya.

<sup>25</sup> "Wiyasiya ebe tetelo naniwite nabiwino pali bailo woko ebe nosiyodiluti. Dadimoni ebete woko baine moto tataliamo eba pemaiganalo mae diyamo ega:walo kalakala oaleno diyamo ebo polowini, <sup>26</sup> ebema: ebete wokodawa idi ebetamo ka:minate nalateda:ni, 'Me tanalo keba kunula:ka?'

<sup>27</sup> "Wokodawate ebetamo negeni, 'A:imano ekawi a:pa:ka, ebema: a:imano nabiwite oli ape kau-goeo gadinomo anagalima:ka. Kalakala kawonomote itana mabu ebete olalata:no a:ka:pemaigaka!'

<sup>28</sup> "Ebe mabuma: naniwite dowanate moto guamo odolo ubia:noma: eda:ni, ebenu ebenu nabiwite motone pemaiganate ebe na:petoweomeni motamo ka:podolonama:. <sup>29</sup> Ebete wiyasiya ebenu nabiwitamo negeni, 'A:ma: numa:, na ulama bilibilinomolo a:imano wokodawama: eba eda:nalo, a:ma:le danana:wenakiya nale ubia:noma: keda:nakia:. A:ma:le wiyasiya natamo beda: inamabu kikanama:wia? Eiye! A:ma: natamo da:peso gautu-goeo kikanama:wea:, nale naimano namutupiago eba naolo kekalakalaoma:!' <sup>30</sup> Wiyasiya a:imano gudu idite a:imano inamabu uwatete, dubu bilibili kamiyala:go kuba eba nosiyodilolelo a:imano mani anatumulateli. Ebene ebe lumagite da:pa:ka, a:ma: ebe kalakalakobi ka:mida:ema: oli ape kau-goeo ebetamo anagalima:kata!'

<sup>31</sup> "Ebenu nabiwite ebetamo nowamini, 'Naimano gudu, a:ma: okolina tetelo nago okolinata, naimano inamabu bilibilinomo a:imanola. <sup>32</sup> Wiyasiya a:imano ekawite da:i ebete ka:lo igilo walo a:kelawe, iyo, ebete iyabaiamo dalatidi ale ebe walo a:kelaema:. Ebema: modobola a bae kapimiya eba naonalo kekalakalaonamalema:.' "

## 16

### *Dogodogo Dubuno Inamabu Dulamelemenami Ebe Wokodawano Iyatulame Oi*

<sup>1</sup> Ebene Ya:sute ebe waloma:tapiatamo negiya, "Kawo dubu idite dubu idi iyati ebete ebenu inamabu bilibilinomo wadenomamo kulamelemenama:. Ebene egela epetapi bilibilinomo da:petoiya, epo epetapiate ebe dogodogo dubu napaniya, 'Numa:, a:ma:le diyata:wia ebe wokodawate a:imano inamabu pilo gabodo eba puwatelo ebo nowatutulatenako.'

<sup>2</sup> "Ebe tetelo kawo dubute ebenu wokodawa ka:mite ebetamo negi, 'Na ka:lo dolowimo, ebe tanalo keba kunula:ka? A:ma:le naimano woko eba osiyodilonalo kebako kuba kosiyodilola:wenamiya, modobola a:ma: ebe iyaiya tanalo bilibilinomo a:imano woko bukalo wadenomamo na:tuputupuilama:wete ebo nadaiye nale kiyatawama:. Mabu a:ma: modoboa: naimano inamabu ulamedawama: eda:ma:, ebema: a:ma: ka:lo woko katepama:ta.'

<sup>3</sup> "Ebenu ebe wokodawate ebenu woko baiamo eba tolo tepo magumulo na:negi, 'Kawo dubute naimano woko odiyobi, ebema: na keba kunu

\* **15:22:** Ya:suko tetelo lini inamabu ega:walo agowa pata ibino pupuli tanalono magumu ma kunula. Kawo dubute ebenu lini inamabu wokodawatamo a:kikaemene, wiyasiya ebete ebenu elawo ebenu gudutamo eba ikamelo ebenu lini inamabu ebetamo ebo kikaemene. Ega:walo ebenu kawo motolo ebenu wokopiate agowa patago wapata:laema: talenala, wiyasiya ebenu guda:te a:ka:tuwa: agowa patago kowapata:laema:na:.

na:kowagelemo? Na ubia:nola gowolesi obobole woko osiyodilolema:, na elawoa:nola. Ega:walo na epatamo manima: da:towetoweomo na ilipokobi kolowimamo. <sup>4</sup> Oe, na iyatawala! Naimano woko namutudawa eba masigilo epo epetapi naimano namutupima: ka:midilimamo. Nale eba kunu dosiyodilomo, naimano woko olopoligo tetelo ebe namutupiate naimano iyaiya modoboa: tanalo magumulo kalakalago bowalubininakoma:na:.'

<sup>5</sup> "Ebema: ebe tetelo ebete ebeno woko namutudawa ma kunu masigi. Piyate ebe kawo dubutamo mani wiyaolea:no, ebete ibi bilibilinomo ka:la:mite dopodawatamo negi, 'A:ma: naimano woko namutudawatamo kebako mani ka:wiyaewa:?'

<sup>6</sup> "Ebete negi, 'Nale 100 dolomu alono obo\* duwatimo, nale ka:wiya:.'

"Ebene kawo dubuno inamabu ulamedawate ebetamo negi, 'Mela, a:ma:le duwata:wia ebe pepa. A:ma:le 100 uwomu egebola:wete wiyasiya 50 dolomu nakulola:.'

<sup>7</sup> "Ebene ebete tetedawa iditamo negi, 'A:ma: kebako mani ka:wiyaewa:?'

"Ebete nowami, 'Nale 1,000 witi-laiso baiko† duwatimo, nale ka:wia:.'

"Ebene kawo dubuno inamabu ulamedawate ebetamo negi, 'Mela, a:ma:le duwata:wia ebe pepa. A:ma:le 1,000 uwomu egebola:wete wiyasiya 800 baiko nakulola:.' Ebene kawo dubuno inamabu ulamedawate wiyaolea:pi bilibilinomatamo ma kunu genaki, iyo, ebete me gabodo ebeno woko namutudawa eba masigilo epo bilibilinomo epetapi ebeno namutupima: gito midili.

<sup>8</sup> "Walone kawo dubute ebeno inamabu ulamedawano osiyodilo tanalo iyatawate negi, 'Oe, ebe beda: mulo kawodawala:ka! Ebete na eba kubainamelo ebe a:ka:tuwa: ebe walubi.' "

Ebene Ya:sute ebeno iyatulame oino magumu ma kunu awokalimiya, "Me opolo nanitabokobi midia: epate mulonomoma: eba eda:onalo ibino maniamo iyaiya tanalo osiyodilolenaka ibi kowalubilinama:. Wiyasiya alo magumulo dilukuliona ebe epate tete epetapilo mulo woki malagidiloa:no ibi a:ka:tuwa: ibino maniamo ibi kowalubilina:. <sup>9</sup> Nale la: analemata, modobola la: me opono maniamo epo la:imano namutupima: na:midilinala:, ebema: la:imano a:elao tetelo me opono inamabu dolopoligolametamene, Godokono Unu Duliyomololo la:imano namutupiate la: atumu kalakalago kuwatema:ta.

<sup>10</sup> "Nanitabola, kebe lumagite da:peso tanalo wadenomamo dosiyodilomene, ebete kawo tanalo atumu wadenomamo ka:kosiyodilomene, ega:walo ebete da:peso tanalo magumulo delemasigimene, ebete kawo tanalo magumulo atumu ka:kelemasigimene. <sup>11</sup> Ebema: la: me opolo la:imano inamabu tuputupu gabodo ulamena:no, Unu Duliyomololo da:pola:na ebe wadewade tanalo Godote la:tamo a:kikalamoletamene, <sup>12</sup> ega:walo la:le epetapino inamabu tuputupu gabodo ulamelelamena:no, idawate la:imano inamabunomo la:tamo a:kikalamolema:ta!

<sup>13</sup> "Ega:walo me tanalo idila, lumagite netewa elawodubatamo wokedawama: eda:ma: modoboa:. Ebete eba kunu dowagelemene iditamo eba dowanalo idi nilakapolo bemalagidilonamene, ega:walo ebete iditamo eba utinalo idi ubia:noma: beda:namene. Ebema: a:ma: atumu, Godotamo ega:walo manitamo kapiya tetelo tuduwatama: modoboa:."

\* **16:6:** Yu epate olibi kikopuno ii alono oboma: midilina:kiya, kelisini keba kunula:ka: eba kunula. Ega:walo iba:te ebe alono obo maniamo midilima: dolomu magumamo alateonakiya, mako dolomu 20 litama: eda:onamiya. † **16:7:** Yu epagodolo mako baiko 25 kilogramama: eda:onamiya.



*Ya:sute Wadewade Tabo Epetapi Da:kiyawaiya  
Ma:t 11.12-13; 5.31-32; Mak 10.11-12*

<sup>14</sup> Yu epo magumulo Pa:lisi tanebapiate mani kawonomamo malagidilole-namiya, ebema: ibi epetapiate Ya:sukono tabo olowite ebe nekalakalatitiya. <sup>15</sup> Ebene Ya:sute iba:tamo negiya, “La: epono ololo apulo la:imano unu tama wadekobi midilinamata, wiyasiya Godote la:imano tepo magumuno tanalo iyatawala, mabu epate kebe iyaiya tanalo unamo eba wadipalatelelo wadewadepima: degelana, wiyasiya Godote ebe tanalo kuba abale niboma: gena.

<sup>16</sup> “Godote ebenu Totomu Tabo Mosesedo epatamo dikalamiya ega:walo ebenu woki awokalimpiate Bukamo dakuloliya, ebe tagala tanalono tabote pete Yoneko teta:mo ebo pemaigi. Wiyasiya Yoneko tetene wagilimite Godote Kawo Elawodawama: deda:na ebe oli tanalono tabote a:pe, ebenu epetapiate me Wade Tabo eba kiyawaonalo, epo epetapi bilibilinomate olowite ibi ubila Godokono Wade Duliyomolamo ibi a:ka:tuwa: ibino elawamo nopila:oma. <sup>17</sup> Me tanalo nanitabola. Me opo ega:walo tobolo unu ibino inamabuate tete geyageyanomolo eba pola:nalo walone a:ka:tuwa: kolopoligoma:na:, wiyasiya Godokono Totomu Tabo bilibilinomo magumulo madodo da:pesonomo idite a:kolopoligomene, ebenu tabote uwomua: uwomua: tetelo bitanamene.”

<sup>18</sup> Ebene Ya:sute tabo idi kegiya, “Kebe dubute ebenu kamiyale alibutite kamiyale idi delaemene ebete Godokono ololo apulo pilo tanalo kosiyo-dilomene, ega:walo dubute ebenu kamiyale alibutite, idawate ebe kamiyale delaemene ebete pilo tanalo kosiyo-dilomene.”

*Inamabu Bilibilinomago Dubu Ega:walo Lasalesiko Ibino Tanalo*

<sup>19</sup> Ebene Ya:sute me oi kiyawaiya, “Inamabu bilibilinomago dubu idite okolinami, ebete wiya kawokawo kaliku pupulinaki ega:walo tete bilibilinomolo wadewade nao inamabu ebe naonaki, <sup>20</sup> wiyasiya ebenu moto gigiyu tetelo nigologolo dubute watitanaki, ebenu mailo Lasalesitela, ebenu apelo kani kawokawate pola:menami. <sup>21</sup> Ebete inamabu bilibilinomago dubuno bae nao baine opamo da:pa:guditanaki, ebe bae papana naoma: ubi niyatitanaki, wiyasiya gaagaate da:pelamenakiya ebenu kani ebo pema:menaolemenakiya.

<sup>22</sup> “Ebenu egela idilo nigologolo dubute da:i, Godokono nopopiate ebenu uliyana pelawete Unu Duliyomolamo A:ibalayamatamo gito magatiya, wiyasiya inamabu bilibilinomago dubute da:i, epate ebenu ape pelawete bobamo gito niyatiya. <sup>23</sup> Ebene inamabu bilibilinomagodawate Ela Opolo temeteme magumulo eba nokolilo, mulunomone na:melete A:ibalayamako ebo numi, Lasalesiago dokoliutiya. <sup>24</sup> Ebe tetelo ebete kawonomamo eba negepatelo negi, ‘Aba A:ibalayama! A:ma: na nilakapoinamelo Lasalesiko napaliba. Modobola ebete ebenu nege koto wui obamo aduba:midate naimano mena gibagibakobi na:pa:midina, mabu na me Ela Opolo temeteme kawonomo a:pelaemo!’

<sup>25</sup> “Wiyasiya A:ibalayamate negi, ‘Gudu, a:ma: nemalagidila. A:ma:le opolo dokoliawenamiya ebe tetelo a:ma: wadewade inamabu watenamiy-ata, wiyasiya Lasalesiko kubakuba inamabu watenami. Ebema: numa:, ka:lo ebete wade kalakalago pa:luta, a:ma: wiyasiya kawo temeteme magumulo pa:lutata. <sup>26</sup> Gudu, me tanalo idila. A:imano tetenomolo kawo bolegale bitana, ebema: ale mene la:tamo pa:iwalema: gabo puliyala, ega:walo la:le atamo pa:iwalema: gabo atumu kitana:’

27 “Ebene inamabu bilibilinomago dubute negi, ‘Aba A:ibalayama, nale a:ma: na:toweomata, a:ma: naimano nabiwino motamo Lasalesiko nanalibiye, 28 mabu naimano paibu ekaki ba:pola:na. Modobola ebete iba:tamo tote kawiyana nananalemene, iba:te me kawo temeteme opamo pelamekapoma.’

29 “A:ibalayamate wiyasiya negi, ‘Ao! Godokono tabote iba:godolo bitana, ebete Mosesedo epatamo dikalamiya ega:walo ebenu woki awokalimipiate ebenu Bukamo dakuloliya ebe kawokawo tabo. Modobola iba:te ebe iyaiya tanalo olowiote Godokono ubi tanalamo na:tudila:oma:na.’

30 “Inamabu bilibilinomago dubute negi, ‘Ao, Aba A:ibalayama! Idawate a:ene igilamo maigate iba:tamo da:tomene, iba:te ebe anoano tanalo umite ibino kubane olobila:te woki iyakobi ebo ka:midilima:na.’

31 “A:ibalayamate tabo eba wiyalo negi, ‘Iba:te Moseseko ega:walo Godokono woki awokalimipi dubu epetapiagodone tabo olowioa:no, lumagi idite a:ene iba:tamo da:nemaigamene, iba:te ebe tanalo duima:na: ebe lumagino tabo atumu nanitabokobi a:ka:midima:na.’ ”

## 17

### *Saitanakono Kuba Gabamo Wabuga:ta Tanaloma: Ya:sute Degiya* *Ma:t 18.6-7,21-22; Mak 9.42*

1 Ebene Ya:sute ebe waloma:tapiatamo negiya, “Nanitabola, Saitanakono kuba gabamo wabuga:ta tanalate epatamo kemaimioma:na:, wiyasiya kebe lumagigodone demaimioma:na: Godote ebe lumagitamo kuba wiya kawonomo kikaemene! 2 Ebema: modobola epate ebe lawete ebenu kuwokoba:mo kawo nokolanomo ma:midaomete kewa: kolomamo neba:idiloma:na:, gudu da:peso idite ebenu kuba magumamo gakapoma:.”

3 Ebema: la: a:ka:tuwa: la:imano tanalo wadenomamo nulamenala!  
“A:imano ekawite a:ma:tamo kuba dosiyodilomene, a:ma:le ebe na:totomutiye, ebenu ebete ebenu kubane olobigate ebenu woki iyakobi da:midimene, a:ma: ebenu kuba egebolema:wete na:dodolomatilimiye.

4 Iyo, ebete kapiya egelalo a:ma:tamo sebeni kubakuba tanalo osiyodilote, ebenu ebete sebeni teta:mo walo ka:pete ma kunu dakapanatamene, ‘Naimano naniwi, niyata. Na walo a:ma:tamo kuba a:kosiyodilomo,’ modobola a:ma:le ebenu kuba egebolema:wete ka:dodolomatilima:ta.”

### *Godoko Nanitabokobi Midi Tanalo*

5 Ebene Kawodawa Ya:sute dopamo daliboliya Godokono woko ka:nosiyodiloma:, ebe alibolepi dubate ebetamo negeliya, “Aimano nanitabokobi midi tanalo kawokawokobi na:midiliama:.”

6 Kawodawa Ya:sute eba wiyalo negiya, “Mastada kikopu kawoa:, da:pesonomola. Wiyasiya la:imano nanitabokobi midi tanalote makonoma: deda:mene, la:imano elawote modoboma: eba eda:lo la:le me kewatamo kegelamamota, ‘A:ma: a:ka:tuwa: a:imano dolodolo magobela:wete, kewa: kolomamo na:toa!’ ebenu me kewate la:imano tabamo ka:tuduwatamene.”

### *Wokodawano Woko Tanalo*

7 Ebene Ya:sute walo na:kegiya, “La: me uli tabo wadenomamo ne-malagidilala: Epo magumulo idawate kawo elawodubuma: eda:na ebenu ebegodolo wiya: wokopi epetapi bilibilinomo dilukulina, ebenu osiyodilo tanalo keba kunula:ka:? Kawo elawodubuno wiya: wokodawa idite pali damela obobole woko ega:walo sipi-goeogoeo ulame woko opoliyaalete motamo da:pemene, ebe tetelo ebenu kawodawate ebetamo ma kunu ba:kegemene, ‘A:ma: niyalata, a:imano tanalo dopamo na:numa: A:ma: a:imano bae nawete, walone naimano bae na:pokalimiye?’ 8 Ao, kawo

elawodubute eba kunu a:kowagelemene, wiyasiya ebete ebenu wokedawata ma kunu kegemene, 'Bae okalimino daley: kaliku pula:wete naimano bae nosiyodila, ebene nale bae nao baiamo eba okolilo, a:ma: wadewade bae ega:walo da:imi obo natamo kowadaema:ta. Naimano bae nao tanalo dolopoligomene, a:ma: walone a:imano obo niawete a:imano bae ebo kenama:ta.'

<sup>9</sup> "Me tanalo nanitabola. Kawo elawodubute ebenu wokodawa iyaiya woko osiyodilolema: danamene, ebe tetelo wokodawate ebetamo tuduwatalo ebe woko dopoliyalemene, ebenu kawodawate ebetamo eba kalakalalo wiyasiya kawonomamo a:kemoiomene mabu ebe ebenu wokodawano watodawala. <sup>10</sup> Ebema: la: olowiopi atumu. Kawo Elawodawa Godote la:le kebe iyaiya woko osiyodilolema: danaletamene, modobola la: ebe woko bilibilinomo opoliyala:wete ma kunu kegelamamota, 'A Godokono wokopila. Ebete a beda: tanaloma: kanaile, ale ebenu elawamo kalakalago gito osiyodiloma:, ebema: lumagi idite a moioema: modoboa:. Modobola epate aimano Kawo Elawodawa Godoko kapiya nemoioma:na:!' "

### *Ya:sute Teni Kukulakukulago Dubu Wadekobi Da:midoliya*

<sup>11</sup> Ebene Ya:sute Yelusalema kawo duliyomolamo eba tolo, ebete Samaliya opo ega:walo Ga:lili opo tetenomodo tiya. <sup>12</sup> Ebete duliyomolo idi da:pesamo da:piya teni kukulakukulago dubate eba:go palugote mulune ebetamo kawonomamo na:pegeliya, <sup>13</sup> "Ya:su, Wade Iyatulamedawa, a:ma: a na:nilakapoiama:!"

<sup>14</sup> Ya:sute ibi muluamo nulamete iba:tamo na:negiya, "La: tolama:wete la:imano ape Godotamo kalimagono ikameopiatamo nanawokalilamola:la:."

Ebene iba:te eba tolamelolo, gabo tetelo ibino apete wadekobi ebo nolowia. <sup>15</sup> Ibino taneba magumulo kapiya idi ebenu apete wadekobi dolowiya, ebete ebe tanalo numite ebenu tabo madodo unamo adipatelo Godoko eba moiolo Ya:sutamolo walo na:ka:piya, <sup>16</sup> ebene ebete Ya:sukono agowa mabuamo pegate ebetamo kalakala tabo ebo pa:kiyawaiya. Ebe dubu Samaliya opodawala, <sup>17</sup> ebema: Ya:sute ebenu tanalo umite epatamo negiya, "Numa:la:, Godokono elawote teni dubu wadekobi a:midiole, wiyasiya epetapi naini iba:te ka:pelamea:. <sup>18</sup> Keleka: mabu me kapela dubu, ebe kapiyate ka:pete ebenu kalakala tabo Godotamo da:pa:kiyawao?" <sup>19</sup> Ebene Ya:sute ebetamo negiya, "A:ma: maigawete na:toa. A:imano nanitabokobi midi tanalote a:ma: wadekobi a:mida:ta."

### *Godote Kawo Elawodawama: Deda:na Ebe Tanalono Pemaiga Tete Ma:t 24.23-28,37-41*

<sup>20</sup> Ebene Pa:lisi tanebapi dubu epetapiate Godote Kawo Elawodawama: deda:na ebe tanalono pemaiga tetema: Ya:suko dalatediya, ebete ibino tabo eba wiyalo negiya, "Anoano tanalate la: a:kiyatulamemene ma kunu, Godokono Kawo Elawodawano tete netatali. <sup>21</sup> Lumagi idite a:da: elemasigi tabo ma kunu kegemene, 'Numa:la:, ebe wade tanalote owagilimi, mela!' ega:walo idawate ka:kegemene, 'La: ebe tanalo ebamo na:numa:la:!' Wiyasiya Godokono Kawo Elawodawama: eda: tanalo eba kunua:, mabu ebe tanalo tepo magumuno tanalola, iyo, la:tamo iyalo a:pemaigiya."

<sup>22</sup> Ebene ebete ebe waloma:tapiatamo negiya, "Me tetelo Epono Naniwite me opolo eba okolinalo, me opo epate anoano tanalo ebegodolo ulamenaka. Walone tetelo la: ubi kiyatimamota mako egela walo ka:kuma:ema:, wiyasiya la: a:kuma:ema. <sup>23</sup> Ebe tetelo epetapiate la:tamo ma kunu kegelama:na:, 'Mela, me anoano tanalo na:puma:la:!' o 'Ibe,

ebamo na:numa:la!' wiyasiya la: ibi akowaloma:tala:la. <sup>24</sup> Nanitabola, molete da:la:uwa:midamene ebe tetelo egelate tobolo unu kawonomo ka:pukuimene, ebema: na Epono Naniwite walo da:ka:pemo naimano pe egelate eba kunu kitanamene, iyo, me opo epo bilibilinomate naimano pe tanalo kuima:na. <sup>25</sup> Wiyasiya nanitabola, ebe tanalote pemaiga:no, dopamo me tete epate na ubia:noma: eda:ote natamo temeteme kawokawonomo kikanamonema:na.

<sup>26</sup> "Nanitabola, Nowako tetelo kebako tanalote ka:pemaigiyale, Epono Naniwite walo da:ka:pemene ebe tetelo ebe atu tanalote ka:ka:pemaigamene. <sup>27</sup> Ebe tetelo iba:te bae naota ega:walo elawo da:imi obo kawonomamo niota, dubate kamiyale uwatoleta ega:walo kamiyala:te dubu uwatoleta, iba:te eba kunu eba wagelenalo Nowate kawo peamo ebo opegiya. Ebene ebe tetelo obo kawonomote odolote epo bilibilinomo ebo anakapulamiya. <sup>28</sup> Ega:walo Lotako tetelo demaigiya, ebe atu tanalote eba kunu ka:kemaigamene. Epate bae naota ega:walo elawo da:imi obo kawonomamo niota, ibino inamabu maniamo midioleta ega:walo mani kawonomamo uwateota, pali inamabu amiota ega:walo moto etemoteota, iba:te eba kunu eba wagelenalo <sup>29</sup> Lotate Sodomu duliymolone pemaigate ebo alauliya. Ebene ebe egelalo elate Godokono Unu Duliymolone opamo pegate ibi bilibilinomate ela magumulo gito a:elaiya. <sup>30</sup> Ebema: Godote Epono Naniwino nanitabo tanalo dawokalimene, ebe tetete eba kunu ka:kitanamene.

<sup>31</sup> "Ebe Kawo Egelalo kebe lumagite moto tanatimilo dokolitamene, ebete moto guamo walo a:ka:nopegamene ebenu inamabu uwatema:, ega:walo tumulo woko dosiyodilutamene ebe lumagite atumu ebenu motamo walo a:ka:toamene. <sup>32</sup> Ebema: la: Lotakono kamiyaleno tanalo nemalagidilala:!" <sup>33</sup> Nanitabola, kebe lumagite ebenu kateneno ubi gabodo eba tolo ebenu igilo Godogodone damoeda:mene, ebenu igilote kalatidimene, wiyasiya kebe lumagite ebenu igilo Godoko mabuma: datutimene, ebete nanitabo igilo kelaemene. <sup>34</sup> Nale la: analemata, ebe idokolo dubu netewate kapiya ketalo delanama:na:, Epono Naniwite penate idi eba pelawenalo idi ebo katepanamene. <sup>35</sup> Ega:walo kamiyale netewate bae delapautama:na:, ebete pete idi eba pelawelo idi ebo katepanamene. <sup>36</sup> Ega:walo dubu netewate pali bailo dowapaitama:na:, ebete pete idi eba pelawelo idi ebo katepanamene."†

<sup>37</sup> Ebene Ya:suko waloma:tapiate ebe nalatediya, "Kawodawa, me tanalate kebolo na:kemaimioma:na:?"

Ya:sute wiyasiya iba:tamo negiya, "Abale inamabute kebolo kitanamene, waliate aleola:go ebamo ka:guditama:na:."

## 18

### *Amole Kamiyale Ega:walo Tabo Anagilamedawa Ibino Iyatulame Oi*

<sup>1</sup> Ebene Ya:sute iyatulame oi idi ebe waloma:tapiatamo na:kiyawaiya, mabu ebe ubia:nola iba:te tete bilibilinomolo Godotamo towetowe tabo gela magumulo iba:te wiya tabo samamo lawea:no elawoa:noma: eda:okapoma:. <sup>2</sup> Ebete negiya, "Duliymololo idilo tabo anagilamedawa dubute nokolinami, ebete Godotamo ka:tuduwatanakia: ega:walo ebete

\* **17:32:** Buka ka:la:mioledawa, a:ma: me tanalo niyatawa, Godokono elate Sodomu duliymolamo da:pegiya, ebe tetelo Lotakono kamiyaletu ubi kawonomo iyatiya duliymolamo walo ka:tote ebenu motono inamabu ka:nuwatema:. Ebema: ebe egelalo ebete ela magumulo gito a:iya Sodomu duliymololo epo epetapi bilibilinomago. † **17:36:** Luk 17.36 buka apuno tabo Lukute bukamo kakuloliya:, wiyasiya ebenu buka osiyodilo walogabo apune nanitabokobi mididawa idite akuloliya.

epo ka:nilakapoilamenakia:.<sup>3</sup> Ebe atu duliynomololo amole kamiyale idite na:kokolinami, ebete tete bilibilinomolo tabo anagilamedawatamo penaki ma kunu pegenaki, 'A:ma:le nago da:gowelaona, ebe lumagitamo kuba wiya nikama:!'

<sup>4</sup> "Ebene tabo anagilamedawate tete geyageyadopolo ebene tabo kolowinakia:, wiyasiya walone ebete ebene wokilo ma kunu gi, 'Na Godotamo ka:tuduwatanakoa: ega:walo na epatamo nilakapo kiyatinakoa:,<sup>5</sup> wiyasiya me kamiyaletete tete geyageyalo natamo kawo temeteme ikanamena. Nale ebe walubia:no me temeteme tanalote a:kolopoligomene, ebema: modobola nale ebene ubi tanalamo tuduwatalo eba:go gowelaodawatamo kuba wiya kikaemamo!' "

<sup>6</sup> Ebene Kawodawa Ya:sute negiya, "Me tabo anagilamedawa ebe kuba lumagila, wiyasiya ebete degi, modobola la: ebe tabo wadenomamo nemalagidilala:.<sup>7</sup> La:imano woki keba kunula:ka? Godokono epo magumulo piyate idoko tetelo ega:walo egela tetelo ebetamo towetoweolo diimina, ebete iba:tamo wiya ikalamea:noma: ba:keda:mene? Ega:walo ebete ibi walubilima: ubia:noma: eda:lo tete ba:kegeyageyaima:tepamene?<sup>8</sup> Ao! Nale la: analemata, ebete ibi walubililo iba:go da:gowelaona ebe epatamo kuba wiya samonomamo ka:pikalaemene, wiyasiya Epono Naniwite da:pemene, ebe tetelo ebete me opo epagodolo nanitabokobi miditanalo ba:ka:puimene?"

*Pa:lisi Tanebadawa Ega:walo Ta:kese Uwatedawa Ibino Iyatulame Oi*

<sup>9</sup> Ya:sute me iyatulame oi idi epo epetapiatamo ka:kiyawaiya, mabu ibi a:ka:tuwa: ibi tuputupupima: eba gelanalo ebo gelanakiya epo epetapi wadewade epoa:.<sup>10</sup> Ebete negiya, "Dubu netewate Godoko Amamateno Iya Motamo nodoliya Godotamo towetoweoma:, idi Pa:lisi tanebadawala, idi ta:kese mani elemasigilo uwatedawala.<sup>11</sup> Ebene Pa:lisi dubute ebe a:ka:tuwa: utite ebene tanaloma: ma kunu gi, 'Godo, na a:ma:tamo kalakala tabo kiyawaomo, mabu na me epo epetapidopoa:. Ma kunu na inamabu pilolo kuwatanakoa:, a:da: elemasigi gabodo kepata:nakoa:, ega:walo dubu idino kamiyale pilolo kelawea:. Ega:walo me ta:kese uwatedawate iyaiya kuba dosiyodilolena, na eba kunua:.<sup>12</sup> Na kapiya wuiki magumulo nale netewa egelalo a:imano woko osiyodiloma: bae naoa:no lutanakomo, ega:walo nale duwatanakomo ebe inamabu bilibilinomo anagilamote, epetapi teni apuapu magumune idi kapiya kelawe, idi kapiya kelawe, a:imano apu a:ma:tamo nanitabonomolo ikamenakomata.'

<sup>13</sup> "Wiyasiya ta:kese uwatedawate muludopone nutite, ebete ebene wato opamo tuduta:midate eba utitalo ilipago bodolo anagalimilo negi, 'Godo, na kawokawo kuba a:ma:tamo osiyodilolimo, wiyasiya nale a:ma: na:toweomata, natamo kuba wiya ikanamea:no na na:nilakapoinama:!' "

<sup>14</sup> Ebene Ya:sute negiya, "Na la:tamo negemo, Godote me amama: lumagino kuba egebolemete ebete ebene motamo ebo ti, wiyasiya Pa:lisi dubu eba kunu kowagelea:. Godote ebene tanalo ka:tupugaimea:, ebete ebene kubago eba kunu ti. Mabu nanitabola, lumagite ebe a:ka:tuwa: ebe kawoma: da:midimene Godote ebe da:pesoma: ka:midimene, ega:walo kebe lumagite ebe a:ka:tuwa: ebe da:pesoma: da:midimene Godote wiyasiya ebe kawoma: ka:midimene."

*Ya:sute Guda:tamo Koto Dowatiolelamiya*

*Ma:t 19.13-15; Mak 10.13-16*

<sup>15</sup> Ebene epate gudi egege Ya:sutamono nemagaaliya, ebete ebene koto iba:tamo eba watiolelamelo Godoko kanama: ebete ibi wadenomamo



kowalubilinama: Ebe tetelo ebe waloma:tapiate ebe tanalo umite epo kawiyaya analelo gudi nodiyoboliya, <sup>16</sup> wiyasiya Ya:sute gudi ebetamo eba ka:la:milo ebe waloma:tapiatamo negiya, “Gudi natamo pelaema: modobola. Ako-odiyobola:la:, mabu mako epate Godote Kawo Elawodawama: deda:na ebe duliynomolamo ka:nopila:oma:na. <sup>17</sup> Na la:tamo nani tabo gemo, kebe lumagite gudu da:pesomu aimano Kawo Elawodawa Godoko lawea:no, ebe lumagite ebeno Kalakala Duliynomolamo a:ka:nopegamene.”

*Inamabu Bilibilinomago Dubute Ya:sutamo Da:piya*

*Ma:t 19.16-30; Mak 10.17-31*

<sup>18</sup> Ebene Yu epono watodawa idite Ya:suko eba alateda:lo naniya, “Wade Iyatulamedawa, na beda: tanalo osiyodilote uwomua: igilo ebo na:kelaemo?”

<sup>19</sup> Ya:sute ebetamo negiya, “A:ma:le na wadedawama: beda:ma: keka:na:miawa? Wadedawa idi puliyala, Godoko kapiyate wadedawanomola. <sup>20</sup> A:ma: Godokono Totomu Tabo iyatawala. Lumagi idino kamiyale pilolo akolawa:la:, lumagi akoanakapuma:la:, inamabu pilolo akouwata:la:, lumagi idino tanaloma: a:da: tabo akokiyawala, ega:walo a:imano nabiwila menokola ibino tabamo na:tuduwatanakiye.”

<sup>21</sup> Wiyasiya ebete Ya:sutamo negiya, “Na da:peso tetene wagilimite me totomu bilibilinomo kodakodalo uwatete kapiya idi kadikanaliya:.”

<sup>22</sup> Ya:sute ebeno tabo olowite ebetamo negiya, “A:ma:godolo kapiya tanalote ka:modobona: Modobola epetapiate a:imano inamabu bilibilinomo maniamo uwateometate a:ma:le ebe mani nigologolopi epetapiatamo nanalabaolama: Ebe tetelo a:ma: walo ka:pa:wete na nowaloma:eniye, ebene a:imano inamabu bilibilinomate Godokono Unu Duliynomololo ka:nepola:namene.” <sup>23</sup> Ebete ebe tabo olowite ebeno tepo magumulo mibonomoma: ediya mabu ebe inamabu bilibilinomagodawanomola.

<sup>24</sup> Ya:sute ebe uminate negiya, “Godote Kawo Elawodawama: deda:na, inamabu bilibilinomagopiate ebe duliynomolamo nopila:oma: kodakodanomola! <sup>25</sup> Numa:la:, ka:molo-goeote\* kaliku waluono moe iyado nilupigama: kodakodama: eda:na, gaboanola. Atumu inamabu bilibilinomagodawate Godokono Kawo Elawodawano duliynomolamo nopegama: kodakodanomoma: eda:na, gabote nanitabonomolo a:kitanamene.”

<sup>26</sup> Ebene Ya:sukono tabo olowiopiate ebetamo negeliya, “A:ma:le degeawa: ebe tabote nanitaboma: deda:mene, piyate modobola:ka: Godote ibino igilo mula:lelaema:?”

<sup>27</sup> Ya:sute iba:tamo eba wiyalo negiya, “Epagodolo da:kodakodaona ebe iyaiya tanalo wiyasiya Godogodolo kodakodanomoa:.”

<sup>28</sup> Ebene Pitate Ya:sutamo negiya, “A:ma: numa:, aimano motono inamabu bilibilinomo miyapate a:ma: nowaloma:enata.”

<sup>29</sup> Ya:sute iba:tamo walo na:kegiya, “Na la:tamo nani tabo gemo, kebe lumagite ebeno moto, o ebeno kamiyale, o ebeno nanila ekakila ega:walo ebeno menokobila nabila gudila, ebe iyaiya tanalo Kawo Elawodawa Godoko mabuma: da:miyapamene, <sup>30</sup> ebete me tetelo wiyasiya Godogodone ebe atu tanalo bilibilinomo walo ka:kuwatemene, ega:walo walone ebete uwomua: igilo ka:kelaemene.”

\* **18:25:** Ya:suko tetelo Yu epono tanalo ma kunula, iba:te alagiote ka:molo-goeogoeo kawokawonoma ibino woko osiyodilolenakiya. Iyo, iyaiya tete epetapilo ka:molo-goeogoeate ibino inamabu watanakiya mulu opamo, ega:walo tete epetapilo iba:te pema: watenamiya.

*Ya:sute Ebene A:e Tanaloma: Walo Da:kegiya  
Ma:t 20.17-19; Mak 10.32-34*

<sup>31</sup> Ebene Ya:sute ebene 12 waloma:tapi dubu ebetamo ka:la:mite iba:tamo negiya, “La: nolowiala:, a Yelusalemamo tolamitama:. Ebolo Godokono woki awokalimipiate Epono Naniwi mabuma: Bukamo dakuloliya ebe tanalo bilibilinomate ka:pemaimioma:na:. <sup>32</sup> Iyo, Godote ebe Yua:piatamo kikalaemene, ebene iba:te ebe malogolo eba kalakalatelo ebetamo kowe ka:meolema:na:, <sup>33</sup> ega:walo iba:te pa:ka:pa:ka:mo ebe a:na:ma:ga:midaote ebene ebe gito kanakapuima:na:, wiyasiya ebete netewa-kapiya egelalo a:ene walo ka:kemaigamene.”

<sup>34</sup> Wiyasiya Ya:sute da:kiyawaiya, ebe waloma:tapiate ebe tabono magumu wadenomamo kelawiya:. Ebe tanalote waminalo itani ebema: iba:te wadenomamo kemalagidiliya:.

*Ya:sute Balidi Tamiole Dubu Wadekobi Da:midia  
Ma:t 20.29-34; Mak 10.46-52*

<sup>35</sup> Ebene Ya:sute Yeliko kawo duliomolo niyakabamo eba penapelo, balidi tamiole dubute gabo niyakabolo okolite manima: epo ebe towelamiti. <sup>36</sup> Ebete epo bilibilinomo gabodo da:petolamitiya, ebe tanalo olowite epetapi ebo alateda:liya, “Beda: tanalote ka:pitale?”

<sup>37</sup> Iba:te nowaimiya, “Nasalete duliomolo dubu Ya:sute pita.”

<sup>38</sup> Ebene ebete tabo kawonomamo gelo negiya, “Ya:su, Da:ibidikono A:la:mu! A:ma:le na na:nilakapoinama:!”

<sup>39</sup> Ebe tetelo dopamo da:petolamitiya ebe epate ebe kawiya analo nodiyobiya ebete taboa:no kokolitama:, wiyasiya ebete kawonomamo walo na:kegiya, “Da:ibidikono A:la:mu! A:ma:le na na:nilakapoinama:!”

<sup>40</sup> Ebene Ya:sute ebamo utite balidi tamiole dubuno tanaloma: negiya, “Ebe nemaga:la:.” Ebete niyakabamo da:piya, ebe tetelo Ya:sute ebe nalatediya, <sup>41</sup> “A:ma: beda: ubi kiyata:wita nale a:ma:tamo kosiyodiloma:?”

Ebete negiya, “Kawodawa, na ubila inamabu wadenomamo kulamolema:.”

<sup>42</sup> Ebene Ya:sute ebetamo negiya, “A:ma: balidi na:mela:! A:imano nanitabokobi midi tanalote a:ma: wadekobi a:mida:ta.”

<sup>43</sup> Ebema: nanitabola, ebe tetenomolo ebene balidite wadekobi dolowiomiya, ebete Godoko eba moiolo Ya:suko ebo waloma:tiya, ebene epo bilibilinomate ebe tanalo umite iba:te atumu Godokono mailo unamo ebo adipatiya.

## 19

*Ya:sute Sa:kiyasekono Motamo Da:tiya*

<sup>1</sup> Ebe tetelo Ya:sute Yeliko duliomolo magumudo petuti, <sup>2</sup> ebe duliomololo Sa:kiyaseko nokolinami, ebe ta:kese uwatepino watodawala ega:walo ebe inamabu bilibilinomagodawala. <sup>3</sup> Ebete ebene tepo magumulo negiya, “Ya:suko kebako dawala:ka:?” ebene ebete ebe kuima: ubi kawonomamo niatiti, wiyasiya ebe gopowai dubula ega:walo epo bilibilinomate Ya:suko a:wa:midia, ebe mabuma: ebete Ya:suko uima: modoboa:. <sup>4</sup> Ebema: ebete epono dopo apuamo puligate, umei kewamo gito nodoliya Ya:suko kuima:, mabu Ya:sute ebe gabodo piti. <sup>5</sup> Ebene Ya:sute ebamo pemaigate balidi unamo da:pemeliya, ebe pumite napaniya, “Sa:kiyase, a:ma: samamo na:piwisiga! Na ka:lo egelalo a:imano motolo ka:lutamo.”

<sup>6</sup> Ebe tetelo Sa:kiyasete samamo piwisigate, Ya:suko lawete ebenu motamo kalakala kawonomago gito magatiya, <sup>7</sup> ebenu epo bilibilinomate ebe tanalo umite ubia: tabo ma kunu geliya, “Ebetu kuba lumagino motamo a:to.”

<sup>8</sup> Wiyasiya Sa:kiyasete ebenu motolo epono dopo apulo maigate Ya:sutamoni negiya, “Kawodawa, a:ma: numa:! Ka:lo nale naimano inamabu tulituliya anagiyamidalete, naimano inamabu epetapi nigologolopiatamo kikalamolomamo, ega:walo nale epetapino mani elemasigi gabodo duwate-nakimo netewa-netewa teta:mo walo ka:ka:wiyaolemamo.”

<sup>9</sup> Ebenu Ya:sute negiya, “Ka:lo egelalo Godokono igilo mula: tanalote me motamo a:pe, mabu me dubu atumu ebe A:ibalayamakono walone gudu idila. <sup>10</sup> Nanitabola, piyate kuba osiyodilole tanalo magumulo dalatidiolena, ebe epo uwatete ibino igilo ka:mula:lelaema: na Epono Naniwite ebema: piyamo.”

*Kawo Dubute Wokopiatamo Mani Dikalamoliya Ebe Iyatulame Oi*

*Ma:t 25.14-30*

<sup>11</sup> Ebe tabo dolowiutiya ebe epate iyatawaiya Ya:sute Yelusalema kawo duliomolo niyakabamo a:pemaiga, ebema: iba:te ibino wokilo negeliya, “Diyala, me tetelo Godokono Kawo Elawodawano tanalote atamo da:ba:pemaigamene.”

Ya:sute ibino tanalo iyatawate iyatulame oi idi iba:tamo ma kunu kiyawaiya, <sup>12</sup> “Kawo dubu idite mulu opamo tiya, ebe ubila ebe mulu opolo Kawo Elawodubuno gobobobu nelawete, ebete ebenu duliomolamo ebo ka:ka:pema: <sup>13</sup> Ebete toa:no, dopamo ebenu teni wokopi ebetamo ka:la:mite iditamoni 100 mani, iditamoni 100 mani, ma kunu eba ikalamolelo ibi nanaliya, ‘La: me mani nekawokawoilamiyala: naimano pe uwomuamo.’

<sup>14</sup> “Ebenu ebete mulu opolo eba nokolilo, ebenu opo epo epetapiate ebetamo dowate ebenu walogabo apune tabo atapi ebo aliboliya. Iba:te tolamete tabo ma kunu negeliya, ‘A ubia:nola me dubute aimano Kawo Elawodubuma: eda:ma:, ebete aimano opamo walo a:ka:pemene.’

<sup>15</sup> “Wiyasiya kawo dubute mulu opolo Kawo Elawodubuno gobobobu nelawete ebenu duliomolonomamo walo na:ka:piya. Ebe tetenomolo ebete dopamo piyatamo mani dikalamoliya, ebe wokopi ebetamo na:peka:la:miya ebenu mani uwomu iba:godone kiyatawaoma: <sup>16</sup> Dopodawa ebete pete ebetamo na:pegiya, ‘Kawodawa, a:imano 100 maniamo nale 1,000 mani idi osiyodilimo.’ <sup>17</sup> Kawo dubute ebetamo negiya, ‘Oe! A:ma: wade wokodawalata! A:ma: da:peso tanalo wadenomamo osiyodiliata, ebema: nale a:ma: teni duliomolo ulamedawama: ka:midimamota.’

<sup>18</sup> “Ebenu tetedawa idite pete ebetamo na:pegiya, ‘Kawodawa, a:imano 100 maniamo nale 500 mani idi osiyodilimo,’ <sup>19</sup> ebenu kawo dubute ebetamo negiya, ‘Nale a:ma: paibu duliomolo ulamedawama: ka:midimamota.’

<sup>20</sup> “Walone tetedawa idite pete ebetamo na:pegiya, ‘Kawodawa, me a:imano 100 manila. A:ma: da:toawiyala, na me mani kalikamo wadenomamo matuomeote epate umia: baiamo ebo iyatiyamo. <sup>21</sup> Na a:ma: tolemenamata mabu a:ma: genegene dubunomolata. Epetapiate dalomonaka a:ma: pa:wete ebe inamabu ba:puwatanakoma:ta, ega:walo iba:te damionaka a:ma: ebe inamabu gito ba:petapionakoma:ta a:ma:le a:ka:tuwa: kenaoaema:.’

<sup>22</sup> “Ebema: kawo dubute ebetamo negiya, ‘A:ma: kuba wokodawalata! A:ma:le degeawa:, ebe tabote a:imano kuba awokalimi! Iyo, a:ma: tabo ma kunu egeata, na genegene dubunomola, ega:walo epetapiate dalomonaka nale ebe inamabu ba:puwatanakomo, ega:walo iba:te damionaka nale ebe

inamabu gito ba:petapionakomo. <sup>23</sup> Ebema: mabu keleka: a:ma:le naimano mani baneka wokopiatamo ka:nikalama:wiya? Iba:te mani uwatete woko idi nosiyodilotaleka: kawodopoma: beda:na:, ebene nale pete a:ma:le natamo atu mani wiyasiya kele unudopamo walo ba:kikanama:wena:’

<sup>24</sup> “Ebene kawo dubute ebene opopi nanaliya, ‘La: ebene 100 mani laema:wete 1,000 maniago dubutamo nikama:la:’

<sup>25</sup> “Iba:te wiyasiya ebetamo negeliya, ‘Kawodawa, eba kunua! Ebe lumagite 1,000 mani iyalo uwati!’

<sup>26</sup> “Ebene kawo dubute iba:tamo nowamiya, ‘Na la:tamo negemo, kebe lumagigodolo wadewade woki da:pola:na, idawate ebetamo wadewade tanalo bilibilinomo kikameomene. Wiyasiya kebe lumagigodolo wadewade woki pola:na:no, ebegodolo kebe kapiyakapiya tanalate da:pola:na idawate ebegodone walo ka:kuwatemene. <sup>27</sup> Ega:walo me tanalo idila. Piyate nago gowelaoma: eba wagelenalo ubia:noma: deda:ona nale ibino Kawo Elawodubuma: eda:ma:, la: ibi magaela:wete naimano dopo apulo gowelaono gila:mo gito napanakapulama:la:!’ ”

*Ya:sute Yelusalema Kawo Duliyoumolo Niyakabamo Da:nemaigiya  
Ma:t 21.1-11; Mak 11.1-11; Yon 12.12-19*

<sup>28</sup> Ya:sute me tabo epatamo gete ibi dopolamete Yelusalema kawo duliyoumolo apuamo gito tiya. <sup>29</sup> Ebe tetelo ebete Betapa:gi duliyoumolo ega:walo Betani duliyoumolo niyakabodo tote Olibi Kewakewa Unu Dame-lamo ebo nemaigiya, ebene ebete ebe waloma:tapi netewa dopamo eba nalibolelo <sup>30</sup> iba:tamo negiya, “La: ebe tatali duliyoumolamo toawete, ebe duliyoumolamo da:nemaima:ema donoki-goeo da:peso ala:mo ma:midao ebo ka:nuimamota, lumagite dopamo ebe unamo kokoliya:. Modobola la: ale pamiauwete nemagaiyala:. <sup>31</sup> Idawate la:tamo degemene, ‘La: ebe beda:ma: kepamiawitama?’ la: wiyasiya ma kunu negeliyala:, ‘Kawodawate donoki-goeo ubila.’ ”

<sup>32</sup> Ebene iba:te gabodo tote duliyoumolamo eba nemaimilo Ya:sute ibi keba kunu kanaliyale, iba:te ebe iyaiya tanalo eba kunu nulamiya. <sup>33</sup> Iba:te donoki-goeo da:peso eba pamitalo, ebe goeono namutupiate iba:tamo negeliya, “La: ebe beda:ma: kepamiawitama?”

<sup>34</sup> Iba:te tabo eba wiyalo negeliya, “Kawodawate donoki-goeo ubila.” <sup>35</sup> Ebene iba:te donoki-goeo da:peso Ya:sutamoma magaete, ibino watubino kaliku donoki-goeo unamo alomomete, iba:te Ya:suko ibino kotamo adipatete gito owodimiya. <sup>36</sup> Ebe tetelo Ya:sute eba tutalo epate ibino ga:ga:ga:ga: kaliku pupukulamete gabamo apote, ebete ebe unudo tiya.

<sup>37</sup> Ebete Olibi Kewakewa Unu Damelane eba niwisigalo Yelusalema kawo duliyoumolo niyakabamo da:piya, ebe tetelo ebe dowaloma:tanakiya ebe epo bilibilinomate Godotamo kalakala tabo kapimiya kawonomamo wadipalatelelo ebe ebo moiya, mabu iba:te kawokawo anoano tanalo bilibilinomo ulamiya. <sup>38</sup> Iba:te tabo ma kunu gelitiya,

“Godo, a:imano mailago da:pita,  
modobola a:ma: ebe Kawo Elawodubu kawokobi na:midaye!  
O epala:, la: Godoko moiolo unamo nadipata:la:,  
ebe Unu Duliyoumolono kalakala tanalono mabula!”

<sup>39</sup> Ebene epono taneba magumulo da:pola:niya ebe Pa:lisi tanebapi dubate Ya:suko kawiya naniya, “Iyatulamedawa, a:ma: waloma:tapi nodiyobola:!”

<sup>40</sup> Ya:sute iba:tamo nowamiya, “Nale la:tamo negemo, me epate na moionea:notaleka: wiyasiya gabono nokolate na eba adipanatenelo kawonomamo begelitana:.”

*Ya:sute Yelusalema Duliyomolo Epo Da:liyalamiya*

<sup>41</sup> Ebene Ya:sute Yelusalema niyakabamo pete duliyomolo da:pumiya, ebete iilo <sup>42</sup> negiya, “Yelusalema, nale a:imano milo mabuma: deda:namo, a:ma: ebe tanalo niyatawawetaleka: a:ma: ebe milo belawa:wena:, wiyasiya a:ma: naimano nanitabo tanalo uima: modoboa:! <sup>43</sup> Nanitabola, tete ebe na:pe a:ma:go gowelaopima: deda:ona, iba:te pelamete a:ma: kapanakopa:midama:ta a:imano epo kanakapulaema:, ebene iba:te a:imano tametame apulo gowolesi kawokawonomo eba obobolelo iyaiya unuunu damela kosiyodilolema:na:, a:imano epate ibino igilo ka:mula:lema: iba:te iyabaiamo alautiokapoma:. <sup>44</sup> Ebene piyate a:imano kala ga:dimi magumulo dilukuliona, iba:te ebe epo alukote kopoliyadigalema:na:, ega:walo a:imano kawokawo moto iyalekete nokola idite nokola idi unulo a:kitanamene. Iba:te ma kunu ka:posiyodiloma:na: mabu Godote a:ma: walubima: da:pe, a:ma: ebe tete anaetoamidawete ebe kelawa:wea:!”

*Ya:sute Godoko Amamateno Iya Moto Wadekobi Da:midiya*

*Ma:t 21.12-17; Mak 11.15-19; Yon 2.13-22*

<sup>45</sup> Ebene Ya:sute Godoko Amamateno Iya Motamo tote, ebe motolo ebete inamabu olowamepi nulamete elawonomamo eba na:na:ma:latelelo <sup>46</sup> iba:tamo negiya, “Godokono Bukalo tabo ma kunu bitana, ‘Naimano Moto epate Godoko Amamate Motoma: kegelama:na:,’ la:le wiyasiya pilo epono motoma: a:midimata!”

<sup>47</sup> Ebema: Godotamo kalimagono ikameopino watowatopi, ega:walo Godokono Totomu iyatulamepi, ega:walo Yu epono kawokawo dubu epetapi, iba:te Ya:suko anakapuima: gabo ebe waditiya. Wiyasiya egele epetapilo Ya:sute Godoko Amamateno Iya Motolo epo eba iyatulamitalo, <sup>48</sup> iba:te gabo kumiya: mabu epo bilibilinomate Ya:sukono tabo olowioma: ubi kawonomamo iyatilo iba:te eba:go ebo pola:niya.

## 20

*Yu Watowatopiate Ya:sukono Elawo Mabuma: Ebe Dalatediya*

*Ma:t 21.23-27; Mak 11.27-33*

<sup>1</sup> Egele idilo Ya:sute Godoko Amamateno Iya Motolo epo eba iyatulamitalo Godokono Wade Tabo da:kiyawauti, ebe tetelo Godotamo kalimagono ikameopi elawodubu, Godokono Totomu iyatulamepi, ega:walo kawokawo dubu epetapi, iba:te ebe odiyoboma: ebo pelamiya. <sup>2</sup> Iba:te ebe ma kunu palatediya, “A nanaa:, a:ma: me iyaiya tanalo pokono elawamo kosiyodilola:wena? Ega:walo me elawo a:ma:tamo potele kikametia?”

<sup>3</sup> Ya:sute wiyasiya iba:tamo negiya, “Nale la: dopamo kapiya tanaloma: kalateda:lemamota. Modobola la:le na nananiyala:, <sup>4</sup> Yonete epo obamo dowaduba:midaolenaki, ebe elawo ebetamo potele kikamile? Godotela:ka: o lumagi iditela:ka:?”

<sup>5</sup> Ebema: ibi a:ka:tuwa: ibino taneba magumulo negeliya, “Ale degelama: Godote Yonetamo elawo ikami, ebete kegemene, ‘Beda: mabuma: la:le ebene tabo nanitabokobi ka:mida:wea:’ <sup>6</sup> Ega:walo a modoboa: ebe ma kunu anama:, me opo lumagite Yonetamo elawo ikami. Epate ebe tabo olowite a nokolamo mapeamete kanakapuaema:na:, mabu iba:te negelana Yoneko ebe Godokono woki awokalimidawala.” <sup>7</sup> Ebema: iba:te ibino tepo



magumuno woki waminaolelo Ya:sutamo negeliya, “Yonekono elawo mabu a iyatawa:.”

<sup>8</sup> Ebe tetelo Ya:sute iba:tamo negiya, “Ebema: nale la: atumu akanaletama nale me iyaiya tanalo pokono elawamo kosiyodilolenamo.”

*Tupina Da:imi Pali Atila:pino Iyatulame Oi  
Ma:t 21.33-46; Mak 12.1-12*

<sup>9</sup> Ebene Ya:sute me iyatulame oi epatamo negiya, “Dubute pali osiyodilote tupina da:imi kewa ebo ami, ebe da:imino mailo ebe gala:ipi da:imila. Ebene ebete ebenuo pali atila:pi dubu epetapiatamo gito atepi, iba:te ebolo woko eba osiyodilonalo ebe pali wadenomamo umilo ebenuo da:imi kuwatolemenakoma:, ebenuo ebete mulu opamo tote tete geyageyadopo nokoliatepi. <sup>10</sup> Da:imi tapio tetelo ebete pali atila:piatamo wiya: wokodawa napalibi, ebete iba:godone da:imino mani magumune ebenuo kawodawano apu ka:pelaema:, wiyasiya iba:te ebe wokodawa gaubamo anagalimiote inamabua:no gito nalibiya. <sup>11</sup> Ebene ebete wiya: wokodawa idi walo daka-palibi, iba:te ebe eba kanagalimiolo ebe ilipo ikamete atumu gito kalibiya. <sup>12</sup> Ebene ebete walo idi dakapalibi, ebe netewa-kapiya tete dubula, wiyasiya iba:te ebe bugomokobi midite pali magumune ebe gito neba:idiliya. <sup>13</sup> Ebe tetelo pali namutudawate negi, ‘Na keba kunu na:kowagelemo? Modobola nale kawonomamo demalagidilonamo ebe gudu kanalibomamo. Diyala, iba:te ebetamo da:ba:tudila:oma:na.’

<sup>14</sup> “Wiyasiya ebe pali atila:pi dubate ebe gudu pitalo dumiya, iba:te ibino taneba magumulo negeliya, ‘Numa:la:, me gudute nabiwino inamabu namutudawama: deda:mene, ebe gudute na:pe. Ebema: modobola ale ebe anakapumite ebenuo pali lawenomo kelaemalema:.’ <sup>15</sup> Ebe tetelo iba:te ebe lawete palino kala magumune neba:idilote gito nanakapumiya.”

Ebema: Ya:sute olowiopiatamo negiya, “La:imano woki keba kunula:ka:? Pali namutudawate beda: tanalo na:ka:posiyodilomene atila:pi dubatamo? <sup>16</sup> Nanitabola, ebete pete ibi panakapulamete ebenuo pali epetapiatamo ka:pikalaemene.”

Ebate ebe tabo olowite negeliya, “Ao, ebe kubate a:ka:pemaigamene!”

<sup>17</sup> Ebema: Ya:sute ibi ulamelo negiya, “Godokono Bukalo ditana me tabono magumu keba kunula:ka:?”

‘Moto etepiate iyabaiamo diyatiya  
ebe alote wiyasiya  
motono elawo mabuma: eda:na.’

<sup>18</sup> Numa:la:, ebe alono kodakoda ebe nokola keba kunula:ka: eba kunula. Iyo, me nokola unamo degamene ebe lumagite keta:ta:puwatiomene, ega:walo me nokolate lumagi dita:timene kedagodagoimene.”

<sup>19</sup> Ebene Godokono Totomu tabo iyatulamepi ega:walo Godotamo kalimagono ikameopino watowatopi, iba:te iyatawaiya Ya:sute ebe oi ibino tanaloma: giya, ebema: ibi ubila ebe tetenomolo ebe laema:, wiyasiya epo eba tolelamelo walo gito katepiya.

*Loma Epono Kawo Elawodubunomo Sisatamo\* Ta:kese Mani Ikameo Tanalo*

*Ma:t 22.15-22; Mak 12.13-17*

<sup>20</sup> Ebene Yu watowatopiate Ya:suko laema: gabo eba wadilo dubu epetapiatamo mani ebo ikalamiya iba:te Ya:sutamō tolamete ebe kuba gabamo ka:nowabuga:tama:. Ibi ubila ebegodolo iya tabo olowite ebe tabono tanaloma: Loma gabamanino kapela Kawo Elawodubutamo magatate, ebete ebe ebolo kanakapuima: <sup>21</sup> Ebema: ebe dubate Ya:sutamō pelamete a:da: elemasigi gabodo ebe napaniya, “Iyatulamedawa, a iyatawala a:ma:le da:kiyawawenaka ebe iyaiya tanalo ebe nanitabola, ega:walo a:ma: epo unu nikapiamo kulama:wena:, ma kunu lumagi idi atepalo lumagi idi ebo a:kelawa:emene. Iyo, a:ma: epo Godokono gabo wadenomamo iyatulamenata, <sup>22</sup> ebema: a nanaa:, Loma epono Kawo Elawodubunomo Sisatamo ta:kese mani ikameoma: modobola:ka: o kubala:ka:? A ebetamo ba:kikameoma: o a:kikameoma:?”

<sup>23</sup> Ya:sute ibino mena netewa tanalo iyatawate iba:tamo negiya, <sup>24</sup> “La: mani kapiya natamo nada:la:. Ebe manilo da:pola:na, mailo ega:walo ololo pokonola:ka:?”

Iba:te ebene tabo eba wiyalo negeliya, “Kawo Elawodubunomo Sisakonola.”

<sup>25</sup> Ebene Ya:sute iba:tamo negiya, “Sisakono inamabu Sisatamo nikameala:, wiyasiya Godokono inamabu Godotamo nikameala:.”

<sup>26</sup> Ebene ebe dubate ka:modobiya: epono ololo apulo Ya:suko kuba gabamo kowabuga:tama:, ebema: iba:te eba anoanolo tabo idi kegelija:.

*A:e Magumune Igilamo Maimio Tanalo*

*Ma:t 22.23-33; Mak 12.18-27*

<sup>27</sup> A:e magumune maimioa:noma: degelana, ebe epo Sa:diyusi tanebapila.† Ibi epetapiate Ya:sutamō pelamete tabo ma kunu pegeliya, <sup>28</sup> “Iyatulamedawa, Godokono Bukamo Mosesete tabo ma kunu akuloliya, ‘Dubute a:ete kamiyaletē gudia:no datepamene, ebene ekawite ebe amole lawete ebene naniwino tanaloma: gudi nosiyodilolemene.’ <sup>29</sup> Dopamo tetelo kapiya dubuno sebeni koiate nilukulinamiya. Ibi magumulo dopo gudute kamiyaletē lawete gudi ulamea:no a:iya, <sup>30</sup> ebene ebene ekawite ebene amole kelawete eba kunu kowageliya. <sup>31</sup> Ega:walo tetedawa idite atumu kowageliya, ebene ebe sebeni atu alailama:te gudia:no eba kunu a:elaiya <sup>32</sup> wiyasiya kamiyaletē walone gito a:iya. <sup>33</sup> Ebema: iba:te a:e magumune igilamo demaimioma:na:, ebe Kawo Egelalo ebe kamiyaletē pokono kamiyaletē na:keda:mene, mabu ebe sebeni dubate aida:tepaiya?”

<sup>34</sup> Ebene Ya:sute iba:tamo negiya, “Numa:la:, me opolo dubate kamiyaletē uwatoletē, ebene kamiyaletē atumu dubu akouwatolenaka, <sup>35</sup> wiyasiya Godokono Unu Duliwomololo eba kunua:. Ebete kebe epo ebene wadewade ga:limapi gudima: deka:la:imene, iba:te a:e magumune nanitabonomolo igilamo kemaimioma:na:, ebene ebe tetelo iba:te kamiyaletē walo a:ka:piadiolema:na: ega:walo dubu a:ka:puwatolema:na:. <sup>36</sup> Me

\* **20:19:** Sisako ebe Loma epono Kawo Elawodubunomola, opo kawonomolo ebe kapiya elawonomoma: eda:nami. Ebete ebene gowelaopi iyaiya opamo alibolenaki, ebene iba:te ebe iyaiya opolo eba nilukulionalo epagodone ta:kese mani kawonomo ebo nuwatelamenakiya, ebe maniamo ibino Loma gabamanino iyaiya woko kosiyodilolenama:. † **20:27:** Ya:suko tetelo Sa:diyusi epo ebe Yu epono taneba idila, iba:te Pa:lisi tanebapino iyaiya totomu bilibilinomamo ka:tudila:onakia:. Ega:walo epate a:elaote a:ene walo kemaimiote Godotamo da:nemaimioma:na:, ebe tanalo Sa:diyusi tanebapiate nanitabokobi ka:midinamia:, ebema: iba:te ebe atu nanitabokobi midia: tanalamo epo iyatulamenakiya.

tanalo ebe nanitabola, iba:te a:e magumune emaimiya, ebema: iba:te Godokono nopopimu eba ilukulionalo walo a:ka:elaoma:na:, wiyasiya Godokono gudima: eba eda:olo uwomua: igilago bilukulionama:na:.

<sup>37</sup> Numa:la:, epate a:e magumune demaimioma:na:, ebe tanalo Mosesete a wadenomamo iyatuamiya. Iyo, ebete me tanalo Godokono Bukamo iyatiya, ma kunu elate kewalo dowaiti wiyasiya kewate kolotolitiya:, ebe tetelo Mosesete Kawodawa Godoko ka:milo negiya, 'A:ibalayamako, Aisa:keko, Ya:ikoboko iba:te uwomua: tetelo poko kamamatene, a:ma: ebe Godotela.'

<sup>38</sup> Ebema: la: Sa:diyusi tanebapi, la:imano wokilo na:kemalagidilawenama ebe ewonino igilate olopoligoiya? Ao, kolopoligoiya:, mabu a:elaopiate Godoko kamamatena: wiyasiya piyate igilolo dilukulina ebe eponomate ebe amamatena, iyo, a bilibilinomate ebena uwomua: igilago ilukulinama:!"

<sup>39</sup> Ebe tetelo Godokono Totomu iyatulamepi epetapiate Ya:sutamo negeliya, "Iyo, Iyatulamedawa, a:ma: wadenomamo geata." <sup>40</sup> Nanitabola, ebe tetene wagilimite epate Ya:suko tanalo idima: alateda:ma: na:toletoleutiya.

*Godokono Alibodawa Kelisoko Potelela:ka:*

*Ma:t 22.41-46; Mak 12.35-37*

<sup>41</sup> Ebene Ya:sute iba:tamo negiya, "Epate negelana Godokono Alibodawa Kelisoko ebe Da:ibidikono a:la:mula, ebena walone gudi magumune kawokalamene. Wiyasiya me tanalono magumu keba kunula:ka:? <sup>42</sup> La: numa:la:, Da:ibidite Sam Oale Bukamo tabo ma kunu akuloliya,

'Kawodawa Godote

naimano Kawodawa Kelisotamo nege,

'A:ma: naimano tumudi apuamo na:pokoliya,

<sup>43</sup> ebene a:ma:go gowelaopi

nale ibi a:imano agowa puti

baima: ka:midilimamo.' ' ' "

<sup>44</sup> Ebene Ya:sute tabo moga:melo walo na:kegiya, "Modobola, la: me tabo eba malagidilolo na nanana:la:, Da:ibidite ebena a:la:mu Kelisoko ebena Kawodawama: ka:milo ebete Godokono tumudi apuamo okolima: giya, ebema: ebe tanalote keba kunu na:ka:pemaigamene?"

*Ya:sute Godokono Totomu Iyatulamepino Amama Tanaloma: Degiya*

*Ma:t 23.1-7,28; Mak 12.38-40*

<sup>45</sup> Ebene epo bilibilinomate ebena tabo eba olowiutalo Ya:sute ebe waloma:tapiatamo negiya, <sup>46</sup> "La:le Godokono Totomu iyatulamepi wadenomamo nulama:la:. Ibi ubila ga:ga:ga:ga: kaliku pupuliotte olowame bailo eba wapata:lamelo epate ibi ebo kowalogolema:. Iyo, ibi ubila Yu epono balidi ibilamole moto gulo kawokawo dubuno ilukuli bailo kilukulima:, ega:walo ibi ubila soliyomu osiyodilo tetelo kawokawo ilukuli bailo ka:pola:na:ma:.

<sup>47</sup> Ega:walo iba:te amoleamoleno inamabu a:da: elemasigi tanalodo eba uwatelo ebo opoliyalelamenaka, ebene iba:te ebe tanalo kuba:noma: gelalo tolamete Godotamo balidi eba nibilamolelo ga:ga:ga:ga: towetowe tabo ebo negelanaka, mabu ibi ubila epate ibino tanalo umilo ibi wadewadepima: kegelama:. Ebema: nanitabola, iba:te kuba wiya kawonomo kelaema:na:!"

## 21

*Amole Kamiyalete Godotamo Mani Dikamiya*

*Mak 12.41-44*

<sup>1</sup> Ebene Ya:sute Godoko Amamateno Iya Motolo eba lutalo, inamabu bilibilinomagopiate ibino nilakapo inamabu Godotamo dapalomutiya, ebete ibino tanalo eba umitalo <sup>2</sup> inamabua: amole kamiyaale idi ebo kumiya, ebete mani egege netewa dapalomuti. <sup>3</sup> Ebema: ebete negiya, “Na la:tamo nani tabo gemo, epate mani dapaloma me inamabua: amole kamiyaalete ibi bilibilinomo odoili, <sup>4</sup> mabu inamabu bilibilinomagopiate ibino inamabu epetapi da:luililamenako ebe inamabu paloma, wiyasiya me amole kamiyaale inamabua:nola. Ebete ebena bae uwateono mani alomonomo apalomo.”

*Godoko Amamateno Iya Moto Kubaimi Tanalo*

*Ma:t 24.1-2; Mak 13.1-2*

<sup>5</sup> Ebe tetelo Ya:suko waloma:tapi epetapiate Godoko Amamateno Iya Motoma: ma kunu gelitiya, “Me nokola moto kawokawo wadewadenonomola! Ega:walo epate malo Godotamo nilakapolo dikameonaka, ebe inamabuate wadewadenoma: eda:ona!”

Ebene Ya:sute iba:tamo negiya, <sup>6</sup> “La: me inamabu dulama:witama, walone tetelo ibi bilibilinomate ka:kubakubaoma:na:. Ebe tetelo me iyaiya motono tanaloma: nokola idite nokola idi unulo a:ka:pola:nama:na:, mabu gowelaopiate me nokola bilibilinomo mapitaotele opamo iyalekenomo ka:piyalekema:na:.”

*Kawokawo Temetema:te Pelaema: Ya:sute Degiya*

*Ma:t 24.3-14; Mak 13.3-13*

<sup>7</sup> Ebene iba:te Ya:suko nalatediya, “Iyatulamedawa, Godokono Moto kubaimi tanalote kebe tetelo na:ka:pemaigamene? A beda: anoano tanalate na:kiyatuaemene tete ebe na:pe ebe tanalote ka:pemaigama:?”

<sup>8</sup> Ebene Ya:sute iba:tamo negiya, “La: nanisiwale. Lumagi idite la: demasigilitamene, la: ebena tabo ako-olowiala:, mabu dubu bilibilinomo epetapiate naimano mailamo pelamete ka:pegelama:na:, ‘Na ebe Kelisotela! Tete ebe na:pe!’ wiyasiya la: ibi akowaloma:tala:la:. <sup>9</sup> Ega:walo la:le iyaiya opo epono gowelao tanalo ega:walo ibino gowelao nopo iyati tanalo dolowiaema, ebe mabuma: la: kawonomamo akotoletoleala:. Me tanalate nanitabolo ka:pemaimioma:na:, wiyasiya ebe tete ebe uwomu tetea:.”

<sup>10</sup> Ya:sute iba:tamo walo na:kegiya, “Nanitabola, opo epetapino epate opo epetapino epago ka:gowelaoma:na:, iyo, opo idite opo iditamogowela tanalo kosiyodilomene. <sup>11</sup> Ebene kawokawo mumulate iyaiya opo bilibilinomamo ka:pelaema:na:, ega:walo kawokawo gabugabuno temeteme tanalate ebe iyaiya epo kuwatema:na:, ega:walo iyaiya duliomolo epetapilo epate baea:no kilukulioma:na:, ebena ebe atu tetelo tobolo unulo iyaiya anoano tanalo ega:walo Godokono elawo awokalimino tanalate ka:pemaimioma:na:.”

<sup>12</sup> “Me tanalate maimioa:no kubakubapiate dopamo la: elawamo uwatetate temeteme ebo kikalaema:ta. Iyo, Yu epono balidi ibilamole moto gulo iba:te la:imano tanalo anagilamelelametate la: idoko motamo gito kalomoma:ta, ega:walo na mabuma: iba:te la: iyaiya kawokawo elawodubuno ololo apuamo magataletate, iba:te atumu la:imano tanalo kakanagilamelelaema:ta. <sup>13</sup> Ebe tetelo la: wiyasiya iba:tamo naimano Wade Tabote na:kiyawaiyala:. <sup>14</sup> Ebema: la:le ibino ololo apulo eba lamota:onalola:imano mailo wadekobi keba kunu ka:midila:ema, ebe tetete pemaiga:no la:imano gela tanaloma: woki bilibilima: akoeda:oala:, <sup>15</sup> mabu nale la:tamo mulo woki ega:walo tabo eba ikalamelo, piyate la:go gowelaopima: deda:ona iba:te la:imano nani tabo kubailaema: a:ka:modoboma:na:.”

<sup>16</sup> “Ega:walo me tanalo idila. La:imano nabila menokobila, ega:walo nanila ekakila, ega:walo la:imano kalima epo epetapila namutupila, iba:te la:go da:gowelaona ebe kubakubapino kotamo la: kanalomoma:ta, iyo, la: epetapi la:imano epate gito kanakapulaema:ta. <sup>17</sup> Nanitabola, na mabuma: epo bilibilinomate la:tamo ka:dowaoma:na:, <sup>18</sup> wiyasiya naimano umi magumulo la:imano watono eke idi kapiyate akalatidimene. <sup>19</sup> Ebema: la:imano kodakodalo utitata tanalodo la:le la:imano igilo ma kunu ka:mula:lemamota.”

*Yelusalema Kawo Duliyomolo Kubaimi Tanalo*

*Ma:t 24.15-21; Mak 13.14-19*

<sup>20</sup> Ebene Ya:sute walo na:kegiya, “Iyaiya opono gowelaopiate pelamete Yelusalema dapanakopa:midama:na:, la: ebe tanalo дума:ema la: kiyatawaomamota ebena olalati tete ebe a:pemaiga. <sup>21</sup> Ebema: gowelaopiate pemaimioa:no, modobola Yudiya opo epate dopamo unuunu damelamo nalautioma:na:, ega:walo Yelusalemalo dilukuliona ibi atumu iyabaiamo na:ka:tolaema:na:. Numa:la:, ebe tetelo piyate tumulo da:pola:nama:na: iba:te kawo duliyomolono kala ga:dimi magumamo nopila:oma: modoboa:, mabu iba:te ebolo wade opila:o bai a:ka:nuima:na:. <sup>22</sup> Nanitabola, Godote dopamo ebena Bukamo dakuloliya ebe tanalate nanitabonomolo ka:pemaimioma:na:, iyo, ebe tete ebe Yelusalema duliyomolono kuba wiya lawe egelala. <sup>23</sup> Ebema: numa:la:, lamitulamitu ega:walo nono dikalamena ebe kamiyala:tamo ebe egelate kubanomoma: keda:mene, mabu nanitabola, Godokono kawo dowa tanalomote Yelusalema epatamo eba itanalo, ibino opolo kawokawo tepo temetema:te ka:pemaimioma:na:!  
<sup>24</sup> Iyo, gowelaopiate ibi epetapi gowelaono gila:mo kanakapulaema:na:, ega:walo ibi epetapi ala:mo matuolamolete iyaiya mulu opamo kema:gatalema:na:, ebena nanitabokobi midia:piate Yelusalema duliyomolo ibino agowamo ka:mikitama:na:, Godote iba:tamo dikalaemene ebe tete uwom-uamo.”

*Epono Naniwino Pe Tete*

*Ma:t 24.29-31; Mak 13.24-27*

<sup>25</sup> “Ebena egela, sagana, ega:walo mawele, ibi magumulo kawokawo anoano tanalate da:pemaimioma:na:, me opo kawonomolo epate woki bilibilima: eba eda:olo balidi koba:midaolema:na:, iyo, ebe atu tetelo kewa: kolomono kawokawo ulate maimiote kolomo bala dupalukolema:na:, iba:te ebe obono diyamo dolowima:na: kawonomamo ka:toletoleoma:na:. <sup>26</sup> Ega:walo ebe tetelo tobolo ununo elawoelawo inamabuate kalela:oma:na:, ebema: epate me opono kawo olalati tanalo eba makopelelo, iba:te tole kawonomamo lawete elawoa:noma: ebo keda:oma:na:. <sup>27</sup> Ebene ebe tetelo Epono Naniwite tobolo unune eba piwisigalo iba:te ebe ebo kuima:na:, ebete ebena elawago ega:walo alo kawonomago ka:pemene. <sup>28</sup> Ebema: me temeteme tanalate maimi dowagilima:na:, ebe tetelo la: unamo na:nemeliyala: mabu la:imano igilo mula:le tete ebe netatali.”

*Umei Kewano Tanalo*

*Ma:t 24.32-35; Mak 13.28-31*

<sup>29</sup> Ebene Ya:sute uli tabo iba:tamo ma kunu iyatulamiya, “La: umei kewa ega:walo iyaiya kewano tanalo wadenomamo nemalagidilala: <sup>30</sup> La:le ibino paa mogoiamidale tanalo dulama:ema, ebe tanalote la: kiyatulamema:ta ulamano tete ebe netatali, <sup>31</sup> ebema: me temeteme tanalate maimiolo dulama:ema, la: kiyatawaomamota Godokono Kawo Elawodawano tete ebe



na:pe. <sup>32</sup> Na la:tamo nani tabo gemo, me tanalo bilibilinomate dopamo ka:pemaimioma:na:, walone me tete epate ebo ka:elaoma:na:, <sup>33</sup> iyo, me opo ega:walo tobolo unu iba:te kolopoligoma:na:, wiyasiya naimano tabote a:kolopoligomene, uwomua: tetelo bitanamene.”

### *Olowiolo Ilukuli Tanalo*

<sup>34</sup> “La: a:ka:tuwa: la: wadenomamo nulamenala! La: bae nao tanaloma:, ega:walo elawo da:imi obo nio tanaloma:, ega:walo me opono inamabu uwate tanaloma: woki bilibilima: akoeda:onala:. La: nanisiwale, ebe Kawo Egelate samonomamo da:pemaigamene la: kawonomamo da:bela:wa:oma, me tanalo ebe gubite inamabu danagalimi keba kunula:ka: eba kunula. <sup>35</sup> Iyo, ebe Kawo Egelate me opolo dilukuliona ebe epo bilibilinomatamo ma kunu ka:pemene, <sup>36</sup> ebema: tete bilibilinomolo la: olowiolo eba ilukulinalo Godotamo na:towetoweonala:. Ebe tanalo magumulo la:le ebene elawo lawa:wete, kawokawo temetema:te da:pelaema:na: la: ebe iyaiya tanalo magumudo nemaimiawete Epono Naniwino dopo apulo ka:nelamota:onamamota.”

<sup>37</sup> Ebene egela epetapilo Ya:sute Yelusalemamo da:penaki ebete Godoko Amamateno Iya Motolo epo piyatulamenaki, wiyasiya didokonaki ebete duliymolone walo ka:tonaki Olibi Kewakewa Unu Damelalo ebo nowatanaki. <sup>38</sup> Ebe tetelo epo bilibilinomate duiyanomolo Godoko Amamateno Motamo pelamenakiya ebene tabo ka:polowioma:.

## 22

### *Yu Watowatopiate Ya:suko Anakapuima: Degelitiya*

*Ma:t 26.1-5; Mak 14.1-2; Yon 11.45-53*

<sup>1</sup> Unamo Maiga: Palowa Bae Soliyomu\* ebene mailo idi ebe Aduga:la Soliyomula,† ebene osiyodilo tanalo detataliya, <sup>2</sup> ebe tetelo Godotamo kalimagono ikameopino watowatopi ega:walo Godokono Totomu iyatulamepi dubu, iba:te Ya:suko anakapumi gabo waditiya, wiyasiya iba:te epo tolelamelo awokala kosiyodilutiya:.

### *Yudasite Ya:suko Laema: Nopo Diyatiya*

*Ma:t 26.14-16; Mak 14.10-11*

<sup>3</sup> Ebene Saitanate Keliyota duliymolodawa Yudasikono tepo magumamo opegiya, Ya:sukono 12 waloma:tapino taneba magumulo ebe idila. <sup>4</sup> Ebete Godotamo kalimagono ikameopino watowatopi ega:walo Godoko Amamateno Moto atila:pi dubu iba:tamo tote nopo ebo niyatiya Ya:suko ibino kotamo kiyatima:. <sup>5</sup> Ebe tetelo iba:te ebe tanalo olowite kalakalaolo tabo ebo iyatiya ebetamo mani kikaema:, <sup>6</sup> ebema: Yudasite ebe tabamo tuduwatate,

\* **22:1:** Me Unamo Maiga: Palowa Bae Soliyomu ebe Yu epono soliyomu idila. Aduga:la Soliyomu dolopoligomene, egela idilo me soliyomu idi wagilimite iba:te sebeni egela tetelo bosiyodilonakoma:na:. Me soliyomuno magumu ma kunula. Yu epate Isipiti opone Godokono elawamo da:nemaiminiya, ebe idokolo ibino palowa bae osiyodilolenate wadenomamo okaleona:no iba:te gawagawalo ebo tolameniya. Mabu ebe baete unamo maimioma: tetea:nola, ebema: ebe tanalo malagidiloma: Yu epate me soliyomu bosiyodilonakoma:na:. † **22:1:** Aduga:la Soliyomuno mabu ebe Moseseko tetelo wagilimiya. Ebe tetelo Isipiti Kawo Elawodubu Pa:lote Yu epo bilibilinomo uwatete ibi ebene wiya: wokopima: midiliya, ebema: ebe ubia:nola ibi gito alibolema: ibino Ka:inane opamo. Godote Pa:lokono wato kodakoda tanalo dumiya, ebema: idoko idilo ebete ebene a:e nopodawa Isipiti opamo napaliboni Isipiti epo bilibilinomono dopo gudi kapanakapulamenama:. Ebene ebe idokolo a:e nopodawate Yu epono gudi aduga:lalenate, wiyasiya Isipiti epono gudinomo anakapulameni. Ebe anoano tanalodo Yu epo bilibilinomate Isipiti opone ebo nemaiminiya, ebema: ebe tanalo malagidiloma: iba:te ulama bilibilinomo magumulo Aduga:la Soliyomu bosiyodilonakoma:na:.

iba:godone tote gabo ebo nowadiya epoa: tetelo Ya:suko ibino kotamo kiyatima:.

*Ya:sute Aduga:la Soliyomuno Nao Inamabu Osiyodilolema: Tabo Degiya  
Ma:t 26.17-25; Mak 14.12-21; Yon 13.21-30*

<sup>7</sup> Yu epono osiyodilo tanalo ma kunula, iba:te ulama bilibilinomolo Unamo Maiga: Palowa Bae Soliyomu nao dowagiliminakiya, ebe dopo egelalo iba:te Aduga:la Soliyomuno sipi-goeogoeo egege alukolenakiya. <sup>8</sup> Ebema: Ya:sute Pitako Yoneko ibi netewapi eba nalibolelo negiya, “La: toawete Aduga:la Soliyomuno nao inamabu na:nosiyodiloliyala:, ale ka:penaoma:.”

<sup>9</sup> Iba:te ebetamo negeliya, “Ale kebolo na:ka:nosiyodilolema:?”

<sup>10</sup> Ebete iba:tamo nowamiya, “La: kawo duliyoumolamo na:toala:, ebene obo daguwaita ebe dubute la:go dapalugomene, la:le ebe ebo nowaloma:tiyala:. Ebete kebe motamo ka:nodolomene, <sup>11</sup> la: ebe moto namutudawatamo ma kunu na:negeliyala:, ‘Iyatulamedawate a:ma:tamo ge, moto keleka: nale naimano waloma:tapiago Aduga:la Soliyomu bae ka:penama:?’ <sup>12</sup> Ebe tetelo ebete la: moto guamo kemagatalema:ta, unu motolo tete kawo bitana, iyalo osiyodilaka. La: ebolo nao inamabu na:nosiyodiloliyala:.”

<sup>13</sup> Ebene iba:te tote, Ya:sute kebe tanaloma: kanaliyale, iba:te ebe tanalo nulamete Aduga:la Soliyomuno nao inamabu ebo nosiyodiloliya.

*Ya:suko Malagidilo Bae Nao Tanalono Wagilimi Mabu  
Ma:t 26.26-30; Mak 14.22-26; 1 Kol 11.23-25*

<sup>14</sup> Tete da:peni Ya:sute ebe alibolepi dubago bae nama: ilukuliniya, <sup>15</sup> ebene ebete iba:tamo negeni, “Na ubi kawonomamo niyatinatimo, nale a:ea:no dopamo me Aduga:la Soliyomu la:go kenama:. <sup>16</sup> Ebema: nale la:tamo negemo, nale me soliyomu bae me tetelo walo a:kenamo, wiyasiya Godokono Kawo Elawodawano tete da:pemene, ebe tetelo me soliyomuno magumute nanitabolo dawokalamene nale ebo kenamamo.”

<sup>17</sup> Ebene Ya:sute kalili lawenate Godotamo kalakala tabo genate iba:tamo negeni, “La: me kalili lawa:wete, la: magumulo idite iditamo kikame, idite iditamo kikame, ma kunu nowagela:la:. <sup>18</sup> Nale la:tamo negemo, na me tetelo me elawo da:imi obo walo a:ka:nimo, wiyasiya Godokono Kawo Elawodawano tete da:pemene, ebe tetelo nale ebo ka:nimamo.”

<sup>19</sup> Ebe tetelo ebete bae kelawenate Godotamo kalakala tabo genate, wakamionate iba:tamo eba ikalamolenalo negeni, “Me naimano apela, la: mabuma: Godotamo ikaemo. La:le na malagidilonelo me tanalo nosiyodilonakiyala:.” <sup>20</sup> Ebene ibino bae nao tanalo dolopoligoni, ebete kalili walo kelawenate negeni, “Me kalili ebe Godote epago milolo kilukulinama: oli nopo diyatiya me ebe tanalola. La: mabuma: deka:ka:liyamene, me naimano kalimate ebe nopo kodakodaimina.

<sup>21</sup> “La: numa:la:! Na anakapunamepiatamo dikanaemene, ebe lumagite nago me bae nao bailo ba:luta! <sup>22</sup> Iyo, ebe nanitabola, Epono Naniwite a:eamo ebe na:to, Godote nopo dopamo diyatiya eba kunu, wiyasiya kebe lumagite ebe anakapumipiatamo dikalaemene, ebe dubute kuba wiya kawonomo kelaemene!”

<sup>23</sup> Ebene ibi a:ka:tuwa: ibi magumulo idite idi ananaki, idite idi ananaki, eba kunu eba wagelenalo negelaniya, “Me kuba potele na:kosiyodilomene?”

*Potele Kawodawama: Na:keda:mene*

<sup>24</sup> Ebe tetelo Ya:suko waloma:tapi magumulo potele kawoma: eda: tanaloma: apamineu tanalote maigani. <sup>25</sup> Ebene Ya:sute iba:tamo negeni,

“Godoko nanitabokobi midia:pino kawokawo elawodubate ibi a:ka:tuwa: ibi eba wadipalatelelo epo epetapi elawamo analenaka iba:te ibino ubi tanalamo ka:tudila:onama:, ega:walo ebe kawokawopi ubila epate ibi walubilipima: eba ka:la:milo ibi ebo kemoiolema:. <sup>26</sup> Wiyasiya la:imano tanalo eba kunua:. Modobola la:imano taneba magumulo kawodawate oli ape lumagi keba kunula:ka: ebakodawama: neda:mene, ega:walo la:imano watodawate atumu ebe wiya: wokodawa keba kunula:ka: ebakodawama: na:keda:mene. <sup>27</sup> Numa:la:, wadewade bae nao bailo dokolita epate ebako lumagi kawodawama: gelanaka, wiyasiya kebe lumagite ebetamo bae dadaemenako iba:te ebe wiya: wokodawama: gelanaka. Nanitabola, na wiya: wokodawa keba kunula:ka:, nale la:imano taneba magumulo ebako da:pesodawama: eda:namo, ebema: modobola la: atumu eba kunu nilukuliniyala:.”

<sup>28</sup> “Nanitabola, naimano kodakoda tanalo magumulo da:lutanakimo, la:le na katepana:wenakia:, <sup>29</sup> ebema: Nabiwite na Kawo Elawodubuma: keba kunu ka:midiniyale nale la: atumu eba kunu ka:ka:midilimamota. <sup>30</sup> Ebene na Godokono Unu Duliyomololo Kawo Elawodawama: eba neda:lo, la: nago soliyomu bae nawete da:imi obo ebo ka:niomamota, ega:walo la: kawokawo elawodubuno ilukuli bailo ilukula:wete Isalaela 12 gu epono iyaiya tanalo anagilamelelamepima: keda:omamota.”

*Ya:sute Pitako Danani, A:ma:le Na Iyatawa:noma: Kegema:ta  
Ma:t 26.31-35; Mak 14.27-31; Yon 13.36-38*

<sup>31</sup> Ebene Ya:sute negeni, “Saimono, Saimono, a:ma: nolowia. Dubute witi-laisono tanalo kuima:, da: wadenola: o da: kubanola:, ebete keba kunu kanamogolenakole, Saitanako ubila a:ma: kuba gabamo eba kunu kowabuga:tatama:, ebema: Godote ebe tanalo iyatawate ebetamo modoboma: ge. <sup>32</sup> Ebema: Saimono, nale a:ma: mabuma: Godoko a:toweoma:kamo, ebete a:ma: eba walubilo a:imano nanitabokobi midi tanalote akalatidimene. A:ma: natamo walo da:kolobigaemene, ebe tetelo a:imano ekaki elawokobi na:midiliye.”

<sup>33</sup> Pitate ebetamo nowamini, “Kawodawa, nale a:ma:go idoko motamo tote da:na:emo, na ebe tanaloma: olosiyodilomo.”

<sup>34</sup> Ya:sute wiyasiya negeni, “Pita, na a:ma:tamo negemo, ka:lo idokolo kakabate goea:no a:ma: netewa-kapiya teta:mo na iyatawa:noma: kegema:ta.”

*Ya:sute Gowelaono Gili Laema: Degeni*

<sup>35</sup> Ya:sute iba:tamo negeni, “Nale la: dopamo danaliboletima, la: ma kunu analiamata, ‘Mania:no, ikuwa:no, ega:walo agowa pata:no na:tolamiyala:,’ ebema: ebe tetelo la: modoboa: tanalo a:ka:niyatawaima?”

Iba:te nowaiminiya, “Ao, nigologolo tanalo idi ka:numia:.”

<sup>36</sup> Ebene Ya:sute iba:tamo negeni, “Ka:lo wiyasiya na tabo idi ma kunu gemo, ale eba tolamelolo la:godolo mani o baeno ikuwa da:pola:lametana nuwatiyala:, ega:walo pogodolo gowelaono gili itana:no, modobola ebete ebena lubudino kaliku maniamo na:midite wiyasiya elawo gilite nelaemene. <sup>37</sup> Mabu na la:tamo negemo, Godote naimano tanaloma: ebena Bukamo dakuloliya, tete na:pe ebe tanalote kemaigamene, iyo, buka apuno tabote ma kunu gena, ‘Iba:te ebe kubakubapiyo kapiyama: midiya.’ ”

<sup>38</sup> Ebene iba:te negelaniya, “Kawodawa, a:ma: numa:. Mela, gowelaono gili netewa ba:pola:na!”

Ya:sute nowamini, “Eiye! La: naimano tabono magumu wadenomamo kelawa:wena:. Taula, nitanana.”

*Ya:sute Olibi Kewakewa Unu Damelalo Godotamo Da:towetoweoni*  
*Ma:t 26.36-46; Mak 14.32-42*

<sup>39</sup> Ebene Ya:sute Yelusalema duliyoumolone nemaiganate ebete dopamo keba kunu kosiyodilonakile, eba kunu ebete ebe waloma:tapiago Olibi Kewakewa Unu Damelamo gito tolameniya. <sup>40</sup> Ebete ebe damelamo nemaiganate ibi nanaleni, “La: malo Godotamo na:towetoweonala: mabu la:le Saitanakono kuba gabamo wabuga:ta tanalamo da:ba:gudima.”

<sup>41</sup> Ebene ebete ibi miyapanate kela:mo tonate, ebe tetelo ebete pupamo nokolinate Godotamo ebo na:towetoweoni. <sup>42</sup> Ebete na:geni, “Aba, a:ma: ubi diyata:emene me tepo temeteme kalili nagodone nelawa:. Wiyasiya naimano ubia:, a:ma: a:ka:tuwa: a:imano ubila nosiyodila.” <sup>43</sup> Ebe tetelo Godokono Unu Duliyoumolone nopodawate ebetamo pemaiganate ebe elawokobi ebo pa:midini, <sup>44</sup> ega:walo ebete tepo temeteme kawonomoma: eda:nate elawonomamo Godotamo eba towetoweonalo, ebena kolowate kalimama: eda:omenate opamo ebo ka:ka:liyaomeni.‡

<sup>45</sup> Ebene ebete towetoweo tabo gela baine maiganate ebe waloma:tapiatamo da:peni iba:te tepo temetema:go laonalo pulameni. <sup>46</sup> Ebete iba:tamo negeni, “La: beda: mabuma: kelawenama? La: maimiawete Godotamo na:towetoweonala:, mabu la:le Saitanakono kuba gabamo wabuga:ta tanalamo da:ba:gudima.”

*Yu Watowatopiate Ya:suko Anakapuima: Delaweniya*  
*Ma:t 26.47-56; Mak 14.43-50; Yon 18.3-11*

<sup>47</sup> Ya:sute ebe tabo eba genalo, ebena waloma:tapi 12 magumulo dubu idi Yudasite dubu bilibilinomo epetapi dopolamenate iba:te kapimiya ebo pelameniya. Ebene ebete Ya:sutamo nilakapo tabo genate ebe kapaboeteonama: niyakabamo da:peni, <sup>48</sup> Ya:sute ebetamo negeni, “Yudasi, a:ma: Epono Naniwi eba paboeteolo ebe anakapumipiatamo ikalaema: ka:pa:wa?”

<sup>49</sup> Ebene Ya:suko lawe tanalote maigama: eba penalo, ebe waloma:tapi dubate ebe tanalo uminate negelaniya, “Kawodawa, ale ibi gowelaono gila:mo bakalukolema:?” <sup>50</sup> Ebene ibi magumulo idawate maiganate Godotamo kalimagono ikameopino Ununomo Watodawano moto wokodawa anagaliminate ebena tumudi apuno galo ebo mapitamidameni.

<sup>51</sup> Ya:sute wiyasiya ibi kawiya nanaleni, “Taula, nolodiyobala:!” ebena ebete ebe dubuno galo dologimini ebe tetelo wadekobi nolowini.

<sup>52</sup> Ebene Godotamo kalimagono ikameopino watowatopi, ega:walo Godoko Amamateno Moto atila:pi dubu, ega:walo kawokawo dubu epetapi, iba:te Ya:suko laema: da:pelameniya ebete iba:tamo negeni, “Na pilo lumagila:ka:, o na gowelaodawala:ka:? La:le na lawenema: gowelaono gila:go ega:walo gaubago beda:ma: ka:pelama:ema? <sup>53</sup> Na egela epetapilo Godoko Amamateno Iya Motolo la:imano ololo apulo da:pokolitanakimo, ebe tetelo la:le na kelawena:wea:. Wiyasiya me idoko la:imano tetela, iyo, idoko namutudawama: deda:na ebena elawo tetete a:pemaiga.”

*Pitate Ya:suko Iyatawa:noma: Degeni*

*Ma:t 26.57-58,69-75; Mak 14.53-54,66-72; Yon 18.12-18,25-27*

<sup>54</sup> Ebe tetelo iba:te Ya:suko kotamo kodakodanomolo lawenate, Godotamo kalimagono ikameopino Unu Watodawanomono motamo magataniya, wiyasiya Pitate ibi muludopone waloma:taleni. <sup>55</sup> Ebene epetapiate motono kala magumulo ela madonate eba pola:nalo, Pitate kala ga:dimi magumamo nopeganate iba:go ebo nokolini. <sup>56</sup> Ebe tetelo Pitate elano alolo eba

‡ **22:44:** Luk 22.43-44 buka apuno tabo Lukute bukamo kakuloliya; wiyasiya ebena buka osiyodilo walogabo apune nanitabokobi mididawa idite akuloliya.

nokolinalo, woko buwelete ebe wadenomamo uminate negeni, “Me dubu atumu Ya:suago pata:nami!”

<sup>57</sup> Pitate wiyasiya negeni, “Kamiyale, na iyatawa: ebe!”

<sup>58</sup> Ebene iba:te tete da:pesamo ilukula:tepanate, dubu idite ebe wadenomamo uminate walo nakanani, “A:ma: atumu ebe waloma:tadawa idilata!”

Pitate wiyasiya negeni, “Dubu, na ebe iyatawa:!”

<sup>59</sup> Tete keke kawodopo da:ka:petoni, dubu idite elawodopamo na:kegeni, “Nanitabola, me dubu Ya:suago pata:nami, mabu ebe Ga:lili opodawala!”

<sup>60</sup> Pitate wiyasiya negeni, “Dubu, a:ma:le degeawena ebe tabono tanalo na iyatawa:!”

Ebe tetenomolo ebete ebe tabo eba genalo kakabate negeoni, <sup>61</sup> ebene Kawodawa Ya:sute olobiganate da:nemeleni Pitako ebo numini. Ebe tetelo Ya:sute ebetamo dopamo kebe tabo kegenile, Pitate ebe tabo ebo malagidiloni, “Ka:lo idokolo kakabate geoa:no, a:ma:le netewa-kapiya teta:mo na iyatawa:noma: kegema:ta.” <sup>62</sup> Ebene Pitate iyabaiamo tonate kawo tepo temetemenomago iinomo ebo niini.

*Godokono Moto Atila:pi Dubate Ya:suko Danagalimioniya*

*Ma:t 26.67-68; Mak 14.65*

<sup>63</sup> Ebene Godoko Amamateno Moto atila:pi dubate Ya:suko eba kalakalatenalo ebo anagalimioniya. <sup>64</sup> Iba:te kalikamo ebene ololo mula:menate ebe anagalimiolo negelaniya, “A:ma: Godokono woki awokalimidawama: nanitabolo deda:wena, a:ma: negea piyate kanagalimiotana!” <sup>65</sup> ega:walo iba:te ebe eba malogonalo kubakuba tabo epetapi bilibilinomo ebetamo ebo kiyawaoniya.

*Yu Epono Ka:nisolo Dubate Ya:sukono Tanalo Danagiyamidameniya*

*Ma:t 26.59-66; Mak 14.55-64; Yon 18.19-24*

<sup>66</sup> Ebene egela walo apuamo Godotamo kalimagono ikameopino watowatopi, ega:walo Godokono Totomu iyatulamepi, ega:walo Yu epono kawokawo dubu epetapi, iba:te aladabutinate epetapiate Ya:suko ibino dopo apuamo magatanate nananiya, <sup>67</sup> “A:ma: a nanaa:, a:ma: Godokono Alibodawa Kelisotela:ka:?”

Ebete wiyasiya iba:tamo negeni, “Nale la:imano tabo nanitabolo dowaimo la: nanitabokobi a:ka:mida:ema, <sup>68</sup> ega:walo nale la: tanalo idima: dalateda:letama, ebe tetelo la:le natamo wiya tabo wadenomamo a:kegelaema. <sup>69</sup> Nanitabola, na Epono Naniwite me tetene wagilimite Elawodawa Godokono tumudi apulo ka:nokolimamo!”

<sup>70</sup> Ebe tetelo ibi bilibilinomate negelaniya, “A:imano tabono magumu keba kunula:ka:? A:ma: Godokono nani Gudula:ka:?”

Ebete iba:tamo nowamini, “La:le ebe ebe gelamata.”

<sup>71</sup> Ebema: iba:te negelaniya, “A me dubuno kuba kiyatawaoma: tabo gedawa idi a ubia:nola, mabu a a:ka:tuwa: ebene tabonomone ebe olowima:!”

---

§ 22:65: Buka ka:la:mioledawa, modobola a:ma: me tanalo niyatawa, Ya:suko tetelo Yu epono watowatopi dubu epetapi, ibi me Ka:nisolo dubula. Ebe watowatopiate Yu epono iyaiya tanalo eba anagilamelelamelelo kubakubapiatamo ibino wiya ebo ikalamenakiya, wiyasiya ebe Ka:nisolo dubagodolo elawo kitanamia: lumagi a:eamo aliboma:.



## 23

*Yu Epono Watowatopiate Ya:suko Paeletetamo\* Demagatiya*

*Ma:t 27.1-2,11-14; Mak 15.1-5; Yon 18.28-38*

<sup>1</sup> Ebene ibi bilibilinomate maimiote Ya:suko lawete Paeletetamo ebe gito magatiya. <sup>2</sup> Iba:te ebene tanalo eba anagilamelemelo Paeletetamo negeliya, “A me dubu uima: ebete aimano epo eba iyatulamitalo da:kubailamiti, ebete ibi ma kunu odiyoboli iba:te Kawo Elawodubunomo Sisatamo ta:kese mani ikameoma; ega:walo ebete iba:tamo negenako ebe Kelisotela, Kawo Elawodubula.”

<sup>3</sup> Ebema: Paeletete ebe nalatediya, “A:ma: Yu epono Kawo Elawodubula:ka:?”

Ya:sute ebetamo nowamiya, “A:ma:le ebe ebe geata.”

<sup>4</sup> Ebene Paeletete Godotamo kalimagono ikameopino watowatopi ega:walo tabo olowioma: da:pelamiya ebe epo bilibilinomatamo negiya, “Na me dubuno kuba idi kumita:.”

<sup>5</sup> Wiyasiya iba:te elawonomamo walo na:kegeliya, “Ebete dopamo Ga:lili opone wagilimite mamu pemaiga epo kubanu iyatulamenaki, ma kunu Yudiya opo kawonomolo ebete ibi nanalenako iba:te gabamaniatamo gowelao tanalo kosiyodiloma:.”

*Paeletete Ya:suko Kawo Elawodubu Eloditamo Danalibiya*

<sup>6</sup> Paeletete ibino tabo olowite ebe a:ka:tuwa: ebetamo negiya, “Oe, me dubu Ga:lili opodawala!” <sup>7</sup> Ebe tetelo Paeletete iyatawiya Elodite Yelusalema kawo duliomololo okoliatepama: da:piya, ebema: ebete Ya:suko ebetamo gito nalibiya mabu Elodiko Ga:lili opono Kawo Elawodubula ega:walo Ya:suko ebe opone piya.

<sup>8</sup> Ebene Elodite Ya:suko umite kawonomamo kalakaliya, mabu ebete Ya:sukono osiyodilole tanalo olowite tete geyageyanomolo ebe uima: ubi eba iyatinalo ma kunu malagidilonami, “Diyala, Ya:sute naimano ololo apulo anoano tanalo idi da:bosiyodilomene.” <sup>9</sup> Ebe mabuma: Elodite Ya:suko iyaiya tanalo bilibilinomoma: nalateda:iya, wiyasiya Ya:sute ebetamo tabo kapiya idi kegiya: <sup>10</sup> Ebene Godotamo kalimagono ikameopino watowatopi ega:walo Godokono Totomu iyatulamepi, iba:te maimiote Ya:sukono tanalo eba anagilamelemelo ebe kuba lumagima: gelalo elawonomamo geliya, <sup>11</sup> ega:walo ebe atu tetelo Elodite ebene gowelaopiago Ya:suko malogolo nekalakalatiya. Ebe kalakala magumulo iba:te kawokawo elawodubate da:pupulinaka ebako kaliku ebetamo pulimite, ebene iba:te eba kunu Paeletetamo walo gito kanalibiya.

<sup>12</sup> Ega:walo me tanalo idila. Elodiko ega:walo Paeleteko ibi netewapiate dopamo idite iditamo dowanaki eba kunu wagenamiya, wiyasiya me egelane wagilimite iba:te namutupima: nanitabonomolo ediya.

*Paeletete Ya:suko A:eamo Dalibiya*

*Ma:t 27.15-26; Mak 15.6-15; Yon 19.1-16*

<sup>13</sup> Ebene Paeletete Godotamo kalimagono ikameopino watowatopi, ega:walo Yu epono kawokawo dubu epetapi, ega:walo kebe epate ibino tabo olowioma: da:pelamiya, ibi bilibilinomo ebetamo ka:la:mite <sup>14</sup> iba:tamo negiya, “La: me dubu natamo epo kubailamedawamu magaemata, wiyasiya nale la:imano ololo apulo ebene iyaiya tanalo danagilamelemo ebegodolo kuba idi kumia: <sup>15</sup> Ega:walo Elodite atumu ebegodolo kuba idi kuimia:,”

\* **23::** Ya:suko tetelo Loma epate Paeleteko napalibiya Yu epono Yudiya opamo, ebete ibino kapela Kawo Elawodubuma: ka:pada:nama; ebene ebe opolo Paeleteko kapiyagodolo elawo itanami lumagi a:eamo aliboma:.

ebete ebe atamo ebema: kapalibo. Nanitabola, ebete kawo kuba idi kosiyodilola: ebete ebema: a:ela. <sup>16</sup> Ebema: modobola nale ebe pa:ka:pa:ka:mo a:na:ma:ga:midaote gito kalibomamo.”

<sup>17</sup> Paeletete me tabo negiya mabu ebena osiyodilo tanalo ebe ma kunula, ulama bilibilinomo magumulo Yu epono Aduga:la Soliyomu tetelo iba:te idoko motolo kapiya lumagi mailamo deka:minakiya, Paeletete ebe lumagi ebena kuba wiyane gito alibonaki.† <sup>18</sup> Wiyasiya epo bilibilinomate Paeletetamo gelatepaolo negeliya, “Ao, Ya:suko nanakapuma:! A ubila a:ma: Balabasiko gito naliba!” <sup>19</sup> Balabasikono tanalo ma kunula. Dopamo ebete Loma gabamaniatamo gowelao tanalo eba osiyodilolo epo epetapi Yelusalemalo ebo anakapulamiya, ebema: iba:te ebe idoko moto magumamo gito ba:idiliya.

<sup>20</sup> Ebe tetelo Paeleteko ubila Ya:suko gito kaliboma:, ebema: ebete ebena tabo madodo adipatelo epo bilibilinomo walo nakanaliya, <sup>21</sup> wiyasiya ibi bilibilinomate kawonomamo negeliya, “Kewa olotolowamo tupuguima:wete, ikoko nanagilamolema:!”

<sup>22</sup> Ebene netewa-kapiya teta:mo Paeletete walo na:kegiya, “Mabu keleka:? Ebete beda: kuba kosiyodilile? Na ebegodolo kuba idi kumita: nale ebe a:eamo ebema: alibola! Modobola nale ebe pa:ka:pa:ka:mo a:na:ma:ga:midaote gito kalibomamo.”

<sup>23</sup> Wiyasiya iba:te olodiyoboa:no kawonomamo nega:gitiya Ya:suko kewa olotolowamo ka:tupuguima:, ebene ibino gelatepao tanalote kawonomoma: dediya Paeletete iba:tamo gito tuduwatiya, <sup>24</sup> iyo, iba:te ebe keba kunu kaniye, Paeletete eba kunu osiyodilote Ya:suko a:eamo alibo tabo ebo giya. <sup>25</sup> Ebene iba:te idoko motolo lumagi mailamo deka:miya, ebe dubu epo anakapulamedawa ega:walo gabamaniatamo gowelaodawala, Paeletete ebe ebena kuba wiyane gito alibiya, wiyasiya ebete Ya:suko epatamo gito ikalamiya iba:te ibino ubi tanalo kosiyodiloma:.

*Gowelaopiate Ya:suko Kewa Olotolowamo Da:tupuguimiya*

*Ma:t 27.32-44; Mak 15.21-32; Yon 19.17-27*

<sup>26</sup> Gowelaopiate Ya:suko a:e baiamo eba magatalo, Saimonoko Sailiniya duliyaomolo dubula, ebete iyabaine kawo duliyaomolamo ebe gabodo piti, ebene iba:te ebe elawamo lawete naniya, Ya:suko dopamo eba tutalo Saimonote ebena kewa olotolowa kaguwataema:.

<sup>27</sup> Ebene epo bilibilinomate ebe eba waloma:titalo, ibino taneba magumulo kamiyale epetapiate Ya:sukono tanaloma: iima:go tolamitiya. <sup>28</sup> Ya:sute wiyasiya iba:tamo olobigate negiya, “Yelusalema duliyaomolo kamiyala:la:, la: naimano tanaloma: kiimitala:, la: a:ka:tuwa: la: ega:walo la:imano gudino tanaloma: niimitala:!” <sup>29</sup> Mabu kuba tete ebe na:pe epate ma kunu kegelama:na:, “Ta:li kamiyale ega:walo lamitua:noma: eda:o kamiyale ega:walo guda:tamo nono ikalamea: kamiyale, iba:te olalati tetelo modobodopoma: keda:oma:na:, wiyasiya guda:gopi kawo tepo temetemenomo kiyatawaoma:na:!” <sup>30</sup> Ebe tetelo epate temeteme magumulo unuunu damelatamo kegelama:na:, ‘La: a unamo na:pa:guda:la:!’ ega:walo egege damelatamo kegelama:na:, ‘La: a na:pitioa:la:!’ <sup>31</sup> Ebema: kamiyala:la:, la: me tanalo nemalagidilala:. Kewate alawoa:noma: eda:o tetelo kubakubapiate natamo mako kawo kuba osiyodiluta, ebema: walone tetelo kewate alawoma: deda:oma:na:, la: nanisiwale! Diyala, ebe tetelo ibino tepo

† 23:17: Luk 23.17 buka apuno tabo Lukute bukamo kakuloliya:, wiyasiya ebena buka osiyodilo walogabo apune nanitabokobi mididawa idite akuloliya.

magumuno kubate kawonomoma: eda:lamete la:tamo ega:walo la:imano guda:tamo iyaiya kuba kawokawonomo da:bosiyodilolema:na.”‡

<sup>32</sup> Ebe tetelo iba:te kuba osiyodilolepi dubu netewa Ya:suago magataliya, iba:te ibi kapimiya a:eamo kanalomoma. <sup>33</sup> Ebema: iba:te damela unu ida:mo nemaimiya, ebe damelano mailo ebe Wato Goala, ebene iba:te Ya:suko kewamo ebolo na:tupuguimite ikoko ebo nanagilamolemiya, ega:walo kubakuba tanalo osiyodilolepi dubu netewa atumu kuwatete, idi tumudi apuamo, idi pele apuamo, iyaiya kewa olotolowamo eba kunu ka:tupuguilamiya. <sup>34</sup> Ebene Ya:sute negiya, “Aba, a:ma: ibino kuba egebolelama:wete na:dodolomatililama:, mabu iba:te beda: tanalo kosiyodilute ibi iyatawa:.”

Ebe tetelo Ya:suko anakapumpiate nokola egege iyalekeolo kalakala tanalo eba osiyodilolo ebene kaliku iyaiya ebo alabaomiya. <sup>35</sup> Ebene epate utitatate ebe eba umitalo, Yu watowatopi dubate ebe kalakalatel negeliya, “Ebetepo epetapino olalati tanalo mula:lalamanaki, ebema: ebete Godokono nani Kelisoma: deda:na, modobola ebe a:ka:tuwa: ebene igilo na:mula:na!”

<sup>36-37</sup> Ega:walo gowelaopiate ebe atumu kalakalatel na:kegelitiya, “A:ma: Yu epono nani Kawo Elawodubuma: deda:wena, a:ma: a:ka:tuwa: a:imano igilo na:mula:!” Ebene iba:te kaka da:imi obo ebetamo ebo ikamiya ebete ka:nima:, <sup>38</sup> ega:walo iba:te Ya:suko da:tupuguimiya ebe kewa unamo tabo ma kunu akuloliya, “Me dubu ebe Yu epono Kawo Elawodubula.”

<sup>39</sup> Ebe tetelo eba:go kewa olotolowamo da:tupuguilamiya, ibi netewapi magumulo dubu idite ebe kawonomamo malogolo ma kunu giya, “A, a:ma: ebe Godokono Alibodawa Kelisotela:ka? A:ma: a:ka:tuwa: a:imano igilo mula:wete, aimano igilo atumu na:ka:mula:leama:!”

<sup>40</sup> Wiyasiya dubu idite ebe eba odiyobolo negiya, “Eiye! A:ma: Godoko tolemea:noma: keda:wita? A netewa-kapiyate kapiya a:e wiya eba lawitalo, <sup>41</sup> gowelaopiate atamo kuba wiya wadenomamo ikaeamita mabu a kuba tanalo osiyodilolena:ma:, wiyasiya Ya:sute kuba idi kosiyodilola:.”

<sup>42</sup> Ebene ebete Ya:sutamoniya, “Ya:su, a:ma: Kawo Elawodawano elawago da:ka:pa:emene, ebe tetelo na nilakapolo na:pemalagidiloniye!”

<sup>43</sup> Ya:sute ebetamo nowamiya, “Na a:ma:tamo nani tabo gemo, ka:lo egelalo a:ma: nago Kalakala Duliyomololo ka:lutama:ta.”

### *Ya:sute Da:eni*

*Ma:t 27.45-56; Mak 15.33-41; Yon 19.28-30*

<sup>44-45</sup> Ebene egelate tuli teta:mo dutiya, egelano pukuilame tanalote olopoligote opo kawonomote ebo idokiya. Iyo, idokote egelano alo eba mula:lo egelate a:iwate kela:mo a:niwisigatepani, egela tuli tetene wagilimite 3 koloko uwomuamo, ebene Godoko Amamateno Iya Motono kaliku ubilite tulituliya ebo bolegaleni. <sup>46</sup> Ebe tetelo Ya:sute kawonomamo gepatenate negeni, “Aba! Nale naimano uliyana a:imano kotamo iyatimo!” Ebete me tabo genate a:enomo ebo a:eni.

<sup>47</sup> Ebene gowelaopino elawodubute ebe tanalo uminate ebete Godokono mailo eba adipatenalo negeni, “Nanitabola, me dubu tuputupudawama: eba eda:nalo kuba tanalo idi kosiyodilola:.”

‡ **23:31:** Ya:sute me uli tabo degiya, ebe tabono magumu ma kunula. Lumagite ka:ka: kewamo ela demadomene elate kawonomamo a:kowamotemene, wiyasiya alawo kewamo ela demadomene kawonomamo kowamotemene. Ebema: eba kunu Ya:suko tetelo kuba osiyodilolepiate ibino iyaiya kuba tanalo kela:mo osiyodilole ebo wagilimiya, wiyasiya walone tetelo ebako epono kuba woki kawonomoma: deda:mene, ebe tetelo iba:te Ya:suko waloma:tapiatamo kawokawo kuba nanitabonomolo kosiyodilolema:na.

<sup>48</sup> Ebene epo bilibilinomate Ya:sukono a:e tanalo uima: da:pelamiya, kebe tanalate kemaimioniye iba:te ebe tanalo ulamenate kawo tola:go bodolo alukola:go ibino motamo gito tolameniya, <sup>49</sup> wiyasiya Ya:sukono namutupi bilibilinomo ega:walo kebe kamiyala:te Ga:lili opone ebe dowloma:iya, iba:te mulune putitatanate ebe iyaiya tanalo ebene pulameniya.

*A:limitiya Duliyomolodawa Yausepete Ya:sukono Ape Nokola Bobo Magumamo Diyatini*

*Ma:t 27.57-61; Mak 15.42-47; Yon 19.38-42*

<sup>50-51</sup> Ebe tetelo dubu idi nokolinami, ebene mailo Yausepetela, ebe Yudiya opono A:limitiya duliyomolodawala, ega:walo ebe tuputupudawala, ebete Godokono Kawo Elawodawano pe tete nemakopelenami. Ebe Yu epono Ka:nisolo dubu idila, wiyasiya Ka:nisolo dubu epetapiate Ya:suko anakapumi tabo degelitiya, ebete iba:go woki kapiyama: keditia; <sup>52</sup> ebene ebe dubute Paeletekono ololo apuamo tonate Ya:sukono ape lawenama: ebe ebo nanani. <sup>53</sup> Ebene ebete Ya:sukono ape opamo powolukonate, wade keyakeya kalikamo aputinate nokola bobo magumamo gito niatini, epate ebe bobo maboele nokola damela iyalo obobiya wiyasiya a:e lumagi idi ebamo dopamo kiyatiya:

<sup>54-55</sup> Ebe tetelo kebe kamiyala:te Ya:suago Ga:lili opone da:pelamiya, iba:te Yausepeko bobo baiamo waloma:tanate, ebe nokola bobo ega:walo Yausepete Ya:sukono ape keba kunu kiyatiniyale, ebe iyaiya tanalo ebo nulamelemeniya. Ebe egela Palaide egelala, Yu epono talena egelano inamabu osiyodilole tetela, mabu dumutu ebe ibino woko: talena egelala. <sup>56</sup> Ebema: ebe kamiyala:te motamo ka:tolamenate wadewade nibo inamabu ebo nosiyodiloleniya egela idilo Ya:sukono apa:mo kapabutimelema:, wiyasiya iba:te Yu epono woko: egelalo tanalo idi kosiyodiliya:, mabu Godokono totomu tabote talena ma kunu iyatilamenami.

## 24

*Ya:sute A:ene Walo Da:kemaigiya*

*Ma:t 28.1-10; Mak 16.1-10; Yon 20.1-10*

<sup>1</sup> Ebene kamiyala:te Palaide adimolo dosiyodiloleniya, iba:te ebe wadewade nibo inamabu Sande egela duiyanomolo bobo baiamo gito watiya.

<sup>2</sup> Iba:te ebamo nemaimiote, bobo demopiniya ebe kawo nokola balamo iyalo mupiamida eba itanalo ebo numiya, <sup>3</sup> ebene iba:te nokola bobo magumamo nopila:ote wiyasiya Kawodawa Ya:sukono ape ka:numiya:.

<sup>4</sup> Ebe tetelo iba:te ebe tanaloma: woki bilibilima: eba eda:utalo, dubu netewa ibino kaliku alonomola, iba:te pemaimite ibi niyakabolo pelamota:niya.

<sup>5</sup> Ebene kamiyala:te kawonomamo toletoleolo ibino ololo opamo eba alomolo dubu netewate iba:tamo negeliya, “Keleka: mabu la:le igilo lumagi a:elao epono bobo bailo da:powadiawitama? <sup>6</sup> Ebe malo puliyala, ebe emagaka! Ebete Ga:lili opolo la: danaletia, la: ebe tabo nemalagidilala:.

<sup>7</sup> Iyo, ebete ma kunu giya, ‘Godote Epono Naniwi kubakubapino kotamo iyatite, iba:te ebe kewa olotolowamo tupuguimite ikoko kanagilamolema:na:, wiyasiya ebete netewa-kapiya egelalo a:ene walo ka:kemaigamene.’ ”

<sup>8</sup> Ebe tetelo ebe kamiyala:te Ya:sute iba:tamo dopamo kebe tabo kegiyale ebe tabo ebo malagidiliya, <sup>9</sup> ebene iba:te bobo baine duliyomolamo ka:tolamete iba:te bobo bailo da:nulamiya ebe iyaiya tanalo Ya:sukono 11 waloma:tapi ega:walo ebene namutupi epetapi bilibilinomo ebo na:kiyawaolamiya. <sup>10</sup> Ebe tetelo Magadala duliyomolodawa Ma:liko, Yowanako, Ya:imesikono menoko Ma:liko, ega:walo kamiyale

epetapi, miba:tamo kebe tanalate bobo bailo kemaimiye, iba:te ebe tanalo Ya:sukono alibolepi dubatamo ebo na:kiyawaiya, <sup>11</sup> wiyasiya iba:te ibino tabo dolowiya, ebe tabo daedale wokima: gelate nanitabokobi ka:midiya. <sup>12</sup> Ebe tetelo Pitate wiyasiya maigate bobo baiamo gito puligiya. Ebeta nokola bobamo da:nemaigiya, nopega:no tuduwatalo Ya:sukono ape dauputiniya ebe kaliku balalo eba pola:nalo ebo nulamiya, wiyasiya tanalo idi ka:numiya. Ebe mabuma: ebeta ebe tanalo ebena wokilo kawonomamo malagidilago walo na:ka:piya.

*Ya:suko Waloma:tapi Netewate Emeyasi Duliynomolamo Eba Tutalo Ebeta Iba:tamo Dapawokaliya*

*Mak 16.12-13*

<sup>13</sup> Ebe atu egelalo Ya:suko waloma:tapi netewate Yelusalema kawo duliynomolone Emeyasi duliynomolamo tutiya, ebe gabono geyageya 10 kilomita keba kunula:ka: eba kunula, <sup>14</sup> ebene gabo tetelo iba:te Ya:sutamo demaimiya ebe iyaiya tanalo bilibilinomoma: kiyawago tutiya. <sup>15</sup> Iba:te tabo gelago eba tutalo, Ya:sute ibino walogabo apune pete iba:go da:tuti, <sup>16</sup> ebe tetelo iba:te ibino balida:mo Ya:suko umiya, wiyasiya Godote ibino woki eba atutulatelelamelo iba:te kemalagidilutiya: me Ya:sutela. <sup>17</sup> Ebene Ya:sute ibi netewapi nanaliya, “La: gabo tetelo eba tutalo beda: tabo kegelawitama?”

Ebema: ibino dopote mibomiboma: eda:olamete gito lamota:niya. <sup>18</sup> Ibi magumulo idino mailo Kolopasitela, ebeta Ya:suko kapela dubumu midilo negiya, “Aimano Yelusalema duliynomololo dilukuliona, ebe kapela epo magumulo a:ma: kapiya iyatawa:noma: keda:wita me egela epetapilo atamo beda: tanalate kemaimile?”

<sup>19</sup> Ya:sute wiyasiya negiya, “Beda: iyaiya tanalola:ka:?”

Ebene iba:te nowaimiya, “Nasaletе duliynomolodawa Ya:sutamo demaimi ebe tanalo. Ebeta Godokono ololo apulo ebena woki awokalimidawama: eba eda:nalo tabo kiyawao magumulo ega:walo osiyodilole magumulo elawonomoma: eda:nami. Me tanalo epo bilibilinomate nanitabonomolo umiya, <sup>20</sup> wiyasiya Godotamo kalimagono ikameopino watowatopi ega:walo aimano kawokawo dubu epetapi, iba:te ebe gabamanino kotamo gito iyatiya, iba:te ebena tanalo eba anagilamelemelo a:eamo kaliboma:, ebene iba:te ebe kewa olotolowamo tupuguimite ikoko ebo anagilamolemiya. <sup>21</sup> Dopamo a ma kunu malagidilonaima:, ebe Isalaela epono igilo mula:lelamedawala, wiyasiya ebeta da:i ebe egelane wagilimite mamopemaiga ka:lo netewa-kapiya egelama: edita. <sup>22</sup> Ebene aimano taneba magumulo kamiyale epetapiatamo ka:lo duiyanomolo da:pemaigaka, ebe tanalote a nanoanojama:ka. <sup>23</sup> Iba:te bobo baiamo da:tolama:ka Ya:sukono ape ka:numa:ka:, ebema: iba:te atamo walo ka:pelamete na:pegelaka, ‘A Godokono nopopi a:nulaema: Iba:te negela Ya:suko a:ene emaigaka!’ <sup>24</sup> Ebene aimano taneba magumulo epetapiate bobo baiamo da:tolama:ka, ale kamiyala:godone dolowiakama: ebe tanalo iba:te eba kunu nulama:ka, wiyasiya Ya:suko ka:numa:ka:.”

<sup>25</sup> Ebene Ya:sute ibi netewapiatamo negiya, “La:imano iyatawa lawe tanalo nanitaboa:, daedale gudi keba kunula:ka: eba kunula, mabu Godokono woki awokalimipiate dopamo degelanakiya, la: ibino iyaiya tabono tanalo nanitabokobi ka:midila:wena! <sup>26</sup> Me kawo tanalonomo la: iyatawala:ka:? Godokono ubi tanalodo ebena Alibodawa Kelisote dopamo kawokawo temeteme uwatete, ebene ebeta ebena Alonomo Duliynomolamo ka:nopegamene.” <sup>27</sup> Ebene Godokono Bukalo da:pola:na Kelisokono



nanitabo tanalo awokalima; Ya:sute ebe tanalo bilibilinomo ebo iyatunamiya, Mosesete Bukamo dakuloliya ebe tetene wagilimite Godokono woki awokalimpiate dakuloliya ebamo nemaiga.

<sup>28</sup> Ebene dadimoni iba:te ibino duliynomolamo maimioma: eba tolamenalo, Ya:sute duliynomolo ida:mo ka:tonama: degeni, <sup>29</sup> wiyasiya iba:te ebe odiyobonate nananiya, “Modobola a:ma: ago na:pa:, mabu egela na:niwisigana ega:walo samamo kidokomene.” Ebema: Ya:sute ibino motamo tonate gito nodoloni.

<sup>30</sup> Iba:te kapimiya bae eba naonalo Ya:sute bae lawenate kalakala tabo Godotamo genate, ebene bae wakalaminatate ibi netewapiatamo gito ikalamenti. <sup>31</sup> Ebema: Godote ibino balidi paeamidalelamente iba:te Ya:sukono tanalo ebo iyatawaniya, wiyasiya ebe tetenomolo Ya:sute ibino ololo apune gito alatidini. <sup>32</sup> Ebene ibi netewapiate tabo ma kunu gelaniya, “Nanitabola, gabo tetelo ebete ago tabo eba kiyawaonapelo Godokono Buka apuno iyaiya tabo atamo dawokalilama:ka, ebe tetelo aimano tepo magumulō Godokono elate wamotitaka!”

<sup>33</sup> Ebe tetenomolo ibi netewapiate Yelusalema kawo duliynomolamo walo na:kolowaminiya, ebolo Ya:sukono 11 waloma:tapi ega:walo piyate iba:go da:pola:niya, iba:te ibi bilibilinomo ebo nulameniya. <sup>34</sup> Ebene Ya:sukowaloma:tapiate ibi netewapiatamo negelaniya, “Nanitabola, Kawodawa Ya:sute a:ene emaigaka! Ebete Saimonotamo nanitabonomolo emaigaka!”

<sup>35</sup> Ebene ibi netewapiate gabo tetelo beda: tanalo kumiye ega:walo Ya:sute iba:tamo bae eba wakalaminalo iba:te ebene tanalo diyatawaniya, ebe iyaiya tanalo iba:te waloma:tapi epetapi ebo kiyawaolameniya.

*Ya:sute Ebene Waloma:tapi Epetapiatamo Dapawokalani  
Ma:t 28.16-20; Mak 16.14-18; Yon 20.19-23; Ali 1.6-8*

<sup>36</sup> Iba:te ebe tabo ma kunu eba gelanalo Ya:sute iba:tamo pawokalanate ibino tetenomolo putinate ibi nanaleni, “Godokono kalakalate la:godolo nitanana.”

<sup>37</sup> Ebema: iba:te la:wa:onate kawonomamo toletoleoniya mabu iba:te nemalagidiloniya Ya:suko ebe obolola. <sup>38</sup> Ebete wiyasiya iba:tamo negeni, “Keleka: mabu la:le toletoleolo woki bilibilima: deda:wenama? Nanitabokobi midia: tanalote la:imano tepo magumune beda:ma: kemaigale? <sup>39</sup> Modobola la: naimano kotola agowala nulama:la: Na Ya:sutela. La: na na:pologiona:la:, na oboloa:, na lumagila. La:le na nunamenamata, na katena:gonola ega:walo goagonola.”

<sup>40</sup> Ebete ebe tabo genate ebene kotola agowala iba:tamo ebo a:iyamidaoleni, <sup>41</sup> ebene iba:te kawonomamo kalakalaoniya, wiyasiya woki bilibilima: eba eda:onalo ibino nanitabokobi midia: tanalote kolopoligolameniya: Ebema: Ya:sute ibi nanaleni, “La:godolo inamabu idi ba:kitanale nale kenama:?” <sup>42</sup> ebene iba:te namo okalimi ebetamo ikamenate, <sup>43</sup> ebete lawenate ibino ololo apulo gito nani.

<sup>44</sup> Ebe tetelo Ya:sute iba:tamo negeni, “Nale la:go eba okolinalo la:tamo da:kiyawaonakimo, me ebe tanalola. Na dopamo ma kunu egimo, Godokono Bukate naimano tanaloma: degena ebe tanalo bilibilinomate ka:pemaimioma:na:, iyo, Mosesete Totomu Tabo Bukamo dakuloliya, ega:walo Da:ibidite Sam Oale Bukamo dakuloliya, ega:walo Godokono woki awokalimipi epetapiate dakuloliya ebe tabono tanalo bilibilinomate nanitabonomoma: keda:oma:na:.” <sup>45</sup> Ebene iba:te Godokono Buka apuno tanalo bilibilinomo wadenomamo kemalagidilolenama: ebete ibino woki eba tuputupuilamelelamente <sup>46</sup> ibi nanaleni, “Godokono Bukalo tabo ma

kunu itana, ebenu Alibodawa Kelisote kawokawo temeteme uwatete ebo ka:emene, wiyasiya netewa-kapiya egelalo a:ene walo ka:kemaigamene. <sup>47</sup> Ega:walo me Wade Tabote Yelusalema duliyoumolone wagilimite me opo kawonomamo ma kunu ka:tomene, Godokono tabo kiyawaopiate naimano mailamo epo ka:nikiyawaolaema:na; iba:te ibino kubane dolobila:oma:na: Godote ibino kuba ebo ka:dodolomatililaemene. <sup>48</sup> Nanitabola, la:le me iyaiya tanalo wadenomamo ulamolimata, ebema: la: naimano tabo kiyawaopima: keda:omamota. <sup>49</sup> Ega:walo me tanalo idila. Naimano Nabiwite nanitabonomolo degiya la: ebe tanalo kuimamota, nale ebenu elawo la:tamo kapalibomamo, ebema: modobola la: Yelusalema kawo duliyoumololo ebe tanalo nemakopeliyala; ebolo Godokono Elawote Unu Duliyoumolone la:tamo ka:piwisigamene.”

*Godote Ya:suko Unu Duliyoumolamo Da:pelawiya*

*Mak 16.19-20; Ali 1.9-11*

<sup>50</sup> Ebe tetelo Ya:sute ibi Yelusalema kawo duliyoumolone magatalete iba:te Betani duliyoumolo niyakabamo da:nemaimiya, ebete ebenu koto wadipalatelelo Godoko ebo aniya ebete ibi wadenomamo kowalubilinama: <sup>51</sup> Ebete ebe tabo eba gitalo, Godote ebe pelawete Unu Duliyoumolamo ebo adipatiya. <sup>52</sup> Ebema: iba:te ebolo Ya:suko amamatete, Yelusalema kawo duliyoumolamo kawo kalakalago na:ka:tolamiya, <sup>53</sup> ebene iba:te ebe duliyoumololo eba ilukulinalo egela epetapi bilibilinomolo Godoko Amamateno Iya Motamo da:nodolonakiya, iba:te Godokono mailo unamo ebo adipatenakiya.

## YA:SUKONO WADE TABO YONETE AKULOLIYA

### *Godokono Tabote Lumagino Apa:mo Me Opamo Da:piya*

<sup>1</sup> Godote me opo osiyodiloa:no dopamo Tabote okolinami, ebete Godago eba okolionalo ebe ega:walo Godoko ibi kapiyanomola, <sup>2</sup> ebema: me opo wagilimia:no Tabote Godago kapimiya eba kunu okolionamiya.

<sup>3</sup> Ebene Godote me opono inamabu ega:walo tobolo ununo inamabu, iyaiya uliyana ega:walo epo, ebete ibi bilibilinomo Tabokono elawamo osiyodiloliya, ebema: ibi bilibilinomo magumulo kapiya tanalo idite idawano elawamo kawokaliya:. <sup>4</sup> Ebe tetelo nanitabo igilote Tabogodolo itanami, ebene me igilote aloma: eda:te opo epo bilibilinomo ebo pukuilamiya. <sup>5</sup> Ebe mabuma: me alote idoko magumulo pukuilamena, idokono elawote a:egamidama: modoboa:.

<sup>6</sup> Ebene Godokono alibodawa Yonete a:pemaigiya, <sup>7</sup> ebete epo bilibili-nomatamo ebe alono tanalo eba pawokalimilo iba:te ebene tabo olowite nanitabokobi ebo ka:midima:. <sup>8</sup> Yonete alo me opamo kadaiya:, wiyasiya ebete epatamo alono tanalo kapawokalima: ebema: piya. <sup>9</sup> Yonete dapa-wokalimiya ebe alo ebe Godokono nanitabo alola, ebe alote me opo epo bilibilinomo pukuilamena.

<sup>10</sup> Nanitabola, Godote me opo Tabokono elawamo osiyodiliya, wiyasiya Tabote pete me opolo eba pokolinalo me opo epate ebene tanalo kiyatawaiya:, <sup>11</sup> iyo, ebete ebene oponomamo piya wiyasiya ebene epate ebe kalakalago kelawiya:. <sup>12</sup> Wiyasiya numa:la:, kebe epate ebe nanitabonomolo delawiya ega:walo ebe nanitabokobi da:midiya, ebete iba:tamo elawo ikalamiya iba:te Godokono gudima: keda:onama:. <sup>13</sup> Me guda:te me opo dubu idino ubi tanalamo ega:walo kateneno elawamo kawokalaiya:, wiyasiya iba:te Godokono elawo kapiyamo awokalaiya.

<sup>14</sup> Ebene Tabote lumagino apa:mo pete ago eba pokolinalo ale ebene alo kawonomo ebo umiyama:, ebako alo Nabiwi Godote ebene kapiya Gudutamo ikamiya. Ebene alono pukuilame magumulo ale me tanalo umiyama:, ebe Godokono nilakapo tanalo ega:walo nanitabo tanalo tabokanomola.

<sup>15</sup> Ebene Yonete ebene tabo madodo unamo adipatelo Godokono Guduno tanalo ma kunu awokalimiya, “Nale dopamo kebe dawano tanaloma: ka:kiyawaimo, me ebe lumagila. Nale ebene tanaloma: ma kunu gimo, ebete naimano walogabo apune ba:pena, ega:walo Godote ebetamo dikamiya ebe elawo kawonomote naimano elawo nodoliona, mabu nale me opamo awokala:no ebete dopamo okolinami.” <sup>16</sup> Ebe nilakapo tabokanomola, ebema: ebene nilakapo tanalodo ebete a bilibilinomatamo ebene wadewade tanalo walo ikaeamenaki, walo ikaeamenaki, ebete eba kunu wagenami. <sup>17</sup> Nanitabola, Godote ebene Totomu Tabo epatamo Mosesedo ikalamiya, wiyasiya ebete ebene nilakapo tanalo ega:walo nanitabo tanalo Ya:su Kelisogodone awokalilamiya. <sup>18</sup> Lumagi idite Godokono ololo dopamo kuminakia:, wiyasiya Godokono Gudu kapiyate ebene Nabiwino tanalo epatamo apawokalimiya, mabu Nabiwila Gudula ibi kapiyanomola ega:walo Gudute Nabiwino ololo apulo okolina.

*Epo Obama Waduba:midaoledawa Yonete Ebe A:ka:tuwa: Ebeno Tanaloma: Da:kiyawaiya*

*Ma:t 3.1-12; Mak 1.1-8; Luk 3.1-18*

<sup>19</sup> Ebe tetelo Yelusalema kawo duliynomololo dilukulionamiya, ebe Yu watowatopiate Godotamo kalimagono ikameopi dubu ega:walo Libai gu dubu\* epetapi Yonetamo ebo naliboliya ebeno nanitabo tanalo ka:nuima:. Ebene iba:te Yonetamo pelamete ebe napalatediya, “A:ma: potelela:ka?: A:imano nanitabo tanalo atamo nawokalima:.”

<sup>20</sup> Yonete ibino tabo wiyama: ubia:noma: kediyas:, wiyasiya ebete kalakalago ibi awokala nanaliya, “Na Godokono Alibodawa Kelisotea:!”

<sup>21</sup> Ebema: iba:te ebe walo nakalatediya, “A:ma: potelela:ka?: A:ma: Godokono woki awokalimidawa Elayatela:ka:, a me opo epatamo walo da:ka:pemaigi?”

Yonete ibino tabo eba wiyalo negiya, “Ao, na ebetea:.”

Ebema: iba:te ebe walo nakalatediya, “Mosesete lumagi idino pe tanaloma: da:kiyawaiya, a:ma: ebe Godokono Woki Awokalimidawa idila:ka:?”

Yonete nowamiya, “Ao, na ebetea:.”

<sup>22</sup> Ebene iba:te ebetamo walo na:kegeliya, “A piyate kapaliboe, ale iba:tamo wiya tabo katama:, modobola a:imano tanalo nawokalima:, a:ma: potelela:ka:?”

<sup>23</sup> Yonete ibino tabo eba wiyalo negiya, “Godokono woki awokalimidawa Aisayate naimano tanalo awokalima: tabo ma kunu giya,

‘Lumagite bulu opolo

tabo ma kunu kawonomamo ka:pegemene,

‘Kawodawano gabo

na:tupugaima:la:.’ ’ ”

<sup>24</sup> Ebe tetelo kebe Yu watowatopiate ebe dubu Yonetamo dapaliboliya, ibi Pa:lisi tanebapila,† <sup>25</sup> ebema: ebe dubate ebe walo na:kegelamiya, “A:ma:le egeata a:ma: Kelisotea:, ega:walo a:ma: Elayatea:, ega:walo Mosesete Godokono wokodawano pe tanaloma: da:kiyawaiya a:ma: ebetea:. Ebema: mabu keleka: a:ma:le epo obamo dowaduba:midaola:wenaka?”

<sup>26</sup> Yonete ibino tabo eba wiyalo negiya, “Nanitabola, nale epo obamo owaduba:midaolenakomo, wiyasiya la: magumulo dokolina ebe lumagi idino tanalo la: nanitabola iyatawa:, ebe aimano Kawodawala. <sup>27</sup> Ebete naimano walogabo apune ba:pena, wiyasiya na wadenoa: nale ebeno agowa ukulaolema:.” <sup>28</sup> Yonete Yodane Kolomo apulo epo obamo dowaduba:midaolenaki, ebete ebe opono Betani duliynomololo eba okolinale me tanalote ebetamo ebo pemaigiya.

*Ya:suko Me Opo Epono Kuba Wiya Uwatelamedawala*

\* **1:19:** Yu epo magumulo 12 gu na:pola:namiya, me Libai gu ebe idila. Ebe gu kapiyate Godokono woko osiyodilonamiya Yu epo epetapiatamo. Ma kunu Yelusalemalo ditanami, ebe Godoko Amamateno Iya Motolo Libai gu dubate woko a:ka:tuwa: osiyodilonamiya. Ebene iyaiya duliynomololo atumu epetapi iba:te Yu epono balidi ibilamole motolo oale alapiopima: eda:onamiya, epetapiate Godokono tabo iyatulamepima: eda:onamiya, ega:walo epetapiate tabo anagiyamidapima: eda:onamiya. † **1:24:** Ya:suko tetelo Pa:lisi epo ebe Yu epono taneba idila. Godote ibino ewoniatamo Mosesedo dikalamiya ebe Totomu Tabo, ega:walo ibino ewoniate a:ka:tuwa: kebe iyaiya tanaloma: kawokawo pukalama: degelanamiya, Pa:lisi epate ebe tanalo bilibilinomamo wadenomamo tudila:onamiya, ebene iba:te epo ma kunu eba iyatulamenalo, piyate ibino tabamo tudila:oa:no iba:te ibi kubakubapima: gelate iba:go kaladabutinakia:

<sup>29</sup> Ebene egela idilo Ya:sute ebetamo eba pitalo, Yonete ebe umite epetapi-atamo negiya, “Numa:la:, ebe Godokono Sipi-goeo Da:pesote pita, ebete opo epono kuba osiyodilole wiya uwatelamete ebene kalimamo kegebole-laemene. <sup>30</sup> Nale dopamo la:tamo kebe dawano tanaloma: ka:kiyawaimo, me ebe lumagila. Nale ebene tanaloma: ma kunu gimo, dubu idite naimano walogabo apune ba:pena, wiyasiya ebene elawo kawonomola, ebete naimano elawo nodoliona mabu nale me opamo awokala:no ebete dopamo okolinami. <sup>31</sup> Iyo, nale ebe umia:no dopamo ebene nanitabo tanalo na iyatawa:, wiyasiya ebene tanalo nale Isalaela epatamo awokalima:piyamo, ega:walo nale epo obamo ebema: waduba:midaolenakomo.”

<sup>32</sup> Ebene Yonete Ya:sukono tanalo awokalimilo negiya, “Nale ebene tanalo ma kunu uimo, Godokono Uliyanate Unu Duliynomolone ebetamo bigo olamu piwisigitalo uimo, ebete ebegodolo ka:pokolinama:.” <sup>33</sup> Nale ebe tanalo umia:no dopamo Ya:sukono nanitabo tanalo iyatawa:, wiyasiya na epo obamo waduba:midaolema: dupaliboniya ebe Kawodawate natamo negi, ‘Naimano Uliyanate pogodolo ka:pokolinama: ebetamo da:piwisigamene, a:ma:le ebe lumagi uma:wete kiyatawama:ta, ebe naimano Uliyanamo epo waduba:midaoledawala.’ <sup>34</sup> Nanitabola, ebe tanalo naimano balida:mo uimo, nale ebene tanalo ebema: awokalimo, ebe Godokono Gudula.”

*Ya:sute Ebene Dopo Waloma:tapi Dekala:miya*

<sup>35</sup> Egela idilo Yonete ebe waloma:tapi netewago dutiti, <sup>36</sup> ebe tetelo Ya:sute ibi niyakabodo eba petonatolo, Yonete ebe umite negiya, “Numa:la:, me Godokono Sipi-goeo Da:pesola, ebete epono kuba osiyodilole wiya kuwatelaemene.”

<sup>37</sup> Yoneko waloma:tapi netewate ebe tabo dolowiya iba:te ebe atepate Ya:suko ebo waloma:tiya, <sup>38</sup> ebene Ya:sute olobigate ibi ulamelo nanaliya, “La:imano ubi beda:la:ka:?”

Iba:te ebene tabo eba wiyalo ebe naniya, “Iyatulamedawa, ale a:ma: La:baima: ka:miata, ebema: a:ma: kebole kokoliawena, a ubila ebe bai uima:.” Buka ka:la:mioledawa, modobola a:ma: me tanalo niyatawa, Yu epate ibino tabamo wade iyatulamedawa idi La:baima: ka:minaka.

<sup>39</sup> Ebene Ya:sute iba:tamo nowamiya, “Kuba:nola, la: pa:wete na:puma:la:.” Ebene egelate kela:mo da:niwisigatepani, 4 koloko keba kunula:ka: ebako tetelo ebe dubu netewate Ya:suago tonate, ebene okoli bai numinate kapiya idoko eba:go ebo nelaniya.

<sup>40</sup> Ebe dubu netewapi magumulo idino mailo A:ndulutela, ebe Saimono Pitakono ekawila. <sup>41</sup> Ebene duiyanomolo A:ndulute tote ebene naniwi Saimonoko da:numiya ebe nananiya, “A Mesayako nanitabonomolo uima:!” Buka ka:la:mioledawa, modobola a:ma: me tanalo niyatawa, Yu epate Godokono Alibodawa Kelisoko ibino tabamo Mesayama: ka:minaka.

<sup>42</sup> Ebene A:ndulute ebene naniwi Ya:sutamo demagatiya, Ya:sute ebe umite ebetamo negiya, “A:imano mailo ebe Saimonotela, a:ma: Yonekono gudulata, wiyasiya epate a:ma: oli mailo Kipasema: keka:ima:ta.” Kipase mailono magumu nitana ‘Nokolala,’ ega:walo Guliki opo epono tabamo iba:te ebe mailo Pitama: ka:minaka.

*Ya:sute Pilipiko Ega:walo Nata:niyoloko Ebe Waloma:tapima: Keda:onama: Dekala:miya*

<sup>43</sup> Ebene egela idilo Ya:sute Ga:lili opamo ka:toma: ubi diyatiya, ebe tetelo ebete Pilipiko umite ebe naniya, “Modobola a:ma: na nowaloma:ena:.”



<sup>44</sup> Ebe dubu Pilipiko ebe Betasaida duliynomolodawala, ega:walo A:ndulukoko Saimonago iba:te ebe atu duliynomololo okolionamiya. <sup>45</sup> Ebene Pilipite Nata:niyoloko numite ebe nananiya, “Mosesete Godokono Totomu Bukalo pokono tanalo kawokalimiyale, ale ebe Kawodawa nanitabonomolo uima:. Iyo, Godokono woki awokalimipi epetapiate ebene Bukalo atu lumagino tanaloma: tabo walo dakawokalimiya, me ebe lumagila. Ebe Ya:sute Nasalete duliynomolodawala, Yausepekono gudula.”

<sup>46</sup> Nata:niyolote wiyasiya negiya, “Nasalete duliynomolo wade duliynomoloa:, ebema: ebe duliynomolone beda: wade tanalote na:ka:pemaigamene?”

Pilipite ebe naniya, “Modobola a:ma: pa:wete ebene tanalo na:puma:.”

<sup>47</sup> Ebene Nata:niyolote ebetamo da:pemaigiya, Ya:sute ebe umite ebene tanaloma: negiya, “Me Isalaela opo dubu ebe nani tabo lumagila. Ebene tepo magumulo a:da: tanalo idi kitana:, puliyanomola.”

<sup>48</sup> Nata:niyolote ebe nalatediya, “Mabu keleka: a:ma: naimano tepo magumuno tanalo diyatawawita?”

Ebene Ya:sute nowamiya, “Pilipite a:ma: mamopema: ana:no ega:walo nale a:ma:go alugoa:no, a:ma:le da:imi kewano gololo magumulo dokoliawitaka, nale a:ma: Godokono Uliyanano elawamo iyalo uma:kamata.”

<sup>49</sup> Ebe tetelo Nata:niyolote ebetamo negiya, “Iyatulamedawa, nanitabola a:ma: ebe Godokono Gudulata! A:ma: Isalaela epono Kawo Elawodubulata!”

<sup>50</sup> Ebene Ya:sute ebetamo negiya, “Nale a:ma: da:imi kewano golololo dumatikama, ebe mabuma: a:ma:le na nanitabokobi ka:midina:wita? Nanitabola, me tanalo kawo tanaloma:, wiyasiya a:ma: walone nagodolo kawokawo anoano tanalonomo kulamolema:ta. <sup>51</sup> Na a:ma:tamo nani tabonomo gemo, Godote ebene Unu Duliynomolo a:iyamiditalo a:ma: kuima:ta, iyo, Epono Naniwite‡ waola gaboma: eda:te, Godokono nopopiate ebe waola gabodo Unu Duliynomolamo ka:nodolo, ka:piwitio, eba kunu eba wagelelo, a:ma:le ibi ebo kulaema:ta.”

## 2

### *Ya:sute Ka:ina Duliynomololo Obonomo Wade Da:imi Obonomoma: Da:midiya*

<sup>1</sup> Egela netewa epetapi da:petoiya, ebe tetelo Ga:lili opono Ka:ina duliynomololo dubu idite oli kamiyale lawe soliyomu osiyodiluti. Ebe soliyomu magumulo Ya:sukono menoko na:luti, <sup>2</sup> ega:walo Ya:sute ebe waloma:tapiago atumu ebolo na:ka:pola:niya mabu soliyomu namutudawate ibi analiya iba:te epo epetapiago soliyomu bae ka:penaoma:. <sup>3</sup> Ebene soliyomu osiyodilo magumulo wade da:imi obote dolopoligiya, ebe tetelo Ya:sukono menokote ebe naniya, “Epate wade da:imi obo da:nia samonomamo opoliya.”

<sup>4</sup> Ebene Ya:sute ebene menokotamo negiya, “Maea, nale kebe tanalo osiyodiloma: a:ma:le na akopanana:la:, mabu naimano elawo awokalimite tete nanitabolo ka:pea:, ebe tetete pemaigama: Godote a:ka:tuwa: na kananemene.”

<sup>5</sup> Ebe tetelo ebene menokote oobligate soliyomu namutudawano moto wokopiatamo negiya, “Ebetete kebe tanalo osiyodiloma: la: danaletamene, modobola la: ebe tanalo gito nosiyodiliyala:.”

‡ **1:51:** Epono Naniwi ebe Ya:sukono mailo idila. Ebe a epo bilibilinomono Naniwila, atumu Godoko ebe aimano Naniwila.

<sup>6</sup> Ebe tetelo ebe motolo sikisi kawokawo obo upate na:pola:niya, me upa epate nokolamo osiyodiloliya ega:walo ibi magumulo epetapi 80 litala ega:walo epetapi 120 litala. Me upano tanalo ma kunu itani, nio oboa: wiyasiya Yu epono osiyodilole magumulo iba:te Godokono totomu tabo ida:mo ka:tudila:oma: ibino kotonno daleyaya makomako upano obamo uku-laolenakiya, ibino ewoniate ibi diyatulamiya eba kunu. <sup>7</sup> Ebema: Ya:sute moto wokopi nanaliya, “La: me upa obonomamo netabokailama:la:,” ebene iba:te nanitabonomolo detabokailamiya, <sup>8</sup> Ya:sute ibi ebo analiya iba:te kalila:mo iyapote soliyomu namutudawatamo ka:nikaema:

Ebene iba:te tolamete soliyomu namutudawatamo da:nikamiya, <sup>9</sup> ebe tetelo ebete nite ebene wokilo gola da:imi obonomoma: giya. Ebe obote wade da:imi obonomoma: keba kunu kediya moto umi wokopiate iyatawaiya, wiyasiya soliyomu namutudawate ebe tanalo iyatawa:no, ebete oli kamiya daiditi ebe dubu ebetamo ka:mite <sup>10</sup> ebe naniya, “Numa:, aimano osiyodilo tanalo ma kunula, soliyomu osiyodilo tetelo ale epatamo wade golanomo da:imi obo dopamo ikalamenakoma:, iyo, iba:te ebe wade gola obo dopoliyama:na:, ebene walone ale gola:dopo obo iba:tamo ebo kikalaemalema:. Wiyasiya a:ma: eba kunu kosiyodilawea:, a:ma: soliyomu olopoligo tetelo me gola da:imi obonomo epatamo ikalमितata!”

<sup>11</sup> Ebema: Ga:lili opono Ka:ina duliyaomololo Godokono elawo awokalima: Ya:sute me ebene dopo anoano tanalo osiyodiliya. Ebe tetelo ebene waloma:tapiate ebene kawo elawonomo dumiya, iba:te ebe nanitabokobi ebo midiya. <sup>12</sup> Ebene me tanalo dolopoligiya Ya:suko ega:walo ebene waloma:tapi, iba:te ebene menokago ega:walo ekakiago Kapeniya duliyaomolamo tolamete tete da:pesamo ebo nilukuliya.

*Ya:sute Godoko Amamateno Iya Moto Wadepi Da:midia  
Ma:t 21.12-13; Mak 11.15-17; Luk 19.45-46*

<sup>13</sup> Mabu Yu epono Aduga:la Soliyomu\* osiyodilo tete detatalinapiya, ebema: Ya:sute Yelusalema kawo duliyaomolamo gito tiya. <sup>14</sup> Ebene ebete Godoko Amamateno Iya Motamo tote, ebe motolo epate kau-goeogoeo ega:walo sipi-goeogoeo ega:walo bigo olaola maniamo eba midiolitalo ebo nulamiya, ega:walo ebe atu tetelo epate patapatalo ilukulite epetapino mani dodowaolitiya ebete ibi ebo ka:nulamiya. <sup>15</sup> Me mabuma: Ya:sute ale uwatete pa:ka:pa:ka: osiyodilote ebete ebe goeogoeo Godoko Amamateno Motono kala magumune elawonomamo ebo a:na:ma:lateliya, ega:walo ebete mani odowaolepino patapata oba:midaolelamete epono mani eba pa:na:gudilamelu iyaiya ebo petoiya. <sup>16</sup> Ebene ebete bigo olaola olowamepi kawiya eba analelo negiya, “Me inamabu me motone nowagaila:la:. Naimano Nabiwino Moto talenala, ebema: la:le olowame baima: akomida:la:!”

<sup>17</sup> Ya:sute me tanalo dosiyodiliya ebene waloma:tapiate Godokono Bukano tabo idi ebo malagidiliya, ebe tabote ma kunu itana, “A:imano Talena Moto mabuma: naimano tepo magumuno elawote elanomoma: eda:na.”

<sup>18</sup> Ebe tetelo Yu watowatopi epetapiate Ya:suko naniya, “A:ma: Godokono elawo awokalima: aimano ololo apulo anoano tanalo nosiyodila, ebema: a kiyatawaomalema: a:ma:le Godokono Motolo dosiyodilawa: ebe tanalo a:imano elawamo kosiyodilawea:, wiyasiya Godokono elawamo osiyodilata.”

\* **2:13:** Buka ka:la:mioledawa, a:ma: me Soliyomuno magumu iyatawama: ubi diyata:emene, modobola a:ma: Yon 18.28 buka apuno walubi tabo numiye.

<sup>19</sup> Ya:sute ibino tabo eba wiyalo negiya, “Kuba:nola, la:le me Godoko Amamateno Moto danabulima:ema, wiyasiya nale netewa-kapiya egelalo walo ka:ketemamo.”

<sup>20</sup> Yu watowatopiate ebetamo negeliya, “A:ma: na:kemalagidilawita, a:imano elawo modobola me moto kawonomo netewa-kapiya egelalo keta:ema:? Eiyee! Me moto aimano nabiate 46 ulamamo etenamiya!”

<sup>21</sup> Wiyasiya Ya:sute kebe tabo kegiyale ebe ebene apeno tanaloma:giya. <sup>22</sup> Ebema: walone tetelo ebete a:e magumune da:kemaigiya, ebene waloma:tapiate me tabono magumu ebo malagidiliya, ebene Godote ebene tanaloma: ebene Bukalo kebe tanalo iyalo kawokalimiyale, iba:te ebe tanalo wadenomamo lawete nanitabokobi eba midilo Ya:sukono tabo atumu nanitabokobi ebo ka:midiya.

### *Ya:sute Epo Bilibinomono Tepo Magumuno Iyaiya Kuba Tanalo Iyatawala*

<sup>23</sup> Ebene Aduga:la Soliyomu tetelo Ya:sute Godokono elawo awokalima: kebe kawokawo anoano tanalo Yelusalema duliynomololo kosiyodiloliyale, epo epetapi bilibinomate ebe tanalo ulamete ebe nanitabokobi ebo midiya.

<sup>24</sup> Wiyasiya ibi magumulo Ya:sute ebene nanitabo tanalo kapiya lumagi iditamawo kawokalimiya:, mabu ebe iyatawanomola epo bilibinomono tepo magumulo kuba elemasigi tanalate ba:pola:lamena. <sup>25</sup> Ega:walo ebete lumagi idi kananakia: ebete ebene tepo magumuno tanalo nanitabonomolo kawokalima:, mabu ebete epo bilibinomono tepo magumuno tanalo iyalo iyatawiya.

## 3

### *Ya:sute Yu Epono Watodawa Nikadimasiago Tabo Degelaniya*

<sup>1</sup> Ebe tetelo Yu epono watodawa idi nokolinami, ebene mailo Nikadimasitela, ebe Pa:lisi tanebadawa idila. <sup>2</sup> Idoko idilo ebete Ya:sutamo penate na:pegeni, “Iyatulamedawa, a epetapi iyatawala a:ma: Godote palibiyata a ka:piyatutama:ema:, mabu Godote kebe lumagigodolo okolina:no, ebete a:ma:le dosiyodilola:wenaka ebako anoano tanalo osiyodilolema: a:ka:modobomene.”

<sup>3</sup> Ya:sute ebene tabo eba wiyanalone negeni, “Na a:ma:tamo nani tabonomo gemo, lumagite olinoma: eda:lo ebe oli igilamo walo awokala:no, Godote Kawo Elawodawama: deda:na ebete ebe tanalono magumu a:kuimene.”

<sup>4</sup> Ebema: Nikadimasite Ya:suko nalateda:ni, “Lumagite kadelema: deda:na, ebe tetelo ebete olinoma: walo keba kunu na:keda:mene? Gaboa:nola, mabu ebete ebene menokono tepo magumamo opegate menokote ebe walo alaima: modoboa:!”

<sup>5</sup> Ya:sute ebetamo nowamini, “Nale a:ma:tamo nani tabo gemo, lumagite obamo ega:walo Godokono Uliyanano elawamo olinoma: eda:no, Godote Kawo Elawodawama: deda:na ebete ebe duliynomolamo a:ka:nopegamene.

<sup>6</sup> Me opolo lumagite dawokaliya ebe tetelo ebene igilote menokola nabiwila iba:godone pawokaliya, wiyasiya ebene uliyanano nanitabo igilote Godokono Uliyanagodone ka:pemene, <sup>7</sup> ebema: epate olinoma: eda:ote walo awokalaoma: degemo, ebe tanaloma: a:ma: akola:wa:la:. <sup>8</sup> Lumagite Godokono Uliyanano elawamo olinoma: eda:lo ebe oli igilago walo daka-wokalamene ebe tanalo ma kunula. Me opolo awate a:ka:tuwa: ebene ubilo iyaiya apune dapaloguta, a:ma:le ebene diyamo kapiya olowitata wiyasiya awate ebene wagilimite ka:pitale ega:walo keba apulo ka:nolopoligutale a:ma: iyatawa:.”

<sup>9</sup> Nikadimasite wiyasiya Ya:sutamo negeni, “A:imano tabono magumu na wadenomamo kelawea:. Me tanalo keba kunula:ka:?”

<sup>10</sup> Ebene Ya:sute ebena tabo eba wiyanalona negeni, “A:ma: Isalaela epono iyatulamedawa idilata, wiyasiya mabu keleka: a:ma: me tanalona magumu kiyatawawena:?” <sup>11</sup> Na a:ma:tamo nani tabonomo gemo, naimano tanebapiago ale diyatawaonama: ebe iyaiya tanalo gelanakoma:, ega:walo ale iyalo dulamoliyama: ebe iyaiya tanalo kiyawaonakoma:, wiyasiya la: Yu epo epetapiate aimano tabo kolowiawenakoa:. <sup>12</sup> Iyo, nale me tetelo la: me opono tanalo da:kiyawaolametanakoma, la: wiyasiya nanitabokobi ka:midila:wena:, ebema: nale Godokono Unu Duliyaomolona tanalo la: walo da:ka:kiyawaolametama, diyala, la: atumu nanitabokobi a:ka:midila:ema. <sup>13</sup> Nanitabola, me opo epo magumulo lumagi idite Godokono Unu Duliyaomolamo ka:nodoliya:, wiyasiya Epono Naniwite Unu Duliyaomolone me opamo a:piwisigiya, ebema: ebe kapiyate iyatawala Unu Duliyaomolona tanalo.

<sup>14</sup> “Ega:walo me tanalo idila, Mosesete bulu opolo kalu idi auli inamabuamo osiyodilote gaubamo keba kunu kadipatiyale, modobola a:ma: ebe tanalo nemalagidila. Ebe tetelo bu kaluate Isalaela epo magumulo kebe epo daloliya, iba:te Mosesekono auli kalutamo da:meleiya, Godote ibino igilo ebo mula:lalamiya. Ebema: nanitabola, me tetelo Godote atu gabodo Epono Naniwi unamo kadipatemene, <sup>15</sup> ebena piyate ebe nanitabokobi da:midima:na: iba:te uwomua: igilo ebo kelaema:na:. <sup>16</sup> Mabu Godote me opo epo nilakapolo kawonomamo eba malagidilolelo ebena Gudu kapiyanomo me opamo ebo palibiya, ebema: piyate ebe nanitabokobi da:midima:na: ibino igilate akalatidioma:na: wiyasiya iba:te uwomua: igilo kelaema:na:.

<sup>17</sup> “Nanitabola, Godote ebena Gudu dapalibiya, ebe tetelo ebe ubi kiyatiya: ebena Gudute epono tanalo anagilamelelamete kuba wiya kikalaema:, ao, wiyasiya ebe ubila ebete ibino igilo ka:pa:mula:lalaema:. <sup>18</sup> Ebema: piyate Godokono Gudu nanitabokobi da:midina Godote iba:tamo kuba wiya a:kikalaemene, wiyasiya piyate ebe nanitabokobi midia:no Godote ebena woki iyalo iyatiya iba:tamo kuba wiya kikalaema:, mabu iba:te nanitabokobi midi magumulo ebena Gudu kapiyanomo kelawea:. <sup>19-20</sup> Numa:, Godokono alote me opamo da:piya iba:te ubia:noma: eda:iya, wiyasiya ibi ubila idoko magumulo kilukulionama: mabu ibino osiyodilole tanalo kubakubanomola. Iyo, kuba osiyodilolepiate wade alo ubia:noma: eba eda:olo alo magumamo ka:pelamenakoa:, mabu ibi ubia:nola alote ibino kuba pukuilamelelaema:, ebema: nanitabola, ibino kuba anagiyamida tanalote iba:tamo ka:pemaigamene, <sup>21</sup> Wiyasiya piyate Godokono nanitabo gabodo da:tolamena iba:te alo magumamo ka:pelaema:na:, ebena iba:te wadewade tanalo Godokono elawamo eba osiyodilolelo alote ibino nanitabo tanalo ebo kawokalilaemene.”

### *Epo Obama Waduba:midaoledawa Yonete Ya:sukono Tanalo Dawokalimiya*

<sup>22</sup> Ebe tanalo dolopoligiya Ya:sute ebe waloma:tapiago Yudiya opamo tolamete, iba:te ebola tete geyageyadopolo eba nilukulilo epo epetapiate obama aduba:mida tanalo laema: da:pelamenakiya Ya:sute ibi ebo walubilinaki. <sup>23</sup> Ega:walo atu tetelo epo epetapiate Yonetamo da:pelamenakiya, ebete ibi Inono duliyaomolo niyakabolo atumu kowaduba:midaolenaki mabu ebola obo kawodopola, ebe Inono duliyaomolote Salimi duliyaomolo tatalilo itana. <sup>24</sup> Ebe tetelo gabamaniate Yoneko idoko moto guamo iyatia:nola.

<sup>25</sup> Ebene egela idilo Yoneko waloma:tapiate Yu opono dubu ida:go epono apeno daleyā ukulaole tanaloma: apamineuteitiya. <sup>26</sup> Ebema: epetapi iba:te ebe tabo gela magumune Yonetamo pelamete ebe napaniya, “Iyatulamedawa, dopamo Yodane Kolomo apulo a:ma:tamo da:pemaigi ebe dubuno tanalo a:ma:le atamo dawokalima:wia, ebete walo ka:pete epo obamo ba:powaduba:midaolente, ega:walo epo bilibinomite a miyapaete ebetamo na:tolama:.”

<sup>27</sup> Yonete ibino tabo eba wiyalo negiya, “Lumagite wade tanalo a:ka:tuwa: a:kelaemene, Godote ebetamo ikamea:no ebete gito ka:lutamene. <sup>28</sup> Nale la:tamo degimo, la: ebe tabo nanitabonomolo olowimata. Iyo, na ma kunu gimo, ‘Na Godokono Alibodawa Kelisotea:, wiyasiya Godote na napaliboniya Kelisoko dopomete ka:toma:.’ <sup>29</sup> Dubu idite oli kamiyaale delaemene, ebete soliyomu osiyodilote ebe kamiyaale nanitabonomolo ebenoma: keda:mene. Ebe tetelo ebe dubuno wade namutudawate tete da:pesamo ebe niyakabamo nutite, ebenu namutudawano tabo madodo olowite ebenu kawo kalakala duimene, ebete atumu kekalakalamene. Nanitabola, na eba kunula, Kelisoko mabuma: naimano tepo magumulo kalakala kawonomote etaboki, <sup>30</sup> ebema: modobola ebete kawoma: neda:mene, na wiyasiya da:pesoma: keda:mamo.”

#### *Unu Duliyomolone Da:piwisigiya Ebe Kawodawano Tanalo*

<sup>31</sup> Godokono Unu Duliyomolone da:piwisigiya ebe Kawodawate opo epo bilibinomo nodoilina. Kebe lumagite me opolo dokolina, ebe me opono tanaloma: kiyawaonako mabu ebe opo lumagila, wiyasiya Unu Duliyomolone da:piya ebe dawa eba kunua:. Ebete me opolo a:ka:tuwa: Kawodawanomoma: eba peda:nalo, <sup>32</sup> Unu Duliyomololo kebe tanalo kulamiyaale ega:walo kebe tanalo kolowiyale, ebete ebe iyaiya tanalo opo epatamo napawokalilamena, wiyasiya ibi magumulo epetapi bilibinomite ebenu tabo kelawena:. <sup>33</sup> Ebe mabuma: kebe lumagite ebenu tabo nanitabonomolo delaemene, ebete ebe tanalodo me tanalo idi kawokalimene, Godoko kapiya ebe nanitabo tanalo awokalimidawala. <sup>34</sup> Nanitabola, Godote dapalibiya ebe Kawodawate Godokono nani tabo kiyawaonako, mabu Godote ebenu Uliyanano elawo kawonomo ebetamo iyalo ikamiya, <sup>35</sup> iyo, Nabiwi Godote ebenu Gudu nilakapolo nemalagidilona, ebema: ebete ebetamo elawo ikamiya ebete tanalo bilibinomo osiyodilolema:. <sup>36</sup> Ebe mabuma: kebe lumagite Godokono Gudu nanitabokobi da:midina, Godokono uwomua: igilote ebegodolo bitana, ebete iyalo elawi, wiyasiya kebe lumagite Godokono Gudutamo tuduwata:no, Godokono kawo dowa tanalomote ebetamo bitana ebema: ebete nanitabo igilo a:kelawenamene.

## 4

#### *Ya:sute Samaliya Opono Kamiyala:go Tabo Da:kiyawaiya*

<sup>1</sup> Ebene Pa:lisi tanebapiate Ya:sukono tanalo ma kunu olowiya, ebete epo bilibinomo ebenu waloma:tapima: midilite ibi obamo ebo waduba:midaolenaki, wiyasiya Yonete bilibili epo kowaduba:midaolenakia:. <sup>2</sup> Ebe teteno nanitabo tanalote wiyasiya ma kunu itani, ebe epo magumulo Ya:sute lumagi idi obamo kaduba:midanakia:, ebenu waloma:tapiate a:ka:tuwa: waduba:midaolenakiya, <sup>3</sup> ebenu Ya:sute Pa:lisi tanebapino tabo gela tanalo diyatawiya, ebe tetelo ebete Yudiya opo atepate Ga:lili opamo olowaima: malagidiliya.



<sup>4</sup> Ebene ebamo ka:nemaigama: ebete duiyanomolo wagilimite Godokono ubilo Samaliya opodo tote <sup>5</sup> ebe opono Saika duliynomolamo gito nemaigiya. Ewonino tetelo Ya:ikobote ebenu gudu Yausepetamo dikamiya me Saika duliynomolo ebe damela niyakabolo itana, <sup>6</sup> ega:walo Ya:ikobote dobobiya ebe obo gulite ebolo atumu ba:kitana. Ebene egela tuli tetenomolo Ya:sute tete geyageyadopo pete ebe obo guli niyakabolo pokolite ela ebe pamiti.

<sup>7-8</sup> Ebene Ya:suko waloma:tapiate bae maniamo uwateoma: duliynomolamo da:tolamiya, ebe a:ka:tuwa: obo gulilo eba okolitalo Samaliya opo kamiyale idite obo iyapoma: duliynomolone ebo piya, Ebene Ya:sute ebe naniya, “Na obo kapete unamita. Niyata, na obo nikanama:.”

<sup>9</sup> Ebene kamiyaletete Ya:sukono tabo eba wiyalo negiya, “Eiye, a:ma: Yu opono dubulata ega:walo na Samaliya opono kamiyalela! A:ma: na oboma: beda:ma: kanana:wa:?” Ebete ma kunu degiya mabu Yu epate Samaliya opo epo daleyagopima: gelalo atu kalila:mo obo nioma: talenama: gelanaka.

<sup>10</sup> Ebene Ya:sute negiya, “Godote epatamo gito dikalamena ega:walo potele a:ma: oboma: da:towemeta, a:ma:le ebe netewa tanalo nanitabolo niyatawawetaleka:, a:ma:le na banana:wena: nale a:ma:tamo igilo obo kikametama:.”

<sup>11</sup> Kamiyaletete ebetamo negiya, “Kawodawa, a:ma: ebe igilo obo kebene na:kelawa:emene? A:ma:godolo obo iyapono inamabu puliyala, ega:walo numa:, me obo guli ebe kulukulunomola. <sup>12</sup> A:ma: aimano ewono Ya:ikoboko da:pesodawama: gelo a:ma: a:ka:tuwa: a:ma: kawoma: ka:mida:wita? Me obo guli ebete a ebenu walone gudi mabuma: obobiya, Ebene ebe ega:walo ebenu gudi, ega:walo ebenu sipi-goeogoeo ega:walo kau-goeogoeo, ibi bilibilinomate me obo nionamiya.”

<sup>13</sup> Ya:sute wiyasiya ebetamo negiya, “Kebe lumagite me obo da:nimene ebe obo kapete walo ka:kuimene, <sup>14</sup> wiyasiya nale kebe obo lumagitamo nima: dikaemo ebe obo kapete walo a:kuminakomene. Ebe igilo obote lumagino okoli magumune tete bilibilinomolo ba:peka:ka:liyanamene, ma kunu ebete uwomua: igilo nanitabonomolo kelaemene.”

<sup>15</sup> Ebene kamiyaletete ebetamo negiya, “Kawodawa, niyata, a:ma: ebe obo natamo nikanama:. Nale da:nimo, na walo obo kapete a:kunamenakomene ega:walo nale me obo iyapoma: walo a:ka:penakomo.”

<sup>16</sup> Ya:sute ebe naniya, “A:ma: duliynomolamo toawete, a:imano awi nad-abua:wete mamo kapimiya na:piyala:.”

<sup>17</sup> Ebene kamiyaletete nowamiya, “Na awia:nola.”

Ya:sute ebetamo negiya, “A:ma: awia:noma: nanitabolo geata, <sup>18</sup> mabu a:ma: dopamo paibu iyaiya dubate aida:tepaiata, ega:walo ka:lo a:ma:go dokolina ebe dubu a:imano awinomoa:. Iyo, a:ma: awia:noma: nanitabolo geata.”

<sup>19</sup> Ebema: kamiyaletete ebetamo negiya, “Kawodawa, na niyatawitamo, nanitabola, a:ma: Godokono woki awokalimidawa idilata. <sup>20</sup> A Samaliya epono ewoniate Godoko me damela ununomolo amamatenakiya ebema: ale talenama: gelanama:, wiyasiya la: Yu epate negelanakomata epate Yelusalemalo Godoko namamatenama:na:.”

<sup>21</sup> Ya:sute ebetamo negiya, “Kamiyale, nale degitamo, a:ma: me tabo nanitabokobi na:mida:. Tete na:pe, piyate Nabiwi Godoko damamatena iba:te walo Yelusalemalo akamamatenama:na: ega:walo me damela ununomolo akamamatenama:na:. <sup>22</sup> La: Samaliya opo epate Godoko amamate gabo nanitabonomolo iyatawa:, wiyasiya a Yu epate me tanalo iyatawala mabu Godokono igilo mula: tanalote agodone opo kawonomamo pena.

<sup>23</sup> Nanitabola, tete ka:pemene, iyo, ebe na:pe, piyate Nabiwi Godoko

nanitabonomolo damamatena iba:te oli woki uwatete ebenu Uliyanano elawamo ega:walo ebenu nanitabo tanalodo ebe bamamatenama:na:, mabu Nabiwite ebako epo olena ebe kamamatenama:. <sup>24</sup> Godote lumagino ololamo kokolina:, ebe uliyananomola. Ebema: piyate ebe damamatena, modobola iba:te ebenu Uliyanano elawamo ega:walo ebenu nanitabo tanalodo namamatenama:na:.”

<sup>25</sup> Ebene kamiyaletete ebetamo negiya, “Na iyatawala Mesayate ka:pemene, ebenu mailo idi Kelisotela. Ebete da:pemene Godokono tanalo bilibilinomo atamo kapawokalilaemene.”

<sup>26</sup> Ya:sute ebetamo nowamiya, “Na a:ma:go tabo da:kiyawautama:, na Kelisotela.”

<sup>27</sup> Ebe tetenomolo Ya:sukono waloma:tapiate duliyaomolone da:ka:pelamiya, iba:te kawiya pela:wa:iya mabu ebete me kamiyala:go tabo eba kiyawautalo ebo pulamiya. Wiyasiya ibi magumulo lumagi idite ebe kamiyale ma kunu kaniya:, “A:ma: beda: tanalo osiyodiloma: kowagela:wita?” ega:walo lumagi idite Ya:suko kaniya:, “Mabu keleka: a:ma:le eba:go tabo da:kiyawawita?”

<sup>28</sup> Ebema: ebe tetelo kamiyaletete ebenu upa obo gulilo atepate duliyaomolamo tote epo ma kunu nanaliya, <sup>29</sup> “Dubu idi na:puma:la:. Diyala, ebe da: Kelisotela:, mabu nale dopamo kebe kuba tanalo diya gabodo dosiyodilole-naimo, ebe iyaiya tanalo ebete natamo nanitabonomolo awokalilame.”

<sup>30</sup> Ebema: duliyaomolo epate kamiyaleno tabamo tudila:ote Ya:suko uima: gito tolamiya.

#### *Ya:sute Ebenu Bae Na Tanaloma: Da:kiyawaiya*

<sup>31</sup> Duliyaomolo epate eba pelamitalo ebe atu tetelo Ya:suko waloma:tapiate ebe kawiya naniya, “Iyatulamedawa, modobola a:ma: bae nena.”

<sup>32</sup> Wiyasiya Ya:sute iba:tamo negiya, “Ao, nale nama: ditana ebe baenu nanitabo tanalo la: iyatawa:.”

<sup>33</sup> Ebema: Ya:sukono waloma:tapiate ibi magumulo negeliya, “Diyala, lumagi idite ebetamo bae da: ikamele.”

<sup>34</sup> Ebene Ya:sute iba:tamo negiya, “Na dapaliboniya nale ebenu ubi tanalamo tuduwatalo ebenu woko uwomuamo da:nemaigamo, nale ebe gabodo elawo nanitabonomolo elawenakomo, bae na tanalo keba kunula:ka: eba kunula. <sup>35</sup> Numa:la:, la: pali osiyodilole tetelo ma kunu gelanakomata, ‘Netewa-netewa saganate ba:na:pola:na, pali inamabu nao tete ka:pemene.’ Ebema: nale la: tabo idi analemata, la:le Godokono pali inamabu wadenomamo ulama:wete niyatawala:, nao inamabu uwate tete a:pe. <sup>36</sup> Ega:walo me tanalo idila, kono wakalami wokodawate pali namutudawano uwomua: igilo mabuma: pali woko magumulo nao kono uwatenako. Nanitabola, namutudawate ebetamo wiya ikame iyalo owagilimi, iyo, me gabodo kono kikopu amiodawa ega:walo kono wakalami wokodawa, iba:te ibino wiya kawonomo kalakalago kapimiya kuwatema:na:. <sup>37</sup> Epate degelanaka ebe tanalo nanitabola, ‘Lumagi idite kono kikopu amiote wiyasiya ebenu ekawite pali inamabu uwate tetelo woko kosiyodilomene, ebenu ibi netewapiate kapimiya kenaoma:na:.’ <sup>38</sup> Ebema: nale la: pali inamabu uwatema: eba kunu alibolemata, wiyasiya ebe pali inamabu la:le kamiawea:. Iyo, wokopi epetapiate dopamo kodakoda woko osiyodiliya, wiyasiya ka:lo la: ibino wade woko osiyodilo magumune wadewade nao inamabu uwatenakomata.”

#### *Samaliya Opo Epo Bilibilinomate Ya:suko Nanitabokobi Da:midia*

<sup>39</sup> Ebe tetelo ebe duliynomololo dilukulinamiya ebe Samaliya opo epo magumulo epetapi bilibilinomate Ya:suko nanitabokobi ebo midiya, mabu kamiyaletete ibi ma kunu kiyawaolamiya, “Nale dopamo kebe kubakuba tanalo diya gabodo kosiyodilolenaimo, ebe iyaiya tanalo me dubute natamo nanitabonomolo awokalilame.” <sup>40</sup> Ebene iba:te ibino duliynomolone Ya:sutamo da:nemaimiya, iba:te ebe na:toweomiya ebete iba:godolo kokoliatepama:, ebema: ebe tetelo Ya:sute netewa egela ebo ka:luti.

<sup>41</sup> Ebe tetelo duliynomolo epo epetapiate Ya:sukono tabo dolowiya, ibi magumulo epetapi bilibilinomate ebe nanitabokobi midite, <sup>42</sup> kamiyale ma kunu aniya, “Dopamo tetelo a:imano tabo kapiya dolowima: ale me dawa Ya:suko nanitabokobi ebo midima:, wiyasiya ka:lo ale aimano imila galamo ebena tabo olowima:. Nanitabola, ebe me opo epono Igilo Mula:lamedawala.”

### *Ya:sute Gabamani Dubuno Koi Wadekobi Da:midiya*

<sup>43-44</sup> Ya:sute me opolo dokolinami ebete ebena tanaloma: nanitabonomolo ma kunu genaki, “Godokono woki awokalimidawa ebena duliynomolo epate ebe unamo akadipatema:na:, wiyasiya iba:te ebe ubia:noma: beda:onakoma:na:.” Ebema: Ya:sute ebe tanalo iyatawate Samaliya opolo netewa egelamo lutate, ebena ebe opo atepate ebena Ga:lili opamo walo gito ka:tiya. <sup>45</sup> Ebe tetelo Ga:lili opo epo epetapiate ebe kalakalago lawiya, mabu iba:te dopamo Aduga:la Soliyomuma: Yelusalema kawo duliynomolamo da:tolamiya Ya:sukono osiyodilole tanalo bilibilinomo nulamete wadewadenoma: ebo negeliya.

<sup>46</sup> Ebene Ya:sute Ga:lili opono Ka:ina duliynomolamo walo gito ka:tiya, ebe duliynomolo ebe ebete dopamo Godokono elawo awokalimi tanalodo obonomo wade da:imi oboma: da:midiya, ebe duliynomolola. Ebe tetelo gabamani dubu idi ebolo nokoliti, wiyasiya ebena koite Kapeniyama duliynomololo kawo gabugabuago watiti. <sup>47</sup> Ebene ebe gabamani dubute Ya:sute Yudiya opone pe tanalo dolowiya, ebema: ebete ebetamo tote ebe nananiya, “Modobola:ka: a:ma: Kapeniyama duliynomolamo pa:wete naimano koi wadekobi na:pa:midiye, mabu ebe a:e tatalila.”

<sup>48</sup> Ya:sute wiyasiya ebetamo negiya, “La: epo bilibilinomono tanalo ma kunula, nagodolo kawokawo anoano tanalo ulama:wea:no la:le na nanitabokobi ka:midina:wenakoa:.”

<sup>49</sup> Gabamani dubute ebetamo walo na:kegiya, “Kawodawa, niyata. A:ma: nago samamo na:pa:, naimano gudute da:ba:emene.”

<sup>50</sup> Ebene Ya:sute ebetamo negiya, “A:ma: kalakalago na:toa. A:imano koino igilote akalatidimene.”

Ebe tetelo ebe dubute Ya:sukono tabo nanitabokobi midite ebena Kapeniyama duliynomolamo to ebo wagilimiya, wiyasiya ebe atu egelalo ebete duliynomolamo ka:nemaigiya:. <sup>51</sup> Ebene egela idilo ebena moto wokopi epetapiate eba:go dupalugiya, iba:te ebe napaniya, “Niyata, a:imano koite dutu igilo walo a:kelawi!”

<sup>52</sup> Ebena koite kebako tetelo wadekobi kolowile, ebete ebe tanalo laema: ebena wokopi dalateda:liya iba:te nowaimiya, “Dutu egela tuli tetelo, 1 koloko tete keba kunula:ka:, gabugabute ebe ebo atepi.” <sup>53</sup> Ebene nabiwite wokilo nemalagidiliya, ebe tete ebe atu tetenomola Ya:sute ebe dani koino igilote akalatidimene, ebema: ebe ega:walo ebena moto epo, ibi bilibilinomate Ya:suko nanitabokobi ebo midiya.

<sup>54</sup> Nanitabola, Ya:sute Yudiya opone Ga:lili opamo pete netewa anoano tanalo da:posiyodiloliya, me tanalo ebe idila.

## 5

*Ya:sute Agowa Tatai Dubu Wadekobi Da:midia*

<sup>1</sup> Me tanalo dolopoligiya Ya:sute Yelusalema kawo duliyoumolaro tiya Yu epono soliyomu idi ka:nuima:. <sup>2</sup> Yelusalemano kala ga:dimi tetelo gigiyu idi bitana, ebena mailo Sipi-goeogoeono Gigiyula, ega:walo me gigiyu niyakabolo mala: ikila:no bobo ba:kitana, ebena mailo Yu epono tabamo ebe Betesedala. Ebe bobo apuapune paibu tanatima:gopi motote lamota:onamiya, <sup>3</sup> ebena iyaiya temetema:gopi bilibilinomate ebe motono golololo pola:nanakiya, ibi magumulo epetapi balidi tamiopila, ega:walo epetapi agowa tataipila, ega:walo epetapi ape kodakoda temetema:gopila. Iba:te egela bilibilinomolo obono tete ebe makopelitanakiya, <sup>4</sup> mabu iyaiya kapiyakapiya tetelo Kawodawa Godokono nopodawate bobono obo da:pologinaki obote gelewalemu ebo elewegediamidanaki. Ebe tetelo kebe temetema:godawate obo magumamo samamo da:niwisiganaki ebe kapiyate wade tanalo ebo lawenaki.\* <sup>5</sup> Ebena Ya:sute Beteseda bobamo da:nemaigiya, dubu idite ebolo na:luti, ebete 38 ulamalo pata:modoboa:noma: eda:nami. <sup>6</sup> Ya:sute ebe eba watitalo da:numiya, ebete niyatawiya ebe dubute tete geyageyanomolo eba kunu okolinami. Ebema: ebete ebe naniya, “A:ma: ubila:ka: Godote a:ma: wadekobi midima:?”

<sup>7</sup> Temetema:go dubute ebetamo nowamiya, “Kawodawa, me obo Godote gelewalemu dewegediamidanako, ebe tetelo na walubinidawa puliyala, ebema: na obamo eba niwisigitalo wiyasiya lumagi idite dopamo niwisiganako modobo tanalo ka:nelaema:.”

<sup>8</sup> Ya:sute ebetamo negiya, “A:ma: maigawete, a:imano keta mokopiamidawete, na:toa.” <sup>9</sup> Ebe tetenomolo ebe dubute wadekobi olowite, ebena keta lawete ebo tiya.

Ya:sute ebe dubu wadekobi da:midia, ebe egela ebe Yu epono woko: talena egelala. <sup>10</sup> Ebema: ebe dubute keta eba aguwatitalo Yu watowatopi epetapiate ebe ma kunu kawiya aniya, “Eiye! Me aimano woko: talena egelala! Keta aguwata magumulo a:ma: aimano pukala adikamidala:ta!”

<sup>11</sup> Ebete wiyasiya negiya, “Na wadekobi da:midini ebe dubute ma kunu anane, ‘A:imano keta mokopiamidawete na:toa.’”

<sup>12</sup> Ebema: iba:te ebe nalatediya, “Kebe dubute kanata, a:ma: keta aguawete ka:toaema:? A:ma: a nanaa:, ebe dubu potelela:ka:?”

<sup>13</sup> Wiyasiya ebe dubute Yu watowatopiatamo wiya tabo gema: ka:modobiya:, mabu ebete Ya:sukono tanalo kiyatawiya: ega:walo Ya:sute ebe wadekobi midite ebete epo bilibilinomo magumamo gito nopegiya. <sup>14</sup> Ebema: walone Ya:sute Godoko Amamateno Iya Motolo ebe dubu walo da:kumiya ebo aniya, “Numa:, a:imano ape wadekobi olowi, ebema: a:ma: kuba idi walo ako-osiyodilala:. Diyala, kawo temetemetete a:ma:tamo walo da:ba:ka:pemaigamene, ebena walogabo apuno temetemetete kawonomoma: eda:te, dopamo a:ma: dumitanamiya ebe temeteme kodolimene.”

<sup>15</sup> Ebe tetelo ebe dubute tote Yu watowatopi ma kunu nanaliya, “Na wadekobi da:midina:ka ebe dubu Ya:sutela.”

*Yu Watowatopiate Ya:suko Anakapuima: Ubi Diyatiya*

<sup>16</sup> Mabu Ya:sute Yu epono woko: talena egelalo temetema:gopi epetapi wadekobi da:midilinaki, ebema: ibino watowatopi epetapiate ebetamo dowate temeteme ikaema: ebo wagilimiya. <sup>17</sup> Ebe tetelo Ya:sute iba:tamo

\* **5:4:** Yon 5.3b-4 buka apuno tabo Yonete bukamo kakuloliya, wiyasiya ebena buka osiyodilo walogabo apune nanitabokobi mididawa idite akuloliya.

negiya, “Naimano Nabiwite egela bilibilinomolo woko osiyodilona, ebema: na ebena Gudute atumu woko kosiyodilonamo, egela idi gito ka:lutanakoa.”  
<sup>18</sup> Yu watowatopiate ebe tabo dolowiya iba:te ubi kawonomamo ebo iyatiya ebe kanakapuima:, mabu nanitabola, dopamo Ya:sute ibino talena egelano pukala adikamidaliya, wiyasiya me tetelo ebete Godoko ebena nani Nabiwima: gelo ebe a:ka:tuwa: ebena elawo Godokono elawago modoboma: ge.

*Uwomua: Igilo Godokono Gudugodolo Bitana*

<sup>19</sup> Ebema: Ya:sute iba:tamo negiya, “Na la:tamo nani tabonomo gemo, Godokono Gudute a:ka:tuwa: ebena ubilo tanalo idi osiyodiloma: modoboa:, wiyasiya Gudute ebena Nabiwino osiyodilo tanalo duminako ebete ebe atu tanalo ebe kosiyodilonako. <sup>20</sup> Mabu Nabiwi Godote ebena Gudu nilakapolo eba malagidilonalo ebena osiyodilole tanalo bilibilinomo Gudutamo awokalilamena. Nanitabola, walone tetelo Nabiwite ebena Gudutamo tanalo epetapi kawokawonomo kawokalilaemene ebete kosiyodilolema:, ebema: la: bilibilinomate ebe tanalo ulama:wete kanoanomamota. <sup>21</sup> Nabiwite a:e lumagi igilamo keba kunu kadipatenakole, Gudute atumu eba kunu kowagelena, ebete kebe lumagitamo ubi diyatimene ebe lumagitamo nanitabo igilo kikaemene. <sup>22</sup> Ega:walo Nabiwi Godote a:ka:tuwa: lumagi idino tanalo akanagiyamidaemene, wiyasiya ebete elawo Gudutamo ikamiya ebete epono iyaiya tanalo kanagilamelelaema:. <sup>23</sup> Ebema: epo bilibilinomate Guduno mailo unamo kadipatema:na:, iba:te Nabiwino mailo keba kunu kadipatenake eba kunu. Kebe lumagite Gudutamo ubia:noma: deda:na, ebete atumu Nabiwi Godotamo ubia: tanalo nakawokalimina mabu me Gudu Nabiwite opo epatamo palibiya.

<sup>24</sup> “Na la:tamo nani tabonomo gemo, potele naimano tabo olowite ebene ebete na Alibonedawa nanitabokobi da:midina, ebegodolo uwomua: igilo nanitabonomolo bitana, iyo, Godote ebe lumagino tanalo akanagiyamidaemene mabu ebete a:e magumune igilamo iyalo emaigi. <sup>25</sup> Ebema: na walo la:tamo nani tabonomo na:kegemo, tete ka:pemene, iyo, ebe na:pe, ebe tetelo a:elao epate Godokono Guduno tabo madodo dolowima:na: iba:te uwomua: igilamo kemaimioma:na:. <sup>26</sup> Nanitabola, Nabiwi Godoko kapiyagodolo uwomua: igilo bitana, ebema: ebete ebena Gudutamo elawo iyalo ikamiya ebete atumu Igilo Mabudawama: ka:keda:nama:, <sup>27</sup> ega:walo Nabiwite Gudutamo elawo walo a:kikamiya ebete epono tanalo kanagilamelelaema:, mabu me Gudu ebe Epono Naniwila.

<sup>28</sup> “Ebema: la: olowiopi naimano kiyawao taboma: akola:wa:oala:, mabu tete ebe na:pe, a:elao epate ebena tabo madodo olowite <sup>29</sup> bobo magumune igilamo kemaimioma:na:. Ebene ibi magumulo piyate me opolo wadewade tanalo kosiyodilolenaki iba:te Igilo Duliyomolamo ka:nodoloma:na:, wiyasiya piyate kubakuba tanalo dosiyodilolenakiya iba:te tabo anagiyamida bailo ibino kuba wiya ka:nuwatema:na:.”

*Nabiwi Godote Ebena Gudu Ya:sukono Nanitabo Tanalo Dawokalimina Ebe Tanalo*

<sup>30</sup> Ya:sute walo na:kegiya, “Na a:ka:tuwa: naimano ubilo tanalo idi osiyodiloma: modoboa:, wiyasiya naimano Nabiwite na dananenako nale ebe gabo kapiyado epono tanalo ebo anagilamelelakenakomo. Ega:walo anagiyamida magumulo nale tuputupunomolo osiyodilonakomo, mabu na ubila na dapaliboniya ebe Kawodawa kapiya kekalakalaiminama:, na a:ka:tuwa: na a:kekalakalaimo.



<sup>31</sup> “Na a:ka:tuwa: ma kunu degemo, ‘Na magumulo nanitabo tanalo bitana,’ epate ebe tabono nanitabo tanalo a:kelaema:na; <sup>32</sup> wiyasiya Kawodawa idi bokolina, ebe Godotela, ebete naimano nanitabo tanalo awokalimina. Na iyatawala, ebete naimano tanaloma: kebe tabo ka:kiyawaonale ebe tabo nanitabola.

<sup>33</sup> “Dopamo tetelo la: Yu watowatopiate dubu epetapi Yonetamo dali-bola:ima, ebete iba:tamo naimano nanitabo tanalo atumu akawokalimi. <sup>34</sup> Numa:la:, me opo epate naimano tanaloma: da:kiyawaona nale ibino tabo kolowinakoa:, wiyasiya Yonete dopamo da:kiyawai ebe tabo ebenu woki taboa:, ebe Godokono tabola. Ebe mabuma: nale ebe atu tabo la: walo nakanalemata, la:le nanitabokobi mida:wete Godote la:imano igilo ka:mula:lelmetama:. <sup>35</sup> Iyo, Yoneko ebe wade alo keba kunula:ka: ebe eba kunu pukuilamenami, ebene tete da:pesamo ebe alono tanaloma: la:le la:imano ubi alomatepaolo ginima:mo walo na:kolowamimata.

<sup>36</sup> “Ega:walo me tanalo idila. Nabiwi Godote iyalo tetelo natamo dikanamiya, nale ebe woko eba osiyodilonalo naimano wokote naimano nanitabo tanalo awokalimina, na Godote paliboniya. Ebema: dopamo tetelo Yonete naimano tanaloma: nanitabo tanalo dawokalima:tepiya, wiyasiya me tetelo naimano wokote naimano nanitabo tanalo wadenomamo awokalimina. <sup>37</sup> Nanitabola, na dapaliboniya ebe Nabiwite naimano nanitabo tanalo eba awokaliminalo, wiyasiya la:le ebenu tabo madodo kolowiawenakoa: ega:walo ebenu ololo kuma:wenakoa:. <sup>38</sup> Iyo, ebenu tabo la:imano tepo magumulo kitana:, mabu ebete na me opamo paliboniya wiyasiya la:le naimano tabo nanitabokobi ka:mida:wena:. <sup>39</sup> La:le Godokono Buka apuno iyaiya tabo wadenomamo eka:la:miolenakomata, mabu la: nemalagidilonamata ebe gabodo la:le uwomua: igilo kelaemamota. Eiye, numa:la:! Me Buka apuno tabo bilibilinomate naimano nanitabo tanalo awokalimina, wiyasiya la:imano ka:la:mirole magumulo ebe tabono magumunomo nanaetoamidanamata, <sup>40</sup> ebema: la: ubia:nola natamo pelama:wete nagodone uwomua: igilo ka:pelawa:ema:.

<sup>41</sup> “Na ubia:nola me opo epate na moionema:, <sup>42</sup> mabu na iyatawala la: kebako epola:ka:, la:imano tepo magumulo nilakapo kimalagidilo tanalote Godotamo nanitabolo kitana:. <sup>43</sup> Nanitabola, nale naimano Nabiwino elawamo piyamo wiyasiya la:le na kelawena:wena:, wiyasiya lumagi idite ebe a:ka:tuwa: ebenu elawamo la:tamo da:pemene la:le ebe kalakalago kelaemamota, <sup>44</sup> iyo, la: ubila la: magumulo idite idi kemoio, idite idi kemoio, eba kunu kowagela:wenama:. La: nolowiala:, la:le iyaiya tuputupu tanalo aimano kapiya Godotamo osiyodilolema: dowagela:ema ebe tetelo ebete la: kemoiolema:ta, wiyasiya la: ubia:nola. Me mabuma: la:le na nanitabokobi a:ka:midina:ema, gabo puliyala!

<sup>45</sup> “La: ma kunu akomalagidilala:, na kapiyate Nabiwi Godotamo la: kuba osiyodilolepima: keka:la:mitama:. Ao, Mosesete atumu la: kubakubapima: ka:keka:la:ima:ta, ebe la:le la:imano wade walubidawama: degelawenakoma ebe dawala! <sup>46</sup> Ega:walo la:le Mosesekono tabo nanitabokobi na:mida:wenataleka: la:le na atumu nanitabokobi ba:ka:midina:wena:, mabu ebete Godokono Bukamo iyaiya tabo dakuloliya, ebe tanalate naimano nanitabo tanalo awokalimina. <sup>47</sup> La: wiyasiya ebete Bukamo dakuloliya ebe tabo nanitabokobi ka:midila:wena:, ebema: la:le naimano tabo nanitabokobi keba kunu na:ka:mida:ema? Gabo a:kitanamene!”

*Ya:sute Epo Bilibilinomatamo Bae Dikalamoleni*  
*Ma:t 14.13-21; Mak 6.30-44; Luk 9.10-17*

<sup>1</sup> Ebene ibino tabo kiyawao tanalo olopoligote, egela epetapi da:petoiya, tete idilo Ya:sute Ga:lili Paka: apuamo peago gito na:iwiya, ebe paka:no mailo idi Taibiliyasila. <sup>2</sup> Ebene epo bilibilinomate ebe ebamo waloma:tiya, mabu ebete temetema:gopiatamo dosiyodilolenaki, iba:te ebe anoano tanalo ulamoliya ega:walo iba:te kawo tanalo idi uima: ubi iyatiya. <sup>3</sup> Ebene Ya:sute damela unamo nodolote ebe waloma:tapiago ebo nokoliti, <sup>4</sup> ebe tetelo Yu epono Aduga:la Soliyomu tete tatalima: na:kediya.

<sup>5</sup> Ebene adimo apulo epo epetapi bilibilinomate Ya:sutamamo dapalad-abutiniya, ebete ibi ulaminate Pilipiko nanani, “A me epo bilibilinomo walubilima: bae kebolo na:kuwatelaema:?” <sup>6</sup> Ebe tetelo Ya:sute iyalo iyatawani ebete epatamo beda: tanalo na:kosiyodilomene, ebema: ebete Pilipiko me tabo anani, mabu ebe ubila ebena nanitabokobi midi tanalo kuiminama:, da: nanitabola: o da: nanitaboa:.

<sup>7</sup> Ebene Pilipite ebetamo nowamini, “Me epo bilibilinomate bae kela:mo naoma: kapiya ulamano woko wiya manite a:ka:modobomene.”

<sup>8</sup> Ebe tetelo Ya:suko waloma:tadawa idi, ebena mailo A:ndulutela, ebe Saimono Pitakono ekawila, ebete Ya:sutamamo negeni, <sup>9</sup> “Koi kapiya mela, ebegodolo paibu palowa bae ega:walo namo netewa ba:pola:na, wiyasiya ebe bae bilibilia:, me epo bilibilinomago a:ka:modobomene.”

<sup>10</sup> Ebene Ya:sute ebe opono uwago kawonomo uminate ebe waloma:tapiatamo negeni, “La: epo nanala:la: iba:te gito kilukulima:.” Ebema: epo bilibilinomate ebamo ilukulinate ebe epo deka:la:mioleniya ibino uwomu 5,000 dubuma: eda:ni. <sup>11</sup> Ebene Ya:sute ebe bae uwatenate Godotamo kalakala tabo genate, da:pola:niya ebe epatamo gito ikalamoleniya, ega:walo ebete namo kuwatenate eba kunu kowageleni epono bae kape tanalote ka:modobolamenama:.

<sup>12</sup> Ebe tetelo ebe baete ibi da:ugulamoleni Ya:sute ebe waloma:tapi nanaleni, “La: da:luli ebe bae apuapu wadenomamo nuwata:la:, mabu ale me bae a:ka:kubailaema:.” <sup>13</sup> Ebema: iba:te epagodolo da:lulini ebe palowa bae apuapu duwateniya, iba:te 12 bagowo ebe owiyaoleniya.

<sup>14</sup> Ya:sute ebena elawo epatamo kawokaliminama: me anoano tanalo dosiyodiloni, iba:te uminate negelaniya, “Nanitabola, me dubu ebe Godokono Iyanomo Woki Awokalimidawala, Godote me opamo paliboma: degiya, me ebe Kawodawala!” <sup>15</sup> Ebe tetelo Ya:sute ibino ubi tanalo iyatawani, iba:te ebe lawenate ibino Kawo Elawodubuma: gito ka:midinama:. Wiyasiya ebe ubia:nola, ebema: ebete ibi miyapanate ebe a:ka:tuwa: damela unu ida:mo gito nodoloni.

*Ya:sute Obo Unudo Da:toni*  
*Ma:t 14.22-33; Mak 6.45-52*

<sup>16</sup> Egelate eba niwisiganalo Ya:suko waloma:tapiate paka: balamo niwitonate, <sup>17</sup> wiyasiya opote didokoni ebe tetelo Ya:sute iba:tamo samamo ka:peniya:, ebema: iba:te peamo nolonate paka: a:iwale ebo wagiliminiya Kapeniyama duliyaomolo apuamo. <sup>18</sup> Ebe tetelo kawo awate eba maiganalo kawokawo ulate ebo maimioniya. <sup>19</sup> Ebene iba:te paibu o sikisi kilomita mako tete geyageyadopolo eba nabitadilonalo, ebe tetelo Ya:sute ibino pe niyakabamo obo unudo da:toni, iba:te ebe uminate kawonomamo ebo toletoleoniya, <sup>20</sup> wiyasiya ebete ibi nanaleni, “Na Ya:sutela, la: ka:toletoleonala:!” <sup>21</sup> Ebema: iba:te Ya:suko peamo kalakalago

da:nowianiya, iba:te nela:wa:oniya mabu iba:te kebamo tolamenama: dowageleniya, ebe tetenomolo iba:te ebe pe boboamo pe gito na:ilioniya.

*Epo Bilibilinomate Ya:suko Wadima: Kapeniyama Duliyomolamo Da:nemaimioniya*

<sup>22</sup> Ebene Ya:sute Ga:lili Paka: apulo da:na:miyapani, egela idilo ebe epo bilibilinomate me tanalo iyatawaiya, Ya:sute ebe waloma:tapiago kapiya peago iba:tamo da:pa:iwaliya, wiyasiya adimo tetelo waloma:tapiate walo a:ka:tuwa: da:ka:na:iwaleniya, Ya:sute iba:go ka:tonia:. <sup>23</sup> Ebe atu tetelo Taibiliyasi duliyomolo epate Kawodawa Ya:sukono anoano osiyodilo tanaloma: tabo ma kunu olowiya, ebete Godotamo baema: kalakala tabo genate epo bilibilinomatamo dikalamoleni, ebema: ibi bilibilinomo epetapiate ebe uima: ibino peago ebe atu opamo ebo pelamoliya. <sup>24</sup> Wiyasiya ebe epate Ya:suko ega:walo ebe waloma:tapi ebolo nipo da:poliya, iba:te peamo walo kolote na:ka:tolamiya Kapeniyama duliyomolamo, iba:te Ya:suko ebolo ka:nowadima:.

*Ya:suko Ebe Igilo Baela*

<sup>25</sup> Ebene ebe epate Ya:suko Kapeniyama duliyomolo apulo da:numiya, iba:te ebe nananiya, “Iyatulamedawa, a:ma: mammo kebe tetelo ka:pemaigawa:?”

<sup>26</sup> Ya:sute ibino tabo eba wiyalo negiya, “Nale la:tamo nani tabonomo gemo, la:le nagodone bae uwata:wenate, ebe baete la: da:ugulamoleta la:le na unaema: ebema: pelaemata, wiyasiya naimano elawo awokalimino anoano tanalono magumu la:le la:imano wokiamo kelawa:wea:. <sup>27</sup> La:le kateneno ubi bae naoma: woko kosiyodilonala: mabu ebe baete samamo kabaleomene, wiyasiya modobola la:le uwomua: igilo bae laema: woko nosiyodilonala:. Mako bae na Epono Naniwite la:tamo kikalaemamota, mabu Nabiwi Godote me tanalo iyalo awokalimiya, na ebeno nanitabodawama: eda:namo.”

<sup>28</sup> Ebene iba:te ebe naniya, “Ale Godokono iyaiya ubi tanalo kosiyodilolema: beda: woko na:kosiyodiloma:?”

<sup>29</sup> Ya:sute iba:tamo nowamiya, “Godote la:godolo kapiya tanalonomo uima: ubila, ebete me opamo dapalibiya la: ebe dawa nanitabokobi na:mida:la:.”

<sup>30</sup> Ebema: iba:te ebe walo nakaniya, “Ale a:ma: nanitabokobi ka:miditama: a:ma:le atamo beda: anoano tanalo na:kosiyodilaemene? Modobola a:ma: a:imano elawo atamo nawokalima:! <sup>31</sup> Numa:, aimano ewoniate bulu opolo eba ilukulinalo, Godokono anoano osiyodilole tanalodo iba:te bae uwatenakiya, ebe baeno mailo ebe ma:nala. Iyo, Godokono Bukano tabote ma kunu itana, ‘Godote iba:tamo Unu Duliyomolono bae ikalamenaki,’ ebema: modobola a:ma: atumu a:imano elawo nawokalima:.”

<sup>32</sup> Ya:sute negiya, “Nale la:tamo nani tabonomo gemo, Mosesete la:imano ewoniatamo dikalamenaki, ebe bae Unu Duliyomolono baenomoa:, wiyasiya me tetelo naimano Nabiwite Unu Duliyomolono baenomo la:tamo nikalamenata, <sup>33</sup> mabu Godokono baenomo ebe Unu Duliyomolone da:piya ebe dawala, ebe kapiyate me opo epatamo nanitabo igilo ikalamea.”

<sup>34</sup> Ebene iba:te ebe walo nakaniya, “Iyatulamedawa, modobola a:ma:le me tetene wagilima:wete ebe bae atamo nikaeamenakiye.”

<sup>35</sup> Ebene Ya:sute negiya, “Na ebe igilo baela. Kebe lumagite natamo da:pemene ebe bae kapete walo a:kuminakomene, ega:walo kebe lumagite na nanitabokobi da:midinimene ebe obo kapete atumu a:kuminakomene.

<sup>36</sup> “Ka:lo nale la:imano tanalo ma kunu awokalimo, la:le la:imano balidinomamo naimano elawo uimata, wiyasiya la:le na nanitabokobi midinima: ubia:nola. <sup>37</sup> Naimano Nabiwite natamo ikanaema: dowagelena, ebe epo bilibilinomate natamo ka:pelaema:na:, ega:walo kebe dawate natamo da:pemene nale ebe iyabaiamo gito akalibamo. <sup>38</sup> Numa:la:, Unu Duliyyomolone na dapaliboniya nale ebe Kawodawano ubi tanalo osiyodiloma: me opamo piyamo, na a:ka:tuwa: naimano ubi tanalo a:kosiyodilomo. <sup>39</sup> Ebema: na dapaliboniya ebe dawano ubi tanalo ma kunula, ebete natamo kebe epo kikanamenale ibi magumulo idi kapiyate akalatidimene, ebene Uwomu Egelalo nale ibi bilibilinomo nanitabo igilamo kowadipalatelemamo. <sup>40</sup> Iyo, naimano Nabiwi ubila, kebe lumagite ebene Gudu umite nanitabokobi da:midimene, ebete uwomua: igilo kelaemene, ebema: nanitabola, Uwomu Egelalo nale ebe lumagi nanitabo igilamo kadipatemamo.”

<sup>41</sup> Ebene Yu epo epetapiate Ya:sukono tanaloma: ubia: tabo geliya, mabu ebete tabo ma kunu giya, “Na ebe Unu Duliyyomolone da:piya ebe igilo baela.” <sup>42</sup> Ebema: iba:te negeliya, “A, nanitabola:ka:, me Ya:suko Yausepekono gudula! A iyatawala ebene menokola nabiwila! Mabu keleka: ebete Unu Duliyyomolone pema: dege?”

<sup>43</sup> Ya:sute ibino tabo iyatawate iba:tamo nowamiya, “La: magumulo ubia: tabo kegelitala:. <sup>44</sup> Nabiwi Godote lumagi idi natamo magaea:no, ebe dawate ebene ubilo a:ka:tuwa: natamo pema: a:ka:modobomene, wiyasiya Nabiwite kebe dawa natamo demagaemene, nale ebe lawete Uwomu Egelalo uwomua: igilamo kadipatemamo. <sup>45</sup> Numa:la:, dopamo Godokono woki awokalimipiate ebene Bukamo tabo ma kunu akuloliya, ‘Tete na:pe, Godote a:ka:tuwa: me opo epo bilibilinomo ebene gabo kiyatulaemene.’ Ebema: me tanalo nanitabola, potele Nabiwino tabo madodo olowite ebegodone wade iyatawa tanalo delawenako, ebe dawate natamo ka:pemene. <sup>46</sup> Naimano tabono magumu kubanu akolawa:la:. Me opo lumagi idite Nabiwino ololo dopamo kumiya:, wiyasiya potele Godogodone da:piwisigiya ebe kapiyate Nabiwino ololo umiya, ebema: la:le ebe kapiyagodone Nabiwino tabo kolowiomamota.

<sup>47</sup> “Iyo, nale la:tamo nani tabonomo gemo, kebe lumagite na nanitabokobi da:midinina ebegodolo uwomua: igilote bitanamene. <sup>48</sup> Na ebe igilo baela.

<sup>49</sup> “Numa:la:, la:imano ewoniate ma:nama: deka:minakiya, iba:te bulu opolo ebe bae naonakiya ebene walone tetelo ibi bilibilinomate a:elaiya, <sup>50</sup> wiyasiya Unu Duliyyomolone da:piya, ebe bae lumagite denamene ebete a:ka:emene. <sup>51</sup> Na ebe Unu Duliyyomolone da:piya ebe igilo baela, ebema: nanitabola, kebe lumagite me bae denamene ebete uwomua: tetelo nanitabo igilago bokolinamene. Nale ebetamo dikamenakomo ebe bae ebe naimano apeno katenela, mabu nale naimano ape me opo epatamo ikalaemo ibino igilo ka:mula:lelaema:.”

<sup>52</sup> Ebema: Yu epono dowate demaigiya, iba:te ibi magumulo apamina-teuilo negeliya, “Ale me dubuno katene kenaoma:, ebete atamo keba kunu na:kikaeamene?”

<sup>53</sup> Ebene Ya:sute iba:tamo negiya, “Nale la:tamo nani tabonomo gemo, la:le Epono Naniwino katene naoa:no ega:walo ebene kalima nioa:no, nanitabo igilote la:godolo a:kitanamene. <sup>54</sup> Iyo, kebe lumagite naimano katene denanako ega:walo naimano kalima da:ninako, ebegodolo uwomua: igilote bitanamene, ega:walo nale Uwomu Egelalo ebe nanitabo igilamo kadipatemamo, <sup>55</sup> mabu naimano katene ebe nanitabo igilo baela, ega:walo naimano kalima ebe nanitabo igilo obola. <sup>56</sup> Nanitabola, kebe lumagite

naimano katene denanako ega:walo naimano kalima da:ninako, ebete na magumulo bokolina ega:walo nale ebe magumulo bokolinamo. <sup>57</sup> Na dapaliboniya ebe Nabiwino nanitabo igilote nagodolo keba kunu kitanale, eba kunu kebe lumagite naimano katene denanakomene, ebete naimano igilago bokolinamene. <sup>58</sup> Ebema: numa:la:, naimano ape ebe Unu Duliyomolone da:piya ebe igilo baela. Me baete lumagitamo nanitabo igilo bikamenakomene, wiyasiya la:imano ewoniate denaonakiya ebe baete igilo iba:tamo nanitabolo kikalamenakia:, iyo, walone iba:te gito a:elaiya.”

<sup>59</sup> Ya:sute Kapeniyama duliyomololo Yu epono balidi ibilamole motolo ibi diyatulamiti, ebe tetelo ebete iba:tamo me tabo geyageyadopo kiyawaiya.

### *Ya:suko Ebe Uwomua: Igilo Adaedawala*

<sup>60</sup> Ebe tetelo Ya:suko waloma:tapi epetapi bilibilinomate ebene iyatulame tabo olowite negeliya, “Me tabono magumu kodakodanomola, potele laema: na:ka:modobomene?”

<sup>61</sup> Iba:te ebene iyatulame tanaloma: kebe ubia: tabo degelitiya, Ya:sute iyatawate negiya, “Mabu keleka: naimano iyatulame tanalote la:imano nanitabokobi midi tanalo da:kubailamita? <sup>62</sup> Nanitabola, Epono Naniwite dopamo dokolinami ebete ebe Kalakala Duliyomolamo walo ka:ka:nodolomene, ebema: la:le ebe anoano tanalo duma:ema la: keba kunu na:kowagela:ema? <sup>63</sup> Numa:la:, Godokono Uliyanate epatamo nanitabo igilo ikalamena, wiyasiya kateneno elawote iba:tamo igilo ikalaema: ka:modobonakoa:. Ebema: nanitabola, nale la:tamo da:kiyawaomo ebe tabo ebe igilola, iyo, ebe tabote Godokono Uliyanagodone pe, <sup>64</sup> wiyasiya la: epetapiate nanitabokobi ka:mida:wea:.”

Ya:sute me tabo kiyawaiya mabu ebete ebene woko wagilimi mabune iyalo iyatawiya, ebe waloma:tapi magumulo piyate ebe nanitabokobi midia:pima: deda:onama:na: ega:walo potele ebe anakapumpipino kotamo diyatimene. <sup>65</sup> Ebene ebete tabo moga:melo walo na:kegiya, “La:imano nanitabokobi midia: tanaloma: nale iyalo ma kunu gemo, Nabiwite elawo lumagitamo ikamea:no, ebete a:ka:tuwa: ebene ubilo natamo a:ka:pemene.”

<sup>66</sup> Ebe mabuma: Ya:suko waloma:tapi epetapi bilibilinomate eba:go wapata:laema: ubia:noma: eda:ote ibino iyaiya ilukuli tanalamo walo gito kolowamiya. <sup>67</sup> Ebene Ya:sute ebene 12 waloma:tapi epetapi nalateda:liya, “La: atumu, la:le na bakatepana:ema?”

<sup>68</sup> Saimono Pitate ebetamo nowamiya, “Kawodawa, a potamo na:ka:tolaema: mabu a:ma: kapiyagodolo nanitabo igilo tabonomo bitana? <sup>69</sup> A iyatawala a:ma: Godokono Wade-talena Dawalata, ebema: ale a:ma: nanitabokobi na:midinata.”

<sup>70</sup> Ya:sute wiyasiya iba:tamo negiya, “A, nanitabola:ka:, nale a:ka:tuwa: la: 12 dubu uwatimata, wiyasiya la: nolowiala:, la: magumulo kapiyate Saitanakono wokodawama: eda:na!” <sup>71</sup> Ebete me tabo Yudasikono tanaloma: giya, ebe dubu ebe Keliyota duliyomolodawa Saimonokono gudula. Dopamo me dubute 12 waloma:tapi magumulo okolinami, wiyasiya walone tetelo ebete Ya:suko anakapumpipino kotamo ebe iyatiya.

## 7

### *Ya:sukono Ekakiate Ebe Nanitabokobi Ka:midia:*

<sup>1</sup> Ebene ibino tabo kiyawao tanalo dolopoligiya, ebe tetene wagilimite Ya:sute Ga:lili opo kawonomolo pata:nami, wiyasiya ebete Yudiya



opolo pata:ma: ubia:nola mabu ebe opono Yu watowatopiate ebe anaka-puima: wagenamiya. <sup>2</sup> Ebene Yu epono Nupunupu Etemoteono Soliyomu\* detataliya, <sup>3</sup> ebe tetelo Ya:sukono ekakiate ebe naniya, “Modobola a:ma: me Ga:lili opo atepawete Yudiya opamo walo na:ka:toa. Diyala, a:ma:le waloma:tapi epetapi ebolo da:ba:nulaemene, ebene a:ma:le dosiyodilola:wenaka iba:te ebe anoano tanalo wadenomamo kulaema:na. <sup>4</sup> Numa:, lumagite ubi diyatimene epo bilibilinomate ebe kowaloma:tama:, modobola ebete ebene tanalo akowaminala:. Ebe mabuma: a:ma:le me iyaiya anoano tanalo nanitabolo dosiyodilola:wenaka, modobola a:ma: atumu a:imano tanalo me opo epo bilibilinomatamo nawokalimiye!” <sup>5</sup> Ya:sukono ekakiate ebe kalakalatelo me tabo kiyawaiya mabu iba:te ebe nanitabokobi ka:midia:, epo epetapi bilibilinomate nanitabokobi midia:noma: keba kunu keda:iye eba kunu.

<sup>6</sup> Ebema: Ya:sute ebene ekakino tabo eba wiyalo negiya, “La: a:ka:tuwa: la:imano iyaiya ubi tetelo la:imano tanalo ebo osiyodilolenakomata, wiyasiya naimano nanitabo tete Godogodone ka:pea:. <sup>7</sup> Me opo epate la:tamo ka:dowaona:, wiyasiya iba:te natamo dowona mabu nale ibino iyaiya kuba osiyodilole tanalo awokalilamenakomo. <sup>8</sup> Ebema: la: a:ka:tuwa: soliyomu baiamo na:tolama:la:, wiyasiya na ka:lo a:ka:toamo mabu Godokono nanitabo tete natamo ka:pea:.” <sup>9</sup> Ya:sute me tabo gete Ga:lili opolo ebo olowagiliya.

*Ya:sute Nupunupu Etemoteono Soliyomuma: Da:tiya*

<sup>10</sup> Ya:sukono ekakiate soliyomuma: da:tolamiya, ebete wiyasiya walone diya gabodo waloma:taliya, awokala ka:tiya:. <sup>11</sup> Ebe tetelo Yu watowatopiate soliyomu bailo ebe eba wadilo negeliya, “Me dubu Ya:suko keleka:?”

<sup>12</sup> Ega:walo piyate soliyomuma: da:pelamoliya ebe Yu epo bilibilinomate Ya:sukono tanaloma: tabo ganaloma: kawonomamo kiyawautiya. Epetapi iba:te negeliya, “Ebe wade lumagila,” wiyasiya epetapiate negeliya, “Ao, ebe epo nemasigilina.” <sup>13</sup> Ebe tetelo iba:te Ya:sukono tanaloma: awokala kegelitiya: mabu iba:te ibino watowatopino dowona tanalo tolemitiya.

<sup>14</sup> Ebene epate ibino soliyomu eba osiyodilonatelo egela idilo Ya:sute iba:tamo nawokalate Godoko Amamateno Iya Motamo tote iyatulame ebo nowagilimiya. <sup>15</sup> Ebe tetelo ebene iyatulame taboma: Yu watowatopiate eba anoanoutalo negeliya, “Eiye! Me dubute kebako iyatawa kelawile mabu ebete ka:sukuliya:!”

<sup>16</sup> Ya:sute wiyasiya iba:tamo negiya, “Nale la: diyatulametana, ebe tabote na dapaliboniya ebe Kawodawagodone pena, na a:ka:tuwa: naimano ubi tanalodo kiyatulametana:. <sup>17</sup> La: a:ka:tuwa: la:imano taneba magumulo naimano tanaloma: ma kunu gelanamata, ‘Ebene iyatulame tanalote Godogodone da:penale o da: ebene kateneno wokine da:penale.’ Numa:la:, la: magumulo potele Godokono ubi tanalo osiyodiloma: ubi diyatina, ebe

\* **7:2:** Nupunupu Etemoteono Soliyomu ebe Yu epono soliyomu idila, iba:te ulama bilibilinomolo bosiyodilonakoma:na:. Ibino ewoniate Isipiti opone da:nemaimiya, ebe tetelo iba:te Ka:inane opamo samamo nemaimioa:no dopamo 40 ulamalo bulu opolo ilukulinamiya. Ebe tete geyageyanomolo iba:te bulu opono iyaiya opolo eba latepaonatolo sipi-goeogoeo tama awokowiamidaole motoma: midilite, iba:te ebakobako nupunupu motolo laonakiya, nani motoloa:. Ega:walo ebe atu tetelo Godoko amamateno sipi-goeogoeo tama awokowiamidaole motote iba:godolo itanami, ebema: Godote iba:go eba pata:nalo ibino iyaiya modoboa: tanalo magumulo ebete ibi wadenomamo walubilinaki. Ebema: ebe tetene wagilimite me teta:mo pemaiga, Godote Yu epono ewoniatamo wade walubi tanalo diyatinaki, iba:te ebe tanalo eba malagidilolo ulama bilibilinomolo a:iti egela magumulo Godotamo ibino kalakala soliyomu osiyodilonakiya.

modobola naimano iyatulame tanalono mabu la:tamo kiyawaoma. <sup>18</sup> Iyo, kebe tetelo lumagite ebeno kateneno wokino tabo da:kiyawaona, ebe a:ka:tuwa: ebe walogona, wiyasiya kebe lumagite ubi diyatina ebe alibodawa kapiya kowalagonama; ebe lumagi ebe nanitabo tanalo awokalimidawala, ebegodolo elemasigi tanalo kitana. <sup>19</sup> Godote ebeno Totomu Tabo Mosesedo la:tamo ikalamiyata wiyasiya la: magumulo kapiya idite ebe totomu tabo bilibilinomamo nanitabonomolo ka:tuduwatana; a, nanitabola:ka:? Wiyasiya na tuputupu lumagima: eba eda:nalo, mabu keleka: la:le na anakapunaema: dowagela:wenama?"

<sup>20</sup> Ebe tetelo Ya:sukono tabo dolowiutiya ebe epo bilibilinomate ebetamo negeliya, "A:ma: kuba uliyanagonolata! Potele kegitala a:ma: anakuipuma:?"

<sup>21</sup> Ya:sute wiyasiya iba:tamo negiya, "Nale la:imano ololo apulo kapiya anoano tanalo dosiyodilimo, la: kawiya ebo la:wa:imata. <sup>22</sup> La: numa:la:, Mosesete la:tamo pukala idi dikalameiyala, ebe pukala ebe la:le baibai guda:tamo tama itamida pukala kalomolama:wenakoma:. Iyo, la:le me pukala alomo tanalo Mosesegodone laema: gelanamata, wiyasiya me tanalo ebegodone nanitabolo ka:pemaigiya:, la:imano ewoni epetapiagodone piya. Ega:walo Mosesete talena egelano pukala atumu la:tamo a:kikalamiyata, ebema: ebe netewa pukala la:godolo eba pola:nalo gudu idino pukala iyatimi tetete woko: talena egelalo demaiganako, la:le gito osiyodilonakomata mabu Godote ma kunu kegena:, tama itamida pukala iyati tanalote talena egelano pukala kadikamidalemene. <sup>23</sup> Iyo, la:imano osiyodilo tanalo ebe ma kunula, la:le Godokono ubi tanalamo ka:tudila:ema: Mosesekono totomu tabo bilibilinomo magumulo kapiya kodakodalo eba lawelo woko: talena egelano pukala ebo adikamidalenakomata. Ebema: nale woko: talena egelalo temetema:go dubu idi wadekobi da:midimo, wiyasiya mabu keleka: la:le natamo da:dowawitama? <sup>24</sup> Eiye, la: unu gabodo naimano tanalo gito akoanagiyamidana:la:, modobola la: wiyasiya Godokono tuputupu gabodo lumagino tanalo nanagiyamidama:la:!"

### *Yu Epate Ya:sukono Tanaloma: Iyaiya Tabo Degeliya*

<sup>25</sup> Ebe tetelo Yelusalema duliyaomololo dilukulionamiya ibi epetapiate negeliya, "A, nanitabola:ka:, me dubu ebe epetapiate anakapuima: dowagelena ebe lumagila! <sup>26</sup> Numa:la:, ebete ilipoa:no tabo awokala kiyawauta, wiyasiya aimano watowatopiate ebe odiyoboma: tabo idi kegelita:. Diyala, ibi da: iyatawala:, me dubute Godokono Alibodawa Kelisoma: deda:na. <sup>27</sup> A iyatawala me dubuno duliyaomolono tanalo, wiyasiya Godokono Bukate a niyatua:mena, nani Kelisote da:pemaigamene, ebe tetelo epate a:kiyatawaoma:na: ebete kebene ka:pemene."

<sup>28</sup> Ebema: Ya:sute Godoko Amamateno Iya Motolo epo eba iyatulamitalo kawonomamo negiya, "La: nanitabolo iyatawala:ka: nale kebene ka:piyamo ebe duliyaomolono tanalo? Ega:walo naimano tanaloma: la:godolo nanitabo iyatawa ba:kitanale? La: nolowiala:, na a:ka:tuwa: naimano ubilo ka:piya: la:tamo, na Kawodawate paliboniya. Ebe nanitabo tanalo awokalimidawala, wiyasiya la:le ebeno tanalo kiyatawawena:, <sup>29</sup> iyo, na a:ka:tuwa: ebeno tanalo iyatawala, mabu nale ebegodone piyamo ega:walo ebete na apaliboniya."

<sup>30</sup> Ebe taboma: epetapi ubila Ya:suko idoko motamo iyatima:, wiyasiya ibi magumulo idawate ebe kelawiya: mabu ebe tanalote nanitabolo pemaigama: Godogodone tete pea:nola. <sup>31</sup> Wiyasiya ebe atu tetelo epo epetapi bilibilinomate Ya:suko nanitabokobi midilo negeliya, "Me dubugodolo

anoano tanalo bilibilinomo ulamenakoma; ebema: ebe da: Kelisotela: Iyo, lumagi idite Keliso mailamo demaigamene, ebenu elawote me dubuno elawo a:kodolimene!”

*Yu Watowatopiate Ya:suko Idoko Motamo Iyatima: Dubu Epetapi Daliboliya*

<sup>32</sup> Epo bilibilinomate Ya:sukono tanaloma: tabo gananalo degelitiya, Pa:lisi tanebapiate olowite ebene ibi ega:walo Godotamo kalimagono ikameopino watowatopi iba:te Godoko Amamateno Moto atila:pi epetapi dubu ebo naliboliya, iba:te Ya:suko nelawete idoko motamo ka:piyatima:.

<sup>33</sup> Ebe atu tetelo Ya:sute epatamo na:kiyawauti, “Na la:go tete da:pesamo okolite, na dupaliboniya ebe Kawodawatamo walo ka:ka:tomamo. <sup>34</sup> Ebene la:le na nipo kowadinimamota, mabu nale kebe duliyaomolamo da:tomo la:le ebe duliyaomolamo tolaema: modoboa:.”

<sup>35</sup> Ebema: Yu watowatopiate ibino taneba magumulo negeliya, “Me dubute kebe duliyaomolamo na:ka:tomene, ebene ale ebe uima: a:ka:modoboma:? Diyala, aimano epo epetapiate iyaiya Yua:pino opolo da:nilukuliona, ebete iba:tamo da:ba:tomene iba:go ka:nokolima:, ebene ebete ebe Yua:pi Godokono tabo da:ba:niyatulaemene. <sup>36</sup> Ebete nege, ‘La:le na nipo kowadinimamota,’ ega:walo ebete walo na:kege, ‘Nale kebe duliyaomolamo da:tomo la:le ebe duliyaomolamo pelaema: modoboa:.’ Eiye! Ebenu tabono magumu keba kunula:ka:?”

*Uwomua: Igilo Obono Tanalo*

<sup>37</sup> Yu epono Nupunupu Etemoteono Soliyomu magumulo uwomu egele ebe kawo egelelanomoma: eda:na. Ebene ebe egelelate da:piya Ya:sute epo bilibilinomono magumulo maigate kawonomamo negiya, “Kebe lumagi obo kapete dumina, modobola ebete pete nagodolo obo na:pa:nimene.

<sup>38</sup> Ega:walo kebe lumagite na nanitabokobi da:midinimene, ebe lumagino tepo magumune uwomua: igilo obote ba:peka:ka:liyanamene, mabu Godokono Bukate eba kunu gena.”

<sup>39</sup> Buka ka:la:mioledawa, modobola a:ma: niyatawa Ya:sute me tabo Godokono Uliyanano tanaloma: kiyawauti. Iyo, dopamo tetelo Uliyanano elawote Ya:suko nanitabokobi midipiagodolo kitanamia:, wiyasiya Godote ebe a:e magumune dadipatiya, ebete Unu Duliyaomolamo odolote kawo alonomote ebe ebo na:pukuimiya. Ebe tetelo Ya:suko nanitabokobi midipiate Uliyanano elawo nanitabolo ebo lawiya.

*Yu Epagodolo Ya:suko Mabuma: Anagiyamida Tanalote Demaigiya*

<sup>40</sup> Ya:sukono tabo dolowiya ebe epono taneba magumulo epetapi bilibilinomate negeliya, “Me dubu ebe Godokono Iyanomo Woki Awokalimidawala, Mosesete dopamo pema: nanitabolo degiya me ebe dubula.”

<sup>41</sup> Wiyasiya epetapiate negeliya, “Ao, ebe Kelisotela, Godokono Alibodawala.” Ega:walo epetapiate na:kegeliya, “Ao, me dubu Ga:lili opodawala. Modoboa: Kelisote mako kuba opolo pawokalama:, <sup>42</sup> mabu Godokono Bukate a niyatuamena, Kelisote Da:ibidikono Beteliyama duliyaomololo ebenu walone guda:godone kawokalamene, Ga:lili opoloa:.” <sup>43</sup> Ebema: epo magumulo Ya:sukono tanaloma: anagiyamida tanalote maigiya, <sup>44</sup> ega:walo epetapi ubila ebe idoko motamo kiyatima:, wiyasiya ebe tetelo ibi magumulo lumagi idite ebetamo tanalo idi kosiyodiliya:.

*Yu Watowatopiate Ya:suko Nanitabokobi Ka:midiya:*

<sup>45</sup> Ebene Pa:lisi tanebapi ega:walo Godotamo kalimagono ikameopino watowatopi, iba:te Ya:suko laema: kebe dubu dopamo danaliboliya, ebe

dubate Ya:suko lawea:no walo gito ka:pelamiya. Ebema: Yu watowatopiate ibi nanaliya, “Keleka: mabu la:le ebe dubu atamo kemagaeaweae?”

<sup>46</sup> Ebe dubate ibino tabo eba wiyalo negeliya, “Ebe dubuno tabo wadenonomola, a dopamo ebako tabo kolowionakia!”

<sup>47</sup> Ebene Yu watowatopiate ibi kawiya eba analelo negeliya, “Eiye! La: ebena a:da: elemasigi tabo olowiawete nanitabokobi a:ka:mida:ema?”

<sup>48</sup> Numa:la:, a Pa:lisi tanebapi ega:walo watowatopi epetapi, a magumulo lumagi idite ebena tabo nanitabokobi ka:midina! <sup>49</sup> Nanitabola, kebe kubakuba daley a epate ibino ubi tanalo ebetamo diyatina, iba:te Mosesekono totomu tabo wadenomamo niyatawaotaleka:, a keba kunula:ka: iba:te atumu ebe nanitabokobi a:ka:midina:. Wiyasiya ibi bilibilinomo daedalepila, ebema: Godote ibi Ela Opamo kiyalekemene!”

<sup>50</sup> Ebe tetelo Nikadimasite ebe watowatopino taneba magumulo na:luti, ebete idoko tetelo Ya:suago tabo kiyawaonama: dopamo da:toni ebe dubula. Ebene ebete watowatopi epetapiatamo negiya, <sup>51</sup> “La: nanisiwale! Aimana totomu tabo idite a niyatuamena, lumagi idino nanitabo tanalo laema: ebena tabo olowia:no ale ebe unu tama gabodo kubama: gito a:kegelama:.”

<sup>52</sup> Ebene iba:te ebe kawiya eba analo negeliya, “Eiye! A:ma: atumu Ga:lili opono daley a lumagi idila:ka:? Modobola a:ma: Godokono Buka apuno iyaiya tabo nulamoliye, ebema: a:ma: kiyatawama:ta Godokono woki awokalimipi bilibilinomo magumulo idawate Ga:lili opone dopamo kemaiganakia:.”

<sup>53</sup> Ebene dadimoni ebe epo bilibilinomate ibino iyaiya motamo ebo tolamoleniya,†

## 8

<sup>1</sup> wiyasiya Ya:sute Olibi Kewakewa Unu Damelamo gito toni.

*Ya:sute Kamiyale Idi Kamiyale Idino Awiago Kuba Osiyodilo Tanalo Degebolemiya*

<sup>2</sup> Ebene egela idilo Ya:sute Godoko Amamateno Iya Motamo duiyanomolo walo ka:pete, epo bilibilinomate ebetamo da:pelamiya, ebete okolite ibi iyatulame ebo wagilimiya. <sup>3</sup> Ebe tetelo Godokono totomu tabo iyatulamepi epetapi ega:walo Pa:lisi tanebapi, iba:te kamiyale idi lawete epono ololo apuamo gito magatiya, mabu me kamiyalete kamiyale idino awiago kawo kuba osiyodilutalo iba:te ebo ulamiya. <sup>4</sup> Ebema: iba:te Ya:suko naniya, “Iyatulamedawa, me kamiyale kamiyale idino awiago kawo kuba eba osiyodilutalo, ale ibi ulamete me kamiyale ebo laema:. <sup>5</sup> Mosesekono totomu tabote a niyatuamena, mako kamiyaleno kuba osiyodilo mabuma: modobola epate ebe nokolamo mapemete nanakapuima:na:. Ebema: a:imano woki keba kunula:ka:? Ale ebetamo a:e wiya ba:kikaema:?” <sup>6</sup> Iba:te me tabo Ya:sutamono negelitiya, mabu ibi ubila epono ololo apulo Ya:sukono tanalo ma kunu awokalima:, ebete Mosesekono totomu tabamo da:ba:tuduwatamene o a:ka:tuduwatamene. Ebete tuduwata:noma: degemene, ebe tetelo iba:te ebe kubadawama: kegelama:na:.

Ya:sute wiyasiya ibino tabo wiya:no tuduwatate ebena kotamo damelamo iyaiya tabo akuloliti. <sup>7</sup> Ebema: iba:te atu alateda: tabo ebe kawiya analo atepa:no, ebe tetelo Ya:sute maigate negiya, “Kuba:nola, la:imano taneba magumulo potele kuba osiyodiloa:dawama: deda:na, modobola ebete dopo nokola lawete ebe na:mida:emene, ebena la: epetapiate walogabo apune

† **7:53:** Yon 7.53–8.11 buka apuno tabo Yonete bukamo kakuloliya; wiyasiya ebena buka osiyodilo walogabo apune nanitabokobi mididawa idite akuloliya.

ebe mapema:wete ebo nanakapumiyala.” <sup>8</sup> Ebene Ya:sute opamo walo ka:tuduwatate ebena kotamo iyaiya tabo epetapi kakuloliya.

<sup>9</sup> Ebema: piyate Ya:sukono tabo dolowiya, iba:te woki iyakobi midilite, ebene ibino taneba magumulo kapiya idi tonaki, kapiya idi tonaki, ebe dubu bilibilinomate iyaiya ma kunu tolamoliya kadelekedela:godone wagilimite oli ape dubatamo nemaiga. Ebe tetelo Ya:suko kapiyate ebolo okoliti, ega:walo ebe kamiyaletate ebena ololo apulo utiti. <sup>10</sup> Ebene Ya:sute ebena wato adipatete kamiyaletamo negiya, “Kamiyale, kuba wiya a:ma:tamo ikaema: dowagelitaka, ebe epo keleka? A:ma: kuba dawama: degita, ebako lumagi idi ba:ka:lutale?”

<sup>11</sup> Ebete wiyasiya negiya, “Ao, Kawodawa, natamo kuba wiya ikanamedawa idi puliyala.”

Ebene Ya:sute ebetamo negiya, “Na atumu a:ma:tamo kuba wiya a:kikametama. Modobola a:ma: na:toa, walone tetelo ebako kuba walo ako-osiyodilala.”

### *Ya:suko Ebe Me Opo Kawonomono Alola*

<sup>12</sup> Tete idilo Ya:sute Pa:lisi tanebapiatamo walo na:ka:kiyawaiya, “Na ebe me opo kawonomono alola. Kebe lumagite na dowaloma:enena ebete idoko magumulo a:kepata:namene mabu ebegodolo nanitabo igilo alote bitanamene.”

<sup>13</sup> Ebene Pa:lisi tanebapiate ebetamo negeliya, “A:ma: a:ka:tuwa: a:ma: adipatelo degeawa:, ebema: epate a:imano tabo a:kelaema:na.”

<sup>14</sup> Ya:sute ibino tabo eba wiyalo negiya, “Ao, na a:ka:tuwa: na kadi-patenakoa:, wiyasiya naimano nanitabo tanalo na a:ka:tuwa: nawokalim-italeka:, naimano iyaiya tabote nanitabonomoma: beda:ona:, mabu na kapiyate iyatawala nale kebene ka:piyamo ega:walo nale walo kebamo da:ka:tomo. La:le wiyasiya naimano tanalo kiyatawawena:, <sup>15</sup> mabu la: me opo epono woki gabodo lumagino tanalo gito anagilamelemenakomata! Numa:la:, nale me opolo eba okolinalo lumagi idino tanalo anagiyami-damete kuba wiya kikamenakoa:, <sup>16</sup> wiyasiya kebe tetelo nale lumagi idino tanalo nanagiyamidametaleka: ebena tanalo nanitabolo bawokalimina:, mabu Nabiwite na dapaliboniya ebete elawo natamo ikanamiya ebe tanalo kosiyodiloma:. Ebena woki ega:walo naimano woki kapiyala, ebema: nale lumagi idino tanalo kubama: degitamo na kapiyate kegita:, ebe tetelo naimano Nabiwite atu tabo ebe kegita. <sup>17</sup> La:imano totomu tabo idite ma kunu gena, epono anagiyamida magumulo netewapiate atu tabo degelama:na: tabo anagiyamidapiate ebe tanalo nanitaboma: kegelama:na: <sup>18</sup> Ebema: numa:la:, nale naimano nanitabo tanalo eba awokaliminalo, na dapaliboniya ebe Nabiwite atumu naimano nanitabo tanalo la:tamo nakawokalimina.”

<sup>19</sup> Ebe tetelo iba:te ebe negelamiya, “A:imano nabiwi ale kumita:. Ebe keleka:?”

Ya:sute ibino tabo eba wiyalo negiya, “Na ega:walo naimano Nabiwi, aimano tanalo la: kiyatawawena:. La:le naimano nanitabo tanalo niy-atawawetaleka:, naimano Nabiwino tanalo atumu la: biyatawawena:.”

<sup>20</sup> Ya:sute Godoko Amamateno Iya Motolo eba lutalo, ebete ebe Motono nilakapo mani alomo bailo epo eba iyatulamitalo me tabono iyaiya tanalo Pa:lisi tanebapiatamo ebo kiyawaiya. Ebe tetelo epetapi ubila ebe idoko motamo kiyatima:, wiyasiya ibi magumulo idawate ebe kelawiya: mabu ebe tanalote nanitabolo pemaigama: Godogodone tete pea:nola.



*Ya:sute Kebamo Da:tomene Nanitabokobi Midia:piate Ebamo Tolaema: Modoboa:*

<sup>21</sup> Ebema: Ya:sute Pa:lisi tanebapiatamo walo na:kegiya, “Tete tatalila, nale la: ka:miyapamamota, ebene la:le na eba wadinilo la: la:imano kuba osiyodilole magumulo gito ka:elaomamota, mabu nale kebe duliynomolamo da:tomo la: ebe duliynomolamo nago tolaema: modoboa:.”

<sup>22</sup> Ebema: Yu watowatopiate ibino taneba magumulo negeliya, “Mabu keleka: ebete dege a eba:go tolaema: modoboa:? Me tabono magumu ma kunula:ka:, ebe a:ka:tuwa: ebe bakanakapuimene?”

<sup>23</sup> Ebema: Ya:sute ibino tabo eba wiyalo negiya, “La: me opo epolata, wiyasiya na Unu Duliynomolone piyamo, na me opo lumagia:.” <sup>24</sup> Ebema: nale la: nanitabonomolo ma kunu analemata, la: la:imano kuba magumulo ka:elaomamota, mabu na uwomua: tetelo dokolinamo ebe Kawodawala. La: me tanalo nanitabokobi midia:no, nanitabola, la: bilibilinomate la:imano kuba osiyodilole magumulo ka:elaomamota.”

<sup>25</sup> Ebene tabo olowiopiate ebe naniya, “A:ma: potelela:ka:?”

Wiyasiya Ya:sute iba:tamo negiya, “Wagilimi mabune nale la: ma kunu analimata, na ebe Kawodawala.” <sup>26</sup> Ebema: nagodolo tabo bilibilinomo epetapi ba:pola:na, nale la: mabuma: eba kiyawaolo la:imano tanalo ebo kanagilamelelaemamota. Wiyasiya numa:la:, ebe iyaiya tabote nagodone ka:pelamena:, na Alibonedawagodone pelamena. Ebe Kawodawa ebe nanitabo tanalo awokalimidawala, ebema: nale iyalo tetelo ebegodone kebe iyaiya tabo kolowiyamo, na la:tamo ebe atu tabonomo ka:kiyawaonakomo.”

<sup>27</sup> Ebe tetelo iba:te wadenomamo kemalagidiliya:, Ya:sute Nabiwi Godokono tanaloma: da:kiyawaiya.

<sup>28</sup> Ebema: Ya:sute iba:tamo walo na:kegiya, “La: me opo epate na Epono Naniwi kewa olotolowa unamo dadipanatena:ema, la: naimano tanalo ma kunu nanitabolo kiyatawaomamota, na ebe uwomua: tetelo dokolinamo ebe Kawodawala, ega:walo nale kebe iyaiya tanalo kosiyodilolenamo na a:ka:tuwa: naimano elawamo kosiyodilolena:, mabu na Alibonedawate na kebe iyaiya tabo kananiyale nale epatamo ebe atu tabonomo ka:kiyawaonakomo.” <sup>29</sup> Ega:walo me tanalo idila. Na dapaliboniya ebe Kawodawate tete bilibilinomolo naimano osiyodilole tanaloma: natamo nekalakalana, ebema: ebete nago eba okolinalo na katepanena:.”

<sup>30</sup> Ebe tetelo epo epetapi bilibilinomate Ya:sukono tabo dolowiya, iba:te ebe nanitabokobi ebo midiya.

*Ape Tutupi Ega:walo Ape Ala:mo Matuolamolepi Ibino Tanalo*

<sup>31</sup> Ebene Yu epo magumulo piyate Ya:suko nanitabokobi da:midiya, ebete iba:tamo negiya, “La: naimano iyatulame magumulo dilukula:wenama, la: naimano nani waloma:enepilata.” <sup>32</sup> Ebene la: Godokono nanitabo tanalo kiyatawaomamota, iyo, ebe nanitabo tanalote la: mibomibo wiya: woko magumune wagailitate tutupima: ka:midilimamota, ega:walo kubadawa idino matuomeo tanalo idite la:godolo a:kitanamene.”

<sup>33</sup> Ebe tetelo iba:te tabo eba wiyalo negeliya, “A A:ibalayamakono walone gudila. Ewonino tetene wagilimite me teta:mo pemaiga, aimano taneba magumulo lumagi idite kubadawa idino wiya: wokodawama: keda:namia:, ega:walo ale lumagi idino matuomeo tanalo kiyatawaonakoa:. Ebema: mabu keleka: a:ma: atamo degeawa:, Godokono nanitabo tanalote a wiya: woko magumune kowagaima:?”

<sup>34</sup> Ebene Ya:sute iba:tamo walo na:kegiya, “Na la:tamo nani tabonomo gemo, piyate kuba osiyodilole magumulo dilukuliona, ibi kubano wiya:

wokopima: eda:ona. <sup>35</sup> Nani gudunomote ebenu nabiwino moto epo magumulo ebenu okolina tetelo kalakalago bokolinamene, wiyasiya wiya: wokodawano tanalo eba kunua: Ebete ebenu woko namutudawano matuomeo magumulo bokolina, ebema: tete idilo ebe namutudawate ebe ubia:noma: deda:mene, ebete ebenu motone ebe gito kanalibomene. <sup>36</sup> Ebema: la: nolowiala: Godokono Gudute la: kubadawa idino matuolamole magumune wagailitate ebenu atu alailame tutu ekakima: da:midilitamene, ebe tetelo la: nanitabonomolo tutuma: keda:omamota.”

<sup>37</sup> Ebene Ya:sute iba:tamo negiya, “Na iyatawala la: A:ibalayamakono walone gudilata, wiyasiya la: naimano iyatulame tanalo kuwata:wena: ebema: la: ubila na kanakapunama:ema: <sup>38</sup> Numa:la:, naimano Nabiwite iyalo tetelo natamo dawokalilamiya na ebe atu tanalo la:tamo awokalilamenakomo, ega:walo la: atumu, la:imano a:da: elemasigi nabiwite kebe tanalo kiyatulametiyala la: ebe iyaiya tanalo kapiya bosiyodilolenakomata.”

<sup>39</sup> Ebene iba:te ebenu tabo eba wiyalo negeliya, “Aimano nabiwi ebe A:ibalayamatela.”

Ebe tetelo ebete ibi nanaliya, “La: A:ibalayamakono nani gudima: neda:wenataleka:, ebete dosiyodilolenaki la: ebe atu wadewade tanalo bosiyodilola:wenakona: <sup>40</sup> Numa:la:, nale Godogodone kebe iyaiya nanitabo tanalo kolowiyamo, na ebe atu tanalo la:tamo awokalilamenakomo. Ebema: la: ubila na kanakapunama:ema:, wiyasiya la:imano ewono nabiwi A:ibalayamate dopamo tuputupu lumagi iditamo dowate ebe anakapuima: kowageliya: <sup>41</sup> Nanitabola, la:imano nabiwi idi bokolina, ebe kubadawate kebe tanalo kosiyodilolenakole la: ebe atu kuba tanalo kosiyodilolenakomata, la:le wiyasiya A:ibalayamakono wadewade tanalo kosiyodilola:wena:!”

Ebene iba:te ebenu tabo eba wiyalo negeliya, “A pilo gabodo kawokalaiya:, iyo, a nabia: gudima: keda:ona: Ebema: Godoko kapiya ebe aimano Nabiwila, ega:walo a ebenu nani gudinomola.”

<sup>42</sup> Ya:sute iba:tamo negiya, “Godote la:imano Nabiwinomoma: neda:nataleka:, la:le na nilakapolo bemalagidilona:wenana:, mabu na Godogodone la:tamo piyamo. Iyo, na a:ka:tuwa: naimano elawamo ka:piya:, na Godote paliboniya. <sup>43</sup> Wiyasiya la:le me tabono magumu wadenomamo kelawa:wea:, mabu la:le naimano iyatulame tanalo ubia:noma: eda:onamata. <sup>44</sup> Numa:la:, la:imano nabiwi ebe Saitanatela, ebema: la:le ebenu gudima: eba eda:onalo ebenu ubi tanalamo tudila:onakomata. Dopamo wagilimi mabune ebe tuputupu lumagi anakapumidawala, ega:walo ebete Godokono nanitabo tanalo ubia:noma: eda:nami. Eiye, ebenu osiyodilole magumudo ebe a:ka:tuwa: ebenu tanalo ma kunu awokaliminako, ebete a:da: tabo kapiya kiyawaonako mabu ebegodolo nanitabo tanalo idi kitana: Iyo, ebe a:da: tabo kiyawaopino nabiwima: eda:na, mabu a:da: tabo kiyawao tanalo bilibilinomate ebegodone pemaimina! <sup>45</sup> Na wiyasiya iyaiya nanitabo tanalo kapiya kiyawaonakomo, ebema: la:le la:imano a:da: elemasigi nabiwi keba kunula:ka: ebako epoma: eba eda:wenalo la: na nanitabokobi ka:midina:wena:. <sup>46</sup> La: iyatawalata na nanitabo tanalo kiyawaodawala, ega:walo la:imano taneba magumulo lumagi idi modoboa: na kuba osiyodilodawama: ka:na:ima:. Ebema: mabu keleka: la:le na nanitabokobi ka:midina:wena:? <sup>47</sup> Me tanalo nanitabola, kebe epate Godokono nani gudima: deda:oma:na: iba:te ebenu tabamo ba:tudila:onakoma:na:, wiyasiya la: eba kunua:, ebema: la: ebenu tabo kolowiawenakoa:.”

*Ya:suko Ega:walo A:ibalayamako Ibino Tanalo*

<sup>48</sup> Ebe tetelo Yu epo epetapiate Ya:sutamō negeliya, “Ale a:imano tanalo nanitabonomolo ma kunu awokalima:, a:ma: kuba Samaliya opodawalata ega:walo a:ma:godolo kuba uliyanate okolina.”

<sup>49</sup> Ya:sute ibino tabo eba wiyalo negiya, “Nagodolo kuba uliyanate kokolina:. Ao, naimano osiyodilole tanalate naimano Nabiwino mailo unamo adipatenako, wiyasiya la:le naimano mailo kubaiminakomata.  
<sup>50</sup> Numa:la:, na a:ka:tuwa: na kowalogonakoa:, mabu Kawodawa idite naimano tanalo eba anagiyamidanamelo ebete na ebo kowalogonemene.  
<sup>51</sup> Ebema: nale la:tamo nani tabonomo gemo, kebe lumagite naimano iyatulame tabamo da:tuduwatamene ebete a:e a:kuimene.”

<sup>52-53</sup> Ebe tetelo tabo olowiopiate Ya:sutamō walo na:kegeliya, “A:imano tabo kiyawao tanalodo a nanitabolo iyatawaoma: a:ma: kuba uliyanagonolata. Mabu A:ibalayamako ega:walo Godokono woki awokalimipi epetapi ibi bilibilinomate a:elaiya, wiyasiya a:ma:le negeata kebe lumagite a:imano tabamo da:tuduwatamene ebete a:e a:kuimene! A:ma: na:kemalagidilawita a:imano elawote A:ibalayamakono elawo ega:walo Godokono wokopi epetapino elawo nodoilina? Eiyē, a:imano amama tanalo beda: kawonomola:ka:!”

<sup>54</sup> Ebene Ya:sute ibino tabo eba wiyalo negiya, “Kebe tetelo na a:ka:tuwa: na nowalogotaleka:, ebe amama magumulo nanitabo tanalo idite a:kitanana:. Wiyasiya naimano Nabiwite na nowalogonena, nalea:. Ebe la:le nani Godoma: deka:miawenama, ebetela. <sup>55</sup> La: ebenu tanalo nanitabolo iyatawa:, wiyasiya na kapiyate ebenu tanalo iyatawala. Numa:la:, nale la:tamo ma kunu negetaleka:, ‘Na ebenu tanalo iyatawa:,’ na a:da: tabo begena:, wiyasiya na la: a:da: tabo kiyawaopi keba kunula:ka: eba kunua:, ebema: nale Nabiwino nanitabo tanalo iyatawala ega:walo nale ebenu iyaiya ubi tanalo kapiya bosiyodilolenakomo. <sup>56</sup> Ega:walo la: me tanalo idi nemalagidilala:. La:imano ewono nabiwi A:ibalayamate ebenu tepo magumulo naimano pe tanalo demalagidilonaki kawo kalakala tanalo iyatawanaki, iyo, ebe egelate pema: ebete kalakalago makopelenami.”

<sup>57</sup> Ebe tetelo tabo olowiopiate ebe naniya, “Eiyē! A:ma: aimano ewono A:ibalayamako nanitabolo a:kuma:wiyala? Ebete iyalo tetenomolo a:iya ega:walo a:ma: 50 ulama tete lumagia:, a:ma: oli ape dubulata!”

<sup>58</sup> Ebene Ya:sute iba:tamo eba wiyalo negiya, “Na la:tamo nani tabonomo gemo, na ebe uwomua: tetelo dokolinamo ebe Kawodawala. A:ibalayamate me opamo awokala:no na dopamo Godago okolinaimo.” <sup>59</sup> Ebe tetelo iba:te ebe tabono tanaloma: kawonomamo dowoate nokola ebo uwatiya ebe mapemete kanakapuima:, wiyasiya Godote ebe waminalo Amamateno Iya Moto atepate gito tiya.

## 9

### *Ya:sute Balidi Tamio Dubu Wadekobi Da:midia*

<sup>1</sup> Egela idilo Ya:sute eba tonatolo balidi tamio dubu ebo numiya, ebe dubute ebenu menokono tepo magumune eba kunu pawokaliya. <sup>2</sup> Ebene Ya:suko waloma:tapiate ebe nalatediya, “Iyatulamedawa, me dubute balidi tamiolo dapawokaliya pokono kubala:ka:? Ebenola:ka: o ebenu menokola nabiwila ibino kubala:ka:?”

<sup>3</sup> Ebene Ya:sute ibino tabo eba wiyalo negiya, “Me dubuno kuba:, ega:walo ebenu menokola nabiwila ibino kuba:. Me dubute ma kunu dapawokaliya, ebe mabu bitana Godote iyalo tetelo ubi iyatiya ebenu wokono kawo elawo ebegodolo kawokalima:. <sup>4</sup> La: nolowiala:, a egelano alo magumulo eba

ilukulinalo, na dapaliboniya ale ebe Kawodawano woko osiyodilonama; wiyasiya idoko tanalo na:pe, ebe tetelo lumagi idite woko a:kosiyodilomene.

<sup>5</sup> Nale me opolo eba okolinalo na me opono aloma: eda:namo.”

<sup>6</sup> Ebe tetelo Ya:sute ebe tabo kiyawaote, ebete kowe damelamo meamidate ebe kowa:mo kobokobo osiyodilote dubuno balida:mo abutilamelemete <sup>7</sup> ebe naniya, “A:ma: Silomo mailagono mala: ikila: baiamo toawete mala: ebo na:neta.” Silomo mailono magumu ebe nitana ‘Alibo Tanalola.’ Ebene ebe dubute ebe mala: ikila: bailo mala: da:netiya, ebene balidite na:melete ebete opo uma:go walo ebo ka:piya.

<sup>8</sup> Ebe tetelo ebe niyakabolo dilukulinamiya ega:walo piyate dopamo ebe manima: towetoweolo duminakiya, iba:te ebe umite ebo geliya, “Me dubu gabo balalo okolite manima: da:toweolamitanaki, me ebe dubula:ka:?”

<sup>9</sup> Epetapiate ibino tabo eba wiyalo negeliya, “Iyo, ebe ebetela,” wiyasiya epetapiate negeliya, “Ao, ebe ebetea:, ebene ololo keba kunula:ka: ebako lumagi idila.”

Wiyasiya ebe dubute a:ka:tuwa: ebene tanalo eba awokalimilo negiya, “Na ebe ebe dubula.”

<sup>10</sup> Ebene iba:te ebe naniya, “A:imano balidi wadekobi keba kunu kolowiometa?”

<sup>11</sup> Ebete ibino tabo eba wiyalo negiya, “Dubu idi ebene mailo Ya:sutela, ebete kowe damelamo meamidate ebe kowa:mo kobokobo osiyodilote naimano balida:mo ebo alomo. Ebene ebete na nanane Silomo mala: ikila: bailo mala: ka:netama:. Nale eba kunu da:nosiyodilomo, na balidi ebo melemo.”

<sup>12</sup> Ebene iba:te ebe walo nakaniya, “A:ma: wadekobi da:midita, ebe dubu keleka:?”

Ebete negiya, “Na iyatawa:.”

*Pa:lisi Tanebapiate Ya:sukono Wade Osiyodilo Tanalo Kubama: Degeliya*

<sup>13-14</sup> Ya:sute balidi tamio dubu wadekobi ka:midima:, ebete kebe egelalo kobokobo osiyodilote ebene balida:mo dalomomiya, ebe egela Yu epono woko: talena egelala. Ebema: epetapiate ebe wade walubi tanalo kanawokalima:, iba:te ebe dubu lawete Pa:lisi tanebapiatamo gito magatiya. <sup>15</sup> Ebe tetelo Pa:lisi tanebapiate talena egelano tanalo eba malagidilolo ebe naniya, “A:imano balidi wadekobi kebako gabodo kolowiometa?”

Ebete ibino tabo eba wiyalo negiya, “Dubu idite naimano balida:mo kobokobo abutilamelenamete, nale mala: da:netamo na balidi ebo melemo.”

<sup>16</sup> Ebe tetelo Pa:lisi tanebapi epetapiate negeliya, “Me dubute woko: talena egelano pukala adikamidale, ebema: ebe Godokono alibodawanomoa:.” Wiyasiya epetapiate negeliya, “Ao, ebe wade lumagila. Kubadawagodolo Godokono elawo kitana: mako anoano tanalo osiyodilolema:.” Ebema: ibi magumulo anagiyamida tanalote gito maigiya.

<sup>17</sup> Ebe tetelo iba:te ebe dubu walo nakaniya, “A:imano balidi wadekobi da:midilimita, ebe dubu a:ma:le poma: kegeawita?”

Ebete nowamiya, “Nale ebe Godokono woki awokalimidawa idima: gitamo.”

<sup>18</sup> Ebe tetelo ebe dubute menokono tepone balidi tamiolo dapawokaliya ega:walo ebene balidite ka:lo wadekobi dolowiome, Yu watowatopiate ebe tanalo netewa nanitabokobi ka:midiliya:. Ebema: iba:te ebe dubuno menokola nabiwila iba:tamo tabo gito alibiya iba:te ka:pema:. <sup>19</sup> Iba:te da:piya Yu watowatopiate iba:godone ibino guduno nanitabo tanalo lawete

ibi nanaliya, “La: egelamata me dubu la:imano gudula, ega:walo la: ege-lamata ebe menokono tepone balidi tamiolo pawokaliya. Ebema: la: me tanalo atamo nawokalima:la:, ebena balidite wadekobi kebako gabodo kolowiomele?”

<sup>20</sup> Ebene ebena menokola nabiwila iba:te ibino tabo eba wiyalo negeliya, “Nanitabola, ebe aimano gudula, ega:walo a iyatawala ebe menokono tepone balidi tamiolo pawokaliya. <sup>21</sup> Wiyasiya a iyatawa: ebena balidite wadekobi kebako gabodo kolowiomele ega:walo ebena balidi potele wadekobi ka:midilimile. Ebe dubu kawola. Modobola la: ebe nanala:, nanitabo tanalo ebete la: ka:kiyawaolaema:ta.” <sup>22</sup> Ebe dubuno menokola nabiwila iba:te tabo ma kunu degeliya mabu iba:te Yu watowatopi tole-lamiya. Watowatopiate iyalo egeliya, kebe lumagite Ya:suko Godokono Alibodawa Kelisoma: degemene, iba:te ebetamo talena kiyatima:na: ebete balidi ibilamole moto guamo epo epetapiago ka:podoloma:. <sup>23</sup> Ebe mabuma: ebe dubuno menokola nabiwila iba:te negeliya, “Aimano gudu ebe dubu kawola, modobola la: ebe nanala:.”

<sup>24</sup> Ebene Yu watowatopiate dopamo balidi tamiolo dokolinami, ebe dubu iba:tamo walo keka:mite ebe nakaniya, “A:ma: Godokono ololo apulo eba utitalo nanitabo tanalo atamo nawokalima:, me dubu Ya:sute a:ma:tamo beda: tanalo kosiyodilole? A iyatawala ebe iyaiya kuba osiyodilole dawala.”

<sup>25</sup> Ebe tetelo ebete tabo eba wiyalo negiya, “Na iyatawa:, ebe da: wade lumagila: o da: kuba lumagila:. Wiyasiya na kapiya tanalo iyatawitamo, na dopamo balidi tamiodawala, ka:lo na balidi a:melemo.”

<sup>26</sup> Ebene Yu watowatopiate ebe walo nakaniya, “Ebete a:ma:tamo beda: tanalo osiyodilote a:imano balidi wadekobi ebo kolowiometa?”

<sup>27</sup> Ebete negiya, “Na nani tabo la: iyalo analemata, wiyasiya diyala, la: wadenomamo kolowiawea:. Ebema: la: beda: mabuma: olowima: walo da:kowagela:witama? La: ebena waloma:tapi epetapima: eda:oma:la:ka:?”

<sup>28</sup> Ebene iba:te wiyasiya ebe malogolo kawiya eba analo negeliya, “A:ma: ebena waloma:tadawa idilata, aa:! A Mosesekono waloma:tapila! <sup>29</sup> Mabu a iyatawala Godote Mosesedo tabo a:kiyawaonaki, wiyasiya me dubuno nanitabo tanalo a iyatawa:. Ebe kuba daley a duliyo molo idilo ega:walo pilo gabodo da: awokaliyale!”

<sup>30</sup> Ebene ebe dubute tabo eba wiyalo negiya, “Me beda: kuba tanalola:ka:? Me dubute naimano balidi anoano gabodo wadekobi midiliname, wiyasiya la: watowatopi iyatawa: ebete kebene ka:piyale! <sup>31</sup> A bilibilinomo iyatawala Godote kuba osiyodilolepino tabo kolowinakoa:, wiyasiya kebe lumagite ebe Kawodawama: gelo ebetamo da:tuduwatamene, Godote ebe lumagino tabo kolowimene. <sup>32</sup> Opo wagilimi mabune me teta:mo pemaiga idawate balidi tamio lumagi wadekobi da:midiya, a opo epate ebe anoano tanalo kuminakia:. <sup>33</sup> Ebema: naimano woki ma kunu itana, me dubu Godogodone pea:notaleka:, ebete epo kowalubilima: wade tanalo idi osiyodiloma: a:ka:modobona:!”

<sup>34</sup> Ebe tetelo Yu watowatopiate ebena tabo eba wiyalo negeliya, “Eiye! A:ma: menokono kuba osiyodilo tanalodo awokaliyata! Mabu keleka: a:ma: a iyatuaema: dowagela:wita?” Ebene iba:te kawo dowago ebe dubutamo balidi ibilamole moto guamo popega talena iyatimite gito alibiya.

### *Godokono Osiyodilo Tanalo Umia: Lumagi Ebe Balidi Tamiodawala*

<sup>35</sup> Ebene Yu watowatopiate ebe dubu dowago dalibiya, Ya:sute ebe tanalo olowite ebe wadiago da:piya, ebete ebe dubu pumite ebe napaniya, “A:ma: Epono Naniwi nanitabokobi na:ka:mida:wita?”



<sup>36</sup> Ebene ebete nowamiya, “Kawodawa, Epono Naniwi potelela:ka?: A:ma:le na diyatunama:emene, nale ebe nanitabokobi ebo ka:midimamo.”

<sup>37</sup> Ebene Ya:sute ebetamo negiya, “A:ma:le ebe numitata, mabu ka:lo a:ma:go ebete kiyawauta.”

<sup>38</sup> Ebe dubute negiya, “Nanitabola, Kawodawa, na ka:lo a:ma: nanitabokobi na:midimata,” ebene ebete pupamo okolite Ya:suko ebo amamatiya.

<sup>39</sup> Ebene Ya:sute negiya, “Na me opo epono iyaiya tanalo anagilamele-laema: piyamo. Ebema: piyate balidi tamiolo dilukuliona, na ibino balidi kepalamililaemamo iba:te tanalo bilibilinomo wadenomamo kulaema:, ega:walo piyate a:ka:tuwa: ibino amama magumulo degelana, ‘A balidi na:meleonama:,’ nale ibino balidi wiyasiya idokoma: ka:midililaemamo.”

<sup>40</sup> Ebe tetelo Pa:lisi tanebapi epetapiate Ya:suko niyakabolo delam-ota:oniya, iba:te ebena tabo olowite negeliya, “A:ma: na:kegeawita, a atumu balidi tamiopila?”

<sup>41</sup> Ebene Ya:sute iba:tamo negiya, “La: Godokono tabono iyaiya tanalo iyatawaoa:noma: neda:wetaleka:, ebete la: balidi tamiopinomoma: ka:la:mia:no la:imano kuba osiyodilole mabuma: wiya ikalaema: a:kegena. Wiyasiya la: negelanamata, ‘A Godokono tabono tanalo bilibilinomo modobolo ulamenama:,’ ebema: la:imano kuba wiyate nanitabonomolo na:pe.”

## 10

### *Sipi-goeogoeo Ega:walo Ibino Ulamedawa Ibino Tanalo*

<sup>1</sup> Ebene Ya:sute walo na:kegiya, “Na la:tamo nani tabonomo gemo, kebe lumagite sipi-goeogoeono kala magumamo gigiyudo popega:no wiyasiya balado da:popegamene, ebe pilo lumagila ega:walo ebe epetapino inamabu elawamo uwatelamedawala. <sup>2</sup> Wiyasiya kebe lumagite gigiyunomodo da:popegamene, ebe sipi-goeogoeono nani ulamedawanomola. <sup>3</sup> Ebe ulamedawate duiyanomolo kala magumune toma: dowagelemene, gigiyu umidawate gigiyu ebetamo ka:iyamidaemene. Ebene ebete ebena sipi-goeogoeonomo ibino mailamo deka:la:imene, iba:te ebena tabo madodo olowite, ebete kala magumune ibi ebo ka:powaulatelemene. <sup>4</sup> Ebete ebena sipi-goeogoeo bilibilinomo powaulatelete, ibi dopolamete eba tonatolo iba:te ebe ebo kowaloma:tama:na: mabu ibi iyatawala ibi ulamedawano tabo madodo. <sup>5</sup> Wiyasiya sipi-goeogoeate iya lumagi idi a:kowaloma:tama:na:. Ebako lumagite ibi deka:la:imene, iba:te ebe atepate iyabaiamo gito kalautioma:na: mabu iba:te ebena tabo madodo iyatawa:.”

<sup>6</sup> Ya:sute me iyatulame oiamo epo diyatulamiya, iba:te ebena magumu wadenomamo kelawiya:, nipo malagidiliya.

### *Ya:suko Ebe Wade Sipigoeogoeo Ulamedawala*

<sup>7</sup> Ebema: Ya:sute iba:tamo walo na:kegiya, “Na la:tamo nani tabonomo gemo, na ebe sipi-goeogoeono kala gigiyula. <sup>8</sup> Na pea:no piyate dopamo da:pelamenakiya, ibi bilibilinomo pilo dubula ega:walo epetapino inamabu elawamo uwatamepila, wiyasiya sipi-goeogoeate ibino tabo kolowion-akia:.”

<sup>9</sup> “Na ebe gigiyula. Kebe lumagite na magumudo da:popegamene ebete igilo mula: tanalo nanitabolo ka:pelaemene. Iyo, ebako sipi-goeote adimo apuamo naimano kala magumamo ka:popega, duiya tetelo wade uwago nalema: ka:to, ebete eba kunu eba wagenalao inamabu modobolo bula-menakomene. <sup>10</sup> Numa:la:, pilo lumagi ega:walo na, aimano tanalo iyaiyala.”

Ebete sipi-goeogoeo pilolo uwate o alukole woki kapiyado ka:pemene ibi ka:pa:kubailaema:. Wiyasiya nale na:piyamo uwomua: igilonomo iba:tamo eba ikalamelo iba:te uwomua: tetelo kekalakalaonama:, ebema: ebe igilo tanalote ibi magumulo tabokanomoma: eba eda:lo lumagite modobutima: modoboa:.

<sup>11</sup> “Ebema: na ebe Wade Sipi-goeogoeo Ulamedawala. Naimano kalakala bitana, nale naimano igilo iyabaiamo eba iyatilo ibino igilo ka:mula:lelaema:.

<sup>12</sup> “Wiyasiya kebe lumagite sipi-goeogoeo ulame woko wiyamo dosiyodilona, ebe ibi ulamedawanomoa:. Kebe tetelo ebete elawo gaa penapelo duimene, ebe a:ka:tuwa: ebene igilo eba mula:lo sipi-goeogoeo miyapate iyabaiamo gito kalaula:mene, ebene elawo gaate ibi epetapi eba palukolelo, epetapi iyaiya gito kalautioma:na:. <sup>13</sup> Iyo, mako dubute sipi-goeogoeatamo olalati tanalote pelo duimene, ebete samamo kalaula:mene, mabu ebene woko wiya ega:walo ebene igilo ebe tanalo kapiya malagidilolena, sipi-goeogoeono tanalo nanitabolo kemalagidilolena:.”

<sup>14-15</sup> Ebene Ya:sute walo na:kegiya, “Na ebe Wade Sipi-goeogoeo Ulamedawala.

“Nale naimano sipi-goeogoeono tanalo iyatawala, ega:walo ibi atumu naimano tanalo iyatawala, Nabiwi Godote naimano tanalo keba kunu kiyatawanale ega:walo nale ebene tanalo atumu keba kunu kiyatawanamo eba kunu. Ebe mabuma: naimano kalakala bitana, nale naimano igilo iyabaiamo eba iyatilo ibino igilo ka:mula:lelaema:. <sup>16</sup> Ega:walo naimano sipi-goeogoeo epetapi ba:pola:na, wiyasiya me tetelo iba:te me kala magumulo kilukuliona:. Wiyasiya nanitabola, iba:te naimano tabo dolowima:na:, nale ibi ebo kemagaelemamo iba:te me dopo sipi-goeogoeago kapimiya kilukulionama:, ebene ibi bilibilinomate kapiya kalalo aladabutite na ibino kapiya ulamedawate ibi wadenomamo ba:buiyalatelenamo.

<sup>17</sup> “Numa:la:, naimano kalakala bitana naimano igilo iyabaiamo iyatima:, ebema: Nabiwite nilakapolo na nemalagidilonena. Ega:walo me tanalo idila, nale naimano igilo iyabaiamo diyatimo, nale nanitabolo walo ka:kelaemamo. <sup>18</sup> Lumagi idite naimano igilo nagodone a:kelaemene. Ao, na a:ka:tuwa: naimano igilo iyabaiamo kiyatimamo mabu me tanalo ebe naimano tanalola, ega:walo na a:ka:tuwa: walo ka:kelaemamo mabu elawo nagodolo bitana. Naimano Nabiwite na iyalo ananiya me tanalo kosiyodiloma:, ebema: nale nanitabonomolo kosiyodilomamo.”

<sup>19</sup> Ebe tetelo Ya:sute da:kiyawaiya ebe tabono tanaloma: olowiopiate ibi a:ka:tuwa: ibino taneba magumulo woki kapiyama: ka:midiliya:, iba:te tulituliya gito kagaliya. <sup>20</sup> Ibi epetapiate negeliya, “Me dubuno tabo la:le beda:ma: kolowiawitama? Ebe kuba uliyanagonola, ebema: ebe nedaedalita!”

<sup>21</sup> Epetapiate ibino tabo eba wiyalo negeliya, “Ao, kuba uliyanate daedalekobi da:midi, ebako lumagite Godokono iyatulame tabo wadenomamo kiyawaoma: modoboa:, wiyasiya me dubuno iyaiya tabono tanalo wadewadenonomola. Ega:walo kuba uliyanagodawate modoboa: balidi tamiodawano balidi wadekobi midilima:!”

### *Epate Ya:suko Ubia:noma: Deda:iya*

<sup>22</sup> Ulama uwomu tetelo giba tanalote Yu epono opolo eba itanalo, ebe tetelo iba:te Yelusalema kawo duliynomololo Godoko Amamate Moto

A:iyamida Soliyomu\* osiyodilutiya mabu ibino tanalo eba kunula. <sup>23</sup> Ebe tetelo Godoko Amamateno Motolo tanatimi idi nitanami, epate ebe tanatimi Solomonokono mailamo ka:minakiya. Ebene Ya:sute ebe tanatimilo eba nepata:lo, <sup>24</sup> epo epetapiate pelamete ebe pa:wa:midadigalo ebetamo na:pegeliya, “A:imano nanitabo tanalo tete geyageyanomolo atamo kawokalima:wena:. Ebema: modobola a:ma: a niyatuama:, a:ma: ebe Godokono Alibodawa Kelisotela:ka:?”

<sup>25</sup> Ya:sute ibino tabo eba wiyalo negiya, “Nale me tanaloma: la: dopamo analimata wiyasiya la:le na nanitabokobi ka:midina:wea:. Ega:walo nale kebe anoano tanalo naimano Nabiwino elawamo kosiyodilolenakomo, ebe tanalate naimano tanalo ebe awokalimina, na ebetela. <sup>26</sup> Wiyasiya nanitabola, la:le ebe iyaiya tanalo dulama:wenakoma na nanitabokobi ka:midina:wena:, mabu la: naimano sipi-goeogoeonomoa:. <sup>27</sup> Naimano sipi-goeogoeate naimano tabo madodo olowinaka, ebene na ibino tanalo iyatawala ega:walo iba:te na nowaloma:enena. <sup>28</sup> Ebema: nale iba:tamo uwomua: igilo dikalaemo iba:te a:ka:elaoma:na:, iyo, nale ibi kodakodalo eba uwatelo pilodawate naimano koto magumune idi kapiya a:kelaemene. <sup>29</sup> Nanitabola, naimano Nabiwite ibi bilibilinomo natamo iyalo ikanamoniya. Ebene elawo kawonomola, idawano elawote ebene elawo kodolina:, ebema: ebe atumu ebe sipi-goeogoeo kodakodalo eba uwatelo pilodawate ebene koto magumune idi kapiya laema: modoboa:. <sup>30</sup> Nabiwi Godoko ega:walo na, a kapiyanomola.”

<sup>31</sup> Ebe tetelo epate me tabo dolowiya, iba:te nokola gito uwatiya Ya:suko mapemete ebe ebo kanakapuima:. <sup>32</sup> Wiyasiya Ya:sute iba:tamo negiya, “Naimano Nabiwite natamo dikanamoniya, nale ebe wadewade tanalo bilibilinomo la:imano ololo apulo osiyodilolenakomo. Ebema: ebe wadewade osiyodilole tanalo magumulo la:le natamo beda: tanaloma: ka:dowawitama? Mabu keleka: la:le na mapenaema: dowagela:witama?”

<sup>33</sup> Iba:te nowaimiya, “Ale a:imano wade osiyodilo tanalo idi mabuma: a:ma: mapema: kowagelita:. Ao, mabu bitana, a:ma: me opo dawama: eba eda:nalo wiyasiya a:ma:le negeata, a:ma: ega:walo Godoko, la: kapiyala! Godokono ololo apulo mako tabo kubanomola!”

<sup>34</sup> Ya:sute ibino tabo eba wiyalo negiya, “Nale degemo ebe tabo kuba:. Ebema: la: me tanalo wadenomamo nemalagidilala:, Godote la:imano ewoniatamo dikalamiya ebe Totomu Bukalo ebene tabote ma kunu itana, ‘La: bilibilinomo Godoko keba kunula:ka: ebako epoma: eda:onamata.’ <sup>35</sup> Numa:la:, Godote ebene Bukalo dawokalimina ebe nanitabo tanalono elawote uwomua: tetelo bitanamene. Ebene ewonino tetelo Godokono Buka apuno tabote ibi Godoko keba kunula:ka: ebako epoma: ka:la:miya, <sup>36</sup> wiyasiya la:imano tetelo Godote na talenama: midinite me opamo ebo paliboniya. Ebema: na a:ka:tuwa: na Godokono Guduma: degemo, nale kuba tabo kegea:. Mabu keleka: la:le kubama: degelaema?”

\* **10:22:** Godoko Amamate Moto A:iyamida Soliyomu ebe Yu epono kalakala soliyomu idila, iba:te ulama bilibilinomolo bosiyodilonakoma:na:. Ibino ewonino tetelo kapela kawo elawodubu idite Godoko Amamateno Iya Motono talena eba adikamidalelo, ebete netewa-kapiya ulamalo kuba daleyale gaeogoeo moto guamo ebo magaelenaki Godokono moto ka:kubaima:. Ebene Yu epate ebe kapela kawo elawodubu ibino opone ebene oponomamo elawamo da:na:ma:tiya, ebe tetelo iba:te Godokono Moto wadekobi ka:midite, talenama: walo ka:midite, amamatepinomatamo walo eba ka:iyamidalo kawo kalakala soliyomu Godotamo ebo osiyodiliya. Ebema: ebe tetene wagilimite me teta:mo pemaiga, Yu epate ibino Godoko Amamate Motono a:iyamida tanalo eba malagidilolo, iba:te ulama bilibilinomolo a:iti egela magumulo ibino kalakala soliyomu Godotamo osiyodilonakiya.

<sup>37</sup> “Ega:walo me tanalo idila, Godote natamo kebe wadewade tanalo osiyodilolema: kikanamonenale, nale ebe tanalo osiyodilolea:no modobola la: na nanitabokobi akomidina:la: <sup>38</sup>Wiyasiya nale ebe wadewade tanalo la: magumulo nanitabolo osiyodilolenakomo, ebema: modobola la: ebe tanalo eba ulamenalo naimano nanitabo tanalo ebo niyatawaonala:. Iyo, naimano wade osiyodilole tanalate naimano tanalo ebe awokalimina ma kunu, na ega:walo naimano Nabiwi, a kapiyanomola. Wiyasiya la: ubia:nola me tanalo nanitabokobi midima!”

<sup>39</sup> Ebe tetelo ibi ubila Ya:suko idoko motamo ebo kiyatima:, wiyasiya ebete ibi magumune iyabaiamo gito tiya iba:te ebe lawekapoma:

<sup>40</sup> Ebene ebete walo ka:tote Yodane Kolomo apuamo ka:na:iwate, Yonete dopamo epo obamo dowaduba:midaolenaki ebolo eba nokolitalo <sup>41</sup> epo bilibilinomate ebetamo ebo pelamoliya. Ebe tetelo iba:te negeliya, “Yonete Godokono elawamo iyaiya anoano tanalo kosiyodilolenakia:, wiyasiya me dubu Ya:sute dosiyodilolena ebe anoano tanalo kawokawonomola! Yonete ebene tanaloma: kebe tabo ka:kiyawaile, ebe tabono tanalo bilibilinomo nanitabonomola!” <sup>42</sup> Ebema: ibi magumulo epo epetapi bilibilinomate Ya:suko nanitabokobi ebo midiya.

## 11

### *Lasalesikono A:e Tanalo*

<sup>1</sup> Tete idilo Betani duliynomolono dubu idi, ebene mailo Lasalesitela, ebe kawo gabugabute umiti. Me Betani duliynomolo ebe atu alailame kamiyale netewa Ma:lika ega:walo Matakoko, iba:te kebolo kokolionami ebe duliynomolola. <sup>2</sup> Me kamiyale Ma:lite tete idilo Kawodawa Ya:sukono agowamo wade nibo inamabu adipanamete ebene eka:mo a:la:li diya:da:olemiya ebe dawala, ega:walo gabugabute dumiti me dubu Lasalesiko ebe ebene ekawila. <sup>3</sup> Ebene ebe tetelo Ma:lika ega:walo Matakoko iba:te lumagi idi gito alibiya Ya:suko ma kunu kananama:, “Kawodawa, a:ma:le kawonomamo demalagidilawena, ebe lumagi kawo gabugabute umina.”

<sup>4</sup> Ya:sute me tabo olowite ebene waloma:tapiatamo negiya, “Me gabugabute Lasalesikono a:e uwomuma: a:keda:mene. Gabugabute ebe dumina ebene mabu ma kunula, Godoko ubila me tanalodo ebene mailo ega:walo ebene Guduno mailo kawokobi ka:midilima:.”

<sup>5</sup> Nanitabola, Ma:lika, Matakoko, ega:walo Lasalesiko ebe Ya:sukono wade namutupila, ebete ibi kawonomamo nemalagidilolenami. <sup>6</sup> Wiyasiya Ya:sute Lasalesikono gabugabu tanalo dolowiya, ebete ebe ka:nowalubima: Yudiya opono Betani duliynomolamo samonomamo ka:nemaigiya:, ebete kebe duliynomololo kokolinamile ebe duliynomololo netewa egela walo ebo kokoliya. <sup>7</sup> Ebene Ya:sute ebe waloma:tapi nanaliya, “Modobola a Yudiya opamo walo ka:ka:tolamiye.”

<sup>8</sup> Iba:te ebene tabo eba wiyalo negeliya, “Iyatulamedawa, ale ebe opone mamu a:pelaima: mabu ebe epate a:ma: nokolamo mapema: wagemitiya. Ibi ubila a:ma: kanakapumitama:, ebema: mabu keleka: a:ma: ebamo walo samamo ka:ka:toaema:?”

<sup>9</sup> Ya:sute ibino tabo eba wiyalo negiya, “Kapiya egela magumulo modobo alote itananako, a, nanitabola:ka:? Ebene lumagite egelano alo magumulo depaitamene, ebete damela gugamo a:ka:negamene mabu me opono alonomo ebete numita. <sup>10</sup> Wiyasiya ebete idoko tetelo depata:mene agowa ukamida tanalo kiyatawamene, mabu ebegodolo alo puliyala ebene to gabo wadenomamo kuima:.” <sup>11</sup> Ebe tetelo Ya:sute tabo eba moga:melo negiya,

“Aimano namutudawa Lasalesiko u ebe watita, wiyasiya nale ebetamo tote ebe kanamutiyamamo.”

<sup>12</sup> Ebene Ya:suko waloma:tapiate ebetamo negeliya, “Kawodawa, ebete u dowatita, wadenomola! Gabugabute ebegodone nolopoliguta.” <sup>13</sup> Ya:suko waloma:tapiate ma kunu geliya, mabu ebete iba:tamo u wata tabo degiya ebe Lasalesikono a:e tanaloma: giya, wiyasiya iba:te ebe tabono magumu kelawiya:, ebema: iba:te u wata tanalonomoma: negemu malagidiliya.

<sup>14-15</sup> Ebene Ya:sute ebena tabono magumu awokalimilo ma kunu giya, “La: nolowiala:, ditidi nale Lasalesiago luta:no ebete a:enomo ebo a:i. Wiyasiya nale ebe mabuma: tepo magumulo mibomibo kiyatawita:. La: mabuma: naimano kalakala bitana, mabu tete tatalila ebena a:e tanalodo la:le naimano kawo elawo uma:wete na nanitabokobi ebo ka:midinimamota. Ebema: modobola a ebetamo ka:tolamiye.”

<sup>16</sup> Ebe tetelo Tomasiko, ebena mailo idi Nedewale Gudula, ebete waloma:tapi epetapiatamo negiya, “Kuba:nola, a bilibilinomate Iyatu-lamedawago ebamo tolamete eba:go ka:na:elaiye.”

### *Ya:suko Ebe A:e Magumune Maiga Tanalono Elawo Mabula*

<sup>17</sup> Ebene Ya:sute Betani duliyaomolamo da:nemaigiya, ebete Lasalesikono tanalo ma kunu nolowiya, ebete da:i netewa-netewa egela bobo magumulo kapitani. <sup>18</sup> Ebe Betani duliyaomolo Yelusalema kawo duliyaomolo tatalinomolo itana, ebe kawo duliyaomolamo tolame gabono tete ebe netewa-kapiya kilomita keba kunula:ka: eba kunula. <sup>19</sup> Ebema: Yu epo bilibilinomo epetapiate Lasalesikono a:e tabo olowite, iba:te kawo duliyaomolone a:pelamolliya ebena nanikubi Ma:liko ega:walo Matako ibi ka:pegelebadilaema:.

<sup>20</sup> Ebene ebe tetelo Matate Ya:sukono pe tanalo olowite eba:go alugoma: gito tiya, wiyasiya Ma:liko ka:tiya:, ebete motolo luti. <sup>21</sup> Matate Ya:suago nalugote ebete ebe nananiya, “Kawodawa, a:ma: malo nokoliawitataleka: naimano ekawite a:ka:ena:!<sup>22</sup> Wiyasiya na iyatawala, ka:lo a:ma:le Godoko beda: tanaloma: danaemene, ebete a:ma:tamo nanitabolo kikaema:ta.”

<sup>23</sup> Ebene Ya:sute ebe naniya, “A:imano ekawite a:e magumune walo ka:kemaigamene.”

<sup>24</sup> Matate ebena tabo eba wiyalo negiya, “Iyo, na iyatawala Godote Uwomu Egelalo nanitabokobi midipi bilibilinomo igilamo ka:kowadipalatelemene, Lasalesiko ebana.”

<sup>25</sup> Ebene Ya:sute ebetamo negiya, “Na ebe a:e magumune maiga tanalono elawo mabula, ega:walo na uwomua: igilola, ebema: kebe lumagite na nanitabokobi da:midinimene, a:e magumudo ebete uwomua: igilo ka:nelaemene. <sup>26</sup> Nanitabola, kebe lumagite nagodolo eba okolinalo na nanitabokobi da:midinimene, ebete a:ka:emene. A:ma: me tanalo nanitabokobi na:ka:mida:wita?”

<sup>27</sup> Matate ebena tabo eba wiyalo negiya, “Iyo, Kawodawa! Nale a:ma: nanitabokobi na:miditamata, a:ma: ebe Kelisote, Godokono Gudulata. Ebete iyalo tetelo me opamo ka:pema: degiya, a:ma: ebe lumagilata.”

### *Ya:sute Lasalesikono A:e Tanaloma: Diya*

<sup>28</sup> Ebene Matate me tabo kiyawaote, ebete motamo walo ka:tote ebena naniko Ma:litamo tabo diya gabodo ma kunu negiya, “Iyatulamedawa a:pe, ebe a:ma: uima: ubi iyatita.” <sup>29</sup> Ebema: Ma:lite me tabo dolowiya ebete samonomamo maigate Ya:suago alugoma: gito tiya. <sup>30</sup> Ebe tetelo Ya:sute Betani duliyaomolo tatalilo ela ebe amiti, Matate dopamo eba:go kebole kanalugiyale ebe atu bailo. <sup>31</sup> Ebene Ma:lite motone samonomamo



da:nemaigiya, ebe tetelo epetapiate ebe gelebadimima: da:pelamiya, ebe epate atumu motone ka:nemaimiote ebe ebo waloma:tiya, mabu iba:te nemalagidiliya Ma:lite Lasalesikono bobamo iima: to.

<sup>32</sup> Wiyasiya Ma:lite bobamo ka:tiya:, Ya:sute kebolo ka:lutiya ebe ebo tiya. Ebe ebe numite ebena agowa mabuamo eba negalo negiya, “Kawodawa, a:ma: malo nokoliawitataleka: naimano ekawi a:ka:ena!”

<sup>33</sup> Ebe tetelo Ya:sute Ma:lika ega:walo piyate eba:go da:pelamiya ibi bilibilinomono iimi tanalo umite ebena tepo magumulo ibi kawonomamo malagidilote ebe atumu iima: kowageliya. <sup>34</sup> Ebene ebete ibi nanaliya, “La:le ebe bobamo kebe teta:mo kiyata:ima?”

Iba:te ebena tabo eba wiyalo negeliya, “Kawodawa, a:ma: ago pa:wete ebena bobo bai na:puma:.” <sup>35</sup> Ebe tetenomolo Ya:sute ebo iia. <sup>36</sup> Ebene epate ebena ii tanalo olowite negeliya, “Numa:la:, ebena namutudawa malagidilo tanalo kawonomola.”

<sup>37</sup> Wiyasiya epetapiate negeliya, “Me dubute balidi tamio dubu wadekobi a:midi, a, nanitabola:ka:? Ebe samamo na:petaleka:, ebena namutudawate a:ka:ena:.”

#### *Ya:sute Lasalesiko A:e Magumune Dadipatiya*

<sup>38</sup> Ebe tetelo Ya:sute ebena tepo magumulo iima: walo eba kowagelelo bobamo ebo tiya, ebe bobote damela maboete tetelo eba itanalo, epate Lasalesikono ape iyatite bobono gigiyu kawo nokolamo ebo mopiya. <sup>39</sup> Ebene Ya:sute ebolo da:pola:niya ebe dubu epetapi nanaliya, “La: gigiyuno nokola iyabaiamo na:mupiamidala:.”

Ebe tetelo wiyasiya a:e lumagino naniko Matate negiya, “Kawodawa, iyaiya! Ka:lo ebena apete netewa-netewa egela tetelo itana, ebena: ebena abale nibote kubanomamo kemaigamene.”

<sup>40</sup> Ebene Ya:sute ebena tabo eba wiyalo negiya, “Nale a:ma: dopamo ma kunu anamata, a:ma: Godoko nanitabokobi da:mida:emene ebena elawo kawonomo kuima:ta.” <sup>41</sup> Ebene dubu epetapiate bobo gigiyuno nokola iyabaiamo mupiamidate, Ya:sute Godokono Unu Duliyomolamo melelo negiya, “Aba, na a:ma:tamo kalakala tabo gemo, mabu a:ma: naimano towetowe tabo olowinakota. <sup>42</sup> Iyo, na iyatawala a:ma: tete bilibilinomolo naimano tabo olowionakota, wiyasiya nale me tabo me epono ololo apulo gemo, iba:te naimano nanitabo tanalo ma kunu kiyatawaoma:, a:ma:le me opamo na apaliboniyata.”

<sup>43</sup> Ebene Ya:sute me kalakala tabo Godotamo kiyawaote, ebete ebena tabo madodo unamo adipatete kawiya negiya, “Lasalesi, a:ma: bobo magumune na:pemaiga!” <sup>44</sup> Ebe tetelo a:e dubute Ya:sukono tabo dolowiya, ebete bobo magumune ebo pemaigiya, wiyasiya ebena agowala kotola, ega:walo wato kalikamo aupulatolemela, Yu epate ibino a:elao epo kalikamo keba kunu kaupulatolenake eba kunu. Ebene Ya:sute epo nanaliya, “Modobola la:le ebe eba walubilo ebena apene kaliku nepalamioloma:la:.”

#### *Yu Watowatopiate Ya:suko Anakapuima: Nopo Diyatiya*

##### *Ma:t 26.1-5; Mak 14.1-2; Luk 22.1-2*

<sup>45</sup> Ebe tetelo piyate Ma:lika gelebadimima: da:pelamiya, Ya:sute Lasalesitamo beda: tanalo kosiyodiliya, iba:te ebe anoano tanalo umite epetapi bilibilinomate nanitabokobi ebo midiya, <sup>46</sup> wiyasiya epetapiate nanitabokobi midia:no Pa:lisi tanebapiatamo tolamete ibi gito nanaliya. <sup>47</sup> Ebe mabuma: Pa:lisi tanebapi ega:walo Godotamo kalimagono

ikameopino watowatopi, iba:te Ka:nisolo dubu\* epetapi ebo ka:la:miya iba:go tabo kapimiya kegelama:. Ebene iba:te tabo ma kunu geliya, “Me dubute anoano tanalo bilibilinomo osiyodilolena, ebema: a beda: tanalo na:kosiyodiloma: ebe odiyoboma:? <sup>48</sup> Kebe tetelo ale tanalo idi osiyodiloa:no gito duma:tepama:, epo bilibilinomate ebe nanitabokobi midite Kawo Elawodubuma: kegelama:na:. Ebe tetelo Loma epono gowelaopiate pelamete aimano Godoko Amamateno Moto ega:walo aimano opo kawonomo ka:pa:kubailaema:na:!”

<sup>49</sup> Ebe tetelo dubu idi ebena mailo Kayapasitela, ebete ebe ulamalo Godotamo kalimagono ikameopino Unu Watodawanomoma: eda:nami, ebene ebete Ka:nisolo dubu epetapiatamo negiya, “Eiye, la: daedelepima: akoeda:oala! Mabu keleka: la:le me dubutamo osiyodiloma: nanitabo gabo kuma:wita:? Ale ebe gito kanakapuimalema:! <sup>50</sup> Iyo, modobola epo bilibilinomono taneba magumulo kapiyadawanomote na:emene epetapi mabuma:, ebema: aimano opote a:ka:kubamene, a, nanitabola:ka:?”

<sup>51</sup> Ebe tetelo Kayapasite Ya:sutamo dowalo ma kunu malagidiliya, me tabo ebe a:ka:tuwa: ebena mulo wokiamo kiyawao. Wiyasiya nanitabo tanalote ma kunu itani, Godote me tabo ebe magumudo kiyawauti, mabu ebe ulamalo ebete Kayapasitamo gobebobo ikamiya ebete kalimagono ikameopino Unu Watodawanomoma: keda:nama:. Ebema: Ya:sute a:ea:no, dopamo Kayapasite me tabono magumu iyatawa:no nanitabolo egiya, Ya:sute ebena Yu epo bilibilinomo mabuma: ka:emene. <sup>52</sup> Wiyasiya Godote Kayapasido me tabo Yu epo kapiyatamo kegiya:, ao, ebete ma kunu giya, me opo kawonomolo iyaiya dilukuliona ibi magumulo piyate ebena gudima: deda:onama:na:, Ya:sute ebena a:e tanalodo ibi bilibilinomo walo kuwatete ibi kapiya alailame gudima: ka:midilimene.

<sup>53</sup> Ebene Kayapasite me tabo Ka:nisolo dubatamo da:kiyawauti, ebe tetene wagilimite iba:te Ya:suko anakapuima: gabo ebo wadiya. <sup>54</sup> Ebema: Ya:sute ibino tanalo iyatawate tete da:peso Yudiya opolo awokala kepata:nakia:. Ebete wiyasiya ebe waloma:tapiago ebe opo atepate Ipala:ima duliyo-molamo tolamete ebola nilukuliya, ebe duliyo-molo ebe bulu opo niyakabolo itana.

<sup>55</sup> Ebene Yu epono Aduga:la Soliyomu osiyodilo tete tatalima: dediya, soliyomu osiyodilo tete pea:no ibi epetapi bilibilinomate Yelusalema kawo duliyo-molamo dopamo tolamoliya, mabu ibi ubila Godokono ololo apulo ibino ape ukulale tanalodo iyaiya kuba daleyana tanalo dopamo opoliya-lete walone ebena soliyomu kosiyodiloma:. <sup>56</sup> Ebe tetelo ibi epetapiate Godoko Amamateno Iya Moto magumulo nutitatate Ya:suko nowadilo ibi a:ka:tuwa: ibi magumulo negeliya, “La:imano woki keba kunula:ka:, Ya:suko soliyomu baiamo ba:ka:pemene?” <sup>57</sup> Iba:te tabo ma kunu degeliya mabu Godotamo kalimagono ikameopino watowatopi ega:walo Pa:lisi tanebapi, iba:te tabo iyalo iyatiya, “Kebe lumagite Ya:suko duimene, modobola ebete samamo a napanamene, ebena ale tolamete ebe nelawete idoko motamo gito ka:piyatimalema:.”

## 12

*Ma:lite Wade Nibo Ii Ya:sukono Agowamo Dadipanamiya  
Ma:t 26.6-13; Mak 14.3-9*

\* **11:47:** Buka ka:la:mioledawa, modobola a:ma: me tanalo niyatawa, Ya:suko tetelo Yu epono watowatopi dubu epetapi, ibi me Ka:nisolo dubula. Ebe watowatopiate Yu epono iyaiya tanalo eba anagilamelelamelelo kubakubapiatamo ibino wiya ebo ikalamenakiya, wiyasiya ebe Ka:nisolo dubagodolo elawo kitanamia: lumagi a:eamo aliboma:.

<sup>1</sup> Yu epate Aduga:la Soliyomu kosiyodiloma: sikisi egelate eba na:pola:nalo, Ya:sute Betani duliyyomolamo walo ebo ka:pemaigiya, ebe duliyyomolo ebe Ya:sute a:e magumune dadipatiya ebe dubu Lasalesikono duliyyomolola. <sup>2</sup> Ebene Lasalesikono naniko Matate walubipi epetapiago Ya:sukono wade bae osiyodilomitiya, ebene dubu bilibilinomate bae denautiya, Lasalesiko ibi magumulo na:luti. <sup>3</sup> Wiyasiya ebene naniko idi Ma:lite wiya kawonomo wade nibo ii inamabu, ebene mailo ebe nadala, ebete adaete Ya:sukono agowamo padipanamete ebene eka:mo agowa a:la:li ebo iya:da:olemiya. Ebene ebe moto gu ebe inamabuno wade nibote lawenomo elawiya.

<sup>4</sup> Ebe tetelo Ya:sukono waloma:tadawa idite bae nao bailo na:luti, ebene mailo ebe Keliyota duliyyomolodawa Yudasitela, walone ebete Ya:suko anakapumpino kotamo ebe kiyatimene. Ebete Ma:likono osiyodilo tanaloma: negiya, <sup>5</sup> “Mabu keleka: ebete me wade nibo inamabu manima: ka:na:midia:? Ebete eba kunu nowageletaleka: kapiya ulamano woko wiya mani buwatena:, ebene ale nigologolopiatamo bikalamolena:!” <sup>6</sup> Yudasite me tabo degiya ebete a:da: elemasigi gabodo giya. Ebete inamabua: epono modoboa: tanalo kemalagidilolenakia: wiyasiya ebe ubila ebe kawo mani ebete a:ka:tuwa: kuwatema:, mabu ebe Ya:sukono waloma:tapino mani umidawama: eba eda:nalo tete epetapilo ebete mani pilolo uwatenaki.

<sup>7</sup> Ebema: Ya:sute ebe waloma:tapiatamo negiya, “La: Ma:liko natepala:, ebe natamo wade tanalo osiyodilo. Iyo, nale a:ea:no tetelo ebete naimano ape bobamo iyati tanalo malagidilolo me wade nibo inamabu naimano apa:mo ebema: adipana. <sup>8</sup> La: numa:la:, nigologolopiate tete geyageyanomolo la:go bilukulinama:na:, la:imano ubi tetelo ibi nowalubili-nakiyala:, wiyasiya na uwomua: tetelo la:go a:kokolinamo, tete tatalila nale la: ka:miyapamamota.”

#### *Yu Watowatopiate Lasalesiko Anakapuima: Nopo Diyatiya*

<sup>9</sup> Ebe tetelo epo epetapi bilibilinomate Ya:suko Betani duliyyomololo okoli tanalo dolowiya, iba:te ebe uima: ebamo gito tolamiya. Wiyasiya iba:te Ya:suko kapiya uima: ka:tolamiya:, ibi ubila Ya:sute a:e magumune dadipatiya ebe dubu Lasalesiko atumu ka:ka:nuima:. <sup>10</sup> Ebene Yu watowatopi ebe tanalo dolowiya iba:te nopo ebo iyatiya Lasalesiko Ya:suago kanakapulaema:, <sup>11</sup> mabu Lasalesikono tanalone epo bilibilinomate Ya:suko nanitabokobi a:midiaya.

#### *Ya:sute Yelusalema Kawo Duliyyomolamo Da:nopegiya Ma:t 21.1-11; Mak 11.1-11; Luk 19.28-40*

<sup>12</sup> Egela idilo piyate Yelusalema kawo duliyyomololo Aduga:la Soliyomu osiyodiloma: da:pelamiya, ibi bilibilinomate iyatawaiya Ya:sute ebe duliyyomolamo da:piti. <sup>13</sup> Ebema: iba:te puwala uwatete eba:go alugoma: eba tolamitalo kawonomamo negelitiya,

“Godoko nadipata:la!  
Godo, a:imano mailago da:pita,  
modobola a:ma: ebe lumagi  
kawokobi na:midie!  
Ebe a Isalaela epono  
Kawo Elawodubula!”

<sup>14</sup> Ebene Ya:sute oli ape donoki-goeo umite ebe unamo gito okoliya. Ebete eba kunu osiyodiliya Godokono tabote nanitaboma: keda:ma:, mabu ebenu Bukalo tabo idite ma kunu bitana,

<sup>15</sup> “Yelusalema duliyoumolo epala:  
 la: akotoletoleala:  
 Numa:la:, la:imano Kawo Elawodubute  
 ebe na:pita,  
 iyo, ebete donoki-goeo da:peso  
 unamo okolite ba:pita.”

<sup>16</sup> Ebe tetelo Ya:suko waloma:tapiate me Buka tabono magumu wadenomamo kemalagidilutiya:, wiyasiya walone Ya:sute Godokono elawo alago a:e magumune demaigiya, ebe tetelo ibino wokite tuputupuo-lamete iba:te ebo geliya, “Nanitabola, Ya:sute Yelusalemamo eba nope-galo, ale ebe demoima:, Godokono Buka apuno tabote ebenu tanaloma: nanitabonomoma: ebo edi!”

<sup>17</sup> Dopamo Ya:sute Lasalesiko bobo magumamo neka:mite a:e magumune dadipatiya, ebe tetene wagilimite piyate ebe anoano tanalo dumiya, iba:te iyaiya duliyoumolamo tolamolete epo bilibilinomo epetapi ebo nikiyawao-lamiya. <sup>18</sup> Ebe mabuma: Yelusalema epo bilibilinomate ebe tanalo iyatawaote, iba:te Ya:sute ibino duliyoumolamo pema: dolowiya ebe uima: gito pelamiya. <sup>19</sup> Ebema: Pa:lisi tanebapiate ubia:noma: eba eda:olo ibi a:ka:tuwa: ibi magumulo negeliya, “La: numa:la:! A elawokobi kolowita:, epo bilibilinomate a miyapaete ebe nowaloma:ta!”

#### *Yua:pi Epetapiate Ya:suko Uima: Pilipiko Daniya*

<sup>20</sup> Yu epono Aduga:la Soliyomu osiyodilo tetelo Yua:pi epetapiate Yelusalema kawo duliyoumolamo Godoko amamatema: da:tolamiya, ibi atumu ebe soliyomu bailo na:nepola:niya. <sup>21</sup> Ebene Ya:sukono waloma:tadawa idi Pilipiko, ebe Betasaida duliyoumolodawala, epetapi iba:te ebetamo nemaimite ebe nananiya, “Namutudawa, a Ya:suko uima: wagemitama:.” <sup>22</sup> Ebema: Pilipite A:ndulukoko daniya, ibi netewapiate kapimiya tote Ya:suko ebo naniya.

<sup>23</sup> Ebene Ya:sute iba:tamo negiya, “Tete a:pe, Godokono elawo alote Epono Naniwi eba pukuimilo ebe dowalogomene, epo bilibilinomate ebenu nanitabo tanalo ebo kuima:na:. <sup>24</sup> Ebema: na la:tamo nani tabonomo gemo, kono kikopute damela magumamo ma:sigate da:na:emene, ebenu igilote nanitabolo a:kolopoligomene mabu walone kono kikopu epetapiate ebe magumune ka:pemaima:na:. <sup>25</sup> Ega:walo kebe lumagite ebenu igilo kapiya demalagidilona, ebenu igilote kalatidimene, wiyasiya kebe lumagite me opolo ebenu igilo malagidiloa:no, ebenu igilote Godokono Unu Duliyoumololo uwomua: tetelo bitanamene. <sup>26</sup> Ebema: kebe lumagite naimano wiya: wokodawama: eda:ma: ubi diyatimene, modobola ebete na nowaloma:enemene, ebenu nale kebe duliyoumololo kokolinamo ebete ebe atu duliyoumololo nago bokolinamene. Ega:walo me tanalo idila, kebe lumagite naimano nani wokodawama: deda:mene, naimano Nabiwite ebe unamo kadipatemene.”

#### *Ya:sute Ebenu A:e Tanaloma: Degiya*

<sup>27</sup> Ebene Ya:sute Godotamo tabo eba kiyawaolo negiya, “Ka:lo na tepo magumulo mibomibonomoma: editamo, ebema: Nabiwi, na a:ma:tamo beda: tabo na:kegemo? Nale ma kunu ba:kegemo, ‘Nabiwi, modoboa: me olalati tetete natamo pema:’? Ao, nale mako tabo a:kegemo mabu na me

temeteme laema: me opamo ebema: piyamo. <sup>28</sup> Ebema: Nabiwi, a:ma: a:ka:tuwa: a:imano elawo alo magumudo a:ma: nowalogiye.”

Ya:sute me tabo eba gitalo ebe tetenomolo Godokono Unu Duliynomolone tabote ma kunu piwisigiya, “Na a:ka:tuwa: na iyalo owalogiyamo, ega:walo na a:ka:tuwa: walo ka:kowalogomamo!”

<sup>29</sup> Ebe tetelo piyate Ya:suko niyakabolo delamota:oniya, ebe epo bilibili-nomate ebe tabo madodo olowite negeliya, “Me tobolo unute gewata,” wiyasiya epetapiate negeliya, “Ao, ebe Godokono nopodawate ebetamo pa:kiyawauta.”

<sup>30</sup> Ya:sute ibino tabo gela tanalo iyatawate negiya, “Me tabo na mabuma: ka:pea:, la: mabuma: pe. <sup>31</sup> Nanitabola, ka:lo me opo epate ibino kuba osiyodilole mabuma: wiya kuwatema:na:, ebene me opono kuba elawodubu Saitanako Godote ebene wato kikopu kitamidaemene. <sup>32</sup> Ega:walo Godote na unamo dadipatenemene, ebe a:e tanalodo na wiyasiya epo bilibinomo natamo kemagaelemamo.” <sup>33</sup> Ya:sute me tabo da:kiyawaiya ebene magumu ma kunula, ebe kewa olotolowalo keba kunu na:ka:emene, ebete ebe tanalo ebe awokalimiya.

<sup>34</sup> Ebene epo bilibilinomate Ya:sukono tabo eba wiyalo negeliya, “Godokono Totomu Tabo Bukate a niyatuaemena, ebene Alibodawa Kelisote uwomua: tetelo bokolinamene. Ebema: a:ma: ma kunu beda:ma: kegeawa:, Godote Epono Naniwino a:e tanalodo ebe unamo kadipatemene? Epono Naniwi potelela:ka:?”

<sup>35</sup> Ebene Ya:sute walo na:kegiya, “Godokono alote la: magumulo tete kele geyageyadopo kitanamene, ebema: modobola la: me alo magumudo nowapata:lamenala:. La: nanisiwale, idoko tanalote la:tamo akopa:la:, mabu idoko magumudo depata:na ebe lumagi iyatawa: ebete kebe gabodo ka:tonale! <sup>36</sup> Ebema: idoko tanalote pea:no alote la:imano tolame gabo eba pukuiminalo, modobola la: nanitabokobi na:mida:la:, ebene la:le alono gudima: keda:omamota.” Me tabo kiyawao dolopoligiya, Ya:sute ebe epo bilibilinomo miyapate diya gabodo iyabai ida:mo tote ebo niluti.

*Yu Epo Epetapiate Ya:suko Nanitabokobi Ka:midiya:*

<sup>37</sup> Nanitabola, Ya:sute me opolo eba okolinalo Godokono elawo kawokalima: ebete epono ololo apulo anoano tanalo bilibilinomo osiyodilole-naki, wiyasiya piyate ebe iyaiya tanalo dulamenakiya ibi magumulo Yu epo epetapiate ebe nanitabokobi ka:midiya:. <sup>38</sup> Ebene me tanalote eba kunu pemaigiya, Godokono woki awokalimidawa Aisayate degiya, ebe tabote nanitaboma: keda:ma:. Iyalo tetelo ebete tabo ma kunu giya,

“Kawodawa,  
a:ma: a:imano kawo elawo  
piyatamo kawokalima:wenaka,  
ale a:imano tabo iba:tamo da:kiyawaima:,  
nanitabokobi potele ka:midile?  
Lumagi ka:luta:, puliyanomola.”

<sup>39</sup> Ebema: mabu keleka: epate Ya:suko nanitabokobi midima: mod-  
oboa:noma: deda:ona? Aisayate ebe tanalo awokalima: tabo idi ma kunu  
kegiya,

<sup>40</sup> “Godote nanitabokobi midia:pino balidi  
idokoma: midililamete,



ibino tepo magumuno woki  
 a:ka:kodakodailamelelamiya.  
 Ebema: ebete ibino tanaloma: negena,  
 ‘Iba:te balida:mo nanitabo tanalo uima: modoboa:,  
 iyo, ibino tepo magumulo  
 naimano wade tanalo iyatawaoma: modoboa:.  
 Iba:te ibino tepo magumuno woki  
 wadenomamo nemalagidilotaleka: natamo bolobila:na:,  
 ebema: na modobola  
 ibi nale wadekobi midilima.’ ”

<sup>41</sup> Nanitabola, epate Ya:suko ubia:noma: deda:oma:na:, Aisayate ebe tanaloma: me tabo iyalo egiya, mabu ebena balidite iyama: eba eda:omelo ebete Ya:suko Godokono elawo alote pukuimitalo ebo umiya.

<sup>42</sup> Ebene epo epetapiate Ya:suko ubia:noma: eba eda:olo, atu tetelo epo epetapi ega:walo ibino watowatopi epetapiate ebe nanitabokobi ebo midiya. Wiyasiya iba:te Pa:lisi tanebapi tolelamelo ibino nanitabokobi midi tanalo kawokalimiya:, Pa:lisi watowatopiate dowa magumulo ibi iyaiya duliyoumolono balidi ibilamole motamo odolo talena iyatilamekapoma:.

<sup>43</sup> Nanitabola, iba:te Ya:suko waloma:ta magumulo kodakodalo ka:pola:niya: mabu ibi ubila epate iba:tamo kekalakalaoma:, wiyasiya Godote iba:tamo dekalakalana iba:te ebe tanalo kawonomamo kemalagidilonamia:.

#### *Ya:sukono Tabote Epono Iyaiya Tanalo Anagilamelelame Tanalo*

<sup>44</sup> Ebema: Ya:sute kawonomamo eba gepatelo negiya, “Kebe lumagite na nanitabokobi da:midinina ebete na kapiya nanitabokobi ka:midinina:, ebete na dapaliboniya ebe dawa atumu nanitabokobi na:ka:midina,  
<sup>45</sup> ega:walo kebe lumagite naimano tanalo dumina, ebete na dapaliboniya ebe dawano tanalo na:kumina. <sup>46</sup> Nanitabola, na me opo pukuima: piyamo, ebema: kebe lumagite na nanitabokobi da:midinina ebete idoko magumulo a:kokolinamene.

<sup>47</sup> “Ega:walo me tanalo idila. Kebe lumagite naimano tabo olowite tuduwata:no, nale ebena tanalo akanagiyamidaemo mabu na me opo epatamo kuba wiya ikalaema: ka:piya:, wiyasiya na ibino igilo mula:lalaema: piyamo. <sup>48</sup> Numa:la:, kebe lumagite na ubia:noma: eda:te naimano iyaiya tabo uwatea:no, ebena tanalo anagiyamidaema: Kawodawa idi ba:luta. Iyo, Godote Uwomu Egelalo naimano tabamo ebe lumagino tanalo kanagilamelemene, <sup>49</sup> mabu nale da:kiyawaonamo ebe iyaiya tabo na a:ka:tuwa: naimano wokiamo ka:kiyawaona:, wiyasiya Nabiwite na dapaliboniya nale ebetamo tuduwatalo ebena tabonomo kiyawaonamo. <sup>50</sup> Na me tanalo iyatawala, Nabiwino totomu tabo ebe uwomua: igilola, ebema: ebete na keba kunu kananenakole, na eba kunu kiyawaonakomo.”

## 13

#### *Ya:sute Ebena Waloma:tapino Agowa Dukulaolelameni*

<sup>1</sup> Yu epono Aduga:la Soliyomu osiyodiloma: kapiya egelate eba ni-tanaloma, Ya:sute ebo iyatawiya me tetela, ebete tatalila me opo atepate Nabiwi Godotamo ka:tomene. Nanitabola, piyate me opolo ebena: deda:onamiya, Ya:sute ibi nilakapoilameloma kawonomamo malagidilole-nami, ebema: ibi ebe nilakapago magatalete uwomunomamo ebo ne-maigiya.

<sup>2</sup> Ebene ebe idokolo Ya:sute ebe waloma:tapiago ilukulinate bae naoniya. Ebe idoko pea:no Saitanate dopamo waloma:tadawa idi Yudasikono tepo magumamo kuba woki ma kunu iyatimiya, ebete Ya:suko anakapumpino kotamo ebe kiyatima; me dubu Yudasiko ebe Keliyota duliynomolodawa Saimonokono gudula. <sup>3</sup> Nanitabola, Ya:sute me netewa-kapiya tanalo iyalo iyatawiya, Nabiwi Godote ebetamo elawo ikamiya tanalo bilibilinomo osiyodilolema; ega:walo ebe Godogodone piya, ega:walo ebe Godotamo walo ka:ka:tomene. <sup>4</sup> Ebe mabuma: ebete bae nao baine maiganate, lubudino kaliku pekananate wiya: wokodawamu a:la:li iya:da:oleno kaliku lawenate gito pulini. <sup>5</sup> Ebene ebete wakaluamo obo alatenate ebene waloma:tapino agowa ukulaolelame ebo wagilimini, ega:walo ebete da:pulini ebe a:la:li iya:da:oleno kalikamo ebete ibino agowa a:la:li ebo iya:da:olelamenti.

<sup>6</sup> Ebene ebete Saimono Pitatamo da:peni Pitate ebetamo negeni, “Kawodawa, a:ma: naimano agowa ba:kukulalename:emene?”

<sup>7</sup> Ya:sute tabo eba wiyanalalo ebe nanani, “A:ma: iyatawa: nale a:ma:tamo beda: tanalo kosiyodilonamo, wiyasiya a:ma: walone kiyatawama:ta.”

<sup>8</sup> Ebema: Pitate negeni, “Ao, ebe tanalo modoboa: A:ma: naimano agowa a:kukulala:emene.”

Ya:sute wiyasiya ebe nanani, “Nale a:imano agowa ukulalea:no a:ma: nagodolo gobeboboa:nola.”

<sup>9</sup> Ebema: Pitate ebetamo negeni, “Kawodawa, kuba; a:ma: naimano agowa kapiya akoukulala:la: Modobola a:ma: naimano kotola watola atumu na:kukulalename:ye.”

<sup>10</sup> Ebene Ya:sute negeni, “Kebe lumagite mala: iyalo deti ebene apeno daleya puliyala, wiyasiya ebete ebene agowa kapiya nukulalemene. Me tanalo nanitabola, la: bilibilinomate oliolinoma: eda:imata, wiyasiya la:imano taneba magumulo kapiya dawate olinoma: keda:na:” <sup>11</sup> Ya:sute me tabo degeni mabu ebe iyalo iyatawiya, waloma:tapi magumulo ebe potele anakapumpino kotamo diyatimene.

<sup>12</sup> Ebe tetelo ebete ebene waloma:tapino agowa ukulaolelame dolopoligoni, ebete ebene lubudino kaliku walo ka:pulinate gito okolini. Ebene ebete ibi nanaleni, “La: iyatawala:ka; nale la:tamo dosiyodilomo ebe tanalono magumu? <sup>13</sup> La:le na la:imano Iyatulamedawama: gelanakomata ega:walo Kawodawama: akoka:na:minakomata. Nanitabola, na ebe ebetela. <sup>14</sup> Ebema: walone la:le naimano osiyodilo tanalo ma kunu demalagidilawenakoma, ‘Aimano Iyatulamedawa ega:walo Kawodawa, ebete aimano agowa ukulaoleameni,’ modobola la: a:ka:tuwa: la:imano taneba magumulo idite idino agowa atumu nukulalemenakiyala: <sup>15</sup> Iyo, nale la:tamo uli osiyodilomo, walone la:le epetapiatamo ma kunu nosiyodilonakiyala: <sup>16</sup> Na la:tamo nani tabonomo gemo, wokodawa idino elawote ebene woko namutudawano elawo kodolinakoa; ega:walo tabo atadawano elawote ebe dapalibomene ebe kawodawano elawo a:kodolimene. <sup>17</sup> Ebema: la: me iyaiya tanalo iyatawawete, ma kunu idite iditamo, idite iditamo, wiya: woko dosiyodilawenakoma, ebene la:godolo kawo kalakalanomote bitananakomene.”

*Ya:sute Yudasikono Tanalo Dawokalimini  
Ma:t 26.20-25; Mak 14.17-21; Luk 22.21-23*

<sup>18</sup> Ebene Ya:sute ebe waloma:tapiatamo negeni, “Godokono Bukalo tabo idi ma kunu itana, ‘Nago bae denanako, ebe lumagite naimano goweladawama: keda:mene,’ ebema: me tetelo aimano taneba magumulo me tabono tanalote nanitaboma: keda:mene, Godokono ubila. Nanitabola, na

la:imano tanalo iyatawanomola, mabu la:le na waloma:enema: nale la: uwatimata, ebema: me tabote la: bilibilinomono tanaloma: kegena:, kapiya lumagino tanaloma: gena. <sup>19</sup> Ebe lumagino tanalote maiga:no nale la: dopamo analemata. Ebene ebena tanaloma: Buka apuno tabote nanitabolo demaigamene, la: nanitabokobi ebo ka:midimamota na uwomua: tetelo dokolinamo ebe dawala. <sup>20</sup> Na la:tamo nani tabonomo gemo, nale kebe wokodawa dalibomo, potele ebe wokodawa kalakalago dowalubimene ebete na kowalubinimene, ega:walo potele na dowalubinimene ebete na kapiya a:kowalubinimene, ebete na Alibonedawa Godoko atumu ka:kowalubinimene.”

<sup>21</sup> Ebene Ya:sute me tabo kiyawao dolopoligini ebete tepo magumulo mibomibonomoma: eda:nate ebe waloma:tapiatamo awokala negeni, “Na la:tamo nani tabonomo gemo, la:imano taneba magumulo idawate na anakapunamepi kowalubilimene na kelawenema:.”

<sup>22</sup> Ebema: ebe waloma:tapiate ibino taneba magumulo eba uma:tepauinalo nemalagidiloniya, “Me kuba potele na:kosiyodilomene?” wiyasiya iba:te lumagi kuminiya: <sup>23</sup> Ebe tetelo Ya:sute ebe waloma:tapi magumulo poko kawonomamo demalagidilonami, ebete Ya:suko niyakabolo na:luti, <sup>24</sup> ebene Saimono Pitate kotamo eba genalo ebe nanani, “A:ma:le Iyatulamedawa nana ebete pokono tanaloma: kegenale.”

<sup>25</sup> Ebene ebe waloma:tadawate Ya:suko niyakabamo nokoliatepanate ebe nanani, “Kawodawa, ebe lumagi potelela:ka:?”

<sup>26</sup> Ya:sute ebena tabo eba wiyanalona negeni, “Nale bae kalila:mo aduba:midate kebe lumagitamo dikaemo, ebe ebe lumagila.” Ebe tetelo ebete bae kalila:mo aduba:midanate, Keliyota duliynomolodawa Saimonokono gudu Yudasitamona gito ikameni. <sup>27</sup> Ebene Yudasite ebe bae delaweni, ebe tetenomolo Saitanate ebena tepo magumamo gito opegani.

Ebena Ya:sute ebetamo negeni, “A:ma:le kebe tanalo osiyodiloma: dowagela:wena, modobola samonomamo nosiyodila.” <sup>28</sup> Ebe tetelo bae nao bailo da:pola:niya, ebe waloma:tapi epetapi magumulo lumagi idite Ya:sukona tabona magumu kelaweniya: <sup>29</sup> Yudasite ibino tanebapino mani umidawama: eda:nami, ebema: epetapiate nemalagidiloniya Ya:sute soliyomu osiyodilona bae epetapi ka:nuwateonama: gena, ega:walo epetapiate nemalagidiloniya ebete nigologolopi maniamo ka:nowalubilinama: gena. <sup>30</sup> Ebene Yudasite Ya:sugodone bae delaweni, ebe tetenomolo ebete iba:godone maiganate idoko magumamo gito nopegani.

### *Ya:sute Oli Totomu Tabo Ebe Waloma:tapiatamo Dikalameni*

<sup>31</sup> Yudasite ibi da:miyapani ebe tetelo Ya:sute epetapiatamo negeni, “Me tetelo Godokona elawo alote Epono Naniwi eba pukuimilo ebe kowalogomene, ega:walo Epono Naniwite ebena osiyodilo tanalodo Godoko kowalogomene. <sup>32</sup> Ebema: Godote ebe a:ka:tuwa: ebe Epono Naniwi magumudo dowalogomene, ebe atu tetelo ebete Epono Naniwi elawo alamo eba pukuimilo ebe kowalogomene. Nanitabola, ebete ebe tanalo samonomamo kosiyodilomene.”

<sup>33</sup> Ebene Ya:sute tabo idi na:kegeni, “Naimano guda:la:, na la:go tete da:pesamo okoliatepate la:le na ebo kowadinimamota. Iyo, nale kebe tabo Yu watowatopiatamo dopamo degimo, ka:lo la:tamo ebe atu tabo kegemo, nale kebe duliynomolamo da:tomo la:le ebe duliynomolamo pelaema: modoboa:.”

<sup>34</sup> “Wiyasiya ka:lo idokolo na la:tamo oli totomu tabo ikalaemata la: kowalubilitama: Modobola la:imano ilukuli magumulo idite idi nilakapolo

nemalagidilonala; nale la: keba kunu kemalagidiloletanama eba kunu.  
<sup>35</sup> Kebe tetelo la:imano taneba magumulo idite idi nilakapolo kemalagidilo, idite idi nilakapolo kemalagidilo, la: eba kunu dowagela:wenama, me gabodo epo bilibilinomate kiyatawaoma:na: la: naimano waloma:tapilata.”

*Ya:sute Pitako Danani, A:ma:le Na Iyatawa:noma: Kegema:ta  
 Ma:t 26.11-35; Mak 14.27-31; Luk 22.31-34*

<sup>36</sup> Ebene Saimono Pitate Ya:sutamo negeni, “Kawodawa, a:ma: kebamo na:ka:toaemene?”

Ya:sute tabo eba wiyanalalo negeni, “Nale kebe duliynomolamo da:tomo, me tetelo la:le na waloma:enema: modoboa:, wiyasiya nanitabola, la:le na walogabo apune kowaloma:enemamota.”

<sup>37</sup> Ebene Pitate ebe walo nakanani, “Kawodawa, mabu keleka: nale me tetelo a:ma: waloma:ea:noma: degeawa:? Na modobola naimano igilo a:ma: mabuma: iyabaiamo kiyatimamo.”

<sup>38</sup> Ebe tetelo Ya:sute ebena tabo eba wiyanalalo negeni, “A:imano igilo na mabuma: nanitabonomolo ba:kiyata:emene? Na a:ma:tamo nani tabonomo gemo, ka:lo idokolo kakabate geoa:no a:ma: netewa-kapiya teta:mo na iyatawa:noma: kegema:ta.”

## 14

*Ya:suko Ebe Nanitabo Gabola Nabiwi Godotamo*

<sup>1</sup> Ebene Ya:sute tabo moga:menalo ebe waloma:tapiatamo negeni, “La: tepo mibomiboma: ega:walo woki bilibilima: akoeda:oala: Modobola la: Godoko nanitabokobi na:mida:la:, ega:walo la: na atumu nanitabokobi na:midina:la:. <sup>2</sup> Nanitabola, naimano Nabiwino moto gulo la:imano ilukuli bai bilibilinomo ba:pola:na. Me tanalo a:da:ma: neda:taleka: nale la: akanaletana:, iyo, na la:imano nanitabo ilukuli bainomo osiyodilolema: ka:tomamo. <sup>3</sup> Ebene na la:imano ilukuli bai nosiyodilolete walo ka:pete la: ebo ka:puwatemamota, ebe tetelo a bilibilinomate kapimiya naimano duliynomololo ba:nilukulinama:. <sup>4</sup> Nanitabola, nale kebe duliynomolamo da:tomo, la: ebe duliynomolamo tolame gabo iyatawalata.”

<sup>5</sup> Ebene Tomasite Ya:sutamo negeni, “Kawodawa, a:ma:le kebe duliynomolamo da:toaemene a ebe duliynomolo iyatawa:, ebema: a gabo keba kunu na:kiyatawaoma:?”

<sup>6</sup> Ya:sute ebena tabo eba wiyanalalo negeni, “Na ebe gabola, ega:walo na nanitabo tanalo awokalimidawala, ega:walo na uwomua: igilola. Lumagite nado Nabiwi Godotamo ka:tomene, gabo idido a:ka:toamene. <sup>7</sup> Numa:la:, la: naimano tanalo iyatawalata, ebema: me tetene wagilimite la: naimano Nabiwino tanalo atumu ka:kiyatawaomamota. Nanitabola, la: ebe iyalo umiamata.”

<sup>8</sup> Ebene Pilipite ebetamo negeni, “Kawodawa, a:ma: atamo Nabiwino tanalo dawokalima:emene, a ka:modobomalema:.”

<sup>9</sup> Ya:sute tabo eba wiyanalalo negeni, “Pilipi, nale tete geyageyanomolo la:go okolinamo, ebema: mabu keleka: a:ma:le naimano tanalo kiyatawawena:? A:ma:le na dunama:wia, ebe gabodo a:ma:le Nabiwi umiata, ebema: keleka: mabu a:ma:le ma kunu degeawa:, ‘Nabiwino tanalo atamo nawokalima:?’ <sup>10</sup> Pilipi, a:ma: me tanalo nanitabokobi na:ka:mida:wena, na Nabiwigodolo bokolinamo ega:walo Nabiwite nagodolo bokolina?”

Ebena Ya:sute ebe waloma:tapi bilibilinomatamo negeni, “Nale la:tamo kebe tabo ka:kiyawaonakimo, ebe iyaiya tabono tanalate nagodone ka:pelamena:, wiyasiya nagodolo dokolina, ebe Nabiwite naimano iyaiya

tabamo ebena wade woko osiyodilona. <sup>11</sup> Ebema: modobola la: me tanalo nanitabokobi na:mida:la:, na Nabiwigodolo bokolinamo ega:walo ebete nagodolo bokolina. Wiyasiya la: la:imano wokilo me tanalo kodakodama: degelawenama, ebema: nale kebe anoano tanalo la: magumulo dosiyodilolenakimo, modobola la: ebe tanalono magumu eba malagidilolo na nanitabokobi na:midina:la:. <sup>12</sup> Ka:lo idokolo na la:tamo nani tabonomo gemo, kebe lumagite na nanitabokobi da:midinimene, nale dosiyodilonamo ebete ebe atu woko ba:kosiyodilonamene. Nanitabola, ebe lumagino woko osiyodilo elawote naimano woko osiyodilo elawo ka:nodolimene mabu na Nabiwitamo ka:tomamo. <sup>13</sup> Ebema: la:le naimano mailamo beda: tanaloma: na da:toweonama:ema, nale la:tamo kikalaemamota mabu naimano osiyodilo tanalodo Nabiwite a:ka:tuwa: ebe kowalogomene. <sup>14</sup> Iyo, la: naimano mailamo beda: tanaloma: na da:toweonama:ema, na la:tamo gito kikalaemamota.”

*Godokono Uliyanate Nanitabokobi Midipiatamo Pema: Ya:sute Degeni*

<sup>15</sup> Ebene Ya:sute ebe waloma:tapiatamo tabo idi na:kegeni, “La:le na nilakapolo demalagidilona:ema la: naimano totomu tabamo ka:tudila:omamota. <sup>16</sup> Ebema: nale naimano Nabiwi kanamamo, ebete Walubidawa idi la:tamo kapaliboma:, ebete uwomua: tetelo la:go bokolinamene. <sup>17</sup> Ebe Godokono Wade-talena Uliyanala, Godokono nanitabo tanalo dawokalimina ebe ebe dawala. Me opo epate ebe kuminakoa:, ega:walo ebena tanalo kiyatawaona:, ebema: iba:te ibino tepo magumulo ebena elawo nanitabolo a:kelaema:na:. Wiyasiya la: nanitabokobi midipino tanalo eba kunua: mabu la: ebena tanalo iyatawanomolata, iyo, ebete uwomua: tetelo la:godolo bokolinamene. <sup>18</sup> Ebema: nale la: gito a:ka:miyapatama, ao, nale me Walubidawa la:tamo nanitabolo kapalibomamo, ebena ebete la:godolo eba okolinalo walone na a:ka:tuwa: la:tamo walo ka:ka:pemamo.

<sup>19</sup> “Tete da:pesolo me opo epate na a:kunaema:na:, wiyasiya la:le na kunaemamota, iyo, na uwomua: igilago okolinamo, ebema: la: atumu ebe igilago ilukulinamata. <sup>20</sup> La:le na walo da:kunama:ema, ebe egelate da:pemaigamene, la: me tanalo ebo kiyatawaomamota, na naimano Nabiwigodolo okolinamo ega:walo la: nagodolo ilukulinamata, ebena na atumu la:godolo bokolinamo. <sup>21</sup> Ebema: piyate naimano totomu tabo bilibili-nomo uwatete da:tudila:onakoma:na:, iba:te na nilakapolo malagidilonena. Nanitabola, kebe epate na nilakapolo demalagidilonena, naimano Nabiwite ibi atumu nilakapolo ba:kemalagidilolena, ega:walo nale ibi atumu nilakapolo eba kemalagidilolenalo na a:ka:tuwa: naimano tanalo iba:tamo bawokaliminakomo.”

<sup>22</sup> Ebene Yudasidite, Keliyota duliynomolodawa Yudasitea, ebete Ya:suko nalateda:ni, “Kawodawa, me opo epate a:ma: umia:no, ebe tetelo a a:ka:tuwa: a:ma: keba kunu na:kumitamene?”

<sup>23</sup> Ya:sute tabo eba wiyanalona negeni, “Kebe lumagite na nilakapolo demalagidilonena, ebete naimano totomu tabamo ba:tuduwatanakomene, ebena naimano Nabiwite ebe nilakapolo bemalagidilonamene, ega:walo ale ebetamo pete ebegodolo ba:pokolionama:. <sup>24</sup> Wiyasiya kebe lumagite na nilakapolo malagidilonena:no, ebete naimano totomu tabamo a:ka:tuduwatamene. Me tanalo nanitabola, la: nagodone dolowiawenakoma ebe iyaiya totomu tabo naimanoa:, ebe totomuata na dapaliboniya ebe Nabiwigodone pelamena.



<sup>25</sup> “Nale la: miyapa:no me iyaiya tanalo dopamo la:tamo a:kiyawaomo. <sup>26</sup> Ebene nale la: da:miyapatama, Nabiwi Godote naimano mailamo Walu-bidawa idi la:tamo kapalibomene, ebe ebene Wade-talena Uliyanala. Nanitabola, nale dopamo kebe tanalo bilibilinomo la: diyatulametanakima, ebete pete ebe atu iyaiya tanalo la: walo eba ka:piyatulamelolo la:imano woki ebo ba:tuputupuilamenakomene. <sup>27</sup> Ega:walo me tanalo idila, nale la:tamo naimano tepo magumulo ditana ebe milo ikalaemata. Ebe milo me oponoa:, ebema: la: la:imano tepo magumulo woki bilibila:go ega:walo tola:go akoilukulinala:.

<sup>28</sup> “Nale la:tamo nanitabolo degemo la: olowimata, na Nabiwi Godotamo tote ebene la:tamo walo ka:ka:pemamo. Numa:la:, la:le na nanitabolo nilakapolo nemalagidilona:wenataleka:, naimano to tanaloma: la: bekalakalawena:, mabu ebene elawo kawonomola, naimano elawo nodoliona. <sup>29</sup> Me tanalote maiga:no na la: dopamo analemata, ebema: me tanalote nanitabolo demaigamene, ebe tetelo la: nanitabokobi ka:midimamota. <sup>30</sup> Wiyasiya ka:lo idokolo na la:tamo tabo kawonomo a:ka:kiyawaomo, mabu me opo namutudawa na:pe. Ebe kubadawano elawote nanitabolo natamo kitana: nale ebetamo ka:tuduwatama:, <sup>31</sup> wiyasiya naimano Nabiwite na kebe tanalo kosiyodilolema: dananenako, nale ebe tanalo eba osiyodilolelo ebe kapiyatamo tuduwatanakomo. Iyo, me ebe gabodo me opo epate naimano tanalo niyatawaoma:na:, nale naimano Nabiwi nilakapolo demalagidilonamo.

“Ebema: modobola la: nemaimiala:, a me motone ka:tolamiye.”

## 15

### *Ya:suko Ebe Gala:ipi Tupina Da:imi Kewanomola*

<sup>1</sup> Ebene Ya:sute ebe waloma:tapiatamo tabo idi na:kegeni, “Na gala:ipi tupina da:imi kewanomola, ega:walo naimano Nabiwite ebe da:imi kewa umidawama: eda:na.

<sup>2</sup> “Ebema: me kewano noloa: katomo bilibilinomo ebete mabunomamo otolete iyabaiamo kiyalekemene, wiyasiya da:nolonaka ebe katomo bilibilinomo unu paago ebete unuya kotolemene iba:te kawonomamo walo ka:ka:noloma:. <sup>3</sup> Nanitabola, nale la:tamo kebe iyaiya tabo ka:kiyawaonakimo ebe tabote la: ukulaolenomo dukulaoletia, la:le oliolinoma: ebo eda:imata. <sup>4</sup> Ebema: modobola la:le na da:imi kewanomogodolo nilukulinala:, ebene na atumu la:godolo bokolinamo. Me tanalo wadenomamo nemalagidilala:, da:imi katomote ebene apa:mo moga:no ebe a:ka:tuwa: a:ka:nolomene, ebema: la: nagodolo ilukulina:no la:le nanitabolo a:ka:noloaema.

<sup>5</sup> “Na ebe gala:ipi tupina da:imi kewanomola, la: katomolata. Kebe lumagite na magumulo dokolinamene ega:walo na atumu ebegodolo dokolinamo, ebete kawonomamo ka:nolomene, wiyasiya na la:imano tepo magumulo okolina:no la: a:ka:tuwa: wade tanalo idi a:kosiyodilaema. <sup>6</sup> Ebema: kebe lumagite na magumulo okolina:no, ebe noloa: katomo keba kunula:ka: eba kunula. Pali namutudawate ebe iyabaiamo deba:idilomene alawoma: ebo ka:neda:mene, ebene lumagi idite pelawete elamo gito ka:peba:idilomene. <sup>7</sup> Nanitabola, la: nagodolo dilukula:wenama ega:walo naimano iyatulame tabote la:imano tepo magumulo da:pola:namene, ebe tetelo la: naimano iyaiya tabo nanitabolo eba waloma:talentalo beda: tanaloma: naimano Nabiwi dalateda:ema ebete ebe tanalo la:tamo kikalaema:ta. <sup>8</sup> Mabu kebe tetelo la: naimano da:iminomo keba kunula:ka:

eba kunu kawonomamo da:noloaema, ebe tetelo la: me tanalo wadenomamo kawokalimamota, la: ebe naimano waloma:tapinomolata. Me ebe gabodo Nabiwi Godote ebe a:ka:tuwa: ebe kowalogomene.

<sup>9</sup> “Numa:la:, Nabiwite na nilakapolo keba kunu kemalagidilonenale, nale la: eba kunu malagidilolenamata, ebema: modobola la: naimano nilakapo magumulo nilukuliniyala:.” <sup>10</sup> Nanitabola, la: naimano iyaiya totomu tabamo nanitabolo da:tudila:wenama, ebe gabodo la:le naimano nilakapo magumulo bilukulinamata, nale naimano Nabiwino totomu tabamo tuduwatalo ebena nilakapo magumulo dokolinamo eba kunu. <sup>11</sup> Ebema: nale la: me tabo analemata, mabu na ubila naimano kalakalate la:imano tepo magumulo tabokate ebolo kitanama:.

<sup>12</sup> “Me ebe naimano kawo totomu tabola la:tamo. Nale la: nilakapolo keba kunu kemalagidiloletanama, la:imano taneba magumulo idite idi eba kunu nemalagidilowiniyala:.” <sup>13</sup> Numa:la:, lumagi idite ebena namutupino igilo mula:lelaema: ebena igilo iyabaiamo gito diyatimene, eba kunu ebegodolo nanitabo nilakapo tanalote kawonomamo kawokalamene.

<sup>14</sup> “Ega:walo me tanalo idila, la:le naimano totomu tabamo da:tudila:wema, ebe gabodo la: naimano namutupima: keda:omamota. <sup>15</sup> Ebema: me tetene wagilimite nale la: naimano wiya: wokopima: walo a:keka:la:mitama mabu wiya: wokopiate ibino namutudawano tepo magumuno woki nanitabolo kiyatawana:.” Wiyasiya nale Nabiwigodone kebe iyaiya tanalo kolowiyamo, ebe tanalo bilibilinomo la:tamo awokalilaimo, ebema: la: naimano wiya: wokopinomoa:, ao, la: naimano namutupilata. <sup>16</sup> Ebema: me kawo tanalo akododomatiala:, la:le na lawenea:no nale la: dopamo uwatimata, la:le me opono iyaiya opolo eba nilukulionalo da:iminomate la: magumulo ka:nolonama:.” Ebene la:imano da:ima:te uwomua: tetelo eba pola:nalo, la: beda: tanaloma: Nabiwi Godoko naimano mailamo da:toweoma:wenakoma, ebete ebe tanalo la:tamo ebo bikalamenakoma:ta. <sup>17</sup> Me ebe naimano kawo totomu tabola la:tamo, la:imano taneba magumulo idite idi nilakapolo nemalagidilowiniyala:.”

*Me Opo Epate Ya:suko Waloma:tapiatamo Ka:dowaoma:na:*

<sup>18</sup> Ebene Ya:sute tabo idi na:kegeni, “Me opo epate la: naimano waloma:piatamo da:dowaoma:na:, ebe tetelo nemalagidiliyala: iba:te dopamo natamo a:dowaiya. <sup>19</sup> Ebema: la: me opo epoma: nanitabolo neda:wenataleka: iba:te la: kalakalago buwatetana:, wiyasiya nale la: ibino taneba magumune uwatimata, ebema: iba:te la: ubia:noma: eda:olo la:tamo ba:dowaonama:na: mabu la: iba:go kapiyama: keda:wena:.” <sup>20</sup> Ega:walo nale la: dopamo danaletima, la:le me tabo walo na:kemalagidilala:, wokodawano elawote ebena woko namutudawano elawo kodolina:.” Ebema: kebe epate natamo kawokawo temeteme dikanamenakiya, iba:te la:tamo atu temeteme ba:kikalamenakoma:ta, ega:walo kebe epate naimano iyatulame tabamo da:tudila:iya, iba:te la:imano iyatulame tabamo atumu ka:ka:tudila:oma:na:.”

<sup>21</sup> “Numa:la:, na dapaliboniya ebe dawano tanalo me opo epate iyatawa:, ebema: iba:te na mabuma: la:tamo iyaiya kubakuba tanalo bosiyodilolenakoma:na:.” <sup>22</sup> Nale iba:tamo pete Godokono nani tabo pikiyawaoa:notaleka:, ebena dowa tanalote ibino kuba osiyodilole mabuma: a:ka:pena:, wiyasiya nale me opamo da:piyamo, ebe tetene wagilimite ibino kuba waminaole gabo kitanamia:, ebema: ibino kuba wiyate nanitabolo na:pe. <sup>23</sup> Numa:la:, ibi magumulo kebe lumagite natamo da:dowana, ebete atumu naimano Nabiwitamo na:ka:dowana. <sup>24</sup> Ebema: nale me opo epo magumulo naimano Nabiwino kawokawo

anoano tanalo posiyodilolea: notaleka; ebena dowa tanalote ibino kuba osiyodilole mabuma: a:ka:pena. Wiyasiya na ibino taneba magumulo ebena elawo kawonomamo awokalimo, me opo lumagi idite ebako elawo awokalima: modoboa; iyo, iba:te naimano elawo nanitabonomolo umiya, wiyasiya iba:te natamo ega:walo Nabiwitamo kawonomamo dowaona.  
<sup>25</sup> Numa:la; me tanalote ma kunu pemaigi Godokono Buka apuno tabote nanitaboma: keda:ma; mabu ebete Yu epatamo dikalamiya ebe Totomu Bukalo tabote ma kunu itana, 'Nale ibi mabuma: wadewade tanalo eba osiyodilolenalo, wiyasiya iba:te natamo a:dowaiya.'

<sup>26</sup> "Naimano walomatapiala; na Walubidawa idi la:tamo kapalibomamo, ebe Nabiwi Godogodone da:pena ebe Wade-talena Uliyanala. Ebe Godokono nanitabo tanalo awokalimidawala, ebema: ebete me opo epatamo da:pemene naimano tanalo kapawokalimene, <sup>27</sup> ebena la: atumu naimano tanalo nakawokalimiyala; mabu nanitabola, naimano woko wagilimi mabuna la: nago ilukulinaimata."

## 16

<sup>1</sup> "Na ka:lo idokolo me tanalo bilibilinomo la:tamo kiyawaomo, mabu na ubia:nola la:le agowa ukamidaolema. <sup>2</sup> Tete na:pe, Yu epate la:tamo talena kiyatilaema:ta la:le ibino iyaiya duliomolono balidi ibilamole moto guamo opila:oma; ega:walo ebe tetelo epetapiate la: anakapulaema: nopo eba iyatilo ebo kemalagidiloma:na: iba:te Godokono woko osiyodilona.  
<sup>3</sup> Nanitabola, iba:te eba kunu la:tamo kawokawo kuba osiyodilolema: kowagelema:na; mabu iba:te naimano tanalo ega:walo naimano Nabiwino tanalo iyatawa. <sup>4</sup> Ebema: numa:la; na me iyaiya tanalo la:tamo a:kiyawaomo, mabu na ubila me kuba tetete da:pemaigamene la: ebo kemalagidilomamota, ebete aimano temeteme tanaloma: a iyalo anai."

### *Godokono Uliyanano Woko Osiyodilo Tanalo*

Ebena Ya:sute ebe waloma:tapiatamo tabo idi na:kegeni, "Na dopamo me iyaiya tanaloma: la: kanaletia; mabu naimano woko wagilimi mabuna pete me teta:mo pemaiga, ebe tete geyageyadopolo nale la:go okolinaimo. <sup>5</sup> Wiyasiya tete na:pe, na dupaliboniya ebe dawatamo na walo ka:ka:tomamo. La: ebe tanaloma: woki bilibilima: eba eda:wenalo, wiyasiya idawate na ma kunu kalateda:nena; 'A:ma: kebamo na:ka:toamene?'  
<sup>6</sup> mabu la: naimano to tanalo eba malagidilonalo tepo magumulo mibomibonomoma: eda:onomata. <sup>7</sup> Ebema: nale la: nani tabo analemata, nale la: da:miyapatama ebe wade tanalola, mabu na toa:no la:imano Walubidawa idi, ebe Godokono Uliyanala, ebete la:tamo a:ka:pemene. Iyo, na la:godone da:tomo, ebe tetelo na ebe Wade Walubidawa la:tamo nanitabolo kapalibomamo.

<sup>8</sup> "Ebete me opo epatamo da:pemene, ebe tetelo ebete iba:tamo me tanalo kapawokalilaemene, me tanalo ebe me opono kuba osiyodilole tanalo, ega:walo Godokono tuputupu okoli tanalo, ega:walo Godote epono kuba osiyodilole mabuma: iba:tamo wiya ikalame tanalo, me ebe netewa-kapiya tanalola. <sup>9</sup> Nanitabola, Godokono Uliyanate me opo epono kuba osiyodilole tanalo kapawokalilaemene mabu iba:te na nanitabokobi ka:midinina.  
<sup>10</sup> Ega:walo ebete ebena tuputupu okoli tanalo kapawokalimene, mabu tete tatalila na Tuputupudawate me opo atepate Nabiwi Godotamo walo ka:ka:tomamo, ebe tetelo la: la:imano balida:mo na walo a:kunama:ema.  
<sup>11</sup> Ega:walo Godote epono kuba osiyodilole mabuma: wiya iba:tamo dikalaemene, ebena Uliyanate ebe tanalo kapawokalimene, mabu Godote

me opono Kuba Elawodubu Saitanatamo kuba wiya nanitabolo kikaemene, iyo, ebete ebe tanalo kosiyodiloma: tabo iyalo iyatiya.

<sup>12</sup> “Nanitabola, nagodolo tanalo bilibilinomo ba:pola:na la:tamo kiyawaoma:, wiyasiya me tetelo la:imano woki modoboa: ebe iyaiya tanalo la:le uwatema:.” <sup>13</sup> Wiyasiya Godokono nanitabo tanalo Awokalimidawate da:pemene, ebe Wade-talena Uliyanate la: ebena nanitabo gabodo dopolametate, la: eba magatalelo tanalo bilibilinomo ebo kiyatawao-mamota. Ebe tetelo ebete a:ka:tuwa: ebena wokilo a:ka:kiyawaomene, wiyasiya ebete kebe tanalo Nabiwigodone kolowionakole ebete ebe iyaiya tanalo kapiya la:tamo ba:kiyawaonakomene, ega:walo kebe tanalate me opamo da:pemaimioma:na:, ebe tanalate pelamea:no dopamo ebete la:tamo bawokalilamenakomene. <sup>14</sup> Iyo, ebete me gabodo na ka:powalagonemene, mabu ebete naimano tepo magumuno tanalo uwatete la:tamo nanitabonomolo kapawokalilaemene. <sup>15</sup> Numa:la:, Nabiwigodolo da:pola:na ebe tanalo bilibilinomo ebe naimanola, ebema: ebena Uliyanate modobola naimano tepo magumuno tanalo la:tamo awokalilaema:, nale la: danaletama eba kunu.”

#### *Tepo Magumuno Kalakala Tanalo Ega:walo Mibomibo Tanalo*

<sup>16</sup> Ebene Ya:sute ebe waloma:tapiatamo tabo idi na:kegeni, “Tete tatalila la:le na la:imano balida:mo a:kunama:ema, ebene tete da:peso dolopoligomene la:le na walo ka:kunaemamota.”

<sup>17</sup> Ebene ebena waloma:tapino taneba magumulo epetapiate epetapiatamo gelanakiya, epetapiate epetapiatamo gelanakiya, ma kunu wage-leniya, “Ya:sute me tabo beda:ma: kegele, tete tatalila la: na a:kunama:ema ebene tete da:pesolo la: na walo ka:kunaemamota? Ega:walo ebete ebena Nabiwitamo toma: dege, me tabono magumu keba kunula:ka:?” <sup>18</sup> Ega:walo ale me tabo idino magumu iyatawa:, ebete 'tete da:peso' tabo dege, ebe tete keba kunula:ka:?”

<sup>19</sup> Ebe tetelo iba:te ibino taneba magumulo Ya:sukono tabo magumuno tanaloma: kebe iyaiya alateda: tabo degelaniya, Ya:sute iyatawanate iba:tamo walo na:kegeni, “Iyo, nale tabo ma kunu kiyawaomo, tete tatalila la:le na a:kunama:ema, ebene tete da:pesolo la:le na walo ka:kunaemamota. La: me tabono magumuma: kegelawenama? <sup>20</sup> Na la:tamo nani tabonomo gemo, na la:godone da:tomo ebe tetelo me opo epate kekalakalaoma:na:, wiyasiya la:le na eba liyanamelo tepo mibomibo kawonomamo ebo kiyatawao-mamota. Wiyasiya numa:la:, tete da:peso da:petomene, la:imano tepo mibomibo tanalo olopoligote la:le na mabuma: kawo kalakala walo ka:kelaemamota. <sup>21</sup> Ebema: me tanalo ebe lamitu kamiyalete gudu alaima: temeteme dolowita keba kunula:ka: eba kunula. Ebete gudu eba alaimilo kawo temeteme ebo kiyatawamene, wiyasiya ebena gudu dawokalamene ebe tetelo ebegodolo kalakala kapiyate kitanamene, mabu ebena temeteme olopoligo ega:walo ebena gudute igilolo awokala. <sup>22</sup> La:imano tanalo atumu, me tetelo la:le naimano to tanaloma: tepo magumulo mibomibonomoma: eda:onamata, wiyasiya nale tote la:tamo walo da:ka:pemo la:le kawo kalakala walo ebo ka:kelaemamota, ebe kalakala lumagi idite kubaima: modoboa:.”

<sup>23</sup> “Na la:tamo nani tabonomo gemo, ebe kalakala egelate la:tamo demaigamene, ebe tetelo la: la:imano modoboa: tanaloma: na walo a:ka:toweonama:ema. Ebe tetene wagilimite la: naimano mailamo kebe iyaiya tanaloma: Nabiwi Godoko da:toweoma:wenakoma, ebete a:ka:tuwa: ebe tanalo la:tamo bikalamenakoma:ta. <sup>24</sup> Dopamo tetelo la:le naimano

mailamo ebe ka:toweoma:wenakia:, wiyasiya me tetelo nale la: analemata, modobola la: ebe na:toweomenakiyala:, ebene la: ebegodone wade tanalo delawa:wenakoma ebe gabodo la:imano kalakala tanalote kawonomamo bitananakomene.”

*Ya:sukono Elawote Me Opono Elawo Anakapumi Tanalo*

<sup>25</sup> Ebene Ya:sute tabo idi na:kegeni, “Nale iyatulame oiamo me iyaiya tanalo la:tamo awokalilaemo, wiyasiya tete ka:pemene nale la: oiamo walo a:kiyatulametama, ebe tetelo na naimano Nabiwino tanalo la:tamo awokalanomo ka:kiyawaomamo. <sup>26</sup> Ebe egelalo nale Nabiwitamo la:imano modoboa: tanaloma: walo a:ka:towetoweamo, wiyasiya la: a:ka:tuwa: naimano mailamo ebe ba:toweomenakomata. <sup>27</sup> Numa:la:, Nabiwite la: nilakapolo nemalagidilolenata. Ebete ma kunu wagelena mabu la:le na nilakapolo eba malagidilonenalo, nale ebegodone da:piyamo ebe tanalo la: nanitabokobi na:midinamata. <sup>28</sup> Iyo, nanitabola, na Nabiwigodone me opamo piyamo, wiyasiya me ebe tetela, nale me opo atepate Nabiwitamo walo ka:ka:tomamo.”

<sup>29</sup> Ebene Ya:suko waloma:tapiate ebetamo negelaniya, “Kalakala kawonomola, a me tabo modobolo laema: mabu a:ma: atamo iyatulame oiamo ka:kiyawawena:, awokala kiyawaonata. <sup>30</sup> Iyo, ka:lo idokolo a iyatawaoma: a:ma: tanalo bilibilinomo iyatawanomolata, ebema: lumagi idite tanalo idima: a:ma: alateda:no a:ma: ebene tepo magumuno woki iyalo kiyatawama:ta. A me tanalone nanitabokobi na:midinama:, a:ma: Godogodone piyata!”

<sup>31</sup> Ebene Ya:sute ibino tabo eba wiyanalo negeni, “Ka:lo idokolo la: na nanitabolo nanitabokobi na:ka:midina:wenama? <sup>32</sup> Tete ka:pemene, iyo, ebe na:pe, la: nagodone la:imano iyaiya motamo alautiawete, ebene na a:ka:tuwa: ka:lutamamo. Ebe tetelo nago dokolina ebe Nabiwi ebe kapiyate na akatepanemene, ebete nago ka:lutamene.

<sup>33</sup> “Ebema: numa:la:, nale me iyaiya tanalo la:tamo a:kiyawaomo, mabu na ubila la:le nagodolo eba ilukulinalo naimano milote la:godolo kitanama:. Nanitabola, me opolo la: kawokawo temeteme biyatawaonakomata, wiyasiya nekalakalala:! La: akotoletoleala: mabu naimano elawote me opono elawo iyalo anakapumi.”

## 17

*Ya:sute Ebe A:ka:tuwa: Ebene Tanaloma: Godotamo Towetowe Tabo De-  
geni*

<sup>1</sup> Ya:sute me tabo kiyawao dolopoligoni, ebe tetelo ebete Godokono Unu Duliynomolamo eba melenalo towetowe tabo ma kunu geni,

“Nabiwi, tete a:pe. Modobola a:ma:le na a:imano gudu eba walogonelo naimano wade tanalo nawokalima:, ebema: na atumu a:ma: eba walogolo a:imano wade tanalo kawokalimamo. <sup>2</sup> Nanitabola, iyalo tetelo a:ma:le kawo elawo a:imano Gudutamo ikamiyata, ebema: me opolo epo bilibilinomate ebetamo nanitabolo ka:tudila:oma:na:, ega:walo a:ma:le ibi magumulo kebe epo ebetamo kikama:wiyala, ibinomate uwomua: igilo ebegodone kelaema:na:. <sup>3</sup> Ebe uwomua: igilono tanalo ma kunula. Epate a:ma: nani Godo kapiyama: miditate a:imano tanalo ebo kiyatawaoma:na:, ega:walo atu tetelo iba:te na Ya:su Kelisokono tanalo ka:kiyatawaoma:na:, na ebe a:ma:le dupalibona:wiyala ebe dawala.



<sup>4</sup> Ebema: nale me opamo pea:no a:ma:le iyalo natamo kebe iyaiya woko kikanamona:wiwala, nale ebe woko bilibilinomo opoliyalimo, iyo, me gabodo nale a:ma: eba walogolo a:imano wade amama tanalo epatamo awokalimo. <sup>5</sup> O Nabiwi, me opo osiyodiloa: tetelo nale a:ma:go eba okolinalo agodolo ditanami, modobola a:ma:le ebe elawo alamo na eba pukuinamelo a:imano ololo apulo na nowalogoniye.”

*Ya:sute Ebena Waloma:tapino Tanaloma: Godotamo Towetowe Tabo Degeni*

<sup>6</sup> Ebene Ya:sute ebena towetowe tabo moga:melo walo na:kegeni,

“Nabiwi, me opolo a:ma:le natamo dikanama:wia iba:te a:imanoma: eda:iya, ebema: nale a:imano tanalo iba:tamo dawokalimo, iba:te a:imano tabamo a:tudila:iya. <sup>7</sup> Ebema: ka:lo ibi iyatawala, a:ma:le iyalo natamo kebe wadewade tanalo kikanamona:wiwala ebe tanalo bilibilinomate a:ma:godone pelamiya. <sup>8</sup> Iyo, a:ma:le natamo dikanamona:wiwala ebe tabono iyaiya tanalo nale iba:tamo ikalamolimo, ebena iba:te nanitabolo uwatete ebo iyatawaiya nale a:ma:godone da:piyamo ebe tanalo, ega:walo a:ma:le na dupalibona:wiwala iba:te ebe tanalo nanitabokobi na:midina. <sup>9</sup> Ebema: na ibi towetowe tabamo a:ma:tamo na:powadipalatenamo. Nale a:ma: me opo epo epetapino tanaloma: ka:petoweometana:, wiyasiya a:ma:le me tetelo natamo kebe kapiyakapiya epo kikanamona:wia ibi kapiyano tanaloma: toweomenamata mabu ibi a:imanola. <sup>10</sup> Iyo, naimano tanalo bilibilinomo a:imanola ega:walo a:imano tanalo bilibilinomo naimanola, ebema: me waloma:tapido a:ma:le na me opolo owalogoniata.

<sup>11-12</sup> “O naimano Wade-talena Nabiwi, tete tatalila na me opo katepamo, wiyasiya me opo ebe naimano waloma:tapino ilukuli baila. Ebema: a netewapiate kapiya wokilo keba kunu kokolionama:, iba:te eba kunu gelebadiago kapimiya kilukulinama: modobola a:ma: a:imano elawo mailamo ibi wadenomamo nulameniye. Ebe elawo mailo a:ma:le natamo iyalo ikanamiyata, ega:walo nale dopamo iba:go eba okolinalo ebe mailamo ibi wadenomamo buiyalatenaimo. Nanitabola, ibi naimano buiyalatele magumulo kapiya idite kalatidia:, wiyasiya a:imano Buka apuno tabote nanitaboma: keda:ma: kapiya dubunomote kubakobi ebema: olowi, a:ma:le Ela Opamo dopamo potele toma: degeawiyala, me ebe dubula.

<sup>13</sup> “Tete tatalila nale a:ma:tamo ka:pemamo, iyo, nale me iyaiya towetowe tabo me opolo ebema: kiyawaonamo, mabu na ubila naimano kawo kalakalate naimano waloma:tapino tepo magumulo netabokaomene. <sup>14</sup> Nanitabola, nale a:imano wade tabo iba:tamo dikalaimo, ebe mabuma: me opo epate iba:tamo na:dowaona. Dopamo tetelo iba:te me opo epago kapiyama: eda:onamiya, wiyasiya iba:te oli igilo delawiya iba:te iya epoma: ebo eda:iya, ebema: ka:lo na keba kunu kokolinamo ibi eba kunula, ibi ega:walo na, a me opo epoma: nanitabolo keda:ona:

<sup>15</sup> “O Nabiwi, a:ma:le ibi me opone gito wagailima: ka:toweometana:, wiyasiya nale a:ma: na:toweomenamata, iba:te me opolo eba ilukulinalo a:ma:le ibi wadenomamo ka:buiyalatela:wenama: Saitanate ibi kubailamekapoma:. <sup>16</sup> Nanitabola, na me opo lumagia:, ega:walo ibi atumu me opo epoma: keda:ona:. <sup>17</sup> Na iyatawala a:imano iyaiya tabono tanalo nanitabonomola, ebema: modobola ebe nani tabamo a:ma:le ibi telenanomoma: na:midiliye iba:te a:imano woko kosiyodilonama:. <sup>18</sup> Ebene a:ma:le na me opamo keba kunu kapalibona:wiwala, nale ibi atumu eba

kunu me opo kawonomamo kakanalibolemamo. <sup>19</sup> Iyo, nanitabola, ibi mabuma: na a:ka:tuwa: na talenama: midite naimano ape niyatinamo a:imano woko kapiya kosiyodilonama:, mabu eba kunu iba:te atumu a:imano talena wokopima: ka:keda:oma:na:.”

*Ya:sute Nanitabokobi Midipi Epetapi Bilibilinomono Tanaloma: Godotamo Towetowe Tabo Degeni*

<sup>20</sup> Ebene Ya:sute ebena towetowe tabo moga:menalo walo na:kegeni,

“Nabiwi, nale a:ma: me waloma:tapi kapiyama: ka:toweometana:. Iba:te a:imano tabo iyaiya epatamo eba na:kiyawaolo, piyate ebe tabo olowite nanitabokobi da:midima:na:, nale ibi mabuma: atumu ka:petoweomenamata. <sup>21</sup> O Nabiwi, a:ma:le na magumulo keba kunu kokoliawena ega:walo nale a:ma:godolo keba kunu kokolinamo, modobola ibi bilibilinomate eba kunu kapiyama: eba eda:onalo agodolo nilukulinama:na:. Ebene me opo epate ebe tanalo duima:na:, iba:te nanitabokobi ka:midima:na: a:ma:le na dapalibona:wiwala ebe tanalo. <sup>22</sup> Nanitabola, a:ma:le na walogonelo kebe elawo alo iyalo kikanama:wiwala, ebe alo nale iba:tamo ikalaimo, ebema: iba:te epo kapiyanomoma: neda:oma:na:, ale kapiyanomoma: keba kunu keda:nama: eba kunu. <sup>23</sup> Nale iba:godolo bokolinamo ega:walo a:ma:le nagodolo bokolinata, ebema: modobola ibi bilibilinomate me gabodo epo kapiyanomoma: neda:onama:na:. Ebene me opo epate ibino kapiyama: eda: tanalo duima:na:, iba:te me tanalo netewa ebo kiyatawaoma:na:, a:ma:le na dapalibona:wiwala ebe tanalo, ega:walo a:ma:le na nilakapolo keba kunu kemalagidilona:wena ibi atumu kawonomamo eba kunu ba:kemalagidilolenama:ta.

<sup>24</sup> “O Nabiwi, a:ma:le iyalo tetelo natamo kebe iyaiya epo bilibilinomo kikanama:wiwala, na ubila iba:te nale dokolinamo ebe duliwomololo nago kapimiya bilukulinama:na:, ebena a:ma:le na walogonelo kebe elawo alo dopamo kikanama:wiwala, iba:te ebe alo ebolo ka:nuima:na:. Nanitabola, me opo osiyodiloa:no a:ma:le na dopamo nilakapolo nemalagidilone-namiyata, ebe mabuma: a:ma:le na walogonelo a:imano elawo alo natamo ikanamiyata.

<sup>25</sup> “O Tuputupu Nabiwi, me opo epate a:imano tanalo kiyatawaona:, wiyasiya nale a:imano tanalo iyatawala, ega:walo naimano waloma:tapi atumu iyatawala a:ma:le na dapalibona:wiwala ebe tanalo. <sup>26</sup> Iyo, nale a:imano tanalo me dopo waloma:tapiatamo awokalimo ega:walo ebe atu tanalo uwomua: tetelo walo bakawokaliminakomo, mabu me gabodo a:ma:le na nilakapolo demalagidilona:wena ebe tanalote ibi bilibilinomo magumulo nitanamene ega:walo nale iba:godolo bokolinamo.

“O Nabiwi, naimano waloma:tapi bilibilinomono tanaloma: me naimano towetowe tabo uwomula. Taula.”

## 18

*Yu Watowatopiate Ya:suko Anakapuima: Delaweniya  
Ma:t 26.47-56; Mak 14.43-50; Luk 22.47-53*

<sup>1</sup> Ebene Ya:sukono towetowe tabo Godotamo kiyawao dolopoligoni, ebete ebe waloma:tapiago tonate Kidolono gowo na:iwanate olibi kewakewa pali idi magumamo gito nopegani. <sup>2</sup> Ya:suko anakapumipino kotamo iyatidawa Yudasiko, ebete ebe opo iyatawala, mabu dopamo Ya:sute tete bilibilinomo epetapilo ebena waloma:tapiago ebamo da:tolamenakiya ebo

naladabutinakiya. <sup>3</sup> Ebema: ebe idokolo Godotamo kalimagono ikameopino ununomo watowatopi ega:walo Pa:lisi tanebapi, iba:te Godokono Moto atila:pi ega:walo gowelaopi dubu epetapi naliboleniya. Ebene ebe dubate ibino gowelaono inamabu ega:walo wuiki alo uwatenate, Yudasite ibi ebo magataleni Ya:sute dopamo da:toni ebe baiamo. <sup>4</sup> Ebe tetelo Godokono ubi tanalodo kebe tanalate Ya:sutamo da:pemaimioma:na:, ebe tanalo bilibilinomate pelamea:no Ya:sute dopamo eba iyatawanalo, ebete ebe gowelaopi dubatamo awokala pemaiganate ibi napanaleni, “La: poko kowadiawenama?”

<sup>5</sup> Yudasite ebe dubago eba utinalo iba:te nowaminiya, “A Ya:suko Nasalete duliyoumolodawa wadinama:.”

Ebene Ya:sute iba:tamo negeni, “Na ebe ebetela,” <sup>6</sup> wiyasiya iba:te ebenu ‘na ebe ebetela’ tabo dolowiniya, ebe tetelo ibi bilibilinomate walogabo apuamo eba ila:nalo opamo gito gudiniya. <sup>7</sup> Ebene Ya:sute ibi walo nakalateda:leni, “La: poko kowadiawenama?”

Iba:te nowaminiya, “A Ya:suko Nasalete duliyoumolodawa wadinama:.”

<sup>8</sup> Ya:sute iba:tamo walo wiya tabo na:kegeni, “Nale la: analemata, na ebe ebetela. La:le na nanitabolo dowadina:wenama modobola na nelawena:la:, wiyasiya na waloma:enepi na:miyapala: iba:te ibino iyaiya tanalamo gito ka:tolaema:.” <sup>9</sup> Ebete me tabo negeni, ebete dopamo atu idoko tetelo Godotamo degeni ebe tabote nanitaboma: keda:ma:, mabu dopamo ebete towetowe tabo ma kunu geni, “Nabiwi, a:ma:le natamo dikanama:wia ebe epo bilibilinomo magumulo nale kapiya idi katutia:.”

<sup>10</sup> Ebe tetelo Saimono Pitate ebenu gowelaono gili magoba:nate dubu idino galo apu gito mapitamidameni, ebe dubuno mailo Malakasitela, ebe Godotamo kalimagono ikameopino Unu Watodawanomono moto wokodawa idila. <sup>11</sup> Ebene Ya:sute Pitatamo negeni, “Eiye, a:imano gili walo batamo na:kemapeda! Naimano Nabiwite natamo dikanami ebe temeteme kalili na nanitabonomolo ka:nimamo, ebema: mabu keleka: a:ma:le na odiyobonema: dowagela:wena?”

### *Iba:te Ya:suko A:nasitamo Demagataniya*

<sup>12</sup> Ebene piyate pali opamo da:pelameniya, ebe gowelaopi dubu ega:walo ibino watodawa ega:walo Yu epono kawokawo dubu epetapi, iba:te Ya:suko lawenate ala:mo matuomeonate <sup>13</sup> A:nasitamo dopamo magataniya. A:nasiko ebe Kayapasikono lapinola, ega:walo Kayapasite ebe ulamalo Godotamo kalimagono ikameopino Unu Watodawanomoma: eda:nami. <sup>14</sup> Buka ka:la:mioledawa, modobola a:ma: niyatawa me dubu Kayapasiko ebete dopamo Ya:sukono tanaloma: Yu epono Ka:nisolo dubu ma kunu analiya, “Modobola epo bilibilinomono taneba magumulo kapiyadawanomote na:emene epetapi mabuma:.”

### *Pitate Ya:suko Iyatawa:noma: Degeni*

*Ma:t 26.69-70; Mak 14.66-68; Luk 22.55-57*

<sup>15</sup> Tete da:peso da:petoni, Saimono Pitate Ya:sukono waloma:tadawa ida:go Kayapasikono motamo ebo toni, gowelaopiate Ya:suko dopamo demagataniya ebe atu motamo. Ebe tetelo waloma:tadawa idite Ya:suko kuminama: motono kala magumamo gito nopegani mabu Kayapasite ebenu tanalo iyatawala, <sup>16</sup> wiyasiya Pitate nopega:no kalano gigiyu niyakabolo utini. Ebene dopamo da:nopegani ebe waloma:tadawate kalano gigiyu teta:mo walo ka:penate gigiyu umidawa buwele dapanani, ebete gigiyu Pitatamo ebo a:iyamidani ebete kala magumamo atumu ka:popeganama:.

17 Ebe tetelo ebe buwelete Pitako nanani, “A, nanitabola:ka; a:ma: ebe Ya:sukono waloma:tadawa idilata!”

Pitate wiyasiya negeni, “Ao, na ebetea!”

18 Ebene wokopi epetapi ega:walo moto atila:pi dubu iba:te ela madonate, ibino ape kenaenailamenama: ela niyakabolo lamota:oniya mabu ibi gibate ulameni. Ebe tetelo Pitate atumu iba:go ela niyakabolo utini.

*A:nasite Ya:sukono Iyatulame Tanaloma: Ebe Dalateda:ni*

*Ma:t 26.59-66; Mak 14.55-64; Luk 22.66-71*

19 Ebe tetelo Godotamo kalimagono ikameopino Unu Watodawanomote Ya:suko waloma:tapino tanaloma: ega:walo ebene iyatulame tanaloma: ebe nalateda:ni. 20 Ya:sute wiyasiya ebetamo negeni, “Aimano Yu epo bilibilinomate kebolo daladabutinakiya nale iba:tamo tabo awokala kiyawaonakimo, ega:walo tete epetapi bilibilinomolo nale aimano balidi ibilamole iyaiya motolo ega:walo Godoko Amamateno Iya Motolo a:kiyatulamenakimo. Iyo, nanitabola, na tabo idi diya gabodo ka:kiyawaonakia. 21 Ebema: mabu keleka: naimano tabo kiyawao tanaloma: a:ma:le na dalateda:na:wita? Piyate naimano tabo dolowionakiya, modobola a:ma: ibi nalateda:la:. Ibi iyatawala nale kebe tabo ka:kiyawaonakimo.”

22 Ya:sute me tabo genate, ebe niyakabolo dutini ebe moto atila:dawate ebe tatakolo eba anagaliminalo nanani, “A:ma: aimano Unu Watodawanomotamo mako wato kodakoda tabo beda:ma: kegeawa:?”

23 Ya:sute ebetamo nowamini, “Na beda: kuba tabo kegemmo? Modobola a:ma: ebe kuba nawokalima: olowiopiatamo. Nale kuba idi osiyodiloo:na nani tabonomo degemo, wiyasiya a:ma:le na beda:ma: kanaginama:wa:?”

24 Ebene A:nasite Ya:suko ala:mo matuomeo palamiolemea:no eba kunu Unu Watodawanomo idi Kayapasitamo gito naliboni, ebe dubu A:nasikono lapinola, ibi netewapiate ebe atu motolo okolionamiya.

*Pitate Ya:suko Iyatawano:ma: Walo Da:kegeni*

*Ma:t 26.71-75; Mak 14.69-72; Luk 22.58-62*

25 Ebe tetelo Saimono Pitate elalo utinate ebene ape eba enaenaiminalo, epetapiate ebe nalateda:niya, “A, a:ma: ebe Ya:suko waloma:tadawa idila:ka:?”

Pitate nowamini, “Ao, na ebetea!”

26 Ebene Pitate ebe idokolo galo apu demapitamidameni ebe dubuno namutudawa idite, ebe Unu Watodawanomono moto wokodawa idila, ebete wiyasiya Pitako walo nakalateda:ni, “Ka:lo idokolo a:ma:le Ya:suago pali opolo nale la: kapimiya ulaemata, a, nanitabola:ka:?”

27 Wiyasiya Pitate walo Ya:suko iyatawano:ma: eba kegenalo kakabate ebe tetenomolo geoni.

*Yu Epono Watowatopiate Ya:suko Paeletetamo\* Demagatiya*

*Ma:t 27.1-2,11-14; Mak 15.1-5; Luk 23.1-5*

28 Ebene duiyanomolo Yu watowatopiate Kayapasikono moto atepate Ya:suko Loma gabamanino tabo anagiyamida kawo motamo ebo magatiya. Wiyasiya iba:te ebe moto guamo ka:nodoloiya:, mabu iba:te ibino talena idi kawonomamo malagidiliya, ebe talena ma kunu itana, iba:te

\* **18:27:** Ya:suko tetelo Loma epate Paeleteko napalibiya Yu epono Yudiya opamo, ebete ibino kapela Kawo Elawodubuma: ka:pada:nama:, ebene ebe opolo Paeleteko kapiyagodolo elawo itanami lumagi a:eamo aliboma:.

Yua: lumagino moto guamo a:ka:nopila:oma:na: ibino tepo magumu da-leyama: eda:olamekapoma:. Ibi iyatawala iba:te ebe pukala gito dadikami-dalema:na:, iba:te Aduga:la Soliyomu† bae a:kenaoma:na:. <sup>29</sup> Ebema: kapela Kawo Elawodubu Paeletete iba:tamo pemaigate na:pegiya, “La:le me dubu beda: mabuma: kemagaeaema? Ebete beda: kuba kosiyodilile?”

<sup>30</sup> Iba:te ebetamo nowamiya, “Ebeta kuba osiyodilola: notaleka: ale ebe a:ma:tamo a:kemagaena:!”

<sup>31</sup> Paeletete iba:tamo negiya, “La:le ebe magatawete la:imano totomu iyatawa tanalamo ebenu tanalo nanagiyamidama:wete, la:le a:ka:tuwa: ebetamo kuba wiya ebo na:nikamiyala:.”

Yu watowatopiate wiyasiya negeliya, “Ao, agodolo lumagi anakapuima: elawo kitana:, a:ma:tamo ebe mabuma: magaema:.” <sup>32</sup> Me tanalote ma kunu pemaigiya, Ya:sute dopamo degiya ebe tabote nanitaboma: keda:ma:, iyo, ebete iyalo awokalimiya ebete kewa olotolowalo keba kunu na:ka:emene.

<sup>33</sup> Ebe tetelo Paeletete ebenu Loma gabamanino kawo motamo nopegate Ya:suko ebetamo peka:mite ebe ebo alatediya, “A:ma: Yu epono Kawo Elawodubula:ka:?”

<sup>34</sup> Ya:sute ebetamo nowamiya, “A:ma: a:ka:tuwa: a:imano wokilo kanana:wa:, o epetapino woki tabo ebe kanana:wita?”

<sup>35</sup> Paeletete wiyasiya negiya, “A:ma:le na Yu lumagi idima: ka:midina:wita? A:imano eponomo ega:walo ibino ununomo watowatopiate a:ma: natamo magaeta. Ebema: a:ma:le dosiyodilawia, ebe kuba nawokalima:!”

<sup>36</sup> Ya:sute negiya, “Naimano Kawo Elawodubu tanalo me opono tanalola: Naimano Kawo Elawodubu tanalo me opono tanaloma: neda:taleka:, naimano waloma:tapiate gito ba:gowelana: ebema: Yu watowatopiate na anakapunaema: a:kelawenena:, wiyasiya naimano Kawo Elawodubuno elawote opo idine piya.”

<sup>37</sup> Ebema: Paeletete ebe nalatediya, “A:ma: Kawo Elawodubuma: eda:ma: nanitabolo kegeawita?”

Ya:sute nowamiya, “A:ma:le ebe ebe geata. Na me opamo ebema: pawokaliyamo, ega:walo na ebema: piyamo Godokono nani tabo kapa-wokalima:. Piyate ebenu nanitabo tanalo olowima: ubi diyatinaka, ebe epo bilibilinomate natamo pelamenaka.”

<sup>38</sup> Ebema: Paeletete ebe a:ka:tuwa: ebetamo negiya, “Nanitabo tanalo beda:la:ka:?” Ebete me tabo gete moto gune pemaigate Yu epatamo walo na:ka:pegiya, “Na me dubuno kuba idi kumita: ebe a:eamo aliboma:.”

<sup>39</sup> Wiyasiya ulama bilibilinomolo la:imano Aduga:la Soliyomu tetelo nale la:imano ubi tanalamo tuduwatalo lumagi idi idoko motone ebenu kuba wiyane gito palibonakomo. Ebema: la: ubila:ka: nale la: Yu epono Kawo Elawodubu gito paliboma:?”

<sup>40</sup> Iba:te ebe tabo dolowiya gelatepaolo negeliya, “Ao, a ubia:nola me dubu! A Balabasiko ubila!” Iba:te deka:miya ebe dubu pilo tanalo eba osiyodilolenalo epo epetapi ebo anakapulamiya.

† **18:28:** Me Aduga:la Soliyomuno mabu ebe Moseseko tetelo wagilimiya. Ebe tetelo Isipiti Kawo Elawodubu Pa:lote Yu epo bilibilinomo uwatete ibi ebenu wiya: wokopima: midiliya, ebema: ebe ubia:nola ibi gito alibolema: ibino Ka:inane opamo. Godote Pa:lokono wato kodakoda tanalo dumiya, ebema: idoko idilo ebete ebenu a:e nopodawa Isipiti opamo napaliboni Isipiti epo bilibilinomono dopo gudi kapanakapulamenama:. Ebene ebe idokolo a:e nopodawate Yu epono gudi aduga:lalenate, wiyasiya Isipiti epono gudinomo anakapulameni. Ebe anoano tanalodo Yu epo bilibilinomate Isipiti opone ebo nemaiminiya, ebema: ebe tanalo malagidiloma: iba:te ulama bilibilinomo magumulo Aduga:la Soliyomu bosiyodilonakoma:na:.



# 19

## *Paeletete Ya:suko A:eamo Dalibiya*

*Ma:t 27.15-31; Mak 15.6-20; Luk 23.13-25*

<sup>1</sup> Ebene Paeletete walo ka:tote ebene gowelaopi dubu nananaliya iba:te Ya:suko pa:ka:pa:ka:mo ka:na:ma:ga:midaoma. <sup>2</sup> Ebe tanalote dolopoligiya gowelaopiate moeagono ale nelawete anagogobeyamidaolo a:dete Ya:sukono watamo gito pulimiya. Ega:walo iba:te ebe kalakalatelote wiya kawonomo kalimakalima kaliku ka:pulimite <sup>3</sup> ibino taneba magumulo epetapi bilibilinomate iyaiya pelamoliya ebe tatakolo eba panagalimiolo na:pegeliya, “Eiye! Yu epono Kawo Elawodubu, a:ma: niyata!”

<sup>4</sup> Ebene Paeletete epatamo walo ka:pemaigate nakapanaliya, “Iyaiya, na Ya:suko la:tamo walo na:kemagaemo. Na ubila la: niyatawala; na ebegodolo kuba idi kumita: nale ebe a:eamo kaliboma.” <sup>5</sup> Ebene Ya:sute moeagono inamabu ebene watolo eba itanalo kalimakalima kalikago moto gune da:pemaigiya Paeletete epatamo negiya, “Numa:la; me ebe dubula!”

<sup>6</sup> Ebema: Godotamo kalimagono ikameopino ununomo watowatopi ega:walo Godoko Amamateno Iya Moto atila:pi dubu, iba:te Ya:suko umite kawiyi gelatepaolo negeliya, “Kewa olotolowamo tupuguima:wete, ikoko nanagilamolema!”

Wiyasiya Paeletete negiya, “Ao, nale a:kosiyodilomo. La: a:ka:tuwa: la:imano ubilo ebe kewamo na:na:tupuguima:la; mabu na ebegodolo kuba idi kumita:.”

<sup>7</sup> Ebene Yu watowatopiate negeliya, “Ebate aimano pukala adikanali mabu ebete a:ka:tuwa: negi ebe Godokono Gudula, ebema: modobola ebete na:emene.”

<sup>8</sup> Paeletete ebe tanalo dolowiya ebene tole tanalote kawonomoma: eba eda:lo, <sup>9</sup> Loma gabamanino kawo moto guamo ka:nopegate Ya:suko ebo nalatediya, “A:ma: kebe opo dawala:ka:?”

Ebe tetelo Ya:sute tabo idi kowamiya. <sup>10</sup> Ebema: Paeletete Ya:sutamo negiya, “A:ma: wiya tabo gema: ubia:noma: keda:wita? A:ma: me tanalo wadenomamo nemalagidila, nagodolo elawo bitana a:ma: gito aliboma; ega:walo na modobola kewa olotolowamo a:ma: tupuguima:.”

<sup>11</sup> Ya:sute ebene tabo eba wiyalo negiya, “Kebe elawo a:ma:godolo ditana, ebe elawo a:ma:tamo Godote ikamiata. Ebema: nanitabola, a:ma: a:imano kuba wiya kelaema:ta, wiyasiya piyate na a:imano kotamo diyatina:ka, Godote iba:tamo kuba wiya kawonomamo kikalaemene.”

<sup>12</sup> Paeletete ebe tabo dolowiya ebete gabo ebo wadiya Ya:suko gito aliboma; wiyasiya Yu watowatopiate gelatepaolo negeliya, “A:ma:le Kawo Elawodubunomo Sisakono\* namutudawama: deda:wena, a:ma: me dubu gito akalibaemene mabu ebete negi, ‘Na Kawo Elawodubula!’ Ebe tabo kiyawao magumulo ebete Sisatamo goweladawama: eda:na!”

<sup>13</sup> Paeletete ibino tabo gela olowite tabo anagiyamida baiamo ebo nokoliya, ebene ebene gowelaopiate Ya:suko moto gune epono ololo apuamo ebo powautiya. Ebe tabo anagiyamida baino mailo ebe Nokola Unulo Utitata Baila, Yu epono tabamo Gaba:tama: ka:minaka. <sup>14</sup> Ebe egela ebe Aduga:la Soliyomuno inamabu osiyodilole tetela, mabu dumutu ebe Soliyomuno kawo egelala. Ebene egelate tula:mo utia:no ebe tetelo Paeletete Yu epatamo negiya, “Me dubu ebe la:imano Kawo Elawodubula!”

\* **19:12:** Sisako ebe Loma epono Kawo Elawodubunomola, opo kawonomolo ebe kapiya elawonomoma: eda:nami. Ebete ebene gowelaopi iyaiya opo bilibilinomamo alibolenaki, ebema: ebe epo bilibilinomate ebe Kawo Elawodubuma: eba ka:minalo ebe kapiyatamo tudila:onamiya.

<sup>15</sup> Wiyasiya iba:te gelatepaolo negeliya, “Ebe a:eamo naliba! Kewa olotolowamo na:na:tupuguima!”

Ebene Paeletete iba:tamo negiya, “La:imano ubilo nanitabolo kegelawitama, nale la:imano Kawo Elawodubu kewa olotolowamo ka:tupuguima:?”

Ebene Godotamo kalimagono ikameopino ununomo watowatopiate nowaimiya, “Aimano Kawo Elawodubu ebe Sisako kapiyala, idi puliyala!”

<sup>16</sup> Ebe tetelo Paeletete Ya:suko iba:tamo gito ikalamiya iba:te ebe kewa olotolowamo ka:tupuguima:.

*Gowelaopiate Ya:suko Kewa Olotolowamo Da:tupuguimiya*

*Ma:t 27.32-44; Mak 15.21-32; Luk 23.26-43*

Ebene gowelaopiate Ya:suko gito lawiya. <sup>17</sup> Ebete ebena kewa olotolowa agute iba:te ebe a:e baiamo ebo magatiya, ebe damelano mailo ebe Wato Goala, Yu epono tabamo Gologotama: ka:minaka. <sup>18</sup> Ebene iba:te Ya:suko kewamo na:tupuguimite ikoko ebo nanagilamolemiya, ega:walo iba:te dubu netewa iyaiya kewamo ka:tupuguilamete, Ya:sute ibino tetelo kewa olotolowalo ebo tupuguimitani. <sup>19</sup> Ebe tetelo Paeletete pepa ida:mo tabo ma kunu akuloliya, “Me Nasaletе duliyoмolo dubu Ya:suko ebe Yu epono Kawo Elawodubula,” ebene gowelaopiate ebe pepa lawete Ya:sukono kewa olotolowa unu apuamo ebo nowatiamidiya. <sup>20</sup> Ebe tabote me netewa-kapiya iyaiya tabamo pola:ni, Yu epono tabamo, ega:walo Loma epono tabamo, ega:walo Guliki epono tabamo, ebema: Yu epo epetapi bilibilinomate ebe tabo eka:la:mioliya mabu Ya:sukono a:e bai ibino Yelusalema kawo duliyoмolo niyakabolo itani. <sup>21</sup> Ebene Yu epono ununomo watowatopiate ebe tabo umite ubia:noma: eda:olo, epetapiate Paeletetamo tolamete ebe nanalatediya, “A:ma: tabo ma kunu beda:ma: kakulola:wa:, me dubu ebe aimano Kawo Elawodubula? A ubila a:ma: wiyasiya ma kunu nakulola:, ‘Me dubu a:ka:tuwa: negi ebe Yu epono Kawo Elawodubula!’ ”

<sup>22</sup> Wiyasiya Paeletete iba:tamo negiya, “Ao, nale kebe tabo kakulolemo, na ebe tabo iyakobi a:ka:midilimo.”

<sup>23</sup> Ebe tetelo gowelaopiate Ya:suko ikoko anagilamoleme dolopoligiya, iba:te ebena kaliku uwatemete netewa-netewa tanalo osiyodilote iba:te ebo alabaiya. Wiyasiya wade kaliku idi kapiya moga:lamole tete puliyala, ebema: iba:te ebe kaliku anagiyamidalema: ubia:noma: eba eda:olo, <sup>24</sup> ibino taneba magumulo negeliya, “Me kaliku wadenonomola, akanagiyamidalema: Wiyasiya modobola a me nokola egege uwatete kiyalekeiye, a magumulo potele delaemene a ebe tanalo kiyatawaomalema:.”

Ebema: gowelaopiate eba kunu osiyodiliya. Buka ka:la:mioledawa, modobola a:ma: niyatawa, me tanalote gowelaopido pemaigiya Godokono Buka apuno tabote nanitaboma: keda:ma:, mabu iyalo tetelo ebete Ya:sukono tanaloma: degiya ebe tabote ma kunu itana,

“Iba:te naimano kaliku  
 ibino taneba magumulo alabaiya,  
 ega:walo nokola egege iyalekeiye  
 naimano pulino ga:ga: inamabu  
 kelawenaema:.”

<sup>25</sup> Ebe tetelo Ya:sukono kewa olotolowa niyakabolo me kamiyala:te lamota:oniya, Ya:sukono menoko, ebena menokono naniko, Kolopasikono kamiyale Ma:liki, ega:walo Magadala duliyoмolodawa Ma:li idi. <sup>26</sup> Ebene

Ya:sukono waloma:tadawa dubu idite ebolo nutiti, ebe Ya:sute kawono-mamo demalagidilonami ebe dubula. Ebema: Ya:sute ebe ega:walo ebenu menoko lamota:onalu dulamiya, ebete ebenu menokotamo negiya, “Maea, me dubu ebe a:imano gudula.” <sup>27</sup> Ebene ebete ebe waloma:tadawatamo negiya, “Me kamiyale ebe a:imano menokola.” Ebema: ebe egelalo ebe waloma:tadawate Ya:sukono menoko lawete ebenu motamo gito magatiya ebe wadenomamo ka:nowalubinama:

*Ya:sute Da:eni*

*Ma:t 27.45-56; Mak 15.33-41; Luk 23.44-49*

<sup>28</sup> Ebene adimo tete da:peni, Godote dopamo Ya:sukono tanaloma: kebe tanalo bilibilinomo ebenu Bukamo dakuloliya, Ya:sute ebo iyatawani ebe iyaiya tanalo ebe olopoligoa. Ebema: Godokono Buka apuno tabo idite nanitaboma: keda:ma: Ya:sute ma kunu geni, “Obo kapete unamena.” <sup>29-30</sup> Ebe tetelo kawo kalili idi kaka da:imi obo tabokanomo ebolo nitani, ebenu gowelaodawa idite ebe obamo umago aduba:midanate Ya:sute ka:ninama: ebenu tabamo eba adipatenalo, ebete datuimini ebo geni, “Taula, nale tanalo bilibilinomo opoliyalemo!” Ebe tetelo ebete ebenu wato opamo da:tuduta:midani a:enomo ebo a:eni.

*Gowelaodawa Dubu Idite Ya:suko Kiliba:mo Balalo Dawamidani*

<sup>31</sup> Ebe egela ebe Aduga:la Soliyomuno inamabu osiyodilole tetela, mabu dumutu ebe Yu epono wokoa: talena egelala ega:walo ibino Soliyomuno kawo egelala, ebema: iba:te ebe egela iyanomoma: eba gelanalo, ibi ubia:nola a:elao apa:te ebe egelalo kewa olotolowalo pola:nama:. Ebema: ibi epetapiate Paeleteko nananiya, ebete gowelaopi analenate kewa olotolowamo da:tupuguilamiya ebe dubuno agowa gito kowakalamililame-nama:. Gowelaopiate eba kunu dowagelema:na:, ebe dubate samamo a:elaote, ebenu ibino a:elao ape epate kewa olotolowane piwolukote bobamo gito kanalomoma:na:. <sup>32</sup> Ebema: gowelaopiate tolamenate dopo dubuno agowa nowakalamiliminate dubu idi ebe atumu kanamitiniya, ebe dubu netewa Paeletete Ya:suago a:eamo kapimiya aliboliya. <sup>33</sup> Wiyasiya gowelaopiate Ya:sutamamo da:nemaiminiya ebenu agowa ka:nowakalamiliminiya:, mabu iba:te ebe a:e numiniya. <sup>34</sup> Wiyasiya ebe tetelo kapiya gowelaodawa idite Ya:suko kiliba:mo balalo gito awamidani, ebenu kalimate obago ebenu apene ebo peka:ka:liyaomeniya.

<sup>35</sup> Na buka osiyodilodawate a:ma: ka:la:mioledawa anamata, nale me tanalo naimano balida:mo nanitabolo uminiyamo, iyo, na iyatawala me tabo nanitabola, ebema: modobola a:ma: nanitabokobi na:mida:. <sup>36</sup> Me tanalote pemaigani Godokono Buka apuno tabote nanitaboma: keda:ma:, mabu iyalo tetelo ebete Ya:sukono tanaloma: degiya ebe tabote ma kunu itana,

“Iba:te ebenu goa kapiya idi  
akadikamidalema:na:.”

<sup>37</sup> Ega:walo Buka apuno tabo idite ma kunu gena,

“Epate kiliba:mo  
kebe dawa kawamidiye,  
iba:te ebe kuima:na:.”

*A:limitiya Duliyaomolodawa Yausepete Ya:sukono Ape Nokola Bobo Magu-mamo Diyatini*

*Ma:t 27.56-61; Mak 15.42-47; Luk 23.50-56*

<sup>38</sup> Ebe tetelo dubu idite nokolinami ebenu mailo Yausepetela, ebe A:limitiya duliynomolodawala ega:walo Ya:sukono waloma:tadawa idila, wiyasiya ebete ebenu tanalo nowaminanami mabu ebete Yu watowatopi tolelamenami. Ebenu me dubute Paeletetamo tonate Ya:sukono ape lawe-nama: ebe dananani, Paeletete ebetamo modoboma: geni, ebema: ebete tonate Ya:sukono ape gito nelaweni. <sup>39</sup> Ebe tetelo dubu idi Nikadimasitela, ebete Yausepeko walubinama: ebo peni, ebe dubu ebe idoko tetelo Ya:suago tabo ka:na:kiyawaonama: dopamo da:toni ebe dubula. Ebete Ya:sukono apa:mo kalomonama: iyaiya wadewade nibo inamabu epetapi wadaeni, ebe inamabuno mibo kawodopola, ebe 30 kilogalama keba kunula:ka: eba kunula. <sup>40</sup> Ebenu ebe dubu netewate wadewade nibo inamabu Ya:sukono apa:mo alomonate wadewade keyakeya kalikamo ebo aputiniya, mabu Yu epate lumagino ape bobamo iyatima: eba kunu osiyodilonaka. <sup>41</sup> Gowelaopiate Ya:suko kebolo kanakapuminiye ebe opo niyakabolo pali idi nitanami, ega:walo ebe pali magumulo nokola bobo atumu na:kitanami, epate ebe bobo maboete nokola damela iyalo obobiya wiyasiya a:e lumagi idi dopamo ebamo kiyatiya:. <sup>42</sup> Ebema: Yausepeko Nikadimasiko iba:te Ya:sukono ape ebamo gito niyatiniya, mabu ebe nokola bobo Ya:sukono a:e bai tatalilo itani, ega:walo ibi ma kunu malagidiloniya, ka:lo Palaide egelala, Yu epono talena egelano inamabu osiyodilole tetela, mabu dumutu ebe ibino wokoa: talena egelala.

## 20

*Ya:sukono Waloma:tapiate Ebenu Ape Bobolo Da:nowadiya  
Ma:t 28.1-8; Mak 16.1-8; Luk 24.1-12*

<sup>1</sup> Ebenu Sande duiyanomolo egelate eba waloutalo idokote dolopoliguti, ebe tetelo Magadala duliynomolodawa Ma:lite Ya:sukono bobo uima: da:tiya, ebete bobo demopiniya ebe kawo nokola balamo iyalo mupiamida eba itanalo ebo numiya. <sup>2</sup> Ebenu ebete walo ka:pa:puligate Saimono Pitako ega:walo waloma:tadawa idi Ya:sute kawonomamo demalagidilonami, ebe dubu netewa napanaliya, “Epate Ya:sukono ape bobo magumune pilolo elawa:, a iyatawa: iba:te kebamo diyata:!”

<sup>3</sup> Ebema: Pitako ega:walo waloma:tadawa idi iba:te bobo uima: ebo tiya. <sup>4</sup> Ibi netewapiate eba puila:natolo, waloma:tadawa idite samonomamo puligate bobo baiamo dopamo gito nemaigiya. <sup>5</sup> Ebe tetelo ebete gigiyu niyakabolo nutite, bobo magumamo nopega:no tuduwatalo da:nemeliya, Ya:sukono ape dauputiniya ebe wadewade keyakeya kalikunomoiya nulamiya. <sup>6</sup> Ebenu Pitate walogabone bobamo nemaigate bobo magumamo nopegate da:nemeliya ebe atu keyakeya kaliku ka:nulamiya, <sup>7</sup> ega:walo Ya:sukono wato dauputiminiya ebe kaliku idite mokopiamida iyabailo eba itanalo ebete ebo numiya. <sup>8</sup> Ebe tetelo bobamo dopamo da:nemaigiya ebe waloma:tadawa idite bobo magumamo atumu ka:nopegate Ya:sukono ape numia:no ebenu a:e magumune maiga tanalo nanitabokobi ebo na:midiya. <sup>9</sup> Nanitabola, Godote ebenu Bukamo tabo dopamo akuloliya Ya:sute a:e magumune walo ka:kemaigamene, wiyasiya me waloma:tapi netewate ebe tanalono magumu nanisiwale kelawiya:.

*Ya:sute Magadala Duliynomolodawa Ma:litamo Dapawokaliya  
Ma:t 28.9-10; Mak 16.9-11*

<sup>10</sup> Ebenu Ya:suko waloma:tapi dubu netewate motamo gito ka:tiya, <sup>11</sup> wiyasiya Ma:lite a:ka:tuwa: bobo bailo luti. Ebete bobono gigiyu niyakabolo eba iitalo tuduwatalo bobo magumamo ebo na:meliti. <sup>12</sup> Ebe

tetelo Godokono nopopi netewa keyakeya kaliku pupulite, Ya:sukono apete dopamo ditani ebe bailo eba okoliutalo Ma:lite ebo ulamiya, idi wato apulo, idi agowa apulo. <sup>13</sup> Iba:te ebe nalatediya, “Kamiyale, a:ma: beda:ma: kia:wita?”

Ebene ebete tabo eba wiyalo negiya, “Pilo epate naimano Kawodawano ape kebamo date na iyatawa:.”

<sup>14</sup> Ma:lite me tabo degiya ebete olobigate Ya:suko utitalo umiya, wiyasiya ebete kiyatawiya: ebe potelela:ka: <sup>15</sup> Ebene Ya:sute ebe nalatediya, “Kamiyale, a:ma: beda:ma: kia:wita, ega:walo poko kowadiawita?”

Ma:lite ebe dubu pali namutudawamu malagidilolo negiya, “Dubu, niyata, a:ma:le a:e lumagino ape opo ida:mo a:ka:niyata:wa? Modobola na nanana:, ebene nale ebena ape ka:nelaemamo.”

<sup>16</sup> Ebe tetelo Ya:sute ebetamo negiya, “Ma:li!”

Ebene ebete Ya:sutamo olobigadigate Yu epono tabamo ebetamo negiya, “Laboni!” Buka ka:la:mioledawa, modobola a:ma: me tanalo niyatawa, me tabono magumu ebe nitana “Iyatulamedawa.”

<sup>17</sup> Ya:sute ebetamo negiya, “Na nani akolawenitala: mabu na naimano Nabiwitamo odoloa:nola. Modobola a:ma: toawete naimano ekaki nananala:, ‘Na Ya:sute gemo, naimano Nabiwi ebe la:imano Nabiwila, iyo, naimano Godo ebe la:imano Godola. Tete tatalila na ebetamo walo ka:ka:tomamo.’ ”

<sup>18</sup> Ebene Magadala duliynomolodawa Ma:lite tote Ya:suko waloma:tapi ebe atu tabo eba nanalelo iba:tamo na:negiya, “Na Kawodawa Ya:suko uimo, ebete na anane me tabo la: kapanaletama:.”

### *Ya:sute Ebena Waloma:tapi Epetapiatamo Dapawokalani*

*Ma:t 28.16-20; Mak 16.14-18; Luk 24.36-49*

<sup>19</sup> Ebe atu Sande egela idoko tetelo Ya:suko waloma:tapiate kapiya motolo eba pola:nalo moto gigiyu a:kodakodailameniya mabu iba:te Yu watowatopi tolelameniya. Ebe tetelo Ya:sute iba:tamo pawokalanate ibino tetenomolo putinate ibi napanaleni, “Godokono kalakalate la:godolo nitanamene.”

<sup>20</sup> Ebete ebe tabo genate ebena koto ega:walo balano bugomo iba:tamo ebo a:iyamidaoleni, ebena Ya:suko waloma:tapiate ebe uminate ibino tepo magumulo kawo kalakala iyatawaoniya.

<sup>21</sup> Ya:sute iba:tamo walo na:kegeni, “Godokono kalakalate la:godolo nitanana. Nabiwi Godote na me opo epatamo keba kunu kapaliboniyale, me tetelo nale la: eba kunu kalibolemamota.” <sup>22</sup> Ebe tetelo ebete iba:tamo ela eba agolamidanaloni negeni, “Godokono Uliyana nelawa:la:.” <sup>23</sup> Ebene la:le lumagi iditamo ma kunu degelaema, ‘Godote a:imano kuba egebolemetate a:dodolomatilima:ta,’ Godote eba kunu kosiyodilomene, ega:walo tete idilo lumagi iditamo da:kegelaema, ‘Godote a:imano kuba egebolemetate a:ka:dodolomatilimitamene,’ ebe tanalote atumu eba kunu ka:kitanamene.”

### *Ya:sute Tomasitamo Dapawokalani*

<sup>24</sup> Ya:sukono 12 waloma:tapino taneba magumulo Tomasiko ebe idila, epetapiate ebe Nedewale Guduma: ka:minakiya. Ya:sute waloma:tapi epetapiatamo dapawokalani me dubute ebe idokolo iba:go ka:lutiya:, <sup>25</sup> ebema: epetapiate ebe dananiya, “A Ya:suko uima:,” ebete ibino tabo ma kunu wamini, “Ao! Nale ebena kotolo ikokono bugomo ulamea:no, ega:walo nale ebena bugomo naimano kotamo ologilia:no, ega:walo nale ebena balano bugomamo naimano koto augua:no nale ebe tanalo nanitabokobi a:ka:midimo.”



<sup>26</sup> Ebene kapiya wuiki da:petiya, Ya:suko waloma:tapiate Tomasiago kapiya motamo paladabutinate moto gigiyu kodakodailamenate ebo pola:niya. Ebe tetelo Ya:sute iba:tamo pawokalanate ibino tetenomolo putinate ibi napanaleni, “Godokono kalakalate la:godolo nitanamene.”

<sup>27</sup> Ebene ebete Tomasiko nanani, “Naimano koto ulama:wete ikokono bugomo na:pologila:, ega:walo a:imano koto uwamidawete naimano balano bugomamo napauga. A:ma: woki netewama: akoeda:la:, na nanitabokobi na:midina!”

<sup>28</sup> Tomasite ebene tabo eba wiyanalo negeni, “A:ma: naimano Kawodawalata! A:ma: naimano Godolata!”

<sup>29</sup> Ebene Ya:sute ebe nanani, “A:ma: na unama:wete nanitabokobi ebo midina:ta, wiyasiya piyate na unamea:no nanitabokobi da:midinima:na:, Godote iba:tamo kalakala kawonomamo bikalamenakomene!”

### *Yonekono Buka Osiyodilo Tanalono Mabur*

<sup>30</sup> Buka ka:la:mioledawa, modobola a:ma: me tanalo wadenomamo niyatawa. Ya:sute ebene waloma:tapino ololo apulo anoano tanalo epetapi bilibilinomo dosiyodilolenaki, wiyasiya ebe tanalo bilibilinomo epetapi nale me bukalo kawokalilamita: <sup>31</sup> Wiyasiya kebe iyaiya tanalo nale dakulolemo, ebe tanalate na:pola:nama:na: a:ma:le Ya:sukono nanitabo tanalo kiyatawaema:. Ebe Kelisote, Godokono Gudula, ega:walo a:ma: ebe nanitabokobi da:mida:wenamene ebene mailamo nanitabo igilo ke-laema:ta.

## 21

### *Ya:sute Taibilyasi\* Paka:lo Ebene Sebeni Waloma:tapiatamo Danawokaliya*

<sup>1</sup> Me tanalo olopoligote egela epetapi da:petoiya, Ya:sute Taibilyasi Paka:lo ebe a:ka:tuwa: ebene sebeni waloma:tapiatamo ebene tanalo walo nakawokalimiya, ebene ebe tanalote ma kunu pemaigiya. <sup>2</sup> Saimono Pitako ega:walo Tomasiko, ebene mailo idi Nedewale Gudula, ega:walo Nata:niyoloko, ebe Ga:lili opono Ka:ina duliynomolodawala, ega:walo Sebedikono gudi netewa, ega:walo Ya:suko waloma:tapi epetapi netewa, miba:te kapimiya pola:niya. <sup>3</sup> Ebene eba adimonalo Saimono Pitate epetapiatamo negeni, “Na namoma: tomo.”

Ebe tetelo ibi bilibilinomate negelaniya, “Modobola a a:ma:go ka:pelaemalema:,” ebene iba:te tolamenate peamo gito noloniya, wiyasiya ebe idokolo iba:te namo kuwatoleniya:, puliyanomola.

<sup>4</sup> Ebene duiyalo egelate eba walotalo, Ya:sute Ga:lili Paka: balalo utiti, wiyasiya ebene waloma:tapiate kemalagidiliya: ebe Ya:sutela. <sup>5</sup> Ya:sute ebene tabo madodo adipatelo iba:tamo negiya, “Namutupiala:, la: namo a:kuwatola:ema?”

Iba:te nowamiya, “Ao, puliyala.”

<sup>6</sup> Ebema: ebete ibi nanaliya, “La: pe tumudi apuamo kamau dauba:ema la: namo kuwatolemamota.” Ebene iba:te ma kunu dowageliya, iba:te kamau adipatema: ka:modobiya: mabu kamauamo namo bilibilinomate taiya.

<sup>7</sup> Ebe tetelo Ya:sute ebene waloma:tapino taneba magumulo kawonomamo demalagidilonami ebe dubute Pitatamo negiya, “Me Kawodawata!” Ebene Pitate ebe tabo olowite, ebete woko osiyodiloma: kebe kaliku ka:pekananiyale ebe lubudino kaliku lawete obamo pategate potamo gito na:lumiya, <sup>8</sup> mabu waloma:tapino pete paka: bala tatalidopolo itani.

\* 21:: Taibilyasi ebe Ga:lili Paka:no mailo idila.

Ebe tetelo waloma:tapi epetapiate ibi a:ka:tuwa: namo bilibilinomagono kamau peago anamiyatate potamo gito na:iliya, <sup>9</sup> ebene iba:te potamo eba nidiwiutalo ela ebo numiya, ebe elalo bae ega:walo namo okaleo na:pola:ni.

<sup>10</sup> Ebene Ya:sute iba:tamo negiya, “La:le duwatola:ema ebe namo epetapi mamu nowada:la:.”

<sup>11</sup> Ebe tetelo Pitate peamo walo ka:nolote namagono kamau damelamo ebo anamiyamidiya, ebe kamauamo 153 kawokawo namate taiya wiyasiya kamaute ketegaliya: <sup>12</sup> Ebene Ya:sute iba:tamo negiya, “La: pelama:wete bae na:penala:.” Ibi bilibilinomate iyatawaiya me dubu ebe ibino Kawodawala, ebema: ibi magumulo idawate Ya:suko ma kunu kalatediya: “A:ma: potelela:ka:?” <sup>13</sup> Ebe tetelo Ya:sute bae ega:walo namo uwatete iba:tamo gito ikalamoliya, <sup>14</sup> ebema: nanitabola, ebete a:e magumune demaigiya, me ebenu netewa-kapiya tetela ebenu waloma:tapiatamo dapa-wokaliya.

*Ya:sute Pitako Ebenu Wokodawama: Walo Da:keka:miya*

<sup>15</sup> Ebene ibino bae nao tanalote dolopoligiya, Ya:sute Saimono Pitako nalatediya, “Saimono, Yonekono gudu, me waloma:tapiate na nilakapolo demalagidilonena, wiyasiya a:imano nilakapo tanalote ibino nilakapo tanalo nanitabola na:kodoilinale?”

Ebe tetelo Pitate tabo eba wiyalo negiya, “Iyo, Kawodawa, a:ma: iyatawalata na a:imano wade namutudawala.”

Ebene Ya:sute ebetamo negiya, “Naimano sipi-goeogoeo egege wadenomamo nulameniyu.”

<sup>16</sup> Ebene Ya:sute Pitako walo nakalatediya, “Saimono, Yonekono gudu, a:ma:le na nanitabola nilakapolo na:kemalagidilona:wena?”

Ebene Pitate tabo eba wiyalo negiya, “Iyo, Kawodawa, a:ma: iyatawalata na a:imano wade namutudawala.”

Ebene Ya:sute ebetamo negiya, “Naimano sipi-goeogoeo wadenomamo nulameniyu.”

<sup>17</sup> Ebene Ya:sute netewa-kapiya tetelo Pitako walo nakalatediya, “Saimono, Yonekono gudu, a:ma:le degeawa: me tabo nanitabola:ka: A:ma: naimano nani namutudawama: keda:wena?”

Ebe tetelo Ya:sute netewa-kapiya teta:mo Pitakono nilakapo tanaloma: ebe dalatediya, ebema: ebete woki bilibilima: eda:lo nowamiya, “Kawodawa, a:ma: tanalo bilibilinomo iyatawanomolata. Nanitabola, na a:imano wade namutudawala.”

Ebene Ya:sute ebetamo negiya, “Modobola, a:ma: naimano sipi-goeogoeo wadenomamo nulameniyu. <sup>18</sup> Na a:ma:tamo nani tabonomo gemo, a:ma: oli ape tetelo a:ma: a:ka:tuwa: a:imano apenu inamabu pupuliawete a:imano ubilo pata:namiyata, wiyasiya a:ma: kadele teta:mo da:nemaigaemene a:imano tanalote eba kunu a:kitanamene. Ebe tetelo a:imano ubite itana:no lumagi idite pete a:imano koto pa:tupuguilamelemetate da:pematuolamolemetamene, ebete a:ma: temeteme baiamo ebo kemagatama:ta.” <sup>19</sup> Pitate keba kunu da:emene ega:walo ebenu a:e tanalote Godoko keba kunu dowalogomene, ebe tanalo kawokalilaema: Ya:sute Pitatamo me tabo ebema: giya. Ebene ebete ebenu tabo moga:melo Pitatamo walo na:kegiya, “Modobola a:ma: na nowaloma:ena:.”

*Pitate Waloma:tadawa Idino Tanaloma: Ya:suko Daniya*

<sup>20</sup> Ebe tetelo waloma:tadawa idi Ya:sute kawonomamo demalagidilonami ebete ibi netewapi eba waloma:talitalo, Pitate walogabo apuamo polobigate ebe ebo pumiya. Me waloma:tadawate dopamo Aduga:la Soliyomu bae nao tetelo Ya:suko niyakabamo nokoliatepanate ebetamo ma kunu geni, “Kawodawa, aimano taneba magumulo potele a:ma: anakapumipi na:kowalubilimene?” <sup>21</sup> Pitate ebe dubu umite Ya:suko naniya, “Kawodawa, me dubu epate keba kunu nakamitima:na:?”

<sup>22</sup> Wiyasiya Ya:sute ebetamo negiya, “Na ubi diyatimo ebete naimano pe teta:mo okolinama:, me naimano tanalola, a:imano tanalola. Modobola a:ma: na waloma:ene tanalo kapiya nemalagidila.” <sup>23</sup> Walone tetelo Ya:suko waloma:tapi epetapiate me tabo dolowiya iba:te ma kunu gela ebo wagilimiya, me waloma:tadawate a:ka:enamene, wiyasiya Ya:sute Pitatamo mako tabo kegiya:. Ebete negiya, “Na ubi diyatimo ebete naimano pe teta:mo okolinama:, me naimano tanalola.”

#### *Yonete Bukamo Dakuloliya Ebe Uwomu Tabo*

<sup>24</sup> Na me waloma:tadawate me bukamo dakulolemo, me iyaiya tabono tanalo magumulo nanitabo tanalo awokalimitamo, iyo, a nanitabokobi midipi bilibilinomo iyatawala, me iyaiya tabo ebe nanitabonomola.

<sup>25</sup> Ega:walo me tanalo idila. Ya:sute me opolo tanalo epetapi bilibilinomo dosiyodilolenaki, nale ebe tanalo me buka kapiyalo awokalilaema: modoboa:. Naimano woki bitana, buka osiyodilolepiate Ya:sukono tanalo bilibilinomo awokalilaema: dowagelema:na:, iba:te kebe buka bilibilinomo dosiyodilolema:na:, epate ebe buka alomoma: me opo kawonomolo alomo baite a:ka:modobomene.

Kalakala kawonomola, me naimano buka tabo uwomula.

## YA:SUKONO ALIBOLEPI DUBUNO OSIYODILOLE TANALO

### *Me Bukano Osiyodilo Tanalono Mabu*

<sup>1-2</sup> Naimano wade lumagi Tiyopolasi, niyata. Me netewa tetema: eda: nale a:ma:tamo buka osiyodiloma:. Nanitabola, Ya:sute ebene woko dowag- ilimiya ebe tetene pete ebete Unu Duliyomolamo dodoliya ebe teta:mo pemaiga, ebete kebe iyaiya tanalo kosiyodilolenakile ega:walo epo keba kunu kiyatulamenakile ebe tanalo bilibilinomo nale naimano dopo bukalo awokalilamiyamo.

### *Ya:sute Wade-talena Uliyanate Pema: Nanitabolo Degiya*

Nanitabola, Godote Ya:suko Unu Duliyomolamo pelawea:no dopamo ebete ebene alibolepi dubu Wade-talena Uliyanano elawamo totomulateliya, iyo, ebe dubu ebete ebene alibolepima: iyalo eka:la:miya. <sup>3</sup> Ebene Ya:sukono kawokawo temeteme dolopoligomiya, ebe tetelo ebete 40 egela magumulo tete bilibilinomo epetapilo iba:tamo ebene ololonomamo awokalanaki iba:te ebene igilamo maiga tanalo umite ebe nanitabokobi ka:midima:, ega:walo ebe atu tetelo ebete Godokono Kawo Elawodawano tanaloma: ibi ebo iyatulamenaki. <sup>4</sup> Ebene tete idilo ebete iba:go eba okolilo ibi ma kunu totomulateliya, “La: Yelusalema kawo duliyomolone umuino akotolama:la:, mabu naimano Nabiwite la:tamo ikalaema: nanitabolo degiya la: ebe tanalo nemakopeliyala:. Iyo, nale la: dopamo danaletima, ebe tanalo la: ma kunu olowimata, <sup>5</sup> Yonete dopamo tetelo epo obonomamo waduba:midaolenaki, wiyasiya la: egela kapiyakapiya pola:wenate Godote ebene Uliyanamo ebo ka:powaduba:midaolema:ta.”

### *Godote Ya:suko Unu Duliyomolamo Da:pelawiya*

<sup>6</sup> Ebe tetelo Ya:sute ebene alibolepi dubago aladabuti bailo eba pola:nalo, iba:te ebe alateda:lo naniya, “Kawodawa, a:ma: me tetelo me opo kawonomono watowatopima: eda:o tanalo a:imano Isalaela epatamo walo ba:kikalama:emene?”

<sup>7</sup> Ya:sute ibino tabo eba wiyalo negiya, “Iyaiya tanalono pelame tete naimano Nabiwite ebene elawamo a:ka:tuwa: kegemene. Ebe ubia:nola la:le ebe tanalono tete iyatawaoma:, <sup>8</sup> wiyasiya ebene Uliyanate la: unamo da:pokolimene, ebe tetelo ebene elawote la:imano tepo magumu detabokailaemene, la:le naimano tanalo awokalima: tabo at- apima: keda:omamota. Ebe mabuma: me Yelusalemalo ega:walo Yudiya opono duliyomolo epetapilo ega:walo Samaliya opono duliyomololo ega:walo me opo kawonomono uwomu apuapulo la:le naimano tabo ka:na:kiyawaomamota.” <sup>9</sup> Ebene Ya:sute me tabo kiyawao dolopoligiya, iba:te ebe eba umitalo Godote unamo ebo adipatiya, iyo, ebete tema magumamo da:nopegiya iba:te ebe walo kumiya:

<sup>10</sup> Iba:te unamo taliaote eba umitalo, dubu netewate keyakeya kaliku pupula:go iba:tamo pemaimite ibi niyakabolo eba lamota:nalo <sup>11</sup> iba:tamo negeliya, “La: Ga:lili opo dubala:, la: beda: mabuma: unamo taliaolo delam- ota:wenama? Me Ya:suko la:le eba umitalo Godote ebe Unu Duliyomolamo da:pelawe, ebete la:godone unamo keba kunu ka:nodolole, walone ebete eba kunu ka:ka:pemene.”

### *Matayasite Yudasikono Woko Gobebobo Delawiya*

<sup>12</sup> Ebema: Ya:sukono alibolepi dubate Olibi Kewakewa Unu Damelane niwitiote Yelusalema kawo duliynomolamo ebo tolamiya, ebe damela Yelusalema niyakabolo itana, ebamo tolame gabo mulua:, kapiya kilomita keba kunula:ka: eba kunula. <sup>13</sup> Ebene iba:te kawo duliynomolamo ne-maimiote, iba:te dilukulinamiya ebe unu motolo ditanami ebe teta:mo gito nodoloiya. Ebe tetelo ebe motolo me alibolepi dubate pola:niya — Pitako, Yoneko, Ya:imesiko, ega:walo A:nduluko, Pilipiko ega:walo Tomasiko, Batolomuko ega:walo Ma:tiyuko, ega:walo Ya:imesi idi A:lapiyasikono gudu, ega:walo Saimonoko ebete dopamo Loma gabamani epago gowe-laodawama: eda:nami, ega:walo Yudasiko Ya:imesikono gudu. <sup>14</sup> Ebene me alibolepi dubago Ya:sukono ekaki ega:walo ebenu menoko Ma:lika ega:walo kamiyale epetapi, iba:te 40 egela magumulo ebe atu motamo paladabutinakiya, ebenu iyaiya tete epetapilo iba:te Godotamo towetowe tabo ebo pegelanakiya.

<sup>15</sup> Ebene egela epetapi dolopoligiya, ebe tetelo 120 nanitabokobi midipiate walo dakaladabutiya, Pitate ibino taneba magumulo maigate iba:tamo ma kunu kiyawaiya, <sup>16-17</sup> “Ekakiala:, Godokono Uliyanate dopamo Da:ibidikono tabone Yudasikono tanaloma: degiya, ebe Buka apuno tabote nanitaboma: keda:ma: olalati tanalote ebetamo eba kunu ebema: maigiya. La: iy-atawalata Yudasiko aimano tanebadawa idima: eda:nami, iyo, Ya:sute ebe elawi ago kapimiya woko kosiyodilonama:. Wiyasiya me dubute idoko idilo Ya:suko anakapumpi eba walubilinalo, iba:te ebe ebo laweniya.”

<sup>18</sup> Ebema: buka ka:la:mioledawa, modobola a:ma: me tanalo niyatawa, me dubu Yudasite ebenu kawo kuba osiyodilo magumulo kebe mani kuwatiyale, ebete ebe maniamo dubu idino pali opo nelawiya, ebenu ebete tote ebe opolo da:na:iya, ebenu apete opamo eba pegalo tepo alapogomete maladite ebo pawokalaomiya. <sup>19</sup> Ebe tetelo Yelusalema kawo duliynomololo da:pola:niya, ebe Yu epo bilibilinomate ebenu a:e tanalo olowite ebe pali opono mailo ibino tabamo Akeledamama: ka:miya, ebe mailono magumu nitana ‘Kalimagono Pali Opolo.’

<sup>20</sup> Ebene Pitate tabo moga:melo walo na:kegiya, “Da:ibidite Sam Oale Bukalo Godokono tabo ma kunu akuloliya,

‘Modobola kuba lumagino motote gito nitanamene,  
iyo, ebe moto gulo lumagi idite walo a:ka:lutamene.’

Wiyasiya Da:ibidite ebe lumagino woko gobebobono tanaloma: tabo idi ma kunu kegiya,

‘Modobola kuba lumagino woko gobebobo  
idawate nelaemene.’

<sup>21-22</sup> Ebema: lumagi idite woko magumulo ago nekapiyamene, Kawodawa Ya:sute a:e magumune demaigi ebe tabo kanawokaliminakoma:. Iyo, ago tete geyageyanomolo dokolinami, modobola ebako lumagite ago woko kowagilimene, ma kunu Yonete epo obamo waduba:midaolema: tabo da:pa:kiyawai ebe tetene wagilimite, Ya:sute Unu Duliynomolamo da:nodoli ebe teta:mo nemaiga, ebe tete geyageyanomolo piyate Ya:suago dowap-ata:lamenamiya ibi magumulo a kapiya dawa idi kelaemalema:.”

<sup>23</sup> Ebema: iba:te dubu netewano mailo ka:la:miya, Yausepe Basabasiko ebenu mailo idi Yasitasitela, ega:walo Matayasiko. <sup>24</sup> Ebe tetelo iba:te Godotamo eba towetoweolo negeliya, “Kawodawa, epo bilibilinomono



tepo magumuno tanalo a:ma: iyatawalata, ebema: aimano Kawodawa, me netewa dubu magumulo a:ma:le iyalo poko kelawa:wiya, modobola a:ma: a niyatuama:.<sup>25</sup> Ma kunu a:imano alibodawa idi Yudasite datepi, ebe woko gobebobo a:imano oli lumagi idite kelaemene, wiyasiya Yudasite ebena kuba wiya laema: Ela Opamo iyalo a:ti, ebe kuba opo eba:go na:nemodobona.”

<sup>26</sup> Ibino towetowe tabo gela tanalo dolopoligiya, ebe tetelo iba:te nokola anagogobeyamidaole netewa uwatete, nokola ida:mo idawano mailo akulolemete, nokola ida:mo idawano mailo akoakulolemiya. Ebene iba:te Godokono ubi tanalo kuima: ebe nokola da:niyalekeiya Matayasikono mailo ebo lawiya, ebema: ebe gabodo ebe dubute Ya:sukono alibolepi 11 dubu epetapiago kapiyama: ebo ediya.

## 2

### *Godokono Uliyanate Nanitabokobi Midipiatamo Da:piya*

<sup>1</sup> Ebene Pentekose Soliyomu Egela\* da:piya, ebe tetelo Ya:suko nanitabokobi midipi bilibilinomate kapiya motamo paladabutiya. <sup>2</sup> Ebe tetelo kawo diyamonomote Unu Duliymolone iba:tamo pemaigiya, kawo awanomote degenape eba kunu pete iba:te da:pola:niya ebe moto gu gito petabokiya. <sup>3</sup> Ebene ela mena keba kunula:ka: ibi bilibilinomatamo eba nemaimiolo, iyaiya ka:nekekeote iditamo iditamo ibi unamo ebo nilukuliya. <sup>4</sup> Ebe tetelo Godokono Uliyanate ibi bilibilinomo detabokailamiya, ebete ibi elawokobi eba midililo kapela epo epetapino iyaiya tabamo kiyawao ebo wagilimiya.

<sup>5</sup> Ebema: buka ka:la:mioledawa, a:ma: numa:, ebe Pentekose Soliyomu egela pea:no dopamo Yu epo epetapi ega:walo Yua:pi epo epetapi Godoko damamatenamiya, ibi bilibilinomate ibino iyaiya mulu opone Yelusalema kawo duliymolamo pelamoliya ebe soliyomu kapimiya ka:posiyodiloma:. <sup>6</sup> Ebene Godote ebena Uliyana Ya:sukono nanitabokobi midipiatamo kawo diyamago dapalibiya, iyaiya opone soliyomuma: da:pelamiya ebe epo epetapi bilibilinomate ebe diyamo olowite ebe tanalo kuima: ebo paladabutiya. Ebema: iba:te kawonomamo anoanoutiya mabu nanitabokobi midipiate Yu epono tabamo kegelitiya: wiyasiya iyaiya tabamo gelitiya, ma kunu olowiopino taneba magumulo idawate ebena tabonomo olowinaki, idawate atumu ebena tabonomo ako-olowinaki, ibi bilibilinomate eba kunu wagelitiya.

<sup>7</sup> Ebene iba:te la:wa:ote eba anoanolo negeliya, “Me tabo degelita, me epo aimano opo epoa:, ibi Ga:lili opo epola, <sup>8</sup> ebema: keba kunula:ka: iba:te aimano iyaiya tabonomamo degelita a nolowiutama:? <sup>9</sup> Eiye, a bilibilinomate mulu opone pelamolima:! Iyo, a epetapi Patiya opo epola, epetapi Midiya opo epola, epetapi Ilima opo epola, ega:walo epetapi Mesopotemiya epola, ega:walo a epetapi Yudiya epola, epetapi Ka:padosiya epola, epetapi Pontase epola, ega:walo epetapi A:isiya epola. <sup>10</sup> Ega:walo a epetapi Piligiya epola, epetapi Pa:mapiliya epola, ega:walo epetapi Isipiti epola, nanitabola, a epetapi Sailiniya duliymolono Libiya opone pelaima:, ega:walo a epetapi Loma kawo duliymolone da:pelaima: ebe epola. <sup>11</sup> Numa:la:, a magumulo epetapi Yu eponomola, ega:walo a epetapi Yu epoa: wiyasiya ale

\* **2:1:** Pentekose Soliyomu Yu epate dosiyodilonaka ebena mabu ma kunula. Ibino Aduga:la Soliyomu dolopoligonako, 50 egela walogabo apuamo iba:te me soliyomu idi kosiyodilonaka. Ebe Soliyomu tetelo iba:te palino witi-laiso otele wagilimi tanalo eba malagidilolo ibino kalakala Godotamo ebema: adipatenaka, mabu ibi iyatawala iba:te Godogodone wade walubi tanalo elawiya.

iba:godone nani Godo amamate tanalo lawiyama:, iyo, a epetapi Kuliti opo epola ega:walo epetapi Ala:biya opo epola, ebema: me epate Godokono kawokawo osiyodilole tanaloma: degelita, ale aimano iyaiya tabonomamo beda:ma: kolowiutama:?" <sup>12</sup> Ebe mabuma: ibi bilibilinomate anoanolo woki bilibilima: eba eda:olo, idite iditamo genaki, idite iditamo genaki, eba kunu wagelitiya, "Eiye! Me tanalono magumu keba kunula:ka:?"

<sup>13</sup> Wiyasiya epetapiate Ya:sukono alibolepi dubu eba kalakalatelelo negeliya, "Me dubate elawo da:imi obo niote da:ugulamole, ebema: daedaleuta!"

*Pitate Ya:sukono Wade Tabo Da:kiyawaiya*

<sup>14</sup> Ebene Pitate 11 alibolepi dubu epetapiago maigate ebeno tabo madodo unamo eba adipatelo epo bilibilinomatamo ma kunu kiyawaiya, "Naimano Yu namutupiala:, ega:walo la: epetapi Yelusalemamo da:pelamola:ima la: bilibilinomo atumu, nale me tanalono magumu la:tamo kawokalimamo, ebema: modobola la: naimano tabo wadenomamo nolowiala:. <sup>15</sup> Me dubu la:le elawo da:imi obo nioma: degelawitama, ebe tabo nanitaboa:. Iba:te elawo da:imi obo ka:niaka:, mabu nanitabola, dubate elawo da:imi obo duiyalo ka:nionakoa:. Numa:la:, egela ka:ma: podoluta! <sup>16</sup> Wiyasiya me tanalo ebe Godokono woki awokalimidawa Yowelate dopamo da:kiyawaiya, ebe tabola. <sup>17</sup> Iyo, Godote Yowelado tabo ma kunu giya,

'Me opono uwomu tetelo

na Godote naimano Uliyana epo  
bilibilinomono unamo kadipanamamo.

Ebe tetelo la:imano koikoila buwelemelela,  
iba:te naimano woki nanitabolo kawokalima:na:,  
ega:walo la:imano oli ape dubuno balidite  
iyama: eda:olamete  
kawokawo tanalo kulamolema:na:,  
ega:walo la:imano kadelekadela:te atumu  
iyolo naimano iyaiya tanalo kiyatawaoma:na:.

<sup>18</sup> Iyo, nanitabola, ebe egelalo  
naimano wiya: wokopi dubula kamiyalela,  
nale ibi unamo naimano Uliyana dadipanamo,  
iba:te naimano woki nanitabonomolo  
ebo kawokalilaema:na:.

<sup>19</sup> Ebene nale tobolo unulo  
kawokawo anoano tanalo kosiyodilolemamo,  
ega:walo me opolo nale atumu  
weweda: tanalo eba posiyodilolelo,  
epate kalima ka:ka:liya tanalo  
ega:walo ela ega:walo ela tema kulaema:na:.

<sup>20</sup> Ebe tetelo egelate kidokomene,  
ega:walo saganate kalimakalimanomoma: keda:mene,  
ebene Kawodawano Kawo Egelate  
kawo alonomago ka:pemaigamene.

<sup>21</sup> Ebema: nanitabola,  
piyate Kawodawano mailo deka:ima:na:  
Godote ibino igilo ebo ka:mula:lelaemene.' "

<sup>22</sup> Ebene Pitate tabo moga:melo walo na:kegiya, "La: Isalaela epala:, la: me tabo wadenomamo nolowiala:. La: iyatawanomolata, me Nasalete

duliyomolodawa Ya:suko Godote me opamo palibiya, mabu Godote ebedo kawokawo anoano tanalo ega:walo weweda: tanalo la:godolo eba posiyodilolelo ebena elawo apawokalimi. <sup>23</sup> Nanitabola, me opo kawonomolo tanalo idite pemaiga:no Godote ebe tanalo dopamo kiyatawamene. Ebema: ebena mulo iyatawa tanalodo ebete nopo ma kunu iyatiya, ebete Ya:suko la:imano kotamo iyatite, ebene kuba osiyodilolepiate la: eba walubililo la:le ebe lawa:wete kewa olotowamo tupuguima:wete ikoko ebo anagilamoleimata, iyo, la:le ebe me gabodo anakapuimata. <sup>24</sup> Wiyasiya Godote Ya:sukono a:e temeteme palamilimite ebe a:e magumune ebo adipati, mabu a:ete ebe laema: elawo puliyala. <sup>25</sup> Ebe mabuma: Da:ibidite Godokono elawamo Ya:sukono tanaloma: tabo ma kunu akuloliya,

‘Na Kelisote naimano Kawodawa Godoko  
na niyakabonomolo uminamo,  
iyo, ebete naimano tumudi apulo utina  
nale alegaokapoma:.

<sup>26</sup> Ebema: naimano tepo magumute eba maenalo,  
nale kawo kalakalago kiyawaonakomo,  
iyo, nale Godoko nanitabokobi midi magumulo eba okolinalo,  
naimano apeno a:e tanaloma: nale woki bilibilima: a:keda:mo.

<sup>27</sup> Mabu, Godo, a:ma:le naimano ape  
a:elaopino opolo akatepaemene,  
iyo, a:imano Talena Gudute da:emene,  
a:ma:le ebena abale tanalo odiyobawete  
ebe igilamo walo kakadipatema:ta.

<sup>28</sup> Nanitabola, a:ma:le na igilo gabo iyalo iyatunamiyata,  
ebene nale a:imano ololo apuamo da:pemaigamo,  
a:ma:le natamo kawo kalakala kikanaema:ta.’ ”

<sup>29</sup> Ebene Pitate tabo moga:melo walo na:kegiya, “Ekakiala:, na ilipoa:no aimano ewono Da:ibidikono tanalo awokalima: la:tamo ka:kiyawaomamo. Ebete me tabo Godokono Bukamo dakuloliya ebena tanaloma: kakuloliya:, mabu numa:la:, ebete da:iya iba:te ebe bobamo iyatiya, ebene ka:lo ebena bobote agodolo bitamena. <sup>30</sup> Da:ibidiko ebe Godokono woki awokalimidawa idila. Ebe mabuma: Godote ebena mailamo nani tabonomo Da:ibiditamogeya, ebete ebo iyatawiya Godote ebena walone gudi magumulo idi kapiya lawete ebena Kawo Elawodubuno okoli baiamo kadipimene. <sup>31</sup> Ega:walo Kelisote walone tetelo a:e magumune demaigamene, ebe tanalo pemaiga:no dopamo Da:ibidite Godokono elawamo dumiya, ebe tanalono tabo ebema: ebena Bukamo ma kunu akuloliya,

‘Godote ebe a:elaopino opolo akatepamene,  
ega:walo ebe bobo magumulo akabalemene.’

<sup>32</sup> Nanitabola, Da:ibidite me tabo Kelisokono tanaloma: akuloliya, iyo, me Kelisoko ebe Ya:sutela, Godote ebe a:e magumune dadipati ale aimano balidinomamo ebe ebo uima:, <sup>33</sup> ega:walo me Ya:suko Godote ununomamo adipatete ebena tumudi apuamo gito owodimi. Ebema: numa:la:, Nabiwi Godote a nanitabokobi midipiatamo ikaeaema: nanitabolo degiya, ebe kalakala tanalote ka:lo a:pemaiga. Nanitabola, ebete Ya:sutamo Talena Uliyana iyalo ikami, ebema: ebete ka:lo a unamo ebena elawo

adipana, iyo, la:imano galamo dolowiawitama ega:walo la:imano balida:mo duma:witama me ebe tanalola.

<sup>34</sup> “Ebema: la: me tanalo wadenomamo nemalagidilala:, Ya:sute Godokono Unu Duliyomolamo keba kunu ka:nodolile, Da:ibidite eba kunu kanodoliya:. Ebe mabuma: Da:ibidite Ya:sukono tanaloma: Godokono Bukamo tabo idi walo ma kunu kakuloliya,

‘Kawodawa Godote naimano Kawodawa Kelisotamo nege,

‘A:ma: naimano tumudi apuamo na:pokoliya,

<sup>35</sup> ebene a:ma:go gowelaopi  
nale ibi a:imano agowa puti  
baima: ka:midilimamo.’’

<sup>36</sup> “Ebema: la: Isalaela epo bilibilinomala:, modobola la: iyatawanomo niyatawala:, la:le me Ya:suko kewa olotolowamo da:tupuguima:ima, Godote ebe kapiya lawete aimano Kawodawama: ega:walo aimano Kelisoma: a:midi!”

<sup>37</sup> Ebene tabo olowiopiate Pitakono tabono tanaloma: kawo tepo teme-teme eba lawitalo, ebe ega:walo alibolepi epetapi dubatamo negeliya, “Naniala:, a beda: tanalo na:kosiyodiloma:?”

<sup>38-39</sup> Pitate wiyasiya negiya, “Modobola la: la:imano tepo magumuno woki iyakobi midila:wete la:imano kuba osiyodilole magumune nolobila:la:, ebema: ale la: Ya:su Kelisokono mailamo obamo kowaduba:midaolema:ta. Ebene Kawodawa Godote la:imano kuba egebolelametate eba dodolomatililamelolo, ebete ebene Uliyana nilakapolo la:tamo gito kapalibomene. Iyo, la: ega:walo la:imano gudi ega:walo iyaiya mulu opolo dilukuliona ebe epo atumu, la: bilibilinomo magumulo ebete kebe epo ebetamo pelaema: deka:la:mina ebete iba:tamo ebene Uliyanano elawo kikalaemene, dopamo nanitabolo keba kunu kegiyale eba kunu.”

<sup>40</sup> Ebene Pitate makomako tabo epetapi bilibilinomo eba kiyawaolamelolo ibi kawiya ma kunu analiya, “Me opolo kuba osiyodilole magumulo dowapata:lamena, la:le ebe epono taneba magumune nemaimiala: la:imano igilo mula: tanalo kelawa:ema:!” <sup>41</sup> Ebe tetelo piyate ebene tabo dolowiya ibi epetapi bilibilinomate nanitabokobi midite, ebene Ya:sukono alibolepi dubate ibi obamo ebo waduba:midaoliya. Nanitabola, ebe egela kapiyalo 3,000 epate nanitabokobi midi magumulo iba:go kapiyama: eda:iya.

### *Nanitabokobi Midipino Ilukuli Tanalo*

<sup>42</sup> Ebene egela epetapi bilibilinomolo nanitabokobi midipiate ibino alad-abuti tanalo katepanakia:, iyo, iba:te kapimiya alibolepi dubuno iyatulame tanalo olowionakiya ega:walo Ya:suko malagidilo bae naonakiya ega:walo Godotamo towetowe tabo akogelanakiya. <sup>43</sup> Nanitabola, Godote alibolepi dubudo anoano tanalo ega:walo weweda: tanalo bilibilinomo dosiyodilole-naki, ebema: epo bilibilinomagodolo kawo tolenomote itanami. <sup>44</sup> Ega:walo me tanalo idila, nanitabokobi midipiate woki kapiyama: eba eda:olo, ibino inamabu bilibilinomo kapiyama: midilite, ebe inamabuamo idite idi walubinaki, idite idi akowalubinaki, eba kunu wagenamiya. <sup>45</sup> Ebema: iba:godolo iyaiya modoboa: tanalo demaimionakiya, ebe tetelo idawate ebene pali opo maniamo nimidinaki, idite ebene inamabu idi maniamo akonimidinaki, iba:te ebe gabodo mani duwateonakiya nigologolopi ebo walubilinakiya.

<sup>46</sup> Ega:walo nanitabokobi midipiate iyaiya egela bilibilinomo epetapilo Godoko Amamateno Iya Motamo paladabutinakiya, ebene iba:te walogabo

apune ibino motamo da:ka:tolamenakiya, egege aladabuti magumulo ibino bae eba alabaolo kalakala kawonomago ebo naonakiya. <sup>47</sup> Nanitabola, iba:te me osiyodilole tanalodo Godokono mailo unamo eba adipatenalo, epo epetapi bilibilinomate ibino tanaloma: wadewade tabo ebo gelanakiya. Ebe tetelo Godote kebe epo dopamo deka:la:mioliya, ebe epate ibino igilo mula: tanalo ebegodone kelaema:, iba:te iyaiya egela epetapilo nanitabokobi midipiatamo da:pelamenakiya, nanitabokobi midipino uwomute unamo ebema: nodolonami.

### 3

#### *Pitate Ya:sukono Elawamo Agowa Tatai Dubu Wadekobi Da:midini*

<sup>1</sup> Egela idilo egelate kela:mo da:niwisigatepani, ebe tete ebe 3 koloko tetela, Pitako ega:walo Yoneko iba:te Godoko Amamateno Iya Motomo Godotamo towetowe tabo gelanama: toniya. <sup>2</sup> Ebe tetelo dubu idite ebolo nokoliti, ebete menokono tepo magumune agowa tatai eba kunu pawokaliya. Ebe mabuma: ebena namutupiate tete epetapi bilibilinomolo ebe Godokono Motamo aguwaenakiya, ebete kala ga:dimi tetelo ditana ebe Wade Ololo mailagono gigiyulo pokolite epo manima: ebo ka:petoweolamitanakoma:. <sup>3</sup> Ebene Pitako Yoneko iba:te Godoko Amamateno Iya Moto guamo ka:nopila:nama: eba tonalo me dubute ibi manima: ebo toweolameni. <sup>4</sup> Wiyasiya ibi netewapiate ebe balidi kodakodamo eba umionalo, Pitate ebe nanani, “A:ma: a nuama:.”

<sup>5</sup> Ebene ebe dubute ibi netewapi eba ulamenalo nemalagidiloni, “Iba:te natamo mani kikanamonema:na:.”

<sup>6</sup> Ebe tetelo Pitate ebetamo negeni, “Nagodolo mani idi kitana:, wiyasiya nagodolo tanalo idite bitana a:ma:tamo ikaema:. Nale a:ma: Ya:su Kelisoko Nasaletе duliynomolodawano mailamo anamata, a:ma: maigawete nepata:!”

<sup>7</sup> Ebene Pitate ebe dubu tumudi apu kotone lawenate dadipatini, ebena agowate ebe tetenomolo wadekobi olowiomeniya. <sup>8</sup> Ebema: ebete unamo pateganate pata: ebo wagilimini, ebena ebete pategaago ega:walo Godoko moiago ebe Amamateno Iya Motono kala magumamo Pitako Yoneko iba:go gito nopila:oniya.

<sup>9-10</sup> Ebene ebete ebamo da:nopegani, epo bilibilinomate ebe uminate negelaniya, “Eiye! Me ebe agowa tatai dubula, ebete tete bilibilinomolo Wade Ololo mailagono gigiyulo okolite manima: toweolamitanaki!” Nanitabola, iba:te ebe dubunomo uminiya, ebete agowa wadenomamo putionalo ega:walo ebete Godoko moiago depata:ni, ebema: iba:te kawonomamo eba anoanonalo nipo malagidiloniya me tanalote ebetamo keba kunu kemaigale.

#### *Pitate Godoko Amamateno Motolo Ya:sukono Wade Tabo Da:kiyawaoni*

<sup>11</sup> Godoko Amamateno Motolo tanatimi idi itanami, epate ebe tanatimi Solomonokono mailamo ka:minakiya, ebena Pitako Yoneko iba:te ebamonutiate, ebe dubute ibino koto eba uwatelelamenalo epo bilibilinomate kawo anoano tanalago pipuila:oniya. <sup>12</sup> Ebene Pitate epono tanalo uminate iba:tamo tabo na:kiyawaoni, “La: Isalaela opo epala:, la: beda: mabuma: a uamelo kawonomamo danoanoawenama? La: beda: tanalo kemalagidilawenama? Ale a:ka:tuwa: aimano elawamo ega:walo aimano tuputupu ilukuli tanalamo me dubu wadekobi midima: kegelawenama?”

<sup>13</sup> Ao, ale kosiyodiloa:! Wiyasiya A:ibalayamako, Aisa:keko, Ya:ikoboko, ega:walo aimano ewoni epetapiate damamatenamiya, ebe Godote me tanalo a:ka:tuwa: osiyodilo ebena Wokodawa Ya:suko kowalagonama:.



Numa:la:, la:le ebe anakapuima: Paeletetamo demagataima, ebe tetelo Paeletete la:imano koto magumune ebe gito kaliboma: ubi diyati, wiyasiya la: ebena ololo apulo Ya:suko ginima:mo eba iwutilo ubia:noma: gelimata. <sup>14</sup> Iyo, me gabodo la:le wade tuputupu lumagitamo ubia: tanalo eba awokalimilo, wiyasiya Paeleteko nanimata ebete epo anakapulamedawa Balabasiko ebena kuba wiyane gito kaliboma:. <sup>15</sup> Ebema: epatamo igilo dikalamena la:le ebe Kawodawa anakapuimata, wiyasiya Godote ebe a:e magumune igilamo walo akadipati, iyo, me tanalo ale aimano balida:mo duima: a ebema: gelanama:. <sup>16</sup> Ebema: nanitabola, me dubu la:le duma:wenama ebena agowa Ya:sukono elawo mailote wadekobi a:midilimi. La: iyatawanomolata ebete dopamo kebe temeteme magumulo kokolinamile, wiyasiya Ya:sugodone da:pena ebe nanitabokobi midi tanalodo ebete la: bilibilinomono ololo apulo wadekobi olowi.

<sup>17</sup> “Ebema: naimano ekakiala:, na iyatawala la: ega:walo la:imano watowatopiate Ya:sukono nanitabo tanalo iyatawaoa:no ebetamo iyaiya kuba tanalo ebo osiyodilolimata. <sup>18</sup> Wiyasiya ebe tanaloma: woki bilibilima: akoeda:oala:, mabu iyalo tetelo Godote ebena woki awokalimipi bilibilinomagodone dawokalimiya, ebe tabono nanitabo tanalote la:imano osiyodilole tanalodo apawokali, iyo, ma kunu ebena Alibodawa Kelisote la: epono kotone kawokawo temeteme uwati. <sup>19</sup> Ebema: modobola la: la:imano tepo magumuno woki iyakobi midila:wete Godotamo nolobila:la:, ebena ebete la:imano kuba egebolelametate ka:dodolomatililaema:ta. <sup>20</sup> Me gabodo tete bilibilinomo epetapilo la:imano tepo magumu elawokobi midi tanalote Kawodawa Godokono ololo apune ba:penakomene, ega:walo Godote la: mabuma: Ya:suko walo kakapalibomene, iyo, Godote iyalo tetenomolo ebe ebena Alibodawa Kelisoma: ka:miya. <sup>21</sup> Nanitabola, ebete Godokono Unu Duliyomololo nokolinamene ebena pe uwomuamo, wiyasiya ebete da:pemene ebe tetelo ebete tagalatagala tanalo bilibilinomo eba popoliyalelo olioli tanalo kapalomomene, Godote ebena talena woki awokalimipido dopamo keba kunu kawokalimiyale eba kunu.

<sup>22</sup> “Numa:la:, Mosesete Kelisokono tanaloma: dopamo ma kunu giya, ‘La:imano Kawodawa Godote la: ka:powalubilitama: na keba kunu kapaliboniyale, ebete eba kunu ebena Iyanomo Woki Awokalimidawa idi la:godolo kadipatemene. Ebema: ebete kebe iyaiya tanalo la: diyatulametamene, modobola la: ebe tabo bilibilinomamo na:tudila:iyala:, <sup>23</sup> mabu la: magumulo kebe lumagite ebena tabo olowia:no, Godote ebe nanitabokobi midi epagodone iyabaiamo eba a:midalo ebo ka:kubaimene.’”

<sup>24</sup> Ebene Pitate walo na:kegeni, “Ega:walo me tanalo idila. Mosesekono walogabo apune Godokono woki awokalimipi epetapi bilibilinomate ibino tabo kiyawao magumulo me teteno iyaiya tanalo awokalilamenakiya, Sa:miyolokono tetene wagilimite me teta:mo pemaiga. <sup>25</sup> Ebema: numa:la:, Godote la:imano ewoniatamo kebe nopo nanitabolo diyatiya, ega:walo ebete ebena woki awokalimipido kebe wadewade tanalo la: walonepi mabuma: kosiyodilolema: da:kiyawaonaki, la: me tetelo ebe tanalo bilibilinomo kuwatemamota. Iyo, Godote la:imano ewono idi A:ibalayamatamo ma kunu kiyawaiya, ‘Nale a:imano waledawagodolo me opo kawonomolo dilukuliona ebe epono taneba bilibilinomo wadenomamo bowalubilinakomo.’ <sup>26</sup> Me ebe mabuma: Godote ebena Wokodawa Ya:suko adipatete la: Yu epatamo dopamo palibiya, iyo, ebe ubila Ya:sute la:imano kawokawo kuba osiyodilole magumune la: eba oba:midalelo wadenomamo kowalubilitanama:.”

## 4

*Yu Watowatopiate Pitako Ega:walo Yoneko Idoko Motamo Dalomoniya*

<sup>1</sup> Ebene Yonete ebe eba walubinalo Pitate tabo kiyawao magumulo adimo apuamo da:nemaigani, ebe tetelo Godotamo kalimagono ikameopi, ega:walo Godoko Amamateno Moto atila:pino watodawa, ega:walo Sa:diyusi tanebapi epetapi, ebe kawokawo dubate ibi ka:podiyobolenama: ebo pelameniya. <sup>2</sup> Nanitabola, iba:te Pitako ega:walo Yoneko iba:tamo kawonomamo dowao niya, mabu ebe alibolepi dubu netewate epo ma kunu iyatulameniya, Godote Ya:suko a:ene igilamo adipatiya. <sup>3</sup> Me mabuma: ebe kawokawo dubate Pitako ega:walo Yoneko uwatenate idoko moto guamo gito nalomoniya, mabu ebe tete ebe nadimoni, ega:walo ibi ubila egela idi powalolo ibino tanalo wadenomamo kanagiyamidalaema:. <sup>4</sup> Wiyasiya piyate Pitakono tabo dolowioniya ibi magumulo epetapi bilibilinomate nanitabokobi a:midiniya, ebe tetelo nanitabokobi midipino uwomu ebe 5,000 epoma: eda:niya.

*Yu Epono Ka:nisolo Dubate Pitako Ega:walo Yoneko Ibino Iyatulame Tanaloma: Kawiya Danaliya*

<sup>5</sup> Ebene egela idilo Yu watowatopi, ega:walo Godokono Totomu tabo iyatulamepi, ega:walo Yu epono kawokawo dubu epetapi, ibi bilibilinomate Yelusalema kawo duliyaomolamo pelamete ebo paladabutiya. <sup>6</sup> Ebe tetelo ibino taneba magumulo me kawokawo dubate na:pola:niya — A:nasiko ebe Godotamo kalimagono ikameopino Unu Watodawanomola, ega:walo Kayapasiko, Yoneko, A:lesandako, ega:walo A:nasikono atu alailame dubu gudi epetapi. <sup>7</sup> Ebene iba:te Pitako ega:walo Yoneko ibino dopo apuamo magaelete ibi ebo alateda:liya, “La:le dutu adimolo me dubu wadekobi da:mida:wenima, kebako elawamo ega:walo pokono mailamo wadekobi ka:mida:wenima?”

<sup>8</sup> Ebema: Godokono Uliyanano elawote Pitakono tepo magumu detabokiya, ebete ibino tabo eba wiyalo negiya, “Naimano epono watowatopi ega:walo kawokawo dubala:, la: nolowiala:. <sup>9</sup> Me agowa tatai dubute wadekobi dolowini, la:le ebena tanalo uma:wete a ebema: kalateda:witama wade tanalote ebetamo keba kunu ka:pemaiganile? <sup>10</sup> Aimanu watowatopiala:, modobola la: ega:walo Isalaela opo epo bilibilinomo atumu, la: bilibilinomate me tabo wadenomamo niyatawala:. Ka:lo la:imano ololo apulo wadenomamo dutita, me dubute Ya:su Kelisoko Nasaleta duliyaomolodawano elawamo wadekobi olowini. Numa:la:, me Ya:suko ebe la:le kewa olotolowamo da:tupuguima:ima ebe dawala, wiyasiya Godote a:ene igilamo ebe walo akadipati. <sup>11</sup> Nanitabola, Godokono Bukate ebena tanaloma: ma kunu gena,

‘La: moto etepiate  
iyabaiamo diyata:ima,  
ebe alote wiyasiya  
motonu elawo mabuma: eda:na.’

<sup>12</sup> Ebema: numa:la:, Ya:suko kapiyate modobola epono igilo mula:lalaema:, me opo kawonomolo lumagi idi puliyala. Iyo, Godote Ya:sukono elawo mailo kapiya atamo ikaeami, ebema: modobola ale igilo mula: tanalo ebe kapiyagodone kelaemalema:.”

<sup>13</sup> Ebene Yu watowatopiate iyatawaiya Pitako ega:walo Yoneko ibino tabo gela tanalo wadenomola, tole tanalo puliyala, wiyasiya iba:te

sukulamo ka:tiya:. Me mabuma: iba:te anoanolo ibino tepo magumulo negeliya, “Nanitabola, me netewapiate Ya:suago wapata:namiya, ebema: diyala, iba:te ebegodone me wade iyatawa da: elawiye.”<sup>14</sup> Ebe tetelo dopamo agowa tatai dubute dokolinami, ebete Pitako ega:walo Yoneko ibi niyakabolo dutiti Yu watowatopiate ebe umiya, ebene iba:te ebe dubuno wade tanalo umilo kuba tabo gelama: gabo nipo wadiya.<sup>15</sup> Ebema: Yu watowatopiate ibi netewa-kapiya nanaliya iba:te ebe taneba magumune ka:nemaimioma:, ebene iba:te iba:godone da:nemaimiya Yu watowatopiate a:ka:tuwa: tabo ma kunu geliya,<sup>16</sup> “A Pitako Yoneko iba:tamo beda: tanalo na:kosiyodiloma:? Iba:te kebe anoano tanalo kosiyodiloni Yelusalema epo bilibilinomate ebe tanalono nanitabo tanalo iyatawaiya, ebema: me tanaloma: a modoboa: a:da: tabo gelama:.”<sup>17</sup> Wiyasiya a ubia:nola ibino mulo osiyodilo tanalote Yelusalemane iyaiya epo epetapiatamo ka:toma:, ebema: modobola a ibi kawiya analete talena kiyatilaemalema: iba:te Ya:sukono mailamo walo a:kegelanakoma:na:.”

<sup>18</sup> Ebema: iba:te Pitako ega:walo Yoneko walo iba:tamo keka:la:mite ibi kawiya ma kunu analiya, “La: epo iyatulamelolo Ya:sukono mailamo tabo walo akogelanakala!”

<sup>19</sup> Ebene iba:te ibino tabo eba wiyalo negeliya, “Modobola la: me tanalo a:ka:tuwa: nemalagidilala:. Ale la:imano tabamo ba:ka:tudila:ma: o Godokono tabamola:ka? Godokono ubi keba kunula:ka? <sup>20</sup> Ebema: numa:la:, ale kebe tanalo kolowima: ega:walo kebe tanalo kulamolima:, a ebe iyaiya tanaloma: tabo kiyawao akatepama:.”<sup>21-22</sup> Ebe tetelo Yu watowatopi ubila kuba wiya iba:tamo kikalaema:, wiyasiya iba:te gabo nipo wadiya mabu epo bilibilinomate Pitako ega:walo Yoneko ibino wade osiyodilo tanalo iyalo olowiya. Iyo, iba:te Pitako Yoneko mabuma: Godoko nemoiutiya, mabu nanitabola, ebete ibido wadekobi da:midini ebe agowa tatai dubute 40 ulamamo ebe temetema:go okolinami. Ebene watowatopiate ebe tanalo eba iyatawaolo, iba:te tanalo idi osiyodiloa:no Pitako ega:walo Yoneko ibi kawiya walo kanalete ibino motamo gito aliboliya.

### *Nanitabokobi Midipiate Elawo Kelaema: Godotamo Da:towetoweiya*

<sup>23</sup> Ebema: Yu watowatopiate ibi gito daliboliya, ebe tetelo Pitako ega:walo Yoneko ibino nanitabokobi midipi namutupiatamo tote ibi ebo nanaliya, Godotamo kalimagono ikameopino ununomo watowatopi ega:walo kawokawo dubu epetapiate iba:tamo degeliya ebe tanalo.<sup>24</sup> Ebene nanitabokobi midipiate ebe tanalo olowite Godotamo ibino tabo madodo eba adipatelo kapimiya ma kunu geliya, “Aimano Kawo Elawodawa, a:ma:le a:ka:tuwa: Unu Duliyomolo ega:walo me opo kawonomo ega:walo iyaiya kewa: kolomo ega:walo inamabu bilibilinomo osiyodiloliyata.<sup>25</sup> Nanitabola, a:imano wokodawa Da:ibidiko ebe aimano ewono nabiwila, a:ma:le ebene tabone a:imano Talena Uliyanano elawamo tabo ma kunu kiyawaiyata,

‘Mabu keleka: nanitabokobi midia:piate  
Godotamo kawonomamo da:dowautiya?

Ega:walo me opo epate ebe kubaima:  
nopo beda: mabuma: kiyatiye?

<sup>26</sup> Iyo, me opolo kawokawo elawodubate  
ebetamo kuba osiyodiloma: lamota:oniya,  
ega:walo watowatopi dubate aladabutiya,  
iba:te Kawodawa Godoko ega:walo ebene Alibodawa Kelisoko

iba:tamo gowelao tanalo kosiyodiloma:’ ”

<sup>27</sup> Ebene nanitabokobi midipiate towetowe tabo gela magumulo walo na:kegeliya, “O Godo, nanitabola, a:imano Wade-talena Wokodawa Ya:suko a:ma:le a:imano Alibodawa Kelisoma: iyalo a:midiyata, wiyasiya Kawo Elawodubu Elodiko ega:walo Poniyase Paeleteko, iba:te me Yelusalema duliynomololo nanitabokobi midia:pi epetapi ega:walo Isalaela epago aladabutiya eba:go ka:gowelaoma:.” <sup>28</sup> Iyo, nanitabola, a:ma:le iyalo tetelo a:imano elawamo ega:walo wokiamo nopo diyata:wiyala, ebe npono nanitabo tanalote ka:pemaigama: iba:te aladabutite gowelao tanalo Ya:sutamano ebo osiyodiliya. <sup>29</sup> Ega:walo ka:lo, Kawodawa, iba:te atumu kuba atamo osiyodiloma: da:ka:kiyawauta, a:ma: nolowitata, ebema: modobola a:ma:le a a:imano wokopi elawokobi na:midia: ale a:imano tabo tolea:no ka:kiyawaoma:.” <sup>30</sup> Ega:walo modobola a:ma:le a:imano koto uwamidawete temetemete dulamena ebe epo wadekobi na:midioliyete, iyo, a:imano Talena Wokodawa Ya:sukono mailamo kawokawo anoano tanalo ega:walo weweda: tanalo a magumudo nosiyodiloliye.”

<sup>31</sup> Ebe tetelo ibino towetowe tabo gela tanalote dolopoligiya, iba:te da:pola:niya ebe motote ebo alegiya, ebene Godokono Uliyanate ibino tepo magumu eba tabokailamelo, iba:te toletoleoa:no Godokono tabo elawamo kiyawao ebo wagilimiya.

#### *Nanitabokobi Midipiate Ibino Inamabu Nilakapolo Dikameteuiya*

<sup>32</sup> Ebe tetelo nanitabokobi midipi bilibilinomono tepo magumuno tanalo ega:walo woki kapiyanomoma: eda:olamiya, ebema: ibino taneba magumulo idawate ebene inamabu ebenonomoma: kegenakia:, wiyasiya ibino inamabu bilibilinomo kapiyakobi midilite, ebe inamabuamo idite idi walubinaki, idite idi akowalubinaki, eba kunu wagenamiya. <sup>33</sup> Ebene Kawodawa Ya:sute a:e magumune demaigiya, alibolepi dubate ebe tabo kawo elawonomamo eba kiyawaonalo Godokono nilakapo tanalote ibi magumudo woko elawonomamo ebo osiyodilonami. <sup>34</sup> Ebema: nanitabokobi midipino taneba magumulo lumagi idigodolo modoboa: tanalote kitanamia:, mabu piyagodolo ibino moto ega:walo pali opo kawokawo da:pola:lamenami, iba:te epetapi maniamo eba nimidiolelo mani da:nuwatenakiya, <sup>35</sup> ebene iba:te alibolepi dubatamo nilakapolo ebo pikalamenakiya, iba:te ebe mani wadenomamo eba ulamenalo nigologolopiatamo ebo kikalamolema:.”

<sup>36</sup> Ebe tetelo Libai gu dawa Yausepeko Saipalase opodawala, alibolepi dubate ebetamo Banabasi mailo idi ikamiya, ebe mailono magumu nitana ‘Epono Tepo Magumu Gelebadilame Dawala.’ <sup>37</sup> Ebene ebe dubute ebene pali opo idi eba kunu maniamo atumu ka:nimidite mani uwatete alibolepi dubatamo nilakapolo gito pikalamiya.

## 5

#### *A:nanayasiko Ega:walo Sapailako Iba:te Godoko A:da: Demasigiya*

<sup>1</sup> Ebe tetelo dubu idi ebene mailo A:nanayasitela, ebete ebene kamiyalet Sapailago ibino pali opo idi maniamo nimidite, <sup>2</sup> ebene A:nanayasite mani uwatete apu eba powaminalelo apu wadaete alibolepi dubatamo gito pikalamiya. Nanitabola, ebete dosiyodiliya ebe tanalo ebene kamiyalet iyatawiya. <sup>3</sup> Ebema: Pitate ebetamo negiya, “A:nanayasa, beda: mabuma: a:ma: gigiyu Saitanatamo da:iyamidawa:ka? Numa:, ebete a:imano tepo magumamo opegate a:ma: detabokaimitaka, ebe tetelo a:ma:le pali opamo

duwata:wa:ka ebe mani apu eba powaminalelo Godokono Uliyana a:da: ebo pemasiga:kata. <sup>4</sup> Ebe pali opo a:ma:le maniamo midia: tetelo a:imanonomoma: eda:nami, ega:walo a:ma:le ebe opo maniamo eba midilo duwata:wa:ka ebe mani ebe a:imanonomola a:ma:le a:ka:tuwa: a:imano ubi tanalo kosiyodilola:ema:. Ebene a:ma:le a:imano tepo magumuno kuba woki lawa:wete me tanalo beda:ma: kosiyodilawa:? Nanitabola, a:ma:le me opo lumagi kemasiga:wea:, Godoko ebe masiga:ta!”

<sup>5</sup> Ebema: A:nanayasite ebe tabo olowite opamo adogelete a:enomo ebo a:iya, ebe tetelo me tanalo dolowiya ibi bilibilinomate kawonomamo toletoleutiya. <sup>6</sup> Ebene oli ape dubate pelamete ebena ape kalikamo pauputite ebo aguwatiya bobamo ka:niyatima:.

<sup>7</sup> Ebene egelate kela:mo da:nelegatepani, ebe tetelo A:nanayasikono kamiya:le na:piya, wiyasiya ebena awitamoma demaigiya, ebete ebe tanalo iyatawa:no Pitate da:luti ebe motamo gito popegiya. <sup>8</sup> Ebene Pitate ebe nalatediya, “A:ma: na nanana:, la: pali opo maniamo da:na:mida:wa:kama me maninomo kuwata:wa:kama?”

Ebete nowamiya, “Iyo, nanitabola, me ebe wiyanomola.”

<sup>9</sup> Pitate wiyasiya ebetamo negiya, “La: netewapi la:imano woki kapiyakobi beda:ma: ka:midila:wa:kama Kawodawano Uliyana a:da: kemasiga:ema:? A:ma: nolowia, a:imano awi bobamo da:niyata: ebe oli ape dubate gigiyu tetedo ba:pelamenapa:. Iba:te a:imano a:e ape atumu bobamo kakaguwatama:na:!” <sup>10</sup> Ebe tetenomolo ebe kamiya:lete Pitakono agowa mabuamo adogelete a:enomo ebo ka:iya, ebena oli ape dubate pelamete ebena a:e tanalo pumite, iba:te ebena ape aguwatate ebena awi kebamo ka:niyatiye ebe atu bobamo ebena awi niyakabamo gito ka:niyatiya. <sup>11</sup> Ebema: sosi epo bilibilinomoma ega:walo nanitabokobi midia:pi epetapi atumu, ibi bilibilinomate ebe iyaiya tanalo dolowiya kawonomamo ebo toletoleutiya.

#### *Ya:sukono Alibolepi Dubate Ebena Elawamo Anoano Tanalo Dosiyodilolenakiya*

<sup>12</sup> Ebe tetelo Ya:sukono alibolepi dubate epo magumulo anoano tanalo ega:walo weweda: tanalo bilibilinomoma osiyodilolenakiya, ega:walo nanitabokobi midipi bilibilinomate akaladabutinakiya Godoko Amamateno Iya Motono tanatimi ida:mo, ebe tanatimi Yu epate Solomonokono mailamo ka:minakiya. <sup>13</sup> Ega:walo ebe tetelo epo bilibilinomate nanitabokobi midipino tanaloma: wadewade tabo degelanakiya, wiyasiya ibi epetapiate ibino watowatopino dowo tanalo kawonomamo malagidilolo iba:go aladabutima: na:toletoleonakiya. <sup>14</sup> Ebema: Godokono Uliyanate epo magumulo woko eba osiyodilonalo egela idilo dubu ega:walo kamiya:le epetapi magaelenaki, egela idilo epetapi kemagaelenaki, ibi bilibilinomate eba kunu Kawodawa Ya:suko nanitabokobi midilo ebe waloma:tapiago kapiyama: ebo peda:iya. <sup>15</sup> Ebene epate ibino temetema:gopi patapatago ega:walo ketago demagaelenakiya Pitakono peto bai gabo niyakabamo ebo powadilatilinenakiya. Iba:te ma kunu malagidilonakiya, Pitate da:petomene ebena ulite ibi eba pa:mula:lenatolo temetema:gopiate wadekobi ebo kolowioma:na:. <sup>16</sup> Ebema: Yelusalema kawo duliyaomolo niyakabolo da:pola:namiya ebe egege duliyaomolone epo epetapi bilibilinomate ibino iyaiya temetema:gopi ega:walo kuba uliyanagopi demagaelenakiya, ibi bilibilinomate wadekobi ebo polowionakiya.

#### *Yu Watowatopiate Ya:sukono Alibolepi Dubatamo Gowela Tanalo Dowagilimiya*



<sup>17</sup> Ebene Godotamo kalimagono ikameopino Unu Watodawanomo ega:walo ebena opopi, ibi Sa:diyusi tanebapila, iba:te kawo dowa tanalo wagilimiya mabu epo epetapi bilibilinomate Ya:sukono alibolepi dubatamo kawonomamo kalakalautiya. <sup>18</sup> Ebema: iba:te alibolepi dubu uwatete idoko motamo gito alomiya, <sup>19</sup> wiyasiya ebe idokolo Kawodawa Godokono nopodawate penate idoko motono kawokawo gigiyu pa:ilamenate ibi wagailinate iba:tamo negeni, <sup>20</sup> “La: tolama:wete Godoko Amamateno Motolo nutitatawete epatamo me oli ilukulino tanalo bilibilinomoma: tabo na:na:kiyawaiyala:.” <sup>21</sup> Ebema: alibolepi dubate me tabo olowinate, duiyanomolo Godoko Amamateno Iya Motamo nodolote epo ebo niyatulamitiya.

Ebene ebe tanalo iyatawaoa:no Godotamo kalimagono ikameopino Unu Watodawanomo ega:walo ebena opopi, iba:te Yu epono kawokawo dubu epetapi ka:la:mite, ebene ebe Ka:nisolo dubu bilibilinomate dupaladabutiya Godokono Moto atila:pi epetapi ebo naliboliya Ya:sukono alibolepi dubu idoko motone iba:tamo kemagaelema:. <sup>22</sup> Wiyasiya iba:te idoko motamo da:tolamiya alibolepi dubu idoko moto gulo nipo noliya, ebema: iba:te gito ka:pelamiya Yu epono Ka:nisolo dubu kapanalema:. <sup>23</sup> Iba:te tabo ma kunu pegeliya, “Ale idoko moto gigiyu kodakodailame pola:nalo nulaema:, ega:walo ebe moto atila:pi dubu atumu niyakabolo eba lamota:onalo ebo ka:nulaema:, wiyasiya gigiyu da:na:ilaema: ebe tetelo ale moto gulo lumagi idi ka:numia!” <sup>24</sup> Ebene Godokono Moto atila:pino watodawa ega:walo Godotamo kalimagono ikameopino watowatopi iba:te ebe tabo dolowiya woki bilibilinomoma: eda:iya, mabu ebe tanalote keba kunu kemaigiyale iba:te nipo malagidiloliya.

<sup>25</sup> Ebe tetelo dubu idite pete iba:tamo na:pegiya, “Eiye, nolowiala! La:le idoko motamo dalomaima, ebe dubate Godoko Amamateno Motolo epo biyatulamita!”

<sup>26</sup> Ebene atila:pino watodawate ebena opopiago Godoko Amamateno Motamo tolamete Ya:sukono alibolepi dubu ebo nadabuliya Yu epono Ka:nisolo dubatamo kemagatalema:. Iba:te wiyasiya ibi elawamo ka:nuwatiya: mabu iba:te toletoleolo ibino tepo magumulo negelitiya, “Diyala, epono taneba magumulo piyate me dubatamo dekalakalaona, iba:te atamo kawonomamo dowaote a kanakapuaema: nokolamo da:bemapeaema:na:.”

<sup>27</sup> Ebene iba:te Ya:sukono alibolepi dubu Ka:nisolo dubatamo demagataliya, iba:te ibino dopo apulo eba lamota:onalo Godotamo kalimagono ikameopino Unu Watodawanomote ibi nanaliya, <sup>28</sup> “Ale la: dopamo elawonomamo analiata la:le Ya:sukono mailamo akoiyatulamenakala:, wiyasiya la:le dosiyodilawenama ebe kuba numa:la! La: negelanamata a watowatopiate Ya:suko kuba gabodo anakapuima:, ebene me la:imano iyatulame tanalote opo kawonomamo tote Yelusalema duiyomolopi bilibilinomate olowiya!”

<sup>29</sup> Ebene Pitako ega:walo alibolepi dubu epetapi, iba:te ebena tabo eba wiyalo negeliya, “Ale Godoko kapiyatamo ba:tudila:onakoma:, epetapiatamo:!<sup>30</sup> Nanitabola, Ya:suko la:le kewa olotolowamo tupuguima:wete ebo anakapuimata, wiyasiya aimano ewoniate damamatenamiya ebe Godote ebe a:ene adipati, <sup>31</sup> ebene ebete ebe ebena tumudi apuamo adipatete epono Watodawama: ega:walo Igilo Mula:lamedawama: ebo midi. Me osiyodilo tanalodo Godote Isalaela epatamo wade tete ikalami, iba:te ibino woki iyakobi midilite ebetamo eba olobila:lo ebete ibino kubakuba

osiyodilole tanalo ebo kegebolelaema:.<sup>32</sup> Mabu ale me tanalo aimano bal-ida:mo dulaima:, ale ebema: gelanama: ega:walo a magumudo Wade-talena Uliyanate atu tanalo ebe kawokalilamena. Nanitabola, piyate Godotamo da:tudila:ona, ebete ebena Uliyanano elawo iba:tamo nikalamena.”

<sup>33</sup> Ebene Yu epono Ka:nisolo dubate ebe tabo olowite kubanomamo eba dowaoalo Ya:sukono alibolepi dubu anakapulaema: tabo ebo geliya.<sup>34</sup> Wiyasiya ibino taneba magumulo Pa:lisi tanebadawa idi ebena mailo Gameliyelatela, ebe Godokono Totomu Tabo iyatulamedawa idila ega:walo epo bilibilinomate ebena mulo tanaloma: ebe nowalagonamiya. Ebe tetelo ebete maigate tabo ma kunu giya, iba:te alibolepi dubu Ka:nisolo magumune wagailite tete da:peso balalo ka:na:pola:nama:.<sup>35</sup> Ebene alibolepi dubate iba:godone da:nemaimiya, Gameliyela Ka:nisolo dubatamo negiya, “La: Isalaela dubala:, me dubatamo kuba idi osiyodiloa:no dopamo la:wadenomamo nemalagidilala:.<sup>36</sup> Mabu la: iyatawalata, dopamo Tiyudasiko dokolinami ebe a:ka:tuwa: ebe kawoma: genaki, ebena ebetamo 400 dubu epetapiate aladabutiya. Wiyasiya numa:la:, gabamanino gowelaopiate ebe danakapumiya ebena tanebapiate iyaiya eba alautiolo ebena tanalote ebo olopoligiya.<sup>37</sup> Ebene walone tetelo epate ibino mailo gabamanino bukamo dakuloliya, ebe atu ulamalo Ga:lili opono dubu idi Yudasite ebo kemaigiya. Ebete epo epetapi bilibilinomo ebetamo ka:la:mite eba kunu eba wagelelo, wiyasiya gowelaopiate ebe atumu ebo kanakapumiya, ebema: ebena tanebapiate atumu iyaiya gito kalautiya.<sup>38</sup> Ebema: numa:la:, ka:lo ale me dubuno tanalo danagilamelelamitama:, ibino tanaloma: nale la: analemata, la:le iba:tamo tanalo idi ako-osiyodilala:. Ibi na:miyapala:, mabu ibino tabo gela tanalo ega:walo woko osiyodilo tanalo ibi a:ka:tuwa: ibino elawamo dosiyodilolenaka ebe tanalote a:ka:tuwa: kolopoligomene,<sup>39</sup> wiyasiya ibino woko osiyodilo elawote Godogodone da:penale, ebema: la:godolo elawo kitana: ibi odiyobolema:. La: nanisiwale, la: Godotamo gowelaopima: da:beda:oma!”

<sup>40</sup> Ebene Yu epono Ka:nisolo dubate Gameliyelakono tabamo gito tudila:iya. Iba:te Ya:sukono alibolepi dubu ibino dopo apuamo ka:la:mite pa:ka:pa:ka:mo a:na:ma:ga:midaote ibi ma kunu analiya, “La: Ya:sukono mailamo epatamo tabo walo akogelanakala:!” Ebene iba:te ibi gito naliboliya.

<sup>41</sup> Ebe tetelo alibolepi dubate Ka:nisolo dubu miyapate kawo kalakalago eba nemaimiolo ibino taneba magumulo negeliya, “Nanitabola, Godote a ebena wadewade ga:limapi gudima: eba ka:milo ebete ebena ubi ebo iyati, aimano Ya:suko waloma:ta tanaloma: epetapiate temeteme ega:walo ilipo atamo kikaeaema:!”<sup>42</sup> Ebema: egela bilibilinomolo iba:te Godoko Amamateno Motolo ega:walo epono iyaiya motolo woko osiyodilo atepa:no epo eba iyatulamelo Ya:su Kelisokono Wade Tabo ebo kiyawaonakiya.

## 6

### *Sosi Epate Alibolepi Dubu Kowalubilima: Sebeni Dubu\* Duwatiya*

<sup>1</sup> Ebe atu ulamalo Ya:suko waloma:tapino uwomute unamo odolo olodiy-obao:no ibino taneba magumulo apaminatui tanalote ma kunu maigiya. Guliki tabamo degelanakiya ebe Yu epate ubia: tabo awokalimiya Yu tabonomamo degelanakiya ebe Yudiya opo epatamo, mabu egela bilibilinomo epetapilo bae alabaolame tetelo ibino amoleamola:te wade walubi

\* 6:: Keyakeyapino tabamo nanitabokobi midipiate me dubu dikonema: gelanaka.

kelawenakia:.<sup>2</sup> Ebema: Ya:sukono 12 alibolepi dubate waloma:tapi epetapi bilibilinomo iba:tamo ka:la:mite ibi nanaliya, “Me tanalo modoboa:, ale la:imano bae alabaolame tanalo eba tupugaimilo wiyasiya Godokono tabo kiyawao woko gito atepama:.<sup>3</sup> Ebema: ekakiala:, la:godolo sebeni dubu nuwata:la:, epate kebe dubu tuputupupima: ega:walo Godokono Uliyanamo tabokaopima: ega:walo mulopima: degelanaka. Ebene ale bae alabaolame woko iba:tamo eba ikalamelo<sup>4</sup> a wiyasiya tete bilibilinomolo me netewa kawokawo tanalo bulamenakoma:, Godago tabo gela tanalo ega:walo ebena tabo epatamo kiyawao tanalo.”

<sup>5</sup> Ebe tetelo ebe taboma: nanitabokobi midipi bilibilinomate kawonomamo kalakalaiya, ebena iba:te dopamo Stibiniko lawiya, ebena nanitabokobi midi tanalo kodakodanomola ega:walo Godokono Uliyanamo tabokanomola. Ebene iba:te me dubu epetapi ebo kuwatiya — Pilipiko, Palokolasiko, Nikanoko, Timonoko, Pamenaseko, ega:walo uwomudawa Nikolasiko, me Nikolasiko Yu lumagia: wiyasiya ebete dopamo A:ntiyoka kawo duliyaomololo Yu epagodone nani Godokono tanalo dolowiya, ebe tetelo ebete ebe amamatema: iba:go kapiyama: ebo pediya.<sup>6</sup> Ebene nanitabokobi midipiate me sebeni dubu alibolepi dubatamo demagataliya, iba:te ibino tanaloma: Godotamo towetowe tabo eba kiyawaolo koto ebo watiolalamiya ebena elawote iba:godolo kitanama:.

<sup>7</sup> Ebema: me gabodo Godokono tabote ebe opo kawonomodo pene-maigiya, ega:walo Yelusalema kawo duliyaomololo Ya:suko waloma:tapino uwomute unamo eba odolonalo kolodiyobonamia:. Ebe tetelo Godotamo kalimagono ikameopi dubuno taneba magumulo epetapi bilibilinomate atumu Ya:suko nanitabokobi midi tanalo ebo lawiya.

### *Yu Epo Epetapiate Stibinitamo Dowaote Ibino Ka:nisolo Dubatamo Demagatiya*

<sup>8</sup> Nanitabola, nanitabokobi midipiate alibolepi dubu kowalubilima: duwatiya, ebe dubu magumulo dubu kapiya idi Stibinikono tanalo ma kunula, ebena tepo magumulo Godokono nilakapo ega:walo elawo kawonomate pola:namiya, ebema: ebete epo magumulo kawokawo anoano tanalo ega:walo weweda: tanalo osiyodilolenaki.<sup>9</sup> Ebe tetelo Yu epono balidi ibilamole moto idi nitanami, ebena mailo ebe ‘Matuolamole Magumune Demaimiya Ebe Dubuno Aladabutula,’ ebe taneba magumulo epetapi Sailiniya duliyaomolo epola, epetapi A:lesandiya duliyaomolo epola, epetapi Silisiya opo epola, ega:walo epetapi A:isiya opo epola, ibi bilibilinomate kapimiya ilukulinamiya. Ebene egela idilo ibino tanebapi epetapiate pelamete Stibiniko eba podiyobolo eba:go apamineutei tanalo ebo posiyodiliya,<sup>10</sup> wiyasiya ibino elawote Stibinikono elawago ka:pa:modobiya: mabu Godokono Uliyanate ebetamo wade mulonomo ikamiya.

<sup>11</sup> Ebema: ebe dubate ibino modoboa: tanalo umite iba:te diya gabodo tolamete dubu epetapiatamo mani eba nikalamelo ma kunu nanaliya, “La: mako a:da: tabo Stibinikono tanaloma: na:negeliyala:, la: olowimata ebete la:imano dopo apulo kuba tabo da:kiyawai Mosesetamo ega:walo Godotamo.”

<sup>12</sup> Ebene ebe a:da: tabo kiyawaopiate tolamete ibino tabo gela magumulo Yu epo epetapi ega:walo ibino watowatopi ega:walo Godokono Totomu iyatulamepi, ibi bilibilinomatamo elawo ebo nikalamiya Stibinitamo ka:dowaoma:. Ebema: ibi epetapiate Stibiniko elawamo pelawete Yu epono Ka:nisolo dubatamo ebo magatiya ebena tanalo kananagiyamidaema:.

<sup>13</sup> Ebe tetelo iba:te dubu epetapi ebo magaeliya Ka:nisolo dubuno ololo

apulo Stibinikono tanaloma: a:da: tabo ka:pegelama:, ebene ebe tabo atapiate pelamete tabo ma kunu pegeliya, “Me dubute Godoko Amamateno Talena Motono tanaloma: ega:walo Mosesete atamo dikaeamiya ebe Totomu Tabono tanaloma: iyaiya kuba tabo kiyawao katepana:.”<sup>14</sup> Nanitabola, ale ebene tabo olowima:, ebete ma kunu gi, ‘Ya:suko Nasalete duliyoumolo dubute Godoko Amamateno Moto anabulimite, ebene Mosesete aimano ewoniatamo dikalamiya ebete ebe wadewade osiyodilole tanalo kubailamete iyama: ka:midilimene!’”<sup>15</sup> Ebe tetelo Yu epono Ka:nisolo tanebapi magumulo da:pola:niya, ebe dubu bilibilinomate olobila:ote Stibiniko balidi kodakodamo eba umiolo, wiyasiya Godokono nopodawano alo keba kunula:ka: ebene ololote eba kunu pukuilamiti.

## 7

### *Stibinite Yu Epono Ka:nisolo Dubatamo Ibino Ewonino Tanaloma: Da:kiyawaiya*

<sup>1</sup> Ebene Godotamo kalimagono ikameopino Unu Watodawanomote Stibiniko nalatediya, “Me tanalo nanitabola:ka:?”

<sup>2</sup> Stibinite tabo eba wiyalo negiya, “Naniala: ega:walo nabiala:, la: naimano tabo nolowiala:. Aimanu ewono A:ibalayamate Mesopotemiya opolo eba okolinalo A:la:na duliyoumolamo pea:no, ebe tetelo Alonomo Godote ebetamo pemaigate”<sup>3</sup> ma kunu pegiya, ‘A:imano opo ega:walo a:imano mabu epo miyapawete, nale a:ma: danatama ebe opamo na:tiye.’<sup>4</sup> Ebema: ebete Ba:baloni opo atepate A:la:na duliyoumolamo gito tiya, ebene ebete ebolo eba nokolinalo ebene nabiwite da:iya, Godote ebe me Ka:inane opamo ebo magaiya, la:le ka:lo dilukuliawenama me opamo.”<sup>5</sup> Godote wiyasiya ebe tetelo Ka:inane opo kawonomo magumulo okoli bai da:peso idi kikamiya: ebenonomoma: keda:nama:, ega:walo ebe tetelo ebete gudia:no eba okolinalo Godote ebetamo nanitabolo egiya, ebete walone tetelo Ka:inane opo ebetamo ega:walo ebene walonepiatamo kikalaema:.”<sup>6</sup> Ebene Godote ebetamo walo ma kunu kegiya, ‘A:imano walonepiate kapela epono opo idilo da:nilukulinama:na:, ebe opo epate ibi wiya: wokopima: midilite 400 ulamamo kawokawo temeteme bikalamenakoma:na:.”<sup>7</sup> Wiyasiya nanitabola, piyate iba:tamo temeteme dikalamenama:na:, nale ebe epono tanalo anagiyamidalamete kuba wiya kikalaemamo, ebene nale a:imano walonepi ebe mulu opone wagailite demagaelemo, ebe tetelo iba:te na me opolo kapamamanatenema:na:.’

<sup>8</sup> “Ebe tetelo Godote A:ibalayamatamo nopo nanitabonomolo diyatiya, ebe nopono pukala awokalima: tama itamida tanalo ikamiya, ebema: A:ibalayamate ebene gudu Aisa:keko umite kapiya wuiki dolopoligiya ebetamo tama itamida pukala ebo iyatimiya. Ega:walo walone tetelo Aisa:kete me atu tanalo ebe kosiyodiliya ebene gudu Ya:ikobotamo, ebene Ya:ikobote ebene 12 dubu guda:tamo me atu tama itamida pukala kalomolamiya, walone ebe guda:te aimano 12 gu epono nabima: eda:iya.”

<sup>9</sup> “Ebene Ya:ikobokono 12 guda:te apepeote ebe aimano guguno nabiate ibino ekawi Yausepekono wade okoli mabuma: eba dowao lo olowamepi dubu epetapiatamo manima: gito nikalamiya, ebete Isipiti opolo wiya: wokodawama: ka:neda:nama:. Wiyasiya Godote eba:go eba nokolinalo”<sup>10</sup> ebene temeteme bilibilinomo magumulo ebene igilo wadenomamo mula:menaki. Ebene Yausepete Isipiti opono Kawo Elawodubu Pa:lokono ololo apuamo da:nemaigiya, ebe tetelo Godote ebetamo wade mulonomo ikamiya. Nanitabola, Godokono walubi magumudo Pa:lote Yausepetamo

kawonomamo kalakaliya, ebema: ebete ebe Isipiti opo kawonomo ega:walo ebenu kawo moto ulamedawama: ebo midiya.

<sup>11</sup> “Ebe tetelo Isipiti opo ega:walo Ka:inane opo kawonomolo baete eba olopoligolo kawo nigologolo tanalonomote epatamo piya, ebema: aimano ewoniagodolo bae uwateo gabote kitanamia:.” <sup>12</sup> Ebene Ya:ikobote Isipiti opolo konote da:pola:nami, ebe tanalo olowite aimano ewoni nabi bae ka:nuwateoma: ebamo gito naliboliya. Me ibino dopo tetela. <sup>13</sup> Ebene iba:te netewa teta:mo walo da:ka:tolamiya, ebe tetelo Yausepete ebenu tanalo ebenu naniatamo awokalimilo ma kunu giya, ‘Na ebe Yausepetela!’ ega:walo ebe atu tetelo Kawo Elawodubu Pa:lote Yausepekono mabu epono pelame tanalo ebo iyatawiya. <sup>14</sup> Ebene Yausepete ebenu nabiwi Ya:ikobotamo tabo ebo nalibiya, ebe ega:walo ebenu mabu gudi ibi bilibilinomate Isipiti opamo ka:pelaema:, iyo, ebe tetelo Ya:ikobokono epono uwomu ebe 75 epola, miba:te pelamiya Isipiti opamo.

<sup>15</sup> “Ebene Ya:ikobote ebenu epago tote Isipiti opolo eba nokolinalo, ebe ega:walo aimano ewoni epetapiate ebo na:elaiya. <sup>16</sup> Ebene ibino guda:te Ya:ikoboko ega:walo Yausepeko ibino ape Ka:inane opono Sekeme duliynomolamo walo kowadaete bobamo ebo palomiya, ebe bobo damela A:ibalayamate Amokono guda:godone maniamo iyalo elawiya.”

*Stibinite Mosesekono Tanaloma: Da:kiyawaiya*

<sup>17</sup> Ebene Stibinite tabo moga:melo Yu epono Ka:nisolo dubatamo walo na:ka:kiyawaiya, “Godote A:ibalayamatamo nanitabonomolo degiya, ebe tabono nanitabo tanalote awokalama: eba tatalilo Isipiti opolo aimano Isalaela epate bilibilinomoma: eda:iya. <sup>18</sup> Ebe tetelo Isipiti opolo Kawo Elawodubu idite maigiya, Yausepete dopamo Isipiti opo epo keba kunu kowalubilinakile ebete ebe tanalo wadenomamo kiyatawiya:.” <sup>19</sup> Ebema: ebete aimano epo a:da: masigilinami, ega:walo ebete aimano ewoni mako elawo tabamo kubailamenami, iba:te ibino a:lia:li gudi agimagimao bailo gito ka:miyapaolenakoma:.

<sup>20</sup> “Ebe tetelo Mosesete ebo awokaliya, ebenu ololo wadenonomola. Ebete netewa-kapiya saganalo ebenu nabiwino motolo okolite, <sup>21</sup> ebenu ebenu menokola nabiwila iba:te ebe motone kela:mo matopa:tate gito danatepapiya, ebe tetelo Kawo Elawodubu Pa:lokono buwelete ebe numite ebenu guduma: nimidite wadenomamo dabinami. <sup>22</sup> Ebene Mosesete Pa:lokono motolo eba apelo Isipiti opo epate ibino mulo tanalo bilibilinomo ebe ebo iyatumiya, ebema: ebete ebenu tabo kiyawao magumulo ega:walo ebenu osiyodilole magumulo elawonomoma: ediya.

<sup>23</sup> “Mosesete 40 ulama tetedawama: eba eda:nalo ebete ebenu tepo magumulo woki iyatiya, ebenu Isalaela epate keba kunu kilukulinami ebe tanalo ka:nuima:.” <sup>24</sup> Ebe tetelo Isipiti opo dubute Isalaela dubu idi danagalimiuti, Mosesete numite Isipiti dubutamo kuba wiya eba nikamelo ebe ebo nanakapumiya, <sup>25</sup> mabu ebe osiyodilo tanalodo ebete nemalagidiliya ebenu epate me tanalo kiyatawaoma:, Godote Mosesekono kotamo ibi Pa:lokono elawo magumune kowagailimene. Wiyasiya iba:te ebenu wade osiyodilo tanalono magumu wadenomamo kelawiya:.” <sup>26</sup> Ebema: egela idilo Isalaela dubu netewate da:gowelitiya, Mosesete ibi ulamete ibi eba gelebadilamelo nanaliya, ‘Naimano naniala:, la: kapiya alailame epo keba kunula:ka: eba kunulata. Beda: mabuma: idite iditamo, idite iditamo kuba tanalo dosiyodilawitama?’

<sup>27</sup> “Wiyasiya ebe tetelo kebe dubute iditamo elawonomoma: keditile, ebete Moseseko balamo eba nimupiamidalo ebo aniya, ‘A:ma: potele



kanatia a:ma:le aimano kawodawama: eda:ma:? A:ma: aimano tanalo anagiyamidadawa:! <sup>28</sup> A:ma: ubila:ka: na anakapunaema:, a:ma:le dutu Isipiti dubu danakapuma:wia eba kunu?' <sup>29</sup> Mosesete ebe tabo olowite ebete kawo tole lawete Isipiti opone ebo alauliya, ebene ebete Midiyana opolo eba nokolinalo kamiyale aidite dubu gudi netewa ebo nulamiya.

<sup>30</sup> "Ebene 40 ulama da:petoiya egela idilo Mosesete Sainai Ununomo Damelano bulu opolo eba paitalo Godokono nopodawate ela magumudo ebetamo ebo pawokaliya, iyo, elate kewalo dowaiti wiyasiya kewate kolotolitiya:, <sup>31</sup> Mosesete ebe tanalo umite kawonomamo anoaniya. Ebema: ebete wadenomamo uima: tataliamo eba tolo Kawodawa Godokono tabote ebetamo ma kunu piya, <sup>32</sup> 'Na Godotela. A:imano ewono nabi A:ibalayamako, Aisa:keko, ega:walo Ya:ikoboko iba:te poko kamamatene, na ebetela.' Mosesete ebe tabo olowite elawoa:noma: eba eda:lo ebete tabo gedawa kuima: ebene ape anakamilo kawo tolenomo ebo lawiya.

<sup>33</sup> "Ebene Kawodawa Godote ebetamo negiya, 'A:imano agowa inamabu na:pupukulama:, mabu a:ma:le duta:wita ebe uti bai talenala. <sup>34</sup> Naimano epate Isipiti opolo kawokawo temetema:go dilukulina, nale ka:lo ibino modoboa: tanalo ulamelelaemo, iyo, nale ibino imi tanalo olowilatele na Unu Duliomolone ebema: piwisigamo ibi kuba magumune kowagailima:. Ebema: a:ma: na:pa:, nale a:ma: Isipiti opamo kanalibomamota naimano woko ebolo ka:nosiyodilaema:.' "

### *Isalaela Epate Moseseko Ubia:noma: Eda:o Tanalo Stibinite Da:kiyawaiya*

<sup>35</sup> Ebene Stibinite tabo moga:melo Yu epono Ka:nisololo dubatamo walo na:ka:kiyawaiya, "Numa:la:, Isalaela epate Mosesetamo dopamo ibino ubia: tanalo eba awakalimilo ma kunu geliya, 'A:ma: potele kanatia a:ma:le aimano kawodawama: eda:ma:? A:ma: aimano tanalo anagiyamidadawa:!' Wiyasiya me tetelo Godote Moseseko walo akapalibiya ibi ulamedawama: ega:walo ibino igilo mula:lamedawama: ka:pada:ma:. Nanitabola, elate kewalo dowaiti, ebe tetelo Godokono nopodawate ebetamo pawokalate elawo ebetamo ebo ikamiya ibi kowalubilinama:. <sup>36</sup> Ebema: 40 ulama magumulo Mosesete kawokawo anoano tanalo Isipiti opolo ega:walo Kalimakalima Kewa: Kolomolo ega:walo bulu opolo osiyodilolenaki, iyo, ebete Isalaela epo me gabodo wagailiya Isipiti opone. <sup>37</sup> Ebene me Mosesete Isalaela epatamo negiya, 'Walone Godote ebene Iyanomo Woki Awokalimidawa idi, na dopo, la:godolo kadipatemene,' <sup>38</sup> ega:walo Isalaela epate bulu opolo danaladabutiya me dubu Mosesete iba:go nokolinami, ega:walo ebete aimano ewoniago eba okolinalo Godokono nopodawate Sainai Ununomo Damelalo ebetamo da:kiyawaiya ebe Totomu Tabo ebete Godogodone uwatete atamo ebo ikaeamiya uwomua: tetelo a kowalubinama:.

<sup>39</sup> "Wiyasiya ebe tetelo aimano ewoniate Godotamo tudila:oma: ubia:noma: eda:iya, ebene iba:te ebe waloma:ta tanalo iyabaiamo eba watiamidalo ibino tepo magumulo Isipiti opamo olowamioma: ubi walo nakalomonamiya. <sup>40</sup> Ebema: Mosesete epago luta: tetelo iba:te ebene naniwi A:lonitamo negeliya, 'Aimano ida:da:li nosiyodiloleama:, iba:te a dopaeamete kemagataema:, mabu me Moseseko Isipiti opone a demagaeyiya kebamo dalatidile!' <sup>41</sup> Ebe tetelo iba:te oli ape kaugeono ololamo ida:da:li osiyodilote ebetamo kalimagono inamabu eba ikameolo, iba:te a:ka:tuwa: ibino kotamo dosiyodiliya ebe inamabutamo kawo kalakala soliyomu osiyodiliya. <sup>42</sup> Ebe kuba mabuma: Godote ibi ginima:mo eba ilatelelo gito miyapiya ibi a:ka:tuwa: ibino ubilo tobolo

ununo mawele kamamalatelenama: Nanitabola, me tanalo Godokono woki awokalimpiate ebena Bukalo iyalo ma kunu awokalimiya,

‘La: Isalaela epala;

la:le 40 ulamamo bulu opolo dowapata:lama:wenaima,  
la:le na amamanatenema: dalukola:wenakima,  
ebe sipi-goeogoeono kalima tepo magumuno  
nanitabo tanalago ka:pikanamona:wenakia:.

<sup>43</sup> Wiyasiya la:le la:imano ida:da:li Molekakono  
sipi-goeono tama talena moto  
unamo awokowiamidiyamata,  
ebene ida:da:li idi Lapanako  
mawelena ololamo a:kosiyodiloliyamata,  
me ebe ida:da:lila  
la:le damamalatela:wenaima.  
Me mabuma: nale la:tamo  
kuba wiya kikalametama:  
naimano wade Ka:inane opone  
kuba Ba:baloni apuamo kanalibolemamota.’ ”

*Stibinite Yu Epono Ka:nisolo Dubatamo Ebena Uwomu Tabo Da:kiyawaiya*

<sup>44</sup> Ebene Stibinite tabo moga:melo walo na:ka:kiyawaiya, “Me tanalo nanitabola, Godokono sipi-goeo tama awokowiamida Talena Moto aimano ewoniagodolo eba itanalo Godote iba:go ebolo nokolinami. Numa:la:, Godokono iyatumi magumulo Mosesete keba kunu kolowiyale ega:walo ebena balida:mo keba kunu kumiyale, ebete ebe moto eba kunu wadenomamo osiyodiliya. <sup>45</sup> Ebene aimano ewonino guda:te ebe Talena Moto ibino nabiagodone lawete, iba:te agute Yosuwago Ka:inane oli opamo gito tolamiya. Ebe tetelo ebe opono iyaiya epo Godote ebena elawamo na:na:ma:latelete Isalaela epatamo ebo nikalamiya, ebena ebena Talena Motote ebolo eba nitanalo iba:te ebe tetene pelamete Da:ibidikono teta:mo pemaimiya. <sup>46</sup> Ebene Godote Da:ibidikono osiyodilole tanalo ulamelemete ebe kawonomamo malagidilonami, ebema: tete idilo Godokono okoli baima: Da:ibidite ebe ebo aniya ebete ebe amamateno iya moto ketema:, nanitabola, me Godo ebe Da:ibidikono ewono Ya:ikobote dopamo damamatenami ebe Godola. <sup>47</sup> Wiyasiya Godoko Amamateno Moto Da:ibidikono gudu Solomonote etiya, Da:ibiditea:.

<sup>48</sup> “Wiyasiya la: wadenomamo nolowiala:, epate Ununomo Godoko mabuma: detemoteona, ebete ebe iyaiya motolo nanitabolo kokolina: Iyo, dopamo ebena woki awokalimidawa idite me tanalo ma kunu awokalimiya,

<sup>49</sup> ‘Kawodawa Godote negena,

‘Unu Duliyomolo ebe naimano okoli baila,  
ega:walo me opo naimano agowa puti baila.  
Ebema: la: me opo epate  
natamo kebako moto na:keta:ema?

Naimano ela ami bai  
la:le kebolo na:kosiyodilaema?

<sup>50</sup> Mabu me tanalo ebe nanitabola,  
me opono inamabu bilibilinomo  
na a:ka:tuwa: naimano konomamo osiyodiloliyamo,  
me inamabu bilibilinomate  
naimanoma: ebema: eda:ona.’ ’ ”

<sup>51</sup> Ebene Stibinite Yu epono Ka:nisolo dubatamo uwomu tabo eba kiyawaolo negiya, “Eiye, la: wato kodakoda epolata! La: Godokono Totomu Tabamo tudila:olo tama itamida pukala unu gabodo lawiyamata, wiyasiya tepo magumuno kodakoda tanalo kiyaila:wiyaya! Iyo, la: tete bilibilinomolo la:imano galo eba mopiolelo Godokono Wade-talena Uliyana ebe odiiyobonamata, la:imano ewoniate dowagelenamiya eba kunu!” <sup>52</sup> Numa:la:, Godokono woki awokalimipi bilibilinomo magumulo la:imano ewoniate kapiya dawatamo nilakapo kiyatinakia: wiyasiya ibi bilibilinomatamo temeteme ikalamenakiya. Eba kunu piyate Godokono Tuputupu Wokodawano pe tanaloma: dopamo tabo da:kiyawaiya la:imano ewoniate ibi anakapulamenakiya, ega:walo me tetelo Tuputupudawa Ya:sute ebenu tanalo la:tamo dapawokalimi, la:le ebe a:da: elemasigi gabodo lawa:wete ebe anakapuimata. <sup>53</sup> Ebema: nanitabola, Godokono Totomu Tabo ebenu nopopiagodone duwata:wiyama, la: ebe epolata, la:le wiyasiya ebe Totomu Tabamo nanitabola ka:tudila:wena:!”

*Yu Epono Ka:nisolo Dubate Stibiniko Nokolamo Mapemete Danakapumiya*

<sup>54</sup> Ebene Yu epono Ka:nisolo dubate me tabo dolowiya iba:te ibino dowa tanalo kawonomo Stibinitamo kawokalima: pituku ebo waliwalioliya.

<sup>55</sup> Ebe tetelo wiyasiya Stibiniko Godokono Uliyanate detabokaimiya, ebenu Unu Duliyomolamo da:nemeliya Godokono kawo alonomo eba umitalo, Ya:sute atumu ebenu tumudi apulo na:kutiti. <sup>56</sup> Ebema: ebenu negiya, “La: numa:la:! Godote Unu Duliyomolono gigiyu da:iyamidita nale bumitamo, Epono Naniwite ebenu tumudi apulo butita!”

<sup>57</sup> Ebe tetelo Yu epono Ka:nisolo dubate kapimiya gelatepago galo mopiolele ebenu na:na:puala:iya ebe ka:na:kubaima:. <sup>58</sup> Ebene iba:te ebe elawamo nelawete duliyomolo magumune magatate nokolamo mapeme ebo nowagilimiya. Ebe tetelo kebe dubate Stibinikono tanaloma: a:da: tabo Ka:nisolo dubatamo da:pegeliya, ebe dubate ebe dopamo anakapumia:nu ibino watubino kaliku oli ape dubu idi Solokono agowa mabuamo gito nalomiya. <sup>59</sup> Ebene iba:te Stibiniko nokolamo eba mapemelo ebenu ebenu Kawodawa ka:milo negiya, “Kawodawa Ya:su, naimano uliyana a:ma:le na:pelawa:!” <sup>60</sup> Ebe tetelo ebenu pupamo gate kawonomamo negiya, “Naimano Kawodawa, me kuba iba:te dosiyodiluta, a:ma:le iba:tamo kuba wiyaya akoikalama:la:.” Ebene ebenu me tabo gete a:enomo ebo a:iya.

## 8

*Solote Nanitabokobi Midipiatamo Temeteme Ikalame Dowagilimiya*

<sup>1</sup> Ebe tetelo ebe oli ape dubu Solote Stibinikono a:e tanalo umite nekalakaliya. Ega:walo ebe atu egelalo sosi epate Yelusalema kawo duliyomololo dilukulinamiya, Yu watowatopiate iba:tamo kawokawo temeteme ikalame ebo wagilimiya. Ebe mabuma: Ya:sukono alibolepi dubate a:ka:tuwa: kawo duliyomololo na:pola:niya, wiyasiya Ya:suko nanitabokobi midipi epetapi bilibilinomate alautiya, ma kunu epetapi Yudiya opamo ega:walo epetapi Samaliya opamo iyaiya tolamoliya. <sup>2</sup> Ebema: Yelusalema epo epetapi Godokono nilakapago dilukulinamiya, iba:te Stibinikono ape pelawete bobamo eba niatilo ebe mabuma: kawonomamo niimitiya. <sup>3</sup> Ebe tetelo Solote me kuba tanalo idi wagilimiya, ebenu sosi epono iyaiya motamo nodolonaki dubu ega:walo kamiyale da:nulamenaki, ebenu ibi uwatete danamiyatalenaki idoko motamo gito niyalekenaki.

*Pilipite Samaliya Kawo Duliyomololo Ya:sukono Wade Tabo Da:kiyawaiya*

<sup>4</sup> Ebema: nanitabokobi midipiate kebe iyaiya opamo kalautiye, iba:te ebolo iyaiya eba nowapata:lamelo Ya:sukono Wade Tabo epatamo ebo na:kiyawaonakiya. <sup>5</sup> Ibino taneba magumulo Pilipiko ebe idila, ebete Samaliya kawo duliynomolamo tote Ya:su Kelisokono tanaloma: tabo da:na:kiyawauti, <sup>6</sup> epo bilibilinomate ebena tabo wadenomamo olowiutiya, ega:walo ebete Godokono elawamo kebe anoano tanalo kosiyodilolitiyale iba:te atumu nulamitiya. <sup>7</sup> Ebe tetelo Pilipite epagodone kubakuba uliyana daliboliya iba:te gelatepago ebo nemaimiya, ega:walo ebete ape kodakoda temetema:gopi ega:walo agowa tataipi wadekobi a:ka:midioliya, <sup>8</sup> ebema: ebe Samaliya duliynomolo kawonomolo kawo kalakalanomote itani.

*Giwali Osiyodiloledawa Saimonote Godokono Elawo Maniamo Laema: Dowageliya*

<sup>9</sup> Nanitabola, Pilipite Samaliya kawo duliynomolamo dopamo pea:no, dubu idite ebolo nokolinami ebena mailo Saimonotela, ebete ebena giwali osiyodilole tanalamo epo anoanoilamenami. Ega:walo ebe a:ka:tuwa: ebe kawoma: eba midinalo, <sup>10</sup> Samaliya opono dologala epo ega:walo kawokawo mailago epo ibi bilibilinomate ebena iyatulame tanalo wadenomamo olowionakiya. Ebena iba:te negelanakiya, “Ebena elawo Unu Duliynomolone pena, ebema: ale ebetamo Elawodawanomo mailo kikamiye!” <sup>11</sup> Iyo, Saimonote tete geyageyalo ebena giwali iyatawa tanalamo ebe epo danoanoilamenami, ebema: iba:te ebena osiyodilole tanalodo ebe nowaloma:tanamiya.

<sup>12</sup> Wiyasiya Pilipite da:piya ebete Wade Tabo eba pa:kiyawaolo, Godote Kawo Elawodawama: deda:na ebete ebe tanalo ega:walo Ya:su Kelisokono elawo tanalo ebo pawokalilamiya. Ebe tetelo Samaliya epate nanitabokobi midite, ebena Pilipite ebe kamiyale ega:walo dubu bilibilinomo obamo ebo waduba:midaoliya. <sup>13</sup> Ega:walo Saimonote atumu nanitabokobi midite Pilipite ebe obamo ebo kaduba:midiya, ebena Pilipite Godokono elawamo kebe kawokawo anoano tanalo kosiyodilolenakile, Saimonote ebe niyakabonomolo eba okolitalo ebe iyaiya tanalo dulamenaki kawonomamo anoanonaki.

<sup>14</sup> Ebe atu tetelo Yelusalema kawo duliynomololo alibolepi dubate Samaliya opo epono tanalo ma kunu olowiya, iba:te Godokono tabo elawiya, ebema: iba:te Pitako ega:walo Yoneko ebe tanalo uima: ibi gito naliboliya. <sup>15</sup> Ebena ibi netewapiate ebamo tote olioli nanitabokobi midipi Godotamo ebo nowadipalateleya iba:te ebena Uliyanana kelaema:, <sup>16</sup> mabu dopamo Pilipite ebe nanitabokobi midipi obamo dowaduba:midaoliya Kawodawa Ya:sukono mailo kapiyamo osiyodiliya, wiyasiya ebe tetelo Godokono Uliyanate ibi unamo ka:pokoliya:. <sup>17</sup> Ebema: Pitako Yoneko iba:te ebe tanalo iyatawaote ibino koto Samaliya nanitabokobi midipiatamo dowatolelamiya, iba:te Godokono Uliyanana ebo lawiya.

<sup>18</sup> Ebe tetelo Godote alibolepi dubagodone ebena Wade-talena Uliyanana epatamo keba kunu kikalamiyale, giwali osiyodiloledawa Saimonote ebe tanalo dumiya, ebete mani iba:tamo eba ikalamelo negiya, <sup>19</sup> “La:godolo ditana ebe elawo nale la:godone maniamo kelawa:mo, ebena nale kebe epono watamo naimano koto dowatiolamenakomo, iba:te atumu Godokono Uliyanana nagodone belawenakoma:na:.”

<sup>20</sup> Ebena Pitate ebena tabo eba wiyalo negiya, “A:imano ape ega:walo a:imano mani Saitanakono Ela Opamo kapimiya ka:toma:na:, mabu a:imano woki ma kunu itana, lumagite Godokono Uliyanano elawo maniamo kelaemene! Ao, eba kunua:!” <sup>21</sup> A:imano kuba wokino

tanaloma: a:ma: Godokono woko osiyodilo magumulo ago akapalad-abua:emene, mabu Godokono umi magumulo a:imano tepo magumuno woki ka:tuputupua. <sup>22</sup> Ebema: modobola a:ma: woki iyakobi mida:wete a:ma:le demalagidilawita ebe kuba osiyodilo tanalone nolobigiye, ega:walo a:ma: Godoko na:toweomiye ebete a:imano kuba woki egebolemetate ka:dodomatimitama. <sup>23</sup> Nanitabola, na iyatawala a:imano tepo magumuno dowa tanalote detaboki, ebe mabuma: a:ma: Saitanakono idoko motolo bokolinata!”

<sup>24</sup> Ebene Saimonote tabo eba wiyalo negiya, “La: niyanyata, modobola:ka: la: na Kawodawa Godotamo nadipanateniyala:, mabu la:le kebe tanaloma: kegelaema ebe kuba wiyate natamo nanitabolo demaigamene nale a:ka:modobomo.”

<sup>25</sup> Ebema: me tanalo dolopoligiya, ebe tetelo Pitako Yoneko iba:te Samaliya kawo duliyoumololo Kawodawa Ya:sukono iyaiya tabono tanaloma: awokala gelate Yelusalemano walo ebo kolowamiya, ebene iba:te eba tolo gabo tetelo Samaliya opono iyaiya duliyoumolo depesodo Wade Tabo kiyawaoago ebo tiya.

*Pilipite Itiyopiya Opo Kawo Dubutamo Ya:sukono Wade Tabo Da:kiyawaiya*

<sup>26</sup> Ebe tetelo Kawodawa Godokono nopodawate Pilipitamo negiya, “A:ma: maigawete siyele apuamo na:toa, Yelusalemane Gasa duliyoumolamo bulu opodo da:tolamenaka ebe gabamo.” <sup>27</sup> Ebene ebete maigate ebamo na:tiya. Ebe atu tetelo kawo dubu idi, ebete Itiyopiya opono Kawo Elawo Kamiyale Ka:ndesikono wokodawama: eda:nami, ebete ebene kawokawo inamabu ega:walo mani ulamelemenami, ebe dubute me atu gabodo piti. Ebete Yelusalema kawo duliyoumolamo Godoko amamatema: iyalo tote <sup>28</sup> walo eba ka:pitalo, ebene sa:liyota-pe unulo okolite Godokono woki awokalimidawa Aisayakono Buka ka:la:miola:go eba pitalo, Pilipite ebe ebo numiya.

<sup>29</sup> Ebe tetelo Godokono Uliyanate Pilipiko naniya, “A:ma: sa:liyota-pe niyakabamo nemaigawete eba:go kapimiya na:tonatiye.” <sup>30</sup> Ebema: Pilipite sa:liyota-peago eba puliganatolo, kawo dubute Aisayakono Buka tabo deka:la:mioliti ebene tabo nolowite ebetamo negiya, “A:ma:le deka:la:miola:wita ebe tabono magumu na:kemalagidilawita?”

<sup>31</sup> Ebete tabo eba wiyalo negiya, “Ao, na keba kunu na:kiyatawamo? Na iyatunamedawa puliyala.” Ebe tetelo ebete Pilipiko naniya ebete sa:liyota-peamo olote ebe niyakabamo ka:pokolima. <sup>32</sup> Ebene kawo dubute Aisayakono Bukalo Godokono tabo ma kunu ka:la:mioliti,

“Iba:te ebe dubu lawete emagatiya  
 sipi-goeomu kananakapuima,  
 ebene lumagite sipi-goeo da:pesono  
 ipo dotolemita,  
 ebe sipite gelebadilo eba lutalo  
 tabo gea:noma: keba kunu keda:nakole,  
 ebete eba kunu tabo abumite  
 tabo idi kegiya:

<sup>33</sup> Ebe tetelo iba:te ebe eba malogolo  
 ebene tanalo wadenomamo anagiyamidamea:no  
 a:eamo gito nalibiya.  
 Numa:la:, iba:te ebene igilo  
 me opolo itamidamiya,  
 ebema: ebene walonepino tanaloma:



potele na:ka:kiyawawaomene?”

<sup>34</sup> Godokono Buka ka:la:miole tanalo dolopoligiya kawo dubute wiyasiya Pilipitamo negiya, “A:ma: na nanana:, Aisayate pokono tanaloma: ka:kiyawaiyale, ebe a:ka:tuwa: ebene tanaloma:la:ka: o lumagi idino tanaloma: ka:kiyawaiyale?” <sup>35</sup> Ebema: iba:te kapimiya eba tutalo kawo dubute deka:la:moliya, Pilipite ebe tabono magumu dopamo awokalimite, ebene Godokono Buka apuapuno tabo epetapino magumu atumu kawokalilamete Ya:sukono Wade Tabo ebetamo ebo kiyawaonatiya. <sup>36</sup> Ebene ibi netewapiate ebe gabodo eba tonatolo obo paka: da:pesamo da:nemaimiya, kawo dubute negiya, “A:ma: me obo numa:. A:ma: modobola:ka: na obamo aduba:midanema:? Kodakoda idi ba:kitanale?”

<sup>37</sup> Ebene Pilipite ebetamo negiya, “A:ma: a:imano tepo magumulo Godokono tabo nanitabokobi da:mida:wa:, nale a:ma: obamo kaduba:midamota.”

Ebete tabo eba wiyalo negiya, “Na ka:lo Ya:suko nanitabokobi a:midimo, ebe Kelisote, Godokono Gudula.”\*

<sup>38</sup> Ebe tetelo kawo dubute sa:liyota-pe atadawa naniya ebete pe ebamo kodiyo boma:, ebene ebete Pilipa:go iwitite Pilipite ebe obamo ebo aduba:midiya. <sup>39</sup> Ebene ibi netewapiate obo magumune eba pidiwitalo Kawodawa Godokono Uliyanate Pilipiko opo ida:mo demagatiya, kawo dubute ebe walo kumiya:, ebete wiyasiya kawo kalakalago ebe gabodo walo gito ka:tiya. <sup>40</sup> Ebe tetelo Pilipite Godokono elawamo Asotase duliyo molamo nemaigate, ebete ebe duliyo molone tote ebe opono duliyo mololo bilibili-nomodo Godokono Wade Tabo kiyawaoago Sisaliya kawo duliyo molamo ebo nemaigiya.

## 9

### *Solote Ebene Kuba Osiyodilole Tanalome Ya:sutamo Dolobigiya*

*Ali 22.6-16; 26.12-18*

<sup>1</sup> Ebe atu tetelo Solote Kawodawa Ya:suko waloma:tapi anakapulaema: tabo elawonomamo kiyawaonaki, ebene ebete Godotamo kalimagono ikameopino Unu Watodawanomotamo tote <sup>2</sup> leta uwatema: ebe ebo naniya. Ebe ubila ebe letago Dama:sakase kawo duliyo molamo tote, Yu epono iyaiya balidi ibilamole motamo nopegate, kebe epate Ya:suko Nanitabokobi Midi Gabodo dowapata:lamenamiya ebe dubu ega:walo kamiyale ka:nolema:, ebene ebete ibi da:nulaemene ibi elawamo nuwatete Yelusalema kawo duliyo molamo magaelete idoko motamo ebo ka:piyalekema:.

<sup>3</sup> Ebene ebete Dama:sakase kawo duliyo mololo niyakabamo da:nemaiganatiya ebe tetenomolo Godokono Unu Duliyo molone alote eba piwisigalo molete da:la:uwa:mida keba kunula:ka:, ebe alote eba kunu ebe ebo pa:wiyamidadiyiya. <sup>4</sup> Ebene ebete opamo gate tabo ma kunu olowiya, “Solo, Solo! Keleka: mabu a:ma:le natamo kawokawo temeteme dikanama:wena?”

<sup>5</sup> Solote nowamiya, “Kawodawa, a:ma: poteleka:?”

Wiya tabote na:piya ebetamo, “Na Ya:sutela, a:ma:le temeteme dikanama:wena, na ebe lumagila. <sup>6</sup> A:ma: maigawete duliyo molamo na:nopega. Ebolo lumagi idite a:ma: kanama:ta a:ma:le beda: tanalo na:kosiyodilaemene.”

\* **8:37:** Ali 8.37 buka apuno tabo Lukute bukamo kakuloliya:, wiyasiya ebene buka osiyodilo walogabo apune nanitabokobi mididawa idite akuloliya.

<sup>7</sup> Ebe tetelo Solago da:tolamiya ebe dubate ebe tabo madodo eba olowilo wiyasiya lumagi kumiya:, ebema: iba:te eba anoanolo tanalo idi osiyodiloo:na gito lamota:oniya. <sup>8</sup> Ebene Solote opone maigate balidi paeamidalete da:meliya ebe tetelo inamabu kulamiya:, ebema: ebena namutupiate ebe kotamo lawete Dama:sakase kawo duliyaomolamo gito magatiya. <sup>9</sup> Ebene ebete netewa-kapiya egelelo inamabu ulamolea:na ebolo gito nokoliya, ebete bae kenanakia: ega:walo obo ka:ninakia:

<sup>10</sup> Ebe tetelo ebe Dama:sakase kawo duliyaomololo Ya:suko waloma:tadawa idi nokolinami, ebena mailo A:nanayasitela. Ebete u wata:na ebena balidite iyama: eba eda:omelo Kawodawate ebe neka:miya, "A:nanayasi!"

Ebete nowamiya, "Kawodawa, na mela. Beda:la:ka:?"

<sup>11</sup> Ebene Kawodawate ebetamo negiya, "A:ma: maigawete, gabo mailo Tuputupula ebamo toawete Yudasikono motolo Tasase duliyaomolo dubu Soloko na:nowadia. Me tetelo ebete ebolo towetowe tabo natamo degita, nale nolowitamo. <sup>12</sup> Ebema: ebete u wata:na ebena balidite iyama: eba eda:omelo A:nanayasi mailago dubu umi, ebe dubute ebena balidi wadekobi ka:midilima: ebete ebena koto ebetamo eba powatilimitalo ebo umi."

<sup>13</sup> A:nanayasite ebena tabo eba wiyalo negiya, "Kawodawa, na epo bilibilidopagodone olowimo, me dubute Yelusalemalo a:imano tuputupu epatamo kawokawo kuba osiyodilolenaki. <sup>14</sup> Ega:walo na iyatawala, me tetelo ebete a Yu epono kawokawo watowatopiagodone elawo elawi, ebete me Dama:sakase duliyaomololo piyate a:imano mailo deka:mina ibi uwatete idoko motamo ka:niyalekema:."

<sup>15</sup> Kawodawate wiyasiya ebetamo negiya, "Modobola a:ma: na:toa, mabu nale ebe iyalo elawiyamo ebete naimano wade wokodawama: keda:ma:, iyo, ebete naimano mailamo tote, Isalaela epo ega:walo Yua: epo ega:walo ibino kawokawo elawodubu ibi bilibilinomatamo naimano tanalo kana-wokalimene. <sup>16</sup> Ebema: na a:ka:tuwa: ebe kiyatuimamo, naimano mailo mabuma: ebete kebako kawokawo temeteme na:kuwatanakomene."

<sup>17</sup> Ebene A:nanayasite tote ebe moto guamo nodolote ebena koto Solotamo eba nowatililo naniya, "Naimano ekawi Solo, a:ma:le gabodo eba pitalo a:ma:tamo dapawokali ebe Kawodawa Ya:sute na apalibone, a:imano balidi wadekobi pimidilimitate, ebena Godokono Uliyanate a:imano tepo magumu ketabokaimene." <sup>18</sup> Ebe tetenomolo ebena balidi da:mula:lemiya ebe balidino gibute opamo eba gudimilo ebena balidite wadekobi ebo olowiomiya, ebena ebete demaigiya A:nanayasite ebe obamo aduba:midate, <sup>19</sup> ebe tetelo ebete bae da:keniya elawo walo ebo kelawiya.

### *Solote Ya:sukono Wade Tabo Dama:sakase Kawo Duliyaomololo Da:kiyawaiya.*

Ebena egele epetapilo Solote Dama:sakase kawo duliyaomololo Ya:suko waloma:tapiago eba okolilo, <sup>20</sup> ebete Yu epono iyaiya balidi ibilamole motolo Ya:sute Godokono Guduma: deda:na ebe tanalo awokalimi ebo nowagilimiya. <sup>21</sup> Ebene piyate ebena tabo dolowiya ibi bilibilinomate anoanolo negeliya, "Me dubu Yelusalemalo Ya:sukono mailo deka:mina ebe epo da:kubailamenaki, me ebe lumagila! Ebete mamo ebema: pi, iyo, ebe ubila Ya:suko nanitabokobi midipi elawamo puwatete Godotamo kalimagono ikameopino ununomo watowatopiatamo kemagatalema:!"

<sup>22</sup> Ebe tetelo Solote Godokono tabo kiyawao magumulo elawonomoma: eda:te, Ya:sute Godokono Alibodawa Kelisoma: deda:na ebete ebe tanalo awokaliminomo awokalimiya, ebema: nanitabola, Dama:sakase kawo

duliyomololo dilukulinamiya ebe Yu epate woki bilibilima: eba eda:olo, iba:te apaminateui tanalago ebena tabo odiyoboma: ka:modobiya:

*Yu Epate Soloko Anakapuima: Nopo Diyatiya*

<sup>23</sup> Ebene egela epetapi da:petolamiya Yu epate aladabutite Soloko anakapuima: nopo ebo iyatiya. <sup>24</sup> Ebe tetene wagilimite iba:te egela ega:walo idoko bilibilinomolo Dama:sakase kawo duliyomolo kalano iyaiya gigiyulo atila:pi ebo alomiya Solote ebamo nemaigalo ebo kanakapuima:. Wiyasiya iba:te gananaloda:kiyawautiya lumagi idite Soloko iyalo a:piyatumiya, <sup>25</sup> ebena idoko idilo Soloko waloma:tapiate ebe lawenate da:ea magumamo adipinate kala unudo opamo nowolukonate, ebete ebe duliyomolone gito alaula:ni.

*Solote Yelusalema Kawo Duliyomolamo Walo Da:kolowamiya*

<sup>26</sup> Solote Yelusalemamo walo da:ka:piya Ya:suko nanitabokobi midipi epetapiago kapiyakobi olowima: powageliya, wiyasiya ibi bilibilinomate ebe eba tolemelo iyaiya alautiya mabu iba:te ebe Ya:sukono nani waloma:tadawama: kegelija:. <sup>27</sup> Ebe mabuma: Banabasite ebe lawete alibolepi dubatamo eba magatalo me iyaiya tanalo ibi ebo nikiyawaolamiya, Solote gabo tetelo Kawodawa Ya:suko dumi, ega:walo Kawodawate ebetamo tabo da:kiyawai, ega:walo ebete Dama:sakase duliyomololo Ya:sukono mailamo tabo elawamo da:kiyawaonati. <sup>28</sup> Ebema: ebe tetene wagilimite Solote nanitabokobi midipiago eba okolilo Yelusalema duliyomolo kawonomolo Kawodawa Ya:sukono mailamo tabo elawonomamo kiyawao ebo nowagilimiya. <sup>29</sup> Ebene tete epetapilo ebete Guliki tabamo degelanakiya ebe Yu epago Ya:sukono tanaloma: apaminateuinakiya, ebema: iba:te gabo waditiya ebe anakapuima:. <sup>30</sup> Ebe tetelo nanitabokobi midipi ekakiate ebe tanalo diyatawaiya, iba:te Soloko Sisaliya kawo duliyomolamo magatate ebena Tasase duliyomolamo gito nalibiya.

<sup>31</sup> Ebema: Yudiya ega:walo Ga:lili ega:walo Samaliya opo kawokawonomolo dilukulionamiya, ebe sosi epate gelebadi tanalago eba pola:nalo iba:te nanitabokobi midi magumulo elawonomoma: eba eda:olo ebo apepeiya. Nanitabola, nanitabokobi midipiate Kawodawa Ya:sutamo tudila:olo ebena Uliyanano walubi tanalodo ibino uwomute kawonomoma: ebo ediya.

*Pitate Ape Kodakoda Temetema:go Dubu Wadekobi Da:midiya*

<sup>32</sup> Ebene Pitate Yudiya ega:walo Samaliya opodo eba petolo, ebete egela idilo Lida duliyomolamo ebo nemaigiya Godokono tuputupu epono ilukuli tanalo ka:nuima:. <sup>33</sup> Ebete ebolo dubu idi numiya, ebena mailo Iniyasitela, ebe a:iti ulama magumulo ape kodakoda temetemetete eba uminalo ebena wata bailo gito watitanaki. <sup>34</sup> Pitate ebe naniya, "Iniyasi, Ya:su Kelisote a:ma: wadekobi a:mida:ta. A:ma: maigawete a:imano keta na:mokopiamida." Ebe tetenomolo temetemetete ebe dubugodone dolopoligiya ebete ebo maigiya, <sup>35</sup> ebema: Lida ega:walo Salono duliyomololo dilukulionamiya ebe epo bilibilinomate ebena wade tanalo umite Kawodawa Ya:sutamo ebo olobiliya.

*Pitate Dokasiko A:ene Dadipatiya*

<sup>36</sup> Ebene Yopa duliyomololo Ya:suko waloma:tadawa kamiyale idi nokoliami, ebena mailo Tabitatela, epate ebe mailo Guliki tabamo Dokasima: ka:mina, me mailono magumu nitana, 'diya-goeola.' Me kamiyaleno tanalo ma kunula, ebete wadewade tanalo eba osiyodilolelo nigologolopiatamo nilakapo kawodawanomoma: eda:nami. <sup>37</sup> Egela idilo ebe gabugabute

delawiya gito a:iya, ebene moto epate ebene ape ukulate unu motono tete kawo ditanami ebe teta:mo gito nadilatiya epo epetapiate ebe ebolo ka:pa:liyaema:.<sup>38</sup> Yopa duliyaomolone Lida duliyaomolamo tolaema: mulua:, ebema: Pitate Lida duliyaomololo dokolinami, Ya:suko waloma:tapi epetapiate ebe tanalo olowite netewa dubu ebo naliboliya, iba:te ebe eba na:toweomelo ebete samamo ka:pema:.

<sup>39</sup> Ebene Pitate maigate iba:go ebo piya. Ebete Dokasikono motamo da:podoliya, a:e kamiyaleno ape ka:nuima: epate ebe ebo magatiya unu motolo tete kawo ditanami ebe teta:mo. Ebolo amoleamole epetapiate ebe niyakabolo putitatate eba iimitalo ibino pupuliono inamabu ebo iyatumiya, Dokasite eba okolinalo dopamo nilakapolo dikalamolenaki ebe kaliku.<sup>40</sup> Ebe tetelo Pitate ibi bilibilinomo Dokasikono wata baine palibolete, ebe a:ka:tuwa: pupamo okolite Godoko ebo toweomiya, ebene ebete a:e kamiyaletamo olobigate ebe naniya, “Tabita, a:ma: nemaiga!” Ebe tetenomolo ebete ebene balidi paeamidaletate Pitako dumiya ebene wata baine maigate gito okoliya,<sup>41</sup> ebene Pitate koto uwamidate ebete kemaigama: eba walubilo, ebete amoleamole ega:walo nanitabokobi midipi epetapi ka:la:mite Dokasiko iba:tamo ebo ikalamiya.<sup>42</sup> Nanitabola, me tabote Yopa duliyaomolo kawonomamo da:tiya epo bilibilinomate Kawodawa Ya:suko nanitabokobi ebo midiya,<sup>43</sup> ebema: Pitate egela epetapi bilibilidopo ebe duliyaomololo okoliya Saimonokono motolo, ebe dubu kau-goeogoeono tamamo inamabu osiyodiledawala.

## 10

### *Koniliyasite Pitako Ka:pema: Tabo Danaliboni*

<sup>1</sup> Ebe tetelo dubu idite Sisaliya kawo duliyaomololo nokolinami, ebene mailo Koniliyasitela, ebe Loma epono gowelaopino elawodubu idila, ega:walo ebene gowelaopino taneba mailo ebe Itali Epono Tanebapila.<sup>2</sup> Ebete ebene osiyodilole magumulo Godotamo na:tuduwatanami, ma kunu ebete ebene moto epago Godoko amamatenamiya, ega:walo tete epetapilo ebete Yu epo nigologololo dilukulionamiya ebe epo nilakapolo walubilinaki, ega:walo egela bilibilinomolo ebete Godotamo towetowe tabo kiyawaonaki.<sup>3</sup> Ebene egela idilo egelate kela:mo da:niwisigatepani, ebe tete 3 koloko tetela, ebene balidite iyama: eba eda:omenalo Godokono nopodawa wadenomamo ebo umini. Nopodawate ebetamo popeganate na:peka:mini, “Koniliyasi!”

<sup>4</sup> Ebe tetelo Koniliyasite nopodawa tola:go eba umionalo ebetamo negeni, “Kawodawa, beda:la:ka:?”

Nopodawate ebe nowaimini, “A:ma:le towetowe tabo Godotamo degeawenaka ega:walo nigologolopiatamo nilakapo tanalo dosiyodilola:wenaka, ebe mabuma: Godote a:ma:tamo nekalakalana, ebe ubila wade tanalo idi a:ma:tamo osiyodiloma:.”<sup>5</sup> Ebema: a:ma:le ka:lo dubu epetapi nalibola: Yopa duliyaomolamo, iba:te dubu idi Saimono Pitako kemagaema:.<sup>6</sup> Me dubu Pitako ebe Saimono idi kau-goeogoeono tamamo inamabu osiyodiledawano motolo okolina, ebene moto kewa: kolomo balalo a:emena, ebene a:ma:le kebe dubu kanalibola:emene, iba:te ebamo nemaimiote Pitako ebo ka:nuima:na:.”

<sup>7</sup> Ebe tetelo Koniliyasitamo da:kiyawaoni ebe nopodawate ebegodone da:toni, ebete ebene moto guno wokopi netewa ega:walo gowelaodawa dubu kapiya ebo ka:la:mini, ebe gowelaodawa dubute Godotamo na:tuduwatanami ega:walo ebe Koniliyasikono wade opodawa idila.

<sup>8</sup> Ebene Koniliyasitamo kebe tanalote ka:pemaiganile, ebete ebe tanalo ibi analenate Yopa duliyoumolamo ebo aliboleni.

<sup>9</sup> Egela idilo iba:te Yopa duliyoumolo niyakabamo nemaima: eba tolame-natolo, Pitate egela tuli tetelo Godago tabo gelama: moto unamo a:ka:tuwa: gito nodoliya. <sup>10</sup> Ebe tetelo ebena tepo magumulo bae kape tanalo eba iyatawitalo bae nama: ubi niyatiti, wiyasiya moto epate bae ka:ma: eba osiyodilutalo ebena balidite iyama: ebo eda:omiya. <sup>11</sup> Ebene Godote Unu Duliyoumolo a:iyamiditalo Pitate ebo umiya, ebegodone inamabu idite piwisigiya, kaliku kawonomo ubuwomu netewa-netewa uwatelemete opamo ebo puwamidiya. <sup>12</sup> Nanitabola, ebe kaliku magumulo digilona ebe iyaiya inamabu bilibilinomate pola:niya, ma kunu agowamo wapata:lamole inamabu, tepamo wapata:lamole inamabu, ega:walo olaola bilibilinomo, Pitate ebakobako inamabu ulamiya. <sup>13</sup> Ebene tabote ebetamo ma kunu piwisigiya, “Pita, a:ma: maigawete inamabu idi anakapuma:wete nena!”

<sup>14</sup> Wiyasiya Pitate negiya, “Ao, Kawodawa, na modoboa! A:ma:le a Yu epatamo dopamo dalomoama:wiyala, nale ebe talena kadikamidalenakia: Nale makomako kuba goeogoeo, kalu, ega:walo olaola kenaonakoa!”

<sup>15</sup> Ebene walo ebetamo tabo idite ka:piya, “Me tetelo Godote kebe inamabu wadewadenoma: degena, a:ma:le ebe inamabu kubakubanoma: akogeala:” <sup>16</sup> Ebene Godote Pitatamo ebe tanalo netewa-kapiya teta:mo osiyodilote, ebe inamabuagono kaliku Unu Duliyoumolamo walo gito kelawa:digiya.

<sup>17</sup> Ebe tetelo Pitate me tanalono magumuma: woki bilibilima: eba editalo, Koniliyasite adimo idilo daliboleni ebe dubate Saimonokono moto niyatawaote ebe motono kala ga:dimi gigiyulo ebo nelamota:oniya. <sup>18</sup> Ebene iba:te moto epo nalateda:liya, “Saimono Pitako me motolo ba:ka:lutale?”

<sup>19</sup> Ebe atu tetenomolo Pitate kebe tanalo kumiyale ebe tanalono magumu eba waditalo, Godokono Uliyanate ebe naniya, “Gigiyu niyakabolo dubu netewa-kapiyate a:ma: ba:powaditata. <sup>20</sup> A:ma: maigawete iba:tamo na:niwisiga. A:ma: ibino tabo dolowiaemene iba:go toma: woki bilibilima: akoeda:la:, mabu ibi nale palibolimo.”

<sup>21</sup> Ebe tetelo Pitate ebe dubatamo piwisigate na:pegiya, “Na la:le dowadina:witama, ebe dubula. La: beda:ma: ka:pelama:ema?”

<sup>22</sup> Iba:te ebetamo nowamiya, “Gowelaopino Elawodubu Koniliyasite dutu adimolo a a:ma:tamo paliboeni. Ebe tuputupudawala, ebete nani Godo ebe amamatena ega:walo Yu epo bilibilinomate ebe wadedawanomoma: gelana. Godokono nopodawa idite ebe anani a:ma:le ebena motamo ka:pa:ema:, ebena ebete a:imano tabo kolowimene.” <sup>23</sup> Ebema: Pitate ibino tabo olowite moto guamo magatalete ebe idokolo ibi wadenomamo walubilini.

### *Pitate Koniliyasiko Ka:nowalubima: Da:tiya*

Ebena egela idilo Pitate maigate ebe dubago na:tiya, ega:walo Yopa duliyoumolone nanitabokobi midipi dubu epetapiate iba:go a:ka:tolamiya. <sup>24</sup> Iba:te gabo tetelo nelaonate, egela idilo Sisaliya kawo duliyoumolamo ebo nemaimiya, wiyasiya iba:te Koniliyasitamo nemaimia:no, ebete dopamo ebena eponomo ega:walo ebena namutupi epetapi ka:la:mite, iba:te ebena motamo paladabutite Pitako ebo pemakopelitiya. <sup>25</sup> Ebene Pitate ebamo pemaigate motamo opegama: eba nowagelitalo, Koniliyasite eba:go palugote ebena agowa mabuamo pa:tuduwatalo ebe ebo pamamatiya. <sup>26</sup> Pitate wiyasiya ebe adipatelo negiya, “A:ma:le na akoamamanatena:la! A:ma: nemaiga, mabu na me opo lumagila, a:ma: keba kunula:ka: eba kunula.”



<sup>27</sup> Ebene Pitate eba:go tabo kiyawaoago moto guamo eba nopila:olo, epo bilibilinomate iyalo aladabutite eba pola:nalo ebo nulamiya. <sup>28</sup> Pitate iba:tamo negiya, “La: iyatawalata a Yu epagodolo talena bitana Yua: lumagi idino motamo odoloma:, ega:walo ale Yua: lumagiago akaladabutima:, wiyasiya Godote tanalo idi na iyatunami, nale lumagi iditamo ubia:noma: eba eda:lo daleyagonoma: a:kegemo. <sup>29</sup> Ebema: la:le natamo tabo dapalibawenima, na ebe tabo olowite woki bilibila:go ka:pea:, kalakalago pemo, wiyasiya niyaniyata, la:le natamo tabo beda:ma: kanalibawenima?”

<sup>30</sup> Ebene Koniliyasite ebetamo nowamiya, “Netewa-kapiya egele da:ponolopoligi kawo tanalo idite natamo a:pemaigani. Ebe tetelo egelele kela:mo da:niwisigatepani nale naimano motolo Godotamo towetowe tabo negenimo, ebene dubute a:la:uwa:da:le kalikago pawokalanate naimano dopo apulo utinalo uminimo. <sup>31</sup> Ebete natamo negeni, ‘Koniliyasi! Godote a:imano towetowe tabo olowi ega:walo a:imano nilakapo osiyodilo tanaloma: nekalakalana. <sup>32</sup> Ebema: a:ma: tabo nanalibiye Yopa duliynomolamo Saimono Pitate ka:pema:, ebete Saimono idi kaugeogoeo tamamo inamabu osiyodiledawano motolo okolina, ebene moto kewa: kolomo balalo a:emena.’ <sup>33</sup> Ebema: nale tabo samonomamo palibonimo a:ma:le ka:pa:ema:, ka:lo a:ma: a:pa:ta. Kalakala kawonomola, a bilibilinomate malo Godokono ololo apulo ba:pola:nama:, Kawodawa Godote a:ma:tamo dikametia ebe tabo ale wadenomamo kolowiomalema:.”

#### *Pitate Koniliyasikono Motolo Ya:sukono Wade Tabo Da:kiyawaiya*

<sup>34</sup> Ebene Pitate tabo kiyawao eba wagilimilo negiya, “Nanitabola, na iyatawamo Godote epono unu tama kulamelelamena:, <sup>35</sup> ebema: me opo kawonomolo iyaiya epono taneba magumulo kebe lumagite Godotamo tuduwatalo tuputupu tanalo dosiyodilolenamene, ebete ebe lumagitamo bekalakanamene.

<sup>36</sup> “Godote dopamo a Isalaela epatamo dapalibi, la: ebe tabo iyatawalata, iyo, ebete ebe Wade Gelebadi Tabo atamo Ya:su Kelisodo apawokalimi, Ya:suko ebe me opo epo bilibilinomono Kawodawala. <sup>37-38</sup> Ega:walo la: me kawo tanalo idi iyatawalata, Yoneko epo obamo waduba:midaoledawate Godokono tabo da:pa:kiyawai, Nasaleta duliynomolodawa Ya:sute ebene woko ebe tetelo wagilimi, iyo, ebene tanalote Ga:lili opolo dopamo pawokalate Yudiya opo kawonomamo ebo nemaigi. Ebema: la: iyatawalata, Godote ebe lawete ebene Talena Uliyanano elawo ebe unamo dadipani, ebe mabuma: ebete wadewade tanalo osiyodilola:go eba pata:lo, Saitanate ala:mo dematuolamololenami ebete ebe epo bilibilinomo wadekobi a:midiolenaki mabu Godote eba:go nokolinami. <sup>39</sup> Ebema: numa:la:, Ya:sute a Yu epono opolo ega:walo Yelusalema kawo duliynomololo dosiyodilolenaki, ebe tanalo ale aimano balida:mo dulamenakima:, a ebema: gelanama:. Nanitabola, epate ebe kewa olotolowamo tupuguimite ikoko anagilamolemete ebo anakapumiya, <sup>40</sup> wiyasiya netewa-kapiya egelele Godote ebe a:ene igilamo adipatelo epatamo ebo awokalimi.

<sup>41</sup> “Wiyasiya Ya:sute a:e magumune demaigi epo bilibilinomatamo kawokalima:, ao, Godote ebene ubilo kebe epo Ya:sukono tanalo awokalima: iyalo deka:la:mioliya, ebete a kapiyakapiyatamo pawokali. Ebema: nanitabola, tete epetapilo ebete ago bae enanaki, <sup>42</sup> ebene tete idilo ebete a anai ale epatamo Godokono Wade Tabo kawokaliminakoma:. Ale me tanalo ebema: awokaliminama:, piyate igilolo dilukuliona ega:walo piyate dopamo da:elaiya, Ya:sute ebe epo bilibilinomono tanalo kanagilamelelaemene, mabu iyalo tetenomolo Godote ebetamo ebe woko ikamiya.

<sup>43</sup> Iyo, nanitabola, Godokono woki awokalimipi dopamo dilukulinamiya ibi bilibilinomate Ya:sukono tanalo ma kunu awokaliminakiya, piyate ebe nanitabokobi da:midima:na: Godote ibino kuba Ya:sukono mailono elawamo egebolelamete ka:dodolomatililaemene.”

*Godokono Uliyanate Yua: Epatamo Da:piya*

<sup>44</sup> Pitate me tabo eba kiyawautalo, Godokono Uliyanate tabo olowiopi bilibilinomo unamo ebo piwisigiya. <sup>45</sup> Ebene Yu epo nanitabokobi midipi epetapiate Yopa duliynomolone Pitago da:pelamiya, iba:te ebe tanalo umite kawonomamo anoanoutiya, mabu Godote ebena Uliyana Yua:pi unamo nilakapolo gito adipaniya, dopamo ebete Yu epatamo keba kunu kikalamiyale eba kunu. <sup>46</sup> Iyo, Yua:piate Godokono Uliyanano elawamo Unu Duliynomolono nopopino iyaiya tabamo ebe eba walogutalo, Yu epate ebo olowiutiya, ebema: Pitate ebena namutupiatamo negiya, <sup>47</sup> “Numa:la:, me epate Godokono Uliyana elawa:, ale dopamo delaima: eba kunu. Ebema: ale ibi obamo waduba:midaolema: modobola, me wade tanalo osiyodiloma: lumagi idite a a:kodiyoboemene.”

<sup>48</sup> Ebene Pitate ibi epetapi nanaliya iba:te Ya:su Kelisokono mailamo Yua:pi obamo kowaduba:midaolema:. Iba:te ebe tanalo osiyodilo dolopoligiya, Koniliyasiate Pitako ebo toweomiya egela epetapi iba:go kokoliatepama:.

## 11

*Pitate Yelusalema Sosi Watowatopiatamo Ebena Osiyodilo Tanalo Dapawokalimiya*

<sup>1</sup> Ebe tetelo Yudiya opo kawonomolo dilukulinamiya ebe alibolepi dubu ega:walo nanitabokobi midipi ekaki epetapi, iba:te me tanalo olowiya Yua:piate Godokono tabo delawiya. <sup>2</sup> Ebema: Pitate Yelusalema kawo duliynomolamo da:piya ibi epetapiate ebe kawiya aniya, mabu iba:te negelanakiya Yua:pi dubate Yu epono tama itamida pukala uwatea:no iba:te nanitabokobi midipiago kapiyakobi ako-olowiala:. <sup>3</sup> Ebema: iba:te Pitatamo negeliya, “A:ma: beda: mabuma: tama itamida pukala uwatea:pino motamo gito nodolawete iba:go bae beda:ma: ka:nenawia? A:ma: aimano kawo pukala nadikamidaliata!”

<sup>4</sup> Ebema: Pitatamo kebe tanalate ka:pemaimiyale, ebete ebe tanalono wagilame mabune wagilimite wadenomamo ma kunu awokalilamiya, <sup>5</sup> “Na Yopa duliynomololo eba nokolinatelo egela idilo Godago tabo degelitima: naimano balidite iyama: ebo eda:onami. Ebe tetelo Godokono Unu Duliynomolone inamabu idite piwisigitalo uimo, ebete kaliku kawonomo ubuwomu netewa-netewa uwatelemete natamo ebo puwamidi. <sup>6</sup> Ebe tetelo nale tatalinomolo utite kaliku magumulo da:pola:ni ebe inamabu wadenomamo ulaimo, agowamo wapata:lame dabiola inamabu, ega:walo iyaiya dabiola: goeogoeo epetapi, ega:walo tepamo wapata:lame inamabu, ega:walo olaola bilibilinomo. <sup>7</sup> Ebene tabote natamo ma kunu pi, ‘Pita, a:ma: maigawete, inamabu idi anakapuma:wete nena!’

<sup>8</sup> “Wiyasiya nale negimo, ‘Ao, Kawodawa, na modoboa:. A:ma:le dopamo a Yu epate naoma: talena dalomoama:wiyala, nale makomako kubakuba inamabu kenaonakoa!’

<sup>9</sup> “Ebena tabote walo Unu Duliynomolone na:ka:pi natamo, ‘Me tetelo Godote kebe inamabu wadewadenoma: degena, a:ma:le ebe inamabu kubakubanoma: akogeala:.’ <sup>10</sup> Ebene Godote natamo netewa-kapiya teta:mo

ebe tanalo osiyodilote, ebe inamabuagono kaliku Unu Duliynomolamo walo gito kelawa:digi.

<sup>11</sup> “Ebene ebe tetenomolo Sisaliya duliynomolone natamo dapaliboli, ebe dubu netewa-kapiyate nale dokolinatimo ebe motamo ebo pemaimiya. <sup>12</sup> Ebe tetelo Godokono Uliyanate na niyatunami nale woki bilibilia:no iba:go ka:toma:, ebema: me nanitabokobi midipi sikisi ekaki Yopa duliynomolone nago Sisaliya duliynomolamo tolamete Koniliyasikono motamo ebo nodoloima:. <sup>13</sup> Ebene adimo idilo Godokono nopodawate Koniliyasitamo dapawokalani, ebete ebe tanalo a ebo anai. Ebe nopodawate ebena motolo dutini ebetamo negeni, ‘A:ma: Yopa duliynomolamo tabo nanaliba Saimono Pitate ka:pema:. <sup>14</sup> Ebete pete Godokono tabo da:pa:kiyawawaomene, ebe gabodo a:ma: ega:walo a:imano moto epo la: bilibilinomate igilo mula: tanalo Godogodone kelaemamota.’

<sup>15</sup> “Ebene nale Koniliyasikono tabo olowite tabo kiyawao eba wagilimilo, Godokono Uliyanate ibi unamo ebo iwisigi, dopo tetelo atamo diwisigi eba kunu. <sup>16</sup> Ebe tetelo Kawodawa Ya:sute dopamo da:kiyawai, nale ebena tabo walo na:kemalagidilimo. Ebena tabo ma kunula, ‘Yonete la: obonomamo dowaduba:midaoletia, wiyasiya Godote la: ebena Uliyanamo kowaduba:midaolema:ta.’ <sup>17</sup> Nanitabola, Godote ebena Uliyana Yua:piatamo ma kunu ikalami, dopamo ebete atamo dikaeami eba kunu, ale Kawodawa Ya:su Kelisoko nanitabokobi da:midima: ebe tetelo. Ebema: na potelela:ka:, nale Godoko odiyoboma: dowagelenamo? Nale Godokono elawo iba:godolo duimo Yua:pi obama ebema: waduba:midaolimo.”

<sup>18</sup> Ebe tetelo sosi watowatopiate Pitakono tabo olowite ebena osiyodilo tanaloma: odiyobo tabo idi kegeliya:, wiyasiya iba:te Godoko eba moiolo negeliya, “Nanitabola, Godote atumu Yua:piatamo wade tete ikalami, iba:te kuba woki magumune olobila:te Godokono nanitabo igilo kelaema:.”

### *Ya:sukono Wade Tabote A:ntiyoka Kawo Duliynomolamo Da:piya*

<sup>19</sup> Me tanalo idila. Yu watowatopiate Stibiniko danakapumiya ebe tetelo ibino dowo tanalote elawonomoma: ediya Ya:suko nanitabokobi midipi-atamo, ebema: iba:te Yelusalemane iyaiya alautiya, epetapiate Ponisiya opamo, epetapiate Saipalase opamo, ega:walo epetapiate A:ntiyoka kawo duliynomolamo, iba:te eba kunu alautiya. Ebene iba:te ebe iyaiya opolo eba nilukulionalo, iba:te dopamo Yu epo kapiyatamo Ya:sukono Wade Tabo kiyawao ebo nowagilimiya. <sup>20</sup> Wiyasiya Saipalase opo epo ega:walo Sailiniya opo epo, ibino nanitabokobi midipi epetapiate A:ntiyoka kawo duliynomolamo da:pelamiya, iba:te Kawodawa Ya:sukono tanaloma: Wade Tabo Yua:piatamo atumu ebo pa:kiyawaiya. <sup>21</sup> Ebe tetelo epo bilibilinomate ibino tabo nanitabokobi midite Kawodawa Ya:sutamo ebo olobiliya, mabu Kawodawano elawote iba:godolo nitanami.

<sup>22</sup> Ebene Yelusalema kawo duliynomolono sosi watowatopiate ebe tanalo olowite Banabasiko ebo palibiya A:ntiyoka kawo duliynomolamo. <sup>23</sup> Ebete ebama da:pemaigiya Godokono nilakapo tanalote ibino taneba magumulo woko dosiyodilonami ebe tanalo pumite kawonomamo pekalakaliya, ebema: ebete ibi nanaliya iba:te ibino tepo magumu kodakodailamete Kawodawa Ya:suko magumulo nanitabonomolo kilukulinama:. <sup>24</sup> Nanitabola, me Banabasiko ebe wade dubunomola, Godokono Uliyanate ebe etabokaimiya ega:walo ebena nanitabokobi midi tanalote kawonomoma: eda:nami, ebema: Godote ebena wade woko eba osiyodilolo epo bilibilinomate Kawodawa Ya:sutamo ebo olobiliya.

<sup>25</sup> Ebene Banabasite Tasase kawo duliyoumolamo gito tiya Soloko ka:nuima:. <sup>26</sup> Ebete ebe numite A:ntiyoka kawo duliyoumolamo gito magariya, ebene ibi netewapiate kapiya ulama magumulo sosi epago daladabutinakiya, iba:te epo epetapi bilibilinomo ebo iyatulamenakiya. Ebe tetelo A:ntiyoka duliyoumolo epo epetapiate Ya:suko waloma:tapi ebene mailamo ka:la:milo Kelisoko modobo epoma: ka:la:mi ebo wagilimiya.

<sup>27</sup> Ebene Godokono woki awokalimipi dubu epetapiate Yelusalema kawo duliyoumolone A:ntiyokamo gito tolamiya. <sup>28</sup> Ibino taneba magumulo dubu idi A:gabasite maigate Godokono Uliyanano elawamo tabo ma kunu kiyawaiya, “Me opo kawonomolo tete geyageyadopolo nao inamabuante kolopoligoma:na!” Ebema: ebe tanalote walone nanitabonomolo a:pemaigiya, Loma epono Kawo Elawodubunomo Kolodiyasiko tetelo. <sup>29</sup> Ebene Ya:suko waloma:tapiate ebe tanalo olowite tabo ma kunu iyatiya, ibi bilibilinomagodolo kebako manite modobolo ka:pola:niyale, ebe mani alomote iba:te Yudiya opolo dilukulinamiya ebe nanitabokobi midipi ekaki nilakapolo ka:nowalubilima:. <sup>30</sup> Ebema: iba:te eba kunu osiyodiliya, ebe mani iba:te Banabasiko ega:walo Soloko ibino kotamo alomote ebo aliboliya Yelusalema sosi watowatopiatamo.

## 12

### *Kawo Elawodubu Elodite Sosi Epatamo Kawokawo Temeteme Dikalamiya*

<sup>1</sup> Ebe atu tetelo Yelusalema kawo duliyoumololo Kawo Elawodubu Elodite kawokawo temeteme sosi epatamo ikalame ebo wagilimiya, <sup>2</sup> ma kunu ebete gowelaopi naliboletete, iba:te Yonekono naniwi Ya:imesiko nelawete idoko motolo gowelaono gila:mo ebe ebo anakapumiya. <sup>3</sup> Ebema: nanitabokobi midia: Yu epo epetapiate ebene osiyodilo tanaloma: dekalakalautiya, Elodite ebe tanalo iyatawate Pitako atumu anakapuima: ubi na:kiyatiti, ebene Yu epate ibino Unamo Maiga: Palowa Bae Soliyomu\* eba osiyodilutalo ebete Pitako ebo lawiya. <sup>4</sup> Ebene Pitako idoko motamo eba nalibolo Elodite ebene gowelaopi epetapi gito nalomiya iba:te ebe wadenomamo ka:numinatema:. Ebe gowelaopiate Pitako eba uminatelo ibino netewa-netewa tanebalo pola:niya, taneba idilo powa, taneba idilo powa, iba:te eba kunu pola:niya, mabu Elodite ubi niyatiya, Aduga:la Soliyomu† dolopoligomene ebete Pitako powolukote epono ololo apulo ebene tanalo anagiyamidamete ebe ebo kanakapuima:. <sup>5</sup> Ebema: Pitate ebe tete eba makopelelo idoko motolo ebo okoliya, wiyasiya sosi epate ebe mabuma: Godotamo kawonomamo towetoweonamiya.

### *Idoko Idilo Godote Pitako Idoko Motone Da:powolukoni*

<sup>6</sup> Elodite Pitako epono ololo apulo anakapuima: degiya, ebe egela pea:no idoko idilo Pitate gowelaopi dubu netewapino tetelo watani, auli ale ma:midaolemela, ega:walo ebe idokolo gowelaopi epetapi dubu netewate idoko moto gigiyulo nelamota:niya. <sup>7</sup> Ebene ebe tetelo Kawodawa Godokono nopodawate pawokaladiganate eba utinalo alote idoko moto gu ebo pukuimini. Ebete Pitako bala apune ologilo eba amutiyanalalo nanani, “Pita, samamo nemaiga!” ebene ebete ebe tabo eba genalo Pitakono kotono auli alete a:ka:tuwa: ebo palamila:olemeni. <sup>8</sup> Ebene Godokono nopodawate ebetamo negeni, “A:imano apeno inamabu pupuliawete agowa inamabu

\* **12:3:** Buka ka:la:mioledawa, a:ma: me Soliyomuno magumu iyatawama: ubi diyata:emene, modobola a:ma: Ma:t 26.17 buka apuno walubi tabo numiye. † **12:4:** Buka ka:la:mioledawa, a:ma: me Yu epono Soliyomu idino magumu iyatawama: ubi diyata:emene, modobola a:ma: Ma:t 26.2 buka apuno walubi tabo numiye.

na:ka:pupuliya.” Pitate ebe tanalo osiyodilonate nopodawate ebe walo nakanani, “A:ma: a:imano lubudino kaliku pula:wete na nowaloma:ena:.”

<sup>9</sup> Ebene Pitate ebe eba waloma:tanalo Godokono nopodawate ebetamo dosiyodiloni ebe tanalo ebete iyolo numinamu geni. <sup>10</sup> Iba:te eba kunu eba tonalo atila:dawa idi nodolinate, idi ka:nodolinate, eba kunu iba:te idoko motono auli gigiyamo ebo nemaiminiya. Ebe tetelo kawokawo gigiyate a:ka:tuwa: alagilionate iba:te duliynomolo teta:mo gito nemaiminiya, ebene iba:te duliynomolo magumuno gabo idido kela:mo tonate Godokono nopodawate Pitagodone gito nalatidini.

<sup>11</sup> Ebe tetelo Pitate wade woki lawenate negeni, “Nanitabola, na ka:lo iyatawamo Kawodawa Godote ebene nopodawa apalibo, iyo, ebete na Elodikono elawo magumune a:powolukone, ega:walo nanitabokobi midia: Yu epo epetapino kuba ubi tanalo magumune ebete naimano igilo a:mula:name.”

<sup>12</sup> Ebema: ebete me tanalo diyatawani ebete Yone Makakono menoko Ma:likono motamo gito toni, mabu nanitabokobi midipi bilibilinomate ebamo iyalo aladabutiniya iba:te Godotamo towetowe tabo Pitako mabuma: kegelanama. <sup>13</sup> Ebene Pitate gigiyu eba nanakaminalo, woko buwele idi ebene mailo Laudate gigiyu a:iyamidama: eba penalo, <sup>14</sup> ebete Pitakono tabo madodo polowinate gigiyu a:iyamida:no kalakalago puliganate, Pitate gigiyu niyakabolo da:putini ebe tanalo ebete epo ebo nanaleni.

<sup>15</sup> Iba:te ebetamo nowaminiya, “Ao, a:ma: nedaedalenata!” Wiyasiya ebete ebene tabo nanitabonomoma: walo da:kegeni, iba:te woki iyakobi midilinate negelaniya, “Diyala, Pitate iyalo a:ete Godokono nopodawate ebene ololamo da:pele.”

<sup>16</sup> Iba:te ebe tabo eba gelanalo wiyasiya Pitate gigiyu anakami katepania:, ebema: iba:te pelamenate gigiyu da:pa:iyamidaniya Pitako uminate kawonomamo anoanoniya. <sup>17</sup> Ebe tetelo Pitate ebene kotamo epono kalakala diyamo eba odiyobolenalo, Kawodawa Godote ebe idoko motone keba kunu ka:powolukonile ebe tanalo ebete ibi ebo analeni. Ebene ebete iba:tamo negeni, “Me tanalo Ya:imesiko ega:walo aimano nanitabokobi midipi epetapi nananaliyala:.” Ebe tetelo Pitate ibi miyapanate diya gabodo moto ida:mo gito toni gabamaniate ebe walo lawekapoma:.

<sup>18</sup> Duiya idilo egelate da:powaloia ebe tetelo idoko moto atila:pi dubate Pitako idoko motone keba kunu ka:nemaiganile, iba:te ebe mabuma: kawonomamo eba anoanoutalo woki bilibilinomoma: eda:utiya. <sup>19</sup> Ebene Kawo Elawodubu Elodite ebe tanalo dolowiya tabo ebo iyatiya Pitako kowadima:, wiyasiya iba:te ebe nipo wadiya. Ebe tetelo Elodite ibi Pitakono tanaloma: kawonomamo dalateda:liya, wiyasiya iba:te nanitabo tanalo awokalima: ka:modobutiya:, ebema: ebete ebene gowelaopi epetapi analiya iba:te ebe idoko moto atila:pi gito kanakapulaema:.

### *Godote Kawo Elawodubu Eloditamo Kuba Wiya Dikamiya*

Ebe tanalo dolopoligiya walogabo apune Kawo Elawodubu Elodite Yudiya opone Sisaliya kawo duliynomolamo gito tiya tete geyageyadopolo ebolo ka:nokolinama:. <sup>20</sup> Ebene tete idilo ebete Taya ega:walo Saidono kawokawo duliynomolo netewatamo kawonomamo da:dowiya, ebe mabuma: ebe epate woki bilibilinomoma: eda:iya mabu ibi bilibilinomate Elodikono opolo bae uwatenakiya. Ebe tetelo iba:te Sisaliya kawo duliynomolamo pelamete Kawo Elawodubuno moto umidawa Balastasiko dopamo napaniya ebete ibi mabuma: Elodiko gelebadikobi ka:midima:.



<sup>21</sup> Ebema: Elodite iba:go tabo ka:kiyawaoma: kebe tete kiyatiyale, ebe tete da:piya ebete ebenu kawo elawodubuno inamabu pupulite tabo anagiyamida bailo eba okolitalo iba:tamo tabo ebo kiyawaiya. <sup>22</sup> Ebema: iba:te Elodikono tabo dolowiya, ebe eba moiolo kawonomamo gelalo nowaimiya, “Atamo da:kiyawauta ebe opo lumagia:, ebe aimano Godotela!” <sup>23</sup> Ebene Elodite ebe tabo kalakalago lawete wiyasiya nani Godo kadipatiya:. Ebe mabuma: Kawodawa Godokono nopodawate ebe tetenomolo ebe anagalimite, ebenu ukate ebenu apa:mo opila:ote ebenu tepo magumuno inamabu naome eba wagilimilo gito a:iya.

<sup>24</sup> Ebe tetelo Godokono tabote ebe opo kawonomamo eba petolo kawonomoma: ebo ediya. <sup>25</sup> Ega:walo ebe atu tetelo Banabasiko ega:walo Soloko iba:te Yelusalemalo woko osiyodiloma: da:tiya, ebe woko nopoliyate iba:te A:ntiyoka kawo duliynomolamo walo eba kolowamilo Yone Makako ebo magaiya.

## 13

### *A:ntiyoka Sosi Watowatopiate Banabasiko Soloko Oli Wokamo Daliboliya*

<sup>1</sup> Ebe tetelo A:ntiyoka kawo duliynomolono sosi magumulo Godokono woki awokalimipi dubu epetapi ega:walo iyatulamepi dubu epetapi bilidilidopo iba:te ebolo nilukulinamiya. Ebe dubuno mailo Banabasiko, ega:walo Simiyonoko ebenu mailo idi Kilikilidawala, ega:walo Lusiyasiko ebe Sailiniya duliynomolodawala, ega:walo Manayaneko, ebe gudu da:peso tetelo Kawo Elawodubu Elodikono menokote dabinami, ega:walo Soloko.

<sup>2</sup> Ebene egela idilo iba:te Kawodawa Godoko eba amamatitalo ebete ibino tolame gabo wadenomamo kiyatulaema: bae naoa:no pola:niya. Ebe tetelo Godokono Uliyanate ibi nanaliya, “La: Banabasiko Soloko ibi netewapi naimano tanaloma: iyabaiamo nalomala:. Ibi nale iyalo eka:la:miyamo iba:te naimano woko idi kosiyodilonama:.”

<sup>3</sup> Ebene iba:te bae naoa:no eba pola:nalo, ibi netewapi mabuma: Godotamo towetowe tabo gelate, koto iba:tamo watiolamete oli wokamo ebo aliboliya.

### *Banabasiko Soloko Iba:te Saipalase Opolo Ya:sukono Wade Tabo Da:kiyawaiya*

<sup>4</sup> Ebe tetelo Godokono Uliyanate Banabasiko Soloko danaliboliya, iba:te Selusiya duliynomolamo nemaimite ebolo kawo palai pe lawete kewa: kolomo apuamo gito na:iwiya Saipalase opamo. <sup>5</sup> Ebene ebe opono Salamasi duliynomolamo nemaimite iba:te Yu epono iyaiya balidi ibilamole motolo Godokono tabo kiyawaoago ebo nowapatiya. Ebe tetelo Yone Makate woko magumulo ibi nowalubilinatiya.

<sup>6-8</sup> Ebene iba:te Saipalase opodo eba petonatolo ebe opono duliynomolo ida:mo ebo nemaimiya, ebe duliynomolono mailo Peposala. Ebolo iba:te giwali dubu idi numiya, ebenu mailo Ba-Ya:sutela ega:walo ebenu mailo idi Guliki tabamo Elimasitela. Me dubu ebe Yu dubula, wiyasiya ebete epo eba iyatulamenalo a:da: tabo Godokono mailamo kiyawaonaki. Ebe tetelo Saipalase opono Kapela Kawo Elawodubu ebenu mailo Segiyasi Polasitela, ebete wade mulo wokiagodawama: eda:nami, ebenu ebete Banabasiko ega:walo Soloko ebetamo ka:la:miya iba:godone Godokono tabo kolowima:. Wiyasiya ebenu namutudawa Ba-Ya:suko ubia:nola, ebema: ebete Soloko ega:walo Banabasiko eba odiyobolelo Kapela Kawo Elawodubu naniya ibino tabo nanitabokobi akomida:la:. <sup>9</sup> Buka ka:la:mioledawa, modobola a:ma: niyatawa Solokono mailo idi Polotela, ebema: Godokono

Uliyanano elawote ebe eba tabokaimilo, ebete ebe giwali dubu balidi kodakodamo eba umilo kawiya ma kunu aniya, <sup>10</sup> “A:ma: Saitanakono gudu-lata, ega:walo a:ma: Godokono tuputupu tanalo odiyobodawama: eda:nata! Iyo, a:ma:godolo iyaiya elemasigi tanalo tabokanomola! Keleka: mabu a:ma:le Kawodawa Godokono tuputupu gabo dekalawikalawima:wenaka? <sup>11</sup> Ebema: ka:lo Godokono kotote a:ma: danagalimitamene a:imano balidite idokoma: keda:oema:ta, iyo, tete geyageyadopolo a:ma: egelano alo a:kuma:wenakomene.”

Ebe tetenomolo idoko tanalote ebene ape da:pa:muliya Elimasite ebene kotamo eba ologiatepalelo walubidawa wadiya ebe gabo kiyatuima: <sup>12</sup> Ebema: kebe tanalote kemaigiyale, Kapela Kawo Elawodubu Segiyasi Polasite ebe tanalo umite Godoko nanitabokobi ebo midiya, ega:walo ebete Kawodawa Godokono iyatumi tanaloma: kawonomamo anoanuti.

### *Polote Pisidiya Opono A:ntiyoka Duliyomololo Ya:sukono Wade Tabo Da:kiyawaiya*

<sup>13</sup> Ebene Polote ebene namutupiago ebe Peposa duliyomololo kawo palai pe lawete kewa: kolomo na:iwalete Pa:mapiliya opono Pega duliyomolamo gito tolamiya. Ebolo Yone Makate ibi miyapate Yelusalema kawo duliyomolamo walo gito ka:tiya. <sup>14</sup> Wiyasiya Poloiate Pega duliyomolone tolamete Pisidiya opono A:ntiyoka duliyomolamo gito nemaimiya, ebene iba:te Yu epono wokoa: talena egelalo ibino balidi ibilamole motamo nodolote epo epetapiago gito nilukuliya. <sup>15</sup> Ebene Mosesete Godokono Totomu Tabo ebene Bukamo dakuloliya ega:walo Godokono Woki Awokalimipiate dakuloliya, ebe netewa tanalo moto umipiate epatamo ebo ka:la:mioliya. Ebe tetelo iba:te Poloko ega:walo Banabasiko iba:tamo tabo ma kunu nalibiya, “Naniala:, la:godolo a kodakodaiaema: tabo ditanamene, modobola atamo negeliyala:.”

<sup>16</sup> Ebema: Polote maigate ebene koto unamo adipatelo negiya, “Isalaela epala:, ega:walo la: Yua:pi epetapi piyate nani Godo damamata:wenama, la: naimano tabo nolowiala: <sup>17</sup> A Isalaela epono ewoniate Isipiti opolo kapela epoma: eba eda:onal, aimano Godote ibi uwatelo taneba kawonomoma: ebo midiliya, ebene ebete ebene kawo elawamo Isipiti opone ibi ebo wagailiya. <sup>18</sup> Ebene iba:te 40 ulamamo bulu opolo eba wapata:lamenalo Godotamo temeteme nikamenamiya, wiyasiya ebe tete geyageyanomolo ebete ibi wadenomamo buiyalatelenami, <sup>19</sup> ega:walo ebete Ka:inane opolo iyaiya epono sebeni taneba alukolete ibino opo Isalaela epatamo gito ikalamiya. <sup>20</sup> Nanitabola, Godote ebe Isalaela epono ewoni Isipiti opone dowagailiya ebe tetene wagilimite, iba:te Ka:inane opo da:pelawiya ebe teta:mo pemaiga, ebe tetelo 450 ulama a:petoiya.

“Ebene Godote ibi kowalubilima: tabo anagilamepi dubu epetapi iba:tamo ikalamiya, me tanalote ebe tetene wagilimite Godokono woki awokalimidawa Sa:miyoloko teta:mo pemaigiya. <sup>21</sup> Ebe tetelo iba:te Sa:miyoloko naniya ibi magumulo kawo elawodubu kadipatema:, ebema: Godote Beniyaminakono gu magumulo Kisikono gudu Soloko iba:tamo ikalamiya, ebete 40 ulamalo ibino watodawama: keda:nama: <sup>22</sup> Wiyasiya Godote Soloko iyabaiamo eba iyatilo Da:ibidiko ebo adipatiya ebete ibino Kawo Elawodubu idima: keda:ma:. Ebe tetelo Godote Da:ibidikono tanaloma: tabo ma kunu kiyawaiya, ‘Nale Yesikono gudu Da:ibidiko uimo, ebene tepo magumu wadenonomola, na keba kunula:ka: eba kunula, iyo, ebete naimano ubi tanalo bilibilinomamo a:tuduwatanako.’

<sup>23</sup> “Ebene Godote kebe tabo dopamo nanitabonomolo kegiyale, ebe tabono tanalote a tetelo ma kunu pemaigiya, ebete Da:ibidikono walone gudu idi Ya:suko adipatiya, ebete Isalaela epono Igilo Mula:lelamedawama: keda:ma:.” <sup>24</sup> Ebene Ya:sute ebene woko wagilimia:no, dopamo Yonete Isalaela epo bilibilinomatamo Godokono tabo ma kunu pa:kiyawaiya, iba:te ibino kubane olobila:ote ebene ebete ibi obamo kowaduba:midaolema:.” <sup>25</sup> Ega:walo Yonekono woko opoliya tete detataliya, ebete ibi nanaliya, ‘La:le na poma: kegelawenakoma? Na Kelisotea:, ebete naimano walogabo apune ba:pena, iyo, na wadenoa: nale ebene agowa ukulaolema:.’

<sup>26</sup> “Ebema: naimano ekakiala:, la: piyate A:ibalayamakono walone gudima: deda:wenama ega:walo la: Yua:pi epetapi piyate nani Godo damamata:wenama, Godote ebene igilo mula: tabo a bilibilinomatamo apalibiya.” <sup>27</sup> Wiyasiya Yelusalema duliynomolo epo ega:walo ibino wato watopi iba:te Godokono woki awokalimipiate ebene Bukamo dopamo dakuloliya, ebe tabono iyaiya tanalo iba:te wokoa: talena egela bilibilinomolo eka:la:miolenaka, wiyasiya numa:la:, iba:te ebe iyaiya tabono nanitabo magumu wadenomamo kelawenakoa:.” Ebe mabuma: iba:te Ya:suko ubia:noma: eba eda:olo ebe anakapuima: tabo ebo iyatiya, wiyasiya iba:te kiyatawaiya: ebe osiyodilo tanalodo Godokono tabote nanitaboma: keda:mene.” <sup>28</sup> Ebe tetelo iba:te Ya:suko a:eamo kaliboma: ubi diyatiya ebene kuba nipo wadimiya, wiyasiya iba:te olodiyoboa:no Paeleteko walo nakapaniya ebete ebe kanakapuima:.” <sup>29</sup> Ebene Godote Ya:sukono tanaloma: kebe tabo apuapu ebene Bukamo dopamo dakuloliya, iba:te ebe tanalo epetapi bilibilinomo ebetamo osiyodiloliya, ebene ebete da:iya iba:te ebe kewa olotolowane owolukote nokola bobo magumamo gito iyatiya.” <sup>30</sup> Wiyasiya Godote a:ene ebe walo akadipatiya, <sup>31</sup> ebema: piyate Ya:suago Ga:lili opone Yelusalemamo da:tolamiya, ebete egela bilibilinomo epetapilo iyaiya tetelo iba:tamo pawokalanaki, iyo, iba:te ibino balida:mo Ya:sute a:ene igilamo maiga tanalo duminakiya, ka:lo iba:te Yu epatamo ebene tanalo ebema: awokalimina.”

<sup>32</sup> “Ale la:tamo degelitama:, me tabo ebe Godokono Wade Tabola. Numa:la:, ebete aimano ewoniatamo kebe tabo nanitabonomolo kegiyale, <sup>33</sup> ebe tabono tanalote a tetelo ma kunu pemaigiya, ebete Ya:suko a:ene adipatiya. Iyo, ebete Sam Oale Buka sapta 2 tetelo Ya:sukono tanaloma: ma kunu giya,

‘A:ma: naimano Gudunomolata,  
ka:lo na a:imano Nabiwima: eda:mo.’ ”

<sup>34</sup> Ebene Polote ebene tabo moga:melo walo na:kegiya, “Iyo, nanitabola, Godote Ya:suko a:ene adipatiya, ebema: ebene apete kabalema: bobo magumamo walo a:ka:toamene. Ebema: Godote ebene Bukalo tabo idi ma kunu kegiya,

‘Naimano gudu, nale Da:ibiditamoma:  
nanitabonomolo degiyamo,  
ebe talena ega:walo nanitabo tanalo bilibilinomo  
a:ma:tamo kikameomamota,  
uwomua: tetelo a:ma: kowalubitanama:.’

<sup>35</sup> Ega:walo Godokono Bukate tete idilo na:kegena,

‘Godo, a:ima:no elawo awokalimi magumudo

abale tanalote bobo magumamo a:ka:pemene  
a:imano Wade-talena Wokodawa ka:kubaima.’ ”

<sup>36</sup> Ebene Polote me tabono magumu awokalimilo walo na:kegiya, “Numa:la:, me tabote Da:ibidikono tanaloma: kegena:. Da:ibidite me opolo eba okolinalo ebete Godokono wokodawama: eda:nami, wiyasiya ebete da:iya iba:te ebena ape ebena ewonino bobo niyakabamo niyatite ebo abaliya. <sup>37</sup> Wiyasiya numa:la:, Godote kebe dawa a:ene dadipatiya, me lumagi Ya:sute bobo magumulo kabaliya:.

<sup>38-39</sup> “Ebema: naimano ekakiala:, ale kebe tabo la:tamo ka:kiyawautama: la: wadenomamo niyatawala:, Ya:suko modobola la:imano kuba egebole-lametate la: ebena tuputupupima: ka:midilitama:. Iyo, Godote Mosesedo atamo dikaeamiya ebe Totomu Tabote epono kuba osiyodilole tanalono ale palamililaema: modoboa:, wiyasiya piyate Ya:suko nanitabokobi da:midima:na: Godote kuba tanalono elawo magumune ibi kowagailimene. <sup>40</sup> Ebema: la: nanisiwale! La:le ebe nanitabokobi midia:no, Godokono woki awokalimipiate dopamo da:kiyawaiya ebe kuba wiyate la:tamo ka:pemaigamene! Iyo, Godokono tabote ibido ma kunu awokaliya,

<sup>41</sup> ‘Naimano iyaiya taboma:  
na demalogona:wenama,  
la: wadenomamo nolowiala:!  
Numa:la:, la:imano ilukulina tetelo  
nale kawo tanalo idi kosiyodilomamo,  
wiyasiya epetapiate me tanalono magumu  
la:tamo dawokalima:na:,  
la: nanitabokobi a:ka:mida:ema,  
ebe mabuma: la: naimano osiyodilo tanalo uma:wete  
eba anoanolo la: gito ka:elaomamota!’ ”

<sup>42</sup> Ebene tabo kiyawao dolopoligiya, Poloko Banabasiko iba:te Yu epono balidi ibilamole motone eba piwitilo, epate ibi nanaliya woko: talena egela idilo ebe atu iyaiya tanalo ibi walo ka:ka:piyatulaema:. <sup>43</sup> Ebene ibi bilibilinomate ebe aladabuti baine da:tolamiya, Yu epo ega:walo Yua:pi epetapi piyate nani Godo damamatenamiya iba:te Poloko Banabasiko eba waloma:talenatolo, ibi netewapiate wadewade tabo epetapiamo ibi ebo walubilinatiya iba:te Godokono nilakapo magumulo kodakodalo kilukulinama:.

*Iba:te Woko: Talena Egela Idilo Godokono Tabo Walo Da:ka:kiyawaiya*

<sup>44</sup> Ebene woko: talena egela idilo duliyaomolo epo bilibilinomate pelamoliya Godokono tabo olowioma:. <sup>45</sup> Ebe tetelo Yu epo epetapiate tabo olowiopino iyawa tanalo dumiya, ebema: iba:te kawonomamo eba dowao Polote da:kiyawaiya ebe tabo kubama: gelalo ebe ebo malogiya. <sup>46</sup> Ebene Poloko Banabasiko iba:te tolea:no ibino tabo eba wiyalo negeliya, “Godoko ubila ebena tabote la: Yu epatamo dopamo awokalama:, wiyasiya la: ubia:noma: eda:omata. Ebema: la: wadewadenoa: la:le Godogodone uwomua: igilo laema:, mabu la: a:ka:tuwa: la:tamo gigiyu emopimata! Ebe mabuma: ale la: eba miyapalo a wiyasiya Yua:piatamo ka:tomalema:. <sup>47</sup> Mabu Kawodawa Godote a eba paliboelo ebena Buka apuno tabo ida:mo a ma kunu totomuatiya,

‘Nale a:ma: eka:miyamata,

a:ma:le iyaiya opo epo bilibilinomatamo  
 aloma: ka:neda:wenama:,  
 ebema: a:ma:le me opo kawonomamo toawete,  
 epono igilo mula:lelame tanalo  
 iba:tamo katama:ta.' ”

<sup>48</sup> Ebene tabo olowiopi magumulo Yua: epate eba kalakalautalo Godokono tabo wadenoma: gelate ebe ebo moiutiya, ega:walo ibi magumulo Godote dopamo uwomua: igilamo deka:la:miya, ibi bilibilinomate ebena tabo nanitabokobi ebo midiya.

*Yu Watowatopiate Ibi Pisidiya Opone Elawamo Danaliboliya*

<sup>49</sup> Ebe tetelo Kawodawa Godokono tabote Pisidiya opo kawonomamo ebo tiya, <sup>50</sup> wiyasiya A:ntiyoka duliyaomololo Yua:piate Godoko damamate-namiya, ibi magumulo kawokawo kamiya epetapi ega:walo duliyaomolo watowatopi dubu, Yu epate ibino woki kubailamelelamete elawo ebo ikalamiya iba:te Poloko Banabasiko iba:tamo ka:dowaoma:. Ebema: ebe watowatopiate ibi netewapiatamo temeteme eba ikalamelelo ibino opone elawamo ebo naliboliya. <sup>51</sup> Ebene duliyaomolo watowatopiate ibi eba ulamitalo, Poloko Banabasiko iba:te ibino agowano tuwae moda:midatepaotelele ibi gito miyapiya, iba:te kiyatawaoma: Godokono tete na:pe ebete ibino kuba wiya iba:tamo ka:pikalaema:. Ebene Poloko Banabasiko iba:te Aikoniya duliyaomolamo gito tiya, <sup>52</sup> wiyasiya iba:te A:ntiyoka duliyaomololo da:miyapiya, ebe Ya:suko waloma:tapi Godokono Uliyanate ibino tepo magumu kawo kalakala tanalamo ebo tabokailamelelamiya.

## 14

*Poloko Banabasiko Iba:te Aikoniya Duliyaomololo Ya:sukono Tanalo Dawokalimiya*

<sup>1</sup> Ebene Aikoniya duliyaomololo Poloko Banabasiko iba:tamo atu tanalote ka:pemaigiya. Iba:te Yu epono balidi ibilamole motolo Godokono tabo wadenomamo eba kiyawautalo, Yu epo ega:walo Yua:pi bilibilinomo atumu iba:te Ya:suko nanitabokobi ebo midiya. <sup>2</sup> Wiyasiya Yu epo epetapiate nanitabokobi ka:midia:, ebema: iba:te Yua:pino woki eba kubailamelelelo elawo ebo ikalamiya iba:te nanitabokobi midipi ekakiatamo ka:dowaoma:. <sup>3</sup> Wiyasiya Poloko Banabasiko iba:te ebe Aikoniya duliyaomololo tete geyageyadopolu eba okoliolo Kawodawa Ya:sukono nilakapo kimalagidilo tanaloma: tolea:no gelanakiya, ebena Kawodawate ibino tabo elawokobi eba midilo iba:tamo elawo ebo ikalamenaki iba:te iyaiya anoano tanalo kosiyodilolema:. <sup>4</sup> Ebema: ebe duliyaomolo epo magumulo anagiyamida tanalote maigiya, epetapiate Yu epatamo utitatiya ega:walo epetapiate Ya:sukono alibolepi dubatamo utitatiya.

<sup>5</sup> Ebe tetelo Yu epo ega:walo Yua:pi epetapiate ebe duliyaomolono watowatopiago tabo iyatiya alibolepi dubatamo kawokawo temeteme eba ikalamelelo nokolamo mapelamete ebo kanakapulaema:. <sup>6</sup> Ebema: Poloko Banabasiko iba:te me tanalo iyatawate Laikoniya opono Lista duliyaomolo ega:walo Debi duliyaomolamo dalautiya, <sup>7</sup> iba:te ebe duliyaomolono opodo eba tolo Ya:sukono Wade Tabo ebo kiyawaonatiya.

*Polote Lista Duliyaomololo Agowa Tatai Dubu Wadekobi Da:midia*

<sup>8</sup> Lista duliyaomololo agowa tatai dubu idi okolinami, ebete menokono tepone ma kunu awokaliya, ebe pata: iyatawa:. <sup>9</sup> Tete idilo Polote Godokono



tabo da:kiyawauti ebe dubute nolowiti, ebene Polote ebe balidi kodakodamo eba umilo ebo iyatawiya ebene nanitabokobi midi tanalono elawo modobola Godote ebene agowa wadekobi ka:midilima:.<sup>10</sup> Ebema: Polote ebetamo kawonomamo negiya, “A:ma: maigawete, nuta:!” Ebe tetenomolo ebe dubute unamo pategate pata: ebo wagilimiya.

<sup>11</sup> Ebe tetelo Polote kebe tanalo kosiyodiliyale epo bilibilinomate ebe tanalo umite ibino Laikoniya opono tabamo gelatepaolo negeliya, “Aimano ida:da:li netewano uliyante dubuno ololamo aimano opamo nanitabonomolo a:pemaima:!”<sup>12</sup> Ebene iba:te Banabasitamo ibino ida:da:lino Susa mailo ikamete ega:walo Polotamo ida:da:li idino Emisi mailo akoikamiya, mabu ibi netewapi magumulo Poloko ebe tabo kiyawao elawodawanomola.<sup>13</sup> Ebe Lista duliyo molo niyakabolo ibino ida:da:li Susako Amamateno Motote na:enami, ebene Susatamo kalimagono ikameodawate ebe motone pete kau-goeogoeo ega:walo kaiyakaiya inamabu duliyo molo kala ga:dimi gigiyamo ebo wadaiya Poloko Banabasiko iba:tamo ka:pikalaema:. Ebe ubila kau-goeogoeo anakapulamete kalima ibi netewapiatamo eba ikalamelo ibi ebo kamamalatelema:.

<sup>14</sup> Wiyasiya Banabasiko Poloko iba:te ebe tanalo dumiya tepo mibomibo kawonomo iyatawaote, ebene iba:te epono taneba magumamo puila:ote ibino tepo mibomibo kawokalima: ibi a:ka:tuwa: ibino pupuliono inamabu anagilamolete gelatepaolo negeliya,<sup>15</sup> “Namutupiala:, la: me tanalo beda:ma: kosiyodilawitama? A opo epola, a la: keba kunula:ka: eba kunula, ebema: a akoamamatea:la:! Ale Igilo Godokono Wade Tabo adaima: la:tamo, ma kunu la:le makomako ida:da:li amamalatele magumune ebetamo kolobila:ema:. Numa:la:, ebe Unu Duliyo molo ega:walo me opo ega:walo iyaiya kewa: kolomo ega:walo inamabu bilibilinomo Osiyodiloledawala.<sup>16</sup> Dopamo tetelo epate ibino kateneno ubi gabodo dowapata:lamenamiya Godote ibi kodiyo bolenakia:.”<sup>17</sup> Wiyasiya numa:la:, tete bilibilinomo epetapilo ebete ebene nanitabo tanalo me opo epatamo ma kunu awokaliminako, ebete tobolo unune ulama eba palibolo la:imano pali inamabuate ibino wadewade tetelo apepeonaka, ega:walo ebete la:tamo modobo bae eba ikalamelo la:imano tepo magumuno kalakalate etabokaonako. Ebema: namutupiala:, modobola la: me nani Godo kapiya namamata:la:, aa:!”<sup>18</sup> Ebe tetelo Poloko Banabasiko iba:te me elawo tabamo epo odiyoboliya, wiyasiya iba:godolo ibi netewapi amamalatele ubi kolopoligolamiya:.

#### *Lista Duliyo molo Epate Poloko Nokolamo Demapemiya*

<sup>19</sup> Ebene Yu epo epetapiate Pisidiya opono A:ntiyoka duliyo molo ega:walo Aikoniya duliyo molo da:pelamiya, iba:te Lista duliyo molo epono woki kubailamelelamete elawo iba:tamo ebo ikalamiya Polotamo ka:dowaoma:. Ebema: iba:te Poloko nokolamo mapemete ebene ape duliyo molo anamiyatate a:emu gelate gito natepapiya.<sup>20</sup> Wiyasiya nanitabokobi midipiate walone pelamete ebe niyakabolo ibino pupamo eba pilukulilo, Polote maigate atu duliyo molo magumamo ka:nopegate, ebene egela idilo ebete Banabasiago Debi duliyo molo gito tiya.

#### *Poloko Banabasiko Iba:te Siliya Opono A:ntiyoka Kawo Duliyo molo Da:kolowamiya*

<sup>21</sup> Poloko Banabasiko iba:te Debi duliyo molo eba nokoliolo, Ya:sukono Wade Tabo da:kiyawaonakiya epo bilibilinomate ebe tabo nanitabolo lawete Ya:suko waloma:tapima: ebo eda:iya. Ebene ibi netewapiate Debi duliyo molo kebe gabodo ka:pemaimiye ebe atu gabodo

kolowamiya. Iba:te ma kunu Lista duliyoumolo ega:walo Aikoniyama duliyoumolo ega:walo Pisidiya opono A:ntiyoka duliyoumolamo da:ka:nemaimiya, <sup>22</sup> iba:te ebe iyaiya duliyoumololo nanitabokobi midipi eba nowalubililo na:totomulatenatiya iba:te nanitabokobi midi magumulo kodakodalo kelamota:onama:. Ebe tetelo iba:te nanitabokobi midipiatamo tabo ma kunu kiyawaonatiya, “Godote Kawo Elawodawama: deda:na, ale ebe Duliyoumolamo ka:nopila:oma: a dopamo kawokawo temeteme magumudo ka:tolaemalema:.” <sup>23</sup> Ega:walo iba:te ebe iyaiya duliyoumololo nanitabokobi midipi magumulo dubu epetapi uwatiya iba:te sosino watowatopima: keda:onama:. Ebene ibi netewapiate ibino towetowe tabo gela magumulo elawo kelaema:, iba:te bae naoa:no eba okoliutalo Kawodawa Ya:suko ebo toweomiya, ebete ebe sosi epo bilibilinomo wadenomamo ka:buiyalatelenama:, mabu nanitabola, ebe epate ibino nanitabokobi midi tanalo ebetamo iyatinomo iyatiya.

<sup>24</sup> Ebene Poloko Banabasiko iba:te Pisidiya opodo tote Pa:mapiliya opamo gito nemaimiya, ebe opo unuunu damelalo ditana ebe opola. <sup>25</sup> Ebene iba:te ebe opono Pega duliyoumololo Godokono tabo na:kiyawaote, ebe duliyoumolo atepate kewa: kolomono Ataliya duliyoumolamo gito nodoliya.

<sup>26</sup> Ebolo iba:te kawo palai pe lawete kewa: kolomo na:iwate Siliya opono A:ntiyoka kawo duliyoumolamo walo gito ka:nemaimiya. Me ebe duliyoumolola, nanitabokobi midipiate ibi dopamo Godokono wokamo eba alibolelo ebe da:toweomiya, ebete ibi ebene nilakapo tanalamo wadenomamo kowalubilinatema:. Ebema: Poloko ega:walo Banabasiko iba:te ebe woko uwomuamo da:nemaimiya A:ntiyokamo walo gito kolowamiya, <sup>27</sup> ebene iba:te sosi epo bilibilinomo kapiya baiamo ka:la:mite ibi nanaliya, Godote ibi magumudo kebe tanalo kosiyodilolenakile ega:walo ebete gabo keba kunu ka:iyamidiyale Yua:piate ebene tabo nanitabokobi ka:midima:. <sup>28</sup> Nanitabola, Poloko Banabasiko iba:te tete geyageyalo A:ntiyoka duliyoumolono nanitabokobi midipiago ebo okoliya.

## 15

### *Yelusalema Sosi Watowatopiate Yua:pino Tanaloma: Degeliya*

<sup>1</sup> Ebene dubu epetapiate Yudiya opone A:ntiyoka kawo duliyoumolamo pelamete nanitabokobi midipi ekaki eba piyatulamelo na:pegeliya, “Mosesete a Yu epate kosiyodiloma: diyatuamenaki, la: Yua:pi dubate ebe tama itamida pukala lawea:no Godote la:imano igilo a:ka:mula:lelametamene.” <sup>2</sup> Poloko Banabasiko iba:te ebe tabo dolowiya ebe dubago tabo eba gelalo kawonomamo ebo apaminatuiya. Ebema: A:ntiyoka sosi epate Poloko Banabasiko ega:walo dubu epetapi uwatiya, iba:te Yelusalema kawo duliyoumolamo tolamete Ya:sukono alibolepi dubu epetapi ega:walo sosi watowatopi epetapiago me tanalo wadenomamo ka:negelama:.

<sup>3</sup> Ebene A:ntiyoka sosi epate ibi danaliboliya, gabo tetelo iba:te Ponisiya ega:walo Samaliya opodo eba tolamelolo, Yua:piate kuba osiyodilole magumune Godotamo doloboliya ebe tanalo iba:te nanitabokobi midipi ekaki ebo kiyawaolamenatiya. Nanitabola, piyate ebe tabo dolowiya iba:te kawonomamo ebema: kalakalaiya. <sup>4</sup> Ebene Poloiate Yelusalema duliyoumolamo da:nemaimiya, ebe tetelo Ya:sukono alibolepi dubu ega:walo sosi watowatopi epetapi ega:walo nanitabokobi midipi epetapi, ibi bilibilinomate ibi kalakalago uwatiya, ebene Godote ibido Yua:pi magumulo dosiyodilolenaki iba:te ebe tanalo bilibilinomo ebo na:kiyawaolamiya.

<sup>5</sup> Ebe tetelo wiyasiya nanitabokobi midipi epetapi, ibi Pa:lisi tanebapila, iba:te maimiote elawo tabo ma kunu geliya, “Modobola ebe Yua:pi dubate a Yu epono tama itamida pukala nelaema:na:, ega:walo la: ibi nananaliyala: iba:te Mosesekono Totomu Tabo epetapiamo atumu wadenomamo ka:tudila:onakoma:.”

<sup>6</sup> Ebene ebe tabono tanaloma: kegelama: alibolepi dubu ega:walo sosi watowatopi epetapi iba:te a:ka:tuwa: ebo aladabutiya. <sup>7</sup> Iba:te tabo tete geyageyalo degelitiya Pitate ibino taneba magumulo maigate negiya, “Naimano ekakiala:, la: iyatawalata Godote la: magumune na elaweni, Yua:piate naimano tabone ebena Wade Tabo olowite nanitabokobi ka:midima:.” <sup>8</sup> Nanitabola, Godote epo bilibilinomono iyaiya tepo magumu iyatawanomola. Ebema: Yua:piate ebena tabo nagodone delawiya, ebete ebe tanaloma: eba kalakalalo ebena kalakala kawokalima: Wade-talena Uliyana iba:tamo ebo ikalami, dopamo a Yu epatamo dikaeamiya eba kunu. <sup>9</sup> Numa:la:, me osiyodilo tanalodo ebete me tanalo ebe awokalimi, ibi ega:walo a Yu epo, a iyaiyama: keda:ona:, mabu nanitabola, ebete a bilibilinomo aimano nanitabokobi midi tanalodo aimano tepo magumuno kuba ukulaoleami. <sup>10</sup> Ebema: la: Godotamo temeteme kikama:ema: ubi beda:ma: kiyata:wenama? A ega:walo aimano ewoni, ale Mosesekono Totomu magumulo dilukulinaima:, a ka:modobonamia: mabu ebe Totomu mibomibo inamabu waguata keba kunula:ka: atamo eba kunu eda:iya. Ebema: la:imano woki keba kunula:ka:, me tetelo ale Yua:piatamo atu mibomibo Totomu ba:kikalaema:? Ao, modoboa:! <sup>11</sup> Olowiopiala:, kalakala kawonomola, a me kawo tanalo nanitabokobi na:midinama:, a ega:walo Yua:pi, a bilibilinomate Kawodawa Ya:su Kelisokono nilakapo kapiyado igilo mula: tanalo nelawenama:, tama itamida pukala lawe tanalodoa:.”

<sup>12</sup> Ebe tetelo sosi watowatopi bilibilinomate tabo idi kegeliya:, wiyasiya Poloko Banabasiko iba:tamo tete ikalamiya ibino tanalo kawokalima:, ma kunu Godote ibido iyaiya kawokawo anoano tanalo Yua:pi magumulo dosiyodilolenaki. <sup>13</sup> Ibi netewapino tabo kiyawao dolopoligolamiya, Ya:imesite wiyasiya watowatopi epetapiatamo negiya, “Ekakiala:, la: naimano tabo nolowiala:.” <sup>14</sup> Saimono Pitate a wadenomamo anae, Godote dopamo Yua:piatamo ebena nilakapo keba kunu kawokalimile, ebete iyaiya opo epo magumune epetapi uwatete ebenoma: ka:midilima:.” <sup>15</sup> Nanitabola, Godokono woki awokalimipiate iyalo dawokalimiya ega:walo Pitate ka:ma: da:kege, ebe iyaiya tabono magumu ebe kapiyala, mabu Godokono Bukalo tabote ma kunu itana,

<sup>16</sup> ‘Me tanalo dolopoligomene,  
na walo ka:pete  
Da:ibidikono moto ka:ka:petemamo,  
iyo, ebe motote dopamo kagate  
ka:lo kubanomolo itana,  
wiyasiya nale walo ka:ka:posiyodilomamo.

<sup>17</sup> Ebema: iyaiya opo epo epetapiate  
na ibino Kawodawa kowadinima:na:,  
iyo, nale kebe epo keka:la:mioliyamo,  
ebe Yua:piate ka:pelaema:na:  
naimano gudima: ka:pada:oma:.”

<sup>18</sup> Na Kawodawa Godote me tanalo nanitabonomolo gemo,  
nale kebe tanalo iyalo dawokalimiyamo  
me ebe tanalola.’ ”

<sup>19</sup> Ebene Ya:imesite tabo moga:melo walo na:kegiya, “Yua:pino tanaloma: nale ma kunu malagidilomo, ibino taneba magumulo Godotamo dolo-bila:na ale iba:tamo temeteme a:kikalaema. <sup>20</sup> Modobola ale wiyasiya leta osiyodilote ibi ma kunu kanalemalema. Epetapiate ida:da:liatamo dikalamenaka iba:te ebe inamabu bilibilinomo a:kenaonakoma:na:, mabu ebe inamabuate Godokono ololo apulo daleyama: eda:ona. Ega:walo kamiyale pilo dubu pilo talenala, iba:te a:kosiyodilolenakoma:na:. Ega:walo kuwokobe dewegedililamenaka ebe inamabu nao talenala, mabu kalimate ebe katene magumulo bitana. Ebema: modobola iba:te me kapiyakapiya totomuamo na:tudila:onakoma:na:, tanalo ida:moa. <sup>21</sup> Numa:la:, me opo epo bilibilinomate a Yu epono tanalo iyatawanomola. Iyo, iyalo tetenomone wagilimate me teta:mo pemaiga opo bilibilinomono duliynomololo ale aimano balidi ibilamole motolo Mosesekono Totomu Tabo bilibilinomo eka:la:miolenakima:, ega:walo ka:lo me iyaiya Totomu Tabono tanalo ale woko: talena egela bilibilinomolo awokalilamenakoma:.”

*Sosi Watowatopiate Leta Tabo Dakuloliya Yua:pi Nanitabokobi Midipi Ekakiatamo*

<sup>22</sup> Ebene Ya:sukono alibolepi dubu ega:walo sosi watowatopi epetapi, iba:te nanitabokobi midipi epetapi bilibilinomago Ya:imesikono tabo wadenoma: gelalo ibino taneba magumulo dubu epetapi uwatiya, Poloko Banabasiko ebana ka:tolaema: A:ntiyoka kawo duliynomolamo. Ebe tetelo iba:te Yudasiko ebena mailo idi Basabasitela, ebe ega:walo Sailasiko uwatiya, mabu ibi netewapiate ekakino taneba magumulo kawokawo dubuma: eda:onamiya. <sup>23</sup> Ebene ebe dubate A:ntiyokamo katama: Yelusalema sosi watowatopiate leta tabo ma kunu akuloliya,

A Ya:sukono alibolepi dubu ega:walo sosi watowatopi, a la:imano nanila nabila ibima: deda:onama:, ale me leta ebema: paliboma:.

La: Yua:piate A:ntiyoka duliynomololo ega:walo Siliya opolo ega:walo Silisiya opolo dilukuliawenama, la: aimano ekakiate Godoko nanitabokobi da:mida:wenama, niyaniyata.

<sup>24</sup> Nanitabola, a olowima: epo epetapi a:ka:tuwa: ibino ubilo agodone pelamete ibino tabamo la:tamo tepo mibomibo eba pikalamele la:imano woki a:pa:kubailamiya, wiyasiya ibi ale kapalibolea:. <sup>25</sup> Ebema: a woki kapiyakobi midite tabo ebo iyatima: dubu epetapi Poloko Banabasiko ebana kapalibolema:, iba:te la:imano woki ka:pa:tuputupuilaema:. Nanitabola, Poloko ega:walo Banabasiko ibi aimano wadewade namutupila, <sup>26</sup> ega:walo ibi netewapiate Kawodawa Ya:su Kelisoko kapiyatamo tudila:olo ebena woko mabuma: ibino igilo balamo gito alomiya. <sup>27</sup> Ebema: ibi kowalubilinapema: ale Yudasiko ega:walo Sailasiko ibi atumu nakapalibolema:, ale kebe tabo me leta magumamo dakulolema: iba:te ebe atu iyaiya tanalo la: ibino tabonomamo kapanalema:ta.

<sup>28</sup> Nanitabola, Godokono Uliyanate a kapiyakobi da:midi, ebema: aimano woki ma kunu itana, a ubia:nola tepo mibomibo idi la:tamo ikalaema:, wiyasiya la:le me kapiyakapiya totomuamo na:tudila:onakiyala:. <sup>29</sup> Ma kunu epetapiate ida:da:liatamo dikalamenaka la: ebe inamabu a:kenawenakoma, ega:walo kuwokobe dewegedililamenaka ebe inamabu nao talenala mabu kalimate ebe katene magumulo bitana, ega:walo la: kamiyale pilo ega:walo dubu pilo

a:kosiyodilola:wenakoma. Ebema: la:le me tanalo nanitabolo talenama: da:midila:wenakoma, ale la:godolo tanalo idi kubama: a:kegelama:.

Niyaniyata, me aimano leta tabo uwomula.

<sup>30</sup> Ebene Yelusalema sosi watowatopiate duwatiya ebe dubu me letago danaliboliya, iba:te A:ntiyoka kawo duliyoumolamo nemaimiote nanitabokobi midipi bilibilinomo aladabuti baiamo ebo ka:la:miya leta iba:tamo kikalaema:.<sup>31</sup> Ebene A:ntiyoka sosi epate leta ka:la:miolete kawonomamo kalakalaiya mabu ebe tabote ibi nanitabolo walubiliya.<sup>32</sup> Ebe tetelo Yudasiko Sailasiko iba:te tete geyageyadopolo nanitabokobi midipi ekaki iyatulame tabamo eba walubitalo elawokobi ebo midiliya, mabu nanitabokobi midipino taneba magumulo ibi Godokono woki awokalimipinomola.<sup>33</sup> Ebene iba:te egela epetapi bilibilinomo ebolo okoliote, egela idilo nanitabokobi midipi ekakiate ibi mabuma: Godotamo eba towetowelo ubi ebo iyatiya ibi kalakalago Yelusalema sosi watowatopiatamo walo kakapalibolema:,<sup>34</sup> wiyasiya ebe tetelo Sailasiko ubila ebolo kolowagilima:, ebema: ebete Yudasigo Yelusalemamo walo ka:piya:.\*

*Poloko Banabasiko Iba:te Woko Magumulo Iyaiya Da:tiya*

<sup>35</sup> Ebe tetelo Poloko Banabasiko iba:te A:ntiyoka kawo duliyoumololo tete geyageyadopolo eba okoliolo, wokopi epetapiago Kawodawa Ya:sukono tabo eba kiyawaolo epo ebo iyatulamenakiya.<sup>36</sup> Ebene egela epetapi da:petoiya Polote Banabasitamo negiya, “Ale dopamo Kawodawano tabo kebe iyaiya duliyoumololo ka:na:kiyawaonakima:, modobola a ebe duliyoumolamo walo ka:ka:tomalema: aimano ekakino nanitabokobi midi tanalo ka:nulamelelaema:.”<sup>37</sup> Ebe tetelo Banabasiko ubila Yone Makako iba:go tote, ebete woko magumulo ibi ka:nowalubilima:,<sup>38</sup> wiyasiya Poloko ubia:nola, mabu dopamo Makate Pa:mapiliya opolo ibi miyapate woko magumune gito palauliya, ma kunu ebete iba:go woko uwomuamo ka:nemaigiya:.<sup>39</sup> Ebe mabuma: Poloko Banabasiko iba:te kawonomamo apaminatuite iyaiya gabodo ebo tiya, ma kunu Banabasite Makako lawete kawo palai peago kewa: kolomo gito na:iwiya Saipalase opamo,<sup>40</sup> wiyasiya Polote Sailasiko lawete gabo idido gito ka:tiya. Ebe tetelo A:ntiyoka duliyoumolono nanitabokobi midipi ekakiate Poloko Sailasiko mabuma: Kawodawa Godoko toweomiya, ebete ebena nilakapo tanalamo ibi wadenomamo kowalubilinataema:,<sup>41</sup> ebene ibi netewapiate Siliya ega:walo Silisiya opodo eba tolo, ebe opono iyaiya sosi epono nanitabokobi midi magumulo ibi ebo kodakodailamenatiya.

## 16

*Timotite Poloko Sailasiko Kowalubilima: Woko Magumamo Dopegiya*

<sup>1</sup> Ebene Polote Debi duliyoumolo ega:walo Lista duliyoumolamo nemaigate Ya:suko waloma:tadawa idi ebo numiya, ebena mailo Timotitela. Timotikono menoko Yu kamiyalela ega:walo ebe nanitabokobi mididawala, wiyasiya ebena nabiwi Yua: lumagila, ebe Guliki opodawama: eda:nami.<sup>2</sup> Lista ega:walo Aikoniyama duliyoumololo dilukulinamiya ebe nanitabokobi midipi bilibilinomate Timotikono okoli tanalo iyatawaote wadenoma: gelanakiya,<sup>3</sup> ebema: Poloko ubila Timotite Godokono woko

\* **15:34:** Ali 15.34 buka apuno tabo Lukute bukamo kakuloliya:, wiyasiya ebena buka osiyodilo walogabo apune nanitabokobi mididawa idite akuloliya.



magumulo eba:go pata:ma:. Wiyasiya ebe opolo dilukulionamiya ebe Yu epo bilibilinomate me tanalo iyatawaiya, Timotikono nabiwi Guliki opodawala ebema: Timotite Yu epono tama itamida pukala kelawiya:. Ebe mabuma: Polote Timotiko woko ida:mo magata:no, Yu epono woki ka:modoboilaema: ebete Timotiko dopamo tama itamida iyatawa lumagitamamo nalibiya ebe tanalo ka:nelaema:. <sup>4</sup> Ebene Poloiate Timotiko lawete duliynomolo epetapiamo kapimiya da:tolamenakiya, iba:te Yelusalema sosi watowatopi ega:walo alibolepi dubagodone kebe totomu dopamo kuwatiye, ebe iyaiya tanalo nawokalilamenakiya nanitabokobi midipiate ebe totomuamo ka:tudila:onama:. <sup>5</sup> Ebema: nanitabola, ebe opo kawonomolo Godote sosi epono nanitabokobi midi magumulo ibi elawokobi eba midililo, egela epetapi bilibilinomolo ibino uwomute unamo odolo kolodiyobonamia:.

*Polote Ma:sadoniya Opamo Ka:toma: Iyo Dowatani*

<sup>6</sup> Ebe tetelo Godokono Uliyanate Poloi nodiyoboliya iba:te A:isiya opolo ebena tabo ka:na:kiyawaoma:. Ebema: iba:te Piligiya ega:walo Galesiya opodo eba tolamelolo <sup>7</sup> Misiya opo tataliamo da:nemaimiya, ibi ubila Bitiniya opamo ka:nopila:oma: wiyasiya Ya:sukono Uliyanate ibi walo na:kodiyoboliya. <sup>8</sup> Ebe mabuma: iba:te Misiya opodo tolamete kewa: kolomono Talowase duliynomolamo gito niyodoliya. <sup>9</sup> Ebe idokolo Polote iyolo Ma:sadoniya dubu ebe umini, ebete utinate Poloko ma kunu toweomeni, “A:ma: a walubima: Ma:sadoniya opamo na:pa:iwiye.”

<sup>10</sup> Ebene duiya idilo ale Polokono iyo tanalo iyatawaote tabo ma kunu geliyama:, “Godote ebena ubi atamo awokalimi, ale Ma:sadoniya opo epatamo ebena Wade Tabo ka:na:kiyawaoma:.” Ebema: ebe tetenomolo ale inamabu gatela:mo wepote tolame ebo wagilimiyama:.

*Lidiyate Ya:suko Nanitabokobi Da:midiya*

<sup>11</sup> Ebene ale kawo palai peamo olote Talowase duliynomolo eba atepalo kewa: kolomono Sa:mota:si opamo ebo na:iwaliyama:, ebena egela idilo ale tolame walo kowagilimite Niyapolisi duliynomolamo gito nemaimiyama:. <sup>12</sup> Ebene a agowa gabodo walo ka:tolamete Pilipai kawo duliynomolamo ebo nemaimiyama:, ebe Pilipai duliynomolo ebe Ma:sadoniya opono kawo duliynomolonomola, ebema: Loma duliynomolo epo epetapi bilibilinomate ibino oponomone pelamete ebe duliynomololo pilukulionamiya. Ebene ale egela epetapilo ebolo ilukula:tepate, <sup>13</sup> Yu epono wokoa: talena egeleale ale ebe duliynomolo atepate tuli balamo gito niyodoliyama: mabu a ma kunu malagidiliyama:, diyala, Yu epo kapiyakapiyate Godotamo towetowe tabo gelama: ebamo da:bapaladabutima:na:. Ebene kamiyale epetapiate kapimiya da:pola:niya, ale ibi nulamete iba:go nilukulite tabo ebo negeliyama:. <sup>14</sup> Ebe kamiyaleno taneba magumulo inamabu bilibila:godawa idite na:luti, ebena mailo Lidiyatela, ebe Tayataila duliynomolodawala ega:walo ebete kalimakalima kaliku manima: midili magumulo kawokawo mani uwatenaki. Me kamiyalete nani Godo amamate-naki, ebena Polote Ya:sukono tanaloma: tabo da:kiyawaiya, Kawodawate ebena tepo magumu ebo a:iyamidamiya ebete tabo nanitabonomolo ke-laema:. <sup>15</sup> Ebema: Lidiyako ega:walo ebena moto epo, ale ibi obamo waduba:midaote ebete a ma kunu anaiya, “La:le na Kawodawa Ya:sukono nanitabokobi mididawa idima: nanitabolo degelaema, modobola la: pelama:wete naimano motolo na:pilukuliyala:.” Ebene ebete a kawiya da:toweoamiya, ale ebena tabamo tudila:ote eba:go gito pelamiyama:.

*Pilipai Kawo Duliyomolono Watowatopiate Poloko Ega:walo Sailasiko Idoko Motamo Diyalekiya*

<sup>16</sup> Egela epetapi da:petoiya, tete idilo ale Godotamo towetowe tabo gela baiamo walo da:ka:tolamiyama; gabo tetelo epetapino wiya: woko buwelete ago ebo alugiya. Ebe kuba uliyanagonola, ebe kuba uliyanate ebena kiyawao magumudo epo analenaki kebe iyaiya tanalate iba:tamo da:pemaimioma:na; ebema: ebe buwele umipiate ebena pakani tanalo osiyodilo magumudo epagodone kawokawo mani uwatenakiya. <sup>17</sup> Ebene ebe buwelete aimano walogabo apune Poloko ega:walo a eba waloma:taelo geatepaolo ma kunu negiya, “Me dubu Ununomo Godokono wokopila! Iba:te la: kanalema:ta la: igilo mula: tanalo kebe gabodo na:kelawa:ema!”

<sup>18</sup> Egela epetapi bilibilinomolo ebete atamo eba kunu wagenaki, ebena tete idilo Polote tepo miboma: eda:te buweletamo olobigate kuba uliyana kawiya ebo aniya, “Nale Ya:su Kelisokono mailamo a:ma: anamata, a:ma: ebegodone na:nemaiga!” Ebe tetenomolo kuba uliyanate buwelegodone gito nemaigiya.

<sup>19</sup> Ebema: buwele umipiate me tanalo umite iyatawaiya, ebe buweledo ibino mani lawe gabo olopoligo. Me mabuma: iba:te Poloko ega:walo Sailasiko elawamo uwatete, ebe Pilipai kawo duliyomolono watowatopiate kebolo ka:pola:niyale ebe olowame baiamo ebo anamiyataliya. <sup>20</sup> Ebene iba:te ebe Loma gabamani dubuno ololo apuamo ibi magatalete na:negeliya, “Me Yu dubu netewa iba:te aimano duliyomolo kubaimina! <sup>21</sup> Ibino totomu iyala, a Loma epono totomu keba kunula:ka: eba kunua; ebema: ibino iyatumi tanalote a ebe anaena aimano wadewade pukala kowakalaima!” <sup>22</sup> Ebene ebe tetelo duliyomolo epo epetapi bilibilinomate Poloino osiyodilole tanaloma: atu kuba tabo kegeliya.

Ebema: Loma gabamani dubate ibi netewapino kaliku elawamo pupukulamelelamete gowelaopi epetapi ebo analiya ibi pa:ka:pa:ka:mo ka:na:ma:ga:midaolema. <sup>23</sup> Ebene ibi kubanomamo a:na:ma:ga:midaolete iba:te Poloko ega:walo Sailasiko idoko motamo niyalekete, ebena idoko moto umidawa naniya ebete ibi wadenomamo kulamenatema: iba:te alautikapoma. <sup>24</sup> Ebema: idoko moto umidawate ebe tabo dolowiya, ebete ibi idoko moto gunomamo magatalete ibino agowa kewa gugamo nugulamelelamete ibi gito nimiriyapiya.

<sup>25</sup> Ebe idoko sele tetenomolo Poloko Sailasiko iba:te Godotamo towetoweonaki amama oale akalapionakiya, ebena gabamianate dubu epetapi ibino kuba osiyodilole mabuma: idoko motamo iyalo dalomiya ebe dubate Poloko Sailasiko ibino tanalo eba olowionalo, <sup>26</sup> ebe tetenomolo kawo mumulute penate idoko moto kubanomamo eba padegetenalo, gigiyute a:ka:tuwa: a:ilamenate idoko moto epono kotono auli alete a:ka:tuwa: ebo teteolamena. <sup>27</sup> Ebene idoko moto umidawate ebena motonomolo maiganate idoko motono gigiyu alagiliolo da:pulamena ebete nemalagidiloni, idoko moto epo bilibilinomate alautia. Ebema: ebete tole kawonomo lawenate ebena gowelaono gili magoba:nate ebe a:ka:tuwa: ebena ape awamidana: eba wagenalalo, <sup>28</sup> ebe tetenomolo Polote ebe tanalo uminate ebe negepatemena, “Eiye! A:ma: a:ka:tuwa: a:ma: akoanaka-puma:la! A bilibilinomo mela, kalautioa!”

<sup>29</sup> Ebe tetelo idoko moto umidawate ebena opopi nanaleni iba:te alo kowadaenama; ebena ebete idoko moto guamo tola:go samonomamo nopeganate, Poloko Sailasiko ibino agowa mabuamo neganate ebo nanakamini.

<sup>30</sup> Ebene ebete ibi netewapi idoko motone powagailinate ebo panaleni,

“Kawokawo dubala; na beda: tanalo osiyodilote Godogodone igilo mula: tanalo ebo na:kelaemo?”

<sup>31</sup> Iba:te nowaminiya, “A:ma: Kawodawa Ya:suko nanitabokobi na:mida:, ebene ebete a:ma: ega:walo a:imano moto epono igilo ka:mula:lelaema:ta.”

<sup>32</sup> Ebene iba:te idoko moto umidawa ega:walo ebene moto epatamo Kawodawa Ya:sukono tabo eba kiyawaonalo ebene tanalo ebo awokaliminiya. <sup>33</sup> Ebema: ebe tetenomolo idoko moto umidawate ibi netewapino bugomo ukulaolelamente, iba:te wiyasiya ebe ega:walo ebene moto epo bilibilinomo obamo gito waduba:midaoleniya. <sup>34</sup> Ebene idoko moto umidawate Poloko Sailasiko ibi ebene moto guamo magatalenate bae ebo nikalamenti. Nanitabola, ebe ega:walo ebene moto epate kawonomamo kalakalaoniya, mabu iba:te ebe idokolo ibino nanitabokobi midi tanalo Godotamo alomoniya.

<sup>35</sup> Ebene egela da:powaloiya Loma gabamani kawokawo dubate polisi dubu epetapi idoko moto umidawatamo me tabago paliboliya, “A:ma:le ebe dubu netewa idoko motone gito nowagaila:.”

<sup>36</sup> Ebene idoko moto umidawate Poloko atu tabo kananiya, “Gabamani kawokawo dubate tabo apaliba, nale a:ma: ega:walo Sailasiko la: me idoko motone kowagailitama: Ebema: ka:lo la: maima:wete kalakalago na:toala:.”

<sup>37</sup> Wiyasiya Polote ebe polisi dubu ulamelo iba:tamo negiya, “Ao, ale gito a:ka:nemaima: La:imano kawokawo gabamani dubate a:ka:tuwa: na:pelaema:na: a ka:powauatema:, mabu a netewapiate me opolo Loma gabamanino pepago wapata:nama:,\* ega:walo ale kuba osiyodiloa:no iba:te aimano tanalo wadenomamo kanagiyamidamea:, iba:te wiyasiya a pa:ka:pa:ka:mo a:na:ma:ga:midaoete idoko motamo gito iyalekeiya. Ebema: ka:lo ibi ubila a diya gabodo milolo gito kaliboema: Ao, iba:te dopamo a na:puaema:na:!”

<sup>38</sup> Ebene polisi dubate tolamete Polokono tabo kawokawo gabamani dubu dananaliya, ebe tetelo ebe dubate Poloko Sailasiko Loma gabamanino pepago wapata: tanalo olowite kawonomamo toletoleiya. <sup>39</sup> Ebema: iba:te pelamete Poloko Sailasiko iba:tamo nilakapo tabo pegelate ibi kawonomamo petoweolamiya, iba:te Pilipai kawo duliyaomolone opo ida:mo milolo ka:toma:. <sup>40</sup> Ebene ibi netewapiate idoko motone pemaimite, iba:te tote dopamo Lidiyakono motamo nodolote, ebolo iba:te nanitabokobi midipi ekaki da:nulamiya, walubi tabo epetapi na:kiyawaolamete Pilipai kawo duliyaomolone gito tiya.

## 17

### *Tesalonaika Kawo Duliyaomololo Kawo Dowa Tanalote Demaigiya*

<sup>1</sup> Ebene Poloko Sailasiko iba:te A:mapipolisi duliyaomololo ega:walo A:poloniya duliyaomolodo tote Tesalonaika kawo duliyaomolamo ebo nemaimiya, Yu epono balidi ibilamole moto idite ebolo na:enami. <sup>2</sup> Ebene

\* **16:37:** Poloko tetelo Loma gabamaniate ibino Itali opo epo kapiyatamo ebako pepa ikalamolenakiya, iba:te iyaiya opo epetapilo eba wapata:lamelo ebe opono gabamanino wokopiate temeteme iba:tamo ikalamekapoma:. Ebema: ebako pepago lumagite kuba osiyodiloa: tetelo gabamani dubu idite ebene tanalo wadenomamo anagiyamidamea:no temeteme ebetamo gito dikaemene, ebe mabuma: Loma kawokawo gabamaniate pelamete ebe gabamani dubutamo kuba wiya kawonomo ka:pikaema:na:. Poloko Itali opodawa:, ebe Yu lumagila. Wiyasiya ebete Tasase kawo duliyaomololo dawokaliya, ebe tetelo ebete Loma gabamaniagodone pepa elawiya, mabu Loma gabamaniate Tasase duliyaomololo epatamo kawonomamo eba kalakalaolo ibi bilibilinomatamo ebako pepa gito ikalamoliya, iba:te ibino Itali opo epatamo dikalamolenakiya eba kunu.

Polote duliynomolo epetapilo keba kunu ka:posiyodilonakile ebete Tesalonaika kawo duliynomololo atumu ka:posiyodiliya, ebete netewa-kapiya wokoa: talena egelalo Yu epono balidi ibilamole motamo nodolonaki Godokono Buka apuapuno tabo iba:tamo ebo na:kiyawaonaki. <sup>3</sup> Ebene ebete iyaiya tabono magumu eba awokalilamelolo ibi nanitabonomolo ma kunu iyatulamoloya, Godote iyalo tetelo diyatiya ebe nopo magumudo Kelisote pemaigate, epagodone kawokawo temeteme puwatete, a:e magumune walo ka:kemaigamene. Ebema: Polote iba:tamo negiya, “Me Kelisoko nale ebena tanalo la:tamo da:kiyawaomo, ebe Ya:sutela! A:e magumune walo a:kemaigiya!”

<sup>4</sup> Ebe tetelo Yu epo epetapiate ebe tabono nanitabo tanalo lawete Poloko Sailasiko ebana kapiyama: ebo eda:iya, ega:walo ebe Guliki opolo dilukulionamiya, ebe Yua:pi epetapiate nani Godo dopamo damamate-namiya ega:walo Yua:pino kawokawo watowatopi kamiya epetapi atumu, ibi bilibilinomate kapimiya nanitabokobi ebo midiya. <sup>5</sup> Wiyasiya Yu epo epetapiate ebe Yua:pino nanitabokobi midi tanalo dulamelelamiya, ebe mabuma: iba:te dowate inamabu olowame baiamo tolamete, iyaiya kuba osiyodilolepi dubu epetapi nuwatete iba:go kapimiya dowate tanalo kawonomo ebo nadipatiya. Ebema: iba:te duliynomolo kawonomolo elawo adipatelo dubu idi Ya:isonikono motamo gawagawalo tolamete gigiyu nowakalamite Poloko Sailasiko ebo noliya, iba:te ibi nuwatete epatamo ka:piwolukoma:. <sup>6</sup> Ebe tetelo iba:te ibi netewapi nipo nolete wiyasiya Ya:isoniko ega:walo Ya:suko waloma:tapi epetapi motone ebo anamiyataliya ebe duliynomolono gabamani dubatamo. Ebene iba:te gabamani dubatamo kawonomamo negeliya, “Me opo kawonomo da:kubaimina ebe dubate aimano duliynomolamo a:pemaimiya! <sup>7</sup> Ega:walo me dubu idi Ya:isonite ebe kuba osiyodilolepi kalakalago uwatete ebena motolo lao bai iba:tamo ikalami. Ibi bilibilinomate Kawo Elawodubunomo Sisakono pukala wakalamina, mabu iba:te negelana Kawo Elawodubu idi ba:luta, ebena mailo Ya:sutela!”

<sup>8</sup> Ebene duliynomolo epo bilibilinomo ega:walo gabamani dubate ebe tabo olowite woki bilibilinomoma: ebo eda:iya. Ebema: ibino taneba magumulo iyaiya tabo kawonomamo eba gelitalo, <sup>9</sup> gabamaniate Ya:isoniko ebena namutupiago ibi nanaliya, “Modobola la:imano kuba mabuma: mani atamo ka:wiyamamota, wiya:no ale la: idoko motamo ka:niyalekema:ta.” Ebe tetelo gabamaniate iba:godone mani uwatelamete ibino motamo gito naliboliya.

### *Beliya Duliynomolo Epate Ya:sukono Tabo Wade Mulo Wokiago Delawiya*

<sup>10</sup> Ebema: ebe idokolo nanitabokobi midipi ekakiate Poloko ega:walo Sailasiko ebe duliynomolone gito aliboleniya Beliya duliynomolamo, ebena iba:te ebamo nemaiminate, egela idilo iba:te Yu epono balidi ibilamole motamo gito nodoliya. <sup>11</sup> Ebe tetelo Beliya duliynomolo epate ibino tepo magumuno gigiyu a:ilamiya Ya:sukono tabo wade mulo wokiago kelaema:, Tesalonaika epate dowageliya eba kunua:. Beliya epate wiyasiya egela bilibilinomolo Godokono Buka apuno iyaiya tanalo deka:la:miolenakiya, ibino taneba magumulo ebe tanalono magumu wadenomamo eba gelalo nanitabo tanalo ebo iyatawaonakiya, mabu ibi ubi kawonomola me tanalo uima:, Polote iba:tamo da:kiyawaiya ebe tabo da: nanitabola: o da: a:da:la:. <sup>12</sup> Ebema: ibi magumulo Yu epo epetapi bilibilinomate Ya:sukono tabo nanitabokobi na:midiya, ega:walo ebe atu tetelo ebe Guliki opolo dilukulionamiya ebe Yua:pino kawokawo watowatopi kamiya ega:walo

dubu atumu, ibi bilibilinomo epetapiate Ya:sukono tabo kapimiya ebo lawiya.

<sup>13</sup> Wiyasiya ebe tetelo Tesalonaika kawo duliynomololo dilukulionamiya ebe Yu epate Polote Godokono tabo Beliya duliynomololo da:na:kiyawaiya, iba:te ebe tanalo olowite ebamo tolamete Beliya epatamo elawo eba nikalamelo ibi ebo nowadipalateleya iba:te Polotamo ka:dowaoma: <sup>14</sup> Ebe tetenomolo nanitabokobi midipi ekakiate Poloko kewa: kolomono duliynomolo ida:mo dubu epetapiago gito nalibiya, wiyasiya Sailasiko Timotiko iba:te Beliya duliynomololo ebo polowagiliya, iba:te Polago ka:tiya: <sup>15</sup> Ebene Poloko da:buiyatiya ebe Beliya duliynomolo dubate pe lawete eba:go A:tenese kawo duliynomolamo da:nemaimiya, ebe tetelo ibino duliynomolamo walo ka:kolowamioma: eba wangelitalo, Polote ibi nanaliya Sailasiko Timotiko iba:tamo tabo katama:, iba:te A:tenesa:mo ebetamo samamo ka:pemaima:.

*Polote A:tenese Kawo Duliynomololo Ida:da:li Amamalatelepiatamo Godokono Tabo Da:kiyawaiya*

<sup>16</sup> Polote Sailasiko Timotiko ibino pe tanalo eba makopelelo, ebe A:tenese kawo duliynomololo ida:da:li amamalatele tanalo bilibilinomo dulamoliya, ebete tepo magumulo mibomibonomoma: ediya. <sup>17</sup> Ebema: ebete Yu epono balidi ibilamole motolo ibi ega:walo Yua:pi epetapi nani Godo damamatenamiya, ebete ibi bilibilinomatamo Godokono Buka apuapuno magumu tanalo kawonomamo kiyawaonaki, ega:walo egela bilibilinomo epetapilo ebete olowame bailo gito dowapata:lamitanakiya ebe epatamo atu iyaiya tanalo ka:kiyawaonaki. <sup>18</sup> Ebene Polote A:tenese duliynomolo epatamo Ya:sute a:ene maiga tanalo dawokalimiya, iba:te ibino wokilo nemalagidiliya Ya:suko opo idi ida:da:lino uliyanala, ebema: epetapiate negeliya, “Ebe ubila ale mulu opono ida:da:li idino tanalo kowaloma:tama:.” Ebene ibino taneba magumulo Epikuliya tanebapi\* ega:walo Stowika tanebapi† ibi epetapino iyatulamepiate Polago apamineuteui dowagilimiya, epetapiate ebe kalakalatele negeliya, “Me wato kawo dubute daedale tabo da:kiyawaonako, ebena magumu beda:la:ka:?”

<sup>19</sup> Wiyasiya epetapi iba:te Polotamo wade tete eba ikamelo ebe ibino A:tenese duliynomolono mulopino ilukuli baiamo ebo magatiya, ebe ilukuli baino mailo Aleyopagasela. Ebe tetelo Polote ibino ololo apuamo da:nemaigiya iba:te ebe nalatediya, “A ubila a:ma:le a nanaa:, me oli iyatulame tabo da:kiyawawenaka keba kunula:ka:? <sup>20</sup> Mabu a:ma:le da:kiyawawena ebe tabono iyaiya tanalo aimano olowio magumulo iyanomoma: eda:na, ebema: a ubila a:ma: me tabono magumu atamo wadenomamo nawokalima:.” <sup>21</sup> Iba:te Poloko ma kunu aniya, mabu A:tenese duliynomolo epo magumulo piyate ebolo dawokalaiya ega:walo piyate mulu opone pelamete ebolo da:pilukulionamiya, ibi bilibilinomate ubi kawonomamo iyatinamiya ibino mulopino iyaiya taneba magumulo olioli tanalo olowiote kegelanama:.

\* **17:18:** Buka ka:la:mioledawa, modobola a:ma: me tanalo niyatawa. Poloko tetelo Epikuliya epo ebe Guliki opo epono taneba idila. Iba:te ibino waloma:tapi ma kunu iyatulamenakiya, iyaiya ida:da:lino uliyanano elawo kitana:, ebema: modobola epate ibino iyaiya tole tanalo iyabaiamo eba alomolo kateneno ubilo kalakalago gito nilukulionama:na: † **17:18:** Stowika epo ebe Guliki opo epono taneba idila. Ibi Epikuliya tanebapi keba kunula:ka: eba kunua:, ebema: iba:te iyaiya ida:da:li epetapi bilibilinomo amamalatenamiya, ega:walo ebe ida:da:lino elawo eba tolelamenalo iba:te tuputupunomolo ilukulionamiya. Iba:te ibino waloma:tapi ma kunu iyatulamenakiya, a opo epo bilibilinomate a:ka:tuwa: aimano elawamo tepo magumuno mulo wokonomo duwatema:, ebe tetelo a nanitabo kalakalago bilukulionama:.



<sup>22</sup> Ebene Polote Aleyopagase mulopi dubuno dopo apulo maigate negiya, “A:tenese duliyoumolo dubala:, na uimo la: ida:da:li amamalatele tanalo magumulo elawonomoma: eda:onamata. <sup>23</sup> Iyo, nale la:imano wade duliyoumololo eba pata:lo la:godolo iyaiya ida:da:li amamalatele bai da:pola:na ulamolimo, ega:walo ebe bilibilinomo magumulo nale amamate bai kapiya idi a:kuimo, lumagi idite ebe unamo tabo ma kunu akuloliya,

‘Epate iyatawaoa:no damamatena,  
me ebe Kawodawa Amamate Baila.’

“Ebema: la: A:tenese duliyoumolo epate iyatawa:no damamata:wenama, nale ebe Kawodawano tanalo la:tamo kawokalimamo. <sup>24</sup> Ebe me opo kawonomo ega:walo inamabu bilibilinomo Osiyodilole dawala, iyo, ebete me opolo ega:walo Unu Duliyoumololo Kawodawanomoma: eda:na, ebema: ebe ubia:nola epate kotamo detemoteona ebe amamate motolo okolinama:.  
<sup>25</sup> Ega:walo ebe ubia:nola a opo epate aimano kotamo inamabu idi osiyodilote ebetamo ikaema:, mabu ebe atamo wade igilo ega:walo elawo dikaeamena ebe Kawodawala, iyo, ebete a bilibilinomono iyaiya modoboa: tanalo eba malagidilolenalo ebenu nilakapo magumulo wade tanalo bilibilinomo atamo gito ikaeamena. Wiyasiya numa:la:, ale ebe walubima: ebetamo beda: inamabu na:kikameoma:? Puliyala, kitana:, mabu ebe a:ka:tuwa: modobonomolo okolina!

<sup>26</sup> “Ega:walo me tanalo idila. Me Kawodawate kapiya dubu osiyodilote, ebe magumune iyaiya epo tanebapi bilibilinomate pawokalaiya. Ebene ebete ibi me opo kawonomamo iyaiya alibolete ibino iyaiya ilukulio teteno uwomu ega:walo ibino opono uwomu iba:tamo alomolamiya, ebete dopo dubu osiyodiloa:no nopo dopamo keba kunu kiyatiyale eba kunu.  
<sup>27</sup> Numa:la:, Godote ebe osiyodilo tanalodo ebenu ubi iyatiya, epo bilibilinomate ibino iyaiya opolo eba ilukulionalo, iba:te ibi Osiyodilole dawano tanalo malagidilolo ibino mulo wokiamo ebe dowadima:na: ebenu nanitabo tanalo ebo kuima:na:, balidi tamiodawate ebenu kotamo gabo keba kunu kowadinakole eba kunu. Wiyasiya kalakala kawonomola, ale ebe uima: kodakoda tanalo idite nanitabolo kitana:, iyo, ebete mululo kokolina:, a niyakabonomolo okolina. <sup>28</sup> Ebe mabuma: mulodawa idite tabo dopamo ma kunu giya,

‘Ale aimano Ununomo Talenadawano  
igilo magumulo ilukulinama:,  
iyo, ale ebenu elawamo wapata:lamenama:,  
mabu ebe aimano igilo mabuma: eda:na.’

Ega:walo A:tenese duliyoumolo epala:, la: numa:la:, la:imano oale osiyodilolepi magumulo idite oale ma kunu akuloliya,

‘Me tanalo nanitabonomola,  
ale Kawodawano gudima: eda:onama:.’ ”

<sup>29</sup> Ebema: Polote tabo moga:melo walo na:kegiya, “La: wadenomamo nolowiala:. Nanitabola, me Kawodawa Godote a bilibilinomo ebenu gudima: osiyodilo iya ebema: a ma kunu a:kemalagidiloma:, aimano kotamo o aimano mulo wokino tanalamo inamabu ida:mo aimano Nabiwino ololo kosiyodilomalema:. Ao! Epate golodo o siliba o wade nokolamo dosiyodilolenaka, nani Godoko ebe iyaiya ida:da:li inamabu keba kunula:ka: eba

kunua: <sup>30</sup> Nanitabola, dopamo epate ebena nanitabo tanalo iyatawa: no kuba tanalo dosiyodilolenakiya, Godote iba:tamo kuba wiya nanitabolo kikalamenakia:, wiyasiya me tetelo ebete iyaiya opo epo bilibilinomo nanalena iba:te ibino kuba osiyodilole magumune ebetamo kolobila:ma:, <sup>31</sup> mabu ebete ibi bilibilinomono tanalo kanagilamelelaema: ebena Kawo Egela iyalo iyatiya. Iyo, ebete elawo kebe dawatamo kikamiyale, ebe Tuputupu Dubuno anagiyamida magumulo epo bilibilinomate ibino kuba wiya ega:walo wade wiya modobonomolo kuwatema:na:. Ebema: mabu keleka: epate me tabono tanalo nanitabokobi da:midima:na:? Mabu bitana Godote epono ololo apulo ebe Tuputupu Dubu Ya:suko a:e magumune adipatiya!”

<sup>32</sup> Ebene ebe A:tenese mulopi dubate Ya:sute a:ene maiga tanalo dolowiya iba:te Poloko ebo kalakalatiya, wiyasiya epetapiate ebetamo negeliya, “Modobola a:ma: walo ka:pa:wete atamo tabo na:ka:pa:kiyawaiye.”

<sup>33</sup> Ebene Polote tabo gela baine eba tolo, <sup>34</sup> dubu epetapiate ebena tabo nanitabokobi midite eba:go gito naladabutiya, ibi magumulo Dayonisiyasiko ebe Aleyopagase mulopino taneba dubu idila, ega:walo ebe atu tetelo kamiyale idi Damalisiko ega:walo kamiyale epetapi iba:te atumu Ya:suko nanitabokobi ebo midiya.

## 18

### *Polote Kolini Kawo Duliynomololo Da:nokolinami*

<sup>1</sup> Me tanalote dolopoligiya Polote A:tenese duliynomolo atepate Kolini kawo duliynomolamo gito tiya, <sup>2</sup> ebena Yu dubu idi ebena mailo Akuilatela, Pontase opolo awokaliya, ebete Polago ebo alugiya. Ebe tetelo ebe dubute ebena kamiyale Pilisilago Itali opone piya, mabu Kawo Elawodubunomo Kolodiyasite Yu epatamo dowalo analiya ibi bilibilinomate ebena Itali opono Loma kawo duliynomolone ka:tolaema:. Ebema: egela idilo Polote ibi netewapiatamo nemaigate, <sup>3</sup> ibino mani woko magumulo ibi walubili eba nowagilimilo iba:go ebo nokoliya, mabu ebete ebe woko iyatawala, ebete dopamo sipi-goeogoeo tamamoo awokowiamidaole moto osiyodilolenaki. <sup>4</sup> Ebe tetelo Yu epono woko: talena egela bilibilinomolo Polote ibino balidi ibilamole motamo tonaki, ebena ebete ibi ega:walo Guliki opo epo iba:go eba aladabutulo iba:tamo Godokono tabono iyaiya tanalo ebo kiyawaonaki, mabu ebe ubi kawonomola iba:te Ya:sukono nanitabo tanalo kiyatawama:.

<sup>5</sup> Ebene Sailasiko Timotiko iba:te Ma:sadoniya opone Kolini kawo duliynomolamo Polotamo da:pemaimiya, ebete sipi-goeogoeo tama moto osiyodilole mani woko ebo atepiya. Ebe tetelo ebete Godokono woko kapiya eba osiyodilonalo Yu epatamo ma kunu kiyawaonaki, Ya:suko ebe Kelisote, Godokono Alibodawala. <sup>6</sup> Wiyasiya egela idilo iba:te Poloko malogolo ebena iyatulame tanalo dodiyoboliya, Polote ibino dopo apulo ebena kalikuno tuwae eba moda:midatepaolelo negiya, “Me tanalone la: niyatawala:, la:le ebolo Godokono igilo mula: tanalo nelawea:no, ebe tanalo ebe la:imano kubala! Naimano kuba:, mabu nale Godokono nanitabo tanalo la: wadenomamo iyatulaimata, wiyasiya la: ubia:nola. Ebema: me tetelo na la:godone olobigate wiyasiya Yua:piatamo ka:tomamo.” <sup>7</sup> Ebene Polote ibi miyapate Yua: dubu idino motolo nokoliya, ebe dubuno mailo Taitasi Yasitasitela, ebe nani Godo amamatenami ega:walo ebena motote Yu epono balidi ibilamole moto niyakabolo aenami. <sup>8</sup> Ebe tetelo dubu idi, ebena mailo Kilipasatela, ebete Yu epono balidi ibilamole moto umidawama: eda:nami, ebe ega:walo ebena moto epo iba:te Kawodawa Ya:suko nanitabokobi a:midiya. Ega:walo

Kolini duliyoumolo epo epetapi bilibilinomate atumu Godokono tabo Pologodone olowiote nanitabokobi midite obamo waduba:midaole tanalo ebo lawiya.

<sup>9</sup> Ebene idoko idilo Kawodawa Ya:sute Poloko iyolo nanani, “A:ma: naimano tabo kiyawaoma: akotoletola:la:, ega:walo tabo gea:noma: akoeda:la:, <sup>10</sup> mabu nale a:ma:go bokolinamo, ebema: lumagi idite a:ma: a:ka:kubaimitamene. Ega:walo me duliyoumolo kawonomolo naimano epo epetapi bilibilinomate bilukuliona, a:ma: kapiya:.” <sup>11</sup> Ebema: Polote ebolo kapiya ulama ega:walo sikisi sagana eba okolinalo Godokono tabono iyaiya tanalo epo ebo iyatulamenaki.

*Yu Epate Poloko Guliki Opono Kapela Kawo Elawodubutamo Ibino Elawamo Demagatiya*

<sup>12</sup> Ebe ulamalo Loma gabamani kawokawo dubate Ga:liyoko palibiya ebete Guliki opo epono oli Kapela Kawo Elawodubuma: ka:peda:nama:, ebema: ebe opono Yu epate woki kapiyakobi midite Poloko ebetamo ebo magatiya ebena tanalo kanagiyamidaema:. <sup>13</sup> Ebe tetelo iba:te Kawo Elawodubutamo negeliya, “Me dubu Godoko amamateno iya gabo eba iyatulamelo, ebete epatamo elawo nikalamena gabamanino pukala kowakalaima:.”

<sup>14</sup> Ebema: Poloko ubila wiya tabo kegema:, wiyasiya Ga:liyote ebe odiiyobote Yu epatamo negiya, “Lumagite kawo kuba idi nanitabolo nosiyodilotaleka:, nale la: Yu epono tabo apuapu wadenomamo bolowiona:, wiyasiya me tanalo kawo tanalola:!” <sup>15</sup> La: la:imano Yu opono tanalo kapiyama: apamineuteitamata, ebe iyaiya tanalo la:imano Buka apuapuno magumu tanalola, ega:walo la:imano epono iyaiya mailono tanalo, ega:walo la:imano ewonino iyaiya pukala tanalola, ebema: modobola la: a:ka:tuwa: la:imano ubia: tanalo na:na:tupugaima:la:. Na ubia:nola ebe tanalo anagilamedawama: eda:ma:!” <sup>16</sup> Ebene Ga:liyote elawo lawete ibi bilibilinomo ebena tabo anagiyamida motone gito a:na:ma:lateliya. <sup>17</sup> Ebe tetelo ebe Yu epate tepo mibomibonomoma: eda:ote ibino balidi ibilamole moto umidawa Sostenisiko lawete Ga:liyokono tabo anagiyamida moto dopo apulo kubanomamo ebo anagalimiya, wiyasiya Ga:liyote ebe tanalo umite kawo tanaloma: kegiya:, ebema: ebete iba:godone gito olobigiya ebena woko epetapi kosiyodilolema:.

*Polote Siliya Opono A:ntiyoka Kawo Duliyoumolamo Ka:kolowaima: Ubi Diyatiya*

<sup>18</sup> Ebe tanalote dolopoligiya Polote tete geyageyadopo nanitabokobi midipi ekakiago okolite, ebena Kolini duliyoumolo eba atepalo ebete Pilisilako ega:walo Akuilako uwatete Siliya mulu opamo tolame ebo wagiilimiya. Ebene iba:te Senekiliya duliyoumolamo nemaimite kawo palai peamo noloa:no, dopamo Polote ebena tepo magumuno nanitabo tanalo kawokalima: ebena eke ebo na:gumiya, mabu ebete dopamo kebe tabo Godotamo nanitabolo kegiyale, ebete eba kunu woko osiyodilo magumulo uwomuamo a:nemaigiya.

<sup>19</sup> Ebene Poloiate walo ka:tolamete Epesese kawo duliyoumolamo da:nemaimiya, ebete Pilisilako ega:walo Akuilako ebo nimiyapiya iba:te ebolo kokolionama:. Ebe tetelo Polote a:ka:tuwa: tote Yu epono balidi ibilamole motamo nodolote Godokono Buka apuapuno tanalo iba:tamo ebo na:kiyawaiya. <sup>20</sup> Ebene iba:te ebe naniya tete geyageyadopo iba:go kokolima:, wiyasiya Polote negiya, “Ao, na ka:tomamo.” <sup>21</sup> Ebe tetelo ebete ibi eba miyapalo tabo idi ma kunu analiya, “Godote ubi diyatimene

na la:tamo walo ka:ka:pemamo,” ebene ebete tote kawo palai peamo da:noliya, ebe pete Epesese kawo duliynomolone gito tiya.

<sup>22</sup> Ebene pete kewa: kolomo na:iwate Sisaliya kawo duliynomolamo da:na:iliya, ebe tetelo Polote agowa gabodo tote Yelusalema kawo duliynomolamo nemaigate sosi epatamo ebene nilakapo tabo na:kiyawaote, ebene ibi miyapate ebete A:ntiyoka kawo duliynomolamo gito ka:tiya. <sup>23</sup> Ebene ebete tete geyageyadopo A:ntiyokalo okolite, ebe kawo duliynomolo katepate Gale-siya ega:walo Piligiya opodo eba petolo Ya:suko waloma:tapi walubila:go ebete ibi elawokobi ebo pa:midiolenatiya.

*Apolosite Godokono Woko Magumulo Tabo Kiyawaodawa Idima: Dediya*

<sup>24</sup> Ebe tetelo Yu dubu idi ebene mailo Apolosite, ebe A:lesandiya duliynomolodawala, ebe Godokono Buka apuapuno tabo magumu iyatawanomola ega:walo ebene tabo kiyawao mulonomola, ebete Epesese kawo duliynomolamo piya. <sup>25</sup> Me dubu lumagi idite Kawodawa Ya:suko waloma:ta gabo dopamo iyatumiya, ebema: ebete ebene tepo magumulo elanomoma: eba eda:nalo Ya:sukono tanaloma: epetapi wadenomamo iyatulamenaki. Wiyasiya ebete Yonekono obamo waduba:midaole tanalo kapiya iyatawiya, ebema: ebete kiyatawiya: Godote ebene Uliyanamo epo keba kunu dowaduba:midaolenako ebe tanalo. <sup>26</sup> Ebene egela idilo Apolosite Yu epono balidi ibilamole motolo Godokono tabo tolea:no da:kiyawaiya, Pilisilako ega:walo Akuilako iba:te ebene tabo olowite, Apolosiko ibino motamo magatate Godokono gabono tanaloma: wadewade iyatulame tabo epetapiamo ebe ebo nowalubiya.

<sup>27</sup> Ebema: tete idilo Apolosite Guliki opamo toma: ubi diyatiya, Epesese nanitabokobi midipi ekakiate leta alibiya Guliki opo epo nanitabokobi midipiatamo iba:te ebe kalakalago kelaema: Ebene Apolosite ebamo da:nemaigiya, piyate Godokono nilakapodo nanitabokobi midipima: deda:onamiya, ebete ebe epo kawiyawa ebo nowalubiliya. <sup>28</sup> Ebe tetelo ebete Godokono tabo kiyawao elawonomoma: neda:te, Yu epo epetapiate ebene iyaiya tabono tanalo odiyobolema: dowagelenakiya, wiyasiya Apolosite epo bilibilinomono ololo apulo ibino tabo modobolo alukolelamenaki. Iyo, ebete Godokono Buka apuapuno magumu wadenomamo ma kunu awokaliminaki, Ya:suko ebe Kelisote, Godokono Alibodawala.

## 19

*Polote Epesese Kawo Duliynomololo Da:nokolinami*

<sup>1</sup> Ebene Apolosite Kolini duliynomololo eba nokolinalo, ebete kebe duliynomolo katepiyale Polote A:isiya opono duliynomolo epetapido petote ebe atu Epesese kawo duliynomolamo gito nemaigiya. Ebe tetelo ebete Ya:suko waloma:tapi epetapi ebolo nulamete <sup>2</sup> ibi nanaliya, “La:le la:imano nanitabokobi midi tanalo Ya:sutamo diyata:ima, ebe tetelo Godokono Uliyana a:kelawa:ima?”

Iba:te wiyasiya negeliya, “Ao, a Godokono Uliyanate epagodolo dokolina ebe tanalo dopamo kolowia:.”

<sup>3</sup> Wiyasiya Polote ibi nalateda:liya, “Epetapiate la: obamo dowaduba:midaoletia, pokono mailamo kosiyodiliye?”

Iba:te nowamiya, “A obamo Yonekono mailamo iwitima:.”

<sup>4</sup> Ebene Polote iba:tamo negiya, “Epate ibino kuba osiyodilole magumune Godotamo dolobiliya, Yonete ibi obamo ebema: waduba:midaoliya, ega:walo ebe atu tetelo ebete Isalaela epo ebe analiya, iba:te ebene walo-gabo apune da:pena ebe lumagi nanitabokobi ka:midima:, ebe Ya:sutela.”

<sup>5</sup> Ebene Epesese nanitabokobi midipi ekakiate ebe tabo olowite Polote ibi Kawodawa Ya:sukono mailamo obamo walo ebo kowaduba:midaoliya.

<sup>6</sup> Ega:walo Polote ebena koto iba:tamo dowatiolelamiya, Godokono Uliyanate ibi unamo eba iwisigalo, iba:te elawo lawete Unu Duliyomolono nopopino iyaiya tabamo kawo kalakala adipatelo Godokono tepo magumu wokino tabo ebo awokalilamiya. <sup>7</sup> Nanitabola, ebe tetelo Godokono Uliyanano elawote 12 dubatamo ma kunu iwisigiya.

<sup>8</sup> Ebema: Polote netewa-kapiya sagana Yu epono balidi ibilamole motamo odolonaki Godokono tabo tolea:no ebo kiyawaonaki, ebene ebe tete geyageyadopolo Polote iba:go Godote Kawo Elawodawama: deda:na, ebe tanalono nanitabo tanaloma: kawonomamo kiyawaonakiya. <sup>9</sup> Wiyasiya ibi epetapiate wato kodakodanomoma: eba eda:olamelo nanitabokobi ka:midia: Iba:te epono ololo apulo Ya:suko Nanitabokobi Midi Gabo kubama: geliya, ebema: Polote Ya:sukono nani waloma:tapi kapiya uwatete iba:te nanitabokobi midia:pino taneba magumune kapimiya gito tolamiya. Ebe tetene wagilimite ibi a:ka:tuwa: Taila:nasikono Sukulu motolo dalad-abutinakiya, Polote egela bilibilinomo epetapilo Godokono Buka apuapuno tabo magumu iba:tamo ebo kiyawaonaki. <sup>10</sup> Ebema: nanitabola, ebete netewa ulamamo Epesese kawo duliyomololo eba okolinalo, A:isiya opo kawonomolo dilukulionamiya ebe Yu epo ega:walo Yua:pi atumu, ibi bilibilinomate Kawodawa Ya:sukono tabo ebo olowiya.

### *Sikibakono Koino Kuba Osiyodilo Tanalo*

<sup>11</sup> Ebe tetelo Godote Polodo kawokawo anoano tanalo epetapi osiyodilolenaki. <sup>12</sup> Ma kunu epate Polokono wato matuomeono kaliku ega:walo lubudino kaliku ebena apene duwatemenakiya, ebene iba:te watate temetema:gopiatamo da:nowatiolelamenakiya ibino temeteme tanalate iba:godone gito olopoligolamenaki ega:walo kubakuba uliyanate iba:godone a:ka:nemaimionakiya. <sup>13-14</sup> Ebe atu tetelo Yu dubu epetapiate ebe opolo eba wapata:lamenalo epagodone kuba uliyana alibolenakiya, ebene iba:te ebe woko eba osiyodilonalo tete epetapilo Polokono mailo ega:walo Kawodawa Ya:sukono mailo ka:la:milo kubakuba uliyana kawiyana ebo analenakiya. Ebene ibino taneba magumulo Yu dubu idi Sikibakono sebeni koiate nilukulinamiya, ibino nabiwi ebe Godotamo kalimagono ikameopino watodawa idila. Tete idilo ebe sebeni koiate dubu idigodone kuba uliyana aliboma: eba wangelitalo, iba:te negeliya “Polote Ya:sukono tanaloma: da:kiyawaonako, ale ebe Elawodawano mailamo la: anala:ta ebegodone na:nemaima:la.”

<sup>15</sup> Wiyasiya kuba uliyanate iba:tamo negiya, “Ya:suko ega:walo Poloko na ibi iyatawala, wiyasiya la: piyatela:ka:?” <sup>16</sup> Ebene kuba uliyanagono dubute kawo elawago iba:tamo pepategate ibi kubanomamo eba palukolelo ibino kaliku pupukulamelelamete, iba:te motone kalima ka:ka:liyaolelama:go kikopiya gito alautiya.

<sup>17</sup> Ebema: Epesese kawo duliyomololo dilukulionamiya, ebe Yu epo ega:walo Guliki opo epo atumu, ibi bilibilinomate ebe tanalo dolowiya iba:te kawonomamo toleteleote Kawodawa Ya:sukono mailo unamo ebo adipatiya. <sup>18</sup> Ebe tetelo epo bilibilinomate Ya:suko nanitabokobi midite, ebene iba:te epono ololo apuamo pelamete ibino kuba osiyodilole tanalo ebo pawokalilamoliya. <sup>19</sup> Ega:walo ebe atu tetelo giwali osiyodilolepi epetapiate ibino giwali iyatawa buka wadaete epo bilibilinomate eba ulamitalo elamo gito pemadolamoliya. Nanitabola, iba:te da:kubailamiya ebe bukano wiya uwomu kawonomola, da:pesoa:, iyo, ebe buka bilibilinomono



wiya uwomu 50 taoseni manima: ediya. <sup>20</sup> Ebema: me osiyodilo gabodo Godokono tabote elawonomoma: eba eda:lo ebe opo kawonomamo ebo tiya.

*Epese Kawo Duliynomololo Kawo Dowa Tanalote Polotamo Demaigiya*

<sup>21</sup> Me iyaiya tanalate dolopoligoiya, ebe tetelo Polote nopo ebo iyatiya Ma:sadoniya ega:walo Guliki opodo petote Yelusalema kawo duliynomolamo walo ka:ka:nemaigama:. Ebe negiya, “Na ubila Yelusalemalo tete da:pesamo nokolite, ebene na Loma kawo duliynomolo uima: ka:tomamo.”

<sup>22</sup> Ebene Ma:sadoniya opamo toa:no Polote ebene walubipi netewa Timotiko ega:walo Elastasiko ebe opamo dopamo naliboliya, wiyasiya ebete A:isiya opolo tete da:pesamo walo ka:kokolima: gelo iba:go ka:tiya:. <sup>23</sup> Ebene ebe tetelo Ya:suko Nanitabokobi Midi Gaboma: Epese kawo duliynomololo kawo kubanomo idite ma kunu maigiya.

<sup>24</sup> Ebolo dubu idite nokolinami, ebene mailo Dimitiyasitela, ebe siliba inamabuamo ida:da:li osiyodilole dawala. Ma kunu ebete ebene kawo bisnisi magumulo abali ida:da:li idi Atimisiko mabuma: ebe amamateno moto egege siliba inamabuamo dosiyodilolenaki, ebe ega:walo ebene wokopiate epatamo manima: midiolelo kawokawo mani uwatenakiya, iyo, epate ebe egege moto maniamo uwatete ibino moto gulo patapata unamo eba nalomolo Atimisiko malagidilolo ebe ebo amamatenakiya.

<sup>25</sup> Ebene egela idilo Dimitiyasite ebene wokopi ega:walo ida:da:li osiyodilolepi epetapi, ibi bilibilinomago tabo kegelama: ka:la:mite iba:tamo negiya, “Dubala:, la: iyatawalata aimano bisnisi magumulo a kawokawo maninomo osiyodilolenakoma:, iyo, me aimano igilo mabula. <sup>26</sup> Wiyasiya me dubu Polote beda: tanalo kosiyodilonale, la:le la:imano balida:mo uminakomata ega:walo galamo olowinakomata. Ebe negenako epate kotamo dosiyodilolenaka ebe ida:da:lino elawo kitana:, nani Godo keba kunula:ka: eba kunua:. Ebema: aimano Epese duliynomololo ega:walo me A:isiya opo kawonomolo epate ebene tabo olowite nanitaboma: gelate ibino ida:da:li amamalatele magumune olobila:iya. <sup>27</sup> Diyala, ale tanalo idi osiyodiloa:no tatalila epate aimano bisnisi osiyodilo tanalo kubama: da:bejelama:na:, ega:walo atu tetelo iba:te Atimisiko Amamateno Iya Motamo odolo tanaloma: da:bekalakalatemala:na:. Ebe mabuma: me tetelo epo bilibilinomate aimano A:isiya opolo ega:walo me opo kawonomolo damamatenaka, aimano ida:da:li Atimisiko ebene elawo kawonomo kolopoligoeme!”

<sup>28</sup> Ebema: olowiopi bilibilinomate ebe taboma: kawonomamo dowate gelatepao atepa:no iba:te negeliya, “Epese epono Atimisiko, ebe aimano Kawodawanomola!” <sup>29</sup> Ebene ibino elawo tanalote duliynomolo kawonomamo da:tiya, duliynomolo epo bilibilinomate kawonomamo dowaiya. Ebe tetelo piyate dowago da:tolamitiya iba:te Ma:sadoniya opo dubu netewa Ga:iyasiko ega:walo A:listakasiko elawamo nuwatete duliynomolo epono tabo gela baiamo gawagawalo gito anamiyataliya, mabu ibi netewapi Polago wapata:namiya. <sup>30</sup> Ebema: Poloko ubila epo magumamo tote ibi wadewade tabamo ka:negelebadilaema:, wiyasiya Ya:suko waloma:tapi magumulo ebene namutupiate ebe nodiyobiya, <sup>31</sup> ega:walo ebe A:isiya opono gabamani dubu magumulo Polokono namutupi epetapiate atumu ebe toweomelo tabo ebetamo napalibiya, “A:ma: duliynomolo epono tabo gela baiamo akopa:la:!”

<sup>32</sup> Ebene ebe tetelo duliynomolo epono taneba magumulo kawo dowa tanalote nanitabonomolo maigiya, epetapiate gelatepaolo tabo idi gelanaki, tabo idi gelanaki, eba kunu wagelitiya, ega:walo atu tetelo epetapiate

woki bilibilima: eda:utiya, mabu iba:te kiyatawaiya: epate aladabuti ba-iamo beda:ma: ka:pelamiye. <sup>33</sup> Ebene Yu dubu epetapiate ibino lumagi idi A:lesandatamo elawo eba ikamelo, ebete epono dopo apulo maigate koto ebo a:midaiya epate tabo gela katepama:, mabu ebe ubila iba:tamo walubi tabo ka:kiyawaoma:. <sup>34</sup> Wiyasiya iba:te ebe umiote, ebete Yu lumagima: deda:na ebe tanalo iyatawaote kawonomamo kapimiya gelatepao walo na:kowagilimiya, “Epesese epono Atimisiko, ebe aimano Kawodawanomola!”

Ebene iba:te tete geyageyanomo eba kunu eba wangelitalo, <sup>35</sup> gabamani dubu idi, ebe Epesese duliyoumolono pukala iyatulamedawala, ebete ibi milokobi midilite iba:tamo negiya, “Epesese dubala:, epo bilibilinomo iyatawala, aimano Epesese kawo duliyoumolo ebe Kawodawa Atimisiko Amamate Motono opola. Ega:walo ibi iyatawala, ebe abali ida:da:lino talena nokola kawonomo Unu Duliyoumolone atamo iyalo pegiya, ka:lo aimano duliyoumololo bitana ale wadenomamo kuminama:. <sup>36</sup> Ebema: numa:la:, mulo iyatawa lumagigodolo elawo kitana: Atimisikono tanaloma: a:da: tabo gema:. Ebe mabuma: la: woki bilibiliana:no milolo na:pola:nala:, daedale wokilo kuba tanalo idi ako-osiyodilala:!

<sup>37</sup> “Ebema: la: me dubu netewa mamu beda:ma: kemagaela:ema? Iba:te Atimisiko Amamateno Motolo pilo tanalo kosiyodiloma:, ega:walo iba:te aimano ida:da:lino tanaloma: kuba tabo idi kegela:. <sup>38</sup> Ebema: Dimitiyasiko ega:walo ebenu wokopi, iba:godolo dowo tanalo lumagi iditamo nanitabolo ditana, modobola iba:te aimano gabamani dubatamo na:tolaema:na: tabo anagiyamidapino ololo apulo kanapaminatuima:. <sup>39</sup> Ega:walo la: tanalo idi uima: ubi diyata:witama, modobola duliyoumolo epo epetapiate la:go paladabutite milolo ka:pegelamamota, Loma gabamanite atamo elawo dikaeamena eba kunu. <sup>40</sup> Ebema: nale la: analemata, la: nanisiwale! Ale ka:lo kebe tanalo kosiyodiloma:, Loma gabamaniate dolowima:na:, diyala, iba:te ebe tanalo duliyoumolo kubaimi tanaloma: da:bejelama:na:, ebenu iba:te atamo kuba wiya nanitabonomolo kikaema:na: mabu aimano dowo tanalo magumulo nanitabo tanalo kitana:.” <sup>41</sup> Ebene ebenu tabo kiyawao dolopoligiya, Epesese duliyoumolono pukala iyatulamedawate epo bilibilinomo ibino motamo gito aliboliya.

## 20

### *Polote Ma:sadoniya Ega:walo Guliki Opamo Walo Da:ka:tiya*

<sup>1</sup> Ebema: Epesese duliyoumolo epono kawo dowo tanalote dolopoligiya, Polote Ya:suko waloma:tapi ebetamo ka:la:mite ibi tabo epetapiamo eba walubililo yawo tabo gete Ma:sadoniya opamo ebo tiya. <sup>2</sup> Ebene ebete ebe opo kawonomolo eba nepata:lo, ebete sosi epatamo walubi tabo bilibilinomo kiyawaonatote Guliki opamo gito nemaigiya.

<sup>3</sup> Ebete ebulo netewa-kapiya sagana eba nokolilo, ebenu ebete Siliya opamo palai peago toma: giya. Ebe tetelo Yu dubu epetapiate wiyasiya ebe anakapuima: nopo diyatiya, Polote ebe tanalo olowite ebenu woki iyakobi midite Ma:sadoniya agowa gabodo walo na:ka:piya. <sup>4</sup> Ebe tetelo me dubate Polago tolamiya, Beliya duliyoumolodawa Pilasikono gudu Sosipatako, ega:walo Tesalonaika duliyoumolo dubu netewa A:listakasiko ega:walo Sekandasiko, ega:walo Debi duliyoumolodawa Ga:iyasiko, ega:walo Timotiko, ega:walo A:isiya opo dubu netewa Tikikasiko ega:walo Topimasiko, iyo, me dubate Poloko ebana tolamiya. <sup>5</sup> Ebene iba:te dopamo tolamete Talowase duliyoumolamo nemaimiote a ebo nemakopeitiya, <sup>6</sup> wiyasiya

Pilipai kawo duliynomololo paibu egela da:ponolopoligiya, ebe tetelo a epetapiate Unamo Maiga: Palowa Bae Soliyomu osiyodilote, ebene kawo palai peago Talowasa:mo tolamete Poloiatamo ebo nemaimiyama:. Ebe tetelo ale iba:go kapimiya sebeni egela ebolo nilukuliyama:.

*Polote Idoko Idilo Talowase Duliynomololo Godokono Tabo Da:kiyawaoni*

<sup>7-8</sup> Ebene Satade idokolo ale Ya:suko malagidilo bae naoma: unu moto idilo ditanami ebe kawo teta:mo daladabutiniyama:, ebe aladabuti bailo wuiki alo bilibilinomate wamoteoniya. Ebene Polote egela idilo toma: eba wagelenalo, ebete Godokono tabo kiyawao geyageyaima:tapanate sele tetenomamo ebo nemaigani. <sup>9</sup> Ebe tetelo a magumulo oli ape dubu idite okolini, ebene mailo Yutikasitela, ebete awano gigiyu tetelo eba okolinalo kawo unomote ebo laweni. Ebema: Polote tabo geyageyanomo eba kiyawaonalo Yutikasiko ute delaweni, ebete eba dedeganalo ebe idili moto unune opamo ebo pegani, ebene epo epetapiate piwitionate ebe dapadipateniya a:enomo puminiya. <sup>10</sup> Wiyasiya Polote da:piwisigani ebete Yutikasikono bodolo unamo polokowiganate ebe eba a:wiyamidanalogo negeni, “La: akotoletoleonala:, ebene igilo bitamena!” <sup>11</sup> Ebe tetelo Polote walo ka:nodolonate Ya:suko malagidilo bae wakamionate ale kapimiya ebo naoniyama:, ebene tete geyageyanomolo ebete ago tabo eba kiyawaonalo egela ebo waloiya. Ebene Polote a miyapaete gito tiya, <sup>12</sup> wiyasiya Yutikasite walo igilo da:kelaweni, ebene epate ebema: kawo kalakalago ebe ebene motamo ebo magatiya.

*Poloiate Talowase Duliynomolone Mailitase Duliynomolamo Da:tolamiya*

<sup>13</sup> Ebe tetelo Polote A:soso duliynomolamo dopamo tiya agowa gabodo, wiyasiya a epetapi ebamo kawo palai peago tolamiyama:, mabu Polote a ma kunu anaiya ale ebe ebolo ka:nowiyama:. <sup>14</sup> Ebema: ale eba:go A:soso duliynomololo danalugiyama:, ebete ale da:tolamiyama: ebe peamo olote a bilibilinomate kapimiya Mitilina duliynomolamo ebo na:iwaliyama:. <sup>15</sup> Ebene Mitilina duliynomolone ka:tolamete egela idilo Kiyosi mubamo nemaimite, ebe mubano balado tolamete egela idilo Samoso duliynomolamo na:iwalete, egela idilo Mailitase duliynomolamo gito nemaimiyama:. <sup>16</sup> Ebe tetelo Polote ebene nopo ma kunu iyatiya, ebete kawo palai peago eba tolo Epesese kawo duliynomolo gito ka:nodolima:, mabu ebe ubia:nola ebe A:isiya opolo tete geyageyalo nokolima:, wiyasiya ebe ubila Yelusalema kawo duliynomolamo samamo tote Pentekose Soliyomu\* ebe lupida: kosiyodiloma:.

*Polote Epesese Sosi Watowatopiatamo Ebene Uwomu Tabonomo Da:kiyawaiya*

<sup>17</sup> Ebene Polote Mailitase duliynomolone tabo nalibiya Epesese sosi watowatopiatamo iba:te ebetamo ka:pelaema:. <sup>18</sup> Ebe watowatopiate ebetamo da:pemaimiya, ebe tetelo ebete iba:tamo negiya, “Na dopo tetenomolo A:isiya opamo da:pimo, ebe egelane wagilimite egela epetapi bilibilinomo magumulo la:godolo kebako okolilo ka:pokolinaimo, la: ebe tanalo iyatawalata. <sup>19</sup> Ma kunu na a:ka:tuwa: na opamo iyatilo Kawodawa Ya:sukono woko eba posiyodilonalo ipupago pepata:naimo, mabu Yu epate natamo temeteme eba ikanamenalo na anakapunaema: wagelenamiya. <sup>20</sup> Wiyasiya ebe tete geyageyanomolo la: kowalubilitama: Godokono tabo kiyawaoma: na ka:toletolenamia:, ebema: tete bilibilinomo epetapilo nale awokala bailo

\* **20:16:** Buka ka:la:mioledawa, a:ma: ubi diyata:emene me Yu epono Soliyomu idino magumu kiyatawaema:, modobola a:ma: me atu Alibolepi Buka 2.1 buka apuno walubi tabo numiye.

ega:walo la:imano iyaiya moto gulo la: eba iyatulamelo nale kapiya tanalo idi kanaetoamidania. <sup>21</sup> Iyo, ebe tetelo na Yu epo ega:walo Yua:pi atumu, ibi bilibilinomo analenakimo, iba:te ibino kuba osiyodilole magumune Godotamo olobila:ote Kawodawa Ya:suko nanitabokobi ka:midima:

<sup>22</sup> “Ebema: ka:lo la: numa:la:, na Godokono Uliyanate danani ebe tanalamo tuduwatate Yelusalemamo toma: wagelemo, wiyasiya na iyatawa: ebolo natamo beda: tanalate demaimioma:na. <sup>23</sup> Wiyasiya Godokono Uliyanate na diyatunami ebe kapiya tanalo iyatawanamo, duliynomolo bilibilinomolo idoko motono temeteme ega:walo kodakoda tanalo epetapiate na makopelenena. <sup>24</sup> Wiyasiya naimano igilo nitanana, nale kawonomamo a:kemalagidilomo. Kawodawa Ya:sute natamo iyalo dikanamiya, ebe woko Godokono Wade Tabo kiyawao wokola, ebema: ebe tabo kiyawao magumulo nale Godokono nilakapo tanalo awokalima: woko uwomuamo nanitabonomolo ka:nemaigamamo.

<sup>25</sup> “Me tanalo nanitabola, Godote Kawo Elawodawama: deda:na, nale ebe tanalo la:godolo kiyawaoago pata:naimo. Wiyasiya naimano namutupiala:, ka:lo na niyatawitamo la: bilibilinomate naimano ololo walo a:kuma:ema, <sup>26</sup> ebema: ka:lo egelalo nale la: analemata, la:imano taneba magumulo lumagi idino igilote danalatidimene, ebe tanalote naimano kubama: a:keda:mene. <sup>27</sup> Nanitabola, Godote epo bilibilinomatamo ebena ubi keba kunu kiyatinala iba:te kosiyodilolenama:, nale ebe tanalo bilibilinomo la:tamo kiyawaoma: ka:toletolenamia:, ebema: nale la: eba iyatulamelo kapiya tanalo idi kanaetoamidania.

<sup>28</sup> “Ebema: watowatopiala:, la: a:ka:tuwa: la: ega:walo la:imano sipigoeogoeo bilibilinomo wadenomamo nulamenala:, mabu Godokono Uliyanate la: ibi ulamepima: a:midiliata. Iyo, modobola la: Godokono sosi epatamo wadewade bae nikalamenakiyala:, mabu ebete ebena kalimamo ibi uwatiya iba:te ebena gudima: keda:onama. <sup>29</sup> Na iyatawala, nale la:godone da:tomo, ebe tetelo elawoelawo tumu gaagaate la: magumamo popila:ote la:imano sipigoeogoeo kubanomamo kapalolema:na. <sup>30</sup> Ega:walo la:imano eponomo magumulo dubu epetapiate maimiote Godokono nani tabono magumu oba:midalete wiyasiya a:da: taboma: ka:midilima:na:, Ya:suko nanitabokobi midipi kuba gabamo kowabuga:talema. <sup>31</sup> Ebema: la: olowiolo nilukuliniyala: ega:walo naimano tanalo akododomatiala:! Nanitabola, nale netewa-kapiya ulama magumulo naimano ipupago idoko ega:walo egela bilibilinomolo la: bilibilinomo iyatulamenakimata.

<sup>32</sup> “Ebema: ka:lo nale la: Godokono kotamo alomomata, ebena nilakapodo la:tamo da:pi ebete ebe tabamo la: wadenomamo ka:buiyalateletanama. Iyo, ebe modobola la: ka:kodakodailametama:, ebena ebete iyalo ebena talena epoma: da:midilitiyala, ebe epo ega:walo la:, ebete ebena wadewade tanalo la: bilibilinomatamo kapimiya kikalamolema:ta, ebete dopamo nanitabonomolo keba kunu kegiyale eba kunu. <sup>33</sup> Numa:la:, nale la:imano taneba magumulo lumagi idino mani ega:walo pupuliono inamabu nale kolomoiliminakia. <sup>34</sup> La: iyatawalata, na a:ka:tuwa: me koto netewamo woko eba osiyodilonalo, na a:ka:tuwa: na ega:walo nago dowapata:lamenamiya aimano modoboa: tanalo modobokobi midilinaimo. <sup>35</sup> Ma kunu nale osiyodilole tanalo bilibilinomo magumulo la: iyatulamenakimata, la:le iyaiya woko kodakodalo eba osiyodilolelo mani uwata:wete nigologolopi ebo kowalubila:wenama. Iyo, Kawodawa Ya:sute dopamo kebe tabo kegiyale, modobola la:le ebe tabo walo na:kemalagidilala:, mabu nanitabola, ebete ma kunu giya,

‘Inamabu uwate tetelo  
me opono kalakala bitana,  
wiyasiya lumagi iditamo ikame tetelo  
Godokono kalakalate a:ma:godolo  
kawonomoma: keda:mene.’”

<sup>36</sup> Ebene Polokono tabo kiyawao sosi watowatopiatamo dolopoligiya, ebe tetelo ibi bilibilinomate ebe ebana pupamo ilukulite towetowe tabo Godotamo ebo adipatiya. <sup>37-38</sup> Ebene ibi bilibilinomate pe boboamo kapimiya da:niyodoliya, iba:te Poloko a:wiyamidaolo ega:walo eba aboe-teolo kawo tepo temetema:go iimitiya, mabu ebete iba:tamo ma kunu kiyawaiya, iba:te ebenu ololo walo a:kuminakoma:na:

## 21

### *Polote Yelusalemamo Eba Tolo Iyaiya Duliyomolamo Demaigaonatiya*

<sup>1</sup> Ebe tetelo ale Epesese nanitabokobi midipiatamo yawo tabo gelate kewa: kolomo a:iwalenomo na:iwalete Kosa opamo ebo nemaimiyama:, ebene egela idilo a Lodesa opo nelawete, ebene Patala duliyomolamo gito tolamiyama:. <sup>2</sup> Ebolo Ponisiya opamo a:iwama: ditani ebe kawo palai pe idi ale numite, ebe tetelo a ebe peamo nolote tolame ebo nowagilimiyama:. <sup>3</sup> Ebene ale da:tolamiyama: Saipalase opo numite pele apuamo eba a:midalo ale Siliya opamo na:iwalete, pe namutudawate ebenu pe Taya kawo duliyomolamo gito na:iliya ebenu inamabu maniamo ka:na:midilima:. <sup>4</sup> Ebe duliyomololo ale Ya:suko waloma:tapi epetapi ola:go petolamete ibi nulamete sebeni egela iba:go ebo nilukuliyama:, ebene kebe kuba tanalote Polotamo da:pemaigamene, iba:te ebe tanalo Godokono Uliyanano elawamo iyatawaote ebe kawiyaya naniya ebete Yelusalemamo a:ka:toamene. <sup>5</sup> Ebene pe namutudawate atamo kebe tete kikaemiyale, ebe tete demaigiya ale ibi miyapama: gelate peamo ebo piwitiyama:. Ebe tetelo ibi bilibilinomate ibino kamiyaalela gudila a miyapaema: duliyomolone ago pelamiya pe boboamo, ebene a bilibilinomo kewa: kolomo balalo pupamo pilukulite Godotamo towetowe tabo ebo padipatiyama:. Ebe tanalo dolopoligiya, epetapiate epetapiatamo yawo tabo gelate <sup>6</sup> ale peamo olote iba:te ibino motamo walo gito kolowamiya.

### *Polote Sisaliya Kawo Duliyomololo Tete Da:pesolo Da:nokoliya*

<sup>7</sup> Ebe tetelo Taya kawo duliyomolo atepate ale kawo palai peago tolame walo na:kowagilimiyama:, ebene Tolameyasi duliyomolamo da:nemaimiyama:, ebolo nanitabokobi midipi ekakiatamo kalakala tabo negelate kapiya idoko iba:godolo nelaoniyama:. <sup>8</sup> Ebene egela idilo ale Sisaliya kawo duliyomolamo nemaimiote Godokono Wade Tabo atedawa Pilipikono motamo nodolote ebo nilukuliyama:. Nanitabola, Yelusalema sosi epate dopamo sebeni dubu Godokono woko osiyodiloma: duwatiya, Pilipiko ebe tuputupu wokopino taneba magumulo ebe idila, <sup>9</sup> ega:walo ebegodolo ebenu netewa-netewa kawokawo buwelemela:te ilukulinamiya, Godokono Uliyanate ebenu iyanomo elawo iba:tamo ikalamoliya ebenu tepo magumuno woki kawokalilamenakoma:

<sup>10</sup> Ebene ale egela epetapilo ebolo eba ilukulilo, Godokono woki awokalimidawa idi A:gabasite Yudiya opone atamo ebo pemaigiya. <sup>11</sup> Ebete a puamete Polokono bata pelawete ebe a:ka:tuwa: ebenu agowala kotola eba matuolamolelo negiya, “Godokono Uliyanate ma kunu gita, ‘Yu epate



Yelusalemalo dilukulina, kebe dubute me bata da:pulinako iba:te ebe dubu elawamo lawete Yua:piatamo ka:nikalaema:na: ebe ka:kubaima:’ ”

<sup>12</sup> Ebe tetelo a ega:walo epetapi me tabo dolowiyama:, ale Poloko na:toweomiyama:, “A:ma: Yelusalemamo akotoala:!”

<sup>13</sup> Ebene Polote aimano tabo wiyalo negiya, “Natamo beda:ma: ki-ima:witama? Mabu keleka: la:le tepo temeteme natamo ikanaema: dowagela:witama? Nanitabola, nale olosiyodilomo Yelusalemalo epetapiate naimano ape ala:mo matuomeoma:, ega:walo naimano kalakala bitana ebolo Kawodawa Ya:suko mabuma: a:ema:.”

<sup>14</sup> Ebe tetelo ale Polokono woki iyakobi midima: ka:modobiya:, ebema: ebe tanalo dumiyama: ale negeliyama:, “Kuba:nola, Godokono ubi tanalote nemaigamene.” Ebene ale tabo idi kegeliya:.

<sup>15</sup> Ebene ebe tanalo dolopoligiya ale aimano inamabu gatela:mo we-pote Yelusalema kawo duliynomolamo agowa gabodo gito tolamiyama:.

<sup>16</sup> Ebe tetelo Ya:suko waloma:tapi epetapiate ibino Sisaliya duliynomolone a da:buiyataenatiya, iba:te a Nesonikono motamo gito magataiya ale ebolo ka:nilukulima:. Nesoniko Saipalase opodawala, dopo epate Ya:suko nanitabokobi da:midiya ibino taneba magumulo ebe idila.

### *Yelusalema Sosi Watowatopiate Poloko Da:totomutiya*

<sup>17</sup> Ebe atu egelalo Yelusalema kawo duliynomololo dilukulionamiya ebe nanitabokobi midipi ekakiate a kawo kalakalago uwateiya. <sup>18</sup> Ebene egela idilo a bilibilinomate Polago Ya:imesiko uima: da:tolamiyama:, ebe tetelo ale ebe sosi watowatopi epetapi bilibilinomago eba lutalo numiyama:.

<sup>19</sup> Ebema: Polote iba:tamo kalakala tabo negete, Godote ebenu woko magumudo kebe tanalo bilibilinomo Yua:pi magumulo dosiyodilolenaki, ebete ebe tanalo iba:tamo ebo awokalimiya.

<sup>20</sup> Iba:te me tabo dolowiya Godoko moiolo negeliya, “Aimano naniwi, kalakala kawonomola, wiyasiya me tanalo idi wadenomamo numa:, a Yu epo magumulo kebako taoseni epo bilibilinomate Ya:suko nanitabokobi a:midiya. Wiyasiya nanitabola, Godote Mosesedo aimano ewoniatamo dikalamiya, ibi bilibilinomate ebe Totomu Tabo kowaloma:talema: kawonomamo malagidilolena. <sup>21</sup> Ebema: nanitabokobi midia: Yu epo epetapiate aimano ekaki epetapino woki kubailamelelanelo dopamo ma kunu analiya, iyaiya mulu opolo dilukuliona a:ma:le ebe Yu epo a:niyatulametakota iba:te Mosesekono Totomu magumune kolobila:ma:. Ebene iba:te a:imano tanaloma: a:da: tabo idi kegeliya ma kunu, a:ma:le epatamo talena iyatila-menata ibino dubu guda:tamo Godokono tama itamida pukala kalomolame-nama: ega:walo aimano ewonino iyaiya tanalo epetapi kosiyodilolenama:.

<sup>22</sup> “Ebema: a keba kunu na:kowagelema:? Nanitabola, iba:te a:imano pe tanalo kiyatawaoma:na:, <sup>23</sup> ebema: a ubila a:ma: me tanalo nosiyodiliye. Aimano taneba magumulo netewa-netewa dubate ba:pola:na, iba:te dopamo epono ololo apulo tabo a:kiyawaiya ibino ape Godotamo nanitabonomolo kikameoma:. <sup>24</sup> Ibino tete na:pe, ebema: modobola a:ma: ibi magatala:wete awokala na:nowalubiliye, kalimagono inamabu mani-amo uwata:wete Godotamo eba nikameolo ibino tepo magumuno daleyale kopoliyalelaema:. Ebene a:ma: iba:go toawete eke a:gumi iyatawaopiatamo mani nikalamiye iba:te eke a:gumi tanalo kuwatema:. Me gabodo epo bilibilinomate kiyatawaoma:na: epetapiate a:imano tanaloma: a:da: tabo degelana ebe tabo nanitaboa:, wiyasiya iba:te kuima:na: a:ma: atumu Mosesekono Totomu Tabo magumulo bokolinata. <sup>25</sup> Nanitabola, a sosi watowatopiate dopamo Yua:pi nanitabokobi midipiatamo leta alibima:, iba:te

Mosese kono Totomu magumulo keba kunu na:kilukulinama:na. Ebe leta tabono tanalo ma kunula, epetapiate ida:da:liatamo dikalamenaka iba:te ebe inamabu a:kenaonakoma:na; ega:walo kuwokobe dewegedililamenaka ebe inamabu nao talenala mabu kalimate ebe katene magumulo bitana, ega:walo iba:te kamiyale pilo dubu pilo a:kosiyodilolenakoma:na.”

<sup>26</sup> Ebene egela idilo Polote ebe netewa-netewa dubu magatalete ebe ega:walo ibino tepo magumuno daleya tanaloma: Godotamo kalimagono inamabu ebo nikameiya. Ebene ebete Godoko Amamateno Iya Motono kala ga:dimi magumamo nopegate ibino mailo eba nalomolo wokedawa ebo naniya, “Sebeni egela dolopoligomene, nale me dubago walo ka:pete ibino iyaiya tanaloma: uwomu kalimagono inamabu Godotamo ka:pikameomamo.”

### *Godoko Amamateno Motolo Yu Epono Dowa Tanalote Polotamo Demaigiya*

<sup>27</sup> Ebene sebeni egela olopoligoma: eba tatalilo, Yu epo epetapiate A:isiya opone dopamo da:pelamiya, iba:te egela idilo Poloko Godoko Amamateno Motolo ebo numiya. Ebema: iba:te kuba woki lawete ubi iyatiya, ebolo da:pola:niya ebe epo bilibilinomatamo elawo ikalamete iba:te Polotamo ka:dowaoma:, ebene iba:te Poloko elawamo lawete <sup>28</sup> gelatepaolo negeliya, “Isalaela dubala:, la: a nowalubia:la! Opo kawonomolo epo bilibilinomo kubanu demagatalena, me ebe dubula! Ebeno iyatulame magumudo ebete aimano epo ega:walo aimano iyaiya totomu ega:walo me talena moto kubailamenako! Ega:walo egela idilo ebete Yua:pi epetapi me Godoko Amamateno Motamo magaelete aimano talena baino pukala adikamidali!” <sup>29</sup> Iba:te me tabo egeliya mabu egela idilo iba:te Poloko ega:walo Epe-sese duliyoumolo dubu idi Topimasiko Yelusalemalo kapimiya wapaitalo dulamiya, ebema: iba:te ma kunu malagidiliya, Polote ibino talena adikamidalete ebe Yua: dubu Godoko Amamateno Motamo emagata, wiyasiya ebe tanalo nanitaboa:.

<sup>30</sup> Ebe tetelo Yelusalema kawo duliyoumololo epo bilibilinomate ebe tabo dolowiya, iba:te apune apune ebo pipuila:iya. Ibi epetapiate Poloko elawamo pelawete Godoko Amamateno Motone anamiyatate, ebene moto umipiate kalano gigiyu gito mopioliya. <sup>31</sup> Iba:te Poloko anakapuima: eba wagemitalo, Loma gabamanino gowelaopino watodawate ebo iyatawiya Yelusalemalo gowela tanalo kawonomote maigita. <sup>32</sup> Ebema: ebe tetenomolo ebete ebene opopi ega:walo gowelaopi dubu epetapi uwatete epono gowela tanalo odiyoboma: ebo pipuila:iya, ebene epate ibino pelame tanalo dumiya Poloko anagalimio gito atepiya. <sup>33</sup> Ebene gowelaopino watodawate Poloko niyakabamo pete ebene opopi nanaliya, iba:te ebe lawete auli ale netewamo ebe kematuomeoma:, ega:walo ebete epo nalateda:liya, “Me dubu poteleka:? Ebete beda: kuba kosiyodilole?”

<sup>34</sup> Ebe tetelo epo epetapi bilibilinomate gelatepaolo tabo idi gelanaki, tabo idi gelanaki, eba kunu wagemitiya. Ebema: iba:te diyamo kawonomo eba osiyodilutalo gowelaopino watodawate ebe tanalono magumu wadenomamo lawea:no ebene opopi gito analiya iba:te Poloko gabamanino motamo kemagatama:, ebe kawo motonomo ebe Loma epono gowelaopino woko motola ega:walo lao motola. <sup>35</sup> Ebene iba:te Poloko ebamo magatate motono gabamo eba na:putiolelo ebene igilo mula:ema: ibino kotamo ebe unamo ebo adipatiya, mabu duliyoumolo epono dowa tanalote kawonomamo maigiti. <sup>36</sup> Ebe tetelo ibi bilibilinomate Poloko elawo kawonomago

eba a:na:ma:elo gowelaopiatamo gelatepaolo negelanapiya, “Ebe nanakapuma:la! Ebe nanakapuma:la!”

*Polote Yu Epatamo Tabo Kiyawaoma: Gowelaopino Watodawa Daniya*

<sup>37</sup> Ebene Loma gabamanino gowelaopiate Polago ibino kawo motonomono guamo nopila:oa:no, dopamo ebete ibino watodawatamo negiya, “Na tabo idi a:ma:tamo ba:kegemo?”

Gowelaopino watodawate la:wa:lo nowamiya, “O! A:ma: Guliki tabo iyatawalata! <sup>38</sup> Ebema: Isipiti opo dubu idite ebene 4,000 dubu bulu opamo magatalete a Loma gabamaniatamo gowela nopo da:niyati, a:ma: ebetea. Diyala, a:ma: da: iya opodawala.”

<sup>39</sup> Polote ebene tabo eba wiyalo negiya, “Na Yu lumagila, na Silisiya opono Tasase kawo duliyoumololo awokaliyamo, ebema: nanitabola, naimano duliyoumolo da:peso duliyoumoloa:. Na a:ma: toweoemata, nale naimano epatamo tabo ka:kiyawaoma:.”

<sup>40</sup> Ebene gowelaopino watodawate modoboma: gete, Polote motono gabo unulo utite ebene kotamo epo eba odiyobolelo, ebene ibino tabo gela tanalo gito olopoligolamiya. Ebe tetelo ebete Yu epono tabamo kiyawao ma kunu wagilimiya,

## 22

<sup>1</sup> “Naimano ekakila, nabila, naimano kuba osiyodilo tanalo la:tamo da:kiyawaomo, la: nolowiala:.” <sup>2</sup> Ebete iba:tamo Yu tabamo da:kiyawauti, iba:te olowite tabo gela:no gelebadinomolo pola:niya.

Ebene Polote walo na:kegiya, <sup>3</sup> “Na Yu lumagila, Silisiya opono Tasase kawo duliyoumololo awokaliyamo, wiyasiya na me Yelusalema duliyoumololo apete, ebene ulama bilibilinomo epetapilo Gameliyelate na iyatunamenaki. Ebene ebene iyatumi magumune Godote aimano ewoniatamo kebe Totomu Tabo kikalamiyale, nale ebe iyaiya tanalo kodakodalo eba uwatelo naimano ape kawonomo Godokono wokamo ebo iyatiyamo, ka:lo la: bilibilinomate keba kunu kilukula:wenama eba kunu. <sup>4</sup> Ebema: ulama epetapilo nale me wokino tanalodo piyate Ya:suko Nanitabokobi Midi Gabodo dowapata:lamenamiya iba:tamo kawokawo temeteme ikalamenakimo. Iyo, nale ibi magumulo dubu ega:walo kamiyale elawamo uwatenakimo idoko motamo gito niyalekenakimo, ebene epetapiate ibi danakapulamenakiya na ebe tanaloma: ebo kalakalanakimo. <sup>5</sup> Ka:lo nale kebe tabo ka:kiyawautamo ebe tabono nanitabo tanalo Godotamo kalimagono ikameopino Unu Watodawanomo ega:walo Ka:nisolo dubu ibi bilibilinomo iyatawala. Iba:te natamo leta epetapi ikanamonete Dama:sakase duliyoumolamo na gito aliboniya nale aimano Yu epo ekakiatamo ebe leta ka:nikalamolema:. Ebe tetelo na ubi iyatiyamo, nale ebe duliyoumolamo eba nemaigalo Ya:suko waloma:tapi ebolo nuwatete ala:mo matuolamolete Yelusalemamo magalete iba:tamo kuba wiya ka:pikalaema:.”

*Polote Ya:sutamo Keba Kunu Kolobigiyale Ebe Tanalo Dawokalimiya*

<sup>6</sup> Ebene Polote ebene tabo moga:melo walo na:kegiya, “Wiyasiya nale egela tulilo Dama:sakase duliyoumolo niyakabamo da:nemaiganatiyamo, ebe tetenomolo Godokono Unu Duliyoumolone alo kawonomote eba piwisigalo molete da:la:uwa:mida keba kunula:ka:, na ebe alote eba kunu pa:wiyamidiganiya. <sup>7</sup> Nale opamo gate tabo ma kunu olowiyamo, ‘Solo, Solo! Keleka: mabu a:ma:le natamo kawokawo temeteme dikanama:wena?’

<sup>8</sup> “Nale nowamiyamo, ‘Kawodawa, a:ma: poteleka:?’

“Ebene ebene wiya tabote ma kunu piya, ‘Na Ya:sute Nasalete duli-  
 omolodawala, a:ma:le natamo temeteme dikanama:wena na ebe lumagila.’  
<sup>9</sup> Ebe tetelo kebe dubate nago da:tolamiya, iba:te natamo da:kiyawauti  
 ebe lumagino tabo madodo wadenomamo kolowiya:, wiyasiya alo kapiya  
 umitiya.

<sup>10</sup> “Ebene nale negiyamo, ‘Kawodawa, a:ma: beda: ubi kiyata:wita nale  
 kosiyodiloma:?’

“Ebate nowamiya, ‘A:ma: maigawete Dama:sakase duli-  
 yomolamo na:nopega, ebene a:ma:le kosiyodilaema: Godote ebene ubi tanalo iyalo  
 tetelo diyatiya, ebe iyaiya tanalo lumagi idite ebolo ka:kiyawaoema:ta.’

<sup>11</sup> Ebe tetelo naimano balidite idokonamiya mabu nale alo kawonomo  
 umiyamo, ebema: naimano namutupiate na kotamo lawenete Dama:sakase  
 duli-  
 yomolamo gito magataniya.

<sup>12</sup> “Ebolo dubu idi ebene mailo A:nanayasitela, ebete Godoko tolemelo  
 Mosesekono Totomu Tabamo tuduwatanami, ega:walo Yu epate ebe  
 duli-  
 yomololo dilukulionamiya ibi bilibilinomate ebe tuputupudawama:  
 gelanamiya. Ebete na unaema: da:piya <sup>13</sup> na niyakabamo putite na:pegiya,  
 ‘Naimano ekawi Solo, a:imano balidi wadenomamo walo na:ka:melena!’  
 Ebe tetenomolo naimano balidite wadekobi dolowiya nale ebe wadeno-  
 mamo ebo umiyamo.

<sup>14</sup> “Ebene ebete natamo negiya, ‘Aimano ewoniate damamatenamiya,  
 ebe Godote a:ma: iyalo eka:miyata a:ma:le ebene ubi tanalo kiyatawaema:,  
 ega:walo ebene Tuputupu Wokodawano ololo kuma:ema:, ega:walo  
 a:imano galamo me Tuputupudawano tabo madodo kolowiaema:. <sup>15</sup> Iyo,  
 a:ma:le ebegodone kebe tanalo kolowiyawia ega:walo kebe tanalo ku-  
 lama:wia, ebe ubila a:ma:le ebe iyaiya tanalo epo bilibilinomatamo  
 ka:na:kiyawaema:. <sup>16</sup> Ebema: beda: kemakopela:wita? A:ma: maigawete  
 obamo aduba:mida tanalo nelawa:. A:ma:le ebene mailo deka:miaemene,  
 ebete a:imano kuba ukulaolemetate ka:dodolomatilima:ta.’ ”

### *Ya:sute Ebe Yua:piatamo Keba Kunu Kalibiyale Polote Ebe Tanalo Da- wokalimiya*

<sup>17</sup> Ebene Polote tabo moga:melo walo na:kegiya, “Nale Yelusalemamo  
 walo da:ka:piyamo, egela idilo Godoko Amamateno Motolo eba:go tabo eba  
 gelitalo naimano balidite iyama: eda:onamete wade tanalo ebo umiyamo.  
<sup>18</sup> Ebe tetelo Kawodawate natamo ma kunu giya, ‘A:ma: ka:lono-  
 mo Yelusalemane samonomamo na:tiye, mabu me epate a:ma:godone naimano  
 nanitabo tanalo a:kelaema:na.’

<sup>19</sup> “Ebene nale nowamiyamo, ‘Kawodawa, me duli-  
 yomolo epo iyatawala, nale ibino iyaiya balidi ibilamole motolo a:ma: nanitabokobi midipi dole-  
 nakimo, nale ibi eba uwatelo epetapi alukolenakimo, epetapi idoko motamo  
 gito niyalekenakimo. <sup>20</sup> Ega:walo ibi iyatawala, epetapiate iyalo ulamalo  
 a:imano nanitabo tanalo awokalimidawa Stibiniko danakapumiya, nale  
 ebe tanalo kalakalago eba umitalo ebe anakapumipino watubino kaliku  
 ulamelelamitimo.’

<sup>21</sup> “Wiyasiya Kawodawate natamo walo na:kegiya, ‘Me duli-  
 yomolone a:ma: na:tiye, mabu nale a:ma: mululo dilukuliona ebe Yua:piatamo kanal-  
 ibomamota.’ ”

<sup>22</sup> Tabo olowiopi bilibilinomate Polokono tabo wadenomamo olowion-  
 apiya, wiyasiya ebete Yua:piatamo Godokono ubilo toma: tabo da:kiyawaiya  
 ebe tetelo kawo dowanomote iba:tamo maigate gelatepao eba kowagilimilo  
 Loma gabamaniatamo walo na:kegeliya, “Nanakapuma:la! Me dubute  
 na:ena, ebe modoboa: igilonama:!” <sup>23</sup> Ebema: ibino dowa magumulo eba

gelatepautalo iba:te ibino watubino kaliku pupukulamete elawamo opamo iyalekete, ebene damela tuwae uwatolete unamo ebo iyalekeiya.

*Polote Loma Gabamanino Pepago Pata: Tanalo Dawokalimiya*

<sup>24</sup> Ebema: Loma gowelaopino watodawate epono dowo tanalo umite ebene gowelaopi dubu nanaliya, iba:te Poloko gabamanino moto guamo magatate ebe pa:ka:pa:ka:mo eba na:na:ma:ga:midaolo, Yu epate ebetamo beda:ma: kegelatepautiye ebe tanalo ebegodone nanitabolo kiyatawama:.

<sup>25</sup> Ebene gowelaopi dubate tolamete Poloko ka:na:ma:ga:midaoma: ebene ape da:na:tupuguimiya, ebe tetelo Polote ebe niyakabolo dutiti ebe elawodubu idi naniya, “Talena ba:kitanale, Loma gabamanino pepago depata:na ebako lumagi gito a:na:ma:ga:midaoma:? O la: dopamo ebene tanalo wadenomamo bakanagiyamidama:ema?”\*

<sup>26</sup> Gowelaopino elawodubute me tabo dolowiya, ebete ebene watodawatamo walo ka:tote ebe ebo nalatediya, “A:ma: me dubutamo beda: tanalo osiyodiloma: kowagela:wita? A:ma: iyatawala:ka: ebete Loma gabamanino pepago depata:na?”

<sup>27</sup> Ebene gowelaopino watodawate Polotamo nemaigate ebe ebo naniya, “A:ma: nanitabolo na nanana:, a:ma: Loma gabamanino pepago kepata:wena?”

Polote nowamiya, “Iyo, nanitabola.”

<sup>28</sup> Ebene gowelaopino watodawate negiya, “Na atumu ebe pepago pata:namo, wiyasiya na ebe pepa kawo maninomamo uwatiyamo.”

Polote negiya, “Na wiyasiya ebe pepa maniamo kuwatiya: Nale dawokaliyamo ebe tetelo gabamaniate naimano nabiwitamo gito ikamiya.”

<sup>29</sup> Ebene Poloko a:na:ma:ga:midaoma: dolosiyodilutiya ebe gowelaopiate ebene tabo dolowiya, ebe tetenomolo iba:te tole tanalo lawete ebe atepate balamo gito utitatiya. Ibino watodawate atumu na:ka:toletoliti mabu ebete iyatawa:no Loma gabamanino pepago lumagi auli ala:mo dematuomeiya, ebete eba kunu ibino kawo pukala idi ebe adikamidaliya.

*Yu Epono Ka:nisolo Dubate Polokono Tanalo Danagiyamidamiya*

<sup>30</sup> Ebe tetelo Polote Yu epono wokilo iba:tamo beda: kuba kosiyodiliyale, gowelaopino watodawa ubila ebete ebe tanalo nanitabonomolo kiyatawama: Ebema: egela idilo ebete tabo naliboliya, Godotamo kalimagono ikameopino ununomo watowatopi ega:walo Yu epono Ka:nisolo dubu epetapi ibi bilibilinomate kapaladabutima:, ebene iba:te da:pelamoliya ebete Poloko idoko motone powolukote ibino ololo apuamo gito magaiya.

## 23

<sup>1</sup> Ebe tetelo Polote tolea:no Yu epono Ka:nisolo dubu ulamolelo negiya, “Naimano naniala:, ulama bilibilinomo pete me teta:mo pemaiga, nale Godokono ololo apulo naimano tepo magumuno mulo wokido tuputupulo eba okolinalo ebetamo kuba idi kosiyodiliya:.” <sup>2</sup> Ebema: Godotamo kalimagono ikameopino Unu Watodawanomo, ebene mailo A:nanayasitela, ebete Poloko niyakabolo delamota:oniya ebe dubu nanaliya idite ebe tabone kanagalima:.

<sup>3</sup> Polote ebe tabo olowite ebetamo nowamiya, “Eiye! Godote wiyasiya a:ma: kanagalima:ta! A:ma: kuba kala ga:dimi epate wade keyakeya tita:gonoma: da:midiya eba kunula, unu tama modobola wiyasiya magumu

\* **22:25:** Buka ka:la:mioledawa, a:ma: me Polokono tabono magumu iyatawama: ubi diyata:emene, modobola a:ma: me atu Alibolepi Buka 16.37 buka apuno walubi tabo numiye.



abalenomola. A:ma: tabo anagiyamidawano gobebobolo eba lutalo, modobola a:ma: naimano tanalo Mosesekono Totomu tanalago modobolo nanagiyamidana:ma:. Ebema: mabu keleka: a:ma:le na anaginaema: degeawa:? Ebe osiyodilo magumulo a:ma: a:ka:tuwa: Mosesekono totomu idi adikamidala:ta!”

<sup>4</sup> Ebe tetelo Poloko niyakabolo delamota:oniya ebe dubate ebe elawamo naniya, “Mabu keleka: a:ma:le Godotamo kalimagono ikameopino Unu Watodawanomo demalogawa:? A:ma: kawo kubanomo osiyodilota!”

<sup>5</sup> Polote nowamiya, “Naimano naniala:, niyaniyata. Nanitabola, Godokono Buka tabote ma kunu itana, ‘A:imano epono watowatopi magumulo idawano tanaloma: kuba tabo akogeala:.’ Na iyatawa: ebete Godotamo kalimagono ikameopino Unu Watodawanomoma: deda:na.”

<sup>6</sup> Ebe tetelo daladabutiya ebe Yu epono Ka:nisolo dubu Polote ulamiya, apulo Sa:diyusi tanebapila, apulo Pa:lisi tanebapila. Ebema: ebete woki idi lawete ebena tabo madodo adipatelo iba:tamo negiya, “Naimano naniala:! Na Pa:lisi tanebadawala ega:walo naimano nabi atumu Pa:lisi tanebapila! Numa:la:, na nanitabokobi na:midinamo Godote a:elao epo igilamo kowadipalatelemene, ebema: la: epetapiate naimano tanalo wiyasiya kubanu anagiyamidanamitamata!”

<sup>7</sup> Ebete me tabo da:kiyawaiya, ebe tetelo Ka:nisolo dubu magumulo anagiyamida tanalote maigate, ebene Pa:lisi tanebapi ega:walo Sa:diyusi tanebapi iba:te ebo apamineutei. <sup>8</sup> Ibino apamineutei tanalono mabu ma kunula, Sa:diyusi tanebapiate negelanaka Godote a:elao epo igilamo a:kowadipalatelemene, wiyasiya Pa:lisi tanebapiate nanitabokobi na:midina Godote ebe tanalo nanitabolo kosiyodilomene. Ega:walo Sa:diyusi tanebapiate negelanaka Godokono Unu Duliomolono nopopi puliyala ega:walo epono uliyana puliyala, wiyasiya Pa:lisi tanebapiate negelanaka Godote ebena Unu Duliomolono nopopi osiyodilote ega:walo epono ape uliyanago ako-osiyodiloliya.

<sup>9</sup> Ebema: Yu epono Ka:nisolo dubuno apamineutei magumulo tabo wamiuilo elawo tabonomote maigiti, ebene Pa:lisi tanebapino Godokono Totomu Tabo iyatulamepi epetapiate maimite elawonomamo negeliya, “A me dubugodolo kuba idi kumita:! Diyala, wade uliyana idi o Unu Duliomolono nopodawa idite ebetamo Godokono nopo da: awokalimiyale!”

<sup>10</sup> Ebene Ka:nisolo magumulo apamineutei tanalote kawoma: dediya gowela tatalila. Ebe tetelo gowelaopino watodawate na:toletoliti epetapiate Poloko kubanu anagalimiolo da:banakapuima:na:, ebema: Polokono igilo ka:mula:ema: ebete ebena gowelaopi nanaliya, iba:te Ka:nisolono taneba magumamo niwitiote Poloko nelawete Loma gabamanino kawo motonomamo walo ka:kemagatama:.

<sup>11</sup> Ebene ebe idokolo Kawodawa Ya:sute Poloko niyakabolo putinate ebe napanani, “A:ma: na:kodakoda! Mabu a:ma:le na mabuma: me Yelusale-malo tabo wadenomamo da:kiyawawa:ka, a:ma: Loma kawo duliomolamo toawete ebe atu tabo na:ka:nikiyawaiye.”

### *Yu Dubu Epetapiate Poloko Anakapuima: Nopo Diyatiya*

<sup>12</sup> Ebene duiya idilo Yu dubu epetapiate paladabutite nopo eba piyatilo Godokono mailamo elawo tabo ma kunu pegeliya, iba:te bae naoa:no ega:walo obo nioa:no talenalo pola:nate Poloko anakapumi teta:mo ebo ka:nemaima:. <sup>13</sup> Ebe tetelo me nopo diyatiya ebe dubate ibino uwomu delawiya 40 a:nodoliya. <sup>14</sup> Ebene ebe dubate Godotamo kalimagono ikameopino ununomo watowatopi ega:walo Yu epono kawokawo dubu

epetapiatamo tolamete na:negeliya, “Aimano woki kapiyakobi midite ale Godokono mailamo tabo ma kunu nanitabolo gelama:, ale bae nao:ano talenalo pola:nate Poloko anakapumi teta:mo ebo kemaima:.”<sup>15</sup> Ebema: modobola la: aimano Ka:nisolo dubu epetapiago Loma gabamanino gowelaopino watodawatamo tabo nanalibala:, ebete Poloko motone powolukote la:tamo kemagaema:. La:le a:da: tabo gela gabodo ebe nananiyala: ma kunu, la: ubila Polokono tanalo wadenomamo kanagiyamidama:ema: ega:walo ebena tabo apuapu walo ka:kolowiaema:. Wiyasiya ebete Poloko demagaemene, la:tamo pemaiga:no a iyalo kolosiyodilomalema: ebe gabo tetelo kanakapuima:.”

<sup>16</sup> Wiyasiya ebe tetelo Polokono buwelete dalaimiya, ebe koite Yu dubate nopo diyatitiya ebe tabo olowite, diya gabodo Loma epono gowelaopino kawo motonomamo tote Poloko ebo naniya. <sup>17</sup> Ebene Polote gowelaopino elawodubu idi ebetamo ka:mite ebe naniya, “Me oli ape dubu la:imano Watodawatamo nemagata, mabu ebegodolo tanalo idi bitana Watodawa kanama:.”

<sup>18</sup> Ebene gowelaopino elawodubute ebe koi ebena watodawatamo magatate nananiya, “Aimano idoko motolo da:luta ebe dubu Polote na anane me oli ape dubu a:ma:tamo kemagaema:, mabu ebegodolo tanalo idi bitana a:ma: kanatama:.”

<sup>19</sup> Ebe tetelo gowelaopino watodawate ebe koi kotamo lawete kela:mo iyabaiamo ebe magatate diya ebo nalatediya, “A:ma:godolo beda: tanalote kitanale na ananema:?”

<sup>20</sup> Ebete nowamiya, “Yu dubu epetapiate woki kapiyakobi a:midiya a:ma: ma kunu kapanatama:, a:ma: dumutu Poloko me motone owolukawete ibino Ka:nisolo dubatamo kemagataema:. Ebe tetelo iba:te a:da: gabodo a:ma: kapanama:ta ma kunu, ibi ubila Polokono tanalo wadenomamo anagiyamidamete ebena tabo apuapu walo ka:kolowioma:. Wiyasiya ebe tabo nanitaboa:.”<sup>21</sup> A:ma: ibino tabamo akotuduwatala:, mabu 40 dubu keba kunula:ka: ebako dubate Polokono to gabolo taneba alomote ebo ba:pola:na, ebe makopelita. Iba:te woki kapiyakobi midite Godokono mailamo elawo tabo ma kunu gelaka, iba:te bae naoa:no ega:walo obo nioa:no talenalo pola:nate Poloko anakapumi teta:mo kemaima:. Nanitabola, iba:te iyalo olosiyodilote a:ma: makopelitata, a:ma:le a:imano gowelaopi kanala:ema: iba:te Poloko ebamo kemagatama:.”

<sup>22</sup> Ebene gowelaopino watodawate ebe koi eba nalibolo naniya, “A:ma:le na dapanana:wa:, ebe tanalo epetapiatamo akonawokalima:la:.”

### *Gowelaopino Watodawate Poloko Loma Gabamanino Kawo Elawodubu Pilikisitamo Danalibiya*

<sup>23</sup> Ebe tetelo gowelaopino watodawate ebena opopi elawodubu netewa ebetamo ka:la:mite ibi nanaliya, “La:imano 200 kiyoiyo gila:mo gowelaopi dubu, ega:walo 70 oso-peago dowapata:lamena ebe gowelaopi dubu epetapi, ega:walo 200 kiliba:mo gowelaopi dubu epetapi, la:le ibi bilibili-nomo uwata:wete nolosiyodiliyala: ka:lo idokolo 9 koloko tetelo Sisaliya kawo duliyoumolamo ka:tolama:ema:.”<sup>24</sup> Ega:walo oso-pe Poloko mabuma: modobolo nuwata:la:, ebete ibi unamo okolite ka:toma:. Na ubila la:le ebe aimano Loma gabamanino kapela Kawo Elawodubu Pilikisitamo olalatia:no wadenomamo nemagatiyala:.”

<sup>25</sup> Ebene ebe tetelo gowelaopino watodawate leta osiyodilote tabo ma kunu alomoliya,

<sup>26</sup> Naimano Wadenomo Kawo Elawodubu Pilikisi, a:ma: niyata. Na Kolodiyasi Lisiyasite me leta a:ma:tamo palibomo.

<sup>27</sup> Potele a:ma:tamo me letago da:pemaigamene, me dubuno tanalo ma kunula. Egela idilo Yu epate ebe elawamo lawete anakapuima: dowageli-tiya, nale gowelaopi epetapi uwatete ibino elawo magumune ebe ebo wagalimo, mabu nale me tanalo iyatawimo ebete Loma gabamanino pepago depata:na. <sup>28</sup> Ebene ebete Yu epatamo kebe kuba kosiyodilile, nale ebe tanalo wadenomamo kiyatawama: ubi eba iyatilo ebe ibino Ka:nisolo dubuno ololo apuamo ebo magatimo. <sup>29</sup> Ebolo nale iyatawimo, iba:te ibino ewonino totomuno iyaiya tanaloma: ebetamo da:dowautiya, wiyasiya ebete kawo kuba idi kosiyodiloa: nale ebe a:eamo o idoko motamo ebema: alibola. <sup>30</sup> Me tanalo walogabo apune lumagi idite diya gabodo pete na apanani, Yu dubu epetapiate ebe kanakapuima: gabo idi osiyodiliya. Ebema: nale ebe tanalo olowite ebe a:ma:tamo samonomamo palibomo, ega:walo nale ebetamo da:dowautiya ebe dubu analimo iba:te a:imano ololo apulo ebenu tanalo kapanagiyamidaema: Kalakala kawonomola, me naimano tabo uwomula.

<sup>31</sup> Ebema: gowelaopino elawodubu netewate ibino watodawano tabamo tudila:te, ebenu leta lawete ebe idokolo iba:te ibino gowelaopiago Poloko A:nitipatisi duliyoumolamo gito magataniya. <sup>32-33</sup> Ebene egela idilo agowamo da:tolamitiya ebe gowelaopi dubu bilibilinomate Yelusalema kawo duliyoumolono gabamani motamo walo kolowamiote gito ka:pelamiya, wiyasiya oso-peago da:tolamitiya ebe gowelaopi dubate Poloko a:ka:tuwa: magatiya Sisaliya kawo duliyoumolamo. Ebolo iba:te kapela Kawo Elawodubutamo nemaimite ibino watodawano leta eba nikamelo Poloko ebenu umi magumamo ebo niyatiya. <sup>34</sup> Ebe tetelo kapela Kawo Elawodubute ebe leta ka:la:miolete Poloko ebo alatediya ebe kebe opodawala:ka:. Ebene Polote ebe Silisiya opodawama: eda:ma: degiya, Kawo Elawodubute ebe tabo dolowiya <sup>35</sup> ebetamo walo na:kegiya, “A:ma:le kuba osiyodiloma: degelitiya ebe dubate mamu da:pemaimima:na:, ebe tetelo nale a:imano tanalo kanagiyamidaemamota.” Ebema: ebete ebenu gowelaopi epetapi nanaliya, Kawo Elawodubu Elodite dopamo detiya iba:te Poloko ebe wade motonomamo magatate ebolo ka:numinatema:.

## 24

### *Yu Epate Pilikisitamo Polokono Osiyodilole Tanalo Kubama: Degeliya*

<sup>1</sup> Ebene paibu egela dolopoligiya ebe tetelo Godotamo kalimagono ikameopino Unu Watodawanomo A:nanayasite Yu watowatopi epetapiago Sisaliya kawo duliyoumolamo ebo pelamiya. Ebe tetelo iba:te Loma gabamanino totomu iyatawadawa idi, ebenu mailo Tetalasitela, ebe dubu magaeite iba:te kapela Kawo Elawodubu Pilikisikono ololo apuamo kapimiya pemaimiya Polokono osiyodilole tanaloma: ebe kapanama:.

<sup>2</sup> Ebene Kawo Elawodubu Pilikisite Polote pema: tabo nalibote, ebete da:pemaigiya Tetalasite Yu epono ubia: tanalo Poloko mabuma: Pilikisitamo ma kunu awokalimiya, “Aimano Wadenomo Watodawa, a:ma: niyata! A:imano kawo elawodubu magumulo a tete geyageyanomolo milago ilukulinaima:, ega:walo aimano opolo iyaiya kubate maimio tetelo a:imano mulo wokilo ebe tanalo wadekobi a:midilinakota. <sup>3</sup> Ebema: nanitabola, tete

bilibilinomolo ale aimano duliynomolo bilibilinomolo a:ma:godone wade-wade walubi tanalo eba uwatelo a:ma:tamo kawonomamo kalakalaon-akoma:.<sup>4</sup> Niyata, na tabo a:kegeyageyaimo mabu na ubia:nola a:imano tete kubaima:, ebema: nale a:ma: towemoemata a:ma: kalakalago aimano tabo da:peso nolowiya.

<sup>5</sup> “Me dubuno tanalo ale iyalo umiyama:, ebe iyaiya kuba wagil-amedawala, mabu Nasaleta dubu idino taneba magumulo ebe watodawa idila. Ebete me opo kawonomolo depata:na, ebena kuba osiyodilole magumulo aimano Yu epo epetapiate iyaiya opolo dilukuliona ebetamo eba dowao gowelao tanalate ebo maimionaka.<sup>6</sup> Ega:walo me tanalo idila, ebete aimano Godoko Amamateno Moto kubaima: dowageliti, ale ebe ebo laima:. Ebe tetelo a ubila aimano totomu tanalodo ebena tanalo kanagiyamidaema:,<sup>7</sup> wiyasiya gowelaopino watodawa Lisiasite pete agodone ebe elawamo pelawi,<sup>8</sup> ebema: aimano taneba magumulo piyate me Polokono osiyodilole tanaloma: kubama: degelanamiya, Lisiasite a anai ale a:imano ololo apuamo ka:pelaema:.\* Ebema: modobola a:ma: a:ka:tuwa: ebena osiyodilole tanaloma: ebe nalateda:, ebena me tanalo bilibilinomo ale degelama:, ebe tabono nanitabo tanalo a:ma: ebegodone kiyatawama:ta.”

<sup>9</sup> Ebe tetelo Yu epo epetapiate Tetalasikono tabo moga:melo negeliya me iyaiya tanalo nanitabola.

#### *Polote Ebena Kuba Osiyodiloa: Tanalo Pilikisitamo Dawokalimiya*

<sup>10</sup> Ebena ebe tetelo kapela Kawo Elawodubu Pilikisite Poloko kotamo aniya ebete ebena tabo kiyawao kowagilima:. Ebena Polote negiya, “Kawodawa, a:ma: niyata! Na iyatawala a:ma: ulama bilibilinomo epetapilo aimano opo epono tanalo anagilamelelamenakiyata, ebema: nagodolo kalakala bitana naimano kuba osiyodiloa: tanalo a:ma:tamo awokalima:.<sup>11</sup> A:ma: nanitabo tanalo ma kunu kiyatawama:ta, nale Yelusalemamo Godoko amamatemala: da:timo, ebe tetene wagilimite me teta:mo pemaiga<sup>12</sup> egelanomote a:ponopololigi.<sup>12</sup> Ebema: piyate na kuba osiyodilodawama: degelita iba:te na Godoko Amamateno Motolo lumagi ida:go elawamo tabo gelitalo kunamea:, ega:walo aimano iyaiya balidi ibilamole motolo ega:walo Yelusalema kawo duliynomololo na milago eba pata:lo epatamo gowelao woki kikalamea:.<sup>13</sup> Ebema: nale kubakuba tanalo nosiyodilolenamu iba:te degelita, ebe tabono nanitabo tanalo kitana:, iyo, iba:te naimano kuba idi awokalima: modoboa:.

<sup>14</sup> “Numa:, Yu epo epetapiate negelanaka Ya:sukono Gabo ebe nanitabo gaboa:. Wiyasiya nale a:ma: nanitabo tanalo idi kanamota, na Ya:suko waloma:ta gabodo eba tonalo, a Yu epono ewoniate damamatenamiya nale ebe nani Godo amamatenakomo. Yu epo epetapi keba kunula:ka: na atumu eba kunula, Mosesete Godokono Totomu Tabo dakuloliya ega:walo Godokono Woki Awokalimipiate dakuloliya, ebe Buka tabo bilibilinomo ale kapimiya nanitabokobi na:midilinama:.<sup>15</sup> Ebema: Godokono wade walubi tanalote atamo ka:pemaigama: nale naimano Yu epo namutupiago nemakopelenama:, iyo, a me tanalo nanitabokobi na:midinama:, Godote kuba osiyodilolepi ega:walo wade tanalo osiyodilolepi ibi bilibilinomatamo wiya kikalamea: a:ela magumune igilamo kowadipalateleme. <sup>16</sup> Numa:, me mabuma: na ubi kawonomola, Godoko ega:walo epo ibino ololo apulo nale naimano tepo magumuno mulo wokido tuputupulo kokolinama:.

\* **24:8:** Ali 24.6b-8a buka apuno tabo Lukute bukamo kakuloliya:, wiyasiya ebena buka osiyodilo walogabo apune nanitabokobi mididawa idite akuloliya.

<sup>17</sup> “Ebema: naimano tanalo ma kunula, nale Yelusalema opone ne-maigate ulama epetapilo iyaiya mulu opolo nokolinaimo, ebene nale naimano oponomamo walo na:kapimo nale nigologolopi epetapiatamo mani nilakapolo ka:pikalamolema: ega:walo Godotamo kalimagono inamabu ka:pikameoma:.” <sup>18</sup> Nale Godoko Amamateno Motolo ma kunu eba osiyodilutalo, dubu epetapiate ebo unamiya. Nanitabola, na ebe talena motamo podoloa:no, dopamo Godotamo kalimagono inamabu ikameote naimano tepo magumuno daley a ebo ukulalimo, ega:walo nale gowelao tanalo kowagilima: lumagi iditam o kuba woki kikamea:.” Wiyasiya na a:ka:tuwa: milago eba lutalo, ebe tetelo iba:te na unamete elawamo ebo pelaweniya. <sup>19</sup> Ebe tetelo ibino taneba magumulo Yu dubu epetapi A:isiya opolo dilukulina iba:te a:pola:niya, wiyasiya ka:lo ebe dubate a:imano ololo apuamo ka:pelamea:.” Ebema: numa:, nale iba:tamo kuba nanitabolo nosiyodilotaloka:, modobola iba:te a:ka:tuwa: ebe tanalo a:ma:tamo bapawokalimina:, <sup>20</sup> wiyasiya me Yu dubu epetapiate ka:lo da:pemaima:, iba:te ibino Ka:nisolo magumulo naimano tanalo iyalo anagiyamidaniamiya. Ebe tetelo iba:te naimano kuba osiyodilo tanalo numitaloka:, modobola iba:te a:ma: nanitabolo banatana:, <sup>21</sup> wiyasiya numa:, iba:te naimano kuba nipo wadiya. Nanitabola, nale iba:tamo me kapiya tabo a:kiyawaimo, ‘Na nanitabokobi na:midinamo, Godote a:ela epo igilamo kowadipalatelemane, ebema: ibi epetapiate naimano tanalo kubanu anagiyamidanamita.’ Diyala, iba:te me tabo olowite na ubia:noma: da: eda:iye.”

<sup>22</sup> Mabu Pilikisite Ya:suko Nanitabokobi Midi Gabono tanalo wadenomamo iyalo iyatawiya, ebema: ebete Poloko ega:walo Yu epo epetapino tabo gela eba odiyobolelo nanaliya, “A me tanalo malo atepate, gowelaopino watodawa Lisiyasite da:pemene ebe tetelo nale me tanalo eba:go walo ka:kuimamo.” <sup>23</sup> Ebene Pilikisite Poloko duminami ebe gowelao dubu naniya ebete Poloko wadenomamo kuminatema:.” Ega:walo ebete ebe walo nakaniya, “Polote gabamanino moto gulo pata:ma: a:ma: talena akoiyata:la:, ega:walo ebene namutupiate ebene iyaiya modoboa: tanalo magumulo ebe walubima: da:pelamenakoma:na:, a:ma: ibi ako-odiyobolenakala:.”

### *Kawo Elawodubu Pilikisite Godokono Tabo Kolowima: Da:toletoliya*

<sup>24</sup> Egela epetapi dolopoligiya Pilikisite ebene kamiyale Dulusilago walo na:ka:piya, me kamiyale ebe Yu lumagila. Ebene ebete Polote pema: tabo dalibiya, Polote Ya:su Kelisoko nanitabokobi midi tanalo ebetamo da:pa:kiyawaiya Pilikisite ebo olowiya. <sup>25</sup> Ebe tetelo Polote tabo geyageyadopo da:kiyawaiya, ebete Godokono tuputupu ilukuli tanalo ega:walo kateneno ubi tanalamo tudila:oa:no ebe tanalo Pilikisitam o ebo awokalilamiya. Ebene Godote epono tanalo danagilamelelaemene ebe Kawo Egelano pe tanalo Polote da:kiyawauti, Pilikisite tole lawete ebe naniya, “Taula! A:ma: na:toa! Na wade tete duimo a:ma: pema: tabo walo kakapalibomamo.”

<sup>26</sup> Ebe tetelo Pilikisite ubi niyatinami Pologodone kawokawo mani uwa-tete idoko motone ebe gito kowolukoma:, ebema: ebete tete bilibilinomo epetapilo tabo alibonaki Polote eba:go tabo ka:pegelama:.” <sup>27</sup> Wiyasiya netewa ulama da:petoiya ebe tetelo Loma gabamaniate Posiyase Pesitasiko ebe palibiya, ebete Pilikisikono kapela Kawo Elawodubuno gobebobo ka:pelaema:.” Ebe tetelo Pilikisite Yu epo kekalakalailaema: ubi eba iyatilo, Poloko idoko moto gulo atepate opo ida:mo gito tiya.



## 25

### *Polote Ebene Kuba Osiyodiloo: Tanalo Sisakono Ololo Apulo Kanawokalima: Ubi Diyatiya*

<sup>1</sup> Pesitasite ebe opono kapela Kawo Elawodubuno gobebobo da:pelawiya, ebe tetelo netewa-kapiya egela olopoligote ebete Sisaliya kawo duliyyomolone Yelusalemamo ebo tiya. <sup>2</sup> Ebene ebolo Godotamo kalimagono ikameopino watowatopi ega:walo Yu epono kawokawo dubu epetapi iba:te Pesitasitamto tolamete Poloko mabuma: ibino ubia: tanalo ebo nawokalilamiya. <sup>3</sup> Ebene iba:te ebe kawiya eba toweomelo naniya, “Ale Polokono tanalo wadenomamo kanagiyamidaema:, modobola a:ma: ebe Yelusalemamo nemagaiye.” Iba:te ma kunu degeliya mabu iba:te nopo iyalo iyatiya Poloko gabo tetelo kanakapuima:.

<sup>4</sup> Pesitasite ibino tabo eba wiyalo negiya, “Ao, Polote Sisaliyalo idoko motolo bokolina, ega:walo tatalila nale ebamo walo ka:ka:tomamo. <sup>5</sup> Ebema: la:imano watowatopi epetapi nago da:tolaema:na:, ibino wokino tanalate ebe dubuno osiyodilole tanaloma: keba kunu ka:pola:nale, iba:te ebe tanalo gabamanino tabo anagiyamida bailo nanawokalilaema:na:.”

<sup>6</sup> Ebe tetelo Pesitasite a:iti o naini o teni egela epetapi Yelusalemalo okolite Sisaliya kawo duliyyomolamo walo gito ka:tiya. Ebene egela idilo ebete tabo anagiyamida bailo okolite gowelaopi ebo analiya iba:te Poloko ebene ololo apuamo kemagaema:. <sup>7</sup> Polote tabo anagiyamida baiamo da:pemaigiya, ebe tetelo piyate Yelusalemane da:pelamiya ebe Yu dubate Polokono ginimi apune ega:walo tametamene eba pilukulilo, ibino taneba magumulo idite maiganaki, idite maiganaki, ebe kawokawo kuba osiyodilole dawama: ebo gelanakiya. Wiyasiya iba:te kebe iyaiya tanalo degelanakiya ebe tabono nanitabo tanalo awokalima: ka:modobiya:.

<sup>8</sup> Ebene Polote ebene kuba osiyodiloo: tanalo ma kunu awokalimiya, “Naimano Yu epono totomu, ega:walo Godoko Amamateno Motono pukala, ega:walo Kawo Elawodubunomo Sisakono totomu, nale me tanalo bilibili-nomo magumulo kapiya idi kadikanalea:.”

<sup>9</sup> Ebe tetelo Pesitasiko ubila Yu dubu kekalakalailaema: ebema: ebete Poloko naniya, “A:ma: ubila:ka: Yelusalemamo toawete, nale a:imano tanalo ebolo wadenomamo kananagiyamidametama:?”

<sup>10</sup> Polote tabo eba wiyalo negiya, “Ao, na ubia:nola. Ka:lo na me Sisaliya duliyyomololo Kawo Elawodubunomo Sisakono tabo anagiyamida bai wadenomo idilo utitamo. Ega:walo ka:lo a:ma:godolo Sisakono elawo bitana, a:ma:le a:ka:tuwa: naimano tanalo anagiyamidana: wete na idoko motone gito owolukonema:, iyo, a:ma: nanitabo tanalo iyatawanomolata, nale Yu epatamo kapiya kuba idi kosiyodiloo:.” <sup>11</sup> Numa:, nale Loma gabamanino kawo totomu nadikanaletaleka: nale a:e wiya laema: bekalakalana:, ebene naimano igilo mula:ma: a:kegena:. Ega:walo me Yu dubate naimano tanaloma: degelita ebe iyaiya tabo nanitaboa:, ebema: la: gabamaniagodolo elawo kitana: na ibino kotamo walo iyatinima:, wiyasiya na ubi iyatimo Loma kawo duliyyomolamo tote Sisakono ololo apulo naimano kuba osiyodiloo: tanalo ebo kanawokalimamo!”

<sup>12</sup> Ebema: Pesitasite ebene opopiago Polokono ubi tanaloma: gelate, ebene ebete Poloko ma kunu aniya, “A:ma: negeata Sisatamo ka:toaema:, ebema: nanitabola, nale a:ma: ebetamo kanalibomamota.”

### *Pesitasite Polokono Tanaloma: Kawo Elawodubu Agilipako Daniya*

<sup>13</sup> Ebene egela epetapi da:petoiya Kawo Elawodubu Agilipako ega:walo ebene naniko Benisiko iba:te Sisaliya kawo duliyyomolamo

pete ibino kalakala tabo Pesitasitamo pegelate egela epetapi eba:go ebo pilukula:tepiya. <sup>14</sup> Ebene iba:te tete geyageyadopo ilukulite, egela idilo Pesitasite Polokono tanaloma: Agilipako ma kunu aniya, “Pilikisite idoko motolo datepi dubu idi malo bokolina. <sup>15</sup> Nale Yelusalemamo da:timo, ebe tetelo Yu epono Godotamo kalimagono ikameopino watowatopi ega:walo ibino kawokawo dubu epetapi, iba:te ebe dubuno kawokawo kuba osiyodilole mabuma: na ananiya nale ebe a:eamo kaliboma:. <sup>16</sup> Ebema: nale ibino tabo eba wiyalo negimo, ‘Ao, a Loma gabamanino tanalo ma kunula. Kebe tetelo epetapiate lumagi idi kawo kuba osiyodilodawama: degelama:na:, ale ebe gito akanakapuima: wiyasiya ale ebetamo tete kikaemalema: ibino ololo apulo ebenu tanalo wadenomamo kawokalima:. Ebe gabodo a gabamaniate nanitabo tanalo umite ebe lumagino tanalo wadenomamo kanagiyamidaemalema:.’

<sup>17</sup> “Ebema: Yu epate ebe dubu Polokono tanalo anagiyamidaema: mamu da:pelamiya, nale ibino tete ka:kubaimia:, iyo, egela idilo nale tabo anagiyamida bailo okolite gowelaopi ebo analimo iba:te ebe naimano ololo apuamo kemagaema:. <sup>18</sup> Ebe tetelo nale nemalagidilimo Yu epate ebenu kawo kuba idi kawokalima:na:, wiyasiya iba:te maimiote <sup>19</sup> ibino Godoko amamateno iyaiya pukalano tanaloma: ebe kawonomamo aniya. Ega:walo dubu idi ebenu mailo Ya:sutela, iba:te ebenu tanaloma: negeliya, ‘Ebe iyalo a:iya,’ wiyasiya Polote negi, ‘Ao, ebe bigilona.’ <sup>20</sup> Ebe mabuma: na gabo kumia: ebe iyaiya tanalono nanitabo tanalo keba kunu na:kiyatawamo, ebenu nale Poloko nanimo, ‘A:ma: ubila:ka: Yelusalemamo toawete, nale a:imano tanalo ebulo wadenomamo walo kakananagiyamidametama:?’ <sup>21</sup> Wiyasiya ebe tetelo Polote na nanani me Sisaliya duliyyomolono idoko motolo kokolima:, mabu ebe ubila Loma kawo duliyyomolamo tote aimano Kawo Elawodubunomo Sisate a:ka:tuwa: ebenu tanalo ebo kanagiyamidaema:. Ebema: nale ebetamo tuduwatalo negimo, wade gabo duimo ebe Sisatamo ebo kanalibomamo, ega:walo nale gowelaopi dubu nanalimo iba:te idoko motolo ebenu iyaiya modoboa: tanalo magumulo ebe wadenomamo kuminatema:.”

<sup>22</sup> Ebe tetelo Kawo Elawodubu Agilipate Pesitasikono tabo apuapu olowiote ebetamo negiya, “Modobola:ka: na atumu me dubuno tabo naimano galonomamo kolowioma:?”

Ebenu Pesitasite negiya, “Kuba:nola. A:ma: dumutu ebenu tabone kolowioma:ta.”

### *Polote Kawo Elawodubu Agilipakono Ololo Apuamo Da:pemaigiya*

<sup>23</sup> Ebene egela idilo Kawo Elawodubu Agilipako ega:walo ebenu naniko Benisiko iba:te ibino wadewade tita:gopi kaliku pupuliate, ibino opopiate ibi eba walogolelo, gowelaopino watowatopi epetapi ega:walo Sisaliya duliyyomolono kawokawo dubate ibi eba waloma:elelo iba:te gabamani motono tabo gela baiamo kawo kalakala diyamago ebo piya. Ebene ibi bilibilinomate da:nolosiyodiliya ebe tetelo Pesitasite gowelaopi epetapi nanaliya iba:te Poloko kemagaema:. <sup>24</sup> Ebe tetelo Pesitasite negiya, “Kawo Elawodubu Agilipa ega:walo la: bilibilinomo ago da:pola:wenama, la: niyaniyata. Me dubuno tanalo numa:la:. Me Sisaliya duliyyomololo dilukuliona ega:walo Yelusalemalo dilukuliona, ebe Yu epo bilibilinomate ebenu tanaloma: ibino ubia: tanalo natamo eba wadaelo iba:te gelatepaolo na ananiya ebete na:emene. <sup>25</sup> Wiyasiya nale ebenu tanalo danagiyamidaimo, ebenu kapiya kuba idi kumia: ebe a:eamo kaliboma:. Ebema: nanitabola, ebete Sisakono ololo apulo ebenu kuba osiyodilola:

tanalo kanawokalima: na danani, nale tabo ebo iyatimo ebe Sisatamo kanaliboma:.<sup>26</sup> Wiyasiya nale leta magumulo me dubuno tanaloma: aimano Kawodawa Sisatamo kebe tabo nakakulolemo? Naimano woki wadenomamo kitana:, ebema: modobola la: olowiopi na nowalubiniyala:. Kawo Elawodubu Agilipa, nale a:ma: mamu ebema: ka:imata, a:ma:le na eba walubinilo me dubuno tanalo wadenomamo anagiyamidamete na Sisakono leta wadenomamo ebo kosiyodilomamo,<sup>27</sup> mabu modoboa: nale idoko motolo dokolina ebe lumagino tanalo leta magumulo wadenomamo awokalimia:no ebe Sisatamo gito aliboma:.”

## 26

### *Polote Ebena Kuba Osiyodiloa: Tanalo Agilipatamo Dakawokalimiya*

<sup>1</sup> Ebe tetelo Kawo Elawodubu Agilipate Polotamo negiya, “Modobola a:ma: a:ka:tuwa: a:imano tanalo atamo nawokalima:.”

Ebene Polote ebena koto adipatelo ebena kuba osiyodiloa: tanalo awokalima: ma kunu wagilimiya,<sup>2</sup> “Kawo Elawodubu Agilipa, Yu epate nale iyaiya kuba bilibilinomo nosiyodilolenamu gelana, wiyasiya ka:lo kalakala kapiyate nagodolo bitana, mabu wade tete natamo ebe a:pe nale a:imano ololo apulo naimano kuba osiyodiloa: tanalo kawokalima:.<sup>3</sup> Me tanalo nanitabola, a Yu epono ewonino pukala ega:walo ibino osiyodilole tanalo ega:walo a magumulo kebe iyaiya tanaloma: kapamineuina:komama:, a:ma: ebe tanalo iyatawanomolata. Ebema: niyata, nale a:ma: anamata, modobola a:ma: naimano tabo kalakalago nolowia.

<sup>4</sup> “Yu epo bilibilinomate naimano okoli tanalo iyatawanomola, iyo, na da:peso tetelo naimano opolo dokolinaimo ega:walo Yelusalemalo nale da:pokolinaimo,<sup>5</sup> ebe tete geyageyanomolo iba:te naimano okoli tanalo numinamiya. Ebema: iba:te ubi diyatima:na:, modobola iba:te ma kunu nawokalima:na: na wade Pa:lisi tanebadawa idila. Me tanalo nanitabola, Yu epo magumulo a Pa:lisi tanebapiate a:ka:tuwa: ewonino totomu epetapi bilibilinomamo wadenomamo tudila:onakoma:, wiyasiya Yu epo epetapiate eba kunu kowagelena:.<sup>6</sup> Ega:walo me tanalo idila. Ka:lo na a:imano tabo anagiyamida magumulo utitamo, mabu Godote aimano ewoniatamo nanitabonomolo degiya, nale ebe tabo nanitabokobi midilo ebena walubi tanalote atamo ka:pemaigama: nemakopelenamo.<sup>7</sup> Ega:walo naimano Kawo Elawodubu, a:ma: numa:, aimano Yu epono 12 gu epo bilibilinomate atumu idoko ega:walo egela bilibilinomolo Godoko eba amamatenalo ebena tabo nanitabokobi midilo ebena walubi tanalo ebe kemakopelena. Iyo, me tanalo nanitabola, ebe Yu epo ega:walo na, ale atu wade tanalo Godogodone laema: nemakopelena:ma:, wiyasiya iba:te na ubia:noma: eda:ote naimano nanitabokobi midi mabuma: nale kawokawo kuba nosiyodilolenamu gelana.”

<sup>8</sup> Ebene Polote walo na:kegiya, “La: olowiopi, niyaniyata, mabu keleka: la: la:imano wokilo ma kunu demalagidilawenama, Godote a:ela epo igilamo a:kowadipalatelemene?<sup>9</sup> Na atumu dopamo kubakuba woki epetapi emalagidilolenakimo, ebema: piyate Nasaleta duliynomolodawa Ya:sukono mailo unamo dadipatena ebe epatamo nale iyaiya gowelao tanalo osiyodilolenakimo,<sup>10</sup> iyo, nale Yelusalemalo eba okolinalo eba kunu wagelenaimo. Ebema: nanitabola, Godotamo kalimagono ikameopino watowatopiate natamo elawo dikanamenakiya, nale Ya:sukono tuputupu epo epetapi bilibilinomo idoko motamo ebo alibolenakimo, ega:walo tabo

anagiyamida bailo ibino tanaloma: degelanakima: nale ibi a:eamo ali-bolema: modoboma: genakimo. <sup>11</sup> Ega:walo tete epetapilo aimano Yu epono iyaiya balidi ibilamole motolo nale Ya:suko waloma:tapiate kuba nosiyodilolenamu eba genalo, ebema: na epetapiago iba:tamo kawokawo temeteme ebo ikalamenakima:. Eba kunu eba wagelenalo na ubila iba:te Ya:suko nanitabokobi midi magumune olobila:ote ebena tanalo a:da:ma: kegelama:. Ebene naimano dowa iba:tamo elanomoma: eda:lo iyaiya mulu opo epetapino kawokawo duliyoumolamo tonakimo ibi ebo na:kubailamenakimo.”

*Polote Ya:sutamo Keba Kunu Kolobigiyale Ebe Tanalo Dawokalimiya*

<sup>12</sup> Ebene Polote ebena tabo moga:melo walo na:kegiya, “Nale eba kunu eba wagelenalo, tete idilo Godotamo kalimagono ikameopino watowatopiate leta epetapi ega:walo ibino elawo natamo dikanamiya nale Dama:sakase kawo duliyoumolamo gito tiyamo. <sup>13</sup> Nale egela tuli tetelo dubu epetapiago ebama eba tutalo, gabo tetelo alote Godokono Unu Duliyoumolone piwisigate a ebo pa:wiyamidadigaiya, ebe alo elawonomola, ebena elawote egelano alono elawo odoliya. <sup>14</sup> Ebe tetelo a bilibilinomate opamo gudite nale idawano tabo madodo Yu epono tabamo ma kunu olowiyamo, ‘Solo, Solo! Keleka: mabu a:ma:le natamo kawokawo temeteme dikanama:wena? A:ma:le nago goweladawama: deda:wena, a:ma: a:ka:tuwa: a:ma: ebe kubaiminata. A, nanitabola:ka:, kau-goeote ebena namutudawa agowamo aliamidama: dowagelemene, namutudawate ebe wiyasiya gaubamo walo gito kakanagalimene!’

<sup>15</sup> “Ebena nale negiyamo, ‘Kawodawa, a:ma: poteleka:?’

“Kawodawate naimano tabo eba wiyalo negiya, ‘Na Ya:sute, a:ma:le natamo temeteme dikanama:wena, na ebe lumagila. <sup>16</sup> Modobola a:ma: nemaiga, mabu nale a:ma:tamo apawokalamo nale a:ma: naimano wokodawama: ka:miditama:. Ebema: ka:lo a:ma:le nagodolo beda: tanalo kulama:wa: ega:walo nale walone a:ma: diyatumiotama, ebe tanalo bilibilinomo a:ma:le epo epetapiatamo kanawokalilaema:ta. <sup>17</sup> Ebene a:ma: naimano woko eba nosiyodilonalo Yu epono elawo magumulo nale a:imano igilo ba:mula:menakomata, ega:walo Yua:pino elawo magumulo na atumu a:ma: ba:kowalubinakomata. Nanitabola, nale a:ma: ebe Yua:piatamo kanalibomamota, <sup>18</sup> mabu a:ma:le ibino balidi ka:nepalamililaema:ta iba:te idoko magumune alamo kolobila:oma:. Iyo, iba:te Saitanakono elawo magumune Godotamo olobila:ote na Ya:suko nanitabokobi da:midinima:na:, ebe tanalodo Godote ibino kuba egebolelamete ka:dodolomatililaemene, ega:walo ebete ibi ebena tuputupupi epetapiago kapiyakobi midilite wade duliyoumolo idi iba:tamo kikalaemene.’”

*Polote Godotamo Kebe Woko Kosiyodilonamile Ebe Tanalo Dawokalimiya*

<sup>19</sup> Ebene Polote ebena tabo moga:melo walo na:kegiya, “Kawo Elawodubu Agilipa, Godokono Unu Duliyoumolone natamo kebe tanalote ka:pemaigiyale, nale ebe tanalo umite ebo tuduwatiyamo. <sup>20</sup> Ebe tetene wagilimite nale epatamo Godokono tabo ma kunu kiyawaonakimo, ‘La:imano tepo magumu iyakobi midila:wete Godotamo nolobila:la:, ega:walo modobola la:imano wadewade osiyodilole magumudo la:imano Godotamo olobila: tanalo nawokaliminakiyala:.’ Nanitabola, dopamo tetelo nale Dama:sakase kawo duliyoumololo tabo eba kunu kiyawaiyamo, ebena Yelusalemamo pete ibi ebe atu tabo akapanaliyamo, ebena nale Yudiya opo kawonomamo Godokono tabo kiyawago tote Yua:pino iyaiya mulu opamo ebo nemaigiyamo. <sup>21</sup> Me mabune Yu epo epetapiate na ubia:noma: eda:ote,

egela idilo iba:te Godoko Amamateno Motolo na elawamo lawenete ubi ebo iyatiya na kanakapunaema. <sup>22</sup> Wiyasiya Godokono walubite nagodolo nitani, ebema: ka:lo na malo dutitamo Godote na nanitabonomolo dopamo diyatunamiya nale ebe tanalo la: kawokawo epo ega:walo egege epo la: bilibilinomatamo nawokalimitamo. Iyo, dopamo tetelo Mosesete Godokono woki awokalimipi epetapiago kebe tanalote pemaigama: da:kiyawaonakiya, na ebe atu tanalo ebe ka:kiyawautamo. <sup>23</sup> Me tabo ma kunula, Godokono Alibodawa Kelisote da:emene, a:e magumune igilamo walo da:kemaigamene ebete dopo lumagima: keda:mene, ebene ebete igilo mula:no alo ebeno Yu epo ega:walo kapela Yua:pi ibi bilibilinomatamo kawokalimene.”

*Agilipate Ya:suko Nanitabokobi Ka:midima: Polote Ebe Daniya*

<sup>24</sup> Ebe tetelo Kapela Kawo Elawodubu Pesitasite Polokono tabo kiyawao ubia:noma: eda:te ebe ebo gepatemiya, “Eiye! Polo, a:ma: daedale lumagilata! A:ma: buka ka:la:miole kawodawanomolata, ebema: diyala, a:imano iyatawa tanalote a:ma: daedalekobi da: a:miditia!”

<sup>25</sup> Ebene Polote Pesitasitamo nowamiya, “Naimano Kawodawa, na daedale lumagia: Naimano tabo nanitabola ega:walo na tuputupu wokinomolo kiyawautamo. <sup>26</sup> Kawo Elawodubu Agilipate naimano tabono nanitabo tanalo iyatawala, ebema: na ilipoa:no ebeno ololo apulo ka:kiyawaomamo. Nale kebe iyaiya tanaloma: ka:kiyawautamo, ebete ebe tanalo bilibilinomo iyalo iyatawiya mabu ebe tanalate diya gabodo kemaimiya:.”

<sup>27</sup> Ebene Polote walo na:kegiya, “Kawo Elawodubu Agilipa, Godokono woki awokalimipiate dopamo ebeno Bukamo dakuloliya, a:ma: ebe tanalo nanitabokobi na:ka:midilila:wita? Iyo, na iyatawala a:ma: nanitabokobi na:midilitata!”

<sup>28</sup> Ebe tetelo wiyasiya Agilipate Polotamo negiya, “A:ma: natamo beda: tanalo osiyodiloma: kowagela:wita? A:imano tabo kiyawao magumulo woki ba:kitanale, nale me gopowai tetenomolo Ya:sukono waloma:tadawa idima: keda:ma:?”

<sup>29</sup> Polote nowamiya, “A:ma: Ya:sukono tabo tete gopowailo olowiawete ebe nanitabokobi da:mida:emene naimano kalakala nanitabolo kitanamene, o a:ma: tete geyageyadopo okoliawete nanitabokobi midi tanalo delawa:emene na atumu kekalakalamamo. Iyo, la: bilibilinomate naimano tabo dolowiawitama, nale la:imano tanaloma: Godoko na:toweomenamo la:imano nanitabokobi midi magumulo la:le nago kapiyanomoma: keda:ema:. Wiyasiya la: mabuma: na me kapiya tanalo ubia:nola, nale me auli ala:go depata:namo epetapiate la: ebako ala:mo matuolamolema: modoboa:.”

<sup>30</sup> Ebe tetelo Kawo Elawodubu Agilipako, ega:walo ebeno naniko Benisiko, ega:walo kapela Kawo Elawodubu Pesitasiko, ega:walo tabo olowiopi epetapi, ibi bilibilinomate maimiote <sup>31</sup> tabo gela baine eba tolamitalo ibino taneba magumulo negeliya, “Me dubugodolo kuba idi puliyala gabamaniate ebe a:eamo aliboma:, ega:walo modoboa: ebete idoko motolo gito okolinama:.”

<sup>32</sup> Ebene Agilipate Pesitasitamo negiya, “Nanitabola, me dubute a:imano tabo anagiyamida magumulo dopamo dutiti, ebe tetelo ebete Sisakono ololo apuamo toma: a:ma: ana:notaleka: ale ebe idoko motone gito balibona:, wiyasiya ebete aimano Kawo Elawodubunomotamo toma: a:ma: aniata, ebe mabuma: ebete ebetamo na:nemaigamene.”



## 27

*Polote Loma Kawo Duliynomolamo Toma: Kawo Palai Peago Dowagilimiya*

<sup>1</sup> Ebene Loma gabamaniata a ibino Itali opamo palai peago kema-gataema: tabo diyatiya, ebe tetelo gowelaopiate Poloko ega:walo epetapi idoko motolo dilukulinamiya, ibi bilibilinomo gowelaopino watodawa idino kotamo gito nalomiya. Ebe gowelaopino watodawano mailo Yuliyasitela, ega:walo ebena gowelaopino taneba mailo ebe Kawo Elawodubunomo Sisakono Tanebapila. <sup>2</sup> Ebene kawo palai pe idite A:damitiyama duliynomolone pemaigate A:isiya opono kewa: kolomono iyaiya duliynomolamo walo ka:ka:toma: dowageliti, ale ebe peamo nolote ebo tolamiyama: Ebe tetelo Ma:sadoniya opodawa idi A:listakasiko, ebe Tesalonaika duliynomololo awokaliya, ago me dubute tiya.

<sup>3</sup> Ebene egela idilo ale Saidono kawo duliynomolamo da:nemaimiyama:, ebe tetelo gowelaopino watodawa Yuliyasite Poloko nilakapoimilo ebetamo tete ikamiya, ebete ebe duliynomololo ebena namutupi epetapi nulamelo iba:te ebena iyaiya modoboa: tanalo magumulo ebe wadenomamo kowalubima:. <sup>4</sup> Ebene a Saidono duliynomolone walo da:ka:tolamiyama:, kewa: kolomo eba na:iwalelo kawo awate a dodiyoboia, ebema: Saipalase opamo nemaimite ebe opono kewa: kolomono balado ebo tolamiyama: mabu ebe gabote atamo mataludopoma: ediya. <sup>5</sup> Ebene ale kewa: kolomo walo ka:na:iwalete Silisiya ega:walo Pa:mapiliya opo niyakabodo petolamete Lisiya opono Maila duliynomolamo ebo nemaimiyama:.. <sup>6</sup> Ebolo kawo palai pe idite A:lesandiya duliynomolone Itali opamo toma: dowageliti, gowelaopino watodawa Yuliyasite ebe tanalo iyatawate a ebe peamo oloma: gito naliboia.

<sup>7</sup> Ebene ale ebe peago da:ka:tolamiyama: ebe tetelo awano tanalo umilo a kela:mo eba tolamelolo kawo temeteme niyatawaiyama:.. Ebene egela epetapi da:petoia a Sanaidase duliynomololo teta:mo nemaimite awate a ebolo nanitabolo dodiyoboia, a wiyasiya woki iyakobi midite matalu gabo wadiago tolamete kewa: kolomo ebo na:iwaliyama: Kuliti opono Salamone geyageya mubamo. <sup>8</sup> Ebene a Kuliti opono kewa: kolomo balado kawo temetema:go petolamete pe boboo idi ebo numiyama:, ebe pe boboono mailo nitana 'Pe A:ilioleno Matalu Pe Boboola,' Laseya duliynomololo niyakabolo itana.

<sup>9</sup> A ebe Kuliti opamo pelaema: tete geyageyanomoma: dediya, ebema: Septemba saganano Kawo Egelate\* eba ponolopoligolo ebe opo kawonomololo kawo awate alogo iyalo owagilimiya. Mabu ale kewa: kolomodo ka:tolaema: wade tete danaetoamidiyama:, ebema: Polote pe wokopi eba analelo negiya, <sup>10</sup> "Dubala:, na numitamo a me tetelo tolaema: dowagelema: ale ka:nolalatiolema:, iyo, peno igilo ega:walo inamabu ega:walo a epono igilate kalatidioma:na:."

<sup>11</sup> Ebe tetelo gowelaopino watodawate Polote degiya ebe tabo kolowiya:, wiyasiya ebete pe atadawa ega:walo pe namutudawa ibino ubi tanalamo gito tuduwatiya. <sup>12</sup> Iyo, ibino tabo gela magumulo ibi bilibilinomate ubi niyatiya ebe duliynomololo atepate Kuliti opono tatali duliynomololo idi Pinikisa:mo ka:nemaimioma:, mabu iba:te pe da:pa:iliya ebe pe boboo modoboa: kawo palai pete awa tetelo tete geyageyanomololo ebolo itanama:.

\* **27:9:** Septemba sagana uwomu apulo Yu epate ibino tanalo idi ma kunu osiyodilonaka, iba:te kapiya egelalo bae naoa:no eba pola:nalo ibino kuba osiyodilole tanalo Godotamo nanitabonomololo awokalilamenaka ebete ebe tanalo bilibilinomo egebolelamete ka:dodolomatililaema:. Lukute ebe tanalo eba malagidilolo tabo ma kunu akuloliya, me Septemba saganano Kawo Egelate iyalo a:ponolopoligi.

Ebe tetelo iba:te nemalagidiliya, Pinikisi duliynomolono pe boboono kolomo magata kawodopola, egelate da:niwisiganako eba apulo eba itanalo ebema: awate ebe pe boboo kawiya kelawenakoa:.

*Awa Ega:walo Kawokawo Ulate Palai Pe Kubanomamo Danagalimiya*

<sup>13</sup> Ebe tetelo kawo awate dolopoligiya wiyasiya siyele apune kela:mo dapaloguti, ebema: pe wokopiate kalakala lawete a ebe duliynomolone tolaema: wadenoma: gelalo iba:te peno aga mabu wailiomete Kuliti opono kewa: kolomo balado tolame walo ebo kowagilimiya. <sup>14</sup> Wiyasiya iba:te tete da:peso eba tolamitalo, kawo awanomote Kuliti opo apune walo ka:nolosiyodilote ebo piya, pe wokopiate ebe awano mailo Dibilidubu Apuno Awama: ka:miya. <sup>15</sup> Ebe tetelo awate pe dapanagalimiya wokopiate pe poto apuamo oba:midama: dowageliya ka:modobiya:, ebema: iba:te peno walege atepate awate a potone kawo kolomamo gito powauateiya. <sup>16</sup> Ebene ale kewa: kolomono da:peso mamoko, ebene mailo Kolodala, ebe mamoko siyele apudo eba nodolitalo tete da:pesolo ulate mataludopokobi ebo olowiya. Ebe tetelo ale kawo palai peno igilo mula:meno pe da:peso ebo nosiyodiliyama: ebe pete kawo kolomolo ololukapoma:. Iyo, ale ebe tanalo kawo temetema:go ma kunu osiyodiliyama:, <sup>17</sup> wokopiate ebe da:peso pe kawo kolomono obone adipatete kawo palai peno guamo iyatite ala:mo matuomeote ebo kodakodaimiya. Ebe atu tetelo iba:te kawokawo ale epetapiamo kawo pe auputilo atumu a:kematuomeiya, mabu iba:te na:toletoleutiya Libiya opono kewa: kolomono obo tetelo ditana, ebe wiyamo awate aimano pe da:batamene. Diyala, pete ebe wiyamo da:nolokowigamene, ulate pe ebolo kubanomamo anagalimiote pete gito da:ba:na:bolegalemene. Ebe mabuma: wokopiate woki bilibilima: eba eda:olo iba:te tanalo idi makunu kosiyodiliya, iba:te kawo peno palai owololuomete pe guamo gito iyatiya, ebene kewa: kolomono ulate a:ka:tuwa: a ebo ataiya.

<sup>18</sup> Wiyasiya awala ulola ibino elawote kolopoligolamitiya:, ebema: egela idilo wokopiate peno olowame inamabu bilibilinomo obamo gito iyalekiya, <sup>19</sup> ega:walo egela idilo iba:te atumu kowageliya, palai peno iyaiya woko inamabu epetapi ibino kotonomamo uwatete obamo gito kiyalekiya. <sup>20</sup> Ebe tetelo pete kawo temanomo magumudo tonami, ebe mabuma: ale egela epetapi ega:walo idoko bilibilinomolo egela ega:walo mawele ulamea:no kawo awanomote a kubanomamo dalukoenami aimano igilo mula: tanalono wokite analatidioamiya.

<sup>21</sup> Ebema: pe wokopiate egela epetapi bilibilinomolo tole tanalago eba ilukulinalo bae kenaonakia:, ebene egela idilo Polote ibino ololo apulo maigate negiya, “Dubala:, la: naimano tabo nolowiawetaleka: ale Kuliti opono poto akatepana:, iyo, me pete a:ka:kubana: ega:walo inamabu bilibilinomate akalatidiona:.” <sup>22</sup> Wiyasiya ka:lo nale la: toweolamelo negemo, la: elawo walo na:kelawa:la:, mabu pete ka:kubamene wiyasiya la: magumulo lumagi idino igilote akalatidimene! <sup>23</sup> Na Godokono lumagi idila, iyo, ebete na iyalo elaweniya nale ebene wokodawama: keda:nama:. Ebema: ka:lo idokolo ebene nopodawate natamo pawokalate <sup>24</sup> na:pege, ‘Polo, a:ma: akotoletola:la:, a:ma: Sisakono ololo apuamo nanitabolo ka:nemaigama:ta. Ega:walo Godote ebene nilakapolo tabo idi ma kunu kege, me pelo a:ma:go dilukulina ebete a:ma: mabuma: ebe dubu bilibilinomono igilo ka:mula:lalaemene.’ <sup>25</sup> Ebema: naimano dubala:, la: elawo walo na:kelawa:la: mabu na Godoko nanitabokobi na:miditamo, ebete na danane ebe tanalote nanitabonomolo eba kunu ka:pemaigamene. <sup>26</sup> Me tanalo

nanitabola, ulate a ataete kewa: kolomono mamoko opo ida:mo kanapa-timene, ale aimano igilo mula: tanalo ebo ka:nuwatema:.”

*Kawo Palai Pete Ulo Kawokawo Magumulo Da:bolegaliya*

<sup>27</sup> A Kuliti opo datepiyama:, ebe tetene wagilimite 14 egela eba petolo kawokawo ulate a Meditala:iniya kewa: kolomo tetenomodo eba ataelo, ebene idoko idilo sele tetenomolo pe wokopiate ibino wokilo poto netataliminamu gelaniya. <sup>28</sup> Ebema: iba:te auli inamabu da:peso ala:mo matuomeonate kawo kolomono kulukulu da:modobutiniya 40 mita uminiya, ebene tete da:pesolo towatepanate walo da:ka:na:modobutiniya 30 mitama: eda:ni. <sup>29</sup> Ebene ulate a nokolamo nataluatenamu eba gelanalo wokopiate kawonomamo toletoleonate, iba:te pe walogabo apuamo netewa-netewa mibomibo aga iyalekemenate egelate samamo kowaloma: Godotamo ebo towetoweoniya. <sup>30</sup> Ebe tetelo peno olalati tanalo uminate, wokopiate a:da: elemasigi gabodo a ka:miyapatepaenama: iba:te igilo mula:no pe da:peso obamo eba adubinalo a epetapi ebo anaeniya, “Ale pe dopo apuno aga iyalekema: ka:tolamenama:.”

<sup>31</sup> Polote wiyasiya ibino elemasigi tanalo uminate gowelaopino watodawa nanani, “Na niyatawanamo, me wokopiate pelo ago pola:na:no la:imano igilate kalatidioma:na:,” <sup>32</sup> ebema: gowelaopi epetapiate pe da:pesono ale da:niyailiminiya ebe pete epoa:no gito wadauni.

<sup>33</sup> Ebene walo tete detatalini Polote dubu bilibilinomono bae naoa:no ilukuli mabuma: tabo elawodopamo eba analenalo, ebete ma kunu geni, “Me 14 egelamo la:le la:imano igilo tanaloma: woki da:bilibiliawenatima, la:le tete geyageyanomolo bae kenawenakia:.” <sup>34</sup> Nale la: ebema: analenamata, la:le bae kenaoaema: Bae nao magumulo la:le elawo kelaemamota, ebene olalatite la:tamo da:pemaigamene la:imano igilate akalatidioma:na:, iyo, nanitabola, la: bilibilinomo magumulo lumagi idino watono eke kapiya idite akalatidimene.”

<sup>35</sup> Polokono tabo kiyawao dolopoligoni, ebe tetelo ebete ibino ololo apulo bae lawenate Godotamo kalakala tabo ge dolopoligoni bae adikamidalenate nao ebo wagiliminiya, <sup>36</sup> ebema: ibi bilibilinomate ibino tole tanalo iyabaiamo alomonate Polago bae ebo naoniya. <sup>37</sup> Ebe idokolo a piyate ebe kawo pelo da:pola:niyama:, aimano epono uwomu 276 epola, <sup>38</sup> ebene baete a bilibilinomo da:uguaomeni, wokopi epetapiate peno olowame inamabu epetapi ebe witi-laiso kawodopo kolomamo gito iyalekeniya, mabu ibi ubila pete tutuma: eba eda:nalo ibi poto teta:mo kanatalutinama:.

<sup>39</sup> Ebene egelate dowaloiya pe wokopiate kewa: kolomono mamoko opo idi ebo umiya, wiyasiya ibi bilibilinomate ebe opo dopamo kuminakia:. Ebe tetelo iba:te ebe opono kolomo bala eba umiutalo wade tete ebo umiya, nokola puliyala, wiyo damela kapiyate itani, ebema: ibino pete ebe wiyo damela teta:mo ka:na:ilioma: ubi eba iyatilo iba:te gabo ebo wadiya. <sup>40</sup> Ebe mabuma: iba:te peno iyaiya agano ale iyailimite kolomolo gito miyapiya, ega:walo ebe atu tetelo iba:te dopamo dematuolamolliya ebe walegeno ale palamite, ebene da:peso palai ibino pe dopo apulo ebo owiolomiya, awate ibi eba walubilinatalo pete wade wiyo damelamo ka:na:ilioma:. <sup>41</sup> Wiyasiya iba:te eba kunu eba nowagelitalo, pete damela teta:mo nidiwia:no dopamo obolo ditani ebe wiyo damela teta:mo nodolote peno wameya apute ebo nolokowigiya, ebema: ebe tetelo kawokawo ulate peno wapo apu kubanomamo eba anagalimiutalo pete bolegale ebo wagilimiya.

<sup>42</sup> Gowelaopiate peno olalati tanalo dumiya nopo ebo iyatiya, iba:te idoko moto epo peago demagaeliya ebe dubu bilibilinomo kanakapulaema:, ibi

epetapiate potamo na:luma:ote gito nalautiokapoma:.<sup>43</sup> Ebe tetelo wiyasiya gowelaopino watodawa ubila Polokono igilo ka:mula:ema:, ebema: ebete ebena opopi nodiyoboliya iba:te ebe dubu anakapulaema:. Ebe atu tetelo ebete ibi bilibilinomo nanaliya, ibi magumulo piyate a:luma:oma: dowagelitiya iba:te pene ilapatela:ote potamo dopamo ka:na:luma:oma:<sup>44</sup> ega:walo a:luma:o iyatawa:piate pe bolegale elela:mo olokowila:ote ebo ka:na:iwalema:. Nanitabola, a bilibilinomate ma kunu aimano igilago potamo modobolo nidiwiyama:.

## 28

### *Molota Opolo Bu Kalute Poloko Daliya*

<sup>1</sup> Ebene a bilibilinomate olalati:no potamo da:nidiwiyama:, ebe opo epate a nanaiya me kewa: kolomolo ditana ebe opono mailo Molotala. <sup>2</sup> Ebe tetelo iba:te a kawonomamo nilakapoiamele potolo ela madoamete a ebo ka:miya aimano ape kenaenailaema:, mabu ulamate eba owutalo a kawo gibate uwateiti. <sup>3</sup> Ebene Polote kewa katomo nuwatete eba pepadutalo, bu kalute ebe katomo magumune pemaigate ebe kotolo palote ebo legemiti. <sup>4</sup> Ebema: Molota opo epate kalute Polokono kotolo legemitalo dumiya, ibi magumulo epetapiate epetapiatamo negeliya, “Nanitabola, me dubute dubu idi anakapumi. Numa:la:, epatamo kuba wiya dikalamolenako ebe aimano ida:da:lino uliyante ebetamo kuba wiya ikame! Ebete kewa: kolomono olalati magumune dalaula:ka, wiyasiya ebena kuba wiyate gabo idido ebetamo nanitabola a:pemaiga.”

<sup>5</sup> Ebe tetelo Polote ebena kotone kalu danamotega:miya elamo gito adogeliya, wiyasiya Polokono apa:mo kaluno elawote kodoliya:. <sup>6</sup> Ebene epate ebe eba umitalo ibino wokilo ebo geliya, tatalila ebete ka:emene. Wiyasiya tete geyageyadopo nipo dumitiya ebe tetelo iba:te ibino woki iyakobi midilite negeliya, “Diyala, ebe da: kuba lumagia:, wiyasiya aimano ida:da:lino uliyana idite me dubuno ololamo atamo da: apawokalale!”

### *Polote Molota Opo Epo Temetema:gopi Wadekobi Da:midiliya*

<sup>7</sup> Ebe kewa: kolomolo ditanami ebe opono kawo gabamani dubuno mailo Pubiliyasitela, ale kebe damela potamo ka:nidiwiyama: ebe damela niyakabolo ebena kawokawo pali ega:walo motote na:pola:menami. Ebe dubute a epetapi nilakapoiamele uwatete a ebena motamo gito magataiya, ebena netewa-kapiya egelamo ebete a wadenomamo eba uamenatelo ebo walubinaki. <sup>8</sup> Ebe tetelo Pubiliyasikono nabiwi gabugabute eba uminatelo ne kalimago lionaki, ebema: Polote ebe kadeleno wata baiamo tote Godotamo eba na:towetowelo koto ebetamo da:nowatiliya, ebete wadekobi ebo olowiya. <sup>9</sup> Ebene Polote dosiyodiliya Molota opo epate ebe tanalo olowite, egela epetapilo iba:te ibino temetema:gopi demagaelenakiya Polote Godokono elawamo wadekobi ebo midiolenaki. <sup>10</sup> Ebe mabuma: iba:te a moioelo nilakapo inamabu bilibilinomo atamo gito ikaeamoenakiya, ega:walo ale kawo palai pe ida:go walo tolaema: da:kowageliyama:, ebe tetelo agodolo kebe inamabuate modobolo pola:na:no iba:te ebe inamabu wadaete peamo atumu gito kalomoamiya.

### *Ale Loma Kawo Duliwomolamo Da:nemaimiyama:*

<sup>11</sup> Ale Molota opolo eba ilukulilo netewa-kapiya sagana dolopoligiya, ebe tetelo ale kawo palai pe ida:go tolame walo gito kowagilimiyama:. Ebene kawo awano tete pemaiga:no ebe pete dopamo A:lesandiya duliwomolone Molota opamo pemaigate, kawo awano olopoligo tete ebo pemakopeliya

ega:walo ebe peno wato netewala, me pe namutudawate Loma epono ida:da:lino Nedewale Gudino ololamo osiyodiloliya. <sup>12</sup> Ebene a ebe peago kewa:kolomo na:iwalete Silakuse kawo duliyoumolamo nemaimiote netewakapiya egela ebo nilukuliyama. <sup>13</sup> Ebe tetelo ale walo ka:tolamete kewa:kolomo ka:na:iwalete Legiyama duliyoumolamo ebo nemaimiyama; ebene egela idilo wade awate siyele apune da:piya, ebe awate netewa egelamo a eba powalubilo pete tote Putiyoli duliyoumolamo gito nolosigiya.

<sup>14</sup> Ebolo ale Ya:suko nanitabokobi midipi ekaki epetapi da:nulamiyama; iba:te a nanaiya iba:go kilukulima; ebema: ale iba:go sebeni egelamo ilukulite walo agowa gabodo na:ka:tolamiyama: Loma kawo duliyoumolamo. <sup>15</sup> Ebene Loma epo nanitabokobi midipi epetapiate aimano tanalo olowite, iba:te gabo tetelo ago alugoma: kawo duliyoumolone ebo pelamiya. Ibi magumulo dopo epate A:piyase duliyoumolono inamabu olowame bailo ago palugote, ega:walo epetapiate gabo tetelo ago walo nakapalugiya, ebe gabo teteno mailo ebe 'Kapela Epono Netewa-kapiya Lao Moto Tetela.' Ebe tetelo Polote ebe Loma epono ololo dulamiya ebete Godotamo kalakala tabo eba gelo tepo magumulo elawo ebo lawiya. <sup>16</sup> Ebene ale Loma kawo duliyoumolamo da:nemaimiyama; ebe tetelo gabamaniate Poloko naniya ebete idoko motolo a:kokolimene, wiyasiya moto idinomolo eba nokolilo gowelaodawa dubu idi kapiyate eba:go kokolimene ebete alaula:kapoma:

*Polote Loma Kawo Duliyoumololo Ya:sukono Tanaloma: Yu Epatamo Tabo Da:kiyawaiya*

<sup>17</sup> Netewa-kapiya egela da:ponolopoligiya, Polote tabo ebo nalibiya Loma kawo duliyoumololo dilukulionamiya ebe Yu epono watowatopiate ebetamo ka:pelaema; mabu nanitabola, iba:te Ya:sukono nanitabo tanalo dopamo kolowiya. Ebene iba:te dapaladabutiya ebete iba:tamo negiya, "Naimano naniale; me tanalo nanitabola, nale aimano Yu epatamo kuba idi kosiyodiloa: ega:walo aimano ewonino pukala idi kapiya kadikamidalea; wiyasiya aimano epo epetapiate natamo eba dowaoalo iba:te Yelusalemalo na lawenete Loma gabamanino kotamo gito iyatiniya. <sup>18</sup> Ebene ulama epetapi da:petoi ebe tetelo gabamaniate naimano tanalo eba anagiyamidamelolo, iba:te na a:eamo kalibonema: naimano kuba kapiya idi kumia; wiyasiya ibi ubila na idoko motone gito kowolukonema. <sup>19</sup> Ebe mabuma: Yu epate gabamaniatamo ibino ubia: tanalo kawiya awokalimiya, ebene na gabamanino tabo anagiyamida bailo eba utitalo nale gabo idi kumia. Ebema: ebe tetelo nale naimano ubi awokala iyatimo Sisakono ololo apulo naimano kuba osiyodiloa: tanalo kanawokalima; wiyasiya la: niyaniyata, naimano woki kitania: Sisakono ololo apulo aimano Yu epono tanaloma: kuba tabo idi ka:negema. <sup>20</sup> Nanitabola, nale la:go tabo ka:kiyawaoma: tabo ebema: palibomo. Ebema: modobola la:le naimano kotolo ditana me auli ale numa:la; mabu a Isalaela epate pokono pe tanaloma: kalakalago demakopelenama; ebe Kawodawa mabuma: nale me matuolamolole tanalago okolinamo."

<sup>21</sup> Ebe tetelo Yu watowatopiate Polotamo negeliya, "Niyata. Ale a:ma: mabuma: leta epetapi Yudiya opone kuwatea; ega:walo aimano ekaki epetapiate ebene ka:pelamea: a:imano osiyodilole tanaloma: kuba tabo idi a kapanaema. <sup>22</sup> Wiyasiya kalakala kawonomola, a iyatawala iyaiya opolo epo epetapiate a:imano oli tanebano tanaloma: kubanomamo gelana. Ibino tabo gela tanalo da: nanitabola: o da: a:da:la; ebema: aimano ubi bitana a:imano tabo apuapu wadenomamo kolowioma."



<sup>23</sup> Ebene ebe tetelo iba:te kapiya egela idi ka:mite, ebe egelalo dopamo da:pelamiya ebe watowatopiate ega:walo tabo olowiopi bilibili-dopo epetapi iba:te Polokono motamo ebo paladabutiya. Ebene duiya tetene wagilimite adimo teta:mo nemaiga Polote Godokono Kawo Elawodawano tanalo ibi ebo iyatulamiya. Ebe tetelo Mosesete Bukamo dakuloliya ega:walo Godokono Woki Awokalimipiate dakuloliya, Polote ebe Buka apuapuno tabo eba awokalilamitalo ebete ibi ebo analiya Ya:suko nanitabokobi ka:midima. <sup>24</sup> Ebene ibi epetapiate Polokono tabo modoboma: gelate Ya:suko nanitabokobi na:midiya, wiyasiya epetapiate nanitabokobi ka:midiya. <sup>25</sup> Ebe mabuma: egelate eba adimonalo apaminanteui tanalote iba:tamo da:peni, ebe tetelo iba:te iyaiya tabo eba gelanalo ibino motamo gito tolameniya. Ebe tetelo Polote nanitabokobi midia: Yu epatamo me kodakoda tabo kapiya geni, “Godokono Uliyanate ebenu woki awokalimidawa Aisayako aniya, ebete la:imano ewoniatamo tote tabo nanitabonomolo ma kunu ka:na:kiyawaoma,

<sup>26</sup> ‘A:imano epatamo toawete  
ibi ma kunu nananaliye,

‘La: tabo bolowinakomata  
wiyasiya a:kiyatawawenakoma,  
iyo, la: magumu bowadinakomata  
wiyasiya a:kuma:wenakoma.

<sup>27</sup> Mabu me epono woki  
alatidiolamiya,  
ibi nanitabo tanalo olowima: ubia:nola,  
ebema: iba:te galo emopioliya,  
ega:walo ibino balidi atumu a:mula:oliya.  
Ebema: iba:te ibino balidi  
mula:olea:noma: neda:otaleka,  
ibino balidite naimano wade tanalo bulamena,  
ega:walo ibino galote nolowiotaleka,  
iba:te ibino tepo magumuno woki  
wadenomamo malagidilolete natamo bolobila:na,  
ebema: na modobola  
ibi nale wadekobi midilima:’ ’ ”

<sup>28</sup> Ebene Polote ebenu tabo moga:melo walo na:kegeni, “Modobola la: niyatawala:, me tetelo Godokono igilo mula: tanalono tabo ebete Yua:piatamo ikalami, mabu iba:te kalakalago olowite kelaema:na: wiyasiya la:lea.”  
<sup>29</sup> Ebema: Polokono tabo kiyawao tanalo dolopoligoni, Yu epate ebenu motone eba tolamenalo ibi a:ka:tuwa: ibi magumulo apaminanteui kawonomago tolameniya.\*

<sup>30</sup> Ebene Polote ulama netewa Loma kawo duliyaomololo eba okolinalo ebete kebe wata moto ka:wiyanamile, piyate ebe motamo da:pelamenakiya ebete ibi kalakalago ebo uwatenaki. <sup>31</sup> Ebema: ebe tete geyageyanomolo ebete Godokono Kawo Elawodawano tanalo ega:walo Kawodawa Ya:su Kelisokono tanalo ebe epatamo awokala kiyawaonaki, idawate ebe kodiyobonakia:

\* **28:29:** Ali 28.29 buka apuno tabo Lukute bukamo kakuloliya, wiyasiya ebenu buka osiyodilo walogabo apune nanitabokobi mididawa idite akuloliya.

## POLOTE LETA LOMA SOSI EPATAMO OSIYODILIYA

<sup>1</sup> Na ebe Polotela, Ya:su Kelisokono wokodawala, iyo, ebenu sosi wagilima: iyaiya opamo daliboliya, ebe wokopi magumulo na idila, mabu Godote na ka:na:mite ebema: laweniya nale ebenu Wade Tabo ka:kiyawaonama:

<sup>2</sup> Me Wade Tabo ebe Godote dopamo nanitabonomolo ka:pema: ebenu woki awokalimipido degiya, me ebe tanalola, iyo, ebete ebenu Wade Tabono pe tanalo ebenu Wade-talena Bukalo iyalo tetenomolo awokalimiya.

<sup>3</sup> Ebema: me Wade Tabote Godokono Guduno tanalo ma kunu awokalimina, ebete Da:ibidikono walone gudi magumune lumagino apa:mo me opamo apawokaliya, <sup>4</sup> ega:walo ebete me opolo eba okolinalo Wade-talena Uliyanano olonomamo okolinami, ebenu Godote ebenu Guduno nanitabo tanalo kawokalima: ebe a:e magumune igilamo adipatiya. Iyo, me Gudu ebe aimano Kawodawa Ya:su Kelisotela. <sup>5</sup> Nanitabola, Kelisokono mailote kawonomoma: keda:ma: Godote na nilakapolo laweniya, ma kunu na ebenu alibodawama: eba eda:nalo nale me opono iyaiya epo bilibilinomo ebetamo kemagaelenakoma:, ebenu iba:te ebe nanitabokobi midi magumulo ebetamo ka:tudila:oma:. <sup>6</sup> Ebema: la: piyate Loma kawo duliynomololo dilukuliawenama, Godote ebenu woko magumudo la: atumu a:keka:la:miyata la:le Ya:su Kelisokonoma: keda:wenama:

<sup>7</sup> Ebe mabuma: Loma duliynomolo epo magumulo la: piyate Godokono epoma: keda:wenama: ebete ebenu nilakapo kimalagidilo magumulo la: deka:la:mitiyala, na Polote la: bilibilinomatamo me leta palibomo. Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta.

*Polote Loma Sosi Epatamo Pema: Godotamo Towetowe Tabo Da:kiyawaiya*

<sup>8</sup> Naimano dopo tabo ma kunula, Ya:su Kelisote atamo dosiyodiloamiya, ebe towetowe tabo kiyawao gabodo nale la: bilibilinomono tanaloma: kalakala tabo Godotamo adipatenakomo, mabu me opo kawonomolo epate la:imano nanitabokobi midi tanalo nolowiona. <sup>9-10</sup> Numa:la:, nale Godoko kekalakalaiminama: ebenu Guduno Wade Tabo kiyawao woko naimano tepo magumuno elawo kawonomamo osiyodilonamo. Ebema: nanitabola, ebete naimano tanalo ma kunu iyatawana, nale tete bilibilinomo epetapilo la: towetowe tabamo eba wadipalatelelo ebe ebo toweomenakomo, ebenu ubi ditanamene ebete gabo natamo nosiyodilomene nale la:tamo ka:pema:, mabu tete geyageyanomolo nale ebe tanalo nemakopelenamo.

<sup>11</sup> Iyo, naimano ubi kawonomo ma kunula, nale la: da:pulametama ebe tetelo Godokono Uliyanate ebenu woko kosiyodilonama: kebe iyanomo elawo natamo dikanamiya, nale la: ebe tanalamo ka:powalubilimamota la:le nanitabokobi midi magumulo ka:kodakodaema:. <sup>12</sup> Ebenu ale kapimiya eba ilukulinalo aimano nanitabokobi midi tanalodo idite idi kowalubi, idite idi kowalubi, ebo kowaluba:tiuimalema:, iyo, la:imano nanitabokobi midi tanalote na eba walubinilo, naimano nanitabokobi midi tanalote la: atumu ebo ka:kowalubilima:ta. <sup>13</sup> O naimano nanitabokobi midipi ekakiala:, modobola la: me tanalo wadenomamo niyatawala:, nale naimano ubi tanalo iyalo iyatiyamo, nale la:tamo pete la:imano Loma duliynomolo kawonomolo Godokono woko eba posiyodilolo nolo da:imi epetapi ka:petapioma:, nale

dopamo Yua:pi epetapino iyaiya opolo woko keba kunu kosiyodilonaimo eba kunu. Ebema: nanitabola, tete epetapi bilibilinomolo na nopo alomonakimo la:tamo ka:pema:, wiyasiya iyaiya tanalo epetapiate na odiyobone-nakiya.

<sup>14</sup> Numa:la:, Godote na wiya: wokodawama: a:midiniya nale me opo epo bilibilinomatamo ebena Wade Tabo katama:, ebema: piyate Guliki epagodolo ibino iyaiya mulo woki duwatiya ega:walo piyate uwatea:pima: deda:ona, piyate kawokawo sukulamo da:tolamiya ega:walo piyate iyatawa:pima: deda:ona, nale ibi bilibilinomatamo nanitabolo ba:tonakomo. <sup>15</sup> Iyo, me ebe mabula, nagodolo ubi kawonomo bitana nale Loma kawo duliynomolamo pete la:imano duliynomolo epatamo atumu Godokono Wade Tabo ka:ka:pikiyawaoma:.

#### *Godokono Wade Tabono Elawo Tanalo*

<sup>16</sup> Ebema: Godokono Wade Tabo kiyawao mabuma: nagodolo ilipo kitana, mabu piyate nanitabokobi da:midima:na:, Godote ebena Tabono elawamo ibino igilo ka:mula:lalaemene, iyo, dopamo Yu epate ibino igilo mula:tanalo uwatete ebena Yua:piate atumu ka:kuwatema:na:. <sup>17</sup> Nanitabola, Wade Tabote me tanalo awokalimina, Godote epo ibino nanitabokobi midi tanalo kapiyado tuputupupima: midilinako, iyo, epate nanitabokobi midi tanalone wagilimite uwomuamo eba kunu ka:nemaimioma:na:, mabu Godokono Bukalo tabo idite ma kunu gena, “Piyate Godokono tuputupupima: deda:ona, iba:te ebe nanitabokobi midi tanalodo nanitabo igilo kelaema:na:.”

#### *Godokono Ololo Apulo Epo Bilibilinomate Kubakubapima: Deda:ona*

<sup>18</sup> Ebema: epono iyaiya kuba osiyodilole tanalo ega:walo ibino tepo magumuno kubakuba woki, Godote ebe tanalo bilibilinomo kanagilamele-laema: ebena kawo dowo tanalonomote Unu Duliynomolone napawokala, mabu epono iyaiya kuba tanalate ibi nodiyobolena iba:te Godokono nanitabo tanalo kiyatawaoma:. <sup>19</sup> Numa:la:, epate ebena tanalo nanitabolo kuima: Godote iyalo tetelo wadewade woki iba:tamo modobolo ikalamiya, ebe mabuma: ebete ebena nanitabo tanalo odiyobopiatamo kuba wiya nanitabonomolo kikalaemene. <sup>20</sup> Nanitabola, Godote me opo dosiyodiliya, ebe tetene wagilimite me teta:mo pemaiga, epate ebe mabuma: ibino balidinomamo kebe netewa tanalo ulaema: modoboa:noma: deda:onamiya, ebe tanalo ebe ebena uwomua: teteno elawo tanalo ega:walo ebena talenanomolo okoli tanalola. Wiyasiya numa:la:, Godote me opo epatamo ebena tanalo gabo idido modobolo awokaliminako, ebe gabo ebe iba:te ebena nanitabo tanalo ibino tepo magumuno balida:mo dumina ebe gabola. Ebema: nanitabola, ebete dosiyodiloliya ebe epate me opo ega:walo opono inamabu bilibilinomo ulamete ebena tanalo ibino tepo magumulo ebo iyatawana, ebe mabuma: gabote nanitabolo kitana: iba:te ibino kuba wiya uwate tanalone kalautioma:.

<sup>21</sup> Iyo, epate Godokono tanalo eba kunu iyatawaiya, wiyasiya iba:te ebe nani Godoma: gela:no ebe kemoionakia: ega:walo ebetamo kalakala tabo kadipatenakia:, ebema: ibino wokite me osiyodiloa: tanalodo daedalenomoma: eba eda:olamelo ibino tepo magumuno kodakoda wokite idokoma: ebo eda:olamiya. <sup>22</sup> Ebena ibi a:ka:tuwa: ibi iyatawa kawokawopima: eba gelalo wiyasiya daedalema: gito eda:iya. <sup>23</sup> Ebe mabuma: iba:te uwomua: uwomua: tetelo dokolinamene ebe Kawodawa Godoko amamate tanalo atepate, wiyasiya ida:da:li epetapi amamalatele tanalo ebo wagilimiya, iyo, iba:te ida:da:li epetapi ibino a:elao apeno

ololonomamo, ega:walo goeogoeo epetapino iyaiya lolamo, ega:walo olaola epetapino lolamo, ega:walo kalu epetapino lolamo gito osiyodiloliya.

<sup>24</sup> Me mabuma: Godote ibi gito miyapiya, iba:te ibino tepo magumuno kuba daley a eba awokalilamelolo, ibi magumulo idite iditamo, idite iditamo, kawokawo ilipo tanalo ibino apa:mo kosiyodilolenakoma. <sup>25</sup> Ebema: ebe epono kuba tanalono mabu ma kunula, iba:te Godokono nanitabo tanalono olobila:ote a:da: tanalo kalakalago gito lawiya, ega:walo iba:te me opono iyaiya inamabu amamalatelema: ida:da:lino wokopima: eba eda:olo, wiyasiya ebe inamabu bilibilinomo dosiyodiloliya iba:te ebe nani Kawodawa amamate gito atepiya. Eiyel! Modobola epate nani Godo kapiya uwomua: uwomua: tetelo namamatenama:na! Me tabo ebe nanitabola, taula.

<sup>26</sup> Ebema: nanitabola, me opo epate nani Godo amamate datepiya, Godote ibi atumu gito ka:miyapiya iba:te ibino tepo magumulo kebe kubakuba ubi tanalo kemalagidilolenami ebe ilipo tanalo kosiyodilolenakoma. Ebe mabuma: kamiyala:te ibino awiago osiyodilo tanalo atepate wiyasiya kamiyale epetapi gabatamo ilipo tanalo osiyodilolenaka, <sup>27</sup> ega:walo atu gabodo dubate ibino kamiyala:go osiyodilo tanalo atepate wiyasiya dubu epetapiatamo ilipo tanalo ebo kosiyodilolenaka, iyo, iba:te dubu gabatamo kubakuba tanalo kosiyodilolema: ibino tepo magumulo elanomoma: eda:ona, ebema: ibino kuba wiyate Godogodone iba:tamo modobolo penako.

<sup>28</sup> Numa:la:, epate ibino tepo magumulo Godokono nanitabo tanalo ubia:noma: deda:iya, ebema: Godote ibi gito miyapiya iba:te ibino wokilo kuba daleyonomoma: eba eda:olo ebeno pukala gito kowakalaminakoma. <sup>29</sup> Ebe mabuma: ibino tepo magumulo iyaiya kuba bilibilinomo tabokaonomoma: gito eda:iya. Iyo, ma kunu inamabu kawonomamo uwate ubi tanalo, ega:walo ibino woki kuba daleyakobi midili tanalo, ega:walo epetapino inamabuno tanaloma: iba:tamo dowo tanalo, ega:walo epo anakapulame tanalo, ega:walo gowelao tanalo, ega:walo a:da: elemasigi tanalo, ega:walo epetapino ilukuli tanalo kubailame wokino tanalo, me iyaiya tanalate iba:godolo tabokaonomola.

Ebene epetapiate pola:na:no iba:te ibino tanaloma: kubakuba tabo gelanaka, <sup>30</sup> iyo, tete idilo iba:te a:da: elemasigi tabamo epetapino tanalo gito kubailamenaka. Ebene iba:te Godotamo eba dowoanalo iyaiya epo epetapi malogolelo ibino kawo amamanomo magumulo ibi a:ka:tuwa: ibi ebo wadipalatenaka, ega:walo iba:te ibino tepo magumulo olioli kuba osiyodilole tanalo epetapi olenaka, ega:walo iba:te ibino nabila menokobila iba:tamo ka:tudila:onakoa. <sup>31</sup> Iyo, iba:godolo wade woki kapiyanomo idite kitalamena:, ebe mabuma: iba:te kebe tetelo tanalo idi nanitabolo kosiyodiloma: degelanaka wiyasiya walogabo apulo kosiyodilonakoa:, ega:walo iba:te walubi tanalo nigologolodawatamo kiyatinakoa: mabu iba:godolo nilakapo puliyanomola. <sup>32</sup> Iba:te Godokono tuputupu tabono iyaiya tanalo iyalo ma kunu iyatawaiya, kebe dawate ebako kuba tanalo dosiyodilolena, ebete a:e wiya modobolo kelaemene. Wiyasiya iba:te ebe tanalo nanitabolo malagidiloa:no atu kubakuba tanalo walo eba kosiyodilolelo, kebe olioli epate ebe osiyodilole magumulo iba:go dapaladabutinaka iba:te iba:tamo ebema: kalakalaonaka.

*Godote Tuputupu Gabodo Epo Bilibilinomono Tanalo Kanagilamelelaemene*

<sup>1</sup> Wiyasiya naimano namutudawa, a:ma: nanisiwale! A:ma: ma kunu akomalagidilala:, na modobola lumagi idino tanalo anagilamelema:. Nanitabola, a:ma: eba kunu dowagela:emene, ebe tetelo kuba wiyate a:ma:tamo ka:pemene mabu a:ma: atu kuba tanalo kosiyodilolenakota.

<sup>2</sup> Nanitabola, kebe epate iyaiya kuba kosiyodilolenake, nale ibino tanaloma: dopamo egemo, ebene nale tabo idi ma kunu na:kegemo, a iyatawala Godote ebakobako kuba osiyodilolepiatamo wiya ikalaema: ibino tanalo tuputupulo kanagilamelelaemene.

<sup>3</sup> Ebema: namutudawa, a:ma: lumagi idino kubakuba tanalo eba anagilamelemelo a:ma:le atu tanalo da:kosiyodilola:wenaka, a:ma: daedale wokilo ma kunu akomalagidilala:, na modobola, Godokono dowo tanalote natamo a:ka:pemene. <sup>4</sup> Numa:, a:ma: ebako daedale woki demalagidilaemene, diyala, a:ma:le a:imano tepo magumulo ma kunu da:begemene, “Godote ebene nilakapo magumulo tete geyageyanomolo kuba osiyodilolepiatamo wiya nanitabolo kikalamenakoa:, ebema: diyala, ebegodolo elawo da:kitana: natamo kuba wiya kikanaema:.” Eiyee! Godokono nilakapo tanalote a:ma: eba kunu kiyatumitana:, wiyasiya ebene nilakapo tanalote a:ma: ma kunu iyatuminata, a:ma: me tetenomolo kuba osiyodilole magumune kolobigaema: mabu walone tetelo ebene dowo tanalote nanitabonomolo ka:pemaigamene!

<sup>5</sup> Wiyasiya a:ma:le kuba osiyodilole tanaloma: a:imano tepo magumu na:kodakodaiminakota, ebema: Godokono Kawo Egelalo ebene kawo dowo tanalonomote ebene tuputupu anagiyamida tanalago da:pemaigamene, a:imano kuba wiyate kawonomoma: keda:mene. <sup>6</sup> Nanitabola, ebe tetelo Godote epo bilibilinomono tanalo eba anagilamelelamelo iba:tamo modobo wiyanomo ebo kikalamolemene. <sup>7</sup> Iyo, piyate me opolo eba ilukulinalo wadewade tanalo dosiyodilolena, iba:te ebe gabodo ibino nanitabo kalakala ega:walo uwomua: igilo ega:walo amama tanalo Godogodone uwatema: ubi dalomona, ebe epatamo ebete uwomua: teteno igilo nanitabonomolo kikalaemene. <sup>8</sup> Wiyasiya me opo epo magumulo piyate ibi a:ka:tuwa: ibi kapiya eba malagidilolenalo kuba osiyodilole tanalo waloma:talelo Godokono nanitabo gabo ubia:noma: deda:ona, Godote ebe epono tanalo anagilamelelamete ebene dowo tanalote iba:tamo kawonomamo ka:pemene. <sup>9</sup> Iyo, nanitabola, piyate kuba tanalo dosiyodilolena, Godote ibi bilibilinomatamo iyaiya olalati tanalo eba ikalamelo, iba:te temeteme ebo kiyatawaoma:na:, ebe wiya tanalote Yu epatamo dopamo pemaigate ebene Yua:piatamo atumu ka:ka:pemaigamene. <sup>10</sup> Wiyasiya piyate wadewade tanalo dosiyodilolena, Godote ibi bilibilinomatamo kalakala tanalo ega:walo amama tanalo ega:walo milo tanalo kikalaemene, ebe wiya tanalote Yu epatamo dopamo pemaigate ebene Yua:piatamo atumu walone ka:ka:pemaigamene. <sup>11</sup> Ebema: a:ma: nolowia, Godote epo bilibilinomono iyaiya tanalo tuputupu gabo kapiyado kanagilamelelaemene.

*Lumagite Mosesekono Totomu Tabo Olowio Gabodo Igilo Mula: Tanalo A:kelaemene*

<sup>12</sup> Me tanalo idila. Godote ebene iyaiya Totomu Tabono tanalo Yu epatamo Mosesedo eba ikalamelo ebete Yua:piatamo kikalamiya:, ebema: Yu epate ebe Totomu olowiote eba iyatawaolo iba:te dowakalaima:na:, Godote ebene Totomu Tabono tanalamo ibino tanalo ebo kanagilamelelaemene. Wiyasiya numa:, Yua:piate ebe Totomu Tabo olowioa:no



dowakalaima:na; iba:te atumu kuba wiya ebema: kelaema:na; iyo, iba:te ibino kuba osiyodilole mabuma: gito ka:elaoma:na. <sup>13</sup> Ebema: nanitabola, epate Godokono Totomu Tabo gito dolowioma:na; ebe tanalo kapiyado Godote ibi tuputupupima: a:ka:midilimene. Ao, iba:te ebenu Totomu Tabo bilibilinomamo nanitabonomolo da:tudila:oma:na; ebe tetelo ebete ibi ebenu tuputupupima: keka:la:imene.

<sup>14</sup> Ebema: modobola a:ma: Yua:pino tanalo nemalagidila, iba:te Godokono Totomu Tabo dopamo kolowiya; wiyasiya ibino olowioa: tetelo ibi magumulo piyate tuputupu ubi tanalodo Godokono Totomu tanalomo da:tudila:onaka, iba:te me tanalo awokalimina, ibi modobola ibi a:ka:tuwa: ibino tepo magumuno iyatawa tanalodo wade tanalo ega:walo kuba tanalo kanagilaema: <sup>15</sup> Ebe nanitabola, Godote a:ka:tuwa: Yua:pi bilibilinomono tepo magumunomamo ebenu Totomu Tabo iyalo akulolelamiya. Iyo, ibino tepo magumuno mulo wokino tanalate ebe tanalo ma kunu awokalimina, kebe tetelo ibi magumulo idite kuba tanalo dosiyodilomene ebenu tepo magumuno wokite ebe kubadawama: ebo keka:imene, ega:walo kebe tetelo ebete tuputupu tanalo dosiyodilomene ebenu tepo magumuno wokite ebe tuputupudawama: ebo keka:imene. <sup>16</sup> Me mabuma: tete bilibilinomolo na Polote Godokono Wade Tabo kiyawao magumulo me tanalo kiyawaonakomo, Godokono Kawo Egelalo ebete Ya:su Kelisodo epono waminaole tanalo bilibilinomo awokalilamelelamete, Yu epo ega:walo Yua:pi ibi bilibilinomono tanalo kapimiya ebo kanagilamelelamene.

*Yu Epate Godokono Totomu Tabamo Nanitabolo Ka:tudila:ona:*

<sup>17</sup> Ebema: naimano Yu namutudawa, a:imano tanalo keba kunula:ka?: A:ma: a:ka:tuwa: a:ma: amama magumulo negenata, “Na Yu lumagila. Iyo, Godote ebenu Totomu Tabo naimano ewoniatamo iyalo ikalamiya, ebema: na tanalo idi osiyodiloa:no na modobola igilo mula: tanalo kelaema:; mabu Godote a Yu epo ebenoma: keda:onama: iyalo uwateiya.”

<sup>18</sup> Nanitabola, a:ma: walo na:kegenata, “Na Godokono iyaiya ubi tanalo iyatawanomola, iyo, na ebenu iyaiya Totomu Tabo eba iyatawalo, na a:ka:tuwa: modobola kuba osiyodilo tanalo ega:walo wade osiyodilo tanalo wadenomamo kanagilaema:.” <sup>19</sup> Ega:walo a:ma: na:kegenata, “Na modobola balidi tamiopi gabo iyatulaema:; iyo, na ebe alola, piyate idoko magumulo dilukuliona naimano alote ibi a:pukuilamenako. <sup>20</sup> Ega:walo na modobola daedalepi tuputupu gabodo magatalema:; iyo, nale olioli ape epo iyatulamenakomo mabu Mosesekono iyaiya Totomu Tabote nagodolo ba:pola:na. Me mabuma: naimano woki modobola Godokono iyatawa tanalo ega:walo ebenu nanitabo tanalo uwatenomo kuwatema:.”

<sup>21</sup> Eiye! A:ma: potele epetapi iyatulaema: dowagela:wena wiyasiya a:ma: a:ka:tuwa: a:ma: wadenomamo kiyatuma:wena? Iyo, a:ma: Godokono Totomu Tabo epo eba iyatulamelu negenata, “La: epetapino inamabu pilolo akouwata:la:;” wiyasiya a:ma: ebe atu pilo tanalo a:kosiyodilonakota!

<sup>22</sup> Ega:walo a:ma: na:kegenata, “La: dubu idino kamiya pilolo akolawa:la:;” wiyasiya a:ma: ebe atu kuba a:kosiyodilonakota! Ega:walo a:ma: ida:da:li amamalatele tanalo kawo kubanomoma: da:kiyawawenaka, wiyasiya a:ma: ebe tabo kiyawao tanalone toawete epetapino ida:da:li amamalatelenu motamo diya gabodo nopegawete ebe inamabu pilolo ebo nuwatelamenakota! <sup>23</sup> Iyo, Godokono iyaiya Totomu Tabono tanalate a:imano epagodolo da:pola:na, ebe tanaloma: a:ma: potele damamawena a:ma: ebe ebe lumagilata, wiyasiya a:ma: ebenu Totomu nanitabolo malagidilolea:no dowakalamiawena ebenu mailo opamo ebo owolukonakota. <sup>24</sup> Nanitabola,

a:imano tanalo kawokalima: Godokono Bukalo tabo idite ma kunu gena, “La: Yu epono kuba osiyodilole tanalone Yua:piate Godokono tanaloma: kubakuba tabo gelana!”

<sup>25</sup> Ebema: Yu dawa, kebe tetelo a:ma: Godokono Totomu Tabo bilibili-nomamo nanitabolo da:tuduwatawenamene, ebe tanalodo a:ma:le gudu da:peso tetelo delawa:wiya, Godote ebe tama itamida pukalano tanalo wadenoma: kegemene. Wiyasiya a:ma: nolowia, a:ma:le ebeno iyaiya Totomu Tabono tanalo epetapiamo tuduwata:noma: deda:emene, a:imano tama itamida tanalono wade tanalote a:kitanamene. <sup>26</sup> Ega:walo modobola a:ma: Yua:pino tanalo nemalagidila. Ibi magumulo idite tama itamida pukala lawea: tetelo wiyasiya Godokono Totomu Tabo epetapiamo da:tuduwatanamene, a, nanitabola:ka:, Godote ebeno tama itamida lawea: tanalo malagidiloa:no ebe tuputupudawama: kegemene! <sup>27</sup> Eiye! Walone Godokono ololo apulo ebako tama itamida pukala lawea: lumagite la: Yu epo kubakubapima: kegemene, mabu Totomu Tabono iyaiya tanalate la:godolo eba pola:nalo, la:le tama itamida pukala apa:mo uwatelo wiyasiya Godokono iyaiya pukala epetapi bilibilinomo gito wakalaminakomata!

<sup>28</sup> Nanitabola, Godokono umi magumulo potele Yu lumaginomoma: deda:mene, ebete ebeno unu tama kapiya iyakobi a:ka:midimene, ao, ebeno tepo magumute atumu iyama: na:keda:mene. <sup>29</sup> Ebema: piyate kuba osiyodilole magumune maimiote ibino tepo magumulo iya epoma: deda:ona, me epo kapiya ebe Yu eponomola, iyo, me opolo Godokono epo epetapiate nanitabolo ka:pola:na:. Me mabuma: ebete kebe totomu tabo dopamo diyatiya Yu dubate ibino apa:mo ebeno pukala kuwatema:, me tetelo ebete ebe totomu iyabaiamo iyatite ubi tanalo idi ma kunu awokalimina, ebeno Uliyanano elawamo epono tepo magumamo pukala idi kiyatilaema:.

Ebema: nanitabola, piyate ibino tepo magumulo iyama: eba kunu deda:ona, Godote ibi kapiya moiolo tabamo bowalogolenakomene, wiyasiya diyala, me opo epate iba:tamo da: a:kekalakalaoma:na:.

### 3

#### *Yu Epate Godotamo Nanitabo Tanalo Osiyodiloa:no Wiyasiya Ebete Ibino Nanidawama: Beda:namene*

<sup>1</sup> Ebema: naimano tabo olowidawa, diyala, a:ma:le na ma kunu da:banana:emene, “Kebe lumagite a Yu epagodolo awokalate ebene baibai guduno tama itamida pukala delawiya, ebete ebe tanalodo beda: wade tanalo kelawiyale? Da: puliyala:, iyo, Godokono umi magumulo Yu epagodolo wade tanalo idite da: kitana:.”

<sup>2</sup> Nale wiyasiya negemo, “Ao, eba kunua:! Godote a Yu epo kowalubinama: wadewade tanalo epetapi bilibilinomo atamo ikaeamiya, ebe tanalo magumulo dopo tanalo ebe ebeno Buka apuapuno tabo ikaeame tanalola.”

<sup>3</sup> Ebene a:ma:le na ma kunu walo da:bakanana:emene, “Numa:, a Yu epate Godotamo tudila:oa:no nanitabo tanalo kosiyodilolenakia:, ebema: ebete dopamo a uwomua: tetelo kowalubinama: nanitabolo degiya, ebete ebe tabo walo a:kemalagidilomene, a, nanitabola:ka:?”

<sup>4</sup> Nale wiyasiya na:kegemo, “Ao, Godokono tanalo eba kunua:. Me opo epo bilibilinomate a:da: elemasigipima: eba eda:onalolo, ebe kapiyate nanidawanomoma: beda:namene, ebema: ebete kebe tabo dopamo nanitabolo kegiyale walone ebe tabo akadikamidalemene. Iyo, Godokono nanitabo tanalo awokalima: ebeno Bukalo tabote ma kunu itana,

‘Godó, a:ma:le kebe tabo apuapu  
 ka:kiyawawenaka,  
 walone tetelo epate  
 ebe iyaiya tabono nanitabo tanalo kuima:na:,  
 ebema: piyate a:ma: a:da:dawama: degelana,  
 a:imano wadewade osiyodilole tanalate  
 ibino daedale wokino tanalo  
 ebo kawokalilaemene.’ ”

<sup>5</sup> Ebema: diyala, lumagi idite me opo epono daedale wokiamo natamo ma kunu da:ba:wiyamene, “Godote aimano kuba osiyodilole mabuma: wiya ikaeaema: modoboa:, iyo, ebete eba kunu dowagelemene tuputupu tanalo akawokalimene. Numa:, ebete aimano kuba osiyodilole tanalodo wade tete ebe lawenako ebenu nilakapo tanalo awokaliminomo kawokalima:. Ebema: mabu keleka: ebete kuba wiya atamo walone ikaeaema: degena? Ebete eba kunu dosiyodilomene, ebe tanalo ebe tuputupu tanaloo:, ebenu kuba osiyodilo tanalola.”

<sup>6</sup> Na wiyasiya ma kunu gemo, “Eiye! A:ma:le degeawa:, ebe tabo nanitaboo! Godoko ebe tuputupu osiyodilole dawala, ebegodolo kuba osiyodilo tanalo idi puliyanomola. Ebema: ebe kapiya modobonomola me opo epo bilibilinomono tanalo anagilamelelamete wiya iba:tamo ikalaema:.”

<sup>7</sup> Ebema: diyala, daedale lumagi idite ma kunu da:ba:kegemene, “Godote naimano a:da: elemasigi tanalodo wade tete ebe lawenako ebenu wade osiyodilo tanalo awokaliminomo kawokalima:. Iyo, eba kunu ebe a:ka:tuwa: ebe walogonanako, ebema: ebete epono tanalo danagilamelelaemene, ebe tetelo modoboa: ebete na kuba osiyodilodawama: gema:! <sup>8</sup> Ebe mabuma: kuba: a me opo epate aimano ubilo iyaiya kubakuba tanalo bosiyodilole-nama:, mabu Godote aimano kuba osiyodilole magumune ebenu wade nilakapo tanalo eba wagaililo atamo kuba wiya a:kikaeaemene.”

Ebema: na Polote na:kegemo, “A:ma:le kebako kuba daedale tabonomo degeawa:, a:da: elemasigi epo epetapiate ebako tabo eba gelalo kuba tabo idi ma kunu kegelanaka, nale naimano iyatulame tanalago iba:go kapiyama: eda:te atu tabo kegenamo. Eiye! Ebe a:da: elemasigipiate ibino kuba tabono tanaloma: Godogodone wiya modobolo kuwatema:na:!”

*Me Opo Epo Bilibilinomate Kuba Osiyodilolepima: Deda:ona*

<sup>9</sup> Ebema: la: Yua:piate naimano Yu epono tanaloma: beda: woki na:kiyata:ema? Godokono umi magumulo Yu epono osiyodilole tanalo wadewadenodopola:ka:, ega:walo Yua:pino osiyodilole tanalo kubakubadopola:ka:? Ao, eba kunua:! Na me leta dopo apulo nanitabo tanalo ma kunu awokalimo, Yu epo ega:walo Yua:pi, ibi bilibilinomono watodawa ebe kapiyala, ebe ibi magumulo ditana ebe kuba osiyodilole tanalono elawo tanalola. <sup>10</sup> Ebe tanalo awokalima: Godokono Bukalo tabo idite ma kunu itana,

“Me opo kawonomolo  
 kuba osiyodiloo:dawa puliyanomola,  
 iyo, tuputupudawa kapiya idi ka:luta:.  
<sup>11</sup> Ega:walo wade kimalagidilagodawa idi puliyala,  
 iyo, Godokono nanitabo gabo wadidawa kokolina:  
<sup>12</sup> Nanitabola, me opo epo bilibilinomate  
 Godogodone olobila:ote kubakubanomoma: eda:iya,  
 ebema: wadewade tanalo osiyodilole dawala idi ka:luta:,”

iyo, idi kapiya puliyanomola.

<sup>13</sup> “Ebema: epono tabo gela tanalo  
 ebe a:elaopino bobo keba kunula:ka: eba kunula,  
 potele ebe bobo magumu da:iyamidamene  
 abale kapiya ebo kuimene.  
 Iyo, ibino menate a:da: tabo gelanaka,  
 ebema: elawo kaluno pako keba kunula:ka:;  
 ibino iyaiya tabono tanalo ebe eba kunula.

<sup>14</sup> “Nanitabola, iba:te dowate  
 ibino tabo magumune  
 malato tabo kawokawonomate pemaimionaka,  
<sup>15</sup> ega:walo iba:te ibino ubi tanalo kawonomamo alomonaka,  
 gawagawalo tolamelolo  
 epetapiatamo temeteme eba nikalamelolo  
 epetapi gito kananakapulaema.  
<sup>16</sup> Iyo, iba:te kebe iyaiya opamo da:tolamenaka,  
 ebolo epo eba na:kubailamelolo  
 iba:tamo iyaiya mibomibo tanalo ebo nikalamenaka.  
<sup>17</sup> Me tanalo nanitabola,  
 ibi nanitabo milo okoli tanalo iyatawa:;  
<sup>18</sup> ega:walo iba:te ibino kuba osiyodilole mabuma:  
 Godokono elawo tanaloma: ka:toletoleona.”

<sup>19</sup> Ebema: a me kawo tanalo iyatawala, kebe epate Godokono Totomu Tabo dopamo dolowiya, ebe tetene wagilimite ebe iyaiya Totomu Tabote ibino watodawama: gito ediya. Me mabuma: Godote ibino tanalo danag-ilamelelaemene, ebe tetelo iba:te kuba wiya uwatelo ebe odiyoboma: tabo idi gelama: a:ka:modoboma:na:. Iyo, Godote eba kunu me opo kawonomolo dilukuliona ebe Yu epo ega:walo Yua:pi ibi bilibilinomatamo ibino kuba wiya modobolo kikalaemene. <sup>20</sup> Ebema: nanitabola, Godote ebene Totomu Tabo epatamo dikalamiya, ebe tetelo ebete woki kiyatiya: ebete Totomu ikalame gabodo lumagi idi tuputupudawama: ka:midima:. Ao, ebete ebene Totomu Tabo epatamo ikalamiya, ibi bilibilinomate ibino kuba osiyodilole tanalo wadenomamo kiyatawaoma:

*Godote Epono Nanitabokobi Midi Tanalodo Ibi Ebene Tuputupupima: Da:midilinako*

<sup>21</sup> Ebema: Godote ebene Totomu Tabono tanalomo lumagi idi tuputupudawama: a:ka:midimene, wiyasiya ebete epo ebene tuputupupima: kebe tanalodo ka:midilinale, me tetelo ebete ebe tanalo atamo awokalimiya. Numa:la:, dopamo Mosesete ebe tanaloma: nanitabonomolo degiya Godokono Totomu Tabo bukamo ebo akuloliya, iyo, Godokono woki awokalimipi epetapiate atu tanalonomoma: kegelanakiya. <sup>22</sup> Ebe tanalo ma kunula, piyate Ya:su Kelisoko nanitabokobi da:midima:na:, Godote ebe tanalodo ibi ebene tuputupupima: ka:midilimene. Iyo, me tetelo Godote Yu epo ega:walo Yua:pi ibi bilibilinomo kapimiya eba kunu ibino nanitabokobi midi tanalodo walubilinako, <sup>23</sup> mabu me opo epo bilibilinomate kubakuba tanalo osiyodilolete ibino ele gabo odidi tanalodo Godokono ololo apune mulunomamo a:tolamiya. <sup>24</sup> Wiyasiya iba:te Godotamo wade tanalo idi osiyodilola: tetelo ebete ebene nilakapo magumulo Ya:su Kelisokono woko tanalodo ibi tuputupupima: ebo

ka:la:miya. Iyo, Godote epono kuba osiyodilole tanalono elawo magumune ibi ma kunu wagailiya, <sup>25</sup> ibino kuba osiyodilole mabuma: ebete Ya:suko kalimagono nilakapo inamabuma: midite kewa olotolowalo gito a:iya.

Ebema: piyate Ya:sukono a:e tanalo nanitabokobi da:midima:na; Godote ebe gabodo ibino kuba osiyodilole tanalo bilibilinomo egebolelamete ebo ka:dodolomatililaemene, nanitabola, ebete ebe gabo osiyodiliya ebenu tuputupu osiyodilo tanalo kawokalima: Iyo, numa:la; Ya:sute me opamo pea:no dopamo piyate dilukulionamiya, Godote ebenu nilakapo magumulo ibino kuba osiyodilole mabuma: wiya iba:tamo nanitabolo kikalamenakia; <sup>26</sup> mabu ebe ubila ebenu tuputupu osiyodilo tanalo a tetelo nanitabolo awokaliminomo ma kunu kawokalima; ebe kapiya tuputupudawama: eba eda:nalo ebete epo bilibilinomo magumulo piyate Ya:suko nanitabokobi da:midima:na: ibi atumu tuputupupima: ka:midilimene.

<sup>27</sup> Ebema: ale tuputupupima: eda:o tanalo eba malagidilolo amama tanalote agodolo akoitanala; mabu ale aimano elawamo Godokono Totomu Tabamo tudila:o gabodo o wade osiyodilo tanalo idido walubi tanalo kelawiya: Nanitabola, ale aimano wade tanalo osiyodiloa: tetelo Ya:sukono osiyodilo tanalo kapiya nanitabokobi da:midiyama; ebe gabodo ale Godokono tuputupupima: eda:iyama; <sup>28</sup> iyo, a me tanalo kawonomo iyatawala, lumagite nanitabokobi midi tanalodo tuputupudawama: keda:mene wiyasiya Godokono Totomu Tabamo tuduwata tanalodoa: <sup>29-30</sup> Ebema: la:imano woki ma kunu kitanale, Godoko ebe Yu epo kapiyano Godola? Ao, Yua:pi ega:walo Yu epo, Godoko ebe ibi bilibilinomono kapiya Godola, ebema: ebete ibi bilibilinomo kapiya gabonomodo tuputupupima: midilinako, ebe gabo ebe Ya:suko nanitabokobi midi tanalola. <sup>31</sup> Ebema: la: ma kunu kemalagidilawitama, ale Godokono Totomu Tabamo tudila:o tanalo iyabaiamo gito kiyatimalema:? Ao, eba kunua: Ale Totomu Tabamo tudila:o tanalo kawo tanalonomoma: gelanama; wiyasiya ale nanitabokobi midi tanalo kapiyado elawo kelaemalema:

## 4

### *Godote Yu Epono Ewono A:ibalayamakono Nanitabokobi Midi Tanalodo Ebe Tuputupudawama: Da:midiya*

<sup>1</sup> Ebema: modobola la: Yua:piate a Yu epono ewono A:ibalayamakono tanalo nemalagidilala: Ebenu nanitabokobi midi tanaloma: Godote beda: kawo tanalonomo kiyatumiyale? <sup>2</sup> Numa:la; A:ibalayamate kebe wadewade tanalo kosiyodilolenakile, Godote ebe osiyodilole tanalodo ebe tuputupudawama: na:midiyataleka; ebe a:ka:tuwa: ebe bowalogiyana: Wiyasiya Godokono umi magumulo A:ibalayamate ebenu wadewade osiyodilole mabuma: ebe a:ka:tuwa: ebe walogonama: modoboa; <sup>3</sup> ebema: ebenu Bukalo tabote ma kunu itana, “Godote A:ibalayamakono nanitabokobi midi tanalo umite ebe tuputupudawama: ebo ka:miya.”

<sup>4</sup> Numa:la; kebe dubute mani woko dosiyodilona, ebete woko watodawagodone wiya delaemene, ebe wiya lawe tanalo ebe watodawano gito ikame tanalaa: Ao, ebe dubute woko osiyodilo magumulo ebenu elawamo modobo wiya elawe, lumagi idino nilakapo tanalodoa: <sup>5</sup> Wiyasiya kebe dubute Godoko nanitabokobi da:midina, ebenu tanalo iyanomola mabu ebete ebenu woko osiyodilo elawamo wade wiya laema: kegena: Ao, ebete Godokono woko osiyodilo elawo kapiya nanitabokobi eba midinalo, Godote ebe tuputupudawama: ka:milo wade wiya ebo kikaemene, mabu nanitabola, ebe Kawodawa iyatawanomola piyate ebetamo tudila:oa:pima:



deda:ona, ebete ebe epo ibino tudila:oa: tanalo magumune wagailite ibi tuputupupima: ka:midilima:. <sup>6</sup> Ebema: kebe lumagite wadewade tanalo osiyodilolea: tetelo Godote ebe lawete tuputupudawama: gito deka:imene, ebete Godokono walubi tanaloma: kawo kalakalanomo ke-laemene. Da:ibidite ebe tanalo eba malagidilolo Godokono Bukamo tabo ma kunu akuloliya,

<sup>7</sup> “Godote kebe epono kuba osiyodilole tanalo  
nilakapolo da:dodolomatililaemene,

ibino kalakala beda: kawonomola:ka:  
mabu Godote ibino kuba gito egebolelame!

<sup>8</sup> Iyo, Kawodawate pokono kuba osiyodilole tanalo  
walo malagidilolemea:noma: degemene,  
ebeno kalakalate kawonomoma: keda:mene.”

*A:ibalayamate Tama Itamida Pukala Lawea:no Dopamo Godote Ebe  
Tuputupudawama: Dekamiya*

<sup>9</sup> La:imano woki keba kunula:ka:? Godokono osiyodilo magumulo de-maigana, ebe kalakala tanalo ebe piyateka: baibai gudino tama itamida pukala delawiya ibi kapiyatamo kitanale? O ebe kalakalate tama itamida pukala lawea:piatamo atumu ba:kitanale? Numa:la:, a iyalo egelama: ma kunu, Godote A:ibalayamakono nanitabokobi midi tanalo uimite ebe tuputupudawama: ebo ka:miya. <sup>10-11</sup> Ebema: me tuputupudawama: ka:mi tanalote A:ibalayamatamo kebako tetelo kemaigiyale, ebe tama itamida pukala lawea: tetelola:ka:, o ebete pukala delawiya walogabo apunela:ka:? Iyo, ebete pukala lawea: tetelo Godote ebenu nanitabokobi midi tanalodo ebe tuputupudawama: ka:mite, walogabo apune ebenu tuputupudawama: eda: tanalo awokalima:, ebete Godokono tabamo tuduwatate tama itamida pukala ebo lawiya. Ebema: piyate tama itamida pukala lawea: tetelo Godote ibino nanitabokobi midi tanalodo ibi tuputupupima: deka:la:mina, A:ibalayamako ebe Yua:pi bilibilinomono ewono nabiwila. <sup>12</sup> Ega:walo me opolo a piyate tama itamida pukala iyalo delawiyama:, a Yu epo magumulo piyate nanitabokobi midi gabodo dowapata:lamena, ibi atumu A:ibalayamakono walone gudinomola. Ebema: naimano Yu epo namutupiala:, aimano ewono nabiwi A:ibalayamate tama itamida pukala lawea: tetelo nanitabokobi midi magumulo keba kunu kepata:namile, modobola ale uwomua: tetelo atumu eba kunu ba:kowapata:lamenama:.

*Godote Epatamo Wadewade Tanalo Ikalaema: Nanitabolo Degiya, Iba:te  
Nanitabokobi Midi Tanalodo Kuwatema:na:*

<sup>13</sup> Ebene iyalo tetenomolo Godote A:ibalayamako ega:walo ebenu walone gudi nanitabolo ma kunu analiya, me opo kawonomo ibinoma: beda:namene. Mabu keleka: ebete ma kunu degiya? A:ibalayamate ebenu Totomu Tabamo da:tuduwatanami ebe mabuma:la:ka:? Ao, ebete A:ibalayamakono nanitabokobi midi tanalodo ebe tuputupudawama: deka:miya, ebe mabuma: ebe ega:walo ebenu walone gudi kowalubilinama: ebe tabo iyatiya. <sup>14</sup> Numa:la:, Godote epatamo ikalaema: nanitabolo degiya, iba:te ebenu Totomu Tabamo eba tudila:onalalo ebe wadewade tanalo ibi a:ka:tuwa: ibino elawamo duwatema:na:, ebe tetelo iba:te kegelama:na: nanitabokobi midi tanalo kawo tanaloo:, iyo, iba:te daedale woki ma kunu kemalagidiloma:na:, aimano elawo modobola wiyasiya Godote a walubima: dopamo degiya ebe tabono elawote nanitabolo kitana:. <sup>15-16</sup> Wiyasiya

nanitabola, Godokono Totomu Tabono tanalodo iba:te ebegodone wade-wade tanalo a:kuwatema:na:, kapiya tanalonomo kelaema:na:, ebe tanalo ebe ibino kuba osiyodilole wiya lawe tanalola.

Ebe mabuma: Godote ebene Totomu Tabo iyabaiamo eba alomolo gabo idi osiyodiliya epate ebene wadewade tanalo kuwatema:, mabu Totomu Tabo pola:na: tetelo epono tudila:oa: tanaloma: kuba wiya lawe tanalote a:kitanamene. Numa:la:, Godote atamo dosiyodiliya, ebe gabo ebe nanitabokobi midi gabola, iyo, ebe nilakapo gabodo a A:ibalayamakono walone gudi bilibilinomate Godogodone wadewade tanalo buwatanakoma:. Ebema: nanitabola, piyate A:ibalayamako eba waloma:tanalo nanitabokobi midi tanalodo Godokono Totomu Tabamo da:tudila:ona, A:ibalayamako ebe epo bilibilinomono ewono nabiwila. <sup>17</sup> Iyo, Godote ebene Bukalo A:ibalayamatamo ma kunu giya, “Nale a:ma: epono taneba bilibilinomono ewonoma: a:midimata,” ebema: A:ibalayamate poko nanitabokobi da:midinami, ebe Kawodawano umi magumulo ebe a nanitabokobi midipino ewono nabiwima: eda:na.

Numa:la:, ebe Kawodawa Godoko kapiyagodolo elawo bitana a:elao epo igilamo kowadipalatelema:, iyo, ebe kapiya modobola ebene ubilo iyaiya tanalo bilibilinomo ebene tabo kapiyanomamo osiyodilolema:, inamabu ida:moa:. <sup>18</sup> Ebema: Godote A:ibalayamatamo ikaema: degiya, ebete ebe gudu laema: gabo umia:no wiyasiya Godoko nanitabokobi ebo midiya. Iyo, ebete nanitabo tanalo laema: tete geyageyalo olowiolo dokolinami, ebe gabodo ebe epo taneba bilibilinomono ewonoma: ediya, mabu Godote ebetamo dopamo nanitabolo egiya, “A:imano walonepiate bilibilinomoma: keda:oma:na:.” <sup>19</sup> Ebene A:ibalayamate 100 ulama tetema: eba eda:nalo, ebene ape dumiya ebe a:e tatalila, wiyasiya ebete ebe tanalo ega:walo Selakono gudiana: noma: eda: tanaloma: woki bilibilima: eda:no nanitabokobi midi magumulo kodakodalo utinami. <sup>20</sup> Iyo, Godote ebetamo ikaema: nanitabolo degiya, ebete ebe tanalo nanitabokobi midi gabone kelegatepanakia:, ebema: ebete nanitabo tanalo lawea:no ebene tepo magumuno woki eba kodakodaiminalo Godoko ebo moinaki. <sup>21</sup> Ebete ebene tepo magumulo iyatawanomo niyatawanami, Godote kebe tanalo osiyodiloma: nanitabolo degiya ebegodolo elawo bitana ebe tanalo kosiyodiloma:. <sup>22</sup> Iyo, me mabuma: Godote A:ibalayamakono nanitabokobi midi tanalodo ebe tuputupudawama: ebema: ka:miya.

<sup>23</sup> Wiyasiya kawo tanalo idi ma kunula. A:ibalayamakono tuputupudawama: eda: tanalo Godokono Bukalo ditana, ebe tabote ebe kapiyano tanaloma: kegena:, <sup>24</sup> ao, ebe tabote aimano tanaloma: atumu na:kegena, mabu kebe dawate aimano Kawodawa Ya:suko a:e magumune dadipatiya, a piyate ebe nanitabokobi da:midinama: ebete ebe tanalodo a atumu ebene tuputupupima: keka:mina. <sup>25</sup> Ebema: kalakala kawonomola, mabu Godote aimano kuba osiyodilole tanaloma: Ya:suko ebe anakapumpiatamo ikalamiya, wiyasiya ebete daiya Godote ebe a:e magumune walo akadipatiya, ebete ebe gabodo a ebene tuputupupima: keka:a:minama:.

## 5

*Aimano Kuba Osiyodilole Mabuma: Godogodolo Dopamo Ditanami, Ebete Ebe Dowa Tanalo Kelisokono Kalima Ka:ka:liya Tanalodo Da:dodomatiya*

<sup>1</sup> Nanitabola, aimano nanitabokobi midi tanalodo Godote a ebene tuputupupima: a:midiya, ebema: aimano Kawodawa Ya:su Kelisote a

mabuma: dosiyodiliya, ebe woko magumudo ale Godago gelebadi magumulo bilukulionama:.<sup>2</sup> Iyo, Kelisote aimano nanitabokobi midi tanalodo a Godoko niyakabamo emagaeiya ale ebenu nilakapo magumulo kilukulinama: . Ebema: kalakala beda: kawonomola:ka:, mabu a Godokono wade wiya laema: olowiolo eba makopelenalo, a iyatawala walone ale ebenu kawo alonomo magumulo nanitabolo bilukulinama: .

<sup>3</sup> Ega:walo ale kebe temeteme magumulo kilukulinama: ebe temeteme magumulo atumu a na:kekalakalaonama:, mabu a iyatawala aimano temeteme magumune aimano nanitabokobi midi tanalono kodakodalo lamota:ona tanalote kemaigamene. <sup>4</sup> Ebene aimano kodakodalo lamota:ona tanalone aimano tepo magumulo wadenomamo apepeo tanalote kemaigamene. Ebene aimano tepo magumuno apepeo tanalone Godokono wade wiya laema: olowiolo makopele tanalote kemaigamene. <sup>5</sup> Nanitabola, a magumulo kebe lumagite ebako olowiolo makopele magumulo dokolina, ebete walone wade tanalonomo Godogodone lawea:noma: a:keda:mene, mabu Godote wade osiyodilo tanalo iyalo ma kunu awokalimiya, ebete ebenu Uliyana atamo gito ikaeamiya, ebenu ebe Uliyanate pete ebenu nilakapo kimalagidilo tanalo aimano tepo magumamo kawonomamo apadipaniya.

<sup>6</sup> Ebema: me tanalo idi numa:la:. A a:ka:tuwa: a walubima: modoboa:noma: eba eda:onalo, Godote ebe tanalo umiamete wade tetenomoma: giya, a piyate ebenu ubi tanalamo tudila:oa:pima: deda:onama: Kelisote a mabuma: ka:ema: .<sup>7</sup> Nanitabola, me opo epo magumulo lumagi idite lumagi idino igilo ka:mula:ema: da:emene, ebako tanalote kapiyakapiya tetenomolo maimionaka. Iyo, lumagi idite ebenu tamedawano tuputupu okoli tanalonomo eba malagidilolo, diyala, ebete ebenu igilo mula:ema: da:ba:emene. <sup>8</sup> Wiyasiya Godote ebenu nilakapo atamo dawokalimiya beda: kawonomola:ka:, mabu a tuputupua:piate kuba osiyodilole magumulo eba ilukulionalo Kelisote a bilibilinomo mabuma: a:iya!

<sup>9</sup> Numa:la:, Godote Kelisokono kalima ka:ka:liya tanalodo a ebenu tuputupupima: nanitabolo a:midiya, ebema: a iyatawanomola me tanalo idi atumu nanitabonomoma: keda:mene, Godote ebenu kawo dowo tanalonomo kuba osiyodilolepiatamo dawokalimene, ebe atu tetelo ale Kelisoko magumulo igilo mula: tanalo kelaemalema:! <sup>10</sup> Iyo, a iyatawala ale dopamo Godago gowelaopima: eda:onaima:, wiyasiya ebete ebenu Guduno a:e tanalodo gabo dosiyodiloamiya, ebe tetelo ale ebenu wadewade namutupima: nanitabolo ebo eda:iyama: . Ebe mabuma: a iyatawanomola me wade tanalo idite nanitabonomolo kemaigamene, ebete ebenu Gudu Kelisokono igilo tanalodo aimano igilo ka:mula:leaemene! <sup>11</sup> Ega:walo me tanalo idila, ale Godoko nanitabokobi midi magumulo me wadewade tanalo eba iyatawaonalo, aimano kawo kalakalanomote Ya:su Kelisogodolo atumu ba:kitana, ebe aimano Kawodawala, potele ebenu woko osiyodilo magumulo a Godokono namutupima: da:midiya me ebe dawala.

### *A:da:mekono Kuba Osiyodilo Tanalo Ega:walo Kelisokono Wade Osiyodilo Tanalo*

<sup>12</sup> Ebema: A:da:mete Godokono pukala dadikamidaliya, modobola ale ebe tanalo kemalagidilomalema: . Ebe kapiya dubula, wiyasiya ebenu kuba osiyodilo gabodo a:e wiyate me opo epo bilibilinomatamo gito pemaigiya, iyo, me mabuma: epo bilibilinomate ka:elaoma:na: mabu iba:te atumu Godokono pukala epetapi a:kowakalamiya. <sup>13-14</sup> Nanitabola, Godote Mosesetamo ebenu Totomu Tabo dikameiya, ebe tetene wagilimite Kelisoko teta:mo pemaiga piyate ebe tabamo tudila:oa:noma: deda:iya,

Godote ibino kuba osiyodilole mabuma: iba:tamo a:e wiya ikalamenaki, ebete A:da:metamo ebenu tuduwata: mabuma: a:e wiya dopamo keba kunu kikamiyale eba kunu. Ega:walo Godote ibino kuba osiyodilole mabuma: tanalo idi ma kunu kosiyodilonaki, ebete ibino kuba osiyodilole tanalo bilibilinomo ebenu Wiya Ikalame Bukamo akulolelamenaki. Wiyasiya numa:la:, A:da:meko tetene wagilimite Moseseko teta:mo nemaiga, epagodolo Godokono iyaiya Totomu Tabote ka:pola:namia: mabu ebe tete geyageyanomolo ebete iba:tamo kikalamiya:. Ebe mabuma: ebe tetelo dilukulionamiya ebe epate iyatawa:noma: eba eda:onalo Godokono iyaiya pukala dowakalaminakiya, ebete iba:tamo a:e wiya kapiya ikalamenaki wiyasiya ebenu Wiya Ikalame Bukamo ebete ibino iyaiya kuba osiyodilole tanalo kakulolelamenakia:.

Nanitabola, dopo dubu A:da:mekono okoli tanalo atamo ebe ulima: eda:na, walone dapawokaliya ebe Kawodawa Kelisokono tanalo ale kiyatawaoma:. <sup>15</sup> Wiyasiya A:da:mete atamo dikaeamiya ega:walo Godote Kelisodo atamo da:kikaeamiya, ebe netewa tanalo iyaiya ba:pola:na. Nanitabola, kapiya dubuno kuba osiyodilo magumudo me opo epo bilibilinomate a:e wiya elawiya, wiyasiya me tanalo idi atumu nanitabonomoma: keda:na, epo bilibilinomate kapiya dubu idi Ya:su Kelisokono nilakapo tanalodo Godokono igilo elawiya, iyo, Godote ebenu nilakapo kawonomo iba:tamo ma kunu awokalimiya! <sup>16</sup> Numa:la:, dopo dubute Godokono pukala dadikamidaliya, Godote ebe kuba osiyodilodawama: ka:mite a:e wiya ebo ikamiya. Wiyasiya me tetelo iya tanalote emaiyiya. A A:da:mekono walogabo epate tete epetapi bilibilinomolo Godokono pukala dowakalaminakima:, Godote atamo a:e wiya ikaeamea:no ebenu nilakapolo a kuba osiyodilolea:pima: ka:mite nanitabo igilo atamo gito ikaeamiya. <sup>17</sup> Iyo, nanitabola, kapiya dubute kuba dosiyodiliya ebema: a:e tanalote me opo epono watodawama: ediya, wiyasiya me tanalo idi atumu nanitabonomoma: keda:na, dubu kapiya idi Ya:su Kelisokono wade osiyodilo tanalodo epo epetapiate nanitabo igilo magumulo bilukulionama:na:. Iyo, piyate Godogodone ebenu kawo nilakaponomo me opolo delaema:na:, iba:te ebenu tuputupupima: eba eda:onalo kuba osiyodilo tanalono wato kikopu ebo kelaema:na:.

<sup>18</sup> Ebema: kapiya dubuno kuba osiyodilo tanalodo a:e wiyate epo bilibilinomatamo keba kunu ka:piyale, eba kunu kapiya dubu idino wade osiyodilo tanalonomodo nanitabo igilo tanalote iba:tamo piya, iyo, Godote ibi tuputupupima: eba ka:la:minalo ebenu igilo iba:tamo gito ikalamenana. <sup>19</sup> Ebema: numa:la:, kapiya dubute Godokono tabamo tuduwata: tanalodo epo bilibilinomate Godokono pukala epetapi wakalamipima: atumu a:keda:iya. Wiyasiya kapiya dubu idite Godotamo nanitabonomolo da:tuduwatiya, ebe dubuno wade osiyodilo tanalodo Godote gabo osiyodiliya epo epetapi bilibilinomo uwatete ebenu tuputupupima: ka:midilima:.

<sup>20</sup> Ebema: mabu keleka: Godote dopamo ebenu Totomu Tabo epatamo dikalamiya? Nanitabola, ebete me tanalo osiyodiliya mabu ebete ubi iyatiya iba:te ebenu iyaiya pukala eba wakalaminalo ibino modoboa: tanalo ebo kiyatawaoma:. Wiyasiya kalakala kawonomola, kebe tetelo me opo epono kuba osiyodilole tanalate bilibilinomoma: deda:iya, ebe atu tetenomolo Godokono nilakapo tanalote kawonomamo kemaigiya ebe kuba osiyodilole tanalo nanitabonomolo kegebolema:. <sup>21</sup> Iyo, ebete ebenu ubi ma kunu iyatiya, kuba osiyodilole tanalate dopamo a:e wiya magumudo aimano watodawama: keba kunu kediyaale, eba kunu me tetelo

Godokono nilakapo tanalote a tuputupupima: midi tanalodo aimano watodawama: eba eda:nalo, ale aimano Kawodawa Ya:su Kelisodo uwomua: igilo nanitabonomolo kelaema:.

## 6

### *Lumagite Kelisoko Magumulo Kokolinama: Ebete Kuba Osiyodilole Tanaloma: Na:emene*

<sup>1</sup> Ebema: diyala, la: magumulo idite tabo ma kunu da:behemene, “Godote aimano kuba osiyodilole tanalo ebenu nilakapolo degeboleamena, ebema: ale iyaiya kuba dosiyodilolenakoma:, kuba:, mabu ebe gabodo ebete ebenu kawo nilakaponomo atamo kawokalimene.”

<sup>2</sup> Eiye! Mako woki ebe daedale wokinomola! A nanitabokobi midipima: neda:iyataleka: kuba osiyodilole tanalate agodolo ba:elaiyana:, ebema: ale kuba osiyodilole magumulo walo beda:ma: na:kilukulinama:? <sup>3</sup> La: me tanalo iyatawanomolata, epetapiate a obamo dowaduba:midaoiya, iba:te ebe tanalo Ya:su Kelisoko magumulo osiyodiliya, ale ebenu a:e tanalo magumamo eba:go kapimiya ka:nopila:oma:. <sup>4</sup> Iyo, aimano obamo waduba:midaoe tanalodo ale eba:go kapimiya a:elaote, ebenu aimano a:elao apa:te bobo magumamo atumu eba:go kapimiya gito nopila:iya. Ebe mabuma: Nabiwi Godote ebenu kawo alonomono elawamo Kelisoko a:e magumune keba kunu kadipatiyale, ebete eba kunu a atumu owadi-paeateiya ale ebenu oli igilago kilukulinama:.

<sup>5</sup> Ebema: nanitabola, ale Kelisokono a:e tanalo magumamo eba:go kapimiya da:nopila:iyama:, ebe mabuma: ale atumu ebenu oli igilo tanalomo eba:go kapimiya ka:kemaimiomalema:. <sup>6</sup> Iyo, a iyatawala, Kelisote kewa olotolowalo da:iya, ebe tetelo Godote aimano tagala ilukuli tanalo eba:go kapimiya kewa olotolowamo a:tupuguilameleamiya, ebete ebe gabodo tagala ilukuli tanalono elawo eba anakapumilo ale kuba osiyodilole tanalono wiya: wokopima: walo a:keda:onama:. <sup>7</sup> Nanitabola, kebe tetelo lumagite ebenu tagala okoli tanaloma: da:emene, ebe tetelo ebete kuba osiyodilole tanalono elawo magumune nanitabolo ka:pemaigamene.

<sup>8</sup> Ebema: ale me tanalo nanitabokobi na:midinama:, ale Kelisago nanitabolo da:elaiyama:, ebe mabuma: ale eba:go ebenu igilago atumu bilukulinama:. <sup>9</sup> Iyo, a iyatawala, Godote Kelisoko a:e magumune dadipatiya, ebema: a:e tanalono elawote ebetamo walo kitana:, ebete uwomua: tetelo walo a:ka:enamene. <sup>10</sup> Nanitabola, ebete kuba osiyodilole tanalono wato kikopu laema: kapiya tetenomolo a:iya, iyo, a:e tanalono elawote ebetamo walo a:ka:pemaiganamene, mabu me tetelo ebete Godokono tanaloma: oli igilago bokolinamene.

<sup>11</sup> Ebema: modobola la: atumu la:imano kateneno ubi tanalo kosiyodilola:wenama: a:elao epoma: eba eda:onalo, la:le wiyasiya ebe tanalo malagidilolo Kelisoko magumulo Godoko mabuma: nilukuliniyala:.

<sup>12</sup> Nanitabola, la:imano a:elao apene kateneno iyaiya ubi tanalate emaimionaka, wiyasiya ebe kuba ubi tanalate la:imano watodawama: akoeda:la:, la:le ebe kuba osiyodilole tanalomo tudila:okapoma:. <sup>13</sup> Iyo, la:imano apeno tanalo bilibilinomo magumulo da:peso tanalonomamo kateneno kuba ubi tanalo ida:mo akotudila:oala:. La: wiyasiya la:imano ape kawokawonomo Godotamo ikameonomo nikameonala: ebenu tuputupu tanalo kapiya kosiyodilola:wenama:, mabu numa:la:, la:le wade tanalo idi kapiya kosiyodilaema: la: dopamo a:elaopimu eba ilukulinalo, Godote la: ebenu igilamo ebo wadipalatelyata. <sup>14</sup> Ebema: kuba osiyodilole tanalote la:imano watodawama: walo a:keda:mene, mabu me tetelo



la:le Godokono nilakapo magumudo ebeno elawamo ilukulinamata, iyo, kalakala kawonomola, la: a:ka:tuwa: la:imano elawamo ebeno Totomu Tabamo tudila:oa:noma: dowagela:wenaima, ebe tanalote la: magumulo iyalo olopoligiya.

*Nanitabokobi Midipiate Godokono Tuputupu Okoli Tanalono Wiya: Wokopima: Neda:oma:na:*

<sup>15</sup> Ebema: diyala, la: magumulo idite tabo ma kunu da:begemene, “Modobola ale aimano ubilo iyaiya kuba tanalo gito bosiyodilolenakoma:, mabu ale Godokono nilakapo magumulo bilukulinama:, ebeno Totomu Tabamo tudila:o tanalodoa:. Ebe mabuma: ale ebeno pukala dowakalaima:, kuba wiya tanalote ebegodone atamo a:ka:pemene.”

Eiye! Mako woki ebe daedale wokinomola! <sup>16</sup> La: iyatawalata, kebe tetelo lumagi idite ebeno ape ega:walo igilo kawo lumagi iditamo ikameonomo dikameomene, ebe tetene wagilimite ebete ebe watodawa kapiyatamo tuduwatalo ebeno wiya: woko bosiyodilonakomene. Ebema: la: eba kunula. Kebe tetelo la:le la:imano igilo kawonomo kuba osiyodilole tanalamo dikameaema, kuba osiyodilole tanalote la:imano watodawama: eba eda:nalo, la:le a:eamo gito ka:nemaimiomamota. Wiyasiya la:le la:imano igilo kawonomo Godotamo tudila:o tanalamo dikameaema, ebete la:imano watodawama: eda:te la: tuputupupima: ka:midilima:ta. <sup>17-18</sup> Ebema: modobola ale Godotamo kalakala tabo kadipatiye! Nanitabola, dopamo la:le kuba osiyodilole tanalono wiya: wokopima: eda:onaimata, wiyasiya la: ebe mibomibo ilukuli magumune pemaima:wete Godokono tutupima: eda:iyamata. Iyo, kebe tetelo epetapiate ebeno oli okoli tanaloma: la: diyatulametiyala, la:le la:imano tepo magumuno woki kawonomamo ebe iyaiya tanalamo tudila:wete tuputupu okoli tanalono wiya: woko ebo wagilimiyamata.

<sup>19</sup> Ebema: nale me tanalo idima: la: me opo epono wokino tanalamo analemata, mabu la:le la:imano tepo magumulo elawoa:dopoma: eda:onamata. Dopamo tetelo la:imano ape kawonomo la:le kateneno kuba daleyawokino tanalamo ega:walo kawokawo kuba osiyodilole tanalamo ikameonomo ikameiyamata, iyo, la: kuba osiyodilole tanalono wiya: wokopima: eda:onaimata. Ebema: me tetelo modobola la: eba kunu tuputupu okoli tanalono wiya: wokopima: eba eda:onalolo, la:imano ape kawonomo Godokono wade-talena woko osiyodilo tanalamo nikameonala:.

<sup>20</sup> Numa:la:, kebe tetelo la:le kuba osiyodilole tanalono wiya: wokopima: deda:wenaima, ebe tetelo Godokono tuputupu okoli tanalote la:imano watodawama: keda:namia:. <sup>21</sup> Ebema: me tetelo la:le kebe tanalo eba osiyodilolelele ilipoma: degelawenama, dopamo la:le ebe kuba tanalo eba osiyodilolelele beda: wade tanalo kelawa:wiyama? Eiye! La:le wade tanalo idi kelawa:wiyamata, mabu kuba osiyodilole tanalono a:e wiya kapiyate maigana!

<sup>22</sup> Wiyasiya kalakala kawonomola, Godote la: kuba osiyodilole tanalono mibomibo magumune wagailitate, ebene me tetelo la: tutu okoli magumulo ebeno wiya: wokopima: eda:onamata. Ebe mabuma: la:imano oli okoli tanalono wade nolo da:ima:te eba pemaimionalo, Godote la: ebeno talena wokopima: ebo keka:la:ima:ta, ebene la:le ebeno uwomua: igilo nanitabolo kelaemamota. <sup>23</sup> Nanitabola, kuba osiyodilole tanalono wiya ebe a:ela, wiyasiya kalakala kawonomola, Godote aimano Kawodawa Ya:su Kelisoko magumulo uwomua: igilo nilakapolo atamo gito ikaeamena.

## 7

*Dubu Ega:walo Kamiyale Ibino Kapiyama: Eda: Tanalono Totomu Tabo*

<sup>1</sup> Naimano nanitabokobi midipi ekakiala:, la: me opo epono iyaiya totomu tabo diyatawawenama, ebe mabuma: la: me tanalo iyatawanomolata, dubu idite me opolo eba okolinalo ebenu opono gabamaniate kebe totomu tabo kalomone ebete ebe tabono elawo magumulo bokolinamene. Ebete wiyasiya da:emene ebe tetelo ebe iyaiya totomu tabono elawote ebegodone kolopoligomene. <sup>2</sup> Ebema: modobola la: me uli tabo numa:la:. Kamiyale idino awite eba okolinalo, ebete dubu ida:go toma: me opono talena kawonomote itana. Wiyasiya ebenu awite da:emene, ebe tetelo ebenu kapiyama: eda: tanalono totomute olopoligote, talenate a:kitanamene ebete walo dubu ida:go kapiyama: ka:keda:ma:. <sup>3</sup> Iyo, ebe kamiyaleno awite eba okolinalo ebete dubu iditamo da:tomene, gabamanino tabo anagiyamidadawate ebe dubu pilolo lawe kamiyalema: kegemene, wiyasiya kebe tetelo ebenu awite da:emene, ebe tetelo ebete dubu idi delaemene ebe tanalo pilo tanaloma: a:keda:mene.

<sup>4</sup> Ebema: naimano ekakiala:, me uli tabono magumute la:tamo ma kunu itana. Godote Mosesedo epatamo dikalamiya, dopamo la:le ebe Totomu Tabago kapiyama: eda:onaimata. Wiyasiya la:le nanitabokobi midit tanalodo Totomu Tabono elawo tanaloma: a:elaopima: eda:iyamata, ebe mabuma: la: me tetelo Kelisago kapiyama: eba eda:nalo la: ebenu ape magumulo bilukulinamata. Iyo, Godote a:e magumune kebe dawa kadipatiyale, la: ebe Kawodawano oli kamiyalema: eda:onamata, Godokono wadewade da:ima:te la:godolo ka:nolonakoma:. <sup>5</sup> Nanitabola, ale dopamo Totomu Tabono elawo magumulo dilukulinaima:, ebe tetelo ale aimano kateneno ubi tanalamo gito tudila:onaima:. Iyo, iyaiya Totomu Tabote aimano kuba osiyodilole tanalo nanitabolo kodiyoiliya:, wiyasiya ebe Totomu olowio tanalodo aimano kateneno ubi tanalate elawo walo a:kelawiya kubakuba tanalo epetapi kosiyodilolenama:. Ebema: eba kunu a:e tanalono kuba da:ima:te agodolo ebo nolonakiya, aimano kuba ubi tanalate aimano ape magumulo woko kawonomamo kosiyodilonama:. <sup>6</sup> Iyo, dopamo ale eba kunu Totomu Tabono tanalodo aimano kuba osiyodilole tanalono wiya: wokopima: eda:onaima:. Ale wiyasiya Kelisoko nanitabokobi midit tanalodo Totomu Tabono elawo tanaloma: da:elaiyama:, ebema: ale ibino elawo magumune maimiote ebe elawote atamo walo a:kitanamene, gabamanino totomuno elawote a:e lumagigodone keba kunu kolopoligonakole eba kunu. Ebema: Mosesete Godokono Bukamo dakuloliya, ale tagala ilukuli tetelo ebe Totomu Tabono elawo magumulo eba ilukulinalo, ale aimano elawamo Godotamo kebe woko kosiyodilonaima: ebe woko magumulo a ka:modobonamia:. Wiyasiya kalakala kawonomola, me tetelo ale ebenu Uliyanano oli okoli tanalodo ebenu elawamo modobo woko nanitabolo nosiyodilonama:.

*Godokono Totomu Tabo Ega:walo Lumagino Kuba Osiyodilole Tanalo*

<sup>7</sup> Ebema: diyala, la: magumulo idite tabo ma kunu da:behemene, “Godokono wadewade Totomu Tabote epo kuba osiyodilolepima: midilina!”

Eiye, mako woki ebe daedale wokila! Godokono Totomu Tabote na kuba osiyodilodawama: ka:midiniya:, ao, wiyasiya ebete kebe osiyodilole tanalo kubama: kegenale, ebenu Totomu Tabote ebe iyaiya tanalo na iyatunamiya. Ebema: Totomu Tabote na ma kunu dananiya, “A:ma:le lumagi idino inamabu uwatema: ubi akoiyata:la:,” na ebo iyatawiyamo Godote ebe tanalo kubama: gena. <sup>8</sup> Ebene ebe kuba osiyodilo tanalote

wade tete dumiya, ebete Godokono Totomu Tabono tanalodo na magumulo woko osiyodilo ebo wagilimiya nale iyaiya epono inamabu uwatema: ubi kiyatinakoma:. Ebema: numa:la:, kebe tetelo lumagi idite iyaiya Totomu Tabo nanitabolo iyatawa:no, ebe tetelo kuba osiyodilo tanalono elawote ebegodolo nanitabolo a:kitanamene.

<sup>9</sup> Ebe mabuma: naimano tanalo ma kunula. Dopamo tetelo nale Totomu Tabono iyaiya tanalo iyatawa:noma: eba eda:nalo, na modobolo okolinaimo, wiyasiya ebe Totomu Tabote natamo da:pemaimiya, ebe atu tetenomolo na magumulo kuba osiyodilo wokite kawoma: dediya, <sup>10</sup> na ebo iyatawiyamo nale Godoko kekalakalaima: iyalo a:iyamo, iyo, elawo nagodolo kitana: ebene ubi tanalamo ka:tuduwatama:. Ebema: nanitabola, Godote ebene Totomu Tabo natamo ikanamiya nale nanitabolo kigilonama:, wiyasiya na niyala mabu ebe Totomu Tabodo a:e tanalote natamo gito piya, <sup>11</sup> iyo, kuba osiyodilo tanalote Totomu Tabodo wade tete dumiya, na a:da: eba masiginilo nanitabo igilo nagodone pilolo ebo lawiya.

<sup>12</sup> Ebema: Godokono Totomu Tabono iyaiya tanalo bilibilinomate tale-nanomoma: ega:walo tuputupunomoma: ega:walo wadewadenonomoma: deda:ona nale ebe tanalo eba iyatawanalo, <sup>13</sup> nale walo ma kunu a:ka:kiyawaonamo, naimano tepo magumuno a:e tanalote ebe Totomu Tabono tanalone a:pemaigiya. Ao, ebako woki ebe daedale wokila! Nanitabola, kuba osiyodilo tanalote Godokono wadewade Totomu Tabo magumudo a:e wiya natamo gito ikanamiya, ebema: kuba osiyodilo tanalono elawote Totomu Tabono tanalodo na magumulo unamo odolotalo diyatawiyamo, ebene abale nibonomote demaigiya nale ebo niyabiyamo.

*Kuba Osiyodilo Tanalote Wade Osiyodilo Tanalago Lumagino Tepo Magumulo Da:gowelana*

<sup>14</sup> A me tanalo iyatawala, Godokono Totomu Tabote ebene iyaiya ubi tanalo atamo nawokalilamena, wiyasiya na niyala, na me opo lumagima: eba eda:nalo a:e tanalote na magumulo elawonomoma: eda:na, ebema: na kuba osiyodilo tanalono wiya: wokodawama: eda:namo. <sup>15</sup> Mabu keleka: nale naimano apa:mo kuba tanalo dosiyodilolenamo? Eiye! Naimano osiyodilole tanalono mabu na nanitabolo iyatawa:, iyo, naimano tepo magumulo na ubia:nola kuba tanalo idi osiyodiloma:, wiyasiya nale kebe tanalo kuba niboma: degenamo ebako tanalo walo gito kosiyodilolenakomo.

<sup>16</sup> Ebema: numa:la:, kebe tetelo nale apa:mo kuba tanalo idi eba osiyodilotalo, ebene naimano tepo magumulo ebe tanalo osiyodilo ubia:noma: deda:mo, ebe tanalote nawokalimita nale naimano tepo magumulo Godokono Totomu Tabo wadenoma: gemo. <sup>17</sup> Ebe mabuma: kuba osiyodilo tanalono elawote naimano tepo magumuno wokine nanitabolo kemaigana:, ao, kuba osiyodilo tanalote naimano katene magumulo eba okolinalo, ebene elawote natamo ebana pemaigana. <sup>18</sup> Iyo, na iyatawala, wade osiyodilo tanalo kapiya idite naimano katene magumulo nanitabolo kitana:, ebema: Godote naimano tepo magumamo wade ubi tanalo diyatiya, ebe tanalote eba itanalo nagodolo elawote kitana: ebe tanalo kosiyodiloma:!  
<sup>19</sup> Eiye! Naimano tepo magumulo kebe wade osiyodilo ubi tanalote kitanale nale kosiyodilonakoa:, ega:walo nagodolo kebe kuba osiyodilooa: ubi tanalote kitanale, nale ebe kuba gito osiyodilonakomo. <sup>20</sup> Ebema: nale naimano tepo magumuno ubia: tanalo naimano kateneno ubilo gito dosiyodilonakomo, ebe tanalote naimano tanalo ma kunu awokalimina, ebe osiyodilo tanalono elawote naimano tepo magumune kemaigana:. Ao,

eba kunua; wiyasiya kuba osiyodilo tanalote naimano kateneno ubilo eba okolinalo, ebena elawote natamo ebana pemaigana.

<sup>21</sup> Me mabuma: na ma kunu iyatawanamo, nale naimano tepo magumulo wade tanalo idi osiyodiloma: ubi diyatinakomo, wiyasiya kuba osiyodilo tanalote naimano kateneno ubi tanalone atumu eba pemaiganalo na ebetamo gito tuduwatanakomo. <sup>22</sup> Nanitabola, naimano tepo magumulo nale Godokono Totomu Tabamo ka:tuduwatama: nanitabolo nekalakalanamo, <sup>23</sup> wiyasiya naimano katene magumulo ditana, ebe tanalote naimano tepo magumuno wade wokiago na:gowelana. Iyo, ebe elawo tanalote na nematuonamonena, nale kuba osiyodilole tanalo magumune alaula:kapoma:

<sup>24</sup> Eiyeye, me naimano mibo tanalo beda: kawonomola:ka:! Naimano katene magumulo ditana ebe elawo tanalote na a:e tanalamo nanitabonomolo magatanena, ebema: naimano igilo potele na:ka:mula:naemene? <sup>25</sup> Modobola a kalakala kawonomo Godotamo kadipatiye, mabu ebe kapiya Igilo Mula:dawama: eba eda:nalo aimano Kawodawa Ya:su Kelisodo aimano igilo ka:mula:leaemene!

Ebema: me tanalo kawo iyatulame tanalola, nale naimano tepo magumuno elawamo Godokono Totomu Tabamo eba tuduwatanalo, wiyasiya nale naimano kateneno ubi tanalono elawamo kuba osiyodilole tanalono totomuamo gito tuduwatanakomo.

## 8

### *Kelisokono Uliyanano Elawamo Ilukuli Tanalo*

<sup>1</sup> Ebe mabuma: piyate Ya:su Kelisoko magumulo tuputupupima: deda:ona, idawate ibi kubakubapima: ka:la:ima: modoboa:. <sup>2</sup> Numa:la:, dopamo tetelo Godote Mosesedo atamo dikaeamiya ebe Totomu Tabono tanalate aimano watodawama: deda:nami, ale ebe pukala eba wakalamilo a:e wiya ebema: iyatawaonakima:, wiyasiya Ya:su Kelisoko magumulo ebena Uliyanate naimano watodawama: dediya, ebe tetelo ebete na tagala watodawano elawo magumune wagalinite igilo natamo ebo ikanamiya. <sup>3</sup> Nanitabola, Mosesekono Totomu Tabono tanalate atamo elawo kikaemiya: ale ebena pukalamo ka:tudila:onama:, mabu aimano kateneno ubi tanalate iyaiya kuba tanalo kosiyodilolema: a magumulo elawoelawonomoma: eda:onamiya. Wiyasiya kalakala kawonomola, Godote aimano modoboa: tanalo umite a ma kunu walubiya, ebete ebena Gudu lumagino apa:mopalibiya me opamo, ebema: a epate aimano kateneno ubilo kebe kuba tanalo kosiyodilolenama:, ebete ebe tanalono a:e wiya aimano tanaloma: a:pelaweamiya. Iyo, ebete me opolo atu kateneno iyaiya ubi tanalo eba piyatawalo, wiyasiya ebe tanalamo tuduwata:no kuba osiyodilole tanalono elawo gito panakapumiya. <sup>4</sup> Ebema: nanitabola, Godote me gabodo elawo atamo ikaemiya ale tuputupulo eba ilukulinalo ebena Totomu Tabo bilibilinomamo ka:tudila:onama:. Iyo, me ebe mabula ale me tetelo aimano kateneno kuba ubi tanalamo tudila:oa:no ebena Uliyanano elawamo bilukulinama:

<sup>5</sup> Nanitabola, piyate ibino kateneno kuba ubi tanalamo da:tudila:ona ibino kateneno ubi tanalate ibino watodawama: eda:na, wiyasiya piyate Godokono Uliyanano ubi tanalamo da:tudila:ona, ebete ibino watodawama: eba eda:nalo ebena wade tanalo kosiyodilolema: iba:tamowadewade woki kawiya alomolamena. <sup>6</sup> Ega:walo kebe lumagite ebena kateneno kuba ubi tanalo ebena watodawama: da:midina, ebetamo a:e wiyate ka:pemene, wiyasiya kebe lumagite Godokono Uliyanano ebena watodawama: da:midina, ebete nanitabo igilo ega:walo milo kuwatemene.

<sup>7</sup> Ebema: potele ebenu kateneno kuba ubi tanalamo da:tuduwatanako, ebete Godago goweladawama: eda:na, mabu ebe ubia:nola Godokono Totomu Tabamo tuduwatama: ega:walo ebegodolo elawo kitana: ebe tanalo kosiyodiloma:. <sup>8</sup> Nanitabola, kebe lumagite ebenu kateneno ubi tanalamo da:tuduwatanako, ebete Godoko kalakalakobi midima: modoboa:!

<sup>9</sup> Ebe mabuma: Godokono Uliyanate la: magumulo nanitabolo dokolina, la: la:imano kateneno ubi tanalamo a:ka:tudila:wenama, wiyasiya ebete la: keba kunu kanaletana la: eba kunu bilukulinamata. Iyo, nanitabola, Kelisokono Uliyanate kebe lumagigodolo okolina:no, ebe lumagi ebe Kelisokonoa:!  
<sup>10</sup> Numa:la:, la: niyaniyalata mabu la: ega:walo me opo epo epetapi bilibilinomo kuba osiyodilolepima: eba eda:onalo la:imano apete ebema: nanitabonomolo ka:elaoma:na:. Wiyasiya kalakala kawonomola, Kelisote la: magumulo nanitabolo dokolina, ebenu Uliyanate la:tamo nanitabo igilo kikalaema:ta mabu Godote la: ebenu tuputupupima: iyalo a:midiliyata. <sup>11</sup> Iyo, kebe dawate Ya:su Kelisoko a:e magumune igilamo dadi-patiya, ebenu Uliyanate la: magumulo nanitabolo dokolina, ebete atumu la:imano a:elao ape igilokobi ka:midilimene mabu ebenu Igilo Uliyanate la: magumulo wade woko bosiyodilona. <sup>12-13</sup> Ebema: naimano ekakiala:, modobola ale Godokono Uliyanano ubi tanalamo ba:tudila:onakoma:, aimano kateneno ubi tanalamoa:, mabu numa:la:, la:le me tetelo ebenu ubi tanalamo tudila:wete kateneno kuba osiyodilole tanalo nanitabolo danakapulama:wenakoma la:le uwomua: igilo ebo kelaemamota, wiyasiya la: la:imano kateneno ubi tanalamo da:tudila:wenakoma a:e wiyate la:tamo ka:pemene.

<sup>14</sup> Nanitabola, Godokono Uliyanate kebe epo demagatalena, ibi Godokono gudila, <sup>15</sup> ebema: Godote la:tamo dikalametiyala ebe Talena Uliyanado la:le tole tanalo kelawa:wena:. Iyo, wiya: wokopiate woko eba osiyodilonalo ibino woko namutudawano dowo tanalamo keba kunu ka:toletoleone la: eba kunu kowagela:wena:, mabu Uliyanate la: ebenu nani gudima: a:midiliyata, wiya: wokopima: ka:midilitiya:. Ebe mabuma: ale ebenu elawamo aimano Nabiwi Godoko Abama: ka:milo towetowe tabo ebetamo gelanakoma:, <sup>16</sup> iyo, nanitabola, ale towetowe tabo gela tetelo ebenu Uliyana ega:walo aimano uliyana, iba:te woki kapiyama: eda:ote a ebenu gudinomoma: ebo ka:minaka. <sup>17</sup> Ebema: la: me tanalo idi na:kuma:la:, ale Godokono gudima: nanitabolo deda:onama:, ebe mabuma: walone aimano Nabiwigodone ebenu wadewade tanalo kawonomamo ka:nuwatemalema:, Kelisote dopamo keba kunu ka:nuwatiyale eba kunu. Iyo, ale me opolo Kelisokono tanaloma: temeteme tanalo eba:go duwatanakoma:, ebe mabuma: ale walone tetelo eba:go ebenu kawo alonomo magumulo ka:nepola:namalema:.

### *Godokono Guda:te Ebenu Kawo Alonomo Magumulo Bilukulinama:na:*

<sup>18</sup> Wiyasiya ale me tetelo kebe temeteme magumulo kilukulinama: ebe tanalo nale negemo kawoa:, mabu Godote walone tetelo kebe kawo alonomo a da:pukuaemene nale ebe wade tanalo kawonomamo malagidilonamo. <sup>19</sup> Numa:la:, Godote me opo wagilimi mabu tetelo dosiyodiloliya, ebe iyaiya inamabu bilibilinomate kapimiya ubi kawonomamo alomona Godokono guda:te ebegodone wade wiya awokala eba uwatelo ebo kuima:. <sup>20-21</sup> Nanitabola, ebe inamabu ubia:nola me opolo temetema:go pola:nama:, wiyasiya ibino tanaloma: Godote ebenu ubi iyalo ma kunu iyatiya, iba:te Saitanakono a:e temeteme magumulo tete geyageyanomolo ilukulinate



Godokono gudino wade alono pukuilame teta:mo ibino temeteme magumune ka:nemaimioma:. Iyo, kebe tetelo ebene guda:te ebegodone wade wiya duwatema:na:, me opono inamabu bilibilinomate ebe atu tetenomolo ibino kawokawo mibomibonomo magumune maimiote ibino nanitabo kalakala atumu iba:go kapimiya ka:kuwatema:na:.

<sup>22</sup> Ebema: a iyatawanomola, me opo wagilimi mabune pete me teta:mo pemaiga, digilona ebe inamabu bilibilinomate kawokawo temetema:go imina, kamiyaletu gudu kawo temetema:go keba kunu kalaiminakole eba kunu. <sup>23</sup> Wiyasiya me opono inamabu bilibilinomo kapiyate kiimina:, ao, a piyate Godokono Uliyana delawiyama: a atumu aimano tepo magumulo kawokawo temetema:go iminama:, mabu a ubi kawonomamo niyatinama: ale aimano Nabiwigodone olioli apeno uwomua: igilo ka:nuwatema:. Nanitabola, ebete ebene Uliyana atamo dopamo dapalibiya, ebe osiyodilo tanalodo ebete walone teteno tanalo ma kunu awokalimiya, kebe tetelo ale nani gudima: eda:o tanalote dawokalamene, ebe atu tetelo ale uwomua: igilono wadewade tanalo epetapi nanitabonomolo kuwatemalema:. <sup>24-25</sup> Numa:la:, lumagite kebe wade tanalo laema: olowiolo demakopelena, ebe tanalote ebetamo nanitabolo demaigamene ebete ebe tanalo laema: olowiolo walo a:kokolinamene mabu ebete ebene ubi tanalo elawi. Wiyasiya a nanitabokobi midipino tanalo eba kunua:. Nanitabola, ale aimano wade igilo Godogodone laema: olowiolo demakopelena:, ebete ebe tanalodo aimano igilo a:mula:leamiya, wiyasiya aimano olowiolo makopele tanalote kolopoligoamena:. Iyo, ale ebe tetelo aimano wade tanalonomo nanitabolo kelawiya:, walone tetelo Godogodone ka:nelaemalema:, ebema: ale tete geyageyanomolo olowiolo eba makopele-nalo ubia:noma: a:keda:oma:.

<sup>26</sup> Ebema: numa:la:, ale ebe wade igilono tanalo bilibilinomo uwa-tea:noma: deda:onama:, Godokono Uliyanate ebe tanaloma: atumu kemalagidilona, ebema: aimano iyaiya modoboa: tanalo magumulo ebene walubi tanalo ma kunula. A ubila ale aimano tanaloma: Godotamo towetowe tabo gelama:, wiyasiya a a:ka:tuwa: gabo nanitabonomolo iyatawa:. Ebe mabuma: Uliyanate aimano modoboa: tanaloma: kawo tepo temeteme ii tanalago ebe towemenako, wiyasiya me opo epate ibino iyaiya tabamo degelana ebete ebako tabamo ka:kiyawaonakoa:, ebete ebene tabonomamo genako. <sup>27</sup> Ebema: kalakala kawonomola, mabu Godote a epono tepo magumuno woki iyatawanomola, ega:walo ebete ebene Uliyanano woki atumu iyatawala, iyo, kebe tetelo Uliyanate a ebene epono tanaloma: da:towetowenako, ebe tetelo ebete Godokono ubi tanalago a nanitabolo owadipaeatenako.

*Godote Nanitabokobi Midipi Ebene Gudima: Keda:onama: Keba Kunu Keka:la:miyale*

<sup>28</sup> Ebema: a me tanalo iyatawala, piyate Godoko nilakapolo demalagidilona ega:walo ebete kebe epo keka:la:miyale ebene ubi tanalo kosiyodilolenama:, ebe epatamo kebe temeteme tanalo bilibilinomate demaimiona Godote ebe tanalo magumulo woko eba osiyodilonalo, ibino tanaloma: ebete ebe temeteme magumune wadewade tanalo bowaulate-lenakomene. <sup>29</sup> Nanitabola, opo wagilimia: tetelo Godote kebe epo ebenoma: keda:onama: iba:tamo pukala dalomolamiya, ebete ebe tanalo eba malagidilolo ebe atu epo a:kuwatiya iba:te ebene Guduno ololonomo kawokaliminama:, iyo, ebe gabodo ebene kapiya alailame magumulo Ya:sute dopodawama: eba eda:nalo ebene ekaki epetapi bilibilinomate eba:go bilukulionama:na:. <sup>30</sup> Ebema: Godote kebe epo ebene gudima:

keda:onama: ibi duwatiya, ebete ibi a:keka:la:miya. Ebene ebete kebe epo keka:la:miyale, ebete ibi ebenu tuputupupima: a:ka:midiliya. Ebene ebete kebe epo ebenu tuputupupima: ka:midiliyale, ebete ibi ebenu kawo alonomo magumamo a:kemagaeliya iba:te ebenu uwomua: pukuilame alo magumulo kilukulionama:

*Godokono Nilakapo Tanalote Ya:su Kelisoko Magumulo Ditana*

<sup>31</sup> Ebema: a me wadewade tanalo eba malagidilolelo a beda: tabo na:kegelama:? Modobola a tabo ma kunu kegelamalema:, Godote aimano apulo nanitabolo butina, ebema: ago da:gowelaona iba:te wato kikopu a:kelaema:na!<sup>32</sup> Numa:la:, Godote a mabuma: ebenu Gudunomo ka:wokolomiya:, wiyasiya ebete ebe aimano kuba osiyodilole tanalono a:e wiya laema: a bilibilinomatamo gito ikaeamiya. Iyo, ebete ebenu Gudu atamo dikaeamiya, nilakapo beda: kawonomola:ka:! Ebema: me tanalo nanitabola, ebete wadewade tanalo bilibilinomo epetapi atu nilakapo tanalodo atamo gito bikaeamenakomene.

<sup>33</sup> Ebema: Godote kebe epo ebenu eponomoma: keda:onama: duwatiya, potele na:ka:modobomene ibi kubakubapima: keka:la:ima:? Idawa puliyanomola mabu Godote ibi ebenu tuputupupima: iyalo eka:la:miya,<sup>34</sup> iyo, idawate a kubakubapima: ka:ima: modoboa: mabu Ya:su Kelisote aimano tanaloma: a:iya. Ebene Godote ebe a:e magumune igilamo dadipatiya, ebe tetelo ebete Godokono tumudi apuamo nokoliya, ebema: me tetelo kalakala beda: kawonomola:ka:, ebete aimano iyaiya modoboa: tanalo Godotamo owadipalatenako!<sup>35</sup> Ebema: Kelisokono kawo nilakaponomo magumune a iyabaiamo alomoema: potele na:ka:modobomene? Idawa puliyanomola! Nanitabola, epetapiate Ya:sukono tanaloma: atamo temeteme dikaeamena, ibino osiyodilole tanalo ega:walo iyaiya mibomibo tanalo epetapi ega:walo woki bilibili tanalo epetapi, ebe tanalo bilibilinomate a ebenu nilakapo tanalone wagaima: ka:modobona:. Ega:walo atumu bae kape tanalo ega:walo inamabua:no okoli tanalo, olalati tanalo ega:walo a:e tanalo, ebe tanalo bilibilinomate modoboa: a Kelisokono nilakapo magumune wagaima:!

<sup>36</sup> Nanitabola, Godokono Buka magumulo tabo idite aimano tanalo ma kunu awokalimina,

“Godo, tete bilibilinomolo epetapiate a:ma: mabuma:  
a anakapuaema: waghena,  
iyo, ibi ubila a dabirole sipi-goeogoeomu  
kanakapuaema:!”

<sup>37</sup> Wiyasiya aimano Kawodawate a nilakapolo kawonomamo malagidiloena, ebema: ale ebedo me kuba tanalo bilibilinomo magumulo a wato kikopu kelaemalema:!<sup>38</sup> Iyo, me tanalo na iyatawanomola, atamo a:e ikaeame tanalo ega:walo igilo ikaeame tanalo, ebe iyaiya tanalate aimano Kawodawano nilakapo magumune a a:kowagaimene. Nanitabola, Unu Duliyomolono nopopi, ega:walo Saitanakono elawo nopopi, ega:walo ebenu kubakuba uliyana epetapi, iyo, kebe iyaiya tanalate me tetelo demaimiona ega:walo walone tetelo demaimioma:na,<sup>39</sup> ega:walo tobolo unulo da:pola:na, ega:walo damela magumulo da:pola:na, ega:walo opolo dowapata:lamena, me uliyana ega:walo inamabu bilibilinomo magumulo idi kapiyate a Godokono nilakapo magumune wagaima: modoboa:, mabu

ebe nilakapo tanalo ebete aimano Kawodawa Ya:su Kelisodo atamo nanitabonomolo iyalo ikaeamiya.

## 9

### *Godote Yu Epo Kowalubilinama: Iba:tamo Kebe Iyaiya Tanalo Dikalamiya*

<sup>1</sup> Ebema: na Polote Kelisoko magumulo nani tabo gelo a:da: tabo kegita:, iyo, naimano tepo magumuno mulo wokite Godokono Uliyanano elawamo naimano nanitabo tanalo ma kunu awokalimita, <sup>2</sup> naimano kalima epono tanaloma: naimano tepo magumulo kawo temeteme tanalonomote olopoligoa: mibomibo tanalago netabokana. <sup>3</sup> Ebene naimano ubi ma kunu itana, gabote modobolo ditanamene, diyala, naimano Yu epono nanitabokobi midia: mabuma: na kapiyate Godokono dowo magumamo da:ba:nopegamo, ebema: Godote Kelisoko magumune na itamidante Ela Opamo eba ba:idilonelo, ebete wiyasiya ibino igilo ebo ka:mula:lelaemene.

<sup>4</sup> Ibi Godote dopamo deka:la:mioliya ebe Isalaela epola, ebema: ebete ibi nilakapolo uwatete ebene gudima: eba midililo ebene kawo alonomo iba:tamo ebo awokalimiya, ega:walo ebete ibi kowalubilinama: ibino ewoniatamo ebene wadewade nopo alomonaki, ebene ebene Totomu Tabono iyaiya tanalo atumu walo a:kikalamiya. Ebema: iba:godolo Godoko nanitabo amamate iyatawa tanalote bitana, ega:walo ebete ebene Bukalo ibino igilo ka:mula:lema: kebe iyaiya tanalo nanitabonomolo da:kiyawonaki, ebe wadewade tabote iba:godolo atumu ba:ka:pola:na. <sup>5</sup> Ebene A:ibalayamako ega:walo kawokawo ewoni nabi epetapi, Yu epo ebe ebe dubuno walone gudila, ega:walo kalakala kawonomola, Kelisote ibi magumune opo lumagino apa:mo pawokaliya.

Nanitabola, Kelisoko ebe Godotela! Iyo, ebene elawo tanalote epetapi bilibilinomono elawo tanalo nodoilina, ebema: modobola epate uwomua: uwomua: tetelo ebe nemoionakoma:na:! Taula!

### *Godote Yu Epo Kowalubilinama: Nani Tabo Da:kiyawaiya, Ebete Ebe Tabo Kadikamidaliya:*

<sup>6</sup> La:le naimano iyatulame tanalo wadenomamo nelawa:la:, nale Godokono tanaloma: ma kunu kegita:, ebe a:da: tabo kiyawaodawama: eda:na. Ao, ebete Yu epo uwomua: uwomua: tetelo kowalubilinama: nanitabonomolo da:kiyawaiya, ebe tabo ebete kadikamidaliya: wiyasiya ebe tabono nanitabo tanalote a nanitabokobi midipiagodolo emaiyiya. Numa:la:, ebene umi magumulo piyate Yu epono kalimamo dawokalaon-aka ibi bilibilinomate ebene Isalaela eponomoma: keda:ona:. <sup>7</sup> Iyo, katene apulo A:ibalayamakono walone gudima: deda:ona, ibi magumulo epetapiate Godokono nani gudima: keda:ona:. Me mabuma: Godote A:ibalayamatamo dopamo ma kunu giya, "A:imano gudi magumulo a:ma:le Aisa:keko kapiyagodone a:imano gudi bilibilinomo kulaema:ta." <sup>8</sup> Me tabono magumu ma kunula, piyate kateneno ubi gabodo dawokalaoma:na:, iba:te Godokono gudinomoma: a:keda:oma:na:. Ao, piyate Godokono walubi tabonomodo dawokalaoma:na:, ebene umi magumulo ibi kapiyate ebene nani gudima: keda:oma:na:. <sup>9</sup> Ebe mabuma: Godote A:ibalayamako kowalubima: ebetamo nanitabonomolo ma kunu giya, "Na nani tetenomolo walo da:ka:pemo, ebe tetelo Selate dubu gudu kalaimene."

<sup>10</sup> Ebema: modobola la:le me tanalo idi atumu na:kemalagidilala:. A Yu epono ewono nabiwi idi Aisa:kete Lebekagodolo dubu gudi netewa ulamiya, ebene iba:te ebe kapiya ibino nabiwima: ka:minakiya. <sup>11-12</sup> Wiyasiya

ebe nedewale guda:te wade tanalo idi ega:walo kuba tanalo idi osiyodilola:no, iyo, iba:te ibino menokono tepo magumune awokalaoa:no, ebe tetelo Godote ebenu ubilo ibi magumulo kapiya gudunomo lawiya, ebete ebe gududo ebenu iyaiya ubi tanalo kosiyodilolenama:. Ebema: ebete ebe tanalo kawokalima: Lebekatamo negiya, “Ekawi dubuno elawote kawonomoma: eba eda:nalo, naniwino iyaiya gudino tanebapiate ebetamo wiya: wokopima: beda:onama:na:.” Ebe tanalone a me tanalo iyatawala, Godote ebenu ubi tanalo kapiyado ebenu nani gudi uwatenako, ibino osiyodilole tanalodoo:. <sup>13</sup> Iyo, ebe tanalo kawokalima: Godokono Bukalo tabo idite ma kunu itana, “Na Ya:ikoboko nilakapolo eba malagidilonalo ebe ebo lawiyamo, wiyasiya na ebenu naniwi Isoko ubia:noma: ediyamo.”

<sup>14</sup> Ebe mabuma: ale Godoko tuputupu tanalo osiyodilola:dawama: ba:kegelama:? Ao, mako woki ebe daedale wokila! <sup>15</sup> Godote ebenu tanalo kawokalima: Mosesetamo tabo ma kunu giya,

“Na ebe Godotela,  
 ebema: kebe tetelo na a:ka:tuwa: ubi diyatimo,  
     ebe tetelo lumagi iditamo  
     nilakapo kawokalimamo,  
 ega:walo kebe tetelo naimano ubi ditanamene,  
     na lumagi idi nilakapolo ebo kowalubimamo.”

<sup>16</sup> Ebema: kawo tanalo kapiyanomo bitana, ebe tanalo ebe Godokono nilakapo tanalola. Iyo, lumagite a:ka:tuwa: ebenu ubi tanalodo ega:walo ebenu elawamo woko osiyodilo tanalodo wade tanalo idi Godogodone a:kelaemene, Godokono nilakapo kapiyado kelaemene!

<sup>17</sup> Numa:la:, Godokono Bukalo ebete Kawo Elawodubu Pa:lokono wato kodakoda tanaloma: ebetamo ma kunu giya, “Nale a:ka:tuwa: a:ma: kawo elawodubuno gobebobamo iyatiyamata, nale a:ma:godone naimano iyaiya ubi tanalo kosiyodilolema:. Iyo, nale a:ma:do naimano elawo me opopiatamo eba awokalimilo, ibi bilibilinomate naimano amama mailo ebo kiyatawaoma:na:.” <sup>18</sup> Ebema: me tanalo nanitabonomola, Godote ebenu ubilo kapiya lumagitamo nilakapo eba awokalimilo, lumagi idino wato gito kodakodaimiya ebenu dowo tanalote ebetamo ka:pemaigama:.

### *Godokono Dowo Tanalo Ega:walo Ebenu Nilakapo Tanalo*

<sup>19</sup> Ebema: diyala, la: magumulo idite natamo tabo ma kunu da:begemene, “Godote a:ka:tuwa: wato kodakoda woki lumagi iditamo dikaemene, ebete ebe lumagino kuba osiyodilo mabuma: wiya keba kunu na:kikaemene? Ebete eba kunu dosiyodilomene, ebe tanalo tuputupu osiyodilo tanaloo:, mabu ebe a:ka:tuwa: ebenu ubilo wato kodakoda woki ebe lumagitamo ikame! Eiye, opo lumagigodolo elawo kitana: Godokono ubi tanalo odiyoboma:!”

<sup>20</sup> Na wiyasiya ebako tabo gedawatamo negemo, “Naimano namutudawa, a:ma: poteleka: a:ma: a:ka:tuwa: a:ma: kawoma: midilo Godokono ubi tanalago dapamineua:wita? Numa:, mulodawate ebenu ubilo kalili idi gebetamo dosiyodilomene, ebe tetelo kalilite ebetamo mako daedale woki tabo a:kegemene, ‘Na ubia:nola me ololamo okolitama:. Mabu keleka: a:ma:le na ma kunu dosiyodilona:wa:?’ <sup>21</sup> Eiye! Kalili osiyodilole dawa ebe mulo iyatawadawala. Ebema: ebete ebenu ubilo kapiya gebetone kalili idi wade baeno woko kosiyodiloma: osiyodilote, ega:walo kalili idi sosowano

woko kosiyodiloma: da:kosiyodilomene, ebe tanalo ebe ebena tanalola. Idawate modoboa: ebe kuba wokodawama: gema:.”

<sup>22</sup> Me uli tabote Godokono tanalo awokalimita. Ebete ebena ubilo me opo epo bilibilinomo gito osiyodiloliya, ibi magumulo epetapiate nanitabokobi midia:pima: eba eda:onalo ebete iba:godolo ebena elawo tanalo ega:walo dowa tanalo kawokalilaema:. Numa:la:, ebako epate iyalo olosiyodiloiya Godote ibino kuba osiyodilole mabuma: ibi ka:kubailaema:, wiyasiya tete geyageyanomolo ebete ibi kopoliyadigalena: mabu ebena kawo dowanomo awokalimi tanalote ibido katepana:. <sup>23</sup> Ega:walo Godote a nanitabokobi midipi ako-osiyodiloiya ebete ado ebena kawo alonomo kawokalima:, iyo, ebete iyalo tetelo ebena nilakapolo a wadekobi a:midiya ale ebena kawo alonomono wadewade dogodogo tanalo ebegodone ka:nuwatema:. <sup>24</sup> Ebema: nanitabola, Godote Yu epo ega:walo Yua:pi bilibilinomo magumulo piyate ebena gudima: keda:onama: deka:la:mioliya, a ebe ebe epola.

<sup>25</sup> Numa:la:, Godote Yua:pino tanalo kawokalima: ebena Bukalo ebena wokodawa Oseyagodone tabo ma kunu giya,

“Kebe epate naimano epoma:  
keda:onamia,  
nale ibi naimano eponomoma:  
keka:la:imamo,  
ega:walo nale dopamo kebe gudu nilakapolo  
kemalagidilonamia:,  
nale wiyasiya ebe naimano wade gudunomoma:  
kegemamo.

<sup>26</sup> Ebema: na Godote dopamo  
kebe opo epo kanaliyamo,  
‘La: naimano epoa:,’  
me tetelo ibino oponomolo  
epetapiate iba:tamo kegelama:na,  
‘Uwomua: uwomua: tetelo digilonamene,  
la:le ebe Kawodawa Godokono gudima: eda:onamata.’ ”

<sup>27</sup> Ebene Godote ebena Bukalo me elawo tabonomo Aisayagodone ma kunu gena,

“Isalaela epono ka:la:miole uwomu  
ebe kewa: kolomono wiyo keba kunula:ka:,  
iba:te bilibilinomoma: eba kunu eba eda:onalo,  
wiyasiya ibi magumune nale kapiyakapiyanomo uwatete  
ibino igilo ka:mula:lalaemamo.

<sup>28</sup> Mabu tete gawagawalo na:pe,  
na Kawodawate me opo epono tanalo  
eba anagilamelelamelelo,  
ibi bilibilinomatamo modobo wiyanomomo  
ebo kikalamelemamo.”

<sup>29</sup> Iyo, me tabo awokalimia:no, Aisayate dopamo Godokono Bukalo tabo idi ma kunu kegiya,

“Elawo Kawodawanomote ebena nilakapo  
atamo kela:mo awokalimia:notaleka:,



aimano kuba osiyodilole mabuma:  
 ebete a opoliyaenomo bopoliyaena,  
 iyo, ebete Sodomo duliynomolo ega:walo Gomola duliynomolo epo  
 keba kunu kanakapulamiyale,  
 ebete a eba kunu ba:kubaiamena.”

*Yu Epate Tuputupupima: Eda:o Gabodo Agowa Dukamidaoliya*

<sup>30</sup> Ebema: me iyatulame tanalono kawo magumunomo ma kunula. Kebe tetelo Yua:piate Godokono tuputupupima: eda:o gabo wadia:no, ebe tetelo wiyasiya Godote ibi uwatete ibino nanitabokobi midi tanalodo ibi tuputupupima: ebo midiliya. <sup>31</sup> Wiyasiya Godote dopamo deka:la:mioliya ebe Yu epate Mosesekono Totomu Tabo bilibilinomo magumulo elawo ikalame totomu idi kawonomamo nipo wadiya, iba:te ebe totomu tabamo tudila:o tanalodo tuputupupima: keda:onama:. <sup>32</sup> Mabu keleka: iba:te kumiya? Mabu iba:te nanitabokobi midi gabodo kowadiya:, iba:te wiyasiya kebe tanalo ibino elawamo kosiyodilolenakiye ebe tanalo kawo tanalonomoma: eba gelalo, iba:te tuputupupima: eda:oma: Godokono noko-lalo agowa gito nukamidaoliya. <sup>33</sup> Ebe mabuma: Godote ebena Bukalo Kelisokono tanaloma: tabo ma kunu gena,

“Numa:la:, nale Isalaela epono Sayono opamo\*  
 agowa ukamidaoleno nokola iyatiyamo,  
 iyo, ebe nokola ebe nale iba:tamo dapalibiyamo  
 ebe Wade Wokodawala.  
 Ebema: ibi epetapiate ebe nokolalo agowa ukamidaolete  
 ebo ka:na:gudima:na:,  
 wiyasiya piyate naimano Wokodawa nanitabokobi da:midima:na:,  
 iba:te ilipo walo a:kiyatawaonakoma:na:.”

## 10

*Yu Epate Godokono Igilo Mula: Gabo Keba Kunu Kanaetoamidiye*

<sup>1</sup> Naimano nanitabokobi midipi ekakiala:, naimano Yu epate igilo mula: tanalo kelaema: nale ebe tanalo tepo magumulo kawonomamo eba malagidilolo Godoko ebema: toweomenakomo. <sup>2</sup> Na ibino tanaloma: nani tabonomo la:tamo ma kunu kiyawaimo, iba:te ibino tanalo bilibili-nomo Godotamo eba osiyodilolenalo ebo malagidilonaka ebete iba:tamo kekalakalamene, wiyasiya ibi iyatawa: iba:te ebena nanitabo gabo iyalo danaetoamidiya. <sup>3</sup> Iyo, Godote epo ebena tuputupupima: kebe gabodo ka:midilinale, Yu epate ebe gabodo tolaema: ubia:noma: eba eda:olo, ebema: iba:te Godokono ubi tanalamo tudila:oa:no ibi a:ka:tuwa: ibino woki idi gabonomoma: ebo geliya, <sup>4</sup> ebe gabodo ebe Godote ibino ewoniatamo Mosesedo dikalamiya ebe Totomu Tabamo tudila:o gabola. La: wiyasiya numa:la:, Kelisokono woko magumulo ebete ebe tagala gabo odiyobiya, ebema: me tetelo ebena oli gabo kapiyanomote itana, iyo, piyate ebe nanitabokobi da:midina Godote ibi bilibilinomo ebena tuputupupima: midilite, iba:te igilo mula: tanalo ebo kelaema:na:.

*Ya:suko Ka:mi Magumulo Lumagite Igilo Mula: Tanalo Kelaemene*

<sup>5</sup> Ebema: Godote lumagi idi ebena Totomu Tabamo tuduwata tanalodo tuputupudawama: deka:imene, Mosesete ebe tanalo Godokono Bukalo ma kunu awokalimiya, “Potele Godokono Totomu tabo bilibilinomamo

\* **9:33:** Buka ka:la:mioledawa, modobola a:ma: niyatawa, Isalaela epono opono mailo idi ebe Sayonola.

da:tuduwatanako idi kapiya adikanalea:no, Godote ebe tuputupudawama: ka:mite nanitabo igilo ebetamo ebo kikaemene.” Wiyasiya numa:la:, a opo duliynomolo epo niyaniyala mabu a magumulo ebako lumagite ka:luta:

<sup>6</sup> Wiyasiya Godote kebe lumagi ebene nanitabokobi midi tanalodo tuputupudawama: deka:imene, ebete ebako dawano tanaloma: ebene Bukamo iyaiya tabo epetapi akakuloliya. Iyo, ebene Bukalo dopo tabote ma kunu gena, “Opo lumagi, a:ma: mako tabo tepo magumulo akogeala:, ‘Naimano nanitabo igilo ka:nelaema:, Unu Duliynomolamo potele na:ka:nodolomene?’ ” Eiyee! Me tabo ebe daedale woki tabola, mabu nanitabokobi mididawa iyatawala Kelisote Unu Duliynomolone me opamo iyalo a:piwisigiya! <sup>7</sup> Ega:walo atu Buka tabote walo ma kunu kegena, “Opo lumagi, a:ma: atumu daedale tabo idi ma kunu akogeala:, ‘Naimano nanitabo igilo ka:nelaema:, a:elao epono opamo potele na:ka:niwisigamene?’ ” Nanitabokobi mididawa, a:ma: numa:, Kelisote ebamo iyalo niwisigate a:e magumune atamo walo ebo kemaigiya! <sup>8</sup> Ebema: Godokono Bukalo tabo idite nanitabokobi mididawano tanaloma: ma kunu itana, “Naimano igilo tabote iyalo pemaigate a:ma: niyakabonomolo bitana, iyo, a:imano tepo magumulo eba itanalo ebo kiyawaonakota.” Nanitabola, epate Ya:suko nanitabokobi ka:midima: ale iba:tamo da:kiyawaonakoma:, me ebe Wade Tabola.

<sup>9</sup> Ebema: Godote Ya:suko a:e magumune dadipatiya, kebe lumagite ebe tanalo ebene tepo magumulo nanitabokobi eba midinalo, Ya:sute Kawodawama: deda:na ebe tanalo ebene tabamo dawokalimene, Godote ebe lumagino igilo ka:mula:emene. <sup>10</sup> Nanitabola, ale nanitabokobi da:midinama:, Godote a tuputupupima: ebema: ka:mina, ega:walo ale aimano nanitabokobi midi tanalo tabamo dawokaliminakoma:, Godote ebe gabodo aimano igilo ebo mula:leamenako. <sup>11</sup> Ebema: Godokono Bukalo tabo idite ma kunu itana, “Piyate ebe nanitabokobi da:midima:na:, ibi bilibilinomate ilipo walo a:kiyatawaonakoma:na:.” <sup>12</sup> Numa:la:, Godote me tabamo epo bilibilinomono tanaloma: gena, mabu ebene osiyodilo magumulo ebete Yu epo ega:walo Yua:pi atu gabodo uwatete kapiya epoma: ebo midiliya. Iyo, Kawodawa Ya:suko ebe ibi bilibilinomono kapiya Kawodawala, ebema: ibi bilibilinomo magumulo piyate ebene mailo deka:ima:na:, ebete ibi bilibilinommatamo wadewade dogodogo tanalo kawonomamo kikalaemene. <sup>13</sup> Nanitabola, Godote ebene Bukalo tabo idi walo ma kunu kegena, “Piyate Kawodawano walubi tanalo laema: ebene mailo deka:ima:na:, Godote ibi bilibilinomono igilo nanitabonomolo ka:mula:lalaemene.”

*Yu Epate Godokono Wade Tabo Olowite Ubia:noma: Deda:iya*

<sup>14</sup> Ebema: modobola la: me tanalo nemalagidilala:. Epate Kawodawa Ya:suko nanitabokobi midia:no, iba:te ebe keba kunu na:keka:ima:na: ebete ibino igilo ka:mula:lalaema:? Ega:walo iba:te ebene tanalo olowioa:no ebe nanitabokobi keba kunu na:ka:midima:na:? Ega:walo epetapiate ebene Wade Tabo iba:tamo kiyawaonakoma:, iba:te keba kunu na:kolowioma:na:? <sup>15</sup> Ega:walo Godote wokopi ebene elawago alibolea:no iba:te Wade Tabo keba kunu na:ka:nikiyawaonakoma:na:? Numa:la:, ebe tanalo awokalima: ebene Bukalo tabo idite ma kunu itana, “Olalati magumulo dilukuliona, piyate ebako epo kowalubilima: Wade Tabo dadaema:na:, ebe wokopino pelame tanalo beda: wade tanalonomola:ka:!”

<sup>16</sup> Wiyasiya Ya:sukono Wade Tabote Yu epatamo da:pemaigiya, ibi epetapi bilibilinomate ubia:noma: eda:iya. Ebema: tete idilo Godokono woki awokalimidawa Aisayate ebe naniya, “O Kawodawa, a a:imano wokopiate tabo da:kiyawaonakoma: epate wiyasiya kolowionakoa:, ibi

magumulo kapiyakapiyanomate nanitabokobi midinaka!”<sup>17</sup> Me tanalo nanitabola, epono nanitabokobi midi tanalote Kelisokono Wade Tabo olowio tanalodo maiganako, ega:walo Kelisokono tabo awokalimi tanalodo iba:te ebo olowionaka.<sup>18</sup> Ebema: nanitabola, Yu epate Kelisokono tabo ibino galonomamo eba kunu olowiya wiyasiya kelawiya:, iyo, Godokono Bukalo tabo idite ibino olowio tanalo ma kunu awokalimina,

“Godote wagilimi mabu tetelo dosiyodiloliya,  
ebe inamabuate ebena tanaloma: tabo eba kiyawaonalo,  
ebe tabote me opo kawonomamo gito tiya.

Ebema: mulu oponomolo dilukuliona,  
ebe epate ebena tabono iyaiya tanalo  
wadenomamo iyalo olowiya.”

<sup>19</sup> Ebema: na Polote naimano leta tabo olowiopi la: analemata, la: ma kunu kemalagidilawitama, Isalaela opolo dilukuliona Godokono tabote ebe Yu epatamo ka:pemaigiya:? Ao, iba:te nanitabonomolo olowiote wiyasiya kelawiya:, mabu ibino nanitabokobi midia: tanalo pemaiga:no, dopamo Mosesete ebe tanalo Godokono Bukalo ma kunu awokalimiya,

“Godote nege,  
‘La: Yu epate kebe epo wadewade epoa:ma: degelawenama,  
nale la:imano gobebobo ebe Yua:piatamo dikalaemo,  
la: ebema: ka:dowaomamota.  
Iyo, dopamo daedale woki magumulo dilukulionamiya,  
nale la:imano iyaiya iyatawa tanalo iba:tamo dikalaemo,  
ebe mabuma: la: tepo magumulo  
iba:tamo elanomoma: keda:omamota.’ ”

<sup>20</sup> Ega:walo tete idilo Aisayate tolea:no Godokono Bukalo Yua:pino tanalo walo nakawokalimiya,

“Godote nege,  
‘Na wadinia:piate na unamiya,  
iyo, nale pema: piyate na ka:toweonamia:  
wiyasiya na iba:tamo nilakapolo a:pemaigiyamo.’ ”

<sup>21</sup> Ebete wiyasiya Isalaela epono tanaloma: ma kunu kegiya,

“Nale ibino igilo ka:mula:lalaema:  
tete geyageyanomolo naimano koto  
iba:tamo uwamidalete dutinaimo,  
wiyasiya iba:te naimano tabamo tudila:oa:no  
wato kodakoda-ibinomoma: eda:onamiya.”

## 11

*Yu Epate Godoko Ubia:noma: Eba Eda:onalo Ebete Wiyasiya Ibi Ubia:noma: Keda:na:*

<sup>1</sup> Ebema: nale la: analemata, la:imano woki ma kunu kitanale, Godote ebena Yu epono tanaloma: woki iyakobi midite iba:tamo ubia:noma: ebo kediya? Ao, eba kunua:. Nanitabola, ibi epetapi bilibilinomate Kelisoko nanitabokobi ka:midina:, wiyasiya numa:la:, me atu tetelo kapiyakapiya

epo epetapiate ebe nanitabolo lawiya. Ma kunu na atumu Yu lumagima: eba keda:nalo wiyasiya nanitabokobi na:midinamo, iyo, A:ibalayamako ebe naimano ewono nabiwila, ega:walo na Isalaela epono Beniyaminakono gu magumune awokaliyamo. <sup>2</sup> Ebema: nanitabola, Godote me opo wag- ilimia: tetelo piyate ebena gudima: keda:onama: ebena pukala iba:tamo dalomolamiya, me tetelo ebete ebe Isalaela epo ubia:noma: keda:na:. La: iyatawalata, Godokono Bukalo tabo idite keba kunu kitanale, iyo, Godote Isalaela epatamo kuba wiya ikalaema: Elayate ebe eba toweomelo tabo ma kunu giya, <sup>3</sup> “O Kawodawa, Isalaela epono kuba osiyodilole tanalo kawokawonomola. Iba:te a:ma: watidilono nokolamo osiyodilole patapata kubailamete a:imano woki awokalimipi bilibilinomo ebo anakapulamiya, ebema: ibi magumulo na kapiyate eba igilonalo iba:te atumu na anaka-punaema: kowagelena!”

<sup>4</sup> Ebene Godote Elayakono tabo eba wiyalo negiya, “Naimano Isalaela epo magumulo a:ma: kapiyate nanitabokobi midi magumulo kokoliawena:. Nanitabola, ibi epetapi miliya:ni epo bilibilinomate na iyalo atepanete a:da: elemasigi ida:da:li Ba:iliko ibino godoma: ka:minaka, wiyasiya Ba:iliko amamatea:pi epetapi sebeni taoseni epate ba:pola:na, iba:te na amamanate-nenaka. Numa:, ebe nanitabokobi midipino uwomu bilibilia:, wiyasiya nale ibi wadenomamo anikulamenamo.”

<sup>5</sup> Ebema: Elayako tetelo dopamo demaigiya, me tetelo ebe atu tanalote kemaigiya, Yu epo epetapi bilibilinomate Godoko ubia:noma: eba eda:onalo, wiyasiya ibi magumulo ebete ebena nilakapo tanalodo kapiyakapiyanomo uwatiya. <sup>6</sup> Nanitabola, Godote ibi ibino wadewade osiyodilole tanalodo kuwatiya:, ao, ebete ibi ebena nilakapo tanalodo gito uwatiya. Numa:la:, me opolo woko namutupiate wade wiya wadewade wokopiatamo eba ikalamenalo wiyasiya kuba wiya kubakubapiatamo ikalamenaka, wiyasiya Godokono tanalo eba kunua:, ebete ebena wade tanalo a kuba osiyodilolepi bilibilinomatamo gito eba ikaeamenalo ebena nilakapo tanalonomo ma kunu awokaliminako.

<sup>7</sup> Ebema: me tanalono magumu keba kunula:ka:? Nanitabola, Isalaela epate ibi a:ka:tuwa: ibino elawamo Godogodone wade tanalo laema: eba wagenalalo wiyasiya iba:te gabo nipo wadiya. Ebene ibi magumulo Godote kebe epo ebena gudima: keda:onama: dopamo deka:la:mioliya, ebe kapiyakapiyanomate nanitabo tanalo eba lawelo, wiyasiya Godote Yu epo epetapi bilibilinomono galo gito mopirolelamiya iba:te ebena tabo olowiokapoma:. <sup>8</sup> Iyo, ebena Bukalo tabo idite ibino tanalo ma kunu awokalimina,

“Godote iba:tamo u lao tanalo ikalamiya,  
 ebema: iyalo tetene wagilimite me teta:mo pemaiga,  
 iba:te ibino balida:mo Godokono nanitabo tanalo kuminakia:,  
 ega:walo iba:te ibino galamo ebena tabo kolowionakia:.”

<sup>9</sup> Ega:walo tete idilo Da:ibidite Godokono Bukalo Yu epono tanaloma: tabo ma kunu kegiya,

“Iba:te woki bilibilia:no soliyomu bae eba nautalo,  
 modobola Godote ibino kuba wiya  
 iba:tamo nikalaemene,  
 iyo, iba:te ebena gubi magumamo eba nigudilo,  
 kubanomamo ebo na:nela:wa:oma:na:.”

<sup>10</sup> Ebene ibino balidi netamiolaemene,  
 iba:te ebena wade tanalo umikapoma;  
 ega:walo mibomibo tanalo magumulo eba ilukulionalo,  
 modobola iba:te kawokawo temetema:go  
 nowapata:lamenama:na.”

*Godokono Igilo Mula: Tanalote Yua:piatamo Da:piya*

<sup>11</sup> Ebema: nale la: tanalo idima: kanalemata. La:imano woki ma kunu kitanale, Yu epate nanitabokobi midi magumulo agowa da:nukamidaoliya, Godote ebe mabuma: ibi ginima:mo gito kilateliya: iba:te uwomua: uwomua: tetelo ebegodone mulunomolo ka:pola:nama:? Ao, eba kunua! Numa:la:, Yu epono ele gabo odidi tanalodo Godokono igilo mula: tanalote Yua:piatamo piya. Ebema: Yu epate ebe mulupino nanitabo kalakala tanalo duima:na:, diyala, iba:te ebe tanaloma: dowatepaote Godotamo da:bolobila:oma:na:, ebene ibino kalakala atumu ebegodone ka:kelaema:na. <sup>12</sup> Nanitabola, kebe tetelo Isalaela epate nanitabo gabo datepiya, iyaiya opo epetapino epate gabo ebo umiya Godogodone wadewade tanalo kuwatema:. Iyo, Yu epono nanitabokobi midia: tanalone iba:te kebe tanalo katutulateliye, Yua:piate ebe atu tanalo gito uwatiya, ebema: ibino kalakala tanalote me tetelo kawonomoma: eda:na. Wiyasiya Yu epate ibino igilo mula: tanalo atumu da:kelaema:na:, aimano kalakala beda: kawonomola:ka: mabu a nanitabokobi midipino walogabo apuno kalakalate me teteno kalakala ka:nodolimene!

<sup>13</sup> Ebema: na Polote me tabo idi la: Yua:piatamo gemo, nanitabola, Godokono alibolepi magumulo ebete na la: mabuma: elaweniya. Ebe woko osiyodilo tanaloma: nagodolo kawo kalakalanomote itana, <sup>14</sup> mabu naimano Yu eponomate la: Yua:pino igilo mula:no nanitabo kalakala dumilametamene, diyala, iba:te ebe tanaloma: dowatepaote Godotamo da:boloba:la:oma:na:, ebene ibino kalakala tanalo ebegodone atumu ka:kelaema:na:. Ebema: kalakala kawonomola, nale woko Yua:piatamo eba osiyodilonalo, ebe atu woko magumulo gabote da:bitanamene Yu epono igilo mula: tanalote iba:tamo naimano woko magumudo ka:pema:. <sup>15</sup> Numa:la:, Godote Yu epo iyabaiamo eba alomatepalo, wiyasiya me opo epono Yua:pino wade tetete ebo pemaigiya iba:te Godago wadewade namutupima: walo ka:keda:oma:. Ebema: walone tetelo Godote ebena Yu epo walo da:kuwatemene, kalakala beda: kawonomola:ka:, mabu piyate me tetelo da:elaona iba:te igilamo kemaimioma:na:!

<sup>16</sup> Numa:la:, kebe tetelo lumagite palowa bae apu talenama: midite Godotamo dikaemene, ebe tetelo ebe bae umomonomote Godokonoma: keda:mene. Ega:walo lumagi idite wade da:imi kewa talenama: midite Godotamo dikaemene, ebe kewano ape kawonomote ebena katomo ega:walo dolodolago Godokono talena inamabuma: keda:mene. <sup>17</sup> Ebema: la: me uli tabo idi nemalagidilala:. Idawate wade olibi da:imi kewa ebena moto niyakabamo gito amiya. Ebene ebete ebe kewano katomo epetapi otolete, tumulo da:eni ebe olibi da:imi kewa iditamo tote katomo kapiya nitamidate, walo ka:pete tumu kewano katomo dopo kewano apa:mo gito pa:mogiya, iba:te atu igilago eba pola:nalo wadewade da:ima:te kapimiya ka:nolonakoma:. Ebema: la: Yua:piate Godoko nanitabokobi da:mida:wenama, la:imano tanalo ebe eba kunula. Godote la: nilakapolo uwatetate Yu epono igilo mabuamo a:pemoga:liyata, la:le iba:go kapimiya ebena wadewade tanalo kalakalago kuwata:wenakoma:. <sup>18</sup> Wiyasiya la: nanisiwale! Godote la:tamo gobobobo ikalaema: gelo Yu epo epetapino katomo gito dotoliya, la: a:ka:tuwa: ibino olalati tanaloma: akoamamala:.



Eiye! La: katomonomolata, la: kewano nanitabo igilo mabua! Kewano dolodolote la: katomotamo igilo ikalamenata, wiyasiya la:le dolodolotamo wade tanalo idi kikalama:wena:

<sup>19</sup> Ebema: diyala, la: magumulo idite naimano tabo eba wiyalo ma kunu da:begemene, “Kalakala kawonomola, gobebobo natamo ikaname mabuma: Godote Yu epo epetapino katomo gito otoliya.”

<sup>20</sup> Ebema: nale ebe lumagitamo kowaimamo, “A:imano tabo nanitabola, wiyasiya a:ma: nanisiwale! A:ma: Godoko tolemelo a:ma: a:ka:tuwa: akooamamata:la:, mabu piyate dopamo nanitabokobi midia:noma: deda:onamiya ebete ibi gito otoliya, ebene a:ma: a:imano nanitabokobi midi tanalo kapiyado ibino gobebobolo utitata. <sup>21</sup> Nanitabola, dopamo Godote katomo epetapi ibino nanitabokobi midia: mabuma: ka:wokololamiya:, ebema: a:ma: nanitabokobi midia:noma: deda:emene, ebete a:ma: atumu gito ka:kitamidama:ta!”

<sup>22</sup> Ebema: la: Yua:pi nanitabokobi midipiala:, modobola la: Godokono kawo nilakaponomo ega:walo ebene kawo elawonomo me netewa tanalo nemalagidilolenala:. Piyate kuba osiyodilole magumamo da:na:gudiya ebete iba:tamo kawonomamo eba elawonalo, wiyasiya la:tamo ebene nilakapo awokalimina, iyo, kebe tetelo la:le ebene nilakapo magumune gudia:no ebe nilakapote la: mabuma: a:kolopoligonamene. Wiyasiya la:le kubakubapino tanalo eba waloma:talo atumu da:ka:niguda:ema, la: nanisiwale! Ebe tetelo Godote la: atumu gito ka:kotolema:ta! <sup>23</sup> Ega:walo kebe tetelo Yu epate kuba magumune maimiote Kelisoko nanitabokobi da:midima:na:, ebe tetelo Godote ebe katomo walo kuwatete ebene olibi da:imi kewano igilo mabuamo ka:ka:moga:lemene, mabu ebegodolo elawo bitana ebe nilakapo tanalo kosiyodiloma:. <sup>24</sup> Ebema: numa:la:, Godote la: Yua:pino katomo ebene olibi da:imi kewamo moga:lema: kodakodadopola, mabu la: tumu da:imi kewano katomolata. Wiyasiya ebete ebene Yu epono katomo walo da:ka:moga:lemene, ebe tanalo ebete osiyodiloma: kodakoda: mabu ebe katomo ebe atu kewane iyalo dotoliya ebe katomola, iyo, ebe kewano mabu ebe ibino igilo mabunomola.

*Walone Tetelo Isalaela Epo Bilibilinomate Ibino Igilo Mula: Tanalo Kelaema:na:*

<sup>25</sup> Naimano nanitabokobi midipi ekakiala:, Godote walone tetelo kosiyodiloma: dopamo dowaminiya, nale ebe tanalo la:tamo kawokalimamo, la:le la:imano igilo mula: tanalo lawe mabuma: amamaokapoma:. Ebe tanalo ma kunula, Isalaela epono wato kodakoda tanalote uwomua: tetelo a:kitanamene, ao, Yua:pi magumulo piyate nanitabokobi da:midima:na: ibi bilibilinomate Godotamo dopamo pelamete, ebene Yu epate atumu walone ka:ka:pelaema:na:. <sup>26-27</sup> Ebema: nanitabola, ebe tetelo Isalaela epo bilibilinomate ibino igilo mula: tanalo kelaema:na:, mabu Godokono Bukalo tabo idite ma kunu gena,

“Na Godote ibino kuba osiyodilole tanalo  
iyabaiamo dowatalaemo,  
ebe tetelo nale naimano oli nopo iyatite  
iba:tamo ma kunu kawokalimamo,  
Ya:ikobokono walone gudino Igilo Mula:lelamedawate  
Isalaela opolo demaigamene,\*  
ebete ibino Godoko ololoa: tanalo

\* **11:26-27:** Buka ka:la:mioledawa, modobola a:ma: niyatawa, Isalaela epono opono mailo idi ebe Sayonola.

iba:godone uwatlamete  
iyabaiamo gito kalomolaemene.”

<sup>28</sup> Ebema: Godote ebene ubi ma kunu iyatiya, Yu epate ebene Wade Tabo laema: ubia:noma: eda:ote, ebete iba:go gowelaodawama: eba eda:nalo ibino ubia: tanalodo igilo mula: gigiyu la: Yua:piatamo ka:iyamidalametama: Wiyasiya numa:la:, ebete ibi nanitabolo kalibulateliya:, ao, ebete ibino ewoni nabi nilakapolo iyalo duwatiya, ebema: ebe tanalo dodomatia:no ebete ebe nanitabokobi midipino tanaloma: ibino walone gudi uwomua: tetelo nilakapolo atumu ba:kemalagidilolenamene. <sup>29</sup> Nanitabola, Godote dopamo kebe wadewade tanalo epatamo kikalamiyale, ebete woki iyakobi midite walo a:kuwatemene, ega:walo ebete dopamo kebe epo nilakapolo kuwatiyale, ebete walone tetelo ibi ubia:noma: eda:te gito a:ka:miyapamene.

<sup>30</sup> Ebema: numa:la:, dopamo tetelo Godote ebene nilakapo Yu epatamo eba awokaliminalo, ebe tetelo la: Yua:piate ebetamo ka:tudila:wenamia:, wiyasiya me tetelo la: Yua:piate ibino tudila:oa: tanalodo nilakapo Godogodone nelawenamata. <sup>31</sup> Ega:walo Godokono nilakapo la:tamo awokalimi mabuma: Yu epate tete da:pesolo ibino tudila:oa: tanalo magumulo ilukula:tepate, ebene walone tetelo ibi atumu ebegodone nilakapo walo ka:kelaema:na:. <sup>32</sup> Iyo, nanitabola, Godote me opo epo bilibilinomatamo tete ikalamiya iba:te kuba osiyodilole tanalono matuomeo magumulo kilukula:tepama:, mabu ebe ubila ibi bilibilinomate ebe temetema:go eba kunu eba ilukulinalo ebete iba:tamo ebene nilakapo ebo kawokalima:.

*Polote Godoko Amamatema: Tabo Dadipatiya*

<sup>33</sup> Ebema: Godokono nilakapo tanalo ega:walo ebene mulo tanalo ega:walo ebene iyatawa tanalo beda: kawokawonomola:ka:!

Ebene osiyodilole tanalono magumu nanitabolo uwatema:

lumagi idite a:ka:modobomene,  
iyo, ebene tuputupu gabono mabu  
idawate a:kiyatawamene!

<sup>34</sup> Dopamo wagilimi mabune lumagi idite  
Kawodawa Godokono tepo magumuno woki  
nanitabolo kelawenakia:,  
ega:walo idawate ebe oli tanalo  
iyatuima: ka:modobonakia:!

<sup>35</sup> Ega:walo nanitabola,  
Godogodolo modoboa: tanalo kapiya idi kitana:,  
ebema: ebete opo lumagigodone  
walubi tanalo idi nanitabolo kelawenakoa:,  
ebete ebe lumagitamo walo ebema: ka:wiyala!

<sup>36</sup> Ebe nanitabola, Godote ebene elawamo  
inamabu bilibilinomo osiyodiloliya,  
ebene ibi bilibilinomate ebe kowalagonama:  
ebene igilo magumulo pola:na,  
ebema: modobola uwomua: uwomua: tetelo  
amama tanalote ebegodolo nitanamene!  
Me tabo nanitabonomola, taula!

## 12

### *Nanitabokobi Midipiate Ibino Igilo Godotamo Ikameo Tanalo*

<sup>1</sup> Naimano nanitabokobi midipi ekakiala; Godote ebenu nilakapo kawonomo atamo keba kunu kawokalimiyale, nale la: ebe tanalo me leta magumulo wadenomamo iyatulaemata. Ebe mabuma: nale la: toweolaemata, la:le la:imano ilukuli magumulo la:imano igilo ebetamo nanitabonomolo nikameonala; epo epetapiate ebetamo kalimagono inamabu keba kunu kikameonake eba kunu. Iyo, la:le Godoko kekalakalaima:wenama: modobola ebenu woko osiyodilo tanaloma: la:imano igilo talenama: na:midilinakiyala; ebenu me gabodo la:le ebe wade tuputupu wokiago bamamatenakomata. <sup>2</sup> Ebema: me opolo dilukuliona ebe nanitabokobi midia:pino osiyodilole tanalodo ibi akoibamilatela:la; la: wiyasiya Godotamo gobebobo nikamenala: ebete la:imano tepo magumuno woki oliolinoma: ka:midilinama; ebenu Godote keba tanalo wadewadenonomoma: kegenale, la: ebe iyaiya tanalo wadenomamo kiyatawaomamota la:le ebenu ubi tanalamo ka:tudila:wenama:

<sup>3</sup> Ebema: nale Godokono woko kosiyodilonama: ebete keba iyanomo elawo natamo nilakapolo kikanamiyale, nale ebe tanalamo la: bilibilinomo ma kunu analemata, amama magumulo la: a:ka:tuwa: la: kawokawopima: akomidila:la. Wiyasiya Godote la:imano nanitabokobi midi tanalodo la:tamo kebakobako iyaiya elawo dikalamoletiyala, modobola la: ebe tanalo tuputupu wokiago nemalagidilolenala; mabu la: eba kunu nanitabolo kiyatawaomamota la:le ebetamo keba iyaiya woko modobolo kosiyodilawenama. <sup>4</sup> Ebema: modobola a bilibilinomate lumagino apenu tanalo eba malagidilolo uli tabo idi ma kunu kuimalema; lumagino ape ebe kapiyala wiyasiya ebenu iyaiya woko osiyodilole tanalo ba:pola:mena. <sup>5</sup> Eba kunu a nanitabokobi midipiate Kelisoko magumulo kapiya apema: eba eda:nalo aimano iyaiya woko kapimiya bosiyodilolenama: Ega:walo me tanalo idila, lumagino apenu moga:lamole tanalate ibino iyaiya bailo modobolo da:pola:nama:na: ibino woko osiyodilo tanalate wadenomamo ka:pola:nama:na; wiyasiya apenu iyaiya apu magumulo idi kapiyate ape kawone ditamidamene ebe a:ka:tuwa: woko osiyodiloma: a:ka:modobomene.

<sup>6</sup> Nanitabola, Godote nilakapolo a bilibilinomatamo iyaiya elawo ikaeamoiya ale ebenu woko kapimiya kosiyodilonama: Ebema: nanitabokobi mididawa, Godote a:ma:tamo iyanomo elawo dikametiyyala ebenu woki nanitabonomolo kawokalima:wenama; modobola a:ma:godolo ditana ebe nanitabokobi midi tanalago a:ma:le ebenu woki nawokaliminakiye. <sup>7</sup> Ega:walo ebete a:ma:tamo iyanomo elawo dikametiyyala epono osiyodilole magumulo ibi kowalubila:wenama; modobola a:ma:le ibi nowalubilinakiye. Ega:walo ebete a:ma:tamo iyanomo elawo dikametiyyala ebenu Buka apuapuno tabo kiyatulama:wenama; modobola a:ma:le epo niyatulamenakiye. <sup>8</sup> Ega:walo ebete a:ma:tamo iyanomo elawo dikametiyyala epono tepo magumuno temeteme magumulo ibi gelebadikobi ka:midiola:wenama; modobola a:ma:le ibi gelebadikobi na:midiolenakiye. Ega:walo ebete a:ma:tamo iyanomo elawo dikametiyyala nigologolopiatamo mani ega:walo inamabu kikalamola:wenama; modobola a:ma: iba:tamo kawonomamo nikalamolenakiye. Ega:walo ebete a:ma:tamo iyanomo elawo dikametiyyala epono watodawama: keda:wenama; modobola a:ma: wade wokinomodo ibi nemagatalenakiye. Ega:walo ebete a:ma:tamo iyanomo elawo dikametiyyala ebenu nilakapo

epetapiatamo kawokalima:wenama;, modobola a:ma: ebe nilakapo iba:tamo kalakalago nawokaliminakiye.

*Epo Nilakapolo Malagidilole Tanalo*

<sup>9</sup> Ebema: modobola la: nanitabokobi midipiate lumagi kapiya idi masigia:no epo epetapi bilibilinomatamo nilakapo nawokaliminakiyala;, ega:walo kuba osiyodilole tanaloma: kawonomamo ubia:noma: eba eda:onalowade osiyodilo tanalo kodakodalo natila:niyala:. <sup>10</sup> Nanitabola, la: Kelisoko magumulo kapiya alailaema: eda:onamata, ebema: la: magumulo epetapiate epetapi nilakapolo eba malagidilolenalo, la: a:ka:tuwa: la: opamo alomolo la:imano woki magumulo epetapi unamo nowadipalatenakiyala:. <sup>11</sup> Ega:walo la: damolama: eda:oa:no Kawodawa Ya:sukono woko la:imano tepo magumuno elawo kawonomago nosiyodilonala:. <sup>12</sup> Iyo, ebeno pe tanaloma: olowiolo eba ilukulinalo nekalakalaonala;, ega:walo temeteme tanalate la:tamo demaimioma:na;, la:imano nanitabokobi midi magumulo kodakodalo eba lamota:onalowala: Godago tabo gela akoatepanala:. <sup>13</sup> Ebene ebeno epo magumulo piyate modoboa:noma: deda:ona, modobola la:le ibi nowalubilinakiyala;, ega:walo kapela epo atumu eba walubililo bae ega:walo lao bai iba:tamo nikalamolenakiyala:.

<sup>14</sup> Ega:walo piyate Kelisoko mabuma: la:tamo temeteme dikalametana, modobola la: Godoko na:toweomenakiyala: ebete ibi wadenomamo kowalubilinama;, wiyasiya la:le ebe akoanala: ebete ibi gito ka:kubailaema:.

<sup>15</sup> Ebene piyate kalakala magumulo dilukulina modobola la: iba:go kapimiya nekalakalaonala;, ega:walo piyate temeteme magumulo dilukuliona modobola la: iba:go kapimiya niiminala:. <sup>16</sup> Ma kunu la: bilibilinomate kapimiya milolo eba ilukulinalo la: a:ka:tuwa: la: akowalogolenakala;, iyo, la: wato kawokawoma: eda:oa:no kawokawo mailoa: epago namutupima: neda:iyala:.

<sup>17</sup> Ebema: lumagi idite a:ma:tamo kuba dosiyodilomene ebeno kubama: akowiyala;, wiyasiya epo bilibilinomate wadenoma: degelanaka ebako wade tanalo kapiyate ebetamo nosiyodiliye. <sup>18</sup> Ega:walo kebe tetelo epate a:ma: odiyoboa:no iba:go milolo kilukula:wenama;, modobola a:ma: ibi bilibilinomago kapimiya eba kunu nilukuliniyala:.

<sup>19</sup> Ebema: naimano wadewade namutupiala;, la:go gowelaopima: deda:ona iba:tamo kuba wiya akoikalama:la:. La: wiyasiya Godokono dowatanalo awokalimi tete nemakopela:la;, mabu ebeno Bukalo tabo idite ma kunu itana,

“Na Kawodawate gemo,  
na kapiyate kuba wiya ikalamedawala,  
ebema: epono kuba osiyodilole mabuma:  
nale naimano nani tetenomolo  
iba:tamo wiya kikalaemamo.”

<sup>20</sup> Ega:walo Godokono Bukalo tabo idite ma kunu kegena,

“A:ma:go da:gowelaona ebe lumagi bae kapete duimene,  
modobola a:ma: ebetamo bae nikamiye,  
ega:walo ebe obo kapete duimene,  
a:ma: ebe obamo na:kowalubiye.  
Nanitabola, me osiyodilo gabodo  
ebete ebeno kuba osiyodilole tanaloma: ilipo kelaemene.”

<sup>21</sup> Ebema: naimano namutudawa, a:ma: nanisiwale! Kuba osiyodilo tanalote lumagi idigodone a:ma:tamo da:pemaigamene, ebe kuba osiyodilo tanalamo akotuduwatata. Modobola a:ma: wiyasiya wadewade tanalo kapiya eba osiyodilolelo kuba tanalono wato kikopu ebo nelawiye.

## 13

### *Gabamaniatamo Tudila:o Tanalo*

<sup>1</sup> La: nanitabokobi midipi bilibilinomate gabamaniatamo na:tudila:onala, mabu gabamani wokopi bilibilinomo ibino gobebobamo ebe Godote alomiya. <sup>2</sup> Ebema: kebe lumagite ebeno kuba osiyodilo tanalodo gabamani wokodawa idino tanalo dodiyobomene, ebete gabamani ibino woko osiyodilo baiamo potele kalomiyale ebe Kawodawa Godoko atumu kodiyo-bomene, ebene ebete ebeno kuba osiyodilo tanalodo ebe a:ka:tuwa: ebe-tamo kuba wiya nanitabonomolo kadaemene. <sup>3</sup> Ebe nanitabola, kuba osiyodilolepiate gabamaniatamo na:toletoleona, wiyasiya wadewade tanalo dosiyodilolena iba:te ka:toletoleona. Ebema: namutudawa, a:ma: ubila:ka: tolea:no kokoliawenama? Modobola a:ma: wadewade tanalo kapiya nosiyodilolenakiye, ebene gabamaniate a:ma:tamo eba kalakalaolo a:ma: ebo kemoioma:ta, iyo, ebe mabuma: a:ma:godolo tole tanalote a:kitanamene.

<sup>4</sup> Nanitabola, gabamani wokodawa ebe Godokono wokodawala, ebete a:ma: mabuma: wade woko osiyodilona. Wiyasiya kebe tetelo a:ma:le kuba tanalo idi dosiyodilaemene, a:ma: ebe tanaloma: na:toletoliye mabu gabamaniate a:ma:tamo kuba wiya nanitabolo kikaema:ta, iyo, ebe dawate Godokono wokodawama: eba eda:nalo ebegodolo elawo bitana kuba osiyodilolepiatamo wiya ikalaema. <sup>5</sup> Ebema: modobola la: bilibilinomate gabamaniatamo na:tudila:onala, mabu la:imano tepo magumuno mulo wokite la: eba kunu iyatulamenata, ega:walo diyala, la:le tudila:oa:no iba:godone temeteme tanalo da:belaema.

<sup>6</sup> Me mabuma: la:le gabamaniatamo ta:kese mani nikalamolenakiyala, mabu iba:te ebe maniamo ibino iyaiya woko bilibilinomo Godoko mabuma: osiyodilolena. <sup>7</sup> Iyo, gabamaniate epo totomu tabo keba kunu kanalenake, modobola la: iba:tamo eba kunu iyaiya ta:kese mani modobolo nikalamenakiyala, ega:walo modobola la:imano tepo magumuno wokilo la: a:ka:tuwa: la: opamo eba alomolo gabamani wokopi bilibilinomo unamo nowadipalatenakiyala.

### *Epo Nilakapolo Malagidilole Tanalo*

<sup>8</sup> Ega:walo me tanalo idila. A:imano modoboa: tetelo namutudawa idigodone mani eba lawitalo a:ma:le ebetamo walo ka:kikama:ema: danatia, modobola a:ma: samonomamo na:ka:wiye, ebene a:ma:le ebako gabodo mani walo akolawa:la. Wiyasiya numa:la:, la: nanitabokobi midipino iyaiya modoboa: tanalo magumulo, idite iditamo, idite iditamo nilakapolo gito dikameteua:wenakoma, talena puliyala. Nanitabola, lumagi idino modoboa: tetelo a:ma:le ebe nilakapoimilo gito dowaluba:emene, ebako nilakapo kimalagidilo tanalodo a:ma: Godokono Totomu Tabono tanalo bilibilinomamo ka:tuduwatama:ta. <sup>9</sup> Numa:, Godokono Totomu Tabo bilibilinomate me kapiya totomu magumulo ba:pola:na, me kawo totomu ma kunula, "A:ma: a:ka:tuwa: a:ma: demalagidilawena, modobola a:ma:le eba kunu a:ma: niyakabolo dokolina ebe lumagi nilakapolo nemalagidilona." Ebema: lumagite me kawo totomu tabo kapiya kodakodalo eba atila:nalo, totomu tabo epetapi wakalami gabote ebegodolo a:kitanamene, iyo, ebete dubu idino kamiyale pilolo a:kelaemene, ega:walo



lumagi idi gito akanakapuimene, ega:walo inamabu idi pilolo a:kelaemene, ega:walo lumagi idino inamabu uwatema: ubi a:kiyatimene. <sup>10</sup> Nanitabola, nilakapo kimalagidilo tanalote lumagigodolo eba itanalo, ebete kuba osiyodilo magumulo idawatamo temeteme kikamenakoa:, me mabuma: kebe lumagite epetapi nilakapolo malagidilole totomuamo nanitabonomolo da:tuduwatanako, ebete ebe tanalodo atumu Godokono totomu tabo epetapi bilibilinomamo a:ka:tuduwatanako.

### *Alo Magumulo Ilukuli Tanalo*

<sup>11</sup> Nale me iyaiya tanalo la: analemata, mabu na ubila la: me teteno tanalo ma kunu niyatawala:, tete nanitabonomolo a:pe la:le u lao tanalone kemaimiaema:, mabu a nanitabokobi midipino igilo mula: tetete netatali. Numa:la:, dopamo ale aimano nanitabokobi midi tanalo Ya:sutamo diy- atiyama:, ebe tetelo aimano igilo mula: tanalono maiga tete muludopolo itanami, wiyasiya me tetelo tatalinomoma: edi. <sup>12</sup> Iyo, egela walo tete eba tatalilo idoko teteno ilibubute nolopoligo, ebema: modobola ale idoko teteno kuba osiyodilole tanalo iyabaiamo alomote, ale alo teteno gowela tanalo kosiyodiloma: modobo inamabu ka:pupulimalema:. <sup>13</sup> Ebema: ale egelano alo magumulo eba ilukulinalo, epetapiate aimano wadewade osiyodilole tanalo kapiya bulamenakoma:na. Ma kunu a nanitabokobi midipiagodolo kuba ilipo soliyomu osiyodilo tanalo ega:walo gamoda nio tanalo, buwelemele pilo tanalo ega:walo iba:tamo ilipo tabo gela tanalo, gowelao tanalo ega:walo dowo tanalo, ebe kuba tanalo bilibilinomate agodolo akopola:nala:. <sup>14</sup> Ebema: modobola la:imano kateneno ubi tanalamo tudila:o tanalote eba olopoligolamelolo, la:le wiyasiya Kawodawa Ya:su Kelisokono wadewade kaliku na:pupula:la:.

## 14

### *Lumagi Idite Ebedo Nanitabokobi Midi Tanalone Tanalo Idi Dosiyo- dilomene, A:ma: Ebe Tanalo Kubama: Akogeala:*

<sup>1</sup> La: nanitabokobi midipi magumulo potele elawoa:noma: deda:na, modobola a:ma:le ebe nilakapo kimalagidilamo nelawiye, ebene ebete ebene nanitabokobi midi tanalone kebe iyaiya tanalo kosiyodilolenakole, a:ma:le ebe tanaloma: eba:go akoapamineua:la:. <sup>2</sup> Ebema: numa:la:, nanitabokobi midi dawa idite ebene nanitabokobi midi magumulo elawoma: deda:na, ebete olowame baiamo tote, piyate ida:da:li amamalateleno katene inamabu dapalomonaka, ebete ebako inamabu laema: talenama: kegena:. Wiyasiya idawate ebene nanitabokobi midi magumulo elawoa:dopoma: eba eda:nalo, olowame baine pali inamabunomo uwatenako mabu ebe inamabu ida:da:li amamalateleno inamabua:. <sup>3</sup> Ebema: dopo lumagite inamabu bilibilinomo nao talena:noma: eba genalo, wiyasiya ebene nanitabokobi midi ekawite inamabu idi na talenama: degemene, ebete ebe tanaloma: ebene ekawino woki kubama: akogeala:. Ega:walo potele inamabu idi na talenama: degemene, ebete talena:noma: gedawano osiyodilo tanalo atumu kubama: akogeala:, mabu Godote ebe nilakapo kimalagidilamo iyalo elawiya. <sup>4</sup> Eiye! Mabu keleka: a:ma:le Godokono wokodawa idino tanalo danagiyamidama:wenaka? Ebe lumagino woko Namutudawate a:ka:tuwa: ebene tanalo eba anagiyamidamelolo wadenoma: da:begemene o kubama: da:begemene, wiyasiya a:ma:lea:! Numa:, Kawodawa Godokono elawo modobola ebe wokodawatamo walubi tanalo iyatima:, ebema: nanitabola, ebete ebene nanitabokobi midi magumulo a:kegamene, wiyasiya ebete kodakodalo kutitamene.

<sup>5</sup> Ega:walo me tanalo idila. Nanitabokobi mididawa idite Godoko amamatema: kapiya egela kawonomamo malagidilonako, ebema: ebete ebe egela talenama: eba genalo epatamo talena ebo iyatinako, iba:te ebe egelalo ibino iyaiya woko osiyodilole tanalo ega:walo kalakala tanalo kosiyodilolema:. Wiyasiya lumagi idite Godoko amamatema: egela bilibili-nomo modoboma: eba genalo kapiya egela idi iyanomo talena egelama: ka:midina:. Ebema: me tanaloma: la:imano sosi epono iyaiya wokite da:pola:lamena, la: magumulo idite idawano wokino tanalamo gito akotuduwatala:. Ao, modobola la: bilibilinomate ma kunu nosiyodiliyala:, lumagi idino nanitabokobi midi tanalote ebena tepo magumulo keba kunu kiyatuminale, ebe a:ka:tuwa: ebe woki kodakodalo lawete aimano Kawodawa kowalagonama: eba kunu nokolinamene. <sup>6</sup> Iyo, numa:la:, la: magumulo potele egela idi kawoma: degena, ebete lumagi idino tanalo malagidilola:no aimano Kawodawa kapiya adipatema: ebe egela talenama: midinako. Ega:walo potele olowame bailo katene lawete denanako, ebete atumu aimano Kawodawa kapiya malagidilolo osiyodilonako, mabu ebete ebe nao inamabuma: Godotamo kalakala tabo adipatenako. Ega:walo potele ebe katene nao talenama: degena, ebete atumu aimano Kawodawa kapiya malagidilolo nao inamabu epetapino tanaloma: kalakala tabo ebetamo eba adipatelo, wiyasiya ebe katene inamabu iyabaiamo gito iyatinako.

<sup>7-8</sup> Ebema: la: me kawo tanalo nemalagidilala:, a nanitabokobi midipiate me opolo eba ilukulinalo, a a:ka:tuwa: a kekalakalalaiaema: aimano iyaiya ubi tanalo osiyodilole modoboa:, mabu a aimano Kawodawa kowalagonama: bilukulinama:. Ebema: ale aimano nanitabokobi midi mabuma: da:elaoma:, ebe tanalo atumu aimano ubi gabodo a:kosiyodiloma:, ale aimano Kawodawa kowalagonama: ka:elaomalema:. Ebema: ale dilukulinama: o ale da:elaoma: ebe tanalo kawo tanalola:. Kawo tanalo ebe ale Kawodawano epoma: deda:onama: ebe tanalola.

<sup>9</sup> Nanitabola, Kelisote ebe mabuma: a:e magumune walo igilamo a:kemaigiya, dopamo da:elaiya ega:walo me tetelo igilolo dilukuliona ebe epo bilibilinomono Kawodawama: keda:nama:. <sup>10</sup> Ebema: mabu keleka: a:ma:le a:imano nanitabokobi midi ekawino tanalo danagiyamidama:wenaka? Ega:walo beda: mabuma: a:ma:le ebena tepo magumuno woki kubama: degeawena? Numa:, a bilibilinomate Godokono ololo apulo eba lamota:onalo ebe kapiyate aimano tanalo ebo kanagilameleaemene.

<sup>11</sup> Ebe mabuma: Godokono Bukalo tabo idite ma kunu itana,

“Na ebe uwomua: tetelo dokolinamo  
 ebe Kawodawala,  
 ebema: na nani tabonomo gemo,  
 epo bilibilinomate pupamo eba pilukulilo  
 na ebo kapamamanatenema:na:  
 Iyo, na nani Godoma: deda:nama,  
 ibi bilibilinomate ebe tanalo  
 ibino tabamo kapawokalima:na.”

<sup>12</sup> Ebema: me tanalo ebe kawo tanalonomola, Godoko kapiyate a bilibilinomono tanalo eba anagilameleamelo, ale aimano iyaiya kuba osiyodilole wiya uwatelo ebe odiyoboma: ale tabo idi gelama: a:ka:modoboma:.

*A:ma: Nanitabokobi Midi Ekawi Idino Agowa Ukamidadawama: Akoeda:la:*

<sup>13</sup> Ebema: modobola a nanitabokobi midipi magumulo idite idino tanalo anagiyamidame tanalote nolopoligoaemene. La: wiyasiya me tanalo nemalagidiliyala; la: magumulo idite ebena nanitabokobi midi ekawino agowa ukamidadawama: akoeda:la: ebete gakapoma: <sup>14</sup> Nanitabola, na Kawodawa Ya:suko magumulo eba okolinalo me wokite nagodolo kawonomoma: eda:na, nao inamabu bilibilinomo magumulo Godote inamabu kapiya idi talenama: kegena; wiyasiya kebe tetelo lumagite ebena nanitabokobi midi tanalone inamabu idi talenama: degemene, ebe tetelo ebe inamabute ebetamo daleyama: keda:mene. <sup>15</sup> Ebema: a:imano nanitabokobi midi ekawite kebe inamabu talenama: degena, a:ma:le ebe inamabu eba nitalo ebena woki da:kubaimene, a:ma:le ebe tanalo nilakapo kimalagidilamo kosiyodilawita: Eiyee! A:ma: bae nao magumulo ekawino agowa ukamidadawama: akoeda:la; mabu Kelisote ebe lumagi mabuma: atumu a:ka:iya! <sup>16</sup> Ebema: a:imano nanitabokobi midi tanalone kebe tanalo osiyodiloma: modoboma: degeawena, a:ma: ebe tanalo eba osiyodilutalo lumagi idino agowa dukamidama:emene, ebe tanalo modoboa: Mabu keleka: a:ma:le tanalo idi a:imano tuputupu wokilo eba osiyodilutalo, epetapiate ebe tanaloma: kubama: degelita? <sup>17</sup> Numa:, Godote Kawo Elawodawama: deda:na ebe tanalono magumu ebe nao tanaloo: ega:walo nio tanaloo:! Ao, ebena Uliyanate nanitabokobi midipiatamo dikalamena, ebe tuputupulo okoli tanalo ega:walo milo tanalo ega:walo kalakala tanalo, ebe iyaiya tanalo ebe ebena Kawo Elawodawano tanalono magumula. <sup>18</sup> Ebema: lumagi idite eba kunu Kelisotamo woko eba osiyodilonalo ebena nanitabokobi midi ekawino agowa ukamidamea:no, Godote ebetamo nanitabolo kekalakalamene ega:walo epate atumu ebetamo ka:kekalakalaoma:na:

<sup>19</sup> Me mabuma: modobola ale aimano woki kawonomamo milo gabo kapiya bowaloma:tanama; ale eba kunu idite idi kowalubi, idite idi kowalubi, ale nanitabokobi midi magumulo kapepeoma: <sup>20</sup> Ebema: Godote kebe wade woko lumagi idi magumulo dosiyodilona, a:ma:le a:imano bae nao tanalamo ebe woko akokubaima:la: Nao inamabu bilibilinomo talena:nola, wiyasiya a:ma: inamabu idi eba nitalo nanitabokobi midi dawano agowa ukamidadawama: deda:emene, Godote ebe tanaloma: kubama: kegemene. <sup>21</sup> Wiyasiya kebe tetelo osiyodilo tanalo idima: talena nanitabolo itana:no, ebena a:ma:le a:imano nanitabokobi midi ekawi eba malagidilolo a:ma: a:ka:tuwa: a:ma:tamo talena diyata:wenakomene, Godokono umi magumulo a:ma:le wade tanalonomo bosiyodilonakoma:ta, mabu a:imano tanaloma: ekawite ida:da:li amamateleno katene nao tanalodo o elawo da:imi obo ni tanalodo o ebako iyaiya osiyodilole tanalo idido agowa a:kukamidamene.

<sup>22</sup> Ebema: ebako iyaiya osiyodilole magumulo Godote a:imano nanitabokobi midi tanalodo tanalo idino talena: tanalo a:ma: diyatumitana, modobola a:ma: ebe tepo magumuno woki epetapiatamo akoawokalima:la: Numa; kebe lumagite ebena nanitabokobi midi tanalone ma kunu diyatawana, ebena osiyodilole tanalo bilibilinomo magumulo ebete Godokono da:peso talena idi kapiya kadikamidalena; ebema: ebete nekalakalamene! <sup>23</sup> Wiyasiya ebete ebena tepo magumulo inamabu idi nama: talenama: eba genalo gito denamene, kuba wiya ebetamo ka:pemene mabu Godote ebetamo dikamiya, ebete ebe tepo magumuno nanitabokobi midi tanalamo ka:tuduwata: Nanitabola, lumagite ebena tepo magumuno nanitabokobi midi tanalamo tuduwata:noma: eba editalo tanalo idi dosiyodilomene, Godokono umi magumulo ebe tanalote ele gabo

odidi tanaloma: keda:mene.

## 15

*La:le Epetapi Malagidilolea:no La: A:ka:tuwa: La:imano Tanalo Kapiya Akomalagidilolenala:*

<sup>1</sup> Ebema: nanitabokobi midipi magumulo a piyate elawoelawopima: deda:onama:, modobola ale aimano elawoelawoa: nanitabokobi midipi ekaki eba walubililo, iba:te kodakodalo kelamota:onama: a a:ka:tuwa: aimano tanalo kapiya a:kemalagidilolenama:. <sup>2</sup> Iyo, a bilibilinomo magumulo idite ebena osiyodilole magumulo ebena ekawi wadenomamo eba walubilo ebe nekalakalaimene, ebete ebena nanitabokobi midi magumulo wadenomamo kapema:. <sup>3</sup> Numa:la:, Kelisote eba kunu wagenlenaki, iyo, ebena osiyodilole magumulo ebe a:ka:tuwa: ebena tanalo kapiya kemalagidilonamia:, ebema: ebete Godokono Bukalo ebena tanalo iyalo ma kunu awokalimiya, “Godo, epate kebe tanalamo a:ma: kemalogotanaka, nale a:ma:tamo tuduwata magumulo ebe atu tanalate natamo na:kemaimiona.” <sup>4</sup> Nanitabola, Godote ebena Bukamo kebe iyaiya tabo dopamo dakuloliya, ebe tabono tanalo bilibilinomate a iyatuaema: pola:na, iyo, ale ebena Buka apuapuno tabone walubi elawo lawete temeteme magumulo kodakodalo eba lamota:onalalo, aimano nanitabo kalakala tetete ka:pema: olowiolo makopelenama:.

<sup>5</sup> Ebema: potele ebena nanitabokobi midipiatamo kodakodalo lamota:ona tanalo ega:walo walubi elawo tanalo dikalamena, modobola ebe Kawodawa Godote la: nowalubilima:ta, la:le Ya:su Kelisoko eba waloma:talo woki kapiyama: keda:wenama:. <sup>6</sup> Me gabodo la: bilibilinomate la:imano tabo madodo kapiyama: eba midilo, aimano Kawodawa Ya:su Kelisokono Nabiwi Godoko ebo kemoiomamota.

*Yua:piate Godoko Moio Tanalo*

<sup>7</sup> Ebema: epetapiate la:imano tuputupu ilukuli tanaloma: Godoko kemoioma:, modobola la: magumulo idite idi nilakapo kimalagidilamo nelawenakiyala:, Kelisote la: nilakapolo keba kunu kuwatetiyala eba kunu. <sup>8</sup> Nale la: analemata, Kelisote a Yu epatamo wiya: wokodawamu piya, Godote aimano ewoni nabiatamo kebe nani tabo dopamo ka:kiyawaonakile ebe tanalate ebena osiyodilole magumulo nanitabonomolo kapawokalaoma:. Ega:walo Kelisote Godokono nanitabo tanalo eba kunu eba pawokalimilo, <sup>9</sup> ebe tanalodo ebete la: Yua:piatamo atumu gabo a:posiyodiliya la:le Godokono nilakapo tanaloma: ebe kemoiawenakoma:. Ebe tanalo awokalima: Godokono Bukalo tabo idite ma kunu itana,

“O Godo, nale Yua:pi magumulo eba utitalo,  
naimano kalakala tabo a:ma:tamo ebema: adipatenakomo,  
iyo, ibi magumulo nale a:ma: amamate oale alapionakomo.”

<sup>10</sup> Ega:walo Godokono Bukalo tabo idite na:kegena,

“La: Yua:piala:  
modobola la:le nanitabokobi midipi epetapiago  
kawonomamo nekalakalaonala!”

<sup>11</sup> Ebene Godokono Bukano tabo idite ma kunu kitana,

“La: Yua:piala:, Kawodawa Godoko nemoiala;  
iyo, iyaiya opo epo bilibilinomate  
ebe amamate oale nalapioma:na:!”

<sup>12</sup> Ega:walo tete idilo Aisayate Godokono Bukamo tabo ma kunu akuloliya,

“Da:ibidikono nabiwi Yesiko,  
ebeno walone gudi magumune  
Kawodawa idite kapawokalamene.

Ebene Yua:piate ebene ubi tanalamo ka:tudila:onama;  
Godote ebe ebene Kawo Elawodawano gobebobamo kiyatimene,  
ebema: iba:te ibino igilo mula: tanalo ebegodone kelaema:  
ebeno pe tanaloma: olowiolo bilukulionama:na:.”

<sup>13</sup> Nanitabola, Godote elawo nanitabokobi midipiatamo ikalamiya iba:te ibino igilo mula: tanalo nanitabolo laema: olowiolo kilukulionama:. Ebema: modobola ebete la: Yua:pino nanitabokobi midi tanalodo la:imano tepo magumu kawo kalakala tanalamo ega:walo milo tanalamo netabokailaemene, ebene la:le ebene Uliyanano elawamo olowiolo okoli tanalo magumulo kawonomamo kapepeomamota.

*Polote Iyaiya Tabo Epetapi Tolea:no Loma Epo Da:kiyawaolamiya Ebe Tanalono Mabu*

<sup>14</sup> Naimano nanitabokobi midipi ekakiala:, niyaniyata. Naimano tepo magumulo niyatawanamo la:godolo wadewade osiyodilole tanalo ega:walo kawokawo iyatawa tanalo tabokaonomola, iyo, la: magumulo idite idi mula tanalamo iyatuima: modobola. <sup>15</sup> Wiyasiya na me leta eba osiyodilole, la:le kebe iyaiya tanalo dopamo kiyatawawiyama nale tolea: tanalago ebe atu tanalo la: ebe kiyatulaemata, mabu Godote ebene nilakapo tanalodo na elaweniya, <sup>16</sup> nale Ya:su Kelisokono wokodawama: eba eda:nalo la: Yua:pino mabuma: ebene woko kosiyodilonama:. Iyo, Godotamo kalimagono ikameodawa keba kunula:ka: na ebako dawama: eba eda:nalo, nale Yua:pi kalimagono inamabumu midilite ebetamo ebo nikameonakomo. Ebema: naimano ubi tanalo ma kunula, Godote ebe nanitabokobi midipi Yua:pi nagodone kalakalago eba uwatelo, ebene Uliyanate ibi ebene talena wokopima: ebo ka:midilimene.

<sup>17</sup> Ebema: na Ya:su Kelisoko magumulo Godotamo me woko eba osiyodilonalo, ebe mabuma: amamanamo. <sup>18-19</sup> Numa:la:, Kelisote nado kebe wade wokonomo Yua:pi mabuma: kosiyodilonamile, na ebe kapiya tanaloma: tabo tolea:no ka:kiyawaomamo. Ebe woko ebe nale tabo kiyawao tanalamo ega:walo apa:mo osiyodilole tanalamo, iyo, Godokono anoano osiyodilole tanalamo ega:walo ebene Uliyanano elawo tanalamo dosiyodilonaimo, me ebe wokola. Ega:walo naimano woko ebe nale Yua:pi Godotamo eba magatalelo iba:te ebetamo da:tudila:ona ebe tanalola, ebema: nale Kelisokono Wade Tabo kiyawao tanalago tote Yelusalema kawo duliyoumolone wagilimite Ilikama mulu opamo gito nemaigimo, iyo, ebe woko kawonomo nale nanitabonomolo opolimo. <sup>20</sup> Nanitabola, na ubi kawonomamo ma kunu iyatinaimo, nale Kelisoko iyatawa:piatamo ebene Wade Tabo ka:na:kiyawaonakoma:, mabu na ubia:nola lumagi idite dopamo dowagilimi ebe woko unamo woko walo ka:nosiyodiloma:. <sup>21</sup> Numa:la:, Godokono Bukalo tabo idite ebe tanalo awokalima: ma kunu itana,

“Dopamo piyate Kawodawano tanalo kiyatawaiya;



iba:te ebena tanalo kuima:na;  
 ega:walo piyate ebena tabo dopamo kolowiya;  
 iba:te walone tetelo wadenomamo kiyatawaoma:na.”

*Polote Loma Kawo Duliynomolamo Toma: Ebena Nopo Dawokalimiya*

<sup>22</sup> Ebema: nanitabola, dopamo tete bilibilinomo epetapilo nale la:tamo pema: dowagelenakimo, gabote wiyasiya natamo mopilo itananaki. <sup>23-24</sup> Wiyasiya me tetelo me tatali opo bilibilinomolo woko opoliyalimo, ebema: na ubila nale Spa:ini opamo wokoma: eba petolo gabo tetelo la: pulaema: . Nanitabola, ulama bilibilinomo epetapilo la: mabuma: ubi ma kunu iyatinakimo, ebema: tete tatalila na la:go kalakalago eba pokoliatepalo, modobola la:le na ebo kowalubinimamota nale naimano oli woko baiamo ka:toma: . <sup>25</sup> Me tetenomolo nale wiyasiya la:tamo pea:no dopamo Yelusalema kawo duliynomolamo ka:tomamo, Godokono epate ebolo dilukuliona ibi ka:nowalubilima: . <sup>26</sup> Mabu Ma:sadoniya opo ega:walo Guliki opolo dilukuliona, ebe sosi epate ibino ubilo nilakapo eba awokalimilo mani ebo alomiya, Godokono epate Yelusalemalo dilukuliona ibino nigologolopi kowalubilima: . <sup>27</sup> Nanitabola, iba:te Yu epono nigologolo epo epetapi kowalubilima: ibino ubi tanalo kalakalago diyatiya, ebe tanalo ebe modobo wokila. Iyo, dopamo Yu epate Yua:pino igilo mula:le mabuma: iba:tamo Godokono tepo magumuno wadewade tanalo wiya:no gito ikalamiya, ebema: modobola me tetelo Yua:piate ibino nilakapo mani-amo ega:walo inamabuamo Yu epo gito nowalubilima:na: .

<sup>28-29</sup> Ebema: naimano tanalo ma kunula. Yua:piate nilakapolo dalomoiya, nale ebe mani kawodopo Yelusalema duliynomolo epatamo eba pikalamelo, ebe walubi woko iba:tamo popoliyate nale Spa:ini mulu opamo to ebo kowagilimamo. Ebene gabo tetelo nale la:tamo da:pemaigamo, na iyatawala nale la:go eba pokoliatepalo, Kelisote nado ebena iyaiya kalakala tanalamo la: ebo ketabokailamolema:ta.

<sup>30</sup> Naimano nanitabokobi midipi ekakiala:, nale Godokono Uliyanano nilakapo tanalamo la: aimano Kawodawa Ya:su Kelisoko magumulo ma kunu toweolaemata, nale naimano tanaloma: Godotamo keba kunu ka:towetoweonakomo, modobola la:le nago kapimiya atumu na elawonomamo nadipanateniyala: . <sup>31</sup> Ebene nale Yudiya opamo da:tomo, modobola la:imano towetowe tabono walubi tanalodo Godote na ebolo na:ga:lunatenemene nanitabokobi midia:piate na kubainamekapoma:, ega:walo ebena epate Yelusalemalo dilukuliona, nale nanitabokobi midipi epetapino nilakapo mani iba:tamo da:nikalaemo, ebete ebe tanalodo ibino kalakala kawokobi na:midililaemene. <sup>32</sup> Ebema: nanitabola, Godote ubi diyatimene, na ebe tanalone la:tamo kawo kalakalago pete naimano uliyana apulo nale la:godolo wade ela kapamiatepamamo.

<sup>33</sup> Epatamo milo dikalamena, modobola ebe Godote la: bilibilinomagodolo nokolinamene. Me tabo ebe nanitabonomola, taula.

## 16

*Polote Leta Uwomu Apulo Iyaiya Nilakapo Tabo Ebena Namutupiatamo Da:kiyawaiya*

<sup>1</sup> Ebema: a nanitabokobi midipino naniko Pibikono tanaloma: na Polote la: analemata, ebe Senekiliya duliynomolono sosi watowatopi magumulo wade walubi kamiyale idima: eda:na. <sup>2</sup> Ebete la:tamo da:pemaigamene, modobola la:le Kawodawano mailamo ebe kalakalago eba lawelo, modoboa: tanalo idi ebegodolo duma:ema ebetamo gito nikamiyala:, mabu Godokono epate

ebako osiyodilo tanalodo ebena wadewade ga:limapi gudima: eda:ona. Nanitabola, dopamo tete bilibilinomo epetapilo na ega:walo epo epetapi bilibilinomo ebete a wadenomamo walubinaki.

<sup>3</sup> Ega:walo nale Pilisilako Akuilako iba:tamo nilakapo tabo palibomo, nanitabola, iba:te Ya:su Kelisoko magumulo nago wade woko osiyodilonaka.

<sup>4</sup> Iyo, tete idilo iba:te na mabuma: ibino igilo atutulatelema: negeliya ebe tanalo kawo tanaloo:, ebema: ibino katene apa:mo tatalila a:elama:, ebe mabuma: na ega:walo Yua:pino sosi epo bilibilinomate iba:tamo nekalakalaonama:. <sup>5</sup> Ega:walo kebe nanitabokobi midipiate ibino motolo daladabutinaka, naimano nilakapo tabo iba:tamo atumu nakapalibomo.

Ega:walo naimano wade lumaginomo Epinitasitamo nilakapo tabo kapalibomo, ebe A:isiya opo kawonomolo Kelisoko nanitabokobi midipi magumulo dopo lumagima: ediya.

<sup>6</sup> Ega:walo naimano nilakapo tabo Ma:litamo nakapalibomo, ebe la: mabuma: woko elawonomamo dosiyodilonami ebe kamiyalela.

<sup>7</sup> Ega:walo naimano Yu epo netewa dubu A:ndolonaikasiko ega:walo kamiyale idi Yuniyasiko, iba:tamo naimano nilakapo tabo atumu nakapalibomo. Iba:te Ya:sukono alibolepi magumulo kawokawopima: eda:ona, nanitabola, iba:te dopamo nago idoko motolo ilukulinamiya, ega:walo nale Kelisoko nanitabokobi midia:no iba:te dopamo ebetamo olobiliya.

<sup>8</sup> Ega:walo A:mapiliyatasitamo naimano nilakapo tabo kapalibomo, ebete aimano Kawodawa magumulo naimano wade namutudawama: eda:na.

<sup>9</sup> Ega:walo naimano nilakapo tabo Ebanasitamo nakapalibomo, ebe Kelisoko magumulo ago woko bosiyodilona, ebene naimano wade lumagi idi Sta:ikisiko ebete atumu naimano nilakapo tabo olowite nelaemene.

<sup>10</sup> Ega:walo Apilisitamo naimano nilakapo tabo kapalibomo, ebete ebena Kelisoko waloma:ta tanalo tolea:no iyalo awokaliminomo awokalimiya.

Ega:walo Alistabulasikono moto gu epatamo naimano nilakapo tabo atumu nakapalibomo.

<sup>11</sup> Ega:walo naimano Yu lumagi idi Elodiyanatamo naimano nilakapo tabo kapalibomo.

Ega:walo Nasisasikono moto gu epo magumulo piyate Kawodawa Kelisoko nanitabokobi midipima: deda:ona, nale naimano nilakapo tabo iba:tamo atumu nakapalibomo.

<sup>12</sup> Ega:walo Taipinako Taiposako iba:tamo naimano nilakapo tabo kapalibomo, me kamiyala:te Kawodawatamo woko wadenomamo osiyodilona.

Ega:walo nale naimano wade lumaginomo Pesisitamo naimano nilakapo tabo atumu nakapalibomo, ebe Kawodawatamo woko elawonomamo dosiyodilonami ebe kamiyale idila.

<sup>13</sup> Ega:walo Lupasitamo naimano nilakapo tabo kapalibomo, ebete Kawodawatamo woko elawamo eba osiyodilonalo wade mailonomo ebo lawiya, ega:walo ebena menokote atumu naimano nilakapo tabo olowite nelaemene, mabu ebete na ebena gudu idima: midiniya.

<sup>14</sup> Ebene Asinikitasiko ega:walo Pelegoniko, Emisiko ega:walo Pato-basiko, ega:walo dubu idi Emasiko, ibi ega:walo iba:go dilukulina nale ebe nanitabokobi midipi bilibilinomatamo atumu naimano nilakapo tabo kapalibomo.

<sup>15</sup> Ebene Pologasiko ega:walo Yuliyako, Neliyasiko ega:walo ebena ekawi buwele, iyo, Olimapasiko atumu ega:walo Godokono epo epetapi bilibilinomate iba:go dilukulina, iba:tamo nale naimano nilakapo tabo kapalibomo.

<sup>16</sup> Ebene la: daladabuta:ema, modobola la: bilibilinomo epetapiate epetapino koto uwateuilo na:wiyamidauiyala:. Nanitabola, iyaiya sosi epo epetapi bilibilinomate ibino nilakapo tabo la:tamo palibola:.

*Polote Ebena Iyaiya Uwomu Iyatulame Tanalo Da:kiyawaiya*

<sup>17</sup> Naimano nanitabokobi midipi ekakiala:, nale la: kawonomamo analemata, la: nanisiwale! Piyate nanitabokobi midipi magumulo anagiyamida tanalo eba osiyodilolelo epetapino nanitabokobi midi tanalo da:kubailamenaka, la: iba:go kapiyama: akoeda:oala:. Nanitabola, la:le wade wokiago dopamo duwata:wiya, iba:te ebe wadewade iyatulame tanalago gowelaona, <sup>18</sup> ebema: piyate ebako kubakuba tanalo dosiyodilolena, iba:te aimano Kawodawa Kelisotamo nani woko osiyodilola:no, ibino kateneno kubakuba ubi tanalo kapiyamo tudila:ona. Ebene piyate kuba osiyodilole iyatawa: gudimu dilukulina, iba:te ebako tuputupupi a:da: elemasigi mulo tanalodo eba walogolenalo ibino tepo magumuno woki ebo kubailamenaka. <sup>19</sup> Wiyasiya la:imano tanalo eba kunua:. Iyo, epo epetapi bilibilinomate iyalo olowiya, la:le Kelisokono nani tabamo da:tudila:wenama, ebema: la: mabuma: na kawonomamo kalakalanamo, ega:walo na ubila la: mulo wokido wadewade tanalo kapiya eba malagidilolenalo, kuba osiyodilole iyatawa: gudimu nilukulinala:.

<sup>20</sup> Ebene epatamo milo dikalamena, ebe Godote tete tatalila Saitanako la:imano agowa mabuamo ba:idilote, la:le ebe agowamo ebo ka:mikitamamota. Modobola Kawodawa Ya:sukono nilakapo tanalote la:godolo nitanamene.

<sup>21</sup> Ebene nago woko kapimiya dosiyodilona, ebe wadedawa Timotite naimano Yu namutupi epetapiago Lusiyasiko ega:walo Ya:isoniko ega:walo Sosipatako, iba:te ibino nilakapo tabo la:tamo paliba.

<sup>22</sup> Ega:walo me tanalo idila. Na Tetiyasite Poloko mabuma: me leta tabo akulolemo, ma kunu nale aimano Kawodawano mailamo naimano nilakapo tabo atumu la:tamo nakapalibomo.

<sup>23</sup> Ega:walo Ga:iyasite ebena nilakapo tabo kapalibo, ebena motamo sosi epate paladabutinaka, ega:walo na Polote eba:go eba okolinalo ebete na wadenomamo walubininako. Ebene me kawo duliyaomolono gabamani apulo mani dumina ebe dubu Elastasiko, ebete aimano nanitabokobi midi ekawi Katasiago, iba:te la:tamo ibino nilakapo tabo atumu nakapaliba.

<sup>24</sup> Modobola aimano Kawodawa Ya:su Kelisokono nilakapo tanalote la: bilibilinomagodolo nitanamene. Me tabo ebe nanitabonomola, taula.\*

*Polote Leta Uwomu Apulo Godoko Demoiya*

<sup>25</sup> Ebema: modobola a Godoko kowalogiye! Na Polote Ya:su Kelisoko mabuma: kebe Wade Tabo ka:kiyawaonakomo, Godote modobola ebe wade tanalamo la: nanitabokobi midi magumulo kodakodailaema:. Nanitabola, ebete dopamo tete geyageyanomolo kebe nanitabo tanalo kowaminanamile, me tetelo ebete ebe tanalo eba awokaliminalo na ebema: kiyawaonakomo. <sup>26</sup> Iyo, Godokono woki awokalimpiate ebena Bukamo dopamo dakulolenakiya, ebe iyaiya tabono tanalone ebena nanitabo tanalote me tetelo nawokalana, ebema: Uwomua: Igilo Godote a ebena wokopi na:totomuatenana, ale ebena nanitabo tanalo me opo epo bilibilinomatamo kanawokalima:, iba:te ebe nanitabokobi eba midinalo ebetamo ka:tudila:onama:.

\* **16:24:** Lom 16.24 buka apuno tabo Polote ebena letamo kakuloliya:, wiyasiya ebena leta osiyodilo walogabo apune nanitabokobi mididawa idite akuloliya.

<sup>27</sup> Ebema: Mulodawanomo ebe Godoko kapiyala. Modobola ebete Ya:su Kelisodo amama tanalo lawete, ebene ebe wade tanalote uwomua: uwomua: tetelo ebegodolo nitanamene! Me ebe naimano tabo uwomula. Taula.

## POLOTE DOPO LETA KOLINI SOSI EPATAMO OSIYODILIYA

<sup>1</sup> Na ebe Polotela, Ya:su Kelisote ebenu sosi wagilima: iyaiya opamo dali-boliya, ebe wokopi magumulo na idila mabu Godote ebenu ubilo na ebema: ka:na:miya. Na ega:walo a nanitabokobi midipino ekawi Sostenisiko, <sup>2</sup> ale la: piyate Kolini duliynomololo Godokono sosi epoma: deda:wenama, iyo, ebete Ya:su Kelisoko magumulo la: kebe epate ebenu wade-talenapima: keda:wenama: deka:la:mitia, ale me leta la:tamo paliboma:. Ega:walo piyate iyaiya opolo eba ilukulionalo aimano Kawodawa Ya:su Kelisote ibi kowalubilima: ebenu mailo deka:minaka, me leta ibi bilibilinomatamo atumu na:ka:toamene, mabu ibino Kawodawa ega:walo aimano Kawodawa, ebe kapiyala.

<sup>3</sup> Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta.

### *Polote Kolini Sosi Epono Tanaloma: Kalakala Tabo Godotamo Dadipatiya*

<sup>4</sup> Tete bilibilinomo epetapilo na la:imano tanaloma: Godotamo kalakala tabo adipatenakomo, mabu ebete Ya:su Kelisokono woko magumudo ebenu nilakapo tanalo la:tamo nanitabonomolo ikalamiata. <sup>5</sup> Numa:la:, la: Kelisoko magumulo eba ilukulinalo la:imano tepo magumuno walubi tanalo bilibilinomo ebegodone gito uwatimata, ebema: ebenu elawo ega:walo iyatawa tanalo la:godolo ba:pola:na, la:le iyaiya tete bilibilinomolo ebenu tabo wadenomamo ka:kiyawawenakoma: ega:walo ebenu woki wadenomamo kawokalima:wenakoma:. <sup>6</sup> Nanitabola, ale Kelisokono tanalo la:tamo da:pa:kiyawaima:, Godote ebe tabo la: Kolini sosi epono tepo magumamo iyatilametate ebo kodakodaimi. <sup>7</sup> Ebene aimano Kawodawa Ya:su Kelisokono tanalo awokalimi tete ka:pema: la:le kalakalago eba makopelenalo, ebenu Uliyanate ebenu woko kosiyodilonama: kebe iyaiya elawo epatamo kikalamenale, la:le ebe walubi tanalo bilibilinomo ebo uwatimata, iyo, ebe gito ikalame tanalo magumulo idi kapiya lawea: tanalote la:godolo kitana:. <sup>8-9</sup> Ebema: kalakala kawonomola, mabu Godokono osiyodilole tanalo bilibilinomo magumulo ebe nanidawanomola. Numa:la:, ebete la: nanitabonomolo eka:la:miata, la:le tuputupupinomoma: eba eda:onalolo Kawodawa Ya:su Kelisokono Kawo Egelalo la:le ebenu ololo apuamo eba kunu ka:nemaimiomamota. Ebema: nanitabola, la:le la:imano nanitabokobi midi magumulo uwomu teta:mo kodakodalo kelamota:wenama: ebete la: wadenomamo ba:buiyalatelenakoma:ta, iyo, ebete ebenu ubi iyalo iyatiya la:le ebenu Gudago kapimiya kalakalago kilukula:wenama:, ebe Gudu ebe aimano Kawodawa Ya:su Kelisotela.

### *Kolini Sosi Epo Magumulo Anagiyamida Tanalate Demaimiya*

<sup>10-11</sup> Naimano nanitabokobi midipi ekakiala:, nale Kalowikono moto epagodone tabo ma kunu olowimo, iyaiya apamineateui tanalate la:godolo ba:pola:na. Ebema: aimano Kawodawa Ya:su Kelisokono mailamo nale la: ma kunu analemata, la: Godokono ubi tanalo kapimiya kosiyodilola:wenakoma: woki kapiya nelawenakiyala: ebakobako iyaiya anagiyamida tanalate la: magumulo pola:nakapoma:, iyo, modobola la: la:imano tepo magumulo woki kapiyanomoma: neda:onalala:. <sup>12</sup> Numa:la:, naimano ubia: tanalo ebe ma kunula. La:imano sosi taneba magumulo la:



epetapi bilibilinomate iyaiya daedale woki tabo ma kunu gelanakomata, idawate na Polokono tanebadawama: bege, idawate na Apolosikono tanebadawama: bege, ebene idawate atumu na Pitakono\* tanebadawama: ba:kege, ega:walo idawate atumu ebene amama magumulo na Kelisokono tanebadawama: kegenako.

<sup>13</sup> Eiye! Kelisokono sosite ebene ape kapiyama: eba eda:nalo, la: epetapiate ebe ape iyaiya anagilaema: wagelenamata! La: epetapi naimano tanebapima: degelawenama, na ubia:nola. Numa:la:, na Polote la: mabuma: kewa olotolowalo ka:iya:, ebe mabuma: la:le la:imano obamo waduba:midaole tanalo delawa:ima, ebe tanalo Kelisokono mailamo laimata, naimano mailamoa!<sup>14</sup> Iyo, naimano kalakala bitana, mabu nale la: obamo kowaduba:midaoleta: wiyasiya la: bilibilinomo magumulo Kalisipasiko ega:walo Ga:iyasiko ebe dubu netewanomo waduba:midaolimo.<sup>15</sup> Ebema: la: bilibilinomo epetapi magumulo idite ka:modobona: mako daedale tabo gema:, obamo aduba:mida magumulo na Polokono waloma:tadawama: edimo.<sup>16</sup> Iyaiya! Woki idi natamo ka:ma: a:ka:pe, ma kunu la: magumulo nale Stepanasiko ebene moto epago atumu obamo a:kowaduba:midaolimo, ebene la:godolo idawa da:ba:lutale nale ebe obamo daduba:midimo, wiyasiya ebe dawano tanalo na nipo malagidilutamo.

<sup>17</sup> Nanitabola, Kelisote na iyaiya epatamo kaliboniya: nale ibi obamo ka:nowaduba:midaolema:, ao, ebe wiyasiya na ebene Wade Tabo kiyawaoma: aliboniya. Numa:la:, ebe Tabono elawo tanalo ebe Kelisote kewa olotolowalo da:iya ebe tanalono elawo awokalimi tanalola, ebema: nale me opo epono iyaiya mulo tabamo Wade Tabo kiyawao modoboa:, mabu kebe lumagite ebe tabo me opono mulo tanalamo da:kiyawaomene, Kelisokono a:e tanalono elawote ebe tabo kiyawao magumulo nanitabolo akawokalamene.

*Kelisoko Ebe Godokono Elawo Ega:walo Mulo Awokalilamedawala*

<sup>18</sup> Nanitabola, piyate ibino igilo mula: gabo anaetoamida magumulo Saitanakono ele gabo dodidina, iba:te nemalagidilona nale Kelisokono a:e tanaloma: da:kiyawaonakomo ebe tabo ebe daedale woki tabola. Wiyasiya a piyate aimano igilo mula: tanalo laema: nanitabokobi midi gabodo da:tolamenama:, aimano wokilo ebe tabo Godokono elawo awokalimi tanalola.<sup>19</sup> Ebe mabuma: Godote ebene Bukalo tabo ma kunu gena,

“Me opopiate kebe epo  
 ibino mulopima: degelana,  
 nale ebe dubuno iyaiya mulo tanalo  
 ka:kubailaemamo.  
 Iyo, iba:te sukulu magumulo  
 kebe kawokawo tanalo kiyatawaiye,  
 nale kegemamo ebe tanalo kawokawo tanalola:  
 ebema: iyabaiamo gito kalomomamo.”

<sup>20</sup> Me tabono magumu ma kunula, me opote uwomu teta:mo nemaiga:no epo bilibilinomo magumulo mulodawa kapiya idite nanitabolo a:kokolinamene, iyo, ibino kawokawo sukulu magumulo la:le iyatawadawanomo kapiya kuma:wenakoa:, ega:walo gabamani apulo dapaminatueinaka iba:te ibino daedale wokino tabo kapiya

\* **1:12:** Buka ka:la:mioledawa, modobola a:ma: niyatawa Pitakono mailo idi ebe Kipasetela.

kiyawaonaka. Ebema: nanitabola, me opo epate kebe tanalo wadewade mulo tanaloma: degelana, Godote ebe tanalo bilibilinomono daedale tanalo iyalo awokalimiya!

<sup>21</sup> Numa:la:, Godote ebena nanitabo mulo tanalodo gabo odiyobiya, me opo epo a:ka:tuwa: ibino mulo wokino tanalodo ebena nanitabo tanalo kiyatawaoma:. Ebe tetelo ebete wiyasiya ebena ubi tanalo ma kunu iyatiya, ale epatamo kebe Wade Tabo ka:kiyawaonakoma:, ebe Tabo iba:te aimano daedale wokino taboma: degelana, Godote ebe Tabo awokalimi tanalodo nanitabokobi midipino igilo nanitabonomolo na:mula:lelamena.

<sup>22</sup> Nanitabola, Yu epono tanalo ma kunula, ibi epetapi bilibilinomate negelana, iba:te Godokono elawo awokalimino anoano tanalo nanitabolo duaema:na: ebena tabo nanitabokobi ebo ka:midima:na:. Wiyasiya Yua:pino tanalo iyanomola, ibi epetapi bilibilinomate negelana, kebe tetelo iba:te tabo idi olowio tanalodo me opono iyaiya mulo tanalo diyatawaoma:na:, iba:te ebe tabo nanitaboma: ebo ka:midima:na:.

<sup>23</sup> A wiyasiya ebe nanitabokobi midia:pino iyaiya kubakuba woki-amo tudila:oa:no, Kelisote kewa olotolowalo da:iya ebe tanalo kawo tanalonoma: eba gelanalo ebe tabo epatamo ebo kiyawaonakoma:. Ebe mabuma: nanitabokobi midia:pi magumulo Yu epono tanalo ma kunula, iba:te Wade Tabo olowio anoano tanalo idi umia:no agowa ebo ukamidaolenaka, ega:walo Yua:piate atumu ebe Taboma: ubia:noma: eba keda:olo daedale woki tabono tanaloma: ebo malagidilonaka. <sup>24</sup> Wiyasiya kalakala kawonomola, Yu epo ega:walo Yua:pi magumulo Godote kebe epo ebena gudima: eda:oma: deka:la:miya, iba:te Wade Tabo olowio tetelo nanitabokobi eba midilo ma kunu ebo gelanaka, nanitabola, Kelisoko ebe Godokono elawo ega:walo ebena mulo awokalilamedawala. <sup>25</sup> Iyo, numa:la:, Godokono osiyodilole magumulo me opo epate kebe tanalo daedale wokima: kegelane, ebe tanalono mulote ibi bilibilinomono mulo tanalo nodoilina, ega:walo Godokono osiyodilole magumulo iba:te kebe tanalo elawoa: tanaloma: kegelane, ebe tanalono elawote atumu ibi bilibilinomono elawo na:kodoilina.

<sup>26</sup> Ebema: naimano nanitabokobi midipi ekakiala:, Godote la: ebena gudima: eda:oma: deka:la:mitia, ebe kalakala tetete pemaiga:no la: dopamo kebako epoma: keda:wenaima, modobola la: ebe tanalo wadenomamo nemalagidilala:. Nanitabola, la: nanitabokobi midipi bilibilinomo magumulo dopamo kapiyakapiyate me opo epono mulo wokino tanalamo ega:walo elawo tanalamo ega:walo dogodogo inamabu uwate tanalamo kawokawopima: eda:onaimata. Iyo, la: kapiyakapiyanomate Wade Tabo kalakalago eba lawelo, wiyasiya la:imano epo magumulo mulopi ega:walo elawoelawopi ega:walo inamabu dogodogopi ibi epetapi bilibilinomate ubia:noma: ebo eda:iya. <sup>27</sup> Numa:la:, me opo epate kebe epo muloa:pima: ega:walo dologala epoma: degelana, iyalo tetenomolo Godote ebe eponomo uwatiya, mabu ebete ebena ubi ebo iyatiya ebe osiyodilo tanalodo me opo epono mulopi ega:walo kawokawopiatamo ilipo kikalaeama:. <sup>28</sup> Iyo, me opo epate kebe epo kubakubapima: ega:walo epoa:ma: degelana, Godote ebako epo ebena gudima: keda:onama: uwatiya, mabu ebe ubila ebe ebena osiyodilo tanalodo kebe iyaiya tanalo me opo epate wadewadenonomoma: kegelane, ebe tanalo bilibilinomate olopoligote ebete ibino modoboa: tanalonomo ebo kawokalilaemene. <sup>29</sup> Ebema: nanitabola, me opo epo bilibilinomate Godokono ololo apuamo da:nemaimioma:na:, ibi magumulo idi kapiyate a:ka:modobomene ebe a:ka:tuwa: ebe kowalogoma:.

<sup>30</sup> Numa:la:, Godokono osiyodilo tanalodo la: me tetelo Ya:su Kelisoko magumulo ilukulinamata, la:imano osiyodilo tanalodoa:, iyo, ebete Kelisoko ebena mulo awokalimidawama: da:midiya, ebema: ebete ebe magumudo atamo nanitabo mulo woki ikaeamenako. Ega:walo me tanalo idila, me Kelisote a Saitanakono idoko moto magumune dowagaiya, ebe tetelo ebete ebena tuputupu okoli tanalo atamo ikaeamete a Godokono epoma: gito midiya. <sup>31</sup> Ebe mabuma: Godokono Bukalo tabo idite ma kunu itana, “Lumagite a:ka:tuwa: ebena osiyodilo tanaloma: akowalogala:, wiyasiya Godote ebe magumulo wade woko dosiyodilona, modobola ebete ebe tanaloma: eba kalakalalo ebena Kawodawa kapiya nowalogomene.”

## 2

### *Kelisote Kewa Olotolowalo Da:iya, Polote Ebe Tanalo Kolini Duliyaomolo Epatamo Dopamo Da:pa:kiyawaiya*

<sup>1</sup> Ebene naimano nanitabokobi midipi ekakiala:, dopamo nale la:tamo da:pemaigimo, ebe tetelo nale Godokono nanitabo tanalo la:tamo kawokalima: ebena tabo eba kiyawaolo nale me opo epono kawokawo iyatulame tabono tanaloma ega:walo ibino mulo wokino tanaloma ka:pa:kiyawaoa:, mabu na ubia:noma: edimo la:le na unamo kadi-panatena:ema:. <sup>2</sup> Ebema: nale la:go eba okolinalo naimano tepo magumuno woki ma kunu iyatimo, naimano osiyodilole tanalo bilibilinoma magumulo kapiyadawa unamo eba adipatenalo, ebena wade wokonomo kapiya ebo kawokalima:. Ebe dawa ebe Ya:su Kelisotela, ebena ebena wade wokonomo ebe ebete kewa olotolowalo da:iya ebe tanalola.

<sup>3</sup> Nanitabola, nale la: magumulo woko dosiyodilonaimo, ebe tete geyageyadopolo naimano ape elawoa:noma: eba eda:nalo, nale Godokono tabo la:tamo wadenomamo ka:kiyawaoma: tete bilibilinoma epetapilo na la:imano ololo apulo tole tanalago anakaminakimo. <sup>4</sup> Ega:walo me tanalo idila. Ebe tetelo nale Wade Tabono iyaiya tanalo la:tamo kawokalilaema: me opo epono mulo wokino tanaloma ka:kiyawaonakia:. Iyo, na iyatawimo nale me opono mulo wokino tanaloma la: diyatulametama, ebema: Godokono Uliyanate la: magumulo nanitabo woko a:kosiyodilomene, wiyasiya kebe tetelo ebete ebena elawamo la:imano tepo magumuno woki iyama: da:midililametamene, la: ebena woko osiyodilo magumudo nanitabokobi midipima: keda:omamota. <sup>5</sup> Ebe mabuma: la: me tanalo wadenomamo niyatawala:, la:imano nanitabokobi midi tanaloma mabu ebe Godokono elawo tanalola, me opopino mulo wokino tanaloma:

### *Godokono Uliyanate Ebena Mulo Tanalo Nanitabokobi Midipiatamo Dikalama*

<sup>6</sup> La: wiyasiya numa:la:, ale Wade Tabo da:kiyawaonakoma: ebe Tabono mulo tanalo nanitabolo bitana, piyate nanitabokobi midi magumulo wadenomamo dapepeona ibi kapiyate ebe mulo modobolo lawenaka. Wiyasiya ebe Tabono mulo tanalo me opo epate ibino wokilo kelawena:, ega:walo kebe kubakuba uliyanate me opolo elawoelawonomoma: deda:ona, ibi atumu ebe mulo tanalo modobolo kelawenakoa:, nanitabola, ebe kubakuba uliyanano elawo tanalote nolopoligona. <sup>7</sup> Iyo, ale Godokono Wade Tabo eba kiyawaolo, ebete dopamo diya gabodo dowaminiya ebe mulo tanalote nanitabokobi midipiatamo me tetelo nawokalana, mabu Godote me opo ega:walo tobolo unu osiyodilolea:no dopamo ebete ebena ubi tanalo ma kunu iyatiya, walone tetelo ebete ebena mulo wokino tanaloma a nanitabokobi midipi kowalogoemene.

<sup>8</sup> La: wiyasiya numa:la:, me opolo elawoelawonomoma: deda:ona, ebe kubakuba uliyanate ka:modobiya: Kawo Alonomago Okolidawano a:e tanalono nanitabo mulono magumu laema:. Iyo, iba:te ebe Kawodawano a:e tanalono magumu nanitabolo niyatawaiyataleka: iba:te ebe kewa olo-tolowalo akanakapumiyana:. <sup>9</sup> Wiyasiya Godokono Bukalo tabo idite a nanitabokobi midipino tanalo ma kunu awokalimina,

“Me opo epo bilibilinomate  
 dopamo kebe wade tanalo kuminakiye,  
 ega:walo iba:te kebe wade tanalo  
 dopamo kolowionakiye,  
 ega:walo iba:te kebe wade tanalote ka:pemaigama:,  
 ibino tepo magumuno wokilo  
 kemalagidilonakiye,  
 me tanalo Godote osiyodiliya,  
 piyate ebe nilakapolo demalagidilona,  
 ebe epo kapiyatamo kikalaema:.”

<sup>10</sup> Ebema: Godote dopamo dowaminiya, me tetelo ebete ebe wade tanalo ebeno Uliyanano elawamo atamo awokalimiya. Nanitabola, kebe tanalate Godokono tepo magumulo da:pola:na, ebeno Uliyanate ebe tanalo iyatawanomola, iyo, kebe tanalate wamina magumulo da:pola:na, ebe tanalo bilibilinomo atumu ebete modobonomolo ulamenako. <sup>11</sup> Numa:la:, lumagino tepo magumuno woki lumagi idite nanitabolo a:kiyatawamene, wiyasiya ebe lumagino uliyana kapiyate ebeno tepo magumuno tanalo iyatawala. Eba kunu Godokono tepo magumuno woki lumagi idite iyatawama: modoboa:, wiyasiya ebeno Uliyanana kapiyate ebeno tanalo iyatawala. <sup>12</sup> Me mabuma: me opolo dilukuliona ebe iyaiya uliyana magumulo Godote idi kapiya a nanitabokobi midipiatamo kikaeamiya:, ao, ebe wiyasiya ebeno Uliyananomo atamo ikaeamiya, ebene ale ebeno woko kosiyodilonama: ebete kebe iyaiya elawo atamo gito dikaeamiya, ale ebeno Uliyanano wokino tanalodo ebe walubi tanalo wadenomamo kiyatawaomalema:.

<sup>13</sup> Ebe mabuma: ale me opo epono mulo iyatulame tanalamo Godokono tabo ka:kiyawaonakoa:, ao, a wiyasiya ebeno Uliyanano iyatulame tabono tanalamo kiyawaonakoma:. Numa:la:, ale Godokono tabono iyaiya magumu tanalo ebeno Uliyanano walubi tanalamo dawokalilaema:, piyate ebeno wokilo demalagidilona iba:te ebe tabono iyaiya magumu tanalo wadenomamo kuwatema:na:.

<sup>14</sup> Wiyasiya potele Godokono Uliyanano wokilo malagidilona:no, ebe lumagi modoboa: Godote epatamo dikalamena ebe iyaiya elawo kuwa-tema:. Nanitabola, ebe lumagite Godokono gito ikame tanalo nanitabokobi midipiagodolo dulaemene, ebe tanalono mabu iyatawa:no epono daedale wokino tanaloma: ebo kemalagidilomene. Iyo, Uliyanate ebe walubia:no ebete ebe Uliyanano iyaiya woko osiyodilole tanalo wadenomamo a:kiyatawamene. <sup>15</sup> Wiyasiya la: numa:la:, potele Godokono Uliyanano wokilo demalagidilona, ebe lumagi modobola kebe tanalate ebe ega:walo epo epetapiagodolo da:pola:na, ebe tanalo bilibilinomo Uliyanano walubi tanalamo wadenomamo kanagilamelelaemene. Wiyasiya kalakala kawonomola, me opo epo magumulo lumagi idite modoboa: nanitabokobi mididawagodolo da:pola:na ebe tanalo kanagilamelema:, mabu Godote a:ka:tuwa: ebeno tanalo kanagilamelemene.

<sup>16</sup> Ebe mabuma: Godokono Bukalo tabo idite ma kunu gena,

“Dopamo wagilimi mabune lumagi idite  
 Kawodawa Godokono tepo magumuno woki  
 nanitabolo kelawenakia;  
 ebema: idawate modoboa:  
 ebe oli tanalo iyatuima:!”

A nanitabokobi midipiate wiyasiya Kelisokono tepo magumuno iyaiya woki bilibilinomo iyalo uwatiyama:

### 3

#### *Polote Kolini Sosi Epono Anagiyamida Tanaloma: Ibi Kawiya Danaliya*

<sup>1</sup> Naimano nanitabokobi midipi ekakiala; niyaniyata, nale la:tamo dopamo da:pemaigimo, ebe tetelo la: Godokono Uliyanano wokilo dilukuliona ebako epoma: keda:wenamia; iyo, la: Kelisokono okoli magumulo a:lia:li gudi keba kunula:ka: eba kunu eda:onaimata! Ebema: nanitabola, Godokono tabo iyatulame magumulo na ebe tabono kawokawo magumu tanalo la:tamo awokalilaema: ka:modoboa; wiyasiya la: piyate me opo epono wokilo dilukula:wenama nale la: ebako epomu eba malagidilolelo la: ebo walubilinakimata. <sup>2</sup> Iyo, ebe tetelo naimano iyatulame magumulo nale la:tamo nono kapiya ikalamenakimata, nale nani baenomo la:tamo ikalaema: ka:modobonakia:

Ebene tete geyageyadopo eba petolo, la: wiyasiya nanitabokobi mididi magumulo apepeoa:no, me tetelo la: ebe atumu nani baenomo naoma: ka:modobawena: <sup>3</sup> Numa:la; nanitabokobi midia:piate keba kunu kilukulione, la: eba kunu la:imano kateneno wokilo ilukulinamata, iyo, la: magumulo epetapiate epetapino mulo woki ega:walo inamabuma: eba dowao, iyaiya apaminatui tanalate la:godolo ba:pola:na. Nanitabola, ebe tanalodo la:imano nanitabo tanalote ma kunu awokalana, la: la:imano kateneno wokilo ilukulinamata.

<sup>4</sup> Ega:walo nale dopamo egemo, la:imano sosi magumulo idite na Polokono tanebadawama: bege, idite na Apolosikono tanebadawama: bege. Ebe tanalodo la:imano nanitabo tanalote atumu ma kunu kawokalana, la:le nanitabokobi midia:pino ilukuli tanalo ibamilatelenamata.

<sup>5</sup> Eiye! Me Apolosiko poteleka? Ega:walo na Poloko poteleka? A netewapi Godokono wokopila, iyo, la: aimano woko magumudo ebene Wade Tabo nanitabokobi a:midimata. Ebema: numa:la; a netewapiate la: magumulo iyaiya woko ebe posiyodilolima; Godote atamo keba kunu kikaeamile eba kunu. <sup>6</sup> Iyo, nale dopamo pete Wade Tabono kikopu la: magumamo pamiote, ebene Apolosite pete ebe kikopu unamo modobo obo padipani. Ebene a netewapino woko walogabo apune Godote a:ka:tuwa: ebe kikopuatamo elawo eba ikalamelo, iba:te wadenomamo ebo apepeiya. <sup>7</sup> Ebema: woko osiyodilo magumulo kikopu amiodawa ega:walo obamo adulateledawa ibino osiyodilole tanalo egegenomola, iyo, woko magumulo Godoko kapiyate kawo tanalonomo osiyodilonako, mabu ebe kikopuatamo elawo ikalamedawala, iba:te wadenomamo ebema: apepeonaka. <sup>8</sup> Numa:la; Godokono umi magumulo piyate kikopu amio woko dosiyodilona ega:walo piyate obamo adulatele woko dosiyodilona, iba:te ibino iyaiya tanalo eba osiyodilolelo wiyasiya kapiya woko osiyodilona, ebe mabuma: ebete ibino woko kapiya gabonomodo danagilamelelaemene ibi bilibilinomatamo modobo wiyanomo ebo kikalamolemene. <sup>9</sup> Nanitabola,



Apolosiko ega:walo na, a Godago woko kapimiya dosiyodilonama: ebe wokopila, ebene la: nanitabokobi midipi ebe ebene wadewade nao inamabuante kebolo kapepeone ebe pali damelala, ega:walo la: ebe ebete detena ebe wade motola.

*Kelisote Nanitabokobi Midipino Iyaiya Wokono Tanalo Elamo Madolame Tanalodo Kawokalilaemene*

<sup>10</sup> Ebema: nanitabola, Godokono woko kosiyodilonama: ebete iyalo tetelo kebe iyanomo elawo natamo kikanamiyale, nale ebe elawamo ebene wade motonomo ete woko ebo wagilimo, mulo wokodawate tuputupu wokilo nopo keba kunu kiyatinakole eba kunu. Ebene naimano walogabo apune wokopi epetapiate pelamete, iba:te nale dopamo dapawokalimo ebe alono mabu unulo wade woko idi ebe kosiyodilona. Ebema: modobola wokopi bilibilinomate ibino iyaiya woko wadenomamo nulamenakoma:na:, <sup>11</sup> mabu Godote ebene motono kodakoda alo iyalo amiya, ebe alo ebe Ya:su Kelisotela. Ebe mabuma: wokopi magumulo lumagi idi modoboa: Godote damiya ebe dopo alo magoba:te oli alo idi ebo kaima:.

<sup>12</sup> Nanitabola, wokopiate ibino iyaiya inamabu uwatenaka ebe alono moto ete woko kopoliyama:, ebene ibi epetapiate golodo inamabu, ega:walo siliba inamabu, ega:walo wiya kawokawonomo a:la:uwa:da:ole nokola uwatete, ebako wadewade inamabunomamo moto ete woko ebo osiyodilona. Wiyasiya ibi epetapiate balibali kewa, ega:walo kololu oga, ega:walo patele uwatete, ebako inamabuamo atu woko kosiyodilona. <sup>13</sup> Ebema: Kelisokono Kawo Egelate da:pemaigamene, ebe moto etepino iyaiya woko osiyodilo tanalate nanitabonomolo kawokalaoma:na:. Iyo, iba:te moto ete magumulo kebe inamabuamo detena, ebete pete ebe inamabu bilibilinomo ebene elamo eba pepadolamelo kubakubadopo inamabu gito kopoliyadigalemene, ebene elate nalea: inamabu ebe kodakoda inamabu kapiyate ebene motolo uwomua: tetelo ba:pola:namene. Nanitabola, Kelisote ebe gabodo wokopi bilibilinomono iyaiya wadewade woko ega:walo kubakuba woko ebo kawokalilaemene.

<sup>14</sup> Ebema: Godote damiya, kebe lumagite ebe alo unulo wade woko dosiyodilona, ebe lumagino wokote ela magumulo olopoligoa:no ebete ebene wade wiya ebo kelaemene. <sup>15</sup> Wiyasiya kebe lumagite Godokono moto ete magumulo kuba woko dosiyodilona, ebene wokote ela magumulo alatidite, ebene ebete Godokono nilakapo magumulo ebene igilo mula: tanalo kapiya kelaemene wiyasiya wade wiya idi a:kelaemene. Iyo, ebe lumagino tanalote ma kunu kitanamene, lumagi idino moto elate eba nitalo, ebete inamabua:no ebene igilo kapiyago ela magumune keba kunu ka:pemaiganakole ebete Unu Duliynomololo eba kunu ka:nilutamene.

*Nanitabokobi Midipi Ebe Godoko Amamateno Motola*

<sup>16</sup> La: iyatawalata, la: nanitabokobi midipi ebe Godoko amamateno iya motolata, ega:walo ebene Uliyanate la: magumulo bokolina, <sup>17</sup> ebema: kebe lumagite Godoko amamateno moto da:kubaimene, Godote ebe lumagi nanitabonomolo ka:kubaimene. Numa:la:, Godoko amamateno iya moto ebe ebene wade-talena motonomola, iyo, la: nanitabokobi midipi ebe ebene motoma: eda:onamata.

<sup>18</sup> Ebema: la: magumulo lumagi idite ebe a:ka:tuwa: ebe a:da: akomasiga:la:, iyo, idawate me opo epono iyaiya mulo wokino tanalodo ebe a:ka:tuwa: ebe mulodawama: akogeala:. Modobola ebe wiyasiya me opo epono ololo apulo daedale lumagima: eba eda:nalo Godogodone nanitabo mulo wokino tanalo ebo nuwatemene. <sup>19</sup> Mabu me opo epate kebe

iyaiya tanalo ibino mulo wokino tanaloma: degelana, wiyasiya Godote ebe tanalo ibino daedale wokino tanaloma: gena. Ebe mabuma: ebena Bukalo tabo idite ma kunu gena, “Godote me opo epono mulo tanalamo gubi a:delamete, iba:te ebamo gito ka:na:gudima:na.”<sup>20</sup> Ega:walo ebena Bukalo ebete walo ma kunu kegena, “Mulopiate ibino tepo magumulo kebe nopo kalomonake, na Kawodawate iyatawamo ebe wokino tanalodo wade tanalo idite a:kemaigamene!”

<sup>21</sup> Ebema: la: magumulo idite me opo epono mulo tanaloma: ebe a:ka:tuwa: ebe walo akowalogala: Numa:la:, la: Kelisoko magumulo eba ilukulinalo, ebena wadewade tanalo bilibilinomate la:imanoma: eda:ona.

<sup>22</sup> Iyo, na Poloko ega:walo Apolosiko ega:walo Pitako,\* a Kelisokono wokopima: eba eda:onalalo la:imano wokopima: atumu na:keda:onama: Ebene me opono inamabu bilibilinomo ega:walo nanitabo igilo tanalo ega:walo a:e magumulo wato kikopu lawe tanalo ega:walo me tetelo demaimiona ebe tanalo bilibilinomate la:imanoma: eba eda:onalalo, walone tetelo demaimioma:na: ebe tanalo bilibilinomate atumu la:imanoma: ka:keda:oma:na: Ebema: nanitabola, wadewade tanalo bilibilinomo ebe la:imano tanalola,<sup>23</sup> mabu la: Kelisokono epoma: eda:onamata, ebe atumu Godokonoma: keda:na.

## 4

### *Ya:sukono Nani Alibolepino Iyaiya Temeteme Tanalo*

<sup>1</sup> Ebema: modobola la:le na Poloko ega:walo Apolosiko ega:walo a keba kunula:ka: ebako nanitabokobi midipi epetapi, la:le aimano tanalo eba malagidilolelo a Kelisokono nani wokopima: na:midiyala: Iyo, Godote dopamo dowaminaliya, ebete me tetelo ebe tanalo piyatamo kawokalilamiyale iba:te me opono epo wadenomamo kiyatulaema:, a ebe ebe wokopila. <sup>2</sup> Numa:la:, me opolo kawodawa idite ebena wokopi bilibilinomo magumulo kapiyakapiya kuwatemene iba:te epetapino woko namutupima: keda:onama:, ebema: ebe watowatopiate wokopi epetapino osiyodilole magumulo ibi wadenomamo eba walubilinalo ibino kawodawa ebo kekalakalaima:na:, iyo, iba:te ebe gabodo ibino tepo magumuno nanitabo tanalo ebetamo kawokalima:na:.

<sup>3-4</sup> Ebema: naimano tanalo ma kunula, na a:ka:tuwa: naimano tanalo anagiyamida:no ebe tanalo naimano anagiyamidada Godotamo atepanamo. Ebene la:le naimano wokono tanalo anagilamelenama:wete kubama: degelaema, ega:walo gabamaniate atumu naimano tanalo anagiyamida magumulo kubama: da:kegelama:na:, na ebe tanaloma: woki bilibilima: a:keda:mo. Nanitabola, naimano tepo magumuno mulo wokite na kuba osiyodilodawama: ka:midinina:, wiyasiya numa:la:, Godoko kapiyate naimano nanitabo tanalo iyatawala, naimano tepo magumuno wokino tanalotea: <sup>5</sup> Ebe mabuma: Kawodawa Kelisote pea:no, la:le lumagi idino tanalo anagiyamidama:wete ebe kubadawama: akogelala: Nanitabola, Kelisokono nani tetenomolo ebe a:ka:tuwa: epono tanalo eba panagilamelelamelo, iba:te me tetelo kebe tanalo idoko magumamo kowaminalene ega:walo kebe ubi tanalo ibino tepo magumamo kowaminalene, ebete ebe tanalo bilibilinomo alamo powaulatelete ebo kawokalilaemene. Ebema: ebe tete ebe Godokono wade tetema: keda:mene, ebete ebena epo bilibilinomono wadewade osiyodilole tanalo mabuma: ibi kemoiolema:.

\* **3:22:** Buka ka:la:mioledawa, modobola a:ma: niyatawa Pitakono mailo idi ebe Kipasetela.

<sup>6</sup> Ebema: naimano nanitabokobi midipi ekakiala; la:imano woki ka:tuputupuilaema: nale Apolosiko ega:walo na, aimano wokono tanalo eba awokalimilo me iyaiya tabo la: iyatulaemata. Na ubila la: naimano iyatulame tabono tanalodo wade woki ma kunu kelaemamota, Godote ebene Bukalo a keba kunu ka:totomuatenale, la: ebe wadewade walubi tanalome a:kolobila:ema, iyo, modoboa: la: magumulo idite idino osiyodilo tanaloma: ebe kapiya eba walogolo lumagi idino tanalo kubama: gito gema:.

<sup>7</sup> La: ma kunu kemalagidilawitama, Godote la: iyaiya alomotate idi unamo eba adipatelo idi wiyasiya opamo gito iyati? Ao, eba kunua:, ebete la: kapiya epoma: a:midiliata, la:le amamaoa:no ka:pola:wenama:. Numa:la:, kebe wadewade tanalate la:godolo ka:pola:nale, ebe tanalo bilibilinomo Godote nilakapolo la:tamo gito ikalamiata, la: a:ka:tuwa: la:imano elawamo wade tanalo idi kelawa:wea:. Ebema: mabu keleka: la: magumulo epetapiate ibi a:ka:tuwa: ibino tanaloma: dotalogolena?

<sup>8</sup> Eiye, la: piyate damamawenama, la: kubanu malagidilonamata modoboa: tanalo kapiya idite la:godolo kitana! Diyala, la:imano wokilo la: ma kunu da:begetawenama, Godokono Uliyanate nanitabokobi midipiatamo dikalamena, ebe tanalo magumulo la: dogodogopima: eba eda:onalo wiyasiya a epetapiate nigologolopima: eda:onama:! Ega:walo la: da:ba:kegetawenama, Godokono umi magumulo la: kawokawo elawodubuma: iyalo eda:imata, wiyasiya aa:!

Ebema: na Polote ebako daedale wokiagopiatamo negemo, la:le kawokawo elawodubuma: nanitabolo neda:wetaleka:, a Ya:sukono nani alibolepiate la: mabuma: bekalakalaona:, iyo, a ebe tanalome biyatawaona:, la: ega:walo a, ale kapimiya kawokawo elawodubuma: eba eda:onalo epo bilibilinomate atamo kalakalago ka:tudila:oma:na:. <sup>9</sup> Wiyasiya Godokono ubi tanalo eba kunua:, iyo, naimano umi magumulo ebete a nani alibolepi alomoiya nanitabokobi midipi magumulo ale uwomunomopima: keda:onama:. Ebe mabuma: ebete gabamani kodiabolena:, iba:te a nani alibolepino tanalo anagilameleamete a kubakubapima: ka:milo epono ololo apulo a gito kanakapuaema:. Iyo, ebene ubi tanalo ma kunu itana, ebene Unu Duliynomololo dilukuliona ebe nopopi, ega:walo kubakuba uliyana ega:walo me opo epo atumu, ibi bilibilinomate aimano modoboa: tanalo nanitabonomolo kuima:.

<sup>10</sup> Eiye! Diyala, la: ma kunu da:bemalagidilawenama, a Kelisokono nani alibolepiate ebe mabuma: daedalepima: eda:onama:, wiyasiya la: ebe magumulo mulopima: eda:onamata! Ega:walo la: ma kunu da:ba:kemalagidilawenama, a nanitabokobi midi magumulo elawoa:noma: eba eda:onalo wiyasiya la: elawonomoma: eda:onamata, iyo, epate la: unamo eba wadipalatelelo iba:te wiyasiya negelana a kawokawopia:!

<sup>11-12</sup> Wiyasiya numa:la:, aimano nanitabo tanalo ebe ma kunula. A woko wagilimi mabune me teta:mo pemaiga, tete bilibilinomo epetapilo bae kape tanalote a uamenako ega:walo obo kapete atumu atamo a:ka:penako, iyo, a kubakuba kaliku kapiyakapiya pupulionakoma:. Ebe mabuma: a a:ka:tuwa: aimano modoboa: tanalo ulameleamete tete epetapilo a mani kele kuwatemala: kodakoda woko aimano kotamo gito osiyodilonakoma:. Ega:walo me tanalo idila. Aimano lao moto nanitabolo pola:na:no, a iyaiya opolo eba wapata:lamenalo ebo latepaonatonanakoma:, ebene tete epetapilo nanitabokobi midia:piate a eba malogoelo a tatakolo dalukoenaka, a wiyasiya ibi mabuma: Godoko toweomenakoma: ebete ibi wadenomamo kowalubilinama:. Iyo, kebe tetelo epate temeteme atamo dikaeamenaka, a wiyasiya woko osiyodilo magumulo kodakodalo lamota:onanakoma:,

<sup>13</sup> ega:walo iba:te ibino tabamo a da:kubaiamena, a ibi nilakapo tabamo walubilinakoma. Ebema: modobola la:le a nani alibolepino tanalo ma kunu wadenomamo niyatawala:, me opo epono umi magumulo a ibino sosowa keba kunula:ka: eba kunu eda:onama:, iyo, iba:te a ubia:noma: eba eda:onalo, a kuba nibo inamabuma: gelate dologala inamabuma: iyalo a:midia.

*Kolini Sosi Epo Magumulo Piyate Polokono Tabo Lawea:no, Ebete Iba:tamo Elawamo Pemaigama: Da:kiyawaiya*

<sup>14</sup> O naimano namutupiala:, nale me tabo la:tamo ilipo ikalaema: kaku-lolea:. Ao, nale kawonomamo demalagidilolenamo la: ebako gudima: eba eda:onalo, naimano ubi ebema: iyatimo la: nanitabo gabo kiyatulametama:.

<sup>15</sup> Numa:la:, la:imano Kelisoko waloma:ta tanaloma: la:imano iyatulamepi bilibilinomate eba pola:nalo, lumagite ibi ka:la:miolema: da: ka:modobona:, wiyasiya na kapiyate la:imano nabiwi keba kunula:ka: eba kunu eda:namo. Iyo, la:le Ya:su Kelisoko magumulo kilukula:wenama:, ebena Wade Tabo la:tamo kiyawao magumulo na ebe dopo lumagima: edimo, <sup>16</sup> ebema: naimano guda:la:, nale la: toweolaemata, la:imano ilukuli magumulo modobola la:le na la:imano nabiwi nibaminatena:la:. <sup>17</sup> Numa:la:, ebe tanalo eba malagidilolo nale naimano nanitabokobi midi gudu idi Timotiko la:tamo palibomo, mabu nale kawonomamo demalagidilonamo ebete ebako guduma: eda:na, iyo, ebete naimano ubi tanalo nanitabonomolo osiyodilolenako. Ebema: ebete la:tamo da:pemaigamene, nale iyaiya opolo sosi epo Kelisokono okoli tanaloma: keba kunu kiyatulamenakomo, ebete ebe atu iyaiya tanalo eba kunu la: ka:ka:piyatulaema:ta.

<sup>18</sup> Na me tanalo iyatawala, la: epetapiate namamaonamata mabu la: kubanu ma kunu malagidilonamata, nale la:tamo a:ka:pemo. <sup>19</sup> Wiyasiya aimano Kawodawate ubi diyatimene, tete tatalila na nanitabolo ka:pemamo. Ebema: ebe tetelo nale ebe amamaopino nanitabo tanalo ka:puimamo, ma kunu ibino tabo gela kawokawonomola wiyasiya Godogodone da:pemaigana ebe nanitabo elawote iba:godolo kitana:

<sup>20</sup> Numa:la:, Godote Kawo Elawodawama: deda:na ebe tanalono magumute lumagino woki tabono tanalone kemaigana:, ao, ebe tanalono magumute kapiya gabodo kawokalamene, ebe Godokono elawote lumagino okoli magumulo ditanamene ebe gabola. <sup>21</sup> Ebema: la: piyate damamawenama, la:imano ubi keba kunula:ka:? Nabiwite ebena wato kawokawo gudi gaubamo keba kunu kalukolenakole, la:imano kuba osiyodilole mabuma: nale la:tamo ebako tanalo ba:ka:posiyodilomo? Wiyasiya na pea:no, modobola la: dopamo la:imano amamao tanalone nolobila:iyala:, ebena na nilakapo wokiago ega:walo milo tanalago la: naimano guda:tamo ebo ka:pemamo.

## 5

*Polote Kolini Sosi Epo Kawiya Danaliya, Iba:te Kawo Kubanomo Osiyodilodawa Gito Kanaliboma:*

<sup>1</sup> Nanitabola, la: magumulo kawo kubanomo idite demaigi, iyaiya epo epetapiate ebe tanaloma: tabo egelanaka, iyo, la:imano sosi tanebadawa idite ebena nabiwino kamiyala:go kapiyama: eda:nako.

Eiye! Godoko iyatawa:pi magumulo ebako kubate kemaiganakoa:, mabu ibi iyatawala ebe ilipo osiyodilo tanalo kubanomoma: eda:na! Wiyasiya la: kawokawo daedale epo keba kunula:ka: ebako epoma: eba eda:onalo, ebe kuba osiyodilodawatamo la:le tanalo idi kosiyodilaweaa! <sup>2</sup> Eiye!

Mabu keleka: la:le la:imano sosi tanaloma: damamawenama? Modobola la: wiyasiya la: magumulo ditana ebe kuba mabuma: tepo temetema:go nimiyala:, ega:walo modobola la: kuba osiyodilodawatamo talena niya-timiyala: ebete la:imano taneba magumamo walo akopa:la:

<sup>3-4</sup> Numa:la:, nale mulunomolo eba okolinalo, wiyasiya Kelisoko magumulo nale naimano uliyanano wokino tanalamo la:go kapimiya bokolinamo. Nanitabola, nale walone la:imano Kolini duliynomolamo pemaigate kuba osiyodilodawano tanaloma: keba kunu da:posiyodilomo, na wiyasiya la:tamo pemaiga:no dopamo eba kunu nale ebe dubuno tanalo Kawodawa Ya:sukono mailamo anagiyamidamete kuba wiya iyatimo. Ebema: nale luta: tetelo la:le walo dakaladabuta:ema, modobola naimano uliyanano wokino tanalamo tudila:wete Kawodawa Ya:sukono elawamo <sup>5</sup> ebe dubu Saitanatamo gito nikamiyala:. Numa:la:, la: eba kunu dosiyodilaema, Saitanate me tetelo ebena ape ka:kubaimene, wiyasiya aimano Kawodawate ebena Kawo Egelalo ebe dubuno uliyana apuno igilo gito ka:mula:emene.

<sup>6</sup> Nanitabola, la:le damamawenama ebe tanalo ebe wade tanaloo: La: iyatawalata, epate ma kunu gelana, “Palowa bae kokalima: kamiyalet gamagamaimino tuwae inamabu kelenomo palowago dekapiyailaemene, baete a:ka:tuwa: ebo kegagamamamene.” Eba kunu la:imano taneba magumulo amama tanalo da:pesonomote ditana, ebe kubate a:ka:tuwa: kawoma: keda:mene, a, nanitabola:ka:? <sup>7</sup> Ebema: modobola la:le tagala ilukuli tanalono amama tanalo bilibilinomo la:imano taneba magumune nowagaila:la:, la: magumulo kuba da:pesonomo idite itana:no Godokono umi magumulo la:le oliolinoma: keda:wenama:

Numa:la:, ulama bilibilinomolo Yu epate ibino Aduga:la Soliyomu\* eba osiyodilolo iba:te ebe Soliyomuno palowa bae okalimioma: gamagamaimino tuwae palowago kapiyailamea:no okalimionaka, mabu Godote ibi ebe tanalo kosiyodilonakoma: iyalo a:totomulateliya. Iyo, ebete ibi iyatulamiya gamagamaimino tuwae inamabu ebe ulila, epate amama magumulo kebe kuba tanalo kosiyodilolenake ebe tanalo keba kunula:ka: eba kunula, ebema: iba:te ebetamo ibino kawo soliyomu wagilimia:no, iba:te dopamo ibino moto bilibilinomone gamagamaimino tuwae waulatelenomo nowaulatelenakoma:na:. Wiyasiya Kelisote a nanitabokobi midipi mabuma: ebena ape Aduga:la Soliyomuno sipi-goeo da:pesomu midite Godotamo eba ikamelo, ebena kalima ka:ka:liya tanalodo ebete a olioli epoma: iyalo a:midiya ale aimano kuba osiyodilole tanalono a:e wiya uwatekapoma:. <sup>8</sup> Ebema: a nanitabokobi midipiate Godoko amamatelo kawo soliyomu idi ebetamo osiyodilo wagilimia:no, modobola ale dopamo aimano tagala ilukuli tanalono amama tanalo bilibilinomo a magumune kowagailimalema:. Ma kunu aimano tepo magumulo iyaiya kuba osiyodilole wokino tanalate pola:na:no, nanitabo gabono osiyodilole tanalo ega:walo tabo gela tanalo kapiyate aimano ilukuli magumune bemaimionakoma:na:.

<sup>9</sup> Ebema: nale la:tamo dopamo dapalibimo, ebe leta magumulo la: ma kunu analimata, la:le buwelemele pilolo duwatanaka ega:walo kamiyale pilolo duwatanaka, ebako epago akokapiyala:. <sup>10</sup> Wiyasiya modoboa: la: naimano tabono magumu kubanu laema:. Numa:la:, la: sosi epo magumulo piyate ebako kawokawo kuba dosiyodilolenaka nale ibino tanalo kapiyama: kiyawaomo, mabu ibi Godokono nanitabo tanalo iyalo iyatawaiya. Wiyasiya me opo epo magumulo epetapi bilibilinomate

\* **5:7:** Buka ka:la:mioledawa, a:ma: me Soliyomuno magumu iyatawama: ubi diyata:emene, modobola a:ma: Ma:t 26.2 buka apuno walubi tabo numiye.



Godokono tanalo kiyatawaona; ebema: iba:godolo kamiyale ega:walo buwelemele pilo tanalate ba:pola:na, ega:walo iba:te dogodogopima: keda:oma: ubi kawonomamo eba alomolo tete epetapilo epetapino inamabu pilolo uwatenaka, ega:walo iba:te iyaiya ida:da:lino uliyana akamamalatenaka. Ebema: nale la:tamo talena kiyatia: ebako nanitabokobi midia:piago wapata:laema; mabu la: me opolo iba:go kapimiya eba ilukulinalo gabote a:kitanamene la: a:ka:tuwa: la: ibi magumune nanitabonomolo iyabaiamo kowatiamidala:ema. <sup>11</sup> Iyo, nale la: sosi epono tanalo kapiyama: kiyawaomo. La:le kebe epo la:imano nanitabokobi midipi ekakima: deka:la:miawenama, ibi magumulo potele buwele pilo o kamiyale pilo dosiyodilonako, potele dogodogodawama: keda:ma: ubi kawonomamo diyatinako ega:walo potele ida:da:li idino uliyana damamalatenako, potele epetapino tanaloma: a:da: elemasigi gabodo kuba tabo da:kiyawaonako ega:walo potele gamoda da:nionako, ega:walo potele epetapino inamabu pilolo duwatanako, nale ebako sosi lumagino tanaloma: la: walo nakanalemata la: eba:go akokapiyala; iyo, la: eba:go bae naoma: la:tamo talena iyatilaemata.

<sup>12-13</sup> Nanitabola, piyate sosi magumulo pola:na:no Godote a:ka:tuwa: ebe nanitabokobi midia:pino tanalo kanagilamelelaemene, ebema: ebe woko ebenola, na ebe tolemelo kosiyodilonakoa. Wiyasiya sosi magumulo da:pola:na ebe epono tanalo anagilamelelame woko iyala, iyo, Godote ebe woko a nanitabokobi midipiatamo ikaeamiya. Ebema: la: magumulo piyate kuba dosiyodilolena ibino tanalo nanagilamelelameta:la; mabu Godokono Bukalo tabote ma kunu itana, "La:le kawo kubanomo osiyodilodawa la: magumune gito nalibiyala!"

## 6

### *Nanitabokobi Midipiate Apaminateui Tanaloma: Gabamaniatamo To-laema: Polote Talenama: Degiya*

<sup>1</sup> Me tanalo idila. La:imano taneba magumulo idite ida:go tanalo idima: dapaminateuima:na; mabu keleka: la:le Godokono ubi tanaloma: tolea:no gabamanino tabo anagiyamidadawatamo da:tolama:ema, ebe tuputupu okoli tanalo iyatawa: lumagite la:imano tanalo kanagiyamidalametama:? Eiyee! Modobola Godokono sosi epate a:ka:tuwa: ibino apaminateui tanalo nanagilamelelaema:na! <sup>2</sup> La: iyatawalata, walone tetelo Godokono epate me opo epo bilibilinomono tanalo kanagilamelelaema:na. Iyo, Godokono ubilo la:le ebe anagiyamida woko magumulo ka:pola:namamota, ebema: me tetelo kebe apaminateui tanalate la: magumulo demaimionaka, la:imano woki ega:walo elawo modobola ebe egege tanalo tuputupulo kanagilama:ema; a, nanitabola:ka:? <sup>3</sup> Ega:walo la: nanitabonomolo iyatawalata, Godote ebeno Unu Duliyomolono iyaiya woko kosiyodilolenama: dosiyodiloliya, ebe nopopino tanalo a nanitabokobi midipiate kanagilamelelaemalema: . Nanitabola, a ebe woko kosiyodiloma: Godote modobo elawo atamo kikaeamene, ebema: a iyatawanomola, me opolo atamo kebe tanalate demaimiona, ebete modobo elawo atamo atumu na:kikaeamena ebe tanalo wadenomamo kanagilaema: .

<sup>4</sup> Ebema: mabu keleka: la:le apaminateui magumulo gabamanino tabo anagiyamidapiatamo da:tolama:wenakoma? Numa:la; a sosi epo iyatawala, ebe nanitabokobi midia:piate Godokono tanalo ega:walo aimano tanalo nanitabolo kiyatawaona. <sup>5</sup> Eiyee! La:le kilipoaema: nale la:imano kuba osiyodilo tanalo ebema: awokalimo. Na iyatawala la:imano mulo

wokiagopi epetapi ba:pola:na, ibi modobola la: nanitabokobi midipino apamineu magumulo la:imano tanalo kanagilamelelametama: Wiyasiya diyala, la: epetapi ma kunu daedale wokilo da:begetawenama, “Mulo wokiagodawa idite aimano taneba magumulo ka:luta:.”<sup>6</sup> Numa:la:, la: nanitabokobi midipi ekakima: eba eda:onale, la:imano daedale wokino tanaloma: idite gabamani idino tabo anagiyamidadawatamo gito magatanakomata, iyo, la:le la:imano iyaiya apamineu tanalo nanitabokobi midia:piatamo watanakomata!

<sup>7</sup> Eiye! La:imano taneba magumulo idite idi gabamianatamo demagatamene, ebe tetelo la:imano goweladawa Saitanate la:imano wato kikopu iyalo elawe, iyo, la: ebenu ubi tanalamo a:tudila:omata! Numa:la:, idite a:ma:tamo kuba osiyodilote ebenu a:ma: ebe tanalo gito degebolema:emene, ebe tanalo modobola, wiyasiya modoboa: wato kikopu Saitanatamo gito ikaema:! Iyo, idite a:imano inamabu idi pilolo lawete ebenu a:ma: ebe tanalo gito da:dodomatiaemene, ebe tanalo modobola, wiyasiya Saitanatamo tuduwatama: modoboa:!<sup>8</sup> Ebema: la:imano osiyodilo tanalono kuba beda: kawonomola:ka:, mabu la:le nanitabokobi midipi ekakima: eba eda:onale idite iditamoma kuba osiyodilonakomata ega:walo idino inamabu pilolo a:kelawenakomata!

<sup>9</sup> La: iyatawalata, tuputupulo ilukulia: epate Godokono Kawo Elawodawano duliyoumolono wadewade dogodogo tanalo magumulo tanalo idi a:kelaema:na:. Iyo, me tanalo ebe nanitabola, piyate buwelemele ega:walo kamiyale pilolo duwatanaka, ega:walo ida:da:lino uliyana damamalatele-naka, ega:walo dubu gabatamo dosiyodilolenaka,<sup>10</sup> ega:walo epetapino inamabu diya gabodo pilolo duwatanaka, ega:walo epetapino inamabu ibino elawamo gito duwatanaka, ega:walo dogodogopima: keda:oma: ubi kawonomamo dalomonaka, ega:walo gamoda da:nionaka, ega:walo epetapino tanaloma: a:da: elemasigi gabodo kuba tabo degelanaka, ebako kuba osiyodilolepi bilibilinomo magumulo idawate Godokono Kawo Elawodawano duliyoumolono wadewade tanalo a:kuwatemene.<sup>11</sup> Numa:la:, dopamo tetelo la: epetapi ebako kuba osiyodilole magumulo ilukulinaimata, wiyasiya kalakala kawonomola, me tetelo la: eba kunu kilukula:wena:. Iyo, Kawodawa Ya:su Kelisote la:imano kuba osiyodilole tanalo dukulaolelametia, ebete aimano Godokono Uliyanano elawamo la: ebenu tuputupupima: eba midililo, la:le ebenu iyaiya ubi tanalo kapiya kosiyodilola:wenakoma: la: talenapima: ebo eda:imata.

### *Nanitabokobi Midipiate Ibino Apa:mo Osiyodilole Tanalamo Godoko Nowalagonakoma:na:*

<sup>12</sup> Ebema: diyala, la: magumulo idite natamo ma kunu da:begetamene, “Numa:, apa:mo osiyodilole tanalo bilibilinomo magumulo nale tanalo idi kosiyodiloma: talena nanitabolo kitana:.”

Ebenu nale ebenu tabo eba wiyalo kegemamo, “Iyo, na Kelisoko magumulo tutudawama: eba eda:nalo, talena natamo nanitabolo kitana: tanalo idi kosiyodiloma:. Wiyasiya numa:, apa:mo osiyodilole tanalo bilibilinomo magumulo osiyodilole tanalo epetapiate naimano nanitabokobi midi magumulo na a:kowalubinima:na:, ebema: nale naimano tepo iyalo a:kodakodaimiyamo ebako kuba osiyodilole tanalamo a:ka:tuduwatamo, iyo, nale kuba osiyodilo tanalo idi naimano watodawama: a:ka:midimo.”

<sup>13</sup> Ebema: diyala, lumagi idite tabo ma kunu da:begetamene, “Numa:, Godote epono kape tanaloma: iyaiya bae osiyodilolelamiya, ega:walo ebete

epo eba osiyodilolelo ibino tepo magumamo ubi tanalo ebo alomolamiya bae kenaonama:.”

Ebene nale ebenu tabo ma kunu ka:wiyamamo, “Iyo, Godote epo ega:walo inamabu bilibilinomo osiyodiloliya, wiyasiya ebenu ubi tetelo ebete kateneno iyaiya ubi tanalo ega:walo bae nao tanalo kapimiya gito kopoliyadigalemene. Ebema: kawo tanalo ebe ma kunula, la: dubate la:imano apa:mo iyaiya kuba ubi tanalo buwelemela:tamo ega:walo kamiyala:tamo osiyodilolema: modoboa:, mabu Kawodawate epono apeno iyaiya modoboa: tanalo magumulo ibi nilakapolo eba walubilinalo, ubi ebo iyatinako iba:te ibino apa:mo ebenu ubi tanalo kapiya kosiyodilolenakoma:.” <sup>14</sup> Numa:la:, Godote aimano Kawodawa a:e magumune eba adipatelo ebenu a:e ape igilokobi ebo midiya, ebema: ebete ebenu elawamo a wadipaeatelo aimano a:elao ape atumu igilokobi ka:ka:midilimene.

<sup>15</sup> La: iyatawalata, a nanitabokobi midipi bilibilinomate Kelisokono talena apema: eba kunu eda:onama:, ebema: aimano iyaiya ape ebe ebenu apeno iyaiya apuapula. Ebe mabuma: a magumulo idite Kelisokono talena apeno tanalo idima: eba eda:nalo, ebete dubu bilibili kamiyaletamo ba:ka:tomene eba:go kuba eba osiyodilolelo kapiyama: keda:ma:? Ao, ebe tanalo kubanomoma: keda:mene! <sup>16</sup> Eiye! La: iyatawalata, kebe tetelo dubu idite ebenu ape dubu bilibili kamiyaletamo dikaemene, ibi netewapiate kapiyama: ebo keda:ma:na:, a, nanitabola:ka:? Numa:la:, ibi netewapino tanaloma: Godokono Bukalo tabote ma kunu gena, “Dubute kamiyala:go kapiyama: keda:mene,” <sup>17</sup> ebema: eba kunu potele nanitabokobi midi magumulo ebenu uliyana Kawodawa Kelisotamo dikaemene, ibi netewapiate uliyana apulo kapiyama: keda:ma:na:.

<sup>18</sup> Ebema: nanitabokobi mididawa, modobola a:ma:le buwelemele ega:walo koi pilo, kamiyale ega:walo dubu pilo, ebako osiyodilole tanalo bilibilinomo a:ma:le kuba nibote maigama: gelo ebe osiyodilole magumune nalaula:nakiye. Nanitabola, potele ebako kuba dosiyodilomene, ebe tanalodo ebe a:ka:tuwa: ebenu ape ka:kubaimene, wiyasiya kuba osiyodilole tanalo bilibilinomo epetapi eba kunua:. <sup>19</sup> A:ma: iyatawalata, Godote a:ma:tamo dikametia ebe Uliyanate a:ma: magumulo eba okolinalo, a:imano apete ebe amamateno motoma: eda:na, a, nanitabola:ka:? Iyo, a:imano ape ebe a:imanoa:, <sup>20</sup> mabu Kelisote ebenu wiya kawonomo kalimamo a:ma: elawiata. Ebema: a:imano apeno osiyodilole magumulo modobola a:ma:le ebe kapiya kowalogawenama: tanalo bilibilinomo nosiyodilolenakiye.

## 7

### *Dubu Ega:walo Kamiyale Ibino Kapiyama: Eda: Tanaloma: Polote Sosi Epo Diyatulamiya*

<sup>1</sup> Ebema: la: dopamo la:imano leta magumulo kebe tanaloma: na danana:ima, nale me tetelo ebe tanalo la: kiyatulaemamota. Dopo tanalo ebe la: epetapiate ma kunu degelawenama, “Dubute kamiyale lawea:no ebe a:ka:tuwa: dokolinamene, ebe tanalo wade tanalola.”

<sup>2</sup> Wiyasiya buwelemele ega:walo kamiyale pilo tanalo magumulo, iyo, atumu koi ega:walo dubu pilo tanalo magumulo Saitanate kuba gabamo wabuga:ta tanalo bilibilinomo ebe wadaenako, ebema: nanitabokobi midipi bilibilinomo magumulo modobola dubu idite ebenu kamiyale nelaemene, ega:walo kamiyale idite atumu ebenu awi na:kelaemene. <sup>3</sup> Ega:walo dubu ebenu kamiyala:go kapiyama: eda: magumulo, kamiyaletate ebenu awi kekalakalaima: modobola ebete ebenu ape ebetamo nikamenakomene,

ega:walo dubute atumu ebenu kamiyale kekalakalaima: ebenu ape ebetamo na:kikamenakomene, mabu Godote ebenu ubi tanalo epatamo dopamo eba kunu iyatiya. <sup>4</sup> Numa:la:, ebe tanalo magumulo kamiyaletete ebenu ape watodawama: keda:na:, awite ebenu ape namutudawama: eda:na, ega:walo atumu dubute ebenu ape namutudawama: keda:na:, wiyasiya ebenu kamiyaletete ebenu ape namutudawama: keda:na. <sup>5</sup> Ebema: dubute ebenu kamiyala:go kapiyama: eda: magumulo idite iditamo ebe tanalo kosiyo-diloma: talena akoiyata:la:, wiyasiya ibi netewapiate woki kapiyama: eba eda:lo ma kunu degelama:na:, iba:te gopowai tetelo kapiyama: eda: tanalo a:kosiyodiloma:na: iba:te Godago tabo gela tanalo kosiyodilonakoma:, ebe tanalo kuba:, wade osiyodilo tanalola. Wiyasiya iba:te kebe gopowai tete diyatima:na: ebe teta:mo da:nemaima:na:, modobola iba:te kapiyama: eda: tanalo samonomamo walo na:kowagilima:na:, mabu Saitanate kateneno ubi tanalodo iba:tamo dowadaenako, iba:te ebe kuba gabamo wabuga:ta tanalamo dubu ida:go o kamiyale ida:go gudima: modoboa. <sup>6</sup> Wiyasiya la: wadenomamo niyatawala:, la:le la:imano tanalo katepapaema: na Polote la: ka:totomulateleta:, ao, nale negemo talena puliyala la: ebe tanalo kosiyodilaema:.

<sup>7</sup> Nanitabola, naimano ubi tanalo ma kunu itana, la: kamiyalea:no ilukulina modobola, nale keba kunu kokolinamo eba kunu. Wiyasiya na iyatawala Godote kebe iyanomo elawo natamo kikanamiyale nale kamiyalea:no kokolinama:, diyala, ebete ebe atu elawo la: epetapiatamo kikalametia:. Iyo, nanitabokobi midipiate ebenu iyaiya woko kosiyodilole-nama:, ebete iba:tamo ebenu iyaiya elawo gito ikalamenako, ma kunu ebete iyanomo elawo idi lumagi kapiyatamo eba ikamelu wiyasiya iditamo iyanomo elawo idi ebo ka:kikaemene.

<sup>8</sup> Ebema: nanitabokobi midipi dubu magumulo kebe dubuno kamiyala:te da:elaiya ibino tanaloma: ega:walo amoleamoleno tanaloma: na Polote tabo ma kunu gemo, nale kamiyalea:no keba kunu kokolinamo, modobola iba:te eba kunu nilukulinama:na:. <sup>9</sup> Wiyasiya ibi magumulo kebe dawano kateneno ubi tanalate elawoelawonomoma: deda:ona, ma kunu dubu idite kamiyale lawea:no kuba osiyodilo tanalamo degamene, modobola ebako dubute kamiyale idi nelaemene ega:walo ebako kamiyaletete atumu dubu idi na:kelaemene. Numa:la:, kebe tetelo dubute kamiyale tuputupu gabodo delaemene, ebe tanalo ebe wade tanalola, wiyasiya ebete lawea:no ebenu tepo magumulo elanomoma: deda:mene, ebe tanalote Saitanakono kuba gabamo wabuga:ta tanaloma: keda:mene.

<sup>10-11</sup> Ega:walo me tanalo idila. Kebe dubute ebenu kamiyala:go dokolina ega:walo kebe kamiyaletete ebenu awiango dokolina, nale ebako epatamo totomu tabo ikalaemo, me totomu tabo naimano wokia:, ebe aimano Kawodawano totomu tabola. Iyo, ebenu ubi tanalo ma kunula, dubute ebenu kamiyale gito akoalibuta:la: ega:walo kamiyaletete atumu ebenu awi akoatepala:. Wiyasiya kebe kamiyaletete ebenu awi iyalo datepi, modobola ebete awia:no gito nokolinamene, ebenu ebete eba kunu eba okolinalo woki iyama: deda:mene, talena a:kitanamene ebete ebe atu awiango kapiyama: walo keda:te eba:go walo ka:kokolionama:.

<sup>12</sup> Ebema: nale la: epetapiatamo tabo idi gemo, me tabo da: naimano wokino tanalola:, iyo, me tabote aimano Kawodawagodone natamo da: ka:pea:. Diyala, la: nanitabokobi midipi magumulo dubu idite ebenu nanitabokobi midia: kamiyala:go dokolinale, ebenu ebe kamiyaleno ubi ditamena eba:go kokolinama: ebete ebe gito akoalibuta:la:. <sup>13</sup> Ega:walo nanitabokobi midi kamiyaletete nanitabokobi midia: awiango dokolina, ebe

atumu ebe dubuno ubi ditamena eba:go kokolinama: ebete ebe gito akoalibuta:la:. <sup>14</sup> Nanitabola, Godote nanitabokobi midia: dubu idi ebenu nanitabokobi midi kamiyaledo ebe tataliamo kemagaemene, ega:walo ebete nanitabokobi midia: kamiyale atumu ebenu nanitabokobi midi awido ebe niyakabamo pema: kowalubimene. Numa:la:, ebe tanalote nanitaboma: eda:notaleka:, ebe dubu ega:walo ebenu kamiyale ibino guda:te Godokono umi magumulo daleyama: eba eda:olo, iba:te ebetamo pelaema: a:ka:modobona: wiyasiya ebe tanalote eba kunu kitana:, ao, ebako guda:te Godoko niyakabamo pelaema: talena puliyanomola.

<sup>15</sup> Wiyasiya numa:la:, kebe tetelo nanitabokobi midia: kamiyaleta ebenu nanitabokobi midi awi atepama: ubi diyatimene, ega:walo kebe tetelo nanitabokobi midia: dubute ebenu nanitabokobi midi kamiyale atepama: dowagelemene, nanitabokobi mididawate odiyobo tanalo idi ako-osiyodilala:. Ebene nanitabokobi midia:dawate ebenu nanitabokobi midi kamiyale o awi eba kunu datepamene, ebe tetelo nanitabokobi mididawate tutunomoma: eba eda:lo matuomeo tanalo idite ebegodolo walo a:kitanamene.

Wiyasiya Godote a nanitabokobi midipi bilibilinomo iyalo eka:miya ale epetapiago gowelaoa:no milo magumulo kilukulinama:, <sup>16</sup> ebema: nanitabokobi midi kamiyale, modobola a:ma: gabo nowadiye a:imano nanitabokobi midia: awiago milolo kokoliawenama:. Diyala, a:imano awite a:ma:do ebenu igilo mula: tanalo da:belaemene. Ega:walo nanitabokobi midi dubu, modobola a:ma: atumu gabo na:kowadiye a:imano nanitabokobi midia: kamiyala:go milolo kokoliawenama:, mabu a:ma: nanitabolo kiyatawawena: ebete ebenu igilo mula: tanalo a:ma:do da:belaemene.

### *Polote Yu Dubuno Tama Itamida Pukala Lawe Tanalone Tanalo Idi Diyatulamiya*

<sup>17</sup> Ebema: nale sosi bilibilinomo magumulo kebe tanalo kiyatulame-nakomo, ebe totomu tabo a bilibilinomono tanaloma: ma kunu itana. Godote lumagi idi ebe nanitabokobi ka:midima: deka:imene, ebenu okoli tanalo keba kunu kitanale, ebete walone tetelo gabo akowadiala: ebe okoli tanalo ebe a:ka:tuwa: ebenu elawamo iyama: ka:midima:. Ao, Kawodawate ebetamo kebako okoli tanalo kikamile, modobola ebete ebe atu okoli magumulo kalakalago nokolinamene, ebenu ubi tanalo lumagi idino okoli tanalamo akoiyata:la:. <sup>18</sup> Eba kunu Godote Yu epono tama itamida pukala lawe dubu deka:imene, ebete gabo akowadiala: ebe pukala ebenu apene egebolema:, ega:walo Godote tama itamida pukala lawea: dubu idi deka:imene, ebete ebenu ubi tanalo akoiyata:la: ebe tanalo kelaema:. <sup>19</sup> Numa:la:, Godokono umi magumulo dubu idite Yu epono tama itamida pukala iyalo delawiya ebe tanalo kawo tanalooa:, ega:walo dubu idite ebe tanalo lawea:noma: deda:mene ebe tanalo atumu kawo tanaloma: a:keda:mene. Kapiya kawo tanalonomo bitana, ebe tanalo ebe Godokono kawokawo totomu epetapino tabamo tuduwata tanalola.

<sup>20</sup> Ebema: me tanalone a bilibilinomate iyatawala, ma kunu Godote lumagi idi deka:imene, ebenu okoli tanalo keba kunu kitanale ebete walone tetelo gabo akowadiala: ebe okoli tanalo ebe a:ka:tuwa: iyama: ka:midima:. <sup>21</sup> Iyo, nanitabokobi mididawa, Godote a:ma: deka:mitia, ebe tetelo a:ma: kawo dubu idino wiya: wokodawama: deda:wia, ebe mabuma: a:ma:le me tetelo a:imano okoli tanalo iyama: ka:mida:ema: woki bilibilima: akoeda:la:. Wiyasiya a:ma: numa:, a:imano woko namutudawate a:ma:tamo gabo nilakapolo dosiyodilomene a:ma:le ebenu wiya: woko magumune



ka:nemaigaema:, kuba:, a:ma: ebe wade tutu okoli tanalo ebegodone gito nelawiye.

<sup>22</sup> Nanitabola, potele kawo dubu idino wiya: wokodawama: eba eda:nalo Godote ebe Kawodawa Kelisoko nanitabokobi midima: deka:mi, ebe tetene wagilimite ebete Kelisokono woko magumulo ebenu tudawama: edi. Ega:walo atumu potele kawo dubu iditamo wiya: woko osiyodiloa: tetelo Godote ebe deka:mi, ebe tetenomolo ebete Kelisotamo wiya: woko osiyodilo ebo wagilimi. <sup>23</sup> Iyo, Kelisote ebenu wiya kawonomo kalimamo la: uwatiata, ebema: la: ebe kapiyatamo woko eba osiyodilonalo epetapino wiya: wokopima: akoeda:onala. <sup>24</sup> Ebema: naimano nanitabokobi midipi ekakiala:, me naimano iyatulame tabono kawo tanalola. Godote kebe lumagi deka:imene, ebe lumagino okoli tanalo keba kunu kitanale, ebete Godago kalakalago eba okolinale gabo akowadiala: ebe okoli tanalo ebe a:ka:tuwa: ebenu elawamo iyama: ka:midima:.

*Kebe Dubute Kamiyalea:no Dokolina Ega:walo Kebe Kamiyalete Dubua:no Dokolina Polote Ibino Tanaloma: Ebenu Woki Tabo Da:kiyawaiya*

<sup>25</sup> Ebema: la:imano leta magumulo la: tanalo idima: na danana:ima, ebe tanalo la:imano sosi magumulo piyate kamiyalea:no dilukulina ega:walo piyate dubua:no dilukulina, ebe dubu ega:walo kamiyale iba:te keba kunu na:kowagelema:na. Numa:la:, nale me tanaloma: aimano Kawodawa Kelisogodone totomu tabo idi dopamo nanitabolo kelawea:, wiyasiya na iyatawala ma kunu ebete ebenu nilakapolo na nani wokodawama: ka:na:mite ebenu woko gobebobamo iyatiniya, nale mako tanaloma: naimano woki-amo la: kowalubilitama:.

<sup>26</sup> Nanitabola, nanitabokobi midipiatamo temeteme maimio tanalote iyalo wagilimite, ebe temeteme tanalate tete tatalila kawokawonomoma: keda:oma:na:, ebema: naimano woki ma kunula, Godote me tetelo kebe dubu deka:imene, ebenu okoli tanalo keba kunu kitanale, modobola ebete eba kunu kalakalago nokolinamene, iyo, ebete gabo akowadiala: ebenu okoli tanalo iyama: ka:midima:. <sup>27</sup> Ebema: nanitabokobi midi dubu, a:ma:le kamiyale dopamo delawa:wia, a:ma: ebe alibutima: woki akoiyata:la:, ega:walo a:ma:le me tetelo kamiyalea:no dokoliawena, a:imano kamiyale lawe gabo akowadiala:. <sup>28</sup> Wiyasiya numa:, a:ma:le kamiyale laema: ubi eba iyatilo tuputupu gabodo delawa:emene, Godokono umi magumulo ebe tanalo kuba:, ega:walo atumu buwele idite dubu delaemene, Godote ebe tanalo kubama: a:kegemene.

La: wiyasiya me tanalo niyatawala:, kamiyale magumulo potele awi dopamo lawete eba:go dokolina, ega:walo dubu magumulo potele kamiyale dopamo lawete eba:go dokolina, ebe mabuma: iba:te me opono iyaiya temeteme tanalo epetapi biyatawaonakoma:na. Ebema: nanitabokobi midi dubu, na ubila a:ma:le kamiyale lawea:no ebako temeteme a:kiyatawaemene, ega:walo nanitabokobi midi buwele, na ubila a:ma: atumu awi akolawa:la: a:ma:le ebako temeteme tanalo uwatekapoma:.

<sup>29</sup> Naimano nanitabokobi midipi ekakiala:, naimano iyatulame tabono magumu ma kunula, Godokono Uwomu Egelate ebe netatali, ebema: kebe dubute kamiyale dopamo lawete eba:go dokolina, modobola ebete me tetene wagilimite kamiyale lawea: dubu keba kunula:ka: eba kunu nokolinamene. <sup>30</sup> Ebene eba kunu potele temetema:go diina, modobola ebete atumu temetemea: lumagimu nokolinamene, ega:walo potele kalakala magumulo da:luta, modobola ebete kalakala: lumagimu nokolinamene, ega:walo potele dogodogo inamabu maniamo dopamo duwatei, modobola

ebete inamabua:dawamu nokolinamene, <sup>31</sup> ega:walo potele me opono tanaloma: woko dosiyodilona, modobola ebete ebe iyaiya woko iyalo da:miyapi ebako lumagimu nokolinamene, mabu me opono tanalate keba kunu ka:pola:nale, ebe tagala tanalo bilibilinomate eba olopoligolo oli tanalate na:pemaimiona.

<sup>32</sup> Ebema: na ubia:nola la: me opono tanaloma: woki bilibilima: eda:oma: Numa:la:, kebe nanitabokobi midi dubute kamiya:lea:no dokolina, ebete aimano Kawodawa kekalakalaima: ebenu ubi kawonomo eba iyatinalo ebenu iyaiya tanalo kapiya ebo malagidilolenako. <sup>33</sup> Wiyasiya kebe nanitabokobi midi dubute kamiya:le dopamo lawete eba:go dokolina, ebete ebenu ubi kawonomo ebe kamiya:le kekalakalaima: iyatinako, ma kunu ebete me opono tanalo eba malagidilolenalo <sup>34</sup> ebenu tepo magumulo ebe tanalate Godokono ubi tanalago na:gowelana. Ebene kebe nanitabokobi midi kamiya:lete awia:no dokolina ega:walo kebe nanitabokobi midi buwelete awia:no dokolina, iba:te aimano Kawodawano talena woko osiyodilo tanaloma: ibino ape ega:walo uliyana ebetamo kikameoma: ebenu iyaiya tanalo kapiya ebo malagidilolenaka. Wiyasiya kebe nanitabokobi midi kamiya:lete dubu dopamo lawete eba:go dokolina, ebete ebenu ubi kawonomo ebe awi kekalakalaima: iyatinako, ma kunu ebete me opono tanalo nemalagidilolena.

<sup>35</sup> Ebema: tabo olowiopiala:, nale me iyatulame tabamo kamiya:le lawe tanaloma: ega:walo dubu lawe tanaloma: la:tamo pukala kalomolameta:, ao, na ubila me tabamo la: eba walubililo la:le wadenomamo kilukula:wenama:, ega:walo la:le la:imano tanalo aimano Kawodawano woko osiyodilo tanaloma: ebetamo nanitabonomolo kikameaema:, na ubia:nola odiyobo tanalo kapiya idite la:godolo itanama:.

<sup>36</sup> Ega:walo me tanalo idila. Kebe tetelo nanitabokobi midipi magumulo buwele idila koi idila iba:te eba okolionalo, ibino nabila menokobila iba:te ebe ebetamo galo doboema:na:, ebenu tete geyageyadopolu iba:te kapiyama: eda:no ebe koite ebe laema: ebenu ubi tanalote kawonomoma: deda:mene, keba kunula:ka: ebete ebetamo modoboa: wokino tanalo malagidilole dowagilimene, ebe tetelo ebete ebe ebenu kamiya:lema: da:midimene Godokono umi magumulo ebete kuba idi a:kosiyodilomene. <sup>37</sup> Wiyasiya kebe tetelo ebe koite lumagi idino ubi tanalamo tuduwata:no, ebenu ebe a:ka:tuwa: ebenu kateneno ubi tanalolo ebetamo galo dobomi ebe buweleno tanaloma: eba matuomeolo, ebete ebenu tepo magumuno woki ma kunu da:kodakodailaemene Godokono iyaiya woko kapiya kosiyodilolenama:, ebete ebe buwele ebenu kamiya:lema: samamo midia:no tete da:geyageyaima:tepanene, Godokono umi magumulo ebete atumu kuba a:kosiyodilomene. <sup>38</sup> Ebema: numa:la:, kebe koite ebetamo galo dobomi ebe buwele samamo delaemene, ebete wade tanalo kosiyodilomene, ega:walo kebe koite Godokono woko kosiyodilonama: ebetamo galo dobomi ebe buwele tete geyageyanomolo lawea:no eba kunu dokolinamene, ebenu osiyodilo tanalote atumu wadenoma: keda:mene, iyo, ebenu osiyodilo tanalono wade tanalote dopo koino wade tanalo ka:nodolimene.

<sup>39</sup> Ega:walo me tanalo idila. Nanitabokobi midi kamiyaleno awino a:e teta:mo ebete talena magumulo eba okolinalo dubu idi akolawa:la:, wiyasiya kebe tetelo ebenu awite da:emene, ebe talenate ebegodone olopoligote ebenu ubilo dubu idi delaemene, kuba:, wiyasiya ebete nanitabokobi midia:dawa akolawa:la:. <sup>40</sup> Ebene Godokono Uliyanate nagodolo eba okolinalo, na nemalagidilutamo me wokino tanalo idite

ebegodone da:pele, kebe kamiyalete amolema: eda:te Godokono woko osiyodilo tanaloma: awia:no dokolinamene, ebena kalakalate kawonomoma: keda:mene, iyo, ebena kalakalate dubu idi delaemene ebe kamiyaleno kalakala ka:nodolimene.

## 8

*Nanitabokobi Midia:piate Ida:da:liatamo Dikalamenaka, Polote Ebako Katene Naoma: Talena:noma: Da:kiyawaiya*

<sup>1</sup> Ebema: la:imano leta magumulo la:le tanalo idima: na danana:ima, ebe tanalo ebe nanitabokobi midi dawa idite olowame baiamo tote, piyate ida:da:li amamatelena katene inamabu dapalomonaka, ebete ebe epono inamabu laema: talenala:ka: o talena:nola:ka:. Ebe tanaloma: la: epetapiate negelanakomata, “A bilibilinomate iyatawa tanalo iyalo elaima:.”

Nale wiyasiya negemo, “Kebe tetelo iyatawa tanalote idawagodolo ditana, ebe mabuma: ebe a:ka:tuwa: ebe walogonako, wiyasiya kebe tetelo nilakapo kimalagidilo tanalote ebegodolo ditana, ebe tanalodo ebete epetapi ibino nanitabokobi midi magumulo na:kodakodailamenako.” <sup>2</sup> Ebema: numa:la:, potele epetapino iyaiya walubi tabo olowioa:no amamalo ma kunu demalagidilona, ebete tanalo idima: iyatawa tanalo dopamo modobolo elawi, ebegodolo nanitabo iyatawa tanalote kitana: <sup>3</sup> Wiyasiya potele Godoko nilakapolo demalagidilona, ebema: Godote ebena tanalo nanitabonomolo eba iyatawanalo ebe wadenomamo umina.

<sup>4</sup> Ebema: nanitabokobi midi dawa idite olowame baiamo tote, piyate ida:da:li amamatelena katene inamabu dapalomonaka, ebete ebe epono inamabu lawete denamene ebe tanalo talenala:ka:? A iyatawala ida:da:li ega:walo Godoko ibino tanalo iyala, mabu aimano Kawodawa kapiyate nani Godoma: eba eda:nalo nanitabo elawote ebe kapiyagodolo bitana, wiyasiya ida:da:li uliyanano elawote nanitabolo kitana: <sup>5</sup> Nanitabola, kebe uliyanate tobolo unulo ega:walo me opo kawonomolo dilukuliona, Godoko nanitabokobi midia:piate ibi eba amamatelena ibi ibino godoma: ebo ka:la:minaka, iyo, tete epetapilo iba:te ibino iyaiya ida:da:li uliyanatamo godo mailo ega:walo kawokawopino mailo gito ikalamenaka. <sup>6</sup> Wiyasiya a nanitabokobi midipino Godoko ebe kapiyanomola, ebe aimano Nabiwila. Nanitabola, potele tobolo unu kawonomo ega:walo me opo kawonomo dosiyodiloliya, iyo, potele iyaiya inamabu ega:walo epo ega:walo uliyana bilibilinomo dosiyodiloliya, ebete ebe Elawodawama: eba eda:nalo ale ebe kowalagonama: ebema: ilukulionama:. Ega:walo aimano Kawodawa atumu ebe kapiyala, ebe Ya:su Kelisotela, ebena elawo magumudo iyaiya inamabu ega:walo epo ega:walo uliyana bilibilinomate awokalaiya, iyo, ale ebena nilakapo tanalodo igilolo ilukulionama:.

*Nanitabokobi Midipi Magumulo Idite Ebena Ekawino Agowa Ukamidawama: Akoeda:la:*

<sup>7</sup> Wiyasiya me opo epo epetapi bilibilinomate Godokono nanitabo tanalo iyatawa:, ibi ida:da:lino uliyana amamatelapila. Ebema: ibi magumulo piyate ebe amamatelatele magumune Godotamo dolobila:oma:na:, ibi epetapiate tete geyageyadopolu ibino tepo magumuno mulo woki nanitabolo kodakodailamea:no, iba:te ida:da:li malagidilole tanalo samamo ebema: akatepama:na:. Numa:la:, ebako nanitabokobi mididawate olowame baiamo tote, piyate ida:da:li amamatelena katene inamabu dapalomonaka, ebete ebe epono inamabu lawete da:penamene ebena tepo magumuno wokite ebe kuba osiyodilodawama: ebema: kegemene.

<sup>8</sup> Wiyasiya nanitabo tanalo ebe ma kunula, ale inamabu idi denama: ebe inamabute a Godokono ololo apulo tuputupupima: a:ka:midia:mene. Ebema: nanitabola, nao inamabu bilibilinomo magumulo lumagite inamabu idi denamene ebe tanalodo kubadawama: a:keda:mene, ega:walo ebete inamabu idi nama: talenama: degemene, ebena naa: tanalodo ebete tuputupudawama: a:keda:mene.

<sup>9</sup> Wiyasiya la:le inamabu bilibilinomo naoma: tutupima: eba eda:onalo, la: nanisiwale! La: magumulo kebe lumagite ebena nanitabokobi midi magumulo kodakodalo utina:no, idawate ebena nao tanalodo ebe lumagino tepo magumuno mulo woki kubailamete ebena agowa ukamidawama: akoeda:la. <sup>10</sup> Numa:la:, la: piyate Godokono tutu okoli tanalonomo diyatawawenama, la: magumulo idite katene inamabu kenama: ida:da:li idi amamateno motamo da:tomene, ebena ebete ebolo ebe uliyana amamateno inamabu eba nitalo, diyala, nanitabokobi mididawa idite ebena osiyodilo tanalo da:ba:puimene. Ebema: ebe dawate ebena tepo magumuno mulo woki dopamo nanitabolo kodakodailamea:no, ebetamo beda: tanalote na:ka:pemaigamene? Iyo, ebete ebena tepo magumulo ebe katene inamabu nao tanalo kuba osiyodilo tanaloma: eba genalo, wiyasiya ebena namutudawa ibamitilo gito denamene, ebete ebena nanitabokobi midi tanalo ebo ka:kubaimene. <sup>11</sup> Ebema: a:ma: potele a:ma: iyatawadawama: deka:mitana, a:ma:le a:imano iyatawa tanalamo a:imano nanitabokobi midi ekawi eba kunu gito ka:kubaima:ta! Numa:, Kelisote ebe ekawino mabuma: a:iya, <sup>12</sup> ebema: nanitabokobi midipi magumulo piyate ibino tepo magumuno mulo woki dopamo kodakodailamea:no, a:ma:le a:imano tutu okoli iyatawa tanalodo ebako ekakino nanitabokobi midi tanalo da:kubailama:emene, ebe gabodo a:ma: iba:tamo kawo kubanomo eba osiyodilolo Kelisotamo atu kuba tanalo nanitabonomolo ebo ka:kosiyodiloma:ta.

<sup>13</sup> Ebe mabuma: nale katene inamabu nao tanalodo naimano nanitabokobi midi ekawino agowa ukamidawama: deda:mo, ebe tanalo eba iyatawalo nale uwomua: tetelo katene inamabu walo a:kenanakomo, naimano ekawite na ibaminatenelo kuba osiyodilo tanalamo gakapoma:.

## 9

*Ya:sukono Alibolepiate Ibino Woko Osiyodilo Tanaloma: Nanitabokobi Midipiagodone Wadewade Walubi Tanalo Uwatema: Talena Puliyla*

<sup>1</sup> Ebema: nale la: alateda:lemata, la: iyatawala:ka: nale aimano Kawodawa Ya:suko naimano balida:mo nanitabolo dumiyamo? Ega:walo la: iyatawala:ka: ebete ebena sosi wagilima: iyaiya opamo daliboliya ebe wokopi magumulo na idima: eba eda:nalo, ebe woko magumulo na tutudawama: deda:namo? Numa:la:, nale aimano Kawodawatamo dosiyodilonaimo, ebe woko magumune kebe wadewade da:ima:te kemaimiye la: ebe ebe epolata. <sup>2</sup> Ebema: epetapiate na Ya:sukono nani alibolepi magumulo idima: ka:na:mia:no, la: wiyasiya naimano tanalo iyatawalata, iyo, la:le Kelisoko magumulo dilukula:wenama ebe tanalote na nani alibolepi magumulo idima: deda:namo ebe tanalo awokaliminako.

<sup>3</sup> Ebena kebe tetelo epetapiate naimano wokono tanalo anagiyamidanamete kubama: degelanaka, nale naimano tuputupu osiyodilo tanalo awokalima: iba:tamo tabo ma kunu kiyawaonakomo, <sup>4</sup> na ega:walo piyate nago woko dosiyodilona ale kebe nanitabokobi midipi kowalubili-nakoma:, ale aimano woko wiyama: modoboa: tanalo idima: ibi kanalenakoa:. Wiyasiya numa:la:, aimano woko osiyodilo tanaloma: ale sosi

epagodone bae modobolo kuwatema: talena kitana:! <sup>5</sup> Eiye! La: iy-atawala:ka:, Kawodawa Ya:sukono alibolepi epetapi, iyo, ebena ekaki ega:walo Pitako\* atumu, iba:te woko magumulo ibino nanitabokobi midipi kamiyala:go eba wapata:lamenalo ibi bilibilinomate sosi epagodone walubi keba kunu kuwatenake, talena puliyala na ega:walo nago woko dosiyodilona ale atumu eba kunu kowapata:lamenama:? <sup>6</sup> Wiyasiya diyala, la: epetapiate na ega:walo Banabasiko a netewapino tanaloma: ma kunu da:bemalagidilawenama, “Alibolepi magumulo ibi kapiyatamo talena bitana sosi epagodone walubi tanalo kuwatema:, iyo, modobola iba:te wiyasiya egege mani woko osiyodilo magumulo ibi a:ka:tuwa: ibino modoboa: tanalo nulaema:na:.”

<sup>7</sup> Eiye! Nale la:imano daedale wokino tabo eba wiyalo ma kunu gemo, “Gabamanino gowelaopi magumulo ibi bilibilinomate ibino bae ega:walo woko wiya gabamaniagodone modobolo uwatenaka, a, nanitabola:ka:? Iyo, eba kunu kebe lumagite gala:ipi da:imi pali dopamo kosiyodilile tete bilibilinomo epetapilo ebe wadewade da:imi a:penaonako, ega:walo kebe dubute sipi-goeogoeo ulamedawama: keda:nale ebena ubi tetelo ebe inamabuno nono uwatenako.”

<sup>8</sup> Ebema: la: na:kemalagidilawitama, na a:ka:tuwa: naimano wokino tanalamo kegemo me uli tabo? Ao, eba kunua:, mabu Godote ebena Bukano totomu tabo ida:mo ebe atu tanalo a niyatuamena. <sup>9</sup> Iyo, Mosesete Godokono Totomu Tabo ebena Bukamo eba akulolelo tabo idi ma kunu awokalimiya,† “Epate witi-laiso naono kikopu kuwatema: ibino kau-goeote ebe inamabu mikitaolelo woko iba:tamo dosiyodilomene, ebe tetelo iba:te ebe kau-goeono tabo ala:mo matuima: modoboa:, mabu ebete iba:tamo woko osiyodilo magumulo witi-laiso kikopu kapiyakapiya naoma: modobola, iyo, ebe nao inamabu ebe ebena wokono wiya da:pesola.” Ebema: la: me tabono magumu eba malagidilolo na nananiyala:, mabu keleka: Godote me totomu atamo dikaeamiya, ebena nilakapolo ebete kau-goeogoeo kawonomamo kemalagidilolenale o ebete epo kawonomamo kemalagidilolenale? <sup>10</sup> Nanitabola, ebete aimano igilo kawonomamo demalagidilolena, me tabo Bukamo ebema: akuloliya.

Iyo, ebete a ma kunu anaena, pali woko magumulo kebe lumagite damela maboelena inamabuamo woko dowagiliminako ega:walo kebe lumagite nao inamabu uwate woko dosiyodilonako, ibi netewapiate me atu wokino tanalago okoliona, iba:te ibino woko wiyama: nao inamabu magumune ibino apu kapimiya kuwatema:na:. <sup>11</sup> Numa:la:, pali osiyodilodawate damela magumamo kikopu keba kunu kamionakole, ale dopamo la: Kolini sosi epo magumulo woko eba kunu posiyodilima:. Ebema: ale kapiyakapiya tetelo la:godone walubi tanalo delawenakoma:, la: ebe tanalo aimano modobo woko wiyama: ba:kegelaema o pilo tanaloma: ba:kegelaema? <sup>12</sup> Nanitabola, iyaiya wokopi epetapiate la:godone walubi delawenaka, ebe tanalote modoboma: neda:taleka:, la:le aimano woko osiyodilo tanaloma: a dowalubia:wenakoma, Godokono umi magumulo ebe tanalote atumu modobonomoma: ba:keda:na:. Wiyasiya numa:la:, dopamo ale woko magumulo iyaiya modoboa: tanalo eba iyatawaonalo, la: magumulo lumagi idigodone walubi tanalo lawea:no aimano tepo magumu gito kodakodailamenakima:. Iyo, ale Kelisokono Wade Tabo piyatamo ka:kiyawaonakoma:, a ubia:nola

\* **9:5:** Buka ka:la:mioledawa, modobola a:ma: niyatawa Pitakono mailo idi ebe Kipasetela. † **9:9:** Buka ka:la:mioledawa, modobola a:ma: Totomu Tabo 25.4 numiye. Me tabono magumu ma kunula, kau-goeote woko osiyodilo magumulo epo dowalubilimene, ebema: modobola iba:te ibino nilakapolo wade walubi tanalo kau-goeotamo atumu na:kiyatima:na:.



iba:godone walubi tanalo idi eba lawelo ebe tanalote aimano woko odiyobo tanaloma: keda:ma:.

<sup>13</sup> Ega:walo me tanalo idila. La: Yu epono tanalo iyatawala:ka:, ma kunu piyate Godoko Amamateno Iya Motolo woko dosiyodilona, iba:te ebe woko magumune ibino bae modobolo naonaka? Iyo, piyate Godoko watidilono patapata unamo kalimagono inamabu elamo dalomonaka, ibi a:ka:tuwa: ibi kowalubilima: ebe kalimagono inamabu magumune katene apuapu uwatenaka. <sup>14</sup> Nanitabola, aimano Kawodawate ebe waloma:tapi atumu a:totomulateliya, ma kunu piyate ebeno Wade Tabo kiyawao woko dosiyodilona, modobola nanitabokobi midipi olowiopiate ibino modoboa: tanalo na:modoboilamelelamenakoma:na:.

*Polote Wade Tabo Kiyawao Magumulo Godogodone Ebeno Wiya Laema: Da:kiyawaiya*

<sup>15</sup> Nale kebe tabo kegemo, ebe tabo nanitabola, ma kunu nale woko magumulo iyaiya modoboa: tanalo eba iyatawanalo, lumagi idigodone walubi tanalo lawea:no naimano tepo magumu gito kodakodaiminakimo. Wiyasiya nale me leta la:tamo eba osiyodilutalo, naimano woki kitana: me tetelo la:le naimano modoboa: tanalo idi uma:wete na walubini ebo kowagilima:ema:. Eiye, na ubia:nola! Nale la:godone walubi tanalo idi kapiya lawea:no modobola na dopamo ka:emamo, mabu kebe tetelo nale idawagodone walubi tanalo lawe dowagilimo, nale naimano Kawodawa mabuma: damamanamo ebe tanalote nagodolo ebo kalatidimene! <sup>16</sup> Wiyasiya numa:la:, na Wade Tabo kiyawao mabuma: na a:ka:tuwa: na a:kowalogomo, mabu Kawodawate ebeno ubilo ebe woko natamo ikanamiya, nale naimano ubilo kelawiya:. Ebema: nale ebe woko iyabaiamo gito diyatimo, natamo da:pemaigamene ebe temeteme beda: kawonomola:ka:!

<sup>17</sup> Iyo, ebe wokote naimano ubi tanalodo natamo na:pemaigiyataleka:, nale modobo woko wiya epagodone belawenakona:, wiyasiya Godote a:ka:tuwa: na nanidawa idima: eba ka:na:milo ebeno ubilo Wade Tabo kiyawao woko natamo ebo ikanamiya. Ebema: nale ebe kapiya kekalakalaima: woko eba osiyodilonalo <sup>18</sup> kebe wade wiya na:kelaemo? Naimano wiya ebe naimano tepo magumuno kalakala tanalola, iyo, ebe kalakalate woko osiyodilo tanalodo natamo pemaigana, mabu gabo bitana nale naimano iyaiya modoboa: tanaloma: epagodone wade tanalo idi lawea:no iba:tamo Wade Tabo wiya:no gito kiyawaonakomo.

<sup>19</sup> Ebema: na opo lumagi idino matuomeo magumulo okolina:no Kelisoko magumulo tutudawama: eda:namo, wiyasiya nale Wade Tabo eba kiyawaonalo tabo olowiopi mabuma: na a:ka:tuwa: na ibi bilibilinomono wiya: wokodawama: a:midinakomo, ibi bilibilinomo epetapiate ebe tabo nanitabonomolo kelaema:. <sup>20</sup> Nanitabola, kebe tetelo nale naimano Yu epatamo Wade Tabo da:kiyawaonakomo, iba:te ebe tabo nanitabolo laema: nale ibino lumagi idimu bokolinamo. Iyo, Godote aimano ewoniatamo dikalamiya iba:te ebe Totomu Tabo bilibilinomamo tudila:oma: kawo tanalonomoma: eba gelanalo, ebema: ebe Totomu Tabamo nale atumu a:ka:tuduwatanakomo, iba:te Wade Tabo olowio tetelo odiyobo tanalo idi nagodolo umikapoma:. <sup>21</sup> Ega:walo kebe tetelo nale Yua:piatamo Wade Tabo da:kiyawaonakomo, iba:te ebe tabo nanitabolo laema: nale ibino lumagi idimu atumu ba:kokolinamo. Iyo, naimano ewoniate Godogodone duwatiya nale ebe Totomu Tabo bilibilinomamo tuduwata:no, wiyasiya Kelisokono kapiya totomu magumulo okolinamo, mabu na ubia:nola Yua:piate Wade Tabo olowio tetelo odiyobo tanalo idi nagodolo uima:. <sup>22</sup> Ebema: numa:la:, piyate nanitabokobi midi magumulo kodakodalo kelamota:ona:,

nale iba:tamo Wade Tabo da:kiyawaonakomo, iba:te ebe tabo laema: nale ibino osiyodilole tanalamo tuduwatate ibi keba kunula:ka: na a:ka:tuwa: na ebako lumagima: ba:midinakomo. Iyo, eba kunu nale iyaiya gabo epetapido iyaiya epo epetapi keba kunula:ka: ebako dawama: beda:nanakomo, mabu na ubila iba:te Wade Tabo olowio tetelo odiyobo tanalo idi nagodolo umia:no ibi epetapiate tabo nanitabonomolo ebo kelaema:. <sup>23</sup> Nanitabola, na Wade Tabo kiyawao mabuma: ebe iyaiya tanalo bilibilinomo osiyodilole-nakomo, nale ebe woko osiyodilo magumulo uwomua: teteno wadewade walubi tanalo Godogodone kuwatema:.

<sup>24</sup> La: iyatawalata, sukulu gudino kalakala egelalo ibi bilibilinomate elawamo eba puila:olo, ibi magumulo kapiyanomote sukulu watodawag-odone wade wiya kelaemene. Ebema: la: Godokono tanaloma: woko eba osiyodilonalo, modobola la: eba kunu elawonomoma: neda:iyala: la:le ebe-godone wade wiya ka:nelawa:ema:. <sup>25</sup> Ega:walo me uli tabo idila. Bolamo kalakalaopiate taneba idino wato kikopu laema: ubi eba iyatilo, kawo egela pea:no dopamo ibi bilibilinomate ibino ape na:kodakodailamenaka, iyo, ibi ubila wato kikopu lawe magumulo epate ibi kowalogolema:. Ebema: numa:la:, iba:te delaema:na: ebe kalakalate tete da:pesolo itanate ebo kolopoligomene, wiyasiya ale Godokono woko osiyodilo magumulo kebe wade wiya laema: ubi diyatinama:, ebe tanalo iyanomola mabu ebe tanalono kalakalate uwomua: tetelo agodolo a:kolopoligonamene.

<sup>26</sup> Ebe mabuma: sukulu gudino kalakala egelalo ibi magumulo idite dopo lumagima: keda:ma: elawamo keba kunu ka:puliganakole, na woko osiy-odilo magumulo elawamo eba kunu osiyodilonakomo, ega:walo gowelao magumulo dubu idite eba:go da:gowelana ebe lumagi idi kubanomamo keba kunu kanagaliminakole, na gowelao magumulo eba kunu kowage-lenamo wato kikopu kelaema:. <sup>27</sup> Iyo, bolamo kalakalaopiate kateneno ubi tanalamo tudila:oa:no ibino ape keba kunu ka:kodakodailamenake, nanitabokobi midi magumulo na eba kunu okolinamo. Ebema: nanitabola, nale Wade Tabo piyatamo ka:kiyawaonakomo, ibi epetapiate nanitabokobi midi magumulo wato kikopu delaema:na:, na ubia:nola ibi magumulo na kapiyate wade wiya lawea:noma: eda:ma:.

## 10

### *Yu Epono Ewoniatamo Bulu Opolo Demaimiya Polote Ebe Tanaloma: Da:kiyawaiya*

<sup>1</sup> Ebema: naimano nanitabokobi midipi ekakiala:, kebe tanalate a Yu epono ewoniatamo kemaimiye, na ubila la: ebe tanalo wadenomamo kemalagidiloilametama:. Iba:te Isipiti temeteme opone demaimiya, ebe tetelo Kawodawa Godote ebena tema magumudo ibi dopolamenaki ibi bilibilinomo ebo itakeamidalenaki, ebene ibi bilibilinomate ebena walubi tanalodo Kalimakalima Kewa: Kolomo apuamo modobolo na:iwaliya.

<sup>2</sup> Ebema: ale me tete epono Kelisoko waloma:ta tanalo kawokalima: ibi obamo keba kunu kowaduba:midaolenakoma:, eba kunu aimano ewo-niate Godokono wokodawa Moseseko eba waloma:tanalo, Godote ibi bilibilinomo ebena tema magumamo ega:walo kolomo magumamo ebo waduba:midaoliya. <sup>3</sup> Ebene iba:te bulu opolo eba wapata:lamenalo, Godote anoano tanalodo iba:tamo dikalamenaki ibi bilibilinomate ebe bae ebo naonakiya, <sup>4</sup> ega:walo ebete anoano tanalo idido nokola magumune dikala-menaki, ibi bilibilinomate ebe obo atumu a:ka:nionakiya, ebema: ebe nokola ebe ulila, ebe Kelisotela, kebe Kawodawate iba:go depata:nami me ebe dawala. <sup>5</sup> Wiyasiya numa:la:, iba:te Godokono iyaiya wadewade walubi

eba ulamenalo, epetapi bilibilinomate ebe nanitabokobi ka:midia; ebema: ebete iba:tamo dowate ibi danakapulamiya, ibino a:ela apa:te bulu opolo iyaiya ebo polamota:oniya.

<sup>6</sup> Ebema: Godoko ubila ale ebe tanalodo wade woki ma kunu kelaema; Yu epono ewoniate kuba tanalo kosiyodilolema: ibino tepo magumuno ubi kawonomamo keba kunu kalomonaki, ale eba kunu eda:oma: modoboa:

<sup>7</sup> Ebene tete idilo ibi epetapiate ida:da:li idino soliyomu dosiyodiliya, Godokono Buka tabote ebe tanalo ma kunu awokalimina, “Epate soliyomu eba osiyodilutalo, bae kawonomamo naote, da:imi obo elawonomo niote, ilipo mae tanalo ebo osiyodiliya.” Eiye! Ibi ida:da:li amamalatelepima:

keba kunu keda:iye, la: eba kunu eda:oma: talenala!\* <sup>8</sup> Ebene tete idilo ibi epetapiate buwelemele ega:walo koi pilo tanalo, kamiyale ega:walo dubu pilo tanalo, ebako kawokawo kuba osiyodilole dowagilimiya, ebema: kapiya egela tetelo 23 taoseni epate gito a:elaiya. Eiye! Ale ebako kuba osiyodilole magumamo nopila:oma: modoboa:!

<sup>9</sup> Ebene tete idilo ibi epetapiate Kawodawa Godoko ebe wabudiya, iyo, ebete ibino daedale wokino tanalamo tuduwata:no ebe mabuma: iba:te ebene osiyodilo tanalo kubama: degeliya, ebema: bu kaluate ibi eba alolelo ibi bilibilinomate gito a:elaiya. Eiye! Ale ebako kuba tabamo aimano Kawodawa wabudima: modoboa:!

<sup>10</sup> Ebene tete idilo ibi epetapiate ubia: tabo Godokono wokopiatamo degeliya, ebema: Godokono A:e Nopodawate ibi ebo anakapulamiya. Eiye! Ale ebako ubia: tabo gela wagilima: modoboa:!

<sup>11</sup> Numa:la; Godote ebene ubi tanalo dopamo iyatiya, epetapiate ebe tanalo bilibilinomo eba iyatawaolo iba:te wadewade woki kuwatema; ebene ebete a mabuma: ebe tanalo ebene Bukamo akuloliya, ale ebe atu kuba osiyodilole magumamo gudikapoma: . Nanitabola, a piyate me tetelo dilukulionama; me opono uwomu tetete atamo ebe netatali, <sup>12</sup> ebema: potele ma kunu demalagidilona, “Na naimano elawamo modobolo utinamo,” ebe nanisiwale! Diyala, tete tatalila ebete kuba osiyodilo magumamo da:ba:negamene.

### *Saitanakono Kuba Gabamo Wabuga:ta Magumulo Godote Nanitabokobi Midipiatamo Modobo Elawo Dikalamenako*

<sup>13</sup> Nanitabola, Saitanate iyaiya kuba gabamo wabuga:ta tanalo a:ma:tamo dowadaenako, ebete ebako atu iyaiya tanalo me opo epo bilibilinomatamo ikalamenako. Wiyasiya kalakala kawonomola, Godote a:ma: kowalubitama: nanidawama: eda:na. Ebe mabuma: a:imano nanitabokobi midi elawote keba kunu kitanale, ebete ebe tanalo eba iyatawanalo Saitanako ebo kodiyoemene, ebete a:imano elawo dodolina ebako kuba gabamo wabuga:ta tanalo kawonomo idi a:ma:tamo kadaema: . Ega:walo ebe atu tetelo Godote a:ma: gabo kiyatuima:ta, a:ma:le Saitanakono kuba gabamo wabuga:ta tanalone keba kunu nakalaula:emene a:ma:le nanitabokobi midi magumulo kodakodalo kuta:wenama:.

### *Nanitabokobi Midipiate Ida:da:li Amamalatele Tanalo Magumune Alautioma: Polote Degiya*

<sup>14</sup> Ebema: naimano wadewade namutupiala; modobola la:le iyaiya ida:da:lino uliyana amamalatele tanalo kuba nibote maigama: gelalo ebe

\* **10:7:** Buka ka:la:mioledawa, a:ma: ubi diyata:emene ebe oino iyaiya tanalo wadenomamo iyatawama; modobola a:ma:le 1 Kolini 10.7 buka apuno tanaloma: Maimi 32.1-6 numiye, ega:walo 10.8 buka apuno tanaloma: Nabas Ka:la:miole 25.1-9 numiye, ega:walo 10.9 buka apuno tanaloma: Nabas Ka:la:miole 21.5-6 numiye, ega:walo 10.10 buka apuno tanaloma: Nabas Ka:la:miole 16.41-50 numiye.

osiyodilole magumune nalautionakiyala: <sup>15</sup> Numa:la:, la: piyate naimano tabo dolowiawitama, nale naimano tepo magumuno wokilo la: wadewade wokiagopima: midilitamata, ebema: modobola la: me naimano tabo wadenomamo nanagiyamidala: <sup>16</sup> Ya:suko malagidilo bae na tanalo osiyodilo tetelo ale kebe kalilino tanaloma: Godotamo kalakala tabo kadipate-nakoma:, ebe kalili ebe Kelisokono kalima kalilila, ebema: nanitabola, ale kapimiya eba niolo a eba:go kapiyama: ebo eda:onakoma:. Ega:walo ale ebe kemalagidilonama: kebe bae kowakamionakoma:, ebe bae ebe ebeno apela, ebema: ale kapimiya eba naolo a Kelisago atumu kapiyama: ebo keda:onakoma:.

<sup>17</sup> Numa:la:, ale ebe bae wakamioa:no dopamo kapiya baete itananako, ebema: ebe tanalo ebe a nanitabokobi midipino tanalo awokalimino ulila, iyo, a bilibilinomate Kelisokono kapiya apema: eba eda:onaloma, ale kapiya bae kapimiya ebema: naonakoma: <sup>18</sup> Nanitabola, a Isalaela epono kalimagono inamabu Godotamo ikameo tanalo atumu eba kunula, ebema: modobola la:le ebe tanalo nemalagidilala: Iba:te ebe inamabu Godoko watidilono patapata unamo alomoa:no, dopamo iba:te mokoletete ibinoma: katene apuapu balamo alomonaka, ebene iba:te Godoko amamate tetelo eba:go kapiyama: eba eda:olo katene kapimiya ebo naonaka.

<sup>19</sup> Ebema: na ubila ale ida:da:li uliyanano amamalatele tanalo walo ka:kemalagidiliye. Mabu keleka: nale la: ebe tanalo magumune alautioma: danaletima? Ebe ida:da:lino elawote nanitabolo ba:kitanale, ega:walo amamalatelepiate iba:tamo kebe inamabu kikalamenake ebe inamabuate talena magumulo nanitabolo ba:ka:pola:nale? <sup>20</sup> Ao, naimano tabono magumu eba kunua:! Nanitabo tanalo ebe ma kunula, ida:da:li amamalatelepiate ibino kalimagono inamabu Godotamo kikameonakoa:, iba:te wiyasiya ida:da:lino a:da: elemasigi uliyanatamo ikalamolenaka. Ebe mabuma: na ubia:nola la: nanitabokobi midipiate la:imano osiyodilole magumulo ebako kuba uliyanago kapiyama: keda:wenama:! <sup>21</sup> Eiye! La:le egela idilo Ya:suko malagidilo kalila:mo niawete, egela idilo kuba uliyana malagidilole kalila:mo da:ka:niaema, ebe tanalo modoboa:! Iyo, la:le egela idilo Ya:suko malagidilo bae eba:go nawete, egela idilo kuba uliyana malagidilolelo iba:go bae da:kenaema, ebe tanalo atumu modoboa:! <sup>22</sup> Ebema: a nanisiwale! Ale ida:da:li amamalatelepino osiyodilole tanalamo a:ka:nopila:oma:, mabu a ubia:nola aimano Kawodawate ebe tanaloma: atamo dowama:. Ega:walo ale daedale wokilo ma kunu a:kemalagidiloma:, aimano elawote ebeno elawago ka:modobomene.

*Nanitabokobi Mididawate Ebe A:ka:tuwa: Ebe Kapiya Kowalubima: Woki Akoiyata:la:*

<sup>23</sup> Ebema: me tanalo idila. La: epetapiate ma kunu negelanamata, “Apa:mo osiyodilole tanalo bilibilinomo magumulo tanalo idi kosiyodiloma: talena nanitabolo kitana:.”

Ebema: nale tabo eba wiyalo negemo, “Iyo, lumagite Kelisoko magumulo tutudawama: eba eda:nalo, talena ebetamo nanitabolo kitana: tanalo idi kosiyodiloma:. Wiyasiya numa:la:, apa:mo osiyodilole tanalo bilibilinomo magumulo osiyodilole tanalo epetapiate aimano nanitabokobi midi magumulo a a:kowalubima:na:, iyo, a sosi epate ebe osiyodilole tanalago eba ilukulinalo wadenomamo akapepeoma: <sup>24</sup> Ebema: la: magumulo idite woki akoiyata:la: ebe a:ka:tuwa: ebe kapiya kowalubima:, wiyasiya modobola ebete epetapino nanitabokobi midi magumulo ibi kowalubilima: ibino iyaiya tanalo dopamo nemalagidilolenakomene.”

<sup>25</sup> Nanitabola, a:ma: olowame baiamo toawete, piyate ida:da:li amamatelano katene inamabu dapalomonaka, ebe epono inamabu uwata:wete denaemene, talena puliyala. Iyo, a:imano tepo magumuno mulo wokino tanalate a:imano nao tanalo idima: a:ma: kubadawama: ka:ima: modoboa:, <sup>26</sup> mabu Godokono Bukalo tabote ma kunu itana, “Me opo kawonomo ebe aimano Kawodawanola, ebema: me opono inamabu bilibilinomate ebenoma: eda:ona.” <sup>27</sup> Ebema: kebe tetelo nanitabokobi midia: namutudawa idite a:ma: eba:go bae naoma: danatamene, a:ma: ubi kiyata:emene, kuba:, a:ma:le eba:go toawete ebete bae nao tetelo a:ma:tamo kebe inamabu kikametamene, modobola a:ma: ebe inamabu kalakalago gito neniye, iyo, a:ma:le tepo magumuno mulo wokino tanalodo ida:da:li amamatelano kateneno tanaloma: woki bilibilima: akoeda:la:

<sup>28-31</sup> Ebema: numa:, naimano tanalo ma kunula. Na Kelisoko magumulo tutudawama: eba eda:nalo, naimano tepo magumuno mulo wokite osiyodilo tanalo idima: na kubadawama: ka:na:mia:no, idawano mulo wokino tanalate naimano tutu okoli tanalo matuomeoma: a:ka:modobomene. Iyo, nale bae nao tanalo idima: Godotamo kalakala tabo adipatelo ebena kalakalago denamo, ebe tetelo potele na:ka:modobomene na kuba osiyodilodawama: ka:na:ima:? Eiyeye, lumagi puliyala, ka:luta:! Ebema: a nanitabokobi midipino osiyodilole tanaloma: me naimano kawo iyatulame tabola, a:imano bae nao magumulo, ega:walo a:imano obo nio magumulo, ega:walo a:imano iyaiya osiyodilole tanalo epetapi bilibilinomo magumulo, modobola a:ma: ebe tanalo bilibilinomamo Godoko nowalagonakiye.

Wiyasiya me tanalo idila. Kebe tetelo idawate a:ma: ma kunu danatamene, “Me katene ebe ida:da:li amamatelano inamabula, ale a:kenaoma:!” a:ma: ebe nilakapolo malagidilawete ebena tepo magumuno mulo wokino tanaloma: na:tuduwatiye. Iyo, a:imano tepo magumuno wokite ebe katene nama: modoboma: gena, wiyasiya a:imano namutudawano tanaloma: a:ma: a:kenaemene. <sup>32</sup> Ebema: a:imano osiyodilole tanalo bilibilinomamo lumagi idino agowa ukamidawama: akoeda:la:, iyo, piyate Godokono sosi epoma: deda:ona, ega:walo piyate Yu epo ega:walo Yua:pi magumulo nanitabokobi midia:pima: deda:ona, ibi bilibilinomo magumulo idite a:imano osiyodilole tanaloma: kuba osiyodilo magumamo gama: modoboa:. <sup>33</sup> Nanitabola, na a:ka:tuwa: na kapiya kowalubima: malagidiloa:no, naimano ubi tanalo ma kunu iyatinamo, nale naimano osiyodilole tanalo bilibilinomamo epo bilibilinomo dowlubilinakomo, ibi eba kalakalailamenalo iba:te Godogodone ibino igilo mula: tanalo walone ebo kelaema:na:. Ebema: nanitabokobi mididawa, naimano ubi tanalote epetapiatamo keba kunu kitanale, modobola a:imano ubi tanalote iba:tamo atumu eba kunu na:kitananakomene.

## 11

<sup>1</sup> Iyo, modobola la: nanitabokobi midipi bilibilinomono osiyodilole tanalo magumulo la:le na nibaminatena:la:, nale Kelisoko keba kunu kibamitiano eba kunu.

### *Polote Kolini Sosi Kamiyaleno Osiyodilo Tanalo Idima: Da:kiyawaiya*

<sup>2</sup> Ebema: nale la: moiolemata, mabu la:imano osiyodilole tanalo bilibilinomo magumulo la:le na eba malagidilonelo, nale la: dopo sosino\* osiyodilole tanalo keba kunu kiyatulametanakima, la: ebe tanaloma nanitabonomolo eba kunu tudila:onomata.

\* **11:2:** Buka ka:la:mioledawa, modobola a:ma: me tanalo niyatawa, Ya:sute a:e magumune maigate Unu Duliyomolamo dodoliya, ebe tetelo Yu epono Yudiya opolo kebe sosite kemaigiyale ebe sosi ebe dopo sosila.



<sup>3</sup> Wiyasiya na ubila me tetelo oli tanalo idi la: kiyatulametama:, ma kunu Godote Kelisokono watodawama: keba kunu keda:nale, Kelisote nanitabokobi midipi dubuno watodawama: eba kunu keda:na, ebene nanitabokobi midi dubute ebene kamiyaleno watodawama: atumu keda:na.

<sup>4</sup> Ebema: la: magumulo dubu idite Godotamo towetowe tabo ge tetelo o ebete Godokono woki awokalimi tetelo ebene wato kalikamo da:mula:mene, ebe osiyodilo tanalo ebe ebene watodawa Kelisotamo ilipo ikame tanalo keba kunula:ka: eba kunula. <sup>5-6</sup> Wiyasiya la: magumulo kamiyale idite ebene wato kalikamo mula:no Godotamo towetowe tabo degemene o ebete Godokono woki sosi epatamo dawokalimene, ebe osiyodilo tanalo ebe ebene awitamamo ilipo ikame tanalola, mabu ebene awi ebe ebene watodawala.

Numa:la:, la: epono tanalo ma kunula, dubu idite ebene kamiyaleno kawo kubanomono tanaloma: ebene eke a:gumi tanalamo ilipo ebetamo kikaemene, ebema: la: magumulo kamiyale idite ebene wato kalikamo mula:no ilipoa:noma: deda:mene, modobola ebete ilipo nelaemene, kamiyaleno awite eke a:gumi tanalamo ebetamo ilipo keba kunu kikame-nakole eba kunu! Iyo, la: iyatawalata, eke a:gumi tanalo ega:walo eke otolo tanalo ebe kamiyala:tamo ilipo ikalame tanalola, ebema: modobola iba:te ibino wato kalikamo na:mula:lenakoma:na:

<sup>7</sup> Wiyasiya dubuno tanalo iyanomola, ebete ebene wato kalikamo mula:noma: deda:mene ilipo tanalote a:kitanamene. Numa:la:, Godote dopo dubu ebene ololamo osiyodiliya, ebema: me tetelo dubu bilibilinomate ebe ololamo eba ilukulionalo Godokono wade mulo okoli igilono tanalo ebo awokaliminaka. Wiyasiya dubuno wade mulo okoli igilono tanalo kamiyala:te awokaliminaka, <sup>8</sup> mabu Godote dopo dubu ega:walo kamiyale eba osiyodilolelo, ebete dubuno igilo kamiyalegodone kelawiya:, ao, ebete wiyasiya kamiyaleno igilo dubugodone lawiya. <sup>9</sup> Ega:walo numa:la:, Godote ebe a:ka:tuwa: ebe kekalakalaima: dopo dubu osiyodiliya, wiyasiya ebete ebe dubu kekalakalaima: dopo kamiyale ako-osiyodiliya.

<sup>10</sup> Ebema: la: magumulo kamiyala:te ibino wato kalikamo na:mula:lenakoma:na:, mabu Godote ebene Uliyanano elawo iba:tamo dikalami, ibino wato mula:le tanalote ebe tanalo wadenomamo kawokalimene. Iyo, ebe tanalodo Unu Duliyomolono nopopiate me tanalo kiyatawaoma:na:, dubate Godokono wade mulo okoli igilono tanalo keba kunu kawokaliminake, talena puliyala nanitabokobi midipi kamiyala:te ebe atu wade mulo okoli igilono tanalo eba kunu atumu kawokalima:

<sup>11</sup> Wiyasiya me tanalo idi akododomatiala:. A nanitabokobi midipi magumulo kamiyala:te dubuno tanaloma: akogelala:, “Ale iba:godolo walubi tanalo idi kuminakoa:,” ega:walo dubate atumu kamiyaleno tanaloma: ebako daedale wokino tabo akokiyawaoala:. Ao, eba kunua:, mabu ale aimano Kawodawa magumulo eba ilukulinalo dubu bilibilinomate kamiyala:godolo walubi tanalo ulamenaka, ega:walo atumu kamiyale bilibilinomate dubagodone walubi tanalo a:kuwatanaka. <sup>12</sup> Numa:la:, Godokono osiyodilo tanalodo dopo kamiyalete dubugodone pawokaliya, ebene me tetelo ebene walubi tanalodo dubu bilibilinomate kamiyale magumune awokalaonaka, iyo, iyaiya epo ega:walo inamabu bilibilinomate ebene ubi tanalo kapiyado ebema: maimionaka.

<sup>13</sup> Ebema: modobola la: a:ka:tuwa: la:imano wokiamo nemalagidilala:, la: magumulo kamiyale idite ebene wato kalikamo mula:no Godotamo towetowe tabo degemene, ebe tanalo modobola:ka: o modoboa:noma: ba:keda:mene? <sup>14-15</sup> Numa:la:, Godote kebe epo ebene ubilo dosiyodiloliya,

ebe iyaiya epo magumulo epetapi bilibilinomate ibino tepo magumuno wokilo negelana, dubu idite gubaguba eka:go dokolina ebe tanalo ebe kuba ilipo tanalola, wiyasiya kamiyale idite gubaguba eka:go dokolina ebe tanalo ebe agalu kamiyalema: midi tanalola. Ebema: modobola la: ebe tanalone niyatawala:, Godote kamiyala:tamo ibino gubaguba eke ikalamiya ebe eka:te ibino wato mula:leno inamabuma: keda:onama:.<sup>16</sup> Ebene la: magumulo idite me tanaloma: nago apamineuima: dowagelemene, naimano uwomu tabo ebetamo ma kunu itana, la:imano opo kawonomolo piyate Godokono sosi epoma: deda:ona, ibi bilibilinomate ago woki kapiyama: eba eda:onalo kamiyaleno tanaloma: eba kunu iyatulamenaka.

*Polote Ya:suko Malagidilo Bae Nao Tanaloma: Da:kiyawaiya*

<sup>17</sup> Ebema: nale ebe tanalo atepate nale iyaiya tanalo epetapi la: diyatulametama, ebe tanalo magumulo nale la: a:kemoioletama, mabu kebe tetelo la: daladabuta:wenakoma, la: la:imano osiyodilole tanalamo epetapino nanitabokobi midi magumulo ibi walubilia:no ibi gito kubailamenakomata.<sup>18</sup> Ebene dopo tanalo ma kunula, epetapiate na ananiya, la: sosi epate daladabuta:wenakoma la: magumulo iyaiya anagiyamida tanalo ba:pola:lamenata. Ebema: ibino tabo gela magumulo nale tabo epetapi nanitabokobi a:midilimo,<sup>19</sup> mabu diyala, ebako anagiyamida tanalate Godokono ubilo demaimiya, la: magumulo piyate ebenu ubi tanalamo nanitabolo da:tudila:wenama, la:le ebenu iyanomo tuputupu okoli magumulo eba lamota:onalo, epetapiate ebe wade okoli tanalo dumilametamene iba:te ibino kuba osiyodilole tanalo ebo kiyatawaoma:na:

<sup>20-21</sup> Wiyasiya numa:la:, la: epetapino kuba osiyodilo tanalo ma kunula. La: daladabuta:wenakoma, la:le Kawodawa Ya:suko malagidilo bae nao tetelo ebe nanitabolo kemalagidilawena:. Iyo, Ya:suko malagidilo bae nao tetete pea:no, dopamo la:imano soliyomu bae nao magumulo† epetapiate epetapi malagidilolea:no ibi kemakopela:wenakoa:, ebenu la: epetapi a:ka:tuwa: la:imano bae gawagawalo eba naolo epetapiatamo nilakapolo kalabaolama:wenakoa:. Ebema: nanitabola, la:imano osiyodilo magumulo epetapiate soliyomu bae kawonomamo eba naolo wiyasiya epetapi baete nanitabolo ka:ugulamolenakoa:, epetapiate elawo da:imi obo kawonomamo nio magumulo daedalema: eba eda:olo wiyasiya epetapi nemaliolenaka.<sup>22</sup> Eiyee! Mabu keleka: la:le Godokono sosi epo magumulo epetapi dologala epoma: da:midila:wenakoma? Ega:walo mabu keleka: la:le nigologolopi walubilia:no iba:tamo ilipo dikalama:wenakoma? La:imano woki ba:kitanale, nale me osiyodilo tanaloma: la: demoiioletama? Ao, moiote tabo nagodolo kitana:! Me kapiya tabo la:tamo kiyawaomo, la:le la:imano ekakiatamo nilakapo awokalima: ubia:noma: deda:ema, la:le sosino aladabuti tanalamo akopelama:la:. Modobola la: wiyasiya la: a:ka:tuwa: la:imano iyaiya motolo bae nenaonakiyala:

<sup>23</sup> Numa:la:, nale Kawodawa Ya:sugodone delawiyamo, ebe atu tanalo dopamo la: ma kunu iyatulaimata, ebenu namutudawa idite ebe ebenu anakapumipino kotamo diyatini, ebe idokolo ebete bae lawenate,<sup>24</sup> Godotamo kalakala tabo genate, eba wakamionalo ebe waloma:tapiatamo negeni, “Me naimano apela, la: mabuma: Godotamo ikaemo. La:le na

† **11:20-21:** Buka ka:la:mioledawa, modobola a:ma: Kolini sosi epono osiyodilo tanalo ma kunu niyatawala, iba:te Godoko amamate egelalo daladabutinakiya, dopamo iba:te ibino iyaiya kapiya alailame taneba magumulo soliyomu bae naonakiya, ebenu walogabo apune iba:te Ya:suko malagidilo bae nao tanalo ebo osiyodilonakiya. Ebema: iba:te soliyomu bae nao tetelo kebe kuba tanalo kosiyodilolenaki, Polote ebe tanaloma: me tabo kiyawaiya.

malagidilonelo me tanalo nosiyodilonakiyala.”<sup>25</sup> Ebene bae nao tanalo dolopoligoni, ebete kalili walo kelawenate na:kegeni, “Me kalili ebe Godote epago milolo kilukulinama: oli nopo diyatiya me ebe tanalola, iyo, naimano kalimate ebe nopo kodakodaimina. Kebe tetelo la:le da:niawenakoma, modobola na malagidilonelo nosiyodilonakiyala.”<sup>26</sup> Ebema: numa:la:, Kawodawate me opamo walo pea:no, kebe iyaiya tetelo la:le ebe malagidilo bae denawenakoma ega:walo ebena kalima kalili da:niawenakoma, ebe netewa tanalodo la: Ya:sukono a:e tanalo bawokaliminakomata.

<sup>27</sup> Ebe mabuma: kebe lumagite ebena tepo magumuno wokilo Kawodawa Ya:suko nanitabolo amamatea:no ebe malagidilo bae denamene ega:walo ebena kalima kalili da:nimene, ebe tanalodo ebete Kawodawano apeno talena ega:walo kalimano talena wakalamite kawo kubanomo kosiyo-dilomene. <sup>28</sup> Ebema: lumagite Ya:suko malagidilo bae na:no ega:walo ebete ebena kalima kaliline nia:no, modobola ebete dopamo ebena tepo magumuno tanalo wadenomamo nanagiyamidamene, <sup>29</sup> mabu kebe dawate Ya:sukono apeno tanalono magumu wadenomamo malagidiloa:no ebe malagidilo bae gito denamene, ega:walo ebena kalima kaliline gito da:ka:nimene, ebe dawano tanalo Godote kubama: kegemene, iyo, ebetamo kuba wiya kikaemene. <sup>30</sup> Me mabuma: apeno temeteme tanalate la: epetapi bilibilinomagodolo ba:pola:na, ega:walo gabugabute atumu la: eba ulamenalo la: magumulo epetapiate gito a:elaiya.

<sup>31</sup> Wiyasiya numa:la:, a a:ka:tuwa: aimano tanalo dopamo modobolo danagilamenakoma:, ebema: aimano Kawodawate aimano tanalo anagiyamidaeame tetelo aimano osiyodilo tanalo idima: a kubakubapima: a:kegeamene. <sup>32</sup> Nanitabola, kebe tetelo ebete a anagiyamidae magumulo kuba wiya dikaeamene, ebena ubi tanalo atamo ma kunu itananako, ebete a me tetelo temeteme tanalamo tuputupulo kilukulinama: diyatuamenako, walone tetelo me opo epate ibino uwomua: teteno kuba wiya eba uwatelo, a wiyasiya kuba wiya a:kelaema:.

<sup>33</sup> Ebema: naimano nanitabokobi midipi ekakiala:, la:le soliyomu bae ega:walo Ya:suko malagidilo bae nao tanaloma: daladabuta:wenakoma, modobola la: nao wagilimia:no epo bilibilinomono pelame tanalo nemakopelenakiyala:. <sup>34</sup> Ega:walo la: magumulo bae kapete kebe lumagi kawiya duimene, modobola ebete ebena motolo bae da:peso dopamo nate ebena sosino aladabuti tanalamo na:pemene, mabu ebako osiyodilo tanalodo kuba wiyate Godogodone la: sosi epatamo a:ka:pemene. Ebema: kalakala kawonomola, me tetelo me kapiyakapiya tanaloma: nale la: wadenomamo analemata, wiyasiya la:imano osiyodilole tanalo epetapima: kebe tabo kolowimo, nale da:pemo ebe tanalo atumu ebo ka:pa:tuputupuilaemamo.

## 12

### *Nanitabokobi Midipiate Godokono Woko Kosiyodilonama: Ebena Uliyanate Nilakapolo Iba:tamo Iyaiya Elawo Dikalamenako*

<sup>1</sup> Ebema: la:le tanalo idima: na danana:ima, ebe tanalo a nanitabokobi midipiate Godokono woko kosiyodilonama: ebena Uliyanate nilakapolo atamo iyaiya elawo dikaeamenako, ebe tanalate keba kunu ka:pola:nale. Naimano nanitabokobi midipi ekakiala:, na ubia:nola la: ebe gito ikalame tanaloma: iyatawa:pima: eda:oma:.

<sup>2</sup> La: iyatawalata, dopamo la: nanitabokobi midia:pima: eba eda:onaloo, ida:da:li amamalatele magumulo a:da: elemasigi uliyanate iyaiya gabo

epetapido la: ebo magatalenakiyata, wiyasiya ebe ida:da:liagodolo nanitabo igilote itana:no iba:te la: kowalubilitanamia:. <sup>3</sup> Ebema: na ubila la: me tanalo niyatawala:, Godokono Uliyanate lumagi idigodolo dokolina, ebete a:ka:modobomene kuba tabo ma kunu gema:, “Ya:suko kuba dawama: eba eda:nalo Godote ebe Saitanakono Ela Opamo keba:idilomene!” Ega:walo la:le lumagi idino tabo ma kunu dolowiaema, “Ya:suko ebe Kawodawala!” la: ebo kiyatawaomamota, Godokono Uliyanate ebe magumulo bokolina, mabu ebete ebe lumagi magumulo okolina:notaleka: ebete ebe nani tabo gema: a:ka:modobona:.

<sup>4</sup> Ebema: numa:la:, Godokono Uliyana ebe kapiyala, wiyasiya nanitabokobi midipi bilibilinomoma: eba eda:onalo, ebete iba:tamo iyaiya elawo dikalamenako ebe iyanomo elawo tanalate iyaiya ba:pola:na. <sup>5</sup> Ega:walo Kawodawa Ya:suko ebe kapiyala, wiyasiya nanitabokobi midipiate ebena tanaloma: dosiyodilona ebe wokono tanalate iyaiya ba:pola:na. <sup>6</sup> Ebene Godoko atumu ebe kapiyala, wiyasiya ebete nanitabokobi midipiatamo wadewade woki dikalamenako, ebe wokino tanalate atumu iyaiya ba:ka:pola:na iba:te ebena iyaiya woko kosiyodilonama:.

<sup>7</sup> Nanitabola, Godokono Uliyanate nanitabokobi midipi bilibilinomo magumulo bokolina, ebema: iba:te ebe tanalo eba iyatawaolo kapimiya kapepeoma: ebete ebena iyaiya elawo ikalame tanalamo ebena tanalo iba:godolo awokaliminako. <sup>8</sup> Ma kunu Godokono Uliyanate lumagi iditamo iyanomo elawo gito ikamenako epetapiatamo mulo wokino tabo ka:kiyawaoma:, ega:walo ebe atu Uliyanate lumagi iditamo iyanomo elawo gito kikamenako wade iyatawa tanalo kawokalima:. <sup>9</sup> Ebene ebe Uliyanate lumagi iditamo iyanomo elawo gito ikamenako ebena nanitabokobi midi tanalo Kelisotamo kawonomamo kiyatima:, ega:walo ebete lumagi iditamo iyanomo elawo gito kikamenako temetema:gopi wadekobi ka:midilima:. <sup>10</sup> Iyo, ebe atu Uliyanate epo epetapiatamo ebena iyanomo elawo nilakapolo iyaiya ikalamolenako, ibi magumulo idite anoano tanalo kosiyo-dilolenakoma:, idite Godokono tepo magumuno woki kawokaliminakoma:, idite kuba uliyanano osiyodilole tanalo ega:walo Godokono Uliyanano osiyodilole tanalo wadenomamo kanagilamelelamenakoma:, idite Unu Duliynomolono nopopino iyaiya tabamo ka:kiyawaonakoma:, ega:walo idite ebako iyaiya tabono magumu olowiopiatamo kawokalilamenakoma:. <sup>11</sup> Ebema: numa:la:, ebe gito ikalame tanalo bilibilinomate Elawodawa kapiyanomodo pemaimionaka, ebe Godokono Uliyanala, iyo, ebena ubilo ebete nanitabokobi midipi bilibilinomatamo ebena iyaiya elawo eba kunu ikalamolenako.

*Nanitabokobi Midipiate Kelisokono Ape Kapiyama: Eba Eda:onalo Ebe Apeno Iyaiya Apuapuate Iyaiya Woko Osiyodilolena*

<sup>12</sup> Nanitabola, lumagi idino ape kapiyanomola, wiyasiya iyaiya woko kosiyo-dilolenama: iyaiya ape apuapuate ba:pola:mena. Ebema: eba kunu Kelisokono kapiya ape magumulo apeno iyaiya apuapuate ba:pola:mena, <sup>13</sup> ebe iyaiya apuapu ebe a nanitabokobi midipila. Numa:la:, a magumulo piyate Yu epoma: deda:onama: ega:walo piyate Yua:pima: deda:onama:, piyate epetapiatamo wiya: woko dosiyodilonama: ega:walo piyate a a:ka:tuwa: a walubima: egege mani woko dosiyodilonama:, a bilibilinomate obamo waduba:midaole tanalo Godokono Uliyana kapiyano elawamo elawiyama:, iyo, ebe atu Uliyanate a bilibilinomono tepo magumu iyalo etabokailamiya.

<sup>14</sup> Iyo, lumagino ape magumulo apeno iyaiya apuapuate ba:pola:mena, kapiya apute kitamena. <sup>15</sup> Ebema: lumagino agowate ma kunu degemene, “Na apeno ape apu idia:, mabu na kotoa:,” ebako tabo ge tanalote a:ka:modobomene ebe ape magumune gito kitamidama. <sup>16</sup> Ega:walo galote atumu ma kunu degemene, “Na apeno ape apua:, mabu na balidia:,” ebako tabo ge tanalote a:ka:modobomene ebe ape magumune gito kitamidama:

<sup>17</sup> Numa:la:, lumagino ape kawonomote balidi kapiyanomoma: neda:taleka:, ebete iyaiya tanalo olowioma: a:ka:modobona:, ega:walo ebena ape kawonomote galo kapiyanomoma: neda:taleka: ebete iyaiya nibo niyabaolema: a:ka:modobona:! <sup>18</sup> Wiyasiya Godote dopo lumagino ape eba osiyodilolo, ebete apeno iyaiya ape apuapu bilibilinomo ebena ubilo alomomiya, <sup>19</sup> ebe mabuma: lumagi idino ape kawonomote kapiya apunomoma: neda:taleka:, ebena apete nanitabolo a:kitanana:! <sup>20</sup> Eiye, apeno tanalo eba kunua:, ebe kapiyanomola wiyasiya iyaiya woko kosiyodilolenama: apeno iyaiya ape apuapuate ba:pola:mena.

<sup>21</sup> Ebe mabuma: balidite modoboa: kototamo tabo ma kunu gema:, “Na ubia:nola a:ma: mabu a:ma:godone walubi tanalo idi kelawena:!” ega:walo watote atumu agowatamo mako tabo a:kegemene, “Na ubia:nola a:ma: mabu a:ma:godolo walubi tanalo idi kuminakoa:!” <sup>22</sup> Ao, eba kunua:. Lumagino ape magumulo apeno iyaiya apuapuate eba pola:menalo, ebe apuapu magumulo ale kebe apuapu elawoelawoa:dopoma: kegelanama:, ebete ebe ape apuapu ebena ape magumune diyailimene ebena igilote gito kolopoligomene. <sup>23</sup> Eba kunu ale apeno iyaiya ape apuapu magumulo kebe apuapu kubakubadopoma: kemalagidilolenama:, aimano osiyodilole tanalamo ebe ape apuapu wadenomamo ulamenanakoma: iba:te modobolo ka:pola:nama:. Ega:walo aimano ape magumulo kebe ape apuapuate awokala eba pola:nalo atamo ilipo dikaeamena, ale ebe ape apuapu kawonomamo malagidilolete kalikamo mula:lenakoma:, <sup>24</sup> wiyasiya numa:la:, kebe ape apuapuate awokala eba pola:nalo atamo ilipo kikaeamena:, ale ebe apuapu kemalagidilolena: ibi kalikamo ka:mula:lema:.

Ebema: nanitabola, Godote dopo lumagino ape eba osiyodilolo apeno iyaiya apuapu alomomelo woki ma kunu iyatiya, epate apeno apuapu bilibilinomo magumulo kebe apuapu kubakubadopoma: degelanama:na:, iba:te ebe ape apuapu kawonomamo eba malagidilolenalo ibino osiyodilole tanalamo wadenomamo bulamenanakoma:na:. <sup>25</sup> Ebema: numa:la:, Godoko ubia:nola, ebete dosiyodiliya ebe ape magumulo anagiyamida tanalote maigama:. Ebe wiyasiya ubila apeno apuapu bilibilinomate eba pola:nalo, idite iditamato atu nilakapo tanalo niyatinakomene, <sup>26</sup> ebema: kebe tetelo ape apu idite temeteme diyatawamene, ebe tetelo ape apuapu bilibilinomate atu temetema:go ka:pola:nama:na:, ega:walo kebe tetelo ape apu idite idawano moio magumulo kalakala delaemene, ebe tetelo ape apuapu bilibilinomate eba:go kapimiya kekalakalaoma:na:.

<sup>27</sup> Ebema: la: nanitabokobi midipi bilibilinomo la: Kelisokono apelata, iyo, ebena ape magumulo da:pola:mena la: ebe apeno iyaiya apuapulata. <sup>28</sup> Numa:la:, sosi wagilima: iyaiya opamo daliboliya Godote ebe wokopi alomoiya iba:te ebena sosi magumulo dopopima: keda:onama:, ebena wokopi epetapiate ebe dopopino opo apulo ka:pola:nama: ebete ebena woki awokalimipi kalomote, ebena ibino opo apulo ka:pola:nama: piyate ebena Buka apuapuno tabo diyatulamenaka ebete ebe wokopi kalomote, ebena ibino opo apulo ka:pola:nama: piyate anoano tanalo dosiyodilolenaka ebete ebe wokopi ebo kalomiya. Ega:walo Godote piyatamo iyaiya



elawo dikalamena iba:te ebene sosino woko epetapi kosiyodilolena:ma:, ebete ebe wokopi atumu kalomiya, ma kunu ebete dopamo temetema:gopi wadekobi midiolepi alomote, ebene piyate epono osiyodilole magumulo ibi gito dowalubilinaka ebe wokopi kalomote, ebene sosi epono watowatopi epetapi kalomote, ebene piyate Unu Duliyaomolono nopopino iyaiya tabamo da:kiyawaonaka ebe wokopi ebo kalomiya.

<sup>29</sup> Ebema: numa:la:, sosino iyaiya wokopi magumulo ibi bilibilinomate Kelisokono dopo alibolepima: keda:ona:, ega:walo atumu ibi bilibilinomate Godokono woki awokalimipia:, ega:walo ibi bilibilinomate ebene Buka apuapuno tabo iyatulamepia:. Nanitabola, ibi bilibilinomate ebene Uliyanano elawamo anoano tanalo kosiyodilolena:, <sup>30</sup> ega:walo ibi bilibilinomate ebene elawamo temetema:gopi wadekobi ka:midiolena:, ega:walo ibi bilibilinomate Unu Duliyaomolono nopopino iyaiya tabamo ka:kiyawaona:, ega:walo ibi bilibilinomate ebako iyaiya tabono magumu olowiopiatamo kawokalilamena:. <sup>31</sup> Ebema: Godokono Uliyanate iyaiya elawo nanitabokobi midipiatamo nilakapolo dikalamena, ebe tanalo magumulo modobola la:le wadewade iyanomo elawo kuwata:ema: ubi kawonomamo niyatinakiyala:.

Wiyasiya numa:la:, na me tetelo Godokono gabo idi la: kiyatulaemamota, ebe tuputupu gabono wade tanalote ebene Uliyanano iyaiya gito ikalame tanalono wade tanalo nodolina.

## 13

### *Nilakapo Kimalagidilo Tanalo*

<sup>1</sup> Diyala, iyaiya opo epono tabamo ega:walo Unu Duliyaomolono nopopino tabamo kiyawao elawote nagodolo ditanale, wiyasiya nilakapo kimalagidilo tanalote nagodolo itana:notaleka: nale tabo kiyawao magumulo wade tanalo idi a:kosiyodilona:, iyo, na lumagite bele gito danagaliminako ebe keba kunula:ka: ebako dawama: eda:nama, ebe bele diyamote olopoligoa:no epate olowioma: ubia:noma: keda:oma:na:. <sup>2</sup> Ebene diyala, Godokono woki kawokalima: ebene Uliyanate natamo iyanomo elawo dikanamenakole, ega:walo iyatawa tanalo bilibilinomate nagodolo eba pola:nalo Godokono waminale tanalo bilibilinomo nale mulo woki-amo diyatawanakomo, ega:walo unuunu damela iyabaiamo kalibolema: nanitabokobi midi tanalono elawote nagodolo ditanale, wiyasiya nilakapo kimalagidilo tanalote nagodolo itana:notaleka: na magumulo wade tanalo idite a:kitanana:. <sup>3</sup> Ebene diyala, nale naimano inamabu bilibilinomo nigol-ogolopiatamo gito da:bikalaemo, ega:walo Ya:suko mabuma: nanitabokobi midia:piate naimano ape elamo da:bemadoema:na:, wiyasiya nilakapo kimalagidilo tanalote nagodolo itana:notaleka: nale Godogodone wade wiya idi a:kelawena:.

<sup>4</sup> Ebema: a:ma: lumagi idi nilakapolo demalagidilawena, a:ma:le ebene daedale osiyodilo tanaloma: ebetamo samamo ubia:noma: a:keda:emene, ega:walo a:ma: nilakapo osiyodilole tanalodo ebetamo wade walubi kiyatima:ta. Ebene a:ma:le nilakapo magumulo dokoliawena, a:ma:le lumagi idino inamabuma: ebetamo a:ka:dowaemene, ega:walo a:imano tanaloma: amama tabo kiyawaoa:no a:imano tepo magumulo a:ma: a:ka:tuwa: a:ma: unamo akadipata:emene, <sup>5</sup> iyo, a:ma: apeno osiyodilole tanalamo modoboa: woki kapiya idi akawokalima:emene. Ebene a:ma:le nilakapo magumulo dokoliawena a:ma: a:ka:tuwa: a:imano tanalo kapiya a:kemalagidilawenamene, ega:walo a:imano tepo magumuno elate lumagi iditamo samamo maiga:no a:ma: ebene kuba osiyodilole tanalo

gito ka:dodolomatilima:ta. <sup>6</sup> Ebene a:ma:le nilakapo magumulo dokoliawena a:ma: epetapino kuba osiyodilo tanalo lumagi iditamo duma:emene a:kekalakalaemene, a:ma: wiyasiya Godokono nanitabo tanalote dawokalamene a:ma: ebo kekalakalama:ta. <sup>7</sup> Ebema: nilakapo kimalagidilo tanalote a:ma:godolo nanitabonomolo ditana, temeteme tanalo bilibilinomate a:ma:tamo demaimionakoma:na: a:ma: uwomua: tetelo ebe kuba tanalamo tuduwata:no kuiwodopoma: a:keda:emene, wiyasiya a:ma:le a:imano nanitabokobi midi tanalo eba atila:nalo, ebe tanalo magumulo kodakodalo uta:wete Godokono wade walubi tete bemakopelenama:ta.

<sup>8</sup> Iyo, nilakapo kimalagidilo tanalote uwomua: uwomua: tetelo a:kolopoligonamene. Wiyasiya numa:la:, Godokono tepo magumuno woki awokalilame tanalate ebena wokopiagodolo demaimionaka ebe tanalate kolopoligoma:na:, ega:walo epetapiate Unu Duliyomolono nopopino iyaiya tabamo Godokono Uliyanano elawamo da:kiyawaonaka, ebe tanalate uwomua: tetelo a:ka:pola:nama:na:, ega:walo iyatawa tanalo bilibilinomate epagodolo da:pola:na ebe tanalate atumu kolopoligoma:na:. <sup>9</sup> Nanitabola, Godote kebe iyaiya iyatawa tanalo aimano woki mabuamo kalomonale, ega:walo ebete kebe elawo atamo kikaeamenale ale ebena tepo magumuno woki kawokalilaema:, ebe tanalate agodolo eba pola:nalo wiyasiya Godokono umi magumulo kubakubadopoma: eda:ona. <sup>10</sup> Ebema: kalakala kawonomola, mabu walone tetelo aimano Wade Tuputupudawanomote nanitabolo dapemene, ebe tetelo kubakubadopoma tanalo bilibilinomate gito kolopoligoma:na:.

<sup>11</sup> Numa:la:, na gudu da:peso tetelo naimano tabo kiyawao tanalo ega:walo epetapino tabo anagiyamida wokino tanalo ega:walo tepo magumuno kimalagidilo tanalo, ebe netewa-kapiya tanalate nagodolo gudu da:pesono osiyodilole tanalo keba kunula:ka: eba kunu eda:onamiya. Wiyasiya me tetelo naimano tanalo eba kunu kitana:, mabu na dubuma: dediyamo ebe tetelo gudu da:pesono osiyodilole tanalo bilibilinomo naimano ginimi apuamo gito miyapiyamo. <sup>12</sup> Ebema: nanitabola, me tetelo ale Godokono tanalo kelenomamo uminakoma:, lumagite molo-molo galasilo ebena ololo keba kunu kuminakole eba kunu, wiyasiya walone tetelo a ebena ololo apuamo da:nemaimioma: ebena ololo wadenomamo ebo ka:nuimalema:. Iyo, me tetelo naimano iyatawa tanalate kubakubadopoma: eda:ona, wiyasiya walone tetelo nale tanalo bilibilinomo wadenomamo kiyatawaomamo, Godote naimano tanalo bilibilinomo keba kunu kiyatawanale eba kunu.

<sup>13</sup> Ebema: numa:la:, uwomua: uwomua: tetelo da:pola:nama:na: me ebe kawokawo tanalola, aimano nanitabokobi midi tanalo, ega:walo ale Godokono wade tetete maigama: olowiolo dilukulinama: ebe tanalo, ega:walo ale epetapi nilakapolo demalagidilolenama: ebe tanalo, me ebe netewa-kapiya tanalola. Wiyasiya nanitabola, me tanalate eba pola:nalo ibi magumulo nilakapo kimalagidilo tanalote kawo tanalonomoma: beda:namene.

## 14

*Godokono Woki Awokalimidawano Wade Tanalote Unu Duliyomolono Nopopino Tabamo Kiyawaodawano Wade Tanalo Nodolina*

<sup>1</sup> Ebema: modobola la: la:imano woki kawonomamo niyatinala: nilakapo kimalagidilo magumulo kilukula:wenama:, ega:walo atu tetelo la: iyawanomoma: neda:onala: Godokono Uliyanate iyaiya elawo gito dikalamenako la:le ebe iyanomo tanalo kuwata:ema:. Numa:la:, ebe gito ikalame

tanalo magumulo potele Godokono woki kawokalima: elawo delaemene, ebete wade tanalonomo elawe. <sup>2</sup> Wiyasiya kebe lumagite Unu Duli-yomolono nopopino iyaiya tabamo da:kiyawaonako, ebete ebe tanalodo Godoko kapiyatamo kiyawaonako, me opo epatamoa:. Iyo, ebete Godokono Uliyanano elawamo ebene waminale tanaloma: kiyawaonako, ebema: olowiopiate ebene tabono magumu laema: ka:modobonakoa:. <sup>3</sup> Wiyasiya Godokono woki awokalimidawano tanalo eba kunua:. Ebene tabo kiyawao tanalodo epate wadenomamo olowionaka, ebema: tete epetapilo Godokono tabote ibino nanitabokobi midi magumulo ibi eba walubililo elawokobi a:midilinako, ega:walo tete epetapilo ibi temeteme magumulo a:gelebadilamenako. <sup>4</sup> Ebe mabuma: kebe lumagite Unu Duli-yomolono nopopino iyaiya tabamo da:kiyawaonako, ebe tanalodo ebe a:ka:tuwa: ebe nanitabokobi midi magumulo a:kodakodaiminako, wiyasiya kebe lumagite Godokono woki dawokaliminako, ebe tanalodo ebete sosi epo bilibili-nomono nanitabokobi midi tanalo a:kodakodailamelelamenako.

<sup>5</sup> Numa:la:, na ubila la: bilibilinomate Unu Duli-yomolono nopopino iyaiya tabamo ka:kiyawaema:, iyo, ebe osiyodilo tanalo kuba:, wiyasiya naimano ubi kawonomote bitana, la:le Godogodone iyanomo elawo nelawiyala:, la:le ebene tepo magumuno woki me opo epono tabamo kawokalilama:ema:. Nanitabola, Godokono umi magumulo ebene woki awokalimipino wade tanalote ebe nopopino iyaiya tabamo kiyawaopino wade tanalo nodoilina, mabu kebe tetelo lumagite nopopino tabamo tanalo idi da:kiyawaomene, ebe tetelo sosi epo magumulo tabo idi oba:midadawate ebe tabono magumu awokalimia:no olowiopiate ebe tanalodo walubi tanalo idi a:kelaema:na:.

<sup>6</sup> Ebema: naimano nanitabokobi midipi ekakiala:, nale la:tamo da:pemaigamo la: magumulo Unu Duli-yomolono nopopino iyaiya tabamo da:pa:kiyawaomo, la:le naimano osiyodilo tanalodo beda: wade walubi tanalo na:kelawa:ema? Eiye, wade tanalo idi puliyala! Ebe mabuma: nale da:pemo, modobola na la:go eba okolinalo tete idilo Godokono wamina tanalo idi la:tamo la:imano tabamo awokalimite, ebene tete idilo wade iyatawa tanalo ida:mo la:imano tabamo atumu la: elawokobi ka:ka:midilimamota. Ega:walo nale tete idilo Godokono ubi tanalo la:imano tabamo awokalimite, ebene tete idilo ebene Buka apuapuno tabo la:imano tabamo atumu la: ka:kiyatulaemamota. Ebema: nanitabola, kebe tetelo ebe osiyodilole tanalodo nale la: la:imano tabamo walubilia:no, la: nagodone wade woki laema: a:ka:modobomata! <sup>7</sup> Numa:la:, bibolo ega:walo begube ibino tanalo ebe atumula. Ebako inamabu molelepi ega:walo modolepi iba:te oale idi ibino modobo osiyodilole tanalamo wadenomamo awokalimia:no, ebe tetelo olowiopiate ebe oaleno madodo a:kiyatawaoma:na:. <sup>8</sup> Ega:walo me tanalo idila, gowelao tetelo elawodubu idite tutele wadenomamo molea:no, dubu epetapiate gowela magumulo ebe kowalubima: a:ka:polosiyodiloma:na:.

<sup>9</sup> Ebema: la:imano sosino tanalo ebe atumu eba kunu ba:kitana. La: magumulo idite Unu Duli-yomolono nopopino tabamo tanalo idi da:kiyawaomene, ebene tabono magumute nanitabolo akawokalamene, iyo, olowiopiate wade iyatawa tanalo idi ebegodone a:kelaema:na:. Eiye, ebe lumagino tabono tanalo ebe tema awate eba patalo a:ka:tuwa: keba kunu ka:ponolopoligonakole eba kunula! <sup>10</sup> Numa:la:, me opolo iyaiya epate ibino tabonomamo kiyawaonaka, iyo, iba:te ibino iyaiya tabo apuapudo ibino namutupiatamo ibino tepo magumuno woki modobolo awokalilame-naka.

<sup>11</sup> Wiyasiya kebe tetelo na opo idi epono tabo iyatawa:noma: deda:mo, ebe tetelo iba:te na kapeladawama: eba ka:na:milo, nale atumu ibi kapelapima: beka:la:minakomo. <sup>12</sup> Ebema: la: Godokono Uliyanano iyaiya gito ikalame tanalo uwatema: ubi kawonomamo dalomawenama, kuba:, wiyasiya ebe tanalo magumulo kebe tanalate sosi epono nanitabokobi midi tanalo nanitabonomolo da:kodakodailamenaka, modobola la: ebe tanalamo woko kosiyodilawenama: woki kawonomamo niyatinakiyala:

<sup>13</sup> Ebe mabuma: la: magumulo kebe dawate Unu Duliomolono nopopino tabo ida:mo da:kiyawaonako, modobola ebete Godoko na:toweoemene ebegodone iyanomo elawo idi gito kelaema:, ebe elawo idi ebe nopopino iyaiya tabono magumu awokalilame elawo tanalola. <sup>14</sup> Nanitabola, nale nopopino tabo ida:mo Godotamo towetowe tabo da:kiyawaomo, ebe tetelo ebena Uliyanate nado tabo modobola eba kiyawaolo, wiyasiya na ebe iyaiya tabono magumu iyatawa:no naimano tepo magumuno wokilo wade walubi tanalo idi a:kelaemo.

<sup>15</sup> Ebema: na Godago tabo gela magumulo beda: tanalo na:kosiyodilomo? Numa:la:, nale naimano uliyana apulo ebetamo tabo a:kiyawaonakomo, ega:walo naimano tepo magumuno wokino tanalamo a:kiyawaonakomo. Atumu nale ebe amamate magumulo naimano uliyana apulo ebetamo oale alapionakomo, ega:walo naimano tepo magumuno wokino tanalamo akalapionakomo. <sup>16</sup> Ebema: nanitabokobi mididawa, a:ma:le sosino taneba magumulo Godoko eba moiolo kalakala towetowe tabo ebetamo da:kiyawaemene, ebe tetelo olowiopino tanaloma: a:ma:le la:imano tabonomamo tanalo idi kiyawaoa:no wiyasiya Godokono Uliyanate nopopino tabamo a:ma:do da:kiyawaomene, piyate la: magumulo olioli epoma: deda:ona iba:te ebe tabono magumu keba kunu na:kiyatawaoma:na:? Ega:walo iba:te a:imano kalakala towetowe tabo uwomu apulo “Taula” tabo keba kunu na:kegelamene? <sup>17</sup> Numa:la:, kebe tetelo Godokono Uliyanate nopopino tabamo kalakala tabo a:ma:do wadenomamo dadipatemene, ebe tetelo olowiopiate a:imano tabono magumu lawea:no, ebe tabono tanalote ibino nanitabokobi midi tanalo a:ka:kodakodailaemene.

<sup>18</sup> Nanitabola, na Polote kalakala tabo Godotamo adipatemo, mabu ebete iyanomo elawo natamo ikanamiya Unu Duliomolono nopopino iyaiya tabamo ka:kiyawaonakoma:, iyo, ebe osiyodilo tanalo magumulo naimano elawote la: bilibilinomono elawo nanitabolo nodoilina. <sup>19</sup> Wiyasiya kebe tetelo nale sosi epago daladabutinakomo, ebe iyaiya tete bilibilinomolo na ubi kawonomamo iyatinakomo nale naimano wokino tanalodo ibino tabonomamo ibi kiyatulamenakoma:. Iyo, nale paibu tabo egegenomo epetapino tabonomamo da:kiyawaomo iba:te modobola kiyatawaoma:na:, wiyasiya nale Unu Duliomolono nopopino iyaiya tabamo teni taoseni tabono tanalo da:kiyawaomo iba:te nagodone iyatawa tanalo idi a:kelaema:na:!

<sup>20</sup> Ebema: naimano nanitabokobi midipi ekakiala:, la:imano wokino malagidilole magumulo iyatawa: gudima: akoeda:oala:. La: kuba osiyodilole magumulo ebako gudima: eda:oma: modobola, wiyasiya la:imano nanitabokobi midi magumulo modobola la: apepeawete kawokawo dubuma: ega:walo kamiyalema: neda:iyala:. <sup>21</sup> Numa:la:, dopamo Godote ebena Bukalo tabo ma kunu kiyawaiya,

“Nale iyaiya kapela opo epono tabo magumudo  
naimano epatamo tabo ka:kiyawaomamo,  
wiyasiya iba:te dopamo keba kunu kowagelenami

eba kunu olowio ubia:noma:  
walo ka:keda:oma:na:  
Iyo, nale kapelapi epetapido ibi diyatulaemo  
ebe tetelo iba:te naimano tabamo  
atumu a:ka:tudila:oma:na:.”

<sup>22</sup> Ebema: ale me tanalo uima:, sosi epate Unu Duliynomolono nopopino iyaiya tabamo da:kiyawaonaka, Godote ebe anoano tanalodo ebena elawo nanitabokobi midia:piatamo awokaliminako, wiyasiya sosi magumulo epetapiate epetapiatamo Godokono woki ibino tabonomamo dawokaliminaka, Godote ebe anoano tanalo idido ebena elawo nanitabokobi midipiatamo awokaliminako. <sup>23</sup> Ebema: la:imano sosi kawonomote eba aladabutilo la: bilibilinomate Unu Duliynomolono nopopino iyaiya tabamo kiyawao dowagilima:ema, ebe tetelo kebe olioli epo ega:walo nanitabokobi midia:piate la:imano aladabuti uima: da:pelaema:na:, iba:te la:imano osiyodilo tanaloma: keba kunu na:kemalagidiloma:na:? Iba:te la:imano osiyodilo tanalodo Godoko nanitabokobi ba:ka:midima:na:? Ao, iba:te la: daedale wokiagopima: kegelama:na:!

<sup>24</sup> Wiyasiya la:imano aladabuti tetelo la: bilibilinomono taneba magumulo epetapiate epetapiatamo Godokono woki la:imano tabonomamo dawokalilima:ema, ebe tetelo kebe olioli epo ega:walo nanitabokobi midia:piate la:imano aladabuti tanalamo da:pelaema:na:, iba:te Godokono tabo modobolo olowiote ibino kuba osiyodilole tanalo ega:walo nanitabokobi midia: tanalo ebo kiyatawaoma:na:. Iyo, iba:te Godokono tabo dolowioma:na: ebe tabono iyaiya tanalo bilibilinomate ibi magumulo lumagi idino tanalo eba anagilamelemelo <sup>25</sup> ebena tepo magumuno waminale tanalo ebetamo ebo kawokalilaema:na:. Ebe mabuma: ebete ebena kuba osiyodilole tanaloma: ilipo lawete ebena ololo opamo iyatilo Godoko eba amamatelo kegemene, “Godote me sosi epagodolo nanitabonomolo bokolina!”

*Piyate Unu Duliynomolono Nopopino Tabamo Da:kiyawaonaka Ega:walo Piyate Godokono Woki Me Opo Epono Tabamo Dawokaliminaka Ebe Sosi Epono Woko Osiyodilo Tanalo*

<sup>26</sup> Ebema: naimano nanitabokobi midipi ekakiala:, la:imano sosi aladabuti tetelo la:le la:imano tanalo keba kunu dosiyodilola:wenakoma, ebe tanalo ma kunula. La: daladabuta:wenakoma, modobola la: magumulo idite Godoko oale ida:mo namamatenakomene, idite la: epetapi Godokono Buka apuno tabo idi niyatulamenakoma:ta, idite Godokono wamina tanalo idi la:tamo nawokaliminakomene, idite Unu Duliynomolono nopopino tabamo tanalo idi na:kiyawaonakomene, ebena idite ebe tabono magumu la:tamo nakawokaliminakomene. Iyo, modobola la: eba kunu nowagelenakiyala: la:imano iyaiya osiyodilole tanalo bilibilinomamo la:imano nanitabokobi midi tanalo ka:kodakodailama:wenakoma:. <sup>27</sup> Ebema: la:imano aladabuti tetelo Unu Duliynomolono nopopino tabamo kiyawao elawote piyagodolo ditana, modobola ibi magumulo netewa o netewa-kapiyanomate ebe tanalo nosiyodiloma:na:, idite netewa-netewa tetedawama: akoeda:la:.

Ega:walo modobola iba:te ibino iyaiya tabono tanalo la: epetapiatamo kapiya tetelo akokiyawaonakala:, ega:walo tetedawa idino tabo kiyawao dolopoligomene, modobola pogodolo elawo ditana ebe tabo oba:midadawate maigate ebe tabono magumu la: epetapiatamo nawokalimene. <sup>28</sup> Wiyasiya ebako tabo oba:midama: lumagi idigodolo elawo itana:no, ebe tetelo piyate Unu Duliynomolono nopopino iyaiya tabamo kiyawaoma: elawo delawenaka, iba:te ibino tabo kiyawao tanalo



natepama:na:. Numa:la:, ibi magumulo lumagi idite ebe a:ka:tuwa: ebetamo ega:walo Godotamo ebena tanalo osiyodiloma: talena puliyala, wiyasiya ebete sosi aladabutipino ololo apulo ako-osiyodilala:

<sup>29</sup> Ega:walo piyagodolo Godokono woki la:imano tabonomamo awokalima: elawo ditalamena ibino tanalo ebe atumula, la:imano aladabuti tetelo ibi magumulo netewa o netewa-kapiyate Godokono woki nawokalilaema:na:, ebene la: epetapiate ibino tabono tanalo wadenomamo olowiawete la: a:ka:tuwa: la:imano tanalo ebe tabamo nanagilamiyala: <sup>30</sup> Wiyasiya kebe tetelo dopo tabo kiyawaodawate woko eba osiyodilolo, iyatawa tanalote tabo kiyawaodawa iditam Godokono elawamo da:pemene, modobola dopo lumagite tabo atepapate ebena namutudawatamo tete eba ikamelo, ebe tetedawa idite ebena luta baine maigate tabo kiyawao ebo kowagilimene. <sup>31</sup> Eba kunu la:imano aladabuti tetelo la: piyagodolo Godokono woki nanitabonomolo awokalima: elawo ditanamene, la: bilibilinomate la:imano iyaiya tetelo woko bosiyodilonamata, iyo, tabo olowiopiate Godokono ubi tanalo wadenomamo ebo kiyatawaoma:na: iba:te nanitabokobi midi magumulo kodakodalo kelamota:onama:

<sup>32</sup> Ebema: me tanalo idila. Kebe lumagite Godogodone iyanomo elawo delawenako ebena woki la:imano tabonomamo kawokalima:, modobola ebete ebe tanalo eba iyatawanalo ebe elawo tanalote ebena tepo magumuno mulo wokino tanalamo tuduwatalo nitanamene. Numa:la:, ebe a:ka:tuwa: ebena ubi tetelo tabo gito akokiyawaoala:, <sup>33</sup> mabu Godoko ebe epatamo gelebadi ega:walo milo dikalamena ebe wadenomo Godola. Iyo, ebe ubia:nola ebena sosi epate daladabutinaka, ibi bilibilinomate ibino ubi tetelo iyaiya geboo tanalo kosiyodilolema:, mabu ebe tanalo ebe nanitabo woko odiyobo tanalola!

*Polote Kolini Sosi Kamiyala:tamo Talena Diyatilamiya Iba:te Sosi Aladabuti Magumulo Epetapi Godokono Tabamo Kowalubima:*

Ebema: me tanalo idila. Godokono epo bilibilinomate ibino iyaiya sosi magumulo kebe tanalo kosiyodilone, <sup>34</sup> na ubila la: ebe atu tanalo na:kosiyodilonakiyala:, ma kunu la:imano sosi aladabuti tetelo kamiyala:te Godokono tabono tanaloma: ibino woki tabo kiyawaoa:no gito nolowionakoma:na:. Iyo, numa:la:, Godote Mosesedo ebena Totomu Tabo Yu epatamo dikalamiya, ebe Totomu magumulo talena idite kamiyaleno tanaloma: ma kunu itana, ibino watowatopiatamo eba tudila:olo iba:te ibino woki tabono tanalamo ibi akoiyatulamenakala:. <sup>35</sup> Ebema: Godokono tabo kiyawaodawate tanalo idi wadenomamo awokalimia:no, kamiyala:te ebe tanalono magumu wadenomamo laema: ubi diyatima:na:, modobola iba:te sosi aladabuti tanalone ibino motamo tolamete ebe tanalo ibino awi ebo na:nikiyawaolaema:na:. Numa:la:, iba:te sosi aladabuti magumulo ebako tanaloma: ibino iyaiya woki tabo dawokalilaema:na:, ebe tanalote ilipo ikalame tanaloma: keda:mene.

<sup>36</sup> Eiye! La: Kolini sosi epate amama magumulo ma kunu kemalagidilawenama, Godokono Wade Tabote la: magumulo dopamo wagilimite, ebene iyaiya epo bilibilinomo epetapiatamo ebo nemaigi? Diyala, la: epetapiagodolo daedale woki idi ma kunu ditanale, Godokono Wade Tabote la: kapiyatamo pemaigi, epetapiatamo:!<sup>37</sup> Ebema: la: magumulo potele ebena amama wokilo degena Godokono Uliyanate ebetamo iyanomo elawo ikamenako ebena woki nanitabonomolo kawokalima:, ega:walo potele demalagidilona ebete Godokono woko idi kosiyodiloma: Godote iyanomo

elawo idi ebetamo gito ikamenako, modobola ebako epate me tanalo niyatawaoma:na:, nale me leta magumulo la:tamo da:kiyawaomo ebe tanalo ebe Kawodawano totomu tabola. <sup>38</sup> Eiye, la: magumulo piyate me tabo olowioa:no, modobola la: epetapiate atumu ibino iyaiya tabo ako-olowiala:!

<sup>39</sup> Ebema: naimano nanitabokobi midipi ekakiala:, modobola la: la:imano sosi aladabuti magumulo Godokono woki la:imano tabonomamo kawokalima:ema: la:imano woki kawonomamo niyatinala:, ega:walo piyate Unu Duliyomolono nopopino iyaiya tabamo kiyawaoma: elawo delawenaka, iba:tamo talena akoiyatilama:la: ebe tanalo kosiyodiloma:.

<sup>40</sup> Kawo tanalo idi ma kunula, la:imano aladabuti magumulo modobola la: tanalo bilibilinomo wadenomamo eba osiyodilolelo, idawano tanalo dolopoligomene, tetedawa idite maigate ebene tanalo ebo na:kosiyodilomene.

## 15

### *Godote Kelisoko A:e Magumune Dadipatiya Ebe Tanalo Ebe Wade Tabo Kiyawao Tanalono Kawo Tanalomola*

<sup>1</sup> Ebema: naimano nanitabokobi midipi ekakiala:, dopamo nale Godokono Wade Tabono iyaiya tanalo la:tamo da:kiyawaimo, na ubila me tetelo ebe atu tanalo la: walo kakanalemamota. Nanitabola, la:le nagodone Wade Tabono kawokawo tanalo dopamo nanitabonomolo uwatimata, ebene me tetelo la: nanitabokobi midi magumulo lamota:onomata. <sup>2</sup> Ebe mabuma: la: la:imano nanitabokobi midi tanalo uwomu teta:mo kodakodalo datila:wenama, Godote la:imano igilo nanitabonomolo ka:mula:lelaema:ta. Numa:la:, la: me teta:mo modobolo a:pemaimiomata, ebema: modoboa: la: me tetelo nanitabokobi midi tanalo atepawete la:imano igilo mula: tanalote gito alatidima:.

<sup>3</sup> Nanitabola, nale epetapiagodone Wade Tabono kawo tanalomoma keba kunu kelawiyamo, ebe atu tanalo la:tamo ma kunu kiyawaimo, Godote ebene Bukamo Kelisokono tanaloma: kebe iyaiya tanalo dopamo kakuloliyale ebe tanalate nanitabonomolo emaimiya. Ma kunu Kelisote aimano kuba osiyodilole tanaloma: da:iya, <sup>4</sup> epate ebene ape bobamo ebo iyatiya, wiyasiya netewa-kapiya egelalo Godote ebe a:e magumune igilamo walo akadipatiya, iyo, ebe tanalate ebetamo emaimiya Godokono Buka apuapuno tabote nanitaboma: keda:oma:. <sup>5</sup> Ega:walo Kelisokono a:e magumune maiga tanalo walogabo apune ebete Pitatamo\* dopamo igilolo pawokalate, ebene ebene 12 alibolepi dubate kapiya bailo eba pola:nalo ibi bilibilinomatamo ebo kapawokaliya. <sup>6</sup> Ega:walo tete idilo ebene waloma:tapi epetapiate kapiya bailo eba pola:nalo Kelisote iba:tamo atumu ebo kapawokaliya. Nanitabola, ebe tetelo ebe waloma:tapino uwomute 500 odoliya, ebene ibi magumulo epetapi bilibilinomate me tetelo bilukulina wiyasiya ibi epetapiate iyalo a:elaiya. <sup>7</sup> Ega:walo tete idilo walogabo apune Kelisote ebene ekawi Ya:imesitamoma kapawokalate, ebene ebete ebene sosi wagilima: iyaiya opamo kebe epo keka:la:miyale ebe alibolepi bilibilinomo epetapiatamo atumu akapawokaliya.

<sup>8-9</sup> Ebene tete geyageyanoma da:petiya ebete atumu natamo ebo kapawokaliya, iyo, ebete a:e magumune maigate piyatamo igilolo dapawokalanaki ibi bilibilinomo magumulo na ebe walogabodawanomoma: ediyamo. Numa:la:, gudu idite menokono tepo magumune nanitabo tetelo awokala:no, na ebako guduma: eda:nama, mabu modobola na naimano

\* **15:5:** Buka ka:la:mioledawa, modobola a:ma: niyatawa Pitakono mailo idi ebe Kipasetela.

kawokawo kuba osiyodilole mabuma: gito ba:iyana:, wiyasiya Godokono nilakapo tanalodo na igilolo okolinamo. Iyo, nale Godokono sosi epo eba kubailamelo iba:tamo kawokawo temeteme gito ikalamenakimo, ebe mabuma: Kelisote ebe sosi iyaiya opolo wagilima: kebe epo kaliboliyale, ebe wokopi bilibilinomono wade tanalote naimano wade tanalo nodolina, ega:walo ibi magumulo na kapiyate modoboa:noma: eda:namo epate na Kelisokono alibodawa idima: ka:na:ima:. <sup>10</sup> Ebema: nanitabola, ka:lo na kebe woko magumulo kokolinamo, Godote ebe woko ebena nilakapolo natamo gito ikanamiya, ebene ebe nilakapo awokalimi tanalodo wadewade da:ima:te naimano woko magumune ebo maimiya. Ebema: nanitabola, na tete geyageyanomolo woko eba osiyodilonalo, naimano elawote alibolepi bilibilinomo epetapino elawo ebo odoili, wiyasiya na iyatawala kebe da:ima:te demaimiya ebe wadewade tanalo ebe Godokono nilakapo osiyodilole tanalola, naimano osiyodilole tanalola:

<sup>11</sup> Ebe mabuma: Kolini sosi epala:, kawo tanalo ebe a alibolepiate Wade Tabono iyaiya tanalo eba kunu eba kiyawaolo la:le nanitabokobi da:mida:ima ebe tanalola. Wiyasiya numa:la:, na ega:walo alibolepi epetapi a bilibilinomo magumulo potele ebe iyaiya tanalo la: diyatulametia, ebe tanalo ebe kawo tanalola:

*Godote Nanitabokobi Midipi A:e Magumune Igilamo Kowadipalatelemene*

<sup>12</sup> Nanitabola, Godote Kelisoko a:e magumune dadipatiya, a alibolepi bilibilinomate ebe tabo iyaiya opolo kiyawaonakoma:, ebema: mabu keleka: la: epetapiate ma kunu degelawenama, walone tetelo Godote a:elaopi igilamo a:kowadipalatelemene? <sup>13</sup> Eiye! La:imano daedale wokino tanalote nanitaboma: neda:taleka:, Godote Kelisoko a:e magumune nanitabolo akadipatiyana:! <sup>14</sup> Ebema: Godote Kelisoko a:e magumune nanitabolo adipatea:notaleka:, Wade Tabo kiyawao tanalodo wade tanalo idite a:kitanana:, iyo, la:imano nanitabokobi midi tanalodo la:le wade tanalo idi a:kuma:ema. <sup>15</sup> Numa:la:, Kelisote a:e magumune maiga:notaleka:, ale Godokono osiyodilo tanaloma: a:da: tabo begelana:, mabu Wade Tabo kiyawao woko magumulo ale ma kunu kiyawaonakoma:, ebete Kelisoko a:e magumune nanitabolo adipatiya.

Wiyasiya la: epetapiate negelanamata Godote a:elaopi igilamo a:kowadipalatelemene. Eiye, ebe tanalote nanitaboma: neda:taleka:, Godote Kelisoko a:e magumune nanitabolo akadipatiyana:! <sup>16</sup> Ebe mabuma: nale atu tabo ma kunu kegeme, Godote epo a:e magumune wadipalatelea:notaleka:, a me tanalone biyatawaona: ebete Kelisoko a:e magumune kadipatiya:. <sup>17</sup> Ebema: Godote Kelisoko a:e magumune adipatea:notaleka:, ebete la:imano kuba osiyodilole tanalo nanitabolo a:kegebolelametana:, iyo, la:imano kuba osiyodilole tanalo bilibilinomate la:godolo eba pola:nalo la:imano nanitabokobi midi tanalodo Godokono wade tanalo idite la:tamo a:ka:pemaigamene.

<sup>18</sup> Eiye! La: epetapino wokino tanalote nanitaboma: neda:taleka:, dopamo piyate Kelisoko nanitabokobi midi magumulo da:elaiya, ibi niyaniyala, ibino igilate alatidinomo balatidiolamiyana:! <sup>19</sup> Ebema: numa:la:, ale aimano nanitabokobi midi tanalo Kelisotamo eba iyatinalo ma kunu demalagidilonama:, me opolo eba ilukulinalo ale egege walubi tanalo ebegodone kuwatemalema:, wiyasiya ale da:elaoma: wade tanalo idite maiga:no aimano igilate gito kalatidioma:na:, ebe mabuma: modobola nanitabokobi midia:piate a nigologolopima: neka:ima:na:. Iyo, iba:te tabo ma kunu negelama:na:, Kelisoko nanitabokobi midipiate ebegodone wade

walubi tanalo nanitabolo a:kelaema:na:, ebema: ebena waloma:tapino modoboa: tanalote me opo epo epetapi bilibilinomono modoboa: tanalo nodoilina.

<sup>20</sup> Wiyasiya kalakala kawonomola, Godote Kelisoko a:e magumune nanitabonomolo adipatiya. Numa:la:, lumagino palilo dapepeoma:na: ebe inamabu bilibilinomo magumulo ebete dopo inamabunomo Godotamo kalakalago gito kikaemene, mabu ebe iyatawala walone tetelo Godokono walubi tanalodo wadewade inamabu epetapiate ebe palilo bapepeonakoma:na:. Ebema: Kelisoko ebe pali inamabuno gito ikame tanalono dopo inamabu keba kunula:ka: eba kunula, mabu ebete dopamo a:e magumune maigate Godotamo ebo tiya. Ebe tanalona a nanitabokobi midipi iyatawala, walone tetelo ale atumu a:e magumune kemaimiomalema:!

<sup>21</sup> Numa:la:, a:e tanalote kapiya dubuno osiyodilo tanalodo a me opo epo bilibilinomatamo pemaigiya, ebema: dubu idino osiyodilo tanalodo aimano a:elao magumune maimio tanalote atumu kemaigiya. <sup>22</sup> Iyo, a me opolo A:da:mekono igilo magumulo eba ilukulinalo, a iyatawala tete na:pe a gito ka:elaomalema:, ebema: a atumu iyatawala a Kelisokono igilo magumulo dilukulinama:, walone tetelo Godote a bilibilinomo aimano a:elao magumune nanitabolo kowadipaeatemene.

<sup>23</sup> Nanitabola, Godokono ubilo Kelisote a:e magumune maiga tanalodo dopo lumagima: ediya, wiyasiya a piyate ebena epoma: deda:onama: a walone tetelo igilamo kemaimiomalema:, Kelisote me opamo walo da:ka:pemene ebe tetelo. <sup>24-25</sup> Ebema: numa:la:, ebe tetete me opono olopoligo tetema: eba eda:lo, Kelisote iyaiya elawoelawonomo uliyana ega:walo elawoelawodopo uliyango gowelao magumulo wato kikopu kelaemene, ega:walo epo magumulo piyate eba:go da:gowelaona ebete Godokono elawamo ebe kawokawopi bilibilinomo atumu nanitabolo ka:mikitaolemene. Kalakala kawonomola, ebete ebe wato kikopu lawe teta:mo ebena Kawo Elawodawano okoli bailo nokolitamene, ebene ebete ebe Kawo Elawodawano okoli bai Nabiwi Godotamo kalakalago gito kikaemene.

<sup>26</sup> Nanitabola, Kelisago da:gowelaona ibi magumulo a:e tanalote uwomudawama: eba eda:nalo Kelisote ebe atumu kubaiminomo ebo ka:kubaimene. <sup>27</sup> Iyo, ebe tanalo awokalima: Godokono Bukalo tabote ma kunu gena, “Kelisago da:gowelaona ebete Godokono elawamo ibi bilibilinomo ka:mikitaolemene.” Ebema: ale me tabono magumu iyatawala, Kelisote gowelao magumulo elawonomoma: deda:mene, ebe tetelo iyaiya uliyana ega:walo iyaiya epo ega:walo kebe iyaiya tanalate Unu Duliyomololo ega:walo me opolo da:pola:na, ibi bilibilinomate ebetamo nanitabonomolo ka:tudila:oma:na:. Wiyasiya numa:la:, ebe tetelo Godoko kapiyate Kelisotamo a:ka:tuduwatamene, mabu ebe potele Kelisotamo wato kikopu lawe elawo dikamiya ebe Kawodawala. <sup>28</sup> Ebema: nanitabola, iyaiya tanalo bilibilinomate Godokono Gudu Kelisotamo eba kunu da:tudila:oma:na:, ebe tetelo Gudute a:ka:tuwa: ebena ubilo Nabiwitamo ka:tuduwatamene, mabu ebe iyatawala ebete Nabiwino ubilo ega:walo ebena elawamo wato kikopu elawe. Iyo, Gudute ebena ubi ebema: kiyatimene, ebena Kawo Elawodawano gobebobo Nabiwite nanitabonomolo lawete iyaiya tanalo bilibilinomate ebe kapiyatamo uwomua: uwomua: tetelo ba:tudila:onakoma:na:.

<sup>29</sup> Ebema: modobola a me tanalo idi atumu ka:kemalagidiliye. Epetapiate ibino namutupino a:elao epono tanaloma: ibi obamo dowaduba:midaolenaka, iba:te ebe tanalo beda: mabuma: kosiyodilonake?

Numa:la:, ibi iyatawala a:e magumune maiga tanalote nanitaboma: eda:notaleka:, iba:te ibino osiyodilo tanalodo wade tanalo idi a:kuima:na:, wiyasiya iba:te Godoko nanitabokobi eba midinalo kawonomamo gelana ebete ibino a:elaopi igilamo nanitabonomolo kowadipalatelemene.

<sup>30</sup> Ega:walo me tanalo idila. A:elaopino igilamo maimio tanalote nanitaboma: eda:notaleka:, mabu keleka: ale egela ega:walo idoko bilibili-nomolo iyaiya tete epetapilo aimano igilo malagidilolea:no Wade Tabono tanaloma: iyaiya a:e olalati tanalomo gito da:nopila:onakoma:? <sup>31</sup> O naimano nanitabokobi midipi ekakiala:, ale aimano Kawodawa Ya:su Kelisoko magumulo eba ilukulinalo, na la: mabuma: amamalo la:tamo nanitabonomolo a:kiyawaomo, egela bilibilinomolo nale naimano igilo iyabaiamo iyatinakomo! <sup>32</sup> Ebema: la:imano woki keba kunula:ka:? Na Epesese kawo duliwomololo elawoelawonomo goeogoeo keba kunula:ka: ebako dubago da:gowelaimo, nale ebe tanalo epono ololo apulo amamalo kosiyodilimo? Ao, nale me opono igilo malagidiloa:no Unu Duliwomolono wade igilo Godogodone laema: osiyodilimo. Wiyasiya numa:la:, a:elaopino igilamo maimio tanalote nanitaboma: eda:notaleka:, nale nanitabokobi midia:pino kuba woki kowaloma:tama: ba:modobona:, mabu iba:te me opono igilo kapiya eba malagidilonalo tabo ma kunu gelana,

“Diyala, dumutu ale da:ba:elaoma,  
 ebema: modobola a ka:lo  
 a a:ka:tuwa: a eba kalakalaimelo,  
 bae kawonomamo naote  
 da:imi obo elawonomo kawiya  
 ebo ka:niomalema:!”

<sup>33</sup> Diyala, epetapiate la: a:da: da:bemasigilitamene, ebema: la: nanisiwale! Nanitabola, ebe a:da: elemasigipino tanaloma: mulo wokiagopiate tabo ma kunu gelanaka,

“A:ma: kuba osiyodilolepiago depata:wenaka,  
 iba:te a:imano tepo magumuno wadewade woki  
 ka:kubailaema:na:.”

<sup>34</sup> Ebema: naimano Kolini sosi epala:, modobola la: wadewade wokino tanalomo walo na:kolobila:la:, iyo, la:imano kuba osiyodilole tanalo na:miyapala:. Eiyee! Nale ilipo la:tamo kikalametama: me kodakoda tabo ebema: kiyawaomo, mabu la: epetapiate Godokono tanalo nanitabolo kiyatawawena:!

*Godote Nanitabokobi Midipi A:e Magumune Igilamo Dowadipalatelemene, Ibino Oli Ilukuli Tanalono Ape Unu Duliwomolo Epono Apema: Keda:oma:na:*

<sup>35</sup> Ebema: diyala, la: magumulo idite na ma kunu da:bananemene, “Godote a:elaopi igilamo keba kunu na:kowadipalatelemene? Ega:walo lumagite igilamo nanitabonomolo demaigamene, ebena oli okoli tanalono apete keba kunu na:kitanamene? Naimano woki nitana ebe tanalote a:kemaigamene!”

<sup>36</sup> Wiyasiya nale tabo ma kunu kegemamo, “A:ma: daedale wokiagodawalata! Numa:, a:ma: kikopu damela magumamo damiaemene, ebe kikopute da:emene ebena igilote nanitabolo a:kolopoligomene, iyo, ebe-godone oli wuite kemaigamene. <sup>37</sup> Ega:walo a:ma: kono pali osiyodilo tetelo a:ma: kono kewano ape paago damela magumamo kamiawenakoa:,



ao, a:ma: wiyasiya kikopunomo amionakota. Numa:, a:ma:le kono kikopu ega:walo ebakobako iyaiya kikopu epetapi eba kunu damiaemene, walone tetelo ebe kikopunomo magumune kawokawo inamabunomate iya ololamo kemaimioma:na:.”

<sup>38</sup> Ebema: nanitabola, Godokono ubilo ebete pali inamabu iditamo ebe inamabuno ololonomo ikamenako, ega:walo ebete atumu iyaiya kikopu-  
uatamo ibino iyaiya ololonomo a:kikalamenako. <sup>39</sup> Ebene igilolo dowa-  
pata:lamena ebe iyaiya inamabuate atumu ibino iyaiya ololonomago  
ilukuliona, iyo, epono ololo idi ba:kitalamena, ega:walo damelalo dowap-  
ata:lamena ebe inamabuno ololo idi bitalamena, ega:walo olaolano ololo  
idi bitalamena, ega:walo obo magumudo dowapata:lamena ebe inamabuno  
ololo idi bitalamena. <sup>40</sup> Ebema: me inamabuate me opolo eba pola:nalo,  
ale ibi bilibilinomono ololo iyatawala, ega:walo ale atumu tobolo unulo  
da:pola:na ebe inamabuno iyaiya ololo iyatawala. Iyo, ale me opono  
inamabu ega:walo tobolo ununo inamabu ma kunu ulamenakoma:, ibino  
wade pukuilame tanalo kapiya:, ao, iyaiya ba:pola:lamena. <sup>41</sup> Ma kunu  
egelano wade pukuilame tanalo ega:walo saganano wade pukuilame tanalo  
ega:walo mawelena wade pukuilame tanalo iba:te iyaiyama: eda:ona, iyo,  
mawele bilibilinomo magumulo ibi atumu iyaiya wade pukuilame tanalago  
ba:pola:na.

<sup>42</sup> Ebema: numa:la:, Godote a:elaopi igilamo dowadipalatelemene ibino  
tanalo eba kunu kitanamene. Lumagite me opolo eba okolinalo ebena apete  
a:e apema: eda:na, ebema: ebete da:emene epate ebe ape bobo magumamo  
gito kiyatima:na:. Wiyasiya Godote kebe ape a:e magumune dadipatemene,  
ebe tetelo ebe apete olinoma: eda:te lumagite ebe apa:go uwomua: uwomua:  
tetelo bokolinamene. <sup>43</sup> Nanitabola, lumagite kebe apa:go me opolo  
dokolina, ebe ape kubadopoma: eda:na ega:walo elawoa:noma: keda:na,  
ebema: ebete da:emene epate ebe ape bobamo gito kiyatima:na:. Wiyasiya  
numa:la:, Godote ebe lumagino ape a:e magumune dadipatemene, ebe apete  
wade pukuilaema: ega:walo elawonomoma: ebo keda:mene.

<sup>44</sup> Iyo, me opolo lumagite me opono apa:mo pata:na, ebema: ebete  
da:emene epate ebena ape bobamo gito kiyatima:na:, wiyasiya Godote ebe  
a:e magumune dadipatemene, ebe tetelo ebena apete olinoma: keda:mene  
mabu Godokono Uliyanate ebena apetamo nanitabo igilo kikaemene.  
Ebema: nanitabola, lumagino ape netewa ba:pola:mena, iyo, ape idite me  
opono apema: eda:na ega:walo ape idi ebe Unu Duliynomolono apema:  
keda:na, ebe apetamo Godokono Uliyanate nanitabo igilo kikaemene.

<sup>45</sup> Ebe mabuma: ebena Bukalo tabo idite ma kunu itana, “Godote dopo  
dubu A:da:meko osiyodilote igilo dikamiya, dubute igilagonoma: ebo ediya.”  
Iyo, ebe dopo dubute me opolo ebema: okolinami, wiyasiya a tetelo  
da:pemaigiya ebe walogabo A:da:me idi ebena tanalo iyanomola, mabu  
ebe epatamo nanitabo igilo ikalame uliyanama: ediya. <sup>46</sup> Numa:la:, a me  
tanalone iyatawaonama: dopamo me opono tanalote pemaigate, ebena  
walone tetelo oli tanalote ka:ka:pemaigamene, ebe oli tanalo ebe Godokono  
Uliyanate nanitabo igilo atamo dikaeaemene ebe tanalola.

<sup>47</sup> Iyo, dopo dubu A:da:mete me opo magumune pemaigiya mabu  
Godote ebe damela tuwaeamo osiyodiliya, wiyasiya a tetelo da:pemaigiya  
ebe walogabo A:da:mete Unu Duliynomolone piya. <sup>48</sup> Ebema: Godote  
damela tuwaeamo poko kosiyodiliyale, ebe dubute kebako dawama:  
keda:namile me opo epate eba kunu damela tuwaeamo osiyodilolepima:  
keda:ona, wiyasiya kalakala kawonomola, a piyate Unu Duliynomolo Epoma:  
deda:onama:, ale Unu Duliynomolone me opamo da:piya ebe dubu keba

kunula:ka: eba kunu nanitabolo keda:omalema:. <sup>49</sup> Iyo, me tetelo a nanitabokobi midipiate damela tuwaeamo osiyodilo dubuno ololamo keba kunu kilukulinama:, walone tetelo a eba kunu Unu Duliyomolone da:piya ebe dubuno ololamo bilukulinama:.

*Godote Nanitabokobi Midipino A:elao Ape Iyanomoma: Ka:midililaemene Iba:te Ebena Uwomua: Uwomua: Teteno Igilago Kilukulionama:*

<sup>50</sup> Naimano nanitabokobi midipi ekakiala:, naimano iyatulame tabono magumu ma kunula. Lumagite me opolo eba okolinalo ebena apete ka:modobona: Godokono Kawo Elawodawano duliyomolono wadewade tanalo nanitabonomolo kuwatema:, iyo, lumagite ebena a:e apa:mo eba okolinalo ebete ka:modobona: uwomua: uwomua: teteno igilo kelaema:.

<sup>51-52</sup> Ebema: Godote nanitabokobi midia:piatamo dowaminana, modobola la: ebe tanalo wadenomamo niyatawala:. A nanitabokobi midipi bilibilinomate gito a:ka:elaoma:, ao, a magumulo epetapiate Uwomu Egelalo igilolo ka:pola:namalema:. Wiyasiya numa:la:, epate uwomu teteno tutele diyamo dolowioma:na:, ebe tetenomolo Godote a nanitabokobi midipi bilibilinomono ape iyanomoma: gito ka:midililaemene, iyo, ebete ebe tanalo samonomamo kosiyodilomene, lumagite ebena balidi ibilite keba kunu ka:melenakole eba kunu. Ebema: nanitabola, tutele mole tetelo Godote a:elaopi bilibilinomo igilamo wadipalatelete, ebena iba:te uwomua: uwomua: tetelo eba ilukulionalo walo a:ka:elaoma:na:, ega:walo ebe atu tetelo Godote a nanitabokobi midipino ape iyanomoma: ka:midililaemene, <sup>53</sup> iyo, ebete epono a:elao ape iyanomoma: na:midililaemene iba:te ebena uwomua: uwomua: teteno igilago kilukulionama:.

<sup>54</sup> Ebema: numa:la:, Godote epono a:elao ape iyama: eba midililamelolo iba:tamo uwomua: teteno igilo dikalaemene, ebe tetelo ebena Bukalo kebe tabote ditana ebe tabote nanitaboma: ebo keda:mene. Iyo, ebete ebena Bukamo tabo dopamo ma kunu akuloliya,

“Ebe tetelo na Godote  
a:e tanalono wato kikopu lawete  
ebe anakapuminomo kanakapuimamo!

<sup>55</sup> Ebema: a:e tanalo,  
a:ma: wato kikopu walo a:kelawa:emene,  
iyo, a:ma:le idawatamo temeteme  
walo a:kikama:wenakomene!”

<sup>56</sup> Nanitabola:, me tetelo a:e tanalono temeteme ikalame elawote epono kuba osiyodilole magumudo iba:tamo penako, ega:walo Godote dopamo Mosesedo dikalamiya, ibino kuba osiyodilole tanalono elawote ebe Totomu Tabono tanalodo a:ka:pemaiganako, <sup>57</sup> wiyasiya modobola a kalakala kawonomo Godotamo kadipatiye, mabu ebete aimano Kawodawa Ya:su Kelisokono osiyodilo tanalodo wato kikopu lawe elawo atamo nikaeamena!

<sup>58</sup> Ebema: naimano wadewade nanitabokobi midipi ekakiala:, modobola la: la:imano nanitabokobi midi magumulo kodakodalo nelamota:onala:, iyo, la: woki netewama: eda:oa:no aimano Kawodawano woko osiyodilo tanaloma: la:imano ape ebetamo kawonomamo nikameonala:, mabu a iyatawala ale ebe magumulo eba ilukulionalo aimano woko magumune wadewade da:ima:te emaimionaka.

## 16

### *Nanitabokobi Midipiate Yudiya Opolo Nigologolo Dilukulinamiya, Kolini Sosi Epate Ibi Nilakapolo Walubilima: Polote Danaliya*

<sup>1</sup> Ebema: la:le tanalo idima: na danana:ima, ebe tanalo ebe Godokono epate Yudiya opolo nigologololo dilukuliona, la:le ibi nilakapo maniamo keba kunu na:kowalubila:ema.

Ebene nale dopamo Galesiya opono sosi epate kebe tanalo osiyodiloma: danalimo, modobola la: ebe atu tanalo ma kunu nosiyodiliyala:.

<sup>2</sup> Sande egela bilibilinomolo la: bilibilinomate la: a:ka:tuwa: la:imano nilakapo mani balamo nalomonakiyala: ebe manite la:godolo kawokawodopoma: keda:oma:, iyo, Godote lumagi idi ebena okoli magumulo keba kunu kowalubinakole ebete eba kunu nilakapolo gito nalomonakomene. Numa:la:, na pea:no la: bilibilinomate dopamo eba kunu dosiyodilawenakoma, ebe woko la:godolo iyalo dolopoligi nale ebo ka:puimamo. <sup>3</sup> Ega:walo la:le kebe dubu la:imano nilakapo mani Yudiya opono Yelusalema kawo duliynomolamo watama: modoboma: degelaema, modobola la: ibi mabuma: leta nosiyodiliyala:, ebene nale la:tamo da:pemo ebe tetelo nale ibi la:imano letago ega:walo maniago ebo kanalibolemamo.

<sup>4</sup> Wiyasiya ebe tetelo la:le la:imano wokilo na ma kunu danana:ema, nale ebe dubago ebamo ka:toma:, kuba:, naimano kalakala bitana ale kapimiya ka:tolaema:.

### *Polote Kolini Kawo Duliynomolamo Pema: Nopo Dawokalimiya*

<sup>5</sup> Ebema: naimano nopo ma kunu itana, nale Ma:sadoniya opodo petote la:tamo ebo ka:pemaigamo, mabu na ebe opopi dopamo ka:nulama:tepaema: nemalagidilonamo. <sup>6</sup> Wiyasiya na ubila la:go tete geyageyadopolo kokolinama:, ebema: diyala, nale pete opono gibate olopoligo teta:mo la:go da:ba:pokolimo. Ebene na iyatawala, ebe tetelo nale kebe opamo toma: ubi diyatimo, la:le na ebo kowalubinimamota.

<sup>7</sup> Iyo, numa:la:, na ubia:nola me tetelo la:imano opodo eba petolo la: pulama:tepaletate opo ida:mo samamo ebo ka:toma:. Ao, naimano wokite eba kunu kitana:, ebema: Kawodawate modoboma: degemene, nale tete geyageyadopolo la:go ka:pokoliatepamamo. <sup>8</sup> Wiyasiya nale pe wagilimia:no, dopamo nale egela epetapilo me Epesese duliynomololo kokolimamo Pentekose Soliyomu Egela\* teta:mo. <sup>9</sup> Numa:la:, me duliynomololo naimano woko odiyoboma: epetapi bilibilinomate nago na:gowelaonaka, wiyasiya kalakala kawonomola, na numinamo gigiyute a:iyamidalo nanitabolo itana, naimano woko osiyodilo magumudo wadewade da:ima:te ka:noloma:.

### *Polote Godokono Wokopi Epetapino Tanaloma: Da:kiyawaiya*

<sup>10</sup> Ega:walo me tanalo idila. Timotite la:tamo da:pemaigamene, la:le ebe kalakalago eba lawelo woki bilibili tanalo idi ebetamo akoikama:la:, mabu na Kawodawano woko keba kunu kosiyodilonamo, ebete atu woko kosiyodilona. <sup>11</sup> Ebema: la: magumulo idawate ebena tepo magumulo ma kunu malagidiloma: modoboa:, Timotiko nani wokodawama: keda:na:. Modobola la: wiyasiya ebe wadenomamo nowalubiyala:, ebete ebena to gabodo kalakalago walo eba kowagilimilo natamo modobolo ebo kolowaimene,

\* **16:8:** Pentekose Soliyomu ebe Yu epono kalakala soliyomu idila, iba:te ulama bilibilinomolo Godotamo bosiyodilonakoma:na. Ebe Soliyomuno osiyodilo mabu ma kunula, iba:te palino witi-laiso otele wagilimi tanalo eba malagidilolo kalakala Godotamo ebo kadipatema:na:, mabu ibi iyatawala iba:te ebegodone wade walubi tanalo elawia.

mabu ebete nanitabokobi midipi ekaki epetapiago natamo pema: nale ebe makopelenamo.

<sup>12</sup> Ega:walo aimano nanitabokobi mididawa ekawi Apolosikono tanalo ma kunula. Nale tete epetapilo naimano ubilo ebe ananakimo ebete nanitabokobi midipi ekaki epetapiago pelamete la:go ka:pokoliatepama:, wiyasiya ebete negi ebete Godogodone nanitabo woki kelawea:, ebema: ebete me tetelo la:tamo a:ka:pemene. Wiyasiya modobola la: niyatawala:, ebena ubi tanalote nanitabolo bitana Godokono wade tetelo la:tamo ka:pema:.

<sup>13</sup> Ebema: la: olowiolo eba ilukulinalo nanitabokobi midi magumulo kodakodalo nelamota:onala:, iyo, gowelao magumulo tolea:noma: eba eda:onalalo la: elawonomoma: neda:onala:. <sup>14</sup> Ebene la:imano ilukuli magumulo modobola la:le tanalo bilibilinomo nilakapo kimalagidilo kapiyado nosiyodilolenakiyala:.

<sup>15</sup> Naimano nanitabokobi midipi ekakiala:, la: me tanalo iyatawalata, Stepanasiko ega:walo ebena moto epo ibi Guliki opo kawonomolo piyate dopo tetenomolo Ya:sutamo dolobiliya ebe epola, iba:te Godokono epo epetapi kowalubilinama: ibino ape kawokawonomo nanitabonomolo alomiya. Ebe mabuma: na Polote la: ma kunu toweolaemata, <sup>16</sup> modobola la: ebako tuputupu osiyodilolepiatamo na:tudila:onala:, ega:walo piyate iba:go woko dosiyodilona iba:tamo atumu na:ka:tudila:onala:.

<sup>17</sup> Ebema: numa:la:, Stepanasiko ega:walo Potunatasiko ega:walo Akeyakasiko ibino pelame tanaloma: nale kawonomamo kalakalimo. Nanitabola, la:le mululo eba ilukulinalo la: kalakala natamo ikanaema: modoboa:, wiyasiya iba:te la:imano gobebobo eba pelawelo <sup>18</sup> naimano woki bilibili tanalo la: mabuma: iyabaiamo ebo palomiya, dopamo iba:te la:imano woki bilibili tanalo keba kunu ka:polopoligolamile eba kunu. Ebema: kebe tetelo la: sosi epate daladabuta:wenakoma, modobola la: ebako dubu nemoiolenakiyala:.

### *Polote Iyaiya Uwomu Nilakapo Tabo Da:kiyawaiya*

<sup>19</sup> Ebema: A:isiya opo kawonomolo iyaiya dilukuliona, ebe sosi epate ibino nilakapo tabo la:tamo palibola:, ebena Akuilako Pilisilako ibi ega:walo ibino motolo daladabutinaka ebe sosi epo, ibi bilibilinomate Kawodawa Ya:suko magumulo eba ilukulinalo ibino kawo kalakala nilakapo tabonomo la:tamo atumu kapalibola:. <sup>20</sup> Iyo, piyate malo nago dilukulina, ebe nanitabokobi midipi ekaki bilibilinomate atumu ibino nilakapo tabo la:tamo kapalibola:. Modobola la: daladabuta:ema la: bilibilinomo epetapiate epetapino koto uwateuilo na:wiyamidauiyala:.

<sup>21</sup> Ebene me leta uwomu apulo na Polote na a:ka:tuwa: naimano kotamo me nilakapo tabo kapiya dakulolemo, la: me tabo numa:la:, iyo, lumagi idite me uwomu tabo kakulolea:.

<sup>22</sup> Nanitabola, epo magumulo potele Kawodawa Ya:suko nilakapolo malagidilona:no, modobola Godote ebetamo kuba wiya nikaemene ebete uwomua: tetelo temeteme kiyatawanakoma:! O aimano Kawodawa, modobola a:ma: na:pa:!

<sup>23</sup> Ebema: modobola aimano Kawodawa Ya:sukono nilakapo tanalote la:godolo nitanamene, <sup>24</sup> ega:walo a Ya:su Kelisoko magumulo kapiyama:

eba eda:onalo, modobola naimano nilakapo kimalagidilo tanalote la: bili-bilinomagodolo atumu na:kitanamene. Me ebe naimano tabo uwomula. Taula.



## POLOTE NABA 2 LETA KOLINI SOSI EPATAMO OSIYODILIYA

<sup>1</sup> Na ebe Polotela, Ya:su Kelisote ebeno sosi wagilima: iyaiya opamo daliboliya, ebe wokopi magumulo na ebe idila mabu Godote ebeno ubilo na elaweniya. Na ega:walo a nanitabokobi midipino ekawi Timotiko, ale la: piyate Kolini duliynomololo Godokono sosi epoma: deda:wenama, ega:walo la: epetapi piyate Guliki opo kawonomolo Godokono epoma: da:keda:wenama, ale me leta la: bilibilinomatamo paliboma:

<sup>2</sup> Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta.

### *Polote Godokono Gelebadi Ikame Tanaloma: Kalakala Tabo Dadipatiya*

<sup>3</sup> Modobola ale aimano Kawodawa Ya:su Kelisokono Nabiwi Godotamo kalakala tabo kadipatiye, mabu ebe potele ebeno gudi kawonomamo da:nilakapoilamena ebe Nabiwila, ega:walo ebe iba:tamo gelebadi dikalamena ebe Godola. <sup>4</sup> Iyo, ebete a aimano temeteme bilibilinomo magumulo a:gelebadiamenako, mabu ebe ubila ale kebe gelebadi ebegodone delawenakoma: a ebe atu gelebadi tanalamo epetapino iyaiya temeteme magumulo ibi atumu ka:kowalubilinakoma:. <sup>5</sup> Numa:la:, ale Kelisoko magumulo eba ilukulinalo ebe mabuma: iyaiya temeteme tanalate atamo kawonomamo keba kunu ka:pemaimionake, eba kunu ebedo gelebadi tanalote atamo kawonomamo atumu ba:kemaiganakomene.

<sup>6</sup> Ebema: Godokono ubi tanalo ma kunula, kebe iyaiya temeteme tanalate atamo da:pemaimionaka, ebe temeteme tanalodo la:le la:imano temeteme magumulo la:imano gelebadi tanalo ega:walo igilo mula: tanalo kuwa-temamota, ega:walo aimano temeteme magumulo kebe gelebadi tanalote atamo da:pemaiganako, ebe gelebadi tanalodo la:le atumu la:imano gelebadi tanalo ka:kelaemamota. Iyo, agodolo da:pola:na ebako atu temeteme tanalate la:tamo da:pemaimioma:na:, ebe temeteme magumulo la:le wade gelebadi tanalo lawa:wete kodakodalo ebo kelamota:onamamota.

<sup>7</sup> Ebema: numa:la:, la:le la:imano nanitabokobi midi magumudo uwomu teta:mo modobolo da:nemaimiaema, ale ebe tanalo walone tetelo kuima: nanitabokobi na:midinama:. Iyo, me tanalote aimano wokilo kodakodalo itana, mabu a iyatawala atu iyaiya temeteme tanalate la: ega:walo a bilibilinomatamo kapimiya keba kunu ka:pemaimionake, eba kunu Godokono gelebadi tanalote atumu la: ega:walo a bilibilinomatamo kapimiya ba:ka:pemaiganakomene.

<sup>8</sup> Ebema: aimano nanitabokobi midipi ekakiala:, A:isiya opolo atamo demaigi, a ubila la:le ebe tanalo wadenomamo iyatawaoma:. Nanitabola, ebe tetelo kawokawo temeteme tanalate atamo da:pemaimioma aimano wokino tanalate mibomibonomoma: eba eda:oamelu, ale ebo malagidilima: ale aimano temeteme tanaloma: gito ka:elaomalema:. <sup>9</sup> Iyo, ale aimano tepo magumulo ma kunu malagidilima:, Godokono ubilo aimano a:elao tetete nanitabonomolo a:pemaigi. Wiyasiya eba kunua:, a:e tanalote atamo ka:pemaiga:. Ao, Godote a mabuma: ebeno ubi idi ma kunu iyati, ale ebe temeteme magumudo a a:ka:tuwa: aimano elawo modoboa:noma: gelalo ale ebe kapiya nanitabokobi ebo ka:midima:, mabu ebe a:elaopi igilamo dowadipalatenako ebe Godola.

<sup>10-11</sup> Nanitabola, ebete ebako kawo a:e olalatinomo magumulo aimano igilo a:mula:leami, ebema: a iyatawala ebete walone tetelo aimano igilo walo ka:ka:mula:leaemene, iyo, la:le a towetowe tabamo eba walubilo ale aimano iyaiya olalati tanalo bilibilinomo magumulo aimano nanitabokobi midi tanalo Godotamo biyatinama: ebete aimano igilo ka:mula:leaema: Ebema: numa:la:, Godote la:imano towetowe tabo bilibilinomo dolowiona ebe tanalodo ebete a wadenomamo bowalubinakomene, iyo, epo epetapi bilibilinomate kalakala tabo ebetamo ebema: badipatenakoma:na:

*Polote Dopamo Diyatiya Ebete Ebe Nopo Iyakobi Midima: Tabo Da:kiyawaiya*

<sup>12</sup> Ebema: nanitabola, ale namamaonama: mabu aimano tepo magumuno mulo wokino tanalate a ma kunu anaenako, aimano osiyodilole magumulo ale me opo epo bilibilinomatamo Godokono talena ega:walo tuputupu okoli tanalo kapiyanomo eba awokalimilo, wiyasiya ebe tanalo la: Kolini sosi epatamo kawonomamo awokaliminakima: Numa:la:, Godokono nilakapo tanalodo ebete elawo atamo nikaeamena ale eba kunu kilukulinama:, opo lumagi idino mulo wokino tanalodo ale elawo kelawenakoa: <sup>13</sup> Ebe mabuma: nale naimano iyaiya leta magumulo naimano ubi niyatinamo, la:le naimano iyaiya tabo eba ka:la:miolelo naimano iyatulame tanalono magumu samamo ebo kuwata:wenakoma:, <sup>14</sup> iyo, modobola la:le dopamo aimano iyatulame tanalo kela:mo keba kunu kelawa:tepaime, me tetelo la: wiyasiya ebe iyatulame tanalono kawo magumunomo wadenomamo kelaemamota. Ebema: numa:la:, la: ebe gabodo Kawodawa Ya:sukono Kawo Egelalo a mabuma: kamamaomamota, ebe tetelo ale la: mabuma: keba kunu kamamaoma: eba kunu.

<sup>15-16</sup> Nanitabola, na ebe tanalo eba iyatawalo nale nopo ma kunu iya-timo, la: kowalubilitama: nale netewa iyaiya tetelo la:tamo ka:pemamo. Ebema: nale ma kunu malagidilimo, na Ma:sadoniya opamo eba tolo gabo tetelo la:go dopamo pokoliatepate, ebene Ma:sadoniya opone da:kolowaimo la:tamo atumu walo ka:ka:pemamo. Ega:walo nale woki idi ma kunu kiyatimo, nale la:godone Yudiya opamo to eba wagilimilo la:godone walubi ebo kelaemamo. <sup>17</sup> Wiyasiya nale ebe nopo iyakobi midite la:tamo ka:pemaiga:, ebema: diyala, la:le na woki netewadawama: da: a:midinima. La: iyatawalata, me opo epate a:da: elemasigi gabodo epetapiatamo “Iyo, na kosiyodilomamo” tabo eba gelalo, wiyasiya ebe tabono tanalone olobila:ote “Ao, na a:kosiyodilomo” tabo epetapiatamo walo gito kegelanaka. Eiye! La:le na ebako lumagima: kemalagidilawenama?

<sup>18</sup> Numa:la:, Godoko nanidawanomoma: eba eda:nalo ebete aimano nanitabo tanalo iyatawala, ale la:tamo pelaema: a:da: elemasigi gabodo “Iyo” tabo kegela: Nanitabola, ale aimano dopo tabono tanalone olobila:ote ale la:tamo pelaema: “Ao” tabo walo eba kegelalo, a ebe tanalo nanitabo gabodo osiyodilima: <sup>19</sup> Eiye! Na Poloko ega:walo Sailasiko ega:walo Timotiko, ale dopamo la: magumulo Wade Tabo eba pa:kiyawaolo Godokono Gudu Ya:su Kelisokono tanalo ma kunu awokaliminakima:, ebete epetapiatamo “Iyo, na kosiyodilomamo” tabo a:da: elemasigi gabodo gete, ebe tabone epetapiatamo olobigalo “Ao, na a:kosiyodilomo” tabo a:kegemene. Numa:la:, ebete nanidawama: eba eda:nalo, a nanitabokobi midipi kowalubinama: tete bilibilinomolo “Iyo” tabo kapiyanomo genako, <sup>20</sup> mabu nanitabola, Godote a kowalubinama: iyaiya tabo da:kiyawaonako, ebe tabo bilibilinomono tanaloma: Ya:sute “Iyo” tabo eba genalo, ebe kapiyado ebe tanalate nanitabonomoma: beda:onamene. Me mabuma: ale Godokono

wadewade osiyodilole tanaloma: aimano towetowe tabamo ebe dowalog-onakoma:, ale “Taula” tabo Ya:sukono mailamo ebema: gelanakoma:.

<sup>21</sup> Ebema: kalakala kawonomola, mabu ale la:go kapimiya Godokono Alibodawa Kelisoko magumulo eba ilukulinalo, Godoko ebe a da:kodakodaiamena ebe Elawodawala. Iyo, ale ebena woko kosiyodilolenama: ebete a ebema: uwateiya, <sup>22</sup> ebene ale ebenoma: deda:onama: ebe tanalo kiyatawaoma: ebete ebena pukala atamo eba alomoamelo, ebena Uliyana aimano tepo magumamo gito iyatiamiya. Nanitabola, ale ebe tanalodo ma kunu kiyatawaomalema:, kebe wadewade tanalate ebegodolo da:pola:na, walone tetelo ebete atumu ebe tanalo bilibilinomo atamo nanitabonomolo kikaeaemene.

<sup>23</sup> Ebema: numa:la:, Godote naimano tepo magumuno iyaiya tanalo eba ulamelenamenalo, ebete naimano tabo nanitabonomoma: ge, ma kunu na kawo temeteme idi la:tamo ikalaema: ubia:noma: edimo, ebema: nale naimano nopo iyakobi midite la:imano Kolini duliyaomolamo ka:pea:.

<sup>24</sup> Wiyasiya ale la: mabuma: kebe woko kosiyodilonama:, ebe wokono tanaloma: woki kubanu akolawa:la:. Numa:la:, Godokono nanitabo kalakalate la:imano tepo magumulo kitanama: ale woko ebema: osiyodilonama:, mabu a iyatawala la: nanitabokobi midi magumulo kodakodalo lamota:onamata, iyo, a ubia:nola la:le a la:imano kawokawopima: ka:milo aimano wokino tanaloma: la:le la:imano mibomibo tanalago gito tudila:oma:!

## 2

<sup>1</sup> Ebema: nale la: mabuma: woki ma kunu iyatimo, me tetelo nale la:tamo a:ka:pemo, mabu nale da:pemo, diyala, la:le kalakala nagodone lawea:no wiyasiya mibomibo tanalo kapiya da:belaema. <sup>2</sup> Eiyee! Nale la: mibomibokobi da:pimidilitama, ebe mibomibo tanalote eba itanalo la:godolo kalakala natamo potele na:kikanaemene? Lumagi puliyala, da: a:ka:lutamene! <sup>3</sup> Nanitabola, nale dopamo naimano leta idi la:tamo dosiyodilimo, ebe tetelo na ubia:noma: edimo, nale la:tamo eba pemaigalo la:godone kalakala lawea:no wiyasiya mibomibo tanalo kapiya pelaema:. Iyo, nale ma kunu malagidilimo, “Modobola kalakala tanalote iba:godone natamo na:pemaigamene, mibomibo tanaloma:!” Ebene nale la:imano tanaloma: me tanalo idi nanitabokobi eba midinalo ebo kemalagidilimo, “Kebe tetelo naimano tepo magumulo kalakalate ditanamene, ebe tetelo iba:te atumu nago nanitabolo kekalakaloma:na:.” <sup>4</sup> Me mabuma: nale la:tamo dopo leta eba osiyodilolo la: mabuma: woki bilibilima: eda:te kawo temetema:go ega:walo ipupago tabo ebo akulolimo, mabu na ubia:nola naimano tabono tanalote la: mibomibokobi midilima:. Ao, na wiyasiya naimano ubi ma kunu iyatimo, nale nilakapolo la: kawonomamo demalagidiloletanama, la:le ebe tanalo naimano tabo olowio tanalodo nanitabolo kiyatawaomamota.

*Polote Kolini Sosi Epo Danaliya Iba:te Kawo Kuba Osiyodilodawa Idino Tanalo Gito Kegebolema:*

<sup>5</sup> Ebema: numa:la:, la: magumulo potele kawo kubanomo dosiyodili, ebe lumagino kuba osiyodilo tanalodo mibomibo tanalote na kapiyatamo ka:pemaiga:, ao, la: bilibilinomate ebe atu mibomibo tanalo kela:mo iyatawatepaimata. Wiyasiya nale me tabamo ma kunu kegea:, la:le ebe dawano tanalo kubanomoma: eba gelalo kuba wiya idi ebetamo walo ikaema:, <sup>6</sup> ao, ebete la: epetapi bilibilinomagodone dopamo delawi ebe kuba wiya ebe modoboma: edi. <sup>7</sup> Ebema: modobola la: me tetelo ebena

kuba egebolema:wete na:dodomatima:la; iyo, gelebadi tanalo ebetamo nikama:la; ebete la:imano nilakapo awokalimia: tanaloma: mibomibo kawonomo lawete kuiwodopoma: gito eda:kapoma. <sup>8</sup> Ebe mabuma: nale la:toweolaemata, la:le ebe nilakapolo demalagidilawenama, modobola la: ebe tanalo ebetamo walo nakawokalima:la. <sup>9</sup> Nanitabola, nale dopamo naimano leta idi la:tamo osiyodilimo mabu na ubi ma kunu iyatimo, la:imano osiyodilole tanalodo la: kowabudilitama; ma kunu la:le naimano tabamo da:ba:tudila:oma o da: a:ka:tudila:ema.

<sup>10</sup> Ebema: numa:la; kebe tetelo la: lumagi idino kuba osiyodilo tanalo egebolema:wete da:dodolomatilima:ema, ebe tetelo na ebenu kuba atumu gito kegebolemamo, wiyasiya diyala, me tetelo ebako kubate la: magumulo nanitabola da: kitana. Nanitabola, nale lumagi idino kuba egebolemete da:dodolomatilimo, nale ebe tanalo Kelisokono ololo apulo la: mabuma: kosiyodilomamo, <sup>11</sup> mabu na ubia:nola Saitanate ago eba gowelanalo ebete ebenu a:da: elemasigi gabo idido atamo elawoma: eda:ma. Iyo, a iyatawala ebete epo ebenu gubi magumamo kebe iyaiya gabodo kemagatalenakole!

*Polote Talowase Duliynomololo Woki Bilibilima: Dediya*

<sup>12</sup> Ebema: modobola la: niyatawala; nale Kelisokono Wade Tabo Talowase duliynomololo ka:na:kiyawaoma: ebamo da:nemaigimo, Kawodawate gigiyu natamo iyalo a:iyamida eba itanalo ebo nuimo. <sup>13</sup> Wiyasiya ebe tetelo nale aimano nanitabokobi midi ekawi Taitasiko nipo da:nowadimo, ebema: nale woki bilibilima: eba eda:lo Talowase nanitabokobi midipi samamo miyapate me Ma:sadoniya opamo gito pimo.

*Polote Ya:sukono Nani Wokopino Tuputupu Woko Osiyodilo Tanaloma: Tabo Da:kiyawaiya*

<sup>14</sup> Numa:la; me opono kawo elawodubu idino osiyodilo tanalo ma kunula, gowelao magumulo piyatamo elawonomoma: deda:mene, ebete ebe epo ala:mo matuolamolete ibi ebenu duliynomolo tulinomodo dopolamete gito kemagatalemene ebenu amama tanalo nanitabola kawokalima. Ebema: a Godotamo kalakala tabo kadipatiye, mabu Kelisoko magumulo a piyate ebenu nani wokopima: deda:onama: ebete a eba kunu dopaeamena ebe a:ka:tuwa: ebe kowalagonama. Iyo, ebe ubila ebete a me opo kawonomodo eba magataenalalo epo bilibilinomate Kelisokono tanalo agodolo ma kunu kiyatawoma:na; ebe wade nibote keba kunu kemaiganale eba kunula. <sup>15</sup> Nanitabola, Godoko amamatedawate wade nibo inamabu idi ebe watidilonoma: elamo gito diyatinako, Kelisote a Godotamo eba kunu ikaeamoiya, ebema: piyate igilo mula: gabodo da:tolamena ega:walo piyate a:e gabodo da:tolamena ibi bilibilinomatamo Kelisokono wade nibote agodone maigana. <sup>16</sup> Iyo, piyate a:e gabodo da:tolamena iba:te ebe nibo kuba a:e ikame tanaloma: gelana, wiyasiya piyate igilo gabodo da:tolamena iba:te ebe atu nibo wade igilo ikame tanaloma: gelana. Ebema: a Kelisokono nani wokopi bilibilinomo magumulo potele modoboma: keda:nale ebenu woko kosiyodilonama? Lumagi puliyanomola mabu aimano elawote nanitabola kitana.

<sup>17</sup> Ebema: numa:la; a piyate nanitabo woko dosiyodilonamiya ega:walo piyate kateneno ubi tanalo dosiyodilonoma, aimano tanalo ega:walo ibino tanalo iyaiyala, mabu iba:te Godokono Tabo kiyawao woko eba osiyodilonalo, olowiopiagodone mani uwatema: kawonomamo malagidilonaka, inamabu olowamepiate ibino inamabu olowame baiamo kebe wokido kowatanake eba kunu. Wiyasiya a nani wokopino tanalo ma kunula, Godote a ebenu woko osiyodiloma: nanitabola uwateiya, ebema: ale ebenu

ololo apulo eba lamota:onalolo a:da: elemasigi tabo idi kiyawaoa:no, ale Kelisokono wokino tabo kapiya ba:kiyawaonakoma:.

### 3

#### *Godokono Oli Nopo Tanalodo Epatamo Woko Dosiyodilona Ebe Wokopino Tanalo*

<sup>1</sup> Wiyasiya modoboa: la:le ma kunu malagidiloma:, a nani wokopiate a a:ka:tuwa: a me tabamo dowalogoema:. Eiye, wokopi epetapiate ibino tanalo kawokalima: iba:te epetapino letago keba kunu kowapata:lamenake, ale la:tamo eba kunu ka:pelamenakoa: mabu la:le aimano tanalo iyalo iyatawaimata! Ega:walo a atumu ubia:nola ale la:godone opo idino sosi epatamo eba nemaimilo, la:le a mabuma: iba:tamo ebako leta ebo osiyodilolema:! <sup>2</sup> Numa:la:, la: Kolini sosi epo la: aimano nanitabo tanalo awokalimino letalata. Iyo, Kelisote ebe a:ka:tuwa: aimano tepo magumamo la:imano iyaiya tanalo akuloli, me opo epo bilibilinomate ebe tabo eba ka:la:miolelo la:imano tanalo ega:walo aimano tanalo nanitabonomolo kiyatawaoma:. <sup>3</sup> Nanitabola, ebene leta osiyodilo tetelo la:imano tanalo kawokalima: ebete me opono baelo peni kelawea: ega:walo ebete atumu me opono tabo akuloleno kawokawo dilidili nokola kuwatea:. Ao, ebete wiyasiya Igilo Godokono Uliyanano elawamo ebe leta eba osiyodilolo aimano tepo magumunomamo la:imano tanalo ebo akuloli, ebene ebete a iyaiya opamo aliboi iyaiya epate la:imano tanalo ado wadenomamo kiyatawaoma:.

<sup>4</sup> Numa:la:, aimano Kelisoko magumulo ilukuli tanalodo ale Godoko nanitabokobi eba midinalo la:imano tanalo awokalima: me tabo ebema: gelama:, <sup>5</sup> wiyasiya a iyatawala, a a:ka:tuwa: aimano elawamo Godokono woko osiyodilo tanaloma: tabo idi gelama: modoboa:. Wiyasiya kalakala kawonomola, ale ebene woko kosiyodiloma: ebe kapiyate a a:modoboiamenako, <sup>6</sup> iyo, Godote modobo elawo atamo iyalo ikaeamiya ale ebene oli nopono tanalodo epatamo walubi woko kosiyodilonama:. Ebema: numa:la:, ebete dopamo ebene iyaiya Totomu Tabo me opono netewa kawokawo nokola unamo keba kunu kakuloliyale, ebete me tetelo ebene oli nopono tabo eba kunu kakuloliya:, mabu ebe tagala Totomu Tabono tanalodo me opo epate a:e wiya kapiya lawenaka. Iyo, me tetelo ebete ebene oli nopo ebene Uliyanano elawamo ebema: awokalimiya, mabu ebe Uliyana ebe nanitabo igilo epatamo dikalamena ebe wade Walubidawala.

<sup>7</sup> Nanitabola, Godote dopamo ebene Totomu Tabo kawokawo nokola unamo akulote Mosesetamo eba ikamelo ebe atu tetenomolo ebete ebene kawo alonomo ebetamo ebo awokalimiya. Ebe mabuma: Mosesekono ololote pukuilamenomoma: ediya, ebene ebete epatamo walo da:ka:pemaigiya ebe pukuilame tanalo a:ka:tuwa: eba olopoligonatolo iba:te wiyasiya ebetamo meleoma: ka:modobiya:. Ebema: numa:la:, epatamo a:e wiya dikalamena ebe Totomu Tabono nopote Godokono alago eba kunu da:pemaigiya, <sup>8</sup> ebe tanalodo a iyatawala, ebene Uliyanagodone walone tetelo da:pemaigiya ebe nopo alote beda: kawonomola:ka:, iyo, ebe oli pukuilameno elawote dopo pukuilameno elawo nodolina! <sup>9</sup> Nanitabola, Godote ebene dopo nopono tanalodo epo kuba osiyodilolepima: ka:la:minako, wiyasiya ebe kuba wiya ikalame nopote ebene kawo alonomago pawokaliya. Ebema: ebe tanalote a ma kunu iyatuamena, Godote me tetelo kebe oli nopono tanalodo epo ebene tuputupupima: deka:la:minako, ebe oli nopono pukuilame elawote dopo nopono pukuilameno elawo nanitabonomolo nodolina!



<sup>10</sup> Me mabuma: ale dopamo tetelo kebe nopo pukuilame tanalo kawonomoma: degelanakima:, a tetelo oli nopono nani pukuilame tanalo kawonomote ebe dopo tanalono gobebobo da:pelawiya, ale ebe oli tanalo eba umilo woki iyakobi midilite ebo geliyama:, dopo tanalo ebe nani pukuilame tanaloo:, iyo, tagala nopono pukuilame tanalote aimano wokilo gito olopoligadigiya. <sup>11</sup> Numa:la:, kebe nopote agodolo tete da:pesolo kitanatepama: dopamo da:pemaigiya, ebe nopono pukuilame tanalote nanitabolo itanami wiyasiya walone a:ka:tuwa: olopoligiya, ebema: ebe tanalodo a nanitabolo iyatawala, kebe oli nopote Godokono ubilo uwomua: uwomua: tetelo ditanamene, ebe nopono pukuilame elawote dopo pukuilameno elawo kawonomamo nodolina!

<sup>12</sup> Ega:walo me tanalo idila. A Godokono nani wokopiate ebena pukuilame tanalo kawonomo nanitabolo kuima: olowiolo bilukulinama:, ebema: ale tolea:no Wade Tabo kiyawao woko elawonomamo bosiyodilonakoma:.

<sup>13</sup> Wiyasiya a piyate me tetelo woko dosiyodilonama: a Moseseko keba kunula:ka: eba kunua:, mabu ebena ololote pukuilaema: dediya, ebe tetelo ebe ubia:noma: ediya Isalaela epate ebe pukuilame tanalote ebegodone olopoligadigalo uima:, iyo, ebete ebe tanalo iba:tamo kowaminama: ebena ololo kalikamo ebema: muliya.

<sup>14-15</sup> Numa:la:, Moseseko tetelo Isalaela epate Godotamo wato kodakoda-ibinomoma: nanitabolo eda:onamiya, iyo, Mosesete ebena ololo kalikamo keba kunu ka:muliyale, Godote eba kunu ibino tepo magumuno woki atumu a:ka:mula:lamiya iba:te idoko magumulo kilukulionama:. Ebema: ebe tetene wagilimite me teta:mo pemaiga ibino wokino tanalate eba kunu idoko magumulo pola:lamenamiya, iyo, Mosesete Godokono Bukamo tagala nopono iyaiya Totomu Tabo ega:walo walubi tabo epetapi dakuloliya, iba:te ebe iyaiya tanalo eba ka:la:mirolelo ebe tabono magumu nanitabolo kuwatena:. Wiyasiya numa:la:, kebe tetelo lumagite Kelisago kokolionama: ebetamo da:pemene, Godote ebe tanalo kapiyado ebena tepo magumu mula:meno kaliku ebegodone kelaemene, <sup>16</sup> iyo, kalakala kawonomola, lumagite aimano Kawodawatamo dolobigamene ebe tetelo Godote ebena tepo magumuno idoko tanalo ebegodone nanitabonomolo kowagalimene.

<sup>17</sup> Ebema: numa:la:, aimano Kawodawa ega:walo ebena Uliyana ibi kapiyala, ebema: ebe Kawodawano Uliyanate kebe lumagigodolo dokolina ebe lumagite nanitabo tutu okoli tanalo kiyatawamene. <sup>18</sup> Iyo, kalakala kawonomola, ebe mabuma: a nanitabokobi midipi bilibilinomate ma kunu bilukulinama:, aimano ololo ka:mula:lema: tanalo idite itana:no Kawodawano pukuilame tanalo kawonomote a magumune nanitabonomolo emaiganako. Nanitabola, aimano Kawodawa ega:walo ebena Uliyana iba:te kapiyanomoma: deda:na, ebema: ebegodone demaigana ega:walo agodone da:kemaigana ebe pukuilame tanalo atumu ibi kapiyala. Ebema: numa:la:, ebe pukuilame tanalote a magumulo wade woko eba osiyodilonalo a iyanomo epoma: midina. Iyo, lumagite motono gabodo unamo keba kunu ka:nodolonakole ale eba kunu Kawodawano pukuilame kawonomo awokalimi tanalodo odolonama:, ebema: walone tetelo ale ebena ololonomoma: nanitabonomolo ka:neda:omalema:.

#### 4

*Godokono Nani Wokopiate Kubadopo Gebeto Damelamo Osiyodilole Kalilima: Eba Eda:onaloo, Ebete Ebena Wiya Kawonomo Igilo Tabo Ibi Magumamo Gito Diyatiya*

<sup>1</sup> Ebema: a piyate Godokono nani wokopima: deda:onama: ale woko osiyodilo tanalo magumulo kuiwodopoma: a:keda:oma:, mabu Godote ebena nilakapo tanalodo me wade woko atamo gito ikaeamiya. <sup>2</sup> Ebe mabuma: ale me woko wadenomamo kosiyodilonama:, me opo epate kebe iyaiya ilipo tanalo diya gabodo kosiyodilolene ale ebe tanalo bilibilinomo ginima:mo iyalo ilateliyama:. Ega:walo ale Godokono tabono iyaiya magumu nanitabonomolo eba awokalilamelolo, tabo olowiopiate aimano ubi tanalomo ka:tudila:oma: ale a:da: elemasigi gabodo ibi gito kekalakalailamena:. Ao, ale Godokono umi magumulo dilukulinama: ebe tanalo eba malagidilonalo, ale ebena nanitabo tanalo awokala ebema: kiyawaonakoma:, mabu a ubila aimano tabo olowiopi bilibilinomote ibino tepo magumuno mulo wokiago ma kunu kegelama:na:, a ebe Godokono nanitabo wokopima: eda:onama:, ebena iba:te ebena iyaiya iyatulame tabo agodone wadenomamo kuwatema:na:.

<sup>3</sup> Numa:la:, ale Wade Tabo eba kiyawaolo wiyasiya ebe tabono magumute olowiopiagodone waminalo ditanamene, ibi magumulo piyate a:egabodo da:tolamena ibi kapiyate ebe igilo tabono magumu a:kelaema:na:.

<sup>4</sup> Iyo, iba:te Kelisoko nanitabokobi ka:midina: mabu Saitanate me opo kawonomolo nanitabokobi midia:pino godoma: eba eda:nalo, ebete ibino tepo magumuno woki idokoma: iyalo a:midililamiya iba:te Wade Tabo magumune demaigana ebe alo umikapoma:. Wiyasiya numa:la:, Kelisogodolo kawo pukuilame tanalomote ditana ebena Wade Tabote ebe tanalo ma kunu awokalimina, ebe ega:walo Godoko ibi kapiya ololonomola.

<sup>5</sup> Me mabuma: a a:ka:tuwa: a eba walogoelo aimano tanaloma: tabo ka:kiyawaona:, ao, a wiyasiya Wade Tabo kiyawao magumulo Kawodawa Ya:su Kelisokono tanalo kapiya eba awokaliminalo, ebe mabuma: a a:ka:tuwa: a la:imano wiya: wokopima: midinama:. <sup>6</sup> Nanitabola, Godote dopamo ma kunu giya, “Alo, a:ma: idoko magumune pawokalawete na:pipukuilama:,” ebema: a tetelo me atu Elawodawate ebena alamo aimano tepo magumu a:pipukuilameleamiya, Kelisokono ololo magumune demaigana ebe pukuilame tanalodo ale Godokono kawo alonomo wadenomamo kuminama:.

<sup>7</sup> Wiyasiya numa:la:, a piyate Godokono nani wokopima: deda:onama: aimano tanalo ebe ma kunula. Ale kubadopo gebeto damelamo osiyodilole kalilima: eba eda:onalolo, ebete ebena wiya kawonomo igilo tabo a magumamo gito iyatiya, mabu ebe ubila ebe tabote a magumulo eba itanalo a ebo kiyatawaomalema:, ebe igilo tabono pukuilame elawo kawonomo aimanoa:, ebenola. <sup>8</sup> Ebe mabuma: iyaiya gabo bilibilinomodo temeteme tanalate atamo emaimionaka, wiyasiya ebe tanalate aimano igilo mula: tanalo laema: gabo odiyoboma: modoboa:. Ega:walo woki bilibili tanalate atamo a:pelamenaka, wiyasiya ebe tanalate woko ginima:mo iwuti woki atamo ikaeama: modoboa:. <sup>9</sup> Ega:walo atamo iyaiya gowelaopiate emaimionaka, wiyasiya iba:te atamo temeteme ikaeame magumulo Godote a ka:miyapaenakoa:. Ega:walo tete bilibilinomo epetapilo iba:te a kubanu alukoenaka, wiyasiya ebete ibi nodiyobolena iba:te a nanitabonomolo kubaiamekapoma:.

<sup>10</sup> Ebema: nanitabola, iyaiya tete bilibilinomolo ale me opolo aimano a:ela apa:go eba wapata:lamenalo, ale aimano temeteme tanalodo iyaiya epatamo Ya:sukono a:eg tanalo bawokaliminakoma:, mabu a ubila iba:te atu tetelo ebena igilo agodolo nanitabonomolo uima:. <sup>11</sup> Iyo, ale Ya:suko mabuma: me opolo eba ilukulinalo atamo iyaiya a:eg olalati tanalate ebo pelamenaka, mabu ebe ubila me opo epate ebena igilo aimano a:elao apeno

temeteme tanalodo uima: <sup>12</sup> Ebema: kalakala kawonomola, kebe tetelo ebako a:e tanalote a magumulo woko dosiyodilona, ebe atu tetelo Ya:sukono nanitabo igilote la: magumulo woko ba:kosiyodilona.

<sup>13</sup> Nanitabola, Godokono Bukalo ebenu wokodawa idite tabo dopamo ma kunu giya, “Nale Godoko nanitabokobi eba midinalo tabo ebema: kiyawaomo.” Ebema: numa:la:, a atumu, aimano tepo magumuno uliyanate atu nanitabokobi midi tanalo eba lawelo, ale Godokono tabo ebo kiyawaonakoma: mabu ale ebe nanitabokobi na:midinama:. <sup>14</sup> Iyo, a me tanalo iyatawala, potele aimano Kawodawa Ya:suko igilamo dadipatiya, ebe Elawodawate ebe keba kunu igilokobi ka:midiyale, ebete eba kunu a ebenu nani wokopi igilamo atumu kowadipaeatemene, ebenu ebete la:la, ala, a bilibilinomo ebenu ololo apuamo nanitabolo gito kemagataemene. <sup>15</sup> Ega:walo me tanalo idi na:kuma:la:, la: tabo olowiopi mabuma: ale aimano iyaiya temeteme tanalo iyatawaonakoma:. Ebe mabuma: me tetelo Godokono nilakapo tanalote me opo kawonomamo eba tonalo, iyaiya epo epetapiate ibino dopo tetenomolo ebenu tabo dolowionakoma:na:, ibi magumulo epetapi bilibilinomate kalakala tabo ebetamo gela ebo kowagilima:na:, iyo, ebe tanalodo iba:te ebe nanitabonomolo kowalogoma:na:.

<sup>16</sup> Me mabuma: ale woko magumulo kuiwodopoma: a:keda:oma:. Iyo, ale aimano a:elao apenu igilote opamo iwisigalo duminama:, a wiyasiya me tanalo idi kalakalago niyatawaonama:, aimano tepo magumuno igilote Godogodone eba penalo, egela idilo elawo idi kelawe, egela idilo elawo idi kelawe, eba kunu ebe nanitabo igilo tanalono elawote a magumulo unamo odolona. <sup>17</sup> Ebema: nanitabola, me tetelo ale kebe iyaiya temeteme tanalo kiyatawaonakoma: ale ebe tanalo egege tanalonomoma: gelanama:, mabu a iyatawala ebe tanalate uwomua: uwomua: tetelo agodolo a:ka:pola:nama:na:. Iyo, ebe temeteme tanalodo ale uwomua: pukuilame wiya kawonomo ka:nelaemalema:, ebema: ebe wade teteno kalakala tanalote me teteno temeteme tanalo nanitabonomolo kawonomamo ka:nodolimene. <sup>18</sup> Ebema: numa:la:, me tetelo ale me opolo kebe tanalo bilibilinomo aimano balida:mo dulamenama:, ale ebe tanalo nanitabolo kemalagidilolena:, a wiyasiya epate ibino balida:mo ulaema: modoboa:noma: deda:ona, ebe iyaiya tanalo kapiya kawonomamo malagidilolenama:. Nanitabola, ebe tanalate uwomua: uwomua: tetelo Godogodolo ba:pola:nama:na:, wiyasiya me opolo da:pola:na ebe inamabuate nolopoligona.

## 5

### *Nanitabokobi Midipiate Ibino Oli Igilo Ape Godogodone Laema: Ubi Diyatina*

<sup>1</sup> Ebema: a nanitabokobi midipi iyatawala, a me opolo eba ilukulinalo aimano a:elao ape epate kubadopo nupunupu ea:ge bailo detemoteona ebe nupunupu keba kunula:ka: eba kunula. Wiyasiya kalakala kawonomola, me tetelo da:pola:amena ebe nupunupate da:kubakubaoma:na:, Godote a mabuma: kebe oli motonomo ebenu Unu Duliyomololo detiya, ale ebe nanitabo moto lawete uwomua: uwomua: tetelo ebolo bilukulinama:. Numa:la:, nale degemo ebe tabo ebe ulila, mabu lumagite kebe oli moto Godogodone da:nelaemene ebe moto ebe ebenu oli igilo apela, iyo, Godote ebe moto a:ka:tuwa: etiya, me opo lumagitea:. <sup>2</sup> Ebema: nanitabola, me tetelo ale temetema:go eba iminalo aimano ubi tanalo kawonomamo iyatinama:, Godote a ebe Unu Duliyomolono motamo samonomamo ka:nowadipima:. Numa:la:, a ebe nanitabo moto da:nelaema:, <sup>3</sup> ebe tanalo

ebe lumagite oli kaliku wadenonomo keba kunu ka:pulinakole eba kunula, iyo, ebete oli kaliku kalakalago kelaemene mabu ebete kalikua:no ilipago okolima: ubia:nola.

<sup>4</sup> Nanitabola, ale me opono apa:go eba ilukulinalo me opono iyaiya mibomibo magumulo iminama:, wiyasiya aimano wokino tanalo ma kunu kitana: ale me opono ape gito miyapama:. Ao, ale me tetelo aimano ape modobodopoma: gelanama:, wiyasiya me atu tetelo ale Unu Duliynomolono oli ilukuli ape uwatema: ubi kawonomamo iyatinama:, mabu a iyatawala ale nanitabolo da:nuwatema:, ebe tetelo uwomua: oli ilukuli igilo tanalote aimano tagala ilukuli ape eba mula:leamelo ebe ape iyanomoma: ebo ka:midilimene. <sup>5</sup> Ebema: numa:la:, ale ebe oli ilukuli igilo kelaema: potele a wadekobi da:midiya ebe Elawodawa ebe Godotela. Iyo, ebete ebena Uliyana atamo gito ikaemiya, ebema: ale ebe tanalodo ma kunu kiyatawaoma- lema:, kebe wadewade tanalate ebegodolo da:pola:na, walone tetelo ebete atumu ebe tanalo bilibilinomo atamo nanitabonomolo kikaemene.

<sup>6</sup> Ega:walo me tanalo idila. Ale aimano nanitabokobi midi magumulo tolea:no kalakalago bilukulinama:, mabu a iyatawala ale me opono apa:go eba ilukulinalo aimano oli igilo apa:te aimano Kawodawagodolo ebena Unu Duliynomololo ba:na:pola:amena. Wiyasiya numa:la:, ebe wade igilote a mulunomolo ditana, <sup>7-8</sup> ale ebe tanaloma: ubia:noma: keda:ona:, ao, a tolea:no kalakalago bilukulinama: mabu ale me tetelo aimano balida:mo kebe tanalo ulaema: modoboa:noma: deda:onama:, ale nanitabokobi midi magumulo eba wapata:lamenalo ebo biyatawaonama:, ale ebe tanalo walone tetelo nanitabonomolo kulaemalema:. Iyo, nanitabola, a ubi kawonomola me opono ape atepate aimano Kawodawano oli motolo eba:go ka:nilukulinama:, <sup>9</sup> wiyasiya ale me opolo tete geyageyanomolo dilukulinama: o me opo samamo atepate Unu Duliynomololo da:nilukulinama:, ale tete bilibilinomolo aimano Kawodawa kapiya kalakalaima: aimano tepo magumuno ubi kawonomamo iyatinama:. <sup>10</sup> Ebema: me tanalo kawo tanalomola, a bilibilinomate Kelisotamo da:nemaimioma:, ebete Godokono ubi tanalodo aimano iyaiya tanalo ebo kanagilameleaemene. Iyo, ale me opono apa:go eba ilukulinalo kebe iyaiya tanalo kosiyodilole- nakoma:, ebete ebe tanalo bilibilinomoma: atamo wade wiya ega:walo kuba wiya modobonomolo ebo kikaemene.

*Godote Kelisokono Osiyodilo Tanalodo Me Opo Epo Ebena Namutupima: Da:midiliya*

<sup>11</sup> Ebema: numa:la:, a piyate aimano Kawodawano nani wokopima: deda:onama:, ale ebe toleme gabo eba iyatawaolo epetapi bilibilinomo ebema: analenakoma: iba:te ebetamo kolobila:oma:. Iyo, Godote aimano nanitabo tanalo iyatawanomola, wiyasiya na ubila la: la:imano tepo magumuno mulo wokino tanalago aimano tanalo atumu wadenomamo niyatawaiyala:. <sup>12</sup> Numa:la:, me tabamo a a:ka:tuwa: a kowalogoea:, ao, a wiyasiya aimano ubi tanalo ma kunu iyatima:, ale aimano nanitabono osiyodilo tanaloma: wadewade woki la:tamo eba ikalamelo la:le a mabuma: ebo kamamaomamota. Ebema: la:imano sosi magumulo piyate epetapino tepo magumuno iyaiya tanalo nanitabolo malagidilolea:no ebe epono unu tama kapiyama: damamaona, iba:te ibino kubakuba wokiago la:go dapamineua:ema, ebe tetelo la:le modobo elawo kelaemamota iba:tamo tabo wadenomamo ka:wiyaema:.

<sup>13</sup> Eiye! Iba:te aimano nanitabo woko osiyodilo tanaloma: a daedalepima: degelana ebe tabo nanitabola:ka? Ao, nanitaboa:, wiyasiya la: epetapiate tabo eba kunu degelaema, kuba:, mabu a ebo kemalagidilomalema: ale

Godoko kapiya kowalagonama: woko bosiyodilonama: Ega:walo tete idilo la:le la:imano woki iyama: mida:wete a daedalea:pima: da:kegelaema, ebe tanalo atumu modoboma: keda:mene, mabu ebe tetelo a ma kunu kemalagidilomalema: aimano woko osiyodilo magumulo la:le nanitabo walubi tanalo elaemata. <sup>14</sup> Numa:la:, woko osiyodilo magumulo Kelisokono nilakapo kimalagidilo tanalo kapiyate a emagataenako, mabu ale me tanalo nanitabokobi na:midinama:, ebe kapiyate me opo epo bilibilinomo mabuma: a:iya, iyo, ebe mabuma: ibi bilibilinomate atumu ebe magumudo a:ka:elaiya. <sup>15</sup> Numa:la:, ebete ibi bilibilinomo mabuma: a:iya, mabu Godoko ubia:nola me opo epate ibi a:ka:tuwa: ibi kalakalailamelo walo ka:kilukulionama:. Ebete wiyasiya ebenu ubi tanalo ma kunu iyatina, kebe Kawodawate ibi mabuma: da:iya iba:te ebe kapiya kekalakalaiminama: nilukulionama:na:, iyo, ebe Godote igilamo dadipatiya ebe dawala.

<sup>16</sup> Ebe mabuma: ale me tetene wagilimite lumagi idino tanalo me opono unu tama gabodo walo akanagiyamidaema:. Eiye! Ale dopamo Kelisokono tanalo eba kunu kubanu anagiyamidamenakima:, wiyasiya kalakala kawonomola, ale ebe kuba wokino tanalo miyapate me tetelo ebe wadenomamo buminama:. <sup>17</sup> Ebema: kebe lumagite Kelisoko magumulo dokolina ebenu tanalo ma kunula. Ebenu tagala okoli tanalote ebegodolo dolopoligi, oli okoli tanalote ebetamo gito pi, iyo, me tetelo ebe oli lumagima: eda:na. <sup>18</sup> Numa:la:, ebe wade wokono tanalo bilibilinomo Godote iyalo tetelo a:ka:tuwa: osiyodiloliya, iyo, ale dopamo eba:go gowelaopima: eba eda:onalo, ebete wiyasiya a uwatete Kelisokono osiyodilo magumudo a ebenu wadewade namutupinomoma: ebo midiya. Ebe tetelo ebete ebe atu wade woko atamo ma kunu ikaeamiya, ale epo epetapi ebetamo eba magaelelo iba:te ago kapimiya ebenu wade namutupima: keda:onama:.

<sup>19</sup> Ebema: ale me opo epo bilibilinomatamo tabo ma kunu kiyawaonakoma:, Godote Kelisokono osiyodilo tanalodo iba:tamo wade woko eba osiyodilonalo ibi ebenu wade namutupima: ebo midiliya, iyo, iba:te dopamo kebe kuba kosiyodilolenakiye ebete ebe tanalo bilibilinomo ebenu wokine gito egebolelamiya. Nanitabola, a piyate me woko dosiyodilonama:, dopamo tetelo Godote a ebenu nani wokopima: eba ka:milo ebete me woko atamo ebema: ikaeamiya, iyo, ebe ubila epate ebenu tabo ado kolowioma:.

<sup>20</sup> Me mabuma: ale me opolo Kelisokono woko gobebobolo eba lamota:onalo ale epatamo ma kunu kiyawaonakoma:, “Ale la: toweolama:ta, modobola la: Godotamo okoli bai nikama:la:, ebenu la:le eba:go gowelao tanalo dosiyodilawenakoma, ebete la: ebe tanalone wagailitate la: ebenu wade namutupima: ka:midilima:ta.” Numa:la:, Godote ado me tabo kiyawaonako, alea:. <sup>21</sup> Nanitabola, Kelisote kuba osiyodilo tanalo idi nanitabolo kiyatawanamia:, wiyasiya Godote a kowalubima: aimano kuba osiyodilole tanalo ebetamo alomoamete kuba osiyodiloledawa idi keba kunula:ka: ebe ebako dawama: gito midiya, mabu ebete ebenu ubi ma kunu iyatiya, ale Kelisoko magumulo dilukulinama: ebete ebe tanalodo a ebenu tuputupupima: ka:midima:.

## 6

<sup>1</sup> Ebema: la: niyaniyata, a Godokono nani wokopiate eba:go woko eba osiyodilonalo, ale la: ma kunu toweolama:ta, Godote me opo epatamo dawokalimiya la: piyate ebe nilakapo tanalo delawa:ima, la: nanisiwale! Modoboa: ebe nilakapo tanalote la: magumulo nanitabo woko osiyodiloa:no la: magumune wadewade da:ima:te ebema: a:kemaimioma:na:. <sup>2</sup> Iyo, Godote ebenu Bukalo tabo idi ma kunu gena,



“Nale kebe tete wadenoma: degiyamo,  
 ebe tetenomolo  
 nale la:imano towetowe tabo olowiyamo,  
 iyo, nale la:imano igilo ka:mula:lema:  
 kebe egela modoboma: degiyamo,  
 ebe egelanomolo la: nanitabolo owalubiliyamata.”

Ebema: la: wadenomamo nolowiala:, me tete ebe Godokono wade tetela, iyo,  
 me egela ebe ebenu igilo mula: egelala.

*Polokono Woko Osiyodilo Tanaloma: Iyaiya Temeteme Tanalate Ebetamo Demaimiya*

<sup>3</sup> Numa:la:, a ubia:nola ale epatamo dosiyodilonama: idite ebe woko kubama: gema:, ebema: ale woko wade wokinomago osiyodilonama: ale epetapino agowa ukamidaolepima: eda:okapoma:. <sup>4</sup> Ebe mabuma: a Godokono nani wokopima: deda:onama:, ale ebe tanalo aimano osiyodilole bilibilinomo magumulo kawokaliminakoma: aimano woko magumulo kodakodalo ebema: lamota:onama:, iyo, iyaiya temeteme tanalo ega:walo mibomibo tanalo ega:walo olalati tanalate atamo demaimionaka, ebe tanaloma: ale woko katepana:. <sup>5</sup> Ebema: numa:la:, tete epetapilo nanitabokobi midia:piate a alukoenaka, ega:walo tete epetapilo iba:te a idoko motamo gito iyalekenaka, ega:walo tete epetapilo iba:te epatamo elawo ikalamenaka a kanakapuaema:. Iyo, tete epetapilo epetapiate a walubia:no a a:ka:tuwa: mibomibo woko osiyodilolenakoma:, ega:walo tete epetapilo ale u lao tanalo anaetoamidanakoma:, ega:walo tete epetapilo bae kape tanalote a uamenako.

<sup>6</sup> Wiyasiya ebako tanalo bilibilinomo magumulo Godote atamo dikaeamena ebe wade daleya: okoli tanalo, ega:walo ebenu mulo iyatawa tanalo, ega:walo aimano tepo magumu kodakodailame tanalo, ega:walo ebenu nilakapo awokalimi tanalo, ale ebe wadewade tanalo kapiya awokalilamenakoma:. Ebene ebenu Wade-talena Uliyanate a magumulo dokolina ebe tanalo, ega:walo ale tuputupu gabodo epetapi kawononoma demalagidilolenama: ebe tanalo, <sup>7</sup> ega:walo ale ebenu Nani Tabo da:kiyawaonakoma: ebe tanalo, ega:walo ebenu elawote a magumulo woko dosiyodilona ebe tanalo, ale atumu ebe iyaiya tanalo kawokalilamenakoma:. Numa:la:, Godokono tuputupu okoli tanalote aimano gowelaono gilima: eda:na, ebako gila:te aimano netewa kotolo ba:pola:na.

<sup>8</sup> Ebema: nanitabola, tete epetapilo epate a unamo owadipaeatenaka ega:walo tete epetapilo iba:te atamo ilipo ikaeamenaka, iyo, tete epetapilo iba:te a kuba osiyodilolepima: egelanaka ega:walo tete epetapilo iba:te a emoioenaka. Ebene iba:te a a:da: elemasigipima: eka:minaka, wiyasiya tete bilibilinomolo ale nani tabo kapiya kiyawaonakoma:, <sup>9</sup> iyo, iba:te a uwatema: ubia:noma: eda:ona, wiyasiya Godote a kalakalago uwatenako. Ega:walo iba:te na:kegelana aimano olalati tanaloma: tatalila a ka:elaomalema:, wiyasiya numa:la:, ale Godokono ubilo igilolo ilukulinama:, iyo, ale iba:godone kawokawo temeteme iyatawaonakoma:, wiyasiya ebete ibi nodiyobolenako aimano igilo nanitabonomolo kiyailiaema:. <sup>10</sup> Ebema: tete epetapilo ale ipupagopima: eda:onakoma:, wiyasiya tete bilibilinomolo aimano tepo magumulo kalakala kapiyate itananako, ega:walo epate a nigologolopima: gelanaka wiyasiya ibi bilibilinomo epetapi ale Godokono tepo magumuno wadewade tanalamo

dogodogopima: midilinakoma:, iyo, iba:te a inamabua:pima: ka:minaka wiyasiya Godokono dogodogo tanalo bilibilinomate agodolo ba:pola:na.

<sup>11-12</sup> O Kolini namutupiala:, numa:la:! Ale la: eba malagidilolenalo aimano tepo magumuno nilakapo gigiyute la:tamo a:iyamidalo itana, iyo, ale nanitabo tanalo idi wamina:no tabo la:tamo awokala ebema: kiyawaima:. La: wiyasiya la:imano tepo magumuno gigiyu atamo emopilimata, <sup>13</sup> ebema: nale la: naimano gudima: eba midilitalo tabo ma kunu kiyawaomo, aimano tepo magumulo la: mabuma: ditana, modobola la:le ebe atu nilakapo tanalodo la:imano tepo magumuno gigiyu atamo atumu na:ka:ilama:la:.

*Woko Osiyodilo Magumulo Nanitabokobi Midiate Nanitabokobi Midia:piago Kapiyama: Akoeda:oala:*

<sup>14</sup> La: nanisiwale! La:le woko idi osiyodilo magumulo nanitabokobi midia:piago kapiyama: akoeda:oala:, mabu piyate Godokono tuputupu osiyodilolepima: deda:ona ega:walo piyate Godokono totomu tabamo tudila:oma: ubia:noma: deda:ona, iba:te tanalo idi kapimiya keba kunu na:kosiyodiloma:na? Iyo, alo magumulo dowapata:lamena ega:walo idoko magumulo dowapata:lamena, iba:te kapimiya keba kunu na:kilukulinama:na? <sup>15</sup> Eiye! Kelisoko ega:walo Saitanako iba:te tanalo idi osiyodiloma: ibino woki kapiyama: a:ka:midima:na! Iyo, nanitabokobi mididawa ega:walo nanitabokobi midia:dawa, ibino wokino tanalate iyaiya eba pola:nalo iba:te kapimiya ilukulinama: gabote a:kitanamene! <sup>16</sup> Ega:walo eba kunu Godoko amamatedawa ega:walo ida:da:li uliyana amamalateledawa, ibi netewapino wokino tanalate eba gowelaonalo milo tanalono nopo iyati gabo a:kuima:na! Numa:la:, a piyate Igilo Godoko nanitabokobi da:midinama:, a ebe amamateno iyanomo motola, ebema: ebete ebe tanalo eba malagidilolo ebeno Bukalo tabo dopamo ma kunu giya,

“Nale naimano epago eba okolinalo,  
 iba:te naimano ololo apulo  
 bowapata:lamenama:na;  
 iyo, iba:te na kapiya ibino Godoma: eba ka:na:minalo,  
 nale atumu ibi naimano nani epoma:  
 beka:la:minamo.”

<sup>17</sup> Ebema: Kawodawate walo ma kunu kegiya,

“Naimano epala,  
 modobola la:le nanitabokobi midia:pi magumune  
 nemaimiala;  
 la: ega:walo ibi la:le  
 netewa iyaiya taneba magumulo  
 kilukuliawenama:  
 Ebene nale kebe iyaiya tanalo kubama: degenakomo,  
 la:le ebe kuba daleya tanalo ako-ologilinakala;  
 mabu la:le me tabamo da:tudila:wenakoma,  
 nale la: nanitabolo kalakalago buwatanakomata.  
<sup>18</sup> Iyo, ebe tetelo nale la:imano nabiwima: eba eda:nalo,  
 la:le naimano gudima: beda:onamata,  
 mabu na Kawodawa Elawonomote  
 me tabo nanitabolo gemo.”

## 7

<sup>1</sup> Naimano wadewade namutupiala; numa:la; Godote ebe wade tabo a nanitabokobi midipi mabuma: nanitabonomolo a:kiyawaiya, ebema: ale aimano apa:mo dosiyodilolenakoma: ega:walo aimano tepo magumulo demalagidilolenakoma; ebe tanalo bilibilinomo magumulo daleya tanalo idite itanama: modoboa:. Iyo, kebe kuba daleya tanalate agodolo da:pola:na, modobola ale ebe tanalo bilibilinomo ukulaolete, Godoko toleme magumulo eba ilukulinalo aimano igilo kawonomo ebe kapiyatamo bikameonakoma:.

*Polote Kolini Sosi Epono Osiyodilole Tanaloma: Kawo Kalakala Delawiya*

<sup>2</sup> Ebema: nale la: walo nakanalemata, modobola la: la:imano tepo magumuno gigiyu atamo na:ilama:la; mabu numa:la; ale la:imano taneba magumulo lumagi iditamo kuba tanalo idi kosiyodiloa; iyo, ale kapiya lumagi idi ka:kubaimia: ega:walo a:da: elemasigi gabodo lumagi idino kapiya inamabu idi kelaemea:. <sup>3</sup> Wiyasiya nale me tabamo ma kunu kegita: la:le natamo kuba idi osiyodilimata. Ao, nale me leta magumulo dopamo keba kunu kegemu atu tabo walo ma kunu kegitamo, ale aimano tepo magumuno nilakapolo la: nemalagidilolenata, iyo, la:la, ala, ale tete geyageyanomolo me opolo kapimiya dilukulionama; aimano a:elao teta:mo ebe atu nilakapo magumudo palo ka:nemaimiomalema:. <sup>4</sup> Ebema: la:le na atumu nilakapolo da:kemalagidilona:wenama, nale ebe tanalo nanitabolo eba iyatawanalo la: mabuma: kawonomamo amamanamo. Iyo, naimano tepo magumulo kalakala tanalote kawonomamo itana, mabu a nani wokopiatamo iyaiya temeteme tanalate demaimiya, nale ebe temeteme magumulo eba lutalo la:imano nanitabo tanalo demalagidilonakomo, gelebadi tanalote naimano tepo magumu ebo tabokaiminako.

<sup>5</sup> Numa:la; ale aimano kawo woko osiyodilo tanaloma: elawoa:dopoma: eba eda:olo me Ma:sadoniya opamo ebo pelaima; wiyasiya ale malo ela amio tete nanitabolo ka:pumia; mabu iyaiya temeteme tanalo epetapiate atamo walo ma kunu ka:pemaimiya, nanitabokobi midia:pi epetapiate gowelao tanalo atamo owadaiya ega:walo aimano tepo magumulo tole tanalate emaimiya. <sup>6</sup> Wiyasiya Godoko iyatawanomola, piyate woko magumulo kuiwodopoma: deda:ona ebe epono tepo magumu elawokobi ka:midilima; ebema: aimano woki bilibili magumulo ebete Taitasikono pe tanalamo a owalubi. <sup>7</sup> Nanitabola, ale ebeno pe tanalo duima: kalakala ebo laima; wiyasiya ebe tetelo ale ebe tanalo kapiyanomoma: kekalakalaoa:. Ao, la:le ebe keba kunu kowaluba:ima, ale ebe tabo ebegodone dolowima: kalakala idi walo ebo kelaima:. Ebene ebete a ma kunu danai, la:le na unaema: ubi kawonomamo diyata:wenama, ega:walo la:le natamo temeteme ikaname tanaloma: la:imano tepo magumulo mibomiboma: deda:wenama, ega:walo me tetelo la:le na kekalakalainama:ema: kawonomamo demalagidilawenama, nale ebe iyaiya tanalo dolowimo naimano kalakalate ununomamo ebo odoli.

<sup>8</sup> La:le naimano leta osiyodilo tanalo idido temeteme delawa:ima, nale ebe tanalo iyatawate temeteme tanalo atumu a:kelawa:tepimo, wiyasiya nale ebe temeteme iyabaiamo gito iyatimo mabu na ma kunu iyatawimo, naimano tabono tanalote kebe temeteme la:tamo dikalametia ebe temeteme tanalote tete geyageyanomolo la:godolo a:kitanamene. <sup>9</sup> Ebema: me tetelo naimano leta osiyodilo tanaloma: kalakala tanalote nagodolo bitana, wiyasiya numa:la; la:le dopamo diyatawaima ebe temeteme tanaloma: na kekalakalana; ao, naimano kalakala bitana mabu Godote la:imano temeteme tanalamo wade woko idi la:godolo eba osiyodilolo, la:le la:imano woki iyakobi midila:wete ebetamo walo ebo kolobilimata. Ebema: nanitabola, a

Godokono nani wokopiate aimano tabamo temeteme la:tamo dikalametia, ale ebe tanalodo kuba tanalo idi la:tamo kosiyodiloa!<sup>10</sup> Iyo, kebe temeteme tanalate Godogodone lumagitamo demaimionaka, ebe temeteme tanalodo ebete ebena woki iyakobi midite Godotamo ebo kolobigamene, ebema: ebete igilo mula: tanalo delaemene, ebe tetelo ebena temeteme tanalote olopoligadigate kalakala kapiyate kitanamene! Wiyasiya kebe temeteme tanalate me opono ubi tanalo waloma:tale magumune lumagitamo demaimionaka, ebete ebe tanalodo kalakala idi a:kuimene mabu ebete a: tanalo kapiya kelaemene.

<sup>11</sup> Ebema: modobola la: me tanalo numa:la:. Godote la:imano temeteme tanalodo la: magumulo wade wokonomo idi ma kunu osiyodili, la:le ebegodone wade woki lawa:wete ebena tuputupu okoli tanalo kawokalima:ema: la:imano ubi kawonomamo ebo iyatimata. Ebena la:imano taneba magumulo kebe lumagite kuba dosiyodili, la:le ebena kuba tanaloma: tole kawonomo eba lawelo la:imano dowa tanalo ebetamo nanitabonomolo ebo awokalimata. Iyo, la:le na walo ka:kunama:ema: ubi kawonomamo eba iyatilo, la:le la:imano osiyodilole tanaloma na kekalakalainama:ema: woki nanitabonomolo ma kunu elawimata, la:le kuba osiyodilodawatamo ebena kuba wiya modobonomolo kikama:ema:. Ebema: kalakala kawonomola, la:le me osiyodilole tanalo bilibilinomodo la:imano tepo magumuno tuputupu tanalo awokalimata, iyo, kebe kubate la: magumulo demaigi Godote ebe kubano wiya la:tamo ebema: a:kikalametamene.

<sup>12</sup> Nanitabola, dopamo nale la:tamo leta idi dosiyodilimo, ebe tanalodo nale kuba osiyodilo dubutamo ebena temeteme wiya ikaema: kemalagidiloa:, ega:walo ebete potamo kuba dosiyodili nale ebe lumagi gelebadima: woki atumu kiyatia:. Ao, nale wiyasiya naimano ubi tanalo ma kunu iyatimo, la:le a Godokono nani wokopi nilakapolo kawonomamo keba kunu kemalagidiloa:wenama, la:le la:imano tuputupu osiyodilo tanalodo ebena ololo apulo ebe tanalo wadenomamo kiyatawaomamota. <sup>13</sup> Ebema: me ebe mabula, ale la:imano tanalo Taitasigodone dolowima:, ebe tanalodo wade gelebadi tanalote atamo ebo pi.

Nanitabola, ebe atu tetelo wade tanalo idite atamo ma kunu kemaigi, ale Taitasikono kalakala duima: aimano kalakalate unamo ebo odoli, mabu ebete a anai, ebegodolo kebe woki bilibili tanalote ditani, ebe tanalo magumulo la: bilibilinomate ebe keba kunu kowaluba:ima.

<sup>14</sup> Numa:la:, dopamo nale Taitasiko la: Kolini sosi epono tanaloma: eba analo naimano woko tanalono wade amama magumulo la: ebo moiolimata, ebema: kalakala kawonomola, ebete la:tamo da:pemaigi la:le ebena ololo apulo kebe wadewade tanalo kosiyodilola:wenakima, la: ebe tanalodo na ilipokobi ka:midina:wea:. Nanitabola, ale la:imano tanaloma: kebe moirole tabo kegelima:, ebete ebena balida:mo ebe iyaiya tanalo la:godolo nanitabonomolo a:pulami. <sup>15</sup> Iyo, la: bilibilinomate Taitasiko eba tolemelo la:imano wokilo ebe unamo adipatelo delawa:ima, ega:walo la:le ebena tabo olowiawete ebetamo da:tudila:ima, ebete me tetelo ebe tanalo kalakalago eba malagidilolelo, ebena tepo magumulo ditana ebe nilakapo tanalote la: mabuma: ununomamo odolona. <sup>16</sup> Ebema: Kolini sosi epala:, nagodolo ditana ebe kalakala beda: kawonomola:ka:, mabu na la:imano nanitabo tanalo iyatawanomola, ma kunu na ka:toletolena: la:le la:imano osiyodilole tanalodo natamo ilipo kikanama:ema:.

*Kolini Sosi Epate Nigologolopi Kowalubilima: Polote Ibi Danaliya Iba:te Nilakapolo Ibino Mani Epetapi Iyabaiamo Kalomoma:*

<sup>1</sup> Ebema: aimano nanitabokobi midipi ekakiala:, a ubila la:le me tanalo niyatawala:, Godote ebena nilakapo Ma:sadoniya opono iyaiya sosi epatamo eba ikalamelo iba:godolo beda: wade woko kosiyodilile.

<sup>2</sup> Numa:la:, kebe tetelo iba:te ibino nanitabokobi midi mabuma: kawokawo temeteme duwatanakiya, iba:te wiyasiya ibino nigologolo ilukuli tanalo kubanomamo eba iyatawaolo ibino kalakala ununomamo dodoliya, ebema: iba:te kawo nilakaponomago ibino mani Godotamo kawonomamo gito ikameiya. <sup>3</sup> Iyo, na Polote nani tabo ma kunu gemo, ibi a:ka:tuwa: ibi walubilima: tanalo idi amoeda:no Godotamo kawonomamo ikameiya, ebema: a epetapiate Ma:sadoniya epono nigologolo ilukuli tanalo eba malagidilolo iba:te Godotamo kebe mani ikameoma: modoboma: kegelima:, ibino ikame wokite wiyasiya aimano ikameo woki odoli. Nanitabola, lumagi idite ibi analea:no ibi a:ka:tuwa: ibino ubilo <sup>4</sup> a towеоamiya, ale opo epetapino sosi epatamo tete keba kunu kikalaima: ale iba:tamo tete eba kunu ka:kikalaema:, Godokono epo magumulo piyate nigologololo kubanu dilukuliona iba:te ebe Yudiya opo epo ibino maniamo kowalubilima:. <sup>5</sup> Ebema: numa:la:, iba:te a towеоame tanalodo ibino tepo magumuno wade woki ma kunu awokalimiya, iba:te ibino igilo kawonomo aimano Kawodawatamo dopamo ikameote, ebene Godokono ubilo iba:te ibino igilo atamo nilakapolo atumu walo a:kikaeamiya. Nanitabola, ale ibino tabo dolowima:, a kawiya la:wa:ote kalakala ebo laima:.

<sup>6</sup> Ebe mabuma: Kolini sosi epala:, la: magumulo me nilakapo woko dopamo dowagilimi ebe dawa ebe Taitasitela, ebema: ale ebe anima:, la:le la:imano mani epetapi nilakapolo balamo dalomawenakoma, modobola ebe tanalo nanitabolo kopoliyaema: ebete la: iyaiya tabamo na:powalubilima:ta. <sup>7</sup> Numa:la:, Godote la:tamo ebena wadewade tanalo kawonomamo ikalamiata, ma kunu la:imano nanitabokobi midi tanalo, ega:walo la:le ebena tabo kiyawao tanalo, ega:walo la:imano iyatawa tanalo, ega:walo ebena woko osiyodiloma: la:imano ubi kawonomamo alomo tanalo, ega:walo la:imano nilakapo atamo awokalimi tanalo, ebe wadewade tanalo bilibilinomate la:godolo modobonomolo pola:na. Ebema: a ubila la: atumu me tetelo me nilakapo woko osiyodilo tanalo idi magumulo la:imano mani nigologolopiatamo kawonomamo gito nikalamiyala:.

<sup>8</sup> Numa:la:, nale me tabo kiyawao tanalodo la:tamo Godokono totomu tabo idi kikalameta:, ao, nale wiyasiya ubi niyatimo la:imano nilakapo kimalagidilo tanalo kuima:, da: kawola: o da: da:pesola:. Iyo, nanitabokobi midipi epetapiate ibino nilakapo tanalo awokalima: ibino ubi tanalo kawonomamo keba kunu kalomone, nale ebe tanaloma: gemo mabu na ubila la: la:imano ubi tanalo atumu eba kunu nakalomiyala:. <sup>9</sup> La: iyatawalata aimano Kawodawa Ya:su Kelisote ebena nilakapo keba kunu kawokalimiyale ebe tanalo. Nanitabola, ebete Unu Duliyomololo dogodogodawanomoma: eba eda:nalo, wiyasiya la: mabuma: ebe a:ka:tuwa: ebe nigologolodawama: midite me opamo ebo pawokaliya, iyo, ebete ebena ubi niyatiya la:le ebena nigologolo okoli tanalodo dogodogopima: keda:wenama:.

<sup>10</sup> Numa:la:, la:le nigologolopi kowalubila:ema: iyalo ulamalo la:imano mani epetapi nilakapolo iyabaiamo alomoma: dowagilima:ima, la:le nanitabokobi midipi bilibilinomo magumulo dopo epoma: eda:imata, iyo, epetapiate tanalo idi wagilimia:no la:le la:imano ubi tanalo dopamo awokalimata. Ebe mabuma: naimano woki ma kunu itana, me tetete wade



tetenomoma: eda:na la:le ebe wade woko kopoliyaema:.<sup>11</sup> Ebema: la:godolo kebako manite modobolo ka:pola:lametana, modobola la:le nilakapolo eba kunu gito nalomonakiyala:, iyo, la:le me woko osiyodiloma: kebe wade ubi tanalonomo dopamo kalomaima, modobola la: me tetelo ebe atu ubi tanalago la:imano tanalo nopoliyadigala:.<sup>12</sup> Ega:walo me tanalo idila. Kebe lumagite nilakapo tanalo idi Godotamo ikaema: dowagelena, ebena tepo magumu tanalote keba kunu kitanale ega:walo ebegodolo kebe manite modobolo ka:pola:nale, Godote ebe tanalo eba iyatawalo ebena ikame tanalo modoboma: o modoboa:noma: ebo kegemene, iyo, kebe lumagigodolo mani pola:mena:no Godote ebena ikamea: tanaloma: ebe kubadawama: a:kegemene.

<sup>13-14</sup> Ebema: numa:la:, naimano ubi tanalo ma kunua:, la: kapiyate la:imano mani nilakapolo alomo tanalodo kawo temetemenomo eba iyatawalo, nanitabokobi midipi epetapiate nanitabolo a:kosiyodiloma:na:. Ao, na iyatawala la:imano manite me tetelo kawokawodopoma: eda:ona, ebema: naimano woki nanitabokobi midipi magumulo piyate me tetelo nigologololo dilukuliona, modobola la: la:imano dogodogo tanalamo ibi gito nowalubiliyala:. Ebema: nanitabola, walone kebe tetelo iba:te dogodogopima: deda:onama:na:, la: wiyasiya nigologololo eba ilukulinalo iba:te walubi tanalo la:tamo ebo kiyatima:na:. Kalakala kawonomola, eba kunu nanitabokobi midipi bilibilinomo magumulo epetapiate epetapiatamo ibino iyaiya modobo tetelo nikameteuinakoma:na:.<sup>15</sup> Numa:la:, ebe tanalo awokalima: Godokono Bukalo tabo idite ma kunu itana,

“Godote Isalaela epatamo  
 anoano gabodo dikalamenaki,  
 piyate ebe ma:na bae kawonomamo duwatenakiya  
 iba:godolo epetapi ka:lulinakia:,  
 ega:walo piyate kela:mo duwatenakiya  
 ibino baete atumu kolopoligonakia:.”

*Taitasiko Ega:walo Nanitabokobi Midipi Ekaki Netewa Epetapi Ibino Pelame Tanaloma: Polote Da:kiyawaiya*

<sup>16</sup> Ebema: modobola a Godotamo kalakala tabo kadipatiye, mabu la: kowalubilitama: kebe ubi tanalote agodolo kawonomamo ditana, ebete ebe atu ubi tanalo Taitasikono tepo magumamo iyalo iyati.<sup>17</sup> Numa:la:, sosi epate nigologolopi mabuma: mani nilakapolo dalomonaka, Taitasite ebe woko la: magumulo katama: ale ebe danima:, ebete ebena ubi tanalo eba awokalimilo aimano tabo kalakalago ebo olowi, ebene ebete ebena ubi kawonomo me tanalo idido atumu akawokalimi, ebe a:ka:tuwa: ebena ubilo tabo ebo iyati ebete me leta la:tamo adaete la:imano nilakapo osiyodilo magumulo la: ka:powalubilitama:.

<sup>18</sup> Ebema: ale eba:go aimano nanitabokobi mididawa ekawi idi la:tamo kapaliboma:, ebe Wade Tabo kiyawao woko wadenomamo dosiyodilona ebe dubula, iyo, ebena woko osiyodilo tanaloma: iyaiya sosi epo bilibilinomate ebena tanalo iyatawaote ebe nemoiona.<sup>19</sup> Ega:walo me walubidawano tanaloma: me tanalo idi na:kuma:la:, sosi watowatopiate ebe elawiya, ebete a wokopi epetapiago eba wapata:lamenalo sosi epono nilakapo mani nigologolopiatamo katama:. Nanitabola, a bilibilinomono ubi tanalo ma kunula, modobola me woko osiyodilo magumulo epate Kawodawa Godoko nowalogoma:na:, ega:walo nigologolopi kowalubilima: kebe ubi tanalote a watowatopiagodolo kawonomamo ditana, modobola ale aimano osiyodilo

tanalamo ebe wade wokino tanalo nanitabokobi midipi bilibilinomatamo kawokalimalema: <sup>20</sup> Wiyasiya sosi epate kebe mani ibino kawo nilakaponomago dalomonaka, ale ebe kawo maninomo mulu opo ida:mo katama: iba:godone duwatema:, a ubia:nola lumagi idite aimano osiyodilole tanalo bilibilinomo magumulo kapiya tanalo idi kubama: gema: <sup>21</sup> Iyo, ale aimano kawo ubi tanalonomo ma kunu iyatinama:, aimano Kawodawa Godokono ololo apulo iyaiya tuputupu tanalo kapiya kosiyodilolema:, ebene ale ebe tanalo eba malagidilolenalo aimano ubi tanalo na:kiyatinama:, ale me opo epo bilibilinomono ololo apulo atumu tuputupulo kowapata:lamenama:.

<sup>22</sup> Me mabuma: ale aimano wokopi netewa epetapiago me nanitabokobi mididawa ekawi idi la:tamo kapaliboma:. Nanitabola, ale iyaiya woko ebetamo dopamo dikameonakima:, ebete ebe tanalo bilibilinomo tuputupunomolo kosiyodilolema: ebene ubi tanalo kawiya eba awokalimilo ale ebo uminakima:. Ebema: me tetelo ebete ebene ubi kawonomamo walo na:kiyatina me woko idi la:godolo ka:posiyodiloma:, mabu la:le la:imano nilakapo tanalo nigologolopiatamo nanitabolo dawokalima:ima ebete ebe tanalo nanitabokobi na:midina. Numa:la:, me oli woko kosiyodiloma: ebegodolo kebe ubi tanalote kitanale, ebe tanalono elawote ebegodolo dopamo ditanami ebe tagala ubi tanalono elawo nanitabolo nodolina. <sup>23</sup> Ebema: nale dopamo degemo ebe tanaloma: walo na:kegemo, na ubila naimano wade namutudawanomo Taitasiko la:tamo walo ka:ka:pema:, mabu ebe la: mabuma: nago woko kapimiya dosiyodilona ebe lumagila. Ega:walo numa:la:, nanitabokobi midipi ekaki netewa epetapiate Taitasiago la:tamo me letago da:pema:na:, ibi me Ma:sadoniya opono iyaiya sosi tanebapiate la:tamo dapalibola: ebe wokopila, nanitabola, ibino osiyodilole magumulo iba:te Kelisoko nowalogona.

<sup>24</sup> Ebema: Kolini sosi epala:, la:godolo ditana modobola la: ebe nilakapo tanalo iba:tamo nawokalimiyala:, ebema: me opono iyaiya sosi epate ma kunu kiyatawaoma:na:, la:imano nilakapo tanalote nanitabolo eba itanalo, ale la: mabuma: kebe moiote tabo dopamo degelanakima: ebe tabote nanitabonomoma: eda:na.

## 9

### *Kolini Sosi Epate Ibino Mani Epetapi Nilakapolo Dalomoma:na: Polote Ebe Tanalo Nanitabokobi Midilo Tabo Da:kiyawaiya*

<sup>1</sup> Numa:la:, Godokono nigologolopino tanaloma: iyaiya sosi epo epetapiate nilakapolo ibino mani balamo dalomonaka, nale ebe tanalo la:tamo awokalimia:no, na iyatawala la: wiyasiya la:imano tanalo modobolo kosiyodilomamota, <sup>2</sup> mabu la:le la:imano tepo magumulo ebe nigologolopi nilakapolo kowalubila:ema: iyalo olosiyodilimata. Iyo, nale naimano woko osiyodilo tanalono wade amama magumulo la: Guliki opono sosi epo eba moiotele, la:le iyalo ulamalo dolosiyodilaima ebe tanalo Ma:sadoniya opono nanitabokobi midipiatamo kiyawaomo. Ebema: kalakala kawonomola, la:le la:imano nilakapo awokalima: ubi kawonomamo dalomawenakoma, ibi bilibilinomo epetapiate ebe tanalo olowite atu nilakapo woko wagilima: woki ebo lawiya.

<sup>3</sup> Wiyasiya na ubia:nola nale dopamo la: kebe tanaloma: kemoioletima, la: me tetelo ebe tanalo osiyodiloa:pima: eda:oma:. Ebema: numa:la:, nale me nanitabokobi midipi ekaki la:tamo palibolemo, mabu iba:te la: iyaiya tabamo eba powalubililo, la:imano nilakapo mani nalibole tete pea:no la:le ebe tanalo osiyodiloma: dopamo nanitabolo kolosiyodilomamota, nale la: mabuma: dopamo keba kunu ka:kiyawaimo eba kunu. <sup>4</sup> Wiyasiya

la: nolowiala; na ega:walo Ma:sadoniya opono iyaiya sosi epo epetapi, ale la:imano nilakapo mani uwatema: da:pemaimioma; ebe tetelo la: ebe tanalo osiyodilola:pimu da:pulametamene, a keba kunu na:kowagelema:? Iyo, aimano ilipote kawonomoma: keda:mene, mabu a dopamo la: nanitabokobi eba midililo la:le ebe nilakapo tanalo nanitabonomolo kosiyodilaema: awokala egelima:. Eiye, ebe tetelo la: atumu, la: kebe ilipo delawa:ema ebe ilipo beda: kawonomola:ka!

<sup>5</sup> Me mabuma: nale naimano woki ma kunu iyatimo, nale pea:no me ekaki epetapi kesamosamolatelema: iba:te la:tamo dopamo ka:pelaema:. Eba kunu la:le kebe kawo nilakapo tanalonomo nanitabolo osiyodiloma: dopamo da:kiyawaima, iba:te la: iyaiya tabamo eba powalubililo, la:le la:imano mani epetapi iyabaiamo nilakapolo gito kalomomamota naimano pe teta:mo. Iyo, modobola nale pea:no la: a:ka:tuwa: la:imano kalakala tetelo ebe nilakapo tanalo dopamo nosiyodiliyala; wiyasiya modoboa: nale la:imano osiyodilola: tanalo pumite, la: kawiya eba panalelo la:le ilipo tanalago la:imano tanalo ebo osiyodiloma:.

*Pali Damelamo Kawonomamo Damiona Ebe Lumagite Ebedo Wade Wiya Kawonomamo Kelaemene*

<sup>6</sup> Ebema: me kawo tanalonomola. Kebe lumagite kapiyakapiya kikopu damelamo damiomene ebete eba kunu ebedo pali magumune kapiyakapiya nao inamabu kuwatemene, wiyasiya kebe lumagite kikopu bilibilinomo damiomene ebete atumu nao inamabu bilibilinomo kuwatemene. <sup>7</sup> Ebema: modobola la: bilibilinomate la:imano nilakapo mani ma kunu nalomonakiyala:. Lumagi idite kebako mani dalomomene, ebe tanaloma: idawate ebe iyatumia:no ebe a:ka:tuwa: ebedo tepo magumuno woki dopamo keba kunu ka:kodakodaimile, modobola ebete eba kunu nalomomene, wiyasiya ebete tepo magumuno ubia: tanalago a:kikaemene, kalakala kapiyate ebegodolo nitanamene mabu Godote ebako ikamedawa nilakapolo nermalagidilona.

<sup>8</sup> Numa:la:, Godokono elawo modobola la:imano ilukuli tanalono tanalo bilibilinomo magumulo la: kawonomamo kowalubilitanakoma; iyo, eba kunu ebete la:imano iyaiya modoboa: tanalo bilibilinomo eba modoboilamelelamelo, la:godolo mani ega:walo inamabu epetapi modobonomolo ba:pola:nama:na: la:le ebedo wadewade woko epetapi bilibilinomo kosiyodilola:wenama:. <sup>9</sup> Ebema: ebe tanalo awokalima: ebedo Bukalo tabote ma kunu itana,

“Piyate nigologololo dilukuliona,  
 ebete nilakapolo iba:tamo kawonomamo ikalamenako,  
 iyo, ebedo nilakapo awokalimi tanalote  
 iba:tamo uwomua: uwomua: tetelo bitanamene.”

<sup>10</sup> Ebema: numa:la:, kebe Kawodawate iyaiya kikopu bilibilinomo pali osiyodilodawatamo dikameonako ega:walo nao inamabu epatamo atu gabodo modobolo da:kikalamenako, ebete la:imano iyaiya modoboa: tanalo magumulo la: atumu inamabuamo ega:walo maniamo ka:kowalubilima:ta. Iyo, ebete la:tamo kikopu kawonomamo dopamo ikalametate, ebene ebedo elawamo ebe kikopu magumune inamabuate wadenomamo apepeonaka, ebema: kalakala kawonomola, mabu la: nao inamabu uwate tetelo ebete la:imano nilakapo ikalame tanalodo la: ega:walo epo epetapi bilibilinomatamo modobo bae kapimiya kikalaema:ta. <sup>11</sup> Nanitabola, uwomua: tetelo Godote la:imano modoboa: tanalo wadenomamo bulamelelamenakoma:ta,

la:le la:imano dogodogo tanalone tete bilibilinomolo epo epetapi bilibili-nomo atumu kowalubila:wenakoma; iyo, ebe ubila ale la:imano nilakapo mani nigologolopiatamo da:nikalaema;, iba:te la: mabuma: kalakala tabo ebetamo ebo kadipatema:na:.

<sup>12</sup> Ebema: numa:la:, la:le la:imano nilakapo mani dalomawenakoma, Godote ebe gabodo ebena epo epetapino iyaiya modoboa: tanalo ka:modoboilamelelaemene. Wiyasiya la:imano osiyodilo tanalado ebe wade tanalo kapiya a:kemaigamene, ao, nigologolopiate ibino walubi tanalo delaema:na:, ebe tetelo atumu wade tanalo idite ma kunu ka:kemaigamene, ebe epate ibino kawo kalakalanomo Godotamo ununomamo ebo kadipatema:na:. <sup>13</sup> Iyo, me woko osiyodilo magumulo epetapiate la:imano tepo magumuno nanitabo tanalo wadenomamo ma kunu kuima:na:, la:le Kelisoko mabuma: kebe Wade Tabo ka:kiyawawenakoma ebe tabamo la: nanitabonomolo tudila:onamata. Ega:walo iba:te me tanalo idi ka:kiyatawama:na:, la:imano nilakapo magumulo ibi kawonomamo keba kunu kowalubila:ima, la: ebe atu gabodo epo epetapi bilibilinomo atumu a:kowalubilinakomata. Ebema: nanitabola, la:imano osiyodilo tanaloma: iba:te Godoko walogolo <sup>14</sup> ibino tepo magumuno nilakapo tanalago la: eba malagidilolelo la: towetowe tabamo ebo kowadipalatelema:ta, mabu iba:te me tanalo umiya, ebena nilakapo tanalote la: magumulo wade wokonomo osiyodilona. <sup>15</sup> Ebema: modobola a kalakala tabo Godotamo kadipatiye, mabu ebete atamo dawokalimiya ebe nilakapo beda: kawonomola:ka:, iyo, lumagi idite ebe gito ikaeame tanalo ebena tabamo nanitabolo awokalima: a:ka:modobomene!

## 10

### *Piyate Polokono Iyaiya Woko Osiyodilo Tanalo Kubadopoma: Degeliya Polote Iba:tamo Ebena Wokono Nanitabo Tanalo Dawokalimiya*

<sup>1</sup> Ebema: na Polote naimano tepo magumuno wokilo la: toweolaemata la:le naimano ubi tanalamo ka:tudila:ema:. Numa:la:, la: epetapiate na mabuma: ma kunu gelanamata, “Ebate dopamo agodolo eba pokolinalo ebena tabono elawote nanitabolo kitanamia;, iyo, ebete aimano elawo tolemelo woko ebe posiyodilonami, wiyasiya ebete a magumune muluamo da:ti ebe tetene wagilimite ebena leta magumulo iyaiya elawo tabo epetapi kiyawaonapi!” Nale wiyasiya ebako daedale wokino tabo malagidilola:no, Kelisokono milo okoli wokino tanalamo <sup>2</sup> la: walo ma kunu ka:toweolaemata, modobola la: naimano iyaiya ubi tanalamo na:tudila:iyala:, mabu nale la:tamo nanitabolo ka:pemamo, ebema: ebe tetelo la:le naimano ubi tanalo osiyodilolelo la: da:pulametama, elawo tabo kiyawao tanalote nagodolo a:kitanamene. Wiyasiya la: magumulo piyate a nani wokopino tanalo kubanu dawokalima:wenama, ma kunu la:le a a:ka:tuwa: aimano tepo magumuno kuba wokino tanalodo woko osiyodiloma: degelawenama, la: nanisiwale! Eiye, na a:ka:tuwa: naimano tanalo nanitabolo niyatawanamo, nale la:tamo da:pemo naimano elawote ka:modobomene la: la:imano daedale wokino taboma: kawiyaa kapanale-tama:!

<sup>3</sup> Ebema: numa:la:, a piyate Godokono nani wokopima: deda:onama;, ale me opolo eba ilukulinalo wiyasiya me opono wokino tanalamo ka:gowelana:. <sup>4</sup> Nanitabola, ale kebe inamabuamo ka:gowelanakoma: ebe inamabu me opo epate atamo kikaemiya;, ao, a wiyasiya ebe elawoelawo gowelao inamabunomo Godogodone uwatiyama;, ebema: ale ebe

inamabuamo Saitanakono iyaiya gowelaono kala ga:dimi ebo anabuilame-nakoma. <sup>5</sup> Iyo, ebe inamabuamo ale epetapino a:da: elemasigi iyatulame tanalo a:kubailamenakoma:, ega:walo kebe iyaiya amama tanalamo iba:te Godokono nanitabo iyatawa tanalago da:gowelaona, ebe amama tanalo atumu ale opamo a:piyalekenakoma:. Ebene me opo epono tepo magumulo kebe iyaiya wokino tanalate da:pola:na, ale Godokono gowelaono inamabuamo ebe tanalo bilibilinomo atumu kodakodalo eba uwatelo ebo matuolamolenaakoma:, iba:te ibino wokino tanalo bilibilinomodo Kelisoko kapiyatamo ka:tudila:oma:.

<sup>6</sup> Ebema: Kolini sosi epala:, kebe tetelo la:imano osiyodilole tanalo bilibilinomo magumulo la:le Kelisotamo da:tudila:ema, ale ebe tanalo nanitabolo duima:, walone tetelo la: piyate tudila:oma: ubia:noma: walo da:keda:ema, a nani wokopiate gowelao magumulo kolosiyodilomalema: la:imano tudila:oa: tanalono osiyodilole tanalo bilibilinomoma: kuba wiya la:tamo kikalametama:.

<sup>7</sup> Eiye, la:le epo unu nikapiamo ulamenakomata, wiyasiya ebako kuba wokino tanalote la:godolo itanama: modoboa:! La: magumulo idawate ebene wokilo ebe a:ka:tuwa: ebe Kelisokono nani waloma:tadawama: degena, modobola ebete a nani wokopino tanalo walo eba kemalagidilolo woki ma kunu nelaemene, a ebe atumu Kelisokono nani waloma:tapima: eda:onama:, ebe a:ka:tuwa: ebene tanaloma: keba kunu kegenale eba kunu. <sup>8</sup> Ebema: la: niyaniyata, aimano elawo tanaloma: amama tabo keba kunula:ka: nale ebakobako tabo la:tamo kiyawaomo, wiyasiya nale ebe tanaloma: ilipo a:kelaemo. Numa:la:, Kawodawate a:ka:tuwa: me elawo atamo nanitabonomolo ikaeamiya, ale la: sosi epo ulamepima: eba eda:onalo la:imano nanitabokobi midi magumulo ale la: ka:kodakodailametama:, wiyasiya ebete atamo elawo kikaeamiya: ale aimano osiyodilo tanalo ida:mo la:imano nanitabokobi midi tanalo ka:kubailaema:.

<sup>9</sup> Ebema: nale naimano iyaiya leta magumulo kebe tabo ka:kiyawaonakomo, la: epetapiate ebe tabo eba olowiolo mako woki kubanu lawenakomata, Polote atamo tole ikaeaema: dowagelenale. Ao, naimano leta osiyodilole magumulo naimano ubi tanalo eba kunu kitana:.

<sup>10</sup> Ega:walo la: epetapiate daedale wokilo tanalo idi ma kunu gelanamata, “Polote ebene leta magumulo atamo tole tanalo ikaeaema: elawo tabonomo kiyawaonako, wiyasiya dopamo ebete ago eba pokolinalo ale ebene apeno elawoa: tanalo ebo uima:, ega:walo ebete aimano ololo apulo tabo da:kiyawaonaki ale ebene elawo nanitabolo kuminakia:.”

<sup>11</sup> Ebema: la: piyate eba kunu degelawenama, modobola la: niyatawala:, kebe tetelo a nani wokopiate la:godolo kilukulina:, ebe tetelo ale aimano leta magumulo kebe elawo kawokaliminakoma:, nanitabola, ale la:tamo da:pelaema: ebe atu elawo aimano osiyodilole magumulo la:le la:imano balidinomamo kuimamota!

<sup>12</sup> Eiye, piyate a mabuma: kubanu demalagidilona, ibino daedale wokino tanalo beda: kawonomola:ka:! Numa:la:, ibi a:ka:tuwa: iba:tamo iyaiya pukala epetapi gito alomonaka, mabu ibi iyatawala ebe atu pukalamo iba:te tudila:o iyalo owagilimiya. Ebe mabuma: iba:te epono ololo apulo ibi a:ka:tuwa: ibino pukala mabuma: ebo walogolenaka, wiyasiya piyate ibino pukala dowakalamina iba:te ibi kubakubapima: gito gelana. Iyo, eba kunu iba:te epono iyaiya tanalo ibino pukalamo modobulatelelamenaka, sosi magumulo ibi a:ka:tuwa: ibi unamo kowadipalatelema:.

Wiyasiya a Godokono nani wokopi ubia:nola ale aimano tanalo ibino pukalamo modobulatelema:, ebema: diyala, iba:te a mabuma: daedale



wokino tabo idi ma kunu da:beigelama:na; “Tole tanalote Poloiaagodolo bitana aimano pukalamo ka:tudila:oma!” <sup>13</sup> Numa:la; ibino amama tanalo ega:walo a nani wokopino amama tanalo iyaiyala, mabu iba:te amamao magumulo epetapino woko ebe kubailamena. Wiyasiya aimano tanalo ma kunula, Godote atamo dikaeamiya ebete ebe woko osiyodilo tanalono iyaiya uwomu tanalo a iyalo iyatuamiya, ale nanitabokobi mididawa idino woko magumamo nopila:okapoma; iyo, ale Godogodone iyalo tetelo delawiyama: ebe woko kapiyama: amama tabo begelanakoma:

Numa:la; la: Kolini sosi epate aimano woko osiyodilo tanalono iyaiya uwomu magumulo nanitabolo ba:pola:namata, <sup>14</sup> mabu piyate mulune pelamete Kelisokono Wade Tabo la:tamo da:pa:kiyawaiya, a ebe ebe wokopila, iyo, ale la:tamo da:pelaima: ebe tetelo ale lumagi idino woko magumamo ka:popila:oa. <sup>15</sup> Ega:walo me tanalo idila. Godote atamo dikaeamiya ale ebe woko osiyodilo tanalono iyaiya uwomu tanalo eba iyatawaolo, modoboa: ale nanitabokobi mididawa idino woko magumamo nopila:ote ebena woko osiyodilo tanaloma: a a:ka:tuwa: a walo-goema: Wiyasiya numa:la; ale la: magumulo kebe woko kosiyodilonama: ebe wokoma: aimano ubi tanalo ma kunu bitana, la: nanitabokobi midi magumulo eba apepeolo, aimano wokote la: magumulo atumu apete Godokono ubilo kawonomoma: eda:te, <sup>16</sup> ebete gigiyu atamo ebo ka:iyamidamene ale la: Kolini duliymolo epono Guliki opo apuamo ka:tolaema: Nanitabola, piyate ebolo dilukuliona ale iba:tamo Kelisokono Wade Tabo eba na:kiyawaolo a a:ka:tuwa: a nanitabokobi mididawa idino wokono tanaloma: akanamamaoma; mabu lumagi idite ebe iyaiya mulu opolo woko dopamo ka:nowagilimia:

<sup>17</sup> Ebema: modobola a me tanalo idi kemalagidiliye. Godokono Bukalo tabote ma kunu itana, “Lumagite a:ka:tuwa: ebena osiyodilo tanaloma: akowalogala; wiyasiya Godote ebe magumulo wade woko dosiyodilona, modobola ebete ebe tanaloma: eba kalakalalo ebena Kawodawa kapiya nowalogomene.” <sup>18</sup> Iyo, nanitabola, kebe tetelo aimano Kawodawate lumagi idi wade wokodawama: degena, ebete ebe lumagi ebena nanitabo kalakalago kelaemene, wiyasiya kebe lumagite amama magumulo ebe a:ka:tuwa: ebe wade wokodawama: degena, Kawodawano kalakalate ebena a:kitanamene.

## 11

*Kolini Sosite A:da: Elemasigipi Epetapi Kelisokono Nani Alibolepima: Dekala:miya, Polote Ibino Tanaloma: Tabo Da:kiyawaiya*

<sup>1</sup> Ebema: Kolini sosi epala; la: niyaniyata, na ubila la: me tabo idi olowioma: ubia:noma: akoeda:oala; mabu nale naimano nanitabo tanalo kawokalima: daedale woki keba kunula:ka: nale ebako tabo la:tamo ka:kiyawaomamo.

<sup>2</sup> Modobola la: me uli tabo nemalagidilala: La:imano sosi taneba ebe dubuno tanalo iyatawa: buwele keba kunula:ka: eba kunula, iyo, dopamo tetelo ebe buwelete dubu epetapino tanaloma: tuputupu woki kapiya malagidilonami, ebena nale ebena nabiwima: eba eda:nalo, ebe kapiya dubutamo galo oboimo, ebe dubu ebe Kelisotela. Ebema: me tetelo dubu epetapiate naimano wade buwele pilolo laema: ubi dalomona, nale ibino kuba ubi tanalo eba ulamelelamenalo, Godogodone kuba osiyodilolepi mabuma: demaigana ebe elate naimano tepo magumulo iba:tamo ebo maiganako. <sup>3</sup> Eiye! La:le dopamo la:imano tuputupu ubi tanalo Kelisoko kapiyatamo nanitabolo iyatinakimata, wiyasiya nale na:toletolenamo la:le

ebe wade woki waloma:ta gabo Saitanakono a:da: elemasigi tanalodo gito katepaema:, dopo kamiyale Ibite kaluno a:da: elemasigi mulo tanalodo ebena kuba gabamo wabuga:ta tanalamo keba kunu kadogeliyale eba kunu.

<sup>4</sup> La: iyatawalata a dopamo Ya:sukono nanitabo tanaloma: kebe tabo la:tamo ka:pa:kiyawaima:, ega:walo la: iyatawalata ebe tetelo la:le ebena Wade Tabo kalakalago olowiawete ebegodone kebe Uliyana kelawa:ima. Wiyasiya me tetelo a:da: elemasigi wokopi magumulo idite pete Ya:sukono tanaloma: iya tabo epetapi la:tamo da:pa:kiyawai, la:le ebena tabamo kalakalago a:tudila:imata, iyo, la:le ebe a:da: tabo dolowiaima Godokono Wade Taboma: mida:wete, ebena ebe lumagigodolo woko dosiyodilona la:le ebe a:da: elemasigi uliyana ebo lawimata.

<sup>5</sup> Eiye! La:le ebako a:da: elemasigipino woko ununomamo adipatelo ibi Kelisokono iyanomo alibolepima: ka:la:minamata! Wiyasiya numa:la:, Kelisokono nani alibolepi magumulo na idima: eba eda:nalo, naimano tepo magumulo nale me tanalo niyatawanamo, ebe a:da: elemasigipiate kebe woko kosiyodilolene, ebe iyaiya wokono elawote kapiya da:peso tanalo idido naimano wokono elawo nanitabolo kodolina!<sup>6</sup> Diyala, epetapiate ma kunu da:begeleane, nale kawo sukulu ida:mo ka:tonakia: ebema: na tabo kiyawao iyatawa nanitabolo kelawiya:. Nanitabola, tete epetapilo Godokono tabo kiyawao tetelo naimano tabo madodote elawoa:dopoma: eda:na, wiyasiya numa:la:, na Godokono iyaiya tabono magumu iyatawanomola, iyo, la: dopamo tete bilibilinomo epetapilo ebe iyatawa tanalo a nani wokopiagodolo wadenomamo uminakimata.

<sup>7</sup> Numa:la:, nale dopamo Godokono Wade Tabo la:tamo da:pa:kiyawaimo, ebe tetelo la: olowiopi unamo kowadipalateletama: na a:ka:tuwa: na opamo eba iyatilo naimano woko osiyodilo tanaloma: la:godone wiya da:peso idi kelawea:. Ebema: la:imano woki ma kunu kitanale, nale ebe woko osiyodilo magumulo la:godone wiya lawea:no, me gabodo nale la:tamo kuba idi ebe kosiyodilimo? Eiye, nale la:tamo dosiyodilimo ebe tanalo ebe wade tanalola, kuba tanalola:!

<sup>8</sup> Wiyasiya diyala, iyaiya sosi tanebapi epetapiate naimano osiyodilo tanalo kubama: da:begeleane, mabu nale la: Kolini sosi epatamo woko eba osiyodilonalo, nale naimano iyaiya modoboa: tanalo magumulo iba:godone mani gito uwatenakimo, la:godonea:. Iyo, ibi epetapiate ebe osiyodilo tanalo pilo tanaloma: da:begeleane, mabu nale ibino mani duwatenakimo wiyasiya iba:godolo woko idi osiyodilola:no la: kapiyagodolo osiyodilonaimo. <sup>9</sup> Nanitabola, nale la:go dokolinaimo ebe tete geyageyanomolo naimano iyaiya modoboa: tanalo magumulo nale da:peso walubi tanalo idi la:godone kelawea:, mabu Ma:sadoniya opono nanitabokobi midipi ekakiate da:pelamiya ibi kapiyate naimano modoboa: tanalo ka:modoboima: mani natamo ebo pikanamiya. Numa:la:, dopamo na woko osiyodilo magumulo temeteme idi la:tamo kikalametanakia:, ebema: eba kunu nale walone tetelo atumu temeteme da:pesonomo idi la:tamo a:kikalametama.

<sup>10</sup> Eiye, amama tabo keba kunula:ka: nale ebako tabo degemo, ebe tabo Kelisokono nani tabola, ebema: nale ebe tabo kiyawaoma: Guliki opo kawonomolo lumagi idite na a:kodiyobonemene!<sup>11</sup> Ebema: la:le na maniamo walubinia: tanalo nale iyaiya epatamo eba nawokalimilo la:imano woki ma kunu kitanale, nale la: nilakapolo nanitabolo kemalagidiloletana:? Ao, eba kunua:! Naimano tepo magumulo la: mabuma: nanitabolo ditana, ebe nilakapo kimalagidilo tanalo Godote iyatawala!<sup>12</sup> Numa:la:, nale naimano woko wiya lawea: tanalo awokaliminakomo, mabu na ubila nale naimano nanitabo osiyodilo tanalo eba nawokalimilo, a:da: elemasigi wokopino

amama tabo kiyawao tanalote iba:godolo ebo kolopoligomene, mabu iba:te a:da: elemasigi tabo ma kunu kiyawaonaka, ibi ega:walo a nani wokopi, a bilibilinomate gabo kapiyanomodo atu woko osiyodilonama:

<sup>13</sup> Eiye! Ebe dubate ibi a:ka:tuwa: ibi Kelisokono nani alibolepima: ka:la:minaka, ebema: epo a:da: kemasigilima: ibi a:ka:tuwa: ibi nani alibolepino ololoma: midilina, wiyasiya iba:godolo nanitabo tanalo kitana:, ibino woko osiyodilo magumulo a:da: elemasigi tanalo kawokawonomate ba:pola:na. <sup>14-15</sup> Wiyasiya la:la, ala, ale ibino osiyodilole tanaloma: a:kela:wa:oma:. Numa:la:, Saitanate epo a:da: kemasigiolema: ebe a:ka:tuwa: ebe Godokono wade pukuilame nopodawa idimu midina, ebema: ebena wokopiate ebe eba waloma:tanalo, iba:te atumu me opo epo a:da: kemasigiolema: ibi a:ka:tuwa: ibi Godokono tuputupu okoli wokopimu midilina. Ebema: la:le ibino iyaiya a:da: elemasigi osiyodilole tanalome niyatawala:, ibino uwomu tetelo ibino kuba osiyodilole mabuma: wiya modobonomolo kuwatema:na:

*Polote Kelisokono Nani Alibodawa Idima: Eba Eda:nalo Ebena Woko Osiyodilo Magumulo Kebe Iyaiya Temeteme Duwatanaki*

<sup>16</sup> Ebema: nale dopamo degemo ebe atu tabo walo na:kegemo, modoboa: lumagi idite ebena wokilo na daedale lumaginomoma: midinima:. Eiye, la: epetapiate na ebako lumagima: iyalo da:midina:ima, kuba:, wiyasiya modobola la:le naimano tanaloma: ebe kuba woki eba malagidilole naimano tabo nolowiala:! Me a:da: elemasigi wokopiate ibino iyaiya amama tabo la:tamo keba kunu ka:kiyawaonake, nale naimano nanitabo tanalo kawokalima: na eba kunu daedale amama tabo kapiyakapiya atumu ka:kiyawaomamo. <sup>17</sup> Ebema: nale me tetelo kebe amama tabo da:kiyawaomo, la: niyatawala: ebe tabo nale aimano Kawodawano wokino tanaloma a:ka:kiyawaomo, ao, na wiyasiya me opo epono daedale wokino tanaloma ka:kiyawaomo. <sup>18</sup> Nanitabola, la: magumulo a:da: elemasigi wokopi epetapi bilibilinomate me opo epono wokino tanaloma ibino iyaiya amama tabo kiyawaonaka, ebema: kuba:, na atu tabo kiyawao gabodo ibi kowaloma:talemamo.

<sup>19</sup> Eiye, la: Kolini sosi epate la: a:ka:tuwa: la: mulo wokiagopima: eba gelanalo, la: wiyasiya ebako daedalepino amama tabo olowima: kawonomamo kalakalaonamata! <sup>20</sup> Iyo, eba kunu epetapiate ibino ubilo la:tamo pelamete ibi a:ka:tuwa: ibi nani wokopima: eba pegelalo la: ibi nanitabokobi ebo midilimata. Ebema: ibi magumulo idite la: sosi epate ebena iyaiya ubi tanalo kosiyodilola:ema: la: elawamo danaletia, ega:walo idite a:da: elemasigi gabodo mani la:godone gito duwati, ega:walo idite la: ebena gubi magumamo demagataletia, ega:walo idite la:imano ololo apulo ebe a:ka:tuwa: ebe dadipati, ega:walo idite la: malogolelo ebena tabamo la: dalukoletia, ebe tetelo la: wiyasiya ibi ubia:noma: eda:oa:no ibino osiyodilole tanalo kubama: kegelawea:. <sup>21</sup> Diyala, la:le a nani wokopino tanaloma: ma kunu kubanu da:begelawenama, ale ebako elawo awokalimi tanalo la: magumulo kosiyodilolenakoa: mabu a epono dowa tanaloma: na:toletoleonama:, iyo, la: ebako tabono tanalodo la:imano ubi tanalo da:biyata:wenama, na Polotamo ilipo kikanama:ema:! Wiyasiya numa:la:, na ilipo la:godone a:kelaemo mabu tole tanalote a nani wokopiagodolo kitana:!

Ebema: a:da: elemasigi wokopiate ibino daedale wokilo tolea:no ibino amama tabo kebe iyaiya tanaloma: da:kiyawaonaka, nale me tetelo naimano nanitabo tanalo kawokalima: ebe atu tanaloma: amama tabo la:tamo atumu ka:kiyawaomo. Eiye, me tabo kiyawao tanalodo na

a:ka:tuwa: na daedale lumagi idima: ka:midimamo, wiyasiya kuba:, modobola la: wadenomamo nolowiala!<sup>22</sup> Ebe a:da: elemasigi wokopiate Yu epono kalima epoma: eda:o tanaloma: amamaona, wiyasiya na atumu Yudawama: keda:namo. Ega:walo iba:te Isalaela epoma: deda:ona ebe tanaloma: kamamaona, wiyasiya na atumu Isalaela lumagima: keda:namo. Ega:walo iba:te A:ibalayamakono walone gudima: deda:ona ebe tanaloma: kamamaona, wiyasiya numa:la:, na atumu ebena walone gudu idima: keda:namo.<sup>23</sup> Ega:walo iba:te amama magumulo ibi a:ka:tuwa: ibi Kelisokono wokopima: kegelana, wiyasiya na ebena woko atumu eba kosiyo-dilonalo naimano woko magumulo demaimiya ebe da:imino wade tanalote ibino da:imino wade tanalo nanitabolo nodolina. Eiyee, na niyala! Nale ebe a:da: elemasigipino amama kiyawao tabo waloma:ta tanalodo na a:ka:tuwa: na watoa: daedale lumagima: a:midimo!

Ebema: modobola la: naimano nanitabo wokono iyaiya tanalo wadenomamo niyatawala:, mabu nale Kelisokono woko osiyodilo magumulo naimano wokono elawote ibino wokono elawo kawonomamo odoli. Nanitabola, Kelisoko mabuma: tete bilibilinomo epetapilo epate na kubanu anaginamonenakiya ega:walo gabamaniate na idoko motamo gito iyatininakiya, ebema: ebe netewa tanalodo naimano temeteme tanalate a:da: elemasigi wokopino temeteme tanalo kawonomamo atumu a:kodoiliya. Ebene iyaiya tete epetapilo nale a:e olalati magumamo nanitabolo a:nopeganakimo,<sup>24</sup> ma kunu paibu iyaiya tetelo Yu epate pa:ka:pa:ka: inamabuamo 39 teta:mo na gito a:na:ma:ga:midaonenakiya,<sup>25</sup> ega:walo netewa-kapiya iyaiya tetelo nanitabokobi midia:pi epetapiate na gaubamo anaginamonenakiya, ega:walo tete idilo iba:te na anakapunaema: nokolamo mapenamiya. Ebene netewa-kapiya iyaiya tetelo na epetapiago kawo palai peago eba wapata:lamelo aimano pete obamo gito ololunaki, ega:walo tete idilo mako olalatite da:pi nale kapiya egela ega:walo kapiya idoko kawonomolo kewa: kolomono obote gito wadaudilonenati.<sup>26</sup> Ebene nale Kelisoko mabuma: iyaiya opo bilibilinomodo eba pata:nalo, iyaiya olalati tanalo epetapiate natamo a:pemaimionakiya, iyo, iyaiya ulama obono tanalo, ega:walo piyate wapata:lamepino inamabu iba:godone elawamo duwatanaka ebe pilo dubuno tanalo, ega:walo naimano Yu epo ega:walo Yua:pi epetapi ibino dowo tanalo, ega:walo kebe olalati tanalate kawokawo duliyomololo ega:walo bulu opolo ega:walo kewa: kolomolo demaimiona ebe tanalo, ega:walo piyate a:da: elemasigi gabodo nanitabokobi midipi ekakimu dilukuliona ibino kuba osiyodilole tanalo, me ebe iyaiya olalati tanalo bilibilinomate natamo nanitabonomolo pemaimionakiya.<sup>27</sup> Nanitabola, nale naimano kotamo mibomibo woko eba osiyodilolenalo iyaiya kodakoda tanalo epetapi atumu a:kulamenakimo, ebene tete epetapilo u wata tanalo nale gito anaetoamidanakimo, ega:walo tete epetapilo bae kape tanalo ega:walo obo kape tanalate na unamenakiya, iyo, tete epetapilo nale bae naoa: tanaloma: ega:walo lao motono tanaloma: ega:walo apa:mo pupuliono inamabuno tanaloma: iyaiya modoboa: tanalo nanitabolo iyatawanakimo.

<sup>28</sup> Ebema: numa:la:, makomako iyaiya temeteme tanalate nagodolo eba pola:nalo, naimano kawo temeteme idi atumu ma kunu kitananako, nale opo epetapi bilibilinomono iyaiya sosi epo eba nilakapoilamelolo ibino iyaiya modoboa: tanaloma: nale kawonomamo malagidilolenamo. Iyo, iba:godolo kebe temeteme tanalate demaimionaka nale atu temeteme tanalo bilibilinomo a:kiyatawanakomo.<sup>29</sup> Ebema: ibi magumulo idite elawoa:noma: deda:mene, nale ebe walubima: atumu elawoa:noma: keda:mamo, ega:walo

kebe tetelo idite kuba osiyodilo magumamo da:negamene, nale ebe mabuma: naimano tepo magumulo kawo mibomibo tanalonomo kiyatawamamo.

<sup>30</sup> Ebema: numa:la:, kebe tanalate naimano elawoa: tanalo ega:walo naimano modoboa: tanalo dawokalilamenaka, ebe iyaiya tanalo kapiyama: na amamalo kiyawaonakomo. <sup>31</sup> Nanitabola, aimano Kawodawa Ya:sukono Nabiwi ebe Godotela, ebema: modobola epate ebe uwomua: uwomua: tetelo unamo nadipatenakoma:na:, iyo, ebete naimano tepo magumuno tanalo iyatawala, nale da:kiyawautamo ebe tabo a:da: taboa:. <sup>32</sup> Ebema: modobola la: me tanalo niyatawala:, nale iyalo tetelo Dama:sakase kawo duliyomololo eba okolinalo, ebe opono Kawo Elawodubu Aletasikono tanaloma: ebene opodawa idite ebe kawo duliyomolo watodawama: eba eda:nalo, ebete ebene gowelaopi ebo analiya iba:te na lawenete idoko motamo gito kiyatinima:. Ebene ebe tanalo osiyodiloma: atila:pi epetapiate duliyomolo kalano iyaiya gigiyamo tolamolete nale me duliyomolone nemaiga tanalo eba nemakopelelo, <sup>33</sup> wiyasiya idoko idilo naimano namutupi epetapiate na da:ea magumamo adipininate kala unudo opamo da:nowololuoneniya, nale ebe gabamani dubuno elawo magumune me gabodo gito alaula:niyamo.

## 12

*Polokono Balidite Iyama: Deda:omiya Ebe Tanalo Ega:walo Ebene Kawo Temeteme Tanalo Idima: Tabo Da:kiyawaiya*

<sup>1</sup> Numa:la:, amama tabo kiyawao magumulo wade da:imi idite a:kemaigamene, wiyasiya la:tamo da:pemaimiya ebe a:da: elemasigi wokopino iyaiya amama tabono tanaloma:, modobola amama tabo keba kunula:ka: na atumu ebakobako tabo epetapi la:tamo ka:ka:kiyawaomamo. Ebema: dopamo lumagi idino balidite iyama: eba eda:omelo, Kawodawate kebe iyaiya wadewade tanalo ebe kiyatumiyale, nale me tetelo ebe tanalo la: kanalemamota. <sup>2</sup> Iyo, na ebe dubuno tanalo iyatawanomola, ma kunu ebetamo anoano tanalote demaigiya ebe tetene wagilimite me teta:mo pemaiga 14 ulama a:petoi. Ebema: ebe dubuno balidite iyama: deda:omiya ebe tanalo ebe ma kunula, ebete Kelisoko magumulo eba okolinalo, tete idilo Godote ebe ebene Ununomo Duliyomolamo magatate ebe ebamo gito nowodimiya. Wiyasiya numa:la:, ebe tetelo ebete ebene apa:go Unu Duliyomolamo da:nodoliyale o ebene uliyana kapiyate da:nodoliyale, na ebe tanalo nanitabolo iyatawa:, Godoko kapiyate iyatawala. <sup>3-4</sup> Ebema: nale atu tabo walo na:kegemo, na iyatawala Godote ebe dubu ebene Kalakala Duliyomolamo nanitabolo emagatiya, wiyasiya na iyatawa: ebete ebene apa:go ebamo da:nodoliyale o ebene uliyana kapiyate da:nodoliyale, mabu ebe tanalo Godoko kapiyate iyatawala. Ebene ebe tetelo Unu Duliyomololo ebetamo demaigiya ebe tanalo ebe ma kunula, ebe dubute iyaiya kawokawo anoano tanalo epetapi ebo olowiya, iyo, me opo epate ebe tanalo ibino tabamo awokalilaema: ka:modobona: ega:walo iba:godolo talena bitana ebe tanalo kiyawaoma:.

<sup>5</sup> Ebe mabuma: ebe dubuno tanaloma: amama tabo keba kunula:ka: nale ebako tabo eba kiyawaolo, wiyasiya naimano tanaloma: amama tabonomo idi kiyawaoa:no, kebe tanalate naimano elawoa: tanalo ega:walo naimano modoboa: tanalo dawokalilamenaka, ebe iyaiya tanalo kapiyama: kiyawaonakomo. <sup>6</sup> Numa:la:, nale naimano woko osiyodilo tanaloma: amama tabo kiyawaoma: ubi nanitabolo niyatitaleka:, nale daedaledawanomoma: a:keda:na: mabu naimano iyaiya tabote nanitabonomoma: beda:ona:. Wiyasiya na a:ka:tuwa: naimano tanaloma:



amama tabonomo a:ka:kiyawaomo, mabu na ubia:nola lumagi idite ebako amama tabo olowi tanalodo na unamo adipanatenema:! Modobola nale woko osiyodilo magumulo kebe tanalo kosiyodilolenakomo ega:walo kebe tabo ka:kiyawaonakomo, epate ebe tanalo kapiyado naimano nanitabo tanalo wadenomamo nelaema:na:, amama tabo kiyawao tanalodoa:.

<sup>7</sup> Numa:la:, kebe dubuno balidite iyama: eda:ome tanaloma: da:kiyawaomo, na ebe ebe dubula, wiyasiya ebe tetelo nale kebe anoano tanalo kawokawo kulamiyamo, Godoko ubia:nola nale ebe iyaiya tanaloma: amamama:. Ebe mabuma: ebete tete idilo Saitanatamo modobo tabo kiyawaiya, ebete ebena kuba osiyodilo nopodawa idi natamo eba palibolo ebete natamo temeteme kawonomo idi kikanamenakoma:, iyo, ebe temeteme naimano ape magumulo tete geyageyanomolo kitanamene nale amamakapoma:. <sup>8</sup> Ebema: netewa-kapiya iyaiya tetelo nale aimano Kawodawa na:toweomenakimo, ebete ebe temeteme tanalo nagodone kowagalima:, <sup>9</sup> wiyasiya ebete naimano tabo eba wiyalo negiya, “Ao, a:kowagalimo. Nale a:ma:tamo kebe nilakapo tanalo kawokaliminamo, ebe nilakapo tanalote a:imano temeteme magumulo a:ma: ba:modoboiminakoma:ta. A:ma: numa:, kebe lumagite ebena elawoa: tanalo kuminale, naimano elawote ebe magumulo naimano wade woko nanitabonomolo kopoliyamene.”

Ebema: Kolini sosi epala:, nale naimano iyaiya elawoa: tanaloma: kawo kalakalanomo eba lawelo amama tabo nanitabolo ka:kiyawaomamo, mabu na iyatawala ebako elawoa: tanalote nagodolo eba itanalo, Kelisokono elawote na magumulo kebe woko kosiyodilonale, epate ebe wade tanalo ebo kuima:na:. <sup>10</sup> Ebema: nanitabola, Kelisoko mabuma: naimano ape magumulo da:pola:na ebe elawoa: tanalo, ega:walo epetapiate na malogonelo iyaiya tabo degelana ebe tanalo, ega:walo nale iyaiya kodakoda tanalo magumulo dokolinamo ebe tanalo, ega:walo epetapiate gowelao magumulo temeteme natamo dikanamena ebe tanalo, ega:walo iyaiya olalati tanalo epetapi atumu, ebe tanalo bilibilinomate natamo eba pemaimionalo na kalakala kapiya belawenakomo, mabu kebe tetelo nale naimano elawoa: tanalo dulamenakomo, ebe tetelo nanitabo elawo tanalote na magumulo woko bosiyodilonakomene.

### *Polote Kolini Sosi Epono Tanaloma: Ebena Woki Bilibilima: Eda: Tanalo Dawokalimiya*

<sup>11</sup> Nanitabola, Godote na walubinia:notaleka: na magumulo wade tanalo idite a:kitanana:. Ebe mabuma: naimano amama tabo kiyawao magumulo na a:ka:tuwa: na daedale lumagima: a:midimo, wiyasiya numa:la:, nale gabo idi nanitabolo kumia: la:imano kuba wokino iyaiya tanalo la:tamo kawokalilaema:. Iyo, la:le la:imano nanitabo wokilo naimano woko osiyodilo tanaloma: na nemoiona:wetaleka:, nale amama tabo la:tamo a:ka:kiyawaona:. La: wiyasiya na moionea:no a:da: elemasigipi epetapino woko ununomamo adipatelo ibi Kelisokono iyanomo nani alibolepima: ka:la:minamata. Eiye, numa:la:!  
<sup>12</sup> Iyo, Godokono elawo kawokalima: nale tete epetapi bilibilinomolo ebena iyaiya anoano tanalo la: magumulo eba osiyodilolelo, na kapiya tete idilo ebe woko kosiyodiloma: ubia:noma: keda:nakia:. Numa:la:, ebe anoano osiyodilole tanalate naimano tanalo ma kunu awokalimina, nale Kelisokono nani alibolepi

magumulo idima: nanitabolo eda:namo. <sup>13</sup> Wiyasiya diyala, la: epetapiate ma kunu da:begetawenama, nale la: Kolini sosi epatamo wade walubi kiyatia: Eiye, nale iyaiya sosi magumulo woko eba osiyodilonalo kebe walubi tanalo iba:tamo kikalamenakomo, ebe tanalo bilibilinomo magumulo nale wade tanalo kapiya idi la:tamo osiyodiloma: kamoeda! Nale kapiya tanalonomo la:tamo kosiyodilonakia:, ebe tanalo ebe nale naimano modoboa: tanaloma: la: manima: kanaletanakia:! Wiyasiya diyala, la: epetapiate daedale woki lawa:wete la:imano wade osiyodiloa: tanalo naimano kuba osiyodilo tanaloma: da:ba:mida:ema, ebema: la: ubila:ka:, la:le la:imano kuba naimano kubama: eba gelalo, nale la: ba:ka:toweolametama la:le ebe kuba kegebolenama:ema:? Eiye, ebe daedale wokino tanaloma: nale la: a:ka:toweolametama mabu nale kuba la:tamo kosiyodiloa:!

<sup>14</sup> Nanitabola, me tetelo nale la:tamo walo ka:ka:pema: nolosiyodilomo, iyo, nale la: walo da:ka:pulametama, me netewa-kapiya tetema: keda:mene. Wiyasiya naimano pe tanaloma: kuba woki idi akolawa:la:, mabu nale naimano modoboa: tanaloma: la: manima: akapanaletama. Ao, na ubia:nola la:imano inamabu ega:walo mani puwatema:, na wiyasiya ubi kawonomola la: nilakapolo ka:powalubilitama:. Numa:la:, Godokono ubi tanalote a opo epatamo ma kunu itana, kebe tetelo egege guda:te ibino nabila menokobila walubilia:pima: deda:ona, kuba:, wiyasiya nabila menokobila iba:te tete bilibilinomolo ibino guda:tamo wadewade walubi tanalo nalomonakoma:na. <sup>15</sup> Ebema: nale la: mabuma: naimano mani ega:walo inamabu bilibilinomo dopoliyalemo, ega:walo la: kowalubilitama: nale naimano igilo iyabaiamo gito diyatimo, nale kawonomamo kekalakalamamo. Iyo, nale kebe nilakapo tanalago la: demalagidiloletanama, ebe nilakapo beda: kawonomola:ka:, wiyasiya la:imano nilakapo natamo keba kunu kitanale? Da:pesoma: deda:nale!

<sup>16</sup> Ebema: la: bilibilinomo iyatawalata, nale kebe tabo ka:kiyawaomo ebe tabo nanitabola, ma kunu nale kapiya tete idilo la: manima: kanaletia:! Wiyasiya diyala, la: epetapiate naimano tanaloma: kuba tabo idi ma kunu da:begetaema, “Polokono a:da: elemasigi mulo woki gabodo ebete a ebena guba:mo emagatai!” <sup>17</sup> Eiye, nale kebe wokopi bilibilinomo la:tamo dopamo dapalibolenakimo, ibi atumu ibi magumulo idi kapiyate wade tanalo idi la:godone a:da: elemasigi gabodo laema: woki ka:piyatia:! <sup>18</sup> Ega:walo numa:la:, nale dopamo Taitasiko la:tamo paliboma: eba analo ebe ega:walo nanitabokobi mididawa ekawi ida:go la:tamo dapalibolimo, ebete la:tamo pemaigate a:da: elemasigi gabodo la:godone beda: wade tanalo ka:pelawile? Eiye! La: iyatawalata ebena tanalo, ebe ega:walo na, a woko osiyodilo magumulo aimano tepo magumuno woki kapiyanomoma: eba eda:onalo, ale atu agowa bobodo tuputupulo wapata:nama:.

<sup>19</sup> Ebema: a piyate Godokono nani wokopima: deda:onama:, ale me leta magumulo kebe iyaiya tabo ka:kiyawaonapema:, diyala, la: epetapiate ebe taboma: ma kunu da:bemalagidiloma, epetapiate a kuba osiyodilolepima: eba gelalo, ale ibi tolelamelo la:imano ololo apulo a a:ka:tuwa: a kuba osiyodiloa:pima: ebema: gelanama:. Ao, eba kunua:! Ale Godokono ololo apulo eba lamota:onalo, lumagi idi tolemea:no Kelisokono wokino tabo kapiya kiyawaonakoma:, iyo, a ubila ale aimano tabo bilibilinomamo la: nanitabokobi midi magumulo ka:kodakodailametama:, mabu la: aimano wadewade namutupilata. <sup>20</sup> Numa:la:, naimano woki bilibili tanalote ma kunu itana, nale la:tamo pete la:imano iyaiya osiyodilole tanalo da:pulamelelametama, ebe tetelo diyala, naimano kalakalate la:tamo da: a:kitanamene. Ebene ebe tetelo nale naimano ubia: tanalodo kebe tanalo

la:tamo da:posiyodilolemo, diyala, ebe mabuma: la: epetapiate natamo atumu da: a:kekalakalaema.

Iyo, woki bilibili tanalote nagodolo bitana, mabu na ubia:nola la:godolo makomako kubakuba tanalo pulaema: — apaminateui tanalo, ega:walo epetapino inamabuma: dowo tanalo, ega:walo tepo magumulo elate samamo maiga tanalo, ega:walo lumagite ebe a:ka:tuwa: ebe kapiya malagidilo tanalo, ega:walo epetapi malogole tanalo, ega:walo epetapino tanaloma: tabo gela tanalo, ega:walo amama tanalo, ega:walo iyaiya utitata tanalo. <sup>21</sup> Iyo, na iyatawala la:le kebe kawokawo kuba dopamo kosiyodilola:wenakima, la: magumulo epetapi bilibilinomate ebe kuba magumune Godotamo nanitabolo kolobila:oa:, ma kunu kamiyale pilo ega:walo buwelemele pilo tanalo, ega:walo tepo magumuno kuba daleywa woki awokalilame tanalo, ega:walo buwelemela:tamo kateneno kuba ubi tabo gela tanalo, ebako iyaiya kuba la: epetapiate nanitabolo ka:miyapawea:. Ebema: naimano woki bilibili tanalo bitana, mabu nale la:tamo walo da:ka:pemo, ebe tetelo diyala, nale la:imano kuba osiyodilole tanaloma: kawonomamo da:ba:piimo, iyo, la:imano ololo apulo naimano Godote ilipo natamo eba kunu da:bikanaemene.

## 13

### *Polote Leta Uwomu Apulo Iyaiya Walubi Tabo Elawamo Da:kiyawaiya*

<sup>1</sup> Iyo, nale la:tamo walo da:ka:pemo, me netewa-kapiya tetema: keda:mene. Ebema: me tanalo idila, Godokono Bukate a niyatuamena, kebe tetelo nanitabokobi mididawa idite a:ka:tuwa: pete lumagi idino osiyodilo tanalo kubama: da:pegemene, ale ebena tabo a:kolowima:, wiyasiya netewa o netewa-kapiya epate ebena kuba tanalo dapawokalima:na:, ebe tetelo ale ebetamo kuba wiya kikaemalema:. <sup>2</sup> Ebema: la: piyate dopamo iyaiya kuba dosiyodilola:wenakima, ega:walo la: piyate me tetelo kuba dosiyodilola:wenakoma, na pea:no la: bilibilinomo dopamo kawiya ma kunu analemata, nale da:pemo la: kuba osiyodilolepi bilibilinomatamo la:imano kuba wiya ka:pikalamolemamota. Numa:la:, nale dopamo da:pimo, ebe tete ebe naimano netewa tetema: edi, piyate ebe tetelo kuba osiyodilole magumulo da:pola:niya, nale ibi me atu tabamo kawiya ebo panalimo.

<sup>3</sup> Eiyee! Nale la:go luta:no tetelo la:le ma kunu a:kiyawaimata, ale Kelisokono elawo Pologodolo nanitabolo duima: ebe nani wokodawama: ebo kegelamalema:. Ebema: tete tatalila, la:le naimano tanalo ma kunu nanitabolo kuimamota, naimano tabo kiyawao tanalodo Kelisote a:ka:tuwa: la: kawiya ebo kanalema:ta, iyo, ebete la: magumulo ebena woko ebena elawo kawonomamo eba osiyodilonalo la:tamo kuba wiya ikalaema: elawoa:noma: keda:na:! <sup>4</sup> Numa:la:, dopamo Kelisote ebe a:ka:tuwa: ebe elawoa:dawama: da:midiya ebe tetelo kuba osiyodilolepiate ebe kewa olotolowamo tupuguimite ikoko ebo alukolemiya, wiyasiya kalakala kawonomola, me tetelo ebete Godokono elawamo igilolo okolina. Ebema: nanitabola, Kelisote dopamo elawoa:noma: keba kunu kediya, a ebena nani wokopiate atumu elawoa:noma: eda:onama:, wiyasiya ale ebe magumulo eba ilukulinalo Godokono elawo ebo kelaemalema:, ale la: mabuma: iyaiya woko wadenomamo kosiyodilolenama:.

<sup>5</sup> Ebema: modobola la: a:ka:tuwa: la:imano iyaiya tanalo wadenomamo nulamenala:, mabu diyala, la: nanitabokobi midi magumulo da:bilukula:wenama o da: kilukula:wena:. La: iyatawalata, la: piyate nanitabokobi midi magumulo dilukula:wenama, Ya:su Kelisote la: magumulo nanitabolo bokolina, a, nanitabola:ka? Wiyasiya numa:la:, la: piyate

nanitabokobi midi magumulo ilukulina:na, la: niyanialata! <sup>6</sup> Ega:walo na ubila la:le aimano tanalo atumu wadenomamo na:kulamenala:, mabu ebe tanalodo la: kiyatawaomamota, a piyate Godokono nani wokopima: deda:onama:, ale nanitabokobi midi magumulo nanitabonomolo bilukulinama:.

<sup>7</sup> Ebema: ale Godoko toweomenakoma: la:le la:imano osiyodilole tanalo bilibilinomo magumulo kuba kapiya idi osiyodilokapoma:, mabu a ubila la: Godokono umi magumulo iyaiya tuputupu tanalo kapiya osiyodilolema:. Wiyasiya numa:la:, la:le tuputupu osiyodilole tanalo magumulo nanitabolo dilukula:wenama, a ubia:nola epate la:imano ilukuli tanaloma: a unamo wadipaeatema:, ao, iba:te daedale wokilo la: wadewadepima: eba gelalo wiyasiya a kubakubapima: da:kegelama:na:, ale kegelamalema: ebe tanalo ebe kawo tanaloda:. <sup>8</sup> Nanitabola, Godokono nani tabo kiyawao woko osiyodilo tanaloma: ale odiyobo tanalo idi kosiyodiloma: ka:modobona:, mabu ebete modobo elawo atamo nikaeamena ale kapiya tanalonomo kosiyodiloma:, ebe tanalo ebe ale ebeno nanitabo tanalo dawokaliminakoma: ebe tanalola. <sup>9</sup> Numa:la:, kebe tetelo ale aimano elawoa: tanalo eba iyatawaolo wiyasiya la: nanitabokobi midi magumulo elawoelawopima: eda:olo dulametana, ebe tetelo aimano kalakalate nanitabolo bitana, iyo, ale Godoko toweomenakoma: ebeno walubi tanalodo la: nanitabokobi midi magumulo kodakodalo walo ka:kelamota:wenama:.

<sup>10</sup> Ebema: kawo tanalonomo ebe ma kunula, nale la:godone mululo eba okolinale me leta osiyodilote la:tamo palibomo, mabu na ubia:nola nale da:pemo ebe tetelo nale la:imano iyaiya kuba osiyodilole tanaloma: la: elawamo eba panalelo kuba wiya la:tamo gito ka:pikalametama:. Ebema: na pea:no modobola la: dopamo la:imano kuba osiyodilole tanalone nolobila:oala:, ebene Kawodawate kebe elawo natamo dikanamiya, nale ebe elawamo la:imano nanitabokobi midi magumulo la: ka:pekodakodailaemamota. Nanitabola, ebete elawo natamo kikanamia: nale la:imano nanitabokobi midi tanalo ka:kubailaema:.

*Polote Iyaiya Uwomu Nilakapo Tabo Da:kiyawaiya*

<sup>11</sup> Ebema: naimano nanitabokobi midipi ekiala:, me leta uwomu apulo nale la:tamo yawo tabo kiyawaomo. Modobola la: la:imano woki kawonomamo niyatinakiyala:, la:le la:imano nanitabokobi midi magumulo kodakodalo walo ka:kelamota:wenama:. Ega:walo la:le nigologolopi kowalubila:ema: nale la: danaletama, modobola la: ebe tabamo na:tudilaoala:, ebene woki kapiyama: eba eda:olo wade milo magumulo nilukulinala:. Ebema: la: eba kunu eba ilukulinalo, potele nilakapo tanalo ega:walo milo tanalo epatamo dikalamena, ebe Godote la: magumulo bokolinamene.

<sup>12</sup> Modobola la: daladabuta:ema la: bilibilinomo epetapiate epetapino koto uwateuilo na:wiyamidauiyala:. <sup>13</sup> Godokono epate malo dilukulina, ibi bilibilinomate ibino nilakapo tabo la:tamo palibola:.

<sup>14</sup> Modobola Kawodawa Ya:su Kelisogodone demaigana ebe nilakapo tanalo, ega:walo Godogodone demaigana ebe nilakapo kimalagidilo tanalo, ega:walo Wade-talena Uliyanagodone demaigana ebe kalakalago kapimiya ilukuli tanalo, ebe tanalate la: bilibilinomagodolo na:pola:nama:na:. Me ebe naimano tabo uwomula. Taula.

## POLOTE LETA GALESIYA Opono SOSI EPATAMO OSIYODILIYA

<sup>1</sup> Na ebe Polotela, Ya:su Kelisote ebena sosi wagilima: iyaiya opamo daliboliya, ebe wokopi magumulo na idila, iyo, potele ebe a:e magumune dadipatiya, ebe Nabiwi Godote eba:go na ebe woko kosiyodilonama: eka:na:miya, lumagi idino ubi tanalodoa: <sup>2</sup> Na ega:walo nago dilukulina ebe nanitabokobi midipi ekaki, ale la: piyate Galesiya opono iyaiya sosi epoma: deda:wenama, ale me leta la: bilibilinomatamo paliboma:

<sup>3</sup> Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta.

<sup>4</sup> Nanitabola, Kelisote aimano Nabiwi Godokono ubi tanalamo tuduwat-alo aimano kuba osiyodilole mabuma: ebena igilo iyabaiamo iyatiya, ebete a me opono kawokawo kubano elawo magumune kowagaima:.

<sup>5</sup> Ebema: modobola Godogodolo amama tanalote uwomua: uwomua: tetelo nitanamene. Me tabo nanitabonomola, taula!

### *Godokono Wade Tabote Igilo Mula: Gabo Kapiyanomo Awokalimina*

<sup>6</sup> Me tetelo nale la: mabuma: kawonomamo nela:wa:namo, mabu la:le igilo mula: gabo idino a:da: tabo dolowiaima, ebema: la:le Wade Tabone olobila:wete potele Kelisokono nilakapo tanalodo la: deka:la:mitia, ebe Kawodawa samonomamo atepama: wagenamata. <sup>7</sup> La: wadenomamo nolowiala:, igilo mula: gabo idite nanitabolo kitana:! Wiyasiya epetapiate Kelisokono Wade Tabo kubaima: eba wagenalalo, iba:te iya gabo idima: tabo kiyawaote woki bilibili tanalo la:tamo ebema: ikalamenata.

<sup>8</sup> Eiye! Nale dopamo tetelo kebe Wade Tabo la:tamo da:pa:kiyawaimo, potele ebe tabo iyakobi midite igilo mula: gabo idi dawokalimene, modobola Godote ebe Saitanakono Ela Opamo gito nalibomene! Ebene Unu Duliynomolono nopopi magumulo idite ebe atu kawo kuba tanalonomo dosiyodilomene, iyo, na atumu, modobola aimano kuba wiyate eba kunu atamo atumu na:ka:pemene. <sup>9</sup> Ebema: ale dopamo la: kebe tanalo ka:kiyawaolametia, nale ebe atu tanalo la: walo ma kunu kanalemata, la:le dopamo kebe Wade Tabo kelawa:ima, potele ebe tabo iyakobi midite iya igilo mula: gabo idi dawokalimene, modobola Godote ebe Saitanakono Ela Opamo gito nalibomene!

<sup>10</sup> Numa:la:, me tabo kiyawao magumulo nale opo lumagi idi kalakalaima: kowagelena:, ega:walo nale lumagi idigodolo na moione tabo olowima: ubi kiyatina:. Ao, eba kunua:, Godote naimano tanaloma: dekalakalana, nale ebe ubi kapiyamo iyatinamo! Nanitabola, dopamo nale me opo epo epetapi bilibilinomo kalakalailaema: wagenaimo, wiyasiya me tetelo na modoboa: eba kunu wagenama: mabu nale woko Kelisoko kapiyatamo osiyodilonamo, lumagi iditamo:.

### *Polote Iyaiya Opolo Sosi Wagilimi Woko Osiyodiloma: Godote Ebe Keba Kunu Keka:miyale*

<sup>11</sup> Naimano nanitabokobi midipi ekakiala:, na ubila la: me tanalo idi wadenomamo niyatawala:, nale kebe Wade Tabo ka:kiyawaonakomo, ebe Tabote opo lumagi idino wokino tanalome kemaigiya:. <sup>12</sup> Iyo, nale ebe Tabo me opo epo magumulo iyatulamedawa idigodone kelawiya:, wiyasiya



nanitabola, Ya:su Kelisote a:ka:tuwa: ebe Tabo natamo ikanamete ebenu magumu ebo awokalimiya.

<sup>13</sup> La: dopamo me tanalo olowimata, naimano tagala okoli magumulo nale Godoko amamatema: Yu epono osiyodilole tanalo bilibilinomo keba kunu kowaloma:talenakimo. Numa:la:, ebe tetelo nale Yu watowatopi epetapiago Godokono nani sosino epo kubanomamo kubailaema: kawokawo teme-teme iba:tamo nanitabonomolo ikalamenakima:. <sup>14</sup> Ega:walo naimano Yu epo epetapiate Godoko amamatema: nale ibino osiyodilole magumulo ibi eba iyatulamenalo ibi magumulo kawodawa idima: ebo ediyamo, mabu nanitabola, a Yu epono ewoniate atamo kebe iyaiya pukala kikaemiye, nale ebe pukala bilibilinomamo tuduwatalo elawonomoma: eba eda:nalo, naimano elawo tanalote naimano apegabo dubu bilibilinomono elawo gito nodoiliya.

<sup>15</sup> Wiyasiya kalakala kawonomola, nale naimano menokono tepone awokala:no, dopamo Godote ebenu nilakapo tanalodo na ka:na:mite ebo laweniya, nale walone tetelo Yu epono osiyodilole tanalo magumune pemaigate ebenu nani woko kosiyodilonama:. Ega:walo nale ibino osiyodilole magumulo eba okolinalo, ebete atu ubi tanalo walo ma kunu kiyatiya, <sup>16</sup> ebenu Guduno tanalo natamo awokalimite, ebenu nale tote Yua:piatamo Wade Tabo eba na:kiyawaolo iba:te ebenu tanalo atumu wadenomamo kiyatawaoma:. Ebenu ebe tanalote natamo da:pemaigiya, nale naimano namutupi magumulo lumagi iditamo ka:tiya:, nale keba kunu ka:nosiyodilomo ebe woki ebegodone ka:nelaema:. <sup>17</sup> Ega:walo Yelusalema kawo duliyomololo dilukulionamiya, nale ebe Ya:sukono alibolepi epetapino woki laema: iba:tamo atumu ka:tiya:. Iyo, na iyatawiyamo Ya:sute na ka:na:mia:no ebete ebe dubu dopamo eka:la:miya, wiyasiya nale iba:tamo nemaiga:no Ala:biya bulu opamo tote, na a:ka:tuwa: ebenu nokoliatepate ebenu Dama:sakase kawo duliyomolamo walo gito kolowamiyamo.

<sup>18</sup> Ebenu netewa-kapiya ulama da:petoiya, ebe tetelo nale Pitago tabo gelama: Yelusalemamo tote eba:go netewa wuika:mo eba nokoliatepalo, <sup>19</sup> wiyasiya alibolepi dubu epetapi magumulo nale idi kapiyanomo ebo numiyamo, ebe dubu ebe Kawodawa Ya:sukono ekawi Ya:imesitela. <sup>20</sup> La: nolowiala:, nale me leta magumulo dawokalimo ebe tabo nanitabonomola, iyo, Godoko iyatawala na a:da: tabo ka:kiyawauta:.

<sup>21</sup> Ebenu nale Yelusalemane samamo walo ka:pete, Siliya opo ega:walo Silisiya opamo gito nemaigiyamo. <sup>22</sup> Me mabuma: kebe sosi epate Yudiya opono iyaiya duliyomololo dilukulionamiya, ebe Kelisoko nanitabokobi midipiate na ibino balida:mo unamea:no naimano tanalo ebe mabuma: wadenomamo kiyatawaiya:. <sup>23</sup> Wiyasiya iba:te epetapino tabo gela kapiya ma kunu olowiya, “Dopamo kebe dubute a nanitabokobi midipi kubaiaema: kawokawo temeteme atamo dikaeamenaki, ebete me tetelo tabo a:kiyawaonako epo bilibilinomate Ya:suko nanitabokobi ka:midima:!”

<sup>24</sup> Nanitabola, iba:te ebe tabo olowite naimano tanaloma: Godoko ebo moiya.

## 2

### *Polote Yelusalema Kawo Duliyomololo Alibolepi Dubu Epetapiago Dalad-abutiya*

<sup>1</sup> Ebenu <sup>14</sup> ulama da:ka:petoi, iyalo ulamalo na Taitasiko lawete Banabasiko ebana Yelusalemamo walo na:ka:timo, <sup>2</sup> mabu Godote ebenu ubi natamo awokalimi nale ebe tanalo kosiyodiloma:. Ebenu nale sosi

kawokawo watowatopi kapiyago eba naladabutilo, na Wade Tabono tanaloma: kebe iyaiya tabo Yua:piatamo ka:kiyawaonakomo, ebe tanalo iba:tamo ebo awokalilaimo. Nanitabola, nale ebe tanalo nosiyodilimo, mabu na ubia:nola kebe da:ima:te naimano kodakoda woko magumulo Yua:piagodone da:pemaimiya, iba:te ebe da:imi kubakubadopoma: gelama:. <sup>3</sup> Ebene iba:te naimano tabo olowiote, na walubinidawa Taitasikono tanaloma: iba:te nago woki kapiyama: ebo eda:iya, ma kunu ebe Yua:dawama: eba eda:nalo, talena puliyala ebete Yu dubuno tama itamida pukala lawea:noma: eda:lo Godokono woko nago kapimiya kosiyodilonama:. <sup>4</sup> Wiyasiya aimano aladabuti baiamo piyate a:da: elemasigi gabodo da:pelamiya, ibi a:ka:tuwa: ibi nanitabokobi midipi ekakima: eba ka:la:milo ebo geliya, ebete tama itamida pukala nelaemene. Eiyee! Ebe dubate kuba woki gabodo ago paladabutiya, a piyate Yua:pi magumulo woko dosiyodilonama: aimano osiyodilo tanalo kubama: kegelama:, ebema: a Ya:su Kelisoko magumulo Mosesekono Totomu Tabono mibomibo magumune da:nemaima:, iba:te ebe tabo olowiote ubi ebo iyatiya Totomu Tabono ala:mo a walo ka:kematuoamoema:. <sup>5</sup> Wiyasiya iba:te Taitasitamo osiyodiloma: degeliya, ale ibino ubi tanalamo tudila:oa:no aimano wokilo tete da:pesolo woki netewama: keda:oa:, iyo, ale la: Yua:pi nanitabokobi midipi mabuma: ibi ebo odiyobolima:, iba:te Wade Tabono nanitabo tanalo kubaimikapoma:.

<sup>6-8</sup> Ebe tetelo aimano taneba magumulo piyate watowatopima: deda:iya, iba:te wiyasiya naimano wokono osiyodilole tanalo bilibilinomo olowiote modoboma: geliya. Iba:te me tanalo iyatawaiya, Godote iyalo tetelo natamo Wade Tabo Yua:piatamo kiyawao woko dikanamiya, dopamo ebete Pitatamo Wade Tabo Yu epatamo kiyawao woko keba kunu kikamiyale eba kunu. Nanitabola, Godote kebe elawamo Pitako Yu epatamo alibodawama: ka:midiyale, ebete ebe atu elawamo na Yua:piatamo alibonedawama: a:ka:midiniya, ebema: ebe watowatopiate naimano woko tanaloma: modoboma: gelate iya gabo idido kosiyodiloma: na kananea:. Wiyasiya numa:la:, iba:te naimano woko kubama: negelataleka: nale ebe tanaloma: woki bilibilima: a:keda:na:, mabu me opo epate kebe epo kawokawopima: degelana, Godote ebe dubu unu nikapiamo kulamena: wiyasiya ebete tepo magumamo ulamena.

<sup>9</sup> Ebene Ya:imesiko, Pitako, ega:walo Yoneko iba:te ebe tanebapino umi magumulo kawokawo watowatopima: eba eda:onalalo, iba:te naimano wade wokonomo Godogodone pe tanalo diyatawaiya, ebe tetelo iba:te na ega:walo Banabasiko aimano koto uwateuilo ale kapimiya tabo ma kunu gelima:, na Banabasiago woko Yua:pino iyaiya opolo eba osiyodilonalo, ibi wiyasiya woko Yu epono opolo bosiyodilonama:na:. <sup>10</sup> Ebene ale kapiya tanalo idi osiyodiloma: iba:te a ebo anaiya, ma kunu Yu epo magumulo piyate nigologolopima: deda:ona, ale Yua:pi nanitabokobi midipi kananalema: iba:te ebe epo nilakapo mani alomo tanalamo kemalagidilolenakoma:, wiyasiya numa:la:, ibino tabo olowia:no nale ebe tanalo osiyodiloma: na a:ka:tuwa: naimano ubi dopamo iyatimo.

*Polote A:ntiyoka Kawo Duliynomololo Pitakono Kuba Osiyodilo Tanaloma: Ebe Kawiya Daniya*

<sup>11</sup> Ebene egela bilibilinomo epetapi da:petoiya, tete idilo Pitate A:ntiyoka kawo duliynomolamo pemaigate kuba tanalo idi Yua:pi nanitabokobi midipi ekakiatamo da:posiyodili, na ebema: sosi epono ololo apulo ebe kawonomo animo. <sup>12</sup> Iyo, ebete ago da:pokoliyatepi, egela epetapilo ebete

Yua:pi ekakiago bae kapimiya kalakalago enaonaki. Wiyasiya Ya:imesite Yu dubu epetapi Yelusalemane dapaliboli, Pitate ebo iyatawi ibi piyate tama itamida pukala lawea:piago pola:nama: talenama: degelana ebe dubula, ebema: ebete ibino ubia: tabo gela tanaloma: eba toletolelo Yua:piago bae nao ebo atepi. <sup>13</sup> Ebene A:ntiyoka duliynomololo dilukuliona, ebe Yu ekaki epetapi Banabasiko ebana, iba:te Pitakono osiyodilo tanalo umite tola:go atu kuba tanalo ebo kosiyodiliya, iyo, iba:te Yelusalema duliynomolo dubuno ubia: tabo gela tanaloma: toletoleote bae nao magumulo ibino Yua:pi nanitabokobi midipi ekaki gito miyapiya.

<sup>14</sup> Ebema: Wade Tabote ale osiyodiloma: keba kunu kanaenale, iba:te ebe nanitabo tuputupu gabo datepiya, nale ebe tanalo eba umilo ibi bilibili-nomono ololo apulo Pitako kawiya ma kunu animo, “A:ma: Yu lumagima: eba eda:nalo, wiyasiya Yelusalema epo pelamea:no a:ma: Yua:pino iyaiya tanalo iba:go kalakalago osiyodilolenakiyata. Eiye, me wade osiyodilo tanalola! Ebema: mabu keleka: a:ma: me tetelo ebe wade osiyodilo tanalo atepawete temeteme Yua:piatamo dikalama:wena, ma kunu iba:te a Yu epono ewonino osiyodilole tanalo waloma:talea:no a:ma: iba:go walo a:ka:luawitamene?”

*Yu Epo Ega:walo Yua:pi Iba:te Nanitabokobi Midi Tanalo Kapiyado Ibino Igilo Mula: Tanalo Kelaema:na:*

<sup>15</sup> Ebema: a piyate Yu epo magumune dawokalaliyama:, a me tanalo nanitabolo iyatawala, a la: Yua:pi keba kunula:ka: eba kunua:, mabu la:imano epo epetapi bilibilinomate Godokono nanitabo gabo iyatawa:noma: eba eda:onalo kawokawo kuba ebo osiyodilolenaka.

<sup>16</sup> Wiyasiya a nanitabokobi midipi bilibilinomate iyatawala, lumagite Ya:su Kelisoko nanitabokobi da:midimene, Godote ebe tanalo kapiyado ebe tuputupudawama: keka:imene, ebete Mosesedo epatamo dikalamiya ebe Totomu Tabamo tuduwata tanalodoa:. Iyo, me mabuma: a Yu epo ega:walo la: Yua:pi, a bilibilinomate Kelisoko nanitabokobi midi gabodo tuputupupima: eba eda:onalo ebo gelanama:, gabo idi kitana: lumagite Godokono Totomu Tabamo tuduwata tanalodo ebeno tuputupudawama: keda:ma:.

<sup>17</sup> Ebema: diyala, daedale wokiagodawate ma kunu da:begemene, “La: nanitabokobi midipiate Kelisoko magumulo Godokono tuputupupima: eda:oma: eba gelalo, wiyasiya la:le Mosesekono Totomu Tabo epetapiamo ka:tudila:wena:. Ebema: numa:la:, Kelisote la: elawokobi midilinata la:le la:imano tudila:oa: tanalodo ele gabo kodida:ema:, kawokawo kuba osiyodilolepiate keba kunu kodidinake eba kunu!”

Na wiyasiya ebetamo tabo ma kunu kegemamo, “Ao, a:ma: daedale wok-ilo geata! <sup>18</sup> Godote Mosesedo atamo dikaeamiya, nale ebe iyaiya Totomu Tabo kodakodanomolo walo a:kuwatemo. A:ma: numa:, ebete naimano nanitabokobi midi tanalodo na kebe tanalo kodakodalo laema: kubama: gelo diyatunamiya, nale ebe tanalone olobigate ebene woki iyakobi midite ebe atu tanalo walo da:kelaemo, Godokono umi magumulo na ebe kawo kubanomo ebetamo kosiyodilomamo.”

<sup>19</sup> Nanitabola, Godokono Totomu Tabono tanalate na niyatunamena, na a:ka:tuwa: naimano elawamo ebeno ubi tanalamo tuduwatama: mod-ooa:. Ebema: na ebe Totomu tanalono elawo magumune nemaigate naimano elawamo osiyodilo tanaloma: gito a:iyamo, nale ebe tetene wag-ilimite Godokono elawamo ebeno tanaloma: kokolinama:. <sup>20</sup> Iyo, me gabodo nale Kelisago kewa olotolowalo gito a:iyamo, ebema: me tetelo Kelisote na magumulo eba okolinalo na a:ka:tuwa: naimano elawamo

walo a:kokolinamo. Nanitabola, Godokono Gudute na nilakapolo eba malagidilonenalo ebeno igilo na mabuma: iyabaiamo diyatiya, ebema: na me tetelo ebe nanitabokobi midi tanalodo bokolinamo. <sup>21</sup> Eiye! Lumagite Totomu Tabamo tuduwata tanalodo tuputupudawama: eda:ma: gabote nanitabolo nitanataleka:, a biyatawaona: Kelisokono a:e tanalo ebe kawo tanalooa:. Wiyasiya numa:la:, Totomu Tabamo tuduwata tanalodo gabo kitana:, ebema: Godote ebeno nilakapo gabo idi na diyatunamiya, nale ebe wade gabonomo ubia:noma: a:keda:namo.

### 3

#### *Godote Epono Nanitabokobi Midi Tanalodo Ibi Tuputupupima: Da:midilina*

<sup>1</sup> O Galesiya opo epala:, mabu keleka: la: daedale epoma: deda:ima? Eiye, Ya:sute kewa olotolowalo da:iya, na dopamo ebe tanalono magumu la:tamo wadenomamo awokalimo! Ebema: la:godolo dopamo da:pola:namiya, Saitanakono osiyodilo tanalodo ebe wadewade woki potele kiyalekelametiya? Numa:la:, la:le ebeno iyaiya a:da: elemasigi tanalo uwata:wete kuba woki ma kunu malagidilo owagilimata, Godote Mosesedo epatamo dikalamiya la:le ebe Totomu Tabamo tudila:o tanalodo tuputupupima: keda:wenama:.

<sup>2</sup> Ebema: modobola la: me kapiya tanalo na nanana:la:, la:le Godokono Uliyanano elawo kebe gabodo kelawa:ima, ebeno Totomu Tabamo tudila:o gabodola:ka:, o la: ebeno Wade Tabo olowi tetelo nanitabokobi da:mida:ima ebe tanalodola:ka:? <sup>3</sup> Eiye, la: daedale epoma: akoeda:oala! Godokono Uliyanate la: magumulo kebe woko kowagilimile, la: modobola:ka: ebeno elawo tanalone olobila:wete la: a:ka:tuwa: la:imano osiyodilole elawamo ebe woko opoliyama:? <sup>4</sup> Numa:la:, la:imano nanitabokobi midi magumulo kebe tanalo bilibilinomate la:tamo da:pemaimionakiya, Godote ebe tanalodo la: wadenomamo iyatulamenakiyata, a, nanitabola:ka:? Eiye, modoboa: la: ebe wadewade woki gito dodolomatilima! <sup>5</sup> Ebema: Godote ebeno Uliyanano elawo la:tamo kawonomamo eba ikalamenalo la: magumulo kawokawo anoano tanalo dosiyodilolenako, ebe tanalote la:godolo beda: mabuma: kitanale? La: Godokono Totomu Tabamo tudila:o mabuma:la:ka:, o la: ebeno Wade Tabo olowi tetelo nanitabokobi da:mida:ima ebe mabuma:la:ka:?

<sup>6</sup> Ebema: modobola la: A:ibalayamakono tanalo nemalagidilala: Godokono Bukalo tabote ma kunu itana, "Godote ebeno nanitabokobi midi tanalo umite ebe tuputupudawama: ebo ka:miya." <sup>7</sup> Iyo, me Buka tabone modobola la: me tanalo wadenomamo niyatawala:, piyate nanitabokobi midipima: deda:ona ibi ebe A:ibalayamakono walone gudinomola. <sup>8</sup> Numa:la:, Godote a tetelo Yua:pi uwatete ibino nanitabokobi midi tanalodo ibi tuputupupima: da:midilina, ebe tanalote maiga:no dopamo ebete A:ibalayamatamo ebe nopo eba awokalimilo Kelisokono Wade Tabono magumu ebetamo ebo kiyawaiya. Iyo, ebe tabote ebeno Bukalo ma kunu itana, "Iyaiya opolo dilukuliona ebe epo taneba bilibilinomate na ma kunu ba:toweonamenakoma:na:, 'A:ma:le A:ibalayamako keba kunu kowaluba:wenakiya, modobola a:ma:le a atumu eba kunu nowalubinakiye.'" <sup>9</sup> Nanitabola, A:ibalayamate Godokono tabo olowite nanitabokobi da:midiya, ebe tetene wagilimite Godote ebeno okoli magumulo ebe wadenomamo walubinaki, ebema: me tetelo piyate Godoko atumu nanitabokobi da:midina, ebete ibi eba kunu atumu a:kowalubilinako.

<sup>10</sup> Wiyasiya numa:la; piyate Totomu Tabamo tudila:oma: ibi a:ka:tuwa: ibino elawo nanitabokobi da:midilina, Godote ibi walubilia:no iba:te ibino kuba osiyodilole mabuma: kawo temeteme biyatawaonakoma:na:. Iyo, ebene Bukalo tabote ibino tanaloma: ma kunu itana, “Totomu Tabono iyaiya tanalo bilibilinomo magumulo potele kapiya totomu kapiya tetenomolo dadikanalemene, ebe mabuma: ebete ebene a:e uwomuamo olopoligoa: temeteme ma kunu biyatawanakomene, ebene kuba wiyate Godogodone nanitabonomolo ka:pemene!” <sup>11</sup> Ebema: numa:la; a opo epo bilibilinomagodolo lumagi idite modoboa:noma: eda:na Godokono Totomu Tabo bilibilinomamo ka:tuduwatama; iyo, ebe tanalone a iyatawala, Totomu Tabamo tuduwata tanalodo Godote lumagi idi ebene tuputupudawama: a:ka:midimene. Nanitabola, ebe gabo kitana; wiyasiya kalakala kawonomola, Godokono Bukalo tabo idite ma kunu gena, “Piyate Godokono tuputupupima: deda:ona, iba:te ebe nanitabokobi midi tanalodo nanitabo igilo kelaema:na:.” <sup>12</sup> Ega:walo ebene Bukalo tabo idite ma kunu kegena, “Piyate ebene iyaiya Totomu Tabo bilibilinomamo eba tudila:onale idi kapiya adikanalea:no, me opo epo magumulo ibinomate nanitabo igilago bilukulinama:na;” wiyasiya nale dopamo ma kunu gemo, ebako lumagite me opolo kokolina:. Ebema: me tanalo kawo tanalomola, Godote ebene Bukalo a niyatuamena, Totomu Tabamo tuduwata tanalo ega:walo nanitabokobi midi tanalo, ebe netewa tanalate iyaiya ba:pola:na, ibi kapiya:.

<sup>13</sup> Ebema: nanitabola, ale Godokono Totomu Tabo adikanale mabuma: ebete a temeteme magumulo kilukulinama: degiya, wiyasiya Kelisote a nilakapoiamele ebe temeteme uwateamete ebo a:iya. Iyo, me gabodo ebete aimano kuba osiyodilole tanalono temeteme magumune a iyalo owagaiya. Numa:la; Kelisokono a:e tanalono magumu kawokalima: Godokono Bukalo tabo idite ma kunu gena, “Epate lumagi idi anakapuima: ebene ape kewamo diyatima:na; ebe lumagite ebene kuba osiyodilole mabuma: Godokono ololo apulo olopoligoa: temeteme belawenakomene.”\* <sup>14</sup> Me mabuma: Ya:su Kelisote kewa olotolowalo da:iya, ebete ebene ubi ebo iyatiya, ebene a:e tanalodo aimano kuba osiyodilole tanalono temeteme wiya kuwateama; ega:walo ebe ubila ebene Uliyanate aimano nanitabokobi midi tanalodo a magumulo kokolinama:. Iyo, Godote Yu epo kowalubilima: dopamo nanitabonomolo egiya, wiyasiya ebete Kelisokono a:e tanalodo Yua:piatamo gigiyu atumu a:ka:iyamidiya, ibino ilukuli magumulo Godote ibi wadenomamo kowalubilinakoma; ebete dopamo A:ibalayamako keba kunu kowalubinakile eba kunu.

*Godote Dopamo A:ibalayamatamo Kebe Tabo Nanitabolo Degiya Ebe Tabono Elawo Ebene Iyaiya Totomu Tabono Elawote Kadikamidaliya:*

<sup>15</sup> Naimano nanitabokobi midipi ekakiala; nale me opo epono osiyodilo tanalo idi uli taboma: midite ebe tanalamo la: kiyatulaemamota. Ma kunu epono ololo apulo netewa dubate ibino nopo iyatite bae kapimiya denaoma:na; walone tetelo ibi magumulo idite ebe nopo tabo gito adikanalema: modoboa; iyo, iba:godolo gabote a:kitanamene ebe tabo iyakobi ka:midima:. <sup>16</sup> Eba kunu Godote ebene Bukalo iyaiya tete epetapilo ebene nopo A:ibalayamatamo eba iyatilo tabo nanitabolo ebo genaki,

\* **3:13:** Buka ka:la:mioledawa, modobola a:ma: me tanalo niyatawa, Ya:suko tuputupudawanomola, ebete kuba idi kosiyodilonakia:. Wiyasiya ebete kewa olotolowalo aimano kuba osiyodilole tanalo bilibilinomo uwateamete, ebene uwomua: uwomua: tetelo ebe kuba tanalate ebegodolo eba pola:nalo ebete a mabuma: ebe kuba ebene kalimamo ba:mula:leamenamene.



ebete ebe ega:walo ebenu walonepi kowalubilinakoma; wiyasiya numa:la; ebe tabono tanalate A:ibalayamakono walonepi bilibilinomono tanaloma: unulo eba pola:nalo, ibino kawo magumu ebe walonedawa kapiyanomono tanaloma: gena, ebe dawa ebe Kelisotela.

<sup>17</sup> Ebema: naimano kawo iyatulame tanalo ma kunula. Dopamo tetelo Godote ebenu nopo eba iyatilo kebe tabo nanitabolo degiya, ebe tabono elawote uwomua: uwomua: tetelo a:kolopoligonamene. Iyo, 430 ulama epetapi da:petoiya, ebe tetelo Godote ebenu Totomu Tabo epatamo dikalamiya, ebe Totomu Tabono elawote modoboa:noma: ediya ebenu dopo tabono elawo kadikamidalema:.<sup>18</sup> Ebema: numa:la; Godokono wadewade walubi tanalate Totomu Tabamo tudila:o tanalodo epatamo nemaimiotaleka; a biy-atawaona: ebete dopamo nanitabolo degiya ebe dopo tabono elawote iyalo olopoligiya. Wiyasiya eba kunua: Godote A:ibalayamatamo nanitabolo degiya, ebe nani tabo kapiyado wadewade walubi tanalo ebetamo gito ikameonaki, A:ibalayamakono osiyodilo tanalo ididoa: Me mabuma: a iyatawala, ebe nani tabono elawote uwomua: tetelo eba itanalo, me tetelo a mabuma: atumu wade woko ebe kosiyodilona.

### *Godokono Totomu Tabono Woko Osiyodilo Tanalo*

<sup>19</sup> Ebema: mabu keleka: A:ibalayamakono walogabo apune Godote Totomu Tabono iyaiya tanalo epatamo dikalamiya? Nanitabola, Godote ebe osiyodilo tanalodo ubi iyatiya, me opo epate aimano kuba osiyodilole tanalo wadenomamo kiyatawaoma: A:ibalayamakono walone gudu idino pe teta:mo. Numa:la; ebe walone gudu ebe Godote pokono tanaloma: tabo A:ibalayamatamo nanitabolo degiya ebe gudula, iyo, ebe Kelisotela.

Ega:walo me tanalo idila. Dopamo tetelo Mosesete Godoko ega:walo me opo epo tetenomolo eba utinalo, Unu Duliyomolono nopopiate Godokono Totomu Tabono iyaiya tanalo ebetamo ebo ikameiya, ebete ebe Totomu Tabono nopo ibi wadenomamo kiyatulaema:.<sup>20</sup> Wiyasiya walone tetelo kebe oli nopote atamo Kelisogodone ka:pemaigiyale, ebe nopono tanalo iyanomola mabu Kelisoko ega:walo Godoko ibi kapiyanomola. Ebema: numa:la; opo lumagi idite Godoko ega:walo a tetenomolo utia:no, ebe tetelo ebe a:ka:tuwa: me opamo piya ebenu nopo a ka:piyatuaema:.<sup>21</sup> Ebema: la:imano woki keba kunula:ka? Godokono Totomu Tabono nopote Mosesedo da:pemaigiya ega:walo Godokono nani Tabonomo Ge Tanalono nopote Kelisogodone da:pemaigiya, ebe netewa nopo magumulo gowela tanalo ba:kitanale? Ao, kitana:! Gabote nitaniyataleka: ale totomu tabo ida:mo tudila:o tanalodo nanitabo igilo kelaema; Godote a ebe gabodo tuputupupima: eba midinalo ebenu nopo idi atamo a:kikaeamiyana:.<sup>22</sup> Wiyasiya ebenu Bukalo ebete a niyatuamena, me opo epo bilibilinomate kuba osiyodilole tanalono elawo magumulo ilukulina, iba:te nanitabo igilo laema: ka:modobona: Me mabuma: epate ibino osiyodilole tanalono elawo nanitabokobi midia:no Ya:su Kelisoko kapiya nanitabokobi da:midina, Godote ebe tanalodo kebe walubi tanalo iba:tamo ikalaema: dopamo nanitabolo degiya, ebe tanalote iba:tamo nanitabonomolo ka:pemaigamene.

<sup>23</sup> Nanitabola, Godote ebenu Nanitabokobi Midi Tanalono nopo awokalimia:no, dopamo tete geyageyanomolo nanitabokobi midi tanalono pe teta:mo a opo epate ebenu Totomu Tabono elawo magumulo ilukulinaima; kuba osiyodilolepiate gabamanino idoko motolo keba kunu kilukuline eba kunu.<sup>24</sup> Iyo, Godote ebenu Totomu Tabo atamo dikaeamiya, ebenu ubi ma kunu iyatiya, ale ebe tabono elawo magumulo

eba ilukulinalo ebe tabono iyaiya tanalate Kelisokono pe teta:mo a wadenomamo iyatuamenapete, ebene ale ebegodone ebene oli nopo idi dolowioma: ebe nanitabokobi midi tanalodo ebene tuputupupima: ebo keda:omalema:. <sup>25</sup> Ebema: kalakala kawonomola, a me tetelo Totomu Tabono elawo magumulo kilukulina:, iyo, ebe tanalono elawote agodone iyalo olopoligiya, nanitabokobi midi tanalote da:pemaigiya ebe tetelo.

<sup>26</sup> Numa:la:, Ya:su Kelisoko magumulo la: bilibilinomate ebe nanitabokobi eba midinalo Godokono gudima: beda:onamata. <sup>27</sup> Iyo, la:le obamo waduba:midaole tanalo Kelisoko magumulo elawimata, ebema: me tetelo la: ebene oli okoli tanalago wapata:lamenamata, lumagite oli kaliku pulite kalakalago keba kunu kepata:nakole eba kunu. <sup>28</sup> Ebema: nanitabola, la: Ya:su Kelisoko magumulo eba ilukulinalo, la: piyate Yu epoma: deda:wenama ega:walo la: piyate Yua:pima: deda:wenama, la: piyate epetapino wiya: woko dosiyodilawenama ega:walo piyate la: a:ka:tuwa: la: kowalubila:ema: mani woko dosiyodilawenama, la: piyate dubuma: deda:wenama ega:walo la: piyate kamiyalema: deda:wenama, Godokono umi magumulo la: bilibilinomo kapiya eponomolata, la: iyaiya epoma: keda:wena:. <sup>29</sup> Iyo, la: bilibilinomo Kelisokono epolata, ebema: la: A:ibalayamakono nani walone gudima: eba eda:onalo, Godote ebetamo uwomua: walubi tanalo ikameoma: nanitabolo degiya, la: atumu Godogodone atu walubi tanalo ba:kelawenakomata.

## 4

### *Godokono Nani Gudino Tanalo*

<sup>1-2</sup> Ebema: nale uli tabo idi ma kunu gemo. Kawo dubu idino moto epo magumulo ebene nani gudu ega:walo wiya: wokopi iba:te kapimiya ilukulina. Nanitabola, walone tetelo ebe gudute ebene nabiwigodone inamabu bilibilinomo ega:walo elawo kuwatemene, wiyasiya ebene nabiwite ebene tanaloma: kebe tete modoboma: kegiyale, ebete ebe kawo teta:mo maiga:no dopamo ebe a:ka:tuwa: ebene ubilo tanalo idi kosiyodilona:. Iyo, ebete da:pesoma: eba eda:nalo, ebene nabiwite piyatamo elawo dikalamiya iba:te ebene dawalipima: ega:walo iyatulamepima: keda:onama:, ebete ebe kawokawopino tabamo gito tuduwatanako, ebene nabiwino wiya: wokopiate ibino woko namutupiatamo keba kunu ka:tudila:onake eba kunu. <sup>3</sup> Ebema: a atumu, kuba uliyana magumulo piyate me opolo ega:walo tobolo unulo kawokawopima: deda:ona, a dopamo ibino elawo magumulo ilukulinaima: aimano tepo magumuno iyatawa tanalote kawoma: eda: teta:mo. <sup>4</sup> Ebene ebe tetenomote Godokono ubilo modobonomolo da:pemaigiya, ebete ebene Gudu me opamo ebo palibiya, iyo, ebete kamiyale idino tepo magumune awokalate a opo epago Godokono Totomu Tabono elawo magumulo okolinami. <sup>5</sup> Numa:la:, ebete eba kunu osiyodiliya, a piyate eba:go Totomu Tabono elawo magumulo dilukulinaima:, ebete a ebe elawo magumune eba wagailo ale Godokono nani gudima: ebo keda:omalema:.

<sup>6</sup> Ebema: kalakala kawonomola, mabu a nanitabokobi midipiate me tetelo Godokono gudima: deda:onama:, ebete ebene Guduno Uliyana atamo ebema: palibiya ebete aimano tepo magumulo ka:pokolinama:. Numa:la:, ebe Uliyanate ado Godoko Abama: eba ka:minalo ebe da:toweomenako ebe dawala. <sup>7</sup> Ebema: nanitabokobi mididawa, a:ma: dopamo Totomu Tabono wiya: wokodawama: eba eda:nalo kebe temeteme magumulo dokoliawenamiya, a:ma: ebe temeteme magumune iyalo nemaigawete me tetelo wiya: wokodawama: walo keda:wena:, a:ma: wiyasiya Godokono nani

guduma: eda:nata. Ega:walo me tanalo idila. A:ma:le ebeno guduma: deda:wena, ebema: Godote ebeno gudi mabuma: kebe wadewade tanalo iyalo dogodogokobi da:midiliya, ebe iyaiya walubi tanalo ebete a:ma:tamo uwomua: tetelo gito bikameonakoma:ta.

*Polote Galesiya Sosi Epono Tanaloma: Woki Bilibili Tanalo Dawokalimiya*

<sup>8</sup> Numa:la:, dopamo la: Godokono nanitabo tanalo iyatawa:noma: eba eda:onale, epetapiate kebe kubakuba uliyana kamamalatelene la: ebe uliyanano temeteme ikalame tanalono elawo magumulo atumu nilukulinaimata. <sup>9</sup> Wiyasiya me tetelo la: Godokono nanitabo tanalo uimata, ebete iyalo tetelo la:imano tanalo nanitabolo dulamelelametiyala ebe dawala. Ebema: la: ebe nanidawama: eba gelanalo, mabu keleka: la: ubi diyata:wenama, la:le dopamo kebe kubakuba uliyanano temeteme magumulo kilukuliawenaima la: ebe atu uliyanano tanalamo walo ka:kolobila:ema:? Eiye, ebe uliyanate nigologolopimu ilukuliona, iyo, ibino elawo nanitabolo kitana: la: kowalubilitama:! Ebema: la: ubi beda: mabuma: kiyata:wenama ibino elawo magumulo walo ka:kilukuliawenama:? <sup>10</sup> Eiye! La:imano woki-ate kubakubaote, ebene Yu epono osiyodilole magumulo iba:te kawokawonomoma: degelana, ebe iyaiya egelano tanalo, ega:walo oli saganano tanalo, ega:walo kawokawo soliyomuno tanalo, ega:walo ulama epetapino kawokawo osiyodilole tanalo, la: atumu ebe tanalo kawokawonomoma: gelanamata! <sup>11</sup> Ebe mabuma: nale la:imano nanitabokobi midi tanaloma: woki bilibilima: editamo. Nale la: magumulo kebe woko kodakodalo kosiyodilimo, diyala, ebe wokono da:ima:te iyalo a:kubakubaiya!

<sup>12</sup> Ebema: naimano nanitabokobi midipi ekakiala:, nale la: toweolaemata, nale dopamo la:go kapiyama: keba kunu ka:pedimo, modobola la: eba kunu nago kapiyama: eda:wete na nibaminatena:la:. Iyo, dopamo la:le temeteme natamo kikanama:wenakia:, ebema: la: niyaniyata, me tetelo temeteme natamo ikanaema: akowagilima:la:. <sup>13</sup> Nanitabola, natamo dopamo demaigi, la: ebe tanalo iyatawalata, ma kunu gabugabute na dunamiti, na ebe tanalodo wade tete umite Godokono Wade Tabo la:tamo ebo kiyawaimo. <sup>14</sup> Ebe tetelo naimano gabugabuno tanaloma: la: na eba walubinilo mibo tanalote la:tamo emaigi, wiyasiya la:le na malogonea:no, la:imano tepo magumuno wokilo la:le na Godokono Unu Duliynomolono nopodawa idi keba kunula:ka: eba kunu da:midina:ima, naimano tabo kiyawao tanalo ubia:noma: keda:wea:, iyo, la:le na Ya:su Kelisoma: midina:wete na kalakalago ebema: lawenimata. <sup>15</sup> Numa:la:, ebe tetelo la:godolo na mabuma: ditanati, ebe kalakala beda: kawonomola:ka:! Ebema: beda: tanalote kemaigile la:imano kalakala ebo kanakapuima:? Nanitabola, dopamo la:le na mabuma: ubi ma kunu iyatimata, gabote nitanataleka: la: magumulo idite ebeno wadewade balidi magobelete natamo gito bikanamena:. <sup>16</sup> Wiyasiya numa:la:, nale me tetelo Godokono nanitabo tanalo la:tamo walo dakawokaliminamo, ebe mabuma: la: epetapi la:imano wokilo na nilakapoinamea:no la:le na la:imano goweladawama: midininamata!

<sup>17</sup> Nanitabola, piyate Godokono mailamo a:da: tabo da:kiyawaonaka, iba:te la:imano tanaloma: ibino ubi kawonomamo ma kunu iyatina, iba:te la:imano woki kubailamete, la: ega:walo na, a iyaiya kalomoema:, ebene la: ibino tanebapima: eba eda:olo la:imano ubi iba:tamo atumu kawonomamo ebo kalomomamota. <sup>18</sup> Ebema: numa:la:, lumagi idite la: nanitabo gabodo kowalubilitama: ebeno ubi kawonomamo diyatimene, ebe tanalo wadenonomola. Iyo, nale la:godolo luta tetelo ega:walo nale luta: tetelo, la:le ebako wade iyatulamedawatamo ubi diyata:ema, kuba:nola, naimano

kalakalate ebema: kitanamene! <sup>19</sup> Wiyasiya la: idawano gudia:, la: naimano wadewade nanitabokobi midipi gudinomolata, ebema: nale la: mabuma: diyatawitamo, ebe temeteme tanalo ebe kamiyaletе gudu alaima: temeteme diyatawanako eba kunula! Nanitabola, ebe temeteme tanalote nagodolo kitanamene la:le la:imano nanitabokobi midi magumulo Kelisoko keba kunula:ka: ebako epoma: deda:ema ebe teta:mo, <sup>20</sup> ebema: numa:la:, la: mabuma: nagodolo ditana ebe woki bilibili tanalo da:pesoa:. Me mabuma: nale naimano ubi tanalo kawonomamo ma kunu iyatitamo, gabote ditanamene nale me tetelo pete la:go kapimiya ilukulite Godokono nani tabono tanalamo la: diyatulametama, ebe atu tetelo naimano nilakapo awokalimi tanalamo la: kowalubilimamota!

*A:igako Ega:walo Selako Ibino Uli Tabono Magumu Tanalo*

<sup>21</sup> Ebema: la: piyate Godokono Totomu Tabono elawo magumulo walo ilukulima: ubi diyata:wenama, la: me tanalo na nanana:la:. Mosesete Godokono Buka magumamo kebe Totomu Tabo kakuloliyale, la: modobola:ka: ebe Totomu Tabono kawo magumunomo nanitabonomolo laema:? <sup>22-23</sup> Numa:la:, Godokono Bukalo tabote me tanalo awokalimina, A:ibalayamate dubu gudi netewa ulamiya, dopo gudute ebena wiya: wokodawa kamiyaledgeone awokalate, idite ebena nani kamiyaledgeone akawokaliya. Ebene dopo gudute epono kateneno ubi tanalodo eba awokalalo, gudu idite wiyasiya Godokono anoano tanalodo awokaliya, mabu dopamo ebete A:ibalayamatamo tabo nanitabolo egiya ebena kamiyaletе ebe gudu kalaimene.

<sup>24</sup> Numa:la:, ebe kamiyale netewano tanalo ebe a iyatuaema: uli taboma: eda:na, ega:walo me tanalono magumu ebe ma kunula. Netewa kamiyale ebe Godote iyaiya nopo epatamo dawokalilamiya ebe netewa tanalo keba kunula:ka: eba kunula. Dopo kamiyale A:igate wiya: wokodawama: deda:nami, ebema: ebete kebe gudi kalailamiyale ebe gudi ebe atumu wiya: wokopima: keda:iya. Ebe mabuma: A:igako ebe Godote Sainai Ununomo Damelalo dawokalimiya ebe Totomu Tabamo tudila:o tanalono nopo keba kunula:ka: eba kunula, iyo, piyate ebe nopono elawo magumulo dilukuliona ibi wiya: wokopila, iba:te woko osiyodilo magumulo kawokawo temeteme kapiya biyatawaonakoma:na:. <sup>25</sup> Ega:walo a iyatawala Sainai Damelate Ala:biya opolo itana, ebema: ebe damela ebe ulila, ebe Yelusalema kawo duliyoumolola, mabu me tetelo Yelusalemalo dilukuliona ebe Yu epo bilibilinomate Godokono Totomu Tabono elawo magumulo eba ilukulinalo wiya: wokopima: eda:ona.

<sup>26</sup> Wiyasiya Godokono Unu Duliyoumololo ditana ebe oli Yelusalema duliyoumolono tanalo iyanomola. Ebe duliyoumolo ebe A:ibalayamakono nani kamiyale Selako keba kunula:ka: eba kunula, iyo, ebe a nanitabokobi midipino menokola, ebema: piyate nanitabokobi midi magumulo dilukuliona iba:te ibino temeteme woko magumune iyalo maimiote, me tetelo woko osiyodilo magumulo tutupima: eba eda:olo wiya: temeteme woko walo a:kosiyodilonama:na:. <sup>27</sup> Numa:la:, Selate tete geyageyanomolo gudiana:noma: eba eda:nalo, Godote kebe nani tabo ebena awi A:ibalayamatamo dopamo degiya, ebete ebe tabo malagidilolo Selako ebo walubiya Aisa:keko kalaima:. Ebe mabuma: Godokono Bukalo tabo idite ma kunu gena,

“Ta:li kamiyale, modobola a:ma: nekalakala!

Iyo, a:ma: dopamo gudu alaimia:noma: deda:wenamiya, a:imano tabo madodo unamo adipatelo

kalakala kawonomamo nawokalima!  
 Nanitabola, epate poko  
 kuba ta:li kamiyalema: degelanamiya,  
 ebe kamiyalete gudi bilibilinomo kulaemene,  
 ebene ebenu gudino uwomute dopamo daidiya  
 ebe kamiyaleno gudino uwomu ka:nodolimene.”

<sup>28</sup> Ebema: naimano nanitabokobi midipi ekakiala:, la: Godokono gudi-lata mabu ebete iyalo tetelo la: walubilima: nanitabonomolo degiya, la: ebe tabono elawo magumudo awokalaimata, Aisa:kete dopamo ebenu nani tabono tanalodo keba kunu kawokaliyale eba kunu. <sup>29</sup> Nanitabola, A:ibalayamako tetelo ebenu gudi magumulo potele epono kateneno ubi tanalodo dawokaliya, ebe dopo gudute ebenu ekawitamo kawokawo temeteme ikameonaki mabu ebe iyatawala, ekawite Godokono Uliyanano anoano walubi tanalodo awokaliya. Numa:la:, me tetelo atu tanalote walo na:kemaigana, Totomu Tabono elawo magumulo wiya: wokopima: deda:ona, iba:te kawokawo temeteme a tutupima: eda:opiatamo ikaeame-naka. <sup>30</sup> Ebe mabuma: Godokono Bukalo tabote a keba kunu kiyatua-menale? Iyo, Godote A:ibalayamako ma kunu aniya, “Modobola, a:ma: wiya: wokodawa kamiyale ebenu gudago la:godone iyabaiamo nalibola:. Nanitabola, a:ma:le a:imano nani kamiyalegodolo duma:wia, ebe nani gudunomago a:imano dopo gudute a:imano dogodogo inamabu magumulo kapiya apu idi a:kelaemene, ao, ebe dogodogo inamabuate a:imano nani gudu kapiyagodolo na:pola:namene!” <sup>31</sup> Ebema: naimano nanitabokobi midipi ekakiala:, wiya: woko temetema:go dosiyodilona a ebe kamiyaleno gudi keba kunula:ka: eba kunua:. Ao, a nanitabokobi midi magumulo tutupima: eda:onama:, ebema: a nani kamiyaleno gudila ega:walo ale aimano Nabiwigodone wadewade walubi tanalo buwatanakoma:.

## 5

### *Kelisoko Magumulo Tutupima: Deda:ona Iba:te Totomu Tabono Elawo Magumulo Walo Ilukulinama: Modoboa:*

<sup>1</sup> La: numa:la:, Kelisote kewa olotolowalo a tutupima: a:midia ale ebenu tutu okoli magumulo nanitabonomolo kilukulinama:, ebema: modobola la: ebe tutu okoli magumulo kodakodalo eba lamota:onalo lumagi idino wiya: temeteme woko tanalono gubi magumamo walo akonopila:oala.

<sup>2</sup> Naimano tabo wadenomamo nolowiala:. Na Polote me tanalo la: Yua:pi dubu analemata, la: lumagi idino kuba wokiamo tudila:wete Yu epono tama itamida pukala la:imano apa:mo delawa:ema, ebe tanalodo la:le la:imano woki ma kunu kawokalimamota, Kelisote la: mabuma: dosiyodiliya la: ebe tanalo dologala inamabuma: eba midinalo iyabaiamo ba:idiloma: wagele-namata. <sup>3</sup> Ebema: nale la: kapiya tete ida:mo kawiya walo nakanalemata, la: magumulo dubu idite Yu epono tama itamida pukala delaemene, ebe tetene wagilimite ebete Totomu Tabo epetapino tanalo bilibilinomamo na:tuduwatanakomene ebenu kuba wiyate ebetamo pekapoma:! <sup>4</sup> Eiyee! La: piyate Godokono Totomu Tabamo tudila:o tanalodo ebenu tuputupupima: eda:oma: dowagela:wenama, la: a:ka:tuwa: la: Kelisogodone iyalo iyailimata, iyo, la: Godokono nilakapolo gito ikaeame tanalone olobila:iyamata.

<sup>5</sup> A nanitabokobi midipiate wiyasiya olowiolo nemakopelenama:, Godote aimano nanitabokobi midi tanalodo woko eba osiyodilonalo ebe a:ka:tuwa: ebenu Uliyanano elawamo a ebenu nani tuputupupima: ka:midimene.



<sup>6</sup> Ebema: nanitabola, a Ya:su Kelisoko magumulo eba ilukulinalo, ale Yu epono tama itamida pukala iyalo delawiyama: ebe kawo tanaloo:, ega:walo ale lawea:pima: deda:onama: ebe tanalo atumu kawo tanaloma: keda:na:. Numa:la:, kapiya tanalonomote kawoma: eda:na, ebe tanalo ebe aimano nanitabokobi midi tanalote aimano nilakapo awokalimi tanalodo woko dosiyodilona ebe tanalola.

<sup>7</sup> Eiye! La: dopamo la:imano nanitabokobi midi gabodo elawonomamo tolaimata, sukulu gudino kalakala egelalo iba:te keba kunu ka:puila:onake eba kunu. Ebema: la:imano agowa ukamidawama: potele kedile? Iyo, la:le dopamo Godokono nanitabo tanalo olowiawete ebe tanalamo tudila:o dowagilima:ima, ebe tanalo pokono osiyodilo tanalodo katepaima?

<sup>8</sup> Numa:la:, Godoko la:imano agowa ukamidawama:, ao, ebe dopamo la: nanitabokobi midi tanalamo deka:la:mitia ebe dawala.

<sup>9</sup> Ega:walo me tanalo idila. Epate ma kunu gelana, “Palowa bae kokalima: kamiyaletе gamagamaimino tuwae inamabu kelenomo palowago dekapiyailaemene, baete a:ka:tuwa: ebo kegagamamene.” Ebema: numa:la:, eba kunu la:imano taneba magumulo kuba woki da:pesonomote ditana, ebe a:ka:tuwa: kawoma: ebo keda:mene. <sup>10</sup> Wiyasiya kalakala kawonomola, la:la, nala, a bilibilinomate Kawodawa magumulo kapiyama: eba eda:onalo na me tanalo nanitabokobi na:midinamo, na me tetelo la: walo dakanaletama la: me tabono tanalone a:kolobila:ema. Ebe mabuma: potele woki bilibili tanalo la:tamo ikalaema: dowagelena, na ebe lumagino tanalo iyatawa:, wiyasiya Godote ebena tanalo eba iyatawalo kuba wiya ebetamo nanitabonomolo kikaemene!

<sup>11</sup> Ebema: naimano nanitabokobi midipi ekakiala:, numa:la:. Nale Wade Tabo kiyawao magumulo nanitabokobi midipi dubate Yu epono tama itamida pukala laema: ibi nanaletaleka:, Yu epo magumulo idite natamo temeteme a:kikanamena:. Nanitabola, dopamo nale ebe tanalo kawo tanalonomoma: genakimo, wiyasiya nale me tetelo Kelisote kewa olotolowalo da:iya ebe tanalono magumu kapiya awokalimilo tabo ebo kiyawaonakomo, iyo, me mabuma: epetapiate natamo dowate kawokawo temeteme gito ikanamenaka. <sup>12</sup> Eiye! Ibi piyate tama itamida pukala lawe tanaloma: la:tamo woki bilibili tanalo dikalametana ebe dubula, ebema: nale ibi mabuma: naimano ubi ma kunu iyatinamo, modobola iba:te la:tamo tanalo idi osiyodiloo:no wiyasiya ibi a:ka:tuwa: ibino tama kubanomamo eba iyaililo ibino gudi osiyodilole gabote nolopoligadigamene!

### *Godokono Uliyanano Elawamo Ilukuli Tanalo*

<sup>13</sup> Naimano nanitabokobi midipi ekakiala:, nanitabola, Godote la: ebena tutu okoli tanalamo eka:la:miata. Wiyasiya la: nanisiwale, ebena tutu okoli tanalo magumulo eba ilukulinalo, ebe tanalone la:le la:imano kateneno kuba ubi tanalamo tudila:oma: modoboma: akogelala:. Modobola la: wiyasiya la: magumulo epetapiate epetapi nilakapolo eba malagidilolenalo nowalubiunakiyala:, wiya: wokopiate ibino woko namutupiatamo woko keba kunu kosiyodilone eba kunu. <sup>14</sup> Nanitabola, Godokono Totomu Tabo bilibilinomo magumulo kebe totomute kawonomoma: keda:nale, me totomu ebe “A:ma: a:ka:tuwa: a:ma: demalagidilawena, eba kunu a:ma: tatalilo dokolina, modobola a:ma:le ebe lumagi nilakapolo nemalagidilona.” Iyo, potele me kapiya totomuamo nanitabonomolo da:tuduwatanako, ebete ebe tanalodo Godokono Totomu Tabo epetapi bilibilinomamo atumu a:ka:tuduwatanako. <sup>15</sup> Wiyasiya gaagaate gowela tetelo keba kunu kowagelena, eba kunu la: magumulo idite idi kubaima: daloua:wenakoma, la: nanisiwale! Diyala, la: bilibilinomate gowela magumulo da:ba:elaoma!

<sup>16</sup> Ebema: nale la: analemata, Godokono Uliyanano elawamo eba wapata:lamenalo la:le la:imano kateneno kuba ubi tanalamo gito akotudila:oala:, <sup>17</sup> mabu lumagino kateneno ubi tanalate Godokono Uliyanano ubi tanalo eba odiyobolenalo, Godokono Uliyanano ubi tanalate ebe lumagino kateneno ubi tanalo atumu na:kodiyobolena. Nanitabola, ebe tanalate kubanomamo gowelana, ebema: la: nanitabokobi midipiate Godokono Uliyana eba kalakalaiminalo, la:le la:imano kateneno ubi tanalamo gito tudila:oma: modoboa:. <sup>18</sup> Numa:la:, la: Godokono Uliyanano elawamo ebena ubi tanalamo da:tudila:wenakoma, ebe tetelo la: tutupima: eba eda:onalo ebena Totomu Tabono temeteme tanalono elawo magumulo walo a:kilukuliawenama.

<sup>19</sup> Nanitabola, epo iyatawanomola kateneno ubi tanalone kebe tanalate kemaimionale. Ebe iyaiya tanalo ebe kamiyale ega:walo buwelemele pilo tanalo, ega:walo tepo magumuno kuba daleyawoki awokalilame tanalo, ega:walo buwelemela:tamo kateneno kuba ubi tabo gela tanalo, <sup>20</sup> ega:walo ida:da:lino uliyana amamalatele tanalo, ega:walo giwali osiyodilole tanalo, ega:walo gowelao tanalo, ega:walo apaminatui tanalo, ega:walo lumagi idino inamabuma: dowatanalo, ega:walo tepo magumune ela maigatanalo, ega:walo lumagite ebe a:ka:tuwa: ebe kapiya malagidilo tanalo, ega:walo epo iyaiya anagiyamidale tanalo, <sup>21</sup> ega:walo lumagi idino wade mailono tanaloma: dowatanalo, ega:walo gamoda nio tanalo, ega:walo ilipo soliyomu osiyodilole tanalo, iyo, me ebe iyaiya kubakubatanalo bilibilinomola. Nanitabola, piyate ibino kateneno kuba ubi tanalamo da:tudila:ona, iba:te ebe tanalo bilibilinomo ega:walo ebakobako kuba tanalo epetapi atumu a:kosiyodilolenaka. Ebema: nale la: dopamo kawiyakeba kunu kanaletima eba kunu walo nakanalemata, la: nanisiwale! Piyate makomako kuba tanalo dosiyodilolenaka, iba:te Godokono Kawo Elawodawano duliwomolono wadewade dogodogo tanalo nanitabonomolo a:kuwatema:na:.

<sup>22</sup> Wiyasiya lumagino okoli magumulo Godokono Uliyanano da:imite demaigana, ebe da:imite golanomoma: eba eda:nalo ebe magumulo wadewade tanalate ba:pola:nama:na:. Ebe iyaiya tanalo ebe epetapi nilakapolo malagidilole tanalo, tepo magumuno kalakalanalalo, milo tanalo, temeteme magumulo kodakodalo lamota:ona tanalo, nigologolopiatamo nilakapo awokalimi tanalo, epetapi gito walubili tanalo, nanidawama: eda:tanalo, <sup>23</sup> lumagi ebe a:ka:tuwa: ebe opamo iyati tanalo, ega:walo kateneno ubi tanalamo tuduwata: tanalo. Nanitabola, piyate makomako tanalo dosiyodilolenaka, ibi kuba osiyodilolepima: ka:la:ima: totomu tabo idite me opo kawonomolo kitana:. <sup>24</sup> Iyo, numa:la:, piyate ibino kateneno kuba ubi tanalo elawoelawonomo danakapulamiya, iba:te Ya:su Kelisokono nani epoma: eda:ona.

<sup>25</sup> Ebema: modobola ale Godokono Uliyanano iyaiya ubi tanalo bilibilinomamo ba:tudila:onakoma:, mabu ebete ebena nanitabo igilo atamo iyalo ikaeamiya. <sup>26</sup> Ebe mabuma: a a:ka:tuwa: a walogoema: modoboa:, iyo, ale mibomibo tanalo epetapiatamo gito a:kikalaema: ega:walo ale epetapino inamabuma: iba:tamo a:ka:dowaoma:.

## 6

### *Nanitabokobi Midipi Magumulo Idite Idi Nilakapolo Nowalubinakomene*

<sup>1</sup> Ebema: naimano nanitabokobi midipi ekakiala:, la: magumulo idite kuba osiyodilo tanalamo da:negamene, modobola la: piyate Godokono Uliyanatamo da:tudila:wenama, la:le ebe wadenomamo nowalubiyala:

ebete kuba osiyodilo tanalone kolobigama: Wiyasiya la:le ebe lumagitamamo nilakapo awokalimi tanalodo ebe eba walubilo, ebe atu tetelo la: a:ka:tuwa: la:imano tanalo wadenomamo nulamenakiyala:, la:le Saitanakono elemasigi tanalamo atumu ka:na:guda:wekapoma:. <sup>2</sup> Ega:walo tete epetapilo la:imano iyaiya tepo magumune demaimionaka ebe mi-bomibo tanalo tutuma: ka:midila:ema:, modobola la: epetapiate epetapi nowalubiinakiyala:, mabu la: ebe osiyodilo tanalodo Kelisokono kawo totomuamo ba:tudila:onakomata. <sup>3</sup> Wiyasiya la: nanisiwale. Godote a egegepima: eba genalo, wiyasiya a magumulo idite ebene wokilo ebe a:ka:tuwa: ebe kawodawama: da:midimene, ebe a:ka:tuwa: ebe a:da: kelemasigimene.

<sup>4-5</sup> Ega:walo la: nanitabokobi midipi bilibilinomo magumulo, modobola idite damolama: eda:no ebe a:ka:tuwa: ebene woko osiyodilono iyaiya tanalo wadenomamo eba ulamenalo, ebene osiyodilole tanalo Godokono mulo wokiamo nanagilamenakomene, ebene ebete ma kunu kiyatawamene ebe osiyodilole tanalo da: wadewadenola: o da: kubakubanola:. Iyo, ebe tetelo ebe lumagite nanitabokobi mididawa idino tanalo anagiyamidamea:no, ebe a:ka:tuwa: ebene okoli tanalo kapiya eba malagidilole Godokono wadewade tanalo dulaemene, ebete nanitabo kalakala ebo kelaemene.

<sup>6</sup> Ega:walo me tanalo idila. Kebe lumagite Wade Tabono iyatulame tanalo Godokono wokodawa idigodone duwatanako, modobola ebete ebe iyatulamada ebene maniamo ega:walo inamabu epetapiamo wadenomamo nowalubinakomene.

<sup>7</sup> Ebene la: a:ka:tuwa: la: a:da: akomasigila:la:, lumagi idite Godoko malogolo ebe daedaedawama: demalagidilona, ebete walone ilipo kawonomo kelaemene. Nanitabola, lumagite kebe inamabu ebene pali damelamo damiomene, walone tetelo ebe atu inamabuate da:noloma:na: ebete gito kenaomene. <sup>8</sup> Ebene lumagite ebene kateneno ubi tanalamo tuduwatate kuba tanalo damiomene, ebe osiyodilo tanalone a:e wiyate pemaigate ebe gito ka:pelaemene, wiyasiya ebete Godokono Uliyanano ubi tanalamo tuduwatate wadewade tanalo damiomene, ebe tanalone ebetamo uwomua: igilo wiyate ka:pemaigamene. <sup>9</sup> Ebema: modobola a aimano wadewade osiyodilole magumulo elawoa:noma: a:keda:onama:, mabu ale elawoa:noma: eda:oa:no walone tetelo a aimano wadewade wiya kuwatemalema:, lumagite pali woko osiyodilo magumune wadewade inamabu keba kunu kuwatanakole eba kunu. <sup>10</sup> Me mabuma: kebe tetelo a wade tete duminakoma:, modobola a wade walubi tanalo biyatinakoma: iyaiya epo bilibilinomatamo, iyo, ebe wadewade osiyodilole tanalo magumulo modobola ale dopamo nanitabokobi midipi kapiya alailame epo kawonomamo bemalagidilolenakoma:.

*Polote Leta Uwomu Apulo Galesiya Sosi Epo Walo Da:ka:totomulatiya*

<sup>11</sup> Ebene me leta uwomu apulo na Polote na a:ka:tuwa: naimano kotamo tabo dakulolemo, la: me kapiyakapiya kawokawo akulole tabo nulama:la:, iyo, lumagi idite me uwomu tabo kakulolea:

<sup>12</sup> Numa:la:, piyate la: Yua:pi dubu kawiya danaletanaka Yu epono tama itamida pukala kelawa:ema:, ibi piyate ibi a:ka:tuwa: ibino unu tama osiyodilole tanaloma: dowalogolena ebe dubula. Nanitabola, iba:te ibino tabamo ebe temeteme la:tamo ikalamenakota mabu ibi me tanaloma: na:toletoleona, Kelisote kewa olotolowalo da:iya iba:te ebe tanalono nanitabo magumu dawokalima:na:, Yu epo epetapiate ebe mabuma: iba:tamo kawokawo temeteme da:bikalaema:na:. <sup>13</sup> Eiye, ebe dubate

tama itamida pukala kawo tanalonomoma: eba gelanalo, iba:te wiyasiya Godokono Totomu Tabo epetapi gito wakalaminaka! Ega:walo ibino kuba osiyodilo tanalo idi ma kunula, ibi ubila la: Yua:pi dubu iba:godone tama itamida pukala delawa:ema, la:le ibino ubi tanalamo eba tudila:olo ibi a:ka:tuwa: ibi ebo kowalogolema:na:

<sup>14</sup> Wiyasiya naimano tanalo eba kunua:! Aimanu Kawodawa Ya:su Kelisote kewa olotolowalo da:iya, nale ebe tanalono magumu kapiya eba awokaliminalo ebo bamamanamo. Nanitabola, ebe magumudo me opono amama tanalono elawote naimano tepo magumulo iyalo olopoligadigiya, iyo, me opono iyaiya amama tanalo kuwatema: naimano ubi tanalate a:elaiya. <sup>15</sup> Ebe mabuma: lumagite tama itamida pukala delaemene ebe tanalo kawo tanaloo:, ega:walo lumagi idite lawea:dawama: deda:mene ebe tanalo atumu kawo tanaloo:. Kapiya tanalonomote kawoma: deda:na, ebe tanalo ebe lumagite Godokono elawamo ebenu oli gudumu dawokalamene ebe tanalola. <sup>16</sup> Ebema: numa:la:, piyate me wokiamo da:tudila:onakoma:na:, modobola Godokono milo ega:walo lumagitamo kuba wiya ikamea: tanalo ebete iba:tamo nikalamenakomene, mabu ebe epo kapiyate ebenu nani Isalaela epoma: eda:ona, epetapia:

<sup>17</sup> Ebene me leta uwomu apulo nale la: kawiya ma kunu analemata, Ya:sukono wiya: woko mabuma: na dopamo kawokawo temeteme magumulo eba okolinalo, iyaiya tete epetapilo nanitabokobi midia:piate naimano ape bugomokobi a:midinakiya, iyo, epate ebe bugomo naimano apelo eba ulamenalo ebo iyatawaonaka, na Ya:sukono wiya: wokodawala. Numa:la:, nale dopamo iyaiya temeteme bilibilinomo epetapi uwatenakimo, ebema: me tetelo modoboa: idawate natamo temeteme idi walo ikanaema:

<sup>18</sup> O naimano nanitabokobi midipi ekakiala:, modobola aimanu Kawodawa Ya:su Kelisokono nilakapo tanalote la: bilibilinomono tepo magumulo nitanamene. Me ebe naimano tabo uwomula. Taula.

## POLOTE LETA EPESESE SOSI EPATAMO OSIYODILIYA

<sup>1</sup> Na ebe Polotela, Ya:su Kelisote ebenu sosi wagilima: iyaiya opamo daliboliya, ebe wokopi magumulo na ebe idila, mabu Godote ebenu ubilo na ebema: laweniya. Ebema: la: piyate Epesese duliyoumololo Godokono epoma: eba eda:onalu Ya:su Kelisoko magumulo nanitabolu dilukuliawenama, nale me leta la:tamo palibomo.

<sup>2</sup> Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo la:tamo nikalaema:ta.

*Godote Kelisokono Woko Magumudo Wadewade Tanalo Bilibilinomo Atamo Dikaeamena*

<sup>3</sup> Numa:la:, aimano Kawodawa Ya:su Kelisokono Nabiwi ebe Godotela, ebenu ale Kelisoko magumulo dilukulinama:, ebete ebe tanalodu a wadenomamo kowalubinama: ebenu Unu Duliyoumololo kebe wadewade tanalate da:pola:na ebe tanalo bilibilinomo ebete atamo gito ikaeamena. Me mabuma: modobola ale ebe kemoiomalema:!

<sup>4</sup> Nanitabola, me opo osiyodilo wagilimia:no dopamo ebete a uwateiya, ale Kelisokono woko magumudo ebenu epoma: eba eda:onalu, kuba da:pesonomo idite agodolu itana:no ale ebenu ololu apulu talenanomolu eba kunu kelamota:onama:. Iyo, iyalo tetenomolu ale awokalaoa:no ebete a nilakapolu eba malagidiloenalo <sup>5</sup> ebenu ubi tanalo ebo iyatiya, ebe a:ka:tuwa: ebe kekalakalaima: ebete a uwatete Ya:su Kelisokono woko magumudo a ebenu nani gudima: ka:midima:. <sup>6</sup> Ebema: numa:la:, ebete poku kawonomamo demalagidilona ebe Gudugodone ebenu wade nilakapo tanalonomo atamo gito dikaeamiya, ebe mabuma: modobola ale ebe kemoiomalema:!

<sup>7-8</sup> Nanitabola, Kelisokono kalimate deka:ka:liya, Godote a ebe kalimamo uwatete aimano kuba osiyodilole tanalo egeboleamete Saitanakono idoku motone gito wagaiya. Numa:la:, ebete iyaiya tanalo bilibilinomo eba iyatawalo ebenu mulu wokinomodu kebe tanalo atamo kawonomamo dikaeamiya, ebe nilakapo tanalono wade tanalo beda: kawonomola:ka:!<sup>9-10</sup> Ebema: numa:la:, Godote ebenu ubilo kalakalago diyatiya ebe nopo ebete dopamo owaminiya, wiyasiya me tetelo ebete ebe nopono tanalo atamo ma kunu awokalimiya, ebete ebenu wade woko Kelisodu kopoliyamene. Iyo, ebete me opolu ega:walo Unu Duliyoumololu kebe epu ega:walo uliyana ega:walo inamabu ega:walo tanalo epetapi bilibilinomo dosiyodiloliya, iba:te wadenomamo ka:pola:nama: ebete ibi bilibilinomo kapiya wokiamo kapiyakobi midilite Kelisote ibino Kawo Elawodawama: keda:nama: ebe ebo kiyatimene. Ebema: kalakala kawonomola, Godote kebe tete wadenonomoma: degemene, ebe tetenomolu me nopono tanalote nanitabonomolu ebo kemaigamene!

<sup>11</sup> Nanitabola, kebe tanalo bilibilinomate me opolu ega:walo Unu Duliyoumololu demaimiona, ebe tanalate Godokono ubi tanalo kapiyadu maimionaka, iyo, me opo osiyodilo wagilimia:no ebete dopamo ebenu wade wokidu diyatiya, ebe nopono iyaiya tanalo iyama: ka:midilima: tanalo idite a:kemaigamene. Ebema: a awokalaoa:no Godote a mabuma: ebenu ubi keba kunu kiyatiyale, ebete eba kunu osiyodiliya, iyo, ebete a Kelisoko magumulo uwatete a ebenu epoma: ebo midiya. <sup>12</sup> Numa:la:, a Yu epu magumulo piyate



Kelisoko dopamo nanitabokobi da:midiyama:, Godote ebenu nopo atamo dopamo ebema: awokalimiya ale ebenu wade osiyodilo tanaloma: ebe kemoionama. <sup>13</sup> Wiyasiya me tetelo la: Yua:piate Godokono epoma: atumu a:keda:imata, iyo, la: Godokono nani tabono iyaiya tanalo dolowiaima, ebe Wade Tabono tanalodo la:imano igilo mula: tanalote eba awokalalo, la: Kelisoko nanitabokobi ebo midimata. Ebema: la:le Godokono nani gudima: eda:o tanalo kawokalima:ema:, ebete ebe atu tetelo ebenu Uliyana la:tamo ikalamiata, dopamo ebete nanitabonomolo keba kunu kegiyale eba kunu. <sup>14</sup> Numa:la:, Godokono Uliyanate a nanitabokobi midipi bilibilinomo magumulo bokolina, ebema: a iyatawanomola kebe wadewade tanalate aimano Nabiwi Godogodolo a mabuma: da:pola:na, ebe tanalo bilibilinomate a ebenu guda:tamo nanitabonomolo kemaimioma:na:, iyo, ebe tete ebe ebete a me opono temeteme tanalo bilibilinomone dowagaimene ebe kalakala tetela. Nanitabola, ebe tetelo ale ebenu wade osiyodilo tanaloma: ebe kawonomamo kemoiomalema:!

*Polote Epesese Sosi Epono Tanaloma: Godotamo Da:towetoweonaki*

<sup>15</sup> Me mabuma: la:le Kawodawa Ya:suko nanitabokobi da:mida:wenama ega:walo la:le Godokono epo bilibilinomo epetapi nilakapolo demalagidilola:wenama, na Polote ebe netewa tanalo dolowimo, <sup>16</sup> ebe tetene wagilimite me teta:mo pemaiga nale la:imano tanaloma: kalakala tabo Godotamo ebema: adipatenakomo, iyo, ebe tanalote nagodolo kolopoligona:. Ebene naimano towetowe tabo ge magumulo nale la: eba malagidilolenalo <sup>17</sup> Godoko ma kunu ananakomo, ebenu nanitabo tanalo dawokalimina ega:walo mulo woki epatamo dikalamena ebete ebe Uliyana la:tamo kikalametama:, mabu nanitabola, ebe Uliyanate la: magumulo eba okolinalo, ebete la: ka:modoboilaema:ta la:imano tepo magumulo Godokono nanitabo tanalo kiyatawaema:. Numa:la:, ebe Godo ebe aimano Kawodawa Ya:su Kelisote ebenu Godoma: deka:mina ebe Elawodawala, iyo, ebe kawo alonomo magumulo dokolina ebe Nabiwila.

<sup>18</sup> Ebene nale tanalo idima: ebe walo ma kunu ka:toweomenakomo, ebete la:imano tepo magumuno gigiyu na:ilaemene la:le ebenu iyaiya tabono nanitabo tanalo kiyatawaema:. Eba kunu la: me tanalo kiyatawaomamota, ebete la: nanitabolo eka:la:miata la:le Kelisokono pe tanaloma: olowiolo wadenomamo kilukula:wenama:. Ega:walo la:le tanalo idi ma kunu ka:kiyatawaomamota, ebete la: ebenu epatamo kebe tepo magumuno dogodogo tanalo ikalaema: nanitabonomolo degiya, ebe tanalono wade tanalo beda: kawonomola:ka:!<sup>19-20</sup> Iyo, ebe tetelo la: me tanalo idi atumu ka:kiyatawaomamota, a nanitabokobi midipi magumulo woko dosiyodilona ebenu elawote kawonomoma: eda:na, idawano elawote ebe elawo a:kodolinamene.

Nanitabola, Godote ebe atu elawo kawonomamo Kelisoko a:e magumune dadipatiya, ebe ebenu Unu Duliyomolamo magatate ebenu tumudi apuno Kawo Elawodawano okoli baiamo gito nowodimiya. <sup>21</sup> Ebe mabuma: Kelisote ebulo Kawo Elawodawama: eba neda:nalo, ebenu elawote iyaiya nopopi bilibilinomono elawo nodoilina, iyo, ibi magumulo piyate elawoelawonomoma: deda:ona ega:walo piyate elawoelawodopoma: deda:ona, piyate Unu Duliyomololo woko dosiyodilona ega:walo piyate me opolo woko dosiyodilona, ibi bilibilinomate ebenu ubi tanalamo na:tudila:ona. Ega:walo kalakala kawonomola, iba:te me tetelo keba kunu kowagelene, iba:te eba kunu uwomua: uwomua: tetelo ebe kapiyatamo nanitabonomolo ba:tudila:onama:na!<sup>22</sup> Iyo, nanitabola, Godote ebenu elawo kawonomo Kelisotamo eba kunu ikamiya, ebema: Kelisote tanalo

bilibilinomono Kawodawanomoma: eba eda:nalo, Godote ebetamo elawo atumu a:kikamiya sosi epono Watodawama: keda:nama:.<sup>23</sup> Ebema: sosi epo ebe Kelisokono apela, mabu ebete iyalo tetenomolo Unu Duliyomololo ega:walo me opo kawonomolo kebe wadewade woko kowagilamiyale, ebe iyaiya woko eba opoliyalelo ebete a sosi epodo ebeno wadenonomo uwomu woko osiyodilona.

## 2

### *Godote Nanitabokobi Midipi A:e Magumune Wagailite Ibi Igilokobi Da:midiliya*

<sup>1</sup> Ebema: numa:la:, la: dopamo Godokono ubi tanalamo tudila:oa:no kuba osiyodilole magumulo eba ilukulinalo, la:le a:elaopima: eda:onaimata.  
<sup>2</sup> Ebe tetelo la:le me opono kuba osiyodilole gabodo eba tolamenalo, kebe Kubadawate Godotamo tudila:oa: epo magumulo woko dosiyodilona, la:le ebe dawano uliyana waloma:tanimata. Iyo, tobolo unulo dilukuliona ebe kubakuba uliyanate potamo da:tudila:ona, la:le dopamo ebe atu Kubadawa la:imano Kawo Elawodawama: midinaimata.  
<sup>3</sup> Nanitabola, dopamo a bilibilinomate kuba osiyodilolepi epetapiago kapiyakobi olowite eba kunu ilukulinaima:, iyo, ale aimano kateneno kubakuba ubi tanalo kawonomamo eba malagidilolenalo aimano apeno iyaiya kuba wokino tanalamo gito tudila:onakima:. Me mabuma: ale me opo epo epetapima: eba eda:onalo, Godote a bilibilinomono tepo magumuno kuba tanaloma: kawonomamo dowate aimano kuba osiyodilole tanalono wiya ikaeaema: ebo giya.

<sup>4</sup> Wiyasiya kalakala kawonomola, Godote a nilakapolo eba malagidilolenalo ebeno nilakapo atamo kawonomamo awokalimina,  
<sup>5</sup> ebema: kebe tetelo ale aimano kuba osiyodilole magumulo a:elaopima: deda:onaima:, ebe tetelo ebete Kelisokono osiyodilo tanalodo a uwatete igilokobi gito midiya. Iyo, ebete ebeno nilakapo tanalamo la:imano igilo eba kunu mula:lamiyata,  
<sup>6</sup> ebema: nanitabola, Godote Kelisoko a:e magumune keba kunu kadipatiyale, a nanitabokobi midipiate eba:go kapiyama: deda:iyama:, ebe tetelo Godote a atumu igilamo eba kowadipaeatelo ebete ubi ebo iyatiya, ale ebeno Unu Duliyomololo Kelisokono Kawo Elawodawano elawo magumulo eba:go kapimiya ka:pola:nama:.  
<sup>7</sup> Numa:la:, Godote ebeno nilakapo Ya:su Kelisokono osiyodilo tanalodo atamo dawokalimiya, ebe nilakapo tanalote kawonomoma: deda:na, ebete ebe tanalo uwomua: uwomua: tetelo kawokaliminama: aimano igilo ebema: mula:leamiya.

<sup>8</sup> Ebema: nanitabola, la: Godoko nanitabokobi da:mida:ima, ebe tanalodo ebete ebeno nilakapo tanalamo la:imano igilo a:mula:lamiyata. Iyo, la: a:ka:tuwa: la:imano wade osiyodilo tanalo ida:mo la:imano igilo mula: tanalo kelawa:wea:, wiyasiya me tanalo Godokono gito ikame tanalola,  
<sup>9</sup> ebema: lumagite ebeno igilo mula: tanaloma: amamalo ebe a:ka:tuwa: ebe adipatema: modoboa:.  
<sup>10</sup> Ebema: numa:la:, me tanalo nanitabola, a nanitabokobi midipi ebe Godokono iyaiya woko osiyodilole tanalola, iyo, ebete Ya:su Kelisokono osiyodilo tanalodo a olioli epoma: a:midiya, ale ebeno woko eba osiyodilonalo wadewade tanalo kosiyodilolenakoma:. Nanitabola, a awokalaoa:no ebete ebeno ubi iyalo iyatiya ale walone tetelo me iyaiya tanalo wadenomamo kosiyodilolenakoma:.

### *Yu Epo Ega:walo Yua:pi Iba:te Kelisoko Magumulo Kapiya Epoma: Deda:ona*

<sup>11</sup> Ega:walo me tanalo idila. Yu dubate ibi a:ka:tuwa: Godokono tama itamida pukala lawepima: eba ka:la:minalo, la: piyate Yua:pi magumulo

dawokalawiyama, iba:te la: Godokono pukala lawea:pima: ka:la:minakota. Iyo, iba:te ma kunu gelana la: Godokono epoa:, mabu iba:te ibino apelo kebe tama itamida tanalo me opo epono wokiamo delawiya, ebe tanalo Godokono ubi tanaloma: gelalo kawonomamo malagidilona. Wiyasiya numa:la:, la: Yua:pi epetapi piyate nanitabokobi da:mida:wenama la: atumu Godokono epolata, ebema: la: dopamo la:imano nanitabokobi midia: tetelo keba kunu kilukula:wenaima, modobola la: ebe kuba tagala okoli tanalo wadenomamo nemalagidilala:. <sup>12</sup> Ebe tetelo la: Kelisago kapiyama: keda:wenamia:, ega:walo la: kapelapima: eba eda:onalo Godokono nani Isalaela epago atumu kekapiyawenamia:. Ebe mabuma: Godote ibi kowalubilinama: ibino ewoniatamo kebe iyaiya nopo kalomoiyale ega:walo kebe iyaiya wade tabo ka:kiyawaiyale, la: ebe tanalo iyatawaoa:no la: Godogodone wade tanalo idi laema: olowiolo kilukula:wenamia:, iyo, ebe tete geyageyanomolo la:le ebeno tanalo nanitabolo kiyatawawenamia:. <sup>13</sup> Wiyasiya kalakala kawonomola, la: piyate dopamo mululo dilukula:wenaima, Ya:su Kelisokono kalimate la:imano kuba egebolelaema: deka:ka:liya, ebe kalimado Godote la: me tetelo tataliamo emagaelyata, iyo, ebete Kelisoko magumudo ebe wade tanalo nanitabonomolo osiyodiliya.

<sup>14</sup> Ebema: numa:la:, Kelisote kewa olotolowalo Yu epo ega:walo Yua:pi kapiya epoma: da:midiliya, eba kunu ebe a:ka:tuwa: ebe ibino milo tanalono nopoma: midiya ibi magumulo epetapiate epetapiago walo gowelaokapoma:. Iyo, ebe netewa tanebapiate gowelao magumulo iyaiya ka:pola:nama: ibi tetenomolo dopamo ditanami, ebete ebe kala ga:dimi ebeno a:e tanalodo gito anabulimiya. <sup>15-16</sup> Nanitabola, Godote dopamo Mosesedo Yu epatamo dikalamiya, Kelisote ebe iyaiya Totomu Tabo ega:walo pukala tanalo iyabaiamo alomiya, mabu ebe ubila Yu epo ega:walo Yua:pi ebete ibi bilibilinomo uwatete kapiya oli epoma: eba midililo, iba:te walo gowelaoa:no ebe magumulo kapimiya kilukulionama:. Iyo, ebete kewa olotolowalo da:iya ebe tanalodo Yu epo ega:walo Yua:pi ibino gowelao tanalo nanitabonomolo anakapumiya, ega:walo ebe atu tetelo ebete ibi bilibilinomo uwatete Godokono namutupima: keda:onama: ibi ebetamo walo a:kemagaelya. <sup>17</sup> Me mabuma: Kelisote me opamo pete ebeno Wade Tabo ma kunu pa:kiyawaiya, la: Yua:pi epetapi piyate Godogodone mululo dopamo dilukuliawenaima ega:walo a Yu epo piyate ebe niyakabodopolo dilukulinaima:, a bilibilinomate gowelaoa:no kapimiya kilukulionama:. <sup>18</sup> Iyo, a Yu epo ega:walo la: Yua:pi a bilibilinomatamo modobo gabote itana, ale Kelisokono osiyodilo tanalodo aimano Nabiwi Godokono ololo apuamo ka:pelaema:, ebe gabo ebe ebeno kapiya Uliyanate dosiyodiliya ebe gabola.

<sup>19</sup> Ebema: kalakala kawonomola, la: Yua:piate me tetelo Godokono ololo apulo kapelapimu kilukuliawena:, iyo, la: dopamo kapelapima: deda:wenaima ebe tanalo iyalo olopoligiya, ebema: me tetelo la: Godokono kapiya alailamepima: eba eda:onalo ebeno gudi epetapiago kapiya epoma: eda:onamata. <sup>20-21</sup> Ebema: nanitabola, la: Yua:pi ega:walo Yu epo nanitabokobi midipi, la: Kawodawa Godoko amamateno iya motolata, iyo, Ya:su Kelisote detena la: bilibilinomo ebe motoma: eda:onamata. Ebe a:ka:tuwa: ebe nokola keba kunula:ka: ebako talena motono aloma: eda:na, ebene ebete ebeno sosi wagilima: iyaiya daliboliya ebe wokopi ega:walo piyate Godokono woki awokalimipima: deda:ona ibi atumu, ibi bilibilinomo ebe motono kodakoda abo epetapima: eda:ona. Ebema: me tetelo ebete ebeno elawamo ebe motono iyaiya kewa modoboilamete eba moga:lamolelo unamo ebo adipatena, <sup>22</sup> ma kunu la: Yua:piate Kelisoko magumulo eba ilukulinalo, ebete la: ega:walo Yu epo nanitabokobi

midipi, la: bilibilinomo kapimiya uwatetate ebena moto eteno inamabuma: midilitate la: ebo moga:lamolenata, ebe moto Godokono Uliyanate kebolo kokolinale ebe talena motola.

### 3

#### *Godote Yua:piatamo Wade Tabo Kiyawao Woko Polotamo Dikamiya*

<sup>1</sup> Ebema: na Polote Ya:su Kelisoko mabuma: idoko motolo eba okolinalo la: Yua:pi Godotamo owadipalatelenakomata, iyo, nale ebena tabo la:tamo da:kiyawaonakomo ebe mabuma: gabamaniate na me idoko motamo iya-tiniya.

<sup>2</sup> La: dopamo nanitabolo olowimata Godote me woko natamo ikanamiya, ebena nilakapo tanalote la: Yua:piatamo ditana nale ebe tanalo la:tamo kawokalima:, <sup>3</sup> iyo, ebete dopamo kebe tanalo kowaminiyale, me tetelo ebete ebe wamina nopono magumu na iyatunamiya, nale ebe tanalo ebema: awokaliminakomo. Numa:la:, me leta magumulo na ebe tanalo awokalima:tepamo, <sup>4</sup> ebema: la: naimano iyaiya tabo ka:la:miole magumulo modobola la: Kelisokono wamina nopono magumu wadenomamo nelawiyala:, ebe tanalo ebe nale ebegodone dopamo diyatawiyamo ebe tanalola. <sup>5</sup> Nanitabola, me opolo dopamo dilukulionamiya ebe iyaiya epono tetelo Godote me wamina nopono magumu iba:tamo kawokaliminakia:, wiyasiya kalakala kawonomola, a tetelo ebena Uliyanate ebena wadetalena wokopiatamo awokalimiya, ibi ebete ebena sosi wagilima: iyaiya daliboliya ega:walo piyate ebena woki awokalimipima: deda:iya ebe wokopila.

<sup>6</sup> Ebema: numa:la:, me wamina nopono magumu ebe ma kunula. Me tetelo Yua:pi ega:walo Yu epo ibi bilibilinomate Wade Tabo nanitabokobi midit tanalodo Godokono wadewade walubi tanalo bilibilinomo kapimiya kuwatemala:na:, ega:walo iba:te ebena kapiya epoma: eba eda:onalo, Godote Ya:su Kelisodo ibi kowalubilima: kebe tabo dopamo nanitabolo ka:kiyawaiyale, ebe tabono tanalote ibi bilibilinomatamo kapimiya kemaigamene.

<sup>7</sup> Nanitabola, ebena woko na magumudo osiyodiloma: Godote ebena iyanomo elawo ebena nilakapolo natamo ikanamiya, iyo, ebe ikame tanalodo ebete na ebena wokodawama: a:midiniya nale Ya:sukono Wade Tabo epatamo ka:kiyawaonakoma:. <sup>8</sup> Ebema: numa:la:, Godokono epo bilibilinomo magumulo piyate egegenomoma: deda:ona ibi magumulo na da:pesonomoma: eba eda:nalo, wiyasiya Godote na lawenete wade wokonomo natamo gito ikanamiya. Nanitabola, naimano woko ebe ebena tabo Yua:piatamo kiyawao wokola, iyo, Kelisogodolo kebe dogodogo tanalonomate da:pola:na, ebete ebe wadewade tanalomo epono tepo magumu dowalubilinako, na ebe tanaloma: iba:tamo ebema: kiyawaonakomo.

<sup>9</sup> Ega:walo Godote ulama epetapi bilibilinomolo dowaminanami, ebete me tetelo ebe wamina nopono tanalodo woko keba kunu kosiyodilonale, nale ebe epo epetapiatamo atumu akawokaliminakomo. Nanitabola, me opolo ega:walo tobolo unulo da:pola:na, Godoko ebe inamabu bilibilinomo osiyodilowedawama: eda:na, ebena ebete ebena wamina nopono wamina tanalo magumulo ubi ma kunu iyatiya, <sup>10</sup> ebete me tetelo ebena sosi epagodolo ebena mulo tanalono iyaiya wadewade tanalo kawokalilaema:. Iyo, ebe ubila ebe tanalodo Unu Duliyomololo dilukuliona ebe nopopi magumulo piyate elawoelawonomoma: deda:ona ega:walo piyate elawoelawodopoma: deda:ona, ibi bilibilinomate ebena mulo tanalo wadenomamo kuima:.

<sup>11</sup> Ebema: nanitabola, Godote iyalo tetenomolo kebe tanalote pemaigama: ubi diyatiya, ulama epetapi bilibilinomate eba petolamelo woki iyakobi

midia:no ebete me tetelo aimano Kawodawa Ya:su Kelisokono woko magumudo ebe tanalo nanitabonomolo osiyodiliya. <sup>12</sup> Ebema: kalakala kawonomola, ale ebe magumulo eba ilukulinalo ebe nanitabokobi midit tanalodo ale Godokono ololo apuamo pelaema: tolea:noma: eda:onama:, iyo, gigiyute atamo a:iyamidalo itana. <sup>13</sup> Ebe mabuma: na Polote la: analemata, la:le naimano temeteme tanaloma: la:imano nanitabokobi midit magumulo elawoa:noma: akoeda:oala:, mabu naimano temeteme tanalate la: nanitabolo walubilinakota la:le Kelisoko mabuma: kamamawenama:

*Nanitabokobi Midipiate Kelisokono Kawo Nilakapo Tanalonomo Kiyatawaoma: Polote Tabo Da:kiyawaiya*

<sup>14</sup> Me mabuma: tete bilibilinomo epetapilo nale Nabiwi Godokono ololo apuamo pupamo pokolite la: mabuma: ebe na:petoweomenakomo, <sup>15</sup> mabu nanitabola, piyate Unu Duliyomololo dilukuliona ega:walo piyate me opolo dilukuliona, Godoko ebe ibi bilibilinomono Nabiwila, iyo, ibi bilibilinomono igilote ebe kapiyagodone pena.

<sup>16</sup> Ebene nale Godoko na:toweomenakomo, ebete ebene Uliyanano elawo ikame tanalodo la:imano tepo magumuno woki ka:kodakodailaema:. Iyo, ebe modobola la: kowalubilitama:, mabu kebe dogodogo tanalate ebene wade Alonomo Duliyomololo da:pola:na, ebete ebe wadewade tanalamo epono tepo magumu owalubilinako. <sup>17</sup> Ega:walo nale ebe walo na:ka:toweomenakomo, la:le Kelisoko nanitabokobi eba midinalo ebete ebe tanalodo la:imano tepo magumulo kokolinama:. Numa:la:, nilakapo kimalagidilo tanalo ebe wade pali damela keba kunula:ka: eba kunula, ebema: nale tanalo idima: Godoko ma kunu ka:toweomenakomo, ebete la: eba walubilinalo la:imano tepo magumuno dolodolote ebene nilakapo damela magumamo na:toamene, iyo, modobola nilakapo kimalagidilo tanalo kapiyate la:imano osiyodilole tanalo bilibilinomono mabuma: neda:namene.

<sup>18</sup> Eba kunu la:le Godokono epo bilibilinomo epetapiago woki wadenomamo kelaemamota, Kelisokono nilakapo kimalagidilo tanalote kawonomoma: deda:na ebe tanalo la:le kapimiya kiyatawaema:. O ebene nilakapo beda: kawonomola:ka:, iyo, ebe nilakapo tanalo lumagi idite modobutima: iyaiya modobulatole gabo nipo olena! <sup>19</sup> Ebema: numa:la:, me opo epo epetapiate Kelisokono nilakapo tanalono magumu nanitabonomolo a:kiyatawaonakoma:na:, wiyasiya nale Godoko na:toweomenakomo, ebete la: eba walubilinalo la:le ebe nilakapo tanalo wadenomamo kiyatawaema:. Nanitabola, me ebe gabodo ebete ebene wade okoli tanalamo la:imano tepo magumu kawonomamo detabokailamelelametamene, ebe tetelo la:imano osiyodilole magumulo la: ebe keba kunula:ka: eba kunu nanitabonomolo keda:omamota.

<sup>20</sup> Ebema: kalakala kawonomola, aimano tepo magumuno modoboa: tanalo ka:modoboilaema: ale aimano ubi alomo magumulo kebe wadewade tanalo uwatema: Godoko dananakoma:, ebe modobola ebe tanalo bilibilinomo atamo ikaeaema:, iyo, ebete atamo modobonomolo ikaeamete walo tete idilo gito ka:kikaeamene, mabu ebene elawo tanalote aimano tepo magumulo woko bosiyodilona. <sup>21</sup> Ebema: me opono uwomu tete pea:no, modobola Kelisokono sosi epate ebe magumulo eba ilukulinalo ibino woko osiyodilo tanalo magumudo Godoko nowalagonakoma:na:, iyo, uwomua: uwomua: tetelo amama tanalote ebegodolo nitanamene! Me tabo nanitabonomola, taula!

## 4

*Nanitabokobi Midipi Bilibilinomate Kelisokono Kapiya Apema: Deda:ona*



<sup>1</sup> Ebema: nale aimano Kawodawano woko osiyodilo tanaloma: gaba-manino idoko motolo eba okolinalo la: ma kunu toweolaemata, Godote la: ebenu ubilo kowapata:lama:wenama: deka:la:mitiyala, modobola la: eba kunu ebenu wadewade ga:limapi gudima: neda:oniyala:. <sup>2</sup> Ebene la:imano taneba magumulo idite idi nilakapolo demalagidilona, ebe tanalo kawokalima:ema: modobola idite iditamo samamo akodowaonakala:, iyo, modobola la: a:ka:tuwa: la: opamo alomawete epetapiatamo temeteme ikalamea:noma: eba eda:onalo epetapino tanaloma: ubia: tabo samamo akogelanakala:. <sup>3</sup> Numa:la:, Godokono Uliyanate la:imano tepo magumamo diyatilametana ebe milote la: kapiya epoma: midilinata, ebema: la:imano wokilo la:le kapiyama: eda: tanalo wade tanalonomoma: eba gelanalo, la:imano osiyodilole tanalo bilibilinomo magumulo gabo wadenomamo numinakiyala: ebe tanalote la:godolo nanitabolo kitanama:.

<sup>4</sup> Nanitabola, ale kebe wade tanalo uima: olowiolo dilukulinama: ebe tanalo kapiyala, iyo, Godote a eka:miya ale aimano ilukuli magumulo ebe tanalo kapimiya kemakopelenama:. Ma kunu a ebenu epo kapiya ape keba kunula:ka: eba kunula, ega:walo a magumulo woko dosiyodilona ebe Uliyana atumu ebe kapiyanomola. <sup>5</sup> Iyo, aimano Kawodawa ebe atumu kapiyala, aimano nanitabokobi midi tanalo ebe kapiyala, ega:walo aimano watowatopiate a kebe obamo dowaduba:midaoiya ebe obo atumu ebe kapiyala. <sup>6</sup> Ega:walo aimano Nabiwi Godoko ebe kapiyala, iyo, me opo epo bilibilinomate ebegodone pawokalaiya, ebema: ebe kapiyate ibi bilibilinomono Watodawama: eba eda:nalo, ibi bilibilinomagodolo ebenu woko osiyodilona, iyo, ebete ibi bilibilinomo magumulo bokolina.

<sup>7</sup> Ega:walo me tanalo idila. Kelisote Godokono iyaiya woko ado kosiyodilolenama: ebete idi kapiyatamo iyanomo elawo idi ikamete, idi kapiyatamo iyanomo elawo idi a:kikamiya, a bilibilinomatamo nilakapolo eba kunu ikaeamoiya, iyo, ebete ebenu ubi tanalo atamo keba kunu kiyatiyale, ebete woko osiyodilo tanalono elawo atamo iyaiya eba kunu ikaeamoiya.

<sup>8</sup> Nanitabola, Godokono Bukalo tabo idite ebe tanalo ma kunu awokalimina,

“Godokono Alibodawa Kelisote  
me opo epo kowalubilima:  
ebenu iyaiya tanalo  
iba:tamo nilakapolo gito ikalamoliya.  
Iyo, piyate eba:go da:gowelaonamiya,  
ebete ibino wato kikopu lawete,  
ebene ebenu amama baiamo da:nodoliya,  
ebete ebenu epatamo  
iyaiya nilakapo tanalo ebo ikalamoliya.”

<sup>9</sup> Ebema: modobola la: me tabono magumu wadenomamo ma kunu nemalagidilala:. Kelisote ebenu amama baiamo nanitabonomolo odoliya, mabu dopamo ebete ebe a:ka:tuwa: da:pesoma: midite me opono a:elao epono opamo gito niwisigiya. <sup>10</sup> Iyo, potele a:e magumamo da:niwisigiya, ebe walone tetelo tobolo ununomamo ebenu amama gobebobo laema: da:nodoliya ebe atu dawala. Ebema: ebete Kawo Elawodawano gobebobo eba kunu da:nelawiya, ebe tetelo ebete Unu Duliyomololo ega:walo me opo kawonomolo kebe wadewade woko iyalo tetenomolo dowagilamiya, ebe iyaiya woko bilibilinomo opoliyalema: tabo ebo iyatiya.

<sup>11</sup> Ebema: ebete ebe woko kopoliyadigalema:, ebete ebenu iyaiya woko osiyodilole tanalono elawo me opo epatamo nilakapolo ikalamoliya. Iyo,

ebete epetapi eba nalibolelo iba:tamo elawo ikalamiya iba:te iyaiya opolo ebenu nani sosi kapiya ka:nowagilima:, ega:walo ebete Godokono woki awokalimpiyatamo elawo idi atumu a:kikalamiya iba:te woko wadenomamo kosiyodilonama:, ega:walo ebete ebenu Wade Tabo atapiyatamo elawo idi atumu a:kikalamiya nanitabokobi midia:piate iba:godone nanitabo tanalo kolowioma:, ega:walo ebete iyaiya pasta ega:walo Godokono Buka apuno iyaiya tabono magumu iyatulamepi ibi bilibilinomatamo elawo idi atumu a:kikalamiya. <sup>12</sup> Numa:la:, ebete ebenu iyaiya elawo Godokono epatamo eba kunu ikalamoliya, mabu ebete ebenu ubi iyatiya ibi bilibilinomo elawokobi eba midililo iba:te me opolo ebenu iyaiya woko kosiyodilolenama:, iyo, me gabodo ibi bilibilinomate kapimiya Kelisokono apema: eba eda:onalo ibino nanitabokobi midi magumulo wadenomamo kapepeoma:na:. <sup>13</sup> Ebema: a bilibilinomate eba kunu aimano nanitabokobi midi tanalono osiyodilole magumulo kapiya eponomoma: eba eda:onalo, a kapimiya Godokono Guduno tanalo nanitabonomolo ebo kiyatawaomalema:. Nanitabola, ale aimano wokilo kawokawo kelatala apepeo epoma: deda:oma:, Kelisote ebenu tputupunomo osiyodilole magumulo keba kunu kokolinale, ale eba kunu aimano osiyodilole magumulo ebe keba kunula:ka: eba kunu nanitabonomolo bilukulionama:.

<sup>14</sup> Ebema: numa:la:, a:da: elemasigi dubate ibino mulo wokiamo epo kuba gabamo iyaiya magatalema: eba wagelenalo, piyate ibino tabamo da:tudila:onaka ibi daedale gudi keba kunula:ka: eba kunula. Iyo, awate iyaiya apune alogo tetelo kawokawo ulate iyaiya keba kunu kemaimionake, ebe epo eba kunula mabu iba:te ibino woki magumulo woki netewama: eda:ona. Wiyasiya ale aimano nanitabokobi midi magumulo egege gudima: eda:o tanalo datepama:, ebe tetelo ale a:da: elemasigipino iyatulame tanalamo walo a:ka:gudima:, <sup>15</sup> iyo, ale wiyasiya aimano ilukuli magumulo epetapi nilakapolo eba malagidilolenalo, idite iditamo Godokono nani tabono iyaiya tanalo kapiya ebo kiyawaonakoma:. Ebe gabodo ale wadenomamo apepeote aimano osiyodilole tanalo bilibilinomo magumulo Kelisoko keba kunula:ka: ale eba kunu keda:omalema:, mabu a sosi epo Kelisokono apema: eba eda:onalo ebe aimano apeno watoma: eda:na. <sup>16</sup> Nanitabola, ogiliate apeno iyaiya apuapu wadenomamo moga:lamolete, ebenu ebe apeno apuapu iyaiyate ibino ape kapiya magumulo eba pola:nalo ibino iyaiya woko modobolo osiyodilolena. Ebema: numa:la:, Kelisokono nilakapo tanalo ebe ebenu apeno ogili bilibilinomo keba kunula:ka: eba kunula, iyo, ebe nilakapo tanalote sosi magumulo eba itanalo, sosite nanitabokobi midi magumulo wadenomamo apete iyaiya woko osiyodilolema: elawonomoma: ebo keda:mene.

### *Nanitabokobi Midia:pino Ilukuli Tanalo Ega:walo Nanitabokobi Midipino Oli Igilago Ilukuli Tanalo*

<sup>17-18</sup> Ebe mabuma: nale la: Kawodawa Kelisokono mailamo eba analelo me tanalo idi kawo tanalomoma: gemo, nanitabokobi midia:piate keba kunu kilukulione, la:imano ilukuli magumulo ibi keba kunula:ka: eba kunu akoeda:oala:. Numa:la:, ibino tepo magumulo idoko kawonomote itana, ebema: ibino wokiate ibi kuba gabamo eba magatalelo gabo uwomu tetelo wade tanalo idi a:ka:nuima:na:. Iyo, iba:te Godokono nanitabo tanalo ubia:noma: eda:ote, wiyasiya daedale woki uwatete ibino tepo magumuno woki eba kodakodailamelo, ibi a:ka:tuwa: ibi Godogodone ebo iyailiya ebenu wade igilo kelaema:. <sup>19</sup> Ebema: dopamo iba:te kuba osiyodilole magumulo kebe ilipo tanalo diyatawaonakiya, me tetelo atu iyaiya kuba tanalo eba osiyodilolelo iba:te ilipoa:noma: eda:ona. Eba kunu iba:te ibino

wokilo kawonomamo malagidilolenalo, kateneno ubi tanalamo tudila:olo ibino apa:mo iyaiya ilipo tanalo kosiyodilolenama:, iyo, iba:te ebako kuba osiyodilolema: ibino iyawa kawonomote bitana.

<sup>20</sup> Eiye, la: Kelisogodone ebako kuba okoli tanalo kiyatawawea!  
<sup>21</sup> Nanitabola, la:le Ya:sukono tanalo wadenomamo olowimata, ebene la: ebe nanitabokobi eba midinalo, ebegodolo ditana ebe nanitabo gabono iyaiya tanalo ebene wokopiate la: ebo iyatulamiata. <sup>22</sup> Ebema: la: dopamo keba kunu kilukula:wenaima, ebe tagala ilukuli tanalono kuba osiyodilole tanalo bilibilinomo na:pupukulama:la:. Numa:la:, ebe tagala ilukuli tanalote la:imano a:da: elemasigi ubi tanalodo ele gabo la:tamo eba odidilo la: ebo kubailamenamiyata, <sup>23</sup> ebema: Godote la:imano tepo magumuno woki olinoma: ka:midilima:, modobola la: okoli bai ebetamo nikamiyala:. <sup>24</sup> Iyo, modobola la: ebene oli okoli tanalono osiyodilole tanalo nuwatiyala:, lumagite wadewade kaliku ka:pupulioma: kalakalago duwatanako eba kunu. Nanitabola, Godote ebe oli okoli tanalo a nanitabokobi midipi mabuma: osiyodiloamiya ale ebe keba kunula:ka: ebako epoma: keda:onama:, ebema: kebe tetelo ale ebene oli okoli magumulo nanitabolo dilukulinama:, ebe tetelo me opo epate ebene nanitabo tanalono tuputupu ega:walo talena okoli tanalo ado wadenomamo kuima:na:.

<sup>25</sup> Ebema: nanitabokobi mididawa, a:da: elemasigi tabo walo akokiyawala:. Modobola a:ma: wiyasiya a:ma: niyakabolo dokolina ebe lumagitamo nani tabono iyaiya tanalo kapiya na:kiyawaonakiye, mabu a nanitabokobi midipi bilibilinomate Kelisokono apema: kapimiya eda:onama:. <sup>26</sup> Ebema: a:ma: tanalo idima: da:dowaemene, a:ma: nanisiwale! Dowa tanalote ele gabo odidi tanalodo a:ma: kubamo magatama: modoboa:, ebene kebe tetelo dowa tanalote a:ma:godolo demaigamene, modobola samamo nolopoligadigamene. Iyo, kebe egelalo dowa tanalote a:ma:tamo da:pemene, modobola ebe atu egelate niwisiga:no a:ma: dopamo a:imano dowa tanalo iyabaiamo niyatiye, <sup>27</sup> mabu nanitabola, a:ma: me osiyodilo tanalodo Saitanatamo okoli bai a:kikama:emene.

<sup>28</sup> Ega:walo me tanalo idila. Kebe lumagite epetapino inamabu ega:walo mani pilolo dopamo duwatanaki, ebete ebako kuba osiyodilo tanalo atepate ebe a:ka:tuwa: ebene kotamo nanitabo woko nowagilimene. Nanitabola, mani woko osiyodilo magumulo ebe a:ka:tuwa: ebene iyaiya modoboa: tanalo modobokobi eba midililo, gabote ebegodolo ka:kitanamene ebete nigologolopi atumu ka:kowalubilima:.

<sup>29</sup> Ega:walo a:ma: kubakuba tabo akokiyawaonakala:, modobola a:ma: wiyasiya wadewade walubi tabo kapiya na:kiyawaonakiye, iyo, ebako tabo kiyawao tanalote a:ma:godolo eba itanalo, olowiopiate ibino modoboa: wokino tanaloma: wade walubi buwatanakoma:na:.

<sup>30</sup> Ebene la:imano osiyodilole magumulo la: Godokono Uliyanatamo temeteme ikaema: modoboa:, mabu Godote ebe la:tamo ikalamiata, ebete la: magumulo eba okolinalo Godokono pukalama: keda:nama:. Iyo, ebe pukalate la: ma kunu iyatulamenata, la:le ebene gudima: eda:onamata ebema: ebene Wade Egelate la: mabuma: nanitabonomolo kemaigamene, ebe Egelalo ebete la: me opono temeteme tanalo bilibilinomo magumune kowagailima:ta. <sup>31</sup> Ebema: modobola la: iyaiya dowa tanalo bilibilinomo na:pupukulama:la:, ma kunu la:le lumagi idino tanaloma: la:imano tepo magumute kakama: akoeda:onakala:, ega:walo la:imano tepo magumulo ela tanalote akomaiganakala:, iyo, la: lumagi iditamo ilipo ikaema: elawo tabo ega:walo ebe malogo tabo akogelanakala:, ega:walo la:imano ubi

tanalo akoiyatinakala: gabo idido ebe kubaima:.<sup>32</sup> Wiyasiya modobola la: magumulo idite iditamo nilakapo eba awokalimilo la:le epetapino teme-teme tanaloma: la:imano tepo magumu akokodakodailama:la:, iyo, kebe tetelo lumagi idite kuba dosiyodilomene la: ebena kuba egebolema:wete na:dodomatimiyala:, Godote la:imano kuba Kelisoko magumulo egebole-lametate keba kunu ka:dodolomatililametiya eba kunu.

## 5

### *Alo Magumulo Dilukuliona Ebe Epono Tanalo*

<sup>1</sup> Nanitabola, la: Godote kawonomamo demalagidiloletana ebe gudilata, ebema: modobola la: la:imano ilukuli magumulo ebe keba kunula:ka: ebako epoma: neda:onala:.<sup>2</sup> Numa:la:, Kelisote a:e magumulo ebena ape kalimagono inamabu keba kunula:ka: eba kunu midite ebena igilo a mabuma: Godotamo dikamiya, Godote ebe tanalo wade nibo inamabu ikame tanaloma: giya. Ebe mabuma: Kelisote atamo ebena kawo nilakaponomo keba kunu kawokalimiyale, modobola la: eba kunu atu nilakapo magumulo nilukulinala.

<sup>3</sup> Numa:la:, la: Godokono tuputupu epolata, ebema: me iyaiya kuba tanalo la:godolo akopola:nala: — kamiyale ega:walo buwelemele pilo tanalo, apa:mo iyaiya ilipo osiyodilole tanalo, ega:walo mani kawonomamo malagidilo tanalo. Iyo, ebakobako kuba osiyodilole magumulo kuba da:peso idinomote la:godolo akoitanala:, nanitabokobi midia:piate la:imano ilukuli tanaloma: kuba tabo gelakapoma:.<sup>4</sup> Ega:walo la: iyaiya daleyawoki awokalilaema: tabo akokiyawaonakala:, iyo, epetapino ilipo osiyodilole tanaloma: tabo gela:no modobola la: wiyasiya iyaiya tetelo kalakala tabo Godotamo nowadipalatenakiyala:.<sup>5</sup> Ebema: modobola la: me tanalo wadenomamo nemalagidilala:. Piyate kamiyalela buwelemelela iba:tamo pilo tanalo dosiyodilolenaka, ega:walo piyate ibino apa:mo iyaiya ilipo tanalo dosiyodilolenaka, ega:walo piyate mani kawonomamo demalagidilona, ibi bilibilinomo magumulo idite Kelisoko ega:walo Godoko ibi netewapino Kawo Elawodawano tanalodo wade walubi tanalo idi a:kuminakomene. Numa:la:, potele mani kawonomamo demalagidilona, ebena tanalo ebe ida:da:li amamalateledawano tanalo keba kunula:ka: eba kunula.

<sup>6</sup> Ebema: la: magumulo idite maigate me opo epono daedale wokiamo la: a:da: masigilima: dowagelemene, la: ebena tabo ako-olowiala:. Nanitabola, nale kebe iyaiya kuba tanaloma: la: kawiya kanaletama, ebako osiyodilole tanaloma: Godokono kawo dowo tanalonomote ka:pemene, iyo, piyate ebetamo tudila:oma: ubia:noma: deda:ona iba:te kuba wiya kelaema:na:.<sup>7</sup> Ebe mabuma: la: ebako epago tanalo idi osiyodilola:no iba:go akokapiyala:.

<sup>8</sup> Nanitabola, la: dopamo idoko magumulo ilukulinaimata, wiyasiya la: idoko magumune pemaimiawete me tetelo aimano Kawodawano alo magumulo ilukulinamata, ebema: la: alono gudima: eba eda:onalomodobola la: alo magumulo wadenomamo nowapata:lamenala:.<sup>9-10</sup> Iyo, la: Kawodawa Godoko kekalakalaima:ema: la:imano osiyodilole magumulo gabo wadenomamo numinakiyala:, mabu numa:la:, piyate alo magumulo nanitabolo dilukuliona, iba:godone wadewade da:imi bilibilinomate pemaimionaka, ega:walo iba:te Godokono tuputupu okoli tanalo eba awokaliminalo ebena nani tabono iyaiya tanalo ebo kiyawaonaka.<sup>11</sup> Ebe mabuma: piyate idoko magumulo dilukuliona, la: ebe epono osiyodilole tanaloma: iba:go akokapiyala:, mabu ibino osiyodilole magumune wade da:imi idite kape-maiganakoa:. Modobola la: wiyasiya Godokono alamo ibino osiyodilole

tanalo na:pukuilamiyala; epo epetapiate ebe kuba tanalono temeteme magumu wadenomamo kuima; <sup>12</sup> mabu nanitabola, tuputupu lumagite tabo gema: ilipokobi kolowimene iba:te diya gabodo dosiyodilolenaka ebe tanaloma:!

<sup>13</sup> Ega:walo me tanalo idila. Epate dowaminalena Godote ebe tanalo bilibilinomo waminale magumune ebenu alamo kowaulatelemene, iyo, ebe tanalono nanitabo magumu ebo kawokalaoma:na; <sup>14</sup> ebema: me opono tanalo bilibilinomo magumulo alote kebe tanalo da:pukuimene epate wadenomamo kuima:na; wamina magumulo walo a:kitanamene. Me mabuma: Godokono epate mulo tabo idi ma kunu gelana,

“U dowatawita, a:ma: nemaiga!  
A:ma: a:e magumune pemaigawete  
igilo walo da:kelawa:emene,  
Kelisokono alote  
a:ma: ebo ka:pukuima:ta.”

<sup>15</sup> Ebema: modobola la: mulo woki epoma: eba eda:onalo la:imano osiyodilole tanalo wadenomamo nemalagidilolenala; iyo, muloa: epo akoibamilatela:la. <sup>16</sup> Numa:la; me opo kawonomolo me tete nanitabokobi midia:pino kuba osiyodilole tetema: eda:na, ebema: Godote kebe wadewade tete la:tamo dikalametanaka, modobola la: ebe iyaiya tetelo wade walubi tanalo epatamo nosiyodilolenakiyala. <sup>17</sup> Ebema: la: daedale epoma: eda:oa:no, wiyasiya Kawodawa Godote la:le kosiyodilola:ema: ebenu ubi tanalo keba kunu kiyatinale, modobola la: ebe iyaiya tanalo wadenomamo niyatawaonala:

<sup>18</sup> Ega:walo me tanalo idila. La: elawo gala:ipi da:imi obo kawiya akoniala; mabu la: eba kunu dowagela:ema, la:imano nio tetelo daedalema: eba eda:olo la: a:ka:tuwa: la: ebo ka:kubailaemamota. Modobola la: wiyasiya Godokono Uliyanano tanalo kawiya na:nionakiyala; ebete la:imano tepo magumu wadenomamo ketabokailaema. <sup>19</sup> Ebema: la: la:imano tepo magumulo iyaiya oale alapio tanalamo Godoko wadenomamo namatenakiyala: Iyo, ma kunu Godokono Bukano Sam Oale bukalo da:pola:na ebe oale, ega:walo nanitabokobi midipiate Godokono anoano tanalo awokalilaema: dosiyodilolenaka ebe oale, ega:walo ebenu Uliyanate la:imano tepo magumamo dalomonako ebe oale, la:imano iyaiya tetelo epetapiate epetapi ebe iyaiya oaleno tabamo eba waluba:tiuilolo la:imano Kawodawatamo balapionakomata. <sup>20</sup> Ebene la:le aimano Kawodawa Ya:su Kelisoko waloma:ta tanalo kawokalima:ema; modobola la:imano ilukuli magumulo kebe iyaiya tanalate la:tamo ka:pemaimione, la: ebe tanalo bilibilinomoma: Nabiwi Godotamo kalakala tabo nowadipalatenakiyala:

*Nanitabokobi Mididawa Dubu Ega:walo Ebenu Kamiyale Iba:te Keba Kunu Na:kokolionama:na:*

<sup>21</sup> Ebema: nanitabokobi midipiala; la: Kelisotamo eba tudila:olo, ebe unamo kadipata:ema: modobola la: magumulo idite iditamono nilakapolo na:tudila:onakiyala:

<sup>22</sup> Ebema: modobola la: nanitabokobi midipi kamiyala:te la:imano awiatamo na:tudila:onakiyala; la:le Kelisotamo keba kunu ka:tudila:wenama eba kunu. <sup>23</sup> Numa:la; Kelisote sosi magumulo nanitabokobi midipino watodawama: keba kunu keda:nale, eba kunu dubute ebenu kamiyaleno watodawama: keda:na, wiyasiya modobola la: dubate me tanalo idi wadenomamo nemalagidilala; sosi epate Kelisokono apema: eba eda:onalo,



ebete ibi mabuma: ebenu nilakapo kawonomo awokalimite ibino Igilo Mula:ledawama: ebo ediya.

<sup>24</sup> Ebema: sosi epate Kelisotamo keba kunu ka:tudila:one, modobola kamiyala:te atumu ibino awiatamo eba kunu na:ka:tudila:onakoma:na.

<sup>25</sup> Wiyasiya nanitabokobi midipi dubala:, la: me kawo tanalo idi akododomatjala:. Kelisote sosi epo nilakapolo eba malagidilolenalo ibi mabuma: ebenu igilo iyabaiamo keba kunu kiyatiale, modobola la: eba kunu la:imano kamiyale nilakapolo nemalagidilolenala:.

<sup>26</sup> Numa:la:, Kelisote ebenu igilo iyabaiamo iyati tanalodo ebete sosi epo gito uwatiya, iba:te Godokono talenapima: eba eda:onaloo ebenu woko kosiyodilonama:. Iyo, Kelisote ebe epono kuba osiyodilole tanalo ega:walo ibino tepo magumuno daleyawoki ebenu tabono iyaiya tanalamo ukulaolenomo dukulaoliya, iba:te olioli epoma: ebo eda:iya, epate mala: ikila: tanalodo molomoloa:noma: keba kunu keda:onake eba kunu. <sup>27</sup> Nanitabola, Kelisote ebenu ubi tanalo ma kunu iyatiya, ebenu woko osiyodilo tanalodo sosite agalu buwelema: deda:mene, ebene ebe a:ka:tuwa: ebe wade pukuilame sosi ebenu kamiyalema: kaidimene. Ebema: ebe kamiyalegodolo kuba idi da:pesonomote a:kitanamene, iyo, ebete dubu idino tanalo iyatawa:no tuputupunomolo eba okolinalo, ebete da:pulinako ebe kaliku ebe daleyawade kalikunomola, ebenu a:la:uwa:da:le beda: kawonomola:ka:!

<sup>28</sup> Ebema: modobola nanitabokobi midipi magumulo dubu idite ebenu kamiyale nilakapolo nemalagidilonamene, ebe a:ka:tuwa: ebenu ape keba kunu kemalagidilonale eba kunu. Numa:la:, dubute kamiyale daidimene ebe tetene wagilimite ibino ilukuli igilote kapiyama: keda:mene, ebema: kebe tetelo ebete ebenu kamiyale demalagidilona, ebe atu gabodo ebe a:ka:tuwa: ebe na:kemalagidilona. <sup>29</sup> Nanitabola, me opolo dubu idite ma kunu kokolina:, ebete ebenu apeno iyaiya modoboa: tanalo ulame tetelo ebe a:ka:tuwa: ebe kowalubinakoa:. Ao, dubuno osiyodilole tanalo eba kunua:. Kebe tetelo bae kape tanalote ibi dulame, ibi a:ka:tuwa: ibi walubilima: bae okalimiote ebo naonaka, ebema: modobola nanitabokobi midipi dubate ibino kamiyaleno iyaiya modoboa: tanalo magumulo ibi atumu na:kowalubilinakoma:na:. Numa:la:, Kelisote a sosi epo kawonomamo eba malagidilolenalo ebete a eba kunu walubinako, <sup>30</sup> mabu a nanitabokobi midipi bilibilinomo ebe ebenu apeno iyaiya apuapula.

<sup>31</sup> Ebene Godokono Bukalo tabo idite ma kunu itana, “Me mabuma: dubute ebenu menokola nabiwila miyapate ebenu kamiyala:go kapiyama: keda:mene.” <sup>32</sup> Numa:la:, me tabono magumu tanalo idite waminalo ditana, nale ebe tanalo la:tamo ma kunu awokalimo, sosi epo ebe Kelisokono kamiyalela, ebema: nanitabokobi midipi ega:walo ebe iba:te kapiyama: nanitabonomolo eda:na. <sup>33</sup> Ebema: la: naimano dopo iyatulame tabo eba lawelo, me netewa kawokawo tanalo atumu na:kemalagidilola:la:. Dubute ebe a:ka:tuwa: ebe keba kunu kemalagidilonale, modobola ebete ebenu kamiyale eba kunu nemalagidilonamene, ega:walo kamiyalete ebenu tepo magumuno wokilo ebe a:ka:tuwa: ebe opamo eba iyatilo ebenu awi unamo nadipatenakomene.

## 6

*Nanitabokobi Midipi Gudi Ega:walo Ibino Nabila Menokobila Iba:te Keba Kunu Na:kilukulinama:na:*

<sup>1</sup> Guda:la:, modobola la: la:imano nabila menokobila iba:tamo na:tudila:onakiyala:, mabu Godote ebe tanalo tuputupu osiyodilo tanaloma: gena. <sup>2-3</sup> Iyo, Godote Isalaela epatamo kawo totomu tabo idi ma

kunu ikalamiya, “A:imano nabiwila menokola ibino tanaloma: kuba tabo kiyawaoa:no iba:tamo na:tuduwatanakiye.” Ebene ebete walo na:kegiya, “Me totomu tabamo tuduwata tanalodo a:ma: wade walubi tanalo nagodone ma kunu kelaema:ta, a:ma:le tete geyageyanomolo wade opolo eba okolinalo tanalo bilibilinomo magumulo nale a:ma: wadenomamo bowalubinakomata.” Ebema: numa:la:, Godokono Totomu Tabo bilibilinomo magumulo me totomu tabo ebe dopo totomu taboma: ediya, lumagino tuduwata tanalodo Godote ebetamo wade walubi tanalo kiyatinakoma: nanitabolo egiya.

<sup>4</sup> Ega:walo la: piyate nabima: deda:wenama, la: la:imano gudino iyaiya osiyodilole tanaloma: ibi tete bilibilinomolo kawiya akoanalenakala:, iba:te ibino tepo magumulo la:tamo dowaokapoma:. Modobola la: wiyasiya Kawodawa Kelisokono iyatulame tanalamo ibi eba totomulatelenalo ibino kuba osiyodilole tetelo iba:tamo modobo wiya nikalamenakiyala:, iba:te nanitabokobi midi magumulo wadenomamo kapepeoma:.

*Nanitabokobi Midi Wokopi Ega:walo Ibino Woko Namutupi Ibino Osiyodilole Tanalo*

<sup>5</sup> Ebene kawokawo wokopi dubate la: kebe epo maniamo duwatetiya la:le ibino wiya: woko kosiyodilola:wenama:, ebe dubate me opolo la:imano woko namutupima: eba eda:onalo, modobola la: la:imano wokilo ibi tolelamelo ibi unamo wadipalatela:wete iba:tamo na:tudila:onakiyala:, la:le Kelisotamo keba kunu ka:tudila:wenama eba kunu. Iyo, modobola la: la:imano tepo magumulo kuba woki idi wamina:no woko nanitabonomolo nosiyodilonakiyala:. <sup>6</sup> Ega:walo woko osiyodilo magumulo la: ma kunu akomalagidilala:, woko namutudawate natamo kekalakalama:, ebete na dunamita ebe kapiya tetelo nale woko wadenomamo osiyodilonakomo. Ao, eba kunua:. Woko namutudawate la: ulame tetelo ega:walo ulamea: tetelo, modobola la: Godokono ubi tanalamo tudila:olo, la: a:ka:tuwa: la: Kelisokono wokopima: eba gelalo la:imano tepo magumuno elawo kawonomamo woko ebo nosiyodilonakiyala:. <sup>7</sup> Iyo, la:le la:imano woko nanitabo kalakala tanalago osiyodiloma: modobola, mana: me opo epo kalakalailaema:, la: wiyasiya aimano Kawodawa Kelisoko kekalakalaima:ema: woko wadenomamo nosiyodilonakiyala:. <sup>8</sup> Ebema: piyate wiya: wokopima: deda:ona ega:walo piyate mani woko dosiyodilona, modobola la: bilibilinomate me kawo tanalo akododomatiala:, aimano Kawodawate epo bilibilinomono osiyodilole tanalo eba ulamenalo, ebete wade wokodawatamo ebeno wade wiya nanitabonomolo kikaemene.

<sup>9</sup> Ega:walo la: nanitabokobi midipi woko namutupiala:, piyate la:imano woko wiya:no kosiyodilonama: maniamo duwata:wiyama, la: ebe wokopiatamo atumu wade tepo magumuno nilakapo nawokaliminakiyala:, iyo, kebe tetelo iba:te woko modobodopolo osiyodiloa:no, ebe tetelo la:le ibi temeteme wiya ikalaema: akoanala:la:. Modobola la: me kawo tanalo akododomatiala:, la: ega:walo ibi la: bilibilinomo ebe Unu Duliyomololo dokolina ebe Kawo Watodawanomono wiya: wokopilata. Nanitabola, ebe Kawodawate kapiya gabonomodo epo bilibilinomono tanalo tuputupulo kanagilamelelaemene ibino modobo wiya iba:tamo kikalamolama:.

*Nanitabokobi Midipiate Saitanago Gowelama: Kebe Inamabu Ka:pupulinake*

<sup>10</sup> Ebema: me leta uwomu apulo nale la: ma kunu analemata, la: aimano Kawodawa Kelisoko magumulo eba ilukulinalo ebeno kawo elawonomo lawa:wete elawonomoma: neda:iyala:. <sup>11</sup> Ega:walo la: nanitabokobi

midi tanalono gowelao magumulo wato kikopu kelawa:ema; modobola la: Godokono gowelao inamabu bilibilinomo na:pupulinakiyala; ebema: Saitanakono a:da: elemasigi tanalate la:tamo da:pemaimioma:na; ebe tetelo la: modoboma: keda:omamota la:le kodakodalo kelamota:wenama. <sup>12</sup> Numa:la; aimano gowelao tanalote me opo epo epetapiatamo kitana; wiyasiya ale iyaiya kubakuba uliyana kapiyago gowelaonakoma: Iyo, ibi magumulo epetapi elawoelawodopo uliyanala ega:walo epetapi elawoelawonomo uliyanala, epetapi me opono idoko magumulo dowapata:lamena ebe uliyanala ega:walo epetapi ebe tobolo unulo elawamo dowapata:lamena ibila. <sup>13</sup> Ebema: la:imano gowelao tanaloma: Godokono modobo inamabu bilibilinomo na:pupula:la; mabu nanitabola, la: ebe inamabu eba pupulilo, kuba tetete la:tamo da:pemaigamene, la: Saitanatamo elawokobi ebo kolowiomamota, iyo, gowelao magumulo la:le okoli bai ebetamo ikamea:no kodakodalo kelamota:onamamota.

<sup>14</sup> Ebema: nanitabokobi mididawa, a:ma: kodakodalo eba utinalo ma kunu nolosiyodiliye. A:ma:le Godokono nanitabo tanalo a:imano batamu pula:wete na:kodakodaimiye, ega:walo ebena tuputupu okoli tanalo a:imano negege inamabumu ka:pula:wete, <sup>15</sup> ega:walo ebena milo epatamo dikalamena ebe Wade Tabo a:imano agowa inamabumu na:pupuliye, gowelao magumulo a:imano agowate igiligadigakapoma: <sup>16</sup> Ebene a:ma:le Godoko nanitabokobi da:mida:wena, modobola a:ma: tete bilibilinomolo ebe tanalo a:imano makeyo inamabumu lawa:wete natanakiye, mabu nanitabola, a:ma:go da:gowelana ebe Kubadawate ebena ela menagono biago a:ma:tamo da:piyokomene, a:ma: modoboma: keda:ma:ta ebe inamabu a:imano nanitabokobi midi tanalamo kodiyo:ema: <sup>17</sup> Ebene epono igilo mula: tanalote Godogodone demaigana, modobola a:ma: gowelao magumulo ebe tanalo a:imano dibamu ka:pula:wete, ega:walo Godokono Uliyanano gowelaono gili akonelawiye, ebe gili ebe Godokono Tabola.

<sup>18</sup> Ebene iyaiya tete bilibilinomolo la:le iyaiya towetowe tabo gela tanalodo Godokono Uliyanano elawamo ebetamo negelanakiyala; iyo, modobola la: ebe tanalo osiyodiloma: elawoa:noma: eda:oa:no ebena iyaiya epo bilibilinomo ebo nowadipalatenakiyala: <sup>19</sup> Ega:walo modobola la: na mabuma: Godoko atumu ma kunu na:ka:toweomenakiyala; kebe tetelo nale Wade Tabo kiyawaoma: wade tete duminakomo, ebete natamo wadewade woki modobolo nikanamenakomene. Numa:la; Godote ebe Tabono magumu epatamo dopamo owaminiya, wiyasiya me tetelo ebe ubi niyatina nale ebe tanalo nanitabokobi midia:piatamo tolea:no eba awokalimilo iba:te wadenomamo kiyatawaoma; <sup>20</sup> iyo, nale Wade Tabo iyaiya epatamo atama: ebete na ebema: ka:na:miya. Nanitabola, ebe woko osiyodilo tanaloma: nale gabamanino idoko motolo okolinamo, ebema: modobola la:le towetowe tabamo na Godotamo nadipatenenakiyala; ebete modobo elawo natamo eba ikanamelo ebe Tabo kiyawao magumulo nale tolea:noma: keda:nama:

### *Polote Leta Uwomu Apulo Iyaiya Tabo Da:kiyawaiya*

<sup>21</sup> La: niyaniyata, aimano nanitabokobi mididawa ekawi idi Tikika-site la:tamo da:pemene, ebete naimano okoli tanalo ega:walo osiyodilole tanalo bilibilinomo la: ka:pikiyawaolaema:ta. Nanitabola, ebete Kawodawa Ya:sukono wade wokodawa idima: eda:na, <sup>22</sup> ebema: nale ebe la:tamo palibomo, la:le aimano iyaiya ilukuli tanalo ebegodolo dolowiaema la: kalakala ebo kelaemamota.

<sup>23</sup> Ebema: modobola Nabiwi Godoko ega:walo Kawodawa Ya:su Kelisoko iba:te nanitabokobi midipi ekaki bilibilinomatamo milo tanalo ega:walo nilakapo kimalagidilo tanalo eba ikalamelo ibino nanitabokobi midi tanalo

kawokobi ebo na:midililaema:na: 24 Ega:walo piyate uwomua: tetelo aimano Kawodawa Ya:su Kelisoko kawonomamo demalagidilonama:na:, modobola Godokono nilakapo tanalote ibi bilibilinomagodolo nitanamene. Me ebe naimano tabo uwomula. Taula.

## POLOTE LETA PILIPAI SOSI EPATAMO OSIYODILIYA

<sup>1</sup> Na ebe Polotela. Na ega:walo Timotiko ale Ya:su Kelisokono wokopi epetapima: eda:onama:, ebema: la: Pilipai duliynomololo piyate Ya:su Kelisoko magumulo Godokono epoma: deda:wenama, ale me leta la:tamo paliboma:, ega:walo la: sosi watowatopi ega:walo la: piyate woko osiyodilo magumulo watowatopi dowalubila:wenama, ale me leta la: mabuma: atumu nakapaliboma:.

<sup>2</sup> Modobola aimano Nabiwi Godoko ega:walo Kawodawa Ya:su Kelisoko, iba:te ibino nilakapo tanalo ega:walo milo tanalo la:tamo nikalaema:ta.

*Polote Pilipai Sosi Epono Tanaloma: Kalakala Towetowe Tabo Godotamo Da:kiyawaiya*

<sup>3</sup> Nale tete bilibilinomolo la: eba malagidilolenalo naimano Kawodawa Godotamo kalakala tabo adipatenakomo. <sup>4</sup> Iyo, nale la: towetowe tabamo kalakalago owadipalatenakomata, <sup>5</sup> mabu la:le Godokono Wade Tabo nagodone dolowiaima, ebe tetene wagilimite me teta:mo pemaiga la:le nago kapimiya ebe atu woko osiyodilonapimata. <sup>6</sup> Ebema: nale me tanalo iyatawanomola, kebe Kawodawate la:imano taneba magumulo wade woko dowagilimi, ebete ebe woko atepa:no Ya:su Kelisokono Uwomu Egelalo opoliyanomo kopoliyamene.

<sup>7</sup> Nanitabola, nale la: naimano tepo magumuno nilakapamo demalagidiloletanama, ebe tanalo modobonomoma: eda:na, mabu Godote ebena nilakapo natamo eba awokalimilo kebe woko natamo kikanamiyale, na dopamo idoko motolo okolina: tetelo la: bilibilinomate ebe woko magumulo na owalubininakimata. Ega:walo kalakala kawonomola, me tetelo nale idoko motolo eba okolinalo, kebe iyaiya tetelo gabamaniate naimano tanalo danagiyamidamenaka, la:le na walo a:kowalubininakomata nale Wade Tabono nanitabo tanalo wadenomamo kawokaliminakoma:. <sup>8</sup> Iyo, Godote naimano nanitabo tanalo iyatawala, ma kunu nale Ya:su Kelisokono tepo magumuno nilakapo tanalago la: demalagidiloletanama.

<sup>9</sup> Ebema: nale la: mabuma: towetowe tabo Godotamo dadipatenakomo, ebe tanalo ebe ma kunula. Modobola Godokono nanitabo iyatawa tanalote ebena mulo wokino tanalago la: magumulo eba apepeonalo, la:imano nilakapo kimalagidilo tanalote atumu kawonomamo nakapenamene. <sup>10</sup> Ebe mabune la:le la:imano ilukuli magumulo tanalo bilibilinomo wadenomamo eba anagilamenalo, la:le tuputupu tanalo kapiya lawa:wete Kelisokono Uwomu Egelalo daleya:noma: deda:wenama, idawate a:ka:modobomene la: kuba osiyodilolepima: ka:la:ima:. <sup>11</sup> Iyo, me gabodo Ya:su Kelisokono tuputupu okoli magumune da:pemaimiona ebe da:ima:te la: magumulo betabokaonama:na:, ebema: Godokono mailote kawoma: eba eda:lo ebe a:ka:tuwa: ebe ebo bowalagonamene.

*Ya:sute Polokono Igilo Mabuma: Eda: Tanalo Polote Dawokalimiya*

<sup>12</sup> Ebema: naimano nanitabokobi midipi ekakiala:, na ubila la: me tanalo wadenomamo iyatawaoma:, kebe temeteme tanalate natamo ka:pemaimiye, Godote ebe tanalo magumudo gigiyu a:iyamidi epetapiate Wade Tabo wadenomamo kolowioma:. <sup>13</sup> Me mabuma: Loma epono Kawo Elawodubunomono moto datila:na, ebe gowelaopi ega:walo piyate



me kawo duliyoumololo dilukuliona, ibi epetapi bilibilinomate naimano tanalo wadenomamo ma kunu iyatawaona, nale Kelisokono woko osiyodilo tanaloma: idoko motolo dokolinamo.

<sup>14</sup>Ega:walo kalakala kawonomola, naimano idoko motolo okoli tanaloma: nanitabokobi midipi ekaki epetapi bilibilinomate aimano Kawodawag-odone elawo walo a:kelawiya, iba:te na keba kunula:ka: tolea:no ebena Wade Tabo awokala ka:kiyawaoma. <sup>15</sup>Nanitabola, ibi magumulo epetapi-ate ibino tepo magumuno kuba wokiamo Kelisokono tabo kiyawaonaka, ma kunu iba:te naimano wade mailo pilo gabodo laema: wagelena, ega:walo iba:te ibi magumulo eba apaminateuilo ibino woko osiyodilo tanaloma: amamaona. Wiyasiya epetapi ibi eba kunua:, iba:te wade woki kapiyamo Wade Tabo kiyawao woko osiyodilonaka, <sup>16</sup> iyo, iba:te na nilakapolo eba malagidilonenalo wade woko bosiyodilona. Ibi iyatawala Godokono ubilo na idoko motolo dokolinamo, mabu gabamaniate kebe iyaiya tetelo naimano tanalo danagiyamidananaka, nale Wade Tabono nanitabo tanalo wadenomamo ebo awokaliminakomo. <sup>17</sup>Wiyasiya piyate kuba wokiamo Kelisokono tanaloma: da:kiyawaonaka, ibi ubi niyatina nale idoko motolo eba okolinalo temeteme epetapi natamo gito kikaname-nama:. Iyo, ibi ubila epetapino mailo eba kubailamelo ibi a:ka:tuwa: ebo kowalogolema:, ebema: iba:te woko nanitabo gabodo kosiyodilona. <sup>18</sup>Eiye, iba:te temeteme natamo ikanaema: dowagelena, ebe tanalo kawo tanalooa! Wiyasiya kawo tanalo ebe ibino tabo kiyawao tanalodo iyaiya epate Kelisokono tanalo dolowionaka ebe tanalola. Ebema: wokopiate ibino tepo magumuno kuba wokiamo o wade wokiamo ebena tanalo dawokaliminaka naimano kalakalate itananako. Ega:walo na me tanalo idima: nekalakalitamo, <sup>19</sup> na iyatawala la:le towetowe tabo Godotamo dadipata:wenakoma, ebe tanalodo ega:walo Ya:su Kelisokono Uliyanano walubi tanalodo nale me idoko motone ka:nemaigamamo.

<sup>20</sup>Nanitabola, nale ubi kawonomago olowiolo makopelenamo, naimano tanalo anagiyamidaname tete gabamaniagodone demaigamene, nale tabo idi kiyawaoma: ilipoa:no ega:walo tolea:noma: eba eda:lo, Kelisote epono ololo apulo amama tanalo ebo kelaemene. Modobola ebete tete bilibili-nomolo na magumulo amama tanalo nelawenakomene, iyo, na igilolo dokolinamo o iba:te naimano igilo gito ditamidanaema:na:, naimano ubi tanalote eba kunu bitananakomene. <sup>21</sup>Ebema: numa:la:, nale me opolo eba okolinalo naimano igilo Kelisoko mabuma: kalakalago iyatinamo, wiyasiya nale da:emo naimano kalakala idite ka:kitanamene mabu nale ebegodone naimano wade wiya ka:nelaemamo. <sup>22</sup>Iyo, na me opono igilago eba okolinalo woko osiyodilo magumulo wade da:imi Godotamo da:noloilamenakomo, ebe wade gabote natamo eba itanalo wiyasiya naimano a:e tanalodo wade gabo idite natamo kitanamene.

Eiye, me wadewade gabo netewate natamo eba pola:nalo ibi magumulo nale kebe gabodo na:ka:tomo? <sup>23</sup>Nanitabola, naimano tepo magumulo ebe netewa wokino tanalate ebema: apaminateuina. Nale me opo atepate Ya:sukono okoli duliyoumololo eba:go ka:nokolinama: ubi kawonomamo iyatinamo, mabu na niyatawanamo ebena Unu Duliyoumolono kalakalate me opono kalakala nanitabolo kodolimene. <sup>24</sup>Wiyasiya na tanalo idi kawonomo ma kunu kiyatawanamo, modobola nale la: mabuma: me opolo okolinama:, mabu kebe tetelo nale la:go okolina:no la:le walubi tanalo pogodone na:kelawa:wenakoma? <sup>25</sup>Me mabuma: na iyatawala, nale me tetelo la: miyapa:no la: walo da:ka:powalubilitama, la:imano nanitabokobi

midi magumulo kalakala tanalote ununomamo eba odololo la: ebo kapepeo-mamota. <sup>26</sup> Iyo, nanitabola, nale me idoko motone nemaigate la:go kokolima: la:tamo walo da:ka:pemo, ebe tetelo la:le Ya:su Kelisoko magumulo kalakala kawonomo na mabuma: ebo kelaemamota.

*Kelisoko Nanitabokobi Midipino Gowela Tanalo*

<sup>27</sup> Ebema: me kawo tanalonomola, modobola la: Kelisokono wade ga:limapi gudima: neda:oniyala:, ebene Wade Tabote la: keba kunu kiy-atulametana eba kunu. Ebene nale la:go da:pokolinamo o nale mululo eba okolinalo la:imano tanalo gito dolowinakomo, nale tete bilibilinomolo me tanalo biyatawanamo, la:le la:imano nanitabokobi midi magumulo woki kapiyalo kodakodalo eba lamota:onalo kapimiya gowelaonakomata, epate Wade Tabo olowi tanalone nanitabokobi ka:midima:. <sup>28</sup> Iyo, eba kunu piyate la:go da:gowelaona la:le ibino osiyodilole tanaloma: a:ka:toletoleawenama, ebene Godote la:imano tolea: tanalodo ibi kiyatulaemene, ebete ebene elawo kapiyamo la:imano igilo eba mula:lalamelelo ibi wiyasiya gito ka:kubailaemene. <sup>29</sup> Numa:la:, Godote ebene nilakapo tanalodo la: eka:la:miata la:le Kelisoko nanitabokobi midipima: keda:wenama:, ega:walo kalakala kawonomola, ebete atu nilakapo magumulo la: a:keka:la:miata la:imano nanitabokobi midi mabuma: temeteme tanalo kuwata:wenakoma:. <sup>30</sup> Me mabuma: la:le gowela magumulo ba:pola:namata, nale dopamo kebe gowela magumulo kokolinaimo ega:walo me tetelo da:ka:lutamamo ebe atu gowela tanalola. Nanitabola, la:le dopamo naimano gowela temeteme duma:ima, ebe tanalo nagodolo walo eba kitanalo la: me tetelo walo a:kolowimata.

## 2

*Kelisoko Ebe A:ka:tuwa: Da:pesoma: Midi Tanalodo Godote Ebe Ununomamo Dadipatiya*

<sup>1</sup> La: numa:la:, la: Kelisoko magumulo ebegodone elawo elawenakomata, ega:walo la: temeteme magumulo ebene nilakapo tanalodo gelebadi iyatawaonakomata, ega:walo la: ebene Uliyanago kapimiya owapata:lamenakomata, ega:walo la:imano tepo magumulo epetapiate epetapiatamo nilakapo awokaliminakomata. <sup>2</sup> Me mabuma: modobola la: naimano kalakala ma kunu kawokobi na:midinala:, la: woki kapiyalo eba ilukulinalo epetapiate epetapi atu nilakapo tanalamo nemalagidilolenala:, iyo, la:imano tepo magumulo kapiyama: eba eda:onalo la:le woko osiyodiloma: ubi tanalo kapiyanomoma: na:midinakiyala:. <sup>3</sup> Ebema: la: magumulo idite ebe a:ka:tuwa: ebe kapiya malagidilo tanalone o amama tanalone tanalo idi ako-osiyodilala:, wiyasiya modobola la: a:ka:tuwa: la: opamo eba alomonalo, la:imano tepo magumuno wokilo nanitabokobi midipi epetapi kawokawopima: na:midilinakiyala:. <sup>4</sup> Ebene la: magumulo idite ebe a:ka:tuwa: ebene tanalo kapiya akomalagidilonakala:, ao, ebete wiyasiya epetapino modoboa: tanalo ebene modoboa: tanalago kapimiya nulamenakomene. <sup>5</sup> Ebe mabuma: modobola Ya:su Kelisokono tepo magumulo ditana, ebe atu nilakapo wokino tanalote la: magumulo woko nosiyodilonamene.

<sup>6</sup> Ebete dopamo Godokono ololo kapiyamo okolinami,  
wiyasiya a walubi tete da:pemaigiya,  
ebe a:ka:tuwa: ebene tanalo kemalagidiloma:  
ebete Godoma: deda:na  
ebe tanalo kodakodalo katila:niya:.

<sup>7</sup> Ebete wiyasiya ebene kawo elawodawano okoli bai

balamo kalakalago eba iyatilo,  
 ebete me opo lumagima: eda:te  
 epono ololamo atamo ebo pawokaliya,  
 iyo, ebete wiya: wokodawano ololamo pemaigiya.

<sup>8</sup> Ebene ebete ebe a:ka:tuwa: opamo eba iyatinalo  
 ebenu Nabiwino ubi tanalamo ebo tuduwatanaki,  
 ebema: ebenu tuduwata magumulo  
 ebete ebenu a:e tanaloma: modoboma: giya,  
 iyo, ebete kewa olotolowalo  
 kawokawo temeteme gito uwatiya.

<sup>9</sup> Me mabuma: Godote ebe ununomamo adipatete  
 wade mailonomo idi ebetamo ebo ikamiya,  
 ebe mailono elawote  
 mailo epetapi bilibilinomono elawo nodoilina,  
<sup>10</sup> iyo, ebe mailo ebe Ya:sutela!  
 Ebema: piyate Unu Duliyomololo ega:walo me opolo  
 ega:walo damela magumulo dilukuliona,  
 ibi bilibilinomate ebe amamatema:  
 pupamo pilukulite,  
<sup>11</sup> iba:te Nabiwi Godoko eba moiolo  
 awokala negelanakoma:na;  
 Ya:su Kelisoko kapiya ebe Kawodawanomola.

*Nanitabokobi Midipiate Me Opolo Godokono Aloma: Deda:ona*

<sup>12</sup> Ebema: naimano wadewade namutupiala:, dopamo na la:imano duliyo-  
 omololo eba okolinalo la: naimano tabamo keba kunu ka:tudila:wenakima,  
 modobola nale okolina:no tetelo la:le eba kunu na:kowagelenala:, iyo, la:  
 naimano iyatulame tanalamo tudila:oma: la:imano woki kawonomamo  
 niyatinakiyala:. Ega:walo Godote la:tamo dikalametia, ebe igilo mula:  
 tanalono uwomu tanalo nanitabolo laema:, modobola la: la:imano wokilo  
 ebe tolemelo unamo eba adipatelo woko wadenomamo nosiyodilonala:,  
<sup>13</sup> mabu kalakala kawonomola, Godote la: magumulo ebenu woko bosiy-  
 odilona, iyo, ebete la:tamo wade tepo magumuno woki ega:walo elawo  
 nikalamenata la:le ebenu ubi tanalamo ka:tudila:wenama:!

<sup>14</sup> Ebema: la:imano osiyodilole tanalo bilibilinomo magumulo epetapiate  
 epetapiatamo ubia: tabo gela:no akoapaminatenuinakala:. <sup>15-16</sup> Ma kunu  
 me opo epate kawokawo kuba osiyodilolepima: eda:ote kalawikalawi  
 gabodo eba tolamenalo, la: wiyasiya Godokono wadewade gudima:  
 beda:onamata, iyo, la:godolo kuba osiyodilo tanalo idi ega:walo daleya  
 wokino tanalo da:peso idite a:kitanamene. Ebene la:le epatamo Godokono  
 igilo tabo dikalama:wenakoma, la:le ebenu aloma: eba eda:onalome opo  
 ba:pukuiminamata, mawelete tobolo unulo da:pola:na keba kunula:ka: eba  
 kunu. Me mabuma: nale Kelisokono Uwomu Egelalo me tanalo kiyatawa-  
 mamamo, nale kebe woko la: magumulo kosiyodilonaimo ebe kodakoda woko  
 magumune wadewade da:ima:te nanitabolo a:pemaimiya, iyo, nale la:  
 mabuma: ebema: kamamamamo.

<sup>17-18</sup> Numa:la:, la:imano nanitabokobi midi tanalo ebe la:le Godoko wa-  
 tidiloma: kalimagono inamabu idi ebetamo dikama:ema ebe tanalo keba  
 kunula:ka: eba kunula. Ega:walo nale me tetelo da:emo, iyo, epetapiate  
 naimano kalima opamo gito dadipanama:na:, ebe tanalo ebe Godotamo

ikameo tanalo idima: keda:mene, ebema: ebe tanalote nanitabolo de-maigamene, naimano kalakalate eba itanalo, modobola la: atumu kalakala lawa:wete nago nekalakalaiyala:.

*Polote Timotila Epa:paladaitasila Ibi Pilipai Duliyomolamo Palibolema: Tabo Da:kiyawaiya*

<sup>19</sup> Ebene Kawodawa Ya:sukono ubi ditanamene, nale gabo kuimamo tete tatalilo Timotiko la:tamo kapaliboma:, ebema: ebete la:imano tanaloma: tabo walo dakapalibomene, nale ebe tabo olowite naimano woki bilibili tanalo la: mabuma: ebo kolopoligomene. <sup>20</sup> Ebe kapiyate nago la: nilakapolo kawonomamo malagidilolenata, iyo, ebene tepo magumuno wokite naimano tepo magumuno wokiago kapiyama: eda:na. <sup>21</sup> Nanitabola, sosi epo epetapi bilibilinomate ibino tanalo kapiya malagidilolena, Ya:su Kelisokono iyaiya ubi tanalooa:. <sup>22</sup> Wiyasiya Timotiko eba kunua:. La: iyatawalata nale ebene nabiwi keba kunula:ka: eba kunu eda:nalo, ebete Wade Tabo kiyawao mabuma: nago kapimiya wiya: woko dosiyodilonami, ebe osiyodilo gabodo ebete ebene nanitabo tanalo iyalo awokalimi. <sup>23</sup> Ebema: naimano ubi ma kunu itana, gabamaniate naimano tanalo anagiyamidaname dopoliyamene, ebe tetenomolo gabote ditanamene nale Timotiko la:tamo kapalibomamo. <sup>24</sup> Ega:walo nale Kawodawa nanitabokobi na:midinamo, tete tatalila nale me idoko motone piwisigate la:tamo ka:pemamo.

<sup>25</sup> Ega:walo nale tanalo idi na:kemalagidilutamo, aimano nanitabokobi midi ekawi Epa:paladaitasiko la:tamo walo kakapaliboma:. Ebe la:le naimano iyaiya modoboa: tanalo magumulo na walubinima: dupalibaima ebe wade dawala, iyo, ebete la: mabuma: na niyakabolo eba utitalo gowela woko nago kapimiya osiyodilona. <sup>26</sup> Ebe iyatawala la:le ebene gabugabu tanalo dolowiaima, ebema: woki bilibili tanalote ebegodolo eba itanalo, ebe ubi kawonomamo niatina la:tamo pemaigate la:imano ololo walo ka:ka:pulaema:. <sup>27</sup> Nanitabola, kawo gabugabute ebe duminati a:e tatalila, wiyasiya Godote nilakapolo ebe wadekobi a:midi, ebene ebe osiyodilo tanalodo Godote ebene nilakapo natamo atumu akawokalimi, mabu naimano wade lumagite na:etaleka: nale ebe tanaloma: kawo temete idi nanitabolo biyatawana:. <sup>28</sup> Ebema: nale atumu naimano ubi kawonomago ebe la:tamo palibutamo, mabu na iyatawala la:le ebe walo da:kuma:ema, la:imano kalakalate ebe mabuma: eba itanalo naimano woki bilibili tanalote la: mabuma: ebo kolopoligomene. <sup>29</sup> Ebema: modobola la:le ebe aimano Kawodawa magumulo ekawi idima: gelawete kawo kalakalanomago nelawiyala:. Ega:walo la:imano nanitabokobi midipi taneba magumulo modobola ebete kebako dawama: keda:nale la:le ebako epo atumu na:kemoioliyala:, <sup>30</sup> mabu la:le nagodone mululo eba ilukulinalo na walubinima: modoboa:noma: deda:ima, ebe tetelo me ekawi Epa:paladaitasiko la:imano gobebobolo na da:powalubini, ebete Kelisokono woko osiyodilo tanaloma: ebene igilo ebete kawo tanalooa:noma: gelo tatalila ba:ena:.

### 3

*Ale Aimano Unu Tamamo Dosiyodilolenakoma: Ebe Tanalo Magumudo Godote A Tuputupupima: A:keka:imene*

<sup>1</sup> Naimano nanitabokobi midipi ekakiala:, me leta uwomu apulo nale la: ma kunu analemata, modobola la: aimano Kawodawa magumulo nekalakalaonala:.

Nanitabola, na ubia:noma: keda:na: nale la: dopamo diyatu-lametanakima, ebe atu tanaloma: kapiya tete idilo la: me leta magumulo walo ka:kiyatulametama:, mabu me iyatulame tanalote la:imano nanitabokobi midi tanalo wadenomamo ka:ga:lulatelemene la:le nanitabo gabo anaetoamidakapoma:. <sup>2</sup> La: nanisiwale! Piyate ibino kuba ubi tanalo dosiyodilolenaka ebe dubuno tanalo wadenomamo nulamenala:, mabu ibi elawoelawo gaagaa keba kunula:ka: eba kunula, iyo, iba:te ibino ubi kawonomamo iyatina Yu dubuno tama itamida pukala epetapiatamo eba ikalamelo ibino apeno iyaiya apuapu ebo kiyaililaema:. <sup>3</sup> Wiyasiya a piyate Godokono Uliyanano elawamo ebe damamatenakoma:, a ebe epola. Iyo, Godote baibai gudino tama itamida pukala Yu epatamo dopamo dikalamiya, ale ebe tanalono magumu iyatawaopima: eda:onama:, mabu Godote a tuputupupima: ka:mi tanalo ale kolowima:, ale unu tama osiyodilole tanalo bilibilinomo magumulo kapiya tanalo idi nanitabokobi ka:midina:. Ao, a wiyasiya Ya:su Kelisoko kapiya nanitabokobi eba midinalo ebe kapiya ebema: amamatenama:.

<sup>4</sup> La: numa:la:, piyate naimano tagala okoli tanalo diyatawaona, diyala, iba:te ibino kateneno wokilo ma kunu da:bejelama:na:, “Ebe dubu Poloko ebete ebenu unu tamamoo osiyodilole tanalodo ebe a:ka:tuwa: ebe wadedawanomoma: midiya.”

Nanitabola, dopamo nale unu tamamoo osiyodilole tanalo magumudo epo epetapi bilibilinomo a:nodoiliyamo, ebema: diyala, nale ma kunu da:bemalagidilomo, Godote naimano unu tamamoo osiyodilole gabodo na ebenu tuputupudawa idima: keka:na:imene. <sup>5</sup> Ma kunu nale Isalaela epono Beniyaminakono gu magumune awokaliyamo, iyo, na Yu epono kalimanomola, ebema: nale awokalate kapiya wuiki dolopoligiya dubu gudino tama itamida pukala ebo lawiyamo. Ega:walo a Yu epono Pa:lisi taneba magumulo na idima: dediyamo, ebema: Mosesete atamo dikaeamiya ebe Totomu Tabo bilibilinomo nale kodakodanomolo uwatenakimo. <sup>6</sup> Ebene nale ebe Totomu Tabamo tuduwatama: naimano ubi kawonomamo eba iyatinalo, nale Godokono sosi epono tanaloma: ebo genakimo iba:te ebetamo nanitabo gabodo ka:tudila:onakoa:, iyo, nale iba:tamo kawokawo temeteme ebema: ikalamenakimo. Nanitabola, Totomu Tabono tanalo bilibilinomamo tuduwata magumulo nale tanalo da:peso idi kapiya kanaetoamidankia:, ebema: Yu epono umi magumulo na tuputupudawanomoma: eda:naimo.

<sup>7</sup> Wiyasiya nagodolo dopamo da:pola:namiya, epo bilibilinomate ebe osiyodilole tanalo ega:walo iyatawa tanalo ega:walo Yu epono kalima tanalo wadewadenoma: eba gelanalo, nale me tetelo wiyasiya Kelisoko mabuma: ebe iyaiya tanalo dologala inamabuma: midilinamo. <sup>8</sup> Iyo, me opo epate kebe tanalo bilibilinomo wadewadenoma: kegelane ega:walo naimano tagala okoli tanalono iyaiya tanalo, nale ebe tanalo bilibilinomo dologala inamabuma: eba midilinalo ginima:mo ilateliyamo. Ebema: naimano wokilo kapiya tanalote kawo tanalonomoma: eda:na, ebe tanalo ebe naimano Kawodawa Ya:su Kelisago kapiyama: eda: tanalola. Iyo, nale ebe mabuma: me opono wadewade tanalo bilibilinomo kubakuba sosowama: eba genalo, ebe kapiya kodakodanomolo lawenamo <sup>9</sup> nale ebe magumulo wadenomamo kokolinama:. Nanitabola, Godote lumagino nanitabokobi midi tanalodo modobo elawo ebetamo eba ikamenalo ebe tuputupudawama: ebo ka:midimene, ebema: me tetelo nale Godokono Totomu Tabamo tuduwata tanalodo na a:ka:tuwa: na tuputupudawama: kegena:, ao, nale wiyasiya Kelisoko kapiya nanitabokobi na:midinamo. <sup>10</sup> Ebe mabuma: na me kapiya kawo tanalonomoma: ubi niyatinamo, nale



Kelisago kapiyama: eba eda:nalo, ebete a:e magumune kebe elawo tanalamo kemaigiyale ebe atu elawo tanalote naimano okoli magumulo kitanamene. Ebene ebe elawo tanalote nagodolo eba itanalo, nale ebene temeteme magumulo eba:go kapimiya ka:lutamamo, ega:walo ebete a:e tanalamo keba kunu ka:tiyale nale eba kunu atumu da:tomo, <sup>11</sup> na nanitabokobi na:midinamo ebene elawo modobola, ebete na a:e magumune igilamo walo kakadipatenemene.

*Polote Wade Wiya Godogodone Laema: Woko Elawonomamo Dosiyodilonami*

<sup>12</sup> Numa:la:, nale tabo ma kunu kegita:, nale Godogodone wade wiya laema: naimano okoli magumulo tuputupunomoma: iyalo ediyamo. Ao, eba kunua:, nale wiyasiya elawonomamo woko osiyodilo magumudo ebe wiya walone tetelo laema: wagenamo, mabu Ya:su Kelisote ebe wiya natamo nanitabonomolo ikanaema: na ebema: laweniya. <sup>13</sup> Ega:walo naimano nanitabokobi midipi ekakiala:, na ma kunu kemalagidiluta: nale gowela magumulo wato kikopu iyalo elawiyamo, ao, na ebe kalakala tete walone ka:nuimamo. Ebe mabuma: kebe tanalate natamo dopamo ka:pemaimionakile, nale ebe tanalo walo malagidilolema: naimano woko osiyodilo magumulo walogabo apuamo ka:melena:, na wiyasiya naimano ololo dopo apunomamo iyatinatomo uwomu teta:mo modobolo ka:nemaigama:. <sup>14</sup> Iyo, sukulu gudute kalakala egelalo elawamo keba kunu ka:puliganakole, na woko osiyodilo magumulo eba kunu puliganamo, nale uwomu teta:mo da:nemaigamo naimano wade wiya ebo ka:nelaema:. Nanitabola, Godote Unu Duliyomolono kalakala tanalo natamo ikanaema:, Ya:su Kelisoko magumulo na ebema: ka:na:miya.

<sup>15</sup> Ebema: niyaniyata, a piyate Kelisoko magumulo wadenomamo dapepeonama:, modobola a ebako woki kapiyado woko ebetamo bosiyodilonama:, wiyasiya diyala, la: epetapiate woko kuba wokino tanalo ida:go da:bosiyodilawenama, ebema: Godote a:ka:tuwa: ebene ubi tetelo ebene tuputupu wokino gabo la: kiyatulaema:ta. <sup>16</sup> Numa:la:, me tanalo kawo tanalola, ale nanitabokobi midi magumulo mammo kebe gabodo ka:pemaimioma:, modobola ebe atu gabodo ale uwomu teta:mo nanitabolo ka:nemaimiomalema:.

<sup>17</sup> Naimano nanitabokobi midipi ekakiala:, modobola la: kapimiya la:imano ilukuli magumulo na nibaminatenenala:, iyo, piyate dopamo aimano osiyodilole tanalo waloma:talema: wadewade woki duwatiya, modobola la:le ebe atu gabodo ka:tolama:ema: ibino tanalo wadenomamo nulamenala:. <sup>18</sup> Ega:walo nale dopamo tete epetapi bilibilinomolo la: kebe tanaloma: kanaletanakima, umu numita:la:, ka:lo ebe tanalo walo ipupu balida:go la: ma kunu kanalemata, Kelisokono kewa olotolowalo a:e mabuma: epo epetapi bilibilinomate eba:go gowelaona. <sup>19</sup> Nanitabola, ebako epate ibino uwomu tetelo Saitanakono Ela Opamo ka:nemaimioma:na:. Iba:te ibino kateneno ubi tanalamo kubanomamo tudila:ote, ebene ilipo tanalo ibino osiyodilole magumulo eba amamaonalo, iba:te me opono inamabu uwate gabo kapiya malagidilona. <sup>20</sup> Wiyasiya a nanitabokobi midipino nanitabo ilukuli duliyomolo ebe Godokono Unu Duliyomolola, ebema: aimano Igilo Mula:leamedawate ebene ka:pema: ale ebe tanalo olowiolo makopelenama:, ebe aimano Kawodawa Ya:su Kelisotela. <sup>21</sup> Ebema: nanitabola, iyaiya epo ega:walo uliyana bilibilinomo iba:te ebegodolo ditana ebe kawo elawonomo duima:na:, iba:te ebene ubi tanalamo ebo ka:tudila:oma:na:. Ebe tetelo Kelisote ebe atu elawamo aimano elawoa: ape ega:walo a:ela ape iyanomoma: ka:midiliaemene, iyo,

ebeno apete wade pukuilaema: keba kunu keda:nale, aimano apa:te atumu eba kunu ka:keda:oaema:na:

## 4

### *Polote Totomu Tabo Epetapi Pilipai Sosi Epatamo Dikalamiya*

<sup>1</sup> Ebema: naimano nanitabokobi midipi ekakiala:, modobola la: naimano iyaiya tabo eba malagidilolenalo ebe tanalamo tudila:wete aimano Kawodawa magumulo kodakodanomolo nelamota:onala:. Nanitabola, la: nale ulaema: kawonomamo demalagidiloletanama ebe epolata, ega:walo la:le natamo kawo kalakala tanalo eba ikanamenalo, nale Saitanatamo gowela magumulo delaimo la: ebe wato kikopu keba kunula:ka: eba kunu eda:onamata.

<sup>2</sup> Naimano nanitabokobi midipi ekaki buwelemele Yuwodiyako ega:walo Sintakiko, nale la: toweolaemata la:le apaminateui tanalo atepawete aimano Kawodawa magumulo woki kapiyama: keda:ema:. <sup>3</sup> Ebema: a:ma: potele naimano woko magumulo wade walubidawama: deda:wena, modobola a:ma: me kamiyale nowalubiliye. Nanitabola, ibi netewapiate Wade Tabo kiyawao mabuma: dubu idi Kelaminago dopamo nago kodakoda woko dosiyodilonamiya, ebema: ibino mailote Godokono Igilo Bukalo ba:pola:larena, epetapiate nago woko dosiyodilona ibino mailote keba kunu ka:pola:larenale eba kunu.

<sup>4</sup> Ebema: la: bilibilinomate aimano Kawodawa magumulo tete bilibilinomolo nekalakalaonala:, iyo, na walo na:kegemo, modobola la: nekalakalaola:! <sup>5</sup> Ega:walo modobola la: epo bilibilinomono ololo apulo milolo eba ilukulinalo, epetapiate la:imano wokiamo tudila:oma: ibi elawamo akoanala:la:. Numa:la:, aimano Kawodawano pe tete netatali, <sup>6</sup> ebema: modobola la: tanalo idima: woki bilibilima: akoeda:oala:, wiyasiya la:imano modoboa: tanalo bilibilinomo magumulo la:imano tepo magumuno kalakalago la: Godotamo na:towetoweonakiyala: ebete la: kowalubilitama:. <sup>7</sup> Ebe tetelo la: Ya:su Kelisoko magumulo eba ilukulinalo Godokono milo tanalote la:imano tepo magumuno iyaiya woki wadenomamo ba:ga:lulatenamene, nanitabola, me opo epate ibino mulo wokiamo ebe milo tanalono magumu laema: ka:modobona:.

<sup>8</sup> Ebema: naimano nanitabokobi midipi ekakiala:, me leta uwomu apulo nale la: ma kunu analemata, Godote kebe iyaiya tanalo tuputupu ilukuli tanaloma: kegenale ega:walo ebete kebe tanalo kemoiolenale, modobola la: ebe iyaiya tanalo kapiya la:imano tepo magumulo nemalagidilolenala:. Iyo, ebete kebe woki nanitaboma: kegenale ega:walo mulo tanaloma: kegenale, ebete kebe woki wadenoma: kegenale ega:walo daleya: tanaloma: kegenale, ebete kebe woki nilakapo awokalima: kegenale ega:walo kalakala adipate tanaloma: kegenale, modobola la: ebakobako woki kapiyamo la:imano tepo magumu netabokailameniyala:. <sup>9</sup> Ebene la: kebe tanalo naimano iyatulame tanalodo kolowiawenakima ega:walo naimano osiyodilole tanalodo kulama:wenakima, modobola la: ebe tanalo bilibilinomo nosiyodilolenakiyala:. Me gabodo potele milo epatamo dikalamena, ebe Godote la:godolo nanitabolo bokolinamene.

### *Polote Pilipai Sosino Nilakapo Mani Alomo Tanaloma: Kalakala Tabo Da:kiyawaiya*

<sup>10</sup> Nanitabola, naimano kalakalate aimano Kawodawa magumulo la: mabuma: ditana, ebe kalakala beda: kawonomola:ka:! Iyo, tete geyageyadopolo la:imano ubi eba italamenalo la:le gabo umia:no na

kowalubina:wenakia; me tetelo wiyasiya la:le gabo duma:ima na maniamo ebo walubinimata, dopamo la:le na walubinima: ubi keba kunu kiyata:wenakima eba kunu. <sup>11</sup> Wiyasiya nale me kalakala tabo kiyawao tanalamo modoboa: tanalo idi la:tamo kawokalimita; ao, me tanalo iyalo iyatawiyamo, na iyaiya modoboa: tanalo magumulo eba okolinalo wiyasiya naimano Kawodawano kalakala kapiyate nagodolo bitanamene. <sup>12</sup> Nanitabola, dopamo nale tete epetapilo iyaiya modoboa: tanalo magumulo okolitanakimo ega:walo tete epetapilo na inamabuago modobolo okolitanakimo, ebema: nale kalakala tanalono magumu ma kunu iyalo elawiyamo, iyaiya tete bilibilinomolo, iyo, baete wuguname tetelo ega:walo kape tetelo, dogodogo inamabu pola:na tetelo ega:walo inamabu pola:na:no tetelo, naimano kalakalate naimano Kawodawagodne eba penalo a:kolopoligonamene. <sup>13</sup> Ebema: nanitabola, ebete natamo elawo eba ikanamenalo, na modobola ebe magumulo iyaiya temeteme bilibilinomo magumudo uwomuamo ka:nemaigama:

<sup>14</sup> Wiyasiya na la:tamo kalakala tabo walo na:kegemo, mabu la:le naimano temeteme magumulo na maniamo dowalubina:ima ebe tanalo ebe wade nilakapo tanalola. <sup>15</sup> La: Pilipai sosi epo me tanalo iyatawanomolata, dopamo Wade Tabote nagodone la:tamo da:pemaigi, ebene nale la: magumune Ma:sadoniya opone walo da:ka:timo, ebe tetelo iyaiya sosi epo epetapi magumulo la: kapiyanomate maniamo na nilakapolo owalubinimata. <sup>16</sup> Iyo, na Tesalonaika duliyomololo eba nokolinalo, la: tete epetapilo naimano modoboa: tanalo magumulo walubi tanalo natamo ebo palibonakimata. <sup>17</sup> Wiyasiya numa:la; naimano ubi tanalo ma kunu kitana; na a:ka:tuwa: na malagidilonelo mani la:godone gito uwatema; ao, na ubila la:imano nilakapo ikame tanalodo Godote ebene wade wiyanomo la:tamo gito kikalametama:

<sup>18</sup> Nanitabola, me tetelo modoboa: tanalo kapiya idite nagodolo kitana; mabu la:le na walubinima: Epa:paladaitasitamo dikama:ima, ebete ebe mani mammo dadai nale modobolo laimo. Numa:la; la:imano nilakapo ikame tanalo ebe Godotamo wade nibo inamabu ikame tanalo keba kunula:ka: eba kunula, iyo, ebete ebako tanalo lumagi idigodone kalakalago lawete modoboma: kegemene. <sup>19</sup> Me mabuma: kebe modoboa: tanalate la:godolo ka:pola:nale, naimano Godote ebe tanalo bilibilinomo ulamete la:tamo modobolo kikalaema:ta, mabu ebene dogodogo inamabuate Ya:su Kelisokono Alonomo Duliyomololo ebegodolo ba:pola:na.

<sup>20</sup> Ebema: modobola amama tanalote aimano Nabiwi Godogodolo uwomua: uwomua: tetelo nitanamene! Me tabo nanitabonomola, taula!

*Polote Leta Uwomu Apulo Iyaiya Nilakapo Tabo Da:kiyawaiya*

<sup>21</sup> Ebene piyate Ya:su Kelisoko magumulo Godokono epoma: deda:ona, nale naimano nilakapo tabo ibi bilibilinomatamo palibomo, ega:walo nago dilukulina ebe nanitabokobi midipi ekakiate ibino nilakapo tabo atumu la:tamo nakapaliba. <sup>22</sup> Ega:walo piyate me Loma kawo duliyomololo Godokono epoma: deda:ona, ibi bilibilinomate la:tamo nilakapo tabo kapaliba, iyo, ibi magumulo piyate Kawo Elawodubunomo Sisakono motolo ebene woko dosiyodilona, iba:te ibino nilakapo tabo kawonomo atumu nakapaliba.

<sup>23</sup> Modobola aimano Kawodawa Ya:su Kelisokono nilakapo tanalote la: bilibilinomono tepo magumulo nitanamene. Me ebe naimano tabo uwomula. Taula.

## POLOTE LETA KOLOSI SOSI EPATAMO OSIYODILIYA

<sup>1</sup> Na ebe Polotela, Ya:su Kelisote ebenu sosi wagilima: iyaiya opamo daliboliya ebe wokopi magumulo na idila, mabu Godote ebenu ubilo na ebema: laweniya. Na ega:walo a nanitabokobi midipino ekawi Timotiko, <sup>2</sup> ale la: piyate Kolosi duliwomololo Godokono epoma: eba eda: onalo Kelisoko magumulo aimano nanitabokobi midipi ekakima: deda: wenama, ale me leta la: tamo paliboma: . Modobola aimano Nabiwi Godote ebenu nilakapo tanalo ega:walo milo tanalo la: tamo nikalaema: ta.

*Kolosi Sosi Epono Tanaloma: Polote Kalakala Tabo Ega:walo Towetowe Tabo Da:kiyawaiya*

<sup>3</sup> Tete bilibilinomolo ale towetowe tabamo la: eba wadipalatelelo kalakala tabo Godotamo ebo adipatenakoma: , nanitabola, ebe aimano Kawodawa Ya:su Kelisokono Nabiwila. <sup>4</sup> Ale ebetamo kalakala tabo ebema: kiyawaonakoma: mabu ale me wade tanalo olowima: , la: le Ya:su Kelisoko nanitabokobi eba midinalo Godokono epo bilibilinomo nilakapolo malagidilolenamata. <sup>5</sup> Iyo, dopamo tetelo Godokono Wade Tabote la: tamo da: pi, ebema: nanitabola, la: le ebe nani tabonomo dolowiaima, ebe tetelo la: le Godogodone wade wiya laema: ebenu pe tanaloma: olowiolo makopele tanalo ebo wagilimata, mabu ebete ebe wade wiya ebenu Unu Duliwomololo iyalo osiyodilolete la: mabuma: wadenomamo ulamena. Me mabuma: me tetelo la: imano nanitabokobi midi tanalo ega:walo nilakapo kimalagidolo tanalote la: godolo ba: pola: lamenata. <sup>6</sup> Nanitabola, me atu tetelo Godokono Wade Tabote me opo kawonomono iyaiya apuapuamo eba penalo wadewade da: ima: te a: nolonaka, la: imano olowio wagilimi mabune ebe tabote la: magumulo woko keba kunu kosiyodilonamile eba kunu. Numa: la: , la: le Godokono nani tabo olowi tetelo ebenu nilakapo tanalo pogodone kiyatawaima, <sup>7</sup> ebe dubu ebe Epa: palasitela, ebe ale kawonomamo demalagidilonama: ega:walo ago woko dosiyodilonama ebe lumagila. Iyo, ebete Kelisokono woko a mabuma: osiyodilonako, <sup>8</sup> ega:walo kalakala kawonomola, Godokono Uliyanate la: tamo nilakapo kimalagidilo tanalo keba kunu kikalametana, me tetelo Epa: palasite ebe tanalo atamo apawokalimi.

<sup>9</sup> Ebema: ale la: imano nanitabokobi midi tanalo dolowima: , ebe tetene wagilimite ale la: mabuma: Godotamo towetowe tabo gela katepana: . Ebene ale ebe ma kunu toweomenakoma: , ebenu Uliyanate epatamo kawonomamo dikalamena, ebete ebe mulo wokiamo ega:walo ebenu ubilo wapata: lame tanalamo la: imano tepo magumu ketabokailaemene. <sup>10</sup> Me gabodo Kawodawano elawote la: godolo bitanamene, la: le ebenu wade ga: limapi gudima: eba eda: onalo la: imano osiyodilole tanalo bilibilinomo magumulo ebe kekalakalaima: wenakoma: , iyo, la: magumulo wadewade da: ima: te eba kunu eba nolonalo la: imano Godoko iyatawa tanalodo nanitabolo kapepeomamota.

<sup>11</sup> Ega:walo la: mabuma: ale Nabiwi Godoko ebe toweomenakoma: , ebete ebenu alono kawo elawonomamo la: elawokobi ka: midilitama: , la: le iyaiya temeteme epetapi magumulo kodakodalo eba lamota: onalo <sup>12</sup> kalakala tabo ebetamo kawonomamo kadipata: wenakoma: . Nanitabola, Godote Kelisokono osiyodilo tanalodo la: modobokobi a: midiliyata, ebenu Alonomo

Duliyomololo da:pola:na ebe dogodogo inamabu magumune la:le ebeno epo epetapi bilibilinomago la:imano wade wiya ka:nuwata:ema:, <sup>13-14</sup> mabu ebete aimano igilo eba mula:leamelo idoko namutudawano elawo magumune a wagaite, ebene ebeno Gudute Kawo Elawodawama: deda:na ebe tanalono kalakala okoli tanalomo ebete a alomoiya. Numa:la:, ebete ebe Gudu kawonomamo malagidilona, ebe poteleka: aimano kuba osiyodilole magumune a wiya kawonomamo duwateiya ebe Wadedawala, iyo, ebete aimano kuba bilibilinomo egeboleamete iyalo a:dodolomatiliamiya.

*Kelisote Kawodawanomoma: Deda:na Ebe Tanalo*

<sup>15</sup> Ega:walo me tanalo idila. A opo epate Godoko balida:mo uima: modoboa:, wiyasiya Kelisote ebeno ololo kapiyamo atamo a:pemaigiya, ebe Nabiwino dopo Gudunomola, iyo, me opono inamabu bilibilinomo pawokalaoa: tetelo ebete dopamo okolinami. <sup>16</sup> Ebema: Unu Duliyomololo da:pola:na ega:walo me opolo da:pola:na, iyo, me opo epate balida:mo dulamolena ega:walo iba:te kebe tanalo balida:mo ulamolea:no, ebe iyaiya elawoelawonomo uliyana, ega:walo elawoelawodopo uliyana, ega:walo iyaiya epo, ega:walo me opolo digilona ebe inamabu, ibi bilibilinomo Nabiwite ebeno Guduno elawamo osiyodiloliya. Nanitabola, ibi bilibilinomate Kelisoko kowalogonama: ebeno elawo kapiyado pawokalaiya, <sup>17</sup> ega:walo ibi bilibilinomo magumulo idite pawokala:no ebete dopamo okolinami. Ebe mabuma: ebe kapiyagodolo elawo bitana ibi bilibilinomatamo igilo kikalamolema:

<sup>18</sup> Ega:walo Kelisokono ape ebe sosila, ebema: ebe sosino watola ega:walo igilo mabula. Iyo, a:ela epo bilibilinomo magumulo ebe a:e magumune maigama: dopodawama: ediya, ebema: ebe tanalo bilibilinomono Namutudawa kapiyanomola. <sup>19</sup> Nanitabola, Godote kalakalago ebeno ubi iyatiya, kebe tanalote ebe magumulo tabokanomo kitanale ebe atu tanalote ebeno Gudugodolo tabokanomo ka:kitanama:. <sup>20</sup> Ega:walo ebete ebeno ubi tanalo ma kunu iyalo kiyatiya, ebeno Guduno kalimate kewa olotolowalo deka:ka:liyamene, ebete ebe kalimamo me opolo ega:walo Unu Duliyomololo da:pola:na, ebe iyaiya inamabu ega:walo epo ega:walo uliyana ibi bilibilinomo uwatete ebeno namutupima: keda:onama: ibi walo ebetamo ka:kemagaelemene, mabu ibi bilibilinomate dopamo eba:go gowelaopima: eda:onamiya.

<sup>21</sup> La: nanitabokobi midipi atumu, dopamo la:le kuba tanalo eba osiyodilolenalo la:imano tepo magumuno wokilo Godogodone muludopone putitatawete eba:go gowelaopima: eda:onaimata. <sup>22</sup> Wiyasiya kalakala kawonomola, Kelisote me opamo pete lumagino apa:mo da:pa:iya, ebe mabuma: la: me tetelo Godokono wade namutupima: eda:onamata, iyo, ebete gabo ma kunu osiyodiliya la:le ebeno talena epoma: ega:walo tuputupu epoma: ega:walo daleyaya: epoma: midilitate ebeno ololo apuamo kemagaeletama:. <sup>23</sup> Ebema: modobola la: kodakodalo eba lamota:onalo la:imano tepo magumulo woki netewama: akoeda:onala:, mabu la: dopamo dolowiaima ebe Wade Tabo nanitabokobi eba midinalo la:le Godogodone wade wiya uwatema: olowiolo makopelenamata. Nanitabola, ebe Wade Tabo kiyawaoma: na Poloko Godokono wokodawa idila, ega:walo kalakala kawonomola, ebe Tabote me opo epo bilibilinomatamo iyalo emaigi.

*Sosi Epo Mabuma: Polokono Woko Osiyodilo Tanalo*

<sup>24</sup> Ega:walo me tanalo idila, nale la: sosi epo mabuma: duwatanakomo ebe apeno temeteme tanaloma: nekalakalanamo. Numa:la:, sosi epo ebe Kelisokono apela, ebema: kebe tetelo nanitabokobi midipiate ebeno woko



osiyodilo magumulo temeteme duwatanaka, Kelisote ebako atu temeteme kuwatanako. Iyo, ebena temeteme uwate tanalo me opolo nanitabolo kopoliyalemea; ebema: naimano kalakala bitana nale ebena temeteme opoliyaleme teta:mo ebena woko kosiyodilonama:.<sup>25</sup> Nanitabola, Godote sosi epo mabuma: na wokodawama: a:midiniya, iyo, nale ebena tabo kawonomo iba:tamo awokaliminomo dawokaliminakomo ebe osiyodilo tanalo ebe ebete natamo dikanamiya ebe wokola.<sup>26-27</sup> Ebema: numa:la:, dopamo tetelo Godote ulama epetapi bilibilinomolo me opo epatamo waminalo ditanami, ebe nopo ebete me tetelo ebena tabo kiyawaopino woko magumudo la: ebena epatamo ma kunu awokaliminako, Kawodawa Kelisote la: nanitabokobi midipino tepo magumulo bokolina, ebena la:le ebena pe tanaloma: olowiolo eba makopelenalo, ebete da:pemene ebe tetelo la:le Godokono kawo alonomo magumulo ba:nilukulinamata. Kalakala kawonomola, me tetelo ebena wade pukuilamenomono nopote me opo epo bilibilinomatamo eba kunu itana!

<sup>28</sup> Ebema: ale Kelisokono tanaloma: ebena Wade Tabo epo bilibilinomatamo a:kiyawaonakoma:, iyo, ale iyaiya mulo tabo bilibilinomamo ibi kawiya eba analelo ebo iyatulamenakoma:, mabu a ubila ibi bilibilinomate Kelisoko magumulo wadenomamo apepeote ibi kawokawopima: deda:oma:na:, ale ibi Godokono ololo apuamo ebo ka:nowadipilimalema:.<sup>29</sup> Nanitabola, nale ebe tanalo kuima: Kelisokono kawo elawonomamo woko osiyodilonamo, ega:walo ebena elawote atumu nagodolo woko na:kosiyodilona.

## 2

<sup>1</sup> Ebema: na ubila la: me tanalo kiyatawaema:, na Polote la: Kolosi sosi epo ega:walo Lodosiya sosi epo, la: bilibilinomo mabuma: Godokono woko temetema:go dosiyodilonamo, ega:walo nanitabola, la:imano taneba magumulo piyate naimano ololo dopamo kumia:, nale la: bilibilinomo mabuma: atumu woko na:kosiyodilonamo. <sup>2</sup> Iyo, naimano ubi ma kunu itana, nale la: bilibilinomo iyaiya epo gelebadi tabamo elawokobi eba midilitalo la:le nilakapo kimalagidilo tanalo magumulo kapiyama: keda:ema:. Me gabodo Godote dopamo epatamo dowaminiya, ebe wamina nopono magumu la:le wadenomamo iyatawaoawete kodakodalo ebo katila:namamota, lumagite kawo maniagono gatele keba kunu katila:nanakole eba kunu. Nanitabola, ebe wamina nopono magumute ka:lo epatamo dawokalana, ebe Kelisotela, <sup>3</sup> iyo, wade mulo kimalagidilo bilibilinomo ega:walo iyaiya iyatawa tanalo, ebe tanalo bilibilinomate ebegodolo ba:pola:na. Ebe mabuma: Godote dopamo kebe wadewade tanalo kowaminaliyale ka:lo ebete wiyasiya Kelisogodone epatamo awokalilamenako.

<sup>4</sup> Ebema: nale me tanalo la:tamo negemo, mabu na ubia:nola la: magumulo idite maigate wadewade tabo epetapi unu tama iyatulame gabodo eba kiyawaolo, a:da: tanalo epetapiamo la: masigilitate kuba gabamo ebo kemagataletama:.<sup>5</sup> Nanitabola, naimano ape mulunomola wiyasiya nale naimano tepo magumuno woki magumulo la:go bokolinamo, ebema: la:le Kelisoko nanitabokobi midi magumulo kapiyama: eda:wete kodakodalo keba kunu kelamota:wenama, nale ebe tanalo eba iyatawalo kawonomamo kalakalitamolo.

### *Lumagite Kelisoko Magumulo Nanitabo Igilo Lawe Tanalo*

<sup>6</sup> Ebema: la: dopamo Ya:su Kelisoko la:imano Kawodawama: ka:milo ebe keba kunu kelawa:ima, modobola la: me tetelo ebe magumulo eba kunu nilukulinala:.<sup>7</sup> Numa:la:, Kelisoko ebe wade pali damela keba kunula:ka:

eba kunula, ebema: modobola la:le la:imano dolodolo ebe magumamo iwodoloawete, dolodolote eba tolamolelo la: wadenomamo napepeon-akiyala: Iyo, modobola la: la:imano moto ebe unamo wadenomamo netiyala:, ebene la:le nanitabokobi midi magumulo elawoelawonomoma: keda:omamota, Godokono wokodawate la: dopamo diyatulametankiya eba kunu. Ega:walo me tanalo idila, modobola la: tete bilibilinomolo Godotamo kalakala tabo nadipatenakiyala:

<sup>8</sup> Ebema: la: nanisiwale! Na ubia:nola la: magumulo idite maigate me opo epono mulo tabo epetapino tanalo eba kiyawaolamelo a:da: tanalodo la: kuba gabamo magatalema:. Ebako lumagino iyatulame tanalote la: kuba osiyodilole tanalono wokopima: ka:midilima:ta, mabu ebete me opo epono ewonino iyaiya pukala epetapi ega:walo me opono kubakuba uliyana iyaiya wokino tanalo nanitabokobi eba midilinalo epo ebo iyatulamenako. Iyo, ebene iyatulame tanalote Kelisogodone ka:pena:.

<sup>9</sup> Modobola la: wiyasiya me kawo tanalonomo niyatawala:, Kelisote lumagino apa:mo me opolo da:pokolinami, ebe tetelo Godote ebene ololo ega:walo osiyodilole tanalago ebe magumulo okolinami, iyo, Godote ka:lo atumu ebe magumulo ba:kokolina mabu Kelisoko ega:walo Godoko ibi kapiyanomola. <sup>10</sup> Ebema: kalakala kawonomola, mabu la: nanitabokobi midipiate atumu Kelisoko magumulo eba ilukulinalo ebene tanalo bilibilinomo kawonomamo iyalo uwatimata. Iyo, nanitabola, ebete ebene Kawo Elawodawano okoli bailo eba okolitalo Saitanakono iyaiya nopopi ega:walo kubakuba uliyana epetapi bilibilinomate ebe tolemelo ebetamo a:tudila:onaka.

<sup>11</sup> Ebema: Yu epate ibino ewoniagodone delawiya, modobola la: ebe dubu guduno tama itamida pukala nemalagidilala:. Iba:te dosiyodilonaka ebe pukala dubate a:ka:tuwa: ibino kotamo ibino guda:tamo alomolamenaka, wiyasiya la: Kelisoko magumulo eba ilukulinalo ebete la:tamo dalomolameta ebe tama itamida pukala iyanomola. Iyo, Kelisote la:imano tepo magumulo dosiyodilolameta ebe tanalodo ebete la: kateneno kuba ubi tanalamo tudila:o magumune owagailiata. <sup>12</sup> Ebema: numa:la:, la:imano Kelisoko nanitabokobi midi tanalo kawokalima: sosi watowatopiate la: obamo eba waduba:midaolelo la:le obo magumamo ebo niwitimata, dopamo tetelo epetapiate Kelisokono a:e ape bobo magumamo keba kunu kiyatiye eba kunu. Ega:walo la: obo magumune demaimiama, ebe tetelo la: Godokono elawo nanitabokobi eba midilo ebete la: igilamo ebo wadipalatiata, dopamo ebete Kelisoko igilamo keba kunu kadipatiyale eba kunu.

<sup>13-14</sup> Nanitabola, la: Yua:pi dopamo Godokono umi magumulo a:ela epoma: eda:onaimata, mabu la: la:imano kateneno kuba ubi tanalamo eba tudila:onalo iyaiya kuba tanalo ebo osiyodilolenakimata. Wiyasiya kalakala kawonomola, la:le ebene tanalo iyatawaoa:no ebe tetelo Godote la: a:ela magumune uwatetate, ebete Kelisoko igilokobi keba kunu ka:midiyale la: eba kunu eba:go igilokobi a:midiliyata. Numa:la:, la:la, ala, a bilibilinomate dopamo Godokono iyaiya pukala bilibilinomo dowakalaminakima:, ebete ebe kuba osiyodilole tanalo ebene Tabo Anagiyamida Bukamo ebo akulolenaki. Wiyasiya epate Kelisoko kewa olotolowamo da:tupuguimiya, ebe atu tetelo Godote aimano kuba osiyodilole tanalono akulole tabo ega:walo ebene iyaiya pukalano akulole tabo, ebe netewa tanalo kewa olotolowamo kapimiya alomote ikoko ebo anagilamolelamiya, iyo, me ebe gabodo ebete aimano kuba osiyodilole tanalo bilibilinomo egeboleamete gito dodomatiliamiya. <sup>15</sup> Ebema: nanitabola, Kelisote kewa olotolowalo da:iya, ebe tetelo ebete Saitanakono iyaiya nopopi ega:walo kubakuba uliyana epetapi,

ibi bilibilinomono elawo magumune nemaigate wato kikopu ebo lawiya, iyo, piyate eba:go da:gowelaonakiya ebete me opo epono ololo apulo ibi bilibilinomo elawoa:kobi gito midiliya.

*Iyaiya Pukala Epetapiate Amama Epono Wokido Da:pemaimiona*

<sup>16</sup> Ebema: na ubia:nola kuba wokiagodawa idite maigate nao inam-abuno tanaloma: ega:walo nio inamabuno tanaloma: iyaiya pukala la:tamo ikalaema: Ega:walo la: atumu Yu epate ulama bilibilinomolo ibino iyaiya soliyomu dosiyodilolenaka ebe tanaloma:, ega:walo ibino oli saganano soliyomu osiyodilole tanaloma:, ega:walo ibino wokoa: talena egelano tanaloma:, la: ebe iyaiya tanaloma: lumagi idigodone pukala idi akolawa:la:.

<sup>17</sup> Nanitabola, dopamo tetelo Godote makomako pukala Yu epono ewoni-atamo ikalamiya, iba:te ebe tanalamo tudila:o tanalodo ebena ololo kela:mo kuminakoma:, wiyasiya kalakala kawonomola, me tetelo ale Kelisoko magumulo eba ilukulinalo Godokono ololo nanitabonomolo uminakoma:, mabu Kelisoko ebe ebena nanitabo tanalo awokalimidawala.

<sup>18</sup> Ega:walo na ubia:nola kuba wokiagodawa idite maigate la: kuba gabamo eba magatalelo la:imano nanitabokobi midi tanalono wade wiya ebo alatidioma:. Nanitabola, epetapiate ibino tepo magumuno kuba woki gabodo ibi a:ka:tuwa: ibi eba walogolenalo, ibino balida:te iyama: eda:olame tanalo ega:walo Unu Duliynomolono nopopi amamalatele tanalo epo ebo analenaka. Numa:la:, iba:te a:ka:tuwa: ibi Godokono wiya: wokopima: degelana, wiyasiya ebe tabo gela tanalo ebe unu tamano iyatulame tanalola mabu ibino tepo magumulo amama kawonomote itana. <sup>19</sup> Iyo, ebako lumagite ebena tepo magumuno wokilo a sosi epono watodawa Kelisoko iyalo atepi, ebema: ebete ebetamo nanitabolo ka:tuduwatana:. Wiyasiya kalakala kawonomola, nani sosi epono tanalo ma kunula, ibi Kelisokono apela ega:walo ebe watola. Me mabuma: ape kawonomono iyaiya apua-puate watono ubi tanalamo nanitabolo eba tudila:onalolo, ebe tetelo apeno moga:lamole tete bilibilinomo ega:walo ogili bilibilinomo iba:te ibino iyaiya woko modobolo dosiyodilolenama:na: ebe apete wadenomamo kapemene, Godote ubi keba kunu kiyatinale eba kunu.

<sup>20</sup> Numa:la:, piyate nanitabokobi midia:pima: deda:ona, iba:te Saitanakono elawo magumulo eba ilukulionalo kawo tola:go iyaiya pukala kawonomamo malagidilolenanaka. Wiyasiya la: nanitabokobi midipiate Kelisago da:elawiyama, ebe tetelo me opo dumina la:le ebe kubakuba uliyanano elawo magumune iyalo a:nemaimiyamata. Ebema: mabu keleka: la:le iyaiya pukalano tanalo eba malagidilolenalo me opono nanitabokobi midia:pimu dilukuliawenama? Eiye! Epetapiate la:tamo tabo ma kunu da:kiyawaoma:na:, <sup>21</sup> “Me inamabu ako-ologiala:,” ega:walo “Ebe inamabu akonala:,” ega:walo “Ebe inamabu idino talena kawonomola,” la:le ibino iyaiya tabo ako-olowiala:. <sup>22</sup> Numa:la:, ebako pukala ebe me opo epono wokino tanalola ega:walo ibino iyatulame tanalola, iyo, kebe inamabuate ibino nao tanalodo wapuamo da:tolamita neago da:penemaimioma:na:, iba:te ebe inamabu naoma: kawo tanalonomoma: gelate pukala ebo alomonaka. <sup>23</sup> Ebe pukala ebe daedale wokino tanalola, wiyasiya iba:te a:ka:tuwa: ibi a:da: eba masigiolelo ibino iyaiya pukala mulo tanalonomoma: gelana. Ega:walo iba:te daedale tabo epetapi ma kunu kegelana, nanitabokobi midipiate Unu Duliynomolono nopopi namamalate-lenakoma:na: ega:walo iba:te ibi a:ka:tuwa: iba:tamo apeno temeteme gito nikalamenakoma:na: Godoko nanitabolo kekalakalaiminama:. Numa:la:, iba:te a:ka:tuwa: ibi Godokono wiya: wokopima: degelana, ebe tabo gela

tanalo ebe unu tamano iyatulame tanalola mabu ibino tepo magumulo amama kawonomote itana. Ebema: ibi niyaniyala, mabu ibino pukalate iba:tamo elawo kikalamena: kateneno kuba osiyodilole ubi tanalo nanitabolo kanakapulaema:.

### 3

#### *Nanitabokobi Mididawagodolo Ditana Ebe Nanitabo Igilo*

<sup>1-3</sup> Nanitabola, la: nanitabokobi midipiate Kelisago iyalo a:elaiyamata, ebene Godote la: eba:go igilamo owadipalatelyata. Ebema: modobola la: Unu Duliyomololo da:pola:na ebe wadewade tanalo nanitabolo kuwata:ema: la:imano tepo magumuno woki ebamo niyatinakiyala:, mabu Kelisote dopamo Godokono tumudi apuamo nokolite ebene Kawo Elawodawano okoli bailo bokolita. Iyo, modobola la: Unu Duliyomolono iyaiya tanalo kapiya nemalagidilolenala:, mana: me opono tanalo, mabu Kelisokono osiyodilo tanalodo la:imano nanitabo igilote Godogodolo bitana. <sup>4</sup> Ebema: numa:la:, Kelisote ebene elawo alonomago da:ka:pemene, ebe atu tetelo la:imano nanitabo igilote kawokalamene mabu Kelisoko kapiya ebe la:imano igilo mabula.

#### *Kelisoko Magumulo Ditana Ebe Oli Okoli Tanalono Pukala*

<sup>5</sup> Ebema: la:imano tepo magumulo kebe kuba ubi tanalate ka:pola:nale, modobola la: ebe tanalo nanakapulama:la:. Iyo, kamiyale ega:walo buwelemele pilo tanalo, mako kuba osiyodiloma: ubi iyati tanalo, kateneno ubi tanalamo tuduwata tanalo, apa:mo iyaiya ilipo osiyodilole tanalo, ega:walo mani kawonomamo malagidilo tanalo, modobola la: ebe kuba tanalo bilibilinomo alukolenomo nalukola:la:. Numa:la:, potele mani kawonomamo demalagidilona, ebene tanalo ebe ida:da:li amamalateledawano tanalo keba kunula:ka: eba kunula. <sup>6</sup> Nanitabola, piyate Godotamo tudila:oa:no ebako iyaiya kuba tanalo dosiyodilolena, ebema: ebene kawo dowa tanalomote iba:tamo na:pe!

<sup>7</sup> Numa:la:, dopamo la: nanitabokobi midipi atumu ebako kubakuba ubi tanalo magumulo ilukulinaimata, mabu ebe tetelo la: daedale wokilo wapata:lamenaimata. <sup>8</sup> Wiyasiya ka:lo modobola la: me kuba osiyodilole tanalo bilibilinomo na:pupukulama:la: — dowa tanalo, tepo magumulo elama: eda: tanalo, ega:walo lumagi idi kubaimima: ubi iyati tanalo. Iyo, la: lumagi idi malogo tabo ega:walo daleyaya woki awokalimi tabo akokiyawaonakala:, <sup>9</sup> ega:walo la: magumulo idite iditamoma: da: tabo akogeala:, mabu la: tagala okoli tanalono osiyodilole tanalo iyabaiamo iyalo alomimata, lumagite daleyaya kaliku keba kunu ka:pekananakole eba kunu.

<sup>10</sup> Nanitabola, lumagite wadewade kaliku ka:pupulioma: kalakalago keba kunu kuwatenakole, la:le eba kunu Kelisokono oli okoli tanalono osiyodilole tanalo ebo uwatimata. Ebema: numa:la:, me tetelo la:le oli okoli tanalono osiyodilole magumulo eba ilukulinalo me opo epo Osiyodilole dawate la: ebene olonomoma: midilinata, la:le ebene nanitabo tanalo iyatawanomo kiyatawawenama:. <sup>11</sup> Ega:walo me tanalo idila. Me oli okoli tanalo magumulo nanitabokobi midipiate iyaiya kelamota:ona:, ao, Yu epo ega:walo Yua:pi ibi bilibilinomate kapiya epoma: eda:ona. Ma kunu kebe dubate Yu epono tama itamida pukala duwatiya ega:walo piyate ibino pukala uwa:tea:pima: deda:ona, piyate keyakeyapima: deda:ona ega:walo piyate iyaiya mulu opolo dilukuliona, piyate mani woko dosiyodilona ega:walo piyate epetapino wiya: wokopima: deda:ona, Kelisote ebe epo bilibilinomono

Kawodawama: eba eda:nalo kapiya woko ibi magumulo osiyodilona, iba:te ebena kapiya eponomoma: keda:onama:

<sup>12</sup> La: Godote duwatetia ebe epolata, iyo, ebete la: nilakapolo eba malagidilolenalo la: ebena talena epoma: ebo midiliata. Ebema: modobola la: ebena oli okoli tanalono osiyodilole tanalo la:imano wadewade kalikumu na:pupula:la: — nigologolopi walubili tanalo, epetapiatamo nilakapo awokalimi tanalo, la: a:ka:tuwa: la: opamo alomo tanalo, epetapiatamo temeteme ikalamea: tanalo, ega:walo epetapiatamo ubia: tabo samamo gela: tanalo. <sup>13</sup> Ebene la: magumulo idite iditamono samamo akodowala:, ega:walo kebe tetelo lumagi idite kuba dosiyodilomene la: ebena kuba egebolema:wete na:dodomatimiyala:, Kawodawa Kelisote la:imano kuba egebolelametate keba kunu ka:dodolomatililametiya eba kunu. <sup>14</sup> Ebene me wadewade osiyodilole tanalo bilibilinomo unamo modobola la: nilakapo kimalagidilo tanalo na:ka:puliyala:, mabu nanitabola, me uwomu tanalote la:godolo eba itanalo, la:imano iyaiya osiyodilole tanalo bilibilinomo magumulo la: epo kapiyanomoma: beda:onamata.

<sup>15</sup> Iyo, Godote la: deka:la:mitia ebe tetelo ebete ebena ubi ma kunu iyati, la:le Kelisokono kapiya apemu eba ilukulinalo ebena milo magumulo kilukuliawenama: Ebe mabuma: modobola ebena milo tanalote la:imano tepo magumu watodawama: eba eda:nalo, la: la:imano kalakala Godotamo ebo nawokaliminakiyala:. <sup>16</sup> Ebene Kelisokono Wade Tabote la:imano tepo magumulo kawonomamo nitanamene. Ebe gabodo la: magumulo idite idi ebena kawo mulo tanalonomamo ebe tabono iyaiya magumu tanalo eba iyatumilo, piyate kuba gabodo tolaema: dowagelena ibi ebo nowalubilinakiyala:. Ega:walo modobola la: Godoko amamate magumulo la:imano tepo magumuno elawamo iyaiya oala:mo kalakala ebetamo nawokaliminakiyala:, iyo, ma kunu Godokono Bukano Sam Oale bukalo da:pola:na ebe oale, ega:walo nanitabokobi midipiate Godokono anoano tanalo awokalilaema: dosiyodilolenaka ebe oale, ega:walo ebena Uliyanate la:imano tepo magumamo dalomonako ebe oale, la: ebe iyaiya oala:mo ebe bamamatenakomata. <sup>17</sup> Ebema: la:le Nabiwi Godotamo la:imano kalakala Kawodawa Ya:suko magumulo eba awokaliminalo, modobola la:le la:imano tabo gela tanalo ega:walo apa:mo osiyodilole tanalo bilibilinomodo la:imano Ya:suko waloma:ta tanalo nawokaliminakiyala:.

*Kapiya Moto Epate Kelisoko Magumulo Keba Kunu Na:kilukulinama:na:*

<sup>18</sup> Nanitabokobi midipi kamiyala:la:, modobola la: la:imano awiatamo na:tudila:onakiyala:, mabu la: Kawodawa Ya:suko waloma:tapima: eda:onamata. <sup>19</sup> Ega:walo nanitabokobi midipi dubala:, modobola la: la:imano kamiyale nilakapolo nemalagidilolenakiyala:, iyo, la: iba:tamo akoelawonala:. <sup>20</sup> Ega:walo guda:la:, modobola la: la:imano nabila menokobila ibino tabamo na:tudila:onakiyala:, mabu Godote me tanalo uima: nekalakalana. <sup>21</sup> Ega:walo nabiala:, la:imano gudino osiyodilole tanaloma: elawamo akoanalenala:, iba:te ibino tepo magumulo kuiwodopoma: eda:okapoma:.

<sup>22</sup> Ebene kawokawo wokopi dubate la: kebe epo maniamo duwatetiya la:le ibino wiya: woko kosiyodilola:wenama:, ebe dubate me opolo la:imano woko namutupima: eba eda:onaloma, modobola la: ibino tabo bilibilinomamo na:tudila:onakiyala:. Ega:walo woko osiyodilo magumulo la: ma kunu akomalagidilala:, woko namutudawate natamo kekalakalama:, ebete na dunamita ebe kapiya tetelo nale woko wadenomamo osiyodilonakomo. Ao, eba kunua:. Woko namutudawate la: ulame tetelo ega:walo ulamea:



tetelo, modobola la: Kawodawa Ya:suko eba tolemelo, kuba woki idi tepo magumulo wamina:no nanitabo kalakalago woko nosiyodilonakiyala.  
<sup>23</sup> Iyo, la: kebe woko dosiyodilaema, modobola la: la:imano tepo magumuno elawo kawonomamo nosiyodiliyala:, mana: me opo epo kalakalailaema:, la: wiyasiya aimano Kawodawa kekalakalaima:ema: woko wadenomamo nosiyodilonakiyala:.

<sup>24</sup> Me kawo tanalo akododomatiala:, ebe Kawodawate kebe dogodogo tanalo ebena epo mabuma: iyabaiamo dalomiya, ebete ebe iyaiya tanalo magumune wade wiya a:ma:tamo nanitabolo kikaema:ta, mabu ebe a:imano woko namutudawanomola, me opo lumagi idia:. <sup>25</sup> Nanitabola, Godote kapiya gabonomodo epo bilibilinomono tanalo tuputupulo kanag-ilamelelaemene, ebema: ebete a:ma: wade wokodawatamo wade wiya dikametamene, ebe atu tetelo ebete kuba osiyodilolepi bilibilinomatamo kuba wiya ebo ka:kikalaemene.

#### 4

<sup>1</sup> Ebema: la: nanitabokobi midipi woko namutupiala:, piyate la:imano woko wiya:no kosiyodilolenama: maniamo duwata:wiyama, modobola la: ibino woko eba ulamelelamenalo ibino kuba osiyodilolea: tetelo temeteme idi ikalamea:no ibino bae modobolo gito nikalamenakiyala:. La: me kawo tanalo akododomatiala:, la: atumu Unu Duliyomololo dokolina ebe Kawo Namutudawanomono wiya: wokopilata.

#### *Godotamo Towetowe Tabo Gela Tanalo*

<sup>2</sup> Ebema: la: nanitabokobi midipi bilibilinomala:, la: Godago tabo gela katepanala:, ebene la:le ebe da:toweoma:wenakoma, modobola la: towetowe tabo tepo magumuno woki kawonomago eba gelalo ebe atu tetelo ebetamo kalakala tabo nowadipalatenakiyala:. <sup>3</sup> Ega:walo modobola la:le a nowadipaeatenala:, Godote gigiyu atamo a:iyamidate ebene ale ebena tabo epatamo wadenomamo ka:kiyawaonakoma:. Nanitabola, ebete dopamo epatamo dowaminanami ebe wamina nopono magumu ebe Kelisotela, ale ebena tanaloma: tabo ebema: a:kiyawaonakoma:, iyo, me mabuma: nale idoko motolo okolinamo. <sup>4</sup> Ebema: modobola la: na nadipanatenenala:, mabu na ubila Kelisokono tanalo wadenomamo awokalima:, nale kosiyodiloma: Godote ubi keba kunu kiyatinala eba kunu.

#### *Nanitabokobi Midia:piatamo Tabo Kiyawao Tanalo*

<sup>5</sup> Ega:walo modobola la:le me opono nanitabokobi midia:pi magumulo mulo wokino tanalo kapiyago nilukulinala:, ebene Godote wade tete la:tamo dikalameitanakomene la:le ebena nanitabo tanalo iba:tamo atumu nawokaliminakiyala:. <sup>6</sup> Iyo, la:le ibi magumulo la:imano iyaiya tabo kiyawao tanalo wadenoma: na:midilinakiyala:, epate ibino bae soluamo golakobi eba midililo teponomoma: keba kunu ka:midilinake eba kunu. Ebene iba:te la:imano nanitabokobi midi tanaloma: la: danaletanakoma:na:, modobola iba:te wade wiya tabo la:godone nanitabolo nolowionakoma:na:.

#### *Polote Leta Uwomu Apulo Iyaiya Tabo Da:kiyawaiya*

<sup>7</sup> La: niyaniyata, aimano nanitabokobi mididawa ekawi idi Tikika-site la:tamo da:pemene, ebete naimano okoli tanalono iyaiya tanalo la: ka:pikiyawaolaema:ta. Nanitabola, ebete ago Kawodawa Ya:sukono woko eba osiyodilonalo wade wokodawa idima: eda:na, <sup>8</sup> ebema: nale ebe la:tamo palibomo, la:le aimano iyaiya ilukuli tanalo ebegodone dolowiaema la: kalakala ebo kelaemamota. <sup>9</sup> Ega:walo la:imano Kolosi duliyomolodawa idi Onisimasiko, ebe aimano wade nanitabokobi mididawa idila, ebete

Tikikasiago la:tamo ka:pema:na:, ebene kebe tanalate malo kemaimiye, ibi netewapiate ebe tanalo bilibilinomo la:tamo kapawokalilaema:na:.

<sup>10</sup> Me idoko motolo nago dokolina ebe A:listakasite ebene nilakapo tabo la:tamo palibo, ega:walo Banabasiago kapiya kalimanomo ekawi Makate la:tamo atumu nilakapo tabo ka:kiyawauta. Nanitabola, nale tabo la:tamo dopamo ma kunu palibimo, ebete la:tamo da:pemaigamene la:le ebe kalakalago nelawiyala: <sup>11</sup> Ebene Yosuwako, ebene mailo idi ebe Yasitasitela, ebe atumu nilakapo tabo kapalibo la:tamo. Nanitabola, Yu epo magumulo ebe ega:walo Makako ega:walo A:listakasiko, ibi kapiyate Ya:suko nanitabokobi midite ebene Kawo Elawodawano tanalote ka:pema: nago olowiolo woko osiyodilona, iyo, ebe woko osiyodilo magumulo iba:te na kawonomamo walubinina.

<sup>12</sup> Ebene la:imano tanebadawa idite Ya:su Kelisokono woko malo dosiyodilona, ebe Yua: lumagi Epa:palasitela, ebete atumu la:tamo nilakapo tabo kapalibo. Nanitabola, tete bilibilinomolo ebete la: mabuma: Godotamo towetowe tabo kawonomamo genako, la:le nanitabokobi midi magumulo kodakodalo eba lamota:onalolo Godokono ubi tanalomo nanitabonomolo ka:tudila:wenakoma:, mabu la:le ebe gabodo woki netewama: eda:oa:no apepeawete elawonomoma: keda:omamota. <sup>13</sup> Nale Epa:palasikono tanaloma: nani tabonomo ma kunu kiyawautamo, ebete la: Kolosi duliyo-molo epo mabuma: woko elawonomamo osiyodilona, ega:walo kebe nanitabokobi midipiate Iyalapolasi duliyo-mololo ega:walo Lodosiya duliyo-mololo dilukuliona, ibi bilibilinomo mabuma: atumu woko kawonomo ebe kosiyodilona. <sup>14</sup> Ega:walo doketa woko dosiyodilona, me dubu ebe aimano wade lumaginomo Lukuko, ebete Dimasiago ibino nilakapo tabo atumu la:tamo nakapaliba.

<sup>15</sup> Ebene nanitabokobi midipi ekaki magumulo piyate Lodosiya duliyo-mololo dilukuliona ega:walo kebe sosi epate Nimapasikono motolo daladabutinaka, ibi bilibilinomatamo aimano nilakapo tabo nanaliboliyala: <sup>16</sup> Ega:walo la: Kolosi epo me leta la:imano taneba magumulo awokala deka:la:miola:ema, modobola la: walone Lodosiya sosi epatamo eba nikalamele, wiyasiya nale iba:tamo dalibimo ebe leta iba:godone na:nelawiyala:. Kalakala kawonomola, me ebe gabodo nale netewa leta magumamo kebe iyaiya tanalo kakulolimo, la: bilibilinomate ebe tabono tanalo bilibilinomo wadenomamo kolowiomamota.

<sup>17</sup> Naimano uwomu tabo ma kunula, la: Akipasiko naniyala: ebete Kawodawa Ya:suko mabuma: ebegodone delawiya, modobola ebete ebe woko nanitabolo nopoliyamene.

<sup>18</sup> Numa:la:, lumagi idite na mabuma: me leta tabono iyaiya tanalo eba akulolelo, wiyasiya me uwomu nilakapo tabo na Polote a:ka:tuwa: naimano kotonomamo akulolemo. Nale idoko motolo dokolinamo, la:le ebe temeteme tanalo dodomatima: modoboa:.

Modobola Godokono nilakapo tanalote la:godolo nitanamene. Me ebe naimano tabo uwomula. Taula.

## POLOTE DOPO LETA TESALONAIIKA SOSI EPATAMO OSIYODILIYA

<sup>1</sup> Na ebe Polote Sailasiko ega:walo Timotiko, ale la: Tesalonaika sosi epatamo me leta paliboma:. Nanitabola, la: nanitabokobi midipiate Nabiwi Godoko ega:walo Kawodawa Ya:su Kelisoko magumulo bilukulinama. Modobola Godokono nilakapo tanalo ega:walo ebena milo tanalote la:godolo na:pola:nama:na:.

### *Tesalonaika Sosi Epono Nanitabokobi Midi Tanalo*

<sup>2</sup> Ale tete bilibilinomolo la: bilibilinomono tanaloma: Godotamo kalakala tabo eba adipatelo la: towetowe tabamo ebo wadipalatenakota. <sup>3</sup> Iyo, la:imano nanitabokobi midi magumulo kebe wadewade tanalo kosiyo-dilola:wenakima, ega:walo nilakapo kimalagidilo magumulo kebe woko elawonomamo kosiyodilawenaima, ega:walo me tetelo la:le kodakodalo eba lamota:onalalo Kawodawa Ya:su Kelisokono pe tanaloma: demakopela:wenama, ale Nabiwi Godokono ololo apulo me iyaiya tanalo ka:dodolomatilina:.

<sup>4</sup> Aimana nanitabokobi midipi ekakiala:, a iyatawala Godote iyalo tetelo la: nilakapolo eba malagidilolenalo la: ebo uwatiyata la:le ebena epoma: keda:wenama:. <sup>5</sup> Ebe mabuma: ale Ya:sukono Wade Tabo la:tamo dadaima:, ebe tetelo ebe tabote me opo epono mulo tabo gela magumulo kitanina:. Ao, ebe tabote wiyasiya Godokono Uliyanano elawamo la:tamo pi, ebema: la:le la:imano tepo magumulo iyatawaimata ebe tabote Godogodone nanitabonomolo pemaiga.

Numa:la:, ale la:imano nanitabokobi midi magumulo la: kowalubilitama: egela epetapilo la: magumulo keba kunu ka:pilukulima:, ebe tanalo la: iyatawalata. <sup>6</sup> Ebene Godokono Uliyanagodone da:pemaigana, la:le ebe kalakalago ebena Wade Tabo delawa:ima, ebe tetene wagilimite nanitabokobi midia:piate kawokawo temeteme la:tamo eba ikalamelo, la: wiyasiya aimana ilukuli tanaloma: ega:walo Kawodawa Kelisokono okoli tanaloma: a ebo ibamiatenapimata. <sup>7</sup> Ebema: la:imano osiyodilole tanalate atumu Ma:sadoniya ega:walo Guliki opo epatamo ulima: eda:iya, la:le keba kunu kilukula:wenama iba:te ibino nanitabokobi midi magumulo eba kunu na:kilukulinama:na:. <sup>8</sup> Wiyasiya Kawodawano tabote la:imano osiyodilole magumudo Ma:sadoniya ega:walo Guliki opo epo ibi kapiyatamo ka:toa:, iyo, ebe tabote tutelena diyamo keba kunula:ka: iyaiya mulu opamo eba kunu a:ti, ebema: ale ebe opo epatamo da:nemaimima:, ale tabo kiyawaoa:no iba:te la:imano nanitabokobi midi tanalo iyalo olowiya. <sup>9</sup> Numa:la:, ibi bilibilinomate negelana ale Wade Tabo la:tamo dadaima: la:le a kalakalago keba kunu kuwatea:ima, ega:walo iba:te na:kegelana la:le a:da: elemasigi uliyanano ida:da:li amamalatele magumune Igilodawa ega:walo Nanidawa Godoko amamate tanaloma keba kunu kolobila:ima, <sup>10</sup> ega:walo Godokono Gudute Unu Duliynomolone pema: la:le ebe tanalo demakopela:wenama, iba:te ebe tanaloma: atumu na:kegelana.

Me tanalo nanitabola, Godote ebena Gudu a:e magumune igilamo adipatiya, ebema: me Ya:sute a nanitabokobi midipino igilo na:mula:leamena, Godogodone da:pemene ebe dowo tanalo kawonomote a puwatekapoma:.

## 2

### *Polote Tesalonaika Kawo Duliynomololo Godokono Woko Keba Kunu Kosiyodilonamile*

<sup>1</sup> Ebema: aimano nanitabokobi midipi ekakiala:, la: iyatawanomolata ale la: magumulo woko osiyodiloma: da:pelaima: ebe woko magumulo wadewade da:ima:te emaimiya. <sup>2</sup> Ega:walo la: iyatawalata, ale la:tamo pelamea:no dopamo Pilipai duliynomololo nanitabokobi midia:piate a malogoelo temeteme atamo keba kunu kikaemi, ebene ale la:imano duliynomolamo da:pelaima: ebolo epetapi bilibilinomate atumu a kawonomamo odiyoboema: eba wagelelo, wiyasiya aimano Godote tole tanalo iyabaiamo iyatiamete, ale ebegodone da:pena ebe Wade Tabo la:tamo wadenomamo ebo pa:kiyawaima:.

<sup>3</sup> Nanitabola, la:le me Wade Tabo nanitabokobi ka:mida:ema: ale la: danaletia, ebe tetelo ale ele gabo odidi tanalodo ega:walo tepo magumuno kalawikalawi wokino tanalodo iyaiya a:da: elemasigi tabo kegela:. <sup>4</sup> Ao, aimano tanalo eba kunua:, ale wiyasiya epatamo Godokono nani tabo kapiya a:kiyawaonakoma:, mabu Godote a ebene wadewade wokopima: ka:milo ebene Wade Tabo kiyawao woko atamo ikaemiya. Ebema: ebe woko osiyodilo magumulo aimano woki ma kunu kitana:, ale epo eba kalakalailamenalo iba:te a kowalogoena:, ao wiyasiya aimano ubi niyatinakoma: Godoko kapiya kekalakalaiminama:, mabu ebete aimano tepo magumuno tanalo bilibilinomo eba ulamelo ebo anagilameleamenako.

<sup>5</sup> Ebema: la: iyatawalata, a la:go eba pilukulilo ale unu gabodo la: walogolelo la:tamo nilakapo tabo ka:kiyawaonakia: inamabu epetapi ega:walo mani la:godone kuwatema:, iyo, Godote aimano nanitabo tanalo atumu iyatawala aimano tepo magumuno wokilo ebako a:da: elemasigi tanalote la:tamo kitanatia:!<sup>6-7</sup> Numa:la:, ale Kelisokono alibolepima: dedaonama: ebe tanalo kawonomamo malagidiloa:no ale la: kanaletanakia: iyaiya inamabu epetapi ega:walo mani atamo gito kikaemoa:ema:, iyo, aimano woko osiyodilo magumulo ale epono amama tanalo la:godolo ega:walo epetapiagodolo kowadinakia:, wiyasiya ale la: wadenomamo anikulamenapiata, menokote ebene gudi wadenomamo danikulamenanako eba kunu.

<sup>8-9</sup> O aimano nanitabokobi midipi ekakiala:, ale la: kawonomamo nemalagidilolenata, ebe mabuma: ale Godogodone da:pena ebe Wade Tabo la:tamo eba ikalamelo la: mabuma: aimano igilo iyabaiamo ebo alomonakima:. Nanitabola, aimano nilakapo la:tamo da:pesoma: keda:namia:, ebema: ale la: magumulo temeteme woko eba osiyodilolo kebe kodakoda tanalo kulamenakima:, na iyatawala la: ebe tanalo ka:dodolomatila:wena:. Iyo, idoko ega:walo egela ale aimano kotamo woko osiyodilonakima: a a:ka:tuwa: aimano iyaiya modoboa: tanalo kulaema:, mabu ale Godokono Wade Tabo kiyawao woko la:godolo eba posiyodilolo ale da:peso temeteme idi la:tamo kikalametama: ubia:noma: eda:onakima:.

<sup>10</sup> Nanitabola, ale ebe tetelo la: nanitabokobi midipi magumulo kebe tanalo kosiyodilolenakima: ebe tanalo ebe tuputupu-ibinomola, kuba osiyodilo tanalo kapiya idite agodolo kitananakia:. Iyo, la: ega:walo Godoko la:le aimano wade-talena ilukuli tanalo iyatawanomolata, <sup>11</sup> ega:walo la: me tanalo idi iyatawalata, nabiate ibino gudi keba kunu kowalubilinake, ale la: bilibilinomo eba kunu walubiliniyata. <sup>12</sup> Numa:la:, iyaiya tete epetapilo ale la: wade tabono tanalamo eba walubililo la: analenakiyata la:le la:imano ilukuli magumulo Godokono wadewade ga:limapi gudima: keda:wenama:, mabu ebe Kawodawate la: ka:la:mi katepana: la:le ebene Kawo Elawodawano duliynomolono pukuilame tanalo kawonomo

eba:go kapimiya kelawa:ema:.<sup>13</sup> Ebema: modobola ale tete bilibili-nomolo Godotamo kalakala tabo begelanama:, mabu Godogodone da:pena la:le ebe tabo agodone dolowiaima, ebe tetelo la:le me opo lumagino taboma: kegelawe:, wiyasiya la:le kodakodalo lawa:wete Godokono nani tabonomoma: midimata. Nanitabola, ebe tabo Godokonola, ebema: kebe lumagite ebe nanitabokobi da:midina, ebe tabote ebe magumulo wade woko bosiyodilonamene.

*Ya:suko Mabuma: Temeteme Tanalate Tesalonaika Nanitabokobi Midipiatamo Demaimiya*

<sup>14</sup> Ebema: aimano nanitabokobi midipi ekakiala:, Godokono tabote la: magumulo woko dosiyodilona, a ebe tanalo iyatawala mabu ebena sosi epate Yudiya opono iyaiya duliynomololo dilukuliona, ebe nanitabokobi midipiatamo kebe temeteme tanalate kemaimiyale ebe atu tanalate la:tamo a:kemaimiya. Iyo, la:imano opo epate la:tamo kebako temeteme kikalametia, dopamo tetelo Yu epono opolo epetapiate Ya:su Kelisokono waloma:tapiatamo ebako atu temeteme ebe kikalamiya.<sup>15</sup> Ebema: modobola la: ebe nanitabokobi midia: Yu epono tanalo nemalagidilala:, Godokono elawo tanalote iba:tamo kawonomamo itana, mabu iba:te epo nodiyobolena ebetamo pelaema:! Iyo, iba:te dopamo Godokono woki awokalimipi danakapulamenakiya, ebena ebe atu gabodo Kawodawa Ya:suko akanakapumiya ega:walo a ebe nanitabokobi midipi aimano opone elawamo gito a:na:ma:ateiya.<sup>16</sup> Ebena ale aimano opo atepate mulu opolo dilukuliona ebe Yua:piatamo tolamete Godokono igilo mula: tabo iba:tamo kiyawao eba nowagilimilo, wiyasiya ebolo Yu epo epetapiate a odiyoboema: atumu kowageliya. Ebema: numa:la:, iba:te uwomu tetelo me kawo kubanomo idi eba osiyodilolo Godokono ololo apulo ibino kuba osiyodilole tanalate etabokai, me mabuma: ebena kawo dowa tanalonomote iba:tamo a:pemaiga!

*Polote Tesalonaika Sosi Epatamo Walo Toma: Ubi Da:kiyatiya*

<sup>17-18</sup> Ebema: aimano nanitabokobi midipi ekakiala:, ale la: da:miyapatia ebe tetene wagilimite me teta:mo pemaiga, ale tete da:pesolo aimano katene apa:mo iyaiya eba ilukula:tepalo wiyasiya aimano tepo magumuno wokilo ale la:go kapiyanomoma: eda:onatima:. Ebe mabuma: tete bilibinomo epetapilo ale ubi kawonomamo iyatinakima: la:tamo kapimiya pelamete la:imano ololo walo ka:ka:pulaema:, ega:walo tete epetapilo na Poloko na a:ka:tuwa: pema: wagenakimo wiyasiya Saitanate a nodiyoboenaiki.

<sup>19</sup> Nanitabola, aimano ubi la:tamo kawonomamo bitana. Numa:la:, la: aimano kalakala tanalono mabulata, ebema: ale Ya:sukono pe tanalo nemakopelenama: mabu ale la: ebena ololo apulo walo da:kulametamene, ebe tetelo aimano kalakalate kawonomoma: ka:keda:mene. Iyo, ale Saitanatamo gowela magumulo delaima:, la: ebe ebe wato kikopulata,<sup>20</sup> mabu ale Ya:su Kelisoko magumulo eba ilukulinalo, la: aimano amama tanalolata ega:walo aimano kalakala mabulata.

### 3

*Polote Tesalonaika Sosi Epo Ka:nowalubilima: Timotiko Danalibiya*

<sup>1</sup> Numa:la:, ale la:tamo kapimiya pelaema: gabo nipo dowadima:, ebema: aimano tepo magumulo woki bilibilima: eba eda:olo ale negelima:, “Modobola a epetapiate me A:tenese duliynomololo eba ilukulilo,<sup>2</sup> a magumulo aimano nanitabokobi mididawa ekawi Timotiko kapiya kanalibomalema:.” Nanitabola, ale Ya:sukono Wade Tabo da:kiyawaonakoma: Timotite ago



kapimiya Godokono wade woko bosiyodilona, ebema: ale ebe la:tamo apalibima: ebete la: eba powalubililo la:le nanitabokobi midi magumulo kodakodalo kelamota:wenama:, <sup>3</sup> mabu a ubia:nola nanitabokobi midia:pino temeteme ikalame tanalodo la: magumulo idi kapiyate kubanu alegama:. La: iyatawanomolata mako temetema:te Godokono ubilo a nanitabokobi midipiatamo pemaimionaka, <sup>4</sup> mabu a la:go eba pilukulilo ale la: ma kunu analiata, “Nanitabokobi midia:piagodone temeteme tanalate atamo ka:pemaimioma:na:.” Iyo, nanitabola, me tetelo la: iyatawanomolata ebe tanalote la:tamo emaigi. <sup>5</sup> Ebema: numa:la:, nale me tanalo eba malagidilolo Timotiko ebema: palibimo, iyo, la: mabuma: nale naimano tepo magumulo woki bilibilima: eba eda:lo ubi ebo iyatimo, ebete la:go eba pokolilo la:imano nanitabokobi midi tanalo wadenomamo ka:pulamelelametama:. Ebe tetelo na ubia:nola la: epetapiate Saitanakono kuba tanalamo wabuga:ta gabamo da:guda:ima ebete ebe tanalo puima:, mabu mako tanalote la:tamo nemaigataleka:, ale kebe kodakoda woko la: magumulo kosiyodilima: ebe wokote gito ba:kubana:!

<sup>6</sup> Wiyasiya Timotite la:godone atamo walo da:ka:pi, ebe tetelo ebete la: mabuma: wade tabonomo atamo adai, ma kunu la:imano nanitabokobi midi tanalote Godotamo kodakodalo itana ega:walo la:imano nilakapo epetapiatamo atumu ba:kitanya, ega:walo ebete a napanai la: tete bilibilinomolo a nilakapolo keba kunu kemalagidilola:wenama, iyo, ale la: ulaema: ubi kawonomamo diyatinama: la: atumu a uaema: ubi na:kiyatinamata. <sup>7</sup> O aimano nanitabokobi midipi ekakiala:, Timotite la:imano nanitabokobi midi tanaloma: a da:pikiyawaoami ebe tabote a nanitabolo kalakala ikaeami! Ebe mabuma: ale aimano mibomibo tanalo ega:walo iyaiya temeteme tanalo kawonomamo a:kemalagidilolema:, <sup>8</sup> mabu kebe tetelo la: Kawodawa Ya:suko magumulo kodakodalo delamota:wenama, ale ebe tanalo dolowima: ebe tetelo a kawo kalakala lawete aimano ilukuli magumulo woki bilibili tanalo idite nanitabolo a:kitanamene. <sup>9</sup> Ebema: ale Godokono ololo apulo delamota:onama: la: mabuma: aimano kalakala beda: kawonomola:ka:! Iyo, ale aimano kalakala tabo ebetamo eba wadipalatelelo, <sup>10</sup> egela ega:walo idoko bilibilinomolo ebe na:toweomenakoma: ebete a gabo diyatuamemene, ale pelamete la:imano ololo eba pulamelo kebe modoboa: tanalate la:imano nanitabokobi midi magumulo da:pola:na ebe iyaiya tanalo ka:pa:tuputupuilaemalema:.

<sup>11</sup> Ebema: modobola aimano Nabiwi Godoko ega:walo aimano Kawodawa Ya:suko iba:te gabo nosiyodiloma:na: ale la:tamo ka:pelaema:. <sup>12</sup> Ega:walo modobola Kawodawate la:imano tepo magumulo ebeno nilakapo kimalagidilo tanalo kawonomoma: na:midimene, ebene la: magumulo epetapiate epetapi nilakapolo eba malagidilolelo la:le opo epo epetapi bilibilinomo atumu kawonomamo bemaalagidilolenamata, ale la: keba kunu kemalagidiloletana eba kunu. <sup>13</sup> Ega:walo modobola aimano Kawodawa Ya:sute me gabodo la:imano tepo magumu na:kodakodailaemene, ebene ebete ebeno talena waloma:tapi bilibilinomago walo da:ka:pemene, ebe tetelo la:le aimano Nabiwi Godokono ololo apulo tuputupupinomoma: eba eda:olo ebo ka:nelamota:onamamota, mabu la: magumulo kapiya kuba idite a:kitanamene.

## 4

*Nanitabokobi Midipiate Ibino Ilukuli Magumulo Godoko Keba Kunu Na:kekalakalaiminama:na:*

<sup>1</sup> Ebema: aimano nanitabokobi midipi ekakiala:, la: dopamo agodone iyatawaimata la:imano ilukuli magumulo la: Godoko keba kunu na:kekalakalaima:wenama, ebema: aimano kalakala bitana mabu la: eba kunu bilukulinamata. Ebene me leta uwomu apulo ale me tanaloma: la: Kawodawa Ya:sukono mailamo walo kawonomamo nakanaleta, modobola la: ebe tuputupu ilukuli magumulo eba pola:nalo la:imano wadewade osiyodilole magumulo napepeonala:, <sup>2</sup> iyo, ale dopamo Ya:sugodone uwatete la:tamo dikalametia ebe iyaiya totomu tabono tanalo la: iyatawalata. <sup>3</sup> Ebema: la: mabuma: Godokono ubi ma kunula, la:le ebena talena okoli tanalo magumulo eba pola:nalo buwele pilo tanalo ega:walo dubu idino kamiyale pilo tanalo makomako kuba tanalo ako-osiyodilola:la:. <sup>4</sup> Modobola, la: bilibilinomate wiyasiya wadewade ega:walo talena ilukuli woki kapiya nuwatiyala:, tete bilibilinomolo la:imano kateneno kuba ubi tanalate la:imano tepo magumuno wade mulo wokino tanalamo nanitabolo ka:tudila:onama:. <sup>5</sup> Numa:la:, piyate ibino kateneno iyaiya ilipo tanalo elawonomamo dowaloma:talena ebe kuba osiyodilolepiate Godokono tanalo iyatawa:, ebe mabuma: ebe ubia:nola la:le ibi keba kunula:ka: ebako epoma: eda:oma:. <sup>6</sup> Iyo, la:le nanitabokobi midi magumulo kapiya alailame gudima: eba eda:onalalo, modoboa: idite ebena lumagitamo kateneno kuba ilipo tanalo osiyodiloma:, ega:walo modoboa: idite a:da: elemasigi gabodo ebena ekawino wade tanalo idi pilolo laema:.

Nanitabola, ale dopamo la: kawiya ma kunu analiata, piyate mako kuba tanalo dosiyodilolena Godote iba:tamo wiya nanitabolo kikalaemene. <sup>7</sup> Numa:la:, Godote a nanitabokobi midipiate ebena talena okoli tanalo magumulo ka:pola:nama: a iyalo eka:miya, iyo, ebe ubia:nola ale kateneno kubakuba ubi tanalono osiyodilole magumulo kilukulinama:. <sup>8</sup> Ega:walo me tanalo idila. Godote ebena Uliyana la:tamo nikalamenata la:le ebena talenapima: keda:wenama:, ebema: la: magumulo idite aimano iyatulame tabo ubia:noma: deda:na, ebete me opo lumagino totomu taboma: ebena ubia: tanalo kawokalimina:, ao, ebena osiyodilo magumulo ebete Godokono totomu taboma: ebena ubia: tanalo awokalimina.

<sup>9-10</sup> Ega:walo modobola la: me tanalo idi na:kuma:la:, la:le nanitabokobi midipi nilakapolo kemalagidilola:wenama: Godote la: dopamo iyatulamiata. Nanitabola, la:le ebena tabamo tudila:olo Ma:sadoniya opono nanitabokobi midipi ekaki bilibilinomo na:nilakapoilamenakomata, wiyasiya aimano ekakiala:, kuba: ale me leta magumulo Godokono nilakapo kimalagidilo tanaloma: la: walo kakanaleta:, iyo, a ubi kawonomola me kapiya tabo idi la: kanalema:ta, modobola la: Godokono nilakapo magumulo walo nakapepeala:. <sup>11</sup> Ebema: la: la:imano ubi kawonomamo ma kunu niyatinala:, la:le epo epetapiago milolo eba ilukulinalo epetapino tanaloma: tabo gela:no la: a:ka:tuwa: la:imano ilukuli tanalo kapiya wadenomamo kulaemamota. Ega:walo kebe iyaiya modoboa: tanalo la:godolo da:pola:na, mani woko kelekele osiyodilole magumulo la: a:ka:tuwa: ebe tanalo na:modoboilamenakiyala:, ale la: dopamo keba kunu kanaletia eba kunu. <sup>12</sup> Numa:la:, la: me tanalamo nanitabolo da:tudila:oaema, ebe tetelo la: mani ega:walo inamabu epagodone gito uwatema: temeteme iba:tamo a:kikalama:ema, iyo, ebe mabuma: nanitabokobi midia:piate la:imano tuputupu osiyodilole tanalo dulamelelametamene iba:te la: wadewade epoma: ebo kegelama:na:.

### *Kawodawa Ya:sukono Pe Tanalo*

<sup>13</sup> Aimano nanitabokobi midipi ekakiala:, piyate nanitabokobi midi magumulo da:elaiya, a ubila la: ibino nanitabo tanalo wadenomamo

niyatawala; la:le ibino a:elao tanaloma: tepo magumulo mibomibo lawekapoma:. Numa:la:, nanitabokobi midia:piate ibino epono a:elao tanaloma: kubanomamo iminaka, mabu iba:te Ya:sukono kalakala tanalo ega:walo ebena pe tanaloma: olowiolo kemakopelena:. Wiyasiya la: ibi keba kunula:ka: eba kunu akoeda:oala:, <sup>14</sup> mabu a nanitabokobi midipiate iyatawala, Ya:sute da:iya ebete igilamo walo a:kemaigiya, iyo, ebe mabuma: piyate nanitabokobi midi magumulo da:elaoma:na: Godote iba:tamo igilo walo ka:kikalaemene, ebete Ya:sutamamo igilo keba kunu kikamiyale eba kunu, ebema: kalakala kawonomola, ebena pe egelalo ebete ibi atamo walo ka:kemagaelemene!

<sup>15</sup> Ebema: ka:lo ale la: diyatulametita, me tabo Kawodawano iyatula-lame tabola. Nanitabola, Ya:sukono pe egelalo a piyate nanitabokobi midi magumulo igilolo dilukulionama:, Unu Duliyaomolamo ka:nodoloma: piyate dopamo da:elaiya ale ebe nanitabokobi midipi a:ka:dopalaema:.

<sup>16</sup> Numa:la:, ebe egelalo Godote ebena tabo madodo unamo adipatelo modobo tabo degepatemene, ebe tetelo me opo epate Godokono tutele diyamo ega:walo ebena elawo nopodawanomono tabo madodo olowiote Kawodawa Ya:sute Unu Duliyaomolone ebo ka:piwisigamene. Ebema: piyate nanitabokobi midi magumulo da:elaiya, iba:te dopamo igilamo maimiote, <sup>17</sup> ebena a piyate me opolo igilolo dilukulionama: Ya:sute a uwatete, a nanitabokobi midipi bilibilinomate eba:go tobolo unulo ebo kanaladabutimalema:. Nanitabola, ebe tetene wagilimite ale Kawodawa Ya:suago uwomua: uwomua: tetelo bilukulinama:, <sup>18</sup> ebema: modobola la: magumulo me tabono tanaloma: epetapiate epetapi wadenomamo nowalubiinakiyala:.

## 5

### *Nanitabokobi Midipiate Ya:sukono Pe Tanaloma: Olowiolo Nemakopelena:na:na:*

<sup>1-2</sup> Ebema: aimano nanitabokobi midipi ekakiala:, Kawodawa Ya:sukono Kawo Egelalo keba iyaiya tanalate demaimioma:na:, ebe tanaloma: nale me leta magumulo la: kawiya akanaletama, mabu la: iyatawanomolata pilo dubute idokolo keba kunu ka:penakole Ya:sute ebe Egelalo eba kunu ka:pemene. <sup>3</sup> Iyo, ebe egelate pea:no dopamo nanitabokobi midia:piate ma kunu begelanakoma:na:, “Aimano ilukuli tanalo wadenomola, ega:walo tole tanalote agodolo kitana: mabu me opo epate milo tanalo magumulo ilukulina.” Wiyasiya ebe tetenomolo Godokono kawo olalati tanalonomote iba:tamo gito ka:pemaigamene, lamitu kamiyaletete iyaiya tanalo eba osiyodilolelo ebena gudu alaimi temetemetete ebetamo keba kunu ka:pemaiganakole eba kunu. Nanitabola, ebe tetelo nanitabokobi midia:piatamo da:pemaigamene, iba:te ebe olalati temeteme magumune alautioma: gabo nipo kowadima:na:!

<sup>4</sup> O nanitabokobi midipi ekakiala:, piyate idoko kawonomolo u delaanaka iba:te pilo dubuno pe tanalo kiyatawaonakoa:, wiyasiya la:imano tanalo eba kunua:! La: idoko magumulo kilukula:wena: wiyasiya la: Kawodawano pe tanaloma: olowiolo ilukulinamata, ebema: ebete ebena Kawo Egelalo da:pemene la:le ebe tanalo uma:wete a:kela:wa:omata. <sup>5</sup> Numa:la:, la: bilibilinomate alo teteno gudima: eda:onamata, iyo, a nanitabokobi midipi idoko teteno gudima:, <sup>6-7</sup> ebema: epetapiate u delaanaka ale ebako epoma: eda:oma: modoboa:, mabu idoko tete ebe ibino u lao tetela ega:walo idoko tete ebe ibino gamoda nio tetela. Modobola ale wiyasiya tuputupu

wokilo eba ilukulinalo aimano Kawodawano pe tanaloma: olowiolo ke-makopelenamalema; <sup>8</sup> iyo, a nanitabokobi midipi a egela teteno epola, ebema: modobola ale tete bilibilinomolo tuputupu wokilo bilukulinama. Ega:walo modobola ale Godoko nanitabokobi midi tanalo ega:walo nilakapo kimalagidilo tanalo, ebe netewa kawokawo tanalo aimano apa:mo ka:pupulimalema; gowelaodawate ebena negege inamabu da:pulinako eba kunu. Ega:walo ale aimano igilo mula: tanalo Ya:sugodone nanitabolo laema; modobola ale ebena pe tanaloma: olowiolo bemakopelena; mabu ebako olowio tanalo ebe goweladawano diba keba kunula:ka: eba kunula.

<sup>9</sup> Numa:la; Godote a keka:miya: ebete aimano kuba osiyodilole mabuma: ebena kawo dawanomo magumulo wiya atamo kikaema: Ao, ebete wiyasiya a uwateiya ale aimano Kawodawa Ya:su Kelisokono woko tanalodo aimano igilo mula: tanalo kelaema; <sup>10</sup> mabu Ya:sukono a: e tanalono magumu ma kunula, ebe ubila ale uwomua: uwomua: tetelo eba:go kilukulinama. Ebema: kalakala kawonomola, nanitabokobi midipi magumulo piyate dopamo da:elaiya ega:walo piyate ebena pe egelalo me opolo dilukulionama:na: ibi bilibilinomate kapiya tetelo ibino nanitabo kalakala ebegodone ka:nelaema:na:. <sup>11</sup> Iyo, me mabuma: modobola la: la:imano tabono tanaloma ega:walo la:imano osiyodilole tanaloma la: magumulo epetapiate epetapi wadenomamo nowalubiinakiyala; la: me tetelo keba kunu kosiyodilawenama eba kunu.

*Polote Leta Uwomu Apulo Iyatulame Tabo Epetapi Da:kiyawaiya*

<sup>12</sup> Aimano nanitabokobi midipi ekakiala; ale la: analeta la:imano nanitabokobi midi magumulo piyate Kelisokono nanitabo gabo ega:walo okoli tanalo la: iyatulaema: woko dosiyodilona, modobola la: la:imano tepo magumuno wokilo ibi unamo eba wadipalatelelo ibino tabamo na:tudila:onale. <sup>13</sup> Numa:la; iba:te la: kowalubilitama: wade woko osiyodilona, ebema: modobola la: ibino tabamo wadenomamo eba tudila:olo ibi nilakapolo nemalagidilolenala. Ega:walo me tanalo idila, modobola la:imano taneba magumulo la: bilibilinomate milolo nilukulinala:

<sup>14</sup> Ebema: aimano nanitabokobi midipi ekakiala; ale la: kawiya nanaleta la: magumulo piyate damolama: deda:ona, modobola la:le ibi nanala:la: woko nanitabolo kosiyodilolenama: Ega:walo piyate ibino nanitabokobi midi magumulo ilipo diyatawaona ega:walo piyate elawoa:noma: deda:ona, modobola la:le la:imano tabamo ega:walo osiyodilole tanaloma ibi nowalubiliyala; iyo, la:le iyaiya epo epetapi bilibilinomo la:imano tabamo dowlubila:wenakoma la:le iba:tamo samamo ubia:noma: akoeda:onale. <sup>15</sup> Ega:walo me tanalo idila. La:imano ilukuli magumulo idite iditamo kuba dosiyodilomene, ebe tetelo temeteme lawedawate kuba osiyodilodawatamo wiya akoikama:la; wiyasiya modobola la:le tete bilibilinomolo la:imano ubi kawonomamo niyatinakiyala; la: magumulo idite iditamo nilakapo eba awokalimilo iyaiya epo epetapi bilibilinomatamo atumu wadewade tanalo kapiya ka:kosiyodilola:wenama:

<sup>16</sup> Ebene tete bilibilinomolo la:le Godokono kalakalago eba ilukulinalo, <sup>17</sup> idoko ega:walo egela bilibilinomolo eba:go tabo gela tanalo atepa:no, <sup>18</sup> wadewade tanalate maimio tetelo ega:walo olalati tanalate maimio tetelo ebetamo kalakala tabo nowadipalatenakiyala: Nanitabola, me netewakapiya tanalo ebe Godote la:imano ilukuli magumulo ulaema: ubi diyatina ebe tanalola, mabu la:le Ya:su Kelisoko magumulo eba ilukulinalo ebe wadewade tanalate la:godolo nemaimionakoma:na:

<sup>19</sup> Ebema: Godokono Talena Uliyanate kebe woko kosiyodilonale ebe woko ako-odiyobala; <sup>20</sup> iyo, kebe tetelo lumagi idite Godokono woki nanitabonomolo dawokalimene, modobola la:le ebe tabo lawa:wete kubama: akogelala: <sup>21</sup> Wiyasiya la: nanisiwale, epate kebe iyaiya tabono tanalo Godokono mailamo da:kiyawaonaka, la:le ebe tabono tanalo bilibilinomo la:imano wade wokiamo anagilama:wete nani tabonomoma: samamo akogelala: Me gabodo la:le Godokono nani tabono iyaiya tanalo kodakodalo eba watila:mota:nalo, <sup>22</sup> iyaiya kuba tabo ega:walo osiyodilole tanalo bilibilinomo la:le walogabo apuamo na:midaliyala:

<sup>23</sup> Nanitabola, kebe dawate a nanitabokobi midipiatamo milo dikaeamena, ebe Kawodawa ebe Godotela, ebema: ale la: mabuma: ebe ma kunu toweomenakoma:, ebete la:imano ilukuli tanalo bilibilinomo magumulo la: ebena nani talenapima: eba midililo, ebete la:imano uliyanano woki ega:walo tepo magumuno ubi tanalo ega:walo ape kawonomono osiyodilole tanalo wadenomamo nulamelelamenakoma:ta. Kalakala kawonomola, me gabodo Kawodawa Ya:su Kelisokono pe tetelo kuba da:peso idite la: magumulo a:kitanamene. <sup>24</sup> Numa:la:, Godote la: ebena talenapima: keda:oaema: ka:la:minata, ebema: ebe modobola ebete ebe wade woko la: magumulo opoliyama:, iyo, ebete kebe tanalo osiyodilolema: tabo da:kiyawaona ebete ebe iyaiya tanalo nanitabonomolo bosiyodilolenakomene.

<sup>25</sup> Ebema: aimano nanitabokobi midipi ekakiala:, modobola la: atumu a mabuma: Godotamo na:towetoweonakiyala:, <sup>26</sup> ega:walo la: dalad-abuta:wenakoma, modobola la: bilibilinomo epetapiate epetapino koto uwateuilo na:wiyamidauinakiyala:. <sup>27</sup> Na Polote Godokono mailamo la: ma kunu analemata, la: me leta nanitabokobi midipi ekaki bilibilinomatamo neka:la:mioliyala:.

<sup>28</sup> Modobola aimano Kawodawa Ya:su Kelisokono nilakapo tanalote la:godolo nitanamene. Me ebe naimano tabo uwomula. Taula.



## POLOTE NABA 2 LETA TESALONAIIKA SOSI EPATAMO OSIYODILIYA

<sup>1</sup> Na ebe Polote Sailasiko ega:walo Timotiko, ale la: Tesalonaika sosi epatamo me leta paliboma:. Nanitabola, la: nanitabokobi midipiate aimano Nabiwi Godoko ega:walo Kawodawa Ya:su Kelisoko magumulo bilukulina-mata. <sup>2</sup> Modobola Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta.

### *Godote Kuba Osiyodilolepiatamo Wiya Ikalame Tanalo*

<sup>3</sup> Aimano nanitabokobi midipi ekakiala:, modobola tete bilibilinomolo ale la: mabuma: Godotamo kalakala tabo bowadipalatenakoma:. Iyo, ale eba kunu kowagelenama: me ebe wade tanalola, mabu la:imano nanitabokobi midi tanalote eba apepeonalo, la: magumulo epetapi-ate epetapi nilakapolo demalagidilola:wenama ebe tanalote atumu kawoma: neda:na. <sup>4</sup> Ebe mabuma: ale Godokono sosi epo epetapiatamo da:nemaimionakoma:, ibi magumulo la: eba walogolelo la:imano wadewade osiyodilole tanaloma: gelanakoma:. Iyo, nanitabokobi midia:piate la:tamo kawokawo temeteme dikalametana la: wiyasiya ebe mibomibo magumulo Godoko nanitabokobi midi mabuma: kodakodalo delamota:wenama, ale ebe tanaloma: nanitabokobi midipi epetapi kawonomamo ebema: analenakoma:.

<sup>5</sup> Nanitabola, la:le temeteme uwate tetelo kodakodalo delamota:wenama, ebe tanalote me tanalo awokalimina, Godote me opo epono kuba osiyodilole tanalo danagilamelelaemene ebete ebe tanalo tuputupunomolo ma kunu kosiyodilomene, ebete la:imano temeteme uwate mabuma: la: ebenu wadewade ga:limapi gudima: eba ka:la:milo, modobo tabo ebo kegemene la:le ebenu Kawo Elawodawano duliynomolamo ka:nopila:oaema:. <sup>6</sup> Iyo, Godoko ebe iyaiya tuputupu tanalo kapiya osiyodiledawala, ebema: piyate me tetelo temeteme la:tamo dikalametana ebete iba:tamo kuba wiya kikalaemene, <sup>7</sup> wiyasiya ebete la:godone ega:walo agodone aimano temeteme tanalo bilibilinomo iyabaiamo eba alomolo a kapimiya gelebadikobi ebo ka:midimene.

Nanitabola, ebe tetelo aimano Kawodawa Ya:sute ebenu elawo nopopino-mago Unu Duliynomolone awokala da:pemene, <sup>8</sup> piyate ebenu Wade Tabamo tudila:oa:no ega:walo Godoko ubia:noma: deda:ona, ebete ebe epatamo elawo ela menagononomamo wiya ebo ka:pikalaemene. <sup>9</sup> Ebenu ebe kuba osiyodilolepino temeteme tanalote uwomua: tetelo bitanamene, iyo, Kawodawate ibi ebenu ololo apune ega:walo ebenu elawo pukuilame alonomone iyabaiamo gito kalibolemene iba:te ibino kuba wiya magumulo ka:nilukulionama:. <sup>10</sup> Wiyasiya kalakala kawonomola, Kawodawate ebenu Kawo Egelalo da:pemene, ebe tetelo piyate ebenu epoma: deda:ona ebe nanitabokobi midipi bilibilinomate ebe unamo eba adipatelo ebe mabuma: kawonomamo kanoanoma:na:! Ebema: numa:la:, la:le ebe epono taneba kawonomo magumulo atumu ka:pola:namamota, mabu ale la:tamo ebenu Wade Tabo da:pa:kiyawaima: la: ebe tabo nanitabokobi a:midimata.

<sup>11</sup> Ebema: ale ebe tanalo eba malagidilolo tete bilibilinomo epetapilo la: mabuma: aimano Godotamo ma kunu towetoweonakoma:, ebete kebe wade okoli tanaloma: la: deka:la:mitia, modobola ebete ebe okoli magumulo la: ebenu wadewade ga:limapi gudima: na:midilima:ta, ega:walo modobola

ebete ebena elawo la:tamo nikalaema:ta, la:le la:imano tepo magumuno wadewade ubi tanalona ega:walo la:imano nanitabokobi midi magumune tuputupu osiyodilole tanalo eba waulatelelo ebe iyaiya tanalo wadeno-mamo kopoliyalema:.<sup>12</sup> Ebe mabuma: piyate la:imano wadewade ilukuli tanalo dulaema:na:, iba:te aimano Kawodawa Ya:suko walogolo ebena mailo unamo eba adipatelo, ebe wade amama tanalote Ya:sugodone la:tamo atumu ka:ka:pemaigamene, ebema: modobola me wade tanalote aimano Godoko ega:walo Kawodawa Ya:su Kelisoko ibino nilakapo magumudo eba kunu nemaigamene.

## 2

### *Me Opolo Kawokawo Kuba Osiyodilole dawate Kemaigamene*

<sup>1</sup> Ebema: aimano nanitabokobi midipi ekakiala:, aimano Kawodawa Ya:sukono pe tetelo ebete a nanitabokobi midipi eba:go kilukulinama: kapiyakobi da:pa:midimene, ebe tanaloma: ale la: ma kunu analeta,<sup>2</sup> piyate a:da: elemasigi tabo ma kunu degelana, “Kawodawano Kawo Egela iyalo emaigi,” ebe mabuma: la:imano woki netewama: akoeda:oala: ega:walo la: woki bilibili tanalo akolawa:la:. Diyala, la: magumulo epetapiate da:begeleane me tabono tanalote agodone pi. Ao, eba kunua:! Ale dopamo la:godolo eba pilukulilo la:tamo Godokono woki dawokalimi-nakima: ega:walo tete epetapilo ale tabo gito degelanakima:, ega:walo ale walone dopo leta la:tamo dapalibima:, ebe iyaiya tete bilibilinomolo mako tabote agodone ka:pemaiga:.

<sup>3</sup> Ebema: epetapino iyaiya a:da: elemasigi tabo nanitabokobi akomidila:la:. Numa:la:, Ya:sukono pe egeleate pemaiga:no, dopamo me opo epo bilibilinomate Godokono nanitabo gabo eba atepalo Kawokawo Kuba Osiyodilole dawate ebo kemaigamene. Nanitabola, ebe dawate Saitanakono Ela Opolo kuba wiya nanitabonomolo kelaemene,<sup>4</sup> mabu a nanitabokobi midipiate nani Godoma: deka:minakoma: ebete kegemene ebe nani Kawodawa:. Ega:walo me opo epo epetapiate iyaiya ida:da:lino uliyana damamalatelele, ebete ibino amamalatelele tanalo bilibilinomo eba odiyobolelo ebe a:ka:tuwa: ebe unamo adipatelo ebo kegemene, “Na Godotela, na me opo lumagia:!” Iyo, ebe tetelo ebete nani Godo Amamateno Iya Motolo eba okolitalo, epo bilibilinomo kawiyaya ebo kanalemene iba:te ebe kapiya kamamatema:.

<sup>5</sup> Nanitabola, nale dopamo egela epetapilo la:godolo eba pokolilo me iyaiya tanalo la: iyatulaimata, wiyasiya modobola la: me tetelo naimano tabo walo na:kemalagidilola:la:.<sup>6</sup> La: iyatawalata, me tetelo me opolo idawano elawote me Kawokawo Kuba Osiyodilole dawano tanalo nodiyobona, iyo, ebe mabuma: Godokono ubi tete pea:no ebe dawate a:kemaigamene.<sup>7</sup> Ebema: me tetelo kebe elawote Kubadawano maiga tanalo dodiyobona, Godote ebe elawo iyabaiamo iyatia:no Kubadawate diya gabodo me opo kawonomolo ebena woko bosiyodilona, iyo, ebete eba kunu ebena kuba osiyodilole tanalo iyalo owagilimiya.<sup>8</sup> Wiyasiya numa:la:, walone ebe dawano kuba tanalote epatamo awokalanomo kawokalamene, ebena Godote kebe tete ebetamo dikaemene, ebe tete olopoligote Kawodawa Ya:sute pete ebena tabone da:pemaigamene ebe da:pesonomo tabo kapiyamo ebe Kubadawa gito kapanakapuimene.

<sup>9</sup> Ebema: modobola la: niyatawala:, me Kubadawate da:pemene, ebete iyaiya anoano tanalo bilibilinomo ega:walo tole tanalo Saitanakono elawo kawonomamo ka:posiyodilolemene me opo epo a:da: ka:pemasigiolema:.

<sup>10</sup> Iyo, ibi magumulo piyate Godoko nanitabokobi midia:no gito da:elaoma:na:, iba:te a:elaoa:no dopamo Kubadawate iyaiya a:da: elemasigi gabodo ibi ibino olalati uwomuamo kemagatalemene. Nanitabola, ebe epate Godokono nanitabo tanalo kalakalago nelawiyataleka: Godote ibino igilo ba:mula:lelamiyana:, wiyasiya iba:te ebe tanalo kawo tanaloma: kegeleya: ebema: iba:te nanitabolo ka:kubakubaoma:na:. <sup>11</sup> Numa:la:, iba:te nanitabo tanalo lawea: mabuma: Godote iba:tamo A:da: Elemasigidawa paliboma: modoboma: gena. Ma kunu iba:te ebe dawano elawo tanalamo gudite ebeno a:da: tabono iyaiya tanalo nanitabokobi ka:midilima:na:, <sup>12</sup> iyo, me opo epo magumulo piyate Godokono nanitabo tanalo lawea:no ibino kateneno ubilo iyaiya kuba tanalo kalakalago dosiyodilolena, ebete ibi bilibilinomono tanalo anagilamelelamete iba:tamo kuba wiya ebo kikalaemene.

*Godote Nanitabokobi Midipino Igilo Ka:mula:lema: Ibi Duwatiya*

<sup>13</sup> Ebema: aimano nanitabokobi midipi ekakiala:, modobola tete bilibilinomolo ale la: mabuma: kalakala tabo Godotamo bowadipalatenakoma:. Nanitabola, ebete la: nilakapolo demalagidiloletana, ebe mabuma: ebete me opo wagilimi mabune la: uwatiyata, la:le ebeno tanalo nanitabokobi eba midilo ebeno Uliyanate la: talenapima: midilitate la:le igilo mula: tanalo ebo kelawa:ema:. <sup>14</sup> Iyo, ale Wade Tabo la:tamo da:kiyawaima: Godote ebe tanalodo la: eka:la:miata, la:le nanitabokobi midipi epetapiago Kawodawa Ya:su Kelisokono elawonomo alo magumulo kilukula:wenama:. <sup>15</sup> Ebema: aimano ekakiala:, ale Godokono tabo kiyawao magumulo ega:walo aimano dopo leta magumulo la: kebe iyaiya tanalo kiyatulametanakia, modobola la: ebe tanalo nanitabolo eba watila:mota:nalo kodakodalo nelamota:onala:

<sup>16-17</sup> Numa:la:, iyalo tetenomolo aimano Kawodawa Ya:su Kelisote aimano Nabiwi Godago a kawonomamo eba malagidiloenalo, iba:te ibino nilakapo magumudo a uwomua: teteno tepo magumuno elawo atamo ikaeamiya ale Ya:sukono pe uwomuamo olowiolo kemakopelenama:. Ebema: modobola iba:te eba kunu la:imano tepo magumu elawokobi namidilinakoma:na:, tete bilibilinomolo wadewade tanalate la:imano tabo gela magumune ega:walo osiyodilole magumune ka:pemaimionakoma:.

### 3

*Tesalonaika Sosi Epate Poloi Mabuma: Godoko Ka:toweoema: Polote Ibi Danaliya*

<sup>1</sup> Ebema: aimano nanitabokobi midipi ekakiala:, me leta uwomu apulo ale la: ma kunu analeta, modobola la: towetowe tabamo a Godotamo nowadi-paeateiyala:, mabu a ubila Kawodawa Ya:sukono tabote aimano woko magumudo me opo epo epetapi bilibilinomatamo samonomamo ka:toma:, ega:walo a ubila olowiopiate ebe tabo eba moiolo Godotamo kalakala tabo kadipatema:, la:le dopamo ebeno tabo keba kunu kelawa:ima eba kunu. <sup>2</sup> Ebene modobola la: me tanalo idima: Godoko na:ka:toweomiyala:, ebete kawokawo kuba osiyodilolepi dubuno elawo magumune aimano igilo ka:mula:leaema:, mabu me opo epo epetapiate Godokono tabo olowio tetelo nanitabokobi ka:midina:.

<sup>3</sup> Ebema: kalakala kawonomola, la:imano nanitabokobi midi mabuma: Kawodawate atumu la: elawokobi eba midililo, Saitanakono gowela tanalo magumulo la: ebete kitakeamidalema:ta! Iyo, aimano Kawodawa ebe Nanitabodawanomola! <sup>4</sup> Ebema: a iyatawala ale kebe iyaiya tanaloma: la: danaletanaka, la:le ebe tanalo osiyodilole magumulo eba pola:nalo ebe

tanalo gito a:ka:miyapaema. Numa:la:, Kawodawate la: mabuma: ebe wade woki atamo nikaeamena, ebema: woki bilibili tanalote agodolo kitana:.  
<sup>5</sup> Modobola la:le nanitabokobi midi gabodo eba tolamenalo, Kawodawa Kelisote la: dopolametate temeteme maimio tetelo ebete ebena kodakodalo utitata tanalago ega:walo Godokono nilakapo kimalagidilo tanalago la: nemagatalenakoma:ta.

*Nanitabokobi Midipiate Woko Nosiyodilonama:na: Ibi A:ka:tuwa: Ibino Iyaiya Modoboa: Tanalo Kulaema:*

<sup>6</sup> Ebema: aimano nanitabokobi midipi ekakiala:, ale aimano Kawodawa Ya:su Kelisokono mailamo la: ma kunu analeta, la: magumulo piyate aimano iyatulame tanalamo tudila:oa:no ega:walo iba:te ibi a:ka:tuwa: walubilima: damolama: deda:ona, modobola la: ebako nanitabokobi midipino osiyodilole magumamo ako-opila:la:. <sup>7</sup> Iyo, ale la: magumulo keba kunu ka:pilukulima: la: ebe tanalo iyatawanomolata, ebema: modobola la: atu osiyodilole magumulo nilukulinala:. Numa:la:, ebe tetelo ale woko osiyodiloma: damolama: eda:oa:no, <sup>8</sup> idoko ega:walo egela bilibilinomolo aimano kotamo mibomibo woko osiyodilonakima: a a:ka:tuwa: aimano iyaiya modoboa: tanalo kulaema:, ebene ebe gabodo ale lumagi idigodone bae nilakapolo gito kelawenakia:, ao, a ebetamo a:wiyanakima:. <sup>9</sup> Nanitabola, Godokono wokopiate ibino modoboa: tanalo magumulo nanitabokobi midipiagodone inamabu ega:walo mani uwatema: talena kitana:, wiyasiya ale la:go eba ilukulinalo eba kunu kowagelenakia:, mabu a ubi iyatima: la:tamo wade uli tanalo idi awokalimite, la:le woko osiyodilo magumulo aimano osiyodilole tanalo kowaloma:tala:ema:. <sup>10</sup> Me mabuma: ale la: ma kunu analiata, “Kebe lumagite woko osiyodilo ubia:noma: deda:mene, modobola epetapiate ebetamo bae akoikama:la:.”

<sup>11</sup> Ebema: numa:la:, ale me tanaloma: la: walo nakanaleta mabu tabote atamo ma kunu pemaigi, la: magumulo epetapiate woko osiyodiloma: damolama: eba eda:olo, ibi a:ka:tuwa: ibino iyaiya tanalo ulamea:no ibino tabo gela magumulo piyate iyaiya nanitabo woko dosiyodilolena iba:tamo temeteme ebo ikalamenaka. <sup>12</sup> Iyo, ale ebakobako epo eba totomulatelelo Kawodawa Ya:su Kelisokono mailamo ibi kawonomamo analema:, iba:te tabo gela magumulo epo epetapiatamo temeteme ikalamea:no, wiyasiya iba:te mani woko kelekele osiyodilole magumulo ibi a:ka:tuwa: ibino iyaiya modoboa: tanalo nulamenakoma:na:.

<sup>13</sup> Ebema: ekakiala:, kalakala kawonomola, la:imano nanitabokobi midi magumulo wadewade tanalo kosiyodilola:ema: elawoa:noma: akoeda:oala:. <sup>14</sup> Ega:walo la: magumulo lumagi idite me leta tabono iyatulame tanalamo tuduwatama: ubia:noma: eda:lo woko osiyodiloa:no gito da:lutamene, modobola la: ebako lumagino kuba tanalo kawokalima:ema: ebena osiyodilole magumulo eba:go akokapiyala:. Diyala, me gabodo ebete ilipo lawete ebena kuba wokine Godotamo walo da:ba:kolobigamene, <sup>15</sup> wiyasiya numa:la:, ebete ebena woki iyakobi samamo midia:no ebe la:go gowelaodawama: akomida:la:, la:le wiyasiya ebe la:imano nanitabokobi midi ekawima: ka:milo ebena tepo magumuno kuba wokima: ebe nilakapolo naniyala:.

*Polote Leta Uwomu Apulo Iyaiya Tabo Da:kiyawaiya*

<sup>16</sup> Ebema: milo atamo dikaeamena, modobola ebe Kawodawate la: bilibilinomagodolo eba okolinalo tete bilibilinomolo ebe a:ka:tuwa: la:imano tanalo bilibilinomo magumulo ebena milo la:tamo nikalamenakoma:ta.

<sup>17</sup> Numa:la:, me leta uwomu apulo na Polote naimano mailo ega:walo nilakapo tabo naimano kotonomamo akulolemo, lumagi idite me uwomu

tabo kakulolea:. Iyo, me naimano koto mulola, naimano leta bilibilinomo osiyodilole magumulo na a:ka:tuwa: ma kunu akulolenakomo.

<sup>18</sup> Modobola aimano Kawodawa Ya:su Kelisokono nilakapo tanalote la: bilibilinomagodolo nitanamene. Me ebe naimano tabo uwomula. Taula.



## POLOTE DOPO LETA TIMOTTAMO OSIYODILIYA

<sup>1</sup> Na ebe Polotela. A nanitabokobi midipiate pokono pe tanaloma: olowiolo demakopelenama:, ebe Kawodawa ebe Ya:su Kelisotela, ebene ebete ebena sosi wagilima: iyaiya opamo daliboliya, ebe wokopi magumulo na idila, iyo, ebe ega:walo aimano Igilo Mula:dawa Godoko iba:te na ananiya ebe woko kosiyodilonama:.

<sup>2</sup> O Timoti, a:ma:le nanitabokobi midi magumulo naimano nani guduma: eda:nata, ebema: nale me leta a:ma:tamo palibomo. Modobola Nabiwi Godoko ega:walo aimano Kawodawa Ya:su Kelisoko iba:te ibino nilakapo tanalo, ega:walo lumagitamo kuba wiya ikamea: tanalo, ega:walo milo tanalo a:ma:tamo nikaema:ta.

### *Iyaiya A:da: Tabo Iyatulamepino Tanalo*

<sup>3</sup> Nale dopamo Ma:sadoniya opamo toma: eba olosiyodilutalo a:ma: kebe tabo kanatiama ebe atu tabo kanamata, ma kunu a:ma: Epesese kawo duliyomololo eba okolinalo, nanitabokobi midipi magumulo piyate iyaiya a:da: tabo diyatulamenaka, modobola a:ma: ibi kawiya eba analelo nodiyoboliye. <sup>4</sup> Modobola a:ma: talena iba:tamo niyatilamiye iba:te ewonino iyaiya iyatulame oi ega:walo ewonino mailono iyaiya tanalo akoiyatulamenakala:, mabu ebakobako daedale tanalate ibi magumulo apaminatui tanalo eba wadipalatelelo, iba:te Godokono gabo ebo kanaetoamidama:na:. Nanitabola, ale ebena gabo aimano nanitabokobi midi kapiyado biyatawaonakoma:, wiyasiya ale me opo epono iyaiya ewonino iyatulame tanaloma: tabo gela magumudo nanitabo tanalo a:kuima:. <sup>5</sup> Ebema: nale a:ma: me tabo nanamata, mabu na ubila daleya: tepo magumuno kimalagidilo tanalo ega:walo milo okoli tanalono mulo wokino tanalo ega:walo tuputupu nanitabokobi midi tanalonomo, ebe tanalate a:imano sosi epagodolo eba pola:nalo ebe iyaiya tanalo magumune nilakapo kimalagidilo tanalote bemaiganakomene. <sup>6</sup> Wiyasiya numa:, nanitabokobi midipi epetapiate daedale taboma: apaminatui tanalodo me wadewade tanalone gito eleoia. <sup>7</sup> Ebema: me tetelo iba:te ibino ubi niyatina, Godote Mosesedo epatamo dikalamiya ebe Totomu Tabo iyatulamepima: keda:onama:, wiyasiya ibi modoboa: mabu Godokono iyaiya tabono magumu tanalo ibi iyatawa:, iyo, iba:te tabo tolea:no kiyawaonaka wiyasiya Godokono nanitabo tanalo kumina:.

<sup>8</sup> A iyatawala, kebe tetelo ale nanitabo gabodo Godokono Totomu Tabo diyatulaema: ebe tanalote olowiopino wade walubi tanaloma: keda:mene.

<sup>9</sup> Wiyasiya numa:, Godote ebena Totomu Tabo me opono tuputupupino tanaloma: kikalamiya:, ao, ebete ebena Totomu Tabono iyaiya tanalo kuba osiyodilolepino tanaloma: ikalamiya iba:te ebena nanitabo gabo kiyatawaoma:. Ebema: nanitabola, Godokono Totomu malagidilolea:pi ega:walo ebetamo tudila:oa:pi, ebe lololoma: eda:oa:pi ega:walo ele gabo odidipi, ebena pukala wakalamipi ega:walo ebe tolemea:pi, nabila menokobila anakapulamepi ega:walo epo epetapino igilo iyaililamepi, ebe kuba osiyodilolepi bilibilinomo iyatulaema: Godote ebena Totomu Tabo ebema: ikalamiya.

<sup>10</sup> Ebene piyate buwelemele pilo ega:walo kamiyale pilo dosiyodilolena, piyate dubu gabatamo ega:walo egege guda:tamo ilipo tanalo dosiyodilolena, piyate ibino mibomibo woko wiya:no kosiyodilolenama: epo epetapi pilolo duwatena, piyate gabamanino tanalo anagiyamida bailo ega:walo iyaiya tete epetapilo a:da: tabo da:kiyawaona, Godote atumu ebe kuba osiyodilolepino tanaloma: ebena Totomu Tabo ebema: ikalamiya. Iyo, me opo epo bilibilinomo magumulo kebe lumagite Ya:sukono dopo waloma:tapino iyatulame tabo kapiyanomo dadikamidalemene, ebe lumagino tanaloma: Godokono Totomu Tabono tanalate ebema: pola:na.

<sup>11</sup> Ebema: numa:, Ya:suko waloma:tapino iyatulame tanalate ebena Wade Alo Tabo magumune pemaimiona, ebe tabo ebe nale iyaiya epatamo ka:kiyawaonakoma: Wadenomo Godote natamo dikanamiya me ebe tabola.

*Ya:sukono Nilakapo Tanaloma: Polote Kalakala Tabo Da:kiyawaiya*

<sup>12</sup> Ebema: natamo elawo dikanamiya nale aimano Kawodawa Ya:su Kelisotamo kalakala tabo gemo, mabu ebete na nanidawama: gelo ebena woko kosiyodilonama: na ebema: ka:na:miya. <sup>13</sup> Nanitabola, dopamo tetelo nale ebena tanaloma: kubakuba tabo eba kiyawaolo kawo dowanomo magumulo kawokawo temeteme ebetamo ebo ikamenakimo. Wiyasiya ebe tetelo ebete iyatawiya, nale ebe nanitabokobi midia: mabuma: daedale wokilo ebakobako kuba tanalo dosiyodilolenakimo, ebema: ebete kuba wiya natamo ikanamea:no ebena nilakapo natamo gito awokalimiya. <sup>14</sup> Iyo, aimano Kawodawa Ya:su Kelisote ebena nilakapo natamo kawonomamo dadipaniya, ebe tetelo ebegodone demaigana ebe nanitabokobi midi tanalo ega:walo nilakapo kimalagidilo tanalo naimano tepo magumulo emaimiya.

<sup>15</sup> Ebema: nale me nani tabonomo gemo, Ya:su Kelisote kuba osiyodilolepino igilo mula:lalaema: me opamo a:piya. Iyo, modobola a:ma: me tabo kodakodalo nelawa:, mabu naimano kuba osiyodilole tanalate epo epetapi bilibilinomono kuba osiyodilole tanalo eba odoililo, <sup>16</sup> Ya:su Kelisote na kawokawo kuba osiyodilole dawatamo wiya ikanamea:no nilakapo gito awokalimiya. Me mabuma: Ya:sute kebe epo ebena uwomua: igilo laema: deka:la:mioliya, modobola iba:te ebe nanitabokobi midia: tetelo me wade tanalo niyatawaoma:na:, Ya:sute ibi nilakapo ilamelonemakopelena iba:te ibino kuba osiyodilole tanalo magumune ebetamo nanitabolo kolobila:oma:, ebete na Poloko keba kunu kemakopelenenamile eba kunu.

<sup>17</sup> Ebema: kalakala kawonomola! Godoko ebe uwomua: uwomua: tetelo dokolinamene ebe Kawo Elawodawala, ega:walo ebete a:ka:enamene, ega:walo a me opo epate ebe balida:mo uima: modoboa:, ega:walo ebe kapiyanomo Godotela, idi puliyanomola. Ebema: modobola uwomua: tetelo epate ebe unamo eba adipatenalo amama tanalote ebegodolo nitanamene! Me tabo ebe nanitabonomola, taula!

<sup>18</sup> Timoti, numa:, a:ma:le nanitabokobi midi magumulo naimano guduma: eda:nata, ebema: na ubila me leta magumulo kapiyakapiya tanaloma: a:ma: kawiyana:ma:, a:ma:le me tabamo ka:tuduwaema:. Nanitabola, Godokono wokopiate ebena Uliyanano elawamo kebe wadewade tanalate a:ma:godone kemaimioma: tabo dopamo da:kiyawaiya, me tetelo ibino nani tabono tanalate naimano tabago kapiyama: eda:te a:ma: nanitabolo kowalubima:ta. Ebema: modobola a:ma: ebe walubi tabono tanalo bilibilinomo kodakodalo nowatila:mota:niye, elawo dubute gowela inamabu keba kunu kowatila:mota:nanakole eba kunu, <sup>19</sup> ega:walo a:imano nanitabokobi midi magumulo kodakodalo eba utinalo, a:imano tepo magumuno mulo

wokino tanalate wadenomamo ka:pola:nama: kuba da:pesonomo idi ako:osiyodilala:.

Numa:, Ya:suko waloma:tapi epetapino tanalo ebe ma kunula, Godote kebe mulo tepo magumuno woki iba:tamo kikalamiyale, iba:te tudila:oma: ubia:noma: deda:iya ibi a:ka:tuwa: ibino nanitabokobi midi tanalo a:kubailamiya, lumagite kewa: kolomodo ebenu pe kubanu atalo ebe pete kawokawo ulu magumamo keba kunu ka:nololunakole eba kunu. <sup>20</sup> Iyo, Aimaneyasiko ega:walo A:lesandako ibi netewapi ebakopila, ebe mabuma: nale ibi nanitabokobi midipino taneba magumune wagailite Saitanakono koto magumamo gito alomimo, iba:te ibino kuba wiya eba lawelo wade woki ma kunu kelaema:, iba:te Godokono tanaloma: kubakuba tabo walo a:kegelanakoma:na:.

## 2

### *Godotamo Towetowe Tabo Gela Tanalo*

<sup>1</sup> Ebema: Timoti, nale a:ma: kebe iyaiya tanaloma: kanatama me ebe kawo tanalonomola. La: nanitabokobi midipino aladabuti tetelo Godotamo towetowe tabo da:kiyawawenakoma, modobola la:le me opo epo bilibilinomono iyaiya tanaloma: eba towetoweolo kalakala tabo atumu na:kegelanakiyala:, <sup>2</sup> ebenu atu tetelo kawokawo elawodubu ega:walo gabamani wokopi epetapi bilibilinomo atumu na:kowadipalatenakiyala:. A:ma: numa:, a nanitabokobi midipiate eba kunu gabamaniagodolo wade milo okoli tanalo kuimalema:, ega:walo ale Godokono ubi tanalo bilibilinomamo eba tudila:onale epo epetapino ololo apulo tuputupunomolo bilukulinama:. <sup>3</sup> Ebema: nanitabola, mako towetowe tabo gela tanalo ebe aimano Igilo Mula:dawa Godote wadenoma: degena me ebe tanalola, <sup>4</sup> mabu ebe ubila me opo epo bilibilinomate ebenu nanitabo tanalo iyatawaote ibino igilo mula: tanalo ebo kelaema:.

<sup>5</sup> Numa:, Godoko ebe kapiyanomola. Ega:walo me tanalo idila, ebe ega:walo epo tetenomolo dutina ebe Ya:su Kelisote me opolo lumagino apa:mo dawokaliya ebe dawala. Ebema: nanitabola, ebe kapiyagodolo elawo bitana epo Godotamo kemagaelema:, <sup>6</sup> mabu ebe a:ka:tuwa: ebenu igilo balamo iyatite ibi Saitanakono idoko motone kowagailima: ebenu kalimamo wiyakobi ebo midiliya. Iyo, ebete ebe gabodo ebenu wade tetenomolo me tanalo awokalimiya, Godokono ubi bitana epo bilibilinomate ebegodone igilo mula: tanalo kelaema:. <sup>7</sup> Ebe mabuma: ebete na Polotamo ebenu woko ikanamiya, nale ebenu alibolepi dubu idima: eda:te Yua:piatamo Wade Tabo eba kiyawaolo ibi ebo kiyatulamenakoma:. A:ma: niyata, me tabo nale da:kiyawautamo ebe nanitabonomola, na a:da: tabo ka:kiyawauta:!

<sup>8</sup> Ebema: naimano ubi tanalo ma kunu itana. Kebe iyaiya tetelo nanitabokobi midipiate daladabutinaka, modobola dubate dowa tanalo ega:walo apaminatui tanalo bilibilinomo balamo alomote, ebenu ibino tepo magumulo daleya:noma: eba eda:olo iba:te ibino koto Godotamo wadipalatelelo towetowe tabo ebo na:kiyawaonakoma:na:.

### *Nanitabokobi Midipi Kamiyaleno Tanalo*

<sup>9</sup> Ega:walo na ubila nanitabokobi midipi kamiyala:te wade mulo gabodo kaliku pupulioti ebenu unu tama kawonomamo akomalagidilolenala:. Ebema: iba:te eke aupulatole tanalo, ega:walo galono golodo sepisepi pupuli tanalo, ega:walo negege tulukaula pupuli tanalo, ega:walo wiya kawokawonomo kaliku pupuli tanalo, ebe iyaiya unu nikapi wadekobi midi

tanalo iba:te kawokawo tanaloma: akogelala. <sup>10</sup> Wiyasiya modobola iba:te epetapiatamo wadewade tanalo nosiyodilolenakoma:na:, mabu me osiyodilole gabodo iba:te agaluagalu kamiyalenomoma: keda:oma:na:, iyo, kebe kamiyaletete ebe a:ka:tuwa: ebe Godoko waloma:tadawama: degena, modobola ebete ebene osiyodilole magumulo nanitabo tanalo nawokalimene.

<sup>11</sup> Ega:walo nanitabokobi midipiate daladabutinaka, modobola kamiyala:te tabo gela:no Godokono tabo kiyawaopino iyatulame tanalamo gito na:tudila:onakoma:na:. <sup>12</sup> Ebe mabuma: nanitabokobi midipi magumulo nale kamiyale iditamono elawo kikamenakoa:, ebete Godokono tabamo dubu eba iyatulamitalo ibino watodawama: keda:ma:, ao, Godokono tabo iyatulame tetelo kamiyala:te tabo gela:no gito nolowionakoma:na:. <sup>13</sup> Ebema: numa:, nale kamiyaleno tanalo kawokalima: kebe netewa tanalate Godokono Bukalo da:pola:na, nale ebe tanalo a:ma: kiyatuimamota. Dopo tanalo ebe ma kunula, Godote A:da:meko dopamo osiyodilote, walone ebene kamiyale Ibiko ebo osiyodiliya.

<sup>14</sup> Ega:walo tanalo idi ma kunu itana, Saitanate epo kuba gabamo wabuga:talema: dowageliya, ebe tetelo ebete dopo dubu A:da:meko kemasiyaya:, ao, ebete ebene kamiyale Ibiko kapiya masigite ebene ebete Godokono pukala ebo adikanaliya. <sup>15</sup> Wiyasiya Godokono igilo mula: tanalote nanitabokobi midipi dubu kapiyatamo kitana:, ao, kamiyala:tamo atumu ba:kitana, ebema: kebe kamiyaletete wade mulo wokilo Ya:suko nanitabokobi eba midinalo tuputupu okoli tanalo ega:walo nilakapo kimalagidilo tanalo miyapa:no, ebete gudi alailame gabodo igilo mula: tanalo nanitabolo kelaemene.

### 3

#### *Sosi Watodawano Okoli Tanalo*

<sup>1</sup> Me tanalo nanitabola, kebe tetelo dubute sosi watodawama: eda:ma: ubi kawonomamo diyatimene, me wade tanalola mabu sosi watodawano woko wadenomola. <sup>2</sup> Ebe mabuma: ebe wokodawano osiyodilole tanalo magumulo kuba kapiya idi da:pesonomote itanama: modoboa:. Ma kunu sosi watodawate kamiyale kapiyagodawama: eda:te, ebene nanitabokobi midipi magumulo ebene okoli tanalo tuputupunomolo eba itanalo, ebete wadewade mulo woki kapiya malagidilolelo ebe a:ka:tuwa: ebene tanalo wadenomamo nulamenakomene. Ebene ebete ebene motolo kapela epo wadenomamo nowalubilinakomene, ega:walo modobola ebete Godokono tabo kiyawao magumulo wade iyatulamedawama: neda:mene. <sup>3</sup> Ega:walo sosi watodawate gamoda niodawama: eda: modoboa:, ebene ebete gowelao tanalo ega:walo apaminatui tanalo osiyodilolema: modoboa:, wiyasiya milo okolidawama: neda:mene. Ega:walo ebete ebene tepo magumulo mani kawonomamo malagidiloma: modoboa:. <sup>4</sup> Ebene ebete ebene moto epono tanalo wadenomamo ulamelelamete, modobola ebete ebene gudi wadenomamo niyatulamenakomene, iba:te ibino osiyodilole tanalo bilibilinomodo ibino nabiwi eba malagidilole ebene tabamo ka:tudila:onama:. <sup>5</sup> Nanitabola, kebe dubute ebene moto epo wadenomamo ulamea:no, ebete atumu Godokono sosi epo wadenomamo a:kulaemene.

<sup>6</sup> Ega:walo numa:, sosi watodawate Ya:suko waloma:ta magumulo oli lumagima: eda: modoboa:. Ebako dawate sosi atama: ubi diyatimene, diyala, ebe a:ka:tuwa: ebe da:bowalogomene, ebema: Godote kuba wiya ebetamo kikaemene, ebete dopamo Saitanatamo kuba wiya keba kunu kikamiyale eba kunu. <sup>7</sup> Ebene modobola sosi watodawate nanitabokobi midia:pino ololo apulo atumu wadewade tanalo na:kosiyodilolenakomene,

iba:te ebenu wade okoli tanalo uimite ebe tuputupudawama: kegelama:. Iba:te ebenu okoli magumulo kuba idi uima: modoboa:, mabu iba:te ebegodolo tuputupua: osiyodilo tanalo idi umite ebe kubadawama: degelama:na:, diyala, ebete ilipo lawete Saitanakono gubi magumamo gito da:ba:negamene.

*Sosi Watowatopi Walubilidawano\* Okoli Tanalo*

<sup>8</sup> Ebema: sosi watowatopi walubilidawano okoli tanalote epetapino umi magumulo atumu wadenoma: neda:mene. Ma kunu ebete mena netewa lumagima: akoeda:la:, ebene ebete elawo gala:ipi da:imi obo kawonomamo nioma: modoboa:, ega:walo ebete a:da: elemasigi gabodo inamabu bilibilidawama: eda:ma: ubi iyati modoboa:. <sup>9</sup> Ega:walo Godote kebe nanitabo gabo epatamo kawokalimiyale, modobola sosi watowatopi walubilidawate ebe gabono iyatulame tanalo bilibinomo kodakodalo eba watila:mota:nalo ebenu tepo magumulo woki netewama: akoeda:la:. <sup>10</sup> Ebema: potele sosi walubidawama: woko wagilima: ubi dawokalimene, modobola la: sosi watowatopiate ebenu okoli tanalo dopamo wadenomamo nulamelemiyala:, ebene la: ebegodolo kuba idi umia:no modobola ebete sosi woko nowagilimene.

<sup>11</sup> Ega:walo wokopi kamiyaleno ilukuli tanalate epetapino umi magumulo atumu wadewadenoma: neda:oma:na:. Ma kunu iba:te epono iyaiya tanaloma: kubakuba tabo akogelanakala:, ebene iba:te wadewade mulo woki kapiya malagidilolelo ibino osiyodilole tanalo bilibinomo magumulo nanitabopinomoma: neda:oma:na:.

<sup>12</sup> Ega:walo numa:, sosi watowatopi walubilidawate kamiyale kapiyagodawama: neda:mene, ebene modobola ebete ebenu gudi ega:walo ebenu moto epo epetapi ibino iyaiya tanalo wadenomamo nulamelelame-nakomene. <sup>13</sup> Nanitabola, piyate sosi watowatopi walubili woko wadenomamo dosiyodilona, epetapiate ibi ibino wade woko osiyodilole tanaloma: demoioloma:na:, iba:te Ya:su Kelisoko nanitabokobi midi magumulo apepeote ebenu woko osiyodiloma: tole tanalote iba:godolo a:kitanamene.

*Godoko Waloma:ta Tanalono Kawo Magumu*

<sup>14-15</sup> Ebema: Timoti, nale a:ma:tamo samonomamo pema: ubi iyatimo, wiyasiya na gabo samamo umia:no, ebe tanalo eba malagidilole nale me leta magumulo iyatulame tabo epetapi ebema: akulolemo. Ma kunu nale a:ma: iyatuimata, sosi epono aladabuti tetelo iba:te Godokono umi magumulo tuputupu tanalo keba kunu na:kosiyodilolenakoma:na:. Numa:, uwomua: uwomua: tetelo dokolinamene, a sosi epo ebe Kawodawano moto epola, ega:walo a ebenu motono alo ega:walo abo keba kunula:ka: eba kunula, mabu ale ebenu nanitabo iyatulame tanalo me opolo eba wadipalatenalo ebenu motono a:emena tanalote kodakodalo kitanamene. <sup>16</sup> Ebema: nanitabola, a nanitabokobi midipiate Godokono ubi gabodo ebe keba kunu kowaloma:tanama:, ebe tanalono magumu beda: kawonomola:ka:!

Aimano Kawodawate me opolo  
lumagino apa:mo awokaliya,  
ebene ebenu tuputupu okoli tanalo kawokalima:,  
ebete ebenu Uliyanano elawamo

\* **3:7:** Buka ka:la:mioledawa, modobola a:ma: me tanalo niyatawa, keyakeyapino tabamo nanitabokobi midipiate sosi watowatopi walubilidawa dikonema: ka:minaka.



a:e magumune maigate,  
 Godokono nopopiate  
 ebe uwomua: igilago ebo umiya.

Ega:walo ebe waloma:tapiate ebenu tanalo  
 me opo kawonomolo awokalimiya,  
 ebenu epo bilibilinomate  
 ebe nanitabokobi eba midilo,  
 ebete Godokono Unu Duliomolamo ebo odoliya,  
 ebenu ololo apulo kawo alo magumulo ka:nokolinama:

#### 4

##### *Godokono Mailamo A:da: Tabo Kiyawaopino Tanalo*

<sup>1</sup> Numa:, Godokono Uliyanate awokala ma kunu gena, me opono uwomu tetelo epetapiate Saitanakono kubakuba uliyana ega:walo a:da: elemasigi uliyana iyatulame tanalamo tudila:ote, iba:te Ya:suko nanitabokobi midi magumune ebo kolobila:oma:na:. <sup>2</sup> Nanitabola, me a:da: elemasigi tanalo ebe mena netewa epagodone maimiona, iyo, Godote kebe wade mulo woki ibino tepo magumamo dopamo dalomolamiya, ebe wadewade woki ibino kuba osiyodilole magumulo gito alatidiolamiya, wadewade inamabuate elalo keba kunu kowamotenakole eba kunu. <sup>3</sup> Ebe a:da: elemasigipiate negelanaka nanitabokobi midipi magumulo dubute kamiya laema: Godote talena iyatilamiya, ega:walo iba:te na:kegelanaka wadewade inamabu epetapi naoma: talenala.

Wiyasiya numa:, Godote ebe tanalo bilibilinomo nanitabokobi midipi mabuma: osiyodilolete iba:tamo ikalamiya, ebema: piyate ebenu nanitabo tanalo diyatawaona, iba:te kalakala tabo ebetamo adipatelo ebe inamabu gito benaonakoma:na:, ega:walo dubute ebenu kamiya:go kapiyama: eda: tetelo iba:te atumu Godotamo kalakala badipatenakoma:na:. <sup>4</sup> Nanitabola, Godote me opono tanalo bilibilinomo ebenu epo mabuma: osiyodiloliya, iyo, ebe tanalate wadewadenoma: eda:ona, ebema: modobola epate ebe iyaiya nilakapo tanalo uwatema: ubia:noma: eda:oa:no Godotamo kalakala tabo eba gelalo ebenu kotone nuwatanakoma:na:. <sup>5</sup> Ebema: numa:, Godote me opono inamabu osiyodilole dolopoligiya, ebete ebe inamabu bilibilinomo ulamete ebenu tabo kiyawao tanalamo ibi wadewadenoma: midiliya, ega:walo me tetelo ale inamabu epetapi uwatelo ebetamo kalakala tabo dadipatenakoma:, ebete ebe tanalodo atumu ebe inamabu wadewadenoma: walo ba:kegenakomene.

##### *Ya:su Kelisokono Wade Wokodawano Tanalo*

<sup>6</sup> Ebema: Timoti, a:ma:le Ya:su Kelisokono wade wokodawama: eda: tanalo kawokalima:ema:, modobola a:ma: me iyatulame tabo nanitabokobi midipi ekakiatamo na:kiyawaonakiye. Iyo, a:ma: ibino uliyana apuno bae iba:tamo modobolo dikalama:emene ebe tanalote a:imano tanalo ma kunu kawokalimene, a:ma:le nanitabokobi midi magumulo kebe iyatulame tanalo kowaloma:ela:wenapiyala, a:ma:le wadenomamo apema: ebe iyaiya nanitabo tanalo atumu nanitabolo na:kenaonata. <sup>7</sup> Ega:walo a:ma: ewonino iyaiya iyatulame oi ako-olowionakala:, mabu ebakobako oi tanalate epono daedale wokido eba pemaimionalo Godokono nanitabo tanalo kawokalimina:. Wiyasiya numa:, a:ma: Godotamo nanitabolo ka:tuduwatawenama: modobola a:ma: a:imano tepo magumu na:kodakodaiminakiye, bolamo kalakaladawate elawonomoma: keda:ma:

ebeno ape keba kunu ka:kodakodaiminakole eba kunu. <sup>8</sup> A:ma: iyatawalata bolamo kalakalaopiate ibino ape elawonomoma: keda:oma: keba kunu ka:midilinake, iyo, eba kunu iba:te ibino katene ape walubilima: me tanalo osiyodilonaka. Wiyasiya numa:, a:imano tepo magumute elawonomoma: keda:ma: a:ma:le a:imano woki atumu da:kodakodaima:wenakomene, me gabodo a:ma: a:ka:tuwa: a:ma: walubima: wade tanalonomo bosiyodilonakoma:ta, mabu a:ma: me opolo Godokono wade okoli tanalono wadewade tanalo duwata:emene walone uwomua: igilo nanitabolo ka:nelaema:ta.

<sup>9</sup> Ebema: nale a:ma:tamo degemo, modobola a:ma: me tabo kodakodalo nelawa:, <sup>10</sup> mabu a nanitabokobi midipiate Godokono uwomua: igilo laema: woko ebetamo elawonomamo ebema: osiyodilonama:. Nanitabola, ebete me opo epo bilibilinomono Igilo Mula:ledawama: eba eda:nalo nanitabokobi midipiatamo nanitabo igilo ebo kikalaemene, iyo, ebe uwomua: tetelo dokolinamene ebe Igilodawala, ebema: ale ebena pe tanalo olowiolo makopelenama:.

<sup>11</sup> Ebema: naimano gudu, modobola a:ma: me totomu tabo ega:walo iyatulame tabo nanitabokobi midipiatamo na:kiyawonakiye. <sup>12</sup> Nanitabola, a:ma: sosi epo magumulo oli ape dubulata, wiyasiya iba:tamo gigiyu akoo:iyamidala:, ibi magumulo idite ma kunu gema: a:ma: sosi watodawa:. Iyo, modobola a:ma: a:imano tabo kiyawao tanalo ega:walo osiyodilole tanalo bilibilinomo magumulo tuputupudawanomoma: eba eda:lo wade uli iba:tamo nawokaliminakiye. Ebema: iba:te a:imano nilakapo kimalagidilo tanalo ega:walo a:imano nanitabokobi midi tanalo ega:walo a:imano tepo magumuno daleya: woki dulamelemetamene, ebe tetelo iba:te a:ma: nani sosi watodawama: keka:ima:ta.

<sup>13</sup> Ebene sosi woko osiyodilo magumulo modobola a:ma: nanitabokobi midipiatamo Godokono Buka apuno iyaiya tabo ka:la:miola:wete ebe tabamo ibi eba walubililo ebo niyatulamenakiye. Numa:, nale Epe-sese duliyomolamo da:pemo, ebe tetelo me atu tanalo a:ma:go kapimiya ka:posiyodilolemamo. <sup>14</sup> Ebema: naimano gudu, kebe tanalote a:ma:tamo dopamo demaigiya, a:ma: ebe tanalo akododomatiala:. Iyo, a:ma: sosi woko wagilimia:no watowatopiate Godokono Uliyanano elawamo ibino koto a:ma:tamo eba watililo wadewade tanalate a:ma:godolo kemaimioma: nani tabo da:kiyawaiya, ebe tetelo a:ma:le Godokono woko kosiyodilawenama: ebete nilakapolo iyanomo elawo a:ma:tamo ikamiyata. Ebema: modobola a:ma: ebe elawamo ebena woko nosiyodilonakiye, <sup>15</sup> ebena sosi epatamo me iyaiya tanalo eba iyatulamenalo a:imano igilo iyabaiamo iyatilo elawoa:noma: akoeda:la:, mabu a:ma: ebako woko osiyodilo magumulo eba apelo epate ebe tanalo ebo kuima:na:. <sup>16</sup> Wiyasiya a:ma: nanisiwale! Modobola a:ma: a:ka:tuwa: a:imano okoli tanalo ega:walo iyatulame tanalo wadenomamo nulamenakiye. A:ma:godolo me netewa kawokawo tanalate modobolo da:pola:namene, ebe tetelo piyate a:imano iyatulame tabo dolowiona, a:ma:le ibino igilo ega:walo a:imano igilo kapimiya ka:mula:lema:ta.

## 5

### *Nanitabokobi Midipi Epetapiago Wadenomamo Ilukuli Tanalo*

<sup>1</sup> Ebema: Timoti, nanitabokobi midipi magumulo kebe kadelete kuba dosiyodilomene, modobola a:ma: ebe kawiya ana:no a:imano nani nabiwima: gelo Godokono tabamo ebe nowalubiye. Ega:walo a:ma:go atu apepeo oli dubuno tanaloma: modobola a:ma: ibi a:imano ekaki

ega:walo nanima: midila:wete, <sup>2</sup> ebene abeleabela:te a:imano menokobima: neda:oma:na:. Ega:walo a:ma: nanisiwale! A:ma: oli apepeo kamiyale ega:walo buwelemele Godokono tabamo dowalubila:emene, ebe tetelo ibi a:imano ekaki ega:walo nanikubima: na:midiliye a:imano tepo magumuno wokite iba:tamo tuputupunomolo kitanama:.

### *Nanitabokobi Midipi Amoleamoleni Tanalo*

<sup>3</sup> Ega:walo me tanalo idila. Amoleamole magumulo idite wade walubi tanalo laema: ebene mabu epagodolo walubidawa nanitabolo umia:no, modobola a:ma: sosi epo nanaliye iba:te ebe wadenomamo kowalubinakoma:. <sup>4</sup> Wiyasiya kebe tetelo amole idino kawokawo gudi ega:walo kawokawo a:la:migo guda:te nanitabokobi midipima: deda:ona, modobola ibi a:ka:tuwa: ibino menoko tete bilibilinomolo kowalubinama: wadewade woki nuwatanakoma:na:, mabu eba kunu ebe guda:te ibino Godoko waloma:ta tanalo nanitabolo kawokalima:na:. Nanitabola, nabiwila menokola iba:te gudi egege tetelo ibi keba kunu kowalubilinakiye, kawokawo guda:te ebe iyaiya walubi tanalo malagidilolelo wade wiya ibino amole menokotamo dikaema:na:, Godote ibino nilakapo tanalo umilamete wadenoma: kegemene. <sup>5</sup> Ebene kebe amolete wade walubi tanalo laema: ebene mabu epagodolo walubidawa nanitabolo umia:no, modobola ebete Godokono woko kapiya eba osiyodilonalo ebene igilo tanaloma: woki bilibilima: akoeda:la:. Eba kunu ebete idoko ega:walo egela bilibilinomolo Godago tabo gelalo ebene iyaiya modoboa: tanalo ega:walo epetapino iyaiya modoboa: tanalo eba wadipalatenalo walubi tanalo ebegodone laema: olowiolo nemakopelenanakomene. <sup>6</sup> Wiyasiya a:ma: iyatawalata amoleamole epetapino tanalo eba kunua:. Ibi a:ka:tuwa: ibi ibino kateneno ubilo kalakalailaema: eba wagelenalo Godokono woko kosiyodilona:, ebema: nanitabola, ebako amoleamola:te ibino unu tamano igilo kawonomamo eba malagidilolelo wiyasiya iba:te tepo magumulo iyalo a:elaiya. <sup>7</sup> Ebema: naimano gudu, modobola a:ma: nanitabokobi midipi me tabamo nowalubiliye, epetapiate ibino amoleamoleni osiyodilole tanalo ulamelo kubama: gelakapoma:.

<sup>8</sup> Ega:walo me tanalo idila. Modobola nanitabokobi mididawate ebene nani gudino iyaiya modoboa: tanalo ulamelo ibi dopamo walubilate, ebene ebene mabu epo epetapi atumu wadenomamo na:kowalubilinakomene. Nanitabola, ebegodolo walubi gabote eba itanalo ebete ibino iyaiya modoboa: tanalo ulamelelamea:no, ebete ebene nilakapo osiyodilola: tanalodo ma kunu gena, Ya:suko nanitabokobi midi gabo ebe nanitaboa:. Iyo, ebete ebene nilakapo osiyodilolea: tanalodo kubadawama: eda:te, ebene me kuba osiyodilo tanalote nanitabokobi midia:pi epetapino iyaiya kuba osiyodilole tanalo odoili.

<sup>9</sup> Ebema: kebe amolete dopamo kapiya awiagodawama: deda:nami, ega:walo ebe 60 ulama odoli tetedawama: deda:na, modobola a:ma: ebako dawano mailo sosino amoleamoleni mailo bukamo iyata:wete, ebene nanitabokobi midipiate ebako amole kapiya nilakapolo nowalubinakoma:na:. Wiyasiya a:ma: ebene mailo iyatia:no, <sup>10</sup> modobola sosi epate ebene osiyodilole tanalo dopamo nulamelema:na:. Ebema: iba:te ebe wade kamiyalenomoma: degelama:na:, ma kunu dopamo ebene gudino egege tetelo ebete ibi wadewade iyatulame tanalamo dowalubilinaki, ega:walo me tetelo ebete iyaiya nilakapo tanalo bilibilinomo osiyodilolema: ebene ubi kawonomamo eba iyatinalo, ebete ebene motolo kapela epo wadenomamo dowalubilinako, ega:walo nanitabokobi midipi epetapi walubilima: agowa

ukulaoleno obo iba:tamo dowadaenako, ega:walo tete epetapilo nigolo-golopi nilakapolo atumu da:kowalubilinako, modobola a:ma: ebako amole kapiya walubi nowagilimiye.

<sup>11-12</sup> Wiyasiya modoboa: a:ma: oli ape amoleno mailo bukamo iyatima: Nanitabola, kebe amoleamoleno mailote bukalo da:pola:lamena, sosi epate ibino mailo akulolelamea:no dopamo iba:te Kelisokono woko osiyodiloma: ibino ape ebe kapiyatamo ikameoma: nani tabonomo awokala geliya. Wiyasiya numa:, oli ape amolete mako nani tabo gema: a:ka:modobomene, mabu walone ebene kateneno ubi tanalate demaimioma:na: dubu laema: walo ka:kowagelemene. Ebema: ebe niyala, mabu ebete dopamo kebe nani tabo kegiyale ebe tabo dadikamidalemene, ebene kuba wiyate Godogodone ebetamo ka:pemene. <sup>13</sup> Ega:walo me tanalo idila. Oli ape amoleamola:te nanitabokobi midi magumulo kodakodalo kelamota:ona:, ebema: diyala, iba:te kuba osiyodilo tanalo ida:mo ma kunu da:ba:na:gudima:na:, iba:te nanitabo woko osiyodiloa:no ibino namutupi magumulo moto idine moto ida:mo eba wapata:lamelo iyaiya epono tanaloma: tabo gela ebo kowagilima:na:. Iyo, ebe tetelo iba:te kuba idi ma kunu ka:kosiyodiloma:na:, iba:te woko osiyodiloma: damolama: eba eda:olo, ibi a:ka:tuwa: ibino iyaiya tanalo ulamea:no, ibino tabo gela magumulo piyate nanitabo wokono iyaiya tanalo dosiyodilolena iba:tamo temeteme ebo kikalaema:na:.

<sup>14</sup> Ebema: na ubila oli ape amolete dubu walo kelawete guda:goma: eba eda:lo ebene motolo wadewade iyaiya woko ebo nosiyodilolenakomene, mabu kebe nanitabokobi midia:piate ago da:gowelaona, iba:te ebako kamiyaleno tuputupu okoli tanalo duima:na:, ebe mabuma: iba:te gabo a:kuima:na: a nanitabokobi midipino tanalo kubama: kegelama:. <sup>15</sup> Numa:la:, amoleamole epetapiate Saitanako kowaloma:tama: nanitabokobi midi magumune iyalo olobila:iya, ebema: ibino kuba osiyodilole mabuma: nanitabokobi midia:pi epetapiate aimano ilukuli tanaloma: kuba tabo gelanaka.

<sup>16</sup> Ebema: amoleamoleno tanaloma: me tabo ebe naimano iyatulame tabola. Kebe tetelo nanitabokobi midi kamiyaleno mabu epo magumulo amoleamola:te da:pola:nama:na:, modobola ebete a:ka:tuwa: ibi wadenomamo nowalubilinakomene, iyo, ebe amoleamoleno epate sosi magumulo walubi tanalo uwatema: akogelanakala:. Wiyasiya kalakala kawonomola, amoleamole magumulo pokono mabu epate nanitabolo pola:na:no, modobola sosite ebako amole kapiya nilakapo tanalamo nowalubinakomene.

### *Sosi Watowatopiatamo Ibino Woko Wiya Ikalame Tanalo*

<sup>17</sup> Ebema: me tanalo idila. Sosi watowatopi magumulo piyate Godokono tabo kiyawao woko ega:walo ebene iyatulame woko wadenomamo kosiyo-dilolema: ibino igilo nanitabolo dalomona, ega:walo piyate watowatopino iyaiya woko epetapi wadenomamo dosiyodilolena ibi atumu, modobola sosite ebako wokopiatamo wiya kawonomamo nikalamenakomene, netewa wokono wade wiya keba kunula:ka: eba kunu. <sup>18</sup> Mabu Godokono Bukalo totomu tabote ma kunu itana, “Epate witi-laiso naono kikopu kuwatema: ibino kau-goeote ebe inamabu mikitaolelo woko iba:tamo dosiyodilomene, ebe tetelo iba:te ebe kau-goeono tabo ala:mo matuima: modoboa:, mabu ebete iba:tamo woko osiyodilo magumulo witi-laiso kikopu kapiyakapiya naoma: modobola, iyo, ebe nao inamabu ebe ebene wokono

wiya da:pesola.” Ebene tabo idite ma kunu kitana, “Wokopiate duliyoumolo epagodone wiya laema: modobola.”\*

<sup>19</sup> Ega:walo a:ma: nanisiwale, kebe tetelo lumagite a:ka:tuwa: a:ma:tamo pete sosi watodawano osiyodilo tanalo kubama: da:pegemene ebena tabo ako-olowiala:, wiyasiya netewa o netewa-kapiya nanitabokobi midipiate ebena kuba tanalo kapimiya dapawokalima:na:, ebe tetelo a:ma: toawete ebe sosi watodawano tanalo nanitabolo na:numiye. <sup>20</sup> Ebene ebe sosi watodawate kuba tanalo nanitabolo dosiyodili, modobola a:ma: sosi epono ololo apulo ebe kawiya naniye, ebe gabodo watowatopi epetapiate atu kuba osiyodiloma: ka:toletoleoma:.

### *Polote Iyaiya Tabo Epetapi Da:kiyawaiya*

<sup>21</sup> Ebema: naimano gudu, nale Godoko ega:walo Ya:su Kelisoko ega:walo ibino wade-talena nopopi ibino ololo apulo a:ma: anamata me iyaiya tanalo sosi magumulo kosiyodilola:ema:, ebena a:ma: nanisiwale, sosi epono tanalo anagilamelelame tetelo a:ma: lumagi unu nikapiamo eba umilo lumagi idi atepalo lumagi idi gito akolawa:la:.

<sup>22</sup> Ega:walo a:ma: lumagi idino watamo koto watililo ebe Godokono wokamo samamo akoiyata:la:, mabu kebe tetelo a:ma: tuputupu woki-ago osiyodiloa:no, diyala, a:ma:le ebe gabodo kuba okolidawatamo woko da:bikama:emene. Numa:, ebete ebena woko gobebobolo eba okolitalo kubakuba tanalo epetapi walo da:kosiyodilolemene, ebe tetelo ebena kuba wiyate a:ma:tamo atumu ka:pemene. A:ma: nanisiwale, a:imano osiyodilole magumulo gigiyu akoiyamidala: tepo magumuno daleyana tanalote a:ma:tamo ka:pema:!

<sup>23</sup> Ega:walo Timoti, me tanalo idila. Iyaiya tete epetapilo kateneno temeteme tanalate a:imano tepo magumulo a:ma: uminakota, ebema: obo kapiyanomo akoniala:, modobola a:ma: wiyasiya tete epetapilo elawo gala:ipi da:imi obo kela:mo na:ninakiye.

<sup>24</sup> Ega:walo sosi woko osiyodilo magumulo me tanalo idi na:kemalagidila. Epo epetapino kuba osiyodilole tanalate awokala ba:pola:lamena, ebema: epetapiate negelana iba:te walone kuba wiya nanitabonomolo kuwatemala:na:. Wiyasiya epo epetapino kuba osiyodilole eba kunua: mabu iba:te ibino kuba osiyodilole tanalo nowaminalena, ebema: numa:, walone Godote ebena ubi tetelo ebe kubakuba tanalo bilibilinomo kawokalilaemene. <sup>25</sup> Nanitabola, epono wadewade osiyodilole tanalate atumu awokala ba:pola:na, wiyasiya epetapi kapiyakapiya waminaolelo da:pola:na ebe tanalate Godokono wade tetelo nanitabolo kawokalaoma:na:.

## 6

### *Piyate Woko Namutupiatamo Wiya: Woko Dosiyodilona Ibino Tanalo*

<sup>1</sup> Ebema: me tanalo idila. Kawokawo wokopi dubate maniamo kebe epo kuwatiye iba:tamo wiya: woko kosiyodilolenama:, ebe wiya: wokopi magumulo piyate nanitabokobi midipima: deda:ona, modobola iba:te ibino tepo magumuno wokilo ibi a:ka:tuwa: ibi opamo eba alomolo ibino woko namutupi unamo nowadipalatenakoma:na:. Numa:, nanitabokobi midia:piate ebako wokopino tuputupu ilukuli tanalo dulamelelaema:na:,

\* **5:18:** Buka ka:la:mioledawa, modobola a:ma: Totomu Tabo 25.4 numiye. Me tabono magumu ma kunula, kau-goeote woko osiyodilo magumulo epo dowalubilimene, ebema: modobola iba:te ibino nilakapolo wade walubi tanalo kau-goeotamo atumu na:kiyatima:na:. Ega:walo Polote Timotiko Buka tabo idima: dakaniya, ebe tabo ebe Ya:sute ebe waloma:tapiatamo dopamo degiya ebe tabola, ebema: modobola a:ma: Ma:t 10.10 ega:walo Luk 10.7 tetelo numiye.



ibi mabuma: iba:te gabo a:kuima:na: aimano iyatulame tanalo kubama: kegelama:, iyo, iba:te ibino tabo gela magumulo Godokono mailo atumu a:ka:kubaima:na:.

<sup>2</sup> Ebene wiya: wokopi magumulo piyate nanitabokobi midipi namutupiatamo woko dosiyodilona, iba:te kuba tabo ma kunu akogelala:, “Aimano woko namutupi kawokawo epoa:. Ao, ibi a keba kunula:ka: ebako nanitabokobi midipi ekakila, ebema: ale iba:tamo nanitabo woko a:kosiyodiloma:!” Eiyee, ebako woki tabo ebe kubanomola! Modobola ebe wiya: wokopiate wiyasiya ibino woko namutupino nanitabokobi midi tanalo eba malagidilolo, ibi nilakapoilamelo ubi kawonomamo ebo nalomonakoma:na:, iba:te woko osiyodilo magumulo ibino namutupi kowalubilinama:.

### *Inamabu Bilibila:gopima: Eda:o Tanalo*

Ebema: Timoti, modobola a:ma: Godokono tabo eba kiyawaolo me iyaiya tanalo sosi epo wadenomamo niyatulamiye. <sup>3</sup> Numa:, aimano iyatulame tanalate epo nowalubilina iba:te Godotamo nanitabolo ka:tudila:oma:, wiyasiya kebe lumagite iya gabono tanalo diyatulamenako, ebete aimano Kawodawa Ya:su Kelisokono iyaiya mulo iyatulame tanalago kapiyama: keda:na:, <sup>4</sup> mabu ebako a:da: tabo iyatulamedawa ebe a:ka:tuwa: ebe eba walogonalo ebegodolo wade woki kapiya idi kitamena:. Ebe ubi kawonomola epo kubailamelo iba:go iyaiya tabono magumuma: apaminatemuima:, ebema: me tanalo magumune iyaiya kubate emaimionaka. Ma kunu ebete epetapino inamabuno tanaloma: iba:tamo na:dowana, ega:walo ebete epetapi magumulo anagiyamida tanalo ebe wadipalatele-nako, ega:walo ebete epetapi emalogolenako, ega:walo ebete ebena kuba tepo magumuno wokilo epetapino osiyodilole tanalo kubanomoma: genako, <sup>5</sup> ega:walo ebete atu kubakuba wokiagopi epetapiago gowelao tanalo katepana:. Nanitabola, ebako dubu bilibilinomate Godokono nanitabo gabo iyalo atepiya, ebema: ibino wokilo daedalenomoma: eda:olo a:da: tabo ma kunu gelana, lumagite Godoko waloma:ta magumulo inamabu bilibila:godawama: keda:mene.

<sup>6</sup> Wiyasiya Godokono nanitabo tanalo ma kunula. Kebe lumagite ebe waloma:tama: ebena kalakala magumulo dokolina, ebe lumagite Unu Duliomolono wadewade tanalo kawonomamo kuwatemene, me opono inamabu:. <sup>7</sup> Ebe mabuma: wade tepo magumuno wokiagopiate ma kunu malagidilona, “A me opamo dapawokalaiyama: beda: inamabuago ka:pemaimiyama:? Puliya! Ega:walo ale da:elaoma: beda: inamabuago na:ka:tolaema:? Puliyanomola! <sup>8</sup> Ebe mabuma: a me opolo eba ilukulinalo agodolo kebako kapiyakapiya nao inamabu ega:walo pupuliono inamabuate modobolo da:pola:amena, modobola kalakalate agodolo nitanamene!”

<sup>9</sup> Wiyasiya numa:, kebe epate inamabu bilibila:gopima: eda:oma: ubi diyatina, Saitanate ibi kuba gabamo eba wabuga:talelo iba:te ebena guba:mo ebo ka:na:gudima:na:. Iyo, ebe ubila ebete ebe epo kubailaema:, ebema: ebete ibi ibino daedale ubi tanalamo uwatete a:e magumamo ebo kanamiyamidalemene. <sup>10</sup> Ebema: nanitabola, lumagite mani kawonomamo demalagidilona, ebe tanalo ebe lumagino kuba osiyodilole tanalo bilibilinomono mabula. Iyo, epo epetapiate kawokawo mani uwatema: ubi alomolo nanitabokobi midi magumune da:nemaimiya, me ebe gabodo ibi a:ka:tuwa: iba:tamo kawokawo tepo temeteme ebo ikalamiya.

### *Nanitabokobi Mididawano Wade Wiya Lawe Tanalo*

11 O naimano gudu, a:ma: wiyasiya Godokono wade wokodawalata, ebema: modobola a:ma: me kubakuba ubi tanalo bilibilinomo kuba nibote maigama: gelo Godokono wade okoli tanalono iyaiya tanalo wadenomamo nowaloma:taliye. Ma kunu Godoko nanitabokobi midilo ebe kapiyatamo tuduwata tanalo, ega:walo ebenu tuputupu osiyodilole tanalo, ega:walo ebenu nilakapo kimalagidilo tanalo, ega:walo ebenu milo okoli tanalo, ega:walo temeteme magumulo kodakodalo uti tanalo, me tanalo bilibilinomate a:ma:godolo na:pola:nama:na:. 12 Ebene a:ma:le nanitabokobi midi magumulo uwomu teta:mo modobolo ka:nemaigaema:, modobola a:ma: kodakodama: nediye, sukulu gudino kalakala egelalo idite dopodawama: keda:ma: elawonomamo da:puliganako eba kunu. Ma kunu a:ma: Godogodone uwomua: igilo ka:nelaema:ta, mabu a:ma:le dopamo epono ololo apulo Godoko waloma:tama: nani tabo degeawiyala, ebe tetelo ebete ebe igilo a:ma:tamo ikaema: ka:miyata.

13 Ebema: numa:, Godoko ebe me opo inamabu bilibilinomatamo igilo dikalamena ebe Kawodawala, ega:walo Ya:su Kelisoko ebe Poniya Paeletekono dopo apulo ebenu nanitabokobi midi tanalo dawokalimiya ebe Nanidawala. Ebema: naimano gudu, nale ibi netewapino ololo apulo a:ma: kawonomamo totomutimata, 14 a:ma:le aimano Kawodawa Ya:su Kelisokono pe uwomuamo ebenu iyaiya totomu tabamo wadenomamo na:tuduwatanakiye, iyo, modoboa: epetapiate kapiya tanalo da:pesonomo idima: a:imano woko kubama: kegelama:. 15 Nanitabola, Godoko kapiya ebe Wadedawanomola ega:walo Unudawanomola! Iyo, me opo epono kawokawopi ega:walo elawodubu bilibilinomo magumulo ebe kapiya ebe Kawodawanomola, ega:walo ebe kapiya ebe Kawo Elawodawanomola! Ebe mabuma: ebete modobo tabo degemene, ebe wade tetenomolo Ya:sute me opamo walo ka:ka:pemene. 16 Iyo, nanitabola, Godoko kapiya ebe uwomua: uwomua: Igilodawanomola. Ebete kebe kawo alo magumunomolo kokolinale, lumagi idite ebenu ololo apuamo ka:nemaigama: ebe alo magumamo toma: modoboa:, ebema: me opo epo bilibilinomo magumulo idite ebe dopamo kumiya: ega:walo me tetelo ibi magumulo idite atumu ebe kumina:. Ebema: modobola uwomua: tetelo amama tanalo ega:walo elawo tanalo kawonomote ebegodolo na:pola:nama:na:! Taula!

*Polote Leta Uwomu Apulo Iyaiya Tabo Da:kiyawaiya*

17 Ebema: piyate me opolo inamabu bilibila:gopima: deda:ona, modobola a:ma: ibi nanaliye ibi a:ka:tuwa: ibino tanaloma: akoamamala:. Modobola iba:te wiyasiya ibino inamabu bilibili kawonomamo malagidilolea:no, Godoko kapiya ibino walubidawama: gelalo ebenu pe tanaloma: olowiolo nemakopelenama:na:. Nanitabola, Godote a:ka:tuwa: aimano modoboa: tanalo eba ulameleamenalo, ebete kebe iyaiya inamabuamo a kawiya kowalubinakole, ebe ubi niyatina ale ebe inamabuma: nanitabolo kekalakalaonama:.

18 Ega:walo a:ma:le ibi ma kunu walo nakanaliye, modobola iba:te ibino wade osiyodilole tanalo dogodogokobi na:midilima:na:, iyo, iba:te kawo nilakapo tanalonomo awokalimi magumulo ubia:noma: akoeda:oala: epetapino iyaiya modoboa: tanalo ka:modoboilamelelaema:. 19 Numa:, me gabodo ibi a:ka:tuwa: ibi kowalubilima:na:, mabu Godokono Unu Duliyomololo ibino inamabu bilibilinomate nanitabolo ba:na:pola:lamenama:na:, iyo, ibino nilakapo awokalimi tanalo ebe ibino motono kodakoda mabu keba kunula:ka: eba kunula, mabu iba:te walone tetelo Godogodone da:nelaema:na: ebe nanitabo igilo ebe ibino uwomua: igilo tanalola.

<sup>20</sup> O Timoti, a:ma: niyata! Godote a:ma: wade wokodawama: gelo a:ma:tamo kebe iyaiya woko kikameotiyala, modobola a:ma: ebe woko wadenomamo nulamenakiye. Ebema: a:da: elemasigi epate kebe iyaiya tanalo mulo iyatawa tanaloma: kegelane, a:ma: ebako daedale tabo kiyawao magumamo akonopegala:. Modobola a:ma: wiyasiya ibi miyapawete iba:go akoapamineua:la:, mabu nanitabola, ibino tabo gela tanalate olowiopi epetapi Godoko ololoa:pima: midilinaka, <sup>21</sup> iyo, dopamo ebako epo epetapi ibi a:ka:tuwa: ibi mulo iyatawaopima: eba gelalo iba:te nanitabokobi midi magumune gito nemaimiya.

Naimano gudu, modobola Godokono nilakapo tanalote a:ma: ega:walo a:ma:go daladabutina la: bilibilinomagodolo nitanamene. Me ebe naimano tabo uwomula. Taula.

## POLOTE NABA 2 LETA TIMOTITAMO OSIYODILIYA

<sup>1</sup> Na ebe Polotela, Ya:su Kelisote ebenu sosi wagilima: iyaiya opamo daliboliya, ebe wokopi magumulo na idila. Iyo, Godote ebenu ubilo na elaweniya, nale ebenu woko eba osiyodilonalo tabo ma kunu ka:kiyawaonakoma:, Ya:su Kelisoko magumulo ditana ebete ebe igilo ebe waloma:tapiatamo gito kikalaema: nanitabonomolo egiya.

<sup>2</sup> O Timoti, a:ma: nale kawonomamo demalagidilotanama ebe gudunomolata, ebema: nale me leta a:ma:tamo palibomo. Modobola Nabiwi Godoko ega:walo aimano Kawodawa Ya:su Kelisoko iba:te ibino nilakapo tanalo, ega:walo lumagitamo kuba wiya ikamea: tanalo, ega:walo milo tanalo a:ma:tamo nikaema:ta.

### *Polote Timotiko Mabuma: Godotamo Kalakala Tabo Dawokalimiya*

<sup>3</sup> Nanitabola, nale naimano tepo magumuno mulo wokino tanalamo Godotamo woko nosiyodilonamo, naimano Yu epo ewoni epetapiate ebetamo nanitabo woko dopamo keba kunu kosiyodilonami eba kunu. Ebema: idoko ega:walo egela bilibilinomo epetapilo naimano towetowe tabo ge magumulo nale a:ma: eba malagidilolo a:imano tanaloma: kalakala tabo ebetamo kiyawaolo a:ma: ebo adipatenakomata. <sup>4</sup> Iyo, ebe osiyodilo tanalodo nale a:imano ii tanalo ka:dodomatina:, ebema: na ubi kawonomamo niyatinamo a:ma: walo ka:kumitama:, mabu na iyatawala nale ebe tetelo naimano tepo magumulo kawonomomamo kekalakalamamo.

### *Polote Timotiko Daniya Ebete Woko Wadenomamo Kosiyodilonama:*

<sup>5</sup> Ega:walo nale atumu a:imano nanitabokobi midi tanalo wadeno ka:dodomatina:. Nanitabola, kebe nanitabokobi midi tanalote dopamo a:imano aida Lowisigodolo ditanami, ebe atu tanalote a:imano menoko Yunisigodolo walo na:kitanami, ebema: kalakala kawonomola, na iyatawala me tetelo ebe atu nanitabokobi midi tanalote a:ma:godolo nanitabolo ba:kitana. <sup>6</sup> Ebe mabuma: nale a:ma: walo nakanamata, a:ma: sosi woko wagilimia:no dopamo nale a:ma:tamo koto dowatiliyamo, ebe tetelo a:ma:le Godokono woko kosiyodilawenama: ebete nilakapolo a:ma:tamo kebe iyanomo elawo kikametiya, modobola a:ma: ebe elawamo ebenu woko nosiyodilonakiye. Iyo, lumagite ela mena da:pesamo kawo ela keba kunu kemadonakole, eba kunu modobola a:ma: Godokono woko eba osiyodilonalo ebenu elawote a:ma: magumulo kawonomoma: neda:mene. <sup>7</sup> Numa:, ale Godokono woko osiyodilonama: ebete atamo tole tanalo kikaemiya:. Ao, ebete wiyasiya ebenu elawo atamo ikaeamete, ebenu ebenu nilakapo kimalagidilo tanalo atumu atamo kikaeamete, ebenu ebete wade woki atamo atumu akoikaemiya ale kateneno ubi tanalamo tudila:okapoma:.

<sup>8</sup> Ebema: a:ma: Kawodawa Ya:sukono tanalo awokalima: ilipokobi ako-olowiala:, ega:walo nale ebe mabuma: gabamanino idoko motolo dokolinamo ebe tanaloma: atumu ilipokobi ako-olowiala:. Iyo, na keba kunula:ka:, modobola a:ma: eba kunu ebenu Wade Tabo kiyawaoma: temeteme epetapi nanitabokobi midia:piagodone kalakalago nuwatanakiye, ebenu Godote a:ma:tamo elawo kikaema:ta ebe temeteme magumulo kodakodalo kuta:wenama:.

### *Ya:sukono Wade Tabo Kiyawao Woko Osiyodilo Tanalo*

<sup>9</sup> Ebema: numa:, a nanitabokobi midipiate Godokono talenapima: keda:onama: ebete aimano igilo mula:leamete ebenu nilakapo magumudo a ebo ka:miya, aimano wadewade osiyodilole tanalodoa:. Iyo, me opo wagilimia:no ebete dopamo ebenu ubilo me nilakapo tanalo Ya:su Kelisodo atamo ikaeamiya. <sup>10</sup> Ebe mabuma: aimano Igilo Mula:dawa Ya:su Kelisote me opamo da:piya, ebete ebe nilakapo tanalo atamo nanitabolo apawokalimiya, iyo, ale ebenu Wade Tabo olowio tanalodo me tanalo iyatawaiyama:, ebete a:e tanalono elawo anakapumite uwomua: igilo atamo ebo adaiya.

<sup>11</sup> Ebene Godote na ebo laweniya, nale ebenu alibolepi dubu magumulo idima: keda:nama:, mabu ebe ubila nale Ya:sukono Wade Tabono iyaiya tanalo bilibilinomo eba niyatulamelo epatamo ka:na:kiyawaonakoma:. <sup>12</sup> Me mabuma: na epetapiagodone temeteme uwatenakomo, wiyasiya numa:, nagodolo ilipo tanalo kitana: mabu nale poko nanitabokobi ka:midinamo ebe Kawodawano elawo na iyatawala. Ebema: nanitabola, ebete na wade wokodawama: gelo natamo dikanamiya, ebe Wade Tabo kiyawao woko ebete Uwomu Egela teta:mo wadenomamo eba buyaminanatolo idawate a:ka:kubaiminakomene. <sup>13</sup> Ebema: Timoti, a:ma:le Ya:su Kelisoko magumulo eba okolinalo, ebete a:ma:tamo dikametanaka, modobola a:ma: ebe nanitabokobi midi tanalo ega:walo nilakapo kimalagidilo tanalo nowatila:mota:na, ega:walo a:ma:le nagodone kebe iyaiya mulo iyatulame tanalo kolowiawiyala, modobola a:ma: ebe tanalo atumu kodakodalo uwata:wete nowaloma:taliye, mabu ebe iyatulame tanalate epatamo wade okoli tanalono uli ebe awokalimina. <sup>14</sup> Ega:walo me tanalo idila. Godote a:ma: wade wokodawama: gelo Wade Tabo kiyawao woko a:ma:tamo dikametiya, modobola a:ma: ebenu Uliyanano elawamo ebe woko wadenomamo na:buiyateniye. Kalakala kawonomola, ebe Wade-talena Dawate a nanitabokobi midipi magumulo bokolina!

### *Polote Onisipolasikono Walubi Tanaloma: Tabo Da:kiyawaiya*

<sup>15</sup> Naimano gudu, a:ma: iyatawalata, Paigelasiko ega:walo Emogenesiko iba:te na atepanete, ebenu A:isiya opo kawonomolo dilukuliona ebe epo bilibilinomate nagodone atumu a:kolobila:iya. <sup>16</sup> Wiyasiya Onisipolasikono tanalo eba kunua:, mabu nale gabamanino idoko motolo dokolinamo ebete ebe tanaloma: ilipoa:no iyaiya tete epetapilo na gito walubininaki, ebema: modobola Kawodawa Ya:sute ebe ega:walo ebenu moto epo iba:tamo ebenu nilakapo tanalo nawokalimene. <sup>17</sup> Numa:, ebete Loma kawo duliyaomolamo da:pemaigi ebe atu egelalo na kowalubinima: na wadininapete idoko motolo ebo punami, <sup>18</sup> ebema: Kawodawate ebenu Uwomu Egelalo epono tanalo danagilamelelaemene, epo epetapiate ibino kuba wiya ebegodone eba uwatelo, modobola Onisipolasite wiyasiya ebegodone nilakapo tanalo kapiya nelaemene! A:ma: iyatawanomolata, na Epesese kawo duliyaomololo egela epetapilo da:pokolimo ebete kebako wade osiyodilole tanalodo na kowalubininakile.

## 2

### *Ya:suko Mabuma: Wade Gowelaodawama: Eda: Tanalo*

<sup>1</sup> Ebema: naimano gudu Timoti, modobola a:ma: Ya:su Kelisogodone da:pena ebe nilakapo magumulo kodakodalo uta:wete elawonomoma: neda:na. <sup>2</sup> Ega:walo piyate nanitabokobi midi magumulo woki netewa:noma: eda:olo woko nanitabolo dosiyodilona, modobola a:ma: ebako dubu kapiyakapiya uwata:wete ibi wadenomamo niyatulamenakiye,



iyo, dopamo a:ma: eba olowiolo nale epo bilibilinomono ololo apulo kebe iyaiya tanalo ka:kiyawaonakimo ebe atu tanalamo ibi nowalubiliye. Numa:, a:ma:le nani wokopi epetapi eba kunu diyatulama:emene, walone iba:te ebe atu tanalo epo epetapi wadenomamo ka:niyatulaema:na:

<sup>3</sup> Ega:walo me tanalo idila, a:ma: Ya:su Kelisoko mabuma: Saitanago gowe-laodawama: eba eda:nalo nanitabokobi midipi epetapiagodone iyaiya teme-teme duwata:wenaka, modobola a:ma: elawoa:noma: akoeda:la: <sup>4</sup> Numa:, wade gowelao dubute ebene watodawa kapiya kalakalaima: ubi eba iyatilo, ebe a:ka:tuwa: ebene iyaiya ubi tanalo kosiyodilolenakoa:. Ma kunu ebete gowelao tanalo kapiya malagidiloma: eba kalakalalo, ebete ubia:noma: eda:na kamiyale ega:walo gudi ega:walo gowelao tanalo osiyodilolea:pino iyaiya ilukuli tanalate ebe matuomeoma:, mabu ebe iyatawala gowelao magumulo ebe tanalate ebe elawoa:kobi ka:midima:na:. <sup>5</sup> Ega:walo bolamo kalakaladawate atumu taneba idino wato kikopu laema: ubi eba iyatilo, ebete bolamo kalakala tanalono totomu tabamo tuduwatalo ebe a:ka:tuwa: ebene iyaiya ubi tanalo kosiyodilolenakoa:, mabu ebe iyatawala ebete eba kunu wagelea:no taneba idipiate wato kikopu ebegodone gito kelaema:na:. <sup>6</sup> Ega:walo pali osiyodilodawate ebene woko elawonomamo kosiyodilomene, mabu ebe iyatawala epate nani tabo ma kunu gelana, ebene pali inamabuate demaimioma:na: ebe dopo lumagima: keda:mene pali inamabu magumulo ebene apu kuwatema:. <sup>7</sup> Ebema: naimano gudu, nale da:kiyawautamo modobola a:ma: ebe tabono magumu wadenomamo nemalagidila, mabu Godote wadewade woki a:ma:tamo kikaema:ta a:ma:le naimano iyaiya tabono magumu tanalo bilibilinomo wadenomamo kemalagidilola:ema:.

<sup>8</sup> Ega:walo modobola a:ma: Ya:su Kelisokono tanalo wadenomamo nemalagidila, ma kunu ebe Kawo Elawodubu Da:ibidikono walonepi magumulo awokalate, ebene ebete da:iya Godote ebe igilamo walo akadipatiya. Nanitabola, nale ebene Wade Tabo eba kiyawaolo me kawokawo tanalo dawokalilamenakomo, <sup>9</sup> ebe mabuma: nanitabokobi midia:piate kawokawo temeteme natamo ikanamenaka. Iyo, me tetelo na idoko motolo eba okolinalo iba:te naimano koto auli ala:mo ematuolamolenameiya, gabamaniate kawo kubanomo osiyodilodawano koto keba kunu kematuolamolename eba kunu. Wiyasiya kalakala kawonomola, mabu Godokono nani wokopiate da:kiyawaonaka ebe tabote elawonomoma: eba eda:nalo lumagi idite ebe tabo kiyawao tanalo matuomeoma: modoboa:! <sup>10</sup> Ebema: nale iyaiya temeteme epetapi kalakalago uwatenakomo, mabu Godote kebe epo ebene gudima: keda:onama: dopamo deka:la:mioliya, na ubila ebe epate Ya:su Kelisodo igilo mula: tanalo nago lawete uwomua: uwomua: tetelo ale ebene amama tanalo magumulo kapimiya bilukulinama:.

<sup>11</sup> Ebema: numa:, oale osiyodilodawa idite aimano igilo mula: tanalo eba malagidilolo nani tabonomo ma kunu akuloliya,

“Mabu ale Ya:suago a:elaiyama;

ale eba:go Unu Duliyomololo ba:nilukulinama;

<sup>12</sup> ebene temeteme magumulo ale elawoa:noma: eda:oa:no,

walone eba:go kawokawo elawodubuma: keda:omalema;

wiyasiya ale temeteme magumulo

ebe iyatawa:noma: degelama;

ebe mabuma: ebete atumu a iyatawa:noma: kegemene.

<sup>13</sup> Wiyasiya kalakala beda: kawonomola:ka;

mabu kebe tetelo ale ebe nanitabolo waloma:ta:no,  
 ebe tetelo ebete Nanidawanomoma: eba eda:nalo  
 a gito a:ka:miyapaemene,  
 iyo, ebete a kowalubima: dopamo nanitabolo degiya,  
 ebete ebe tabo iyabaiamo iyatima: modoboa!”

*Godokono Wokodawate Ebe Keba Kunu Na:kekalakalaimene*

<sup>14</sup> Ebema: Timoti, modobola a:ma: me iyaiya tanaloma: sosi epo walo eba ka:kiyawaolamelo, Godokono ololo apulo ibi kawiya ma kunu nanaliye, iba:te iyaiya iyatulame tabono magumuma: akoapamina-teua:la:. Nanitabola, ebako osiyodilo tanalo magumulo wade tanalote a:kemaigamene mabu apaminatui tanalote olowiopi ka:kubailaemene.

<sup>15</sup> Ebene a:ma:le a:imano woko magumulo Godoko kekalakalaima:ema:, modobola a:imano ape kawonomo ebetamo ikamenomo nikamiye, mabu kebe wokodawate Godokono nani tabo epo epetapi wadenomamo diyatulamenako ebe lumagite ilipo tanalo a:kiyatawamene. <sup>16</sup> Ebema: piyate Godotamo tudila:o ubia:noma: deda:ona ibino tabo gela magumamo ako-opegala:, mabu ibino daedale iyatulame tanalate kebe epo kuba gabamo kowabuga:talenale, iba:te ebako olowiopi Godogodone mulunomamo kemagatalema:na:, <sup>17</sup> iyo, ibino kuba iyatumi tanalote gabugabu kani kawonomote lumagino ape magumamo keba kunu ka:tonakole eba kunula.

Nanitabola, Aimaneyasiko ega:walo Pailitasiko ibi netewapi eba kunula. <sup>18</sup> Iba:te Godokono nanitabo iyatumi tanalo eba atepalo a:da: tabo ma kunu gelana, piyate nanitabokobi midi magumulo da:elaiya Godote ibi igilamo iyalo owadipalatiya, ebene ebete a nanitabokobi midipi epetapi igilamo a:kowadipaeatemene! Eiyee, iba:te me kuba iyatumi tanalamo epetapino nanitabokobi midi tanalo iyabaiamo iyalekelamenaka! <sup>19</sup> Wiyasiya kalakala kawonomola, tete bilibilinomolo Godokono Motono nanitabo kodakoda alote ba:ena, ebe alo unamo ebete me tabo iyalo akuloliya, “Piyate Godokono epoma: deda:ona, ebete ibino tanalo iyatawanomola,” ebene alono apuamo ebete tabo walo ma kunu kakuloliya, “Piyate ibi a:ka:tuwa: Godokono epoma: degelana, modobola iba:te kuba osiyodilole tanalone nanitabolo nolobila:oma:na:.”

<sup>20</sup> Ebema: numa:, inamabu bilibilidawano kawo motolo iyaiya kalili ega:walo meleki ma kunu ba:pola:na, epetapi golodo ega:walo siliba inamabuamo osiyodilole kawokawonomo wiya inamabula, ega:walo epetapi kewamo ega:walo gebetamo osiyodilole opodopo wiya inamabula, ebene ebete ebe iyaiya kalili ega:walo meleki magumulo epetapi uwatete ibi unamo ebene bae alomonako, wiyasiya ebete epetapi kuwatete ebamo sosowa gito iyalekenako. <sup>21</sup> Me tabo ebe ulila, ma kunu Godoko ebe inamabu bilibilidawa keba kunula:ka: eba kunula, ega:walo epo ebene motolo da:pola:na ebe iyaiya kalili ega:walo meleki keba kunula:ka: eba kunula. Ebe mabuma: modobola lumagite kuba osiyodilole tanalo bilibilinomo miyapate ebene watodawa Godokono woko kapiya kosiyodilonama: ebe a:ka:tuwa: ebe wadekobi namida:mene, mabu Godote ebe lumagino tepo magumu wadenomamo itanalo duimimene, ebete ebe lawete iyaiya wadewade tanalo bilibilinomo ebene ebo kosiyodilolemene.

<sup>22</sup> Ebema: naimano gudu, oli ape epate ibino kateneno kuba ubi gabodo kebe iyaiya tanalo kosiyodilolenake, a:ma: ebe tanalo kuba nibote maigama: gelo ebe osiyodilole magumune nalaula:nakiye. Modobola a:ma: wiyasiya tuputupu okoli tanalo ega:walo nanitabokobi midi tanalo, nilakapo kimalagidilo tanalo ega:walo milo tanalo, ebe tanalo uwatema: ubi kawonomamo niyatinakiye. Nanitabola, piyate ibino tepo magumulo daleya woki

malagidiloa: no Kawodawa Godote ibi kowalubilima: ebe da: toweomenaka, iba: te ibino ubi tanalo a: ma: go kapimiya eba kunu alomonaka. <sup>23</sup> Wiyasiya epetapiate ibino daedale wokilo iyaiya iyatulame tabono tanaloma: da-pamineuina, a: ma: ibino tabo gela tanalamo ako-opegala:, mabu a: ma: iyatawalata, ebako tabo gela tanalone iyaiya anagiyamida tanalate epo magumulo maimionaka.

<sup>24</sup> Numa:, a: ma: Kawodawa Godokono wokodawalata, ebema: modobola a: ma: epo epetapiago apamineuina: no ibi bilibilinomatamo nilakapo tanalo eba awokaliminalo ibino wade iyatulamedawama: nediye, iyo, a: ma: lumagi idi ubia: noma: samamo akoeda: la:. <sup>25</sup> Ega: walo a: ma: Godokono woko eba osiyodilolo piyate a: ma: odiyoboma: dowagelema: na:, modobola a: ma: iba: tamo ibino kuba osiyodilole tanalo milo gabodo nawokalilamiye. Diyala, Godote a: ma: do iba: tamo wade woki da: bikalaemene, ebema: iba: te kuba osiyodilole magumune olobila: ote ebena nanitabo tanalo diyatawaoma: na:, <sup>26</sup> ebe tetelo iba: te wadewade woki eba uwatelo Saitanakono gubi magumune iyabaiamo gito kilapatela: oma: na:. Nanitabola, iba: te ebena kuba ubi tanalamo tudila: oma: ebe Kubadawate ibi ebena gubi magumamo iyalo alomi, ebema: modobola a: ma: ibi nowalubiliye.

### 3

#### *Me Opono Uwomu Tetelo Kuba Osiyodilole Tanalono Maimio Tanalo*

<sup>1</sup> Ebema: modobola a: ma: me tanalo niyatawa, me opono uwomu tetelo iyaiya kodakoda tanalo bilibilinomate ka: pemaimioma: na:. <sup>2</sup> Ebe tetelo epo epetapi bilibilinomate ibi a: ka: tuwa: ibi eba malagidilolenalo mani uwatema: ubi kawonomamo balomonakoma: na:, ega: walo iba: te amama magumulo epo epetapi epoa: ma: gelalo ibi bemalogolenakoma: na:, ega: walo iba: te ibino menokobila nabila iba: tamo tudila: oa: no kalakala tanalo iba: tamo akawokaliminakoma: na:, iyo, iba: te atumu Godoko tolema: pima: beda: onama: na:. <sup>3</sup> Ebene iba: te nilakapoa: pima: eba eda: olo, piyate iba: tamo kuba dopamo dosiyodiloliya iba: te ebe epatamo wiya ikalaema: ubi kawonomamo biyatinakoma: na:, ega: walo iba: te tuputupupi epetapino tanaloma: a: da: elemasigi tabo gito begelanakoma: na:. Ebene iba: te ibino kateneno kuba ubi tanalo kapiyatamo tudila: olo epo epetapi ibino elawo gowela tanalamo eba kubailamelo, iba: te wiyasiya wade tanalo kapiya idi osiyodiloma: ubia: noma: beda: onakoma: na:. <sup>4</sup> Ebene iba: te kebe epo ibino namutupima: unu gabodo kegelane iba: tamo diya gabodo iyaiya kuba tanalo bosiyodilolenakoma: na:, ega: walo iba: te woki wadenomamo uwatea: no ibino kuba ubi tanalo kosiyodilolema: gawagawalo ba: tolamenakoma: na:, iyo, iba: te amama tanalo kawonomo magumulo Godoko kalakalakobi midima: ubia: nola wiyasiya ibi a: ka: tuwa: ibi kapiya kalakalakobi midilima: bowagelenakoma: na:. <sup>5</sup> Ebene iba: te unu gabodo ibi a: ka: tuwa: ibi Godoko waloma: tapima: eba gelalo wiyasiya ibino tepo magumulo nanitabo tanalote a: kitanamene, iyo, ibino ubi tanalate kalawikalawilo eba pola: lamenalalo Godokono nanitabo elawo dologala inamabuma: midite laema: ubia: nola.

Nanitabola, walone ebako kuba osiyodilolepi bilibilinomate kemaimioma: na:, ebema: me tetelo a: ma: ebako epago akokapiyala:. <sup>6</sup> Ibi magumulo dubu epetapiate ibino motonomo miyapate epetapino motolo eba nilukulinalo daedale woki buwelemele ega: walo kamiyalé ibino kuba ubi gabodo ebo magatalenaka. Ebema: numa:, ebe kamiyala: te ibino kuba osiyodilole mabuma: tepo magumulo mibomiboma: eba eda: olo, wiyasiya ibino kateneno iyaiya kuba ubi tanalate a: ka: tuwa: maimionaka, ebema:

iba:te nanitabokobi midi magumulo woki netewama: eda:olo ebako kuba dubuno tabamo gito tudila:onaka. <sup>7</sup> Nanitabola, ebe kamiyale niyaniyala, mabu iba:te Godokono nanitabo tanalo laema: gabo eba wadilo ibino kateneno ubi tanalate ibi gito odiyobolenaka, iyo, ebe mabuma: iba:te uwomua: tetelo nanitabolo a:kiyatawaonakoma:na:

<sup>8-9</sup> Ebema: dopamo tetelo Godote Mosesedo ebena nanitabo tanalo eba awokalimilo piyate ebe odiyoboma: dowageliya, modobola a:ma: ebe dubu netewa Ya:nesiko ega:walo Ya:mbalasiko ibino tanalo nemalagidila. Numa:, ibino kuba osiyodilo mabuma: epo bilibilinomono ololo apulo ilipo tanalote iba:tamo gito maigiya, ebema: me tetelo piyate nanitabokobi midipi kamiyale da:kubailamenaka ebe a:da: tabo iyatulamepiate atumu kawo ilipo kelaema:na:, mabu ibino kalawikalawi wokino tanalodo iba:te nanitabokobi midi magumune iyalo a:na:gudiya. Nanitabola, iba:te Godokono tanalo odiyoboma: eba wagelenalo wiyasiya ebe odiyoboma: a:ka:modoboma:na:, mabu ibino osiyodilole magumulo epo bilibilinomate tatalila ibino daedale wokino tanalo nanitabolo kuima:na:

### *Nanitabokobi Midipino Temeteme Uwate Tanalo*

<sup>10-11</sup> Ebema: Timoti, a:ma: iyatawanomolata naimano iyatumi tanalo ega:walo osiyodilole tanalo ega:walo woko osiyodilo tanalono kawonomo magumu. Iyo, a:ma: naimano okoli tanalo nanitabolo uminakiy-ata, ma kunu nale nanitabokobi midi magumulo epo nilakapolo eba malagidilolenalo lumagi idi samamo ubia:noma: keda:nakia:, ega:walo epetapiate natamo iyaiya temeteme dikanamenakiya, ebe tanalo magumulo ega:walo iyaiya mibomibo epetapi magumulo nale kodakodalo eba utinalo elawoa:noma: keda:nakia:. Nanitabola, A:ntiyoka duli-omololo ega:walo Aikoniyama duliomololo ega:walo Lista duliomololo nanitabokobi midia:piate kawokawo temeteme natamo dikanamone-nakiya, ebe tetelo ebe temeteme bilibilinomo magumulo Godote naimano igilo a:mula:naki.

<sup>12</sup> Ebema: nanitabola, piyate Ya:su Kelisoko magumulo eba ilukulinalo Godoko kapiyatamo tudila:oma: dowagelena, ibi bilibilinomate epetapi-agodone temeteme buwatanakoma:na:. <sup>13</sup> Ega:walo a:da: tabo iyatulamepi, iyo, kuba epetapi osiyodilolepi atumu, ibi bilibilinomono tanalo ma kunula. Ibi magumulo epetapiate epetapi a:da: eba masigililo kuba gabamo ebo be-magatalenakoma:na:, ebema: piyate me tetelo egege kuba dosiyodilolenaka, walone iba:te kawokawo kuba tanalo kapiya osiyodilole eba wagilamelo kubanomoma: ebo keda:oma:na:

### *Godokono Bukano Tabote Nanitabokobi Midipi Keba Kunu Kowalubili-nakole*

<sup>14</sup> Naimano gudu, a:ma: wiyasiya Godokono tabono iyaiya tanalo dopamo uwata:wete nanitaboma: da:midila:wiya, modobola a:ma: ebe iyatumi magumulo woki netewama: eda:no nepata:na. Numa:, piyate a:ma: dopamo diyatumitanakiya a:ma:le ebe nanitabokobi midipino tanalo iy-atawalata, <sup>15</sup> ebene gudu da:peso tetene wagilimite me teta:mo pemaiga a:ma:le Godokono Talena Buka apuapuno tabo iyatawanapiyata. Ebema: nanitabola, ebe Buka tabono tanalate wade mulo woki a:ma:tamo eba ikamelo, a:ma:le Ya:su Kelisoko nanitabokobi midi magumudo a:imano igilo mula: tanalo ebo kelaema:ta. <sup>16</sup> Iyo, Godokono Buka tabono tanalo bilibilinomate ebena Uliyanano elawamo apawokalaiya me opo epo kowalubilinama:, ma kunu ebena Buka tabono tanalate tete epetapilo ebena nanitabo tanalo epatamo awokaliminaka, tete epetapilo a:da: tabo iyatumi

tanalo odiyobonaka, tete epetapilo epono kuba osiyodilole magumune ibi oba:midalenaka, ega:walo tete epetapilo ibi tuputupu ilukuli tanalo iyatulanenaka. <sup>17</sup> Ebema: nanitabola, Godokono Bukano iyaiya tabono tanalone ebena wokodawate elawo lawete wadedawa ega:walo mulo wokodawa idima: beda:namene, mabu ebete ebe gabodo elawo nanitabolo kelaemene wadewade tanalo bilibilinomo kosiyodilolema:

## 4

### *Polote Timotiko Walo Da:ka:totomutiya Ebete Woko Wadenomamo Kosiyodilonama:*

<sup>1</sup> Ebema: naimano gudu, numa:, Ya:su Kelisote ebena Kawo Elawodawano gobobobo laema: na:pe, iyo, ebete da:pemaigamene ebe tetelo piyate dopamo da:elaiya ega:walo piyate igilolo dilukuliona, ebete ebe epo bilibilinomono tanalo kapanagilamelelaemene. Ebe mabuma: nale ebe ega:walo Godoko ibi netewapino ololo apulo a:ma: anamata, <sup>2</sup> a:ma:le Godokono tabo epatamo ka:kiyawawenakoma:, iyo, ibino ubi tetelo ega:walo ubia: tetelo modobola a:ma: kodakodalo uta:wete ebena iyaiya tabono tanalo ibi niyatulanenakiye. Ebene olowiopi magumulo a:ma:le lumagi idi samamo ubia:noma: eda:no, piyate kuba dosiyodilolena, a:ma:le ibi wade tabamo eba walubililo tolea:no ibino kuba awokalilama:wete ibi kawiya nanalenakiye iba:te kuba osiyodilole magumune kolobila:oma:. <sup>3</sup> Mabu tete na:pe, epate Ya:sukono iyaiya mulo iyatulame tanalo olowioma: ubia:noma: keda:oma:na:, wiyasiya iba:te ubi kawonomo biyatinama:na: piyate ibino kateneno osiyodilole tanalo modoboma: degelanaka ebako iyatulamepi kapiyatamo gawagawalo ka:tolaema:na: ibino tabo ka:nolowioma:

<sup>4</sup> Numa:, ebe olowiopiate Godokono nanitabo tanalona eba olobila:olo iyaiya opo epono ewonino a:da: elemasigi oi tanalo waloma:tale ebo ka:nowagilima:na:. <sup>5</sup> Ebema: naimano gudu, a:ma: woki netewama: eda:no woko osiyodilo tanalona temeteme magumulo kodakodalo eba utinalo, modobola a:ma: nanitabokobi midia:piatamo Godokono Wade Tabo natanakiye, ega:walo Godote kebe iyaiya woko epetapi a:ma:tamo kikameotanaka ebe tanalo bilibilinomo atumu wadenomamo nopoliyalenakiye.

### *Polote Ebena A:e Tanalo Tatalima: Eda: Tanalo Dawokalimiya*

<sup>6</sup> Numa:, naimano tanalo ma kunula. Tete a:pe Godote ebe a:ka:tuwa: ebe eba watidilole ebete naimano igilo da:pelawenaemene na ebo ka:emamo, iyo, tatalila na me opo katepamamo. <sup>7</sup> Nanitabola, nale naimano nanitabokobi midi tanalo eba atila:nalo Saitanago gowelanapete wato kikopu a:pelaemo, iyo, nale elawoa:noma: eda:no uwomuamo a:pemaigamo, sukulu gudino kalakala egelalo idawate elawamo keba kunu ka:puliganakole eba kunu. <sup>8</sup> Ebema: tete tatalila Kawodawa Ya:sute natamo wade wiya kikanaemene, sukulu watodawate gudi magumulo elawodawanomotamo wade wiya keba kunu kikamenakole eba kunu. Iyo, tuputupu okoli tanalona wade wiyate na mabuma: bitana, wiyasiya na kapiyate a:kelaemo, mabu Ya:sute epono tanalo tuputupulo danagilamelelaemene, ebe Kawo Egelalo piyate ebe nilakapo kimalagidilo tanalago ebena pe tete demakopelena, ebete ibi bilibilinomatamo kapimiya ebe wadewade wiya atumu ka:ka:pikalamolemene.

### *Timotite Samamo Ka:pema: Polote Ebe Daniya*



<sup>9</sup> O naimano gudu, a:ma:le natamo samamo pema: gabo nanitabolo nowadiye, <sup>10</sup> mabu Dimasite me opono iyaiya kalakala tanalo kawonomamo demalagidilolenati ebete na atepanete Tesalonaika duliynomolamo gito ti, ebene Godokono woko ka:nosiyodiloma: Kelesenete nagodone Gale-siya opamo eba nemaigalo, naimano namutudawa idi Taitasite atumu Da:lamesiya opamo gito ka:ti. <sup>11-12</sup> Ega:walo numa:, naimano walubidawa idi Tikikasiko nale Epesese duliynomolamo dopamo alibimo, wiyasiya me tetelo Lukuko kapiyate nagodolo bokolina, ebema: na ubila a:ma: Makako lawa:wete ebe natamo nemagaiye mabu woko osiyodilo magumulo ebete naimano wade walubidawama: eda:na.

<sup>13</sup> Ega:walo me tanalo idila. A:imano pe tetelo nale Talowase duliynomololo Kapasigodolo datepimo, modobola a:ma: naimano ape enaenakobi midino ga:ga: kaliku ega:walo naimano iyaiya buka mokopiole uwata:wete ebo nowadaiye, ebe buka magumulo naimano ubi kawonomo bitana sipi-goeogoeono tamamo osiyodilole buka kuwatema:

<sup>14-15</sup> Ega:walo a:ma: me dubu idino tanalo wadenomamo numa: ebete a:ma:tamo kuba osiyodilokapoma:, ebe A:lesandatela, auli inamabu osiyodilole wokodawala! Ebete a nanitabokobi midipino iyatulame woko kodi-yoboma: gowela tanalo eba osiyodilolelo natamo kawokawo temeteme ebo ikanamenaki, ebema: Kawodawa Godote ebene kuba osiyodilole mabuma: ebetamo wiya nanitabolo kikaemene!

<sup>16-17</sup> Nanitabola, Loma gabamaniate naimano tanalo danagiyami-danamiya, ebe tete naimano dopo tetela ibino ololo apuamo da:nemaigimo. Numa:, ebe tetelo nanitabokobi midipi epetapi bilibilinomate tolekobi olowiote na gito atepaniya, ebema: na a:ka:tuwa: eba utitalo naimano kuba osiyodiloa: tanalo tabo anagiyamidawatawate ebo awokalimo. Wiyasiya kalakala kawonomola, mabu gabamanino ololo apulo Kawodawa Ya:sute nago eba utitalo elawo natamo ikanami, nale Yua: epo epetapi bilibili-nomatamo ebene Wade Tabo kiyawaonomo ka:kiyawaoma:, ega:walo atu tetelo ebete naimano igilo eba mula:namelo tabo anagiyamidawate a:e wiya natamo kikanamea: Numa:, piyate na datepaniya, na ubia:nola Godote ibino tole tanaloma: kuba wiya iba:tamo ikalaema:, <sup>18</sup> mabu na me tanalo iyatawala, Kawodawano ubilo ebete kuba osiyodilolepi bilibili-nomono koto magumune naimano igilo walo ka:mula:namete, ebene Kawo Elawodawano elawote kebolo kitanale ebete na ebe Unu Duliynomolamo olalatia:no kemagatanemene. Modobola uwomua: uwomua: tetelo amama tanalote ebegodolo nitanamene! Me tabo nanitabola, taula!

*Polote Leta Uwomu Apulo Iyaiya Nilakapo Tabo Da:kiyawaiya*

<sup>19</sup> Ebema: modobola a:ma:le Pilisilako ega:walo Akuilako ega:walo On-isipolasikono moto epo ibi bilibilinomatamo naimano nilakapo tabo na:kiyawaiye. <sup>20</sup> Numa:, nale Loma duliynomolamo da:pimo, gabo tetelo Elastasite Kolini duliynomololo polowagilite, ebene naimano walubidawa idi Topimasiko gabugabute da:pelawi, ebema: nale ebe Mailitase duliynomololo gito kapatepimo. <sup>21</sup> O naimano gudu, na ubi kawonomola, giba tete pea:no a:ma:le natamo pema: gabo nowadiye!

Malo dilukulina Yubulasiko, Pudenisiko, Lainasiko, Kolodiyako, ega:walo nanitabokobi midipi ekaki epetapi, ibi bilibilinomate ibino nilakapo tabo a:ma:tamo paliba.

<sup>22</sup> Modobola Kawodawa Ya:sute a:imano tepo magumulo nokolinamene, ega:walo ebene nilakapo tanalote a:ma: ega:walo a:ma:go daladabutinaka la: bilibilinomagodolo nitanamene. Me ebe naimano tabo uwomula. Taula.

## POLOTE LETA TAITASITAMO OSIYODILIYA

<sup>1</sup> Na ebe Polotela, Godokono wokodawala, iyo, Ya:su Kelisote ebena sosi wagilima: iyaiya opamo daliboliya, ebe wokopi magumulo na idila.

Nanitabola, Godote iyalo tetelo kebe epo keka:la:mioliyale, nale ebe epono nanitabokobi midi magumulo ibi kowalubilinama: ebete na ebema: laweniya, iyo, ebete ubi natamo iyatiya nale ebe epo Godokono nanitabo iyatawa tanalodo eba magatalelo, iba:te ebena ubi tanalamo tudila:o magumulo <sup>2</sup> ebena uwomua: igilo laema: olowiolo bilukulinama:na. A iyatawala, Godoko a:da: elemasigidawa:, ebete nani tabonomo kiyawaonako, ebema: me opo wagilimia:no ebete dopamo nanitabokobi midipi-atamo kebe tanalo ikalaema: ka:kiyawaiyale, iba:te ebe igilo ebegodone nanitabonomolo kelaema:na. <sup>3</sup> Iyo, aimano Igilo Mula:leamedawa Godote ebena wade tetenomolo me Wade Tabo me opo epatamo awokalimiya, ebema: na ebe tabo kiyawaonakomo mabu ebete na ananiya nale me woko kosiyodilonama:.

<sup>4</sup> O Taitasi, a:ma: ega:walo na, aimano nanitabokobi midi tanalo ebe kapiyala, ebema: a:ma: ebe nanitabokobi midi magumulo naimano nani guduma: eba eda:nalo, nale me leta a:ma:tamo palibomo.

Nanitabola, aimano Igilo Mula:leamedawa ebe Ya:su Kelisotela, ebema: modobola ebe ega:walo Nabiwi Godoko iba:te ibino nilakapo tanalo ega:walo milo tanalo a:ma:tamo nikaema:ta.

### *Sosi Watowatopino Ilukuli Tanalo*

<sup>5</sup> Numa:, Kuliti opolo naimano woko osiyodilo magumulo nale kebe tanalo opoliyalea:no da:pola:na, a:ma: ebe iyaiya tanalo eba ulamelo ebe opono iyaiya duliynomolono sosi magumulo watowatopi nuwatiye, nale a:ma: keba kunu kanatiama eba kunu. Nanitabola, a:ma:le ebe woko kosiyodilaema: nale a:ma: ebolo ebema: patepimata. <sup>6</sup> Ebema: sosi watodawano okoli tanalo tuputupunomolo eba itanalo, ebena osiyodilole tanalo magumulo kapiya kuba idi da:pesonomote itanama: modoboa:. Modobola ebete kamiyale kapiyagodawama: eba eda:nalo, ebena guda:te atumu tuputupu nanitabokobi midipinomoma: neda:oma:na:, ebene epate ibino osiyodilole tanaloma: ibi talaepima: ega:walo nabiwino tabo olowioa:pima: ka:la:ima: modoboa:. <sup>7</sup> Nanitabola, sosi watodawate Godokono motono iyaiya tanalo ulamena, ebema: ebena okoli magumulo kuba kapiya idi da:pesonomote itanama: modoboa:. Iyo, ebete amama dubuma: akoeda:la:, ega:walo ebena tepo magumulo elawo tanalote samamo ako-maiganakala:. Ebene ebete gamoda nioa:dawama: neda:mene, ega:walo ebete gowela magumulo epetapi kubailaema: modoboa:, ega:walo ebete a:da: elemasigi gabodo inamabu bilibilidawama: eda:ma: ubi iyatima: modoboa:. <sup>8</sup> Modobola ebe wiyasiya ebena motolo kapela epo wadenomamo nowalubilinakomene, ega:walo ebete Godokono wade okoli tanalo kawonomamo eba malagidilonalo, ebe a:ka:tuwa: ebena iyaiya tanalo wadenomamo nulamenakomene. Ebene sosi watodawano tuputupunomo okoli magumulo modobola ebete ebena ape Godokono woko kapiyamo eba iyatinalo kateneno kuba ubi tanalamo tuduwatama: modoboa:, <sup>9</sup> ega:walo Ya:sukono dopo waloma:tapiate ebena nani tabono iyaiya tanalo a keba kunu kiyatuamenakiye, modobola ebete ebe atu mulo tanalo kodakodalo

nowatila:mota:namene. Numa:, me gabodo wade watodawate sosi epo nani tabono tanalamo eba walubilinalo, piyate ebe tabago gowelaoma: dowage-lena, ebete ibino daedale wokino tanalo ebo bawokalilamenakomene.

*Godokono Mailamo A:da: Tabo Kiyawaopino Tanalo*

<sup>10</sup> Ebema: Taitasi, a:ma: numa:, Kuliti opono sosi epo magumulo epetapi bilibilinomate nani tabono tanalamo tudila:oma: ubia:noma: eba eda:onalo, iba:te ibino daedale wokino tanalamo epetapi a:da: ebo masigilinaka, iyo, piyate Yu dubuno tama itamida pukala kawo tanalomoma: degelana, ibi ebako a:da: tabo kiyawaopi magumulo dopopima: eda:ona. <sup>11</sup> Nanitabola, ibi ubi niyatina ibino a:da: tabo iyatulame tanalodo sosino iyaiya atu alailame epo epetapiatamo woki bilibili tanalo eba ikalamelo iba:godone kawokawo mani kuwatelaema:, ebema: modobola a:ma: ibi nodiyoboliye tabo kapiya idi gelakapoma:.

<sup>12</sup> Eiye! Dopamo tetelo Kuliti opo epagodolo mulodawa idite maigate ebenu epono tanaloma: me kodakoda tabo nanitabonomolo giya, “Kuliti opo epo bilibilinomo ebe a:da: elemasigipila, iyo, ibi tumuno elawoelawo inamabu keba kunula:ka: eba kunula, ebema: iba:te wade wokino tanalamo ka:tudila:onakoa:, wiyasiya damolama: eba eda:onalo ibino kateneno iyaiya ubi tanalo kapiya malagidilolena!” <sup>13</sup> Numa:, ebe tabo nanitabonomola, ebema: modobola a:ma: Kuliti epo kawiya nanaliye iba:te ibino nanitabokobi midi magumulo wadewade woki kuwatema:. <sup>14</sup> Ma kunu iba:te Yu epono ewoni epetapi a:ka:tuwa: ibino kateneno wokiamo degelanakiya ebe iyaiya oi tabo kawonomamo walo akomalagidilola:la:, iyo, piyate Godokono nanitabo tanalo ubia:noma: deda:iya iba:te ebe dubuno iyaiya totomu tabo walo ako-olowiala:.

<sup>15</sup> A:ma: numa:, kebe lumagino tepo magumulo kuba daleyaya woki kapiyate itamena:no, ebe mabuma: ebete Godoko amamatema: dosiyodilolenako ebe tanalo bilibilinomate atumu daleyaya:noma: eda:onaka. Wiyasiya piyate Godokono tabo nanitabokobi midia:no, ega:walo piyate ibino tepo magumulo kuba daleyaya woki demalagidilolena, iba:te Godoko amamatema: wade tanalo idi osiyodiloma: modoboa:, mabu ebete iba:tamo dopamo dikalamiya ebe wade mulo tepo magumu ega:walo kimalagidilo tanalo iba:te iyalo a:kubailamiya. <sup>16</sup> Ebe mabuma: ibi a:ka:tuwa: ibi Godokono nanitabo tanalo iyatawaopima: gelanaka, wiyasiya ibino kuba osiyodilole tanalate me tanalo awokalimina, iba:te ebenu tanalo nanitabolo kiyatawaona:. Iyo, ibino ilukuli tanalate kuba daleyama: eba eda:onalo Godotamo ka:tudila:ona:, ebema: ebenu umi magumulo ibi modoboa: ebetamo wade tanalo idi osiyodiloma:.

## 2

*Sosi Epono Iyaiya Tanaloma: Polote Totomu Tabo Epetapi Da:kiyawaiya*

<sup>1</sup> Naimano gudu Taitasi, a:ma: wiyasiya epo wadenomamo niyatulame-nakiye, Ya:sukono dopo waloma:tapiate ebenu mulo tabono iyaiya tanalo a keba kunu kiyatuamenakiye eba kunu. <sup>2</sup> Ebema: piyate nanitabokobi midipi magumulo nabima: deda:ona, modobola a:ma: ibi nanaliye, iba:te wadewade mulo woki uwatelo ibi a:ka:tuwa: ibino tanalo wadenomamo eba ulamenalo, ibino ilukuli tanalate epetapino umi magumulo wadewadenoma: neda:oma:na:. Iyo, na ubila iba:te ibino nanitabokobi midi magumulo ega:walo ibino nilakapo awokalimi magumulo ega:walo ibi Ya:suko mabuma: duwatanaka, ebe temeteme magumulo iba:te kodakodalo nelamota:onama:na:.

<sup>3</sup> A:ma: atumu nanitabokobi midipi menokobi nakanaliye, iba:te Godokono ololo apulo wadenomamo eba ilukulinalo ebe mabuma: tale-napima: neda:onama:na: Ma kunu iba:te elawo gala:ipi da:imi obo kawonomamo nioma: modoboa: ibino wokino tanalate daedalema: eda:okapoma:, ega:walo iba:te a:da: tabo kiyawao tanalodo epetapi akokubailama:la: Modobola iba:te wiyasiya oli ape kamiyale wadenomamo eba iyatulamelo <sup>4</sup> iba:tamo mulo woki ebo nikalamenakoma:na:, iba:te ibino awi ega:walo gudi nilakapolo kemalagidilolenama:. <sup>5</sup> Iyo, oli ape kamiyala:te ibi a:ka:tuwa: ibino iyaiya tanalo eba ulamenalo ibino tepo magumulo daleya wokino tanalo idite itanama: modoboa:, ega:walo iba:te ibino moto gulo iyaiya woko wadenomamo eba osiyodilolenalo ibino awino ubi tanalamo ba:tudila:onakoma:na:. Nanitabola, kamiyala:te eba kunu dilukulinama:na:, nanitabokobi midia:dawa idite ibino tanaloma: Godokono tabo kubama: ge gabo a:kuimene.

<sup>6</sup> Modobola a:ma: atumu oli ape dubu nakanaliye, iba:te ibi a:ka:tuwa: ibino iyaiya tanalo wadenomamo nulamenakoma:na:. <sup>7</sup> Ega:walo naimano gudu, modobola a:ma: a:imano osiyodilole tanalo bilibilinomo magumulo wade uli ebe oli ape dubatamo nawokaliminakiye iba:te a:ma: wadenomamo kibamititanama:. Ma kunu Godokono tabo iyatulame wokono tanaloma:, mena netewa tanalote a:ma:godolo itana:no, modobola a:ma:le a:imano tabo olowiopino tanalo eba malagidilolenalo a:ma: tuputupunomolo nokoliniye. <sup>8</sup> Iyo, a:ma:le epo wade tabonomamo nowalubilinakiye, ebene lumagi idite a:ka:modobomene a:imano iyatulame tanalo kubama: kegema:. Ma kunu piyate a:ma:go da:gowelaona, iba:te a nanitabokobi midipino tanaloma: kuba tabo idi gela gabo nipo dowadima:na: ebo kilipoma:na:.

<sup>9</sup> Ega:walo kawokawo wokopi dubate kebe epo maniamo duwatiya ibino wiya: woko kosiyodilolenama:, ebe wiya: wokopi magumulo piyate nanitabokobi midipima: deda:ona, modobola a:ma: ibi nanaliye iba:te ibino woko bilibilinomo magumulo ibino woko namutupi kekalakalailamenama: iba:te ibino ubi tanalamo na:tudila:onakoma:na:. Iyo, ibino woko namutupiate iyaiya woko iba:tamo eba ikalamolelo, modoboa: iba:te ebe woko osiyodilole tanaloma: iba:tamo kuba tabo gelama:, <sup>10</sup> ega:walo iba:te ibino woko namutupino mani pilolo uwatea:no, modobola ibi wiyasiya ibino tuputupu osiyodilole tanalamo me tanalo nawokaliminakoma:na:, ibino woko osiyodilole tanalo bilibilinomo magumulo a:da: osiyodilo tanalo kapiya idi kitana:. Ebema: iba:te eba kunu aimano Igilo Mula:leamedawa Godokono iyaiya iyatulame tanalo wadenomamo eba awokalilamenalo, epo bilibilinomate ebe tanalo wadewadenoma: begelanakoma:na:.

<sup>11</sup> Nanitabola, Godote ebene nilakapo tanalo ma kunu awokalimiya, ebete me opo epo bilibilinomono igilo ka:mula:lelaema: atamo ebema: piya. <sup>12</sup> Ebema: ebene nilakapo tanalote a niyatua:mena, ale kuba osiyodilole magumune ega:walo me opono kateneno ubi tanalone olobila:ote, a a:ka:tuwa: aimano tanalo wadenomamo eba ulamenalo Godokono tuputupu okoli tanalamo ebe kapiyatamo ba:tudila:onakoma:na:. <sup>13</sup> Eba kunu aimano Igilo Mula:leamedawa Ya:su Kelisokono Wade Egelanomote maigama: ale olowiolo bilukulinama:, mabu ebe tetelo ebete ebene alo kawonomago atamo nanitabolo ka:pemene, iyo, ebe aimano Kawodawa Godotela. <sup>14</sup> Nanitabola, ebete ebene igilo iyabaiamo a mabuma: ma kunu iyatiya, ebete aimano kuba osiyodilole tanalo bilibilinomo magumune ega:walo aimano tepo magumuno daleya wokino tanalone a wagaite, ale

ebeno eponomoma: eba eda:onalo aimano ubi kawonomo ebo biyatinama: wadewade tanalo kapiya kosiyodilolenama:.

<sup>15</sup> Ebema: naimano gudu, Godote kebe elawo kawonomo a:ma:tamo kikametiya, modobola a:ma:le tolea:no ebe elawamo me iyaiya tanalo wadenomamo eba iyatulamelo, tabo olowiopi magumulo wadewadepino woki kodakodailama:wete wiyasiya kuba osiyodilolepi kawiya gito nanale-nakiye. Iyo, a:imano osiyodilole tanalo bilibilinomo magumulo sosi epatamo gigiyu akoa:iyamidala:, ibi magumulo idite tabo ma kunu ako-geala: a:ma: sosi watodawa:.

### 3

#### *Nanitabokobi Midipino Tuputupu Ilukuli Tanalo*

<sup>1</sup> Ebema: Taitasi, ale Kuliti opono sosi epo dopamo kebe tanalo kiyatula:ima:, modobola a:ma: ebe atu tanalo ibi walo ma kunu nakanaliye, iba:te gabamanino iyaiya wokopino tabamo na:tudila:onakoma:na:. Ega:walo modobola iba:te nolosiyodilonakoma:na: wadewade tanalo bilibilinomo kosiyodilolema:, <sup>2</sup> ebene iba:te lumagi idino tanaloma: kuba tabo akogelala:, ega:walo epetapiago apaminatua:no milo ilukulipima: eba eda:onalo, ebe milo ilukuli tanalo iba:te epo bilibilinomatamo nawokaliminakoma:na:.

#### *Aimano Igilo Mula:leame Tanalo*

<sup>3</sup> Nanitabola, ale dopamo daedale woki magumulo eba ilukulinalo, Godotamo tudila:oa:no ele gabo gito odidiyama:. Numa:, ebe tetelo a a:ka:tuwa: a kalakalakobi midilima: ale aimano kateneno iyaiya ubi tanalamo tudila:onakima:, ebene aimano ilukuli magumulo iyaiya kuba osiyodilole tanalate eba tabokaonalo, ale epetapino inamabu bilibili uwate mabuma: iba:tamo ebo dowakonakima:, iyo, epetapino dowa magumulo iba:te ago gowelaoma: eba wagenalalo ale atumu iba:go gowelama: kowagelena:ma:. <sup>4</sup> Wiyasiya kalakala kawonomola, aimano Igilo Mula:leamedawa ebe Godotela, iyo, ale aimano iyaiya modoboa: tanalo magumulo eba ilukulinalo ebene wade walubi tanalote ebene nilakapo kimalagidilo tanalago atamo nanitabola a:pemaigiya. <sup>5</sup> Ebema: a a:ka:tuwa: aimano elawamo kebe kapiyakapiya wadewade tanalo kosiyodilolenakima:, ebete ebe osiyodilole tanalamo a kowalubiya:, ao, ebete wiyasiya ebegodolo ditana ebe nilakapo tanalo kapiyanomamo aimano igilo a:mula:leamiya. Numa:, ebene Uliyanate aimano tepo magumuno daleya ukulaoleamelo elawo atamo ikaeamiya ale ebene oli igilamo kawokalaoma:, ebema: Godote ebe gabodo ebene igilo mula: tanalo atamo gito ikaeamiya. <sup>6</sup> Iyo, ebete aimano Igilo Mula:leamedawa Ya:su Kelisodo ebene Uliyanano elawo kawonomo aimano tepo magumamo adipaniya, <sup>7</sup> mabu ebete ebene ubi ma kunu iyatiya, ebete ebene nilakapo tanalodo a tuputupupima: midite, ebene ale ebegodone laema: olowiololo demakopelenama: ebe uwomua: igilote atamo nanitabonomolo ka:pemaigamene. <sup>8</sup> A:ma: numa:, me iyatulame tabo ebe nanitabonomola.

#### *Polote Taitasikono Woko Osiyodilo Tanaloma: Tabo Da:kiyawaiya*

Naimano gudu, na ubila piyate ibino nanitabokobi midi tanalo Godotamo dalomiya, a:ma:le ibi me iyaiya tanalo wadenomamo niyatulamiye, ebene iba:te ibino ubi kawonomamo niyatinakoma:na: epo epetapi kowalubilima: iba:te ibino ilukuli magumune wadewade tanalo kowaulatelema:, iyo, ebe gabodo epo epetapi bilibilinomate naimano iyatulame tanalone wadewade walubi tanalo kuwatema:na:. <sup>9</sup> Wiyasiya modobola a:ma:



epono daedale apaminateui tanalone gito nolobigiye, ma kunu Yu epono ewonino mailo iyatulame tanaloma:, ega:walo Godote Mosesedo epatamo dikalamiya, a:ma:le ebe iyaiya Totomu Tabono waminale magumu tanaloma: anagiyamida woki epatamo ikalamea:no iba:go akoapamina-teua:la:. Nanitabola, ebakobako tabo gela magumune wade walubi tanalo idi kemaiganakoa!<sup>10</sup> Ebema: nanitabokobi midipi magumulo dubu idite apaminateui tanalamo ibi anagiyamidalema: dowagelenako, modobola a:ma:le ebe kapiya o netewa teta:mo kawonomamo naniye ebete ebe tanalo katepama:. Ebete wiyasiya a:imano tabo olowia:no atu kuba osiyodilo da:kowagilimene, ebe tetelo sosi epate ebetamo talena niyatima:na: ebete ibino aladabuti tanalamo walo akopa:la:.<sup>11</sup> Nanitabola, ebako dubuno osiyodilo tanalone a:ma: kiyatawama:ta, ebete ebenu tepo magumulo Godokono nanitabo tanalone iyalo olobigi, iyo, ebe a:ka:tuwa: ebenu kuba osiyodilole tanalodo me tanalo awokalimina, ebete kuba wiya nanitabonomolo ke-laemene.

*Polote Leta Uwomu Apulo Iyaiya Tabo Da:kiyawaiya*

<sup>12</sup> Ebema: Taitasi, a:ma: numa:, tete tatalila na Polote Atimasiko o Tikikasiko ibi magumulo idi kapiya a:ma:tamo kapalibomamo, ebene ebete a:ma:tamo ela ami tanalo ikama:tepama: da:pemene, modobola a:ma: na unaema: Nikapolasi duliyomolamo pe gabo samonomamo nosiyodiliye, mabu nale nopo ma kunu iyatimo opono giba teteno uwomu teta:mo me duliyomololo kokolima:.<sup>13</sup> Ebene Apolosiko ega:walo gabamanino totomu iyatawadawa Sinasiko ibi netewapiate natamo atumu ka:ka:pemaima:, modobola a:ma: ibi wadenomamo nowalubiliye, iyo, ibino pe gaboma: kebe modoboa: tanalate da:pola:lamena ebe tanalo a:ma: nilakapolo gito na:tuputupuilamiye.

<sup>14</sup> Ega:walo me tanalo idila. Amano nanitabokobi midipiate Kuliti opolo dilukuliona, modobola a:ma: ibi na:totomulatiye, iba:te ibino ilukuli magumulo mani woko kekekele eba osiyodilolelo ibi a:ka:tuwa: ibino iyaiya modoboa: tanalo nulamenakoma:na:, ebene tete epetapilo iba:te iyaiya gabo atumu ka:kulaema:na: wadewade tanalo epetapiatamo kosiyodilolema:. Iyo, modobola iba:te ibino woki kawonomamo niyatinakoma:na: eba kunu kowagelenama:, iba:te ibino ilukuli magumulo damolama: eda:okapoma:.

<sup>15</sup> Ebema: piyate nagodolo dilukulina, ibi bilibilinomate ibino nilakapo tabo a:ma:tamo paliba, ebene Kuliti opolo piyate Godoko nanitabokobi midi magumulo a demalagidiloena, modobola a:ma: amano nilakapo tabo iba:tamo na:kiyawaiye.

Modobola Godokono nilakapo tanalote la: bilibilinomagodolo nitanamene. Me ebe naimano tabo uwomula. Taula.

## POLOTE LETA PAILIMONITAMO OSIYODILIYA

<sup>1</sup> Na ebe Polotela, nale Ya:su Kelisoko mabuma: idoko motolo okolinamo. Na ega:walo a nanitabokobi midipino ekawi Timotiko, ale me leta a:ma: Pailimonitamo paliboma:. Nanitabola, a:ma: aimano wade lumaginomolata ega:walo a:ma:le ago Godokono woko bosiyodilonata. <sup>2</sup> Ebene la: sosi epo piyate Pailimonikono motolo daladabuta:wenakoma, ega:walo a nanitabokobi midipino naniko A:piyako, ega:walo Saitanatamo gowelao tanalo ago kapimiya dosiyodilona ebe dubu Akipasiko, ale la: bilibilinomatamo atumu me leta paliboma:.

<sup>3</sup> Modobola aimano Nabiwi Godoko ega:walo Kawodawa Ya:su Kelisoko, iba:te ibino nilakapo tanalo ega:walo milo tanalo la:tamo nikalaema:ta.

### *Polote Pailimonikono Tanaloma: Kalakala Tabo Da:kiyawaiya*

<sup>4</sup> Naimano wade lumagi Pailimoni, nale damamatenakomo ebe Godotamo towetowe tabo eba kiyawaolo a:imano tanaloma: nale kalakala tabo ebetamo adipatenakomo. <sup>5</sup> Iyo, naimano kalakala bitana mabu a:ma:le Godokono epo bilibilinomo nilakapolo demalagidilola:wena ega:walo a:ma:le Kawodawa Ya:suko nanitabokobi midi magumulo kodakodalo duta:wena, nale ebe netewa tanalo olowionakomo. <sup>6</sup> Ebene nale Godoko ma kunu toweomenakomo, a:ma:la, ala, ale nanitabokobi midi magumulo kapiya eponomoma: deda:onama:, ebe tanalone ale Kelisoko magumulo eba ilukulinalo kebe wadewade tanalo Godogodone kuwatenakoma:, a:ma:le ebe tanalo bilibilinomo wadenomamo kiyatawaema:. <sup>7</sup> O naimano wade ekawinomo, nanitabola, a:ma:le epo epetapi nilakapolo eba malagidilolenalo ibino tepo magumuno mibomibo woki dopoliyalelama:wenaka, nale ebe tanalo dolowimo naimano iyaiya temeteme magumulo kawo gelebadi tanalo ega:walo kalakala tanalo ebo uwatimo!

### *Polote Pailimoniko Daniya Ebete Onisimasiko Kalakalago Kelaema:*

<sup>8</sup> Ebema: a netewapi Kelisoko nanitabokobi midi magumulo eba okolinalo ebena modobo elawote na Pologodolo bitana, iyo, talena kitana: nale naimano ubi tanalo awokalimite a:ma: kawonomamo kanatama:, ma kunu a:ma:le naimano ubi tanalamo gito ka:tuduwataema:. <sup>9</sup> Wiyasiya nale a:ma: nilakapolo demalagidilotanama, ebema: a:ma:le naimano ubi tanalo osiyodiloma: nale a:ma: kawiyaka akanatama, ao, na wiyasiya a:ma: gelebadi gabodo toweoemata. A:ma: numa:, na Polotela, na kadelema: eba eda:nalo Ya:su Kelisoko mabuma: idoko motolo okolinamo, ebema: a:imano nilakapo natamo nanitabolo ditana, modobola ebe tanalo awokalima: a:ma: naimano towetowe tabono tanalamo na:tuduwatiye.

<sup>10</sup> Ebema: namutudawa, nale Onisimasiko\* mabuma: a:ma: toweoemata, mabu nale me idoko motolo eba okolinalo ebete nanitabokobi midi magumulo naimano gudu idima: edi. <sup>11</sup> Dopamo ebete a:imano motolo eba okolinalo, diyala, tete epetapilo ebete ebena woko osiyodilo magumulo

\* **1:10:** Me Onisimasikono mailono magumu nitana 'Wadewade Tanalo Osiyodilole dawala.' Ebete dopamo Pailimonikono wiya: wokodawama: eda:nami, wiyasiya ebete Pailimonitamo da:dowiya, ebe tetelo ebete pilo tanalo osiyodilote ebegodone Loma kawo duliyaomolamo gito alauliya. Ebete ebola eba nokolilo egela idilo Polago danalugiya ebegodone Ya:sukono Wade Tabo olowite nanitabokobi mididawama: ebo ediya.

wadewade tanalo a:ma:tamo kosiyodilolenakia:. Ka:lo wiyasiya ebete oli lumagima: eda:na, ebema: na iyatawala me tetene wagilimite ebete a:ma:tamo ega:walo natamo wadewade tanalo kapiya nanitabolo bosiyodilolenakomene.

<sup>12</sup> Ebema: numa:, nale naimano oli gudu a:ma:tamo palibomo. Naimano tepo magumuno nilakapo tanalote ebetamo ditana beda: kawonomola:ka:, <sup>13</sup> ebema: na ubi ma kunu iyatimo, Ya:sukono Wade Tabo mabuma: Onisimasite nago me idoko motolo eba okolinalo natamo wade walubi tanalo kiyatinama:. Nanitabola, a:ma: mululo eba okolinalo a:ma: modoboa: walubi tanalo natamo iyatima:, ebema: kuba: a:imano wokodawate a:imano gobebobo pelawete na niyakabolo eba okolilo naimano iyaiya modoboa: tanalo kosiyodilolemene. <sup>14</sup> Wiyasiya nale woki eba kunu eba iyatitalo ebe a:ma:tamo paliboma: kamoedita:, mabu na ubia:nola a:ma:le modobo tabo gea:no ebete na gito walubininama:. Ebema: a:ma:la, nala, ale me guduno tanaloma: woki kapiyama: eda:oa:no, nale ebe kodakodalo atila:nama: modoboa:.

<sup>15</sup> Diyala, Godote Onisimasikono tanaloma: ubi ma kunu da: iyatile, ebete a:ma:godone alaula:te tete da:pesolo a:ma:godolo okolia:no duliyo molo idilo ka:nokoliatepama:, wiyasiya kalakala kawonomola, me tetelo ebete a:ma:tamo walo da:ka:pemene ebete a:ma:godolo tete geyageyanomolo bokolinamene, mabu nanitabola, me tetelo la: netewapiate nanitabokobi midi magumulo kapiya alailaema: eda:namata. <sup>16</sup> Ebema: me tetelo a:ma:le ebe a:imano wiya: wokodawama: degeawena, modobola a:ma: atu tetelo ebe a:imano nanitabokobi mididawa ekawi idima: eba ka:minalo ebe nilakapolo nemalagidilona. Nanitabola, Onisimasiko mabuma: naimano kalakalate kawonomoma: eda:na, wiyasiya a:ma:le ebe walo da:kuma:emene, ebe tetelo a:imano kalakala tanalote nagodolo ditana ebe kalakala nanitabolo kodolimene, mabu ebe a:imano wade wokodawala ega:walo ebe Kawodawa Ya:suko magumulo a:imano ekawima: eda:na.

<sup>17</sup> Ebema: a:ma:le na Kelisoko magumulo a:imano wade namutudawama: deka:na:miawena, modobola a:ma:le Onisimasiko kawo kalakalanomago nelawiye, nale a:ma:tamo da:pemo ebe tetelo a:ma:le na keba kunu na:kelawena:emene eba kunu.† <sup>18</sup> Ega:walo ebete alaula:no, diyala, dopamo ebete kuba idi a:ma:tamo da: osiyodilile, ma kunu ebete pilo tanalo dosiyodili, modobola a:ma: wiyasiya ebe kuba naimano kubama: na:midie, ebema: nanitabola, ebe tanalo walone na a:ka:tuwa: ka:pa:tupugaimamo. <sup>19</sup> A:ma: numa:, lumagi idite na mabuma: me leta tabono iyaiya tanalo eba akulolelo, wiyasiya na Polote naimano nanitabo tanalo awokalima: na a:ka:tuwa: naimano kotamo me kapiya tabo akulolemo, nale Onisimasikono kuba osiyodilo mabuma: a:ma:tamo nanitabolo ka:pa:wiyamamo. Wiyasiya a:ma:le na ebe tanalo wiyakobi ka:midima: ananea:no ebene kuba osiyodilo tanalo gito degebolema:emene, kuba:, mabu a:ma: nanitabolo iyatawalata, nale dopamo kebe walubi tanalo kawonomo a:ma:tamo diyatimo, iyo, nale Ya:sukono tanalo a:ma:tamo eba awokalimilo a:imano igilo mula: gabo ebo iyatumiyamata. <sup>20</sup> Ebema: naimano ekawi, na ubila a:ma: me nilakapo tanalo Kawodawa Kelisoko mabuma: natamo nosiyodiliye, ebene nale ebe magumulo eba okolinalo naimano iyaiya temeteme tanalo malagidilolea:no

† **1:17:** Poloko tetelo Loma Gabamanino totomu tabote ma kunu itanami, kebe wiya: wokodawate ebene woko namutudawagodone dalaula:mene, ebe dubute ebe walo da:kuimene, ebene kuba osiyodilo mabuma: talena puliyala ebete ebe anakapuima:. Ebema: Polote ebe tanalo eba malagidilole Pailimoniko naniya, ebete Onisimasikono kuba egebolemete ebe kalakalago nelaemene, elawagoa:.

gelebadi woki ebo kelaemamo. <sup>21</sup> Nanitabola, na niyatawitamo a:ma:le naimano tabo Onisimasiko mabuma: duma:emene ebo ka:tuduwatama:ta. Iyo, a:imano nilakapo natamo kawonomola, ebema: na iyatawala a:ma: me kapiya ubi tanalamo a:ka:tuduwataemene, wiyasiya nale me leta magumulo kebe iyaiya ubi tanalo kawokalilamita:, a:ma:le ebe tanalo bilibilinomamo atumu ka:ka:tuduwatama:ta.

<sup>22</sup> Ega:walo me kapiya tanalo idila. La: Kolosi sosi epate Godoko da:toweoma:wenakoma ebete na idoko moto gune kowaunatenema:, nale ebe wade tanalote ebegodone ka:pemaigama: kalakalago makopelenamo. Ebe tanalote demaigamene nale a:ma:tamo nanitabolo ka:pemamo, ebema: modobola a:imano motolo tete nosiyodiliye nale a:ma:go ka:pokoliatepama:.

*Polote Leta Uwomu Apulo Iyaiya Tabo Da:kiyawaiya*

<sup>23</sup> Idoko motolo nago dokolina ebe dubu Epa:palasite ebene nilakapo tabo la:tamo palibo, <sup>24</sup> ebene piyate malo woko nago dosiyodilona, ibi Makako, A:listakasiko, Dimasiko, ega:walo Lukuko, miba:te atumu nilakapo tabo la:tamo kapaliba.

<sup>25</sup> Kawodawa Ya:su Kelisokono nilakapo tanalote la:imano tepo magumulo nitanamene. Me ebe naimano tabo uwomula. Taula.

## **GODOKONO WOKODAWATE LETA YU EPO NANITABOKOBI MIDIPIATAMO OSIYODILIYA**

### *Godokono Tabote Ebene Gudugodone Atamo Da:pemaigiya*

<sup>1</sup> Dopamo Godote a Yu epono ewoniatamo iyaiya gabo epetapido tabo kiyawaonaki, iyo, ebe tetelo ebete ebene woki awokalimipido ebene ubi tanalo awokalilamenaki. <sup>2</sup> Wiyasiya a walone gudi tetelo me opono uwomu tetete eba tatalilo, ebete opo lumagi idido tabo paliboa:ne ebene Gudugodone atamo tabo a:pa:kiyawaiya. Nanitabola, dopamo ebe Gududo ebete tobolo unu ega:walo me opo kawonomo osiyodiloliya, ega:walo ebete ebe elawiya me opono uwomu tetenomolo tanalo bilibilinomono Ulamedawama: keda:ma:. <sup>3</sup> Ebene ebe Gudu ebe Godokono kawo alonomono amama tanalola, ega:walo ebete Godoko modoboma: eba eda:nalo ibi netewapi kapiyanomola. Nanitabola, tobolo unu ega:walo me opono inamabu bilibilinomate wadenomamo ka:pola:nama:, ebete ebene elawo tabonomamo ibi nulamena.

### *Godokono Guduno Elawote Ebene Nopopino Elawo Nodoilina*

Numa:la:, ebe Gudute epono kuba osiyodilole tanalo kegebolelaema: gabo dosiyodiliya, ebete ebe tanalone Unu Duliyomolamo odolote, potele ebolo Kawo Elawodawanomoma: deda:na ebe Kawodawano tumudi apuamo gito nokoliya. <sup>4</sup> Ebema: Godote ebene Gudutamo kebe mailo kikamiyale, ebe mailote Unu Duliyomolono nopopino mailo bilibilinomo keba kunu kodoilinale, eba kunu Guduno elawote ibino elawo atumu na:kodoilina, mabu Nabiwite ebe Kawodawama: ka:midima: nanitabonomolo ebe ebema: lawiya.

<sup>5</sup> Nanitabola, Godokono nopopi bilibilinomo magumulo ebete idi kapiya ma kunu kaniya:;

“A:ma: naimano Gudunomolata,

ka:lo na a:imano Nabiwima: eda:mo.”

Ega:walo Godote ebene nopodawa idino tanaloma: ma kunu kegiya:;

“Nale ebene Nabiwima: eba eda:nalo,

ebete naimano Gudunomoma: beda:namene.”

<sup>6</sup> Ebema: numa:la:, Godote ebene dopo Gudunomo me opamo paliboma: dolosiyodiliya, ebe tetelo ebete ebene tanaloma: tabo idi ma kunu kegiya,

“Modobola naimano nopopi bilibilinomate ebe namamatema:na:.”

<sup>7</sup> Ebene ebene nopopino tanaloma: Godote tabo ma kunu giya,

“Nale naimano nopopi awa popimu a:midilinakomo,

iba:te naimano ubi tanalomo tudila:olo

iyaiya ka:tolaema:.

Iyo, nale ibi ela menamu eba midilinalo,

iba:te naimano iyaiya woko bosiyodilolenama:na:.”

<sup>8</sup> Wiyasiya Godote ebene Guduno tanaloma: ebetamo negiya,

“A:ma: nani Godoma: eba eda:nalo,



a:imano Kawo Elawodawano tanalote  
uwomua: uwomua: tetelo bitanamene.  
Ebema: a:ma:le a:imano epono tanalo  
tuputupu woki kapiyamo banagilamelelamenakoma:ta,  
<sup>9</sup> ega:walo a:ma: kuba tanalo osiyodiloma: ubia:noma: eba eda:nalo,  
wadewade tanalo kapiya osiyodilolema:  
ubi kawonomamo iyatinata.  
Me mabuma: potele a:imano Godoma: deda:na,  
ebe Kawodawate me opo epo epetapi uwatea:no  
a:ma: kapiya elawiyata,  
iyo, ebete kalakala tanalo kawonomo  
a:ma: unamo adipaniya,  
a:ma:le ebe kalakalago  
Kawo Elawodawano okoli bailo kokoliawitama:.”

<sup>10</sup> Ega:walo tete idilo Godote ebene Gudutamo tabo ma kunu kegiya,

“Potele wagilimi mabune tobolo unu  
ega:walo me opo kawonomo  
ebene kotamo dosiyodiloliya,  
o Kawodawa, a:ma: ebe Elawodawanomolata.  
<sup>11</sup> Nanitabola, a:ma:le dosiyodilola:wiya  
ebe inamabu bilibilinomate a:ka:tuwa: kolopoligoma:na:,  
pupuliono inamabuate keba kunu ka:kubakubaonakole eba kunu,  
wiya:siya a:imano tanalo eba kunu,  
a:ma: uwomua: tetelo bokolinama:ta.  
<sup>12</sup> Iyo, me opono inamabuate kolopoligoma:,  
a:ma:le a:imano ubilo  
ibi bilibilinomo iyabaiamo gito kalomoma:ta,  
lumagite oli kaliku pulima: ebene tagala kaliku  
iyabaiamo keba kunu kiyatinakole eba kunu.  
Wiyasiya a:ma: iyakobi a:kolowiaemene,  
mabu uwomua: uwomua: tetelo  
a:imano igilote a:kolopoligonamene.”

<sup>13</sup> Ega:walo me tanalo idila. Godote ebene nopopi bilibilinomo magumulo  
idi kapiya ma kunu kaniya;

“A:ma: Kawo Elawodawama: eba eda:nalo,  
modobola a:ma: naimano tumudi apuamo na:pokoliya,  
ebene a:ma:go gowelaopi  
nale ibi a:imano agowa puti baima: ka:midilimamo.”

<sup>14</sup> Ebema: numa:la:, Godokono ubi tanalote ebene nopopiatamo keba  
kunu kitanale? Nanitabola, ebe uliyanate ebe eba amamatenalo, ebete ibi  
iyaiya alibolenako, piyate igilo mula: tanalo ebegodone delaema:na: ebe epo  
wadenomamo ka:nowalubilinama:.

## 2

### *Kawodawate Epono Igilo Ka:mula:lema: Wade Tabo Da:kiyawaiya*

<sup>1</sup> Ebema: ebe tanalo eba malagidilolo modobola ale kebe  
iyaiya nanitabo tanalo kolowiyama:, ebe tanalo kodakodanomolo  
kowatila:mota:namalema: ale ele gabo idi odidikapoma: <sup>2</sup> Numa:la:,

Godote ebeno nopopido kebe iyaiya Totomu Tabo a Yu epono ewoniatamo dikalamiya, ebete ebeno ubi iyatiya iba:te ebe tabamo nanitabonomolo ka:tudila:onama. Ebe mabuma: ibi magumulo piyate tudila:oa: no pukala idi dadikanaliya, ebako epate ebegodone ibino modobo wiya gito uwatenakiya. <sup>3-4</sup> Wiyasiya a tetelo demaigiya, ebe igilo mula: tabono elawote dopo tabono elawo nodolina. Kawodawa Ya:sute da:piya, ebete ebe oli tabo a:ka:tuwa: pa:kiyawaiya, ebene piyate ebeno tabo dolowiya, iba:te ebe tabono nanitabo tanalo atamo eba pawokalimilo, Godote iyaiya anoano tanalo bilibilinomo ebo osiyodiloliya ale ebe tabo nanitabonomoma: ka:midima:. Ega:walo ebe atu tetenomolo Godote ebeno ubilo ebeno Uliyanano iyaiya elawo atamo gito ikaemiya ale nanitabokobi mido magumudo ebeno woko kosiyodilonama:. Me mabuma: ale ebe wade igilo tabo ubia:noma: deda:oma:, ale Godokono dowo tanalone keba kunu nakalautioma:? Gaboa:nola, aimano kuba wiyate atamo nanitabonomolo ka:pemene!

*Ya:sute Aimano Igilo Mula:leamedawama: Deda:na*

<sup>5</sup> Numa:la:, Godokono Kawo Elawodawano oli opote atamo nanitabolo da:pemene, nale ebe opono tanaloma: kiyawautamo, me tagala opono tanaloma: ka:kiyawauta:. Nanitabola, ebete ebeno nopopi kalomiya: iba:te ebe oli opolo kawokawo elawodubuma: keda:onama:. <sup>6</sup> Wiyasiya Godote ebeno Kawo Elawodawano gobebobo potamo ikaema: ubi diyatiya, ebeno Buka apuapuno tabo bilibilinomo magumulo tabo idite ebe tanalo ma kunu awokalimina,

“O Godo, a:imano nilakapo beda: kawonomola:ka:!

A:imano elawo kawonomoma: eba eda:nalo,  
mabu keleka: a:ma:le me opo epo demalagidilola:wena?

Iyo, a:ma:le ibi beda: mabuma: ka:nilakapoilama:wena?

<sup>7</sup> A:imano elawo modobolo itana  
epo gito ka:kubailaema:,

wiyasiya ibi me opamo a:ma:le alomiyata,  
iba:te tete da:pesolo

a:imano nopopino ulame magumulo ka:pola:nama:.

Ebene a:ma:le kebe tete wadenoma: degeawiyala,  
ebe tetelo ibi unamo owadipalateliyata,

iba:te a:imano kawo alonomono magumulo eba ilukulinalo

<sup>8</sup> me opono tanalo bilibilinomate  
iba:tamo ka:tudila:onama:.”

Ebema: nanitabola, me Buka tabote ma kunu gena, Godote epo alomiya me opono tanalo bilibilinomo ulamepima: keda:onama:. Wiyasiya me tetelo ale ebe tanalo nanitabolo kuminakoa:, iyo, me opono tanalo bilibilinomate epono ubi tanalamo nanitabolo ka:tudila:ona:. <sup>9</sup> A wiyasiya wade tanalo idi numinama:, ebe tanalo ebe Ya:sukono Kawo Elawodawano tanalola. Nanitabola, ebete me opamo da:piwisigiya, tete da:pesolo Godokono nopopino umi magumulo eba pokolinalo, ebete Godokono nilakapo tanalodo epo bilibilinomono kuba osiyodilole mabuma: ebo a:iya, iyo, ebete a:e magumulo kawokawo temeteme duwatiya, ebe mabuma: Godote ebe unamo adipatiya ebete ebeno kawo alonomono magumulo kokolimana:.

<sup>10-11</sup> Numa:la:, Godoko ebe potele inamabu bilibilinomo dosiyodiloliya ebe Elawodawala, ebene ebe inamabuate ebe kowalogonama: ebeno igilago

pola:na, ega:walo Ya:suko ebe potele epo ebenu kawo alonomo duliyo-  
lamo demagatalena ebe Kawodawala. Ebema: Godote ebenu temeteme  
tanalodo ebe wadedawanomoma: eba midilo, ebete tuputupu tanalonomo  
ebo osiyodiliya, mabu eba kunu ebete gigiyu a:iyamidiya epo epetapi  
bilibilinomo ebetamo kemagaelema: Iyo, nanitabola, Ya:suko ebe potele  
epo Godokono talena gudima: eba midilinalo ibino iyaiya kuba osiyodilole  
tanalo degebolelamena ebe Nilakapodawala, ebema: piyate ebe gabodo  
talenapima: deda:iya, iba:te Ya:suago kapiya alailaema: eba eda:onalu, ebete  
ibi ebenu ekakima: ka:la:ima: ilipokobi kolowina. <sup>12</sup> Ebe mabuma: ebete  
Godokono Bukalo ma kunu gena,

“O Godo, naimano ekakiate a:ma: amamatema: daladabutinaka,  
nale ibino dopo apulo  
a:imano mailo unamo eba adipatelo  
a:imano wadewade tanalo ebo bawokalilamenakomo.”

<sup>13</sup> Ega:walo tete idilo ebete tabo ma kunu kegena,

“Nale naimano nanitabokobi midi tanalo Godotamo iyatinamo.”

Ebenu ebete ebe tabo moga:melo walo na:kegena,

“Piyate nago Godoko nanitabokobi da:midina,  
ebete ebe epo natamo gito ikanamiya,  
iba:te naimano gudima: keda:onama:.”

<sup>14</sup> Numa:la:, me ebenu kapiya alailame epate me opolo ilukuliona,  
ebe mabuma: Ya:sute ebenu ubilo me opono lumagi idima: eda:te me  
opamo ebo pawokaliya epono iyaiya temeteme ega:walo modoboa: tanalo  
wadenomamo ka:piyatawaoma: Kalakala kawonomola, ebete ebenu ubi  
ma kunu iyatiya, ebete ebenu a:e tanalodo Kubadawano elawo kanaka-  
puima:, mabu dopamo tete geyageyanomolo ebe dawate a:e wiya me opo  
epatamo ikalamenaki, <sup>15</sup> iyo, piyate uwomua: tetelo ibino a:elao tanaloma:  
da:toletoleonamiya, Ya:sute ubi iyatiya ebe epo tole tanalono elawo magu-  
mune kowagailima:

<sup>16</sup> Ebema: Ya:sukono osiyodilole magumulo a me tanalo uminama:  
ebete Unu Duliyo molono nopopi walubilia:no A:ibalayamakono walone  
gudi kapiya walubilinako. <sup>17</sup> Me mabuma: me opolo piyate Ya:sukono  
ekakima: deda:ona, ebete ibino olonomoma: nanitabonomolo ediya,  
iyo, gabo idite kitaniya: ebete epono kuba osiyodilole tanalo ege-  
bolelamete ka:dodolomatililaema: Numa:la:, ebete me opo lumagima:  
dediya, ebe mabuma: ebe Godotamo kalimagono ikameopino Watodawa  
kapiyanomoma: eba eda:nalo, ebete me opo epo nilakapolo kowalubili-  
nama: Godotamo woko modobolo osiyodilonako. <sup>18</sup> Iyo, Saitanate kebe  
epo kuba gabamo kowabuga:talnakole, Ya:suko ebe modobola ibi waden-  
omamo kowalubilinama: mabu dopamo ebete me opolo dokolinami, ebete  
atumu iyaiya tete epetapilo kuba gabamo wabuga:ta tanalodo temeteme  
iyatawanaki.

### 3

*Ya:sukono Elawote Mosesekono Elawo Nodolina*

<sup>1</sup> Ebema: naimano ekakiala:, Godote la: kebe epo ebena talenapima: eda:oma: nago deka:la:mitiyala, modobola la: Ya:sukono tanalo wadeno-mamo nemalagidilala:. Ale kebe tabono iyaiya tanalo Godokono nanitabo iyatulame tanaloma: da:midilinama:, Ya:sute ebe tabo aimano tepo magumulo na:kodakodailamena. Iyo, ebe Godote a kowalubima: dapalibiya ebe dawala, mabu ebete ebena kalima ikame tanalodo aimano kuba osiyodilole tanalo egeboleamenako, dopamo Godotamo kalimagono ikameopino Watodawate a Yu epo keba kunu kowalubinakile eba kunu. <sup>2</sup> Nanitabola, potele ebe wade woko kosiyodiloma: ebe delawiya, Ya:sute ebe Kawodawano ubi tanalo bilibilinomamo a:tuduwatiya, dopamo Mosesete Godokono epo bilibilinomo kowalubilinama: ebetamo nanitabo woko dosiyodilonami eba kunu.

<sup>3</sup> Numa:la:, lumagi idite wade moto detemene, epate umite ebe moto muloma: a:kegelama:na:, wiyasiya iba:te moto etedawa kapiya mulodawama: keka:ima:na:. Ebema: nanitabola, Ya:sute Godokono wade motonomo etedawama: eba eda:nalo, modobola ale ebe ununomamo kadipatiye, wiyasiya ale Moseseko unamo akadipatema: mabu ebete Godokono moto ketiya:, ao, ebe motolo dilukulina ebe kapiya alailame magumulo ebe idima: eda:na. <sup>4</sup> Ega:walo me tanalo idi a iyatawala, kebe iyaiya motote da:pola:na, ibino iyaiya etemoteopi atumu ba:ka:pola:na, iyo, idi kapiyate a:ka:tuwa: kapawokaliya:. Eba kunu me opolo da:pola:na ebe inamabu bilibilinomo atumu iba:te a:ka:tuwa: ibino ubilo kapawokaliya:, wiyasiya Godote ebe inamabu ebena ubilo osiyodiloliya.

<sup>5</sup> Nanitabola, Godokono moto epo magumulo Moseseko ebe wade wokodawa idila, iyo, ebete Godokono ubi tanalo bilibilinomamo na:tuduwatanami. Ebe mabuma: Godote walone tetelo me opo epatamo kebe wadewade tabo da:kiyawaomene, Mosesete ebena woko magumulo ebe iyaiya tanalo dopamo awokalilamenaki. <sup>6</sup> Wiyasiya moto etedawa Ya:sukono tanalo eba kunua:. Ebe moto Namutudawano Gudula, ebema: piyate ebena motolo woko dosiyodilona, ebete ebe wokopi bilibilinomono Watodawama: eda:na, iyo, ebete ebe tanalodo ebena Nabiwino ubi tanalamo nanitabolo tuduwatanako. Ebema: me kawo tanalo numa:la:, kebe tetelo a nanitabokobi midipiate aimano wade wiya laema: olowiolo dilukulionama: ega:walo ale epetapino dowa tanaloma: tolea:no kodakodalo delamota:onama:, ebe tetelo a Godokono wade motoma: beda:onama:.

*Nanitabokobi Midia:piate Godogodone Wade Wiya Lawea: Tanalo*

<sup>7-8</sup> Ebe mabuma: Godokono Uliyanate ebena Bukalo ma kunu gena,

“La:imano ewoniate bulu opolo  
na Godotamo tudila:oma: ubia:noma: eda:iya,  
iyo, iba:te natamo wato kodakodanomoma: eba eda:olo,  
nale ibino kateneno ubi tanalo iba:tamo ikalamea:no  
iba:te ebo geliya na nani Godoa:.

La: wiyasiya naimano tabo ka:lo egelalo dolowiaema,  
iba:te dopamo keba kunu kowageliye,  
la: eba kunu akowagela:la:.

<sup>9</sup> Eiyel! Na Godote 40 ulamalo  
ibi kebe tanalamo kowalubilinakimo,  
iba:te ebe wadewade tanalo ulamenakiya,  
wiyasiya kebe tetelo  
nale ibino kuba wokino tanalamo tuduwata:no

iba:te ebo geliya na nani Godoa!  
<sup>10</sup> Ebe tetelo nale ebe epatamo dowate negiyamo,  
 ‘Iba:te na nanitabolo kowaloma:enena;  
 iyo, ibi ubia:nola  
 naimano Totomu Tabamo ka:tudila:oma.’  
<sup>11</sup> Ebema: naimano dowa magumulo  
 nani tabonomo ma kunu giyamo,  
 ‘Nale iba:tamo kebe opo ikalaema:  
 dopamo demalagidiliyamo,  
 na woki iyakobi midite,  
 ebene uwomua: uwomua: tetelo  
 iba:te naimano Wade Ela Ami Opamo a:ka:nopila:oma:na!’ ”

<sup>12</sup> Ebema: naimano nanitabokobi midipi ekaki, la: nanisiwale! Modoboa:  
 la: magumulo idite ebene tepo magumulo kuba kimalagidilo eba wagilimilo  
 Nani Igilodawa Godokono ubi tanalamo tuduwata:noma: eda:te ebegodone  
 da:bolobigamene. <sup>13</sup> Modobola la: wiyasiya egela bilibilinomolo la:imano  
 nanitabokobi midi magumulo epetapiate epetapi nowalubiinakiyala:  
 la: magumulo idite kuba osiyodilo tanalono a:da: elemasigi tanalamo  
 gate Godotamo wato kodakodama: eda:kapoma:. Nanitabola, Godote  
 ebene Bukalo degena lumagite ka:lo egelalo ebene tabo kolowima:, ebe  
 tabono magumu a bilibilinomo mabuma: itana. <sup>14</sup> La: numa:la:, a kebe  
 nanitabokobi midi tanalo wagilimi mabune delawiyama:, ale ebe atu tanalo  
 magumulo kodakodalo eba lamota:onalu uwomu apuamo da:nemaimioma:  
 ebe mabuma: Kelisote a bilibilinomo eba:go kapimiya woko osiyodilopima:  
 keka:imene.

<sup>15</sup> Iyo, me mabuma: Godokono Buka tabote ma kunu gena,

“La:imano ewoniate Godotamo wato kodakodanomoma: eba eda:olo,  
 ebetamo tudila:oma: ubia:noma: eda:iya.  
 La: wiyasiya ebene tabo ka:lo egelalo dolowiaema,  
 iba:te dopamo keba kunu kowageliye,  
 la: eba kunu akowagela:la:.”

<sup>16</sup> Ebema: Godokono tabo olowiote wiyasiya ebetamo ka:tudila:oma:  
 ubia:noma: deda:iya, ebe epo bilibilinomo piyatela:ka:? Ibi Mosesete Isipiti  
 opone Godokono elawamo dowagailiya ebe epola. <sup>17</sup> Ega:walo 40 ulamalo  
 Godote piyatamo da:dowanami, ibi piyatela:ka:? Ibi piyate bulu opolo  
 ebetamo kubakuba tanalo dosiyodilolenakiya ebe epola, iyo, iba:te ebolo  
 ebema: a:elaiya. <sup>18</sup> Ega:walo Godote wade opo ikalaema: piyatamo nani  
 tabonomo degiya, ibi piyatela:ka:? Ega:walo ebete woki iyakobi midite  
 ebe Ela Ami Opo uwomua: tetelo ikalaema: ubia:noma: eda:lo degiya,  
 ebe tabo ebete kebe epono tanaloma: kegiyale? Numa:la:, ibi piyate  
 ebetamo tudila:oma: ubia:noma: deda:iya ebe epola. <sup>19</sup> Ebema: ale me kawo  
 tanalo nanitabolo uima:, ebe epono nanitabokobi midia: mabuma: iba:te  
 Godokono wade opamo ka:nopila:oma: ka:modobiya:.

## 4

### *Godote Wade Ela Ami Opo Ebene Epo Mabuma: Dosiyodiliya*

<sup>1</sup> Ebema: numa:la:, Godote dopamo aimano ewoniatamo kebe tabo  
 nanitabolo kegiyale, ebe tabo ka:lo aimano tanaloma: bitana, iyo, ale ebene  
 Wade Ela Ami opamo ka:nopila:oma: ebete modobo gabo atamo ikaeamiya.



Ebe mabuma: modobola aimano ewonino tanalo eba malagidilolo ale tole tanalo lawete wadenomamo kilukulinamalema:, la: magumulo idite ebe Wade Ela Ami Opamo nopegama: ele gabo odidikapoma:. <sup>2</sup> Nanitabola, a me tetelo Wade Tabo keba kunu kolowiyama:, aimano ewoniate atumu dopamo Godokono tabo eba kunu olowiya, wiyasiya ibino tabo olowio tetelo iba:te wade tanalo ebegodolo kumiya: mabu ebena tabo nanitabokobi midi tanalodo kelawiya:. <sup>3</sup> Wiyasiya me tetelo a piyate Godoko nanitabokobi da:midinama: aimano tanalo eba kunua:, mabu a ebena Wade Ela Ami Opamo nanitabonomolo ka:nopila:omalema:, ebete atamo nani tabonomo keba kunu kegiyale eba kunu.

Nanitabola, Godote ebena ela ami tanaloma: ega:walo aimano ewonino tanaloma: me tabo dopamo egiya,

“Naimano dowa magumulo  
 nani tabonomo ma kunu giyamo,  
 ‘Nale iba:tamo kebe opo ikalaema:  
 dopamo demalagidiliyamo,  
 na woki iyakobi midite  
 ebena uwomua: uwomua: tetelo  
 iba:te naimano Wade Ela Ami Opamo a:ka:nopila:oma:na:!’ ”

Numa:la:, Godote me tabo gea:no, dopamo ebete tobolo unu ega:walo me opo kawonomo iyalo tetenomolo osiyodilolete, ebe woko osiyodilo tanalo sebeni egela tetelo dopoliya ela ebo amiti. <sup>4</sup> Iyo, nanitabola, Godokono Buka tabono tanalo bilibilinomo magumulo sebeni egelano tanaloma: tabo idi ma kunu itana, “Godote ebena woko bilibilinomo opoliyaotele sebeni egela tetelo ela amiti.” <sup>5</sup> Ebena ale me tanalo uima:, Godokono Bukalo ebena ela ami tanaloma: tabo idi ma kunu kitana, “Uwomua: uwomua: tetelo iba:te naimano Wade Ela Ami Opamo a:ka:nopila:oma:na:.”

<sup>6</sup> Numa:la:, dopamo tetelo piyate Godokono Wade Tabo dolowiya, iba:te nanitabokobi midia:no ebena tabamo ka:tudila:iya:, ebema: iba:te ibino wade tete anaetoamidate ebena ela ami tanaloma: ka:nopila:iya:. Wiyasiya kalakala kawonomola, me tetelo gigiyute a:iyamidalo itana epetapiate ebe atu ela ami tanaloma: nanitabokobi midi tanalodo ka:nopila:oma:. <sup>7</sup> Me tanalo ma kunula, ulama bilibilinomo epetapiate da:petolamiya Godote dopo epono wade tete anaetoamida tanalo eba malagidolonapelo, ebete epo epetapi mabuma: walo egela idi a:kiyatiya, ebe egela ebete ka:lo egelama: gena. Nanitabola, ebena Bukalo kebe tabote ebe egela idino tanalo dawokalimina ale dopamo uima:, iyo, Godote ebe tabo Da:ibidido ma kunu giya,

“La: wiyasiya ka:lo egelalo Godokono tabo dolowiaema,  
 ebetamo wato kodakodanomoma: akoeda:oala:!”

<sup>8</sup> Ebema: numa:la:, piyate Godokono dopo tabo dolowiya, ebena woko-dawa Yosuwate ibi nanitabo ela ami tanaloma: nemagataliyataleka:, Godote walone tetelo wade egela idino tanaloma: Da:ibidigodone a:kegiyana:. <sup>9</sup> Ebe mabuma: a me tanalo iyatawala, nanitabo ela ami tanalo idi Godogodolo bitana ebete ebena epatamo kikalaema:, iyo, ebete sebeni egelalo ebena woko osiyodilo tanaloma: ela keba kunu kamitiyale, ale eba kunu ebe atu ela ami magumamo ka:nopila:omalema:. <sup>10</sup> Ebema: nanitabola, kebe lumagite Godokono Nanitabo Ela Ami Opamo da:nopegamene, ebete ebena

woko osiyodilo tanalone ela ebo kanaimene, Godote dopamo ebeno woko osiyodilo tanalone ela keba kunu kamitiyale eba kunu. <sup>11</sup> Ebema: modobola a nanitabokobi midipiate woko osiyodilo magumulo elawonomoma: keda:omalema:, ale ebe Ela Ami Opamo nanitabolo ka:nopila:oma:, mabu piyate Godokono tabo dopamo dolowiya, iba:te ibino nanitabokobi midia: tanalodo ele gabo keba kunu ka:nodidiye, a bilibilinomo magumulo kapiya idite eba kunu negama: modoboa:.

<sup>12</sup> Me tanalo nanitabola, Godokono tabote eba igilonalo epono tepo magumulo woko elawonomamo osiyodilona, ilo kiyoiyo gilinomo keba kunula:ka: eba kunu, iyo, ebeno ilote gowelaono gili epetapi bilibilinomono ilo nodoilina. Ebema: Godokono tabote lumagino woki mabuamo opeganomo opeganako, ebe lumagino tepo magumuno woki ega:walo uliyanano woki wadenomamo kanagilamelema:. Iyo, nanitabola, epagodolo da:pola:na, Godote ebe tepo magumuno ubi tanalo ega:walo kimalagidilo tanalo ebeno tabamo eba anagilamelelamelelo, ebe iyaiya tanalo bilibilinomo ebo awokalilamenako. <sup>13</sup> Ebema: numa:la:, Godote iyaiya tanalo bilibilinomo eba iyatawalo, epate ebegodone tanalo idi waminama: modoboa:, iyo, me opo kawonomolo ega:walo tobolo unulo da:pola:na ebete ebe tanalo bilibilinomo ebeno balida:mo nanitabonomolo nulamena. Me mabuma: walone tetelo a bilibilinomate aimano osiyodilole tanalo magumulo tanalo idi kapiya waminama: gabo umia:no Godokono ololo apuamo eba kunu da:nemaimioma:, ebete a:ka:tuwa: aimano tanalo eba anagilameleamelelo, ale aimano kuba osiyodilole tanalono wiya uwate magumulo ale ebe odiyoboma: tabo idi gelama: a:ka:modoboma:.

*Ya:sute A Mabuma: Godotamo Kalimagono Ikameopino Unu Watodawanomoma: Deda:na*

<sup>14</sup> Me ebe mabuma: ale epatamo kebe nanitabokobi midi tanalo kawokaliminakoma:, modobola a ebe tanalo kodakodanomolo katila:namalema:, mabu Ya:sute a mabuma: Godotamo kalimagono inamabu ikameopino Unu Watodawanomoma: eda:na, iyo, ebe Godokono Guduma: eba eda:nalo Godokono ololo apuamo a:nemaigiya uwomua: uwomua: tetelo a kowalubinama:. <sup>15</sup> Ebema: a mabuma: Godotamo kalimagono ikameopino Watodawama: deda:na, dopamo ebete me opolo eba okolinalo Saitanate tete epetapi bilibilinomolo ebetamo iyaiya kuba wabuga:ta gabodo ebetamo penaki, atamo keba kunu ka:penakole eba kunu. Nanitabola, Ya:sute ebe tanalone aimano apeno iyaiya elawoa: tanalo eba iyatawanalo, ebe mabuma: ebete a na:nilakapoiamena. Ebema: numa:la:, ale aimano elawamo kuba gabamo wabuga:ta tanalone alautioma: ka:modobona:, wiyasiya kalakala kawonomola, Ya:sute a walubima: modobola, mabu dopamo ebete Saitanatamo tuduwata:no kapiya tete idilo kuba idi kosiyodiliya:. <sup>16</sup> Me ebe mabuma: modobola ale Godokono Kawo Elawodawano okoli baiamo tolea:no ka:nemaimiomalema: aimano kuba osiyodilole mabuma: ebeno nilakapo ale ebo ka:nelaema:. Iyo, nanitabola, a a:ka:tuwa: a walubilima: modoboa:noma: eba eda:onaloo, wiyasiya ebeno nilakapo tanalote modobolo itana aimano kuba osiyodilole tanalo bilibilinomo kegeboleaema:.

## 5

*Ya:sute Godotamo Kalimagono Ikameopino Unu Watodawanomoma: Eba Eda:nalo Ebete Dopamo Demaigiya Ebe Watodawa Idi Mekisadekako Keba Kunula:ka: Eba Kunula*

<sup>1</sup> La: iyatawalata, Godotamo kalimagono ikameopi magumulo ebete kebe dubu ibino Unu Watodawanomoma: keda:ma: delaemene, ebe dawate epono kuba osiyodilole mabuma: Godokono woko osiyodilo magumulo kalimagono inamabu ega:walo nilakapo inamabu ebetamo kikameomene. <sup>2</sup> Ebema: numa:la:, ebe dubu modobola epetapino kuba osiyodilole mabuma: dowa:no Godokono nilakapo iba:tamo kawokalimene, mabu ebete ibino elawoa: tanalo iyatawanomola. Iyo, iba:te Godokono nanitabo tanalo iyatawaoa:noma: eba eda:onalo tete bilibilinomolo ele gabo dodidinaka, tete epetapilo Godoko kalakalakobi midima: ebete atumu elawoa:noma: keda:nako. <sup>3</sup> Me mabuma: ebete kebe iyaiya tetelo kalimagono inamabu Godotamo epetapino kuba osiyodilole mabuma: dikameonakomene, ebe atu tetelo ebete ebenu kuba osiyodilole mabuma: ba:kikameonakomene.

<sup>4</sup> Nanitabola, Godotamo kalimagono ikameopi magumulo dubu idi ebe a:ka:tuwa: ebe unamo adipatelo Unu Watodawanomoma: eda: gobebobo a:kelaemene. Ao, Godote a:ka:tuwa: ebenu ubilo ebe dubu kelaemene, ebete dopamo A:loniko keba kunu kelawiyale eba kunu.\* <sup>5</sup> Ebema: Kelisote atumu, ebe Unu Watodawanomoma: eda: gobebobo laema: ebe a:ka:tuwa: ebe unamo kadipatiya:. Ao, Godote wiyasiya ebe eba walogolo ebetamo tabo ma kunu giya,

“A:ma: naimano Gudunomolata,  
ka:lo na a:imano Nabiwima: eda:mo.”

<sup>6</sup> Ebene Godote ebenu Bukalo ebenu tanalo walo ma kunu kawokalimiya,

“Uwomua: uwomua: tetelo  
a:ma: natamo kalimagono inamabu  
ikanamonedawama: beda:nama:ta,  
Mekisadekate† dopamo naimano wokodawama:  
keba kunu keda:namile eba kunu.”

<sup>7</sup> Numa:la:, Ya:sute me opolo eba okolinalo ebe iyatawiya Godokono elawo modobola a:e temeteme magumulo ebenu igilo ka:mula:ema:, ebema: ebete ipupago ebenu tabo madodo unamo adipatelo Godoko ebo toweomiya. Ebe tetelo Godote ebenu towetowe tabo olowite ebe nanitabolo owalubiya, mabu Ya:sukono okoli magumulo ebete ubi iyatinami ebe a:ka:tuwa: ebe opamo eba iyatilo wiyasiya ebenu Nabiwi unamo kadipatema:. <sup>8</sup> Nanitabola, Ya:sute Godokono Guduma: eba eda:nalo wiyasiya kawokawo temeteme iyatawiya, iyo, ebete ebenu temeteme tanalone wadewade woki ebo uwatiya ebenu Nabiwino ubi tanalamo nanitabonomolo ka:tuduwatama:. <sup>9</sup> Ebene ebete ebenu Nabiwino ubi tanalo bilibilinomo dopoliyaliya, ebe tetelo ebete modobonomoma: eba eda:nalo Nabiwino ubi

\* **5:4:** Buka ka:la:mioledawa, modobola a:ma: me tanalo niyatawa, Mosesete Yu epo Isipiti opone demagataliya, ebe tetelo Godote epono kuba osiyodilole mabuma: Libai gu dubu uwatiya, iba:te ebetamo kalimagono inamabu ikameopima: keda:onama:. Ebene ebe Libai gu dubu bilibilinomo magumulo ebete Mosesekono naniwi A:loniko kapiya lawiya, ebete ebe wokopino Unu Watodawanomoma: keda:nama:, iyo, ebete ebe woko gobebobolo dopo lumagima: ediya. † **5:6:** Buka ka:la:mioledawa, a:ma: Mekisadekakono tanalo wadenomamo iyatawama: dowagela:emene, modobola a:ma: Wagilamole Mabu Buka 14.17-24 numiye. Ebolo a:ma: me kawo tanalo kuima:ta, Godote A:loniko ebenu kalimagono ikameopino Unu Watodawanomoma: keda:ma: ebe lawea:no, iyalo tetenomolo me dubu idi Mekisadekate okolinami, iyo, ebete Yu epono ewono A:ibalayamako tetelo ebetamo demaigiya, Godote ebe ebenu kalimagono ikameodawa idima: ebo ka:miya.

tanalamo da:tudila:ona ebe epono igilo mula:lelame tanalono mabuma: ebo ediya, <sup>10</sup> ega:walo ebe atu tetelo Godote ebe ebeno kalimagono inam-abu ikameopino Unu Watodawanomoma: ka:miya, ebete Mekisadekako dopamo keba kunu keka:miyale eba kunu.

*Godokono Tabono Magumu Iyatawa Tanalodo Wadenomamo Apepeo Tanalo*

<sup>11</sup> Nanitabola, nale la: me kawo tanalo kiyatulametama: tabo epetapi bilibilinomate nagodolo ba:pola:na, wiyasiya me tetelo modoboa:, mabu la: muloa: gudi keba kunula:ka: eba kunu eda:onamata. <sup>12</sup> Eiye! La: Godokono tabo nanitabokobi da:mida:wiyama, ebe tetene wagilimite tete geyageyanomo a:petiya, la: wiyasiya ebe tabono iyaiya iyatulame iyatawa tanalodo nanitabolo kapepeawenamia:. Ebe mabuma: la: me tetelo nanitabokobi midipi epetapino iyatulamepima: eda:oma: modoboa:, iyo, idawate la: nanitabokobi midi tanalono iyaiya dopo iyatulame tanalo walo na:kiyatulaema:ta la:le gudikapoma:. Ebema: la: a:lia:li gudi keba kunula:ka: ebako epoma: eda:onamata, mabu menokobiate iba:tamo nono kapiya ikalamenaka, iba:tamo nanitabo bae ikalame gabote kitana:. <sup>13</sup> Numa:la:, ebako a:lia:li guduno iyatawate da:pesoma: eba eda:nalo, ebe modoboa: Godokono tuputupu tabono magumu nanitabolo lawete wade osiyodilo tanalo ega:walo kuba osiyodilo tanalo kanagilaema:, <sup>14</sup> wiyasiya piyate nanitabokobi midi magumudo apepeote egege gudima: eda:o tanalo iyalo datepiya, ebe epate nanitabo bae naoma: modobola. Iyo, iba:te nanitabo bae nao tanalodo wadewade woki iyalo uwatiya, iba:te wadewade tanalo eba osiyodilolelo ibino ilukuli magumulo wade tanalo ega:walo kuba tanalo wadenomamo kanagilamenakoma:.

## 6

*Nanitabokobi Midi Magumune Gudi Tanalo*

<sup>1</sup> Ebema: modobola ale aimano ubi ma kunu kiyatimalema:, aimano nanitabokobi midi tanalo magumulo ale wadewade apepeo epono iyatulame tanalo nanitabolo kuwatema:, iyo, ale me tetelo nanitabokobi midi tanalono dopo iyatulame tabono iyaiya tanalo kawonomamo walo a:kemalagidilolema:. Nanitabola, la: ebe dopo iyaiya tanalo iyalo iyatawaiyamata, ma kunu piyate ibi a:ka:tuwa: ibino elawamo Godoko kalakalakobi midima: woko dosiyodilona, iba:te ibino osiyodilole tanalone olobila:ote Godokono osiyodilo tanalo kapiya nanitabokobi na:midima:na:.

<sup>2</sup> Ega:walo dopo iyatulame tanalo idi ma kunu bitana, piyate ibino nanitabokobi midi tanalo awokalimilo Godogodone elawo laema: dowagelena, iba:te obamo waduba:midaole tanalamo ibino ape ukulaote epetapiate koto iba:tamo nowatiolelaema:na:. Ega:walo dopo iyatulame tanalo idi ma kunula, a:elaopi bilibilinomate igilamo walo da:kemaimioma:na:, Godote ibino tanalo anagilamelelamete iba:tamo uwomua: teteno modobo wiya ebo kikalaemene. <sup>3</sup> Ebema: numa:la:, me dopo iyaiya tanalo nale la: walo a:kiyatulametama, wiyasiya Godokono ubi tanalo atamo keba kunu kitanale, ale eba kunu oli iyatulame tanalo epetapi kapimiya kuwatemalema:.

<sup>4</sup> Eiye! Piyate ibino kuba osiyodilole tanalone Godotamo olobila:ote, ebene ibino nanitabokobi midi tanalone da:na:gudima:na:, iba:te nanitabokobi midi tanalamo walo keba kunu na:kolobila:oma:na:? Gabo puliyala, kitana:, mabu dopamo iba:te Godokono alo magumulo eba ilukulinalo, ebegodone demaigiya ebe gito ikame tanalo lawete wade golanomoma: ebo geliya. Iyo, Godokono Uliyanate iba:tamo da:piya,

ebe tetene wagilimite ebete ibi ega:walo nanitabokobi midipi epetapi ibi bilibilinomo magumulo woko eba osiyodilonalo, <sup>5</sup> iba:te Godokono Kawo Elawodawama: eda: tanalono elawo duminakiya ega:walo ebenu tabo dolowionakiya ebe iyaiya tanalo golanomoma: ebo gelanakiya. <sup>6</sup> Wiyasiya numa:la:, ebe tetelo iba:te ibino nanitabokobi midi tanalone eba nigudilo Godokono Gudu ginima:mo gito itiya. Eiye! Me tanalodo iba:te ebetamo ilipo awokala eba ikamelo epetapiate ebe gito malogutiya, dopamo kubakubapi epetapiate ebe kewa olotolowamo tupuguimilo ilipo keba kunu kikamiye eba kunu.

<sup>7</sup> Numa:la:, Godokono wade walubi tanalodo ulamate me opamo owonako, ebe mabuma: kebe pali damelalo wadewade nao inamabuate dapepeoma:na:, ebete ebe damela wadenoma: kegemene. <sup>8</sup> Wiyasiya kebe damelalo nao inamabuate apepeoa:no kubakuba uwago ega:walo moeagopi inamabu a:ka:tuwa: ebe magumune demaimioma:na:, tete tatalila Godote ebe damela kubanomoma: gelo elamo gito kemadoemene.

<sup>9</sup> Naimano wade nanitabokobi midipi namutupiala:, nale me elawodopo tabo la:tamo eba kiyawautalo, wiyasiya na iyatawala la:imano igilo mula: tanalo magumudo la: kuba damela keba kunula:ka: eba kunua:, ebema: Godokono walubi tanalote la:godolo itananako. <sup>10</sup> Iyo, Godoko ebe epono tanalo tuputupu gabodo danagilamelelamenako ebe dawala, ebema: la: dopamo ebe mabuma: woko eba osiyodilonalo ebenu epo epetapiatamo nilakapo awokalimi tanalodo kebe wadewade tanalo kosiyodilola:wenakima, ebete ebe tanalo gito a:ka:dodolomatilimene. Nanitabola, la: me tetelo atu wade wokonomo ebe kosiyodilonamata, <sup>11</sup> ebema: la: mabuma: naimano ubi kawonomote ma kunu itana, la: bilibilinomate nanitabokobi midi tanalodo uwomu teta:mo atu woko elawonomamo na:kosiyodiloniyala:. Me gabodo la: wade wiya laema: demakopela:wenama, ebe tanalote la:tamo nanitabolo ka:pemene. <sup>12</sup> Ebema: na ubia:nola la: woko osiyodilo magumulo elawoa:noma: eda:oma:, wiyasiya na ubila piyate ibino nanitabokobi midi tanalo Ya:sutamo diyatina, la: ebe epo eba ibamilatelenalo, la: la:imano nanitabokobi midi mabuma: temeteme uwate magumulo kodakodalo nelamota:onala:. Iyo, eba kunu Godote kebe wade wiya la:tamo ikalaema: dopamo nanitabolo degiya, la: ebe wiya nanitabonomolo ka:nelaemamota.

### *Godote Kebe Tanalo Osiyodiloma: Degemene Ebe Tanalo Nanitabolo Kosiyodilomene*

<sup>13</sup> Numa:la:, Godote A:ibalayamako kowalubima: ebetamo nanitabolo degiya, ebe tetelo ebenu tabo ka:kodakodaima: ebete ebenu mailo ka:mite ebo giya, iyo, ebete me opo lumagino mailo ka:mia:no ebenu mailonomo ebe ka:miya mabu ebenu elawote epo bilibilinomono iyaiya elawo nodoilina. <sup>14</sup> Ebene A:ibalayamate Godokono tabo ma kunu dolowiya, “Nale a:ma: eba walubinalo a:imano walonepi kawonomamo ka:bilibililaemamo,” <sup>15</sup> ebe tetene wagilimite ebete ebe wade tanalo uima: nanitabokobi midi magumulo tete geyageyanomolo kalakalago makopelenami. Ebe mabuma: Godokono wade tetenomolo A:ibalayamate ebenu wade walubi tanalo nanitabolo umiya.

<sup>16</sup> Iyo, a iyatawala, me opo epono apamineuui magumulo idawate tabo eba gitalo, ebenu tabo kodakodaima: kawodawa idino mailo deka:imene, ebe tetelo olowiopiate ebenu tabo nanitabokobi midite, ebenu ibino apamineuui tanalote gito kolopoligomene. <sup>17</sup> Ebema: numa:la:, Godote me opo epono osiyodilo tanalo eba malagidilolo, ebete a nanitabokobi midipi walubima: ebenu nopo dawokalimiya, ebe tetelo ebete ebenu tabo



kodakodaima: ebenu mailo ka:mite ebo giya. Ebe mabuma: a me tanalo iyatawanomola, Godote ebe nopono wade walubi tanalo atamo nanitabolo kikaeaema: ebenu woki walone iyakobi a:ka:midimene. <sup>18</sup> Iyo, Godoko a:da: elemasigidawa:, ebema: kebe tetelo ebete tanalo idi osiyodiloma: tabo nanitabolo degemene, ebete ebenu woki iyakobi midia:no ebe tanalo kosiyodilomene, ega:walo kebe tetelo ebete tabo eba gitalo ebenu mailo deka:imene, ebete ebe tabo atumu akadikanalemene. Ebene Godokono nani tabo ge mabuma: ega:walo ebenu tabo kodakodaima: ebenu mailo ka:mi mabuma:, a piyate aimano igilo mula: tanalo laema: kuba osiyodilole magumune ebetamo dalautiyama:, ale ebenu tabo nanitabokobi eba midinalo elawo ebo lawenakoma:, ale aimano nanitabo igilo laema: olowiolo kemakopelenama:

<sup>19</sup> Ebema: aimano olowiolo makopele tanalote peno aga keba kunula:ka: eba kunu eba eda:nalo aimano tepo magumuno woki na:kodakodailamena, ale aimano igilo mula: baine gito wadauikapoma:. Ebene Godokono Unu Duliyomololo da:ena, aimano agate ebe Amamateno Iya Motono Talenanomo Bailo eba itanalo, ebenu alete Talena Bainomono kaliku ubilido petote a kodakodalo ebo matuoamoena, ebema: kalakala kawonomola, ebe agano ale kodakodanomola, a:ketegalemene. <sup>20</sup> Iyo, dopamo Ya:sute a mabuma: Amamate Motono Talena Bainomamo a:nopegiya, ebete Godotamo kalimagono ikameo tanalodo aimano kuba osiyodilole tanalo ka:negeboleaema:, ebema: nanitabola, ebe Godotamo kalimagono ikameopino Unu Watodawanomoma: ediya uwomua: uwomua: tetelo ebe woko gobebobolo kokolinama:, Mekisadekate dopamo Godokono wokedawama: keba kunu keda:namile eba kunu.

## 7

### *Godotamo Kalimagono Inamabu Ikameodawa Mekisadekakono Tanalo*

<sup>1-2</sup> A:ibalayamako tetelo me dubu Mekisadekate ebe Yelusalema kawo duliyomolono Kawo Elawodubuma: deda:nami ebe dubula, ega:walo ebe Ununomo Godotamo kalimagono ikameodawa idila. Nanitabola, me kawodawano dopo mailono magumu ebe 'Tuputupu Okoli Kawo Elawodubula,' ega:walo ebenu magumu mailo idi ebe 'Milo Ikame Kawo Elawodubula' mabu ebenu Yelusalema duliyomolono mailo magumu ebe 'Milo Ikame Kawo Duliyomolola.'

Ebenu tete idilo A:ibalayamate netewa-netewa kawokawo elawodubago gowelaote wato kikopu delawiya, ebe tetelo ebete gowelao baine walo eba ka:pitalo, Mekisadekate eba:go palugote Godoko ebo paniya ebete A:ibalayamako wadenomamo kowalubinakoma:. Ebene A:ibalayamate ebenu dubago gowela tanalamo duwatiya, ebete ebe inamabu bilibilinomo anagilamolete epetapi teni apuapu magumune idi kapiya lawenaki, idi kapiya lawenaki, Mekisadekatamo ebo ikameiya. <sup>3</sup> Numa:la:, Godokono Bukalo tabo idi kitana: me kawodawano tanaloma: a kiyatuaema:, ebema: a iyatawa: ebenu ewonino tanalo ega:walo ebenu menokola nabiwila ibino mailo, iyo, ebenu awokala tete ega:walo a:e tete atumu atamo kawokalilamena:. Eba kunu ebe Godokono Gudu keba kunula:ka: eba kunula, mabu uwomua: uwomua: tetelo ebete Godotamo kalimagono ikameodawama: beda:namene.

<sup>4</sup> Ebema: numa:la:, me dubu Mekisadekako ebe beda: kawodawanomola:ka:! A Yu epo bilibilinomono ewono nabiwi A:ibalayamate ebe tanalo eba iyatawalo, ebete Mekisadekako kowalogoma: gowela tanalamo duwatiya ebe inamabu bilibilinomo anagilamolete epetapi teni

apuapu magumune idi kapiya lawenaki, idi kapiya lawenaki, ebetamo kalakalago eba kunu ikameiya. <sup>5</sup> Ega:walo me tanalo idila. A Yu epo bilibilinomate A:ibalayamagodone pawokalaiyama; wiyasiya a magumulo Libai gu dubate a:ka:tuwa: Godotamo kalimagono ikameopima: eda:ona. Ebema: ibi kowalubilima: a Yu epo epetapiate aimano woko wiya mani ega:walo inamabu anagilamoletete teni apuapu magumune idi kapiya belaema; idi kapiya belaema; iba:tamo gito ikalamolenakoma; mabu Godokono Totomu Tabote ebe tanalo kosiyodiloma: a niyatuaмена.

<sup>6</sup> Ebema: numa:la; Mekisadekako Libai gudawama: keda:namia; wiyasiya Libai gu epono ewono A:ibalayamate ebene inamabu bilibilinomo anagilamoletete Mekisadekako kowalogoma: ebene apu ebetamo gito ikameiya, ebene ebe tetelo Mekisadekate Godoko aniya ebete A:ibalayamako kowalubinakoma. Iyo, me dubu A:ibalayamako ebe Godote dopamo ebe kowalubima: potamo nanitabolo degiya ebe kawo dubula, <sup>7</sup> wiyasiya Mekisadekate A:ibalayamakono tanaloma: Godoko daniya, a me tanalone niyatawaonama: me dubu idino elawote A:ibalayamakono elawo nanitabonomolo nodolina. <sup>8</sup> Nanitabola, Libai gu epate Godotamo kalimagono inamabu ikameopima: eda:ona, ebema: a Yu epo epetapiate aimano woko wiya mani ega:walo inamabu anagilamoletete ibino apuapu iba:tamo gito bikalamolenakoma. Wiyasiya numa:la; Godokono umi magumulo ebe Libai gu wokopiate kawokawopima: nanitabolo keda:ona: mabu ibi bilibilinomate ka:elaoma:na; ebene Bukate wiyasiya Mekisadekakono tanalo ma kunu awokalimina, ebete kawo dawanomoma: eba eda:nalo ebene igilo tanalote kolopoligona. Iyo, A:ibalayamate me tanalo eba iyatawalo Mekisadekako kowalogoma: ebene inamabu epetapi ebetamo gito ikameiya. <sup>9</sup> Ebema: diyala, lumagite ebe tanalo eba malagidilolo ma kunu da:begemene, Libai gupiate ibino ewono nabiwi A:ibalayamado Mekisadekako atumu a:kowalogiya. Iyo, nanitabola, A:ibalayamate ebene inamabu bilibilinomo anagilamole tetelo Mekisadekakono apuapu ebetamo dikameiya, ebe atu tetelo Libai gu epate ibino ewoniagodone inamabu atumu a:kikameiya. <sup>10</sup> Ebema: numa:la; Libaiko me opamo awokala:no, dopamo ebete ebene ewonino ape magumulo eba okolinalo, ebe tetelo A:ibalayamate Mekisadekago dalugiya, Libaite ebe kawodawa ebene ewono nabiwa:go kapimiya ebo walugiya.

*Ya:sute Mekisadekako Keba Kunula:ka: Eba Kunu Eda:na*

<sup>11</sup> Ega:walo me tanalo idila. Godote ebene Yu epo magumulo Libai gu dubu ebetamo kalimagono inamabu ikameoma: ibi kapiya duwatiya, ebe atu tetelo ebete Yu epatamo ebene totomu tabo epetapi bilibilinomo ikalamiya iba:te wadenomamo kilukulinama. Ebema: Libai gu wokopino kalimagono inamabu ikameo magumudo epate wadewadepinomoma: neda:iyataleka; Godote ebene iyanomo kalimagono inamabu ikameodawa idi akadipatiyana. Wiyasiya Godokono ubilo idawate nanitabolo emaigiya, ebe dawa ebe A:lonigodone\* da:pemaimiya ebe Libai gu wokopi keba kunula:ka: eba kunua; ao, ebe iyanomo wokodawama: eda:na, Mekisadekate dopamo keba kunu keda:namile eba kunu. <sup>12</sup> Ebema: kebe

\* **7:11:** Buka ka:la:mioledawa, modobola a:ma: me tanalo niyatawa, Libai gu epate Godotamo kalimagono ikameopima: eba eda:onalo, ebete ibi bilibilinomo magumulo poko kelawiyale ibino Unu Watodawanomoma: keda:nama; A:loniko ebe dopodawala. Ebema: A:lonikono walogabo apune ebene gudi magumulo idite ebene nabiwino woko gobebobo lawiya, ebene ebe dawate da:iya ebene gudi magumulo idite atu gobebobo kelawete, ebene ebe tanalote Ya:suko teta:mo ebo pemaigiya.

tetelo Godote ebetamo kalimagono inamabu ikameoma: tagala wokopino gobebobolo oli wokodawa dadipatemene, ebe atu tetelo ebete tagala Totomu Tabono iyaiya tanalo iyabaiamo alomote oli Totomu Tabo ebene epatamo kikalaemene. <sup>13-14</sup> Numa:la:, nale aimano Kawodawa Ya:sukono tanaloma: kiyawautamo, ebe Godote dadipatiya ebe oli wokodawala. Wiyasiya epo bilibilinomo iyatawala, me dubu Ya:suko Libai gudawa:, ebete Yuda gu magumune awokaliya, ega:walo ibi me tanalo idi atumu iyatawala, Godotamo kalimagono inamabu ikameoma: idawate Yuda gu magumune dopamo kemaigiya:, mabu Mosesete Godokono Totomu Tabo ebene Bukamo eba akulolelo, ebete Yuda gu epo kanaliya: ebako woko kosiyodiloma:

<sup>15</sup> Ebema: numa:la:, nale da:kiyawautamo me tabono magumu ma kunu awokala, Godokono iyanomo kalimagono inamabu ikameodawa idi emaigiya, ebe dawate Mekisadekate dopamo kebako dawama: keda:namile ebako dawama: keda:na. <sup>16</sup> Iyo, Mosesete a dopamo da:totomuatiya Godotamo kalimagono ikameopiate Libai gu kapiya magumune kemaimioma:, ebe totomu tanalodo Godokono oli wokodawate ebene gobebobo kelawiya:. Ebete wiyasiya Godotamo kalimagono ikameodawano gobebobo lawiya, mabu ebete kebe igilago uwomua: uwomua: tetelo dokolinamene ebe igilote elawo ebetamo ikamiya. <sup>17</sup> Ebema: nanitabola, Godote ebene oli wokodawano tanaloma: ebene Bukalo tabo ma kunu iyatiya,

“Uwomua: uwomua: tetelo  
a:ma: natamo kalimagono inamabu  
ikanamonedawama: beda:nama:ta,  
Mekisadekate dopamo naimano wokodawama:  
keba kunu keda:namile eba kunu.”

<sup>18-19</sup> Numa:la:, Godote dopamo kebe iyaiya Totomu Tabo Mosesedo a Yu epatamo dikaeamiya, ebe Totomuati ka:modobonamia: epo Godokono tuputupupinomoma: ka:midilinama:. Ebe mabuma: ebetamo kalimagono inamabu ikameopino tanaloma: da:pola:namiya, ebete ebe tagala Totomu iyabaiamo eba alomolo aimano kuba osiyodilole tanalo kegeboleaema: gabo idi ma kunu osiyodiliya, a wade wiyanomo ebegodone kawonomamo laema: olowiolo demakopelenama:, ale ebe wokino tanalodo ebene ololo apuamo kalakalago pelamenakoma:

<sup>20</sup> Ega:walo me tanalo idila. Dopamo tetelo Libai gu dubate Godotamo kalimagono inamabu ikameopima: eda:ote woko wagilimia:no, idite ibino tanaloma: Godokono mailo keka:miya: iba:te ebe woko ebene elawamo kosiyodilonama:. <sup>21</sup> Wiyasiya Ya:sute ebetamo kalimagono ikameodawama: dediya, ebe tetelo Godote ebene mailonomo eba ka:milo ebetamo nanitabonomolo ma kunu giya,

“Na Kawodawa Godote a:imano wokoma:  
naimano woki iyakobi a:ka:midimo,  
mabu nale naimano mailamo  
me nani tabonomo egemo,  
‘Uwomua: uwomua: tetelo  
a:ma: natamo kalimagono inamabu  
ikanamonedawama: beda:nama:ta.’ ”

<sup>22</sup> Ebema: numa:la:, Godote epono kuba osiyodilole tanalo egeboleaema: kebe nopo dopamo diyatiya, ebe nopono elawote da:pesodopoma:

eda:nami. Wiyasiya ebete me tetelo oli nopo da:kiyatiya, ebe nopote ebenu elawo mailamo demaigiya ebe mabuma: ebe elawote kawonomoma: eda:na, iyo, a nanitabokobi midipi me tanalone niyatawaonama: Ya:sute a mabuma: woko wadenomamo nosiyodilona.

<sup>23</sup> Ega:walo me tanalo idila. Dopamo Godotamo kalimagono inamabu dikameonakiya ebe dubate bilibilinomoma: eda:onamiya, mabu ibi magumulo epetapi da:elaonakiya oli apepeo dubu epetapiate a:elaopino woko gobobobo gito kuwatanakiya. <sup>24</sup> Wiyasiya Ya:sukono tanalo iyanomola mabu ebete uwomua: uwomua: tetelo eba okolinalo, ebenu kalimagono ikameo wokote Godotamo a:kolopoligonamene, iyo, lumagi idite ebenu gobobobo a:kelawenamene. <sup>25</sup> Me mabuma: piyate ebe magumudo Godotamo da:pelamenaka, ebe epono igilo ka:mula:lelaema: Ya:sukono elawote modobonomoma: eda:na, mabu ebete uwomua: uwomua: tetelo eba okolinalo ibi mabuma: Godoko ba:toweomenakomene.

<sup>26</sup> Ebema: kalakala kawonomola, me tetelo Ya:sute Godotamo kalimagono ikameopino Unu Watodawanomoma: eda:na, iyo, ebe a:ka:tuwa: aimano modoboa: tanalo bilibilinomo magumulo a wadenomamo owalubinako. Nanitabola, ebete Godoko kalakalakobi midima: tuputupunomoma: eba eda:nalo, kuba osiyodilo tanalo idi ebegodolo kitana:, puliyanomola. Ebe mabuma: piyate me opolo kuba tanalo dosiyodilolenaka, Godote Ya:suko ibi bilibilinomo magumune iyabaiamo watiamidate ebe unamo ebo adipatiya ebete Unu Duliynomololo kokolinama:. <sup>27</sup> Ebema: numa:la:, Ya:sute Godotamo kalimagono inamabu ikameopino ununomo watowatopi epetapi keba kunula:ka: eba kunua:. Iba:te ibino kuba osiyodilole tanalo kegebolelaema: kalimagono inamabu Godotamo dopamo ikameote, ebenu iba:te kalimagono inamabu epetapi epo mabuma: walo a:kikameonaka, wiyasiya Ya:sukono tanalo iyanomola. Ebegodolo kapiya kuba idite itana:no, ebe a:ka:tuwa: ebenu ape kalimagono nilakapo inamabuma: midite Godotamo kapiya tetenomolo ebo ikamiya, ebema: nanitabola, ebenu kalimate uwomua: uwomua: tetelo modobo woko bosiyodilonamene. <sup>28</sup> Ebema: ale me kawo tanalo wadenomamo uima:, Godote atamo Mosesedo dikaeamiya ebe iyaiya Totomu Tabodo tete geyageyanomolo tuputupua: dubu epetapiate Godotamo kalimagono ikameopino ununomo watowatopima: eda:onamiya. Wiyasiya walone tetelo ebete ebe Totomu Tabo iyabaiamo eba alomolo ebenu elawo mailamo nanitabonomolo ebo giya, ebenu Gudu kapiyate ebetamo kalimagono ikameo woko gobobobolo kokolinama:. Nanitabola, ebe Gudute ebe woko osiyodilo tanalo wadenomamo iyalo iyatawate, uwomua: uwomua: tetelo eba kunu bosiyodilonamene.

## 8

*Ya:sute A Mabuma: Godotamo Kalimagono Ikameopino Unu Watodawanomoma: Deda:na*

<sup>1</sup> Ebema: nale kebe tabo ka:kiyawautamo, me ebe tabono kawo magumunomola, a nanitabokobi midipi mabuma: ebako wade wokodawanomote bokolina. Iyo, a mabuma: Godotamo kalimagono ikameopino Unu Watodawanomoma: deda:na, ebe dawate Unu Duliynomolono Kawo Elawodawanomo Godokono tumudi apulo bokolina. <sup>2</sup> Numa:la:, a Yu epono ewoni tetelo iba:te Godoko amamatema: sipi-goeogoeono tama awokowiamida moto idi ebo adipatiya, ebema: ibi mabuma: Godotamo kalimagono inamabu ikameopiate woko ebolo osiyodilonamiya. Wiyasiya a mabuma: kalimagono ikameo woko dosiyodilona, ebe dawate me opo epate

detiya ebako motolo kosiyodilona; ao, ebenu woko osiyodilo bai ebe aimano Kawodawate Unu Duliyomololo detiya, ebe nanitabo Amamateno Motono Talena Bainomola.

<sup>3</sup> Nanitabola, me opolo Godotamo woko dopamo dosiyodilonamiya, Godote ebe kalimagono inamabu ikameopino ununomo watowatopi ibino woko gobebobamo alomonaki, iba:te epo mabuma: iyaiya dabirole inamabuno kalima ega:walo nilakapo inamabu epetapi ebetamo gito kikameonakoma: Ebe mabuma: kalimagono ikameo woko a mabuma: dosiyodilona, modobola ebe Kawodawate wade tanalo idi atumu Godotamo na:kikameomene. <sup>4</sup> Wiyasiya numa:la; a mabuma: Unu Duliyomololo woko dosiyodilona, ebe dawate Unu Duliyomolamo odoloa:no me opolo nokolinataleka: ebete Godotamo kalimagono ikameodawama: a:keda:na; mabu me opolo wokopi epetapiate eba ilukulinalo tete epetapi bilibili-nomolo Godotamo nilakapo inamabu gito ikameonaka, Mosesete a Yu epono ewoni keba kunu ka:totomulateliyale eba kunu. <sup>5</sup> Ebema: piyate me opolo woko dosiyodilona, ebe dubuno woko ebe aimano Kawodawate Unu Duliyomololo dosiyodilona ebe nanitabo wokono uli keba kunula:ka: eba kunula. Eba kunu Mosesete Godoko amamateno sipi-goeogoeo tama awokowiamida moto dadipatiya, ebe motote Godokono Unu Duliyomololo da:ena ebe nanitabo motono ulima: atumu keda:na. Iyo, ebe mabuma: Mosesete ebe moto bulu opolo ete wagilimia:no, dopamo Godote ebe ma kunu aniya, “Nale naimano nanitabo motono uli a:ma: Sainai Ununomo Damelalo keba kunu kiyatumitima, modobola a:ma:le na amamanateneno moto eba etelo motono iyaiya tanalo eba kunu nosiyodiloliye.”

<sup>6</sup> Nanitabola, Ya:sute me opo epo ega:walo Godoko ibi tetenomolo eba utinalo, kebe oli nopo kiyatiyale ebe nopono elawote tagala no-pono elawo nodolina, iyo, Godote ebenu oli nopodo kebe iyaiya walubi tanalo nanitabokobi midipiatamo ikalaema: nanitabolo degiya ebe tanalo wadewadenonomola, wiyasiya tagala nopono walubi tanalote nanitabolo kitanamia: Ebema: numa:la; eba kunu Godote ebenu oli nopodo kebe kalimagono ikameo woko Ya:sutamo dikamiya, ebe wokono elawote atumu tagala nopono wokopino elawo na:kodoilina. <sup>7</sup> Iyo, nanitabola, epono kuba osiyodilole tanalo kegebolelaema: tagala nopono elawote modobolo nitaniy-ataleka; Godote walone tetelo nopo idi a:kiyatiyana: <sup>8</sup> Wiyasiya ebete ebenu epono kuba osiyodilole tanalo eba ulamelo, ebenu tagala nopono tanalo ibi walubilima: modoboa:noma: gelo tabo ma kunu kiyawaiya,

“Na Kawodawate gemo,  
naimano Isalaela epo ega:walo Yuda epo mabuma:  
tete tatalila na oli nopo kiyatimamo.

<sup>9</sup> Iyo, na ibino ewoni Isipiti opone wagailite  
ibi wadenomamo demagataliyamo,  
ebe tetelo nale kebe nopo iba:tamo diyatiyamo,  
ebe nopono tabamo iba:te nanitabolo ka:tudila:iya;  
ebema: nale ibi gito miyapapaliyamo,  
ibi a:ka:tuwa: ibino ubilo iyaiya kowapata:lamenama:  
Wiyasiya na me tetelo oli nopo diyatimo,  
me nopono elawote iyanomoma: keda:mene.

<sup>10</sup> Iyo, na Kawodawate gemo, tete netatali,  
na oli nopo naimano Isalaela epatamo  
ma kunu kiyatimamo,  
nale naimano iyaiya totomu taboma:



ibi gito akanalemo,  
 ao, na wiyasiya ebe totomu tabo ibino woki mabuamo  
 ega:walo ibino tepo magumunomamo kakulolelaemamo.

Ebema: me osiyodilo tanalodo  
 iba:te na kapiya ibino Godoma: eba ka:na:minalo,  
 nale atumu ibi naimano nani epoma:  
 ebo keka:la:imamo.

<sup>11</sup> Ebe tetelo ibi magumulo  
 idite ebeno tamedawa ma kunu akanamene,  
 ‘Modobola a:ma: Godoko a:imano Kawodawama: na:midiye.’  
 Ao, idawate mako tabo ebeno namutudawatamo a:ka:kiyawaomene,  
 mabu ibi magumulo kawokawopi ega:walo egegepi atumu,  
 ibi bilibilinomate tepo magumuno woki wadekobi iyalo a:midiliya,  
 iba:te na ibino Kawodawama: nanitabolo ka:midininama:!

<sup>12</sup> Ebema: me tanalo nanitabola,  
 ebe tetelo nale ibino kuba osiyodilole tanalo egebolelamete  
 nale walo a:kemalagidilolelaemo.”

<sup>13</sup> Ebema: modobola la: me tanalo wadenomamo nemalagidilala:. Godote oli nopono tanaloma: tabo eba kunu da:kiyawaiya, ebe tetelo ebete dopamo diyatiya ebe nopo tagaladopoma: giya, ebema: nanitabola, me opolo kebe inamabuate tagaladopoma: deda:onaka, tete tatalila ebe inamabuno wade tanalote olopoligonomo olopoligote gito kalatidioma:na:.

## 9

### *Tagala Nopono Tanalamo Godoko Amamate Tanalo*

<sup>1</sup> Numa:la:, Godote dopamo kebe nopo kiyatiyale, ebe tagala nopono pukalate na:pola:namiya, epate ebe amamate moto etete ebe ebolo keba kunu nakamamatenakoma:na:. <sup>2</sup> Ebene epate ebe pukalamo ka:tudila:onama: Godoko amamateno sipi-goeogoeo tama awokowiamida moto ebo adipatiya, ebe moto gulo netewa tetete na:pola:nami. Ebene Godoko amamate: wokopiate motono dopo apulo ditanami ebe kaliku ubilido me motono dopo teta:mo ebo nopila:onakiya. Ebe dopo teteno mailo ebe Talena Baila, ebe magumulo alo kapiyate eba itanalo patapatate atumu na:kitanami, ebene ebe patapata unulo wokopiate talena bae Godotamo dikameonakiya ebe baete ebolo na:pola:nanakiya.

<sup>3</sup> Ebene moto gunomolo tete idite na:kitanami, ebe teteno mailo ebe Talena Bainomola, ega:walo ebe talena baino dopo apulo kaliku ubili idite na:kitanami, ebe talena bailo talena inamabunomate waminale magumulo wadenomamo ka:pola:nama:. <sup>4</sup> Ebema: ebe Talena Bainomolo me netewa inamabuate na:pola:nami, Godoko watidilono golodo patapata ega:walo ebete dopamo diyatiya ebe nopono golodo Talena Bokose. Ebene golodo patapatano tanalo ma kunula, elate ebe patapata unulo eba waelo modobodawanomote Godoko watidilono wade nibo tuwae inamabu elamo ebo aminaolenaki. Ega:walo Godokono Talena Bokoseno tanalo ma kunula, ebe Bokose magumulo ebete kebe anoano inamabuamo aimano ewoni-atamo ebeno elawo dawokalimiya, me ebe netewa-kapiya inamabuate na:ka:pola:nami — ma:na mailagono bae golodo kalili, ega:walo A:lonikono tanaloma: ebeno gaubune wuiate a:ka:tuwa: da:pemaimiya ebe gaubu,

ega:walo Godote kebe nokola unamo ebena kawokawo Totomu Tabo daku-loliya ebe netewa nokolala.\* <sup>5</sup> Ebene Godokono Talena Bokose unulo kelamota:nama:, wokopiate netewa iya ololonomo nopopi golodo inamabuamo osiyodilote ebamo gito alomiya. Ebe nopopi ebe tamuagopila, ebena ibino tamu tupuguilamelo eba lamota:nalo iba:te ebe Talena Bokose ebo mula:namiya. Nanitabola, ebe Bokose ununo tete ebe talenanomola, mabu Godote ebolo eba okolinalo epono kuba osiyodilole tanalo bilibilinomo ebo egebolelamenaki.

Wiyasiya naimano tabo olowiopiala:, la: niyaniyata. Nale me sipigoeogoeo tama awokowiamida motono tanalo epetapi bilibilinomoma: la: kiyatulametama: me tete wadenoma: kegea:

<sup>6</sup> Numa:la:, nale motono kapiyakapiya inamabuma: la: diyatulametama, ebe inamabu ebe wokopiate Godokono tabamo tudila:ote ebe amatema: dalomiya ebe inamabula. Ebema: Godotamo kalimagono inamabu ikameopino tanalo ma kunula, iba:te egela bilibilinomolo me motono dopo tete magumamo opila:onakiya ibino iyaiya woko Godotamo kosiyodilole-nama:. <sup>7</sup> Wiyasiya wokopi magumulo ibino Unu Watodawanomo kapiyate modobola moto gunomolo ditanami ebe Talena Bainomo magumamo ka:nopegama:, iyo, ulama bilibilinomo magumulo kapiya tete idinomolo ebe a:ka:tuwa: wade gautu-goeonomono kalimago ebamo tonaki. Ebene ebe ega:walo ebena epo bilibilinomo, iba:te iyatawaoa:noma: eba eda:olo ebe ulama kawonomolo kebe iyaiya kuba dosiyodilolenakiya, Godote ebe kuba bilibilinomo kegebolelaema: wokodawate kalima ebetamo ebo nikameonaki. <sup>8</sup> Ebema: ebe dawano woko osiyodilo tanalodo Godokono Uliyanate a me tanalo niyatuamena, dopamo Godoko amamateno sipigoeogoeo tama awokowiamida motote da:enami, ebe tete geyageyanomolo epate Godokono Talena Bainomamo nopila:oma: gabote a:iyamidalo kitanamia:.

<sup>9</sup> Ebema: numa:la:, tagala nopono Godoko amamateno iyaiya tanalo ebe ulima: eda:ona, iyo, tagala nopono tanalote me teteno oli nopono magumu atamo nakawokalimina. Ebe mabuma: a me tanalo iyatawala, dopamo tetelo epate Godoko amamatema: ebetamo iyaiya dabirole inamabuno kalima ega:walo nilakapo inamabu epetapi dikameonakiya iba:te ebe tanalodo ka:modobonamia: ibino tepo magumuno woki tuputupunomoma: ka:midilima:. <sup>10</sup> Iyo, nanitabola, a Yu epagodolo dopamo da:pola:namiya ebe Godoko amamateno pukalate nao inamabuno tanalo, ega:walo obo nio tanalo, ega:walo ape ukulale tanalo, ebe iyaiya unu tamano tanaloma: epo iyatulamenakiya. Wiyasiya numa:la:, tagala nopono pukalate tepo magumuno woki tuputupuilaema: epo kiyatulamiya:, ebema: Godote ubi ebo iyatiya ebe pukalate ebena oli nopo iyati teta:mo pola:nate ebo kolopoligoma:.

#### *Kelisokono Kalimate A Mabuma: Woko Modobonomolo Dosiyodilona*

<sup>11</sup> Ebema: kalakala kawonomola, mabu Kelisote Godokono oli nopo iyati tanalodo piya, ebena ebe Godotamo kalimagono ikameopino Unu Watodawanomoma: eba eda:nalo, Godokono wadewade walubi tanalate ebegodone atamo pemaimionaka. Iyo, ebete a mabuma: kebe oli motolo woko dosiyodilona, ebe motote me opolo a:ena:no ebe Unu Duliyyomololo da:ena ebe Godoko Amamateno Motola, ebema: ebe motono

\* **9:4:** Buka ka:la:mioledawa, a:ma: ubi diyata:emene me tanalono iyaiya oi wadenomamo kiyatawama:, modobola a:ma:le ma:na mailagono baeno tanaloma: Maimi 16.1-36 numiya, ega:walo a:ma:le A:lonikono gaubuno tanaloma: Nabas Ka:la:miole 17.1-11 numiya, ega:walo Godote netewa nokola unamo ebena kawokawo Totomu Tabo dakuloliya ebe tanaloma: a:ma:le Maimi 34.1-28 na:kumiya.

wade tanalote aimano ewoniate dopamo detiya ebe motono wade tanalo nanitabolo nodolina. <sup>12</sup> Ebene Kelisote kapiya tetenomolo ebe motono kaliku ubilido Talena Bainomamo da: nopegiya, ebete a mabuma: gautu-goeogoeo ega:walo kau-goeogoeono kalima Godotamo ka:nikameiya:. Ao, ebete ebe tetelo ebena kalimanomo nikamiya ebete aimano igilo uwomua: uwomua: tetelo ka:mula:leamenama:

<sup>13</sup> Nanitabola, dopamo tetelo piyate Godokono motolo woko dosiyodilonamiya, iba:te gautu-goeogoeo ega:walo kau-goeogoeono kalima Godotamo eba ikameolo kalima epetapi ebe amamatepi unamo ebo anamogamidaolenakiya, ega:walo iba:te atumu kebe kau-goeogoeo egege Godotamo ikameoma: elamo demadolamenakiya, ebe kau-goeogoeono wibu obago kapiyailamete epo unamo walo gito kanamogamidaolenakiya. Iyo, me gabodo wokopiate epono unu tamano iyaiya modoboa: tanalo iba:godone iyabaiamo ebo wagaililamenakiya, Godote iba:tamo talena iyatilamea:no ebe amamatepi: ka:pelaema:. <sup>14</sup> Ebema: numa:la:, ibino osiyodilole tanalate unu tamano iyaiya tanalo kapiya wadekobi midilina:kiya, wiyasiya Ya:sute ebena kalimamo dosiyodiliya ebe tanalono elawo beda: kawonomola:ka:! Iyo, ebena kalimate aimano tepo magumuno iyaiya modoboa: tanalo ka:tuputupuilaemene, ebema: ale woki walo a:kiyatima: aimano iyaiya osiyodilole tanalodo aimano unu tama kapiya ka:modoboilaema:. Nanitabola, unu tama wadekobi midi tanalodo lumagite nanitabo igilo a:kelaemene, iyo, ebete Godoko amamatepi: nanitabo gabo a:kuimene.

<sup>15</sup> Ebema: kawo tanalo ebe ma kunula, Kelisote Godokono oli nopote atamo pemaigama: gabo osiyodiliya, mabu ebete ebena ubi ma kunu iyatiya, Godote kebe epo ebena epoma: eda:onama: deka:la:mioliya, iba:te ibino uwomua: teteno wade wiya ebegodone kuwatema:, ebete dopamo nani tabonomo keba kunu kegiyale eba kunu. Iyo, Kelisoko ubila piyate tagala nopono tetelo kuba tanalo dosiyodilolenakiya, ebete ebe epo ebena kalimamo wiyakobi midilite kuba osiyodilole tanalono elawo magumune kowagailimene.

<sup>16</sup> Ega:walo me tanalo idila. Me opolo epetapino osiyodilo tanalo ma kunula, inamabu bilibila:go dubute a:ea:no dopamo ebete ebena gudino tanaloma: nopo kiyatimene, iba:te ebena a:e tetelo ebena inamabu bilibili keba kunu na:kuwatema:na:. Ebema: ebena a:e tetete ebetamo nanitabolo da:pemene, ebena guda:te ebe nopo iyati tanalodo nabiwigodone wade-wade tanalo ebo kuwatema:na:. <sup>17</sup> Wiyasiya nanitabola, ebe inamabu bilibila:godawate a:ea:no, ebete diyatiya ebe nopodo gudu idite inamabu kapiya idi gito a:kelaemene, iyo, ebete igilolo eba okolitalo ebe nopono elawote a:kitanamene wiyasiya ebe dubuno a:e tanalo kapiyado kodakodama: keda:mene.

<sup>18</sup> Ebema: Godote atumu eba kunu kosiyodiliya, ebena epatamo dopo nopo diyatiya ebena wokodawa Mosesete dabi inamabu idi danakapumiya, ebe tetenomolo ebe nopono elawote ebe inamabuno a:e tanalodo ebo wagilimiya. <sup>19</sup> Iyo, ebe tetelo Mosesete Godokono ubi tanalamo tuduwatate, dopamo ebena Totomu Tabono iyaiya tanalo bilibilinomo epo ebo analiya. Ebene ebe tanalo dolopoligiya, ebete kau-goeogoeo epetapi anakapulamete ibino kalima obago kapiyailamete, Godokono Totomu Tabo Buka unamo ega:walo epo unamo gito anamogamidaoliya, ebe tanalo ebete oli katomo idino paago ega:walo sipi-goeo tamano kalimakalima ipago osiyodiliya, Godote ebe keba kunu ka:totomutiyale eba kunu. <sup>20</sup> Ebene Mosesete ebe tanalo eba osiyodilolo epo ma kunu analiya, “Godote

ebeno nopo la:tamo diyati, me kalimate ebe nopo kodakodaimi, ebema: la:le ebe nopono tabono tanalo bilibilinomamo na:tudila:onakiyala.”

<sup>21</sup> Ebe tetelo ebete kalima epetapi Godoko amamateno sipi-goeogoeo tama awokowiamida moto guamo eba anamogamidaolelo, kebe talena inamabu ebolo da:pola:namiya ebe inamabu bilibilinomo unamo ebete atumu ebo kanamogamidaoliya. <sup>22</sup> Ebema: numa:la:, Godote dopamo kebe Totomu Tabo epatamo dikalamiya, ebe Totomu Tabote a niyatu- amena, kalima anamogamidaole tanalo kapiyado me opono inamabu magumulo epetapi bilibilinomate talenama: keda:oma:na:, ega:walo dabi inamabu idino kalimate ka:ka:liyaoa:no Godote epono kuba osiyodilole tanalo a:kebolelaemene.

<sup>23</sup> Ebema: nanitabola, Godoko amamateno motolo dopamo da:pola:namiya ebe inamabu ebe Unu Duliyomololo da:pola:na ebe nanitabo amamate inamabuno uli keba kunula:ka: eba kunula. Iyo, me opo inamabuno tanaloma: ibino talenate dabirole inamabuno kalimano tanalodo keba kunu kawokalaiye, eba kunu Unu Duliyomololo da:pola:na ebe inamabuno talenate atumu kalimano tanalodo kawokalaoma:na:. Wiyasiya kapiya tanalote iyama: eda:na, Unu Duliyomolono talenate kawokalama: me opono dabirole inamabuno kalimate ka:modobona:, iyo, Unu Duliyomolono inamabuate Unu Duliyomolono wade kalimanomo kapiyado talenama: keda:oma:na:. <sup>24</sup> Ebe mabuma: me opolo da:enami Kelisote ebe Godoko amamateno motono Talena Baiamo ka:nopegiya:, ao, ebete iyatawiya me opolo da:ena ebe moto ebe Unu Duliyomolono nanitabo amamate motono ulima: eda:na. Ebema: kalakala kawonomola, ebete a mabuma: Unu Duliyomolamo a:nopegiya, iyo, me tetelo ebete Godokono ololo apulo uwomua: uwomua: tetelo ebolo bokolinamene.

<sup>25</sup> Ega:walo me tanalo idila, Kelisote Unu Duliyomololo eba okolinalo ebete ebena kalima Godotamo iyaiya tete epetapilo walo a:kikamenakomene. Iyo, kebe epate me opolo kalimagono ikameo woko dosiyodilonakiya ebe wokopi keba kunula:ka: ebe eba kunua:, mabu dopamo ebe wokopi magumulo ibino Watodawate a:ka:tuwa: ulama bilibilinomolo kapiya tetenomolo Talena Bainomamo eba nopegalo dabirole inamabuno kalima Godotamo ebo nikameonaki. <sup>26</sup> Ebema: nanitabola, Kelisote eba kunu me opo woko dubuma: nediyataleka:, ebete me opo osiyodilo mabune wagilimite me teta:mo pemaiga tete epetapi bilibilinomolo a:e temeteme magumudo ebena kalima Godotamo bikameonanakona:. Wiyasiya ebena tanalo eba kunua:. Ao, me opono uwomu tete tatalima: eba eda:nalo, ebete kapiya tetenomolo pemaigate ebe a:ka:tuwa: ebena ape kalimagono nilakapo inamabuma: ebo midiya, ebete ebena a:e temeteme magumudo a bilibilinomono kuba osiyodilole tanalo iyabaiamo nanitabolo kowataaema:.

<sup>27</sup> Nanitabola, me opo epo bilibilinomono tanalo ma kunula, lumagi idite kapiya tetenomolo a:ete, Godote modobo wiya ebetamo kikaema: ebena iyaiya osiyodilole tanalo ebo kanagilamelemene. <sup>28</sup> Ebema: numa:la:, Kelisoko ebe atumu, kapiya tetenomolo ebe a:ka:tuwa: ebena ape kalimagono nilakapo inamabuma: da:midiya, epo epetapi bilibilinomono kuba osiyodilole tanalo iyabaiamo alomonomo ebo alomolamiya. Ebe mabuma: ebete walo da:ka:pemene, ebe tetelo ebete epetapino kuba osiyodilole tanalo egebolelaema: walo a:ka:pa:emene, ao, ebe tetelo piyate ebena pe tanaloma: olowiolo demakopelena, ebete ebe epono igilo nanitabolo mula:lalamete uwomua: uwomua: tetelo iba:go bokolinamene.

## 10

### *Kelisokono Kalimate Aimano Kuba Osiyodilole Mabuma: Kapiya Tetenomolo Deka:ka:liya*

<sup>1</sup> Numa:la:, Godote a Yu epono ewoniatamo dikalamiya ebe Totomu Tabono tanalate kebe iyaiya tanalo kawokalilamiyale, ebe tanalo ebe Unu Duliyomololo da:pola:na ebe wadewade tanalono uli keba kunula:ka: eba kunula, iyo, walone tetelo ale ebe nanitabo igilono iyaiya tanalo Godogodone ka:nuwatemalema:. Ebema: nanitabola, dopamo tetelo wokopiate ulama epetapi bilibilinomolo kalimagono inamabu Godotamo walo ikameonakiya, walo ikameonakiya, eba kunu wagenlenamiya, wiyasiya ebe kalimagono ikameo tanalate ka:modobonamia: Godoko amamatema: da:pelamenakiya ebe epono tepo magumuno woki ka:tuputupuilaema:. <sup>2</sup> Iyo, dopamo tetelo ibino Godotamo kalimagono ikameo tanalate ibino iyaiya kuba osiyodilole tanalo nanitabolo negebolelamiyataleka:, iba:te ibino tepo magumulo kuba itana: tanalo eba iyatawanalo tete idilo kalimagono inamabu ebetamo walo a:kikameiyana:. <sup>3</sup> Wiyasiya ibino osiyodilo tanalo eba kunua:. Ulama epetapi bilibilinomate eba petolamelo, iba:te Godotamo kalimagono inamabu ikameo tanalodo ibino tepo magumulo ebo iyatawaonakiya, ibi kuba osiyodilolepila, <sup>4</sup> mabu me tanalo nanitabola, kau-goeogoeo ega:walo gautu-goeogoeono kalimate ka:modobona: epono kuba osiyodilole tanalo egebolelamete ibino tepo magumune iyabaiamo nanitabonomolo kowatalaema:.

<sup>5</sup> Me mabuma: Kelisote me opamo pea:no wiyasiya ebena pe tete tatalima: eba eda:lo, ebete Godotamo ma kunu giya,

“Inamabuno kalima ega:walo nilakapo inamabu epetapi epagodone uwatema:,  
 a:ma: a:imano ubi nanitabolo kiyata:wena:,  
 ebe mabuma: a:ma:le naimano ape natamo ikanamiyata,  
 nale ibi mabuma: naimano ape kalimagono nilakapo inamabuma:  
 midite a:ma:tamo kikametama:.”  
<sup>6</sup> Nanitabola, epate dabirole inamabu elamo madolamete  
 a:ma:tamo dikameotanaka,  
 ebe ikameo tanalate a:ma: kalakalakobi ka:miditana:,  
 iyo, ibino iyaiya kuba osiyodilole tanalo iyabaiamo kowatalaema:,  
 a:ma: kalimagono inamabu iba:godone uwatema: ubia:nola.  
<sup>7</sup> Ebema: nale ebe tanalo eba iyatawalo negemo,  
 ‘Na mela, a:imano ubi tanalo nanitabolo kosiyodiloma:,  
 iyo, a:ma:le a:imano Totomu Tabono Bukalo  
 nale kebe tanalo kosiyodiloma: dawokalimina,  
 na ebe tanalo nanitabonomolo kosiyodilomamo.’ ”

<sup>8</sup> Ebema: nanitabola, me tabo kiyawao magumulo Kelisote dopamo negiya, “Godo, epono kuba osiyodilole tanalo iyabaiamo kowatalama:ema:, a:ma:le iyaiya inamabuno kalima ega:walo nilakapo inamabu epetapi ega:walo dabirole inamabu epetapi elamo demadolamenaka, ebe inamabu iba:godone uwatema: a:ma: ubia:nola, iyo, iba:te ebe iyaiya ikameo tanalodo a:ma: kalakalakobi ka:miditana:.” Iyo, nanitabola, epate ebako inamabu Godotamo ikameoma: ebena Totomu Tabote ibi na:totomulatelena, wiyasiya Kelisote Godokono tepo magumuno nanitabo tanalo eba iyatawalo, ebete ebe inamabu uwatema: ubia:noma: ebema: giya. <sup>9</sup> Ega:walo ebete me tabo idi moga:melo na:kegiya, “Na mela, na a:imano ubi tanalo



nanitabonomolo kosiyodilomamo.” Ebema: kalakala kawonomola, Godote dopamo kebe nopo kiyatiyale, Kelisote ebena kalimagono ikame tanalodo ebe tagala nopo kalimagono ikameo tanalo iyabaiamo eba iyatilo oli nopo idi ebo kodakodaimiya. <sup>10</sup> Iyo, Ya:su Kelisote Godokono ubi tanalamo eba tuduwatalo ebena ape kapiya tetenomolo kalimagono nilakapo inamabuma: midite ebetamo dikamiya, ebete ebe tanalodo a nanitabokobi midipi bilibilinomono kuba osiyodilole tanalo egeboleamete a ebena wadetalenapima: ebo midiya.

<sup>11</sup> Nanitabola, dopamo tetelo Godotamo kalimagono ikameopi magumulo ibi bilibilinomate egela bilibilinomolo ibino woko eba osiyodilotalo, tete epetapi bilibilinomolo atu kalimagono inamabu ebetamo ebo ikameonakiya, mabu ebe kalimagono ikameo tanalate modoboa: epono kuba osiyodilole tanalo egebolelamete ibino tepo magumune iyabaiamo nanitabonomolo kowatalaema. <sup>12</sup> Wiyasiya kalakala kawonomola, Kelisokono tanalo iyanomola. Ebete epo bilibilinomono kuba osiyodilole mabuma: ebena ape kapiya kalimagono nilakapo inamabuma: midite Godotamo ebo ikamiya, ebema: uwomua: uwomua: tetelo iba:godolo kuba idite walo a:kitanamene. Nanitabola, ebe woko dopoliya ebete tote Godokono tumudi apuamo nokolite, <sup>13</sup> ebene ebete ebolo ebena Kawo Elawodawano tetete awokalama: makopelena, iyo, ebe tetelo eba:go da:gowelaona Godote ibi ebena agowa puti baima: nanitabolo ka:midilimene. <sup>14</sup> Ebe mabuma: Kelisote ebena ape kapiya tetenomolo kalimagono nilakapo inamabuma: da:midiya, ebe gabodo ebete kebe epono kuba osiyodilole tanalo kegebolelamiyale ebete ibi Godokono talenapima: ebo midiliya, iba:te uwomua: uwomua: tetelo eba kunu tuputupupinomoma: keda:onama:

<sup>15</sup> Ebene Godokono Uliyanate ebena Buka tabono tanalamo Kelisokono wade osiyodilo tanalo atumu kawokalimina, iyo, ebena dopo tabote ma kunu itana,

<sup>16</sup> “Na Kawodawate negemo, tete tatalila,  
na oli nopo naimano epatamo  
ma kunu kiyatimamo,  
nale naimano iyaiya totomu taboma:  
ibi gito akanalemo,  
ao, na wiyasiya ebe totomu tabo ibino tepo magumunomamo  
ega:walo ibino woki mabuamo kakulolelaemamo.”

<sup>17</sup> Ebene ebete tabo moga:melo walo na:kegena, “Uwomua: uwomua: tetelo nale ibino egege ega:walo kawokawo kuba osiyodilole tanalo walo a:kemalagidilolenamo.” <sup>18</sup> Ebema: nanitabola, Godote epono kuba osiyodilole tanalo bilibilinomo eba kunu egebolelamete da:dodolomatililaemene, ebe tetelo epono kuba pola:lamena:no iba:te ebetamo kalimagono inamabu walo a:kikameonama:na:

*Ya:sute Gabo Osiyodiliya Nanitabokobi Midipiate Godoko Niyakabonomamo Ka:pelaema:*

<sup>19</sup> Ebema: naimano nanitabokobi midipi ekakiala:, ale Godoko amatema: Ya:sukono kalima ka:ka:liya tanalodo ebena Talenanomo Baiamo tolea:no ka:nopila:omalema:. <sup>20</sup> Nanitabola, ebete a:e magumulo ebena ape Godotamo dikamiya, ebete Talena Bainomo kaliku ubili ebo a:iyamidiya ale ebamo ka:nopila:oma:, mabu ebena ikame tanalodo ebena ape ebe

kaliku ubili keba kunula:ka: eba kunu ediya, iyo, ebete kebe oli gabo atamo dosiyodiliya, ebe gabo ebe uwomua: teteno igilo gabola. <sup>21</sup> Ebema: kalakala kawonomola, Unu Duliyomololo da:ena ebe Godoko Amamate Motolo Ya:sute ebetamo a mabuma: kalimagono ikameopino Unu Watodawanomoma: eda:na, ebene piyate ebe motolo Godoko damamatena ebe ebe epo bilibilinomono ulamedawala.

<sup>22</sup> Ebe mabuma: modobola aimano tepo magumulo woki bilibili tanalote itana:no, ale woki bilibilia:noma: eba eda:onalo aimano nanitabokobi midi tanalodo Godoko niyakabonomamo ka:nemaimiomalema:. Nanitabola, Kelisote dopamo aimano tepo magumamo ebena kalima danamogamidaoliya, ebema: me tetelo aimano tepo magumuno wokite kuba osiyodilolepima: keka:mina:, ega:walo ale me tanalo idi iyatawala, ale aimano apeno daleyana tanalo atumu ka:kukulaleaema: obamo iyalo a:niwitiyama:. <sup>23</sup> Ega:walo ale kebe wade wiya Godogodone laema: olowiolo demakopelenaema:, modobola ale ebe wade tanaloma: nani tabo epatamo eba kiyawaonalo ebe wade woki uwomu teta:mo kodakodalo batila:nama:, mabu nanitabola, Godote a mabuma: kebe tanalo osiyodiloma: nanitabolo degiya, a iyatawala ebete ebe tanalo nanitabonomolo kosiyodilomene. <sup>24</sup> Ega:walo modobola a magumulo idite idino tanalo malagidilolo bowalubiinakoma:, ale epetapiatamo wadewade tanalo eba osiyodilolelo Godokono nilakapo tanalo ebo kawokalimina:. <sup>25</sup> Ega:walo nanitabokobi midipi epetapiate me tetelo keba kunu kowagelene, ma kunu iba:te sosi epo epetapiago aladabuti tanalo iyalo datepiya, modoboa: ale ibi ibamilatelema:. Ale wiyasiya Kawodawano Kawo Egelate pe tatalima: eda: tanalo eba iyatawaonalo, modobola aimano nanitabokobi midi mabuma: eba aladabutionalo idite idi iyaiya walubi tabono tanalamo ba:kodakodaimiunakoma:.

*Godote Nanitabokobi Midia:pino Tanalo Nanitabonomolo Kanagilamelelaemene*

<sup>26</sup> Nanitabola, ale Godokono tabono iyaiya nanitabo tanalo aimano tepo magumulo uwatete, ebene ale kuba osiyodilole tanalo miyapa:no aimano ubilo gito dosiyodilolenakoma:, ebako kuba osiyodilole tanalo kegeboleaema: Godotamo kalimagono ikameo tanalote kitana:. <sup>27</sup> Ebe mabuma: ebako epate kawo tole magumulo me kapiya tanalo niyatawaoma:na:, Godote kebe Egelalo epono tanalo danagilamelelaemene ebe Egelate nanitabolo ka:pemene, iyo, ebe tetelo piyate eba:go da:gowelaona ebete ibi ebena elawo elanomamo ka:kubailaemene.

<sup>28</sup> La: iyatawalata, Godote dopamo Mosesedo kebe Totomu Tabo epatamo dikalamiya, ebe tetelo idawate ebe tabamo tuduwatama: ubia:noma: eba eda:nalo, netewa o netewa-kapiyapiate ebena tuduwata: okoli tanalo uimite ebe tanalo kapimiya watowatopiatamo dapawokalimiya, epate ebe lawete nilakapo ebetamo awokalimia:no gito anakapumiya, iyo, Godokono epate ebe tanalo kosiyodiloma: ebete ibi analiya. <sup>29</sup> Ebema: la:imano woki keba kunula:ka:? A tetelo Godokono Gudute atamo a:piya, ebema: kebe lumagite ebetamo tuduwatama: ubia:noma: deda:na, Godote ebetamo kuba wiya dikaemene beda: kawonomola:ka:! Eiyey, Ya:sukono kalimate Godokono oli nopo eba kodakodaiminalo, ebe modobola ebe lumagino kuba iyabaiamo kowataema:! Wiyasiya ebe lumagite ebe wade kalima dologala inamabuma: eba genalo, kebe Walubidawate ebetamo nilakapo awokalima: dowagelenako ebete ebe Wade-talena Uliyana malogonako.

<sup>30</sup> Nanitabola, ale aimano Kawodawano tanalo iyatawala, ebete dopamo me tabo nanitabolo egiya, "Piyate natamo kuba tanalo dosiyodilolenaka, nale naimano elawo magumulo iba:tamo modobo wiya kikalaemamo,"

ega:walo ebenu tabo moga:melo walo na:kegiya, “Na Kawodawate naimano epono tanalo kanagilamelelaemamo.” <sup>31</sup> Eiye, Elawodawa Godote uwomua: uwomua: tetelo digilonamene, ebete lumagi idi ebenu kuba wiya ikaema: delaemene, ebenu tole tanalo beda: kawonomola:ka:!

<sup>32</sup> Ebema: dopamo Godokono alote la: eba pukuilamenalo la: keba kunu kilukuliawenaima, modobola la: ebe tanalo wadenomamo walo na:kemalagidilala:, iyo, la:le la:imano nanitabokobi midi mabuma: kawokawo temeteme eba iyatawaonalo la: wiyasiya kodakodalo lamota:onaimata. <sup>33</sup> Ebene tete epetapilo nanitabokobi midia:piate la: eba malogolelo temeteme epetapi gito ikalamenakiyata, ega:walo tete epetapilo iba:te nanitabokobi midipi epetapi namutupiatamo eba kunu eba wagelelano, la: wiyasiya tolea:no ebe ekakiago ebo lamota:onaimata. <sup>34</sup> Ebema: kuba osiyodilolepi epetapiate la:imano nanitabokobi midi mabuma: la: epetapi la:imano namutupiago idoko motamo gito diyaleketiyala, la: ebolo temeteme epetapi kapimiya iyatawaonakimata, ebenu iba:te la:imano motono inamabu elawamo duwatelametiya, la: wiyasiya Godokono kalakala ebo lawiyamata. Iyo, ebe tetelo la: iyatawaiyamata, Godogodolo uwomua: uwomua: tetelo la: mabuma: da:pola:lametanamene, ebe inamabuno wade tanalote la:godolo dalatidiya ebe inamabuno wade tanalo nanitabolo nodoilina.

<sup>35</sup> Ebema: la:le ibi tolelamea:no keba kunu kilukuliawenama, modoboa: ebe tanalote la:godolo alatidima:, mabu Godote la:imano nanitabokobi midi mabuma: wade wiyanomo la:tamo kikalaema:ta. <sup>36</sup> Iyo, modobola la: me tetelo la:imano temeteme magumulo kodakodalo walo na:kelamota:onala:, mabu Godote la:tamo ikalaema: nani tabonomo dopamo keba kunu kegiyale, la: eba kunu ebenu ubi tanalamo tudila:o tanalodo wade wiya kuwatemamota. <sup>37</sup> Nanitabola, Godokono Bukalo tabo idi ma kunu gena,

“Kebe Kawodawate da:pena,  
tete tatalila ebe nanitabolo ka:pemaigamene,  
iyo, ebete ebenu wade tetenomolo ka:pemene.

<sup>38</sup> Ebema: epo magumulo  
potele naimano tuputupudawama: deda:na,  
ebete na nanitabokobi midini tanalodo  
nanitabo igilo kelaemene,  
wiyasiya kebe dawate nanitabokobi midi tanalone dolobigamene,  
ebe mabuma: naimano kalakalate ebetamo a:kitanamene.”

<sup>39</sup> Wiyasiya kalakala kawonomola, piyate Godoko nanitabokobi midi tanalone olobila:oa:no ibino igilo mula: tanalo kodakodalo datila:na, a ebe epola, iyo, Godokono nanitabo igilote agodolo akalatidimene.

## 11

### *Godoko Nanitabokobi Midi Tanalo Ebe Kawo Tanalomola*

<sup>1</sup> A Godoko nanitabokobi da:midinama:, ebe tetelo aimano tepo magumulo ma kunu malagidilonama:, ale kebe wade wiya laema: olowiolo dilukulionama: ebe tanalote atamo nanitabolo ka:pemene, iyo, a iyatawanomola ale kebe wadewade tanalo aimano balidinomamo ulamea:no ebe tanalate nanitabolo ba:pola:na. <sup>2</sup> Numa:la:, a Yu epono ewonino tetelo piyate nanitabokobi midi magumulo dilukulionamiya, Godote ibino nanitabokobi midi tanaloma: iba:tamo nekalakalanami.

<sup>3</sup> Ebene a aimano nanitabokobi midi tanalodo niyatawaonama:, Godote ebenu Unu Duliyomolo ega:walo me opo kawonomo ebenu tabo kiyawao

tanalamo osiyodiloliya, iyo, ale aimano balidinomamo dulamenama: ebe inamabu bilibilinomo ebete inamabu ida:mo kosiyodiloliya:.

*A:ibolokono Nanitabokobi Midi Tanalo*

<sup>4</sup> Mabu A:ibolote Godoko nanitabokobi na:midinami, ebema: ebete kalimagono inamabu Godotamo modobolo ikamiya, iyo, ebete nanitabokobi midi tanalodo dikamiya ebe inamabuno wade tanalote Ka:inikono ikame tanalono wade tanalo ebo odoliya. Nanitabola, Godote A:ibolokono ikame tanaloma: eba kalakalalo ebe tuputupudawama: giya, ebema: ebena igilote me opolo dolopoligiya, wiyasiya uwomua: uwomua: tetelo ebena nanitabokobi midi tanalono osiyodilo tanalote me opo epatamo gena.

*Inokokono Nanitabokobi Midi Tanalo*

<sup>5</sup> Mabu Inokote Godoko nanitabokobi na:midinami, ebema: a:e tanalote ebetamo maiga:no, Godote wiyasiya ebe Unu Duliyomolamo gito da:pelawa:digiya, ebe tetelo ebena epate ebena ape nipo wadiya. Iyo, Godokono Bukate a niyatuamena, Godote Inokoko pelawea:no dopamo ebete ebena nanitabokobi midi tanaloma: ebetamo nekalakalanami. <sup>6</sup> Ebema: numa:la:, me opo epo magumulo potele Godoko nanitabokobi midia:no, ebe lumagite ebe kalakalakobi midima: modoboa:, mabu potele Godoko niyakabamo pema: dowagelena, ebete ebena nanitabokobi midi tanalodo ma kunu niyatawamene, Godote nanitabolo bokolina ega:walo potele ebe uima: ubi diyatina, ebe lumagite ebegodone wade wiya nanitabolo kelaemene.

*Nowakono Nanitabokobi Midi Tanalo*

<sup>7</sup> Mabu Nowate Godoko nanitabokobi na:midinami, ebema: Godote walone teteno olalati tanalote maigama: daniya, ebete ebena tabamo tuduwatalo kawo penomo ebo osiyodiliya, ebe ega:walo ebena moto epono igilo ka:mula:lalaema:. Iyo, kebe olalati tanalate me opamo demaimioma:na:, Nowate ebe tanalo ebena balidinomamo ulamea:no, Godoko nanitabokobi eba midilo ebete ebe tanalodo opo epono kuba ilukuli tanalo dawokalimiya, Godote wiyasiya ebe tuputupudawama: ebo ka:miya.

*A:ibalayamako Ega:walo Selako Ibino Nanitabokobi Midi Tanalo*

<sup>8</sup> Mabu A:ibalayamate Godoko nanitabokobi na:midinami, ebema: Godote ebe ebena nabiwino opo atepate oli opo ida:mo toma: daniya, ebe opote kebolo ditana A:ibalayamate iyatawa:noma: eba eda:lo ebe tabamo gito tuduwatiya. Ebema: Godote ebe opo ebetamo ikaema: nanitabolo degiya, <sup>9</sup> A:ibalayamate ebe tanalo nanitabokobi midite ebe oli opamo tote, ebene ebete tete geyageyanomolo kapeladawama: eba neda:nalo ebena epago sipi-goeogoeono tama awokowiamidaole motolo nokolinami. Ebema: nanitabola, A:ibalayamakono walogabo apune ebena gudu Aisa:keko ega:walo ebena ewono gudu Ya:ikoboko, iba:te ebe atu opolo ibino epago sipi-goeogoeono tama awokowiamidaole motolo kilukulionamiya, mabu Godote ebe opo iba:tamo atumu nanitabolo ikalaema: iyalo egiya. <sup>10</sup> Ebene A:ibalayamate me opolo depata:nami ebena okoli duliyomolo nanitabolo kowadinamia:, mabu ebete nanitabokobi midi tanalodo ma kunu malagidilonami, walone tetelo ebete Godokono Unu Duliyomolo ka:nuimene. Nanitabola, Godote ebe Duliyomolono osiyodilo nopo keba kunu kiyatiyale, ebete eba kunu eba osiyodilolo ebe Duliyomolono kodakoda kalanomo ebo ga:dimiya ebe kalate uwomua: uwomua: tetelo kitanama:.

<sup>11</sup> Mabu Selate Godoko nanitabokobi na:midinami, ebema: ebenu abele tetenomolo ebe gudiana: noma: eba eda:nalo, Godote ebetamo elawo ikamiya ebenu awi A:ibalayamako mabuma: gudu kala:ima: . Iyo, Godote iba:tamo gudu ikala:ema: dopamo nanitabolo degiya, A:ibalayamate ebe tabo nanitabokobi midite, <sup>12</sup> ebene ebete a:e tatalinomoma: eba eda:lo ebenu gudute Selagodone ebo awokaliya. Nanitabola, ebe gudugodone ebenu walone guda:te bilibilinomoma: eda:iya, tobolo ununo mawe:le keba kunula:ka: ega:walo kewa: kolomo balano wiyo keba kunula:ka:, eba kunu lumagi idite ibi ka:la:miolema: modoboa: .

*Nanitabokobi Midipino Wadewade Tanalate Unu Duliyomololo Da:pola:lamena Ebe Tanalo*

<sup>13</sup> Ebema: numa:la:, nale kebe epono tanalo la:tamo kawokalilaemo, iba:te nanitabokobi midi magumulo eba ilukulinalo, Godote iba:tamo kebe wadewade tanalo kikalamolema: nanitabolo degiya, iba:te ebe tanalo me opolo uwatea:no gito a:elaiya, iyo, iba:te mulune putitatate ebe wadewade tanalo Unu Duliyomololo ibi mabuma: pola:nalo ebo nulamenamiya. Nanitabola, iba:te niyatawaonamiya, ebe Unu Duliyomolote ibino nanitabo opoma: deda:na, ebema: iba:te opo duliyomololo eba ilukulinalo ibi a:ka:tuwa: ibi kapelapima: gelanakiya. <sup>14</sup> Ebema: numa:la:, piyate me opolo ibi a:ka:tuwa: ibi kapelapima: degelana, ebe epate ibino tanalo ma kunu awokalimina, iba:te oli opo idinomo laema: olowiolo ilukuliona, iyo, iba:te ebe opo duima:na: ibino oponomoma: ebo keda:mene. <sup>15</sup> Ebe mabuma: piyate nanitabokobi midi magumulo dopamo dilukulionamiya, ibino ewoniate kebe opolo kawokalaiye iba:te ebe opo atepate walo kemalagidilonamia: . Nanitabola, iba:te ebe opamo olowamioma: ubi niyatiyataleka:, ebe tanalo osiyodiloma: gabo iba:tamo balagiliyana:, wiyasiya ibi ubia:nola. <sup>16</sup> Ao, iba:te wiyasiya Godokono Unu Duliyomololo wade duliyomolonomoma: eba gelanalo, ebamo nemaimioma: kawonomamo malagidilonamiya, ebe mabuma: Godoko ilipokobi kolowina: iba:te ebe ibino nani Godoma: ka:minama:, iyo, ibi mabuma: ebete ebe Unu Duliyomololo iyalo osiyodilolamiya.

*A:ibalayamako Ega:walo Yu Epono Ewoni Nabi Epetapino Nanitabokobi Midi Tanalo*

<sup>17-18</sup> Mabu A:ibalayamate Godoko nanitabokobi na:midinami, ebema: ebete ebenu gudu Aisa:keko ebetamo ikaema: ka:wokolomiya: . Numa:la:, dopamo Godote A:ibalayamatamo me tabo nanitabolo egiya, “Me gudu Aisa:kegodone a:imano walone gudi bilibilinomate kemaimioma:na: .” Wiyasiya Godote A:ibalayamakono nanitabokobi midi tanalo kuima:, ebete Aisa:keko kalimagono nilakapo inamabuma: midite ebetamo ikaema: daniya, ebe tetelo A:ibalayamate ebenu tabamo tuduwatama: ebo olosiyodiliya, <sup>19</sup> mabu ebete ebenu tepo magumulo ma kunu malagidiliya, Godoko modobola Aisa:keko a:e magumune igilamo walo kakadipatema: . Ebema: nanitabola, A:ibalayamate ebenu gudu Aisa:keko Godotamo ikaema: ebenu tepo magumulo ebe iyalo a:ema: eba gelo, Godote ebe gudu ebetamo igilolo walo gito kikamiya.

<sup>20</sup> Mabu Aisa:kete Godoko nanitabokobi na:midinami, ebema: ebete ebenu gudi Ya:ikoboko ega:walo Isoko mabuma: Godoko naniya, ebete walone tetelo ibi netewapi keba kunu na:kowalubilinakomene.

<sup>21</sup> Mabu Ya:ikobote Godoko nanitabokobi na:midinami, ebema: ebenu a:e tanalote tatalima: eba eda:lo, ebete Yausepegodone dawokalaiya ebe



walone gudi mabuma: Godoko ebo aniya, ebete ibi wadenomamo kowalubilinama:, iyo, ebe tetelo ebete ebena gaubago maigate ebena ololo opamo tuduta:midalo Godotamo towetowe tabo eba kunu kiyawaiya.

<sup>22</sup> Mabu Yausepete Godoko nanitabokobi na:midinami, ebema: ebena a:e tatalima: eba eda:lo ebete Isalaela epo ebo analiya, iba:te walone tetelo Isipiti opone eba tolamelolo ebena goa kowatama:.

*Mosesekono Nabiwila Menokola Ibino Nanitabokobi Midi Tanalo*

<sup>23</sup> Mabu Mosesekono nabiwila menokola iba:te Godoko nanitabokobi na:midinamiya, ebema: ebete dawokaliya iba:te netewa-kapiya saganamo ebe ebo waminiya, Isipiti opono Kawo Elawodubu Pa:lote ebe anakapumikapoma:. Iyo, iba:te ibino a:lia:li gudu wadenoma: eba gelalo, ebema: Pa:lote Isalaela epono baibai gudi anakapulaema: danaliya, iba:te ebe tabamo tudila:oa:no ebetamo ka:toletoleiya:.

*Mosesekono Nanitabokobi Midi Tanalo*

<sup>24</sup> Mabu Mosesete Godoko nanitabokobi na:midinami, ebema: ebete apete dubu teta:mo demaigiya, ubia:noma: ebo ediya epate ebe Pa:lokono buweleno guduma: ka:ima:. <sup>25</sup> Iyo, ebe tetelo ebete ebena ubi ma kunu kiyatiya:, ebete tete da:pesolo iyaiya kubakuba tanalo eba osiyodilolelo me opono kalakala kelawa:tepama:. Ao, ebete wiyasiya ubi ma kunu iyatiya ebena nanitabokobi midi mabuma: Godokono epo epetapiago temeteme kuwatema:. <sup>26</sup> Ebene Mosesete walone tetelo ebena wade wiya Godogodone da:nelaemene, ebete ebe tanalo kawonomamo nemalagidilonami. Ebe mabuma: epetapiate ebe demalagonakiya, ebete Godokono Alibodawa Kelisoko mabuma: ebe temeteme laema: modobonomoma: eba gelo, Isipiti opono kawokawo inamabu bilibilinomo uwatema: ubia:noma: eda:te ebena wokilo ebe inamabu dologala inamabuma: midiliya.

<sup>27</sup> Mabu Mosesete Godoko nanitabokobi na:midinami, ebema: me opo epate kebe Kawodawa ibino balidinomamo umia:no, Mosesete ebe Kawodawa ebena tepo magumuno wokilo eba uminalo, Kawo Elawodubu Pa:lokono dowa tanaloma: tolea:no Isipiti opone gito tiya, iyo, ebete iyaiya temeteme epetapi magumulo ebena tepo magumuno woki eba kodakodaiminalo ebena Kawodawa kowaloma:tama: woki iyakobi ka:midiya:. <sup>28</sup> Ega:walo Mosesekono nanitabokobi midi mabuma: ebete Godokono tabamo tuduwatalo ebena Isalaela epo ebo analiya, iba:te dopo Aduga:la Soliyomu\* eba osiyodilolo ibino iyaiya motono gigiyamo sipi-goeono kalima kanamogamidaolema:, Godokono A:e Nopodawate ibino dopo dubu gudi anakapulamekapoma:.

*Isalaela Epono Nanitabokobi Midi Tanalo*

<sup>29</sup> Mabu Isalaela epate Godoko nanitabokobi na:midinamiya, ebema: Isipiti epono gowelaopiate ibi anakapulaema: da:na:ma:taliya, ebe tetelo Godote Kalimakalima Kewa: Kolomono obo gagale damelama: da:midiya, iba:te apuamo olalatia:no na:iwaliya. Wiyasiya numa:la:, Isipiti epate ebe atu gabodo ibi elawamo da:na:ma:taliya, ebe tetelo kolomono obote ibi bilibilinomo gito analopamidaliya. <sup>30</sup> Ega:walo tete idilo Isalaela epono nanitabokobi midi mabuma: iba:te Godokono tabamo tudila:olo Yeliko kawo duliyo molo balado sebeni egelalo nanakopa:te tanalo dolopoligiya, Godote ebe duliyo molo kawokawo kalanomo eba anabu ilamelolo opamo gito gudiya.

\* **11:28:** Buka ka:la:mioledawa, a:ma: me Soliyomuno magumu iyatawama: ubi diyata:emene, modobola a:ma: Ma:t 26.2 buka apuno walubi tabo numiye.

### *La:iya:bakono Nanitabokobi Midi Tanalo*

<sup>31</sup> Ega:walo me tanalo idila. Godote ebe Yeliko duliynomolo kubaimia:no, dopamo Isalaela epo magumulo iba:te kebe epo ebe duliynomolo diya gabodo uima: danaliboliya, ebe dubu netewate ebe duliynomolono modoboa: tanalo ulaema: ebamo gito nemaimiya. Ebe tetelo Yeliko duliynomolo epo magumulo kamiyale idi La:iya:bako, ebe dopamo dubu bilibili kamiyalema: eda:nami, ebete Godoko nanitabokobi midite ebe dubu ebeno motamo kalakalago uwatete ibi ebo walubiliya. Ebema: nanitabola, me kamiyaleno nanitabokobi midi mabuma: Godote Isalaela epono gowelaopiatamo talena iyatiya, iba:te Yeliko duliynomolono nanitabokobi midia:pi bilibilinomo eba anakapulamelolo ebe kamiyaleno igilo ebo ka:mula:ema:.

### *Iyaiya Tuputupu Epo Epetapino Nanitabokobi Midi Tanalo*

<sup>32</sup> Ebema: nale la:tamo nanitabokobi midipi epetapino oi atumu ba:ka:kiyawaomo? Naimano woki ma kunula, tete modoboa: ibi bilibilinomono tanalo wadenomamo kawokalilaema:, iyo, Gidiyonoko, Belakako, Sa:msoniko, Yepatako, Da:ibidiko, Sa:miyoloko, ega:walo Godokono woki awokalimipi epetapi, ibi bilibilinomono osiyodilole tanalo da:pola:lamena, na modoboa: ebe tanalo bilibilinomo la:tamo kiyawaoma:. <sup>33</sup> Nanitabola, ibi epetapiate ibino nanitabokobi midi tanalodo gowelao magumulo opo epetapino wato kikopu eba uwatelo ibino kapela kawokawo elawodubuma: ebo eda:onakiya. Iyo, iba:te ibino ilukuli magumulo tuputupu tanalo dosiyodilolenakiya, ebema: Godote iba:tamo kebe wadewade tanalo ikalaema: nanitabola danalenaki, iba:te ebe tanalo gito uwatenakiya. Eba kunu tete idilo ibi epetapiate layono-gaagaa gelebadikobi gito midiliya, ebe elawoelawo inamabuata ibi kubailamekapoma:. <sup>34</sup> Ebene tete idilo ibi epetapiate ibino nanitabokobi midi tanalodo elawo elanomo gito a:egaiya ibino igilate ebe elalo olopoligokapoma:, ega:walo tete epetapilo piyate ibi gowelaono gila:mo anakapulaema: dowagelenakiya, ebe epono elawo magumune iba:te Godokono walubi tanalodo gito alautionakiya. Iyo, iba:te ibino ape magumulo elawoa:noma: eba eda:onalolo, Godote wiyasiya ibi elawokobi ebo midilinaki, ebema: iba:te gowelao magumulo kawokawopima: eba eda:ololo tete epetapilo kapela opono gowelaopino iyaiya taneba kubanomamo alukolenakiya. <sup>35</sup> Ebene nanitabokobi midipi kamiyale epetapiate atumu ibino nanitabokobi midi tanalodo Godokono elawo ma kunu uminakiya, ibino a:elaopi magumulo ebete ibi epetapi igilamo walo a:kowadipalatenaki.

Wiyasiya nanitabokobi midipi epetapino tanalo eba kunua:. Iba:te idoko motolo eba ilukulinalo, kuba osiyodilolepiate kawokawo a:e temeteme ebo ikalamenakiya iba:te ibino nanitabokobi midi tanalone kolobila:oma:. Ebe tetelo ibi wiyasiya ubia:nola ibino nanitabokobi midi tanalo eba atepalo kuba osiyodilolepiate ibi idoko motone gito kanalibolema:, iyo, ibi iyatawala Godote ibino a:elao tanalodo ibi wade oli igilonomamo kowadipalatelemene, ebema: iba:te ibino temeteme magumulo gito na:elaonakiya. <sup>36</sup> Ebene kuba osiyodilolepiate nanitabokobi midipi epetapi eba malogolelo ibi pa:ka:pa:ka:mo ebo a:na:ma:ga:midaolenakiya, ega:walo iba:te epetapi auli ala:mo matuolamololenakiya idoko motamo gito niyalekenakiya. <sup>37</sup> Iyo, tete epetapilo iba:te nanitabokobi midipi eba anakapulamelolo ibi epetapi nokolamo mapelamenakiya, ibi epetapino ape tetenomodo ilonomo inamabuamo iyailinakiya, ega:walo ibi epetapino wato gila:mo gito migililame-nakiya.

Ega:walo me tanalo idila. Nanitabokobi midipi epetapi bilibilinomate me opolo inamabua:pima: eba eda:onalo wadewade kalikago kowapata:lamenakia:, iyo, iba:te modoboa: sipi-goeogoeo ega:walo gautugoeogoeo tama kaliku kapiya pupulionakia. Nanitabola, tete bilibilinomolo me opo epate iba:tamo iyaiya temeteme kubanomamo eba ikalamelolo <sup>38</sup> ibi wadewade epoa:ma: gelalo ibino iyaiya ilukuli duliyyomolone elawamo da:na:ma:latelenakia, ebe tetelo iba:te bulu opamo ega:walo unuunu damelamo gito nalautionakia, iba:te ebakobako epoa: opolo damela gugu magumulo ka:nilukulionama:.

<sup>39</sup> Ebema: ebe nanitabokobi midipi bilibilinomono tanaloma: Godote iba:tamo nekalakalanami, ebena kalakala ibino nanitabokobi midimabuma: beda: kawonomola:ka:! Wiyasiya numa:la:, ebete iba:tamo kebe wadewade tanalo ikalaema: nanitabolo degiya, iba:te me opolo ebe tanalo nanitabolo kulamiya:, <sup>40</sup> mabu a piyate me tetelo dilukulionama:, Godote a mabuma: wade oli noponomo ma kunu iyatiya. Aimanu ilukuli tetete pemaiga:no ebete dopo nanitabokobi midipi mabuma: tanalo idi a:kosiyodilomene, wiyasiya kebe tetelo ebete a iba:go kapiyakobi da:midimene, ebe tetelo ebete a bilibilinomo kapimiya ebena tuputupupinomoma: ka:midimene.

## 12

### *Godokono Guda:te Me Opolo Eba Ilukulinalo Ebete Ibi Iyaiya Temeteme Tanalamo Diyatulamenako*

<sup>1</sup> Ebema: numa:la:, dopamo dilukulionamiya ibi bilibilinomate a a:ga:luatelo eba lamota:onalo, iba:te nanitabokobi miditanalodo kebe tanalo kosiyodilolenamiye ebe tanalo atamo awokalilama:. Ebe mabuma: ibi keba kunula:ka:, modobola a atumu agowa ukamidaole tanalo bilibilinomo aimano tolame gabone tametama:mo ka:niyalekemalema:, ega:walo kebe kuba osiyodilole tanalate a dematuoamoena, modobola ale ebe ale iyailite ginimi apuamo gito ka:miyapamalema:. Iyo, nanitabokobi midigabono uwomu teta:mo nemaimioma: kawonomamo eba malagidilonalo ale elawonomamo ebo ka:puila:omalema:, sukulu guda:te ibino kalakala egelelo keba kunu ka:puila:onake eba kunu. <sup>2</sup> Ega:walo modobola a tete bilibilinomolo aimano tepo magumuno wokilo Ya:suko wadenomamo buminakoma:, iyo, ebete aimano nanitabokobi miditanalono mabuma: eba eda:nalo a dopaeamete uwomuamo a wadenomamo kema-gataemene. Nanitabola, ebete kewa olotolowalo da:iya, ebete kebe kalakala Godogodone walone delaemene ebe kalakala ebena tepo magumuno wokilo ebo umiya. Me ebe mabuma: ebete ebena a:e tanalono kawokawo ilipo ega:walo temeteme tanalo malagidiloa:no wato kikopu ebo lawiya, iyo, me tetelo ebete Kawo Elawodawa Godokono tumudi apulo bokolina.

<sup>3</sup> Nanitabola, Ya:sute kuba osiyodilolepino dowa tanalodo kawokawo temetemenomo duwatiya, wiyasiya Godokono ubi tanalamo tuduwatama: woki iyakobi ka:midiya:. Ebema: modobola la: atumu la:imano temeteme magumulo ebe tanalo wadenomamo eba malagidilonalo la:imano nanitabokobi miditanalodo kuiwodopoma: eda:oa:no elawoa:noma: akoeda:oala:. <sup>4</sup> Numa:la:, Ya:sutamo demaigiya ebako a:e tanalote la:tamo kemaiga:, iyo, kuba osiyodilolepiate iyaiya temeteme epetapi la:tamo nanitabolo ikalamenakota, wiyasiya iba:te la: bilibilinomo magumulo kapiya dawa idi ebena nanitabokobi midimabuma: kanakapumia:.  
<sup>5-6</sup> Ebema: me kawo tanalo akododomatiala:. Godote la: ebena gudima:

ka:la:minata, iyo, ebema: ebenu Bukalo me tabote la:imano temeteme tanaloma: gena,

“Naimano gudu, temeteme tanalo epetapiate  
 Kawodawano ubi tanalodo a:ma:tamo maimiote,  
 ebete ebe tanaloma a:ma: diyatumitamene,  
 modobola a:ma: ebe iyaiya iyatumi tanaloma na:tuduwatiye,  
 ega:walo ebete a:imano kuba osiyodilo tanalo idima: kawiya danatamene,  
 a:ma: kuiwodopoma: akoeda:la:  
 Nanitabola, Kawodawate kebe epo nilakapolo demalagidilolena,  
 ebete ibi temeteme tanaloma iyatulamenako,  
 ega:walo ebete kebe lumagi ebenu guduma: degenako,  
 ebete ebe lumagino kuba osiyodilole tanaloma:  
 ebetamo iyaiya temeteme tanaloma wiya ikameonako.”

<sup>7-8</sup> Iyo, numa:la:, me opo kawonomolo nabiate ibino gudi walubilima: temeteme ikalame tanaloma ibi iyatulamenaka, iba:te kuba osiyodilole tanalo eba miyapalo wadewade tanalo kapiya kosiyodilolema: Ebema: la: iyaiya temeteme magumulo da:pola:wenama elawoa:noma: akoeda:oala:, mabu me opo epo keba kunula:ka: Godote eba kunu la: ebenu guduma: eba genalo la: temeteme tanaloma ebo iyatulamenakota. Ebema: nanitabola, ebete la: temeteme tanaloma iyatulamea: notaleka:, la:le ebenu nani guduma: a:keda:wena:, la: wiyasiya pilo gabodo dawokalaiya ebako guduma: beda:wena:.<sup>9</sup> Iyo, a aimano nabino tanalo iyatawala, a gudi egege tetelo iba:te iyaiya temeteme tanaloma a iyatuamenakiya, ale eba apepeolo wadewade woki ebo kuwatema: Ega:walo a me opolo eba ilukulinalo aimano nabino iyatulame tanaloma da:tudila:onakoma:, epate ebe tanalo aimano mulo wokima: gelanaka. Wiyasiya numa:la:, a me tetelo aimano Unu Duliomolono Nabiwitamo da:tudila:onakoma: ebe tanaloma mulo beda: kawonomola:ka:, mabu ebe tanalodo a nanitabo igilonomo ebegodone kelaemalema:!

<sup>10</sup> Ega:walo me tanalo idila. Me opono nabiate ibi a:ka:tuwa: ibino ubilo kebe tanalo wadewadenoma: degelanaka, ale ebe tanalo kosiyodilolema: iba:te iyaiya temeteme tanaloma tete da:pesolo a iyatuamenaka. Wiyasiya Godote ebenu wade igilo atamo ikaeaema: ubi niatina, ebema: ebete a kebe tanalo osiyodilolema: diyatuamenako a ebe tanalo nanitabolo dosiyodilolenakoma:, ebe tetelo ebete Wade-talenadawama: keba kunu keda:nale, a atumu talenapima: ka:keda:omalema:.<sup>11</sup> Iyo, nanitabola, ale aimano nanitabokobi midi tanalodo kapepeoma: kebe tetelo ale temeteme duwatema:, ale ebe temeteme tanaloma: kekalakalaonakoa:, wiyasiya numa:la:, lumagite ebako temeteme tanaloma wadewade woki duwatemene, Godote ebe gabodo ebetamo milo ega:walo tuputupu okoli tanalo eba ikamelo wadewade da:ima:te ebegodone nanitabolo bemaimionakomene.

<sup>12-13</sup> Ebe mabuma: modobola la: la:imano iyaiya temeteme magumulo elawoa:noma: eda:oa:no kalakala walo na:kelawiyala:, la:le la:imano kotamo wadewade tanalo eba osiyodilolelo la:imano agowamo Godokono tuputupu gabodo wadenomamo kowapata:lama:wenama: Eba kunu la: magumulo potele agowa tataidawama: deda:na, ebete temeteme magumulo wadekobi olowite walo na:kepata:mene.

*Nanitabokobi Mididawate Wadenomamo Nokolinamene, Godogodone Demaigana Ebe Igilo Mula: Tanalone Gakapoma:*

<sup>14</sup> Ebema: nanitabokobi midipiala; modobola la: la:imano ubi tanalo ma kunu niyatiniyala; la: epo bilibilinomago Kawodawa Godokono milo tanalago eba ilukulinalo la:imano osiyodilole magumulo ebe kapiya kalakalakobi ka:mida:wenama: Nanitabola, kebe lumagite aimano Kawodawa eba kunu kalakalakobi midia:no, ebete ebene ololo a:ka:nuimene. <sup>15</sup> Ega:walo Godokono nilakapo tanalodo demaigana, modoboa: la: magumulo idite ebe igilo mula: tanalone gama:. Numa:la:, kaka inamabunomote lumagino palilo apete, ebene ebete iyatawa:no lawete ebene guda:te naoma: iba:tamo dikalaemene, diyala, ebene motolo olalati kawonomote maigate ebene gudi magumulo epetapi bilibilinomate da:ba:elaoma:na:. Eiye, la: nanisiwale! La: magumulo idite ebene tepo magumuno dowo tanalodo ebako kaka inamabuma: eda:ma: modoboa:! <sup>16</sup> Ebema: Isote dopamo ebene kateneno ubi tanalono osiyodilole magumulo keba kunu kokolinamile, la: magumulo idite ebako dawama: eda:ma: modoboa:. Numa:la:, ebete Godokono iyaiya ubi tanalo malagidilolea:no, ebene bae kape kopoliyama: kapiya teteno bae ekawigodone eba lawelo ebene dopo guduma: eda: tanalo kawo tanaloo:ma: gelo ekawitamoo gito ikamiya. <sup>17</sup> Ebema: la: iyatawalata, walone Isote ebene woki iyakobi midima: dowageliya, ebete ebene nabiwitamo ipupago ebo tiya, ebene nabiwite Godoko kanama: ebene okoli magumulo ebe wadenomamo kowalubinama:. Wiyasiya Isoko niyala, gabote kitaniya: Godogodone wadewade tanalo kuwatema:, iyo, ebe modoboa: ebete dopamo kuba woki magumulo dosiyodiliya ebe tanalo walo iyakobi midima:.

*Potele Godokono Tabo Olowima: Ubia:noma: Deda:na Ebete Ebene Kuba Wiyasiya Nanitabonomolo Kelaemene*

<sup>18</sup> Ebema: la: piyate Ya:suko nanitabokobi da:mida:wenama, dopamo Moseseko tetelo a Yu epono ewoniate Godotamo kawo tolenomo magumudo keba kunu ka:pelamiye, la: ebetamo eba kunu ka:pelama:wiyaa:. Iyo, dopamo iba:te Sainai Ununomo Damelalo Godokono iyaiya tole ikalame tanalo ibino balidinomamo ma kunu ulamiya, ebe unu damelalo elawo elanomote eba waitalo, idoko kawonomote egelano alo da:muliya, kawo awanomote maigate ibi kubanomamo ebo pa:mida:lamiya. <sup>19</sup> Ega:walo ebe atu tetelo anoano tanalo idite ma kunu kemaigiya, Godokono nopodawate tutele kawonomamo da:moliya iba:te olowiya, ebene iba:te Godokono tabo madodo ibino galonomamo eba olowiutalo iba:te kawo tole lawete Moseseko ebo toweomiya, iba:te kapiya tabo idi Godogodone eba kunu a:kolowioma:na:. <sup>20-21</sup> Nanitabola, ebe tetelo Mosesete atu kawokawo anoano tanalo eba ulamelo negiya, “Naimano tole kawonomo magumulo naimano apete a:ka:tuwa: anakamita!”

Ebema: numa:la:, aimano ewoniate kawonomamo eba toletoleolo modoboa:noma: ebo eda:iya, mabu Godote ibi dopamo ma kunu totomulatiya, “Me unu damela talenanomola, ebema: la: magumulo idawate pete me damelamo da:pa:putimene, ebete gito na:emene. Iyo, la:imano dabiolo inamabu atumu, ibi magumulo kapiya inamabu idite naimano pukala dapadikanalemene, modobola la: ebe nokolamo mapema:wete nanakapumiyala:!”

<sup>22</sup> Wiyasiya kalakala kawonomola, la: piyate la:imano nanitabokobi midi tanalo Ya:sutamoo diyata:wiyama, la:imano tanalo eba kunua: mabu la:imano Godotamo pelame magumulo tole kitaniya:, puliyanomola. Iyo, nanitabo igilo pogodone da:pena, ebe Kawodawa Godoko ebene nopopi bilibilinomago kebole kokolinale, la:le ebe Unu Duliyaomolono Yelusalema



kawo duliyoumolamo kalakalago pelamiyamata, ebe duliyoumolono mailo idi ebe Sayono Unu Damelala. <sup>23</sup> Numa:la:, Godokono dopo gudu Ya:suko keba kunula:ka: piyate ebako epoma: deda:ona, Godote ebe nanitabokobi midipi bilibilinomono mailo ebenu Unu Duliyoumolono Bukamo iyalo akulolelamiya. Ebema: ebe tuputupupi magumulo ebete kebe epagodolo ebenu woko dopoliyaliya, la:le ebe epono uliyanano Kalakala Duliyoumolamo pelama:wete iba:go kapiyakobi a:polowiyamata, iyo, la: Godokono ololo apuamo atumu a:ka:pelamiyamata, nanitabola, ebe me opo epo bilibilinomono tanalo danagilamelelaemene ebe Kawodawala. <sup>24</sup> Ega:walo me tanalo idila. La: atumu Ya:sutamona a:ka:pelamiyamata, ebe Godokono oli nopote atamo maigama: gabo dosiyodiliya ebe dawala. Ebete ebenu kalima Godotamo ikamelo a mabuma: deka:ka:liya, ebe kalimado ale wadewade walubi tanalo nanitabolo buwatanakoma:, ebema: nanitabola, Ya:sukono kalimano woko osiyodilo elawote A:ibolote Godotamo dopamo dikamiya ebe kalimagono inamabuno elawo nodolina.

<sup>25</sup> Ebema: la: nanisiwale, me tetelo potele la:tamo da:kiyawaona ebe Kawodawano tabo olowioma: ubia:noma: akoeda:oala:. Numa:la:, dopamo me opolo ebenu tabote Mosesedo demaigiya, ebe tetelo piyate ibino galo demopioliya iba:te ebenu elawo magumune alautioma: gabo nipo wadiya. Ebe mabuma: ebete a tetelo Unu Duliyoumolone tabo walo eba ka:kiyawaonalo, ale ubia:noma: eda:ote ebegodone dolobila:oma:, gabo keleka: ale ebenu elawo magumune alautioma:? Gabo puliyanomola, a kuba wiya kawonomamo kuwatemalema:! <sup>26</sup> Nanitabola, dopamo tetelo ebete tabo da:kiyawaiya me opote ebema: alegaiya wiyasiya a tetelo ebete nani tabonomo walo ma kunu ka:kiyawaiya, "Nale kapiya tete idilo me opo kawonomo ega:walo tobolo unu atumu ka:powadimagolatelema." <sup>27</sup> Ebema: numa:la:, ebete kapiya tete idilo me tanalo kosiyodiloma: tabo degiya, ebe tanalono magumu ma kunula. Ebete me opo ega:walo tobolo unu ega:walo ibino inamabu bilibilinomo dopamo dosiyodiloliya, walone tetelo ebete ebe inamabu bilibilinomo eba wadegelatelelo, iba:te ebo kalatidioma:na: ebema: lumagite walo a:kulaemene. Iyo, ebe tetelo Unu Duliyoumolono olioli inamabu kapiyate ka:pola:nama:na:, mabu idawano elawo kitana: ebe inamabu ka:kubailaema:.

<sup>28</sup> Ebema: modobola ale aimano kalakala tabo Godotamo kadipatemalema:, mabu ebe kebe oli opolo Kawo Elawodawama: deda:na ebete ebe wade oponomo atamo kikaeemene, nanitabola, idawate ebe opo kubaima: a:ka:modobomene. Ega:walo Godokono iyaiya walubi tanaloma: aimano tepo magumulo eba kalakalaolo, modobola ebete a keba kunu kiyatuamenale a ebe eba kunu bamamatenakoma:. Iyo, ebe amamatema: modobola ale aimano tepo magumulo ebe unamo eba adipatelo wade tuduwata wokino tanalago ka:pelaemalema:, <sup>29</sup> mabu aimano Godo ebe potele ebenu elamo kuba osiyodilolepi bilibilinomo da:kubailaemene ebe Elawodawanomola.

## 13

### *Ale Godoko Kalakalakobi Midima: Keba Kunu Na:kilukulinama:*

<sup>1</sup> Ebema: modobola la: nanitabokobi midipiate kapiya alailame ekaki keba kunula:ka: ebako epoma: eba eda:onale, la: magumulo idite idi nilakapolo nemalagidilowinala:. <sup>2</sup> Ega:walo piyate kapelapimu opo idine la:tamo da:pelamenaka, la: ibi la:imano motamo kalakalago uwatema: woki wadenomamo nalomonakiyala:. Nanitabola, dopamo nanitabokobi midipi epetapiate ibino ilukuli magumulo eba kunu eba osiyodilonalo, Godokono

Unu Duliyomolono nopopi epetapiate iba:tamo da:pelamiya, iba:te ebe nopopino nanitabo tanalo iyatawaoa:no gito walubiliya. <sup>3</sup> Ega:walo nanitabokobi midipi magumulo piyate idoko motolo ega:walo teme-teme epetapi magumulo dilukuliona, modobola la: ibi nilakapolo eba malagidilolenalo ibi ebo nowalubilinakiyala:, iyo, la: walone tetelo atu temeteme diyatawaoaema, la:le epetapiagodone walubi tanalo uwatema: ubi keba kunu na:kiyata:ema, la: eba kunu nosiyodilonakiyala:.

<sup>4</sup> Ega:walo me tanalo idila. La: bilibilinomo magumulo kebe tetelo dubute kamiyala:go kapiyama: deda:mene, modobola iba:te ibino kapiyama: eda: tanalo Godokono wade walubi tanaloma: eba gelalo, ebe dubute kamiyale idi walo pilolo a:kelaemene ega:walo ebena kamiyalete atumu dubu iditamo pilolo walo a:ka:toamene. Nanitabola, piyate buwelemele ega:walo koi pilo gabodo duwatanaka, iyo, kebe dubute kamiyale pilo tanalo dosiyodilomene ega:walo kebe kamiyalete dubu pilo tanalo dosiyodilomene, Godote ebe kuba osiyodilolepiatamo ibino wiya kikalaemene.

<sup>5</sup> Ega:walo la:le kawokawo mani uwate gabo uima: kawonomamo akomalagidilala:. Modobola la: wiyasiya Godote la:tamo kebe inamabu dopamo kikalametiyala ebe inamabu modoboma: eba gelalo, la:imano tepo magumulo ebena kalakalate nitanamene, mabu ebete ebena Bukalo tabo ma kunu gena,

“Nale la:go eba okolinale  
 la: wadenomamo bowalubilinakomata,  
 iyo, uwomua: uwomua: tetelo  
 la:imano iyaiya modoboa: tanalo magumulo  
 nale la: gito a:ka:miyapatama.”

<sup>6</sup> Ebema: Godote ebena Bukamo tabo idi diyatiya, modobola a woki bilibilia:no ebe atu tabo ma kunu kegelamalema:,

“Kawodawa Godoko ebe naimano Walubidawala,  
 ebema: nale tanalo idima: a:ka:toletolemo,  
 iyo, ebete na eba walubininalo,  
 idawate na kubainaema: a:ka:modobomene.”

<sup>7</sup> Ega:walo me tanalo idila. Dopamo tetelo piyate la:imano watowatopima: eba eda:olo Godokono tabo la:tamo da:kiyawaonakiya, modobola la: ibino ilukuli tanalo nemalagidilala:, iyo, kebe wadewade da:ima:te iba:godolo demaimionakiya, ebako atu da:ima:te la:godolo kemaimionama:, modobola la: ibi nanitabokobi midi tanalodo nibamilateleniyala:. <sup>8</sup> Numa:la:, Ya:su Kelisote dopamo keba kunu kokolinamile, ebete me tetelo eba kunu ba:kokolina, ebene ebete atumu uwomua: uwomua: tetelo iyama: a:keda:namene.

<sup>9</sup> Ebema: la: nanisiwale! Ya:sukono nilakapo tanalodo demaigiya piyate ebe igilo mula: tanalono nanitabo tanalo iyatulamea:no, la: ebe iyatulamepino iyaiya tabamo tudila:oa: tanalodo ele gabo ako-odida:la:! Nanitabola, ale tuputupulo kilukulinama: Ya:sukono nilakapo tanalote aimano tepo magumuno woki na:kodakodailamena, wiyasiya piyate iyaiya bae nao talena pukalamo da:tudila:onaka, iba:te ibino pukala waloma:tale tanalodo wade walubi kuminakoa:. <sup>10</sup> La: iyatawalata, aimano Yu epo epetapiate Godokono tagala nopodo ebe kebe motolo kamamate-nake, kalimagono inamabu ikameopiate amamatepino kuba osiyodilole

mabuma: dabirole inamabu Godotamo eba ikameolo elamo ebo madolame-naka, ebema: ebe katene naoma: talena kawonomote iba:godolo bitana. Wiyasiya numa:la:, Ya:sute kewa olotolowalo ebeno ape kalimagono nilakapo inamabuma: midite Godotamo dikamiya, a nanitabokobi midipi-agodolo talena kitana: ebe ikame tanalo kalakalago naoma:, iyo, piyate tagala nopo magumune ka:nemaimia: me talenate ibi kapiyatamo italamena.

<sup>11</sup> Me tanalo nemalagidilala:. A Yu epono ewoniate Godoko kebolo kamamatenakiye, ebe motono Talena Bainomolo kalimagono ikameopino Unu Watodawanomote epono kuba osiyodilole tanalo egebolelaema: dabi-ole inamabu epetapino kalima Godotamo ebo ikameonaki. Ebene ebe atu tetelo wokopi epetapiate epono kuba osiyodilole tanalo iyabaiamo watalaema: ma kunu osiyodilonakiya, iba:te ebe inamabuno a:elao ape duliynomolo magumune waulatelenakiya elamo ebo nemadolamenakiya.

<sup>12</sup> Me mabuma: Ya:sute atumu ebeno ape Godotamo eba ikamelo ebete Yelusalema kawo duliynomolo magumune nemaigate duliynomolo balalo gito na:iya, iyo, eba kunu ebete ebeno kalimamo epono kuba osiyodilole tanalo iyabaiamo watalamiya iba:te Godokono talenapima: keda:onama:.

<sup>13</sup> Ebema: modobola a nanitabokobi midipiate Ya:suko eba waloma:talo, nanitabokobi midia:pino tanebapiate kebolo kilukulione ale ebe duliynomolo magumune nemaimiote atu ilipo kalakalago ebo ka:nelaemalema:.

<sup>14</sup> Nanitabola, me opo kawonomolo aimano Uwomua: Ilukuli Duliynomolote nanitabolo kitana:, wiyasiya kalakala kawonomola, ale aimano tepo magumuno balida:mo Wade Duliynomolonomo numinama:, walone tetelo a ebe Duliynomololo uwomua: uwomua: tetelo ba:nilukulinama:.

<sup>15</sup> Ebema: modobola a iyaiya tete bilibilinomolo Godoko aimano Kawodawama: awokala eba ka:minalo, Ya:sute atamo dosiyodiliya ebe gabodo ebe bemoionakoma:, mabu ale ebe moio tanalodo Godote nanitabo kalakala kelaemene, ebete dopamo epono kalimagono inamabu ikameo tanalodo keba kunu kelawenakile eba kunu. <sup>16</sup> Ega:walo la:le wadewade tanalo eba osiyodilolelo la: magumulo idite idi kowalubima: woki wadenomamo nalomonakiyala:, mabu me osiyodilole tanalo ebe atumu kalimagono inamabu ikameo tanalo keba kunula:ka: eba kunula, iyo, la:le mako osiyodilo tanalodo Godoko kalakalakobi ba:midinakomata.

<sup>17</sup> Ega:walo la:imano sosi watowatopi kalakalakobi ka:midila:wenama:, modobola la: ibino tabo olowiawete na:tudila:onala:. Numa:la:, iba:te idoko ega:walo egela bilibilinomolo la:imano tepo magumuno woki wadenomamo ulamelelamenata, mabu Godote epono tanalo danagilamelelaemene, ibi ubia:nola ebete ebe tetelo ibino woko kubama: gema:. Nanitabola, kebe tetelo iba:te ibino woko kawonomo magumulo la:godone temeteme idi delaema:na:, ebe tetelo la: atu temeteme magumulo ka:pola:namamota, ebema: modobola la: la:imano osiyodilole magumulo kalakala kapiya iba:tamo nikalamenakiyala:.

<sup>18</sup> Ebene la:imano towetowe tabo kiyawao magumulo modobola la:le na ega:walo nago woko dosiyodilona a bilibilinomo Godotamo nowadipaeatenakiyala:. Nanitabola, aimano tepo magumuno mulo wokite a kuba osiyodilolepima: keka:mina:, mabu a iyatawala aimano ubi tanalo ma kunula, ale tete bilibilinomolo wadewade tanalo kapiya bosiyodilolenama:.

<sup>19</sup> Ega:walo nale me tanalo idima: la: kawonomamo toweolaemata, la:le na Godotamo nadipateniyala: ebete gabo nosiyodilomene nale la:tamo samamo ka:pema:.

*Buka Osiyodilodawano Uwomu Tabono Iyaiya Tanalo*

<sup>20</sup> Nanitabola, aimano Kawodawa Ya:su Kelisote ebena sipi-goeogoeo Elawo Ulamedawanomoma: eda:na, mabu ebena a:e tetelo deka:ka:liya ebe kalimate Godokono uwomua: teteno nopo ebe kodakodaimina. Ebema: potele ebe a:e magumune dadipatiya, ebe Kawodawa Godoko ebe epatamo milo dikalamena ebe dawala, <sup>21</sup> modobola ebete wadewade tanalo bilibilinomo la:tamo nikalamenakoma:ta, la:le ebena elawamo ebena ubi tanalamo nanitabolo ka:tudila:wenama:. Ega:walo Ya:su Kelisote atamo dosiyodiloamiya, modobola Godote ebe gabodo ebena wade wokonomo a magumulo nosiyodilonamene, mabu eba kunu ebe a:ka:tuwa: ebe kalakalakobi eba midinalo Ya:sugodolo amama tanalote uwomua: uwomua: tetelo nitanamene! Me tabo ebe nanitabola, taula!

<sup>22</sup> Ebema: nanitabokobi midipi ekakiala:, nale la: ka:toweolaemata, nale la:imano tepo magumuno woki walubilima: me leta magumamo kebe tabo kakulolemo, la: ebe tanalo bilibilinomo olowioma: ubia:noma: akoeda:oala:, mabu nanitabola, nale me leta magumulo naimano tabo ka:geyageyailama:tepalea:.

<sup>23</sup> Ega:walo na ubila la: me tanalo idi na:kiyatawala:. Gabamaniate aimano nanitabokobi midi ekawi idi Timotiko idoko motone gito alibiya, ebema: ebete natamo samamo da:pemene, ebe tetelo na eba:go la: ulaema: kapimiya ka:pemalema:.

<sup>24</sup> Ebene la:imano opo kawonomolo kebe watowatopiate sosi woko la:tamo dosiyodilona, modobola la: ibi bilibilinomatamo naimano nilakapo tabo nanaliboliyala:. Me Itali opolo dilukuliona ebe nanitabokobi midipi ekakiate ibino nilakapo tabo atumu la:tamo kapalibola:.

<sup>25</sup> Modobola Godokono nilakapo tanalote la: bilibilinomagodolo nitanamene. Me ebe naimano tabo uwomula. Taula.





nilakapolo demalagidilona ebete iba:tamo ikalaema: nanitabolo degiya ebe tanalola.

<sup>13</sup> Ega:walo me tanalo idila. Idawate iyaiya temeteme magumulo eba utinalo kuba gabamo wabuga:ta tanalote ebetamo da:pemene, ebete ma kunu akogeala:, “Me kubate Godogodone natamo pe.” Ao, eba kunua:. Godote lumagi kuba gabamo kowabuga:tanakoa:, ega:walo Saitanakono elawo puliyala ebete ebena kuba gabamo wabuga:ta tanalo Godotamo kosiyodiloma:. <sup>14</sup> Ebema: numa:la:, kuba gabamo wabuga:ta tanalate lumagino kateneno kubakuba ubi gabodo pelamenaka, iyo, me gabodo Saitanate ebe anamiyatate ebena gubi magumamo gito ka:neba:idilomene. <sup>15</sup> Ebe tetelo ebe lumagino tepo magumulo kateneno kuba ubi tanalote apete kuba osiyodilo tanalo kalaimene, ebene ebena kuba osiyodilo tanalote ebena okoli magumulo kawonomoma: deda:mene, ebete a:e ebo kalaimene mabu kuba osiyodilo tanalono wiya ebe a:ela.

<sup>16</sup> Ebema: naimano wadewade nanitabokobi midipi ekakiala:, la: a:ka:tuwa: la: a:da: akomasigila:la:, <sup>17</sup> mabu wadewade tanalo bilibilinomate Unu Duliyomolono Nabiwigodone ebena nilakapolo atamo pelamena, wiyasiya kuba tanalate ebegodone ka:pelamena:. Ebe tobolo unu da:pukuimina ebe mawelena Namutudawala ega:walo ebe nanitabo nilakapo Kawodawanomola, ebema: ebena nilakapo tanalote atamo iyama: keda:na:, ma kunu tete idilo kawonomamo kawokalimi, tete idilo kela:mo kawokalimi, ebete eba kunu kowagelena:. <sup>18</sup> Numa:la:, ebete a ebena gudima: ka:midima: ebena ubi iyatiya, ale ebena Nani Tabo magumudo oliolinoma: eda:ote kawokalaoma:. Ebema: me tanalo ebe nanitabonomola, ebete me opono inamabu bilibilinomo dosiyodiloliya, ibi magumulo a ebe dopo nolo da:imi keba kunula:ka: eba kunula.

*Modoboa: Lumagite Godokono Tabo Gito Olowima; Modobola Ebete Nanitabolo Na:tuduwatamene*

<sup>19</sup> Naimano wadewade ekakiala:, modobola la: me tanalo nemalagidilala:. Modoboa: lumagite epetapino tabo olowioa:no ebe a:ka:tuwa: ebena tanalo samamo kiyawaoma:, ega:walo modoboa: lumagi idite lumagi iditamo samamo dowama:, <sup>20</sup> mabu Godokono tuputupu okoli tanalono da:ima:te lumagino dowaga gabodo a:ka:noloma:na:. <sup>21</sup> Ebema: la:imano tepo magumulo da:pola:na ebe iyaiya daleyawokino tanalo, ega:walo la:imano apa:mo dosiyodilola:wenakoma ebe kuba osiyodilole tanalo, modobola la: ebe tanalo bilibilinomo balamo alomawete, ebene Godote la:imano tepo magumamo damionako ebe tabamo nanitabolo na:tudila:onala:, mabu ebe tabote la:imano igilo mula:no gaboma: eda:na.

<sup>22</sup> Numa:la:, la: Godokono tabo olowiawete tudila:oa:no, me gabodo la: a:ka:tuwa: la: masigilinakomata. Ebema: modobola la: ebena tabo olowiawete nanitabolo na:tudila:onala:, <sup>23</sup> mabu kebe lumagite Godokono tabo olowite tuduwata:no, ebe poteleka: galasilo ebena ololo daedale wokilo dumita ebe lumagi keba kunula:ka: eba kunula. <sup>24</sup> Eiye! Ebako lumagite ebena olololo kuba idi duimene, ebete ebe tanalo modobokobi midia:no, tote beda: kuba tanalo kumile ebe tanalo gito ka:na:dodomatimene. <sup>25</sup> Wiyasiya kebe lumagite Godokono Wade Totomu Tabonomo wadenomamo umite kalakalago eba lawelo, ebete ebe tabamo tuduwatate dodomatia:no ebe tanalo magumulo dokolinamene, Godote ebena osiyodilole tanalo bilibilinomo magumulo ebe wadenomamo bowalubinakomene. Nanitabola, Godokono Wade Tabonomote ebako lumagi ebena nanitabokobi midi magumulo tutunomoma: ka:midimene.

*Nanitabo Gabodo Godoko Waloma:ta Tanalo*

<sup>26</sup> Ebema: la: nanisiwale! Kebe lumagite ebe a:ka:tuwa: ebe Godoko waloma:tadawama: eba gelo wiyasiya ebeno mena wadenomamo umina:no, ebe lumagi ebe a:ka:tuwa: ebe a:da: kemasigimene. Ebeno Godoko waloma:ta tanalo ebe sosowa keba kunula:ka: eba kunula, iyo, ebeno okoli magumulo wade tanalote a:kitanamene! <sup>27</sup> Ebema: Godokono waloma:tadawanomono tanalo keba kunula:ka:? Ebeta nigologolo gudi ega:walo amoleamole kamiyale ebakobako inamabua: epo ibino mibomibo magumulo wadenomamo walubilina, ega:walo ebete me opolo eba okolinalo kubakuba tanalo kosiyodilolena:, ma kunu ebete ebeno tepo magumu ukulate walo daleyama: a:ka:midimene. Nanitabola, Godote ebako lumagi duimene ebe ebeno nani waloma:tadawama: keka:imene.

## 2

*Inamabu Bilibila:gopi Kapiyatamo Wadewade Tanalo Ako-osiyodilola:la:*

<sup>1</sup> Naimano ekakiala:, la: aimano Kawodawa Ya:su Kelisoko nanitabokobi midipilata ega:walo ebe Godokono elawo alo magumulo dokolina ebe Kawodawala, ebema: la:le epo unu nikapiamo ulamea:no ma kunu lumagi idi atepalo lumagi idi ebo akolawa:la:. <sup>2</sup> Ebe mabuma: kebe tetelo inamabu bilibila:godawa idite ebeno wadewade kaliku pupulote ega:walo wiya kawonomo lini inamabu ebeno kotamo pulite la:imano sosi alad-abuti tanalamo da:pemene, ebene ebe atu tetelo inamabua:dawa idite la: magumamo da:ka:pemene, la:imano woki ibi netewapiatamo keba kunu na:kitanamene? <sup>3</sup> Wadewade kaliku pupulite da:pemene, la: ebe lumagi kawonomamo eba malagidilolo ebetamo ma kunu ba:kegelaema, “A:ma: niyata, me dopo apuno okoli baiamo nokoliya?” Wiyasiya inamabua:dawa da:pemene, la: ebe nilakapolo malagidilola:no ebetamo ma kunu ba:kegelaema, “Okoli bai idi kitana:, modobola a:ma: iyabailo gito nutita?” <sup>4</sup> Eiye! La: mako osiyodilo tanalodo la:imano tepo magumuno kuba woki awokalilamenakomata, mabu la:imano tepo magumulo la: inamabu bilibila:gopi wadewadepima: eba gelalo, inamabua:pi sosowama: midililo ibi nilakapolo kemalagidilola:wena:!

<sup>5</sup> O naimano wadewade ekakiala:, modobola la: me tabo wadenomamo nolowiala:! Godote inamabua:pi nanitabolo uwatiya, iba:te me opolo eba ilukulinalo nanitabokobi midi magumulo kawokawopima: keda:onama:. Nanitabola, walone iba:te Godokono Kawo Elawodawano Duliyomololo da:pola:na ebe inamabu bilibili kuwatema:na:, mabu Godote nani tabonomo iyalo a:kiyawaiya, ebe Duliyomolono wadewade tanalo ebe nilakapolo demalagidilona ebe epatamo kikalaema:. <sup>6</sup> Wiyasiya numa:la:, la: ebako inamabua:pi nilakapolo kemalagidilola:wena:, inamabu bilibila:gopi kapiya malagidilolenamata. Eiye! La:imano kuba woki beda: kawonomola:ka:! Tete epetapilo ebe atu inamabu bilibila:gopiate la: nanitabokobi midipiatamo kawokawo temeteme eba ikalamelolo gaba-manino tabo anagiyamida baiamo la: ebo magatalenakota. <sup>7</sup> Iyo, ibi epetapi Ya:su Kelisoko demalagonaka ebe nanitabokobi midia:pila, ebema: Ya:sukono wade mailo ebete la: kowalubilitama: dikalamentiyala, iba:te ebe mailo kubama: gelana.

<sup>8</sup> Numa:la:, Kawo Elawodawa Godote ebeno kawo totomu tabonomo ebeno Bukalo ma kunu awokalimina, “A:ma: a:ka:tuwa: a:ma: demalagidilawena, eba kunu a:ma: niyakabolo dilukulina ebe epo nilakapolo nemalagidilolena,” ebema: modobola la: me tabamo nanitabolo na:tudila:onala:. <sup>9</sup> Wiyasiya la: tudila:oa:no, ma kunu la: epo unu nikapiamo

ulamelo inamabua:dawa idi sosowama: mida:wete, ebene ebe atepawete inamabu bilibila:godawa idi delawa:ema, la: kawo kuba kosiyodilomamota. Eiyee! Godokono kawo totomunomo adikanale mabuma: kuba wiyate la:tamo nanitabolo ka:pemene, <sup>10</sup> mabu kebe lumagite Godokono totomu tabo bilibilinomo eba uwatelo idi kapiya dadikanalemene, ebe tetelo ebete totomu tabo bilibilinomo dowakalamina ebako dubuma: keda:mene. Iyo, kapiya totomu tabo adikanaledawa ega:walo totomu tabo bilibilinomo wakalamidawa ibino tanalo ebe kapiyala, mabu ibi netewapiate kapiya gabodo ibino kuba wiya Godogodone kuwatema:na:

<sup>11</sup> Ebema: numa:la:, Kawodawa Godote totomu tabo ma kunu giya, “A:ma: dubu idino kamiyale pilolo akolawa:la:,” ega:walo me atu Kawodawate walo na:kegiya, “A:ma: lumagi idi akoanakapuma:la:.” Ebene kebe tetelo a:ma: dopo totomu tabo eba lawelo wiyasiya a:ma: toawete lumagi idi gito dananakapuma:emene, a:imano tanalote keba kunu na:kitanamene? A:ma: dopo totomu tabo adikanalea:no, ebe mabuma: Godote a:ma:tamo ba:kekalakalamene? Ao, ebete kuba wiya a:ma:tamo nanitabolo kikaema:ta, mabu a:ma: ebene totomu tabo idi adikanala:ta!

<sup>12</sup> La: wadenomamo nolowiala:, Godokono kawo totomu tabonomo ebe nilakapo awokalimi totomu tabola, ebe totomu tabote epono nanitabokobi midi magumulo ibi tutunomoma: midilina. Ebema: modobola la: la:imano tabo gela magumulo ega:walo osiyodilole tanalo magumulo ebe kawo totomu tabamo nanitabolo na:tudila:onala:, mabu walone Godokono Unu Duliyomololo ebe kapiya totomute la:imano tanalo kanagiyamidalaema:ta. <sup>13</sup> Nanitabola, ebe tetelo Godote nilakapoa: epatamo ebene nilakapo awokalimia:no kuba wiya iba:tamo kikalaemene, wiyasiya nilakapo awokalimpiatamo ebete kuba wiya a:kikalaemene, ao, ebete ebene nilakapo iba:tamo kawonomamo kawokalimene.

### *Godoko Nanitabokobi Midi Tanalo Ega:walo Wadewade Osiyodilole Tanalo Ebe Kapiyala*

<sup>14</sup> Naimano ekakiala:, kebe lumagite Godoko nanitabokobi midima: gelo wadewade tanalo osiyodilolea:no, ebene tanalo keba kunula:ka:? Godote epono tanalo danagiyamidalaemene, ebe tetelo ebete ebe lumagino nanitabokobi midi tanalo modoboma: ba:kegemene? Ao, ebako lumagino nanitabokobi midi tanalo ebe a:da: elemasigi tanalola, ebene igilo mula: tanalote a:kitanamene. <sup>15</sup> Diyala la:imano nanitabokobi midipino taneba magumulo lumagi idite kalikua:noma: da:beda:nale, ega:walo nao inamabua:dawate da:ba:lutale. <sup>16</sup> Ebene la: magumulo idite ebako nigologolo lumagi umite, ebe walubia:no ebetamo ma kunu degemene, “A:ma: Godokono kalakalago na:toa, ebe a:ka:tuwa: a:ma: kalikamo ega:walo baeamo kowalubima:ta,” ebe tabo walubi taboa:, kuba tabola. Ebema: kebe tetelo nanitabokobi mididawa idite inamabua:no dokolina, ebene a:ma:le ebe kalikamo ega:walo baeamo walubia:no, a:imano nanitabokobi midi tanalote keba kunu kitanale? <sup>17</sup> A:ma: wadenomamo nolowia, a:ma:le Godoko nanitabokobi midima: geawete wiyasiya wadewade tanalo osiyodilolea:no, a:imano nanitabokobi midi tanalo ebe a:ela.

<sup>18</sup> Wiyasiya la:imano nanitabokobi midipino taneba magumulo epetapiate negelana, “Lumagigodolo wadewade osiyodilole tanalate pola:na:no kuba:, mabu Godoko nanitabokobi midi tanalo ebe tepo magumuno osiyodilo tanalola, apa:mo osiyodilo tanalola:.”

Ebema: na Ya:imesite ibino tabo eba wiyalo negemo, “La:le wadewade tanalo dosiyodilola:ema nale la:imano nanitabokobi midi tanalo ebo kiyatawamamo, wiyasiya la:le osiyodilolea:no na a:kiyatawamo. Numa:la:,

naimano tanalo ma kunula, epetapiate naimano nanitabokobi midi tanalo kiyatawaoma: nale wadewade tanalo ebema: osiyodilolenakomo.”

<sup>19</sup> Wiyasiya la: epetapiate kegelamamota, “Ale Godoko kapiya nanitabokobi na:midinama:, me kawo tanalola, aimano apa:mo osiyodilole tanalola:.”

Na wiyasiya kegemamo, “Iyo, Godoko kapiya ebe Kawodawala, Saitanakono kubakuba uliyana atumu ebe tanalo iyatawala. Ebema: iba:te ebe tanalo nanitabokobi eba midilo Godokono elawoma: anakamiolo na:toletoleona, wiyasiya numa:la:, iba:te ibino kuba osiyodilole tanalo miyapa:no wadewade tanalo kosiyodilolenakoa. Ebema: la: na:kemalagidilawitama Godote ibino tole tanaloma: iba:tamo kekalakalamene? Ao, ibino wadewade tanalo osiyodilolea: mabuma: ebete iba:tamo kuba wiya nanitabolo kikalaeemene!”

<sup>20</sup> Eiye, a:ma: wadewade tanalo osiyodilolea: lumagima: deda:wena, a:ma: daedale lumagilata! A:ma: numa:, Godokono Buka apuno tabo idite a ma kunu iyatuamena, kebe lumagite Godoko nanitabokobi midima: gelo wiyasiya wadewade tanalo osiyodilolea:no, ebe lumagino nanitabokobi midi tanalo ebe a:da: elemasigi tanalola. <sup>21</sup> Iyo, a:ma: aimano ewono A:ibalayamakono tanalo nemalagidila. Ebete Godoko nanitabokobi eba midilo, ebena nanitabokobi midi tanalote ebena osiyodilo tanalodo ma kunu awokaliya, ebete Godoko watidilono nokola patapata unamo ebena gudu Aisa:keko adilatite Godotamo nanitabolo ikamiya, iyo, ebena wade osiyodilo tanalodo Godote ebe tuputupudawa idima: ebo ka:miya. <sup>22</sup> Ebema: ale me tanalo uima:, A:ibalayamakono nanitabokobi midi tanalo ega:walo ebena osiyodilo tanalo kapiyanomoma: eba eda:lo, ebena nanitabokobi midi tanalote ebena osiyodilo tanalodo modobonomoma: ebo eda:miya. <sup>23</sup> Iyo, me tanalote A:ibalayamatamo pemaigiya, Godote ebena Bukalo dopamo degiya ebe tabote nanitaboma: keda:ma:, mabu ebena Bukalo tabo ma kunu itana, “A:ibalayamate Godoko nanitabokobi da:midiya, ebema: Godote ebe tuputupudawama: ebo giya.” Iyo, nanitabola, A:ibalayamakono nanitabokobi midi mabuma: Godote ebe ebena wade namutudawama: ka:miya. <sup>24</sup> Ebema: modobola a:ma: me kawo tanalo wadenomamo nelawa:, a:ma: Godoko nanitabokobi midilo wadewade tanalo nosiyodilole-nakiye, mabu Godote wadewade osiyodilole tanalo a:ma:godolo dulaemene ebete a:ma: tuputupudawama: keka:ima:ta. Wiyasiya a:ma: nanitabokobi midi magumulo wadewade tanalo osiyodilolea:no, a:imano nanitabokobi midi tanalo ebe a:da: elemasigi tanalola, Godote a:ma: tuputupudawama: a:keka:mitamene.

<sup>25</sup> Ega:walo Godokono Bukate nanitabokobi mididawa idino tanalo kawokalimina, ebena mailo ebe La:iya:batela. Ebe kamiyaletete dopamo Godoko nanitabokobi midia: tetelo dubu bilibili kamiyaletete: eda:nami, wiyasiya Isalaela epate ebena Ka:inane opo laema: da:pemaimiya, ebe tetelo ebete ibino Godoko nanitabokobi midite ibi ma kunu walubiliya. Isalaela dubu netewate opo umioma: diya gabodo ebetamo da:pemaimiya, La:iya:bate ibi Ka:inane opo gabamani dubatamo kikalamiya:, ebete wiyasiya ibi iya gabodo gito aliboliya gabamani dubate ibi anakapulamekapoma:. Nanitabola, mabu La:iya:bate me wade tanalo dosiyodiliya, ebe mabuma: Godote ebe tuputupudawa idima: ebo ka:miya.

<sup>26</sup> Ebema: naimano iyatulame tabono magumu kawokalima: uli tabo idi ma kunu itana. Lumagite da:emene ebe tetelo ebena uliyante ebena apene gito ka:nemaigamene, walo ebe a:e apelo a:kokolinamene. Ebema: nanitabola, lumagino nanitabokobi midi tanalo eba kunula, ebegodolo

wadewade osiyodilole tanalate pola:na:no, epetapiate ebo kiyatawaoma:na: ebenu nanitabokobi midi tanalo iyalo a:i.

### 3

#### *Nanitabokobi Midipiate Ibino Iyaiya Tabo Kiyawao Tanalo Wadenomamo Nulamenama:na:*

<sup>1</sup> Naimano nanitabokobi midipi ekakiala:, la:imano sosi taneba magumulo kapiyakapiyanomate iyatulamepima: neda:iyala:, mabu la: iyatawalata a piyate Godokono tabo iyatulamepima: deda:onama:, walone ebete aimano tabo kiyawao tanalo ega:walo osiyodilole tanalo kawonomamo kanagilameleaemene, wiyasiya ebete nanitabokobi midipi epetapino tanalo eba kunu akanagilameleaemene.

<sup>2</sup> Nanitabola, tete epetapilo a nanitabokobi midipi bilibilinomate Godokono nanitabo gabu anaetoamidanakoma:. Wiyasiya numa:la:, a magumulo kebe lumagite ebenu tabo kiyawao tanalo bilibilinomo wadenomamo dulamena, ma kunu ebenu menate tabo kapiya idi kubanu gea:no, ebe lumagino osiyodilole magumulo kuba idite atumu a:kitanamene, iyo, ebete ebenu apenu iyaiya osiyodilole tanalo bilibilinomo wadenomamo ulamena kuba idi osiyodilokapoma:. <sup>3</sup> Ebema: modobola la: me uli tabo wadenomamo nemalagidilala:, oso-goeo namutudawate ebenu tabamo ale iyatite, ebene ebete oso-goeo unamo eba okolilo ebe da:peso ala:mo oso-goeo nanitabo gabodo ebo katamene. <sup>4</sup> Ega:walo uli tabo idi ma kunula, awate kewa: kolomono kawo palai pe kawonomamo eba atitalo, pe atadawate atumu walege da:pesamo ebe pe ebenu ubi gabodo gito katamene.

<sup>5</sup> Ebema: lumagino mena ebe atumula. Ebe mena lumagino ape kawonomo magumulo ditana ebe apenu ape apu da:pesola, wiyasiya ebe a:ka:tuwa: ubi diyatimene menate lumagi kuba gabamo ebo kema-gatamene. Iyo, ebete amama tabo kiyawao tanalodo kawokawo tanalo osiyodilolema: degemene, ebete eba kunu ebenu igilo kawonomo ka:na:kubaimene, ela mena da:pesote kawonomoma: eda:te kawokawo kewate delamota:ona ebe inamabu keba kunu kenalenakole eba kunu. <sup>6</sup> Iyo, nanitabola, lumagino mena ebe ela mena keba kunula:ka: eba kunula, mabu menate lumagino apelo da:peso inamabuma: eda:na, wiyasiya ebenu kuba tabo kiyawao tanalate ebe lumagino ape kawonomo daleyakobi midite ebenu okoli tanalono tanalo bilibilinomo gito ka:kubailaema:na:. Ebema: numa:la:, menano elate Saitanakono Ela Opone pemaiganako, iyo, mena ebe Kubadawano ubi tanalamo tuduwatanako.

<sup>7</sup> Nanitabola, agowamo wapata:lame inamabu ega:walo tepamo wapata:lame inamabu, obo magumulo digilona ebe inamabu ega:walo olaola, epate ebe iyaiya inamabu bilibilinomo gelebadikobi midili iyatawala, <sup>8</sup> wiyasiya lumagite ebenu mena gelebadikobi midima: modoboa:. Gabo kitana: mabu menate kubanomoma: eba eda:lo, ebenu kuba tabo kiyawao tanalate epo epetapi anakapulaema: wagenena, ebe elawo kalu keba kunula:ka: eba kunula.

<sup>9-10</sup> Ebema: naimano nanitabokobi midipi ekakiala:, modobola la: me tanalo wadenomamo nemalagidilala:. Tete epetapilo a nanitabokobi midipiate aimano menamo aimano Kawodawa Nabiwi Godoko emoionakoma:, ebene tete epetapilo ale epo epetapiatamo dowate aimano tabamo ibi ebo kubailamenakoma:. Numa:la:, Godote ebe epo ebenu ololamo osiyodilolete ebenu gudima: ka:la:mina, ebema: moio tabo ega:walo malato tabo atu lumagino tabone da:pemaimioma:na: ebe tanalo kawo kubanomoma:



keda:mene! Eiye, ebako kubate a magumulo akomaigala! <sup>11-12</sup> O naimano ekakiala:, la: iyatawalata, sipolo da:imi kewane epate boga:me da:imi ketap-inakoa:, ega:walo siwila da:imi kewalo atumu sipolo da:imite ka:nolonakoa:. Eba kunu epate wade gola obo guline kuba solu obo kiyaponakoa:, iba:te wiyasiya wade obonomo iyaponaka, iyo, nanitabola, soluagono obo gulite wade gola obo epatamo ikalaema: modoboa:.

### *Godokono Nanitabo Mulo Tanalo*

<sup>13</sup> Ebema: la:imano nanitabokobi midipino taneba magumulo mulo woki-agodawa idi ba:ka:lutale? Modobola ebako dawate tuputupu okoli tanalodo ebenu mulo ma kunu nawokalimene, ebete amama:no wadewade tanalo kapiya bosiyodilolenakomene. <sup>14</sup> Wiyasiya la: la:imano tepo magumulo epetapino inamabuma: iba:tamo da:dowawenama, ega:walo amama magumulo la: a:ka:tuwa: la: dowadipalatela:wenama, la: nanisiwale! La:imano amama tanalono osiyodilole magumudo la: Godokono nanitabo gabo a:da: gaboma: gelanamata, ebema: modobola la: ebe amama tanalo natepala:. <sup>15</sup> Eiye, la:godolo ditana ebe amama woki Godokono Unu Duliynomolone ka:pena:! Ao, ebako woki me opono mulo wokino tanalola, ebe a:da: mulo tanalote Saitanagodone eba penalo Godokono nanitabo mulo tanalago ebo pegowelaonako. <sup>16</sup> Ebema: piyate epetapino inamabuma: iba:tamo da:dowaona, ega:walo piyate amama magumulo ibi a:ka:tuwa: ibi kapiya demalagidilolena, iba:te apaminateui magumulo iyaiya utitatate iyaiya kuba tanalo bilibilinomo ebo osiyodilolenaka.

<sup>17</sup> Wiyasiya Godogodone da:pena ebe mulo tanalono osiyodilole tanalo eba kunua:, mabu ebenu nanitabo mulote epagodolo ditana, iba:te iyaiya kuba daleya tanalo kosiyodilolenakoa:. Ebe epate milolo eba ilukulinalo apaminateui tanalo kiyatawaonakoa:, wiyasiya ibi magumulo idite idi kawonomamo nilakapoimilo wadewade tanalo ebo osiyodilolenaka. Ebene iba:te epo unu nikapiamo ulamea:no ma kunu lumagi idi atepate lumagi idi ebo kelawenakoa:, ega:walo iba:godolo mena netewa tanalote kitana:. <sup>18</sup> Nanitabola, piyate mako milo ilukuli tanalo epetapiatamo dikalamena, ibi wadewade kikopu damelamo damiona ebe wokopi keba kunula:ka: eba kunula, mabu ibino woko osiyodilo magumulo wadewade nao inamabunomate nanitabolo ka:pemaimioma:na:.

## 4

### *Me Opono Iyaiya Tanalo Kawonomamo Malagidilole Tanalo*

<sup>1</sup> Ebema: la: nanitabokobi midipi magumulo gowelao tanalo ega:walo apaminateui tanalo kebene ka:pelamenakole? Iyo, ebe tanalate la:imano kateneno kubakuba ubi tanalodo pemaimionaka, mabu ebako ubi tanalate la:imano tepo magumulo wadewade wokino tanalago gowelaona. <sup>2</sup> Eba kunu la:le epetapino inamabu uwatema: wagenamata, wiyasiya uwate gabo umia:no ebema: la:le la:imano tabamo ibi anakapulamenakomata. Ega:walo la: kawokawo inamabu uwatema: ubi kawonomola, wiyasiya la:godolo pola:na:no ebema: la:le eba apaminateuilo kubanomamo ebo gowelaonakomata. Eiye! Mabu keleka: la:le la:imano inamabu epetapi modobolo kuwata:wena? Mabu la:le Godoko la:imano modoboa: tanaloma: nanitabo gabodo ka:toweoma:wenakoa:. <sup>3</sup> Ebema: numa:la:, kebe tetelo la:le inamabu idima: Godoko da:toweoma:wenakoma, ebe tetelo la:imano tepo magumuno woki tuputupulo ka:pola:na:, mabu la: ubila ebe inamabu lawa:wete la: a:ka:tuwa: la: kekalakalailama:ema:. Iyo, la:le Godoko

kekalakalaima:ema: woki kiyata:wena:, ebema: ebe ubia:nola inamabu idi la:tamo ikalaema:

<sup>4</sup> Eiye, la: nanitabokobi midia: epo keba kunula:ka: eba kunulata! La: iyatawala:ka:, kebe lumagite me opono iyaiya tanalo kawonomamo demalagidilolena ebete Godago goweladawama: eda:na? Iyo, nanitabola, potele me opono inamabu ega:walo iyaiya amama tanalo uwatema: dowagelena, ebe Godago goweladawala. <sup>5</sup> Ebema: numa:la:, Godokono Bukalo tabote ma kunu itana, “Godoko ubi kawonomola ebene Uliyanate a:ka:tuwa: aimano tepo magumulo kokolinama:, ebema: ebete aimano kubakuba wokino tanalago elawonomamo gowelaonako.” Iyo, la: iyatawalata me Buka tabote nanitabonomoma: eba eda:nalo, <sup>6</sup> ebene Bukalo me tabo idite atumu ba:kitana,

“Piyate damamaona Godote iba:go na:gowelaona, wiyasiya piyate ibi a:ka:tuwa: ibi opamo dalomona, ebete iba:tamo ebene kawo nilakapo ebe awokaliminako.”

Kalakala kawonomola, Godote ebene nilakapo atamo eba kunu awokalimina!

<sup>7</sup> Ebema: modobola la: a:ka:tuwa: la: Godotamo ikameawete Saitanatamo elawonomoma: neda:onala:, mabu la:le eba kunu dowagela:ema, Saitanate la: kuba gabamo wabuga:tale magumune la: miyapatate iyabaiamo samamo kalaula:mene. <sup>8</sup> Nanitabola, kebe tetelo la: Godoko niyakabamo da:pelama:ema, ebe atu tetelo ebete la:tamo pemaigate la: kalakalago ka:puwatema:ta. Ebema: la: piyate iyaiya kuba tanalo dosiyodilola:wenama, modobola la: la:imano daleyaya koto ukulaola:wete kubakuba tanalo walo ako-osiyodilola:la:. Ega:walo la: piyate Godoko ega:walo me opono tanalo atu tetelo waloma:talema: dowagela:wenama, modobola la: la:imano tepo magumuno kubakuba woki wadekobi midila:wete, <sup>9</sup> ebene la:imano kuba mabuma: modobola la:le tepo temetemema: eda:wete niima:la:. Iyo, modobola la: la:imano kalakala tanalo atepawete tepo magumuno ii tanalo nelawiyala:, ebene la:imano kalakala tanalote wiyasiya mibomiboma: neda:mene. <sup>10</sup> Ebema: nanitabola, la: Godokono ololo apulo la: a:ka:tuwa: la: opamo eba alomolo, ebete wiyasiya la: unamo kowadipalatelema:ta.

#### *Nanitabokobi Mididawa Idino Tanalo Kubama: Akogeala:*

<sup>11</sup> Naimano ekakiala:, me tanalo idila. La:imano nanitabokobi midipino taneba magumulo idite idino tanalo kubama: akogeala:, mabu kebe tetelo a:ma: nanitabokobi mididawa idino tanalo kubama: degeaemene, ebe tetelo a:ma: Godokono kawo nilakapo totomu tabonomo kadikanalema:ta. Numa:la:, Godote ebene totomu tabamo a:ma: ananata a:ma:le a:imano nanitabokobi midi ekawi nilakapolo kemalagidilawenama:, ebema: kebe tetelo a:ma: a:imano ekawi kubama: degeaemene, ebe tetelo a:ma: Godokono totomu tabo atumu kubama: ka:kegema:ta. <sup>12</sup> Eiye, a:ma: kawo lumagia:! A:ma:tamo elawo potele kikametana lumagi idino tanalo kanagiyamidama:ema:? Godoko kapiya ebe totomu tabo osiyodiloleadawala, ega:walo ebe kapiya ebe epono tanalo anagilamelelamedawala, ebema: me Kawodawa kapiyate modobola epono iyaiya ilukuli tanalo eba anagilamelelanelo idawano igilo mula:mete idawatamo kuba wiya kikaemene.

#### *Lumagite Ebene Osiyodilole Tanaloma: Amama Tabo Akokiyawaoala:*

<sup>13</sup> Ega:walo me tanalo idila. La: epetapi ma kunu gelanakomata, “Ka:lo adimolo o dumutu egelalo na kawo duliynomolamo tote, ebolo nale kapiya ulamamo eba nokolilo bisnisi woko nosiyodilote mani kawokawonomo ka:nuwatemamo.” <sup>14</sup> Eiye! A:ma: iyatawa: dumutu a:ma:tamo beda: tanalote na:kemaigamene. A:ma: opo lumagilata, ebema: a:imano igilo ebe tema keba kunula:ka: eba kunula, lumagite tete da:pesolo umite a:ka:tuwa: samonomamo ebo kolopoligomene. <sup>15</sup> Ebema: modobola a:ma:le amama tabo kiyawao atepawete ma kunu negiye, “Godote elawo natamo dikanaemene, na dumutu igilolo eba lutalo nale ebenu ubi tanalo ebo kosiyodilomamo.” <sup>16</sup> Wiyasiya la: epetapi mako wadewade tabo kegelawenakoa:, la: a:ka:tuwa: la: amamalatelenamata, ebema: Godote la:imano amama tabo gela tanaloma: kekakalakalana:. <sup>17</sup> Iyo, me tanalo nanitabola, kebe lumagite tuputupu osiyodilo tanalo eba iyatawalo wiyasiya ebe tanalamo tuduwata:no, ebenu osiyodiloa: tanalodo ebete Godokono pukala ebo kadikanalemene.

## 5

### *Inamabu Bilibila:gopiate Ibino Kuba Osiyodilole Tanalo Miyapate Godotamo Nolobila:oma:na:*

<sup>1</sup> Ebema: inamabu bilibila:gopiala:, la: naimano tabo wadenomamo nolowiala:. Modobola la: me tetelo iimi nowagilima:la:, mabu kawokawo temetema:te la:tamo na:pelama:, <sup>2</sup> iyo, tete tatalila la:imano inamabu bilibili tanalate ka:kubakubaoma:na:. Ebe tetelo la:imano pupuliono inamabu nopaiate naote, <sup>3</sup> ebenu la:imano wadewade disi damelate eba uwatelo nonokama: ebo keda:oma:na:. Ebema: nanitabola, Godote epono kuba danagilamelelaemene, ebe Kawo Egelalo ebe nonoka inamabu la:imano kuba osiyodilole tanalo ega:walo kuba wokino tanalo kawokalilaema:na:. Numa:la:, me opono uwomu tetete eba penapelo, la:imano inamabu iyalo a:dogodogoi lamena imata, wiyasiya tete tatalila la:imano kalakala tanalote kolopoligomene, iyo, la:imano nonoka inamabu la:imano ape eba kubailamelo la:imano kalakalate ebo kolopoligomene, elawo elanomote namo tuwaenomoma: keba kunu ka:midinakole eba kunu.

<sup>4</sup> Nanitabola, la:imano kuba tanalo ma kunu itana. La:imano kawokawo bisnisi magumulo piyate la:imano olowameno pali inamabu detapiolametana, la:le iba:tamo wade wiya kikalama:wenakoa:, ebema: iba:te ibino temeteme magumulo kawonomamo iimina. Eiye, Elawodawa Godote ebe imi tanalo iyalo iyatawi! <sup>5</sup> Ebema: numa:la:, la: me opolo inamabu bilibilipima: eba eda:wenalola: a:ka:tuwa: la:imano kateneno ubilo la: ekalakalailamenakomata, iyo, la: wadewade bae eba naonalo gadigadinomoma: iyalo eda:imata. Ebema: gadigadi kau-goeogoeo keba kunula:ka: la: eba kunula, tete tatalila Namutudawate la: anakapulaema: ka:pemene. <sup>6</sup> Ega:walo me tanalo idila. Tete epetapilo la:le tuputupu epatamo dowawete, ebenu la:le ibi gabamania tamo gito magatalenakomata iba:te iba:tamo a:e wiya kikalama:na:. Eiye! Ebe epate la:tamo kuba idi kosiyodilonakoa:, wiyasiya ebe gabodo la:le ibi gito anakapulamenakomata!

### *Nanitabokobi Midi Magumulo Kodakodalo Lamota:ona Tanalo*

<sup>7</sup> Ebema: naimano ekakiala:, la:imano nanitabokobi midi magumulo kodakodalo nelamota:onala: Kawodawa Ya:sukono pe teta:mo. Modobola la: pali osiyodilodawano tanalo nemalagidilala:, ebete pali inamabu amiote wade pali inamabu nao tete ebo kemakopelenamene. Ma kunu dopo saganala tetelo ulamate downakomene ega:walo uwomu saganala walo

da:kowonakomene, damelate wade gibama: eba eda:lo ebeno pali inam-abuate wadenomamo ebo kapepeoma:na. <sup>8</sup> Ebema: la: atumu Ya:sukono pe tanalo makopelema: ubia:noma: eda:oa:no kodakodalo nelamota:onala:, mabu ebeno pe tete netatali! <sup>9</sup> Ebema: naimano ekakiala:, la: magumulo idite lumagi idino tanaloma: ubia: tabo akogeala:, mabu diyala, Godote a:imano tamedawano okoli tanalo modoboma: eba gelo wiyasiya a:ma: kubadawama: da:begemene. Iyo, ebe Kawodawate na:pe a bilibilinomono iyaiya tanalo kapanagilameleaema:!

<sup>10</sup> Ega:walo naimano ekakiala:, modobola la:le iyalo tetelo da:pemaimiya ebe Godokono woki awokalimipino tanalo nemalagidilala:. Iba:te Godokono woko eba osiyodilonalo kawokawo temeteme duwatanakiya, wiyasiya iba:te nanitabokobi midi magumulo kodakodalo lamota:onanakiya, ebema: iba:te keba kunu kilukulinami, modobola la: eba kunu nilukulinala:. <sup>11</sup> Numa:la:, a nanitabokobi midipiate ebako wokopi eba malagidilolelo ma kunu gelanakoma:, “Ibino kodakodalo lamota:ona mabuma: Godokono kalakala tanalote iba:godolo nanitabolo nitanami!” Ebema: modobola la: nanitabokobi mididawa idi Yaubakono tanalo atumu na:kemalagidilala:. Kawo olalatinomo tanalote ebetamo demaigiya, ebe tetelo ebete nanitabokobi midi magumulo kodakodalo utinami, ebema: Kawodawa Godote ebe walubite olalati magumune ebeno igilo a:mula:miya. Kalakala kawonomola, Godoko ebe kawo nilakapodawanomola.

#### *Nani Tabonomo Ge Tanalo*

<sup>12</sup> Ebema: naimano nanitabokobi midipi ekakiala:, me tanalo idi ebe kawo tanalonomola. La:le epetapiatamo nani tabonomo gelama: dowagela:ema, olowiopiate la:imano tabo nanitabokobi ka:midima: la:le Godokono Unu Duliyoumolono mailo akoka:miala: ega:walo me opono mailo atumu akoka:miala:. Ebema: nanitabokobi mididawa, modobola a:ma: wiyasiya a:imano tabo kiyawao magumulo inamabu idino mailo ka:mia:no tabo nanitabolo ma kunu negiye, “Iyo, na kosiyodilomamo,” ega:walo kebe tetelo a:ma: tanalo idi osiyodiloma: modoboa:noma: deda:emene, modobola a:ma: nani tabo idi ma kunu negiye, “Ao, na a:kosiyodilomo.” Eiyee! Epetapiate a:ma: nanitabokobi ka:miditama: a:ma:le a:imano tabo elawokobi midima: tabo idi akogeala:, mabu ebako tabo kiyawao tanaloma: Godote kuba wiya a:ma:tamo kapalibomene.

#### *Godotamo Towetowe Tabo Ge Tanalo*

<sup>13</sup> Ebema: la: magumulo kebe lumagite temeteme epetapi magumulo dokolina, modobola ebete towetowe tabo Godotamo negemene. Ega:walo kebe lumagite kalakala magumulo dokolina, modobola ebete Godoko amamate oale nalapiomene. <sup>14</sup> Ega:walo kebe lumagi temetemetete dumina, modobola ebete sosi watowatopi ka:la:mite, ebene iba:te pelamete Kawodawa Ya:sukono mailamo olibi kikopuno iamo ebeno wato kali pabutimite Godotamo ebe ebo nadipatema:na:. <sup>15</sup> Ebema: iba:te Godoko nanitabokobi eba midilo, ebete ibino towetowe tabo olowite temetema:go lumagi wadekobi ebo ka:midimene, ega:walo diyala, ebe temetemetete ebe lumagino kuba osiyodilole tanalodo ebetamo da: a:pilae, ebene Godote ebe tanalo iyatawate ebe atu tetelo ebeno kuba egebolemete ka:dodolomatilimene. <sup>16</sup> Ebema: modobola la: magumulo idite ebeno kuba osiyodilole tanalo kawokalilame, idite ebeno kuba osiyodilole tanalo kawokalilame, eba kunu nowagelenala:, ebene la: magumulo idite idi Godotamo nadipatenakiyala:, ebete la:imano kuba egebolelametate la:imano apeno iyaiya temeteme tanalo balamo kalomolametama:. Nanitabola, kapiya tuputupudawano

towetowe tabo ge magumudo Godoko ebe modobola kawokawo anoano tanalo osiyodilolema:

<sup>17</sup> Numa:la:, Godokono woki awokalimidawa Elayako ebe opo lumagila, a keba kunula:ka: ebe ebako lumagila. Wiyasiya ebe wade tuputupudawala, ebema: ulamate kolopoligoma: ebete Godotamo kawonomamo da:towetowiya, Godote ebenu tabo nanitabolo olowiya, iyo, ebe tetene wagilimite ulamate tete geyageyanomolo kowonakia:, ebe tete ebe netewakapiya ulama ega:walo sikisi sagana tetela. <sup>18</sup> Wiyasiya ulamate walo owoma: Elayate Godotamo towetowe tabo da:kegiya, Godote ebenu towetowe tabo walo kolowite ulama opamo ebo palibiya epono pali inamabuate walo kakapepeoma:

*Lumagino Igilo Mula:me Tanalo*

<sup>19</sup> Ebema: naimano nanitabokobi midipi ekakiala:, naimano uwomu leta tabo ma kunula. La: magumulo idite Godokono nanitabo gabone iyabaiamo delegamene, modobola idite ebe walo na:kemagaemene. <sup>20</sup> Iyo, la: me kawo tanalo nemalagidilala:, kebe lumagite kuba osiyodilodawa umite ebenu kuba gabone Godokono nanitabo tanalamo walo da:kemagaemene, Godote ebe tuputupudawano osiyodilo tanalodo kubadawano igilo mula:mete ebenu iyaiya kuba osiyodilole tanalo ebo kegebolemene.

Me ebe naimano tabo uwomula. Taula.



## PITAKONO DOPO LETA EBETE NANITABOKOBI MIDIPIATAMO OSIYODILIYA

<sup>1</sup> Na ebe Pitatela, Ya:su Kelisote ebena sosi wagilima: iyaiya opamo daliboliya, ebe wokopi magumulo na idila.

Godote ebena epoma: keda:onama: kebe epo keka:la:mioliyale, ibi magumulo la: epetapi Yudiya opone iyaiya opamo tolama:wete ebo da:nilukuliawenama, ma kunu la: epetapi Pontase opolo, epetapi Gale-siya opolo, epetapi Ka:padosiya opolo, epetapi A:isiya opolo, ega:walo epetapi Bitiniya opolo, la:le me iyaiya opolo bilukulionamata, nale me leta la: bilibilinomatamo ebema: palibomo. <sup>2</sup> Nanitabola, iyalo tetelo Nabiwi Godote la: eka:la:miyata la:le ebena Uliyanano elawamo ebena talena epoma: keda:wenama:, iyo, ebete ubi iyatiya Ya:su Kelisokono kalimamo la:imano tepo magumuno daley a ukulaolelametate, la:le ebetamo nanitabolo ka:tudila:wenama:.

Modobola Godokono nilakapo tanalo ega:walo milo tanalote la:godolo kawonomamo na:pola:nama:na:.

### *Nanitabokobi Midipiate Wade Igilo Duliyomolo Laema: Ya:sukono Pe Tete Demakopelena*

<sup>3</sup> Modobola a kalakala tabo aimano Kawodawa Ya:su Kelisokono Nabiwitamo kadipatemalema:, mabu ebe nani Godotela. Numa:la:, ebete ebena kawo nilakapo tanalonomo ma kunu awokalimiya, ebete Ya:su Kelisoko a:e magumune igilamo dadipatiya ebe tanalodo oli igilo atamo ikaeamiya. Ebe mabuma: ale ebena pe tanaloma: olowiolo kalakalago ebe makopelena:, <sup>4</sup> mabu ebe tetelo Godote ebena gudi mabuma: dosiyodiloliya ale ebe wadewade inamabu nanitabolo kuwatemalema:. Ebe wadewade inamabuate ebena Unu Duliyomololo eba pola:nalo uwomua: tetelo a:kolopoligonama:na: ega:walo akabaleonama:na: ega:walo a:ka:kubakubaonama:na:.

<sup>5</sup> Nanitabola, Godoko ubila ebete me opono Uwomu Egelalo ebena igilo mula: tanalo la:tamo ikalaema:, ebema: ebete la:imano nanitabokobi midi tanalodo ebena elawamo la: nitakeamidalenata. <sup>6</sup> Me mabuma: la: nekalakalaonala:, iyo, nanitabola, me tetelo la:le iyaiya temeteme epetapi magumulo eba ilukulinalo mibomibo iyatawaonakomata, wiyasiya tete tatalila la:imano kalakala tete ka:pemaigamene.

<sup>7</sup> Numa:la:, me opolo iyatawaopiate golodo inamabu ela magumamo diyatima:na:, elate golodo inamabuno daley a eba opoliyalelo iba:te ebe inamabuno wade a:la:uwa:da:le tanalo ebo kuima:na:. Eba kunu Godote la:imano iyaiya temeteme magumulo ebena wade woko bosiyodilona la:imano nanitabokobi midi tanalo kulamelelametama:, da: nanitabola: o da: nanitaboa:. Ebema: numa:la:, opo epate golodo inamabu duminaka wadenoma: gelanaka, mabu tete da:pesolo ebe opo inamabuno a:la:uwa:da:le tanalote kawonomamo kitanamene, wiyasiya kalakala kawonomola, la:imano nanitabokobi midi tanalono wade tanalote ebako golodo inamabuno wade tanalo nodolina, mabu nanitabokobi midi tanalote la:godolo uwomua: tetelo a:kolopoligonamene. Ebe mabuma: modobola la: temeteme magumulo kodakodalo nelamota:onala:, mabu Ya:su Kelisote walo da:ka:pemene, ebete la: eba pemoiolo la: powalogoletate unamo ebo ka:powadipalatelema:ta. <sup>8</sup> La:le ebe dopamo kuma:wenakia:

ega:walo me tetelo la:imano balida:mo ebe kuma:wena; wiyasiya la:le ebe nanitabokobi eba midinalo nilakapolo malagidilonamata. Ebe mabuma: la:imano temeteme kawonomamo malagidilolea:no kawo kalakalanomote la:godolo bitana, ebako kalakala beda: kawonomola:ka! Iyo, epate ebako kalakala tabamo awokalima: modoboa! <sup>9</sup> Numa:la:, ebe kalakalate la:godolo nanitabolo bitana, mabu la: iyatawalata la:imano nanitabokobi midi tanalodo la:le Godogodone igilo mula: tanalo nelawenamata.

<sup>10</sup> Dopamo tetelo Godokono woki awokalimipiate me igilo mula: tanalono nanitabo tanalo kiyatawaoma: ebeno Buka apuapuno tabo ka:la:miolenakiya, ebene iba:te ma kunu gelanakiya, walone tetelo Godote ebeno igilo mula: tanalo la: nanitabokobi midipiatamo nilakapolo gito kikalaema:ta. <sup>11</sup> Wiyasiya numa:la:, iba:te me tanalo idi nipo umiya, Godokono igilo mula: tanalote keba kunu na:ka:pemene ega:walo keba tetelo na:ka:pemaigamene. Ebe tetelo Kelisokono Uliyanate ebeno igilo mula: tanalono pe tete iba:tamo nanitabolo kawokalimiya; wiyasiya ebete ibido ma kunu kiyawaonaki, Godokono Alibodawa Kelisote da:pemene, ebete dopamo kawokawo temeteme uwatete, walone Godote ebeno wade pukuilame tanalomo ebe ebo kowalogomene. <sup>12</sup> Ega:walo ibino woko osiyodilo magumulo Godote ibi analiya, iba:te keba iyaiya tanalo degelanakiya ebe tanalate iba:tamo a:ka:pemaimioma:na: wiyasiya walone epatamo ka:pemaimioma:na:. Ebema: nanitabokobi midipiala:, la: ebe ebe epolata, iyo, la: tetelo Godokono wokopi epetapiate pemaimiote Ya:sukono Wade Tabo ebeno Unu Duliyomolono Talena Uliyanano elawamo la:tamo a:pa:kiyawaonakiya. Nanitabola, Unu Duliyomolono nopopiate ibino ubi kawonomamo alomona, la:le keba waminaole tanalo kuwata:wiyama, iba:te ebe wadewade tanalo atumu ka:kiyatawaoma:.

### *Nanitabokobi Midipiate Godokono Talena Magumulo Ilukuli Tanalo*

<sup>13</sup> Ebema: la:le Godokono wade woko kosiyodilawenama: la:imano woki wadekobi na:midila:la:. Ega:walo modobola la: Ya:su Kelisokono pe tanaloma: olowiolo nilukulionala:, mabu ebete dapawokalamene ebe egelalo ebeno igilo mula: tanalo la:tamo nilakapolo ka:pikalaema:ta. <sup>14</sup> Ega:walo dopamo tetelo la:le Godokono nanitabo tanalo iyatawaoa:no keba tanalo kosiyodilola:wenakima, la: me tetelo ebegodone olobila:wete ebe kateneno iyaiya ubi tanalo osiyodilole tanalodo nanitabokobi midia:pimu walo akoilukulionala:. <sup>15</sup> Wiyasiya la: Godotamo eba tudila:olo ebeno totomu tabo bilibilinomo magumulo idi kapiya adikanalea:no, modobola la: la:imano osiyodilole tanalo bilibilinomo magumulo talenama: neda:iyala:. Iyo, la: deka:la:mitiyala ebe Kawodawate talenama: keba kunu keda:nale la: atumu eba kunu nilukulionala:, <sup>16</sup> mabu ebete ebeno Bukalo a ma kunu iyatuamena, “La:imano osiyodilole tanalo magumulo talenama: neda:onala:, mabu na ebe Talenanomolo Okolidawala.”

<sup>17</sup> Numa:la:, Godote kapiya tuputupu gabonomodo me opo epono iyaiya tanalo bilibilinomo kanagilamelelaemene, iyo, ebe wade wiya ega:walo kuba wiya iba:tamo modobolo dikalaemene ebe Kawodawala, ega:walo nanitabola, la:le ebetamo da:towetoweawenakoma ebe la:imano Nabiwima: ka:minakomata. Ebe mabuma: modobola la: me opolo kapelapimu eba ilukulinalo, la:imano osiyodilole magumulo ebe tolemelo ebe kapiyatamo na:tudila:onakiyala:, <sup>18</sup> mabu la: iyatawalata la:imano wade wiyate ebegodone ka:pemene, ega:walo la:le dopamo ewoniagodone delawa:wiyama ebe ilukuli tanalono osiyodilole magumulo ebeno nanitabo igilo tanalo nipo umiyamata. Iyo, dopamo la:le ebe tagala ilukuli tanalomo

da:tudila:wenaima Saitanakono idoko moto epoma: eba eda:onalo, Godote la: nilakapoilamelo ebe idoko moto magumune ebo wagailiyata. Ebema: numa:la:, ebe tetelo ebete la: me opono maniamo kuwatetiya:, <sup>19</sup> wiyasiya ebete la: Kelisokono kalima wiya kawonomamo la: wiyakobi a:midiliyata. Iyo, kapiya kuba idite Kelisogodolo itana:no, ebete sipi-goeo da:peso wadenonomo keba kunula:ka: eba kunu eda:lo la:imano kuba osiyodilole mabuma: ebene ape kalimagono nilakapo inamabuma: midite Godotamo ebo ikamiya. <sup>20</sup> Nanitabola, me opo osiyodilola:no dopamo Godote Kelisoko iyalo eka:miya la:imano igilo ka:mula:lelametama:, ebema: kalakala kawonomola, a tetelo me opono uwomu tete eba tatalilo ebete opo epatamo ebo pawokaliya, <sup>21</sup> ebene ebete da:iya ebe tetelo Godote a:e magumune ebe eba adipatelo ebene elawo alonomago ebe ebo walogiya. Ebe mabuma: la:le Kelisodo Godoko nanitabokobi eba midinalo, ebegodone la:imano wadewade tanalo nanitabolo uwatema: ebene pe tanalo olowiolo makope-lenamata.

<sup>22</sup> Numa:la:, la: Godokono nanitabo tanalamo eba tudila:olo la:imano tepo magumu ukulaoliyamata la:le la:imano nanitabokobi midipi ekaki nilakapolo nanitabolo kemalagidilola:wenama:. Ebema: modobola la: magumulo idite idi kemalagidilo, idite idi kemalagidilo, la: eba kunu eba wagelenalo la:imano tepo magumuno kawo nilakaponomamo epetapi nemalagidilolenala:. <sup>23</sup> Nanitabola, dopamo la:imano nabi ebe piyate ibino kadele teta:mo nemaimiote da:na:elaiya ibi ebe dubula, wiyasiya me tetelo la: Igilo Nabiwi Godokono gudilata, iyo, la:le ebene uwomua: Igilo Tabodo awokalawete oliolinoma: eda:iyamata. <sup>24</sup> Ebe mabuma: Godokono Bukalo tabote ma kunu itana,

“Epo bilibilinomo ibi uwago keba kunula:ka: eba kunula,  
 ega:walo ibino iyaiya amama tanalo  
 ebe kaiyakaiyano titi keba kunula:ka: eba kunula.  
 Ka:lo dapepeuta ebe uwagate dumutu egelalo kalawoma:na:,  
 ega:walo ka:lo wade tita:gopi da:pola:na  
 ebe kaiyakaiyate dumutu opamo gito kema:sila:ma:na:.”

<sup>25</sup> Godokono Tabote wiyasiya  
 uwomua: uwomua: tetelo bitanamene.”

Numa:la:, me tabo dopamo tetelo epetapiate la:tamo da:kiyawaiya ebe Wade Tabola.

## 2

### *Ya:suko Ebe Godokono Moto no Nokola Keba Kunula:ka: Ebako Alola*

<sup>1</sup> Me mabuma: la:godolo da:pola:na ebe iyaiya kuba bilibilinomo iyabaiamo nalomala:, ma kunu a:da: tabo akokiyawaonakala:, ega:walo mena netewa tanalo na:miyapala:, ega:walo epetapino inamabuma: akodowaonakala:, ega:walo epono mailo kubailame talenala. <sup>2</sup> La: wiyasiya a:lia:li gudimu eba eda:olo Godokono Uliyanano wade nono nioma: la: la:imano ubi tanalo kawonomamo niyatinala:, iyo, eba kunu la: la:imano igilo mula: tanalo nanitabolo laema: nanitabokobi midi magumulo kapepeomamota. <sup>3</sup> Nanitabola, dopamo tetelo la: Kawodawano nilakapo alatipa:wete golanomoma: ebo geliyamata.

<sup>4</sup> Ebema: la:le Kawo Igilodawa Ya:sutamo na:pelama:la:, ebe epate kubama: gelate iyabaiamo diyatiya ebe dawala, wiyasiya Godote ebe nokola keba kunula:ka: ebako wade alonomoma: gelo ebo lawiya. <sup>5</sup> Numa:la:, ebene

igilote la: magumulo atumu ba:kitana, ebema: modobola la: pelama:wete la: a:ka:tuwa: la: Godotamo na:pikameala:, la:le ebe amamateno motono wadewade kewama: keda:wenama:. Ebene la: ebe moto gulo ebe eba wa-tidilonalo ebena Uliyanano talena woko osiyodilo tanalodo nilakapo inamabu ebetamo ikameopima: beda:onamata, ebema: la:le Ya:su Kelisodo ebetamo dikameawenakoma, ebete kalakalago la:godone buwatanakomene.  
<sup>6</sup> Numa:la:, Godote ebe tanalo awokalima: ebena Bukalo ma kunu gena,

“Na nokola keba kunula:ka: ebako wadenomo abo lawete  
 Yelusalema kawo duliymololo\* detenamo  
 ebe motono aloma: ka:midimamo.  
 Ebema: kebe lumagite ebe dawa nanitabokobi da:midimene,  
 ebete uwomua: tetelo ilipo tanalo a:kiyatawanamene.”

<sup>7</sup> Nanitabola, la: piyate Ya:suko nanitabokobi da:mida:wenama, la: iyatawalata ebe Godokono wiya kawonomo aloma: eda:na. Wiyasiya numa:la:, epetapiate ebe nanitabokobi ka:midina:, ebema: Godokono Buka tabote ibino ubia: tanalo awokalima: ma kunu gena,

“Moto etepiate iyabaiamo diyatiya,  
 ebe alote wiyasiya motono elawo mabuma: eda:na.”

<sup>8</sup> Ega:walo Godokono Bukalo tabo idite ma kunu itana,

“Me Kawodawa ebe gabo tetelo ditana ebe nokolala,  
 epate ibino kuba ubi tanalago eba tolamelo  
 ebegodolo agowa nukamidaote  
 ebe unamo ebo ka:na:gudima:na:.”

Ebema: nanitabola, iba:te Godokono tabo nanitabokobi midia: mabuma: agowa ukamidaote ebo gudinaka, Godote ibino tanaloma: iyalo degiya eba kunu.

<sup>9</sup> Wiyasiya la: nanitabokobi midipino tanalo iyanomola. La: ebe Godote ebena ubilo duwatetiya ebe epolata, ega:walo la: Kawo Elawodawa Godoko amamatelo ebetamo nilakapo inamabu dikameawenakoma, la: ebe wokopilata. Iyo, la: ebetamo talena woko dosiyodilawenama ebe tanebapilata, ega:walo la: Godokono iya eponomoma: eda:onamata. Nanitabola, Godote la: idoko magumune eka:la:miyata, mabu ebe ubila la:le ebena wade alonomo magumulo eba ilukulinalo ebena wadewade osiyodilole tanalo epetapiatamo ka:kiyawawenakoma:. <sup>10</sup> Ebema: kalakala kawonomola, la:le dopamo tetelo Godokono epoma: keda:wenamia: wiyasiya ka:lo la: ebena gudilata, ega:walo dopamo la: ebena nilakapo kiyatawawiya: wiyasiya me tetelo ebegodone elawiyamata.

### *Godoko Nanitabokobi Midipiate Me Opolo Kapelapima: Deda:ona Ebe Tanalo*

<sup>11</sup> Naimano wadewade namutupiala:, nale la: toweolaemata la: me opolo eba ilukulinalo kapelapima: neda:onala:, mabu la: Godokono Unu Duliymolo epolata. Ebema: la:imano kateneno ubi tanalamo akotudila:oala:, mabu ebe kuba ubi tanalate la:imano uliyanano igilago eba gowelaolo

\* **2:6:** Buka ka:la:mioledawa, modobola a:ma: niyatawa, Yelusalema duliymolono mailo idi ebe Sayonola.

la: kubailaema: wagenena. <sup>12</sup> Ega:walo la:le nanitabokobi midia:piago eba ilukulinalo ibino ololo apulo wadewade tanalo kapiya nosiyodilole-nakiyala:, mabu ibi magumulo piyate la: kubakubapima: deka:la:mitana, iba:te la:imano wadewade osiyodilole tanalo eba ulamenalo la: mabuma: woki iyakobi ebo ka:midilima:na:. Iyo, nanitabola, Godote me opo epono tanalo anagilamelelaema: da:pemene, ebe Kawo Egelalo ebe atu epate la:imano wadewade osiyodilole tanaloma: Godokono mailo kadipatema:na:.

### *Gabamani Wokopiatamo Tudila:o Tanalo*

<sup>13-14</sup> Ebema: Kawodawa Ya:suko mabuma: la:le Loma duliyoumolo epono Kawo Elawodubunomotamo na:tudila:onala:, mabu opo kawonomolo ebena elawote nanitabolo bitana. Ega:walo ebete iyaiya opo epetapi bilibilinomamo danaliboliya ebe kawokawo elawodubu ega:walo ibino gabamani wokopi epetapi, modobola la: ibi bilibilinomatamo atumu na:ka:tudila:onakiyala:. Nanitabola, ebe dubagodolo elawo bitana kuba osiyodilolepiatamo kuba wiya eba ikalamelo wadewade tanalo osiyodilolepi unamo kowadipalatelema:na:. <sup>15</sup> Me mabuma: Godokono ubi tanalo ma kunu bitana, kebe tetelo ebena nanitabo tanalo iyatawa:piate la: kubakubapima: deka:la:mitamene, la:le la:imano wadewade osiyodilole tanaloma ibino daedale tabo gela tanalo ebo kodiyoolemamota. <sup>16</sup> Ebema: la: Kelisoko magumulo tutupima: deda:wenama, la: nanisiwale! La: daedale wokilo ma kunu akogelala:, “Kelisote aimano kuba wiya iyalo uwa-teamiya, ebema: ale aimano iyaiya kuba ubi tanalo walo da:kosiyodilolema:, Godogodone kuba wiya a:kelaema:.” Ao, eba kunua! Modobola la: wiyasiya la:imano ape Godotamo ikameonomo nikameiyala:, la:le la:imano osiyodilole magumulo ebena wiya: wokopima: keda:wenama:. <sup>17</sup> Eba kunu la:le nanitabokobi midipi epetapi bilibilinomo nilakapolo eba malagidilolenalo Godoko kapiya na:tolemenala:. Ega:walo me opo kawonomolo elawoma: deda:na, ebe Loma epono Kawo Elawodubunomono tanaloma: la:le la:imano tepo magumulo kuba tabo gela:no ebena totomuamo na:tudila:onakiyala:. Iyo, modobola la: a:ka:tuwa: la: opamo eba alomolo, epo epetapi bilibilinomono tanaloma: la:imano tepo magumuno wokilo ibi unamo nowadipalatenakiyala:.

### *Woko Namutupiatamo Tudila:o Tanalo*

<sup>18</sup> Ebema: kawokawo woko dubate la: kebe epo maniamo duwatetiya, modobola la:le ebe dubuno wiya: woko kosiyodilola:wenama: la:imano tepo magumulo ibino tanaloma: kuba tabo gela:no iba:tamo woko elawonomamo nosiyodilonakiyala:. Iyo, woko namutupi magumulo piyate la: da:nilakapoilametana, la:le wadewade woko ibi kapiyatamo osiyodilolea:no, piyate la: kawiya analelo la:tamo da:dowaona, modobola la: ebako woko namutupiatamo atumu kalakalago na:tudila:onakiyala:. <sup>19</sup> Nanitabola, a:ma: eba kunu eba wagenenalo a:imano kuba osiyodilola: tetelo idite a:ma:tamo temeteme dikametamene, Godote ebe tanalo umite a:ma:tamo kekalakalamene mabu a:ma: a:imano tepo kodakodaimilo ebena ubi tanaloma na:tuduwatanata. <sup>20</sup> Wiyasiya a:ma: woko kubanu osiyodilo magumulo woko namutudawate iyaiya temeteme a:ma:tamo dikameotamene, ebe tetelo a:ma: a:imano tepo kodakodaimilo kawo tanaloma: degeaemene, ebe mabuma: Godote a:ma:tamo ba:kekalakalamene? Ao, ebena kalakalate a:kitanamene mabu a:ma: kuba wokodawalata, wiyasiya kebe tetelo a:ma: wade woko osiyodilo magumulo temeteme delawa:emene, ebe tetelo ebena kalakalate a:ma:tamo nanitabolo kitanamene.



*Ya:sute Ebena A:e Magumulo Kawokawo Temeteme Duwatiya*

<sup>21</sup> Nanitabola, Godote la: nanitabokobi midipi eka:la:miyata, la:imano nanitabokobi midi mabuma: me opono temeteme magumulo ka:pola:wenama:. Ebema: Kelisote la:imano igilo ka:mula:lelametama: ebena a:e magumulo kawokawo temeteme keba kunu kuwatiyale, Godoko ubila la: Kelisokono agowa bobodo ebe nanitabolo kowaloma:tawenama:.  
<sup>22</sup> Iyo, numa:la:, Kelisote kuba idi kosiyodiliya: ega:walo ebegodolo a:da: elemasigi tanalo idi puliyala. <sup>23</sup> Ega:walo kubakubapiate ebe demalogiya ebete wiyasiya iba:tamo malogole tabamo ka:wiya:, iyo, ebete iba:godone kawokawo temeteme duwatiya, ebete ibi kawiya analelo iba:tamo kuba wiya ikalaema: kegiya:. Ebe tetelo ebete wiyasiya ebena nanitabokobi midi tanalo Godotamo iyatiya ebete ebena igilo ka:mula:ema:, mabu ebe iyatawiya walone ebe Kawodawate epono tanalo bilibilinomo tuputupu gabonomodo kanagilamelelaemene. <sup>24</sup> Ebena Kelisote a:ka:tuwa: ebena apa:mo aimano kuba osiyodilole tanalo uwateamete kewa olotolowamo ebo watiya. Ebete eba kunu osiyodiliya mabu ebe ubila ale aimano kuba osiyodilole magumulo a:elaote ebena tuputupu okoli magumulo kilukulionama:, iyo, ebete ebena temeteme uwate tanalodo la: wadekobi a:midiliyata. <sup>25</sup> Ebema: numa:la:, dopamo tetelo la: iyaiya dalatidiawiyama ebe sipi-goeogoeomu ilukulionaimata, wiyasiya ka:lo Godote la: walo a:kemagaelyata la:imano Wade Sipi-goeogoeo Ulamedawa kowaloma:tawenama:, ebe la:imano tepo magumuno Woki Buiyalateledawala.

### 3

*Nanitabokobi Midipi Kamiyale Ega:walo Ibino Dubu Iba:te Kapimiya Keba Kuru Na:kilukulionama:na:*

<sup>1</sup> Ebema: kamiyala:la:, nale wokopi ibino namutupiatamo tudila:oma: keba kunu kanalemo, modobola la: atumu la:imano awiatamo na:tudila:onakiyala:. Diyala, ibi magumulo epetapiate Ya:sukono Wade Tabo nanitabokobi ka:midina:, wiyasiya la:le ebena Nani Tabono tanalo idi iba:tamo gela:no, la:imano wadewade osiyodilole tanalate ibi nanitabo gabo ebo kiyatulaema:na: iba:te atumu nanitabokobi midipima: keda:oma:.  
<sup>2</sup> Ebema: la:imano osiyodilole magumulo daleyawa wokino tanalo idite itana:no, la:le Godoko la:imano wokino tanalamo dowalogawenama, modobola iba:te ebe netewa tanalo la:imano ilukuli magumulo wadenomamo nulamenama:na:.

<sup>3</sup> Ega:walo modobola la: la:imano unu tama wadekobi midili tanaloma: kawonomamo akomalagidilonala:. Ma kunu la:imano eke wadekobi midili tanalo, ega:walo wiya kawokawonomo tulukaula pupuli tanalo, ega:walo galono sepisepi pupuli tanalo, ega:walo wadewade kaliku pupuli tanalo, ebe tanalo bilibilinomo ebe kawokawo tanalola:.  
<sup>4</sup> Wiyasiya numa:la:, kawo tanalo ebe tepo magumu wadekobi midili tanalola, mabu kebe kamiyaalete ebena tepo magumu wadekobi da:midimene, ebe wade tanalote ebegodolo a:kolopoligomene, iyo, ebako wade milo okoli tanalote ebegodolo eba itanalo, Godote ebe tanalo umite wadenoma: kegemene.  
<sup>5</sup> Ebema: modobola la:le iyalo tetelo tuputupulo dilukulionamiya ebe kamiyaleno ilukuli tanalo nemalagidilala:. Iba:te Godoko nanitabokobi eba midinalo ibino awiatamo tudila:o tanalodo ibi a:ka:tuwa: ibino tepo magumu wadewadenonomoma: ebo midilinakiya,  
<sup>6</sup> iyo, ma kunu Selate ebena awi A:ibalayamatamo wadenomamo tuduwatalo ebe ebena wade watodawama: ka:minaki. Ebema: la:le Selako eba ibamitalo la:imano awi tolelamea:no iba:tamo wadewade

tanalo dosiyodilola:wenakoma, la:imano nanitabokobi midi magumulo la: ebene buwelemele gudima: beda:onomata.

<sup>7</sup> Ega:walo nanitabokobi midipi dubala:, la: atumu la:imano kamiyala:go milolo eba ilukulinalo wadewade wokino tanalago ibi nowalubilinakiyala:, mabu la:imano elawote ibino elawo nodoilina. Iyo, modobola la: la:imano tepo magumuno wokilo la: a:ka:tuwa: la: opamo eba alomolo la:imano kamiyale unamo nowadipalatenakiyala:, mabu Godote epatamo nilakapolo dikalamena iba:te ebe uwomua: igilo la:go kapimiya kelaema:na:. Nanitabola, la: ma kunu dowagela:ema, Godote la:imano towetowe tabo olowioma: tanalo idite gigiyu a:kemopimene.

*Wadewade Osiyodilole Tanalo Mabuma: Temeteme Lawe Tanalo*

<sup>8</sup> Ebema: la: nanitabokobi midipino ilukuli tanaloma:, na Pitate uwomu tabo ma kunu gemo. Modobola la: bilibilinomate woki kapiyama: eda:wete milolo nilukulinala:, ma kunu amama tanalote la:tamo akopa:la:, ega:walo la: nanitabokobi midipi nilakapolo eba malagidilolenalo, ibino temeteme tanaloma: la:imano tepo magumu akokodakodailama:la:. <sup>9</sup> Ebene lumagi idite a:ma:tamo kuba dosiyodilomene, a:ma: ebene kubama: akowiyala:, ega:walo ebete a:ma:tamo malato tabo degemene, a:ma: ebene malato tabo wiya:no wiyasiya ebe mabuma: Godoko naniye ebete ebe wadenomamo kowalubinama:. Nanitabola, Godote ebene nilakapo a:ma:do awokalima: a:ma: iyalo eka:miyata, mabu ebe gabodo ebene wade walubi tanalote a:ma:tamo atumu ba:ka:penakomene. <sup>10</sup> Me mabuma: Godokono Bukalo tabote ma kunu itana,

“Kebe lumagite kalakalago okolima: ubi diyatimene,  
 ebete kubakuba tabo ega:walo a:da: elemasigi tabo akokiyawaonakala:  
<sup>11</sup> Ega:walo modobola ebete kuba osiyodilole magumune olobigate  
 wadewade tanalo nosiyodilolenakomene,  
 iyo, ebete ebene ubi kawonomamo niyatinkomene  
 epetapi bilibilinomago milolo kilukulinama:  
<sup>12</sup> Nanitabola, piyate eba kunu tuputupupima: deda:ona,  
 Kawodawa Godote ibi wadenomamo eba ulamenalo  
 ibino towetowe tabo olowionako,  
 wiyasiya piyate iyaiya kuba tanalo dosiyodilolena,  
 ebete iba:tamo gowela tanalo osiyodilonako.”

<sup>13</sup> Ebema: a:ma:le wadewade tanalo osiyodilolema: elawonomoma: deda:emene, ebe tetelo lumagi idite ubi a:kiyatimene a:ma: kubaima:  
<sup>14</sup> Wiyasiya diyala, tete idilo a:ma: wade tanalo eba osiyodilolo epetapiate temeteme a:ma:tamo da:bikametamene, ebene ebe temeteme magumulo iba:tamo akotoletola:la: ega:walo woki bilibilima: akoeda:la:, wiyasiya a:ma: kawonomamo nekalakaliye! <sup>15</sup> Iyo, a:ma: a:imano tepo magumulo Kelisoko kapiya tolemelo ebe unamo eba adipatelo Kawodawama: neka:minakiye, ega:walo modobola a:ma: ma kunu nolosiyodilonakiye, kebe tetelo Kelisoko iyatawa: lumagite a:imano nanitabokobi midi tanaloma: a:ma: danatamene, a:ma: ebe tanalono magumu ebe wadenomamo ebo kiyatuma:ta. <sup>16</sup> Ebene a:ma: a:imano tanalo ebetamo dawokalima:emene, modobola a:ma: a:ka:tuwa: a:ma: opamo iyatilo a:imano kimalagidilamo ebe eba adipatelo gelebadi gabodo ebe nowalubiye. Nanitabola, a:ma:le a:imano osiyodilole magumulo Kelisokono tuputupudawama: eba eda:nalo a:imano tepo magumuno mulo wokino tanaloma da:tuduwatawenakomene, piyate a:imano Kelisoko waloma:ta mabuma: a:ma: malogolo kuba tabo

da:kiyawaona, walone iba:te a:imano wade okoli tanalo eba malagidilolo ilipo ebo kelaema:na. <sup>17</sup> Ebema: nanitabokobi mididawa, a:ma: numa: Godote ubi diyatimene, a:ma:le wade osiyodilo tanalo idi mabuma: temeteme delawa:emene, kuba:, ebe wade tanalola, mabu ebako temeteme magumulo Godokono kalakalate a:ma:tamo kitanamene, wiyasiya kebe tetelo a:ma: kuba osiyodilo magumulo temeteme delawa:emene ebete a:ma:tamo a:kekalakalamene.

*Ya:sukono Kawokawo Temeteme Tanalodo Nanitabokobi Midipiate Igilo Mula: Tanalo Delawiya*

<sup>18</sup> Ebema: modobola la: Kelisokono tanalo nemalagidilala:. Ebe tuputupu-dawanomola, wiyasiya ebete me opo epono kuba osiyodilole tanalo bilibilinomoma: kawokawo temeteme uwatete ebo a:iya, me gabodo ebete a Godotamo emagaeiya ale ebene wadewade namutupima: keda:onama: Numa:la:, epate Ya:suko danakapumiya ebe tetelo ebene katene apeno igilote gito olopoligiya, wiyasiya Godote a:e magumune ebe dadipatiya ebete uwomua: igilo ape ebo kelawiya, iyo, ebete uwomua: uwomua: tetelo walo a:ka:enamene. <sup>19</sup> Ega:walo me tanalo idila. Godote ebe igilamo adipatea:no dopamo Ya:sute Saitanakono idoko moto guamo tote Godokono tabo ebo na:kiyawaiya. <sup>20</sup> Ebolo piyate ebene tabo dolowiya, ibi me opolo Godotamo tudila:oa:noma: deda:onamiya ebe kuba osiyodilolepino a:elao uliyanala, iyo, Nowate kawo penomo dosiyodiliya Godote wade tete iba:tamo ebo ikalamiya, wiyasiya iba:te ebene tabo kolowiya:. Ebe mabuma: ulama obote dodoliya ebe tetelo me opo epo magumulo kapiyakapiyate Nowakono pe guamo nopila:iya, iyo, a:iti eponomate obo magumune ibino igilo mula: tanalo eba lawelo epetapi bilibilinomate gito a:elaiya.

<sup>21</sup> Ebema: Nowako tetelo demaigiya ebe ulama obo ebe uli tanalola. Iyo, ka:lo nanitabokobi midipino obamo waduba:midaole tanalo ebe ibino igilo mula: gabola, wiyasiya ebe osiyodilo magumulo obote lumagino tepo magumu a:kukulaemene, ao, obote unu tamano daley a kapiya kukulamene. Ebema: igilo mula: tanalo keba kunula:ka:? Lumagite obamo aduba:mida tanalo lawe tetelo ebene tepo magumuno mulo wokino tanalamo tuduwatalo Godotamo nanitabolo ma kunu degemene, ebete ebene okoli magumulo iyaiya tuputupu tanalo kapiya kosiyodilolenama:, ebe tanalodo ebete igilo mula: tanalo kelaemene, mabu Ya:su Kelisote ebene igilo ebako lumagitamo ikaema: a:e magumune walo a:kemaigiya. <sup>22</sup> Nanitabola, ebe Igilodawano elawo kawonomola. Ebete Unu Duliyaomolamo walo ka:nodolote ebolo Godokono tumudi apuamo da:nokoliya, ebe tetene wagilimite me teta:mo pemaiga nopopi bilibilinomate, Godokono nopopi ega:walo Saitanakono nopopi, elawoelawonomo nopopi ega:walo elawoelawodopo nopopi, ibi bilibilinomate Ya:sukono ubi tanalamo ba:tudila:onakoma:na.

## 4

*Nanitabokobi Midipiate Kuba Osiyodilole Tanalone Godotamo Olobila: Tanalo*

<sup>1</sup> Nanitabola, Kelisote me opolo eba okolinalo ebene apa:mo kawokawo temeteme iyatawanaki, ebema: modobola la: la:imano temeteme magumulo ebene wade walubi woki atumu kodakodalo nelawiyala:, gowe-laodawate ebene igilo mula:ma: gili kilibi keba kunu kelawenakole eba kunu. Numa:la:, potele ebene nanitabokobi midi mabuma: ebene apa:mo temeteme duwatanako, ebe lumagite tagala okoli tanalono kuba osiyodilole tanalamo walo a:ka:tuduwatanakomene, <sup>2</sup> iyo, ebete ebene a:e uwomuamo

eba nemaigalo Godokono ubi tanalamo ba:tuduwatanakomene, ebenu kateneno ubi tanalamoa:

<sup>3</sup> Nanitabola, nanitabokobi midia:piate kebe kubakuba tanalo dosiyodilolenaka, la: epetapi ulama bilibilinomolo ebe atu tanalo kosiyodilolenakimata. Iyo, dopamo la: la:imano kateneno ubi tanalamo eba tudila:olo buwelemele pilo tanalo, ega:walo gamoda nio magumulo daedalema: eda:o tanalo, ega:walo iyaiya ilipo soliyomu magumulo ilukulio tanalo, me tanalate la: magumulo kawokawonomoma: eda:onamiya, ega:walo la: Godokono kawo totomu tabo idi adikanala:wete ida:da:li amamalatele-naimata. Wiyasiya kalakala kawonomola, la: ebe kubakuba osiyodilole tanalo a:miyapiyamata, <sup>4</sup> iyo, me tetelo la:le nanitabokobi midia:piago ebako kawokawo kuba ega:walo daedale wokino iyaiya tanalo kosiyodilola:wena:, ebema: iba:te la: mabuma: kawonomamo la:wa:ote la: ebo malogolenakota. <sup>5</sup> Ebema: nanitabola, Godokono Kawo Egelalo iba:te ebenu ololo apulo da:nutitatama:na:, ebete ibino iyaiya kuba osiyodilole mabuma: iba:tamo wiya eba ikalamelo ebe odiyoboma: iba:te tabo idi gelama: a:ka:modoboma:na:. Iyo, ebe Elawodawate iyalo olosiyodilote bokolina, me opolo dopamo dilukulionamiya ega:walo ka:lo tetelo dilukuliona ebe epo bilibilinomono osiyodilole tanalo anagilamelelamete iba:tamo modobo wiya kikalamolemene. <sup>6</sup> Numa:la:, me ebe mabuma: Ya:sukono Wade Tabote a:elaopiatamo demaigiya. Iyo, iba:te me opolo eba ilukulinalo ibino apa:mo dosiyodilolenakiya ebe kuba mabuma: Godote iba:tamo a:e wiya ikalamete, ebenu ebete ebenu ubi tanalo ma kunu iyatiya, ebe a:elaopino uliyante Wade Tabo olowio magumulo oli igilo uwatete Godokono ubi tanalamo uwomua: uwomua: tetelo ba:tudila:onakoma:na:.

*Godote Nanitabokobi Midipiatamo Iyaiya Elawo Dikalamoliya Iba:te Ebenu Woko Kosiyodilolenama:*

<sup>7</sup> Numa:la:, tete tatalila me opono tanalo bilibilinomate kolopoligoma:na:, ebema: modobola la: tepo kodakodailama:wete ebe tanalote pema: olowiolo nilukuliniyala:, mabu me gabodo la: Godotamo towetowe tabo gela magumulo elawonomoma: keda:omamota. <sup>8</sup> Ebema: la:imano osiyodilole tanalo bilibilinomo magumulo me tanalo kawo tanalonomola. Modobola la:imano ilukuli magumulo idite idi nilakapolo nemalagidilonala:, mabu kebe tetelo la: nilakapo magumulo dilukula:wenama, ebe tetelo idite idino kuba osiyodilole tanalo kawonomamo malagidilolemea:no samamo kegebolemamota. <sup>9</sup> Ega:walo modobola la: ubia: tabo gela:no epetapiate epetapi baemo ega:walo lao baino tanalamo nowalubiunakiyala:.

<sup>10</sup> Ega:walo me tanalo idila. Godote nilakapolo nanitabokobi midipi bilibilinomatamo ebenu iyaiya elawo ikalamoliya iba:te ebenu woko kosiyodilolenama:, ebema: nanitabokobi mididawa, ebete a:ma:tamo kebe iyanomo elawo kikametiya, modobola a:ma: ebe elawamo epo epetapi wadenomamo nowalubilinakiye. <sup>11</sup> Ma kunu Godote kebe lumagitamo elawo dikamiya ebenu tabo ka:kiyawonama:, modobola ebete nanitabolo na:kiyawonakomene, ega:walo Godote potamo elawo dikamiya epetapino iyaiya modoboa: tanalo magumulo ibi kowalubilinama:, modobola ebete ebe elawamo ebako epo wadenomamo nowalubilinakomene. Me gabodo la: nanitabokobi midipino osiyodilole tanalo bilibilinomo magumulo epetapiate Ya:su Kelisokono mailo eba adipatelo Godoko ebo kowalogoma:na:.

Ebema: modobola kawo amama tanalonomo ega:walo kawo elawo tanalonomote Kelisogodolo uwomua: uwomua: tetelo na:pola:nama:na:! Me tabo ebe nanitabonomola, taula!





eba:go ka:lutamamo. Ebema: nale la: sosi watowatopi ma kunu totomulatelemata, <sup>2</sup> modobola la: la:imano tepo magumulo ubia: tabo gela:no, Godote la:tamo dikalamekiyala la: la:imano ubi kawonomamo ebe sipigoeogoeo wadenomamo nulameniyala:. Ega:walo la:imano woko osiyodilo magumulo woko wiya laema: kawonomamo malagidiloa:no, wiyasiya la:le Godokono kalakalago epo epetapi bilibilinomo gito nowalubilinakiyala:. <sup>3</sup> Ega:walo watowatopiala:, Godote la:tamo dikalamekiyala la: ebe sipigoeogoeo kubanu analelo wato kawokawoma: akoeda:oala:. Modobola la:le wiyasiya la:imano milo ilukuli tanalodo iba:tamo wade uli eba awokaliminalo ibi eba kunu nemagaelenakiyala:. <sup>4</sup> Ebema: la: eba kunu eba wagenalalo, la: sipigoeogoeo ulamepino Kawodawate da:pemaigamene, ebe tetelo kawokawo elawodubate ibino watamo da:pupulinaka, la: ebakobako wadewade a:la:uwa:da:ole kelekele inamabu ebegodone kuwatemamota. Kalakala kawonomola, ebe kelekele inamabuno a:la:uwa:da:ole tanalote uwomua: tetelo a:kolopoligonamene.

*Nanitabokobi Midipiate Totomu Tabo Epetapiamo Tudila:o Tanalo*

<sup>5</sup> Ebema: la: nanitabokobi midipi epetapiala:, nale atu gabodo la: iyaiya tabo epetapi ka:kiyawaolaemamota. La: oli apepeo dubala:, modobola la: la:imano watowatopiatamo na:tudila:onala:, ega:walo la: nanitabokobi midipi bilibilinomala:, la: a:ka:tuwa: la: opamo eba alomolo epetapiate epetapiatamo wiya: wokopima: neda:onala:, mabu Godokono Bukalo tabote ma kunu itana,

“Piyate damamaona Godote iba:go na:gowelaona, wiyasiya piyate ibi a:ka:tuwa: ibi opamo dalomona, ebete iba:tamo ebenu kawo nilakapo awokaliminako.”

<sup>6</sup> Ebe mabuma: la: a:ka:tuwa: la: egegema: eba midililo Godotamo da:tudila:wema, Godote ebenu wade tetelo la: unamo eba wadipalatelelo kawokawopima: ka:midilima:ta. <sup>7</sup> Ebema: modobola la: la:imano iyaiya woki bilibili tanalo ebetamo miyapanomo na:miyapala:, mabu ebete la: nilakapolo kawonomamo malagidilolenata.

<sup>8</sup> La: nanisiwale! La: olowiolo nilukulionala:, mabu la:go gowelaodawa ebe Saitanatela, ebe layono-gaa kawonomo keba kunula:ka: eba kunula, iyo, ebete epatamo tole kawonomo eba ikamelolo opola:go ibi naoma: olena. <sup>9</sup> Ebema: modobola la: la:imano nanitabokobi midi magumulo kodakodalo eba lamota:onalo ebetamo gowelao tanalo nosiyodilonakiyala:, mabu la: iyatawalata eba:go gowelao magumulo la: kapiyate kilukula:wena:, iyo, me opo kawonomolo la:imano nanitabokobi midipi ekaki epetapiate atu temeteme magumulo kilukuliona. <sup>10</sup> Wiyasiya kalakala kawonomola, la: tete da:pesolo temeteme magumulo ilukula:tepawete, walone Godote a:ka:tuwa: la:imano temeteme magumune la: wagailitate nanitabolo elawokobi ka:midilima:ta, la:le la:imano tepo magumulo woki netewama: eda:okapoma:. Nanitabola, ebe Kawo Nilakapodawanomote dopamo tetelo la: Kelisodo eka:la:miyata la:le ebenu elawo alonomago uwomua: tetelo kilukuliawenama:, <sup>11</sup> ebema: modobola kawo elawo tanalonomote ebegodolo uwomua: tetelo nitanamene! Me tabo ebe nanitabonomola, taula!

*Pitate Leta Uwomu Apulo Iyaiya Tabo Da:kiyawaiya*

<sup>12</sup> Numa:la:, me leta da:peso Sailasite na mabuma: pepamo akulole, naimano umi magumulo ebe wade nanitabokobi mididawa ekawi idila. Ebema: naimano leta uwomu apulo la: ma kunu analemata, nale

la: la:imano nanitabokobi midi magumulo kowalubilitama: me tabono iyaiya tanalo akulolemo, iyo, ebe tanalate Godokono nanitabo nilakapo awokalimita, ebema: modobola la: ebe nilakapo magumulo kodakodalo nelamota:onala:

<sup>13</sup> Numa:la:, nago daladabutinaka ebe Ba:baloni\* sosi nanitabokobi midipino taneba ega:walo la:imano iyaiya sosi taneba, la:imano iyaiya taneba ebe kapiya alailame buwelemele keba kunula:ka: eba kunula, iyo, Godote ebeno ubilo la: keba kunu kuwatetiyala, ebete eba kunu ibi atumu a:kuwatiya. Ebe mabuma: iba:te ibino nilakapo tabo paliba la:tamo, ega:walo naimano gudu Makate atumu nilakapo tabo kapalibo.

<sup>14</sup> Modobola la: daladabuta:ema, la: bilibilinomo epetapiate epetapiatamo la:imano nilakapo kawokalima:ema: koto uwateuilo na:wiyamidauiyala:

Ebema: la: piyate Kelisoko magumulo dilukuliawenama, ebeno kalakalate la: bilibilinomagodolo nitanamene. Me ebe naimano tabo uwomula. Taula.

---

\* **5:13:** Buka ka:la:mioledawa, modobola a:ma: me tanalo niyatawa, Loma kawo duliynomololo dilukulionamiya, ebe nanitabokobi midipiate Loma duliynomolo epono kawo amama tanalo eba malagidilolo iba:te ibino duliynomolo Ba:baloni mailamo ka:minakiya, mabu piyate dopamo nanitabo Ba:baloni duliynomololo dilukulionamiya iba:te ibino kawo amama magumulo Godotamo kawokawo kuba osiyodilolenakiya.

## PITAKONO NABA 2 LETA EBETE NANITABOKOBI MIDIPIATAMO OSIYODILIYA

<sup>1</sup> Na ebe Saimono Pitatela, Ya:su Kelisokono wokodawala, iyo, ebete ebenu sosi wagilima: iyaiya opamo daliboliya, ebe wokopi magumulo na idila.

Nanitabola, Ya:su Kelisoko ebe aimano Igilo Mula:leamedawala, ebe Godotela. Ega:walo ebete ebenu tuputupu osiyodilole gabodo piyatamo nanitabokobi midi tanalo dikalamiya, la: ebe epolata, ebema: nale me leta la:tamo palibomo, mabu la:imano nanitabokobi midi tanalo ega:walo aimano nanitabokobi midi tanalo ebe kapiyanomola.

<sup>2</sup> Modobola la: Godokono tanalo ega:walo aimano Kawodawa Ya:sukono tanalo eba iyatawaolo, ibino nilakapo tanalo ega:walo ibino milo tanalote la:godolo kawonomamo na:pola:nama:na:

### *Nanitabokobi Midi Magumulo Apepeo Tanalo*

<sup>3</sup> Nanitabola, dopamo tetelo Ya:sute a eka:miya ale ebenu elawo alonmago ega:walo ebenu tuputupu osiyodilole tanalago kilukulionama:. Ebe-godolo Godokono elawote bitana ebema: ebete atamo wadewade tanalo bilibilinomo ikaeamiya, ale ebenu tanalo eba iyatawaolo Godokono ubi tanalamo nanitabolo ka:tudila:onama:. <sup>4</sup> Iyo, ebete dopamo a kowalubima: kebe tabo nanitabolo degiya, ebe tabono nanitabo tanalote ma kunu pemaigiya, ebete atamo kawokawo tanalonomo ega:walo wadewade tanalonomo gito ikaeamiya, mabu ebe ubila ale opo epono kateneno kuba osiyodilole magumune maimiote aimano ilukuli magumulo ale Godokomu kilukulionama:.

<sup>5</sup> Ebe mabuma: la:le la:imano nanitabokobi midi magumulo apepeo gabodo kodoloaema:, modobola la: la:imano woki kawonomamo niyatinala:. Iyo, la: ma kunu Godoko nanitabokobi eba midinalo, ebenu tuputupu okoli tanalo nelawiyala:. Ebene la: tuputupulo eba ilukulinalo, Godokono nanitabo iyatawa tanalo nelawiyala:. <sup>6</sup> Ebene la: Godokono tanalo nanitabolo eba iyatawaonalo, Godokono elawo laema: tepo kodakoda tanalo nelawiyala:. Ebene la: tepo kodakodalo eba lamota:onalo, kawokawo temeteme magumulo elawoa:noma: eda:oa:no kalakala nelawiyala:. Ebene la: temeteme magumulo elawoa:noma: eda:oa:no eba lamota:onalo, Godotamo nanitabolo tuduwata tanalo nelawiyala:.

<sup>7</sup> Ebene Godotamo nanitabolo eba tudila:onalo, la: nanitabokobi midipi epetapiatamo nilakapo awokalimi tanalo nelawiyala:. Ebene la: nanitabokobi midipiatamo nilakapo eba awokaliminalo, modobola Godokono nilakapo kimalagidilo tanalote me opo epo bilibilinomatamo la: magumulo kawonomoma: neda:mene.

<sup>8</sup> Nanitabola, me apepeo gabono tanalo bilibilinomate la:godolo kawonomamo da:pola:nama:na:, ebe tetelo la: aimano Kawodawa Ya:su Kelisokono nanitabo tanalo eba iyatawaolo ebenu wadewade da:imi nolo woko bosiyodilonamata. <sup>9</sup> Wiyasiya numa:la:, kebe nanitabokobi midi lumagigodolo ebe tanalate pola:na:no, ebe balidi tamiodawala, iyo, ebenu okoli tanalote me tanalo awokalimina, Ya:sute ebe ebenu kuba osiyodilole magumune owolukote ebenu tepo magumu dukulamiya, ebete ebe wade tanalo iyalo a:dodomati. <sup>10</sup> Ebema: naimano ekakiala:, Godote la: dopamo deka:la:mioletiyala ebe tanalo nanitabolo kawokalima:ema:, modobola la: la:imano nanitabokobi midi magumulo elawoelawonomoma:

neda:iyala; mabu nanitabola, la: eba kunu dowagela:ema la: agowa ukamidaola:wete a:ka:guda:ema. <sup>11</sup> Iyo, me gabodo Godote la:tamo gigiyu ka:iyamidalaema:ta, la:le aimano Igilo Mula:leamedawano kalakala ilukuli duliynomolamo ka:nopila:oaema; ebe Kawodawa ebe Ya:su Kelisotela ega:walo ebena Kawo Elawodawama: eda: tanalote uwomua: uwomua: tetelo bitanamene.

*Pitate Ebena A:e Tanalo Tatalima: Degiya*

<sup>12</sup> Nanitabola, la: me iyaiya tanalo iyalo iyatawaiyamata, ebema: Godote la:tamo dikalametiyala la: ebe nanitabokobi midi magumulo elawoma: eda:onamata. Wiyasiya numa:la; naimano kalakala bitana iyaiya tete epetapilo me atu tanalo la: walo kakanaletanakoma; <sup>13</sup> ebema: na a:ea:no dopamo la: me iyaiya tanalo walo da:ka:kiyawaolametama, ebe tanalo ebe wade tanalola. <sup>14</sup> Iyo, na iyatawala tete tatalila na ka:emamo, mabu aimano Kawodawa Ya:su Kelisote me tanalo na iyalo iyatunami. <sup>15</sup> Me mabuma: me leta magumulo nale me iyaiya tanalo la: walo ebema: ka:kiyawaolaemata, naimano a:e walogabo apune la:le me tanalo wadenomamo kemalagidilola:wenama:

*Godokono Woki Awokalimipiate Ya:suko Mabuma: Bukamo Iyaiya Nani Tabo Dakuloliya*

<sup>16</sup> Numa:la; a Kawodawa Ya:su Kelisokono alibolepilate ebena elawo tanalo ega:walo awokala tanalo la:tamo dapawokalimiyama; ebe tetelo ale la: a:da: ka:pemasigilitiya;. Ega:walo iyaiya epo epetapino ewoniate ibi a:ka:tuwa: ibino taneba mabuma: walone guda:tamo kebako oi ka:kiyawaonakiye, ale ebako epono iyaiya oi tanalo la: ka:kiyawaolametiya;. Nanitabola, ale Ya:sukono Kawo Elawodawano elawo aimano balida:mo dumiyama; ebe tanalo la: analiyata, <sup>17</sup> mabu Nabiwi Godote Ya:suko eba moiolo ebe dowaloguti, ebe tetelo a ebena alibolepi epetapiate ebolo na:pola:niyama;. Ebene ale aimano galamo Kawo Alodawanomono tabo madodo ma kunu olowiyama; “Me naimano kapiya Gudunomola. Na ebetamo nekalakalitam!” <sup>18</sup> Iyo, a Ya:suago talena damela ununomolo da:pola:niyama; ebe tetelo Godokono tabo madodote ebena Unu Duliynomolone atamo eba kunu pemaigiya.

<sup>19</sup> Ebema: Godokono woki awokalimipiate Ya:suko mabuma: Bukamo iyalo tetelo dakuloliya, ale ebe iyaiya tanalo nanitabokobi na:midilinama;. Numa:la; ibino iyaiya tabono tanalo ebe alo da:pesote kawo idokonomo magumulo keba kunu ka:pukuiminale eba kunula, ebena tete tatalila Gugi Mawelete a:ka:tuwa: ka:pemaigamene, iyo, ebe tetelo wade egelate eba powalolo idokono ilibubute gito kolopoligomene. Ebema: nanitabola, ebe alote la:imano tepo magumulo wadenomamo ka:pukuilaema; modobola la: Godokono wokopiate dopamo dawokalimiya ebe tabo nanitabokobi mida:wete wadenomamo nelawiyala;. <sup>20</sup> Ega:walo me kawo tanalo wadenomamo niyatawala;. Godokono woki awokalimipiate ebena Bukamo dopamo keba iyaiya tabo kakuloliye, lumagite a:ka:tuwa: ebena mulo wokiamo ebe tabono magumu uwatema: modoboa; <sup>21</sup> mabu Godokono woki awokalimipiate ibi a:ka:tuwa: ibino ubilo ibino woki tabo Bukamo kakulolenakia;. Ao, Godokono Uliyanate ibi keba kunu kiyatulamenakile, iba:te ebena tabonomo Bukamo akulolelo eba kunu kiyawaonakiya.

**2**

*Godokono Mailamo A:da: Tabo Kiyawaopiate Maimio Tanalo*

<sup>1</sup> Ebema: numa:la:, la:imano ewonino tetelo Godokono nani tabo kiyawaopiate woko eba osiyodilonalo, atu tetelo Godokono mailamo a:da: tabo kiyawaopiate emaimionakiya, ebema: me tetelo ebakobako dubu epetapiate la: magumulo walo ka:kemaimioma:na:. Iba:te la:imano igilo mula: tanalo ka:kubailaema: ibino iyaiya a:da: tabono tanalo ka:kiyawaoma:na:, ebene kebe dawate ibino kuba osiyodilole tanalono elawo magumune ibi ebene kalimamo nilakapolo dowagailiya, iba:te ebe ubia:noma: eba eda:olo ebo kegelama:na: ebe ibino Watodawa:. Nanitabola, me gabodo ibi a:ka:tuwa: ibi ka:kubailaema:na:, iyo, iba:te iyatawa: tetelo olalatite ibi gito ka:puwatemene. <sup>2</sup> Wiyasiya olalatite iba:tamo pea:no, dopamo sosi epo epetapi bilibilinomate kateneno ubi gabodo ibi eba waloma:talelo Godokono nanitabo gabo katepama:na:, iyo ebe tetelo nanitabokobi midia:piate ibino iyaiya kuba osiyodilole tanalo eba ulamelelamelelo Godokono nanitabo gabo kuba gaboma: ebo kegelama:na:. <sup>3</sup> Ega:walo me tanalo idila. Ebe a:da: tabo kiyawaopiate ubi kawonomamo iyatina la:imano mani a:da: gabodo uwatema:, ebema: ibi a:ka:tuwa: ibino wokino tanalamo iyaiya oi epetapi la: ebo ka:kiyawaolaema:ta. Wiyasiya numa:la:, dopamo tetelo Godote ibino kuba wiya ikalaema: nanitabolo egiya, ebema: ebe kuba wiyate ebe na:pe, iyo, ibi Anakapulamedawate iyalo olosiyodiliya, ebete wade tete makopelena.

#### *Godote Kuba Osiyodilolepiatamo Wiya Ikalame Tanalo*

<sup>4</sup> Nanitabola, Unu Duliyomolono nopopi epetapiate Godokono totomu dadikanaliya, ebe tetelo ebete ibi Saitanakono kawo idoko bobonomamo gito iyalekiya, iba:te idoko magumulo auli ala:mo matuolamola:go eba ilukulionalo ibino kuba wiya uwate egela kemakopelena:na:.

<sup>5</sup> Ega:walo Nowate me opo epatamo Godokono tuputupu okoli tanalo da:kiyawaiya, iba:te Godokono ubi tanalamo ka:tudila:iya:. Ebe mabuma: Godote iba:tamo kuba wiya atumu kikalamiya, iyo, ebete ulama obo me opamo dapalibiya, ebe tetelo ibi bilibilinomate a:elaiya, wiyasiya Nowate sebeni epo epetapiago ibinomate igilo mula: tanalo ebo lawiya.

<sup>6</sup> Ega:walo Sodomo Gomola kawokawo duliyomololo dilukulionamiya, Godote ebe epatamo kuba wiya eba ikalamelo ela menagono dapalibiya, ibi bilibilinomo elate gito popoliyadigaliya. Ebema: numa:la:, ibino olalati tanalo ebe ulila, Godokono ubi tanalamo tudila:oa:piatamo kuba wiyate keba kunu na:ka:pemaigamene. <sup>7-8</sup> Ebe tetelo Godote Sodomo duliyomolo epono kuba osiyodilole mabuma: ibi bilibilinomo eba anakapulamelolo tuputupu dubu Lotakono igilo kapiya mula:miya, mabu ebe dubute ibi magumulo eba okolinalo ibino kateneno iyaiya kuba ubi tanaloma: tepo mi-bomibo delawenaki ibino kuba osiyodilole magumamo kopeganakia:. Iyo, ebete iba:godolo iyaiya kuba osiyodilole tanalo dulamenaki ega:walo ibino kuba tabo gela tanalo dolowionaki, ebema: ebete ebene tepo magumulo kawo temetemenomo iyatawanaki.

<sup>9</sup> Ebema: nanitabola, Godoko iyatawala piyate ebene ubi tanalamo da:tudila:ona ebe epono temeteme magumulo ibino igilo ka:mula:lalaema:. Ega:walo ebe iyatawala ebete kuba osiyodilolepi ibino olalati tanalamo matuolamolete ibi Uwomu Egela teta:mo kemagatalemene iba:te kuba wiya ebo ka:nuwatema:. <sup>10</sup> Iyo, piyate ibino iyaiya kateneno daleyia ubi magumulo eba wapata:lamenalo Godotamo tudila:oma: ubia:noma: deda:ona, Godote ebako epatamo kuba wiya kawonomamo nanitabonomolo kikalaemene.

#### *Godokono Mailamo A:da: Tabo Kiyawaopino Kuba Ilukuli Tanalo*



Numa:la:, ebe kuba osiyodilolepi ibi Godokono mailamo a:da: tabo kiyawaopila. Ebema: ibino ilukuli tanalo ma kunula, ibi a:ka:tuwa: ibi unamo wadipalatelelo Unu Duliynomolono nopopi ka:tolelamena:, iyo, iba:te ibi emalogolenaka. <sup>11</sup> Wiyasiya Godokono nopopino tanalo iyala, iba:te ebe tolemelo ebena ololo apulo ebako kuba wokiagopi malogolea:no ibi kubakubapima: kegelanako:, mabu ibi iyatawala epetapino tanalo anag-ilamelelame woko ebe Godokono wokola, ibino wokoa:. Nanitabola, ebe nopopino elawo kawonomote opo epono elawo nodolina, wiyasiya iba:te ebe tanalo eba iyatawaolo ibi a:ka:tuwa: ibi kowalogolena:. <sup>12</sup> Eiye, me tetelo demaimiona ebe a:da: tabo kiyawaopino tanalo eba kunua:. Iba:te Godokono nanitabo tanalo iyatawaoa:no, ebena wadewade tanaloma: kuba tabo ebema: gelanaka. Iyo, ibi tumu goeogoeo keba kunula:ka: wokia:no eba kunu ilukuliona, ebema: pomolo dubate ebako goeogoeo gubi magumulo uwatolete keba kunu kanakapulamenake, ibino uwomu tete eba kunu kemaigamene.

<sup>13</sup> Mabu iba:te temeteme epetapiatamo gito dikalamenaka, ebema: Godote ibino kuba wiyama: temeteme iba:tamo kikalaemene. Eiye! Iba:te nekalakalaona kateneno iyaiya kuba ubi tanalo egela tetelo ilipoa:no kosiyodilolenama:, ebema: la: nanitabokobi midipino aladabuti soliyomu bae nao magumulo iba:te la:go da:pola:nama:na:, ibi wade bae magumulo da:pola:na ebe kuba sosowa keba kunula:ka: eba kunula, iyo, ibino osiyodilole tanalamo la: a:da: kemasigilitama: iba:te kawo kalakalanomo elawenaka. <sup>14</sup> Ebema: numa:la:, kebe tetelo iba:te kamiyale ega:walo buwelemele dulamenaka, kuba osiyodilo woki kapiyate iba:tamo ebo penako, iyo, iba:te kateneno kuba osiyodilolema: iyawa kawokawonomola. Ebene piyate nanitabokobi midi magumulo elawoa:noma: deda:ona, iba:te ebe gudi Saitanakono kuba gabamo wabuga:ta tanalamo magatalenaka, ega:walo ibi magumulo ibi a:ka:tuwa: ibi iyatulamiya ibino tepo magumuno wokite mani malagidilole tanalamo ka:tudila:onama:. Ebe mabuma: ibi Saitanakono gudila, iyo, Godote iba:tamo kuba wiya nanitabolo kikalaemene!

<sup>15</sup> Iyo, nanitabola, iba:te wade tuputupu gabo atepate, Biyokono gudu Ba:ilamako ebena kuba osiyodilole gabodo ebe ebana waloma:tana. Ebe dubuno tanalo ma kunula, ebete mani kawokawonomo uwatema: ebena ubi diyatiya, ebema: ebete kuba osiyodilo gabodo to ebo wagilimiya. <sup>16</sup> Wiyasiya Godote ebena daedale woki kodiyo:boma: ebena donoki-goeo magumune lumagino tabo madodamo ebe kawonomamo aniya, ebe a:da: tabo kiyawaodawate Isalaela epatamo kuba idi osiyodilokapoma:.

### *Godokono Mailamo A:da: Tabo Da:kiyawaonaka Ebete Iba:tamo Kuba Wiya Ikalame Tanalo*

<sup>17</sup> Ebema: numa:la:, me a:da: tabo kiyawaopi dubu ebe obo gulite gagalema: deda: eba kunula, mabu opo epate iba:godolo wade walubi a:kuima:na:. Ega:walo opote gagalema: deda:, ebe tetelo awa kawonomote dowatanako ebe temate gito ka:petolaema:na: wiyasiya ulamate a:kowomene, ebe dubu ibi eba kunula mabu iba:te epatamo giba kikalamolenako:. Ebema: Godote ibi mabuma: kebe idoko bobo kawonomo iyalo dosiyodilolamiya, ebete ibi ebamo kanalibolemene iba:te ebolo temetema:go ka:nilukulionama:. <sup>18</sup> Eiye! Iba:te iyaiya amama tabono tanalo ega:walo daedale wokino tanalo gelanaka, ega:walo piyate Godotamo olobila:ma: kuba osiyodilole magumune ka:ma:nomo da:pemaimia, iba:te ebe epo ibino kateneno ubi tanalamo walo kuwatete Saitanakono kuba gabamo ebo magatalenaka. <sup>19</sup> Iba:te iba:tamo tutulo ilukuli tanalo

ikalaema: ibi analenaka, wiyasiya ibi Godokono nanitabo tutu tanalono magumulo kilukuliona:, mabu iba:te ibino kateneno ubi tanalono wiya: wokopima: eda:ona. Iyo, nanitabola, lumagite kebe kuba osiyodilo tanalamo da:tuduwatana, ebete ebe tanalono wokodawama: eda:na, ebe-godolo tutulo okoli tanalo puliyanomola.

<sup>20</sup> Ebema: nanitabokobi midipiala:, la: nanisiwale! Kebe epate aimano Kawodawa ega:walo Igilo Mula:leamedawa Ya:su Kelisokono nanitabo tanalo eba iyatawaolo me opono kuba ubi tanalone da:pemaimiya, ebene kuba ubi tanalate ibi walo kematuolamolete, iba:te ebe kuba osiyodilole tanalamo walo da:ka:tudila:oma:na:, ibi niyaniyala! Dopamo tetelo iba:te kela:mo kubadopoma: eda:onamiya, wiyasiya walone ibino igilo uwomu tetelo iba:te kubanomoma: keda:oma:na:. <sup>21</sup> Ebema: numa:la:, ebako epate Godokono tuputupu gabo iyatawaoa:noma: neda:onataleka:, iba:te kuba wiya kela:mo buwatena:. Wiyasiya iba:te Godokono gabo eba iyatawaolo, ebete ibi ebene talena magumulo ilukulima: dikalamiya, iba:te ebe totomu ginima:mo gito ilateliya, ebe mabuma: ibino olalati tanalote kawonomoma: keda:mene! <sup>22</sup> Nanitabola, Godokono mulo woki tabote ibino tanalo ma kunu awokalimina, “Gaate kebe kuba inamabu dedalomene, ebete ebe atu inamabu walo gito ka:kenaomene,” ega:walo mulo woki tabo idite ma kunu gena, “Lumagite ebene dabi goeo wadenomamo dukulamene, ebe goeote kobokobo magumamo ka:nopegate ebo ka:nigiligaomene.”

### 3

#### *Kawodawa Ya:sute Me Opamo Nanitabolo Walo Ka:ka:pemene*

<sup>1</sup> Naimano wadewade namutupiala:, me netewa tetema: eda: nale la:tamo leta alibolema:, iyo, me netewa leta magumulo la:le Godokono iyaiya tuputupu tanalo wadenomamo kemalagidilola:wenama:, nale la: ebema: iyatulaemata. <sup>2</sup> Numa:la:, Godokono woki awokalimipiate kebe tanalate ibino walogabo apune pemaimioma: dopamo da:kiyawaonakiya, na ubila la:le ebe talena wokopino buka apuno iyaiya tabo walo wadenomamo na:kemalagidilola:la:. Ega:walo aimano Igilo Mula:leamedawa, ebe aimano Kawodawala, ebene alibolepate kebe totomu tabo ebegodone uwatete la:tamo dikalameiyala, modobola la:le ebe tanaloma: atumu woki walo nakalomiyala:.

<sup>3</sup> Ebema: me kawo tanalo wadenomamo niyatawala:. Me opono uwomu tete eba tatalilo, nanitabokobi midia:pi epetapiate pemaimiote ibino kateneno kuba ubi tanalamo ebo ka:tudila:oma:na:. Ebene iba:te la: kalakalatelelo <sup>4</sup> ma kunu kegelama:na:, “Nanitabola:ka:, Ya:sute walo pema: a:kegiyale? Ale ebe kumina:, kebolo kokolinale? Me opo wagilimi mabune pete me teta:mo pemaiga epate gito ilukulionamiya, ega:walo anoano tanalo idite aimano nabiatamo maiga:no iba:te gito a:elaiya!”

<sup>5</sup> Eiye! Ebako tabo gelapi iyatawala iyalo tetenomolo Godote me opo ega:walo tobolo unu ebene tabamo dosiyodiloliya, wiyasiya ibi ubia:nola ebe tanalo nanitabokobi midima:. Numa:la:, Godote me opo dosiyodiliya, ebe tetelo ebete gagale opo kulukulu obo magumune powautite obamo ebo osiyodiliya, <sup>6</sup> ega:walo ebete tete idilo ulama obo dapalibiya ebe atu obamo tagala opo kawonomo a:kubaimiya. <sup>7</sup> Ebema: ebete kodakoda tabo ma kunu iyatiya, me tetelo da:pola:na me opo kawonomo ega:walo tobolo unu iba:te ebene ubi teta:mo modobolo ka:pola:nama:, ebene piyate ebetamo tudila:oa:pima: deda:ona, ebete ebene Uwomu Egelalo ebe epono tanalo anagilamelelamete ibi eba opoliyadigalelo me opo elamo ebo ka:kubaimene.

<sup>8</sup> Ebema: naimano wadewade namutupiala:, me kawo tanalo kapiya akododomatiala:. Kawodawa Godogodolo kapiya egela ebe kapiya taoseni ulama keba kunula:ka: eba kunula, ega:walo kapiya taoseni ulama ebe kapiya egela keba kunula:ka: eba kunula, ma kunu gopowai tete ega:walo tete geyageyanomo ebete kapiya tetenomoma: gena. <sup>9</sup> Ebema: piyate daedale wokilo ma kunu degelana, “Opo uwomu a:ka:pemaigamene,” iba:te Kawodawa Godokono tanalo nanitabolo kiyatawaona:. Iyo, Godote me opono uwomu tetema: nanitabolo degiya, ebe tanalote ebenu ubi tetelo ka:pemaigamene, wiyasiya numa:la:, ebete me opo epo nilakapolo malagidilolelo tete ebema: geyageyaima:tepana, mabu ebe ubila epo bilibilinomate ibino kuba osiyodilole magumune olobila:ote igilo mula: tanalo ebegodone kelaema:.

<sup>10</sup> Ebema: nanitabola, Kawodawa Godokono Kawo Egelalo Ya:sute ka:pemene, pilo dubute epate olowioa: tetelo keba kunu ka:penakole eba kunu. Ebe tetelo me opo ega:walo opono inamabu bilibilinomate kapimiya gito kolopoligoma:na:, ebene atu tetelo tobolo unu ega:walo tobolono kawokawo inamabu kawe diyamonomago kolopoligoma:na:, mabu elawo elanomote me inamabu bilibilinomo gito kopoliyadigalemene. <sup>11</sup> Iyo, Godote me inamabu bilibilinomo me gabodo kopoliyadigalemene, ebema: modobola la: nanitabokobi midipiate la:imano ilukuli magumulo talenapima: eda:olo ebe kapiyatamo na:tudila:onakiyala:, <sup>12</sup> ega:walo modobola la: la:imano wadewade osiyodilole tanalodo ebe nowalotenala: ebe tetete samonomamo ka:pema:. Nanitabola, Godokono Kawo Egelalo elawo elanomote tobolo unu ega:walo tobolono kawokawo inamabu kapimiya kopoliyadigalemene, <sup>13</sup> wiyasiya kalakala kawonomola, ebe tetelo ebete a nanitabokobi midipi ebenu oli opo ega:walo oli unu duliynomolo a ebamo kemagataemene, ebolo ebenu tuptupu okoli tanalo kapiyate kitanamene. Numa:la:, ebete dopamo ebe wade tanalo osiyodiloma: nanitabolo degiya, ale ebe tanalono tete ebema: makopelenama:.

<sup>14</sup> Ebema: naimano wadewade namutupiala:, la: ebe Kawo Egela eba makopelenalo, modobola la:imano woki kawonomamo ma kunu niyatinaakiyala:, la:le Godokono ololo apulo eba lamota:onalo la:imano osiyodilole tanalo bilibilinomo magumulo kapiya kuba da:pesonomo idite a:kitanamene. Iyo, la:le ebenu milo magumulo eba ilukulionalo, modoboa: epetapiate la:imano osiyodilo tanalo kapiya idi kubama: gelama:. <sup>15</sup> Ega:walo aimano Kawodawate samamo pemaiga:no, la: me tanalo nemalagidiliyala: ebete tete na:geyageyaima:tepana opo epo epetapiate ibino igilo mula: tanalo kelaema:.

La: iyatawalata Poloko ebe nanitabokobi midipi magumulo aimano wade naniwi idila, ebema: ebete dopamo leta idi la:tamo palibolo atu tabonomo ka:kiyawai. Iyo, Godote kebe mulo woki ebetamo dikamiya ebete ebe mulo tanalamo la: iyalo owalubiliata, <sup>16</sup> ebema: nanitabola, nale kebe tabo ka:kiyawaimo, Polokono leta bilibilinomo osiyodilole magumulo ebete aimano Kawodawano pe tanaloma: ebe atu tabo ka:kiyawaonako. Na iyatawala, tete epetapilo ebenu iyaiya tabono magumu kodakodaibinomola, ebe mabuma: daedale wokiagopi epetapi ega:walo nanitabokobi midi magumulo woki netewama: deda:ona, ebakobako epate ebenu tabono magumu a:da: elemasigi gabodo awokalilamenaka. Numa:la:, iba:te atu gabodo Godokono Buka apuapuno iyaiya tabo epetapima: epo kubanu iyatulamenaka, ebe mabuma: ibi a:ka:tuwa: ibino woki eba kubailamenalo ibino olalati tanalote nanitabolo ka:pemene.

*Pitate Leta Uwomu Apulo Tabo Da:kiyawaiya*

<sup>17</sup> Naimano wadewade namutupiala:, la:le ebakobako epono a:da: el-emasigi tanalo dopamo iyatawaiyamata, ebema: la: nanisiwale! Piyate Godokono totomu tabo dowakalaminaka, na ubia:nola iba:te ibino a:da: elemasigi tanalamo la: eba magatalelo, la:le me tetelo kebe nanitabo gabodo olalatia:no da:tolama:wenama ebe gabote la:godone alatidima:.

<sup>18</sup> Ebema: la: aimano Kawodawa ega:walo Igilo Mula:leamedawa Ya:su Kelisokono tanalo eba iyatawaonalo ebena nilakapo magumulo napepeonala: Modobola amama tanalote me tetelo ega:walo uwomua: uwomua: tetelo ebegodolo nitanamene!

Me ebe naimano tabo uwomula. Taula.

## YONEKONO DOPO LETA EBETE NANITABOKOBI MIDIPIATAMO OSIYODILIYA

### *Igilo Tabono Tanalo*

<sup>1</sup> La: olowiopiala:, ale Igilo Tabono tanalo me leta magumulo la:tamo dawokalimitama:, ebe Tabote dopamo wagilimi mabune dokolinami ebe Kawodawala. Nanitabola, ale me tetelo ebe Tabono tanalo aimano galamo olowiote ega:walo aimano balidinomamo a:kumiyama:, iyo, ale umite aimano kotonomamo ebe atumu ologiyama:. <sup>2</sup> Mabu ebe Igilote me opolo awokaliya ega:walo ale aimano balida:mo ebe umiyama:, ebema: ale ebena tanalo awokalimilo Nabiwi Godokono uwomua: igilo tanaloma: la:tamo me tabo ebema: kiyawautama:. Numa:la:, kebe Igilote dopamo Godago dokolinami, ebe Igilo ebe walone atamo dapawokaliya ebe atu Igilola. <sup>3</sup> Ebema: mabu keleka: ale ulamete dolowiyama: ebe tanalo la:tamo da:kiyawautama:? Mabu bitana a ubila la: olowiopiate ago kapiyama: eda:oma:, ale Nabiwi Godago ega:walo ebena Gudu Ya:su Kelisago kapiyama: keba kunu keda:onama: eba kunu, <sup>4</sup> ebema: nanitabola, ale me leta nosiyodiloma:, la:la, ala, a bilibilinomono kalakalate kawonomoma: keda:ma:.

### *Godokono Alo Magumulo Wapata:lame Tanalo*

<sup>5</sup> Nanitabola, ale Godokono Gudugodone dolowiyama: ebe atu tabo ma kunu ka:kiyawautama:, Godoko ebe alola, ebegodolo idoko tanalo idite kitana:, puliyanomola. <sup>6</sup> Ebema: ale idoko magumulo eba wapata:lamele ma kunu degelama:, a eba:go kapiyanomoma: eda:onama:, nanitabola, a a:da: elemasigipila mabu ale aimano ilukuli magumulo a:da: gabodo tolamenama:. <sup>7</sup> Wiyasiya Godote alo magumulo keba kunu kokolinale ale eba kunu ebena alo magumulo dowapata:lamenama:, ebe tetelo ale ebe magumulo eba ilukulionalo kapiyanomoma: beda:onama:, iyo, ebena Gudu Ya:sute ebena kalimamo aimano kuba osiyodilole tanalo bilibilinomo bukulaleamenakomene.

<sup>8</sup> Numa:la:, kebe tetelo a a:ka:tuwa: a kuba osiyodilolea:pima: degelama:, a a:ka:tuwa: a a:da: kelemasigiomalema:, ebena agodolo nanitabo tanalote a:kitanamene. <sup>9</sup> Wiyasiya ale aimano kuba Godotamo dawokalilaema:, ebete a walubima: kebe tabo dopamo da:kiyawaiya ebe tanalo ebete nanitabo tuputupu gabodo kosiyodilomene, iyo, ebete aimano iyaiya kuba osiyodilole tanalo egeboleamete ka:dodolomatiliaemene, ega:walo ebete aimano tepo magumuno kubakuba daleya kukulaoleaemene. <sup>10</sup> Me mabuma: a a:ka:tuwa: a kuba osiyodilolea:pima: degelama:, ale ebe tabamo Godoko a:da: dawama: midilo ebena nani tabote a magumulo a:kitanamene.

## 2

### *Ya:su Kelisoko Ebe Aimano Walubidawala*

<sup>1</sup> Naimano guda:la:, nale me tabo me letamo akulote la:tamo palibomo la:le kuba idi Godotamo osiyodilokapoma:, wiyasiya kebe tetelo a magumulo lumagite kuba dosiyodilomene, ebe tetelo ebe walubima: aimano Tuputupudawa ba:luta, ebe Ya:su Kelisotela, towetowe tabamo a Nabiwi Godotamo dowadipaeatenako ebe Walubidawala. <sup>2</sup> Nanitabola, Godokono dowa tanalote atamo dopamo emaigiya mabu a kuba osiyodilolepila,



wiyasiya Kelisote aimano iyaiya kuba osiyodilole tanalo ebena kalimamo degeboleamiya, ebe tetelo ebete Godokono dowa tanalo opoliyate a Godago kapiyakobi a:midia. Wiyasiya numa:la:, ebe osiyodilo tanalodo ebete a nanitabokobi midipi kapiya kowalubiya:, ao, ebete ebe atu tetelo me opo epo bilibilinomo walubilima: ibino iyaiya kuba tanalo ebena kalimamo egebolelamiya.

<sup>3</sup> Ebema: ale Godokono totomu tabamo da:tudila:oma:, me gabodo a ebena tanalo nanitabolo kiyatawaomalema:. <sup>4</sup> Iyo, lumagi idite Godokono totomu tabamo tuduwata:no ma kunu degemene, “Na Godokono tanalo iyatawala,” ebe a:da: elemasigidawala, ebegodolo nanitabo tanalote kitana:, <sup>5</sup> wiyasiya kebe lumagite Godokono tabamo tuduwatate nanitabolo dosiyodilomene, ebena nilakapo kimalagidilo tanalote ebe lumagino tepo magumulo ketabokamene. Ebema: ale Godoko magumulo dilukulionama:, a keba kunu na:kiyatawaoma:? <sup>6</sup> A ebe tanalo ma kunu kiyatawaomalema:, potele Godoko magumulo okolinama: degemene, modobola Kelisote keba kunu kepata:namile ebete eba kunu nepata:namene.

#### *Ya:sukono Oli Totomu Tabo*

<sup>7</sup> Naimano wadewade namutupiala:, nale me leta magumulo Ya:sukono oli totomuno tanalo dawokalimitamo, ebe totomu dopamo wagilimi mabune la: olowiyamata, ebema: me oli totomu la:godolo tagala totomu keba kunula:ka: eba kunula. <sup>8</sup> Wiyasiya modobola ebe tagala totomute la:tamo olinoma: walo na:keda:mene, mabu me tetelo ebena nanitabo tanalote Kelisoko magumulo ega:walo la: magumulo awokalanako, iyo, idoko tanalote nolopoligo, ebene nanitabo alote eba pemaigalo na:pukuilame.

<sup>9</sup> Ebema: nale me leta magumulo oli totomuno tanalo walo ma kunu kawokalimitamo, kebe lumagite alo magumulo okolinama: gelo ebena ekawitamo da:dowana, ebete idoko magumulo bokolina, iyo, ebete idoko magumune ka:nemaiga:. <sup>10</sup> Wiyasiya kebe lumagite ebena ekawi nilakapolo demalagidilona, ebete alo magumulo bokolina ega:walo ebena osiyodilo tanalodo ebena ekawite agowa ukamidate a:kegamene. <sup>11</sup> Nanitabola, kebe lumagite ebena ekawitamo da:dowana, ebe idoko magumulo dokolina ebe dawala, iyo, ebete kebe gabodo kepata:nale ega:walo ebete kebamo ka:tonale, ebete ebe tanalo iyatawa: mabu idokote ebena balidi a:mula:lemi.

<sup>12</sup> Naimano guda:la:, na la:tamo leta nosiyodilomo mabu Godote Kelisokono elawo mailamo la:imano kuba egebolelametate a:dodolomatililamiata.

<sup>13</sup> Ega:walo naimano nabiala:, na la:tamo leta nosiyodilomo mabu la: aimano Kawodawano tanalo iyatawala, ma kunu ebe dopamo wagilimi mabune dokolinami ega:walo uwomua: tetelo dokolinamene ebe dawala.

Ega:walo oli apepeo dubala:, na la:tamo leta nosiyodilomo mabu la: Kuba Namutudawatamo eba gowelaolo ebena wato kikopu ebo lawimata.

Iyo, naimano guda:la:, na la:tamo leta nosiyodilomo mabu la: Nabiwi Godokono tanalo iyatawala.

<sup>14</sup> Ega:walo naimano nabiala:, na la:tamo leta nosiyodilomo mabu la: aimano Kawodawano tanalo iyatawala, ma kunu ebe dopamo wagilimi mabune dokolinami ega:walo uwomua: tetelo dokolinamene ebe dawala.

Ega:walo oli apepeo dubala:, na la:tamo leta nosiyodilomo mabu la: elawoelawonomolata, ebene Godokono tabote la: magumulo eba itanalo la: Kuba Namutudawano wato kikopu ebo lawimata.

*Me Opono Inamabu Ega:walo Iyaiya Amama Tanalo Kawonomamo Ako-malagidilolenala:*

<sup>15</sup> Ebema: la: nanisiwale! Me opono inamabu ega:walo ebena iyaiya amama tanalo kawonomamo akomalagidilolenala; mabu kebe lumagite me opono iyaiya tanalo kawonomamo demalagidilolena, ebete Nabiwi Godoko nilakapolo malagidilonama: modoboa: <sup>16</sup> Ebema: me opono iyaiya tanalo keba kunula:ka? Ebe iyaiya tanalo ebe kuba epate kateneno ubilo demalagidilolenaka ebe tanalola, ega:walo iba:te balida:mo ulamete ibino ubilo duwatanaka ebe tanalola, ega:walo iba:te kebe tanalo osiyodilolelo damamaonaka ebe tanalola. Numa:la:, ebe iyaiya kuba tanalo bilibilinomate me opo epono wokine pemaimionaka, Nabiwi Godogodonea! <sup>17</sup> Ebema: me tanalo ebe nanitabola, me opo ega:walo me opono kuba ubi tanalate nolopoligona, wiyasiya kebe lumagite Godokono ubi tanalamo da:tuduwatamene, ebete uwomua: igilago bokolinamene.

*Kelisotamo Gowela Tanalo Osiyodilodawano Tanalo*

<sup>18</sup> Naimano guda:la:, me opono uwomu tete netatali. Iyo, dopamo la: ma kunu olowiyamata, Kelisotamo Gowela Tanalo Osiyodilodawate na:pe, ebema: nanitabola, dubu epetapi bilibilinomate iyalo emaimiya Kelisotamo gowela tanalo kosiyodilolenakoma:, iba:te me tetelo me opolo bilukuliona. Ebema: a me tanalone niyatawaonama:, me tete ebe me opono uwomu tetela. <sup>19</sup> Numa:la:, ebe dubate aimano taneba datepiya, ebe mabuma: iba:te aimano taneba epoma: nanitabolo keda:ona:. Kebe tetelo iba:te aimano tanebapima: neda:onataleka: iba:te a magumulo bilukulionana:, wiyasiya iba:te a nanitabolo da:miyapaiya ebe tanalote a niyatuamena, ibi magumulo lumagi idite aimano tanebadawama: keda:na:.

<sup>20</sup> Wiyasiya la:imano tanalo iyanomola. Kelisote ebena Wade-talena Uliyana la: unamo dadipaniya, ebema: ka:lo la: bilibilinomate Godokono nanitabo tanalo iyatawala. <sup>21</sup> Iyo, la: daedale kimalagidilago kilukuliawena:, wiyasiya la: Godokono nanitabo tanalo iyatawanomolata, ma kunu a:da: tabo idite ebegodone ka:pemaiganakoa:. Nanitabola, ebe mabuma: nale me leta la:tamo osiyodilomo. <sup>22</sup> Ebema: la: magumulo a:da: elemasigidawa potelela:ka? Ebe Kelisotamo gowela tanalo dosiyodilona ebe lumagila, ega:walo ebe potele degena Ya:suko Kelisotea: ebe dawala. Numa:la:, ebako lumagite Nabiwi Godoko ega:walo ebena Gudu Ya:suko ubia:noma: eba eda:nalo ebe tanalo awokala ebo genako. <sup>23</sup> Iyo, kebe lumagite Godokono Guduno tanaloma: ubia: tabo awokala degena, ebete atumu Nabiwi Godotamo ubia: tabo kegena, wiyasiya kebe lumagite Godokono Gudu anikuima: awokala degena, ebete atumu Nabiwi Godoko anikuima: kegena.

<sup>24</sup> Ebema: la:le dopamo wagilimi mabuna kebe nani tabo kolowiwiyama, modobola la: magumulo ebe tabote nitanamene. Nanitabola, la: ebe tabo kodakodalo datila:wenama, ebema: la: Nabiwi Godoko ega:walo ebena Gudu Ya:suko ibi magumulo bilukulionamata. <sup>25</sup> Iyo, numa:la:, Godago ilukuli tanalo ebe uwomua: igilola, Ya:sute atamo ikaeaema: nanitabolo degiya me ebe tanalola.

<sup>26</sup> Ebema: piyate la: a:da: masigilima: dowagelena, nale ibino a:da: tanalo awokalima: me leta ebema: osiyodilomo. <sup>27</sup> Nanitabola, la: ibino a:da: elemasigi tanalamo a:ka:guda:ema, mabu Kelisote ebena Uliyana la: unamo iyalo adipaniya, iyo, ebete uwomua: tetelo la:go eba okolinalo ebe a:ka:tuwa: tanalo bilibilinomo la: biyatulamenakoma:ta, lumagi iditea:. Numa:la:,

ebeno iyatulame tanalo ebe nanitabonomola, iyo, a:da: tanalo idite ebe-godone ka:pemaiganakoa:, ebema: ebete la: keba kunu kiyatulametana, modobola la: eba kunu ebe magumulo nilukulionala:.

<sup>28</sup> Iyo, naimano guda:la:, modobola la: Kelisoko magumulo nilukulionala:, ebema: ebeno pe egelate da:pemaigamene, ale ebe teta:mo ne-maimiote tolea:noma: eba eda:olo ebenu ololo apulo tanalo idima: ilipokobi a:kolowioma:. <sup>29</sup> La: iyatawalata Kelisoko ebe tuputupudawala, ebema: modobola la: me tanalo idi atumu na:kiyatawala:, kebe lumagite ebenu tuputupu tanalo magumulo dokolina, ebe Kelisoko keba kunula:ka: eba kunula ega:walo ebe Godokono gudu idila.

### 3

#### *Godokono Gudino Tanalo*

<sup>1</sup> Ebema: Nabiwite a nilakapolo keba kunu kemalagidiloenale, modobola la: ebe tanalo numa:la:, iyo, ebenu nilakapo atamo beda: kawonomola:ka: Nanitabola, ebete ebenu nilakapo magumudo a ebenu gudima: ka:mina, iyo, a nanitabokobi midipi ebenu gudima: eda:onama:, ebema: me opo epate aimano tanalo kiyatawaona: mabu iba:te atumu Godokono tanalo iyatawa:. <sup>2</sup> Ebema: naimano wadewade namutupiala:, a iyatawala ka:lo a Godokono gudila, wiyasiya a nanitabolo iyatawa: walone a keba kunu na:kilukulionama:. Me tetelo a me kapiya tanalo iyatawala, Kelisote atamo walo da:ka:pemene, ebe tetelo ebe keba kunula:ka: a eba kunu keda:omalema: mabu ale ebenu ololo nanitabolo kuimalema:. <sup>3</sup> Ebe mabuma: kebe lumagite olowiolo Kelisoko demakopelena, ebe lumagite ebenu tepo magumuno daleyakobi a:ka:midimene, ebenu ebete Kelisoko keba kunula:ka: eba kunu bokolinamene, ebenu tepo magumulo daleyakobi tanalo idite a:kitanamene.

<sup>4</sup> Ega:walo me tanalo idila. Lumagite Godokono pukala bilibilinomo magumulo kapiya idi dadikanalemene ebe tetelo ebete ebetamo kuba nanitabolo kosiyodilomene, mabu nanitabola, ebetamo kuba osiyodilo tanalo ega:walo ebenu pukala adikanale tanalo ibi kapiyanomola. <sup>5</sup> Iyo, la: iyatawalata Kelisote me opamo apawokaliya ebete epono iyaiya kuba osiyodilole tanalo iyabaiamo kapalomolaema:. Ebe kapiyate me tanalo osiyodiloma: modobola mabu ebe kapiyagodolo kuba osiyodilo tanalo puliyala. <sup>6</sup> Ebema: kebe lumagite Kelisoko magumulo dokolina, ebete kuba osiyodilo magumulo a:kokolinamene, wiyasiya kebe lumagite kuba osiyodilole magumulo dokolina, ebe lumagite Kelisokono tanalo nanitabolo kelawe: ega:walo ebete ebenu tanalo iyatawa:.

<sup>7</sup> Naimano guda:la:, la: nanisiwale, lumagi idite la: a:da: akomasigila:la: Numa:la:, kebe lumagite tuputupu tanalo dosiyodilolenakomene ebe lumagi ebe tuputupudawala, Kelisoko keba kunula:ka: eba kunula. <sup>8</sup> Wiyasiya kebe lumagite kuba tanalo dosiyodilolenakomene ebe Saitanakono guduma: eda:na, mabu me opono wagilimi mabune pete me teta:mo pemaiga Saitanate iyaiya kuba tanalo kapiya osiyodilolenako. Me mabuma: Godokono Gudute me opamo ebema: pawokaliya, Saitanate dosiyodilolenako ebe kubakuba tanalo ebete nanitabolo palukolemete ka:popoliyadigalema:.

<sup>9</sup> Numa:la:, Godokono gudima: deda:ona iba:te kuba osiyodilole magumulo walo a:kilukulionama:na:, mabu Godote ibi magumamo ebenu igilo

iyalo iyatiya, lumagite wadewade kikopu damelamo keba kunu kamionakole eba kunu. Nanitabola, Godokono igilote ebenu guda:godolo ditanamene, iba:te kuba tanalo osiyodilolema: modoboa. <sup>10</sup> Ebema: modobola la: niyatawala:, epono osiyodilole tanalate ibi anagiyamidalena, ma kunu Godokono gudi ega:walo Saitanakono gudi iba:te iyaiya ka:pola:nama:. Iyo, me tanalo nanitabola, piyate tuputupu tanalo osiyodilolea:no ega:walo piyate ibino ekaki nilakapolo malagidilolea:no, iba:te Godokono gudima: keda:ona:.

### *Idite Idi Nilakapolo Malagidilo Tanalo*

<sup>11</sup> Ebema: numa:la:, la: dopamo wagilimi mabune kebe tabo kolowiawiyama ebe tabo ebe ma kunula, modobola a nanitabokobi midipi magumulo idite idi nilakapo kemalagidilo, idite idi nilakapolo kemalagidilo, a eba kunu bilukulionama:. <sup>12</sup> La: iyatawalata Ka:inikono tanalo, ebema: ebe keba kunula:ka: la: eba kunu eda:oma: modoboa:. Eiye, ebe Saitanakono guduma: eba eda:lo ebenu ekawitamo kuba kawonomo osiyodiliya. Mabuni keleka: ebete ebenu ekawi gito danakapumiya? Iyo, ebete kuba osiyodilole magumulo eba okolinalo, wiyasiya ebenu ekawite tuputupu tanalo osiyodilolenami, ebete ebetamo dowakobi ebema: olowiya.

<sup>13</sup> Ebema: naimano nanitabokobi midipi ekakiala:, la: tuputupu osiyodilole magumulo eba ilukulionalo, me opo epate la:tamo dowa tanalo dosiyodilolema:na:, la: ebe tanaloma: akola:wa:oala:. <sup>14</sup> A iyatawala a a:e magumune igilamo iyalo opila:iyama: mabuni a nanitabokobi midipi ekaki epetapi nilakapolo nemalagidilolenama:, wiyasiya kebe lumagite nilakapo kimalagidilo magumulo okolina:no, ebe lumagite a:e magumune nanitabolo ka:nemaiga:. <sup>15</sup> Ega:walo kebe lumagite ebenu ekawitamo da:dowana, ebe lumagino tanalo ebe potele ebenu ekawi danakapumiya ebe dawano osiyodilo tanalo keba kunula:ka: eba kunula, iyo, ibi netewapino woki ebe kapiyala. Ebema: a iyatawala ebako lumagino tepo magumulo uwomua: igilo puliyanomola, mabuni lumagi anakapumidawagodolo Godokono nanitabo igilote a:kitanamene.

<sup>16</sup> Numa:la:, Kelisote ebenu igilo a mabuma: iyabaiamo iyatiya, ebema: a ebenu osiyodilo tanalodo nilakapo kimalagidilo tanalo nanitabolo kiyatawaomalema:, iyo, modobola a atumu aimano igilo nanitabokobi midipi mabuma: iyabaiamo balomonakoma:. <sup>17</sup> Wiyasiya kebe tetelo a nanitabokobi midipi magumulo inamabuni dogodogodawa idite inamabua:dawa umite ebe walubia:no, ebete mako tabo keba kunu na:kegemene, “Na Godoko nilakapolo nemalagidilonamo?” Eiye, ebete ebako tabo gema: modoboa:! <sup>18</sup> Ebema: naimano guda:la:, a epetapiatamo nilakapo tabo gito a:kegelanakoma:. Ao, modobola a epetapino modoboa: tanalo ulamelelamete iba:tamo nilakapo inamabuni eba ikalamelo Godokono nanitabo nilakapo iba:tamo eba kunu kawokalimalema:.

### *Godokono Ololo Apulo Tolea:no Utitata Tanalo*

<sup>19</sup> Ebema: kalakala kawonomola, a me nilakapo gabodo kiyatawaomalema: a Godokono nanitabo tanalo magumulo ilukulionama:, ega:walo aimano tepo magumulo ebenu milo kapiyate eba itanalo ale tolea:noma: eda:onama: ebenu ololo apulo utitatama:. <sup>20</sup> Wiyasiya kebe tetelo aimano tepo magumuno wokite a kubakubapima: deka:imene, ale ebe kuba woki laema: modoboa: mabuni ebako wokite Godogodone ka:pena:. Numa:la:, ebete aimano waminaole tanalo bilibilinomo eba iyatawanalo ebete dopamo a tuputupupima: eka:miya, ebema: ale woki bilibilima: a:keda:oma: mabuni ebenu tabono elawote aimano tepo magumuno elawo nodolina.

<sup>21</sup> Ebema: naimano wadewade namutupiala; tete idilo aimano tepo magumuno wokite a kubakubapima: deka:imene, ebe kuba woki lawea:no ale tolea:noma: eda:ote aimano towetowe tabago Godokono ololo apuamo gito ka:nemaimiomalema: <sup>22</sup> Ebe tetelo ale beda: tanaloma: ebe da:toweoema: ebete atamo nanitabolo kikaeaemene, mabu ale ebenu to-tomu tabamo tudila:ote ebenu iyaiya ubi tanalo kapiya ebo osiyodilole-nakoma: <sup>23</sup> Nanitabola, me Godokono kawo totomu tabola, ale ebenu Gudu Ya:su Kelisokono mailo nanitabokobi eba midinalo, a magumulo idite idi nilakapolo bemalagidilonama; Ya:sute a dopamo keba kunu kiyatuamiyale eba kunu. <sup>24</sup> Ega:walo tanalo idi ma kunula. Kebe lumagite Godokono totomu tabamo da:tuduwatanako, ebete Godoko magumulo bokolina ega:walo Godote atumu ebe magumulo ba:kokolina. Ebema: Godote a magumulo dokolina a ebe nanitabo tanalo iyatawala, mabu ebete atamo dikaeamiya ebe Wade-talena Uliyanate a ebe tanalo niyatuamena.

## 4

### *Godokono Uliyana Ega:walo Kelisotamo Gowelao Uliyana Ibino Iyaiya Osiyodilole Tanalo*

<sup>1</sup> Naimano wadewade namutupiala; epetapiate ma kunu gito degelanaka, “A Godokono Uliyanagopila,” la: ibino tabo nanitabokobi akomida:la: Modobola la: wiyasiya ibino iyaiya tabo ega:walo ilukuli tanalo wadenomamo nulamelelamenala; mabu diyala, iba:te Godokono Uliyanano elawamo dilukulione o kuba uliyanano elawamo dilukulione. Numa:la; me tetelo opo kawonomolo a:da: tabo kiyawaopiate Godokono mailo ka:milo gito wapata:lamena! <sup>2</sup> Ebema: la: Godokono Uliyanagono wokodawa ma kunu kiyatawaomamota, kebe lumagite ma kunu da:kiyawaonako, “Ya:su Kelisote lumagino apa:mo me opamo nanitabolo apawokaliya,” ebe Godokono Uliyanagonola. <sup>3</sup> Wiyasiya kebe lumagite Ya:sukono tanaloma: a:da: tabo da:kiyawaonako ebe Godokono Uliyanagono wokodawa; ao, ebenu uliyana ebe Kelisotamo Gowela Tanalo Osiyodilodawano uliyanala. Nanitabola, dopamo la: ma kunu olowiyamata, ebe kuba uliyanate me opamo ka:pemene, ebema: ebete epatamo iyalo pemaigate me opolo bokolina.

<sup>4</sup> Naimano wadewade guda:la; piyate Godokono mailamo a:da: tabo da:kiyawaonaka la:le ibino wato kikopu iyalo elawimata, mabu la: Godokono gudilata ega:walo la: magumulo woko dosiyodilona ebe Wade-talena Uliyanano elawote kawonomoma: eda:na, iyo, ebe elawote ibi magumulo woko dosiyodilona ebe uliyana idino elawo nodolina. <sup>5</sup> Numa:la; ebe a:da: kiyawaopiate me opono tanaloma: gelana, mabu me opolo woko dosiyodilona ibi ebe kuba uliyanagopila, iyo, me opo epono kalakala ebema: itana ibino iyaiya tabo olowioma: <sup>6</sup> Wiyasiya aimano tanalo iyanomola mabu a Godokono gudima: eda:onama: Ebema: numa:la; kebe lumagite Godokono tanalo nanitabolo diyatawana ebete aimano tabo kolowimene, wiyasiya Godokono tanalo iyatawa: lumagite aimano tabo a:kolowimene. Iyo, a me gabodo niyatawaonama: kebe tanalate Godokono nani Uliyanagodone da:pemaimiona ega:walo kebe tanalate a:da: elemasigi uliyanagodone da:pemaimiona ebe iyaiya tanalo.

### *Godoko Ebe Nilakapodawala*

<sup>7</sup> Naimano wadewade namutupiala; modobola a magumulo idite idi nilakapolo kemalagidilo, idite idi nilakapo kemalagidolo, a eba kunu bowagelenama: mabu nilakapo tanalo ebe Godogodone pena. Ebema: kebe



epagodolo nilakapo kimalagidilo tanalo ditanamene ibi Godokono gudila, iyo, ibi Godokono nanitabo tanalo iyatawala, <sup>8</sup> wiyasiya kebe lumagigodolo nilakapo kimalagidilo tanalote itana:no, ebe lumagi Godokono nanitabo tanalo iyatawa: mabu Godoko ebe kawo nilakapodawanomola. <sup>9</sup> Numa:la:, Godote ebena nilakapo atamo ma kunu awokalimiya, ebete ebena Gudu kapiyanomo me opamo apalibiya ale nanitabo igilo ebegodone kelaema: <sup>10</sup> Ebema: ebe nanitabo nilakapo tanalo ebe ma kunula. Dopamo ale Godoko nilakapolo malagidiloa: tetelo ebete a kawonomamo eba malagidiloelo ebena Gudu Kelisoko atamo ebo palibiya, iyo, ebete ebena ubi ebo iyatiya aimano iyaiya kuba osiyodilole tanalo Kelisokono kalimamo egeboleamete a ebena gudima: ka:midima:

<sup>11</sup> O naimano wadewade namutupiala:, Godote ebena nilakapo tanalo atamo eba kunu awokalimiya, ebema: modobola a atumu idite idi nilakapolo ba:kemalagidilonakoma: <sup>12</sup> Nanitabola, me opo wagilimi mabune lumagi idite Godoko kumiya:, wiyasiya kebe tetelo a magumulo idite idi nilakapolo kemalagidilo, idite idi nilakapolo kemalagidilo, a eba kunu dilukulionama:, ebe tetelo epetapiate aimano osiyodilo magumudo Godoko nanitabolo kuima:na:, mabu ebete a magumulo bokolina ega:walo ebena nilakapo tanalote a magumulo tabokanomola.

<sup>13</sup> Godote a magumulo dokolina ega:walo ale ebe magumulo dilukulionama:, ebe tanalo a keba kunu na:kiyatawaoma:? Dopo tanalo ebe ma kunula, Godote atamo dikaeamiya ebe Uliyanate a kiyatuaemene. <sup>14-15</sup> Ega:walo aimano tabo kiyawao tanalo ebe a iyatuame tanalo idila. Iyo, ale balida:mo dumiyama: ebe nanitabo tanalo epetapiatamo ma kunu ba:kiyawaonakoma:, “Godote ebena Gudu me opamo apalibiya, ebete epono Igilo Mula:lelamedawama: ka:peda:nama:.” Ebema: nanitabola, kebe lumagite awokala ma kunu da:kiyawaona, “Ya:suko ebe Godokono Gudula,” Godote ebe lumagi magumulo nanitabolo bokolina ega:walo ebete atumu Godoko magumulo ba:kokolina. <sup>16</sup> Ega:walo ebe wade woki laema: Godokono nilakapo tanalote atumu a iyatuamedawa idima: keda:na. Iyo, Godote kawo nilakapodawanomoma: eba eda:nalo a nilakapolo malagidiloena, ebema: a magumulo kebe lumagite ebe tanalo nanitabokobi midite nilakapo kimalagidilo magumulo dokolinamene, ebe lumagite kiyatawamene ebete Godoko magumulo bokolina ega:walo Godote ebe magumulo atumu ba:kokolina.

<sup>17</sup> Numa:la:, me nilakapo kimalagidilo tanalodo a tuputupu epoma: eda:onama:, ebema: Godote epo bilibilinomono iyaiya kuba tanalo danag-ilamelelaemene, ebe Kawo Egelalo ebena ololo apuamo kalakalago ka:nutitatamalema:. Ebe tetelo tole tanalote agodolo a:kitanamene, mabu ebete Unu Duliyomololo keba kunu kokolinale, eba kunu ale me opolo atumu kilukulionama:. <sup>18</sup> Nanitabola, Godokono nanitabo nilakapo kimalagidilo magumulo tole tanalo puliyala, mabu nilakapo kimalagidilo tanalote tole tanalo iyabaiamo ebena elawamo ka:na:ma:tamene. Ebema: kebe lumagite Godokono ololo apuamo utima: da:toletolena, Godokono nilakapo kimalagidilo tanalote ebe magumulo woko wadenomamo kosi-yodilona:, iyo, ebako lumagite nemalagidilona Godote ebetamo kuba wiya kikaemene, ebema: ebegodolo tole tanalo kapiyate itana.

<sup>19</sup> Numa:la:, Godote a dopamo nilakapolo nemalagidiloenami, ebema: modobola a nilakapo kimalagidilo magumulo bilukulionama:. <sup>20</sup> Ebema: kebe lumagite ebena ekawitamo dowalo ma kunu degemene, “Nale Godoko nilakapolo nemalagidilonamo wiyasiya a:ma:

kemalagidilawena;” ebe lumagi a:da: elemasigidawala. Eiyee! Ebete me opolo eba okolinalo kebe lumagi ebenu balida:mo dumina ebe ekawi nilakapolo malagidilola:no, ebete umia:noma: deda:na ebe Godo nilakapolo keba kunu na:kemalagidilonamene? Gabo puliyanomola, a:kitanamene! <sup>21</sup> Nanitabola, Kelisote atamo kebe kawo totomu tabo dikaeamiya ebe tabo ebe ma kunula, kebe lumagite Godoko nilakapolo demalagidilona, modobola ebete atu gabodo ebenu ekawi nilakapolo na:kemalagidilonamene.

## 5

### *Nanitabokobi Midipino Elawote Me Opono Elawo Anakapumi Tanalo*

<sup>1</sup> Numa:la:, Ya:sute Godokono Alibodawa Kelisoma: deda:na, piyate ebe tanalo nanitabokobi da:midina ibi Godokono gudila, ebema: piyate Nabiwi Godoko nilakapolo demalagidilona, iba:te atumu ebenu gudi bilibilinomo atu nilakapo tanalago kemalagidilolena. <sup>2</sup> Ebema: Godokono nilakapo kimalagidilo tanalote agodolo ebenu gudi epetapiatamo ditana, ale ebe tanalo ma kunu iyatawaonama:, kebe tetelo ale ebe nilakapolo eba malagidilolo ebenu totomu tabamo da:tudila:anakoma:, ebe tetelo ebenu nilakapo tanalote a magumulo nanitabolo itananako. <sup>3</sup> Nanitabola, Godoko nilakapolo malagidilo tanalo ega:walo ebenu totomu tabamo tuduwata tanalo, ebe tanalo netewate iyaiya ka:pola:na:, ibino woko osiyodilo tanalo ebe kapiyala. Ega:walo ale ma kunu a:kemalagidiloma:, Godokono totomu tabamo tudila:o tanalote atamo kodakodanomoma: eda:na. <sup>4-5</sup> Ao, eba kunua:, mabu Godokono gudi bilibilinomagodolo ebenu elawo bitana iba:te me opono kuba osiyodilo elawo kanakapuima:. Ebema: me opono kuba osiyodilole tanalo anakapuima: lumagite elawonomoma: keba kunu na:keda:namene, ega:walo potele na:ka:modobomene me opono elawo anakapuima:?. Nanitabola, a magumulo potele ebenu nanitabokobi mido magumulo Ya:suko Godokono Guduma: degena, ebe dawate modobo elawo belawenakomene.

### *Ya:su Kelisokono Nanitabo Tanalo Dawokalimina Ebe Netewa-kapiya Tanalo*

<sup>6</sup> Me tanalo nanitabola, Ya:su Kelisote me opamo da:piya, ebete ebenu nanitabo tanalo awokalima: ebete obo ega:walo kalima ka:ka:liya tanalago atamo a:pemaigiya, iyo, ebete me netewa gabodo ebenu tanalo atamo apawokalimiya. Ega:walo me tanalo idila, Godokono Uliyanate atumu Ya:sukono nanitabo tanalo kawokalimina mabu ebe Godokono nanitabo tanalo awokalimidawala. <sup>7</sup> Ebema: Kelisokono tanalo kawokaliminama: me netewa-kapiya tanalate ba:pola:nama:na:, <sup>8</sup> Godokono Uliyanano tabono tanalo, ega:walo Kelisokono kalimate deka:ka:liya ebe tanalo, ega:walo opo lumagite ebe obamo daduba:midiya ebe tanalo, iyo, me netewa-kapiya tanalate me atu tanalo awokalimina, Ya:su Kelisoko ebe Godokono Gudula.

<sup>9</sup> Numa:la:, me opo epate nanitabolo degelanaka, tete bilibilinomo epetapilo ale ebe tabo nanitabokobi da:midilinakoma: ebe tanalo kuba:. Wiyasiya Godote ebenu Guduno tanaloma: kebe tabo kegenale, modobola ale ebe tabo wadenomamo olowite nanitabokobi ka:midimalema:, iyo, Godokono tabono iyaiya tanalo ebe nanitabonomola, ebete a:da: tabo ka:kiyawaona:, ebema: ebenu tabono elawote opo epono elawo nodolina. <sup>10</sup> Ebema: kebe lumagite Godokono Gudu nanitabokobi da:midina, ebe lumagino tepo magumulo Godokono nani tabote bitana. Wiyasiya numa:la:, kebe lumagite Godokono tabo nanitabokobi midia:no ebe lumagite me gabodo Godoko a:da: elemasigidawama: midina, mabu Godote ebenu

Guduno tanaloma: nanitabolo degiya, ebe nanitabokobi midia:dawate ebe tabo ubia:noma: eda:na. <sup>11</sup> Nanitabola, Godote ebene Guduno nanitabo tanalo awokalima: me tanalo osiyodiliya, ebete ebene Gudugodolo ditana ebe uwomua: igilo atamo ikaeamiya. <sup>12</sup> Ebe mabuma: kebe lumagite Godokono Gudu nanitabolo danikumina ebegodolo uwomua: igilo bitana, wiyasiya kebe lumagite Godokono Gudu lawea:no, ebe niyala, nanitabo igilote ebegodolo kitana:

*Godokono Guduno Uwomua: Igilono Tanalo*

<sup>13</sup> Ebema: la: piyate Godokono Guduno mailo nanitabokobi da:mida:wenama, na me leta la:tamo osiyodilomo, la:le uwomua: igilo delawa:wiyama ebe igilote la:godolo eba itanalo la:le nanitabolo kiyatawaema: <sup>14</sup> Nanitabola, ale towetowe tabago Godokono ololo apuamo da:nemaimioma:, ebe tetelo ale tolea:no aimano iyaiya modoboa: tanaloma: ebe kanamalema:, ebema: a me tanalo iyatawala, ale kebe tanalo ebene ubilo ebe da:toweoema:, ebete ebe towetowe tabo nanitabolo kolowimene. <sup>15</sup> Ega:walo a iyatawala, Godote aimano towetowe tabo dolowiomene ebete a nanitabolo kowalubimene, iyo, a kebe tanalo ebegodone laema: ebe da:toweoema: ebete atamo kikaemene, mabu tete bilibilinomolo ebete aimano iyaiya towetowe tabo olowionako.

<sup>16</sup> Ebema: la:le nanitabokobi midipi magumulo ekawi idino kuba osiyodilo tanalo duma:ema, modobola la: ebene tanalo Godotamo towetowe tabamo nadipatemiyala:, ebene Godote ebene tepo magumuno tanalo wadekobi midite ebetamo igilo walo ka:kikaemene. Wiyasiya kebe tetelo lumagite kuba kawonomo dosiyodilomene, ma kunu ebete Godokono Uliyanano nanitabo woko kubama: degemene, ebe tetelo ebene igilo mabuma: Godotamo akotowetoweala:, modobola ebako kubadawate a:eamo na:toamene. <sup>17</sup> Numa:la:, me kuba osiyodilo tanalo kapiyanomote lumagi a:eamo kemagatamene, ebema: la: naimano tabono tanaloma: woki bilibilima: akoeda:oala:. Nanitabola, a epono osiyodilole tanalo bilibilinomo magumulo aimano tuputupua: tanalo ebe Godokono pukala wakalami tanalola, wiyasiya kalakala kawonomola, ebegodolo elawo bitana ebako iyaiya kuba osiyodilole tanalo egeboleamete igilo atamo walo ka:kikaema:

<sup>18-19</sup> Nanitabola, a iyatawala Godokono guda:te kuba osiyodilole magumulo kilukuliona:, mabu Godogodone dawokaliya ebe Elawodawate ibi na:ga:lulatelena Kubadawa Saitanate ibi kubailamekapoma:. Ebema: numa:la:, me opo kawonomote ebe Kubadawano elawo magumulo itana, wiyasiya a iyatawala a nanitabokobi midipiate me opolo eba ilukulionalo a Godokono gudima: eda:onama:, ebema: kuba tanalo idite a a:kologimene. <sup>20</sup> Ega:walo a tanalo idi iyatawala, Godokono Gudute me opamo da:piya, ebete atamo wade mulo tanalo a:pikaemiya ale Nanidawano tanalo wadenomamo kiyatawaonama:. Numa:la:, ebe Nanidawa ebe Godotela, ebe Uwomua: Igilola, ebema: kalakala kawonomola, ale ebene Gudu Ya:su Kelisoko magumulo bilukulionama:!

<sup>21</sup> Ebema: naimano wadewade guda:la:, modobola la: nani Godo kapiya eba amamatenalo, ida:da:li epetapi amamalatele tanalamo ega:walo ibino a:da: elemasigi uliyanano wokino tanalamo akotudila:onakala:

Me ebe naimano tabo uwomula. Taula.

## YONEKONO NABA 2 LETA EBETE NANITABOKOBI MIDIPIATAMO OSIYODILIYA

<sup>1</sup> Na me leta dosiyodilomo, na nanitabokobi midipino watodawa idila. Godote iyalo tetelo kebe epo keka:la:mioliyale iba:te ebeno gudima: keda:onama:, ebe epono taneba ebe ebeno oli kamiyale keba kunula:ka: eba kunula. Nanitabola, la: ebe nanitabokobi midipi gudilata, ebema: nale la: nilakapolo nemalagidilolenamata, ega:walo Godokono nanitabo tanalo iyatawaopiate atumu la: na:kemalagidilolenata. Numa:la:, nale me leta la:tamo ebema: palibomo, <sup>2</sup> mabu Godokono nanitabo tanalote a bilibilinomatamo da:pemaigiya, ebe nanitabo tanalote a magumulo eba itanalo a:kolopoligonamene, uwomua: tetelo agodolo bitanamene.

<sup>3</sup> Ebema: numa:la:, Nabiwi Godoko ega:walo ebeno Gudu Ya:su Kelisoko iba:godone atamo da:pemaimiona ebe nilakapo tanalo ega:walo lumagitamo kuba wiya ikamea: tanalo ega:walo milo tanalo, modobola ale Godokono nanitabo tanalo ega:walo ebeno nilakapo kimalagidilo magumulo eba ilukulionalo me netewa-kapiya tanalate agodolo na:pola:nama:na:.

### *Kelisokono Iyatulame Tabago Ilukuli Tanalo*

<sup>4</sup> Ebema: nanitabokobi midipi guda:la:, la: epetapi Nabiwi Godokono nanitabo tanalo magumulo dowapata:lama:wenama, na ebe tanalo olowite kawo kalakala ebo laimo, mabu ale eba kunu kowapata:lamenama: Nabiwite a iyalo a:totomuateiya. <sup>5</sup> Nanitabola, la: nanitabokobi midipi gudino taneba ebe Godokono oli kamiyale keba kunula:ka:, la: eba kunula. Ebema: nale me leta nosiyodilomo ebeno totomu tabo idi la:tamo ma kunu kawokalima:, modobola a magumulo idite idi nilakapolo kemalagidilo, idite idi nilakapolo kemalagidilo, a bilibilinomate eba kunu bowagelenama:. Na iyatawala me totomu la:tamo oli totomua:, tagala totomula, iyo, Godote dopamo wagilimi mabune atamo dikaeamiya ebe totomula. <sup>6</sup> Ebema: ebeno nilakapo kimalagidilo tanalo keba kunula:ka:? Ebe tanalono magumu ma kunula, ale aimano ilukuli magumulo Godokono totomu tabo bilibilinomamo ba:tudila:onakoma:. Nanitabola, ebe totomu tabo bilibilinomo magumulo ale ebeno kawo totomu tabo wagilimi mabune ma kunu olowiyama:, a ebeno nilakapo tanalago bowapata:lamenama:.

<sup>7</sup> Numa:la:, a:da: masigiolepi epetapi bilibilinomate iyalo emaimiya, me tetelo me opo kawonomolo bilukuliona. Iyo, iba:te tabo ma kunu gelana, “Ya:su Kelisoko lumagino apa:mo me opamo kapawokaliya:,” ebema: ebe tabo gela tanalamo iba:te ibino tanalo ma kunu awokalimina, ibi A:da: Masigioledawa Kawonomo ega:walo Kelisotamo Gowela Tanalo Osiyodilodawano uliyanagopila. <sup>8</sup> Wiyasiya la:imano tanalo iyanomola, mabu la:le kebe wade woko kowagilima:wiyama ebe wokote la:godolo olopoligoa:no, walone la:le la:imano wiya kawokawonomo nanitabolo ka:nuwatemamota. Ebe mabuma: la: a:ka:tuwa: la: wadenomamo nulamenala:, la:le ebe woko wiya anaetoamidakapoma:.

<sup>9</sup> Ega:walo me tanalo idila. Kebe lumagite Kelisokono iyatulame tabago okolina:no ebe a:ka:tuwa: ebeno ubilo da:tona, ebe lumagino osiyodilole tanalate ebeno tepo magumuno tanalo ma kunu awokalimina, Godote ebe magumulo kokolina:. Wiyasiya kebe lumagite Kelisokono iyatulame tabago dokolina, ebe lumagi magumulo Nabiwi Godoko ega:walo ebeno

Gudu Ya:suko nanitabolo bokoliona. <sup>10</sup> Ebema: kapela lumagi idite la: nanitabokobi midipiatamo eba pemaigalo, ebe a:ka:tuwa: ebe Godokono wokodawama: da:pegemene, la: nanisiwale! Ebete Kelisokono nanitabo iyatulame tabago pea:no la: ebe kalakalago lawa:wete la:imano motamo ebe ako-owodolala;, <sup>11</sup> mabu kebe lumagite ebako a:da: elemasigidawa kalakalago delaemene, ebete ebetamo elawo ebo kikaemene Saitanakono woko kosiyodiloma:.

<sup>12</sup> Nanitabola, nagodolo tanalo epetapi bilibilinomo ba:pola:na la: kanale-tama:, wiyasiya na ubia:nola ebe iyaiya tanalo pepamo akulolema:, ebema: naimano woki bitana naimano apenomamo la:tamo ka:pema:, iyo, gabote ditanamene na ka:pemamo. Ebe tetelo aimano kalakalate nanitabonomoma: keda:mene, mabu na la:imano iyaiya ololo eba pulamelo aimano tabono iyaiya tanalo ebo kegelamalema:.

*Yonete Leta Uwomu Apulo Nanitabokobi Midipino Nilakapo Tabo Dapali-biya*

<sup>13</sup> Ebema: nanitabola, kebe nanitabokobi midipiate nago daladabutinaka, Godote ibi atumu iyalo eka:la:mioliya iba:te ebeno gudima: keda:onama:. Numa:la:, ibino sosi taneba ega:walo la:imano sosi taneba, me la:imano taneba netewate kapiya alailame buwelemele netewa keba kunula:ka: eba kunula, ebema: iba:te ibino nilakapo tabo ebe paliba la:tamo.

Me ebe naimano tabo uwomula. Taula.



## YONEKONO NABA 3 LETA EBETE NANITABOKOBI MIDIDAWA IDITAMO OSIYODILIYA

<sup>1</sup> Na me leta dosiyodilomo, na ebe nanitabokobi midipino watodawa idila. Naimano wade namutudawa Ga:iyasi, a:ma: niyata. Nale me leta a:ma:tamo palibomo, mabu a:ma:la, nala, a Godokono nanitabo tanalo magumulo eba okolionalo nale a:ma: nilakapolo nemalagidilonamata.

<sup>2</sup> Naimano wade namutudawa, na a:ma: mabuma: Godotamo ma kunu towetowenakomo, ebete a:ma: eba walubinalo a:imano okoli magumulo tanalo bilibilinomate modobolo ka:pola:nama:. Ega:walo nale a:ma: akadipatenakomata a:ma:le gabugabua:no kokoliawenama:, mabu a:imano tepo magumuno nanitabokobi midi tanalote elawonomoma: keba kunu keda:nale, modobola a:imano apeno elawote atumu modobonomoma: na:keda:namene. <sup>3</sup> Ebema: numa:, nanitabokobi midipi ekaki epetapiate natamo pelamete a:imano okoli tanalo dapawokalimiya, ebe tetelo na kalakala kawonomo ebo laimo, mabu iba:te tabo ma kunu pegeliya, a:ma: Godokono nanitabo tanalo magumulo pata:nata ega:walo a:imano nanitabokobi midi tanalo kodakodanomola. <sup>4</sup> Nanitabola, naimano nanitabokobi midipi gudi magumulo lumagi idino tanalo ma kunu dolowimo, ebete Godokono nanitabo tanalo magumulo depata:na, ebe tetelo naimano kalakalate ebe mabuma: ununomamo odolote kawonomoma: keda:mene.

### *Ga:iyasikono Wadewade Osiyodilole Tanalo*

<sup>5</sup> Naimano wade namutudawa, numa:, a:ma:le nanitabokobi midipi ekaki Godokono woko osiyodilo magumulo ulama:wete ibi baeamo ega:walo lao baino tanalamo dowalubila:wenaka, ebema: a:ma: atumu Godokono nani wokodawa idima: eda:nata. Ega:walo kalakala kawonomola, Godokono wokopi bilibilinomo magumulo a:ma: a:imano epo kapiya kowalubila:wena:, ao, piyate iyaiya kapela duliynomolone da:pelamenaka a:ma:le ibi atumu wadenomamo a:kowalubilinakota. <sup>6</sup> Ebema: a:ma:le dopamo kebe epo kowalubila:wia, iba:te atamo pemaimiote sosi epono ololo apulo a:imano nilakapo kimalagidilo tanalo kalakalago apawokalimiya. Ebene tete idilo ebako wadewade wokopiate a:ma:tamo walo da:ka:pelaema:na:, iba:te la:godolo pilukulinate ebene duliynomolo ida:mo walo tolaema: dowagelema:na:, modobola a:ma: ibi atumu nilakapo tanalago naliboliye, a:ma:le Godokono wadewade ga:limapi gudi epetapi keba kunu kowalubila:wenaka eba kunu. <sup>7</sup> A:ma: numa:, ebako wokopiate Kelisokono mailo mabuma: ibino iyaiya duliynomolo miyapate iyalo a:tolamoliya, iba:te iyaiya duliynomolo bilibilinomolo eba wapata:lamenalo ebene Wade Tabo nanitabokobi midia:piatamo ebo ka:na:kiyawaonama:. Wiyasiya ebe woko wagilimia:no dopamo iba:te ibino tepo magumu ma kunu kodakodailamiya, iba:te kapiya tanalo da:peso idi nanitabokobi midia:piagodone laema: modoboa:noma: gelalo a:kelaema:na:. <sup>8</sup> Ebe mabuma: modobola a nanitabokobi midipiate ebako wokopi baeamo ega:walo lao baino tanalamo bowalubilinakoma:, iyo, a ebe walubi tanalodo Godokono Nani Tabo kiyawao woko iba:go kapimiya bosiyodilonama:.

### *Diyotipasikono Kuba Osiyodilo Tanalo*

<sup>9</sup> Nanitabola, nale a:imano sosi epatamo leta idi dopamo osiyodilimo, wiyasiya ebe tetelo Diyotipasite ebe leta lawete na sosi watodawa:noma:

gelo, ebete naimano tabamo ka:tuduwata:. Iyo, ebenu ubi tanalo ma kunula, ebe a:ka:tuwa: ebe eba adipatelo sosi epo magumulo ebe kapiya dopo lumaginomoma: keda:ma:. <sup>10</sup> Ebe mabuma: naimano pe tetelo ebete kebe kuba tanalo dosiyodilolena ega:walo a sosi watowatopino tanaloma: kebe kuba tabo da:kiyawaona, nale ebe tanalo sositamo eba pawokalilamelu ebe kawiya ebo kapanamamo. Numa:, ebe ubia:nola me kapiyakapiya kuba tanalo osiyodilolema:, ebema: ebete tanalo idi ma kunu kosiyodilonako, piyate Godokono nani woko osiyodiloma: la:tamo da:pelamenaka, ebete ebenu amama magumulo ibi baeamo ega:walo lao baino tanalamo kowalubilinakoa:, ega:walo piyate ibi dopamo dowalubilinakiya ebete ibi gito odiyoboli. Eiye! Ebe a:ka:tuwa: ebe sosi watodawama: gelo ebe wadewade wokiagopino walubili tanaloma: kuba wiya eba ikalamelu, la:imano sosino aladabuti tanalamo pelaema: talena ebo iyatilami!

### *Dimitiyasikono Wade Okoli Tanalo*

<sup>11</sup> Ebema: naimano wade namutudawa, a:ma: lumagi idino kuba osiyodilo tanalo duma:emene, ebe akoibamita:la:. Modobola a:ma: wade tanalote nowaloma:tiye, mabu piyate wadewade tanalo dosiyodilolena ibi Godokono gudila, wiyasiya piyate kubakuba tanalo dosiyodilolena iba:te dopamo Godokono nanitabo tanalo kumiya:. <sup>12</sup> Eba kunu na Dimitiyasikono tanalo nemalagidilutamo, epo bilibilinomate ebenu osiyodilole tanaloma: wadewade tabo gelana, ega:walo ebenu okoli tanalote atumu ebenu tanalo ma kunu awokalimina, Godokono nanitabo tanalote ebe magumulo bitana. Numa:, a sosi watowatopiate atumu ebe wade lumaginomoma: kegelanama:, ebema: kebe tetelo a watowatopiate mako tabo degelama:, ebe tetelo a:ma: kiyatawama:ta aimano tabo nanitabola mabu a a:da: elemasigipima: keda:ona:.

<sup>13</sup> Nanitabola, nagodolo tanalo epetapi bilibilinomo ba:pola:na la: kanaletama:, wiyasiya na ubia:nola ebe iyaiya tanalo pepamo akulolema:. <sup>14</sup> Ebema: naimano woki bitana tete tatalila naimano apenomamo a:ma:tamo ka:pema:, iyo, gabote ditanamene na ka:pemamo. Ebe tetelo na a:imano ololo eba pumilo aimano tabono iyaiya tanalo ebo kegelamalema:.

### *Yonete Leta Uwomu Apulo Nanitabokobi Midipino Nilakapo Tabo Dapalibiya*

<sup>15</sup> Modobola Godokono kalakalate a:ma:godolo nitanamene. A nanitabokobi midipino taneba magumulo piyate a:imano namutupima: deda:ona, iba:te ibino nilakapo tabo a:ma:tamo paliba, ebema: la:imano taneba magumulo piyate aimano namutupima: deda:ona, modobola a:ma: sosi epono ololo apulo ibi ka:la:miawete aimano nilakapo tabo iba:tamo ebo nawokalimiye.

Me ebe naimano tabo uwomula. Taula.

## YUDAKONO LETA EBETE NANITABOKOBI MIDIPIATAMO OSIYODILIYA

<sup>1</sup> Na ebe Yudatela, Ya:su Kelisokono wokodawa idila ega:walo Ya:imesikono ekawila.

La: nanitabokobi midipi Nabiwi Godote dopamo deka:la:mitiyala, iyo, ebete la: kebe epo nilakapolo kemalagidiloletana ega:walo Ya:su Kelisokono itakeamida magumulo dilukuliawenama, na me leta la:tamo palibomo.

<sup>2</sup> Ebema: modobola milo tanalo ega:walo lumagitamo kuba wiya ikamea: tanalo ega:walo nilakapo kimalagidilo tanalo, me netewa-kapiya tanalate la:godolo kawonomamo na:pola:nama:na:

### *Godote Kuba Osiyodilolepiatamo Wiya Ikalame Tanalo*

<sup>3-4</sup> Naimano wadewade namutupiala:, ale Godogodone kapimiya delawiyama:, na dopamo ebe igilo mula: tanaloma: leta magumulo kiyawaoma: wagelimo. Wiyasiya me tetelo woki idite natamo a:pi, mabu nale me tanalo olowimo, Godokono ubi tanalamo tudila:oa: dubate la:imano taneba magumamo diya gabodo a:popila:iya. Ebe mabuma: na ubila me tanalo ida:mo la: ma kunu kowalubilitama:, Godote a ebena epatamo dikaeamiya, modobola la: ebe nanitabokobi midi tanaloma: elawonomamo na:gowelanakiyala:

Numa:la:, ebakobako dubate Godokono nilakapo awokalimino tabo iyakobi midite negelanaka, lumagite kuba dosiyodilomene Godote wiya a:kikaemene mabu ebena nilakapo kawonomola, ega:walo iba:te na:kegelana Ya:su Kelisoko nani igilo mula:dawa:. Eiye, ebe kapiya ebe aimano nani Watodawala ega:walo Kawodawala, ebema: ibino kuba mabuma: Godokono Buka tabote iyalo tetenomolo egiya, walone iba:te ibino temeteme wiya nanitabolo kelaema:na:!<sup>5</sup> Iyo, Godote kuba osiyodilolepiatamo wiya dikalaemene, la: ebe tanalo dopamo iyatawaiyamata, wiyasiya na ubila kebe olalati tanalote Godokono Isalaela epatamo demaigiya, la: me tanalo walo na:kemalagidilala:. Numa:la:, Godote ibino igilo mula:lalamelo Isipiti opone ibi dowagailiya, walogabo apune epetapi iba:te ebe nanitabokobi ka:midiya:, ebema: ebete ibi gito anakapulamiya.<sup>6</sup> Ega:walo me tanalo idi na:kuma:la:, wagilimi mabune Unu Duliyomolono nopopi epetapiate ibino wade ilukuli duliyomolo atepate Godotamo gowelao tanalo ebo wagilimiya. Ebe mabuma: Godote ibi teteoa: auli ala:mo matuolamolete idoko magumamo gito iyalekiya, iba:te ebolo ibino kuba wiya uwatema: Godokono Kawo Egela kemakopelena:na:.<sup>7</sup> Ega:walo modobola la: Sodomu duliyomolo epo ega:walo Gomola duliyomolo epo ega:walo ibi niyakabolo dilukulionamiya ebe iyaiya duliyomolo epo ibino tanalo atumu na:kemalagidilala:. Ibi bilibilinamate atumu Godokono pukala adikamidaliya, ma kunu ibi magumulo idite iditam kateneno iyaiya kuba ubi tanalo osiyodilolenakiya. Ebe mabuma: Godote ibino kuba wiya iba:tamo ikalamiya, ebena me tetelo iba:te a:ega: ela magumulo kawo temeteme iyatawaona. Me mabuma: piyate me tetelo kuba osiyodilole magumulo dilukuliona, modobola iba:te ebe epono temeteme tanalo eba malagidilolo wadewade woki nuwatema:na: iba:te atu kuba wiya lawekapoma:.

<sup>8</sup> Ebema: piyate diya gabodo la: magumamo da:popila:iya, ebe dubate atumu ibino kateneno kuba osiyodilole ubi gabodo ibino ape ebo kubail-amenaka. Ega:walo iba:te Godotamo tudila:oma: ubia:noma: eda:olo Unu Duliyomolono nopopi ebo malogolenaka, mabu ebako amama wokino tanalate iba:tamo iyolo maimionaka. <sup>9</sup> Wiyasiya modobola la:le Unu Duliyomolono nopopino Elawodubu Maikolokono tanalo nemalagidilala:, ebena elawo kawonomola wiyasiya ebete ebe tanaloma: kamamana:. Ebema: kebe tetelo ebete Mosesekono a:e ape laema: Saitanago dapamineuiya, ebe tetelo ebete Saitanatamo malogo tabo idi gea:no negiya, “Kawodawa Godote a:ka:tuwa: ebena tabamo a:ma: kodiyoiboma:ta, wiyasiya naimano elawamo nale a:ma:tamo tanalo idi a:kosiyodilomo!” <sup>10</sup> Wiyasiya la: magumulo da:pola:na ebe dubuno tanalo eba kunua:. Iba:te Unu Duliyomolono iyaiya tanalo iyatawa:, ebema: iba:te ebe duliyomolono nopopino tanaloma: ibi malogole tabo gelana. Eiye! Iba:te kapiya tanalo iyatawanomola, ebe tanalo ebe me opono kateneno wapata:lame gabola, iyo, ibi tumu goeogoeo keba kunula:ka: eba kunula mabu iba:te wade wokia:no gito ilukuliona! Ebema: numa:la:, ibino kateneno ubi tanalate ibi nanitabolo kanakapulaema:na:.

<sup>11</sup> Iyo, Godote ibino kuba wiya iba:tamo dikalaemene ebe kuba wiya kawonomoma: keda:mene, mabu iba:te Ka:inikono gabodo tolame iyalo owagilimiya. Ega:walo ibi Ba:ilamako keba kunula:ka: eba kunula, iba:te mani kawonomamo malagidilolo kawokawo kuba tanalo ebo osiyodilolenaka. Ega:walo ibi Kolako keba kunula:ka: ebako epoma: eda:ona, ma kunu iba:te Godotamo tudila:oma: ubia:nola, ebema: nanitabola, Godote Kolakono kuba mabuma: ebe keba kunu kanakapumiyale, ebete ibi atumu kopoliyadigalemene.\*

<sup>12</sup> Numa:la:, la: nanitabokobi midipino aladabuti soliyomu bae nao tetelo, ebe dubuno tanalo wadewade bae magumulo da:pola:na ebe kuba sosowa keba kunula:ka: eba kunula, mabu bae nao magumulo ilipoa:nola, iyo, ibi a:ka:tuwa: ibi kapiya malagidilolena. Ebema: opote gagalema: deda:, ebe tetelo awate dowadaenako ebe temate gito ka:petolaema:na: wiyasiya ulamate a:kowomene, ebe dubu ibi eba kunula mabu iba:te epatamo giba kikalamolenakoa:. Ega:walo ebe dubu ibi noloa: da:imi kewala, mabu kawo siyelete da:pemene ibino dolodolo da:pemagobelegaemene damelamo gito ka:piyalekemene, iyo, ibino igilate eba kunu olopoligonomo kolopoligoma:na:. <sup>13</sup> Ebema: netewa uli tabo epetapi ebe dubuno tanalo awokalima: ba:pola:na. Dopo uli tabono tanalo ma kunula, ebe dubuno ilipo osiyodilole tanalo ebe kawokawo ulate ununomamo demaimionaka eba kunula, ega:walo uli tabo idi ma kunu itana, ebe dubu ibi idoko magumulo kalawikalawilo dowapata:lamena ebe maweke keba kunula:ka: eba kunula. Ebema: Godote ibi mabuma: kebe idoko bobo kawonomo iyalo dosiyodilolamiya, ebete ibi ebamo kanalibolemene iba:te uwomua: tetelo ebolo temetema:go ka:nilukulionama:.

<sup>14</sup> Numa:la:, A:da:mekono walone gudi bilibilinomo magumulo Inokote sebeni atu alailameno dopo dubu guduma: ediya, ega:walo ebe Godokono woki awokalimidawa idila. Ebema: me Inokote ebe kuba dubuno tanaloma: iyalo tetelo ma kunu giya, “Numa:la:, Kawodawa Godote ebena talena nopopi bilibilinomago pete, <sup>15</sup> ebete me opo epono tanalo bilibilinomo

\* **1:11:** Buka ka:la:mioledawa, a:ma: Ka:inikono tanalo iyatawama: dowagela:emene, modobola a:ma: Wagilamole Mabu Buka 4.1-16 numiye. Ega:walo a:ma: Ba:ilamakono tanalo iyatawama: dowagela:emene, modobola a:ma: Nabas Ka:la:miole 22.1-25.9 na:kumiye. Ega:walo a:ma: Kolakono tanalo iyatawama: dowagela:emene, modobola a:ma: Nabas Ka:la:miole 16.1-50 na:kumiye.

eba panagilamelelamelelo ebenu ubi tanalamo tudila:oa: epatamo kuba wiya ka:pikalaemene. Iyo, iba:te Godotamo kebe kubakuba tanalo dosiyodilole-naka ega:walo ebetamo kebe kuba tabo degelanaka, ebe iyaiya tanaloma: kuba wiyate iba:tamo nanitabolo ka:pemene.”<sup>16</sup> Ebema: modobola la: me kuba osiyodilolepino tanalo wadenomamo niyatawala:. Iba:godolo ubia: tabo gela kawonomola, ega:walo ibi a:ka:tuwa: ibino kuba ulamea:no epo epetapi kubakubapima: ka:la:minaka. Iba:te ibino kateneno ubi gabodo wapata:laema: elawoelawonomola, ega:walo ibi a:ka:tuwa: ibi walogolelo lumagi idi a:da: elemasigi gabodo demoio:ma:na:, ebe tetelo iba:te ubi niyatina ibino tabo kiyawao tanalodo ebegodone wade tanalo idi gito kelaema:.

*Yudate Nanitabokobi Midipi Elawokobi Midilima: Iyaiya Tabo Da:kiyawaiya*

<sup>17</sup> Ebema: naimano wadewade namutupiala:, Kawodawa Ya:su Kelisokono alibolepi dubate la: dopamo danaletiyala, modobola la: ebe tabo walo wadenomamo na:kemalagidilala:.<sup>18</sup> Iba:te la:tamo ma kunu geliya, “Uwomu tetelo kubakubapiate Godokono ubi tanalamo tudila:oma: ubia:noma: eda:olo ibino kateneno ubi gabodo eba wapata:lamelo la: nanitabokobi midipi kekalakalatelema:ta.”<sup>19</sup> Numa:la:, Ya:sukono alibolepino tabo nanitabola. Me kuba osiyodilolepi ibi la:imano taneba magumulo anagiyamida tanalo dosiyodilona me ebe epola, iyo, iba:te ibino kateneno ubi tanalamo eba tudila:olo, Godokono Uliyanate ibi magumulo kokolina:.

<sup>20</sup> Ebema: naimano wadewade namutupiala:, modobola la: la:imano nanitabokobi midi tanalo talenanomoma: gelawete kodakodalo eba lawelo ebo napepeonala:, ega:walo la: Godokono Uliyanano elawamo ebetamo na:towetoweonala:.<sup>21</sup> Ebene la:le Godokono nilakapo kimalagidilo magumulo dilukuliawenama, ebe tanalo atepa:no Kawodawa Ya:su Kelisokono pe tanalo nemakopelenala:. Nanitabola, ebete da:pemene la:le kebe kubakuba tanalo kosiyodilola:wenakima, ebete ebe kuba bilibilinomo egebolelame tabo pa:kiyawaote uwomua: igilo la:tamo ebo ka:pikalaema:ta.

<sup>22</sup> Ebema: nanitabokobi midi magumulo piyate kodakodalo lamota:ona:no woki netewama: deda:onaka, la: ibi nilakapolo eba malagidilolelo ibi nowalubilinakiyala:,<sup>23</sup> iyo, me modobo tete eba itanalo, modobola la: ibi Saitanakono ela magumune samonomamo nowagailiala:, iba:te ibino igilo mula: tanalo Ya:sugodone kelaema:. Ega:walo modobola la: kuba osiyodilolepi epetapi atumu nilakapolo eba malagidilolelo na:kowalubila:la:. Wiyasiya la: nanisiwale, ibi eba walubililo ibino iyaiya kuba osiyodilole tanalo kawokawoa:ma: a:kegelaema! Numa:la:, iba:te ibino kateneno kuba ubilo dosiyodilolenaka, ebe tanalo ebe ibino pupuliono inamabu keba kunula:ka: eba kunula, ebema: modobola la: ebe daleyago kaliku ubia:noma: eda:olo la:imano kotamo ako-ologiola:la:, ibino kuba daleyaya tanalote la:tamo pekapoma:.

*Yudate Leta Uwomu Apulo Godoko Moio Tabo Da:kiyawaiya*

<sup>24</sup> O nanitabokobi midipiala:, aimano Wade Elawodawa bokolina, ebe modobola la: eba a:ga:lulatelelo la:le a:ka:guda:ema. Nanitabola, ebete la: kubakuba:pima: midilitate, ebene kawo kalakalanomago ebete la: ebenu pukuilame ololo apuamo kemagaelema:ta.<sup>25</sup> Ebe kapiya ebe Godotela, ebete aimano Kawodawa Ya:su Kelisodo aimano Igilo Mula:leamedawama: eda:na. Nanitabola, ebenu amama tanalo ega:walo ebenu wade pukuilame tanalo, ebenu elawo kawonomo ega:walo ebenu kawo elawodubuno tanalo,



me tanalate dopamo wagilimi mabune ebegodolo a:pola:namiya! Ebema:  
modobola me tetelo ega:walo uwomua: uwomua: tetelo me atu tanalate ebe  
kapiyagodolo na:ka:pola:nama:na!

Me ebe naimano tabo uwomula. Taula.

## ME OPO UWOMU TETENO IYAIYA TANALO GODOTE YONETAMO DAWOKALILAMIYA

### *Me Buka Ka:la:mioledawano Kalakala Tanalo*

<sup>1</sup> Me opo duliyoumololo tete tatalilo demaimioma:na:, Ya:su Kelisote ebe iyaiya tanalo ebena wiya: wokopiatamo me bukalo awokalilamena. Nanitabola, Godote ebe tanalo Ya:sutamopamo awokalilamete, ebene ebete ebena nopodawa na ebena wiya: wokodawa Yonetamo palibi, nale ebe atu iyaiya tanalo ebegodone wadenomamo kiyatawama:.  
<sup>2</sup> Ebema: na Yonete kebe tanalo nopodawagodolo dulaimo, nale ebe iyaiya tanalo me bukamo akulolemo, iyo, kebe iyaiya tabo Godogodone natamo da:pemaimiya ega:walo Ya:sute natamo kebe nanitabo tanalo dawokalilami, nale ebe tanalo bilibilinomo a:ma: buka ka:la:mioledawatamo kiyawautamo. <sup>3</sup> Ebema: lumagite me bukano tabo deka:la:miolemene, ebete nekalakalamene! Ega:walo piyate me bukano tabo olowiote da:tudila:oma:na:, iba:te nekalakalaoma:na:! Nanitabola, Godote kebe tanalo bilibilinomo me bukalo dawokalilamena, tete tatalila ebe tanalate ka:pemaimioma:na:.

### *Yonete Sebeni Sosiatamo Nilakapo Tabo Dalibiya*

<sup>4-5</sup> Na Yonete me buka apuapuno tabo A:isiya opono sebeni duliyoumolono sosi epatamo palibolitamo.

Me opo wagilimia:no Godote dopamo okolinami, ega:walo me tetelo ebete bokolina, ega:walo ebete uwomua: uwomua: tetelo bokolinamene. Nanitabola, ebena Uliyanano sebeni apuapuate ebena Kawo Elawodawano okoli bai dopo apulo lamota:ona. Ega:walo ebena nanitabo tanalo awokalimidawa ebe Ya:su Kelisotela, ebe a:e magumune demaigiya ebe Dopodawala, ega:walo ebe me opono kawokawo elawodubu bilibilinomono Watodawala. Ebema: modobola nilakapo tanalo ega:walo milo tanalote la: nanitabokobi midipi magumulo na:pola:nama:na:, mabu ebe netewa tanalate Godogodone ega:walo ebena Uliyanagodone ega:walo Ya:sugodone la:tamo pena.

Nanitabola, Ya:sute a nilakapolo malagidiloena, ega:walo ebete a:ka:tuwa: ebena kalimamo a aimano kuba osiyodilole magumune wagaite, <sup>6</sup> ebena Kawo Elawodawano duliyoumolo epoma: a:midiya, ale uwomua: tetelo ebena Nabiwi Godokono woko kosiyodilonama:. Ebema: modobola amama tanalo kawonomote ega:walo elawo tanalo kawonomote Ya:su Kelisogodolo uwomua: uwomua: tetelo na:pola:nama:na:! Me tabo nanitabonomola, taula!

<sup>7</sup> Umu numita:la:, ebete tema magumudo pemaigita! Ebema: me opo epo bilibilinomate ebe ibino balida:mo kuima:na:, ega:walo piyate ebe eba anakapumilo balalo kiliba:mo dawamidiya iba:te ebe atumu ka:kuima:na:, iyo, me opo kawonomolo dilukuliona ebe epo bilibilinomate ibino iyaiya tama taneba magumulo ebe eba tolemelo kawonomamo ebo kiimitama:na:. Ebema: modobola ebe tetete nanitabolo nemaigamene!

<sup>8</sup> Kawodawa Godote negena, “Na Wagilimi Mabula ega:walo na Uwomula!” Nanitabola, ebe Elawodawanomola, ebete me opo wagilimia:no dopamo okolinami, ega:walo ebete me tetelo bokolina, ega:walo ebete uwomua: uwomua: tetelo bokolinamene!

### *Yonekono Balidite Iyama: Eba Eda:omelo Ya:suko Dumiya*

<sup>9</sup> Na Yonetela, a nanitabokobi midipino kapiya alailame magumulo na ekawi idila. Iyo, na ega:walo la:, a piyate Ya:suko waloma:ta mabuma: kawokawo temeteme magumulo kapimiya dilukulionama:, a ebe epola, wiyasiya a ebenu Kawo Elawodawano duliwomolo epoma: eba eda:onalo aimano tepo magumu kodakodailamete elawoa:noma: keda:ona:.

Nanitabola, nale Godokono iyaiya tabo ega:walo Ya:sukono nanitabo tanalo epatamo da:kiyawaonakomo, ebema: Loma gabamaniate na lawenete kewa: kolomono Pa:tamoso mamoko da:pesamo aliboniya nale naimano kuba wiyama: woko ebolo ka:nosiyodilonama:. <sup>10</sup> Ebene tete idilo, ale kebe egelalo Kawodawa Ya:suko damamatenakoma:, ebe egelalo ebenu Uliyanano elawamo naimano balidite iyama: deda:onami naimano ginimi apulo ebenu tabo madodo kawonomo olowimo, tutele diyamo keba kunula:ka: eba kunula. <sup>11</sup> Ebete natamo ma kunu gi, “A:ma:le naimano elawamo dulama:wenakomene ebe tanalo bilibilinomo kapiya bukamo akulola:wete, ebenu ebe buka Epesese ega:walo Samena, Pegamama ega:walo Tayataila, Sadisi ega:walo Piladelapiya ega:walo Lodosiya, me sebeni duliwomolamo nalibiye ebe duliwomololo dilukuliona ebe sosi epo bilibilinomate keka:la:miolema:.”

<sup>12</sup> Ebene potele natamo tabo degi, nale ebe dawa uima: dolobigimo, wiya kawokawo golodo alo sebeni eba ulamitalo <sup>13</sup> ibi tetenomolo ebete utitalo ebo uimo. Ebe dawano ololo me opo lumagino ololo keba kunula:ka: eba kunula, ebenu ebete da:puli ebe ga:ga: kalikute damela ologi, ega:walo ebenu bodolo tetelo ditameni ebe gabigabi ebe wiya kawonomo golodo inamabula. <sup>14</sup> Ebene ebenu wato ega:walo eke keyakeya-ibinomola, egelano pukuilame tanalo keba kunula:ka: eba kunula, ega:walo ebenu balidite ela menamu wamotemiti. <sup>15</sup> Ebene ebe dawano agowate alonomoma: eda:omi, iyo, wokodawate iyanomo auli inamabuno daleya elamo demadolaemene, ebenu ela magumune wagalite kalikamo eba iya:da:lo a:la:ulinomoma: da:midinako, ebenu agowate eba kunu a:la:uliomiti, ega:walo obo kawonomote degenapenako ebenu tabo madodo eba kunula. <sup>16</sup> Ebene ebenu tumudi kotolo sebeni maweke na:pola:meni, ega:walo ebenu tabo magumune kiyoiyo ilo gilite pemaigi, ega:walo egela tuli tetelo egelate keba kunu ka:pukuilamitanakole ebenu ololono pukuilame tanalo eba kunula.

<sup>17</sup> Ebema: nale ebe Kawodawa duimo, nale ebenu agowa mabuamo gito adogelimo, a:e lumagi keba kunula:ka: eba kunu. Ebe tetelo ebete ebenu tumudi kotamo na eba ologinilo negi, “A:ma: akotoletola:la:, na Wagilimi Mabula ega:walo na Uwomula. <sup>18</sup> Iyo, na uwomua: tetelo dokolinamo ebe Kawodawala, mabu nale da:iyamo igilo walo a:kelawiyamo, ebe igilote uwomua: uwomua: tetelo a:kolopoligonamene, ebema: nagodolo elawo kawonomo bitana nale A:elaopino Duliwomolono gigiyu a:iyamidate epo epetapi ebamo kanalibolema: ega:walo epo epetapi ebe duliwomolone igilamo kowagailima:. <sup>19</sup> Ebema: modobola a:ma:le nagodolo dulama:emene ebe tanalo bilibilinomo bukamo nakuloliye, iyo, kebe tanalate me tetelo demaimioma:na: ega:walo walone tetelo demaimioma:na: ebe tanalo bilibilinomo a:imano bukalo nawokalilamiye. <sup>20</sup> Ka:lo a:ma:le naimano kotolo dulama:wita me sebeni maweke, ega:walo nale tetenomolo dutitamome sebeni golodo alo, ebe netewa tanalono magumute me opo epatamo waminalo pola:na. Wiyasiya numa:, ebe tanalono magumu nale a:ma: ma kunu iyatuimata, sebeni maweke ibi A:isiya opono sebeni sosi tanebapino nopopila, Godote ebe nopopi iyalo aliboliya iba:te ebe sosi epo wadenomamo ka:buiyalatelenama:, ega:walo sebeni alo ibi sebeni duliwomolono nanitabokobi midipino iyaiya tanebala.”

## 2

### *Ya:sute Epesese Sosi Epatamo Tabo Dalibiya*

<sup>1</sup> Ebene Kawodawate tabo walo natamo na:kegi, “Modobola a:ma: Epesese sosi nopodawatamo tabo ma kunu naliba.

Na ebe sebeni maweke tumudi kotamo uwatedawala, ega:walo na ebe sebeni golodo alo magumulo pata:dawala, ebema: nale la: Epesese nanitabokobi midipiatamo tabo ma kunu kiyawautamo. <sup>2</sup> La:le dosiyodilola:wenakoma ebe iyaiya tanalo na iyatawala, ma kunu la:le kodakoda woko eba osiyodilonalo temeteme duwata:wenakoma, la:imano tepo magumu kodakodailama:wete elawoa:noma: keda:wena:. Ega:walo na iyatawala, la:le kuba osiyodilolepino tanalo ubia:noma: eba eda:onale, piyate ibi a:ka:tuwa: ibi naimano alibolepima: a:da: elemasigi gabodo degelana, la:le ibino tanalo wadenomamo ulamelelama:wete ibino a:da: elemasigi tanalo ebo awokalilamenakomata. <sup>3</sup> Iyo, la:le na mabuma: kawokawo temeteme eba uwatenalo, wiyasiya la:imano tepo magumu kodakodailama:wete naimano woko osiyodiloma: elawoa:noma: keda:wena:.

<sup>4</sup> Na wiyasiya la:godolo me kapiya modoboa: tanalo numinamo, la:le dopamo tetelo idite idi nilakapolo kawonomamo keba kunu kemalagidilawenakima, la: ebe tanalo atepimata. <sup>5</sup> Ebema: numa:la:, la:imano nanitabokobi midi magumulo la:le guda:wete kebe wade tanalo katepaima, ebe tanalo walo kemalagidilawete la:imano kuba osiyodilole magumune olobila:wete, la:le dopamo dosiyodilola:wenakima ebe wadewade tanalo osiyodilole walo na:kowagilimiyala:. Nanitabola, la:le kuba osiyodilole magumune olobila:oa:no, nale pete la:imano kuba wiya la:tamo eba pikalanelo la:imano alo iyabaiamo gito ka:piyatilaemamota.

<sup>6</sup> Wiyasiya numa:la:, kapiya tanalote la:godolo modobolo ditana ebe tanalo ma kunula, piyate Nikolayasiko waloma:tapima: deda:ona, la:le ebe kuba osiyodilolepino tanalo ubia:noma: kawonomamo eda:onomata, nale ibino tanalo ubia:noma: keba kunu keda:nama eba kunu.

<sup>7</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia! Nanitabola, piyate ibino nanitabokobi midi tanalo magumulo wato kikopu delaema:na:, nale iba:tamo modobo tabo kegemamo, iba:te Godokono Pali magumulo da:ena ebe kewano uwomua: igilo da:imi kenaoma:.”

### *Ya:sute Samena Sosi Epatamo Tabo Dalibiya*

<sup>8</sup> Ebene Kawodawate tabo walo natamo na:kegi, “Modobola a:ma: Samena sosi nopodawatamo tabo ma kunu naliba.

Na ebe Wagilimi Mabula ega:walo na ebe Uwomula. Nale da:iyamo igilo walo a:kelawiyamo, ebema: nale la: Samena nanitabokobi midipiatamo tabo ma kunu kiyawautamo. <sup>9</sup> La:le na waloma:ene mabuma: kawokawo temeteme magumulo dilukula:wenama, nale ebe tanalo iyatawala. Ega:walo na me tanalo idi iyatawala, la:le inamabua:no gito dilukula:wenama wiyasiya la: Godokono Unu Duliyomololo inamabu bilibila:gopima: eda:onomata. Ega:walo piyate a:da: elemasigi gabodo ibi a:ka:tuwa: ibi Yu epoma: gelalo la: kuba osiyodilolepima: deka:la:mitana, nale ibino kuba tabo gela tanalo iyatawala, iyo, ibino tanalo ma kunula, ibi Saitanakono taneba epola, Godokonoa:! <sup>10</sup> Ebema: la:le tete tatalilo

delawa:ema ebe kawo temetemema: akotoletoleala: Nanitabola, Saitanakono wokopiate la: epetapi idoko motamo da:niyaleketamene, ebe tetelo Godote la:imano nanitabokobi midi tanalo wabudililo ma kunu kulamelelaema:ta, da: nanitabola: o da: nanitaboa: Ebene la:le na waloma:ene mabuma: teni egelamo kawokawo temeteme eba uwatelo, la:imano nanitabokobi midi magumulo kodakodalo nelamota:oniyala: Diyala, la: epetapi na mabuma: da:ba:na:elaoma, wiyasiya nale la:tamo uwomua: igilo wiya ebo kikalaemamota.

<sup>11</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia! Nanitabola, piyate ibino nanitabokobi midi magumulo wato kikopu delaema:na:, iba:te Ela Opono a:e temeteme a:kiyatawaoma:na:, ebe opolo nanitabokobi midia:pino a:elao uliyanate a:e temeteme magumamo walo ka:ka:nopila:oma:na:.”

### *Ya:sute Pegamama Sosi Epatamo Tabo Dalibiya*

<sup>12</sup> Ebene Kawodawate tabo walo natamo na:kegi, “Modobola a:ma: Pegamama sosi nopodawatamo tabo ma kunu naliba.

Na ebe kiyoiyo ilo gila:go dawala, ebema: nale la: Pegamama nanitabokobi midipiatamo tabo ma kunu kiyawautamo. <sup>13</sup> La:le kebe duliyoumololo kilukula:wenama ebe duliyoumolono tanalo na iyatawala, ma kunu ebe duliyoumolo epate Saitanako ibino kawo elawodawama: midina. Wiyasiya la:imano tanalo iyanomola. La:le na kodakodalo lawenelo na nanitabokobi eba midininalo elawoa:noma: keda:wena:, ebema: naimano tabo nanitabolo da:kiyawaonaki, ebe dubu A:ntapasiko Saitanakono duliyoumolo epate ebe lawete danakapumiya, la:le ebe tanalo uma:wete la:imano nanitabokobi midi tanalo katepawea:

<sup>14</sup> Na wiyasiya la:godolo kapiyakapiya modoboa: tanalo nulamenamo. Dopo tanalo ebe ma kunula, la:imano nanitabokobi midi magumulo epetapiate kuba osiyodilodawa Ba:ilamakono iyatulame gabodo ebe waloma:tana. Iyo, Isalaela epono ewonino tetelo ebe dubute Kawo Elawodubu Balakako iyatumiya, ebete naimano epago eba gowelaolo ibi Saitanakono gubi magumamo kemagatalema: Ebema: Balakate ibi ma kunu kubailamiya, ebete ibi kuba gabamo wabuga:talelo nanitabokobi midia:piate ida:da:lino uliyana eba amamalatelelo kalimagono inamabu iba:tamo dikalamiya, naimano epate ebe katene ebo naiya. Ebe atu tetelo iba:te ibino kuba ubi tanalamo eba tudila:olo, buwelemele pilo tanalo ega:walo kamiyale pilo tanalo ebo osiyodiloliya.

<sup>15</sup> Ega:walo la:imano kuba tanalo idi ma kunula, la: epetapi Niko-layasikono kuba iyatulame gabodo wapata:lamenamata. <sup>16</sup> Ebema: modobola la: la:imano kuba osiyodilole magumune nolobila:la:, mabu nanitabola, la: magumulo piyate natamo walo olobila:oa:no, tete tatalila nale pete naimano tabo magumune da:pemaigana ebe ilo gila:mo ibi kapalukolemamo.

<sup>17</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia! Nanitabola, piyate ibino nanitabokobi midi magumulo wato kikopu delaema:na:, nale Godokono wamina magumulo ditana ebe bae iba:tamo kikalaemamo, ebe igilo baeno mailo idi ebe ma:nala, ega:walo nale ibi bilibilinomatamo keyakeya nokola egege ibino olioli mailagono kikalaemamo. Ebe tetelo ibi magumulo epetapiate iyatawaoa:no, idawate ebenu mailagono nokola



kelawe, idawate ebenu mailagono nokola kelawe, iba:te eba kunu eba wagelelo ibino wadewade wiya nagodone ebo kuwatema:na.”

*Ya:sute Tayataila Sosi Epatamo Tabo Dalibiya*

<sup>18</sup> Ebene Kawodawate tabo walo natamo na:kegi, “Modobola a:ma: Tayataila sosi nopodawatamo tabo ma kunu naliba.

Na ebe Godokono Gudula, naimano balidite ela menamu wamotena-mena ega:walo naimano agowate alonomoma: eda:onamena. Iyo, wokodawate iyanomo auli inamabuno daley a elamo demadolaemene, ebenu kalikamo iya:da:te a:la:ulinomoma: da:midinako, naimano agowano a:la:ulio tanalo eba kunula. Ebema: nale la: Tayataila nanitabokobi midipiatamo tabo ma kunu kiyawautamo. <sup>19</sup> La:le dosiyodilola:wenakoma na ebe iyaiya tanalo iyatawala. Iyo, la:imano nilakapo kimalagidilo tanalo, ega:walo la:imano nanitabokobi midi tanalo, ega:walo la:le natamo woko dosiyodilawenama ebe tanalo, ega:walo temeteme magumulo la:le la:imano tepo magumu da:kodakodailama:wenama ebe tanalo, nale ebe tanalo bilibilinomo iyatawala. Ebema: nanitabola, la:le me tetelo dosiyodilola:wenakoma me wadewade tanalate la:le dopamo dosiyodilola:wenakoma ebe wadewade tanalo nodoilina.

<sup>20</sup> Na wiyasiya la:godolo kapiya modoboa: tanalo numinamo, la:le kuba Kawo Elawo Kamiyale Yesebelakono kuba osiyodilole tanalo gito ulama:tepalemenakomata. Ebe a:ka:tuwa: ebe Godokono woki awokalimidawama: a:da: elemasigi gabodo gena, ebema: ebete eba kunu naimano wiya: wokopi epetapi kuba gabamo wabuga:talena. Iyo, ibi epetapiate ebenu iyatulame tanalamo eba tudila:olo buwelemele pilo tanalo ega:walo kamiyale pilo tanalo ebo osiyodilolenaka, ega:walo nanitabokobi midia:piate ida:da:lino uliyana amamalatelelo kalimagono inamabu dikalamolenaka, ibi epetapiate ebe katene gito naonaka. <sup>21</sup> Eiye, nale ebe kamiyaletamo tete ikamenapimo ebete ebenu kuba osiyodilole magumune natamo kolobigama:, wiyasiya ebe ubia:nola dubu bilibila:go pata: tanalo atepama:! <sup>22</sup> Ebema: umu numita:la:, ebenu kuba osiyodilole mabuma: nale kawo gabugabu ebetamo kanalibomamo, ega:walo eba:go kateneno kuba ubi gabodo dowapata:lamena nale ebe dubu bilibila:tamo kawokawo temeteme tanalo atumu ka:kikalaemamo, iyo, iba:te ibino kuba osiyodilole magumune olobila:oa:no ebe wiyate iba:tamo ka:pemene. <sup>23</sup> Nanitabola, piyate ebe kamiyale dowaloma:tana nale ibi kanakapulaemamo, ebema: sosi epo bilibilinomate me tanalo kiyatawaoma:na:, nale epono tepo magumuno woki iyatawanomola, ega:walo nale ibi bilibilinomono tanalo eba anagilamelelamelo wiya iba:tamo modobolo kikalaemamo.

<sup>24</sup> Wiyasiya kalakala kawonomola, la: Tayataila nanitabokobi midipi epetapiate Yesebelakono a:da: elemasigi iyatulame tanalamo ka:tudila:wena:, ebema: ebenu waloma:tapiate kebe iyaiya iyatawa tanalo Saitanakono waminale tanaloma: degelana, la:le ebe kubakuba tanalo la:imano wokiamo iba:godone kuwata:wena:. Ebe mabuma: naimano kalakalate la:tamo nanitabolo eba itanalo, me totomu tabo kapiyanomo la:tamo ikalaemata, <sup>25</sup> modobola la: la:imano nanitabokobi midi tanalo kodakodalo nowatila:mota:onala: naimano pe uwomuamo. <sup>26-28</sup> Nanitabola, piyate ibino nanitabokobi midi magumulo wato kikopu eba lawenalo naimano pe uwomuamo natamo da:tudila:onakoma:na:, nale iba:tamo Gugi Mawele ega:walo elawo kawonomo ikalamete, ebenu iba:te me opo epo bilibilinomono watowatopima: beda:onama:na:. Iyo,

iba:te elawo kawonomo kelaema:na; nale Nabiwi Godogodone elawo keba kunu kelawiyamo eba kunu, ebene me opo epo magumulo piyate ebene tuputupu okoli tanalamo tudila:oma: ubia:noma: deda:ona, iba:te ebe kuba osiyodilolepiatamo kuba wiya eba ikalamolelo auli gaubamo ebo kalukolema:na. Nanitabola, lumagite gebetamo osiyodilo kalili opamo deba:idilo keba kunu keta:ta:puolenakole, kebe dawate naimano wokopiatamo tuduwatama: ubia:noma: deda:mene, ebete eba kunu gito ka:kubamene.

<sup>29</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia!”

### 3

#### *Ya:sute Sadisi Sosi Epatamo Tabo Dalibiya*

<sup>1</sup> Ebene Kawodawate tabo walo natamo na:kegi, “Modobola a:ma: Sadisi sosi nopodawatamo tabo ma kunu naliba.

Na ebe sebeni mawele uwatedawala, ega:walo Godokono Uliyanano sebeni apuapuate naimano ubi tanalamo a:tudila:onaka, ebema: nale la: Sadisi nanitabokobi midipiatamo tabo ma kunu kiyawautamo. La:le dosiyodilola:wenakoma nale ebe iyaiya tanalo iyatawala, ma kunu epetapiate la: nanitabo igilago nilukulinamu gelana, wiyasiya nanitabo tanalo ma kunula, la: la:imano nanitabokobi midi magumulo iyalo a:elaimata! <sup>2</sup> Ebema: a:elaopiala; modobola la: nagodone igilo walo kelawa:wete la:imano ilukuli magumulo da:elaona ebe iyaiya tanalo na:ka:kodakodailama:la; mabu nale kebe Kawodawatamo da:tuduwatanamo, ebe Godote la:imano nanitabokobi midi woko osiyodilole tanalo dulamelelametana ebete wadewadenoma: kegena. <sup>3</sup> Ega:walo naimano wokopiate la: kebe iyaiya tanalo kiyatulametankiya, modobola la: ebe tanalo walo eba kemalagidilolelo la:imano kuba osiyodilole magumune olobila:wete ebe iyatulame tanalamo walo na:ka:tudila:oala. Wiyasiya la:le nagodone igilo walo lawea:no, la: iyatawa: tetelo nale la:tamo kuba wiya ikalaema: ka:pemamo, pilo dubute epono inamabu uwatema: keba kunu ka:penakole eba kunu.

<sup>4</sup> Wiyasiya Sadisi nanitabokobi midipiala; la: magumulo kapiyakapiyate iyaiya kuba osiyodilole tanalo kiyatawaona. Ibino tuputupu ilukuli tanalo ebe wadewade daleya: kaliku keba kunula:ka: eba kunula, ebema: iba:te naimano Kawo Elawodawano duliynomolamo da:nemaimioma:na; nale iba:tamo pupuliono wadewade keyakeya inamabu ikalamolete, ebe tetene wagilimite iba:te nago bowapata:lamenakoma:na. <sup>5</sup> Nanitabola, piyate ibino nanitabokobi midi magumulo wato kikopu delaema:na; iba:te nagodone ebako wadewade keyakeya kaliku kuwatema:na; ebene nale naimano Nabiwi ega:walo ebene nopopino ololo apulo awokala kegemamo ebe epo ebe naimano nani waloma:tapila, iyo, nale ibino mailo naimano Igilo Bukane a:kegebolelaemo.

<sup>6</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia!”

#### *Ya:sute Piladelapiya Sosi Epatamo Tabo Dalibiya*

<sup>7</sup> Ebene Kawodawate tabo walo natamo na:kegi, “Modobola a:ma: Piladelapiya sosi nopodawatamo tabo ma kunu naliba.

Na ebe Talenadawanomola ega:walo na ebe Nanidawanomola, ega:walo Kawo Elawodubu Da:ibidigodolo dopamo ditanami ebe atu kite nagodolo ba:kitana, ebema: nale ebe kiamo kebe gigiyu da:iyamidamo lumagi idite a:kemopimene, ega:walo nale ebe kiamo kebe gigiyu demopimo lumagi idite a:ka:iyamidamene. Ebema: nale la: Piladelapiya nanitabokobi midipiatamo tabo ma kunu kiyawautamo. <sup>8</sup> La:le dosiyodilola:wenakoma nale ebe iyaiya tanalo iyatawala, ma kunu la:le naimano woko osiyodilo magumulo la:imano elawote nanitabolo kolopoligona:, ega:walo na iyatawala epetapiate na mabuma: kawokawo temeteme la:tamo dikalametia, la:le naimano iyatulame tanalamo eba tudila:olo nanitabokobi midi tanalo katepawea:. Ebema: na la:tamo gigiyu a:iyamidalaemata, idawagodolo elawo kitana: walo ka:kemopima:.

<sup>9</sup> Umu numita:la:, piyate ibi a:ka:tuwa: ibi Yu epoma: a:da: elemasigi gabodo degelana, ibi Saitanakono taneba epola, Godokonoa:. Ebema: nale ebe a:da: elemasigipi uwatete la:tamo kemagaelemamo iba:te la:imano agowa mabuamo ka:pa:tudila:oma:, iyo, me osiyodilo tanalodo nale ibi ma kunu kiyatulaemamo, nale la: nilakapolo kawonomamo demalagidilole-tanama.

<sup>10</sup> Nanitabola, la:le na waloma:ene mabuma: temeteme eba uwa-telo wiyasiya la: naimano tabamo tudila:wete elawoa:noma: keda:wea:, ebe mabuma: nale me opo epo kubailaema: dapalibolemo, ebe kawokawo temetemenomo magumulo nale la: eba itakeamidalelo la:imano nanitabokobi midi tanalote a:ka:kubakubaoma:na:. <sup>11</sup> Iyo, tete tatalila nale me opamo ka:pemamo, ebema: modobola la: la:imano nanitabokobi midi tanalo kodakodalo nowatila:mota:onala:, idawate la:imano wadewade wiya pilo gabodo uwatelamekapoma:. <sup>12</sup> Nanitabola, potele ebena nanitabokobi midi magumulo wato kikopu delaemene, nale ebe lawete Godokono moto eteno wade aboma: eba midilo ebo kaimamo, ebene ebete ebe motono aboma: eba utinalo uwomua: uwomua: tetelo idawate ebe a:kemagoba:namene. Ega:walo ebe lumagi kowalagonama: nale naimano oli mailo ega:walo naimano Kawodawano mailo ega:walo ebena Kawo Elawodawano duliymolono mailo ebe unamo kakulolemamo. Nanitabola, naimano Kawodawa ebe Godotela, ega:walo oli Yelusalema duliymolote ebena Kawo Elawodawano duliymoloma: keda:ma: Unu Duliymolone me opamo ka:piwisigamene.

<sup>13</sup> Ebema: galagodawa, Godokono Uliyanate sosi epatamo da:kiyawauta, modobola a:ma: ebe tabo nolowia!”

### *Ya:sute Lodosiya Sosi Epatamo Tabo Dalibiya*

<sup>14</sup> Ebene Kawodawate tabo walo natamo na:kegi, “Modobola a:ma: Lodosiya sosi nopodawatamo tabo ma kunu naliba.

Na ebe Godokono Uwomu Tabo Kiyawaodawala, ega:walo na ebe Godokono nanitabo tanalo wadenomamo dawokaliminamo ebe dawala. Ega:walo Godote me opono inamabu bilibilinomo dosiyodiloliya, na ebe woko osiyodilo tanalono Elawo Mabudawala, ebema: nale la: Lodosiya nanitabokobi midipiatamo tabo ma kunu kiyawautamo. <sup>15</sup> La:le dosiyodilola:wenakoma na ebe iyaiya tanalo iyatawala, ma kunu la:imano nanitabokobi midi magumulo la: gibagiba ega:walo enaena tetenomolo pola:namata. O sosi epala:, naimano ubi kawonomamo itana la: elanomoma: neda:iyala:, wiyasiya la: ubia:noma: deda:wenama modobola la: na atepana:wete gibagibanomoma: neda:iyala:!<sup>16</sup> Nanitabola, mabu la: la:imano osiyodilole magumulo gibagibadopoma: eda:onamata,

ebe mabuma: nale la: bilibilinomo naimano tabo magumune iyabaiamo ka:nedalopeamidalemamota!

<sup>17</sup> O sosi lumagi, a:ma: ma kunu genata, ‘Na inamabu bilibili-dawala ega:walo na inamabu bilibilinomo modobolo uwatenamo, ebema: nigologolo tanalo idite natamo a:ka:pemene.’ Wiyasiya a:imano tabo ge magumulo a:ma:le a:imano nanitabo tanalo kiyatawawena:, ma kunu a:ma: nigologolo gudumu okolinata ega:walo walone tetelo a:ma: atumu nigologolo tanalo magumulo ka:lutama:ta. Iyo, naimano umi magumulo a:ma: inamabu bilibila:godawa:, ega:walo a:ma: kikopiya pata:nata, ega:walo a:ma: balidi tamiodawalata. <sup>18</sup> Ebema: nale naimano wade wokino tanalamo a:ma: anamata, a:ma:le natamo pa:wete, nale epatamo kolowaema: da:midilinakomo ebe wadewade inamabu wiyamo na:puwatiye. Iyo, eba kunu a:ma:le dogodogodawanomoma: keda:ema:, modobola a:ma: wade golodo inamabu nagodone na:pelawiye, nale ebe golodo elamo wade a:la:ulinomoma: a:midimo. Ega:walo a:ma:le kikopiya okoli ilipo tanalo katepaema:, modobola a:ma: wade keyakeya kalikunomo nagodone na:puwatiye. Ega:walo a:ma:le a:imano tamio balidi wadekobi ka:midilimitama:, modobola a:ma: abutilameno wade mulamula nagodone na:pelawiye. <sup>19</sup> Ebema: a:ma: me taboma: ubia:noma: akoeda:la:, wiyasiya a:imano nanitabokobi midi tanalo kodakodaima:wete kuba osiyodilole magumune natamo nanitabonomolo nolobigiye, mabu nanitabola, nale kebe gudi nilakapolo demalagidilolenamo, ebe guda:te naimano nanitabo gabo kiyatawaoma: nale tete epetapilo ibi kawiya analenakomo ega:walo tete epetapilo ibi temeteme tanalamo iyatulamenakomo.

<sup>20</sup> Umu numita:la:, na gigiyu tetelo putite gigiyu ebe panakamitamo, ebema: lumagite naimano tabo olowite natamo gigiyu da:iyamidamene, na ebetamo opegate, ebene ebe ega:walo na, a bae kapimiya kenaomalema:. <sup>21</sup> Nanitabola, piyate ibino nanitabokobi midi magumulo wato kikopu delaema:na:, nale iba:tamo elawo kikalaemamo iba:te naimano Kawo Elawodawano okoli bailo nago kilukulima:, dopamo nale wato kikopu delawiyamo, ebe tetelo nale naimano Nabiwa:go kapimiya kokolioma: ebete elawo natamo keba kunu kikanamiyale eba kunu.

<sup>22</sup> Ebema: galagodawa, Godokono Uliyanate sosi epatamo da:k yawauta, modobola a:ma: ebe tabo nolowia!”

## 4

### *Yonete Godoko Ebeno Kawo Elawodawano Okoli Bailo Okolitalo Dumiya*

<sup>1</sup> Ebene Kawodawagodone me tanalo bilibilinomo olowio dolopoligi, ebe tetelo naimano balidite iyama: deda:onami ebe tanalote olopoligoa:no, nale Unu Duliynomolono gigiyu aligilitanalo ebo uimo.

Ebene nale dopamo dolowimo ebe atu tabo madodote natamo walo na:ka:pi, ebe tabo ebe tutelenu diyamo keba kunula:ka: eba kunula. Ebema: nale tabo ma kunu olowimo, “A:ma: natamo na:podola. Tete tatalilo da:pemaimioma:na: ebe iyaiya tanalo nale a:ma: kiyatumiomamota.” <sup>2</sup> Ebe tetelo Godokono Uliyanano elawote na unamo eba piwisigalo, nale Kawodawa ebeno Unu Duliynomolono Kawo Elawodawano okoli bailo okolitalo ebo uimo. <sup>3</sup> Ebe dawano Kawo Elawodawano okoli bai a:la:uwa:da:le molemabute anagogobeyamidadi, ega:walo ebeno ololo alonomoma: eda:mi, egelate kawonomamo eba pukuilamitalo wadewade gedo nokola ega:walo kalimakalima nokola iba:te keba kunu ka:la:uwa:da:olitanake

eba kunu. <sup>4</sup> Ega:walo nale 24 kawokawo elawodubu epetapino ilukuli baite Kawodawano okoli bai anakopa:midalo eba pola:nalo ka:nulaimo, ebe ilukuli bai unamo 24 Watowatopiate ilukuliya, iba:te keyakeya kaliku pupulite ega:walo kawokawo elawodubuno golodo kelekele inamabu watamo a:ka:pupuliya. <sup>5</sup> Ebene Kawodawano okoli baine tobolono iyaiya gewataole tanalo ega:walo mole a:la:uwa:midaole tanalate maimiutiya, ega:walo ebe okoli bai dopo apulo sebeni wuiki alo pio na:pola:ni, me alo ibi Godokono Uliyanano sebeni apuapula. <sup>6</sup> Ebene Kawodawano okoli bai dopo apulo alonomo obo paka: kawonomote itani, ebe obono a:la:uwa:da:le wadenonomola.

Ebe tetelo nale Kawodawano okoli bai tametamelo Unu Duliyomolono netewa-netewa Elawo Nopopi Iyanomate lamota:onalo kulaimo, ibino ololo apulo ega:walo ginimi apulo balidi bilibilinomate na:pola:lameni. <sup>7</sup> Ibi magumulo dopo nopodawano ololo ebe layono-gaa keba kunula:ka: eba kunula, ega:walo idino ololo ebe kalitagono kau-goeono ololola, ega:walo idino ololo ebe opo lumagino ololola, ega:walo uwomu nopodawano ololo ebe tobolo unudo da:wa:lubianako ebako wali olano ololola. <sup>8</sup> Ebe netewa-netewa Nopopi Iyanomo ebe tamuagopila ega:walo balida:gopila, ebema: iba:godolo sikisi tamuatae pola:lameni, ega:walo ibino balidi bilibilinomate unu tamalo ega:walo magumu apulo atumu na:ka:pola:lameni. Nanitabola, egela ega:walo idoko bilibilinomolo iba:te Kawodawa amamate olopoligo-lamea:no, nale ibino tabo madodo ma kunu olowimo,

“Godoko ebe Kawodawa Elawonomodawala,  
 ebe talenala, iyo, ebe talenanomola,  
 ebe talenadawanomola!  
 Potele dopamo dokolinami,  
 ega:walo me tetelo dokolina,  
 ega:walo uwomua: tetelo dokolinamene,  
 ebe ebe Igilodawala!”

<sup>9</sup> Nanitabola, ebe Kawodawate uwomua: uwomua: tetelo ebenu Kawo Elawodawano okoli bailo dokolinamene, ebe mabuma: ebe Elawo Nopopi Iyanomate ebe amamate atepa:no, ebe eba walogonalo ebenu mailo unamo adipatelo kalakala tabo ebetamo ebo gelanaka. <sup>10</sup> Iyo, mabu Kawodawate uwomua: uwomua: tetelo ebenu Kawo Elawodawano okoli bailo dokolinamene, ebema: Elawo Nopopi Iyanomate ebe eba amamatenalo atu tetenomolo 24 Watowatopiate ibino watamo da:pupulinaka, iba:te ebe kawokawo elawodubuno kelekele inamabu Kawodawano okoli bai dopo apuamo eba niyalekelo, ibino ololo opamo alomote ebe amamatelo ma kunu gelanaka,

<sup>11</sup> “Aimano Kawodawa Godo,  
 modobola Unu Duliyomolono nopopi ega:walo  
 epo bilibilinomate a:ma: nowalogoma:ta,  
 ega:walo a:imano mailo unamo nadipatema:na;  
 ega:walo a:imano elawo tanalamo na:tudila:oma:na!  
 Mabu opo ega:walo tobolo ununo inamabu bilibilinomo  
 a:ma:le osiyodiloliyata,  
 iyo, a:imano ubi tanalodo  
 me inamabu bilibilinomate pawokalaiya!”



## 5

*Godokono Sipi-goeo Da:peso Kapiyate Mokopiamida Pepa A:iyamidama: Modobola*

<sup>1</sup> Ebema: naimano balidite iyama: deda:onami ebe tanalote olopoligoa:no, Kawodawate ebene Kawo Elawodawano okoli bailo eba okolitalo, nale ebene tumudi apu kotolo pepa mokopiamida ebo uimo, dopamo lumagite ebe pepano magumu apuamo ega:walo unu apuamo iyaiya tabo akulote, ebene ebete mokopiamidate sebeni ala:mo gito matuomeiya. <sup>2</sup> Ega:walo nale Godokono elawo nopodawanomo idi kuimo, ebete ebene tabo madodo unamo adipatelo negi, “Potele modobola:ka: me mokopiamida pepano ale iyailite, pepano tabo apuapu ulamolema:?” <sup>3</sup> Wiyasiya ebe tetelo Godokono Unu Duliyomololo ega:walo opo duliyomololo ega:walo A:elaopino Duliyomololo modobo lumagi idite ka:luta: ebe mokopiamida pepa a:iyamidate pepano iyaiya tabo ulaema:

<sup>4</sup> Ebema: nanitabola, me tanaloma: nale kawonomamo iimo mabu modobo lumagi idi ka:luta: mokopiamida pepa a:iyamidama:. <sup>5</sup> Ebe tetelo 24 Watowatopi magumulo idite natamo negi, “A:ma: kiitala:! Numa:, Yuda gudawano Layono-gaa ba:luta! Ebe Da:ibidikono walonepi magumulo Kawo Elawodawama: eda:na, ega:walo ebete wato kikopu iyalo elawiya. Ebe mabuma: ebe modobola me mokopiamida pepano sebeni ale iyailite pepa a:iyamidama:.”

<sup>6</sup> Ebema: nale Kawo Elawodawano okoli bai niyakabolo Sipi-goeo Da:peso utitalo uimo, ega:walo netewa-netewa Nopopi Iyanomate 24 Watowatopi-ago ebe anakopa:midalo eba pola:nalo ebo kulaimo. Ebe epate danakapumiya ebe sipi-goeo da:peso keba kunula:ka: eba kunula. Ebe sebeni kalitagonola ega:walo sebeni balida:gola, ebema: nanitabola, ebe sebeni kalita ega:walo sebeni balidi ebe Godokono Uliyanano sebeni apuapula, ebete ebe Uliyana iyalo tetelo opo duliyomolo kawonomamo apalibiya. <sup>7</sup> Ebe tetelo Sipi-goeo Da:pesote Kawo Elawodawano okoli baiamo tote ebene tumudi apu kotone mokopiamida pepa ebo nelawi. <sup>8</sup> Ebene ebete ebe tanalo dosiyodili, ebe tetenomolo netewa-netewa Nopopi Iyanomo ega:walo 24 Watowatopi iba:te ibino ololo opamo eba alomolo ebe ebo amamatiya. Ebene nale Watowatopino tanalo ma kunu uimo, ibino kotolo begube ega:walo golodo kalili ebe inamabu netewate pola:lameni, ebe golodo kalili magumulo wadewade nibo inamabu tabokaonomola, ebe wadewade nibo inamabu ebe nanitabokobi midipiate towetowe tabo Godotamo degelanaka ebe iyaiya tabola. <sup>9</sup> Ebene iba:te Sipi-goeo Da:peso amamatema: oli oale ma kunu alapiya,

“A:ma: kapiyate modobola  
 mokopiamida pepa lawa:wete pepano ale iyailima:,  
 mabu epate a:ma: danakapumitiyala,  
 ebe tetelo a:ma:le Godoko kekalakalaima:ema:  
 ibi Saitanakono idoko motone wagaila:wete  
 a:imano kalimamo ibi wiyakobi a:midiliyata.

Iyo, a:ma:le epo epetapi  
 ibino iyaiya tama taneba magumune  
 ega:walo iyaiya tabo gela taneba magumune  
 ega:walo iyaiya opo magumune uwata:wete,

<sup>10</sup> ibi Kawo Elawodawa Godokono duliyomolo epoma: a:midiliyata,  
 iba:te uwomua: tetelo ebene woko kosiyodilonama:  
 Iyo, ebe mabuma: opo duliyomolo kawonomolo

epo bilibilinomo epetapiate  
iba:tamo ba:tudila:onakoma:na.”

<sup>11</sup> Ebe tetelo nale walo Unu Duliyomolono nopopi epetapi bilibili-nomono tabo madodo kolowimo, ebe nopopino taneba kawonomola, nale ibi ka:la:miolema: modoboa:. Iba:te Kawo Elawodawano okoli bai anakopa:midalo eba pola:nalo, netewa-netewa Nopopi Iyanomo ega:walo 24 Watowatopi iba:te <sup>12</sup> ibino tabo madodo unamo wadipalatelelo negeliya,

“Sipi-goeo Da:peso kubakubapiate danakapumiya,  
modobola epo bilibilinomate  
ebeno elawo tanalamo na:tudila:oma:na;  
ega:walo inamabu bilibilinomo ebetamo eba ikameolo,  
ebe Mulodawama: ega:walo A:didawama: neka:ima:na!  
Iyo, iba:te ebena mailo unamo nadipatema:na;  
ega:walo ebe eba walogolo,  
ebetamo kalakala tabo negelama:na!”

<sup>13</sup> Ebe tetelo Unu Duliyomololo ega:walo opo duliyomololo dilukuliona, iyo, damela magumulo ega:walo kewa: kolomono obo magumulo ega:walo tobolo unulo dilukuliona, ebe epo ega:walo igilo inamabu bilibilinomate kapimiya degelitiya, nale ebe tabo ma kunu olowimo,

“Kawodawate ebena Kawo Elawodawano  
okoli bailo uwomua: tetelo dokolitamene  
ega:walo Sipi-goeo Da:peso,  
modobola ale uwomua: tetelo  
iba:tamo kalakala tabo eba gelanalo,  
ibino mailo unamo bowadipalatenakoma:!  
Iyo, modobola ale ibi eba walogolenalo,  
ibino elawo tanalamo ba:tudila:onakoma:!”

<sup>14</sup> Ebe tetelo netewa-netewa Nopopi Iyanomate negeliya, “Me tabo nanitabonomola, taula!” ebena 24 Watowatopiate ibino ololo opamo eba alomolo Kawodawa Godoko ega:walo Sipi-goeo Da:peso ebo amamateliya.

## 6

### *Sipi-goeo Da:pesote Mokopiamida Pepano Dopo Sikisi Ale Iyaili Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, Sipi-goeo Da:pesote sebeni ala:mo matuomeo ditani ebe mokopiamida pepano dopo ale ditamidi, nale ebe tanalo ebo uimo. Ebe tetelo netewa-netewa Nopopi Iyanomo magumulo idite ebena tabo madodo unamo adipatelo tobolote keba kunu kegewatanakole eba kunu ebete negi, “A:ma: mamona:pa:!” <sup>2</sup> Ebena nale ebe tabo dolowimo, oso-goeo keyakeyanomo ega:walo ebena namutudawa ebe unulo okolitalo ebo ulaimo, ebe namutudawano kotolo gowelaono gagalite itani. Ebena Kawodawate kawo elawodubuno kekeke inamabu ebetamo dikami, ebete lawete ebo nemaigi epo epetapiago eba negowelaolo iba:tamo elawonomoma: ka:neda:ma:

<sup>3</sup> Ebena Sipi-goeo Da:pesote mokopiamida pepano ale idi da:kitamidi, ebe netewa tetema: eba eda:lo Nopopi Iyanomo magumulo tetedawa idite negi, “A:ma: mamona:pa:!” <sup>4</sup> Nale ebe tabo dolowimo, oso-goeo idite ebo ka:pemaigi, ebe kalimakalimanomola. Ebena ebe oso-goeo unulo dokoliti, Kawodawate ebe namutudawatamo gowelaono gili kawonomo

ega:walo elawo ikami, ebete opo duliyoumolo epatamo kawo dowanomo eba nikalamelo iba:te gowela magumulo epetapiate epetapi kanakapulaema:

<sup>5</sup> Ebene Sipi-goeo Da:pesote mokopiamida pepano ale idi da:kitamidi, ebe netewa-kapiya tetema: eba eda:lo Nopopi Iyanomo magumulo tetedawa idite negi, “A:ma: mamu na:pa:!” Nale ebe tabo dolowimo, oso-goeo kilikilinomo ega:walo ebenu namutudawa ebe unulo okolitalo ebo ulaimo, ebe dubuno kotolo nao inamabuno mibomibo ulamenu inamabute itani. <sup>6</sup> Ebe tetelo netewa-netewa Nopopi Iyanomate kebolo kelamota:oni, ebe magumune nale opo lumagino tabo madodo keba kunula:ka: ebako tabo madodo ma kunu olowimo, “A:ma: opo duliyoumolo epatamo bae olopoligo tanalo natiye, ma kunu iba:te kapiya kilogalama witi-laiso kapiya ege-lano woko wiyamo belawenakoma:na:, ega:walo netewa-kapiya kilogalama baenomo atumu mani kawonomamo ba:kuwatanakoma:na:. Ebe mabuma: ibino gudi epetapi bilibilinomate baema: ka:elaoma:na:, wiyasiya nale talena a:ma:tamo ma kunu iyatimata, a:ma:le ibino gala:ipi da:imi kewa ega:walo olibi da:imi kewa akokubailama:la:.”

<sup>7</sup> Ebene Sipi-goeo Da:pesote mokopiamida pepano ale idi da:kitamidi, ebe netewa-netewa tetema: eba eda:lo Nopopi Iyanomo magumulo tetedawa idite negi, “A:ma: mamu na:pa:!” <sup>8</sup> Nale ebe tabo dolowimo, oso-goeo ga:wega:wenuomo ega:walo ebenu namutudawa ebe unulo okolitalo ebo ulaimo, ebe dubuno mailo ebe A:etela, ebema: A:elaopino Duliyoumolo umidawate ebe waloma:tana. Ebene Kawodawate elawo ibi netewapiatamo ikalami, iba:te gowela tanalo ega:walo bae olopoligo tanalo, a:e gabugabu tanalo ega:walo elawoelawo inamabuno maimio tanalo, ebe iyaiya olalati tanalo opo duliyoumolo epatamo kowatama:. Ebema: epo bilibilinomo magumulo, epetapi netewa-netewa magumune idi kapiyate ka:e, idi kapiya ka:e, ma kunu kowagelema:na:.

<sup>9</sup> Ebene Sipi-goeo Da:pesote mokopiamida pepano ale idi da:kitamidi, ebe paibu tetema: edi. Ebe tetelo kuba osiyodilolepiate Godokono tabo kiyawao mabuma: kebe epo dopamo danakapulamiya, nale ebe tuputupupino uliyana ebo ulaimo, Godoko watidilono patapata magumulo iba:te na:pola:niya. Nanitabola, ebe patapata unamo Godoko amamatepiate kalimagono inamabu elamo ebo alomonaka. <sup>10</sup> Ebene ebe uliyanate kawonomamo gelapatelo negeliya, “O Kawodawa, a:ma: Elawodawanomolata, iyo, a:ma: talenanomolata ega:walo nanidawanomoma: eda:nata! Ebema: piyate a danakapuamiya, a:ma:le ibino kuba osiyodilole tanalo kebe tetelo nakanagilamelelama:emene? Ibino kuba wiya iba:tamo ikalaema:, modobola a:ma:le a eba malagidiloelo tete akogeyageyaima:tepala:!”

<sup>11</sup> Ebe tetelo Kawodawate ibi bilibilinomatamo keyakeya ga:ga:ga:ga: kaliku ikalamolete ibi ma kunu anali, “La:le woki bilibilima: eda:oa:no tete da:pesamo walo na:kilukula:tepiyala:. Nanitabola, kuba osiyodilolepiate la: keba kunu kanakapulamitiyala, iba:te eba kunu la:imano nanitabokobi midipi ekaki epetapi kakanakapulaema:na:, mabu nale tete iba:tamo walo a:kikalaemo iba:te ebe kuba osiyodilole tanalo kopoliyalema:. Wiyasiya naimano wokopi anakapulame uwomu nanitabolo delaemene, ebe tetelo nale ibi anakapulamepiatamo kuba wiya kikalaemamo.”

<sup>12</sup> Ebene Sipi-goeo Da:pesote mokopiamida pepano ale idi da:kitamidi, ebe sikisi tetema: edi. Ebe tetelo opo duliyoumololo mumulu kawonomote demaigi, egelano pukuilame tanalote olopoligote kilikilinomo kaliku keba kunula:ka: eba kunu gito edi. Ebene opo kawonomote idokonate, saganano pukuilame tanalote atumu olopoligonate kalimakalimanomoma: eba eda:nalo, <sup>13</sup> tobolo ununo mawela:te opamo gito pa:gudiniya, ma kunu

awa kawonomote da:imi kewa eba padegetelo epetapi gumigumioa:no opamo keba kunu ka:pa:gudinake eba kunu. <sup>14</sup> Ebene Kawodawate to-bolo kawonomo lawenate ebo mokopiamidani, lumagite keta keba kunu ka:mokopiamidanakole eba kunu, ega:walo ebete opo duliyomolo lawenate kawonomamo eba adegetenalo, opono unuunu damela bilibilinomo ega:walo kewa: kolomono mamoko bilibilinomate ibino pola:na bai miyapanate iyabaiamo ebo tolama:tepaoleniya.

<sup>15</sup> Ebe tetelo iyaiya opono kawokawo elawodubu ega:walo ibino kawokawo gabamani dubu, gowelaopino kawokawo elawodubu ega:walo inamabu bilibila:gopi dubu, piyate wokopi epetapino ulamepima: deda:ona ega:walo piyate wiya: woko dosiyodilolena ega:walo piyate mani woko kelekele dosiyodilolena, iyo, ibi bilibilinomate tole kawonomo lawenate unuunu damelamo eba alautionalo damela gugu ega:walo nokola magumamo ebo nopila:oniya. <sup>16</sup> Ebene iba:te ibino tabo madodo unamo wadipalatelelo unuunu damelatamo ega:walo kawokawo nokolatamo negelaniya, “Modobola la:le a unamo piguda:wete a na:pitioa:la! La:le a walubia:no, Unu Duliyomolono Kawo Elawodawano okoli bailo dokolita ebe Kawodawate a duaemene, ebene Sipi-goeo Da:pesono dowo tanalo kawonomote atamo ka:pemene! <sup>17</sup> Iyo, ibino dowo egela kawonomote atamo a:pemaiga, ebema: a magumulo lumagi idite modoboa: ibino ololo apulo utima:!”

## 7

### *Godote Ebene Pukala Dalomolaemene Ebe 144 Taoseni Epono Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Unu Duliyomolono nopopi netewa-netewa epetapiate opono uwomu netewa-netewalo lamota:onalalo ebo ulaimo. Ebe tetelo iba:te opono kawokawo awa netewa-netewa odiyobolenomo odiyoboliya, opo duliyomolo kawonomono kewa unulo ega:walo kewa: kolomo kawonomolo awate palogutakapoma:. <sup>2</sup> Nanitabola, Godote me nopopiatamo elawo dopamo ikalamiya iba:te opo duliyomolo kawonomo ega:walo kewa: kolomo kawonomo kubailaema:.

Ebe tetelo nale Unu Duliyomolono nopodawa idi egelate da:powalonako eba apune podolutalo kuimo, ebene kotolo Igilo Godote epatamo pukala dalomolamenako ebe inamabute itani. Ebene ebete netewa-netewa nopopi epetapiatamo kawonomamo ma kunu gi, <sup>3</sup> “Me tetelo la:le kawokawo awamo me opotamo ega:walo opono kewatamo ega:walo kewa: kolomo kawonomotamo kuba tanalo idi ako-osiyodilala:, wiyasiya ale dopamo Godokono wokopino wato kaliamo ebene pukala alomolame tanalo dopoliyama:, modobola la:le opo duliyomolo kawonomo ebo na:kubaimiyala:.”

<sup>4</sup> Ebene piyate Godokono pukala nopopiagodone duwatema:na: nale ebe epono uwomu ma kunu olowimo, ibino uwomu ebe 144 taosenila, iba:te Isalaela epono iyaiya 12 gu magumune ka:pemaimioma:na:. <sup>5-8</sup> Me ebe Isalaela epono iyaiya guno mailola — Yuda, Lubeni, Ga:da, A:sa, Na:patali, Ma:na:sa, Simiyono, Libai, Isaka, Sebulana, Yausepe, ega:walo Beniyamina. Ebema: me gu bilibilinomono tanaloma:, gu idine epetapi 12 taoseni epate Godokono pukala uwatete, gu idine epetapi 12 taoseni epate pukala kuwatete, ibi bilibilinomate eba kunu ka:pemaimioma:na:.

### *Nanitabokobi Midipi Bilibilinomate Godokono Unu Duliyomololo Ebe Amamate Tanalo*

<sup>9</sup> Ebema: naimano balidite iyama: deda:onami ebe tanalote olopoligoa:no, nale tanalo idi ma kunu kuimo. Epo bilibilinomate ibino iyaiya opone ega:walo iyaiya tama taneba magumune ega:walo iyaiya tabo gela taneba magumune iyalo da:pelamoliya, iba:te keyakeya ga:ga:ga:ga: kaliku pupulite ibino kotamo puwala eba wadimagotitalo, Kawo Elawodawano okoli bai dopo apulo ega:walo Sipi-goeo Da:pesono ololo apulo ebo lamota:oniya. Nanitabola, ebe epono taneba kawonomola, lumagite ibi ka:la:miolema: modoboa!<sup>10</sup> Ebene ibi bilibilinomate kapimiya kawonomamo negeliya, “Aimano Kawodawate ebena Kawo Elawodawano okoli bailo dokolita, ebe Godotela. Nanitabola, igilo mula: tanalote ebe ega:walo Sipi-goeo Da:pesago ibi kapiyagodone pena!”

<sup>11</sup> Ebe tetelo Kawo Elawodawano okoli bai ega:walo 24 Watowatopi ega:walo netewa-netewa Nopopi Iyanomo, Unu Duliyomolono nopopi epetapi bilibilinomate ibi anakopa:midaletete ebo lamota:oniya. Ebene iba:te Godokono Kawo Elawodawano okoli bai dopo apulo ibino ololo opamo eba alomolo ebe amamatelo<sup>12</sup> ma kunu geliya, “Modobola epate uwomua: uwomua: tetelo aimano Kawodawa Godoko nemoionakoma:na:, ega:walo iba:te ebe eba walogonalo ebe mulodawanomoma: neka:minakoma:na: Iyo, iba:te ebetamo kalakala tabo negelanakoma:na:, ega:walo ebena mailo unamo eba adipatenalo iba:te ebena elawo ega:walo a:di tanalamo na:tudila:onakoma:na: Me tabo nanitabola, Taula!”

<sup>13</sup> Ebene Watowatopi magumulo idite na ma kunu anani, “Me keyakeya ga:ga:ga:ga: kalikagopi piyatela:ka:, ega:walo iba:te kebene ka:pelamiye?”

<sup>14</sup> Nale ebena tabo eba wiyalo negimo, “Kawodawa, na iyatawa:. Modobola a:ma:le na niyatunama:.”

Ebena ebete natamo negi, “Piyate opono uwomu teteno kawokawo temeteme magumudo pelamete ibino igilo mula: tanalago uwomuamo da:pemaimiya, me epo ebe nanitabokobi midipila, iyo, iba:te ibino ga:ga:ga:ga: kaliku Sipi-goeo Da:pesono kalimamo dukulaliya keyakeyaibinomoma: ebo midiliya.<sup>15</sup> Ebema: iba:te egela ega:walo idoko bilibilinomolo Godote ebena Kawo Elawodawano okoli bailo eba okolitalo, iba:te ebena ololo apulo ebe Amamateno Iya Motolo woko bosiyodilona. Ebene Godote iba:go eba okolinalo, ebete ibi itakeamidalelo<sup>16</sup> bae kapete ega:walo obo kapete walo a:kulamena:komene, ega:walo egelano enaenate iba:tamo temeteme walo a:kikalamenakomene.<sup>17</sup> Nanitabola, Sipi-goeo Da:pesote Kawo Elawodawano okoli bai niyakabolo dutita, ebete ebe epo ulamedawama: beda:namene, ma kunu ebete sipi-goeogoeo ulamedawama: eba eda:nalo ibi gito da:peka:ka:liyana ebe obamo kemagatalemene, iba:te niote uwomua: igilo ebo kelaema:. Ebe tetelo ebete ibino temeteme tanalo epetapi bilibilinomo dopoliyalelaemene, ibino ipupu iya:da:olelamete temeteme tanalo idite iba:tamo walo a:ka:pemaiganamene.”

## 8

### *Sipi-goeo Da:pesote Mokopiamida Pepano Uwomu Ale Itamida Tanalo*

<sup>1</sup> Ebene Sipi-goeo Da:pesote mokopiamida pepano uwomu ale ditamidi, ebe sebeni tetema: edi. Ebema: Godokono Unu Duliyomololo tete gopowaidopolo epo ega:walo nopopi ibi bilibilinomate tabo gela:no eba pola:nalo diyamo idite kemaigitia:,<sup>2</sup> ebena nale Godokono ololo apulo uwomua: tetelo delamota:ona ebe sebeni nopopi ebo ulaimo, ebete iba:tamo sebeni tutele ikalamoli.

<sup>3</sup> Ebe tetelo nopodawa idite golodo kalili adaete Kawodawa Godoko watidilono patapata niyakabamo da:puti, Kawodawate wade nibo tuwae



inamabu ebenu kalili magumamo kawonomamo ebo aminali, ebete ebe wade nibo inamabu nanitabokobi midipino towetowe tabago kapiyailamete Godoko watidilono golodo patapata unamo elamo kalomoma, ebe golodo patapatate Unu Duliynomolono Kawo Elawodawano okoli bai dopo apulo itana. <sup>4</sup> Ebene nopodawate kalili elamo iyatite wade nibo inamabu okalimi dowagilimi, ebete kalili ebenu kotamo ela magumune walo kelawete Godotamo eba adipatelo, wade nibo inamabuno temate nanitabokobi midipino towetowe tabago ebetamo ebo nodoli. <sup>5</sup> Ebene nopodawate Godoko watidilono patapata unune ela mio uwatete kalili magumamo alomote opo duliynomolamo ebo peba:idili. Ebe mabuma: mumulute opo kawonomo eba adegetelo tobolono iyaiya gewataole tanalo ega:walo mole a:la:uwa:midaole tanalate ebo maimiutiya.

*Nopopiate Dopo Tutele Netewa-netewa Moleo Tanalo*

<sup>6</sup> Ebe tetelo tutela:gopi nopopi sebeni iba:te ibino tutele moleoma: olosiy-dilote lamota:oniya.

<sup>7</sup> Ebene dopo nopodawate ebenu tutele da:moli, ebe tetelo Kawodawate nokola keba kunula:ka: ebako ulama kikopu ega:walo ela mena kalimago kapiyailamete opo duliynomolamo elawonomamo ebo piyaleki. Ebe mabuma: opolo delamota:oniya, ebe kewa bilibilinomo magumulo, epetapi netewa-kapiya magumulo idi kapiya elate nanaki, idi kapiya elate nanaki, eba kunu opono kewate gito kubakubaiya. Ebe tetelo opo kawonomono iyaiya uwago ega:walo pali inamabute elalo atumu gito kowamoteiya.

<sup>8</sup> Ebene nopodawa idite ebenu tutele da:ka:moli, ebe netewa tetema: edi. Ebe tetelo damela ununomo idite elalo dowaiti Kawodawate ebe damela lawete kewa: kolomamo gito peba:idili, <sup>9</sup> ebenu kewa: kolomono netewa-kapiya apuapulo kapiya apuno obote kalimama: eda:te ebo kubi. Ebe mabuma: ebe obo magumuno igilo inamabu bilibilinomate a:elaiya, ega:walo ebe obolo dopamo dowapata:lamenakiya ebe epono pe bilibilinomate atumu gito ka:kubakubaiya.

<sup>10</sup> Ebene nopodawa idite ebenu tutele da:ka:moli, ebe netewa-kapiya tetema: edi. Ebe tetelo toblo unune maweke kawonomote pegi, keba kunula:ka: lumagite ela menagono keole alo deba:idilomene eba kunula. Ebema: ebe mawelete kolomo tuli idino obamo da:pegi opo kawonomono kolomo tuli ega:walo obo guli bilibilinomo magumulo, epetapi netewa-kapiya magumulo idi kapiya kubanaki, idi kapiya kubanaki, eba kunu opo duliynomolo epono nio obote gito kubakubaiya. <sup>11</sup> Ebe mawelenu mailo ebe Kaka A:e Tanalotela, mabu ebete opo duliynomolamo da:pegi, epono iyaiya obo iyapo bai bilibilinomo magumulo, epetapi netewa-kapiya magumulo idi kapiya kakama: eda:naki, idi kapiya kakama: eda:naki, eba kunu eda:iya. Ebenu epo epetapi bilibilinomate ebe obo da:niya, iba:te gito a:elaiya.

<sup>12</sup> Ebene nopodawa idite ebenu tutele da:ka:moli, ebe netewa-netewa tetema: edi. Ebe tetelo Kawodawate egela ega:walo saganana ega:walo maweke dalukoli, ibino alote depesoma: gito eda:iya, ebema: egela teteno netewa-kapiya apuapu magumulo kapiya apute idokoma: edi, ega:walo idoko teteno netewa-kapiya apuapu magumulo kapiya apute atumu idokonomoma: kedi mabu saganana mawekele iba:te wadenomamo ka:pukuilamitia:

<sup>13</sup> Ebema: naimano balidite iyama: deda:onami ebe tanalote olopoligoa:no, nale wali toblo unudo a:wa:lubitalo uimo, ebete kawonomamo ma kunu gi, “Oe, la: niyanialata! Oe, la: niyanialata! Iyo, la: piyate opo duliynomololo dilukuliawenama, la: niyanialata!

Nanitabola, netewa-kapiya nopopi epetapiate iyalo olosiyodila ibino tutele ka:moleoma; ebema: ibino iyaiya tutelena diyamo demaimioma:na; ebe tetelo netewa-kapiya kawokawo temetemenomo epetapiate opo duliynomolamo ka:pemaimioma:na!”

## 9

### *Naba Paibu Nopodawano Tutele Mole Tanalo*

<sup>1</sup> Ebene nopodawa idite ebena tutele da:ka:moli, ebe paibu tetema: edi. Ebe tetelo nale mawelete idi opo duliynomololo kapitanalo ebo uimo, ebe mawelete dopamo Unu Duliynomolone pegiya. Ebene Kawodawate ebe maweletamo ki ikami, ebe ki ebe Idoko Bobo Kawonomono gigiyu a:iyamidano kila, ebe Idoko Bobolo kubakuba uliyana bilibilinomate ilukuliona. <sup>2</sup> Ebene mawelete ebe ki lawete Idoko Bobono gigiyu da:iyamidi, temate me bobo magumune kawonomamo eba podolutalo egela unu apu idokoma: ebo edi, keba kunula:ka: epate gagale uwago eba imukalo temate ununomamo dodolomene eba kunula. <sup>3</sup> Ebe tetelo tema magumune siguniya bilibilinomate da:pemaimiya, Kawodawate iba:tamo gopowaidubuno elawo eba ikalamelo <sup>4</sup> iba:tamo talena ebo iyatilami, iba:te opo duliynomololo dapepeona ebe uwago ega:walo pali inamabu ega:walo kewano paa a:ka:kubailaema:na; wiyasiya piyate Kawodawano pukala ibino wato kaliama alomolamea:pima: deda:ona, siguniyate ebe epo kapiyatamo temeteme ikalaema: modobola. <sup>5-6</sup> Ebene siguniyate paibu sagana magumulo nanitabokobi midia:piatamo kawokawo temetemenomo kikalaema:na; ebe temeteme ebe gopowaidubute lumagi alolo ebetamo dikaemene ebe temeteme keba kunula:ka: eba kunula. Ebe mabuma: nanitabokobi midia:piate kawokawo temetemenomo eba iyatawaolo, iba:te a:elaoma: ubi kalomoma:na: wiyasiya gabo nipo kowadima:na; iyo, siguniyate epo akanakapulaema:na; mabu iba:te ebe tanalo osiyodiloma: Kawodawate talena iyatilami.

<sup>7</sup> Nanitabola, nale dulaimo ebe siguniyano ololo iyanomola, iyo, ibino ape ebe gowelao tanalamo da:tolamita ebe gowelaopino oso-goeogoeono ape keba kunula:ka: eba kunula, ebena iba:te ibino watamo kawokawo elawodubuno golodo kekeleke inamabu pupulila. Ega:walo ibino dopo ega:walo balidi dubuno dopo ega:walo balidila, <sup>8</sup> wiyasiya ibino eke ebe kamiyaleno ga:ga:ga:ga: eke keba kunula:ka: eba kunula, ega:walo ibino lalo ebe layono-gaano lalola. <sup>9</sup> Ebe siguniya ibino bodolo teta:mo gowelaopino auli negege inamabu pupulila ega:walo ibi tamuagopila, ebema: iba:te ibino tamuamo dowapata:lamitiya diyamo kawonomote ebo maigiti, sa:liyota-pe bilibilinomate oso-goeogoeo bilibilinomago gowelama: keba kunu ka:tolamitanake eba kunu. <sup>10</sup> Ega:walo ebe siguniya etagopila, iyo, iba:te paibu sagana magumulo opo duliynomolo epatamo temeteme dikalaema:na: ebe temetemenomo elawote ibino etolo ka:pola:lamenamene. <sup>11</sup> Ega:walo nanitabola, ibino kawo elawodubu ebe elawo nopodawanomo idila, wiyasiya ebe Godokono wokodawa; ao, ebe Idoko Bobo Kawonomolo dilukuliona ebe kubakuba uliyano namutudawala. Ebena mailo Yu epono tabamo Aba:donatela ega:walo Guliki epono tabamo Apoliyonatela, ebe mailono magumu ebe ‘Kubanomamo Alukoledawala.’

<sup>12</sup> Umu numita:la; kawokawo temetemenomo magumulo dopo tanalote a:peto, wiyasiya netewa temeteme tanalo epetapi ebe na:pa:!

### *Naba Sikisi Nopodawano Tutele Mole Tanalo*

<sup>13</sup> Ebene nopodawa idite ebene tutele da:ka:moli, ebe sikisi tetema: edi. Ebe tetelo nale idawano tabo madodo ebe olowimo, ebe tabo madodote Godoko watidilono golodo patapatano ubuwomu netewa-netewa magumune pemaigi, ebe patapatate Godokono ololo apulo itana. <sup>14</sup> Ebema: tabo madodote naba sikisi nopodawatamo ma kunu gi, “Yupala:itisi kawo kolomolo matuolamolelo dilukulina, a:ma:le ebe netewa-netewa nopopino ale palamililama:wete naimano iyaiya ubi tanalo osiyodilolema: nalibola!”

<sup>15</sup> Ebema: piyate matuolamola:go Godokono tete demakopelenamiya, ebe netewa-netewa nopopiate ibino matuolamole magumune gito maimiya, iba:te epo bilibilinomo magumulo, epetapi netewa-kapiya magumulo idi kapiya kanakapumi, idi kapiya kanakapumi, eba kunu ka:nowagelema: Nanitabola, Godote ebe netewa-netewa nopopino woko osiyodilo tanaloma: kebe ulama ega:walo kebe sagana ega:walo kebe egela iyalo dalomiya, iba:te ebe tetenomolo ebene iyaiya ubi tanalo osiyodilolema: emaimiya.

<sup>16</sup> Ebema: naimano balidite iyama: deda:onami ebe tanalo olopoligoa:no, nale tanalo idi ma kunu kuimo, gowelaopi dubu bilibilinomate ibino oso-goeogoeago ebo maimiya, ebene nale ibino uwomu ma kunu olowimo, ebe uwomu ebe 200 miliya:nila. <sup>17</sup> Ebe gowelaopi dubate auli negege inamabu pupulila, ebe negege magumulo epetapi ebe kalimakalimanomola, epetapi bubunomola, ega:walo epetapi ga:wiwaga:wiyanomola. Ebene ebe dubuno oso-goeogoeono tanalo ma kunula, ibino wato ebe layongaano wato keba kunula:ka: eba kunula, ega:walo ibino tabo magumune ela mena temago ega:walo kuba nibonomote kapimiya maimiutiya.

<sup>18</sup> Ebema: oso-goeogoeono tabo magumune demaimiuti ebe netewa-kapiya kubakuba tanalamo iba:te opo duliwomolo epo bilibilinomo ebo anakapulamiya, iyo, epo bilibilinomo magumulo, iba:te epetapi netewa-kapiya magumulo idi kapiya kanakapumi, idi kapiya kanakapumi, eba kunu wageliya. <sup>19</sup> Nanitabola, oso-goeogoeono elawote ibino tabolo ega:walo etolo na:pola:lameni, iyo, ibino etono elawote epatamo temeteme atumu a:kikalamiya mabu ibino eto ebe elawo kaluno wato keba kunula:ka: eba kunula.

<sup>20</sup> Wiyasiya nale tanalo idi ma kunu kuimo, epo bilibilinomo magumulo piyate me kawokawo temetemenomono tanalone a:elaoa:no, iba:te ibino kubakuba woki iyakobi midilite Godotamo kolobila:. Ma kunu iba:te ibino ida:da:li ega:walo kubakuba uliyana amamalatele tanalo ka:miyapa:, iyo, iba:te a:ka:tuwa: ibino kotamo iyaiya dosiyodilolenaka, ebe golodo ega:walo siliba ega:walo auli inamabu ida:da:li, ebe nokola ega:walo kewa ida:da:li, ebe balidi tamiolame ega:walo galo tamiolame ega:walo wapata:lamea: ida:da:li, iba:te ebe iyaiya ida:da:li amamalatele tanalo ka:miyapa: <sup>21</sup> Ega:walo iba:te Godotamo olobila:ma: ibino kuba osiyodilole tanalo epetapi atumu ka:miyapa:, ma kunu epo anakapulame tanalo ega:walo giwali osiyodilole tanalo, buwelemele pilo tanalo ega:walo epetapino inamabu pilo tanalo, iba:te ebe iyaiya kuba tanalo miyapama: ubia:noma: eda:iya.

## 10

### *Godokono Elawo Nopodawanomo Ega:walo Tabo Akulole Pepa Ibino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale elawo nopodawanomo idi Unu Duliwomolone piwisigitalo ebo uimo. Molemabute ebene wato anagogobeyamidadigi, ega:walo ebene ololo egelano pukuilame keba kunula:ka: eba kunula, ebene ebete tobolono

tema pulite, ebenu agowa ebe motono kawokawo alo netewa ela menago dowamotita keba kunula:ka: eba kunula. <sup>2</sup> Ebe tetelo nale ebenu kotolo ditani ebe tabo alomole pepa kuimo. Ebenu ebete opo duliynomololo eba utitalo, ebenu tumudi apu agowa kewa: kolomamo a:putite ega:walo pele apu agowa gagale damelamo akoo:puti, <sup>3</sup> ebete ebenu tabo madodo unamo adipatelo tabo ebo gi, layono-gaate elawo kawonomago keba kunu kopolenakole eba kunu. Ebenu tobolono sebeni gewataole tanalate ebenu tabo eba wiyalo, <sup>4</sup> nale ibino tabo olowite bukamo akulolema: dowagelimo, ebe tetelo tabo madodo idite Unu Duliynomolone pemaigate na ma kunu panani, “Ao, tobolono sebeni gewataole tanalate degela, a:ma: bukamo akoakulola:la! Ibino tabono tanalote waminalo nitanamene!”

<sup>5</sup> Ebenu kewa: kolomamo ega:walo gagale damelamo da:puti, ebe elawo nopodawanomote ebenu tumudi apu koto Unu Duliynomolamo eba adipatelo, <sup>6</sup> ebete potele opo duliynomolo ega:walo tobolo dosiyodiloliya ega:walo potele uwomua: tetelo dokolinamene ebe Kawo Igilodawano mailamo nani tabonomo ma kunu gi, “Taula, makopele tete ebe olopoligo! <sup>7</sup> Iyo, Godote iyalo tetelo dowaminiya, tete geyageyanomo petote ebe nopo ebenu woki awokalimipi wokopiatamo walone dawokalimiya, ebete ebe nopono iyaiya tanalo me tetelo kosiyodilolemene, mabu nanitabola, naba sebeni nopodawate ebenu tutele da:molemene, ebe tetelo ebe iyaiya tanalono maimio tanalo ebo kowagilimene.”

<sup>8</sup> Ebenu dopamo Unu Duliynomolone da:pemaigi, ebe atu tabo madodote natamo walo ma kunu ka:pi, “Kewa: kolomamo ega:walo gagale opamo da:puti, a:ma:le ebe nopodawatamo toawete ebenu kotolo ditana ebe tabo akulole pepa na:nelawa.”

<sup>9</sup> Ebema: nale nopodawatamo tote pepa laema: ebe dananimo, ebe tetelo ebete natamo negi, “Modobola, a:ma: lawa:wete nena. Me pepate a:imano tabo magumulo golanomoma: keda:mene, molono gola keba kunula:ka: eba kunu, wiyasiya a:imano tepo magumulo kakanomoma: keda:mene.”

<sup>10</sup> Ebenu nale pepa lawete denimo, nanitabola, naimano tabo magumulo molono golama: eda:te, wiyasiya dalopogimo tepo magumulo kakanomoma: ebo edi. <sup>11</sup> Ebe tetelo nopodawate na walo nakanani, “Modobola a:ma: walo ka:towawete epo epetapi bilibilinomatamo Godokono tabo na:nikiyawaonakiye. Iyo, ebenu ubi tanalodo kebe tanalate iba:tamo ega:walo ibino iyaiya opamo ega:walo ibino iyaiya tabo gela taneba epatamo ega:walo ibino iyaiya kawokawo elawodubatamo demaimioma:na:, ebe iyaiya tanaloma: ibi na:nikiyawaolamenakiye.”

## 11

### *Godokono Nanitabo Tanalo Awokalimi Wokopi Netewa Ibino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, Kawodawate motono geyageya modobutino gaubu natamo ikanamete ma kunu gi, “A:ma: toawete na Amamanateneno Iya Moto nemodobuta:wete, ega:walo ebe motolo ditana na watidiloneno patapata ka:nemodobuta:wete, ebenu ebolo na damamanatenena a:ma:le ebe epo akoneka:la:mioliye. <sup>2</sup> Wiyasiya a:ma:le na Amamanatene Motono kala magumulo ditana ebe bala apu akomodobuta:la:, mabu nale nanitabokobi midia:piatamo 42 sagana tetelo kikalaemamo, ebema: iba:te ebe tete geyageyadopolu na Amamanatene Motono bala apu ega:walo naimano Yelusalema kawo duliynomolo kawonomo ibino dowa magumulo agowamo eba mikitalo ibino

kubakuba tanalo ebo kosiyodilolema:na. <sup>3</sup> Ega:walo naimano tepo magumuno woki kawokalilaema: nale wokopi netewapiatamo elawo kikalae-mamo, ebema: 42 sagana magumulo, me tete ebe 1,260 egela tetela, iba:te naimano tabo opo duliynomolo epatamo eba na:kiyawaolo, iba:te epono nanitabokobi midia: mabuma: ibino tepo temeteme awokalima: kubakuba kaliku ka:pupulima:na.”

<sup>4</sup> Nanitabola, Kawodawa Godoko ebe opo duliynomolo Namutudawala, ega:walo me ebena tabo kiyawaopi netewa ibi ebena ololo apulo delamota:na ebe olibi da:imi kewa netewala ega:walo alo netewala. <sup>5</sup> Ebe mabuma: opo duliynomolo epate iba:tamo temeteme ikalaema: ubi diyatima:na:, wiyasiya ibino tabo magumune Godokono elate pemaigate iba:tamo da:dowaona ebe epo ebo kenalemene, iyo, piyate ibi netewapiatamo temeteme ikalaema: dowagelema:na:, Godote ibi ma kunu kanakapulaemene. <sup>6</sup> Ebene me wokopi netewano tanalo ma kunula, iba:godolo elawo bitana ulama owo tanalo kodioboma:, ebema: tete geyageyanomolo iba:te Godokono tepo magumuno woki eba awokalilamenalo ulamate a:kowomene. Ega:walo iba:godolo elawo atumu ba:kitana, iba:te epono nio obo kalimanomoma: ka:midilima: ega:walo olalati tanalo epetapi bilibilinomamo nanitabokobi midia:pi kalukolema:, iyo, kebe tetelo iba:te ubi diyatinakoma:na: ebakobako iyaiya temeteme tanalo opo duliynomolo epatamo bikalamenakoma:na:

<sup>7</sup> Wiyasiya iba:te Godokono tabo kiyawao woko nanitabolo dopoliyama:na:, ebe tetelo Iya Ololonomo Inamabu idite Idoko Bobo Kawonomo magumune podolote iba:go eba pegowelalo elawonomoma: eda:te ibi ebo kanakapulaemene. <sup>8</sup> Ebene ebe elawo Inamabute ibino a:ela ape gito miyapate, iba:te epono kawo duliynomolonomo idino inamabu olowame bai tetenomolo gito ka:polamota:nama:na:. Ebe kawo duliynomolono magumu mailo ebe Sodomola ega:walo magumu mailo idi ebe Isipitila, dopamo epate ebe atu duliynomololo Kawodawa Ya:suko kewa olotolowalo eba tupuguimilo ebe atumu ebo anakapumiya. <sup>9-10</sup> Ebene iyaiya opo epo ega:walo iyaiya tama epo ega:walo iyaiya tabo gela taneba epo, ibi bilibilinomate Godokono wokopi netewano a:ela ape eba ulamelelamelo bobo magumamo alomoma: talena ebo kiyatilaema:na:. Ega:walo ibi netewapino a:ela mabuma: opo duliynomololo dilukuliona ebe nanitabokobi midia:pi bilibilinomo magumulo epetapiate epetapiatamo nilakapo inamabu eba ikameteuitalo ibino kalakala kawonomamo kadipatema:na:, iyo, ibino kalakala kawonomote kitanamene mabu tete geyageyadopolo ebe Godokono woki awokalimipi netewate iba:tamo temeteme ikalamenakiya.

<sup>11</sup> Wiyasiya ibino kalakala tanalote netewa-kapiya egelamo itanate, ebena egela idi eba lawelo egela tuli tetelo ebo kolopoligomene. Iyo, nanitabola, ebe tetenomolo Godokono igilote ebena wokopi netewa magumamo popegate iba:te a:e magumune maimite, ebena opo duliynomolo epate ibi igilolo eba ulamelo kawo tolenomo ebo lawiya. <sup>12</sup> Ebene ibi netewapiago gowelaopima: deda:onamiya, ebe nanitabokobi midia:piate ibi eba ulamitalo, Godokono wokopi netewate ebena tabo madodo kawonomo Unu Duliynomolone pitalo ma kunu olowiya, “La: mamona:podolala:!” ebema: iba:te tobolono tema magumudo ebetamo ebo nodoliya. <sup>13</sup> Ebene ebe tetenomolo mumulu kawonomote maigate, kawo duliynomolono 7,000 epate eba a:elaolo ibino moto bilibilinomo magumulo, epetapi teni magumulo idi kapiya kubanaki, idi kapiya kubanaki, motote eba kunu kubakubaiya.



Ebe mabuma: piyate a:elaoa:no iba:te kawonomamo eba toletoleolo Unu Duliynomolono Godoko ebo walogiya.

<sup>14</sup> Umu numita:la:, kawokawo temetemenomo magumulo netewa tanalate a:petoa, wiyasiya kapiya temeteme tanalo idi ebe na:pe!

*Naba Sebeni Nopodawano Tutele Mole Tanalo*

<sup>15</sup> Ebene nopodawa idite ebene tutele da:ka:moli, ebe sebeni tetema: edi. Ebema: ebe tetelo epetapiate Unu Duliynomololo ibino iyaiya tabo madodo unamo dowadipalateiya, na Yonete ibino tabo ma kunu olowimo, “Aimano Kawodawa Godoko ega:walo ebene Alibodawa Kelisoko, ibi netewapiate elawo kawonomo elawa:, ebema: me tetene wagilimite uwomua: uwomua: tetelo ebe kapiyate opo kawonomono Kawo Elawodawama: beda:namene!”

<sup>16</sup> Ebe tetelo 24 watowatopiate Godokono ololo apulo kawokawo elawodubuno ilukuli bai unamo dilukuliya, iba:te ibino ilukuli bai miyapate ibino ololo Godokono agowa mabuamo eba alomolo ebe amamatelo <sup>17</sup> ebo geliya,

“Elawonomo Kawodawa Godo, opo duliynomolo wagilimia:no  
a:ma: dopamo okolinamiyata,  
ega:walo a:ma: ka:lo nokolinata!

Ale a:ma:tamo kalakala tabo adipatitama:  
mabu a:ma: a:imano elawo kawonomo elawa:ta,  
ebene me tetene wagilimite  
a:ma: kapiyate Kawo Elawodawama: beda:nama:ta!

<sup>18</sup> “Nanitabokobi midia:piate a:ma:tamo eba doweonalo,  
a:ma: wiyasiya iba:tamo kawo dowanomo magumulo  
ebo maigata.

Ebema: me tetela,  
a:ma:le a:elaopino tanalo kanagilamelelaema:ta,  
ega:walo me tetela,  
a:imano woki awokalimipi ega:walo wokopi epetapi,  
ibi bilibilinomate wadewade wiya  
a:ma:godone kuwatema:na:.

Iyo, me tetela,  
piyate a:imano mailo unamo dadipatena  
ebe tuputupu epo bilibilinomo magumulo  
kawokawopi ega:walo egegepi atumu  
wadewade wiya a:ma:godone kuwatema:na:,  
ega:walo me tetela,  
piyate ibino kuba osiyodilole magumulo  
opo duliynomolo da:kubaimiya,  
a:ma:le ibi wiyasiya ka:kubailaema:ta.”

<sup>19</sup> Ebema: ebe tetelo Godoko Amamateno Iya Motote ebene Unu Duliynomololo da:ena, ebete ebe motono gigiyu gito a:iyamidi, ebene iyalo tetenomolo Godote ebene epo kowalubilinama: iba:tamo nopo diyatiya, na Yonete ebe nopono Talena Bokose moto gulo ebo uimo. Ega:walo ebe atu tetenomolo nokola kawokawonomo keba kunula:ka: ebako ulama kikopu ega:walo tobolono iyaiya gewataole tanalo ega:walo mole a:la:uwa:midaole tanalo ega:walo mumulu kawonomo, ebe tanalate kapimiya maimiutiya.

## 12

### *Kamiyale Ega:walo Kalimakalima Atelalo Kawonomo Ibino Tanalo*

<sup>1</sup> Ebe tetelo Godokono Unu Duliynomololo anoano tanalo kawonomo idite demaigi, na Yonete ebe tanalo ma kunu uimo, kamiyaletete egela pulite ebena agowa netewa saganamo eba a:putilo, ebena Kawodawate ebe mabuma: 12 mawela:mo kawo elawodubuno kekeleke inamabu osiyodilote, ebete ebe inamabu kamiyaleno watamo ebo pulimi. <sup>2</sup> Ebe kamiyale lamitula, ebema: ebete gudu alaima: temeteme kawonomo eba olowitalo ebo iiti.

<sup>3</sup> Ebena anoano tanalo idite Unu Duliynomololo ma kunu maigi, Kalimakalima Atelalo Kawonomo nale uimo, ebe teni kalitagonola ega:walo sebeni watagonola, ebena ebena sebeni watolo sebeni kawokawo elawodubuno kekeleke inamabute na:pola:meni. <sup>4</sup> Nale ebe eba umitalo ebete tobolo ununo mawele bilibilinomo magumulo, epetapi netewa-kapiya magumulo idi kapiya ebena etamo opamo pawotanaki, idi kapiya opamo pawotanaki, ibi eba kunu kubailami. Ebena kamiyaletete gudu alaima: dowageliti, Atelalo Kawonomote ebena dopo apuamo ebo punuti, gudute menokono tepo magumune pawokalalo ebete gito kenama:

<sup>5</sup> Ebena ebe kamiyaletete dubu gudu alaimi. Nanitabola, walone tetelo ebe gudute opo duliynomolono iyaiya epo bilibilinomono Kawo Elawodawama: keda:mene, ebena piyate eba:go gowelaopima: deda:oma:na: ebete auli gaubamo ibi kubanu kalukolemene. Ebema: Atelalote ebe gudu nama: dowageliti, Godokono nopodawate ebena igilo eba pa:mula:melo ebe pelawa:digete Unu Duliynomolamo magatate Godokono Kawo Elawodawano okoli bailo ebena dopo apuamo gito nadipi. <sup>6</sup> Ebe atu tetelo kamiyaletete Atelalono elawo magumune gito alauli, Godote ebena igilo mula:ema: bulu opolo iyalo dosiyodiliya ebe opega baiamo, ebena ebete 1,260 egelamo ebolo eba nokolinalo Godote ebe wadenomamo ka:buiyatenatemene.

<sup>7</sup> Ebema: Godokono Unu Duliynomololo gowela tanalote demaigi, ebe tetelo Maikoloko ega:walo Godokono tuputupu nopopi epetapi iba:te Kawo Atelalonomo ega:walo ebena nopopiago kubanu goweliya. <sup>8</sup> Ebena gowela magumulo Maikoloiate wato kikopu delawiya, ebema: iba:te Atelalo ebena nopopiago Unu Duliynomolone elawonomamo eba a:na:ma:latelelo, <sup>9</sup> ibi bilibilinomo uwata:digete opamo gito piyalekiya. Nanitabola, Atelalo Kawonomo ebe opo duliynomolo wagilimi mabuna kaluno ololamo dapawokaliya ebe dawala, ebena mailo netewa ebe Kubadawala ega:walo Saitanatela, ebete opo duliynomolo epo bilibilinomo a:da: masigiolema: wagenena.

<sup>10</sup> Ebe tetelo na Yonete Unu Duliynomololo idawano tabo madodo kawonomo olowimo, ebete ma kunu gi, “Ka:lo Godokono igilo mula: tanalote opo duliynomolo epatamo a:pemaiga! Iyo, ebena elawo ega:walo ebena Alibodawa Kelisokono elawote awokala pe, mabu me tete ebe ebena Kawo Elawodawama: eda: tetela! Nanitabola, aimano Godokono Kawo Elawodawama: eda: tanalote a:pemaiga, mabu ebena ololo apulo kebe dawate dopamo idoko ega:walo egela bilibilinomolo a nanitabokobi midipi ekaki kuba osiyodilolepima: deka:minaki, ebete ebe Kubadawa Unu Duliynomolone a:peba:idili. <sup>11</sup> Ma kunu nanitabokobi midipiate ebe Kubadawano wato kikopu itamidamiya, mabu iba:te gowela magumulo ka:toletoleona: ibino nanitabokobi midi mabuma: ka:elaoma:, iyo, iba:te Godokono Wade Tabo da:kiyawaonaka ebe tabono nanitabo tanalamo ega:walo Sipi-goeo Da:pesono kalimamo elawonomoma: eda:ona. <sup>12</sup> Ebe mabuma: la: piyate Unu Duliynomololo dilukuliawenama, modobola la:

bilibilinomo nekalakalala! Wiyasiya la: epo ega:walo inamabu piyate opo duliynomololo ega:walo kewa: kolomolo dilukuliawenama, la: niyaniyalata mabu Kubadawate la:tamo a:piwisigi. Ebe iyatawala ebenu kuba osiyodilole tete gopowaima: neda:, ebema: ebete kawo dowanomo magumudo la:tamo a:pemaigi!”

<sup>13</sup> Ebene na Yonete me tanalo idi kuimo, Godote Atelalo Kawonomo opo duliynomolamo da:peba:idili, ebete ebe tanalo eba piyatawitalo, dubu gudu dalaimi ebe kamiyaale elawamo ebo a:na:ma:ti ebe ka:na:kubaima:.

<sup>14</sup> Ebema: ebe tetelo Godote wali kawonomono tamu netewa kamiyaletamo ikami, ebete Atelalo atepate bulu opamo eba na:wa:lubialo ebenu igilo mula: bai ebo ka:nuima:. Ebene kamiyaalete ebolo eba nokolinalo, Godokono igilo mula: tanalote ebegodolo netewa-kapiya ulamamo eba itanalo, ulama idi delaemene ebe ulamano tetenomamo ebo ka:nemaigamene.

<sup>15</sup> Ebene kamiyaleno alaula: magumulo Atelalote ebe eba a:na:ma:talo, ebenu tabo magumune ulama obo kawonomote pemaigi ebe kamiyaale lawa:digate ebenu igilo mula: baine gito katama:, <sup>16</sup> wiyasiya Godote kamiyaletamo walubi tanalo eba palibolo, damelate a:ka:tuwa: da:bolegali ebe tetelo damelate Atelalono tabone da:pemaigi ebe obo kawonomo gito imugudiamidi. <sup>17</sup> Ebe mabuma: Atelalote kamiyaletamo kawonomo da:dowi, wiyasiya ebete ebe atepate gito ti ebenu gudi epetapiago ka:negowelanama:, ebe gudi ebe piyate Godokono totomu tabamo da:tudila:ona ega:walo Ya:suko mabuma: nani tabo da:kiyawaona ebe epola. Ebe tetelo ebe Atelalo Kawonomote tote opo duliynomolono kewa: kolomo balalo ebo nutiti.

## 13

### *Iya Ololonomo Inamabuno Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Iya Ololonomo Inamabu kewa: kolomo magumune pemaigitalo ebo uimo. Ebe sebeni watagonola ega:walo teni kalitagonola, ebenu ebenu teni kalitalo teni kawokawo elawodubuno kekelekele inamabute na:pola:lameni, ega:walo ebete ebenu sebeni watamo Godoko malogoma: mailo iyalo akuloliya. <sup>2</sup> Ebe Inamabuno ololo ma kunula, ebenu ape ebe elawo tumu pusino apela, ega:walo ebenu agowa ebe kawo elawo gaano agowala, ega:walo ebenu tabo ebe elawo layono-gaano tabola. Ebene Atelalo Kawonomote ebenu elawo kawonomo Iya Ololonomo Inamabutamo gito ikami, ebe kapiyate opo kawonomolo kawo elawodubuma: keda:nama:. <sup>3</sup> Ebene nale ebenu wato idilo a:e bugomote ditameni ebo uimo, ebete ebe bugomo gowela magumulo lawi, wiyasiya ebe a:e tanalote ebegodolo olopoligote ebenu watote wadekobi walo gito kolowi, ebe mabuma: opo duliynomolo epo bilibilinomate anoanolo Iya Ololonomo Inamabu kalakalago ebo waloma:tiya. <sup>4</sup> Ebe atu tetelo epate Atelalo ebo amamatiya mabu ebete ebenu elawo Iya Ololonomo Inamabutamo nanitabolo ikami, ega:walo iba:te Iya Ololonomo Inamabu atumu eba kamamatelo ma kunu geliya, “Iya Ololonomo Inamabuno elawo beda: kawonomola:ka! Nanitabola, lumagino elawo modoboa: me Inamabuago gowelama:!”

<sup>5</sup> Ebene Godote 42 sagana Iya Ololonomo Inamabutamo ikami, ebete opo duliynomololo elawodawama: eba eda:nalo ebe a:ka:tuwa: ebe walogolo Godoko ebo kemalogoma:. <sup>6</sup> Ebema: Iya Ololonomo Inamabute eba kunu wageli, ebete Godoko eba malogolo ebenu mailono tanaloma: ega:walo ebenu Okoli Baino tanaloma: ega:walo Unu Duliynomololo dilukuliona

ebe epono tanaloma: kubakuba tabo ebo kiyawai. <sup>7</sup> Ebe atu tetelo Godote ebetamo tete ikami ebete nanitabokobi midipiago eba gowelalo ibi ka:kubailaema:, ebe mabuma: ebete opo kawonomolo elawodawama: eba eda:nalo, iyaiya tama epo ega:walo iyaiya tabo gela taneba epo ega:walo iyaiya opo epo ibi bilibilinomate ebetamo ka:tudila:oma:na:. <sup>8</sup> Ebema: opo kawonomolo dilukuliona ebe epate Iya Ololonomo Inamabu ebo kama-matema:na:, wiyasiya Godote opo duliynomolo osiyodiloa:no dopamo kebe epono mailo Sipi-goeo Da:pesono Igilo Bukamo dakulolelamiya ebe epo kapiyate ebe akamatema:na:, ebe Sipi-goeo Da:peso ebe kubakubapiate danakapumiya ebe dawala.

<sup>9</sup> Ebene Godote negi, “Galagodawa, a:ma: me tabo wadenomamo nolowia! <sup>10</sup> Naimano nanitabokobi midipi magumulo nale kebe lumagitamo ubi diyatimo epetapiate ebe idoko motamo gito naliboma:, iba:te ebe lumagi ebamo nanitabolo kanaliboma:na:, ega:walo na kebe lumagitamo ubi diyatimo epetapiate ebe gowelaono gila:mo anakapuima:, iba:te ebe gowelaono gila:mo nanitabolo kanakapuima:na:. Ebe mabuma: naimano epate ebakobako temeteme duwatema:na:, modobola iba:te ibino nanitabokobi midi magumulo kodakodalo eba lamota:onalo elawoa:noma: akoeda:oala:.”

### *Iya Ololonomo Inamabu Idino Tanalo*

<sup>11</sup> Ebene nale Iya Ololonomo Inamabu idite damela magumune podolutalo ebo uimo, ebe netewa kalita ka:ma: demaimimita ebako dabi sipigoeo da:peso keba kunula:ka: eba kunula, wiyasiya ebena tabo madodo ebe elawonomo atelalono tabo madodola. <sup>12</sup> Ebene ebe Inamabute dopamo demaigi ebe Iya Ololonomo Inamabu idino dopo apulo eba utitalo elawo ebegodone ebo lawi, opo duliynomololo dilukuliona ebe epo bilibilinomate ebena tabamo ka:tudila:oma:. Ebema: me gabodo ebete epo kawonomamo anali iba:te dopo Inamabu kamamatema:, ebe dopo Inamabu ebe a:e bugomote eba itamenalo wadekobi walo da:kolowi ebe Inamabula.

<sup>13</sup> Wiyasiya walone demaigi ebe Iya Ololonomo Inamabu idino tanalo ma kunula, ebe kawokawo anoano tanalo osiyodiloledawala, ebema: ebete epo bilibilinomono ololo apulo ela menago tobolo unune opo duliynomolamo gito powauti. <sup>14</sup> Nanitabola, Godote tete ebetamo ikami ebete dopo Iya Ololonomo Inamabuno dopo apulo makomako anoano tanalo kosiyo-dilolema:, ebema: me anoano osiyodilole magumulo ebete epo bilibilinomo a:da: eba masigiolele ebete ibi kawiya ebo anali, iba:te dopo Inamabuno ololo keba kunula:ka: ebako ida:da:li kosiyo-diloma:. Ebe ubila epate ebe dopo Inamabu eba amamatelo ebena mailo unamo kadipatema:, mabu idite gowelaono gila:mo ebe a:e bugomagoma: da:midi ebe wiyasiya ka:ea:. <sup>15</sup> Ebe tetelo Godote modoboma: degi, walone demaigi ebe Inamabute elawo ebo lawi, epate kebe inamabu ibino kotamo dosiyodiliya ebe ida:da:litamo igilo kikaema:. Ebe mabuma: dopo Iya Ololonomo Inamabuno ida:da:lite eba igilonalo, ebete opo duliynomolo epatamo tabo kiyawao dowagilimi ibi ma kunu anali, piyate ebe amamatea:no modobola epetapiate ibi gito nanakapulaema:na:.

<sup>16</sup> Ebene egege ega:walo kawokawo epo, inamabu bilibila:gopi ega:walo inamabua:pi, piyate wiya: woko dosiyodilona ega:walo piyate mani woko dosiyodilona, ebe epo bilibilinomatamo me Iya Ololonomo Inamabute totomu ikalami iba:te ebena pukala ibino tumudi apu kotolo o wato kalilo kuwatema:. <sup>17-18</sup> Ebe tetelo epo bilibilinomo magumulo piyate ebena pukala uwatea:no, ibi kubailaema: ebete epetapiatamo talena iyatilami, iba:te olowame magumulo ebe epatamo nao inamabu ega:walo mani

a:kikalaema:na:. Ebema: la: piyate me buka tabo dolowiawitama, la: niyatawala: me Iya Ololonomo Inamabuno pukala ebe ebena nabala, iyo, ebe nabano magumu ebe ebena mailola. Ebema: modobola la: magumulo mulodawate ebena wade wokiamo me nabano magumu nelaemene, mabu nanitabola, 666 naba ebe Iya Ololonomo Inamabuno nabala.

## 14

### *Sipi-goeo Da:peso Ega:walo Ebena Epo Ibino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Yelusalema kawo duliyomolono unu damelalo\* Sipi-goeo Da:pesote ebena 144 taoseni epago lamota:onalalo ebo ulaimo. Nanitabola, ebe epono wato kaliamo ebete ebena mailo ega:walo ebena Nabiwino mailo iyalo akulolelamiya. <sup>2</sup> Ebena Godokono Unu Duliyomolone da:pi, nale tabo madodo idi ebo olowimo, ebe tabo madodo ebe elawonomola, obo kawonomono diyamo ega:walo tobolono gewata diyamo keba kunula:ka: eba kunula, wiyasiya nale walo da:kemalagidilimo ebe tabo wadenoma: gimo, epate begube kapimiya keba kunu ka:modonake eba kunu. <sup>3</sup> Ebe tetelo nale 144 taoseni nanitabokobi midipino tanalo ma kunu uimo, iba:te Godokono Kawo Elawodawano okoli baino dopo apulo ega:walo ebena netewa-netewa Nopopi Iyanomono ololo apulo ega:walo 24 Watowatopino ololo apulo eba lamota:onalalo oli oale alapiya. Nanitabola, opo duliyomolo epo bilibilinomo magumulo ebe 144 taoseni epo kapiyate ebe oli oale alapioma: modobola, mabu Kawodawate ibino igilo wiyaolete Saitanakono idoko motone ebo wagailiya. <sup>4</sup> Me epo ebe kebe dubate ibi a:ka:tuwa: ibino ape talenama: eba midililo kamiyala:go kapiyama: keda:onakia: me ebe dubula, iyo, iba:te kamiyale kuwatoliya:. Ebema: nanitabola, Sipi-goeo Da:pesote kebamo da:tonako iba:te ebe ebamo gito waloma:tanaka, mabu ebete opo duliyomolo epo bilibilinomo magumulo kebe epo Saitanakono idoko motone dowagailiya ebe epo me ebe epola. Iyo, ebe ega:walo Godoko ibi netewapino wade palinomono dopo nao inamabu keba kunula:ka:, me 144 taoseni epo ibi eba kunula, <sup>5</sup> ibino tabo magumulo a:da: elemasigi tanalo puliyanomola, ega:walo ibino osiyodilole magumulo ibi tuputupunomoma: eba eda:olo kuba idite iba:godolo kitana:.

### *Godokono Netewa-kapiya Nopopino Tabo Gela Tanalo*

<sup>6</sup> Ebema: naimano balidite iyama: deda:onami ebe tanalote olopoligoa:no, nale Godokono nopodawa idite tobolo unudo a:wa:lubitale ebo uimo, ebe Godokono uwomua: uwomua: teteno Wade Tabo atedawala. Ebema: piyate iyaiya opolo ega:walo iyaiya tama epo magumulo ega:walo iyaiya tabo gela taneba magumulo dilukuliona, ebe epo bilibilinomatamo me nopodawate Godokono tabo ka:na:kiyawaomene. <sup>7</sup> Ebena ebete kawonomamo negi, “Modobola la: bilibilinomo Godoko tolemelo ebe unamo nadipata:la:, mabu tete a:pe ebete opo duliyomolo epono tanalo bilibilinomo kanagilamele-laema:. Modobola la: bilibilinomo ebe namamata:la:, mabu opo duliyomolo ega:walo tobolo unu, kewa: kawokawo kolomo ega:walo gito peka:ka:liyaole obo egege, ebe me tanalo bilibilinomo Osiyodilole dawala.”

<sup>8</sup> Ebena me dopo nopodawano tabote dolopoligi, ebe tetelo nale idawano tabo ma kunu kolowimo, “Ba:baloni duliyomolo kawonomo niyala! Dopamo ebena epate ibino kateneno iyaiya kuba ubi tanalamo epo epetapi bilibilinomo ebo kubailamenakiya, lumagite gamoda obo iditamo ikamelo

\* **14:1:** Buka ka:la:mioledawa, modobola a:ma: niyatawa, Yelusalema duliyomolono mailo idi ebe Sayonola.



keba kunu ka:kubaiminakole eba kunu. Nanitabola, dopamo tetelo epate negelanakiya ebe kawo duliynomolo elawonomola, wiyasiya me tetelo Godokono dowa magumulo ebe a:kubadiga!”

<sup>9</sup> Ebene me nopodawano tabote dolopoligi, ebe tetelo nale idawano tabo ebe kolowimo, ebe netewa-kapiya tete dawama: dedi ebe dawala. Ebete tabo kawonomamo ma kunu gi, “Potele Iya Ololonomo Inamabuno pukala ebenu wato kalilo o kotolo lawete ebe Inamabuno ida:da:li damamatemene, <sup>10</sup> Godote ebe lumagitamo ebenu kawo dowanomo kalili nanitabolo kikaemene, ebete ebenu nio magumulo dopoliyamene ebenu tanalo gito ka:kubadigama:. Nanitabola, ebenu kuba osiyodilole mabuma: ebe lumagite Sipi-goeo Da:peso ega:walo ebenu wade-talena nopopino ololo apulo kawokawo temeteme kuwatemene, mabu ebete elawo elanomo magumulo ega:walo kuba nibonomo maiga magumulo ebo ka:na:lutamene. <sup>11</sup> Ebema: ebete kebolo ka:lutamene ebe Ela Opono temate ununomamo eba odololo, egela ega:walo idoko bilibilinomolo ela ami tete da:pesonomo a:kuimene, iyo, ebete Iya Ololonomo Inamabu ebenu ida:da:liago eba amamalatenalo ebenu mailono pukala ebenu ape unulo kalakalago delawi, ebe mabuma: ebete kawokawo temeteme magumulo uwomua: uwomua: tetelo bokolinamene.”

<sup>12</sup> Me ebe mabuma: na Yonete gemo, piyate Godokono totomu tabamo tudila:o mabuma: temeteme duwatema:na:, modobola iba:te Ya:suko nanitabokobi midi magumulo kodakodalo eba lamota:onalalo elawoa:noma: akoeda:oala:.

<sup>13</sup> Ebene tabo madodo idi Unu Duliynomolone da:pi nale ma kunu olowimo, “A:ma: naimano tabo bukamo ma kunu nakulola:, me tetene wagilimite uwomu egela teta:mo nemaiga, piyate Kawodawa Ya:suko nanitabokobi midi mabuma: da:elaoma:na:, iba:te nekalakalaoma:na:!”

Ebenu Godokono Uliyanate natamo tabo ma kunu kiyawai, “Nanitabola, iba:te kawonomamo kekalakalaoma:na:! Iba:te natamo kebe mibomibo woko dosiyodilolenakiya ebe woko magumune wadewade nolo da:ima:te a:pemaimionakiya, ebema: iba:te ebe woko magumune wade ela kamioma:na:.”

### *Godote Opo Duliynomolo Epono Tanalo Anagilamelelame Tanalo*

<sup>14</sup> Ebema: naimano balidite iyama: deda:onami ebe tanalote olopoligoa:no, nale naimano dopo apulo Kawodawate tobolono keyakeya tema unulo lutalo ebo uimo. Ebe Kawodawano ape opo lumagino ape keba kunula:ka: eba kunula, ega:walo ebete ebenu watamo kawo elawodubuno golodo kekelekele inamabu pulite ebenu kotolo witi-laiso otoleno ilo gilite itameni. <sup>15</sup> Ebene Godokono Unu Duliynomololo ditana ebe Amamateno Iya Moto magumune nopodawa idite pemaigate, tema unulo da:luti ebe Kawodawatamo kawonomamo na:pegi, “Tete a:pe! Modobola a:ma: a:imano gila:mo opo duliynomolono witi-laiso bilibilinomo notola:, mabu ebe inamabuate nanitabonomolo a:kodakodaiya!” <sup>16</sup> Ebema: potele tema unulo da:luti ebe Kawodawate ebenu witi-laiso otoleno gili adipatete opo duliynomolodo dapatanati ebe inamabu bilibilinomo otolete gito uwatoli.

<sup>17</sup> Ebene Godoko Amamateno Iya Moto magumune nopodawa idite da:pemaigi, ebenu kotolo gala:ipi da:imi tapiono ilo gilite itameni. <sup>18</sup> Ebe tetelo Godoko watidilono patapata tamene ebenu nopodawa idite ka:pemaigi, ebe Godotamo kalimagono ikameono ela namutudawala. Ebene ebete gala:ipi da:imi tapiono gila:godawatamo kawonomamo negi, “Opo duliynomolono pali kawonomolo gala:ipi da:ima:te nanitabonomolo

a:gumigumiya! Ebema: modobola a:ma: a:imano gila:mo ebe da:imi bilibilinomo netapia!”<sup>19</sup> Ebema: gila:godawate ebena gili da:midai, ebete opo duliomolono palino gala:ipi da:imi bilibilinomo tapiote Godote dopamo kawonomamo doboiya ebe da:imi ii egediolenokola bobo magumamo gito niyaleki, mabu ebe bobolo Godote kuba osiyodilolepiatamo ebena kawo dowanomo kawokalimene.<sup>20</sup> Ebene Godokono Yelusalema kawo duliomolo niyakabolo ebena wokopiate ebe gala:ipi da:imi bilibilinomo agowamo eba mikitaolelo, ibino ape magumune kalimakalima obonomote kalima keba kunula:ka: eba kunu kawonomamo peka:ka:liti. Ebe tetelo ebe obono kulukulu ebe kolomo da:pesono kulukulu keba kunula:ka: eba kunula, iyo, ebe obote oso-goeono wato teta:mo eba nodololo 300 kilomitama: eda:te ebo neka:ka:li.

## 15

### *Godote Uwomu Sebeni Kawokawo Temeteme Opo Duliomolamo Dapalibolemene Ebe Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Godokono Unu Duliomololo anoano tanalo kawonomo idi ma kunu uimo, ebena sebeni nopopiate opo duliomolo epatamo sebeni kawokawo temeteme tanalo kikalaema: ebolo lamota:oniya. Nanitabola, iba:te uwomu tetenomolo opo duliomolamo ebe temeteme tanalo palibole dolopoligomene, ebe tetelo Godokono kawo dowanomo tanalote atumu ka:kolopoligomene.

<sup>2</sup> Ebene nale a:la:uli obo paka: kawonomote ditani ebo uimo, ebe magumune mole a:la:uwa:mida tanalate maimiya, ela keba kunula:ka: eba kunula. Ega:walo ebe obo paka: niyakabolo delamota:oniya, nale ebe nanitabokobi midipiate Godokono begube ibino kotolo pola:lamenalo kulaimo, ebe epo ibi piyate Iya Ololonomo Inamabuno wato kikopu delawiya ebe tuputupupila, iyo, iba:te gowelao magumulo ebe Inamabuno ololo ida:da:li ega:walo ebena mailono 666 naba a:kubailamiya.<sup>3</sup> Ebema: Mosesete kebe oale ebena woko namutudawa Godoko amamatema: dosiyodiliya, ebe oale ebe atumu Sipi-goeo Da:pesono oalela, ebe tuputupupiate ebe oale eba alapiolo ma kunu geliya,

“Kawodawa Godo, a:ma: ebe Elawodawanomolata!  
 A:ma:le kebe kawokawo tanalo dosiyodilola:wena  
 ebe tanalo anoano-ibinomola!  
 A:ma: kapiya ebe uwomua: teteno Kawo Elawodawalata!  
 A:imano osiyodilole gabo  
 ebe tuputupunomola ega:walo nanitabonomola!

<sup>4</sup> “O Kawodawa, a:ma: kapiyate Wade-talena Dawama: eda:nata,  
 ebema: epo bilibilinomate a:ma: tolemelo  
 a:imano mailo unamo badipatenakoma:na:!  
 Iyo, a:imano tuputupu osiyodilole tanalo  
 opo duliomolo epatamo awokalilamiyata,  
 ebema: iyaiya opo epo bilibilinomate  
 a:ma: amamatema: ka:pelamolema:na:!”

<sup>5</sup> Ebene ebe tanalo dolopoligi, Godokono sipi-goeo tama awokowiamida Talena Motote Yu epono ewoniagodolo da:enami, ebe Moto nale Unu Duliomololo ma kunu uimo, ebe Moto tetenomolo ditana ebe Talena Bainomo

Godote gito a:iyamidi. <sup>6</sup> Ebema: piyagodolo elawo ditani sebeni kawokawo temeteme opo duliyoumolamo kapalibolema:, ebe sebeni nopopiate Talena Moto gune ebo pemaimiya, ibi keyakeyanomo wadewade kaliku pupulila, ega:walo ibino bodolo tetelo da:pola:lameni ebe gabigabi ebe wiya kawokawonomo inamabula. <sup>7</sup> Ebene Godokono netewa-netewa Nopopi Iyanomo magumune kapiya idite me sebeni nopopiatamo pemaigate iba:tamo sebeni golodo kalili gito pikalami, ebe kalili ebe uwomua: tetelo digilona ebe Kawodawa Godokono dowo tanalo kawonomamo tabokailamela. <sup>8</sup> Ebe tetelo Godokono kawo alonomo ega:walo ebena elawote ebena Talena Moto eba tabokaimilo temate kawonomamo ebo odoli, ebema: nanitabola, sebeni nopopiate opo duliyoumolamo kawokawo temeteme dapalibolema:na:, ebe woko iba:godolo opoliya:no idawate ebe Talena Moto guamo opegama: a:ka:modobomene.

## 16

### *Godokono Kawo Dowanomo Tanalono Sebeni Kalilino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, Godokono Talena Motone tabo madodote sebeni nopopiatamo kawonomamo degi nale ma kunu olowimo, “La: tolama:wete Godokono kawo dowanomo tanalono sebeni kalili opo duliyoumolo epatamo na:nowadipapalamiala:!”

<sup>2</sup> Ebema: dopo nopodawanomote tote ebena kalili opo duliyoumolamo danadipani, ebe tetelo piyate Iya Ololonomo Inamabu amamatelo ebena pukala ibino apelo delawiya, ebe epono apene kawokawo kaniate eba maimiolo ibino temeteme kawonomoma: ebo eda:olami.

<sup>3</sup> Ebene nopodawa idite ebena kalili opo duliyoumolono kewa: kolomamo danadipani, ebe netewa kalilima: eba eda:lo kewa: kolomono obote a:e lumagino kalimama: eda:te, ebe obo magumulo digilona ebe inamabu bilibilinomate gito a:elaiya.

<sup>4</sup> Ebene nopodawa idite ebena kalili opo duliyoumolono iyaiya kolomo tuli ega:walo obo guli unamo danadipani, ebe netewa-kapiya kalilima: eba eda:lo epono nio obote kalimanomoma: ebo eda:olami. <sup>5</sup> Ebema: opo kawonomono obo watodawama: deda:na, ebe nopodawate tabo Kawodawatamo degi, na Yonete ma kunu olowimo, “Wade-talena Dawa, opo wagilimia:no a:ma: dopamo okolinamiyata, ega:walo me tetelo a:ma: nokolinata! Nanitabola, a:imano elawo magumulo opo duliyoumolo epatamo kebe iyaiya tanalo dosiyodilola:wa: ebe tanalo tuputupunomola, <sup>6</sup> mabu iba:te a:imano woki awokalimipi ega:walo nanitabokobi midipi epetapi eba anakapulamelolo ibino kalimate opamo eka:ka:liyaolamiya. Ebe mabuma: a:ma:le iba:tamo kalima ikalama:ta, iyo, iba:te da:nioma:na: ibino kuba osiyodilole mabuma: modobo wiya ebo kuwatema:na:.”

<sup>7</sup> Ebene piyate dopamo Ya:suko mabuma: da:elaiya, nale ebe epono tabo madodote Godoko watidilono patapata magumune demaigi ma kunu olowimo, “Kawodawa Godo, a:ma: ebe Elawonomodawalata! A:imano osiyodilole tanalo tuputupu-ibinomola!”

<sup>8</sup> Ebene nopodawa idite ebena kalili egela unamo danadipani, ebe netewa-netewa kalilima: eba eda:lo egelate enaenanomoma: eda:lo opo duliyoumolo epatamo temeteme kawonomo ebo ikalami. <sup>9</sup> Ebema: iba:te egelano kawo temeteme magumulo eba ilukulinalo ebo iyatawaiya, ibino iyaiya kawokawo temeteme tanalate Godogodone pemaimiya. Ebe mabuma: iba:te dowo magumulo ebena mailoma: kubakuba tabo

kiyawaiya, wiyasiya ibi ubia:nola ibino kuba osiyodilole magumune ebetamo olobila:ote ebe kowalogoma:.

<sup>10-11</sup> Ebene nopodawa idite ebene kalili Iya Ololonomo Inamabuno kawo elawodubuno okoli baiamo danadipani, ebe paibu kalilima: edi. Ebema: ebe Kubadawano opote idokonomoma: dedi, ebe tetelo opo duliyo-molo epono kawokawo kanino temeteme mabuma: iba:te ibino mena eba aluwataolelo, Unu Duliyo-mololo dokolina ebe Kawodawa Godokono tanaloma: kubakuba tabonomo gelate, iba:te ubia:noma: ebo eda:iya ibino kuba osiyodilole tanalone ebetamo olobila:ma:.

<sup>12</sup> Ebene nopodawa idite ebene kalili Yupala:itisi kawo tuli unamo danadipani, ebe sikisi kalilima: eba eda:lo ebe tulino obote a:pa:enomo gito a:pa:i. Ebe mabuma: egelate da:pemaiganako eba apulo dilukuliona, kawokawo elawodubu epetapiate ebe kawo tulino gagale damelado pelamiya opo duliyo-molo epo epetapiago ka:pa:gowelaoma:. <sup>13</sup> Ebe tetelo na Yonete kubakuba uliyana netewa-kapiyate talotalono ololamo eba maimiutalo ebo ulaimo, idite Atelalo Kawonomono tabo magumune pemaigate, ega:walo idite Iya Ololonomo Inamabuno tabo magumune ka:pemaigate, ega:walo idite Godokono mailamo A:da: Elemasigi Tabo Kiyawaodawano tabo magumune akopemaigi. <sup>14</sup> Nanitabola, ibi Saitanakono kubakuba uliyana epetapila. Iyo, iba:godolo ebene elawote itana ebene anoano tanalo kosiyodilolema:, ebema: iba:te opo duliyo-molo kawonomamo ka:tolaema:na:, iyaiya opono kawokawo elawodubu bilibilinomo kapiya baiamo magaelete, iba:te Elawodawanomo Godokono Kawo Egelalo epetapiate epetapiago ka:gowelaoma:.

<sup>15</sup> Ebe mabuma: Kawodawa Ya:sute ebene epatamo ma kunu gita, “Umumita:la! La:le iyatawa: tetelo nale la:tamo ka:pemamo, pilo dubute epono inamabu uwatema: keba kunu ka:penakole eba kunu. Ebema: potele naimano pe tanaloma: olowiolo dokolina ebete nekalakalamene, mabu pilo dawate ebene wadewade kaliku a:kuwatemene, ebene ebete epono ololo apulo kikopiya a:kepata:mene.”

<sup>16</sup> Ebe tetelo Saitanakono netewa-kapiya kubakuba uliyanate opo duliyo-molo epono kawokawo elawodubu bilibilinomo ibino gowelao baiamo gito magaeliya, ebe opono mailo Yu epono tabamo Amagedonela.

<sup>17</sup> Ebene nopodawa idite ebene kalili tobolo unamo danadipani, ebe sebeni kalilima: edi. Ebema: Godoko Amamateno Iya Motolo ditana, ebe Kawo Elawodawano okoli baine tabo madodote kawonomamo ma kunu pemaigi, “Taula, naimano woko olopoligo!” <sup>18</sup> Ebe tetelo tobolono iyaiya gewataole tanalo ega:walo mole a:la:uwa:midaole tanalate maimiya, ebene mumulu kawonomote opo duliyo-molamo pi. Nanitabola, Godote epo osiyodilolete ibi opo duliyo-molamo dalomiya, ebe tetene wagilimite me teta:mo pemaiga, iba:te ebako mumulu kuminakia: mabu ebe mumulu elawonomola. <sup>19</sup> Ebe mabuma: Ba:baloni kawo duliyo-molote netewa-kapiya teta:mo iyaiya bolaliyaote, ebene opo epetapino kawokawo duliyo-molate atumu gito ka:kubakubaiya. Eba kunu Godote Ba:baloni duliyo-molo epono kawokawo kuba osiyodilole tanalo eba malagidilolelo, ebete wiya iba:tamo gito ikalami, iyo, ibi bilibilinomate Godokono kawo dowo tanalonomo kalili eba niolo ebo opoliyadigiya. <sup>20</sup> Ebene opo duliyo-molo kawonomono damela unuununomo bilibilinomate olopoligonomo eba olopoligolo, atu tetelo kewa: kolomolo da:pola:na ebe iyaiya mamoko opo bilibilinomate obo magumamo gito ololuadigaiya. <sup>21</sup> Ega:walo kawokawo nokola keba

kunula:ka: ebako ulama kikopuate opo duliynomolo epatamo kawonomo mamotobolo unune dowi, ebe ulama kikopuno mibo ebe 50 kilogalamala. Nanitabola, ebe iya ulamanomono mabuma: epono temetemetekubanomoma: eba eda:lo, iba:te dowate Godokono tanaloma: kubakubatabo ebo geliya.

## 17

### *Dubu Bilibili Kamiyale Ega:walo Iya Ololonomo Inamabu Ibino Tanalo*

<sup>1</sup> Ebe tetelo Godokono kawo dowanomo kalila:go nopopi sebeni magumulo idite na Yonetamo pete natamo tabo ma kunu pegi, “A:ma:le tanalo idi uima: mamona:pa: Nale a:ma: kiyatuimamota, Godote Dubu Bilibili Kamiyaletamo ebenu kuba wiya keba kunu na:kikaemene. Ebe Kamiyaleno tanalo a:ma: na:puma:, ebe epate kawokawo kolomo tuli iyaiya tametamelo dosiyodiliya ebe kawonomo amama duliynomolola. <sup>2</sup> Nanitabola, opo duliynomolono kawokawo elawodubate ebe Kamiyaletamo pelamenakiya, iyaiya tetelo iba:te eba:go kapiyama: eba peda:onalo ibino kateneno kubakuba ubi tanalo ebo ka:posiyodilolenakoma:. Iyo, opo duliynomolo epate eba:go kapiyama: da:peda:onakiya iba:te ebo daedaleonakiya, dubate gamoda kawonomamo da:nionaka eba kunu.”

<sup>3</sup> Ebene nopodawate Godokono Uliyanano elawamo na bulu opamo demagatani, ebe tetelo nale ebe Kamiyalete Kalimakalima Iyanomo Inamabuno unulo okolitalo ebo nuimo. Ebe Kalimakalima Inamabuno tanalo ma kunula, ebe sebeni watagonola ega:walo teni kalitagonola, ega:walo ebete ebenu ape unamo Godoko malogoma: mailo bilibilonomo iyalo akuloliya. <sup>4</sup> Ebene ebe unulo dokoliti ebe Kamiyale kalimakalima kaliku pupulila, kawo elawo kamiyalete inamabu keba kunu ka:pupulionakole eba kunu, ega:walo ebenu kuwokobelo iyaiya golodo ega:walo wadewade a:la:uwa:da:ole nokola ega:walo negege tulukaula na:pola:meni. Ebene ebenu kotolo ditani nale ebe golodo kalili ebo uimo, ebe kalili ebe ebenu kateneno iyaiya kuba ubi tanalo ega:walo daley ubi tanalo tabokanomola. <sup>5</sup> Ebema: ebete ebenu wato kaliamo ebenu mailo iyalo akuloliya ma kunu, “Na ebe Ba:baloni kawo duliynomolola, naimano elawo kawonomola!” Ega:walo ebete ebe mailono magumu awokalimite walo ma kunu kakuloliya, “Na ebe dubu bilibili kamiyaleno Menokola, ebenu nagodone kateneno iyaiya kubakuba ubi tanalo bilibilinomate maimionaka!”

<sup>6</sup> Ebene nale ebe Kamiyaleno tanalo walo da:kuimo me tanalo ebo iyatawimo, epate Ya:suko waloma:tapi magumulo kebe epo kanakapulamenaki, ebete ebe nanitabokobi midipino kalima da:nionaki daedalema: ebema: edi, lumagite gamoda kawonomamo da:ninako eba kunu.

Nanitabola, nale ebe Kamiyaleno iyaiya tanalo dulaimo ebema: kawonomamo anoanutimo. <sup>7</sup> Ebene nopodawate natamo negi, “A:ma: beda: mabuma: kanoanawita? Me Kamiyaleno magumu tanalo nale a:ma: kiyatuimamota, ega:walo kebe inamabute ebe daguwatanako ebe sebeni watagono ega:walo teni kalitagono Inamabuno tanalo atumu ka:kiyatuimamota. <sup>8</sup> Ebe Kalimakalima Inamabute opo duliynomololo dopamo okolinami wiyasiya ka:lo ebolo ka:luta:. Tete tatalila ebete Idoko Bobo Kawonomo magumune walo da:kemaigamene opo duliynomolo epatamo ebenu igilago awokala ebo ka:pemaigamene, mabu Godote ubi iyalo iyatiya opono uwomu tetelo ebe nanitabolo ka:kubaima:. Wiyasiya Godote ebe kubaimia:no, dopamo nanitabokobi midia:piate ebe Inamabuno tanaloma: kawonomamo kanoanoma:na:, mabu ebete dopamo okolinami, ebenu ebenu tanalo dolopoligi wiyasiya iba:tamo walo na:kemaigana.



Ebema: me tanalo nanitabola, Godote opo duliyo-molo osiyodiloo: no ebenu tuputupupino mailo Igilo Bukamo dopamo dakulolelamiya, Kalimakalima Inamabu amamatepino mailote ebe Bukalo a:ka:pola:lamenama:na.

<sup>9</sup> “A:ma: nolowia, me mulo kimalagidolo tanalola. Kalimakalima Inamabuno sebeni wato ebe sebeni damelala, opo duliyo-molo epate ebe damela unamo ibino kawo duliyo-molo iyalo osiyodilote, me tetelo Dubu Bilibili Kamiyalete ebe damela unulo okolita. Ega:walo sebeni watono magumu idi ma kunula, ibi ebe sebeni kawokawo elawodubula. <sup>10</sup> Me sebeni kawokawo elawodubu magumulo paibate iyalo olopoligiya, wiyasiya me tetelo idite opo duliyo-mololo bokolina ega:walo idite walone ka:ka:pemaigamene, ebenu ebe uwomudawate da:pemene ebenu kawo elawodubuno tanalote tete da:pesolo kitanamene. <sup>11</sup> Nanitabola, kebe dawate dopamo da:i ebe Kalimakalima Inamabute walo da:kemaigamene, ebenu kawo elawodubuno tanalote eba itanalo ebete naba a:iti tetedawama: keda:mene. Ebete dopamo eba okolinalo dopo sebeni kawokawo elawodubu magumulo idima: eda:nami, wiyasiya ka:lo ebe opolo ka:luta:. Ebema: nanitabola, ebete ebenu atu kawo elawodubuno gobebobo laema: walo ka:kemaigamene, ebenu opono uwomu tetelo Godote ebe gito ka:kubaimene.

<sup>12</sup> “Ega:walo me tanalo idila. A:ma:le dulama:wa: ebe teni kalita ebe teni opo epetapino kawokawo elawodubula, iba:te tete tatalila Kalimakalima Inamabuago elawo kelaema:na: iba:te eba:go opo duliyo-molo epono kawokawopima: kapimiya keda:oma:. Nanitabola, Godote iba:tamo tete da:peso kikalaemene, iba:te ibino kawokawo elawodubuno gobebobolo eba pola:nalo <sup>13</sup> Kalimakalima Inamabuago woki kapiyama: eda:ote ebenu iyaiya ubi tanalamo ebo ka:tudila:oma:na:. <sup>14</sup> Ebema: iba:te ibino gowelaopi bilibilinomago kapiyakobi olowite Sipi-goeo Da:pesago eba pegowelaolo, ebete wiyasiya ibino wato kikopu gito kelaemene mabu opo duliyo-molo epono kawokawopi ega:walo elawodubu bilibilinomo magumulo ebe kapiya Kawodawanomola, iyo, ebe kapiya ebe Kawo Elawodubula! Ebe mabuma: ebete iyalo tetelo kebe epo ebenu nani waloma:tapima: keda:onama: deka:la:mioliya, ebe nanitabokobi midipiate atumu wato kikopu nanitabolo ka:kelaema:na:.”

<sup>15</sup> Ebenu Godokono nopodawate natamo tabo idi ma kunu gi, “A:ma:le ka:ma: dulama:wa: ebe kawokawo iyaiya kolomo tulino tanalo ma kunula. Dubu Bilibili Kamiyaleno kawo duliyo-molote ebe kolomo tuli tametamelo itana, ebema: ebe iyaiya kolomo tuli ebe opo duliyo-molo kawonomono iyaiya epo bilibilinomola ega:walo ebe epono iyaiya opola ega:walo ebe epono iyaiya tabo gela tanebala. <sup>16</sup> Ega:walo Kalimakalima Inamabuno teni kalita a:ma:le dulama:wa: ebe kawokawo elawodubuno tanalo ma kunula. Iba:te Kalimakalima Inamabuago Dubu Bilibili Kamiyale-tamo kawonomamo eba dowao ebenu kaliku pupukulamelemete, ebenu inamabu ega:walo mani ebegodone elawamo uwatemetete, ebenu ebe danakapuima:na: ebenu katene naomete ebe elamo gito keba:idiloma:na:. <sup>17</sup> Nanitabola, Godote dopamo kebe ubi tanalo kiyatiyale ebete ebe woki kawokawo elawodubuno tepo magumamo diyatimene, ebema: iba:te ibino woki kapiyama: eda:ote Kalimakalima Inamabutamo ka:tudila:oma:na:, ebete ibido ebenu iyaiya ubi tanalo opo epatamo ka:posiyodilolema:. Ebenu Godote dopamo kebe tanalate maimioma: degiya, ebe tanalo bilibilinomate nanitabolo maimiote dolopoligoma:na:, ebe kawokawo elawodubuno elawote ebe atu tetenu uwomuamo ka:nemaigate ebo ka:ka:nolopoligoma:na:. <sup>18</sup> Ega:walo kapiya tanalo idi ma kunula. A:ma:le duma:wa: ebe Dubu Bilibili

Kamiyale, ebe opo duliynomolono amama duliynomolo kawonomola, iyaiya opo epetapino kawokawo elawodubu bilibilinomate ebe duliynomolono Kawo Elawodubuno iyaiya ubi tanalamo a:tudila:onaka.”

## 18

### *Godote Ba:baloni Kawo Duliynomolotamo Kuba Wiya Ikame Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Godokono nopodawa idite Unu Duliynomolone piwisigitalo ebo uimo, ebene elawo kawonomola ega:walo ebene alote opo kawonomo a:pukuiamidi. <sup>2</sup> Ebene ebete ebene tabo madodo unamo adipatelo negi, “Ba:baloni duliynomolo kawonomo niyala, mabu Godokono dowo magumulo ebe a:kubadiga! Numa:la:, me tetelo epate ebe magumulo kilukulina:, wiyasiya kubakuba uliyana bilibilinomo ega:walo katene abale denalenaka ebakobako olaola bilibilinomo, ibi kapiyate ebolo ba:pola:na! <sup>3</sup> Iyaiya opo epo bilibilinomate Ba:balonigodone kateneno kuba osiyodilole tanalono woki duwatanakiya, ebema: ebene kuba osiyodilole tanalo ebe gamoda nio tanalo keba kunula:ka: eba kunula, iyo, piyate Ba:balonino osiyodilole magumamo da:niwitionakiya iba:te gito nedaedaleonakiya. Ebene opo duliynomolono kawokawo elawodubate atumu ibino kateneno ubi magumulo ebetamo pelamenakiya, dubate dubu bilibili kamiyale-tamo keba kunu ka:pelamenake eba kunu, ega:walo opo duliynomolono kawokawo bisnisi osiyodilolepiate atumu ebe duliynomolono kateneno ubi gabodo ebetamo pelamenakiya ibino inamabu kawonomamo eba:go ka:pedogodogoilaema.”

<sup>4</sup> Ebe tetelo Godokono tabo madodote Unu Duliynomolone pitalo na Yonete ma kunu olowimo,

“Naimano epala:,

modobola la: Ba:baloni duliynomolone na:nemaimiala:!

Na ubia:nola la: ebene kuba osiyodilole tanalago

kapiyama: eda:oma:,

iyo, na ubia:nola la: ebene kuba osiyodilole mabuma:

wiya eba:go uwatema:!

<sup>5</sup> Nanitabola, ebene kuba osiyodilole tanalate

bilibilinomoma: eda:omiya,

ebe kubate idi unamo idi unamo eba podololo

naimano Unu Duliynomolo a:pologi,

ebema: na Godote ebene osiyodilole tanalo eba malagidilolememo

wiya ebetamo nanitabolo kikaemamo.”

<sup>6</sup> Ebene Godote tabo walo eba kegitalo na Yonete ma kunu kolowimo,

“Modobola la: Ba:baloni duliynomolotamo

ebene kuba wiya nikama:la:,

ebete epetapiatamo temeteme

keba kunu kikalamenakile eba kunu,

ebene la:le ebene dopo wiya modobolo dikama:ema,

modobola la: ebetamo tete idilo

walo kawonomamo na:kikamiyala:!

Ega:walo ebete epo epetapi

ka:kubailaema: dosiyodiliya,

modobola la: ebe elawo gamoda kalili lawa:wete,

wiyasiya ebetamo nikamiyala: ebete ka:nima:  
 ebene ebete ebe kalili da:nimene,  
 modobola la: tete idilo walo na:kikamiyala:  
 ebete daedalema: eda:te kubanomoma: keda:ma:!

7 “Ebete a:ka:tuwa: ebe walogolo inamabu  
 keba kunu ka:dogodogoilamenamile,  
 modobola la: ebako temeteme bilibilinomo  
 ebetamo nikameala:  
 mabu ebete ebenu tepo magumulo negena,  
 ‘Na modobola, na me opono Kawo Elawo Kamiyalela!  
 Ega:walo na amolea:, na dubu bilibila:godawala,  
 na uwomua: tetelo ii tanalo a:kiyatawanamo!’

8 “Ebema: numa:la:, ebenu amama tanaloma:  
 ebete egela kapiyalo na Kawodawa Godogodone  
 temeteme bilibilinomo kuwatemene!  
 Iyo, na Elawodawanomola,  
 ebema: nale ebenu tanalo eba anagilamelemelo  
 ebetamo gabugabu tanalo ega:walo ii tanalo  
 ega:walo baea: tanalo ikameote  
 ela ebo kapalibomamo ebe elate kenama:!”

9 Nanitabola, Godote Ba:baloni duliyoumolotamo kuba wiya dikameomene, ebe tetelo opo duliyoumolo epono kawokawo elawodubate ebe elate eba nitalo duima:na: iba:te ebe ebo ka:liyaema:na:, iyo, iba:te ibino kateneno kuba ubi gabodo eba:go kapiyama: eda:olo kubakuba tanalo dosiyodilolenakiya, ebema: iba:te ebe ela tema umilo gito kiimitama:na:.  
 10 Ebe tetelo iba:te atu kuba wiya laema: eba toletoleolo mulune putititate ma kunu ka:pegelama:na:, “Ba:baloni duliyoumolo kawonomo, a:ma: niyalata! Dopamo a:ma: elawonomoma: eda:namiyata, wiyasiya Godote a:ma:tamo wiya eba ikamelo a:ma: a:kubadigata!”

11 Ebema: kawokawo bisnisi osiyodilolepiate atumu ebe liyamelo kiimitama:na:, mabu opo duliyoumolo epate ibino olowame inamabu walo a:kuwatanakoma:na:.  
 12 Iyo, ibino golodo ega:walo siliba mani, ibino wadewade a:la:uwa:da:ole nokola ega:walo negege inamabu, ibino wadewade keyakeya ega:walo kalimakalima pupuliono inamabu, ibino iyaiya kodakodanomo kewa ega:walo wadewade nibo kewa, iba:te me inamabu bilibilinomo walo a:kolowamenakoma:na:. Ega:walo iba:te ebakobako wadewade kewamo ega:walo auli inamabuamo ega:walo goeogoeono kalitamo ega:walo keyakeyanomo nokolamo dosiyodilolena, ebe iyaiya wiya kawokawonomo inamabu iba:te atumu walo a:kolowamenakoma:na:.  
 13 Ega:walo ibino iyaiya wade nibo maimio inamabu bilibilinomo, ibino gala:ipi da:imi obo ega:walo olibi kikopuno gadi ii, ibino palowa bae ega:walo witi-laiso, ibino kau-goeogoeo ega:walo sipi-goeogoeo, ibino oso-goeogoeo ega:walo osago dowapata:lamenaka ebe sa:liyota-pe, ibino wiya: wokopi maniamo ega:walo gowelao tanalamo duwatanaka, me iyaiya inamabu ega:walo epo iba:te atumu nanitabonomolo walo a:kolowamenakoma:na:.

14 Ebema: ebe kawokawo bisnisi osiyodilolepiate Ba:baloni duliyoumolotamo kegelama:na:, “A:ma: kateneno ubi tanalamo da:dogodogoilama:wenamuya, ebe wadewade inamabu bilibilinomate a:ma:godone alatidia. Nanitabola, a:ma: uwomua: uwomua: tetelo

motono wadewade a:la:ulio inamabu ega:walo gadigadi inamabu walo a:kulama:wenakomene!”<sup>15</sup> Iyo, ebema: Godote Ba:baloni duliynomolotamo kuba wiya dikameomene, kebe dubate ibino woko osiyodilo magumulo eba:go kawokawo inamabu da:dogodogoilamenamiya, iba:te atu kuba wiya laema: eba toletoleolo mulune putitatate ebene tanaloma: ebo kiimitama:na:. Iba:te ebe liyamelo<sup>16</sup> ma kunu kegelama:na:, “Me duliynomolo kawonomo niyala! Dopamo ebete wadewade keyakeya ega:walo kalimakalima kaliku pupulinaki, ebene ebene kuwokobelo iyaiya golodo ega:walo wadewade a:la:uwa:da:ole nokola ega:walo negege tulukaula na:pola:menami,<sup>17</sup> wiyasiya Godote ebetamo wiya eba ikamelo ebene dogodogo inamabu bilibilinomate gito olopoligadigaoma!”

Ega:walo atu tetelo kawokawo peno namutupi ega:walo ibino wokopi ega:walo piyate kewa: kolomolo bisnisi woko osiyodilolema: iyaiya dowapata:lamena, ibi bilibilinomate mulune putitatate<sup>18</sup> kawo duliynomolo elate eba nitalo da:puima:na: ebo kiimitama:na:. Iba:te ela tema umilo ma kunu kegelama:na:, “Me duliynomolo kawonomono elawote dopamo ditanami beda: kawonomola:ka! Ebe tetelo ebako ololo duliynomolo idite kitanamia!”<sup>19</sup> Ebene iba:te ibino tepo temeteme kawokalima: damela tuwae ibino watamo iyalekeote Ba:baloni liyamelo walo ka:kegelama:na:, “Me duliynomolo kawonomo niyala! Dopamo kewa: kolomolo dowapata:lamenamiya, ebe kawokawo peno namutupi bilibilinomate ebegodolo inamabu bilibila:gopima: eda:onamiya, wiyasiya Godote ebetamo wiya eba ikamelo ebene inamabu bilibilinomate gito olopoligadigaoma!”

<sup>20</sup> Ebema: na Yonete tabo idi ma kunu kolowimo, “Godokono Unu Duliynomololo dilukuliona ega:walo ebene alibolepi dubu ega:walo ebene woki awokalimipi ega:walo ebene epo epetapi bilibilinomo, modobola la: nekalakalala: mabu Ba:baloni duliynomolo a:kubadiga! Iyo, ebete la:tamo kawokawo temeteme dikalametanakiya, ebe mabuma: Godote ebetamo wiya ikame!”

<sup>21</sup> Ebe tetelo nale elawonomo nopodawa idi ebo uimo, ebete nokola mibonomo lawete kewa: kolomamo eba ba:idilolo negi, “Godote ma kunu ebene dowapata:lamena magumulo Ba:baloni kawo duliynomolo eba kubaimilo opamo da:peba:idilomene, epate ebe walo a:kuminakoma:na:.”<sup>22-23</sup> Iyo, Ba:baloni, a:imano kuba wiyate nanitabonomolo a:pemaiga, mabu opo duliynomolono inamabu dogodogopi magumulo a:imano bisnisi osiyodilolepiate dopopinomoma: eba eda:onalo, a:ma:le a:imano giwali osiyodilole tanalamo opo epo epetapi bilibilinomo a:da: masigiolenamiyata! Me mabuma: a:ma:godolo epate oale alapio tanalo ega:walo begube modo diyamo walo a:kolowioma:na:, a:ma:godolo atumu bibolo diyamo ega:walo tutele diyamo walo a:kemaimionakoma:na:! Iyo, mulo wokopi dubuno iyaiya tanalo ega:walo kamiyaleno bae osiyodilole tanalo ebe wokote a:ma:godolo kolopoligoma:na:, ebema: me wokono iyaiya diyamo atumu walo a:ka:pola:nama:na:! Ebene epate a:ma:godolo wuiki alo walo a:kuima:na:, ega:walo koite buwela:go kapiyama: eda: soliyomuno kalakala tanalote walo a:kitanamene.”

<sup>24</sup> Ebema: na Yonete gemo, Ba:baloni kawo duliynomolote me gabodo Godogodone kuba wiya elawe, mabu ebegodolo kuba osiyodilolepiate Godokono woki awokalimipi ega:walo ebene epo epetapi anakapulamenakiya, iyo, opo duliynomolo kawonomolo iba:te kebe tuputupupi gito danakapulamenakiya ebe epono kalimate ebegodolo bitana.

## 19

### *Ba:baloni Duliynomolono Kuba Wiyano Tanaloma: Unu Duliynomolo Epono Kalakala Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale Unu Duliynomololo epono taneba kawonomote kapimiya degeliya ibino tabo madodo kawonomo ma kunu olowimo, “Godoko nemoiala:! Igilo mula: tanalote ebegodone nemaigana, ebene amama tanalo kawonomo ega:walo elawo tanalo kawonomote ebegodolo ba:pola:na! <sup>2</sup> Ebene osiyodilole tanalo tuputupunomola! Ma kunu ebete Dubu Bilibili Kamiyaletamo kuba wiya nanitabonomolo ikame, mabu ebe Kawo Kamiyaletate kateneno kubakuba ubi tanalamo opo duliynomolo kawonomo eba kubaiminalo, ebene dowo magumulo Godokono wiya: wokopi gito anakapulamenaki.”

<sup>3</sup> Ebene nanitabokobi midipino taneba kawonomote kawonomamo walo na:kegeliya, “Godoko nemoiala:! Ba:baloni kawonomo duliynomolo elate denana, ebe ela temate uwomua: uwomua: tetelo unamo bodolonamene!”

<sup>4</sup> Ebene Godote ebene Kawo Elawodawano okoli bailo eba okolitalo, ebe tametamelo da:pola:niya ebe 24 Watowatopi ega:walo netewa-netewa Nopopi Iyanomo, iba:te kapimiya ibino ololo ebene agowa mabuamo eba alomolo ebe amamatelo negeliya, “Taula! Godoko nemoiala:!”

### *Sipi-Goeo Da:pesono Kamiyale Lawe Soliyomu*

<sup>5</sup> Ebema: Godokono Kawo Elawodawano okoli baine tabo madodo idite da:pi, nale ma kunu olowimo, “La: piyate aimano Godotamo tudila:olo ebene wiya: woko dosiyodilola:wenama, iyo, la: kawokawopi ega:walo egegepi, modobola la: bilibilinomate ebe nowalogala:!”

<sup>6</sup> Ebene epo bilibilinomate kapimiya degelitya ibino tabo madodo nale walo na:kolowimo, ebe tabo madodo elawonomola, obo kawonomote degenapenako ega:walo tobolote degewataole ebe diyamo kawokawonomo keba kunula:ka: eba kunula. Iba:te ma kunu geliya, “Godoko nemoiala:! Aimano Watodawa Kawonomote Kawo Elawodawama: eda:na! <sup>7</sup> Ebema: modobola a bilibilinomate kawonomamo eba kalakalaolo ebe unamo kadi-patiye! Nanitabola, Sipi-goeo Da:pesono Kamiyaletate iyalo olosiyodilote ibino kapiyama: eda: soliyomu tete emaiga, <sup>8</sup> ebene ebe soliyomuno tanaloma: Godote wadewade a:la:uwa:da:ole kaliku keyakeyanomo ebe Kamiyaletamo ikame.” Ebe tetelo na Yonete me tanalo iyatawimo, ebe pupuliono inamabu ebe nanitabokobi midipino iyaiya tuputupunomo osiyodilole tanalola.

<sup>9</sup> Ebema: Godokono nopodawate natamo negi, “A:ma: Bukamo tabo ma kunu nakulola:, Sipi-goeo Da:pesote ebene Kamiyala:go kapiyama: eda: soliyomu baiamo ka:pelaema: kebe epo keka:la:mioliyale, ebe epate nekalakalaima:na:!” Ebene ebete ebene tabo moga:melo walo na:kegi, “Me Godokono nani tabola.”

<sup>10</sup> Ebema: nale ebe amamatema: ebene agowa mabuamo gito gimo, ebete wiyasiya natamo negi, “Ao, a:ma: na akoamamanatena:la:! A:ma: ega:walo nanitabokobi midipi ekaki epetapi la: keba kunula:ka: na eba kunula, mabu na Godokono wiya: wokodawa idila, iyo, Ya:sute ebene nanitabo tanalo dawokalimiya, la:le ebe tanalo kodakodalo keba kunu kelawa:wenama, na eba kunu kelawenamo. Ebema: modobola a:ma: Godoko kapiya nama-mata:.” Ebe tetelo na Yonete me tanalo iyatawimo, a nanitabokobi midipiate Ya:sukono nanitabo tanalo awokalima: kebe tabo ka:kiyawaonakoma:, ebe tabo ebe Godokono woki awokalimipiate dopamo dawokaliminakiya ebe atu tabola.

### *Kawodawa Ega:walo Ebene Keyakeya Oso-goeo Ibino Tanalo*



11 Ebema: naimano balidite iyama: deda:onami ebe tanalote olopoligoa:no, Unu Duliyomolo eba alagilitanalo nale keyakeya oso-goeo ebene namutudawate ebe unulo okolitalo ebo uimo. Ebe oso-goeo namutudawano mailo ebe Nanitabo Tanalo Awokalimidawala, mabu ebete tuputupu gabodo epono tanalo eba anagilamelelamente kuba osiyodilolepiago ebo gowelaona. 12 Ebene balidi ela menamu eba wamoteomelo ebene watolo kawokawo elawodubuno kekelekele inamabu bilibilinomate pola:meni, ega:walo ebete ebene apa:mo ebene mailo iyalo akuloliya wiyasiya idawate ebe mailono tanalo iyatawa:. 13 Ebene epate ebe deka:minaka ebe mailo ebe Godokono Tabola, ega:walo ebete da:puli ebe ga:ga: kaliku kalimagonola, ebe kalima ebe piyate eba:go da:gowelaona ebe dubuno kalimala. 14 Ebema: Unu Duliyomolo epono gowelaopiate wadewade keyakeya kaliku pupulite ibino iyaiya taneba magumulo keyakeya oso-goeogoeo epetapi unulo eba ilukulitalo ebe Kawodawa ebo waloma:tiya. 15 Ebene ebene tabo magumune ilo gilite da:pemaigana ebete ebe gila:mo iyaiya opo epo kanakapulaemene, ega:walo ibi magumulo piyate ebetamo tudila:oa:no ebete auli gaubamo ibi kubanu kalukolemene, iyo, ebe tetelo ebete opo duliyomolono gala:ipi da:imi bilibilinomo uwatolete ii egediolenokola bobo magumamo iyalekete Elawodawanomo Godokono kawo dowanomo tanalamo ibi ebo ka:nimikitaolemene. 16 Ebene ebene ga:ga: kaliku unamo ega:walo ebene oke unamo ebete ebene mailo kawokalima: tabo iyalo ma kunu akuloliya, “Opo duliyomolo epono kawokawopi ega:walo elawodubu bilibilinomo magumulo na kapiya ebe Watodawanomola, ega:walo na kapiya ebe Kawo Elawodawanomola!”

17 Ebe tetelo nale nopodawa idite egela unulo utitalo ebo uimo, ebene ebete tobolo unudo da:wa:lubiaolenaka ebe olaola bilibilinomo eba ka:la:milo iba:tamo kawonomamo ma kunu gepati, “La: mamona:pelama:la:, Godokono soliyomu kawonomono bae ka:penaema:!” 18 Gowelao magumulo da:elaoma:na:, ebe kawokawo elawodubuno katene ega:walo ibino gowelaopino katene, ega:walo gowelaopino watowatopi epetapino katene ega:walo ibino oso-goeogoeono katene, modobola la:le ebe iyaiya katene na:penaliyala:!” Iyo, kebe epono igilate gowelao magumulo dolopoligoma:na:, ebe kawokawo epo ega:walo egege epo, mani woko dosiyodilona ega:walo wiya: woko dosiyodilona, modobola la:le pelama:wete ibi bilibilinomono katene na:popoliyadigaliyala:!”

19 Ebene nale Iya Ololonomo Inamabu ega:walo opo duliyomolo epono kawokawo elawodubu ibino gowelaopi bilibilinomago, iba:te eba paladabutitalo nale ebo ulaimo, iba:te ibino ubi tabo kapimiya ma kunu iyatiya, iba:te oso-goeo unulo dokoliti ebe Kawodawa ega:walo ebene gowelaopi iba:go ka:gowelama:. 20 Ebema: gowela magumulo Iya Ololonomo Inamabu ega:walo Godokono mailamo A:da: Elemasigi Tabo Kiyawaodawa, Kawodawate ibi netewapi igilolo uwatelete Saitanakono Ela Bobamo gito niyaleki, ebe Bobolo nibo elawonomote maigana. Nanitabola, dopamo ebe A:da: Elemasigi Tabo Kiyawaodawate Iya Ololonomo Inamabuno dopo apulo kawokawo anoano tanalo dosiyodilolenaki, ebete ebe tanalamo nanitabokobi midia:pi a:da: ebo masigilinaki, iyo, piyate Iya Ololonomo Inamabuno pukala uwatete ebene ida:da:li damamatenakiya ebe epate ebene kuba gabamo wabuga:ta tanalamo gito gudinakiya. 21 Ebema: Kawodawate oso-goeo unulo dokoliti, ebene tabone da:pemaigana ebe gila:mo ebete Iya Ololonomo Inamabuno waloma:tapi epetapi bilibilinomo gito anakapulami, ebene olaola bilibilinomate pelamete ebe gowelaopino

a:elao katene kawonomamo da:penaliya ebo wugulamoli.

## 20

### *Kapiya Taoseni Ulamano Tanalo*

<sup>1</sup> Ebema: naimano balidite iyama: deda:nami ebe tanalote olopoligoa:no, nale Unu Duliyomolone Godokono nopodawa idi piwisigitalo ebo uimo, ebena kotolo Idoko Bobo Kawonomono gigiyu ki ega:walo auli ale kawonomote pola:meni. <sup>2-3</sup> Ebe tetelo ebete Atelalo Kawonomo pelawa:digate auli ala:mo matuomeote Idoko Bobo Kawonomo magumamo neba:idilote gigiyu kiamo gito mopi, ebete kapiya taoseni ulama tetelo ebolo kokolinama:. Ebema: kapiya taoseni ulama magumulo Atelalote opo duliyomolo epo a:da: a:kemasigiolemene, wiyasiya ebe tete geyageyanomo dolopoligomene, Godote ebe Idoko Bobo Kawonomo magumune powolukote gopowai tete ebetamo walo ka:kikaemene ebete epo a:da: kemasigiolema:. Nanitabola, Atelalono mailo idi ebe Kubadawala, ebete opo wagilimi mabune kaluno ololamo dapawokaliya ebe dawala.

<sup>4</sup> Ebe tetelo na Yonete epetapiate kawokawo elawodubuno ilukuli bailo eba pola:nalo ebo ulaimo, Godote iba:tamo elawo iyalo ikalamiya opo duliyomolo epono tanalo kanagilamelelaema:. Ebene nale me tanalo iyatawimo, ebe epo ibi piyate Ya:sukono tanalo awokalimi mabuma: ega:walo Godokono tabo kiyawao mabuma: kuba osiyodilolepiate ibino igilo diyaililamiya ebe a:elaopino uliyanala. Iba:te Iya Ololonomo Inam-abu ebena ida:da:liago amamalatelema: ubia:noma: eda:iya, ebema: iba:te ebena pukala ibino wato kalilo ega:walo kotolo kuwatiya:. Ebe mabuma: Godote ibi igilamo walo kowadipalatelete iba:tamo elawo ebo ikalami, iba:te kapiya taoseni ulama magumulo ebena Alibodawa Kelisago kawokawo elawodubuma: keda:onama:. <sup>5</sup> Ebene me a:elaopiate igilamo demaimiya, ebe tanalo ebe Godokono dopo tetela ebete a:elaopi igilamo wadipalatelema:. Nanitabola, kapiya taoseni ulama tetete dolopoligomene, ebe tetelo ebete a:elaopi epetapi atumu igilamo walo ka:kowadipalatelemene. <sup>6</sup> Ebema: piyate Godokono igilamo dopamo demaimioma:na:, ebe epate kawonomamo kekalakalaoma:na:, mabu a:e tanalono elawote iba:tamo walo a:kitanamene, ebena iba:te kapiya taoseni ulama magumulo Kelisago kawokawo elawodubuma: eba eda:onalo ebe ega:walo Godoko bama-malatenakoma:na:.

### *Kawodawate Saitanatamo Kuba Wiya Ikame Tanalo*

<sup>7</sup> Ebene kapiya taoseni ulama tete dolopoligomene, Godote Saitanako idoko moto magumune owolukote ebetamo gopowai tete eba ikamelo, <sup>8</sup> ebete opo duliyomolo epono iyaiya opamo walo ka:tote ibi bilibilinomo a:da: eba nemasiolelo ebo kanadabulatelemene iba:te Godago ka:gowelaoma:. Ebe tetelo Saitanate kebe epo dadabulatelemene ibino opo bilibilinomo magumulo kawokawo mailo netewa ebe Goga ega:walo Magogala, ibino gowelaopi dubu bilibilinomoma: eba eda:olo lumagite ka:la:miolema: modoboa:, iyo, ibi kewa: kolomono wiyo keba kunula:ka: eba kunula. <sup>9</sup> Ebene nale ebe gowelaopino tanalo ma kunu uimo, iba:te opo epono iyaiya apune pelamolete, ebena kebe epo Godote nilakapolo kawonomamo demalagidilolena iba:te ebe tuputupupi ka:kubailaema: ibino kawo duliyomolo ebo panakopa:midiya. Ebe tetelo wiyasiya Godote ela kawonomo Unu Duliyomolone dapalibi ibi bilibilinomo ebo kubailami, <sup>10</sup> ebena potele ibi a:da: demasioleli Godote ebe Kubadawa elawamo lawa:digate Ela Bobamo gito neba:idili, ebe Ela Bobolo nibo elawonomote

maigana. Nanitabola, Godote ebene mailamo A:da: Elemasigi Tabo Kiyawaodawa ega:walo Iya Ololonomo Inamabu atu Ela Bobamo iyalo iyalekiya, ebene me tetene wagilimite uwomua: uwomua: tetelo ibi netewakapiyate egela ega:walo idoko bilibilinomolo kawokawo temetema:go bilukulinama:na:.

*Kawodawate Opo Duliyomolo Epono Tanalo Danagilamelelaemene Ebe Tanalo*

<sup>11</sup> Ebema: naimano balidite iyama: deda:onami ebe tanalote olopoligoa:no, nale Kawodawate ebene kawo elawodawano kawonomo keyakeya okoli bailo okolitalo uimo. Ebene ebene ololo apulo opo duliyomolo ega:walo tobolo unu iba:te ibino inamabu bilibilinomago a:ka:tuwa: olopoligiya, ebema: lumagite ibi walo a:kulaemene. <sup>12</sup> Ebe tetelo piyate dopamo da:elaiya, nale ebe epo bilibilinomo, kawokawo ega:walo egege atumu, iba:te Kawo Elawodawano okoli bai dopo apulo lamota:onalo ebo ulaimo. Ebene nopopiate buka epetapi eba a:ilamelo Kawodawate ebene Igilo Buka ebo a:iyamidi, ebe iyaiya buka magumamo ebete opo duliyomolo epono osiyodilole tanalo iyalo akulolelamiya. Ebe mabuma: ebete a:elaopino tanalo bilibilinomo me bukano iyaiya tanalamo tuputupunomolo ebo anagilamelelami.

<sup>13</sup> Ebene epo magumulo piyate ibino igilo kewa: kolomolo datutulateliya ega:walo piyate A:elaopino Duliyomolamo dopamo da:niwitiya, ebe a:elaopi bilibilinomate Kawo Elawodawano okoli baiamo pemaimiote, ebene ebete ibino iyaiya osiyodilole tanalo ebo anagilamelelami. <sup>14</sup> Ebema: ebe tanalo dolopoligi Kawodawate A:elaopino Duliyomolo kubaima: ebe duliyomolo Saitanakono Ela Bobo magumamo gito neba:idili, ebe Ela Bobo magumulo netewa teteno a:e tanalote nanitabolo bitana, <sup>15</sup> ebene a:elaopi bilibilinomo magumulo kebe epono mailo Igilo Bukalo pola:lamena:no, ebe epo bilibilinomo Kawodawate Saitanakono Ela Bobo magumamo atumu a:ka:niyaleki.

## 21

*Godokono Oli Unu Duliyomolo Ega:walo Oli Opo Ibino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nale oli Unu Duliyomolo ega:walo oli opo ebo ulaimo, mabu Godote dopamo dosiyodiloliya ebe tagala Unu Duliyomolo ega:walo tagala opo iba:te olopoligiya, ega:walo dopamo ditanami ebe kewa: kolomote atumu kitania. <sup>2</sup> Ebene nale Godokono oli Yelusalema kawo duliyomolote ebene Unu Duliyomolone ebegodone piwisigitalo ebo uimo, ebe duliyomolo ebe ebene wade-talena duliyomolonomola. Iyo, ebe oli Yelusalema duliyomolo a:la:uwa:da:lenomola, oli kamiyaletete ebene dubago kapiyama: eda:ma: soliyomu tetelo wadewade a:la:uwa:da:ole kaliku keba kunu ka:pupulinakole eba kunu. <sup>3</sup> Ebe tetelo Godokono Kawo Elawodawano okoli baine kawo tabo madodo idite da:pi, nale ma kunu olowimo, “Umu numita:la:, me tetene wagilimite uwomua: uwomua: tetelo Godokono okoli baite opo duliyomolo epagodolo bitamenamene, ebema: iba:te ebe kapiya eba amamatenalo iba:te ebene nani epoma: beda:onama:na:. <sup>4</sup> Ebene iba:te kebe iyaiya tanaloma: dopamo diiminakiya Godote ebe tanalo ibino wokine eba egebolelamelo ibino ipupu ebo kiya:da:olelaemene. Iyo, a:e tanalo ega:walo a:e lumagi liyame tanalo, tepo temeteme tanalo ega:walo ii tanalo, ebe tagala teteno mibomibo tanalo bilibilinomo Godote eba opoliyalelo epagodone nanitabonomolo kolopoligomene.”

<sup>5</sup> Ebe tetelo Kawodawate ebenu Kawo Elawodawano okoli bailo eba okolitalo tabo ma kunu gi, “Umu numita:la:, nale ka:lo tagala teteno tanalo bilibilinomo oliolinoma: walo na:ka:midilitamo!”

Ebenu Kawodawate ebenu tabo moga:melo na Yonetamo na:kegi, “Me tabo ebe nanitabonomola, iyo, epate nanitabokobi na:midima:na:, ebema: modobola a:ma: bukamo nakulola:.” <sup>6</sup> Ebenu ebete natamo walo na:kegi, “Taula, naimano woko bilibilinomo olopoligo! Na Wagilimi Mabula ega:walo na Uwomula, iyo, na Dopola ega:walo Walogabola! Ebema: obo kapete kebe epo dulamena, nale iba:tamo gito da:peka:ka:liyana ebe obo wiya:no kikalaemamo iba:te uwomua: uwomua: tetelo kigilonama:.” <sup>7</sup> Nanitabola, piyate ibino nanitabokobi midi magumulo wato kikopu de-laema:na:, naimano wadewade tanalo bilibilinomate iba:godolo uwomua: tetelo ba:pola:nama:na:, ega:walo iba:te na eba amamanatenenalo ibi naimano nani gudima: beda:onama:na:.” <sup>8</sup> Wiyasiya piyate nanitabokobi midi magumune kuba osiyodilolepino elawo tolemete dalautiya ega:walo piyate Ya:sugodone dolobila:iya, piyate kawokawo kuba osiyodilole magumulo daleyapima: deda:iya ega:walo epo epetapi gito danakapulamiya, piyate kamiyale pilo ega:walo dubu pilo osiyodilolepima: deda:iya, piyate giwali osiyodilole ega:walo ida:da:li amamalatele tanalo diyatawaiya, piyate iyaiya a:da: elemasigi tabo degeliya, Godote ebe iyaiya kuba osiyodilolepi bilibilinomatamo wiya eba ikalamelo Saitanakono Ela Bobamo gito ka:niyalekemene. Nanitabola, ebe Ela Bobo magumune nibo elawonomote maigana, ebema: ebe Bobolo ebe epono netewa teteno a:e tanalote bitana.”

### *Godokono Oli Yelusalema Kawo Duliyomolono Tanalo*

<sup>9</sup> Ebe tetelo kebe sebeni nopopiate Godokono kawokawo sebeni temeteme kalili opo duliyomolamo dopamo dapaliboliya, ibi magumulo kapiyate natamo pete ma kunu pegi, “Mamo na:pa:, nale Sipi-goeo Da:pesono oli Kamiyale a:ma: kiyatuimamota.” <sup>10</sup> Ebenu ebete Godokono Uliyanano elawamo na magatanete damela ununomamo danadipini, ebe tetelo Godokono oli Yelusalema kawo duliyomolote ebenu Unu Duliyomolone ebe-godone piwisigitalo ebete na ebo iyatunami. <sup>11</sup> Ebe duliyomolote Godokono alo kawonomago itani, ebema: ebenu wade a:la:uwa:da:le tanalo ebe wiya kawonomo gedo nokolate egelano alolo keba kunu ka:la:uwa:da:litanakole eba kunu. <sup>12</sup> Ebe duliyomolono kala kawonomola ega:walo ununomola, ebenu 12 gigiyu tetelo Godokono 12 nopopiate lamota:oniya iba:te ebe duliyomolo wadenomamo katila:nama:.” Ebe tetelo nale gigiyuno tanalo ma kunu ulaimo, Isalaela epono 12 guno mailo magumulo Kawodawate gigiyu idi unamo mailo idi iyatite, gigiyu idi unamo mailo idi kiyatite, eba kunu ebete ibino 12 guno mailo ebe 12 gigiyu unamo iyalo akuloliya. <sup>13</sup> Ega:walo ebe gigiyate ma kunu pola:ni, egelate da:pemaiganako eba apulo netewa-kapiya, ega:walo egelate da:niwisiganako eba apulo netewa-kapiya, ega:walo taidi apulo netewa-kapiya, ega:walo siyele apulo netewa-kapiya. <sup>14</sup> Ebenu ebe kawo duliyomolono kala ga:dimino 12 mabumabu ebe 12 nokola kawokawonomola, ebema: Sipi-goeo Da:pesono 12 Alibolepi Dubuno mailo magumulo, Kawodawate nokola idi unamo mailo idi iyatite, nokola idi unamo mailo idi kiyatite, eba kunu ebete ebenu 12 Alibolepino mailo ebe 12 nokola unamo iyalo akuloliya.

<sup>15</sup> Ebe tetelo natamo da:kiyawauti, ebe nopodawagodolo motono geyageya modobutino golodo gaubu nitameni, ebete ebe kawo duliyomolono uwomu ega:walo ebenu gigiyuno uwomu ega:walo ebenu kalano uwomu ka:nemodobulatolema:.” <sup>16</sup> Ebema: nopodawate ebenu gaubamo

ebe duliynomolono netewa-netewa apuapu ega:walo ebenu ununo modobo da:modobulateli, nale me tanalo uimo, ebe iyaiya modobuti kapiyanomola, iyo, modobuti idi 24 taoseni kilomitama: eda:te, modobuti idi 24 taoseni kilomitama: keda:te, Yelusalema kawo duliynomolote ma kunu itani. <sup>17</sup> Ebenu nopodawate kawo duliynomolono kala da:modobuti, nale ebenu ununo modobuti 60 mitama: dedi ebo uimo. Nanitabola, ebe tetelo nopodawate kawo duliynomolono tanalo da:modobulateli, ebenu osiyodilo tanalo ebe opo duliynomolo epate ibino kawokawo moto ega:walo duliynomolo keba kunu ka:modobulatolenake eba kunu.

<sup>18</sup> Ebenu nale kawo duliynomolono tanalo ma kunu uimo, kawo duliynomolono a:la:uwa:da:le wadenonomola mabu ebenu kala Kawodawate wade gedo nokolamo osiyodilote, ebenu kala magumulo da:pola:ni ebe iyaiya moto ega:walo gabo ebete wadenomo golodo inamabuamo osiyodiloliya, ebe golodo a:la:uwa:da:olenomola. <sup>19</sup> Ebenu kala ga:dimino 12 mabumabuno kawokawo nokolano tanalo ma kunula, ibi unamo nokola egege wiya kawokawonomo Kawodawate iyaiya alomoiya iba:te wadenomamo ka:la:uwa:da:olenama:. Ebema: kala ga:dimino dopo mabuno nokola ebe gedamo a:la:uwa:da:le nokolala, tete nokola idi ebe bubamo a:la:uwa:da:le nokolala, tete nokola idi ebe iyaiya tita:gonamo a:la:uwa:da:le nokolala, ega:walo tete nokola idi ebe iya gedo titi ida:mo a:la:uwa:da:le nokolala. <sup>20</sup> Ebenu kala ga:dimino mabu idino nokola ebe keyakeyamo a:la:uwa:da:le nokolala, tete nokola idi ebe kalimakalimamo a:la:uwa:da:le nokolala, tete nokola idi ebe ga:wiyamo a:la:uwa:da:le nokolala, ega:walo tete nokola idi ebe iya bubu titi ida:mo a:la:uwa:da:le nokolala. Ebenu mabu idino nokola idi ebe iya ga:wiyamo titi ida:mo a:la:uwa:da:le nokolala, tete nokola idi ebe iya gedo titi ida:mo a:la:uwa:da:le nokolala, tete nokola idi ebe iya kalimakalima titi ida:mo a:la:uwa:da:le nokolala, ega:walo uwomunomono nokola ebe iya bubu titi ida:mo a:la:uwa:da:le nokolala. <sup>21</sup> Ebenu duliynomolono 12 kawokawo gigiya unulo 12 kawokawonomo negegete ebo pola:ni, gigiya idi unulo kapiya negege kawonomo, gigiya idi unulo negege kawonomo idi, nale ibi eba kunu ulaimo. Ega:walo duliynomolo tulinomolo ditani, nale ebe gabo atumu a:kuimo, Kawodawate ebe gabo wade golonomo inamabuamo a:la:uwa:da:lenomoma: a:midiya.

<sup>22</sup> Nanitabola, Godoko ebe Kawodawa Elawonomola, ebema: ebete Sipi-goeo Da:pesago ebe kawo duliynomolono Talena Motoma: eba eda:onalolo, ebolo amamateno moto idi ketiya:. <sup>23</sup> Ega:walo ebe duliynomololo egelala saganala iba:te ka:pukuilamena:, mabu Godokono alo elawonomo kapiyate ebenu opo pukuimina, iyo, ebe pukuilame ebe Sipi-goeo Da:pesono alola. <sup>24</sup> Ebema: uwomua: uwomua: tetelo iyaiya opo epo bilibilinomate ebe kawo duliynomolono alolo eba wapata:lamenalo, ibino kawokawo elawodubate ibino wadewade inamabu bilibilinomo Kawodawatamo ka:pikameoma: ebamo bowadaenakoma:na:. <sup>25</sup> Nanitabola, egela kawonomolo ebe duliynomolono gigiya a:ilamelolo ba:pola:nama:na: epate magumamo ka:popila:oma:. Iyo, ebe duliynomolo atila:piate gigiya a:kempionakoma:na: mabu ebolo opote a:kidokonakomene, <sup>26</sup> ebema: uwomua: tetelo gabote bitanamene iyaiya opo epate ibino wadewade inamabu bilibilinomo ega:walo amama tanalo Kawodawatamo ebo ka:pikameonakoma:. <sup>27</sup> Wiyasiya numa:la:, ilipo tanalo osiyodilodawa ega:walo kuba daleyalo tanalo ega:walo a:da: tabo kiyawaodawa, iba:te ebe duliynomolo magumamo a:ka:popila:oma:na:. Kawodawate kebe epono mailo Sipi-goeo Da:pesono Igilo Bukamo iyalo dakulolelamiya, ibi kapiyate modobola ebamo opila:oma:.



## 22

### *Oli Yelusalema Kawo Duliyomolono Igilo Kolomo Tulino Tanalo*

<sup>1</sup> Ebema: naimano balidite iyama: deda:onami ebe tanalote olopoligoa:no, nopodawate Godokono uwomua: igilo kolomo tuli na ebo iyatunami, ebe obo ebe wade a:la:uwa:da:lenomola, Godoko ega:walo Sipi-goeo Da:peso ibino Kawo Elawodawano okoli baine eba pemaiganalo, <sup>2</sup> kawo duliyomolono tulituli gabodo neka:ka:liyana. Ebene ebe tuli bala apuapulo uwomua: igilo dikalamena ebe kewate nelamota:oniya, iba:te kapiya ulama magumulo 12 iyaiya sagana tetelo da:imi a:nolonaka ega:walo ibino paate opo duliyomolo epono iyaiya gabugabu ega:walo temeteme tanalo wadekobi midiolema: pola:na.

<sup>3</sup> Ebema: Godote kebe tanalo kubakubama: kegenale, ebe tanalo bilibilinomo magumulo idi kapiyate ebene oli Yelusalema duliyomolo kawonomolo a:kitanamene, iyo, ebe duliyomolote talenanomoma: eda:lo Godokono wokopiate ebe eba amamatenalo, ebe ega:walo Sipi-goeo Da:peso ibino Kawo Elawodawano okoli baite ebolo bitanamene. <sup>4</sup> Nanitabola, Godote ebe wokopino wato kaliamo ebene mailo dopamo akulolelamiya, ebema: iba:te ibino balidinomamo ebene ololo kuima:na. <sup>5</sup> Iba:te ebolo eba ilukulinalo Kawodawa Godoko kapiyate ibino aloma: eda:te opo kawonomote walo a:kidokonakomene, ebema: egelano alo ega:walo wuikino aloma: ubi walo alomoa:no, iba:te uwomua: uwomua: tetelo kawokawo elawodubuma: eba:go beda:onama:na.

### *Tete Tatalila Ya:sute Me Opamo Walo Ka:ka:pemene*

<sup>6</sup> Ebene na Yonete me tanalo bilibilinomo ulame dolopoligiya, ebe tetelo Godokono nopodawate natamo negi, “Me tabo apuapu nanitabonomola, iyo, kebe lumagite a:ma:godone dolowiomene, modobola ebete nanitabokobi na:midila:mene. Nanitabola, Kawodawa Godote ebene Uliyanano elawo ebene woki awokalimipiatamo keba kunu kapalibonakole, ebete eba kunu na opo duliyomolamo palibone, tete tatalila kebe tanalate demaimioma:na: ebe tanalo nale ebene wokopi ka:piyatulaema. <sup>7</sup> Iyo, Ya:sute epatamo ma kunu gena, ‘Umu numita:la:, tete tatalila na ka:pemamo!’ ”

Ebema: na Yonete gemo, piyate me buka apuapuno tabamo da:tudila:oma:na: iba:te nekalakalaoma:na:, mabu me tabo apuapu ebe Godote opo duliyomolamo maimioma: a diyatuamoi me ebe tanalola. <sup>8</sup> Iyo, na ebe Yonete, nale me iyaiya tanalo ulame tanalo ega:walo Godokono nopodawano tabo olowio tanalo dolopoligi, ebe tetelo nale ebe nopodawa amamatema: ebene agowa mabuamo gito gimo. <sup>9</sup> Wiyasiya ebete natamo negi, “Ao, a:ma: na ako-amamanatena:la:! A:ma: ega:walo Godokono woki awokalimipi ekaki epetapi la: keba kunula:ka: na eba kunula, mabu na Godokono wiya: wokodawa idila, ega:walo la:le me bukano tabamo keba kunu ka:tudila:wenama, na eba kunu ka:tuduwatanamo. Ebema: modobola a:ma: Godoko kapiya namamata:.”

<sup>10</sup> Ebene nopodawate ebene tabo moga:melo natamo walo na:kegi, “Tete tatalila me buka apuapuno tabo bilibilinomate nanitabolo kemaimioma:na:, ebema: modobola a:ma: me tanalo waminalea:no epo bilibilinomatamo nawokalilamiye. <sup>11</sup> Wiyasiya opo duliyomolo epo magumulo piyate kubakuba tanalo ega:walo daleyana tanalo dosiyodilolenaka, ebakobako epate woki iyakobi midilia:no opono uwomu teta:mo atu iyaiya tanalo nosiyodilolenakoma:na:. Ega:walo piyate tuputupu tanalo dosiyodilolenaka ega:walo wadewade talena magumulo dilukuliona, ebakobako epate kuba gabamo

wabuga:ta tanalamo gudia:no iba:te atu wadewade tanalo nosiyodilole-nakoma:na.”

<sup>12</sup> Ya:sute tabo ma kunu gena, “Umu numita:la; tete tatalila na ka:pemamo. Ebema: epate kebe iyaiya tanalo dosiyodilolenakiya, nale ebe tanalo dapanagilamelelaemo ibi bilibilinomatamo wiya modobolo ka:pikalamolemamo. <sup>13</sup> Na ebe Wagilimi Mabula ega:walo na Uwomula, iyo, na ebe Dopola ega:walo Walogabola!

<sup>14</sup> “Ebema: piyate ibino ga:ga:ga:ga: kaliku dukulaolenaka iba:te nekalakalaonama:na; mabu na Kawodawate iba:tamo modobo tabo kegemamo iba:te naimano kawo duliyo molamo nanitabo gigiyudo popila:ote, uwomua: igilo dikalamena ebe kewane da:imi ka:penaoma:.

<sup>15</sup> Wiyasiya gaagaa keba kunula:ka: ebakobako epo na Kawodawate ibi kodiyo bole mamamo iba:te naimano kawo duliyo molamo a:ka:popila:oma:na. Iyo, kubakuba ilipo tanalo osiyodilolepi ega:walo giwali iyatawaopi, piyate kamiyale pilo ega:walo dubu pilo dosiyodilolena, piyate epo epetapi anakapulaema: dowagelena ega:walo piyate ida:da:li damamalatelena ega:walo piyate a:da: tabo kalakalago da:kiyawaona, ibi bilibilinomo magumulo kapiya idite naimano duliyo molamo a:ka:popegamene.

<sup>16</sup> “Na ebe Ya:sutela, Da:ibidikono walonepi magumulo Kawo Ela-wodawama: deda:namo ebetela, iyo, na Gugi Mawelega mabu oli egela walo tetelo na kawonomamo a:pukuilamenakomo. Me mabuma: nale naimano nopodawa la: iyaiya sosi epatamo apalibomo, la:le me iyaiya tanalo wadenomamo kiyatawaema:.”

<sup>17</sup> Ebema: Sipi-goe Da:pesono Uliyanate ega:walo ebeno Kamiyale iba:te ebetamo kapimiya gelana, “Modobola, a:ma: na:pa:!”

Ebema: piyate me tabo dolowioma:na; modobola ibi bilibilinomate ebetamo atumu na:kegelama:na; “Modobola, a:ma: na:pa:!”

Ebene obo kapete kebe epo kulamenale, modobola iba:te ibino ubilo Sipi-goe Da:pesotamo na:pelaema:na; iba:te ebeno uwomua: igilo obo wiya:no ka:pa:nioma:.

### *Yonekono Uwomu Tabo Buka Ka:la:mioledawatamo Degiya*

<sup>18</sup> Nanitabola, me buka apuapuno tabo ebe Godokono ubilo opo duliyo molamo demaimioma:na: ebe tanalola. Ebema: piyate me tabo dolowioma:na; na Yonete iba:tamo kodakoda tabo ma kunu gemo, kebe lumagite me buka kubaima: iya tabo kapiya idi da:pesonomo me bukamo diyatimene, Godote ebetamo kuba wiya kikaemene, iyo, me buka magumulo kebe kawokawo temeteme tanalate opo duliyo molamo epatamo pelaema: dawokalilamena, Godote ebe atu temeteme ebetamo nanitabolo kapali-bolemene. <sup>19</sup> Ega:walo kebe lumagite me buka kubaima: iya tabo idi kapiya da:pesonomo me bukane gito degebolemene, Godote ebegodone ebeno wadewade tanalo kuwatemene, iyo, ebete Godokono talena duliyo molamo magumamo a:ka:nopegamene ebema: ebete uwomua: igilo dikalamena ebe kewano da:imi a:ka:nenamene.

<sup>20</sup> Ebema: Ya:sute me buka apuapuno tabo bilibilinomo nanitabonomoma: gelo ebe a:ka:tuwa: ma kunu gena, “Nanitabola, na tatalila ka:pemamo!”

Ebene na Yonete wiya tabo na:kegemo, “Taula! Kawodawa Ya:su, a:ma: na:pa:!” <sup>21</sup> Modobola Kawodawa Ya:sukono nilakapo tanalote ebeno epo bilibilinomagodolo nitanamene. Me ebe naimano tabo uwomula. Taula.

## **BUKA MAGUMULO DA:POLA:NA EBE KODAKODA TABONO MAGUMU TANALOLA**

**A:da:me** (Luk 3.38; Lom 5.14; 1 Kol 15.22,45; 1 Tim 2.13-14; Yud 1.14)

A:da:meko ebe Godote dosiyodiliya ebe dopo lumagila, ebete ebe damela tuwaeamo osiyodiliya. Me A:da:mete ebeno kamiyale Ibiago, iba:te epo bilibilinomo magumulo dopopima: ediya Godokono totomu tabo dadikamidaliya, iyo, ebe tetene wagilimite mammo pemaigi epo bilibilinomate atumu Godokono iyaiya totomu tabo owakalamiya.

### **A:ibalayama**

A:ibalayamako ebe Yu Epo bilibilinomono ewono nabiwila. Iyalo tetelo Godote ebe aniya, ebete ebeno nabiwino opo atepate oli opo ida:mo ka:toma:, mabu Godote ubi iyatiya ebe ega:walo ebeno walone gudi ibi bilibilinomate ebe oli opolo uwomua: tetelo kilukulionama:. Ebema: A:ibalayamate Godokono tabamo tuduwatate, Godote ebe diyatumiya ebete ebe mulu opamo gito tiya, me tetelo epate ebe opo Isalaela opoma: ka:minaka. Nanitabola, A:ibalayamate ebe opo kawonomono iyaiya duliyoumololo eba watatepaonatolo, ebeno a:e uwomuamo eba kunu okolinami.

Godote ebeno nopo A:ibalayamatamo ma kunu iyatiya, ebe ega:walo ebeno walone gudi ibi bilibilinomate Godokono ubi tanalamo nanitabolo da:tudila:onakoma:na:, ebete ibi ebeno ga:lima gudima: eba ka:la:minalo ibi wadenomamo ba:buiyalatelenamene. A:ibalayamakono kamiyaleno mailo Selatela, iba:te tete geyageyanomolo gudia:no okolionamiya, wiyasiya A:ibalayamate kadelenomoma: eba eda:nalo, Godokono anoano osiyodilo tanalodo Selate gudu Aisa:keko ebo alaimiya.

### **A:iga** (Gal 4.21-31)

A:igako ebe A:ibalayamakono kamiyale Selakono wiya: woko buwelela. Selate gudu alaimia:no ebete A:igako ebo aniya, ebete A:ibalayamago kapiyama: keda:ma:, ebene ebe gabodo A:igate A:ibalayamakono gudu Isamaelako alaimiya. Wiyasiya dopamo tetelo Godote nani tabo A:ibalayamatamo egiya, ebete ebetamo Selado gudu kikaema:, A:igagodonea:, iyo, ebete ubi ma kunu iyatiya, Selakono gudu Aisa:kekono walone gudi magumudo me opo epono Igilo Mula:dawa Ya:sute me opamo kapowakalama:.

Ebene Selate Aisa:keko alaimite, tete idilo ebete A:igatamo da:dowiya ebe mabuma: ebe iyabaiamo gito alibiya. Ebe tetelo A:igate ebeno gudu Isamaelago tote Sainai Ununomo Damelalo ebo nokolionamiya, ebe damela ebe Godote A:igakono walogabo apune Mosesetamo iyaiya totomu tabo dikameiya ebe atu damelala. Me mabuma: Polote Gale-siya bukalo a niyatuamena, A:igako ebe ulima: eda:na. Ma kunu piyate demalagidilona, iba:te Godokono totomu tabo bilibilinomamo eba tudila:onalalo Godote ibi ebeno tuputupupima: ebo keka:la:imene, ebe epo niyaniyala. Iba:te mibo woko magumulo eba ilukulionalo wade tanalo idi Godogodone a:kelawenama:na:, eba kunu wiya: woko buwele A:igate ebeno gudu Isamaelako mabuma: wade tanalo idi kelawiya:.

Wiyasiya Ya:sute kewa olotolowalo dosiyodiliya, piyate ebe tanalo nanitabokobi da:midina, ibino tanalo iyala. Godote ibino nanitabokobi midi tanalodo ibino kuba osiyodilole tanalo bilibilinomo degebole-laemene ibi kapiya ebeno nani tuputupupima: ebo keka:la:imene.

**A:loni** (Luk 1.5; Ali 7.40; Yu Epo 5.4; 7.11; 9.4)

A:loniko ebe Libaikono walone gudu idila, me Libaite Ya:ikobokono 12 dubu gudi magumulo idima: eda:nami. Yu epo bilibilinomo magumulo Godote A:loniko ebe lawiya ebete ebetamo kalimagono inamabu ikameo-dawama: keda:nama:, ega:walo ebe atu tetelo Godote negiya A:lonikono walogabo apune ebene walone dubu gudi kapiyate ebe atu woko Yu epo mabuma: bosiyodilonakoma:na:

Me A:loniko ebe Mosesekono naniwila. Yu epate Isipiti opolo mibomibo wiya: wokonomo osiyodilo magumulo eba ilukulionalo, ibi netewate Godokono elawamo ebe opone ibi ebo wagailiya iba:te Ka:inane opamo ka:tolaema:. Me Ka:inane opo ebe Godote dopamo A:ibalayamakono walone guda:tamo nanitabolo ikalaema: degiya ebe opola.

**Aisa:ke** (Ali 7.8; Lom 9.6-9; Yu Epo 11.9)

Aisa:keko ebe A:ibalayamako ega:walo Selako ibino gudula, Godote ibino nanitabokobi midi mabuma: anoano osiyodilo tanalodo iba:tamo ikalamiya, ebete dopamo tabo nanitabonomolo keba kunu kegiyale eba kunu. Me mabuma: Godokono igilo mula: tanalote me opo epo bilibilinomatamo Aisa:kekono walone gudido piya, iyo, Ya:sute Yu epo magumudo me opamo pawokaliya.

**Aisaya** (Ma:t 3.3; Ali 8.30; Lom 9.27-29)

Aisayako ebe Godokono woki awakalimipi magumulo wade woko-dawanomo idima: eda:nami. Aisayakono walogabo apune Ya:sute pete me opolo eba pokolinalo kebe tanalo bilibilinomate ebetamo da:pemaimioma:na:, Godote Aisayado ebe tanalo bilibilinomo dopamo awokalilamenaki.

**Ba:baloni Kawo Duliynomolo**

Ba:baloni ebe kawo duliynomolonomo idino mailola. Iyalo tetenomolo ebe duliynomolono opo epate Yu epago eba gowelaolo wato kikopu delawiya, ebe mabuma: iba:te Yu epo bilibilinomo epetapi ibino mulu opamo ebo magataliya, iba:te ebolo 70 ulama magumulo wiya: woko iba:tamo osiyodilolenamiya (Ma:t 1.11-12,17; Ali 7.43).

Awokala Bukalo Yonete Ba:baloni kawo duliynomolo idino tanaloma: gita, ebe Ba:baloni duliynomolo idi ebe ulila, ebe ulite Yoneko tetelo Loma kawo duliynomolono nanitabokobi midia:pino kuba osiyodilole tanalo ebe awokalimita, ega:walo ebe ulite ka:lo a tetelo me opo kawonomolo dilukuliona ebe nanitabokobi midia:pi bilibilinomono tanalo atumu ebe kawokalimita (Awo 14.8; 17.5; 18.1-24).

**Ba:ilama** (2 Pit 2.15; Yud 1.11; Awo 2.14)

Me dubu Ba:ilamagodolo kawo elawonomote nitanami Godokono iyaiya woki tanalo kawokalilamenakoma:, wiyasiya ebe mani kawonomamo eba malagidilonalo tete epetapilo Godotamo tuduwatama: ubia:noma: eda:naki.

Ebema: tete idilo Mowa:ba opo epate Yu epago gowelaoma: eba wangelitalo, ibino kawo elawodubute Ba:ilamatamo tabo ma kunu alibiya, ebete ebetamo pete ebene ololo apulo Godoko kanama: ebete Yu epo gowela magumulo elawoa:kobi ka:midilima:. Ebene Godote Ba:ilamako naniya, "A:ma: akotoala:," wiyasiya Ba:ilamate Mowa:ba epono kawo elawodubugodone kawo maninomo nelaemu malagidiliya, ebema: ebete Godokono tabamo tuduwata:no ebene donoki-goeo unamo okolite ebene to gabodo gito wagilimiya. Ebe mabuma: Godote ebene nopodawa ebo nalibiya, ebete gabo tetelo Ba:ilamako kananakapuima:. Ba:ilamate Godokono nopodawa umia:no, wiyasiya ebene donoki-goeote ebe umite

tole lawete ebamo gito nutiya. Ebene Ba:ilamate dowate donoki-goeo gaubamo danagalimiya, ebe tetelo Godote elawo donoki-goeotamo ebo ikamiya ebete Ba:ilamakono daedale woki tanaloma: lumagino tabo madodamo ebe kawiya kanama:

### **Da:ibidi**

Yu epono kawokawo elawodubu bilibilinomo magumulo Da:ibidiko ebe idila, ebene mailote elawodubu bilibilinomo epetapino mailo odoiliya. Ebene oli ape tetelo ebete Godoko kawonomamo nemalagidilonami, ebema: Godote ebe lawiya kawo elawodubu gobebobolo woko kosiyodilonama:. Da:ibidite Godoko amamateno oale bilibilinomo epetapi osiyodilote, ebe oaleno iyaiya tabono tanalo Sam Oale Bukamo ebo akuloliya.

Ebene Da:ibidikono walogabo apune kawo tanalonomote ma kunu pemaigiya, ebene walone gudi magumulo epono Igilo Mula:lamedawa Ya:sute ebo awakoliya, Godote ebene woki awokalimipi magumudo dopamo keba kunu ka:kiyawaonakile eba kunu (Ma:t 1.20-21; 22.41-45; Mak 12.35-37; Luk 2.4-7; 20.41-44; Lom 1.3; Awo 22.16).

**Elaya** (Ma:t 11.14; Mak 9.4; Lom 11.2; Ya:i 5.17)

Godokono woki awokalimipi magumulo Elayako ebe idila, Godote ebene kawokawo anoano tanalo epetapi osiyodilolenaki.

### **Epo Obama Waduba:midaole Tanalo**

Ya:suko tetelo Yonete Yodane kolomolo epo bilibilinomo epetapi obamo waduba:midaolea:no, ebete ibi nanaliya iba:te ibino iyaiya kubane olobila:ote obamo aduba:mida tanalo ebo kelaema:, mabu epo epetapiate ebe tanalodo kiyatawaoma:na: iba:te ibino ilukuli magumulo iyama: eda:ote Godotamo tudila:oma: ubi biyatinakoma:na:.

Ebema: ebe tetene wagilimite me teta:mo pemaiga, kebe lumagite Ya:suko nanitabokobi midite obamo aduba:mida tanalo delaemene, ebe tanalote me netewa-kapiya tanalo kawokalilaemene.

1) Ebe lumagite ebene iyaiya kuba osiyodilole magumune nanitabolo olobigi.

2) Ya:sute kewa olotolowalo ebene kuba egebolemete da:dodolomatilimiya, ebete ebe tanalo nanitabokobi na:midina.

3) Ebete ubi niyatina ebene okoli magumulo Godokono ubi tanalamo ka:tuduwatanama:.

### **Godoko Amamateno Iya Moto**

Yelusalema kawo duliyomololo Yu epono Godoko Amamateno Iya Motote na:enami, ebene iba:te iyaiya tete epetapilo Godotamo kalakala soliyomu kosiyodilolema: ebamo daladabutinakiya, iba:te ebe motolo kalimagono inamabu ega:walo nilakapo inamabu epetapi Godotamo ebo ikameonakiya.

Piyate Godoko amamatema: da:pelamenakiya, iba:te ebe motono kala magumumo opila:ote ebamo utitatama: talenate kitanamia:, wiyasiya Godotamo kalimagono ikameopi dubu kapiyate moto guamo opila:oma: modoboma: eda:onamiya, iyo, iba:te epo epetapi mabuma: moto guno Talena Bailo Godotamo woko ebo osiyodilonakiya. Ega:walo ulama bilibilinomo magumulo kapiya tetenomolo Godotamo kalimagono ikameopino Kawo Watodawanomote a:ka:tuwa: ebe motono Talena Bainomamo nopeganaki, Yu epo bilibilinomono iyaiya kuba osiyodilole mabuma: ebete Godokono ololo apulo kalima ebetamo ebo nikameonaki.

Ega:walo ebe motono kawo tanalonomo idi ebe ma kunula, dopamo ebene Talena Bai ega:walo Talena Bainomo tetenomolo kaliku ubilite



nitanami. Wiyasiya Ya:sute da:iya me kaliku ubilite bolegale unune wagilimite opamo gito piwisigiya, mabu Godote ubi niyatiya ebe osiyodilo tanalodo me opo epo ma kunu kiyatulaema:, ebete gabo a:iyamidiya ebena ololo apuamo Ya:suko nanitabokobi midipiate tolea:no ebetamo ka:pelamenakoma:.

### **Godoko Amamateno Sipi-goeogoeo Tama Awokowiamida Moto**

Yu epate 40 ulamamo bulu opolo eba latepaonatolo, Mosesete Godokono ubi tanalamo tuduwatate me Sipi-goeogoeo Tama Awokowiamida Moto ebo adipatiya, epate opo idine opo ida:moo dowapata:lamenama:na: me motote iba:godolo eba itanalo iba:te Godoko ebolo kamamatenakoma:.

Me moto gulo Talena Bai ega:walo Talena Bainomo na:pola:namiya, ebene Talena Bainomolo Godokono Talena Bokosete itanami. Godote ebena teni kawokawo totomu kebe kawokawo nokola netewa unamo kakuloliyale, Mosesete ebe nokola ebe Talena Bokose magumamo alomiya iba:te ebolo ka:pola:nama:. Ebene Yu epate Godoko Amamateno Iya Moto Yelusalemalo etea:no, iba:te dopamo ibino iyaiya kuba osiyodilole mabuma: me Sipi-goeogoeo Tama Awokowiamida Motolo kalimagono inamabu Godotamo ikameonakiya.

### **Godokono Kawokawo Nopo Netewa Ebete Epo Mabuma: Dalomiya**

Me opo epo magumulo kebe tetelo dubu netewate nopo idi diyatima:na:, dubu idite iditamoo wade tanalo idi osiyodiloma: eba analo, ebena namutudawate ebetamo wade tanalo idi osiyodiloma: atumu kakanamene. Wiyasiya Godokono nopo iyati tanalo eba kunua:, ebete epatamo kebe wade tanalo osiyodiloma: dowagelemene ebe a:ka:tuwa: kegemene. Godokono Bukate a niyatuamena ebete kawokawo nopo netewa ebena epo mabuma: alomiya.

Tagala Nopo – Godote Mosesetamo ebena totomu tabo eba ikameolo, ebete ebe naniya kebe epate ebe totomu bilibilinomamo nanitabolo da:tudila:anakoma:na:, ibi kapiyate ebena epoma: beda:anama:na:. Wiyasiya me opo epo niyaniyala, mabu ibi magumulo lumagi idigodolo elawo kitana: Godokono ubi tanalo bilibilinomamo eba tuduwatanalo ebena nani tuputupudawama: keda:nama: (Luk 1.72; Ali 3.25; 7.8; Gal 3.17; Yu Epo 9.1).

Oli Nopo – Walone tetelo Godote ebena nopo idi Ya:sudo atamo ma kunu awokalimiya, Ya:sute kewa olotolowalo epo mabuma: kebe tanalo kosiyodiliyale, piyate ebe tanalo nanitabokobi da:midima:na: Godote ibino iyaiya kuba osiyodilole tanalo bilibilinomo egebolelamete ibi ebena nani tuputupupima: ebo keka:la:imene (Ma:t 26.28; Mak 14.24; Luk 22.20; Lom 11.27; 1 Kol 11.25; 2 Kol 3.6; Yu Epo 7.22; 8.6-13; 9.15; 10.16,29; 12.24; 13.20).

**Godokono Nopopi** (Ma:t 4.11; Mak 1.13; Luk 1.8-20,26-38; 22.43; Ali 12.6-11; 27.23; Yu Epo 1.14)

Godokono nopopiate ebena Unu Duliyomololo ebena ololo apulo ilukuliona. Iyaiya tete epetapilo Godote ibi me opamo apalibolenako iba:te ebena epo eba buiyalatelenalo ibi kowalubilinama:, ega:walo tete epetapilo iba:te ebena epatamo ebena tabo ebe watenaka. Godokono nopopi ebe uliyanala, wiyasiya tete epetapilo iba:te me opo epono ololamo epatamo pemaimionaka.

**Godokono Talena Bokose** (Yu Epo 9.4; Awo 11.19)

Me bokose Yu epate Moseseko tetelo kewamo osiyodilote, wiya kawonomo golodo inamabuamo gito muliya, ebene Godote ebena teni kawokawo totomu tabo netewa nokolamo dakuloliya Mosesete ebe nokola,

ega:walo A:lonikono gaubu, ega:walo ma:na mailagono bae kalili me bokose magumumo ebo alomiya. Me bokosete Godoko Amamateno Sipi-goeogeo Tama Awokowiamida Motono Talena Bainomolo itanami, mabu ebe bokose ega:walo ebe magumulo da:pola:namiya ebe inamabuate talenanomoma: eda:onamiya, iyo, ebe inamabu magumudo Godote ebena kawo elawonomo ebena Yu epatamo awokaliminaki.

### **Godokono Totomu Tabo Ebete Mosesedo Epatamo Dikalamiya**

Iyatawaopiate negelana Godokono Bukalo dopo paibu buka ebe Mosesete Godokono iyaiya tabo dakuloliya ebe bukala, iyo, Godote Sainai Ununomo Damelalo kebe iyaiya totomu tabo ega:walo iyatulame tabono tanalo ebetamo dikameiya, ebe tanalo bilibilinomate me buka magumulo ba:pola:na.

### **Godotamo Kalimagono Ikameopi**

Moseseko tetelo Godote Yu epo magumulo dubu epetapi alomiya, iba:te epono iyaiya kuba osiyodilole bilibilinomo mabuma: ebetamo kalimagono inamabu ikameopima: keda:onama:. Me dubate dopamo Godoko Amamateno Sipi-goeogeo Tama Awokowiamida Motolo ibino woko osiyodilolenakiya, wiyasiya walone tetelo Yu epate Yelusalemalo Godoko Amamateno Iya Moto detiya, ebe tetene wagilimite Godotamo kalimagono ikameopiate woko ebolo osiyodilolenakiya.

Me dubu magumulo kapiyadawate ibino Kawo Watodawanomoma: eda:nami, ebete ulama bilibilinomo magumulo kapiya tetenomolo epo bilibilinomono kuba osiyodilole mabuma: gautu-goeono kalima Godotamo ikameonaki, ebete ibino kuba bilibilinomo egebolelamete ka:dodolomatililaema:

### **Guliki Epo Ega:walo Ibino Tabo**

Ya:suko tetelo me epate ibino Guliki opolo ilukulionamiya, ibino kawokawo duliynomolo netewano mailo ebe A:tenese ega:walo Kolinila. Me Guliki epono iyaiya sukulu wadewadenonomola, ebema: ibino iyatawate iyaiya opo epo epetapino iyatawa nanitabonomolo odoiliya. Me mabuma: opo kawonomolo epate Guliki epono mulo iyatulame ega:walo osiyodilole mabuma: ibi unamo nowadipalatenamiya.

Ega:walo me tanalo idila. Ebe tetelo opo kawonomolo piyate sukulamo da:tolamenakiya, iba:te buka ka:la:miole tanalo ega:walo tabo kiyawao tanalo ega:walo bukamo tabo akulole tanalo Guliki tabamo ebo iyatawaonakiya. Ebe mabuma: Godokono Buka magumulo da:pola:na piyate ebe iyaiya buka dosiyodiloliya, ibi bilibilinomo epetapiate ibino iyaiya tabo Guliki tabamo ebema: akuloliya.

### **Ibi (2 Kol 11.3; 1 Tim 2.13)**

Ibiko ebe dopo dubu A:da:mekono kamiyalela. Godote me opo kawonomo ega:walo iyaiya inamabu bilibilinomo eba osiyodilolelo, sikisi egela tetelo ebete A:da:meke osiyodilote, ebena ebe dubuno ala goa kapiya lawete Ibiko ebo osiyodiliya. Ebena Saitanate kaluno ololamo Ibitamo da:pemaigiya, ebete ebena a:da: elemasigi tabamo tuduwatate, Godote dopamo kebe da:imi naoma: talenama: kegiyale, Ibite ebe da:imi gito niya ega:walo ebete da:imi epetapi ebena awitamono ikamete, ebete atumu gito kenya. Eba kunu Godokono totomu tabo wakalamipi magumulo ibi netewapi ebe dopopima: ediya, ebema: ebe tetene wagilimite me opo epo bilibilinomate Godokono iyaiya totomu tabo atumu a:kowakalaminakiya.

### **Isalaela**

Isalaela mailo ebe Godote A:ibalayamakono walone gudu Ya:ikobotamo dikamiya ebe mailo idila. Walone tetelo Yu epate ibino Ka:inane opotamo

me atu Isalaela mailo ebe kikamiya, ebema: ka:lo me opo epate ebe opo me mailamo ka:minaka.

### **Isipiti**

Isipiti opo ebe Isalaela opo niyakabolo ditana ebe opo idila. Dopamo tetelo Yu epate me Isipiti opolo 400 ulamamo eba ilukulionalo wiya: wokopima: eda:onamiya (Ali 7.30-38).

**Iso** (Lom 9.13; Yu Epo 11.20; 12.16-17)

Aisa:kekono nedewale dubu gudi Ya:ikoboko ega:walo Isoko magumulo Isote naniwima: eda:nami. Wiyasiya tete idilo ebete ebene bae kape kopoliyama:, kapiya teteno bae ekawigodone eba lawelo ebene dopo guduma: eda: tanalo kawo tanaloo:ma: gelo ekawitamo gito ikamiya.

**Ka:inane** (Ali 7.4-16,44-45; 13.19-20; Ya:i 2.25)

Ka:inane opo ebe Godote Yu epatamo ikalaema: ibino ewono nabiwi A:ibalayamatamo nanitabonomolo degiya ebe opola.

### **Kawo Elawodubu Elodi**

Godokono Bukalo netewa-netewa kawokawo elawodubate Elodi mailamo dilukulionamiya, ale ebe dubuno tanalo ma kunu ulamenama:

1) Ya:sute dawokaliya ebe tetelo dopo Elodite Yudiya opono kawo elawodubuma: eda:nami (Ma:t 2.1-22; Luk 1.5).

2) Ya:sute Godokono tabo anoano osiyodilole tanalago da:kiyawaonatiya ebe tetelo Elodi idite Ga:lili opolo kawo elawodubuma: eda:nami. Me Elodite Elodiyasiko ebene kamiyalema: pilo gabodo lawete, ebene ebete Yoneko obamo waduba:midaoledawano wato gito itamidamiya, ega:walo Ya:sukono a:e tetelo Paeletete ebe me Eloditamo alibiya ebete ebene tanalo kanagiyamidaema: (Ma:t 14.1-12; Mak 6.14-29; Luk 23.6-12).

3) Ya:sukono alibolepi dubate ebene sosi wagilima: iyaiya opo epetapilo woko dosiyodilolenamiya ebe tetelo Elodi idite kawo elawodubuma: eda:nami. Me Elodite Yonekono naniwi Ya:imesikono wato itamidamete, ebene ebete Pitako anakapuima: atumu kowageliya (Ali 12.1-23).

4) Ega:walo Elodi idi ebene mailo idi ebe Agilipatela, ebete gabamanino tabo anagiyamida bailo Polokono iyaiya tabo olowiya (Ali 25.13-26.32).

### **Keliso / Mesaya**

Epate Ya:suko me netewa mailamo ka:minaka. Keliso mailo ebe Guliki epono tabo mailola, ega:walo Mesaya mailo ebe Yu epono tabo mailola, wiyasiya ibino magumu kapiyala, ebe magumu ma kunu itana, 'Godokono Alibodawala.'

### **Kewa Olotolowalo Lumagi Tupuguimi Tanalo**

Ya:suko tetelo Loma gabamanino osiyodilo tanalo ma kunula. Kebe tetelo lumagi idite kawo kuba tanalonomo dosiyodilomene, keba kunula:ka: ebete dowo magumulo lumagi idi danakapuimene, ebe tetelo iba:te ebene kuba wiya ikaema: kewa olotolowamo eba tupuguimilo ebene kotamo ega:walo agowamo ikoko kanagilamolema:na:. Ebene iba:te ebe kewa lawete damelamo gito kaima:na:, epate ebe eba umitalo ebete kawo temetema:go ebe osiyodilo gabodo eba kunu ka:ema:.

**Libai** (Yu Epo 7.5,9,10)

Ya:ikobokono 12 dubu gudi magumulo Libaiko ebe idila. Dopamo Godote Moseseko aniya, ebe Amamateno Sipi-goeogoeo Tama Awokowiamida Motolo me Libaikono gu dubu kapiyate epo epetapi mabuma: woko kosiyodilolenama:. Walone tetelo Yu epate Godoko Amamateno Iya Moto Yelusalemalo detiya, Libai gu dubate atumu ibi a:ka:tuwa: woko ebolo osiyodilolenakiya.

### **Loma Kawo Duliomolonomo**

Ya:suko tetelo Loma duliyoumolo ebe Itali opo epono kawo duliyoumolonomola, ibino kawo elawodubunomo Sisako ebenu gabamani wokopiago me duliyoumololo ilukulionamiya. Me Loma kawo duliyoumolone Sisate ebenu gowelaopi iyaiya opo epetapi bilibilinomamo alibolenaki, iba:te ebe opolo eba nilukulionalo epagodone ta:kese mani kawonomo uwatelamete ibino gabamanino iyaiya woko kosiyodilolenama. Ebe mabuma: ulama epetapi bilibilinomolo Yu epate ubi niyatinamiya Loma epono gowelaopi ibino Isalaela opone elawamo ka:na:ma:latelema:, wiyasiya iba:te ka:modobonamia.

**Lota** (Luk 17.28-33; 2 Pit 2.7)

Lotako ebe A:ibalayamakono ekawino gudula. Ebene Godote A:ibalayamatamo oli opo ikaema: nanitabonomolo degiya, ebete ebe mulu opo uima: eba tolo, Lotate ebenu nabiwi atepate eba:go gito tiya. Iba:te ulama epetapilo ebe oli opolo eba nokolinalo, tete idilo Lotate ubi ebo iyatiya A:ibalayamako atepate Sodomu kawo duliyoumolamo tote ebo ka:nokolinama. Wiyasiya ebe duliyoumololo epate kawokawo kuba bilibilinomo epetapi dosiyodilolenakiya, ebema: Lotate ebenu tepo magumulo miboma: eda:nami. Ebene Sodomu duliyoumolo epono kuba osiyodilole mabuma: Godote ebe duliyoumolo elamo kubaima: nopu ebo iyatiya, wiyasiya ebe tanalo osiyodiloa:no ebete ebenu nopopi dopamo paliboliya Lotako ega:walo ebenu moto epo ibino igilo ka:pa:mula:lelaema.

**Mekisadeka – Godotamo Kalimagono Ikameopino Kawo Watodawa**  
(Yu Epo 5.1-7.28)

Wagilamole Mabu Buka 14.8-20 me tanalote a niyatuamena, kapela opo epo epetapino gowelaopiate Ka:inane opono Sodomu duliyoumolamo da:pelamiya, iba:te A:ibalayamakono ekawino gudu Lotako ega:walo ebenu moto epo ega:walo ibino inamabu bilibilinomo puwatete, ibino opamo tolame gabodo walo gito kowagilimiya. Ebene A:ibalayamate ebenu woko dubu bilibilinomago diya gabodo ibi da:na:ma:taliya, iba:tamo nemaimiote gowelao tanalo eba nosiyodilutalo, wato kikopu nelawete Lotako ega:walo ebenu moto epo ibino igilo ebo mula:lalamiya. Ebema: ebete gowelao tanalone eba olowamitalo, gabo tetelo Mekisadekate eba:go ebo alugiya, me dubu ebe Godotamo kalimagono ikameopino kawo watodawanomo idila. Ebe tetelo Mekisadekate Godoko aniya, ebete A:ibalayamako uwomua: tetelo ebe wadenomamo kowalubinakoma:, ebenu ebe atu tetelo A:ibalayamate gowelao magumulo duwatiya, ebete ebe inamabu bilibilinomo anagilamotele epetapi teni apuapu magumune kapiya idi lawenaki, kapiya idi lawenaki, Mekisadekatamo ebo ikameiya. Nanitabola, walone tetelo Yu epate ebe atumu ibino pali inamabu bilibilinomo magumulo teni epetapi magumune kapiya idi lawenaki, kapiya idi lawenaki, Godotamo kalimagono ikameopiatamo eba kunu ikalamolenakiya.

Mekisadekakono walogabo apune Godote Yu epo magumulo A:loniko ega:walo Libai gu dubu epetapi uwatiya iba:te ebetamo kalimagono ikameo woko kosiyodilolenama:, wiyasiya ale me tanalo numitama:, Libaikono ewono nabiwi A:ibalayamate ebenu wokilo Mekisadekako unamo eba adipatelo ebetamo inamabu nilakapolo gito ikameiya. Ebe tanalone a iyatawala Godotamo kalimagono ikameopi bilibilinomo magumulo Mekisadekakono elawote wokopi epetapi bilibilinomono elawo odoliliya, iyo, ibi magumulo ebe dopodawanomola. Me ebe mabuma: Yu Epono Buka osiyodilodawate a niyatuamena, Mekisadekate Godotamo kalimagono ikameopino watodawama: keba kunu keda:namile, ka:lo

Ya:sute ebe atumu a nanitabokobi midipiatamo ebako wokodawama: keda:na. Iyo, ebete me opo epono iyaiya kuba egebolelaema: ebenu kalima Godotamo dikamiya, ebe kalima ikame tanalono elawote wokopi epetapino kalima ikame elawo nanitabonomolo odoiliya.

### **Mosese**

Yu epate Isipiti opolo wiya: wokopima: eba eda:onalo, Godote Moseseke ebo lawiya ebete ibi ebe temeteme opone wagailite ibino Ka:inane mulu opamo kemagatalema:. Iba:te ulama epetapilo bulu opolo latepaoago eba tolamenalo, Godote ibino igilo ka:mula:lalamanakoma: Mosesedo iyaiya anoano tanalo epetapi osiyodilolenaki. Ega:walo Godote ebenu ebenu iyaiya totomu tabo ega:walo iyatulame tabo bilibilinomo Yu epatamo ikalamiya. Ebe tetelo Godote a:ka:tuwa: ebenu teni kawokawo totomu tabo netewa dilidili nokolamo akulote Mosesetamo gito ikamiya, wiyasiya totomu tabo epetapi ega:walo iyatulame tabo epetapi Mosesete Godokono Bukano dopo paibu buka eba osiyodilolelo ebenu ebo akuloliya.

**Nowa** (Ma:t 24.37-38; Luk 17.26-27; Yu Epo 11.7; 1 Pit 3.20; 2 Pit 2.5)

Nowako tetelo me opo epate kawokawo kuba bilibilinomo eba osiyodilolenalo, Nowako kapiyate tuputupudawanomoma: eda:nami. Ebenu: Godote Nowako naniya, ebete epono kuba osiyodilole mabuma: ulama obo me opo kawonomamo kapalibomene ibi bilibilinomo kopoliyadigalema:. Ebenu Nowate Godokono tabamo eba tuduwatalo kawo penomo ebo osiyodiliya, ebe ega:walo ebenu moto epo ega:walo digilona ebe inamabu epetapi ibino igilo ka:mula:lalaema:.

### **Pa:lisi Tanebapi**

Buka ka:la:mioledawa, a:ma: Pa:lisi tanebapino tanalo iyatawama: dowagela:emene, modobola a:ma: Ma:t 3.7, Mak 2.16, Luk 5.30, ega:walo Yon 1.24 tetelo da:pola:na ebe iyaiya walubi tabo ebo nulamiye.

### **Sa:diyusi Tanebapi**

Buka ka:la:mioledawa, a:ma: Sa:diyusi tanebapino tanalo iyatawama: dowagela:emene, modobola a:ma: Ma:t 3.7, Ma:t 22.24, Mak 12.19, ega:walo Luk 20.28 tetelo da:pola:na ebe iyaiya walubi tabo ebo nulamiye.

**Sainai Ununomo Damela** (Ali 7.30; Gal 4.24-25; Yu Epo 12.18-21)

Sainai Ununomo Damela ebe Mosesete 40 egelamo eba nokolilo Godote ebenu ebenu totomu tabo bilibilinomo dikameiya ebe damelala.

### **Saitana**

Saitanako ebe kubakuba uliyana bilibilinomono watodawala. Dopamo ebenu Unu Duliyomolono nopodawa idima: eda:nami, wiyasiya ebenu Godotamo tuduwatama: ubia:noma: eda:te eba:go gowela ebo wagilimiya. Me tetelo ebenu me opolo a:da: elemasigi woko eba osiyodilonalo, epate Godokono totomu tabo wakalaima: ebenu ibi kuba gabamo wabuga:tale gabodo magatalenako.

**Sela** (Lom 4.19; 9.9; Gal 4.21-31; Yu Epo 11.11-12; 1 Pit 3.6)

Selako ebe A:ibalayamakono kamiyaalela. Ebenu ulama bilibilinomo epetapilo ta:li kamiyaalema: eda:nami, wiyasiya ebenu Godoko nanitabokobi midi tanalodo gudu Aisa:keko ebenu awitamomo ebo alaimiya.

### **Sisa - Loma Duliyomolo Epono Kawo Elawodubunomo**

Buka ka:la:mioledawa, a:ma: Sisakono tanalo iyatawama: dowagela:emene, modobola a:ma: Ma:t 22.15, Mak 12.13, Luk 20.20, ega:walo Yon 19.12 tetelo da:pola:na ebe iyaiya walubi tabo ebo nulamiye.

### **Ya:ikobo**

Aisa:kekono nedewale dubu gudi Ya:ikoboko ega:walo Isoko magumulo



Ya:ikobote ekawima: eda:nami. Wiyasiya tete idilo Isote ebene bae kape kopoliyama:, bae ebene ekawi Ya:ikobogodone eba lawelo ebene dopo guduma: eda: tanalo kawo tanaloo:ma: gelo Ya:ikobotamo gito ikamiya. Nanitabola, Godote dopamo Aisa:kekono nabiwi A:ibalayamatamo tabo ma kunu giya, ebete ebene walone gudi magumulo me opo epo bilibilinomo kowalubilinama: ibino Igilo Mula:lelamedawa kadipatemene. Isoko ebe dopamo dawokaliya ebe gudula, wiyasiya ebene tepo magumuno kuba woki mabuma: Godote ebe balamo eba iyatilo ebene ekawi Ya:ikoboko ebo lawiya, ebema: walone tetelo Ya:sute Ya:ikobokono walone gudi magumune pawokaliya, Isokono walone guda:godonea:.

Ya:ikobokono mailo idi ebe Isalaelatela. Yu epono 12 gu tanebapiate ebene 12 dubu guda:godone maimiya.

### **Ya:sukono Mailo**

Ya:su mailo magumu ebe Igilo Mula:ledawala. Godokono Bukate Ya:sukono iyaiya mailo epetapi ma kunu awokalilamena – Keliso, Mesaya, Godokono Gudu, Epono Naniwi, Godokono Sipi-goeo Da:peso, ega:walo Da:ibidokono A:la:mu.

### **Ya:sukono 12 Alibolepi Dubu** (Ma:t 10.1-4; Mak 3.13-19; Luk 6.12-16)

Ebene waloma:tapi bilibilinomo magumulo Ya:sute kapiyakapiya dubu uwatete ibi ebene alibolepima: ka:la:miya. Ebene netewa-kapiya ulama magumulo iba:te eba:go eba ilukulinalo, Godote Kawo Elawodawama: deda:na ebete ebe tanalono iyaiya tanalo ibi ebo iyatulamenaki, ega:walo ebete kewa olotolowalo a:ete netewa-kapiya egelalo walo da:kemaigiya, me dubate ibino balida:mo umiya. Ya:sute me opono iyaiya opamo ibi ebema: aliboliya, iba:te ebene Wade Tabo epatamo eba nikiyawaolo ebene nani sosi kapiya ebolo ka:nowagilima:.

Godokono Bukate Poloko ega:walo Banabasiko ega:walo nanitabokobi midipi epetapi ibi atumu alibolepima: keka:la:mina, mabu Ya:sute ibi atumu iyaiya opo epetapilo ebene sosi ka:nowagilima: aliboliya.

### **Yaona** (Ma:t 12.39-41; 16.4; Luk 11.29-32)

Yaonako ebe Godokono woki awokalimidawa idila. Tete idilo Godote ebe Niniba kawo duliynomolamo alibiya, ebete ebene tabo ebo ka:nikiyawaoma:, wiyasiya Yaonako ubia:nola. Ebe mabuma: ebete kawo palai peamo olote mulu opo ida:mo to ebo wagilimiya. Gabo tetelo Godote ebene tuduwata: mabuma: kawo awanomo dapalibiya, pe wokopiate Yaonakono kuba osiyodilo tanalo iyatawaote ebe obamo gito ba:idiliya. Wiyasiya Godote Yaonako eba nilakapotelo kawo namo ebe palibiya, namote ebe alopoga gabodo ebene igilo ka:mula:ema:. Ebene netewa-kapiya egelalo namote Yaonako kewa: kolomono balamo da:nedalopeamidiya, ebete woki iyakobi midite Niniba duliynomolamo gito tiya ebolo Godokono tabo ka:nikiyawaoma:.

### **Yelemaya** (Ma:t 2.17; 16.14; 27.9)

Yelemayako ebe Godokono woki awokalimipi magumulo wade wokedawanomo idima: eda:nami. Yelemayakono walogabo apune Ya:sute pete me opolo eba pokolinalo kebe tanalo bilibilinomate ebetamo da:pemaimioma:na:, Godote Yelemayado ebe tanalo bilibilinomo dopamo awokalilamenaki.

### **Yosuwu** (Ali 7.45; Yu Epo 4.8)

Mosesete da:iya ebe tetelo Godote Yosuwako ebe lawiya, ebete Yu epo Ka:inane opamo magatalete ebe opono iyaiya epagodone gowelao gabodo ka:nelaema:. Ebene iba:te gowelao magumulo wato kikopu delawiya, ebe tetelo Yosuwate ebe opo Yu epono 12 gu tanebapiatamo gito

anagilamoliya. Nanitabola, ebe opo ebe Godote A:ibalayamakono walone guda:tamo nanitabolo ikalaema: degiya ebe opola.

### **Yu Dubuno Tama Itamida Pukala Iyati Tanalo**

Yu epono osiyodilo tanalo ma kunula, ibino dubu guda:te awokalaote a:iti egela eba ilukulilo, iba:te tama itamida pukala iba:tamo ebo alomola-menaka, mabu iba:te me osiyodilo tanalodo Godokono iya eponomoma: deda:ona ebe tanalo awokaliminaka. Nanitabola, Godote A:ibalayamako aniya, ebe ega:walo ebene walone guda:te ebe tanalo uwomua: tetelo ibino dubu guda:tamo kosiyodilonakoma:.

Ya:sukono alibolepiate ebene Wade Tabo iyaiya opolo kiyawao dowag-ilimiya, ebe tetelo sosi epo magumulo Yu dubu epetapiate negelanakiya, Yua:pi nanitabokobi midipi dubu magumulo potele tama itamida pukala lawea:no ebete Godogodone igilo mula: tanalo a:kelaemene. Ebema: Polote ebe Yu dubago kawonomamo eba apaminatoulo negenaki, Ya:sute epono kuba egebolelaema: a:ete walo da:kemaigiya, lumagite ebe tanalo nanitabokobi eba midinalo igilo mula: tanalo ebo kelaemene. Iyo, nanitabola, Godote lumagino nanitabokobi midi tanalo kapiyado ebene tepo magumu iyakobi ka:midimene, unu tama osiyodilo tanalodoa:.

### **Yu Epo**

Yu epo ebe A:ibalayamakono gudu Aisa:keko ebene gudu Ya:ikobogodone demaimiya ebe epola, wiyasiya piyate A:ibalayamakono gudu idi Isamaelagodone demaimiya me opo epate ibi Yu epoma: keka:la:mina:.

### **Yu Epono Balidi Ibilamole Moto**

Yu epono iyaiya duliynomololo ibino balidi ibilamole motote belam-ota:ona. Ebene ibino wokoa: talena egelalo iba:te ebe motolo danal-adabutinaka, iba:te ebolo Godoko eba amamatelo ebene Buka tabo eka:la:miolenaka, ega:walo ebe iyaiya tabono magumu tanalo iyatula-menaka, ega:walo oale Godotamo alapionaka, ega:walo towetowe tabo ebetamo owadipalatenaka.

Ya:suko tetelo Yu epate ibino balidi ibilamole motolo tanalo idi ma kunu a:kosiyodilonakiya, iba:te tete epetapilo epono iyaiya tanalo ebo anagilamelelamenakiya.

### **Yu Epono Wokoa: Talena Egela**

Godokono Bukate a ma kunu iyatuamena, ebete sikisi egela magumulo me opo ega:walo opono iyaiya inamabu osiyodilote, sebeni egelalo ebete ela amiti. Ebe mabuma: Moseseko tetelo Godote Yu epatamo totomu ebo ikalamiya, iba:te atumu sikisi egela magumulo ibino iyaiya woko osiyodilote, sebeni egelalo iba:te ela eba amiutalo ebe ebo namamate-nakoma:na:.

Ebene Ya:suko tetelo Yu watowatopi epetapiate me wokoa: talena egelano tanaloma: iyaiya pukala bilibilinomo epetapi epatamo eba alomolo, piyate ibino pukala wakalamipima: deda:onamiya, iba:te iba:tamo ebema: dowaonamiya. Iyo, wokoa: talena egela idilo Ya:sute temetema:go kamiyale wadekobi da:midiya, ebema: Yu watowatopi epetapiate ebe kawiya aniya, ega:walo wokoa: talena egela idilo ebene waloma:tapiate kono pali magumudo eba tolamitalo kapiyakapiya kono kubakubadopo da:nowakalamiya, Yu watowatopiate ibino osiyodilo tanalo kubama: ebo geliya.